

# IRUHIN ANANIN BARAEN



The New Testament in the Coastal Arapesh dialect of the  
Bukiyip language of Papua New Guinea

**IRUHIN ANANIN BARAEN**  
**The New Testament in the Coastal Arapesh dialect of the Bukiyip language of Papua New Guinea**

**Nupela Testemen long tokples Coastal Arapesh long Niugini**

copyright © 2003 Wycliffe Bible Translators, Inc.

Language: Coastal Arapesh (Bukiyip)

Dialect: Central

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-05-07

---

PDF generated using Haiola and XeLaTeX on 11 Nov 2022 from source files dated 8 May 2021  
d1ef5a4e-3e53-5ef0-80e4-4cd8770ca6e6

## Contents

MATYU . . . . .	1
MAK . . . . .	72
LUK . . . . .	116
JON . . . . .	188
APOSEL . . . . .	242
ROM . . . . .	307
1 KORIN . . . . .	341
2 KORIN . . . . .	373
GALESIA . . . . .	394
EFESUS . . . . .	405
FILIPAI . . . . .	417
KOLOSI . . . . .	425
1 TESALONAIKA . . . . .	434
2 TESALONAIKA . . . . .	441
1 TIMOTI . . . . .	445
2 TIMOTI . . . . .	456
TAITUS . . . . .	463
FILEMON . . . . .	468
HIBRU . . . . .	470
JEMS . . . . .	496
1 PITA . . . . .	505
2 PITA . . . . .	514
1 JON . . . . .	520
2 JON . . . . .	529
3 JON . . . . .	531
JUT . . . . .	533
REVELESEN . . . . .	537
BAUGENYUM ENEN BARAEN	576

## Iruhin Ananin Yopinyi Baraen Matyu Nenyem Iri

*Banenyi Baraen Um Matyu*

- 1:1—2:23 Jisas ananim yamehem  
 3:1-12 Jon nenek baptaisumesh iri  
 nakripesh Jisas ananin baraen  
 3:13—4:11 Jisas nenek baptais aria Sa-  
 tan nanaki nakwiraehan um nunek  
 yoweishi inahos  
 4:12—18:35 Jisas nanak shokugi naho-  
 big Galili nakripesh Iruhin ananin  
 yopinyi baraen aria nagabe ene-  
 heneh arugeh henekesh iri yopish  
 19:1 —20:34 Jisas nakutukuk Galili  
 nanak shokugi nahobig Judia  
 nakripesh Iruhin ananin yopinyi  
 baraen  
 21:1 —27:66 Jisas nanak Jerusalem  
 nakripesh baraen, aria eshesh shen-  
 eman baraen aria shenek nyiliman  
 rowogin kruse  
 28:1-20 Shabo Jisas nagok aria ta naki-  
 tak nape nekesh mour ananish dis-  
 aipel ba iyoh aria nato iruhw heven

*Jisas Kraish Ananish Popehesh Yame-  
hesh Esheshish Nyeiguhw  
(Luk 3:23-38)*

- <sup>1</sup> Jisas Kraish ananish popehesh yame-  
hesh esheshish nyeiguhw douk eshudok.  
 Jisas ananin yamenen Devit. Devit ananin  
 yamenen Abraham.  
<sup>2</sup> Abraham ananin nuganin Aisak.  
 Aisak ananin nuganin Jakob.  
 Aria Jakob nabuki Juda nani ananim  
 owarhim.  
<sup>3</sup> Juda nabuki Peres nani Sera.  
 Amamik amakek douk Tamar.  
 Peres ananin nuganin Hesron.  
 Hesron ananin nuganin Ram.  
<sup>4</sup> Ram ananin nuganin Aminadap.  
 Aminadap ananin nuganin Nason.  
 Nason ananin nuganin Salmon.  
<sup>5</sup> Salmon ananin nuganin Boas.  
 Boas ananik amakek douk Rehap.  
 Boas ananin nuganin Obet.  
 Obet ananik amakek Rut.

Obet ananin nuganin Jesi.

- <sup>6</sup> Jesi ananin nuganin douk king Devit.  
 Devit ananin nuganin douk Solomon.  
 Solomon ananik amakek seiwok Uria  
 ananik irohukwik.  
<sup>7</sup> Solomon ananin nuganin Rehoboam.  
 Rehoboam ananin nuganin Abiya.  
 Abiya ananin nuganin Asa.  
<sup>8</sup> Asa ananin nuganin Jehosapat.  
 Jehosapat ananin nuganin Joram.  
 Joram ananin nuganin Usia.  
<sup>9</sup> Usia ananin nuganin Jotam.  
 Jotam ananin nuganin Ahas.  
 Ahas ananin nuganin Heskia.  
<sup>10</sup> Heskia ananin nuganin Manase.  
 Manase ananin nuganin Emon.  
 Emon ananin nuganin Josaia.  
<sup>11</sup> Josaia ananim nugamim douk Je-  
 hoiakin nani ananim owarhim.  
 Abudok nyutob eshesh Israel shanak  
 shonoweshik shape gani Babilon.  
<sup>12</sup> Shanak shonoweshik shape Babilon  
 aria Jehoiakin nabuki Sealtiel.  
 Sealtiel ananin nuganin douk Serubabel.  
<sup>13</sup> Serubabel ananin nuganin Abiut.  
 Abiut ananin nuganin Eliakim.  
 Eliakim ananin nuganin Asor.  
<sup>14</sup> Asor ananin nuganin Sadok.  
 Sadok ananin nuganin Akim.  
 Akim ananin nuganin Eliut.  
<sup>15</sup> Eliut ananin nuganin Eleasar.  
 Eleasar ananin nuganin Matan.  
 Matan ananin nuganin Jakob.  
<sup>16</sup> Jakob ananin nuganin Josep.  
 Aria Josep narao Maria aria kwobuki  
 Jisas douk shuhwaran um Kraish, douk  
 Iruhin nakriyan neshopokan nanaki iri.  
<sup>17</sup> Namudok aria shadarehi awiros arpesh  
 douk shape iri Abraham napeyobi nyu-  
 tob arigaha shanaki shatogrumori De-  
 vit natogur obi nyutob asudok awiros  
 sanak satogrum 14-poreis. Aria ta  
 shadareh Devit napenyobi nyutob ari-  
 gaha shanak shatogrumori abudok nyu-  
 tob eshesh Babilon shanaki sharao es-  
 hesh Israel shanak showeshikesh shape  
 Babilon obi douk shopuk shadarehas  
 sanak satogur um 14-poreis awiros.  
 Aria shopunek shadarehi abudok nyutob  
 shabi shape Babilon obi arigaha shanak  
 shatogur um Kraish natogur nape obi

nyutob um douk shopuk namudok atin, shadarehas sanak satogur 14-poreis.

*Maria Kwokwarumori Jisas  
(Luk 2:1-7)*

<sup>18</sup> Jisas Kraiss nonokwarum ahi aih douk namudok. Ananik amakek Maria douk shagraehok um kurao Josep. Eshesh biyesh ta shunoraum aria madae shishuh atugun uwe, uwok aria okwok kwanodukem um okwok kwonorahaen Iruhin ananin Mishin nyanaki nyawishok aria shatik um okwok douk kwunara-haen. <sup>19</sup> Josep yopini arman, madae nunek inahos uwe, uwok. Anan abraen nyan aria nanaiwos nukok abraen Maria uwe, uwok. Aria anan nabo baraen shokubur atin um anan kanak ta nunoi-wos irohukwik, Maria. <sup>20</sup> Anan nape nonek urkum um enyudok baraen obi nyutob, enen Iruhin ananin ensel ny-atogruman anas yomnis aria nyakripan, “Josep, Devit barhonin, mare nyunotitik um nyurao Maria um nyakik irohukwik. Okwok kwonorahaen um Iruhin ananin Mishin. Madae anan arman nonukok uwe, uwok. <sup>21</sup> Okwok ko kwubunuh kubuki anan nunganin. Aria nyak ta nyuh-waran nyeigur Jisas, um maresh anan ko nugamoh arpes shokutukuk yoweishi inahos aria shutanamori shupe wosik atin.” <sup>22</sup> Eshudok eneshenesh shenenek shagipesh baraen seiwok anan profet noko Iruhinin baraen iri anan nakri namudok, <sup>23</sup> “Onok madae kuti armam iri ta kweyetueguk, kwubunuh aria kubuki anan nunganin, aria shuhwaran Emanuel. Enyudok baraen nyakri namudok, Iruhin nani apak nape.” <sup>24</sup> Aria Josep neshuh nakitak aria narao Maria um ananik irohukwik, kabi da Iruhin nakripan um. <sup>25</sup> Aria Josep madae nini Maria shishuh atugun uwe, uwok. Aria Maria kwobunuh kwobuki anan nunganin. Aria nodowon nyeigur Jisas.

## 2

*Anam Hadukemesh Iri Hape iri Aun Nakihumori Hanaki Hatik Jisas*

<sup>1</sup> Maria kwobuki Jisas abrudok wabur Betlehem. Ababur douk bape agudok

shokugi nahobig Judia. Aria abudok nyutob, Herot douk nenek king nape Debeini um Judia. Maria kwobuki Jisas ba iyoh aria anam hadukem eneshenesh iri hape iri gani aun nakihumori hanaki hatograri Jerusalem. <sup>2</sup> Hanaki aria harigesh hakri, “Anudok batowinyin nonokwarum um nunek king um eshesh Juda iri nape agunum? Apak douk matik ananik unuk gani aun nakihumori aria douk manakumori munek lotuman.”

<sup>3</sup> King Herot nemnek enyudok baraen, ba akas sanun. Ihish arpes shape Jerusalem iri shopunek arugoguhwiar waesh. <sup>4</sup> Aria nenekumam baraen amam pris amamim debeimi hani amudok anam henek skulumesh um lo iri hanaki hatrun. Hanaki aria narigam nakri, “Anudok arman Kraiss douk Iruhin nakriyan neshopokan nunaki iri ko nunukwarumori meiburi wabur?”

<sup>5</sup> Aria hakripan hakri, “Gani Betlehem douk bape agudok shokugi nahobig Judia iri. Seiwok anan profet nowemaguk baraen aria nakri namudok, <sup>6</sup> Seiwok Iruhin nakri, ‘Ipak pape abrudok wabur Betlehem douk bape agudok shokugi nahobig Judia iri, ipak punnek. Ipak madae pupe pigigi um amam debeimi douk hasuhw merik um Judia iri uwe, uwok. Aria amu wouwokuk. Umum maresh, um nyak atin kweipon anan debeini arman nutogur ipak arpes pape Betlehem iri. Aria anan kweipon nupe debeini um ipak eikish arpes Israel.’”

<sup>7</sup> Herot nemnek namudok aria nanabeshuk nenekumam baraen amudok douk hape iri aun nakihumori hanaki iri. Nenekumam baraen aria hanak hatrun. Aria anan narigam um da marab nyutob okwudok unuk da kwatogur. <sup>8</sup> Aria anan neshopokam hunak Betlehem, aria nakri namudok, “Punak aria shokubur atin gamo pupe purim anudok nunganin. Ipak puriman ba puparugon aria ta putanamori ba pukrip eik. Umum maresh, eik shopunek yakana inak inek lotuman.”

<sup>9</sup> Douk hemnek king ananin baraen aria amam hanak. Amam hanak yah aria ta hatik okwudok apunik unuk douk harik

hatrukwi gani aun nakihumori iri. Okwok kwarig atin aria amam hagipeshok arigaha kwanak kwotem iruhw anudok nuganin neshuh atari urupat. <sup>10</sup> Amam hatik okwudok unuk aria amam hanadudareh hanaboum mishish. <sup>11</sup> Aria amam hunak hawish atudok urupat aria hatik nuganin nani amakek Maria shape. Aria habuh hoduk ohrubus hatao atap henek lotuman. Aria hapuk amamigas banagas hatuki eshudok hatorishi debeibori utabor iri aria hukanesh. Hakon gol rani paura nyeisig yopuri unar iri shohwaren um frankinsens aria sani enen yopunyi sanda nyeigurinyum mir. <sup>12</sup> Hakon eshudok aria heshuh nagundok Betlehem. Heshuh habo anas yomnis aria Iruhin nakripam dodogowinyi baraan um maresh hutanam hutiguk Herot uwe, uwok. Namudok aria amam hagipesh kupaihi yah hatanam hanam amamig nahobig.

*Josep Nani Armatok Aria Nuganin Sharuwok Shanam Agudok Nahobig Isip*

<sup>13</sup> Douk amudok biom atun hanakuk aria Josep neshuh nonabek anas yomnis. Aria enen Debeini ananin ensel nyatogruman aria nyakripan nyakri, “Nyikitak nyurao nuganin nini amakek aria arigah punam agudok nahobig Isip. Punak pupe ganudok arigaha eik ta ikripep aria ta putanamori. Umum maresh, Herot douk nakana nupe nurim nuganin um ta non nugok.”

<sup>14</sup> Namudok aria Josep nakitak nurao nuganin nani amakek aria abudok atub wab shapa shanam Isip. <sup>15</sup> Josep nani Maria shabuh shape nagundok arigaha Herot nagok. Enyudok douk nyatogrum enen baraan seiwok Debeini nohur anan profet neyagwrehenyuk iri nyatogur adurin atin. Baraan enyudok. Iruhin nakri, “Eik yohwar eikin Nuganin nakutukuk Isip nanaki.”

*Herot Noguwak Ananim Soldia Hanak Habo Sabaimi Batowishim Hagok*

<sup>16</sup> Herot nape aria nadukemeshum amudok hape iri aun nakihumori hanaki iri douk hagiya giman hanak kupaihi yah. Namudok aria ananibur nyibur

akasi bur atubur. Aria noguwak anam soldia hanam Betlehem bani warub bape hurukatin um Betlehem iri um hubo ihim shokumi batowishim hugok. Hubo amudok douk biyesh aka atin atin kwarahos shadiyom iri atum. Umum maresh, anan nadukemeshum douk hakripan hakri abudok nyutob hatik unuk um. <sup>17</sup> Enyudok douk nyatogur um enen baraan seiwok Iruhin nohur profet Jeremaia neyagwrehenyuk iri nyatogur adurin atin. Baraan enyudok. Iruhin nakriyenyi.

<sup>18</sup> “Shemnek anah mah abrudok wabur Rama. Shemnek onok armatok kworeh kwabo sawiyeguh kunak. Resel kwape kworep okwokwim nugamim. Kworeh aria madae enen arpen ko wosik nyugapeshumok okwokwish urkum apahw.”

*Josep Nani Armatok Aria Nuganin Shakutukuk Isip Aria Shatanam Shanam Wabur Nasaret*

<sup>19</sup> Arigaha douk Herot nagokuk aria Josep nonabek anas yomnis gani Isip. Enen Debeini ananin ensel douk nyonohur aria nyakripan namudok. <sup>20</sup> Nyakri, “Nyikitak nyurao nuganin nini ananik amakek aria ta putanam punam Israel. Amudok douk hakrium hubo nuganin nugok iri douk hagok.” <sup>21</sup> Namudok aria Josep nakitak nurao nuganin nani ananik amakek aria ta shatanam shanam Israel. <sup>22</sup> Shanak aria Josep nemnek baraan um shakri Akeleas narao ananin yaken Herot ananik outuk natogur king nape Debeini um agudok shokugi nahobig Judia. Namudok aria Josep ta nanogugur um nunam Judia. Arigaha douk ta nonabek anas yomnis aria Iruhin nakripan enen baraan. Namudok aria shanam agudok shokugi nahobig nyeigurigum Galili. <sup>23</sup> Shunak aria shabuh shape anabur wabur shohwarabur um Nasaret iri. Namudok aria enen baraan seiwok amam profet henyemaguk iri nyatogur adurin atin. Baraan enyudok. “Anan douk ko shuhwaran shakana anan Nasaret-epimin.”

### 3

#### *Jon Nenek Baptaisumesh Iri Nakripesh Iruhin Ananin Yopinyi Baraen*

*(Mak 1:1-8; Luk 3:1-18; Jon 1:19-28)*

<sup>1</sup> Abudok nyutob Jon nenek baptaisumesh iri douk nanaki nape apa nakripesh Iruhin ananin yopinyi baraen. Arpesh shanaki aria apa nape nakripeshen agudok shokugi nahobig Judia agudok wehigunum arpesh wokagunum. <sup>2</sup> Nakripesh namudok. Nakri, “Ipak pubukuk yoweishi inahos aria putanam pukon aparuh Iruhin aria putogur ananish arpesh. Umum maresh, abudok nyutob um arpesh shuwish um agudok Iruhin nape Debeini um ananish arpesh shapeum heven douk hurukatin um ko butogur.” <sup>3</sup> Jon anan douk anudok arman seiwok Iruhin nohur profet Aisaia neyagwrehuk enen baraen nakri namudok,

“Enen arpen nyape nyohwar gani wehigunum arpesh wokagunum.

Nyohwar nyakri, ‘Gapeshuman yah Debeini.

Pugapeshah ba greg atin hatem um anan nugimah nunaki um!’ ”

<sup>4</sup> Jon nenekah iri rupah douk shenekah enen mahin shohwaren um kamel iri enenyirub ehirub. Aria let nuwashot iri douk shenekat anap mahinyip yegenyihwip. Worigun nagnoh iri douk napeum nawok gormish aria akehinyi lele da nyor numun marubusigas aragas iri.

<sup>5</sup> Aria abudok nyutob arpesh shape iri Jerusalem iri, shape iri ihirub warub agudok shokugi nahobig Judia iri, shape iri ihirub warub bape hurukatin um worub Jodan iri, worobaishi shanaki um shumnek Jon. <sup>6</sup> Shanaki showereh shenekeshi yoweishi inahos aria nenek baptaisumesh abudok worub Jodan.

<sup>7</sup> Jon natik worobaimi Farisi hani Sadyusi hanamori hutrun um nunek baptaisumam aria nakripam namudok, “Ipak ogwuhwudok yoweiguhwi yuguhwim nugamim, Iruhin da akasin atun um ipak. Amiapen nyakripep um ta puruwok um eshudok yoweishi douk nakri nenekesh shutogurum ipak iri?

<sup>8</sup> Ipak douk pubodig nyirub aria ko punek yopishi eneshenesh um ta wosik piyabigesh namudok adur atin ipak da punek gihaum ipakish yoweishi inahos aria putanam pukon aparuh Iruhin aria putogur ananish arpesh. <sup>9</sup> Ipak pur urkwip ipakiruh aparuh namudok, ‘Abraham anan douk apakin yaken. Eik yakri ikrip ipak namudok, Iruhin anan douk adur atin ko nuhur abrudok utabor aria nubranam um butogur Abraham ananish batowish.’ <sup>10</sup> Arubar iganigadae banowatak bakus um buburow rowogig baug. Ihigosum rowos madae subuki yopipi shurkwip ba piragos iri, agusudoki rowos ko shuburo-ogos aria shuwashogos um nyih hunugos.

<sup>11</sup> “Eik douk yenek baptaisumep um abar kabi da enen kak um ipak douk pubukuk eshudok yoweishi inahos ipak da penekeshi iri aria pubodig nyirub aria patanam pakon aparuh Iruhin aria putogur ananish arpesh. Aria anudok ko nugimori eik iri, anan ko nunek baptaisumep nukwu Iruhin ananin Mishin. Anudok ananin dodog nyenek uhwin um eikin dodog eik madae yopue ipe wosik um ta isuhwuman ananiyu su uwe, uwok. Anan ko nunek baptaisumep nukwu Iruhin ananin Mishin nyini nyih. <sup>12</sup> Anan ko nunaki kabi da anan arman nasuhwi anap neitip ananis wis um aria nunaki nudum ihish witish nyubuhhas nushubuk sik. Aria yaputi shuruwepit wit anan ko nutubuk gani ananit urupat nobuk wit ati. Aria ihish witish nyubuhhas anan ko nushaisheh nukwu ehudok yoweih nyih douk hanu hape namudok atin iri madae ta hugoki uwe, uwok.”

#### *Jon Nenek Baptais Um Jisas* *(Mak 1:9-11; Luk 3:21-22)*

<sup>13</sup> Abudok nyutob Jon nape apa nenek baptaisumesh abar, aria Jisas nakitak nakutukuk agudok shokugi nahobig Galili aria nanam worub Jodan. Anan nanam Jon um nakana Jon anan kanak ta nenek baptaisuman. <sup>14</sup> Aria Jon nakri uwok um ta nunek baptaisuman aria nakripan nakri namudok, “Eik yakri wosik um nyak ta nyunek baptaisum eik. Umum

maresh, ba nyak ta nyunakmori eik?”  
<sup>15</sup> Aria Jisas ta nasuhman baraen nakri-pan namudok, “Meyoh um enyudoki baraen, douk nyak nyenekesh kabi da eik yakri um. Namudok wosik um apak munekesh namudok um miyabig ihishmorim um ihinyumorim yopiyopinyi baraen um Iruhin nakriyenyi um enyudok yopinyi poe.” Aria Jon nemnek Jisas aria nunekesh kabi da anan nakri um nunek baptaisuman.

<sup>16</sup> Douk Jon nenek baptaisuman jurug, aria Jisas nakutukuk worub nanatu natowi neyotu iruhw hurus. Aria atub nyutob anan nanig natik utag ganupok um heven ibur wabur, aria anan natik Iruhin ananin Mishin nyabuhi kabi da anar armir runahwaram manyun um rabuhi retem Jisas. <sup>17</sup> Aria anah mah heyagwrehi gani iruhw heven namudok, “Anudok eik kanak eikin nuganin. Eik yanawash abom iri. Eikish urkum apahw shakri shanadudareh shanawashaman abom iri.”

## 4

### *Satan Nakwiraeh Jisas (Mak 1:12-13; Luk 4:1-13)*

<sup>1</sup> Douk Jisas nenek baptaisuman jurug aria Iruhin ananin Mishin nyaran nyunak gani wehigunum arpesk uwok um, aria Satan ko nukwiraehan um nunek yoweishi inahos. <sup>2</sup> Aria Jisas nanak nape nubatib tenabih nyumnegwih weibus nape meyoh um madae nuwok worigun uwe, uwok. Arigaha takweirubi nyurub ban.

<sup>3</sup> Aria Satan nanaki nakripan namudok, “Nyak da Iruhin in nuganin um aria nyak krip abrudok utabor ba butogur bret.”

<sup>4</sup> Aria Jisas nakripan namudok, “Baraen nyetem Baibel iri nyakri namudok, ‘Arpesk madae shuwok bret atut ba ta shupe wosik atin uwe, uwok. Arpesk ta shupe wosik atin um shumnek Iruhin ananin ihin baraen niyagwrehyeni.’ ”

<sup>5</sup> Jisas nakri namudok aria Satan ta naranum yopuburi wabur Jerusalem. Aria nakih nowem Jisas neyotu gani iruhw iruhuguk um atudok Iruhin ananit debeiti urupat.

<sup>6</sup> Aria Satan nakripan namudok, “Nyak douk Iruhin ananin Nuganin um, aria nyak sapurak buh gani atap. Umum maresh, baraen nyetem Iruhin ananik buk iri nyakri namudok, ‘Iruhin ko nukriפש dodogowinyi baraen ananish enselahos um shunaki shegemenyukuk aria shusuwenyukuk iruhw esheshis wis. Namudok aria nyakiruh yeriweruh ko mare hunubo anam atum utom uwe, uwok.’ ”

<sup>7</sup> Aria Jisas nakrip Satan namudok, “Baraen nyetem Iruhin ananik buk iri shopunek nyakri namudok, ‘Nyak ta mare nyukwiraeh nyakin Debeini um nenek yoweishi inahos, anan da nyakin Iruhin.’ ”

<sup>8</sup> Aria ta shopunek Satan ta naran nato onohw hwato abom iri yoduhw. Hakih aria Satan neyabigan ihigosmorim nahobigos sape abudok amnab iri sani ihishmorim yopishi eneshenesh shape agudok nahobig iri.

<sup>9</sup> Aria anan nakrip Jisas namudok, “Nyak douk atin nyuduk ohrubus aria nyuhwido barag gubuh atap aria nyenek beten um eik, aria eik ko iken eshudok ihish eneshenesh um nyak.”

<sup>10</sup> Aria Jisas nakripan namudok, “Satan nyak karuwok-mokuk um eik! Baraen nyetem Iruhin ananik buk iri douk nyakri namudok, ‘Nyak ta ko nyunek beten um Debeini atun anan da nyakin Iruhin aria nyunek anan atun ananin atin mour.’ ”

<sup>11</sup> Jisas nakripan namudok aria Satan nakutunukuk aria nanak. Aria enesh enselahos shanaki shatauruman.

### *Jisas Nari Nenek Mour Nahobig Galili (Mak 1:14-15; Luk 4:14-15)*

<sup>12</sup> Abudok nyutob Jisas nemnek Jon da nonoweshik nape shunuweshik-ati urupat, aria anan nakitak natanam nanak agudok nahobig Galili. <sup>13</sup> Aria anan madae nanak nupe ananibur wabur Nasaret aria amu nenek atin nanak nape kupaiburi wabur Kaperneam. Abrudok wabur douk bape anagas um debeigi Galilieg waiyag hurukatin um abudok biyab amnab nyeiguribum Sebulun aria Naptali. <sup>14</sup> Jisas nenekesh namudok um



enen baraen seiwok Iruhin nohur profet Aisaia neyagwrehenyuk iri nyatogur adurin atin.

<sup>15</sup> Baraen enyudok. Nyakri,  
“Debeibi amnab Sebulun aria debeibi amnab Naptali,  
abudok amnab douk bape hurukatin um debeihi yah

hanam youg gwani amnab douk bape gani wobrab worub Jordan iri um agudok nahobig douk Galili.

Agundok worobaishi arpeshe douk eshesh madae Judaishi aria eshesh shopunek da shanaki shape agundok.

<sup>16</sup> Eshudok arpeshe shapeum arukwut iri, eshesh douk shatik bogaragun um!

Eshudok arpeshe shapeum arukwut-igunum atugun iri,  
douk shape bogaragun um atin!”

<sup>17</sup> Aria abudok nyutob Jisas nape nakripesh baraen nakri, “Ipak pubukuk apa punegeshi yoweishi inahos aria putanam pukon aparuh Iruhin aria putogur ananish arpeshe. Umum maresh, abudok nyutob um arpeshe shuwish um agundok Iruhin nape Debeini um ananish arpeshe shapeum heven douk hurukatin um ko butogur.”

*Jisas Nahwar Nubatim Armam Hatogur Disaipel*  
(Mak 1:16-20; Luk 5:1-11)

<sup>18</sup> Anah nyumnah Jisas nape nanara-haen nanak anagas um debeigi Galilieg waiyag aria natik biom armam ashuken nani wanin. Anan douk Saimon. Ananin kupainyi nyeigur da shohwaran um Pita. Anan nani ananin wanin Andru, amam douk hape howashak umbenab agudok Galilieg waiyag. Amam biom hatuk eiguhw um ta shutoruguh shukam utabor. <sup>19</sup> Douk natrum aria nakripam nakana, “Ipak biom yowi pugipesh eik, aria eik ta iyabigep um ta purao arpeshe shunaki shugipesh eik.” <sup>20</sup> Douk amam hemnek atin aria hakutukuk amamib umbenab bakuk aria hagipesh Jisas hanak.

<sup>21</sup> Anan nagim waiyag nanaku shopunek, aria ta natigu kupaimi biom armam ashuken nani wanin, Jems, Sebedi

ananin nunganin, nani ananin waninuman Jon. Amam biom hani amamin yaken, Sebedi da hatem bot, aria apa hagabe amamib umbenab. Jisas natrumugu aria nahwaram um hugipesh anan. <sup>22</sup> Nohwaromugu aria atub nyutob ahudok atuh nyumnah hakutukuk bot tani amamin yaken napeik, aria hakitak hanaman hanak.

*Jisas Nakripesh Iruhin Ananin Yopinyi Baraen Aria Nagabe Worobaishi Arugeh Henekeshi Yopish*  
(Luk 6:17-19)

<sup>23</sup> Jisas narahaen nanak ihirub warub agudok nahobig Galili. Nanak nawish agundok eshesh Juda shantorum shape shenyagwreh-ogwi urusag aria nape nakripesh Iruhin ananin yopinyi baraen. Nakripesh um agundok eshesh ko shuwish um agundok Iruhin nape debeinium ananish arpeshe um. Nakripesh baraen aria nagapesh ihishmorim da yowe yoweih arugeh henekesh iri aria yopish. <sup>24</sup> Aria baraen nyanak ihigunum agudok nahobig Siria um enyudok Jisas neneken iri mour. Namudok aria shrauri ihishmorim douk yoweshum yomo yomoghi arugeh henekeshi kabi da debeiri eriger rapeyeshi, yoweishi sagabehos shapeyeshi, eshudok shatu ba krukruk shakuh iri aria eshudok roguh waiyas shagokesh iri. Aria Jisas nugabe ihishmorim ba yopish. <sup>25</sup> Aria sabaishi shemnek baraen ba shunaki, eshesh da shanaki arbudok warub bani nahobigos.

Eshesh shanaki Galili, Jerusalem aria Judia. Enesh douk shape iri gani wobrab worub Jordan shanaki. Aria enesh douk shanaki anab amnab douk 10 poreirub warub bapeim shahwarogun um Dekapolis, eshudok ihishmorim eshesh shape arbudok warub iri shanaki aria shagipesh Jisas.

## 5

*Jisas Nakripesh Worobainyi Yopinyi Baraen Iruhw Anag Mihig*

<sup>1</sup> Jisas natik eshudok worobaishi arpeshe shantorum shanaki aria nanak nato anag

mihig. Aria nakih nape atap. Aria ananish disaipel shanaki shanaman shape.

*Jisas Nakripesh Baraen Um Yopihi Aih Douk Apak Mugipesheh Aria Ko Mupe Manadudareh Abom Um (Luk 6:20-23)*

<sup>2</sup> Aria Jisas neyagwreh nakesh yopinyi baraen namudok, <sup>3</sup> “Eshudoki arpesh douk shadukemesh um esheshish mishish madae shupe hurukum Iruhin iri, aria shakri Iruhin um ko numnekesh iri, eshesh wosik ta shanadudareh. Umum maresh, eshesh ko shuwish agundok Iruhin nape Debeini um ananish arpesh shapeum heven aria shupe wosik atin gani iruhw heven.”

<sup>4</sup> “Eshudok arpesh douk esheshiruh aparuh yoweruh ba shureh atinyi aria madae shunududareh um, yoweishi inahos eshesh shenekeshi iri aria shukri um maresh ta shenek yoweishi inahos um, eshesh wosik ta shanadudareh. Umum maresh, Iruhin ko nugamohesh um esheshiruh aparuh.”

<sup>5</sup> “Eshudok samokwiyaishi arpesh madae shubo mishish ba shutuk esheshish nyeiguhw shuto iruhw aria shenek kupaishi yoweishi inahos iri eshesh wosik ta shanadudareh. Umum maresh, Iruhin ko nokesh abudok amnabish ihish eneshenesh aria shunogremesh.”

<sup>6</sup> “Eshudoki arpesh douk shanawasham abom um shigipesh Iruhih ananin baraen ba shupe yopunyi poe, kabi da nyurub baesh um worigun nani abar um, eshesh wosik ta shanadudareh. Umum maresh, Iruhin ko gamo nugamohesh nenekesh shupe duguresh atin shupe.”

<sup>7</sup> “Eshudok douk shenek gihaum kupaishi arpesh iri aria shutaurumesh um eneshenesh iri, eshesh wosik ta shanadudareh. Umum maresh, Iruhin shopunek ko nenek gihaum eshesh.”

<sup>8</sup> “Eshudok douk esheshish apahw urkum shape yopiyopishi madae shur um shenek yoweishi inahos iri, eshesh wosik ta shanadudareh. Umum maresh, eshesh ta shutik Iruhin.”

<sup>9</sup> “Eshudok douk shapeum shiyatak rupanitak iri, eshesh wosik ta shanadudareh. Umum maresh, Iruhin ta nuhwareh ananish nugashish.”

<sup>10</sup> “Eshudok douk shenek Iruhin nakriyenyi yopinyi mour aria namudok ba kupaishi shaesh, shahiyahesh aria shuweshikesh um, eshesh wosik ta shanadudareh. Eshesh douk ta ko shuwish agundok Iruhin nape Debeini um ananish arpesh shapeum heven.”

<sup>11</sup> “Ipak douk shutrip pigipesh eik, ba shuhep shurukwep nubug, shuhiyahep aria shugiyagim ipak shudukumep nyau nyatograri baraen, aria wosik ipak ta panadudareh. <sup>12</sup> Ipakish urkum apahw ko shupe wosik atin aria ipak ko gamo punadudareh. Umum maresh, ipak ko purao yopishi eneshenesh gani iruhw heven. Eshesh ta shenekesh um ipak kabi da seiwok shehiyah anam profet harigum ipak iri.”

*Ipak Douk Pene Bilip Aria Pape Kabi Sol Rani Lait Um (Mak 9:50; Luk 14:34-45)*

<sup>13</sup> “Ipak douk pape kabi da sol um abudok amnab. Aria sol kwehig miyair ba mare ta akehir aka nubutir, aria ta menekar mumam ba ta akehir aka nubutir? Arudoki sol arar mour wokar. Aria ta arpesh shuwashar-uguk, aria shishar shukwu esheshiruh yeriweruh.

<sup>14</sup> “Ipak douk pape kabi da lait um abudok amnab. Anabur wabur da betem gani iruhw onohw yoduhw iri ta mare bunubeshuk. <sup>15</sup> Arpesh ta mare shutik eneh nyih aria shushapumeh shukwu anap marup uwe, uwok. Eshesh ko shutik nyih hukus wehiwehigunum, um ta hukesh arpesh lait um ihishmorim arpesh numun urupat. <sup>16</sup> Aria douk ipak ta pupe namudok atin kabi da nyih hanu hakus um. Pupe um punek yopishiyen aria ta arpesh shutrip aria ko shuhur ipakin Yaken ananin nyeigur nyuto gani iruhw douk nape heven iri.”

*Jisas Nakripesh Baraen Um Iruhin Ananin Lo*

<sup>17</sup> Aria Jisas ta nakri namudok, “Mare pure urkwip namudok eik douk yanaki um iyatakuk Iruhin ananin lo seiwok

nakrip Moses ba nenyem iri nyani enyudok baraen seiwok amam profet hakriפשוק-enyi, uwok. Eik douk yanamori inek enyudok baraen douk lo nyani amam profet amamin baraen nyakrium aria nyutograri adurin atin. <sup>18</sup> Douk ipak gamo pumnek enyudok baraen eik adur atin yakripepum! Kweipon heven aria agudok nahobig guniyatak ahi nyumnah, enyudok ihin Iruhin ananin lo kweipon nyupe atin nyupe aria ta mare nyuniyatokuk uwe, Uwok. Enyudok mehimaryi baraen shenyem shus iri aria ihin baraen sheneken nyape lo iri ihinyumorim baraen kweipon nyupe atin nyupe. Enyudok lo kweipon nyupe atin nyupe namudok atin arigaha ihish kupaishi enesh-enesh shiniyatokuk agudok nahobig. <sup>19</sup> Namudok aria douk meinyiah arpen nyutik anabikum enyudok shokwinyium ihin Iruhin ananin lo aria nyubrigen nyenek skulum kupaishi arpesh um nyigiyagimeshum shenekesh namudok, enyudok arpen nyenekesh namudok iri enyen kweipon nyeigur shokwin um nyuwish abrudok wabur Iruhin nape Debeini um ananish arpesh shapeum gani iruhw heven. Aria namudok atin um meinyiah arpen douk nyigipesh ihinyumorim lo, aria shopunek nyenek skulum kupaishi um enyudok lo, enyenyin nyeigur ko nyutogur debeinyi um ganik Iruhin nape Debeini um ananish arpesh shapeum iruhw heven. <sup>20</sup> Aria douk adur atin eik yakripep namudok, ipak douk pupeum aria ta mare pugipesh Iruhin ananin lo ba baraenyum, aria ipakih yopihi aih douk ta mare henek uhwin um douk amam Farisi hani amudok anam henek skulumesh um lo iri henekehi um ba mare punekesh kabi da Iruhin nakri um, aria ipak ta mare puwish aburdok wabur Iruhin ananish arpesh shapeum heven iri uwe, uwok.”

*Jisas Nakri Um Agundok Shugabe Baraen Um*  
(Luk 12:57-59)

<sup>21</sup> Aria Jisas ta nakri namudok, “Ipak douk pumnek seiwok shakrip ipakish popehesh yamehesh um. ‘Mare pubo

arpesh shugok. Pubirok namudok um aria ko piyotu um debeigwi kwotog.’ <sup>22</sup> Douk eik yakripep namudok. Ipak amiapen nyukri akas um ananin anokwinen, aria ko shuran shunak um kwot. Aria ipak amiapen pukrip anokwinen namudok, ‘Nyak yoweini!’ anan shopunek ko shuran shunak um kwot. Aria amiapen nyuho anokwinen, ba nyukana nyak yoweigunum, anan nape huruhuruk um yoweih nyih hanugunum gani hel. <sup>23</sup> Aria ipak ko pakana pugabe mishish um Iruhin iri. Ipak pure urkwip pani enesh kupaishi panitok um, aria ipak pubukuk eneshenesh pakana pugabe Iruhin eshi. <sup>24</sup> Ipak purik punak, ba pugabe baraen puni ipakishi aria ko putanam punak pugabe Iruhinin Mishin. Douk akas wata sapenyep obi nyutob mare punam Iruhin.

<sup>25</sup> “Ipak douk enesh arpesh shakana shuraep shunak um kwotog um, aria pugabe baraen adukum kwot, da nyutob wata bape adai. Kadak pukuna piyotu abom um ta shuraep shunak um kwot aria shuko jasep aria jas ko noko ipakum polis. Aria polis ko haraep hunam shunuweshik-ati urupat aria punuweshik. <sup>26</sup> Aria nagundok ipak ko pupe abom piyatak ipakibor utabor um putor yoweiti shunuweshik-ati urupat.”

*Jisas Nakri um Arpesh Shunaraum Iri Sheshuh Atugun Shenek Yoweishi Inahos Shani Kupaikwi Kupainari*

<sup>27</sup> Aria Jisas ta nakri namudok, “Ipak seiwok pemnek shakrip arpesh enyudok baraen namudok, ‘Ipak arman armatok punoraum iri mare puni kupaishi arman armatok punek wehrur.’ <sup>28</sup> Aria douk eik yakrip ipak namudok, douk anan arman nushakam onok armatok aria douk anudok arman iganigadae nenek wehrur numun um ananish urkum apahw um okwudok armatok. <sup>29</sup> Aria douk nyakip nabep pape yopunyi rogur ehahi ponuk nyak um nyunek yoweishi inahos, namudok aria douk atin nyutuk apudok nabep ba nyuwashopuk. Namudok wosik um anabik um nyak kanak yowegun ba

nyuwashagunuk aria douk madae nyenek yoweishi inahos uwe, uwok, aria ta mare shuwashokuk ihinyum nyak kanak nyubuh gani yoweih nyih hanu um hel iri. <sup>30</sup> Aria douk nyakin yopunyi rogur nyubirok nyak ba nyuguruki um nyenek yoweishi inahos, namudok aria douk atin nyutupok enyudok rogur ba nyuwashenyuk. Namudok wosik um anabik um nyak kanak yowegun ba nyuwashagunuk aria douk madae nyenek yoweishi inahos uwe, uwok, aria ta mare shuwashokuk ihinyum nyak kanak nyubuh gani yoweih nyih hanu um hel iri.”

*Jisas Nakripesh Um Agundok Douk Shabrigesh Eshesh Kanak Da Shanaraum Um*

*(Mat 19:9; Mak 10:11-12; Luk 16:18)*

<sup>31</sup> Aria Jisas ta nakri namudok, “Seiwok eshesh shakri namudok, ‘Douk anan arman niatokuk ananik irohukwik, aria anan ta nukok irohukwik anap shup um ta shubrig eshesh kanak eshesh shunoraum um.’ <sup>32</sup> Aria douk eik yakana ikrip ipak namudok, aria douk anudok arman niatok ananik irohukwik aria douk abudok nyutob ananik irohukwik madae kwonek wehrur kuni anan arman, namudok aria douk anudok arman nenek armatok um kwabrig enyudok shunoraum enyi lo. Umum maresh, ta okwudok armatok kurao kupaini arman, aria okwudok armatok kwonek wehrur um kwani anudok anan arman sheshuh um. Aria ta anan arman nurao onok armatok, seiwok okwokwin raminen niatokuk iri, anan shopunek nabrig enyudok shunoraum enyi lo aria anan shopunek nenek wehrur um nani okwudok armatok sheshuhum.”

*Jisas Nakripesh um maresh Shukuna Adur Iruhw*

<sup>33</sup> Aria Jisas ta nakripesh namudok, “Ipak pumnek enen baraen seiwok shakrip ipakish popehesh yamehesh shemnek aria ipak shopunek douk pemnek, enyudok baraen nyape namudok, ‘Nyak mare ta nyigiyagig um agundok ta nyukri adur iruhw um. Aria agundok nyukri adur iruhw um

nyakana nyenek enen mugu um, aria ta adur atin nyigipesh enyudok baraen aria nyenekesh shutogur adur atin um Debeini ananis nabes.’ <sup>34</sup> Aria douk eik yakrip ipak, douk ipak mare ta piyagwreh pukri adur iruhw. Amu wouwokuk. Ipak mare ta piyagwreh pukri heven um punek enen baraen nyutogur dodogeshin. Umum maresh, Iruhin napeyenyi debeinyi wagitur da nyape heven. <sup>35</sup> Aria ipak mare ta piyagwreh pukri agudok nahobig um punek enen baraen nyutogur dodogeshin. Umum maresh agudok nahobig douk kabi da wabur um Iruhin noduk ananiruh yeriweruh heyotu agudok nahobig. Aria shopunek ipak mare ta piyagwreh pukri wabur Jerusalem shopunek um punek enen baraen nyutogur dodogeshin. Umum maresh, abrudok wabur douk anudok atun Debeini King ananibur wabur. <sup>36</sup> Aria ipak mare ta piyagwreh pukri ipakigos baragos um punek enen baraen nyutogur dodogeshin. Umum maresh, nyak madae nyukana wosik atin um ta nyenek anap nyakip baragitep nyakig barag um ta putogur shigorihwipi aka behrabipi, uwok. <sup>37</sup> Aria ipak ta pukri pukuna ‘Adur’ aria ‘Uwok’ atin. Enyudok atin ipak ta pukriyen aria meyoh. Ihin kupainyi baraen da shiyagwrehe ba shagiyagig aria shaduronen um enyudok baraen iri enyudok baraen da nyatograri enyudok yoweinyi sagab Satan da neyagwrehe ba nyatogur.”

*Jisas Nakripesh um maresh Ta Shubeiri Baraen Wanohw Douk Kupaishi Shenekesh-umesh Iri*

*(Luk 6:29-30)*

<sup>38</sup> Aria Jisas ta nakri namudok, “Ipak seiwok pemnek shakri namudok, ‘Douk anan arman nununu kupaini arman ananip nabep, aria anan ko shopunek nutanam nununu nanudok ananip nabep. Aria douk anan arman nudar kupaini arman ananiruh nahw, aria anan ko shopunek nutanam nudar nanudok ananiruh nahw.’ <sup>39</sup> Aria douk eik yakrip ipak namudok, Ipak mare ta putanam pubeiri nigwanoh, baraen um douk kupaishi shenekesh yowiyokuk um ipak iri, uwok.

Aria douk anan arman nubo enesh nyakish popaeshohos, aria nyak nyukonugu wobresh popaeshohos shopunek ba nesh. <sup>40</sup> Aria douk anan arman nakana nenenemen kwot aria nutrin nyakit siot, aria nyak shopunek ta nyukonugu nyakit saket shopunek um anan. <sup>41</sup> Aria douk anan arman dodogeshin um nyak ta nyusahumon anan jah ba nyigim yah nyunak 1 kilomita, namudok aria nyak nyusah jah nyigim yah nyinak 2 kilomita. <sup>42</sup> Aria douk anan arman norig nyak um nyukon enesh muguhwos um anan, aria nyak wosik shukon eshudok muguhwos anan da narigen-meishi. Aria douk anan arman nakana nyukon enesh muguhwos meyoh ba kweipon aria anan ta nutanam nukenyeshi um nyak, aria nyak mare nyukon agab um ananin baraen uwe, uwok.”

*Jisas Nakripesh Um Agundok Apakish Urkum Apahw Shukri Shunawasham Apakish Horik Horin*  
(Luk 6:27-28, 32-36)

<sup>43</sup> Jisas ta nakri namudok, “Ipak seiwok pemnek shakri namudok, ‘Ipak ko gamo pukri punawasham ipakishi arpeshtish, aria ipakish urkum apahw ko yoweshum ipakish horin horik.’ <sup>44</sup> Aria douk eik yakripep namudok, ipak douk aria ta putanam pukesh ipakish urkum apahw aria pukri punawasham ipakish horin horik, aria ipak punek beten um eshesh aria Iruhin ta gamo nugabe eshesh douk shenekesh yowiyokuk um ipak iri. <sup>45</sup> Namudok aria ipak ta pupe kabi da Iruhin ananish nugashish um ipakin Yaken douk nape heven iri. Anan douk nenek wah hutao um yoweishi arpeshtish aria shopunek um yopishi arpeshtish. Aria anan shopunek nenek eshah hormorim um yopishi arpeshtish aria shopunek um eshudok arpeshtish da shanahwaram um yoweishi arpeshtish shopunek. <sup>46</sup> Douk ipak pukuna pukri eshudok arpeshtish douk shakri ipak atip iri, aria ipak ta puraomare arpeshtish? Douk harao takis iri, amam shopunek douk henek apunih aih. <sup>47</sup> Aria douk ipak punek ruwahwep wabigep um ipakish wanaruh atish,

aria ipak ta punek uhwin um kupaishi arpeshtish esheshish urkum apahw mumam? Eshesh madae shudukemesh um Iruhin ananin baraen iri douk shenekesh namudok atin. <sup>48</sup> Aria ipak douk ta putogur yopip abom um punek yopishi enesh enesh atin aria pupe kabi da ipakin Yaken nape heven iri douk nape yopuyopuni abom.”

## 6

*Jisas Nakripeshum Shusuhw Yopuhwi Ruwohwum*

<sup>1</sup> Aria Jisas nakri namudok, “Ipak ko gamo pudukemesh. Ipak mare pusuhw ipakihw yopuhwi ruwohw yopugunum um ihish arpeshtish ta shutik uwok. Douk punekesh namudok, aria ipak ta mare puraomare yopishi eneshenesh um ipakin Yaken douk nape heven iri, uwok.

<sup>2</sup> “Aria douk ipak pakana pukesh eneshenesh um eshudok douk enesh enesh wokeshi, aria shopunek mare pukri arpeshtish shurik shunak ba shuhwar shukripesh um nyak nyenekesh namudok kabi da enesh arpeshtish shabirak um gani numun lotuig urusag aria gani debeihi yeh. Eshudoki arpeshtish shakana shigiyagim ihish arman armatok, aria eshesh kupaikwi kupainari ta shukana eshudoki arpeshtish da yopishi aria shuhur esheshish nyeiguhw shuto gani iruhw. Eik yakripep adurin baraen, eshudoki arpeshtish douk sharao esheshishi yopishi enesh enesh aria jurug. <sup>3</sup> Douk nyakana nyutaurum eshudok jah eneshenesh wokeshi, aria douk ruwohw nyasuohwi nyakin yoweinyi rogur mare nyudukemesh um marohw ruwohw douk nyakin yopunyi rogur nyasuohwi. <sup>4</sup> Namudok aria enyudok mour um shutaurum jah um eneshenesh wokeshi douk nyubeshuken nyeneken iri ta nyupe nyunubeshukigunum. Aria ta nyakin Yaken nutik eneshenesh shape nyunubeshukigunum iri, aria anan ko nuken yopishi enesh enesh um nyak.”

*Jisas Nakripesh Um Agundok Shunek Beten Um*  
(Luk 11:2-4)

<sup>5</sup> Aria Jisas nakri namudok, “Ipak pakana punek beten um, aria ipak mare punekesh kabi da amudok hagiyaigigi henekeshum. Amam hakana hiyotu henek beten numun um lotuig urusag aka hiyotu agundok worobaishi arpes sharaen um debeih yeh um kupaishi arpes shutrum. Eik yakripep adurin baraen um ipak, amudok iganigadae harao amamibor utabor jurug. <sup>6</sup> Aria douk pakana punek beten um, aria puwish ipakig urusag aria puwaru witog aria punek beten um ipakin Yaken douk nape nonobeshuk-igunum. Aria ipakin Yaken douk apa natik eshudoki, anan ta gamo nugabe ipak nukep ipakish yopishi eneshenesh. <sup>7</sup> Aria abudok nyutob ipak pakana punek beten obi nyutob, aria mare punek beten piyagwreh sabain atin baraen meyoh, namudok eshudok madae shudukumesh um Iruhin iri shabirak um. Esheship urkwip por namudok eshesh ta shiyagwreh sabaini baraen aria Iruhin ta numnek eshesh. <sup>8</sup> Ipak mare pugipesh eshesh da shenekeshum, uwok. Douk ipak madae pupuk ipakig nukwatog obi nyutob um porig ipakin Yaken um enesh eneshenesh, aria anan iganigadae nadukemesh um ihish eneshenesh ipak douk wokeshi.

<sup>9</sup> “Ipak pakana punek betenum, aria punek beten namudok.

‘Apakin Yain, nyape iruhw heven iri, apak makri

ihishmorim arpes shutuk nyakin yopunyi nyeigur nyape holi iri nyuto gani iruhw.

<sup>10</sup> Apak makri nyak nyupe debeini um sabaishi arpes.

Apak mape atap iri makri mugipesh nyakin baraen atin,

kabi da eshesh shape iruhw heven iri shenekesh um.

<sup>11</sup> Douk nyukop doukigun worigun ahudok atuh nyumnah.

<sup>12</sup> Aria nyukweshih-umap ihish yoweishi inahos

apak monekesh iri, kabi da apak shopunek menekesh um kupaishi shenekeshomap iri.

<sup>13</sup> Aria nyak mare ta nyukrip yoweinyi sagab Satan

um nukwiraeh apak ba munek yoweishi inahos uwe, uwok.

Aria nyak nyutaurum apak nyukrip Satan um ta mare nunamori apak

aria nyukweshihuk yoweishi inahos um apak.

[Nyak atin nyape nyohwar arpes um shuwish

agundok nyak nyape Debeinarium nyakish arpes um,

aria nyak dodogowinyi abom aria sabaishi arpes shatuk

nyakin yopunyi nyeigur nyape holi iri nyuto gani iruhw ihish nyumneh. Adur atin.]’

<sup>14</sup> “Pumnek. Douk ipak puwaromesh kupaishi shenekeshi yoweishi inahos, aria ipakin Yaken nape heven anan ta nukweshih ipakish yoweishi inahos shopunek. <sup>15</sup> Aria douk ipak mare pukweshih yoweishi inahos um eshesh kupaishi arman armatok, aria ipakin Yaken shopunek ta mare nukweshih ipakish yoweishi inahos.”

*Jisas Nakripesh Um Agundok Shashakur Um Worigun Eneh Nyumneh Aria Shunek Beten Atin Um*

<sup>16</sup> Jisas nakri namudok, “Douk pakana pushakur um worigun eneh nyumneh,

aria ipakigos yomogos mare yowegos kabi da arpes shagiyaigigi shenekesh

um. Eshesh shenek esheshigos yomogos yowegos, aria ihish arpes shutrish

aria shudukemesh namudok eshesh da shushakur um worigun. Eik yakripep um

adurin baraen ipak, eshesh iganigadae sharao yopishi eneshenesh aria jurug.

<sup>17</sup> Aria ipak douk pakana pushakur um worigun, aria pukrup yomogos ba puwem

yopuri wel ipakigos baragos. <sup>18</sup> Namudok aria ihish arpes ko mare shudukemesh

namudok ipak da pushakur um worigun. Aria ipakin Yaken da nape nunubeshuk-

igunum iri, anan atun ko nudukemesh. Aria ipakin Yaken apa natik eneshenesh

shunubeshuk iri, anan ko nukep yopishi eneshenesh um ipak.”

*Jisas Nakripesh Um Yopishi Eneshenesh  
Shurimesh Shushubuk Heven Iri  
(Luk 12:33-34)*

<sup>19</sup> Jisas nakri namudok, “Ipak mare putorum yopiyopishi eneshenesh ipakish aria pushubuk atugun agundok um agudok nahobig, uwok. Puneshubuk agundok um yomiyamish aria ros ko shununish, aria eshudok shakwaruhi ko shubrig narub urusag ba shukwumesh aruh. <sup>20</sup> Namudok aria ipak ko putorum yopiyopishi eneshenesh aria pushubuk atugun gani iruhw heven. Umum maresh, gani iruhw heven yomiyamish aria ros ko mare shununish aria eshudok shakwuaruhi ko mare shubrig narub urusag ba shukwumesh aruh uwe, uwok. <sup>21</sup> Aria abrudok wabur eshudok yopiyopishi eneshenesh ipakish shakus aburi, aria douk abrudok wabur atubur ko ipakish urkum apahw ko shunuwasham-agun abom um ta shupe.”

*Arpeshis Nabes Asas Douk Kabi Enen  
Lam Um  
(Luk 11:34-36)*

<sup>22</sup> Aria Jisas ta nakri namudok, “Nabes sape kabi da lam um ipakiruh yegeshiweruh. Aria douk ipakis nabes yopium, ta lait shunukit ihigunum ipakiruh yegeshiweruh. <sup>23</sup> Aria douk ipakis nabes yowes, aria ihigun um ipakiruh yegeshiweruh ta hupeim arukwut. Namudok aria douk atudok lait tupe numuninyum douk kabi da arukwut um, aria ta atudok arukwut ko tutogur debeiti abom.”

*Anan Arman Ko Mare Wosik Um Nenek  
Mour Um Biom Takwiyem Atugun  
(Luk 16:13)*

<sup>24</sup> Jisas nakri namudok, “Madae anan arman douk ta wosik um nupe shukam um biom takwiyem atugun uwe, uwok. Aria ta ananish urkum apahw shukri anan aria yowesh um naniganan. Aria ta numnek baraen um anan aria nukon agab um naniganan. Aria ipak douk shopunek ta mare pupe shukam um Iruhin aria utabor shopunek uwe, uwok.”

*Jisas Nakripesh Um Agundok Eneshenesh  
Wokesh Aria Eshesh Urkwip Yowep  
(Luk 12:22-31)*

<sup>25</sup> Aria Jisas nakri namudok, “Namudok aria eik yakripep, ipak mare urkwip aparuh yowesh um ipak kanak aria pakri, ‘Douk ta apak muwok maresh muguhwos? Aria ta muwok marabar abar?’ Aria mare urkwip aparuh yowesh um ipakiruh yegeshiweruh aria pakana, ‘Douk ta muwah mareh rupeh?’ Enyudokmori ipak mare ta piyagwreheh atin uwe, uwok. Ipak douk ta mare pupe dodogowip um rupeh hani worigun atish aria pupe roubi nyutob agundok atap uwe, uwok. Ipak purik gamo pupe yopip abom ba iyoh aria eshudok ko pugiguk pure urukumomesh. <sup>26</sup> Ipak douk putik armiguhw hwohwebur iruhw iri. Ogwoguh madae hwu worigun uwe, uwok. Aria ogwoguh madae hutorumogun ba hugunubuk shawok worigun ati urupat uwe, uwok. Ogwoguh douk ipakin Yaken nape heven iri nukoguh worigun. Aria ipak douk peshagrakuk armiguhw, aka uwok? <sup>27</sup> Aria douk enen um ipak enyenyish urkum apahw shor shunak yoweshum ta nyupe anagun shopunek banogun nyutobigun nyupe agundok atap nyishagrakuk abudok nyutob douk ko nyugok obi? Namudok ta uwok.

<sup>28</sup> Aria umum maresh ba ipakish urkum apahw yowesh um rupeh? Ipak ko putik kabi da eshudok wanorish aruruhish shatogur um. Eshesh douk shatogur mumam? Eshesh madae shunek enen debeinyi mour uwe, uwok. Eshesh madae shenek rupeh uwe, uwok. <sup>29</sup> Aria douk eik yakrip ipak, seiwok King Solomon nere sabaihwi yopuyopuhwi ananihw suruhw ba uwok, eshudok aruruhish shenek uhwin um Solomon ananihw suruhw. <sup>30</sup> Aria douk aruhudok uturuh hape ihigunmorim, aria nuhut atin arpesh ta shutuporuh aria shuwashoruh um nyih hunuruh. Aria aruhudok uturuh douk Iruhin naginohwaruh. Namudok aria ipak armam armago papeum shokwinyi bilip meyoh, ipak douk gamo pudukemesh namudok, Iruhin ta gamo nuginohw ipak shopunek. <sup>31</sup> Namudok aria ipak mare ipakish urkum apahw shor shunak yowesh aria pukana, ‘Ta apak muwok maresh? Ta apak mu-

wok marabar abar? Ta apak mure mareh rupeh? Uwok.’<sup>32</sup> Eshesh eshudok madae shudukemesh um Iruhin iri eshesh ko esheshish urkum apahw ta yowesh um shurim eshudok ihish eneshenesh. Douk ipakin Yaken nape iruhw heven iri anan iganigadae nadukemesh jurug um eshudok ihish eneshenesh ipak wokeshi.<sup>33</sup> Aria douk nyarik iri mugu ipak ta ko gamo punekenyi douk nyakri namudok. Ipak pupe dodogowip atip um puwish agundok Iruhin nape Debeini um ananish arpeshtum um aria punek yopihi atih aih. Ipak purik punek enyudok aria ihishmorim eneshenesh eshudok ta anan nukepesh shopunek um ipak.<sup>34</sup> Namudok aria ipak mare urkwip aparuh yowesh um maresh ta shutogur nuhut, uwok. Umum maresh, eneshenesh ko shutogur nuhut iri nyunekesh wokish shutogur nuhut. Aria maremaresh eneshenesh shakana shutogur doukih nyumnah iri nyunekesh wokish shutogur douk.”

## 7

*Jisas Nakripesh um maresh Shuduk Heh Um Kupaishi Arpeshtum Shenek Yoweishi Inahos Um*

*(Luk 6:37-38, 41-42)*

<sup>1</sup> Aria Jisas nakri namudok, “Ipak mare pusuhw wis ba puduk heh aria baraen um kupaishi ba pakana eshesh da yoweishi, uwok. Ipak penekesh namudok aria Iruhin ko ta nenekesh namudok atin um ipak shopunek.<sup>2</sup> Iruhin ko nusuhw wis aria nudok hah aria baraen um ipak kabi da ipak penekeshum kupaishi arpeshtum. Aria ahudoki atatahih aih, baraen atish ipak da penekesh um kupaishi arpeshtum iri, ahudok atatahih aih, baraen atish ko Iruhin nutanam nenekesh um ipak namudok atin shopunek.

<sup>3</sup> “Umum maresh, ba ipak patik mehimainyi nyubuhasin nyor ipakin anokwinen ananip nabep iri, aria ipak da madae urkwip purum debeipi rowogip aidap da por ipakis nabes iri?

<sup>4</sup> Aria douk aidap por ipakis nabes, aria umum maresh ba ipak ta pukrip ipakin anokwinen, ‘Anokwin, eik yakana

itukuk nyubuhastum da shor nyakip nabep iri?”<sup>5</sup> Ipak douk penek rohwh iri aria pagiyagigi. Riguk ipak ta putukuk debeipi rowogip aidap por ipak kanak ipakis nabes iri ba jurug. Aria kwehig ba gamo putik aria ko putukuk shokushi nyubuhastum da shor ipakin anokwinen ananip nabep iri.

<sup>6</sup> “Ipak mare puhur yopiyopishi eneshenesh shugraeshum Iruhin iri, aria puko nubagwesh. Umum maresh, nubag ta gutanom aria gunatuk ipak. Aria ipak mare puwashok yopiyopibi ipakib weiyoub bunam burghw. Umum maresh, ogwogwuhw ta hwusish weiyoub hurukutunab hwukwu ohwip.”

*Jisas Nakripesh Um Shenek Beten Um Iruhin Aria Ta Nukesh Yopiyopishi Eneshenesh*

*(Luk 11:9-13)*

<sup>7</sup> Aria Jisas nakri namudok, “Ipak penek beten aria porig Iruhin um ta nukep eneshenesh, aria anan ta nekepesh. Ipak penek mour dodog um purim eneshenesh aria ta putrish. Ipak pubo wit, aria Iruhin ta nujik wit um ipak.<sup>8</sup> Ihish arpeshtum shenek beten um Iruhin iri, eshesh ta shurao eneshenesh. Arpeshtum mour dodog um shurim eneshenesh iri, eshesh ta shutrish. Arpeshtum ko shubo wit iri, Iruhin ta nujikomesh wit.

<sup>9</sup> “Aria ko enen batowin um enen arpen um ipak ko nyorig enenyin yaken um nuken bret, aria ko yakenomen nuken utomum batowin aka? Namudok ta uwok.<sup>10</sup> Aria ko batowin nyorig yaken um nuken anar eyur, aria ko yakenomen nuken anar yowehi yur aka? Namudok shopunek ta uwok.<sup>11</sup> Ipak yakenyim penek sabaishi yoweishi eneshenesh iri agudok nahobig, aria ipak madae pigiyagim batowish uwe, uwok. Aria ipak padukemesh um pukesh yopishi eneshenesh um ipakish nugashish. Namudok aria ipak ta gamo pudukemesh namudok, ipakin Yaken da nape heven iri anan ta nunadudareh um nukep yopiyopishi eneshenesh um arpeshtum shenek beten um anan iri.

<sup>12</sup> “Namudok aria ihih yopihi aih ipak pakana ta kupaishi arpeshtum shenekeh um



ipak, aria ehudoki atih yopihi aih ipak ta punekkeh um kupaishi arpesh shopunek. Enyudok douk baugenyum baraan um lo, aria enyudok douk shopunek baugenyum baraan um seiwok profet hakriyenyi.”

*Jisas Nakripesh Um biyeh Yeh  
(Luk 13:24)*

<sup>13</sup> Jisas nakri namudok, “Ipak punak puwish atudok shokwuti wit. Aria wit douk tunam yoweih yah ta punak puwishukuk ahi ahudok debeih yah, douk sabaishi arpesh shatik shokubur um shakana shigimoh. <sup>14</sup> Aria wit tunam abrudok yopuburi wabur iri um arpesh shunak shupe wosik yopinyi poe iri, atudok wit shokukutet abom iri, aria yah hunam abrudok wabur iri shopunek sabaishi arpesh madae shigimoh uwe, uwok. Aria douk atin atin arman armatok wosik shatik shadukemesh aria shagim ahudok yah.”

*Apak Ko Gamo Mudukemesh Um Amudok Henek Rohw Aria Hagiyagigi Profet Um Amamin Baraan  
(Luk 6:43-44, 13:25-27)*

<sup>15</sup> Aria Jisas ta nakri namudok “Ipak ta gamo pudukemesh um amudok hagiyagigi profet. Amam ko hiyagwreh yopinyi baraan um honuk ipak. Amam hakana ta hiyagwreh higiyagig um ipak aria honunip. Amam kabi da wanarig nubag um gwure sipsipihw yegenyihw, aria ta gwunak huruhuruk um eshesh sipsipahos aria ta gwusuwesh. <sup>16</sup> Ipak ta ko putik kabi da hiyagwreh henek eneshenesh um aria ta pudukemesh, amudok da hagiyagigi profet, aka uwok? Aria ko pudukemesh. Arpesh ta shunam segego watogur-aruhi madururuh aria ta shudi wainip shuruwep, aka? Aria arpesh ta shakana shudi shuruwep peir rowog da nyunuhwarom fik iri, aka ta shunam nyugwugwus-iruhi yoweiruhi utoruh? Namudok uwok. <sup>17</sup> Namudok atin ihigosum yopugosi rowos sobuki yopipi shuruwep. Aria yoweigosi rowos sobuki yoweipi shuruwep. <sup>18</sup> Yopugosi rowos ko mare subuki yoweipi shuruwep. Aria yoweigosi rowos ko mare subuki yopipi shuruwep. <sup>19</sup> Ihigos rowos da

madae subuki yopipi shuruwep iri, eshesh ta shubro-ogos aria shuwashogos sunam nyih ko hunugos. <sup>20</sup> Namudok aria ipak ta gamo putik amam da henek eneshenesh um aria hiyagwreh um aria ta pudukemesh um amudok henek rohwa ba hagiyagigi profet.”

*Jisas Nakripesh Um Eshudok Arpesh Anan Ko Mare Nuhwawesh Ananish Arpesh Iri*

*(Luk 13:25-27)*

<sup>21</sup> “Ipak mare pur urkum apahw namudok. Ihish arpesh da shuhware, ‘Debeini, Debeini,’ aria eshesh ta shunak shuwish agundok Iruhin nape Debeini um ananish arpesh shapeum heven, uwok. Arpesh shagipesh eikin Yain ananin baraan iri aria ananish urkum apahw shakri um gani heven, eshesh atish ko shuwish agundok Iruhin nape Debeini um ananish arpesh um. <sup>22</sup> Nohudok nyumnah Iruhin ananish kwotogwih nyumnah, sabaishi arpesh ko shukrip eik namudok, ‘Debeini, Debeini,’ apak seiwok masuhw nyakin mour profet um nyakin nyeigur. Umum nyakin nyeigur apak mohiah yoweishi sagabehos. Umum nyakin nyeigur apak menek Iruhin atun neneken iri mour. <sup>23</sup> Aria um abudok nyutob eik ko ikripesh namudok, ‘Eik madae idukem ipak uwe, uwok. Ipak eshudok arpesh da apa pape penek yoweishi inahos atish iri, ipak karuwokuk um eik!’ ”

*Jisas Nakripesh Wobuwobren Baraan Um Biom Armam Harok Urusag Iri  
(Luk 6:47-49)*

<sup>24</sup> Jisas nakri namudok, “Ipak amiapen punnek enyudok eikin baraan iri aria pigipeshen, enyen kabi da enen arpen yopugi barag gorengi, nyarok enyenyit urupat totem utaborigunum. <sup>25</sup> Aria eshah harari, dodogowinyi uhwin nyahur, aria uhwin eshah shabo atudok urupat. Aria atudok urupat madae tutu uwe, uwok. Umum maresh? Arpen nyarok urupat utabor bor amnab iri buwapom urupat aria dodogeshit atut. <sup>26</sup> Aria arpen da nyemnek enyudok eikin baraan aria madae nyigipeshen, enyen kabi da enen nyogugaki arpen nyarok enyenyit

urupat totem arukot atut takusum. <sup>27</sup> Aria debeishi uhwin eshah shatogur aria debeibusi worubus sawori, aria shadigur atudok urupat. Aria atudok urupat tanadigur tabuh takus atap aria tutukarot yowiyokuk.”

### *Jisas Ananin Dodog*

<sup>28</sup> Aria Jisas neyatok ihin baraen um eshudok eneshenesh, aria ihish armam armago esheshish urkwip aparuh shakitak yowiyokuk um ananin baraen. <sup>29</sup> Umum maresh? Anan madae niyagwreh nukesh skul kabi da amudok henek skulumesh um Iruhin ananin lo iri uwe, uwok. Aria anan da neyagwreh kabi da anan debeini morim.

## 8

### *Jisas Nagapesh Anan Um Ehudok Yoweihi Arugeh Lepra Hapenyman Iri Arman*

*(Mak 1:40-45; Luk 5:12-16)*

<sup>1</sup> Aria Jisas nakitak nabuhi mihig, aria sabaishi arpesh shagipeshan shanak. <sup>2</sup> Aria anan ehudok arugeh lepra hapenyman iri nanaki um Jisas aria nabuh noduk ohrubus huruk um Jisas aria nakri namudok, “Debeini, nyak nyukri wosik um, aria nyak ko nyugapeshe aria ta eik yopuwe.”

<sup>3</sup> Aria Jisas nuwem ananis wis anudok arman aria nakripan namudok, “Eik yakri wosik um nyak nyutogur yopunyi arpen.”

Aria atub nyutob ehudok arugeh lepra haniyatokuk um anan, aria natogur yopuni arman. <sup>4</sup> Aria Jisas nakripan namudok, “Nyak ko gamo nyudukemesh. Aria mare nyukrip enen arpen um eshudok eneshenesh da shatogur um nyak iri, uwok. Nyak kare ba nyiyabig nyakihw yegenyihw um anan pris aria nyenek ofa kabi da seiwok Moses nakri um. Nyunekesh namudok um aria arpesh ko shudukemesh namudok nyakih arugeh iganigadae hatuh.”

### *Jisas nagapesh Anan Arman Douk Nenek Mour Um Anan Debeini Soldia Iri* *(Luk 7:1-10)*

<sup>5</sup> Jisas nanak nawish wabur Kaperneam aria anan debeini soldia um amam 100-poreim soldia iri um Rom esheshin ami anan nanaki aria narik Jisas debeg namudok, <sup>6</sup> “Debeini, anudok neneme mour um eik iri, arugeh hapeyan aria neshuh nakus urupat. Aria anan nemnek ananihw yegenyihw erigerishihw atuhw.” <sup>7</sup> Aria Jisas nakri namudok, “Wosik eik ko inak ba igabeyan aria yopun.”

<sup>8</sup> Aria anudok debeini soldia nakrip Jisas namudok, “Debeini, eik madae yopuwe iri uwe um nyak nyunaku nyuwish eikit urupat uwe, uwok. Nyak nyukri baraen atin aria anudok arugehin neneme mour iri ko ta yopun. <sup>9</sup> Umum maresh? Eik shopunek yenek mour um ami aria anam debeimi heyotu harig um eik. Aria eik shopunek eik kanak debeini um anam kupaimi soldia. Aria eik ikrip anan, ‘Nyak kare,’ aria anan ta nunak. Aria eik ikrip kupainari, ‘Nyak yowi,’ aria anan ta nanaki. Aria eik ikrip anudok neneme mour eik iri, ‘Nyak nyenek enyudok mour,’ aria anan ta neneken.”

<sup>10</sup> Jisas nemnek enyudok baraen aria nakitak yowiyokuk. Aria nakrip eshudok arpesh shagipeshan iri namudok, “Eik yakripep adurin baraen, eik nubo madae itik enen arpen orokohun um eshesh Israel um nyenek bilip dodog kabi da anudok arman um uwe, uwok. <sup>11</sup> Aria eik yakrip ipak, sabaishi arpesh shape nahobigos gani aun nakih-morim aria gani aun nabuhum ta shanaki, aria eshesh ta shunaki shupe shuwok worigun shuni Abraham nini Aisak aria Jekop abrudok wabur Iruhin nape Debeini um ananish arpesh shapeum heven. <sup>12</sup> Aria ipak Juda pakana puwish pupe agundok Iruhin ananish arpesh shupe um. Aria enep um ipak Iruhin ko nipuhur nuwashep putogur aduk um arukwutibur wabur. Aria nabrudok wabur eshesh ko shureh yowiyokuk aria shurpak naruh shuwegoruh.”

<sup>13</sup> Aria Jisas nakrip anudok debeini soldia namudok, “Nyak douk kare. Aria ihish eneshenesh ta shutogurum nyak kabi da nyenek bilip um.”

Aria douk abudok atub nyutob anudok arman nenek mour um debeini soldia iri arugeh hatuh aria natogur yopunyi arpen.

*Jisas Nagabe Pita Ananik Nakwurikwik Yopuk*

*(Mak 1:29-31; Luk 4:38-39)*

<sup>14</sup> Aria Jisas nanak nawish Pita ananit urupat, aria natik Pita ananik nakwurikwik kweshuhw kwotem aras, okwok da arugeh hapeyok aria okwokwihw yegenyihw juwehosihw atuhw. <sup>15</sup> Aria Jisas nasuhw okwokwis wis aria okwokwihw arugeh hatuh. Aria okwok kwakitak kwape kwonekuman Jisas worigun.

*Jisas Nagabe Sabaishi Ehudok Arugeh Henekeshi Shatogur Yopish*

*(Mak 1:32-34; Luk 4:40-41)*

<sup>16</sup> Douk wabigep hurukatin um wab aria shape sharauri sabaishi yoweishi sagabehos shapenyeshi arpes shanamari Jisas. Sharaeshi aria nakripesh atin baraan meyoh aria eshudok yoweishi sagabehos shatogur sharuwok. Aria anan nagabe ihishmorim arugeh da hapeyeshi. <sup>17</sup> Anan douk nenek enyudok um enen baraan seiwok profet Aisaia neyagwrehenyuk aria nyatogur adurin atin. Baraan enyudok, Iruhin nakri namudok, “Anan meyoh nahiyahuk yomo yomogih apakih arugeh nagabeyap um yopup.”

*Jisas Nakrium Agundok Arpes Shukri Shugipesh Anan Um*

*(Luk 9:57-62)*

<sup>18</sup> Jisas natik sabaishi arpes shanaki sheyatu shersharian aria nakrip ananim disaipel um hunam gani wobrag Galilieg waiyag. <sup>19</sup> Aria anan nenek skulumesh um lo iri nanaki nakrip Jisas namudok, “Tisa, ihigun nyak nyunak um, eik shopunek ta inamen unak atin.”

<sup>20</sup> Aria Jisas nakri namudok, “Wanarig nubag gweshuh nuwagos-igunum. Aria armiguhw huhwebur iruhw aria shopuk hweshuh was. Aria Eik Anudok Arman douk yatogur adurinyi arpen iri, eik douk urupat uwok um inak ishuh ipeum, uwok.”

<sup>21</sup> Aria kupaini arman apa nagipesh Jisas iri ta nakripan namudok, “Debeini, eikin yain watak nape. Nyak yotum eik ba inak ba itrunk anan nugok ba iroman ba iyoh aria inaki inamen unak.”

<sup>22</sup> Aria Jisas nakripan namudok, “Nyak bukeshek. Eshesh shagok iri, eshesh ko shurom eshesh kanak. Nyak yowi douk ba nyigipesh eik.”

*Jisas Naho Debeinyi Uhwin Eshah Um Jurug*

*(Mak 4:35-41; Luk 8:22-25)*

<sup>23</sup> Aria Jisas naprok nato anat bot, aria ananim disaipel shopunek hato bot aria heiran hanak. <sup>24</sup> Hanak orokohun um waiyag, aria atub nyutob enesh uhwin eshah shakitak shohur waiyag aria debeibi morub jirigarab bawish bot aria bot hurukatinyum tubuhuk waiyag. Aria Jisas anan douk neshuh notem bot. <sup>25</sup> Ananim disaipel hanak henyubarun aria hakripan hakana, “Debeini, kwakitak ba nyutaurumap. Apak hurukatinyum ko mugok.”

<sup>26</sup> Aria Jisas nakripam namudok, “Ipak panogugur um maresh? Ipak douk madae punek bilip um eik uwe, uwok.”

Nakripam namudok aria ta nakitik naho eshudok debeishi uhwin eshah shani morub. Namudok aria uhwin eshah shagok shabuh. Aria waiyag ta gabuh gor shemshem.

<sup>27</sup> Aria amam disaipel hakitik yowiyokuk ba minih ham meyoh. “Anudok meini arman aria uhwin eshah ba waiyagib morub shopunek shomnek ananin baraan!”

*Jisas Nagabe Biom Armam Yoweishi Sagabehos Shapenyam Iri*

*(Mak 5:1-20; Luk 8:26-39)*

<sup>28</sup> Aria Jisas nanak natogur gani wobur ehahum Galilieg waiyag gani Gadara esheshig nahobig aria biom armam hape wonugwegwiruh um iri hatogur hanaki hatik Jisas. Amudok biom, yoweishi sagabehos shawisham ba dodogeshim atum. Arpes shanogugur aria madae shugim nohudok yah uwe, uwok. <sup>29</sup> Amam hatik Jisas aria huhwar debeg, “Nyak Iruhin ananin Nuganin nyak nyakana nyenekap mumam apak? Abudok nyutob nyak nyanaki um nyop

nyihyahap obi nyutob da madae butogur uwe, uwok.”

<sup>30</sup> Huruk um nagundok anogwuh burguhw hwetu apa hwashohagun. <sup>31</sup> Aria eshudok yoweishi sagabehos shunokrep Jisas, “Nyak nyakana nyihyah apak mutogur munak um, aria nyak shopukap munak muwish gwagwuhwudok burguhw.”

<sup>32</sup> Aria Jisas nakripesh namudok, “Ipak togur kare.”

Aria eshudok yoweishi sagabehos shakutukuk amudok biom armam, aria shatogur shawish burguhw. Aria agwuhwudok ihigwuhw um burguhw hwahur debeg abom hwanak hwaporok hwabuh enen natogur gani yowegunum. Aria hwabuh Galilieg waiyag hwabarahuk aria hwagok.

<sup>33</sup> Amudok hape hako burguhw iri hatik namudok aria haruwok. Amam hanak hatogur wabur aria hakrip armam armago um eneshenesh da shatogur iri. Hakripesh um maresh da shatogur um amudok biom yoweishi sagabehos shapeyomi shopunek. <sup>34</sup> Aria ihish arpesih shape abrudok wabur iri shanamori Jisas. Eshesh shatrun aria shakripan um nukutukuk esheshig nahobig ba nanak kupai-gunum.

## 9

*Jisas Nagabe Anan Douk Roguhw Aiyas Shagokan Iri*

*(Mak 2:1-12; Luk 5:17-26)*

<sup>1</sup> Aria Jisas ta naprok anat bot, aria nutanam nabinawish gani wobrag Galilieg waiyag aria nanak natogur abrudok wabur da napeyabur iri. <sup>2</sup> Aria anam armam husahi anan roguh w aiyas shagokan iri notemi anas aras. Aria Jisas natik amudok da adur atin henek bilip aria nakrip anudok arugeh hapeyoni namudok, “Nuganin, nyakish urkum apahw ko shupe wosik atin. Nyakish yoweishi inahos eik douk yokweshihesh yeyatesh iyoh.”

<sup>3</sup> Aria anam douk henek skulumesh um lo iri hemnek Jisas ananin barae,

aria hiyagwreh um amam kanak namudok, “Anudok arman douk nabubunim Iruhin.”

<sup>4</sup> Aria Jisas nadukemesh um amudok amamish urkum apahw shor ahi aih aria nakri namudok, “Umum maresh? Ba ipakish urkwip aparuh yowesh um enyudok eikin barae?” <sup>5</sup> Maren barae enyen wosik shokubur um eik ta ikriyen? Wosik um eik ta ikana, ‘Eik yokweshih nyakish yoweishi inahos,’ aka douk wosik shokubur um eik ta ikana, ‘Nyak kitak ba nyurahaen?’ <sup>6</sup> Aria eik yakana ipak ta pudukemesh namudok, Eik Anudok Arman douk yatogur adurinyi arpen iri yasuhw dodogum agudok nahobig aria eik ta wosik um ikweshih yoweishi inahos.”

Aria Jisas nashakom anudok roguh w aiyas shagokan iri aria nakripan namudok, “Nyak kitak aria nyuhur nyakish shuhish, aria kare nyunam nyakit urupat!”

<sup>7</sup> Aria anudok arman nakitak nanak wabur. <sup>8</sup> Eshudok ihish arpesih shatik namudok aria shanogugur. Aria eshesh shohur Iruhin ananin nyeigur nyato gani iruhw. Umum maresh? Anan da nukesh enyudoki dodog um arpesih shenek enyudoki mour.

*Jisas Nakrip Matyu Um Nigipeshan*  
*(Mak 2:13-17; Luk 5:27-32)*

<sup>9</sup> Jisas nakutukuk nagundok aria nagim yah nanak aria natik anan narao takis iri arman, nyeigurinum Matyu, nape apa shurao takis ati urupat. Aria Jisas nakripan namudok, “Nyak yowi ba nyigipesh eik.”

Aria Matyu nakitak nanak nagipesh Jisas.

<sup>10</sup> Hanak aria abudok nyutob Jisas nani ananim hantorum hape Matyu ananit urupat hape hawok worigun. Worobaimi harao takis iri hani eshudok shenek yoweishi inahos iri shanak shanamam shape shawok worigun. <sup>11</sup> Aria anam Farisi hatik namudok aria harig ananim disaipel namudok, “Yaipo, ipakin Tisa douk nani amam harao takis iri hani eshudok shenek yoweishi inahos iri shape

atugun aria shawok worigun. Anan nenekesh namudok um maresh?”

<sup>12</sup> Jisas nemnek enyudok baraen aria nakri namudok, “Arpesh arugeh wokeshi, eshesh madae shunam dokta uwe, uwok. Eshudok arugeh hapeyeshi atish eshesh ko shunak um shutik dokta. <sup>13</sup> Ipak kare ba putik baraen nyape Iruhin ananik buk, ‘Eik yanaiwos um ipakin wehinyi ofa ipak apa penekenyi. Eik yakri abom um ipak penek giha aria pusuhw yopuhwi ruwohw um ihish arpesh.’”

Aria Jisas ta nakri namudok, “Eik madae inamorim ihwar yopishi arpesh atish uwe, uwok. Eik yanamorim ihwar eshudok arpesh shenek yoweishi inahos iri um shutanam shukon aparuh Iruhin aria shutogur ananish arpesh.”

*Jisas Nakri pesh Um agundok Shashakur Um Worigun Eneh Nyumneh Aria Shunek Beten Atin Um (Mak 2:18-22; Luk 5:33-39)*

<sup>14</sup> Aria abudok nyutob Jon nenek Bap-taisumesh iri ananim disaipel hanamori Jisas aria harigan namudok, “Umum maresh? Ba apak mani Farisi apak mushakur um worigun, aria nyakim disaipel madae hushakur uwe, uwok?”

<sup>15</sup> Aria Jisas nakripam wobuwobren baraen namudok, “Abudok nyutob anan arman narao onok armatok obi aria ta ananish wanaruh ta urkwip aparuh yoweshum anan douk wata nani eshesh shapeum aka uwok? Namudok ta uwok. Aria anob nyutob, enesh arpesh shunaki shurao anudok arman shunakuk aria anan madae ta nini ananish wanaruh shupe, aria eshesh ta shushakur um worigun.

<sup>16</sup> “Madae enen arpen ko nyuhur anap namupi rupahip aria nyutapeyop um onohw umunihw um jugwaitori saket. Enyudok arpen nyibirak namudok akure, aria ko nyukrup saket aria apudok rupahip ko punokunish aria pub-rig saket aria umunihw ko hwutogur dedebew atuhw. <sup>17</sup> Aria madae enen arpen nyushar namuni wain um jug-waipi memeip munuhwip uwok. Enyudok arpen nyenekesh namudok, aria apudok munuhwip ta purup aria wain

ta nutaurakuk nubuh amnab aria apudok memeip munuhwip ta yowep shop-unek. Namudok aria enyudok arpen ko nyushar namuni wain nubuh namupi memeip munuhwip aria ta biyebiyesh shupe wosik atin.”

*Jisas Nagabe Onok Armatok Douk Kwasusuhw Ananish Rupah Iri Aria Nohuri Onok Batowinyik Kwagok Iri Kwakitak (Mak 5:21-43; Luk 8:40-56)*

<sup>18</sup> Jisas wata apa niyagwreh nani Jon ananim disaipel aria anan debeini douk debeini um atudok eshesh Juda shantor-um ati urupat iri nanaki natu nabuh noduk ohrubus hurukatin um Jisas ananigas aiyas. Aria nakri, “Eikik nugawik douk atin kwagok. Eik yakri wosik um nyak nyunaku nyuwem nyakis wis iruh-wik um aria ta kwukitak.”

<sup>19</sup> Aria Jisas nakitak nunaman hunak aria ananish disaipel shopunek sheiran shunak. <sup>20</sup> Aria onok armatok okwok sei-wok arugeh hapeyok 12-poreish kwarahos um owishibor banakok. Aria okwok kwanaki agabinum Jisas aria kwasusuhw anagas um ahudok rouhi rupah anan nenekah iri. <sup>21</sup> Okwok da apa kwaneyagwreh kwakri, “Ikri isusuhw ananish rupah atuh um, aria eik ta yopuwe.”

<sup>22</sup> Aria Jisas natanam natruk aria nakripok nakri, “Nugawik, nyakihw apahw mare yowehw, uwok. Nyak nyenek bilip um eik, aria nyak ta yopin.”

Aria abudok atub nyutob okwok owishibor tukaruboruk aria okwok ta yopuk. <sup>23</sup> Aria Jisas nanak natogur anudok debeini ananit urupat aria natik eshesh armam armago shape apa shereh. Amam apa hohapur buwaen aria apa shereh shanoruwor shabo sawiyeguh. <sup>24</sup> Aria Jisas nakri pesh namudok, “Ipak ihp-morim kita togur aduk ba punak. Okwudok batowinyik madae kwugok uwe, uwok. Okwok da kweshuhw meyoh.”

Aria eshesh shagokoruh anan shabo brakahas. <sup>25</sup> Aria nakrip ihishmorim um shutogur shupe aduk aria Jisas nawish nasuhw okwokwis wis aria nakwuhur kwakitak kwape yopuk. <sup>26</sup> Namudok aria

baraen nyanak ihirub warub bape abudok amnab iri um agundok Jisas da nohur okwudok kwagok iri kwakitak kwape wosik atin um.

### *Jisas Nagabe Biom Nabes Seshuhomi*

<sup>27</sup> Jisas nakutukuk nagundok aria nagim yah nanak. Aria biom nabes seshuhomi hagipeshan aria hohwar namudok, “Nyak Devit Ananin Barhonin, nyak ko nyenek gihaum ohwak biohw.”

<sup>28</sup> Anan nanak nawish urupat aria amudok biom nabes seshuhomi hanamori anan. Aria Jisas narigam namudok, “Ipak biom penek bilip namudok eik ko wosik inek enyudok mugu nyutogur adur atin, aka uwok?”

Aria amam biom hakripan namudok, “Adur atin Debeini. Ohwak biohw wonek bilip um nyakin dodogum nyugabeyohw.”

<sup>29</sup> Namudok aria anan nuwem ananis wis um amamis nabes aria nakri namudok, “Ipak biom penek bilip um eik. Namudok aria yakri ipak ta putrugun.”

<sup>30</sup> Aria amamis nabes ta yopus sanapok. Aria Jisas nakripam dodogeshinyi baraen um amam biom namudok, “Ipak biom mare ta pukrip enen arpen nyudukemesh um eik yagabe ipakis nabes yopus um uwe, uwok.”

<sup>31</sup> Aria amam hanak hakrip ihishmorim armam armago um ihirub warub bape abudok amnab iri um ihin yopinyi mour Jisas apa nenekenyi.

### *Jisas Nagabe Anan Madae Niyagwreh Uwe Iri*

<sup>32</sup> Amudok biom hakutukuk Jisas apa hanaku aria enesh arpesh sharauri anan arman um Jisas. Anan douk enen yoweinyi sagab nyapeyan aria madae niyagwreh uwe, uwok. <sup>33</sup> Aria Jisas nahiyahuk enyudok yoweinyi sagab aria anudok madae niyagwreh iri ta niyagwreh. Aria ihish armam armago shanosorim esheshish urkwip aparuh aria shakri, “Seiwok madae enen namudokinyi mugu nyutogur agudok nahobig Israel uwe, uwok.”

<sup>34</sup> Aria amam Farisi hakri namudok, “Anan douk nahiyah yoweishi sagabehos

um anan da narao dodog um enyudok debeinyi nyarik iri yoweinyi sagab um ihishmorim yoweishi sagabehos.”

### *Jisas Nenek Gihaum Arpesh*

<sup>35</sup> Aria Jisas narahaen nanak ihirub warub debeirubi aria shokurubi. Aria anan nenek skulum ihish armam armago numun urusag eshesh Juda shantorum ba sheneyagwreh baraen-ogwi. Anan nakripesh um yopinyi baraen um arpesh shuwish um agundok Iruhin nape Debeini um ananish arpesh um aria anan nagabe ihishmorim arugeh da hape esheshiruh yegeshiweruh iri.

<sup>36</sup> Anan natik sabaishi armam armago aria anan nenek debeinyi gihaum eshesh. Umum maresh? Esheshish urkwip aparuh madae shupe wosik uwe, uwok. Eshesh shape kabi da sipsipahos douk arman madae nupe ba niyohesh iri uwe, uwok. <sup>37</sup> Namudok aria nakrip ananim disaipel, “Sabaiguni worigun jurugigun nape nubarig aria arpesh ta shenek mourum shurimi agundok worigun iri madae sabaishi uwe, uwok. <sup>38</sup> Aria ipak ko penek beten um agudok nubarigin Debeini Yaken aria porigan ta neshopoki eshudok ko shunaki shenek mour um shutorumori ananigun worigun shugunubuk atugun.”

## 10

### *Jisas Ananim 12-poreim Aposel Amamish Nyeiguhw*

(Mak 3:13-19; Luk 6:12-16)

<sup>1</sup> Aria Jisas nahwar ananim 12-poreim disaipel hanaki heyotu atugun aria nakom ananin dodog um huhiyah yoweishi sagabehos shape arpesh iri aria hugabe ihih arugeh. <sup>2</sup> Amudok Jisas ananim 12 poreim disaipel douk nahwaram aposel iri amamish nyeiguhw eshudok. <sup>10:2</sup> Narik iri anudok Saimon douk shahwaran Pita; anokwinen Andru; Jems nani anokwinen Jon, Sebedi ananim nagamim. <sup>3</sup> Aria Pilip nani Bartolomyu aria Tomas aria Matyu, anan da nurao takis iri. Aria Jems Alfius ananin naganin,

10:2 **10:2** aposel douk nyakri eshesh Iruhin neshopokesh um shukripesh ananin yopinyi baraen.

aria Tadius<sup>4</sup> aria Saimon anan da natogur Selotip<sup>10:4</sup> awirop iri, aria Judas Iskariot, anan da kweipon nuwerek Jisas um ananim horim iri.

*Jisas Nakom Mour Ananim 12-poreim Aposel*

*(Mak 6:7-13; Luk 9:1-6)*

<sup>5</sup> Jisas neshopok amudok aposel hanak aria nakom enyudok baraan, “Mare punam eshudok madae shudukemesh um Iruhin iri esheshigos nahobigos aria Samaria esheshirub warub, uwok. <sup>6</sup> Ipak ta punam nahobig Israel ba putik eshudok arpesh da shape kabi da shanatukuki sipsipahos um. <sup>7</sup> Ipak punak aria pukripesh namudok, ‘Abudok nyutob um arpesh shuwish um agundok Iruhin nape Debeini um ananish arpesh shapeum heven douk hurukum butogur!’ <sup>8</sup> Ipak punak pugabe arugeh hapeyeshi aria ta puhuri arpesh shagok iri aria piyatak ehudok arugeh lepra hapeyeshi shutogur yopish aria puhiyah yoweishi sagabehos da shape arpesh iri. Eshudok eneshenesh ipak paraesh iri, douk puraesh meyoh aria madae putorish pukwu utabor uwe, uwok. Namudok aria ipak ta pukesh meyoh um arpesh. Ipak ta mare puhwar arpesh um shukep utabor um eshudok eneshenesh uwe, uwok.

<sup>9</sup> “Aria ipak ta mare puruk gol, utabor, siliwa aka kapaibor utabor banagos uwe, uwok. <sup>10</sup> Ipak ta purahaen um mare pusuhw banagos uwe, uwok. Aria mare pusuhw biobiog siotog, su aka butip, uwok. Arman nenek mour iri, eshesh ko shubiroman um worigun nini enesh eneshenesh.

<sup>11</sup> “Aria punak puwish anabur debeiburi wabur aka anabur shokuburi wabur, aria putrugun ba gamo pudukemesh, meimeishi da shape abrudok wabur iri da yopishi arpesh. Aria ipak puni enyudok arpen atin pupe arigaha nyumnah ipak pakana ta punak ahi. <sup>12</sup> Ipak punak puwish anat urupat, aria ipak ta pukrip arpesh shape atudok

urupat iri namudok, ‘Iruhin ko gamo nutaurum ipak.’ <sup>13</sup> Aria eshudok shape atudok urupat iri eshesh shukep aparuh shukri wosik shunadudareh um ipak pupe puni eshesh, aria enyudok ipakin yopinyi baraan ko nyupe um eshesh. Aria eshesh ko mare shunadudareh um ipak uwe, aria ipak ko ta putanam purawi ipakin yopinyi baraan. <sup>14</sup> Aria ta anan arman ko nunoiwos um ipak punam ananit urupat, aria nonoiwos um numnek ipakin baraan, aria nyutob ipak pukuna pukitakuk atudok urupat aka wabur obi nyutob aria ipak pugudukuk nypruk kwape ipakiruh yeriweruh iri. Punelesh namudok um eshesh shutrip aria shudukemesh shukri eshesh douk shenek yoweishi inahos iri. <sup>15</sup> Eik yakripep adurin baraan, nahudok nyumnah Iruhin nakri um ko nenek kwotog um armam armago um, debeinyi amain ko ta nyutogur um eshesh shape abrudok wabur iri ko nyenek uhwin um amain seiwok nyatogur um eshesh shape narbudok warub Sodom bani Gomora iri.”

*Jisas Nakrip Ananim Aposel Um Wanohw Baraan Ko Shutogur Um Amam Iri*

*(Mak 13:9-13; Luk 21:12-17)*

<sup>16</sup> Aria Jisas nakri namudok, “Ipak punnek. Eik ko yeshopokep panak kabi da sipsipahos shunak orokohun um wanarig nubag. Aria ipak ta penekesh kabi da yuguhw um, aria ipak ta gamo pudukemesh um eneshenesh ipak pakana penekeshi. Aria ipak ta pugipesh ogwuhwudok maishubiguhw armiguhw hwenekahi aih aria ipak ta mare urkwip aparuh shur um penek enen yoweinyi mugu uwe, uwok. <sup>17</sup> Ipak ko pudukemesh um arpesh. Eshesh ta shenemep kwotog, aria eshesh ta shupruk ipak gani numun eshesh Juda shantorumogwi urusag. <sup>18</sup> Eshesh ko urkwip aparuh shur um shenek eikin nyeigur nyubuh atap, aria shurao ipak shunam gavman

**10:4** **10:4** Enyudok nyeigur Selot douk shahwar anap awirop um armam um eshesh Israel. Amudok armam douk dodogowim atum um hakri eshesh Israel ta shurao independens. Hakri hanoiwos um shupe shukamum eshesh Rom uwe, uwok. Aria Saimon douk anan um amudok armam shahwaram um Selot iri.

aria amam king-omi. Namudok aria ta ipak ko pukrip amudok debeimi um eikin yopinyi baraan, aria um eshudok madae shudukemesh um Iruhin iri shopunek.

<sup>19</sup> Aria nyutob eshesh shurao ipak shunam um kwotog, ipak mare punogugur aria urkwip aparuh shur yowiyokuk namudok, 'Apak ta miyagwreh maren baraan? Uwok.' Douk abudok nyutob bakana butogur aria Iruhin ko niyabigep um maren baraan ipak ta piyagwrehen iri. <sup>20</sup> Umum maresh? Ipak kanak ta mare piyagwreh, uwok. Ipakin Yakenin Mishin ko nyukwu ipakig nukwatog aria nyiyagwreh.

<sup>21</sup> "Arpesh ko shenek kwotog um esheshim anokwihem aria shukripesh um shubo amudok anokwihem hugok. Aria amam yakenyim ta henek apunih aih um amamish nugashish. Aria eshesh nugashish ta shutogur horin horik um esheshish amakek yaken aria shukrip kupaishi arpesh um shesh shugok. <sup>22</sup> Aria ihish arpesh ko urkwip aparuh amu yowesh um ipak. Umum maresh? Eikin nyeigur nyape um ipak. Aria armam armago ko shiyotu dodog um bilip arigaha ko hahi hagiguki nyumnah hutogur obi nyutob, Iruhin ta ko nutanam nurao eshesh. <sup>23</sup> Aria um eshesh armam armago um anabur wabur da shenekesh yowiyokuk um ipak um, aria ipak ko puruwok punam kupaiburi wabur. Eik yakripep adurin baraan, ipak ta ko mare piyatak mour um Israelirub ihirub warub aria Eik Anudok Arman yatogur adurinyi arpen iri ko ta itanamori. <sup>24</sup> Eshudok batowish shenek skul iri madae shenek uhwin um esheshin tisa uwe, uwok. Aria eshudok shenek mour um kupaishi iri madae shupe iruhw shenek uhwin um esheshin debeini uwe. <sup>25</sup> Eshudok batowish shenek skul iri ta shutogur kabi da esheshin tisa um, aria wosik. Aria ta eshudok shenek mour um kupaishi iri shutogur kabi da esheshin debeini um, aria namudok shopunek

wosik. Eshesh nubo shakon nyeigur Belsebul um urupatin yaken,<sup>10:25</sup>namudok

aria apak madukemesh, eshesh ko shukri sabaishi yoweishi nyeiguhw um eshudok ananishi shape urupat iri."

*Jisas Nakripesh Um Ta Shunogugur Um Iruhin Atun*  
(Luk 12:2-7)

<sup>26</sup> Aria Jisas nakri namudok, "Ipak mare punogugur um arpesh da shakana shununu ipak iri. Ihish eneshenesh da shunushapom shakus iri ko shutogur yopugunum. Aria ihin baraan da nyunabeshuk iri ko arpesh shudukemen.

<sup>27</sup> Baraan eik yakrip ipaken wab iri, ipak ko piyagwrehen nyumnah. Aria baraan ipak ta shokubur pumneken iri, aria ipak pukih putem iruhw modukwigum urusag aria pukrip ihish armam armago. <sup>28</sup> Aria ipak mare punogugur um arpesh da shabo abudok amnabihw yegenyihw hwagok iri, aria eshesh ta mare shubo enyudok mishin nyor numun ipak iri. Uwok. Ipak ta punogugur Iruhin atun. Anan atun ko nununu abudok amnabihw yegenyihw aria mishin shopunek gani ehudok yoweihi nyihiburi wabur hel.

<sup>29</sup> "Ipak padukemesh, arpesh da shator bioguhw shokuguhwi armiguhw um 10-poreibor utabor. Aria ipakin Yaken da gamo apa neyoh ipak um agwuhwudok armiguhw. Aria da anan nunoiwos akure, aria ta mare anar um agwuhwdok armiguhw ta rugruki rubuh amnab uwe, uwok. <sup>30</sup> Aria shopunek, Iruhin da iganigadae nadareh ihirub ehirub betem ipakigos baragos iri, aria anan gamo nadukemesh um ipak. <sup>31</sup> Namudok aria ipak mare punogugur. Ipak penek uhwin um sabaigwuhwi shokwugwuhwi armiguhw."

*Apak mare Murao Abraen Um Mukripesh Um Agundok Apak Mape Jisas Ananish Arpesh Um, Uwok*  
(Luk 12:8-9)

<sup>32</sup> Aria Jisas nakri namudok, "Ihish arpesh douk shuwereh shukrip kupaishi um shape shani eik iri, eik shopunek ko iwereh eshesh um ikrip eikin Yaken nape



arpesh. <sup>33</sup> Aria ihish arpesh douk shuwereh baraen shukrip kupaishi namudok eshesh douk madae shupe shuni eik iri, eik shopunek ta ko ikrip eikin Yaken nape heven namudok eshudok madae eikish arpesh uwe, uwok.”

*Jisas Narawi Wanohw Aria Yopinyi Poe Uwok*

*(Luk 12:51-53, 14:26-27)*

<sup>34-35</sup> Aria Jisas nakri namudok, “Ipak mare pure urkwip aparuh namudok eik douk yanaki um iyatak wanogwiruh agudok nahobig, uwok. Eik madae inamori um iyatak wanohw, uwok. Eik douk yanamori inek ihishmorim arpesh shukitak shurpak.

‘Arman ko nuhwar ananin yaken horin, aria nagawik ko kuhwar okwokwik amakek horik,

aria armatok kurao arman iri ko kuhwar okwokwik nakwurikwik horik,

<sup>36</sup> aria raminen ananish wanaruh ko shutogur ananish horik horin.’

<sup>37</sup> “Meishi arpesh da esheshish urkum apahw shakri shunawasham esheshish amakek yaken abom iri, aria madae shukri shunawasham eik abom iri, eshesh ko mare shupe kabi da eikish arpesh um uwe, uwok. Aria meini arman da nakri nunawasham ananin naganin aria ananik nugawik abom iri, aria anan da madae nukri nunawasham eik abom iri, anan ko mare nupe kabi da eikin arpenyin um uwe, uwok. <sup>38</sup> Aria meinyi arpen da madae nyusah enyenyin rowogin kruse aria nyigipesh eik iri, aria nyanaiwos um kupaishi shen nyugok um agundok nyagipesh eik um, enyudok arpen ko mare nyupe kabi da eikin arpen um uwe, uwok. <sup>39</sup> Aria meishi arpesh ko esheshish urkum apahw ta shukri um shuhogom eshesh kanak atin um esheshin yopinyi poe atin iri, aria eshesh ko shunak yowegunum shuwishuk. Aria meishi arpesh ko esheshish urkum apahw shukri shunawasham eik aria kupaishi shesh shugok um agundok shakana shugipesh eik um, eshesh ko shurao yopinyi poe.”

*Arpesh Shutaurum Enesh Krai Ananish Arpesh Iri Iruhin Ko Nukesh Yopishi Eneshenesh*

*(Mak 9:41)*

<sup>40</sup> Aria Jisas nakri namudok, “Meishi arpesh ko shuhwar ipak aria shenek yopihi aih um ipak, eshesh da shuhwar eik aria shenek yopihi aih um eik. Aria meishi arpesh shenek yopihi aih um eik, eshesh shenek yopihi aih um Iruhin. Umum maresh, anan da neshopok eik ba yanaki. <sup>41</sup> Aria meishi arpesh da shutik anan profet aria shukri, ‘Eik yakri um itaurum profet’, anan douk yopuni arman narahaen nenek Iruhin ananin mour iri aria eshesh sharauri anan profet um urupat aria sheyehan shatauruman, aria Iruhin ko noko eshudok arpesh eshudok atatahish yopishi eneshenesh kabi da amam profet haraesh iri um. Aria meishi arpesh shutik anan yopuni arman aria shukri, ‘Anudok arman douk yopuni arman, aria eshesh sharawi anan nanaki urupat aria sheyehan shatauruman,’ aria eshesh ko shurao yopishi eneshenesh kabi da anudok yopuni arman nuraesh iri um. <sup>42</sup> Aria meishi arpesh shutik enesh eshudok nyeiguhw wokeshi arpesh aria shukri, ‘Eshudok arpesh Jisas ananish disaipel,’ aria shuken eneh abarih um enen arpen nyape nyagiguki um ihish disaipel douk eikishi, aria eik yakri pep adurin atin baraen, eshudok arpesh esheshish yopishi eneshenesh ko mare shunatakuk uwe, uwok.”

## 11

*Jon Nenek Baptaisumesh Iri Neshopok Ananim Disaipel Hanak Hatik Jisas*

*(Luk 7:18-35)*

<sup>1</sup> Aria Jisas nakrip ananim 12-poreim disaipel um enyudok baraen da nenek skulumam-enyi jurug, aria nakutukuk abrudok wabur aria nunam debeirubi warub bape agundok iri aria nenek skulum arpesh nakripeshum Iruhin ananin baraen.

<sup>2</sup> Jon nape shunuweshik-ati urupat, aria nemnek baraenyum ihin mour da Krai nenekenyi, aria neshopok ananim disaipel um hunak hutik Jisas. Aria Jon

nakrip ananim disaipel um <sup>3</sup> horig Jisas namudok, “Nyak kripap. Nyak da enyudok arpen Jon nakripap um ko nyunaki iri, aka apak mupe ba mubeim enen kupainyi?”

<sup>4</sup> Aria Jisas nakripam namudok, “Ipak kare pukrip Jon um ihish eneshenesh ipak pemnek baraenyumeshi aria patrisi. Eshudok douk namudok. <sup>5</sup> Eshesh nabes seshuheshi ta shatrugun, aria eshesh aiyas yowegaseshi sharahaen. Eshudok yoweihi arugeh lepra hapeyeshi yopish, aria arigos seshukeshi ta shemnek. Eshudok shagok iri ta shakitak, aria eshudok eneshenesh wokesh iri shemnek Iruhin ananin yopinyi baraaen. <sup>6</sup> Aria arpesch shutik eik aria shususuw eikin baraaen dodog shigipeshen aria eshesh ko gamo shunadudareh.”

<sup>7</sup> Abudok nyutob Jon ananim disaipel hape hanak obi, aria Jisas nakitak nakrip sabaishi arpesch um Jon namudok, “Nabudok nyutob ipak panak patik Jon agundok wehigunum douk arpesch wokagunum, ipak douk panak um putik maresh? Panak um putik anah aruh da uhwin nya-susuoh ba nyaunihoh iri aka? Namudok ta uwok. <sup>8</sup> Ipak da panak um pakana putik maresh? Douk ipak panak um putik anan arman nore yopiyopihi rupeh iri aka? Namudok ta uwok. Arman hore yopiyopihi rupeh iri, amam da hape king-omi amamig urusag. <sup>9</sup> Aria umum maresh ba ipak punak? Punak um putik anan profet aka? Namudok um enyudok douk adur atin. Aria eik yakrip ipak, douk anudok profet Jon anan nenek uhwin um ihim kupaimi profet-omi. <sup>10</sup> Umum anudok arman atun ba da anan profet nenyem baraaen nyetem Iruhin ananik buk iri kwakri namudok, ‘Eik ko ta ishopokugu eikin arman um ta nukripep eikin baraaen, aria anan ko nirikum nyak.

Aria anan ta nugapeshumen nyakih yah.’

<sup>11</sup> Eik yakri adurin baraenyum ipak. Jon nenek baptaisumesh iri anan nenek uhwin um ihim-morim kupaimi arman hatogur agudok nahobig iri. Aria meinyi arpen douk nyape shokwinyi um arpesch

shuwish aburdok wabur Iruhin nape Debeini um ananish arpesch shapeum heven iri, enyudok arpen douk nyenek uhwinyum Jon.

<sup>12</sup> “Riguk abudok nyutob Jon nenek baptaisumesh iri nape nakripesh Iruhin ananin baraaen obi nyutob arigaha douk, enesh dodogowishi wanohwish arpesch shape dodogeshish atish shape shabirak um shuwish heven aburdok wabur Iruhin nape Debeini um ananish arpesch shapeum. <sup>13</sup> Aria ihim profet aria enyudok lo Iruhin seiwok nako Moses enyi, eshesh shakri enyudok Iruhin ananin baraaen um heven agundok Iruhin nape debeini um ananish arpesch um arigaha douk Jon natogur nape obi nyutob.

<sup>14</sup> “Aria douk ipak pakana pumnek um enyudok yopinyi baraaen um, aria ko pumnek. Iruhin ananik buk kwakri namudok aria enyudok baraaen da nyakri anudok Jon atun. Profet Elija douk seiwok Iruhin ananin baraaen nyakri anan ko ta nanaki. <sup>15</sup> Aria douk ipak arigos sapeyepi aria ko pumnek enyudok baraaen.

<sup>16</sup> “Aria eik douk ikrium ba iwereh doukish arpesch shapeyohi aih, aria eik ko ikri maren wobuwobrenyi baraenyum eshesh? Eshesh da kabi batowish shape agegwiruh aria shahwarum kupaishi batowish namudok,

<sup>17</sup> ‘Apak mahwapur buwaen um ipak piyarub,

aria ipak da panoiwos um piyarub.

Aria apak manoruwor ba meayrub, aria ipak panoiwos

um punoruwor ba pureh.’ ”

<sup>18</sup> Aria Jisas ta nakri namudok, “Jon nanaki aria madae nuwok sabaiguni worigun aria madae nuwok wain. Aria eshesh shakri namudok, ‘Yoweinyi sagab da nyapeyan.’ <sup>19</sup> Aria Eik Anudok Arman yatogur adurinyi arpen iri yanaki, aria yawok worigun nani abar aria shakri, ‘Putik, anan nawok sabaiguni worigun abom, aria anan nawok sabaini wain abom. Anan nenek arpeschim nani amam harao takis iri hani eshudok shenek yoweishi inahos iri.’ Aria eik yakripep namudok, Ipak putik eshudok arpesch sharao Iruhin ananin saki shagipeshen

aria shenek yopihi aih iri aria ipak ko pudukemesh pukri, esheshih aih douk yopihi.”

*Anarub Warub Da Arpesh Madae Shenek Bilip Um Jisas Iri (Luk 10:13-15)*

<sup>20</sup> Anarub warub da Jisas nenek sabainyi Iruhin atun neneken iri mour, aria eshudok arpesh madae shumnek ba shubodig nyirub shubukuk yoweishi inahos apa shenekeshi. Namudok aria Jisas nahao eshudok arpesh shape arbudok warub iri nukesh dodogowinyi baraan eshesh. <sup>21</sup> Aria nakri namudok, “Eik yenek gihaum ipak arpesh pape wabur Korasin iri. Aria eik yenek giha abom um ipak pape wabur Betsaida iri. Aria nubo enen arpen nyunak wabur Tair aria Saidon aria nyunek enen Iruhin atun neneken iri mour kabi da eik yeneken orokohun um ipak iri akure, seiwokdai eshesh Tair aria Saidon eshesh ko shubodig nyirub aria shure shagoki shohwurari suruhw aria shuwish weshigabus um shuniyabig namudok eshesh da amu shabukuk yoweishi inahos eshesh shenekeshi. <sup>22</sup> Namudok aria eik yakrip ipak um ahudok nyumnah Iruhin nakriyohi um nenek kwotog um ihish arpesh, enyudok amain ko nyutogur um ipak iri ta nyenek uhwin abom um amain ko nyutogur um eshudok arpesh shape warub Tair aria Saidon iri. <sup>23</sup> Aria ipak pape Kaperneam iri, ko shutukep puto gani iruhw heven aka uwok? Namudok ta amu uwok. Ipak ta pubuh gani atap atap uguk um gani shagoki esheshibur wabur. Aria nubo enen arpen nyunam wabur Saidon aria nyunek enen Iruhin atun neneken iri mour kabi da eik yeneken orokohun um ipak iri akure, wabur Sodom da wata bupe. <sup>24</sup> Namudok aria eik yakrip ipak, um ahudok nyumnah Iruhin nakriyohi um nenek kwotog um ihish arpesh, amain ko nyutogur um ipak iri ta nyenek uhwin abom um nubo rig nyatogur um Sodom iri.”

*Ipak Punamori Eik Aria Puraou Uhwin (Luk 10:21-22)*

<sup>25</sup> Abudok nyutob Jisas nakri namudok, “Yain, nyak Debeini um heven aria agudok nahobig, eik yakri yanadudareh um nyak. Umum maresh? Nyak da nyebeshuk eshudok eneshenesh um arpesh shadukem eneshenesh aria worobainyi saki iri, aria nyeyabig eshudok arpesh shape kabi da shokushi batowish um. <sup>26</sup> Aria eik yakri wosik, Yain, nyak nyagipesh nyakish urkum apahw shakri um aria douk nyabirak namudok.”

<sup>27</sup> Aria Jisas ta nakri namudok, “Eikin yaken anan iganigadae nobuk ihish eneshenesh um eikis wis. Aria madae enen arpen da nyudukemesh um Nuganin, Yaken atun douk nadukemesh um eik. Aria madae enen arpen da nyudukemesh um Yaken uwe, uwok. Nuganin atun nani eshudok arpesh douk Nuganin atun niyabig Yaken um eshesh iri, eshesh atish da shadukemesh um Yaken.

<sup>28</sup> “Ipak arpesh douk penek debeinyi mour abom iri aria puraou debeinyi amain, ipak ihipmorim punamori um eik aria eik ta ikep uhwin um ipak. <sup>29</sup> Ipak ko puraou saki um eik aria pupe shakamum eikin baraan. Namudok aria puhur aidap da shopemum um bulmakauin aruhwigur iri um da shanuk eneshenesh enyi. Ipak puraou eikin saki. Umum maresh? Eik da samokwiyain arpen aria eik yenekesh shokubur um ipak arpesh. Aria eik yape shokubur atin kabi da enen batowin um. Aria ta eneshenesh mare shukep amaenyibi bagab ipak aria ipak ta puraou uhwin um ipakish urkum apahw. <sup>30</sup> Apudok aidap eik douk yopemum ipakish aruhwiguhw iri apap douk horihorip aria ipak ta wosik pupusah. Aria eneshenesh eik yako ipakeshi um pushusah eshesh da madae amaenyish atish uwe, uwok.”

## 12

*Jisas Douk Debeini Um Nukri Shunek Maren Mour Um Ahudok Nyumnah Sabat (Mak 2:23-28; Luk 6:1-5)*

<sup>1</sup> Anob nyutob banak banakuk aria anah nyumnah douk eshesh Juda mour

uwok shape meyoh ahi hanak hatograri, aria Jisas nani ananim disaipel hawish hanak anag nubarig douk shau witagari. Aria ananim disaipel nyurub bam, aria amam hadi anat shuruwepit wit ba apa hatoh hanak. <sup>2</sup> Aria amam Farisi hatik, aria hakrip Jisas namudok, “Nyak nyutik ahudoki aih da nyakim disaipel henekohi, apakin lo nyakri uwok um menek enen mour ahudok nyumnah Sabat, uwok.”

<sup>3</sup> Jisas nemnek namudok aria ta nakripam namudok, “Ipak da madae putik ba pudukemesh um seiwok Devit nenekeshi eneshenesh? Eik yakri nabudok nyutob Devit nani ananimi da nyurub bam <sup>4</sup> aria Devit nawish Iruhin ananit debeiti urupat aria nohur atudok bret amam pris da hatubuk um Iruhin iri aria nani ananimi hatoh. Atudok bret da shakri uwok um kupaishi ta shutoh iri. Amam pris atum da shakri wosik um hutoh. <sup>5</sup> Aria ipak shopunek madae putik ba pudukemesh namudok enyudok baraan nyape numun Iruhin ananin lo nyetem buk iri, nyakri namudok. Amudok pris henek mour numun Iruhin ananit debeiti urupat iri amam ta henek mour ahudok nyumnah Sabat? Amam pris da habrig enyudok lo da nyakri Sabat iri, aria amam pris da madae enen baraan nyupeyam uwe, uwok. <sup>6</sup> Aria eik douk yakana ikripep, douk eik yape agundok iri, eik debeini yenek uhwinyum Iruhin ananit debeiti urupat. <sup>7</sup> Aria baraan douk nyape Iruhin ananik Buk iri douk nyape namudok, ‘Eik yanoiws um ipakin ofa ipak peneken meyoh iri. Eik yakri yanawasham yopihi aih um ipak pusuhw yopuhwi ruwohw aria penek gihaum kupaishi.’ Aria nubo ipak gamo pudukemesh um enyudok baugosin um enyudok baraan, aria ipak ta mare puwem amaenyibi bugob um kupaishi da madae shenek enesh yoweishi inahos iri. <sup>8</sup> Umum maresh? Eik Anudok Arman yatogur adurinyi arpen iri douk eik kanak yape debeiwe iri um ikrip arpes shunek maren mour ahudok nyumnah Sabat.”

*Jisas Nagapesh Anan Arman Rogur*

### *Nyagokan Iri*

*(Mak 3:1-6; Luk 6:6-11)*

<sup>9</sup> Aria Jisas nakutukuk amam Farisi nagundok aria nanak nawish anat eshesh Juda shape sheyagwreh baraaneniyati urupat. <sup>10</sup> Nawish aria natik anan arman rogur nyagokan iri nape. Anam armam hape hakana heneman baraan Jisas, namudok aria harigan hakri, “Jisas nyak nyukri, Iruhin ananin lo da nyakri wosik um mugabe arugeh henekeshi arpes ahudok nyumnah Sabat aka, uwok?”

<sup>11</sup> Aria Jisas nakripam namudok, “Douk anan arman orokohun um ipak aria anan da nagrem enen atin sipsip aria enyudok sipsip nyunak ba nyugrukuk anag nuwag douk ahudok nyumnah Sabat aria ipak da padukemesh jurug, anudok arman ta nunak nusuhw enyudok sipsip aria ta nutukenyi agudok nuwag. <sup>12</sup> Aria anan arman douk amu nenek uhwin abom um enen sipsip aka, uwok? Namudok aria douk yopunyi um apak monek yopunyi mugu nyutogur douk ahudok nyumnah Sabatih.” <sup>13</sup> Aria Jisas nakrip anudok rogur nyagokanari namudok, “Nyak nyunu nyakin rogur.”

Aria anudok arman nonu ananin rogur, aria ananin rogur ta nyatogur yopin kabi da enyudok enen ananin yopunyi rogur da nyape meyoh iri. <sup>14</sup> Aria amam Farisi hatik namudok aria hakitak hatogur hanak ba hape habo baraan haurim yah um ko hubo Jisas nugok.

### *Iruhin Nagraeh Jisas Um Nenek Ananin Mour*

<sup>15</sup> Aria Jisas nadukemeshum enyudok amam Farisi hakri um ta hunekenyum anan iri, aria nakitak nakutukuk abrudok wabur aria nanak. Nanak aria worobaishi arpes shagipeshan. Shagipeshan aria nagabe eshudok ihishmorim da arugeh hapeyeshi arpes shatogur yopish meyoh. <sup>16</sup> Aria nakripesh dodogowinyi baraan um mare ta shunak shukrip kupaishi um anan uwe, uwok. <sup>17</sup> Umum ahudok aih atuh, Jisas nenek enen baraan seiwok Iruhin nohur profet Aisaia ba neyagwrehyuk iri baraan nyatogur adur atin. Aria baraan enyudok,

18 “Anudok eikin arman nenek mour um eik iri.

Eik kanak yagraeh anan.

Eik yakri anan abom, aria eikish urkum apahw shanawasham shanadudareh um anan abom iri.

Eik ko ikan eikin yopunyi Mishin nyuwish um nyupe anan,

aria anan ko niyagwreh nuwerekh baraan um yopinyi poe

aria yopihi aih ko hutogrum

ihishmorim arpesch madae shudukemesh um eikin baraan shape agudok nahobig iri.

19 Anan ta mare niyagwreh rupanitakin baraan aria nuhwar debeg uwe, uwok.

Aria eshesh arpesch ta mare shumnek anan niyagwreh debeihi yeh shopunek uwe, uwok.

20 Aria aruh hanounih iri ta mare nutugwaruh.

Aria anan ta mare nubuweh lam da madae gamo hininyi.

Anan ta nupe nenek mour arigaha ko enyudok yopinyi poe

aria yopihi aih shutogur ba shenek uhwinyum ihishmorim yoweishi inahos shutuhuk.

21 Aria ihish madae shudukemesh um eikin baraan iri arpesch eshesh ko shenek bilipum anan.”

*Jisas Nani Yoweinyi Sagab Belsebul  
(Mak 3:20-30; Luk 11:14-23)*

22 Nabudok nyutob enesh arpesch shauri anan arman da yoweinyi sagab nyapeyan iri. Aria da madae niyagwreh nukwat teshukan ba nabes shopunek se-shukan aria madae nutrugun uwe, uwok. Aria sharan shanamorim Jisas. Aria Jisas nagabeyan yopun, aria ta neyagwreh ba natrugun shopunek. 23 Aria ihish arpesch shakitak yowiyokuk aria shakri namudok, “Anudok arman da Devit ananin barhonin, 12:23 aka?” 24 Aria amam Farisi hemnek enyudok baraan, aria hakri namudok, “Anudok arman da nahiyah yoweishi sagabehos um nakwu enyudok yoweinyi sagab Belsebul enyenyin dodog,

12:23 12:23 Enyudok baraan Devit ananin barhonin douk wobuwobren baraan um anudok Krais, Iruhin nagraehan aria nakri um noshopokan nunaki iri um nunarao arpesch iri.

enyudok yoweinyi sagab da debeinyi um ihish yoweishi sagabehos.”

25 Aria Jisas da nadukemesh um amami-gos baragos urkwip da shorum, aria nakripam namudok, “Douk enesh arpesch shupe anag nahobig aria shunorupok ba shupe tukwotukwan, aria arpesch shape agudok nahobig iri ko shunanunukuk. Aria enesh arpesch shape anabur wabur aka anat urupat iri shunarupok ba shupe tukwotukwan, aria arpesch shape abrudok wabur urupat iri ko mare shupe dodogeshish uwe, uwok. 26 Namudok aria douk Satan nukuna nupotik anan kanak um, aria apak ta mudukemesh namudok. Satan ananishi iganigadae shanabrig shape tukwotukwan. Namudok aria anan ta nurao dodog agunum um ta niyoh ananishi arpesch shuni eneshenesh? Aria namudok ta uwok. 27 Aria douk adur atin um Belsebul nutaurum eik um aria yehiyah eshudok yoweishi sagabehos um, namudok aria amiapen douk nyataurum ipak aria pohiyah yoweishi sagabehos? Ipakishi arpesch douk shahiyah yoweishi sagabehos iri ta shiyabig ipak namudok enyudok baraan ipakin madae adurinyi baraan uwe, uwok. 28 Aria douk eik yadukemesh namudok Iruhin ananin yopunyi Mishin nyataurum eik nyeke dodog aria eik yahiyah eshudok yoweishi sagabehos aria ipak ta pudukemesh namudok, abudok nyutob um ipak puwish agundok Iruhin nape Debeini um ananish arpesch um douk batogur.

29 “Enen baraan shopunek nyakri namudok. Anan arman ta wosik um nunak nuwish anan dodogowini arman ananit urupat aria nukwuaruh um ananish eneshenesh aka uwok? Namudok ta uwok. Anudok arman ko nuweshik anudok dodogowini arman nukwu dodogowihwi maduhw ba iyoh, aria ta nenekesh namudok, aria ta ko nuwish ba nuhur eneshenesh shakuh anudok dodogowini arman ananit urupat iri.

30 “Meishi arpesch madae shunahwaram eikish arpesch iri, eshudok arpesch ko

shunahwaram eikish horik horin. Aria meishi arpeshe madae shutaurum eik ba murauri ihish arpeshe iri, eshesh ko shuhiyahesh shuruwok shushutogur.

<sup>31</sup> “Namudok aria eik yakrip ipak, Iruhin ko nukweshih ihish yoweishi inahos aria ihin yoweinyi baraan arpeshe sheneken iri. Aria arpeshe sheneyagwreh shabubunim Iruhin ananin Mishin iri, Iruhin ta mare nukweshih enyudok yoweinyi ina uwe um eshudok arpeshe. <sup>32</sup> Meishi arpeshe sheneyagwreh shabubunim Eik Anudok Arman yatogur adurinyi arpen iri, Iruhin ta nukweshih enyudok yoweinyi ina um eshudok arpeshe. Aria meishi arpeshe da sheneyagwreh shabubunim Iruhin ananin Mishin iri, Iruhin ta mare nukweshih enyudok yoweinyi ina um eshudok arpeshe uwe, uwok. Douk aria kweipon babi bagiguki nyutob shopunek amu uwok.”

*Yoweinyi Rowog Nyabuki Yoweipi Shuruwep Peir*  
(Luk 6:43-45)

<sup>33</sup> Aria Jisas nakri namudok, “Douk enen yopunyi rowog aria ta nyubuki yopipi shuruwep ba pir. Aria yoweinyi rowog, aria ta nyubuki yoweipi shuruwep ba pir. Arpeshe ko shutik shuruwepigun worigun ba iyoh, aria ta shudukemesh enyudok rowog da yopunyi aka yoweinyi. <sup>34</sup> Ipak yoweishi arpeshe, ipak kabi da yoweiguhwi yuguhw um. Umum maresh ba ipak da madae piyagwreh yopinyi baraan uwe? Arpeshe shadukemesh um shuwereh baraan da shunukin nyor esheshish urkum apahw iri. <sup>35</sup> Yopishi arpeshe shor yopinyi baraan esheshish urkum apahw. Namudok aria eshesh shadukemesh um ta shunek yopihi aih aria shupe yopinyi poe. Aria yoweishi arpeshe shor yoweinyi baraan esheshish urkum apahw. Namudok aria eshesh shadukemesh um ta shunek yoweih aih aria shupe yoweinyi poe.

<sup>36</sup> “Aria douk eik yakrip ipak, um ahudok nyumnah Iruhin nugraehahi um nunek kwotog um ihish arpeshe um, anan ko urkum mur um ihin nyaunyatograri aria ihin yoweinyi baraan ihish arpeshe

sheyagwrehen iri aria anan ko nunemesh kwotog. <sup>37</sup> Um ipak kanak ipakin baraan Iruhin nemneken aria ta nuhwarep um yopishi arpeshe aka yoweishi arpeshe.”

*Anam Armam Harig Jisas Um Nenek Enen Iruhin Atun Neneken Iri Mour*  
(Mak 8:11-12; Luk 11:29-32)

<sup>38</sup> Aria anob nyutob, anam henek skulumesh um lo iri hani anam Farisi hakrip Jisas namudok, “Tisa, apak makri nyak nyunek enen Iruhin atun neneken iri mour ba mutrin aria ta ko mudukemesh um nyak da adur atin nyenek Iruhin ananin mour iri.”

<sup>39</sup> Aria anan nakripam namudok, “Ipak doukipari um abudok nyutob, ipak da yoweipari aria ipak madae gamo pukon urkwip aparuh um Iruhin uwe, uwok. Ihib nyutob ipak pakri puhwar eik um putik enen kak um Iruhin atun neneken iri mour. Aria ipak ta mare putik enen enyudoki kak uwe, uwok. Atin arag kak ipak ko putrin iri, enyudok seiwok Iruhin neneken um profet Jona iri. <sup>40</sup> Jona nubo nor 3-poreih nyumneh aria 3-poreibus weibus numun um debeiri eiyyur araribur nyibur, aria namudok atin Eik Anudok Arman yatogur adurinyi arpen iri ta iyur 3-poreih nyumneh aria 3-poreibus weibus numun um amnab. <sup>41</sup> Ahudok nyumnah Iruhin nakriyohi um ta nunemesh kwotog ihish arpeshe, Niniveish arpeshe ko shiyotu um baraan aria shenekumesh baraanym doukish arpeshe shape obi doukib nyutob um yoweishi inahos eshesh shenekesh iri. Umum maresh, eshesh Ninive shemnek baraan profet Jona nakripesh-enyi aria eshesh shabadig nyirub shabukuk yoweishi inahos shekesh agab. Aria eik douk anan arman yape orokohun um ipak iri, eik douk yenek uhwin abom um Jona. Aria ipak douk madae pubukuk yoweishi inahos pigipesh eik uwe, uwok. <sup>42</sup> Nabudok nyutob Iruhin nakriyobi um nunemesh kwotog ihish arpeshe, kwon kwape saut iri ta ko kwiyotu um kwot kwereh yoweishi inahos um doukish arpeshe shapeyobi doukib nyutob. Umum maresh? Okwudok kwon kwape gani nagiguk um agudok nahobig, aria

okwok kwanaki um kwomnek Solomon nuwerek ananin yopinyi saki. Aria eik douk yape agundok iri, eik douk yenek uhwin abom um Solomon.”

*Yoweishi Sagabehos Shakutukuk Arpesh Aria Shatanamori Shawishesh Um (Luk 11:24-26)*

<sup>43</sup> Aria Jisas anan kanak nakri namudok, “Aria enen yoweinyi sagab da nyukutukuk enen arpen obi nyutob, aria enyen ko nyunak nyurahe nyunak anagun abar wokagun um nyunak nyupe nyurao uhwin. Aria enyen ta mare nyuparug anabik yapugunum um ta nyurao uhwin. <sup>44</sup> Aria enyen ta nyukri namudok, ‘Eik ko itanam inam eikit urupat nubo rig yapenyat iri.’

“Namudok aria enyen ko ta nyutanam nyunak um atudok urupat ba nyutik atudok urupat tape meyoh. <sup>45</sup> Namudok aria enyen ta nyunak nyurauri 7-poreish kupaishi sagabehos eshesh da shenek uhwin um enyudok nyarik iri sagab um apa shenek yowoyoweishi inahos iri. Aria eshesh ta shuwish shupe atudok urupat. Nubo rig enyudok arpen madae yowen abom uwe, uwok. Aria douk enyen amu nyabo sisih abom. Aria atatahah yoweih aih ko hutogur um ipak eshudok yoweishi arpesh douk pape abudok doukib nyutob iri.”

*Jisas Ananik Amakek Kwani Ananim Aruhim Shanamori Shutrui (Mak 3:31-35; Luk 8:19-21)*

<sup>46</sup> Aria Jisas ta apa neyagwreh nakrip eshudok sabaishi arpesh um baraen, aria ananik amakek kwani ananim owarhim shanaki sheyotu aduk. Eshesh shakana shiyagwreh shuni anan. <sup>47</sup> Aria anan arman nakrip Jisas, “Nyak nyumnek. Nyakik amakek kwani nyakim owarhim shanaki sheyotu aduk, aria shakana shuni nyak shiyagwreh.” <sup>48</sup> Aria Jisas nakrip anudok arman namudok, “Meikwiyah da eikik amakek? Aria meimiyah da eikim owarhim?”

<sup>49</sup> Aria anan naduk wis um ananish disaipel aria nakri namudok, “Nyutik eikiyu amakeniyu wani eikim owarhim. <sup>50</sup> Umum maresh? Meishi arpesh da apa shagipesh eikin yaken da nape iruhw heven iri um ananim yopumi urkum

aria baraen, eshesh douk ta ihwadesh eikin wanin, eikik mohwukwik aria eikik amakek.”

## 13

*Jisas Nakripesh Wobuwobren Baraen Um Anan Arman Nawashak Witip Shuruwep Nubarig Iri (Mak 4:1-9; Luk 8:4-8)*

<sup>1</sup> Ahudok atuh nyumnah Jisas nakutukuk urupat aria natogur aduk. Aria nanak nape anagasigum Galilieg waiyag.

<sup>2</sup> Aria sabaishi arpesh shanamori anan. Namudok aria anan naprok nato nakih natem anat bot aria ihishmorim arpesh sheyotu anagasigum waiyag gani jakahasigunum. <sup>3</sup> Aria Jisas nakripesh sabainyi wobuwobrenyi baraen um eshesh. Aria anan nakri namudok, “Pumnek. Anan arman nanak nawashak shuruwepit wit gani nubarig. <sup>4</sup> Anan apa nawashat nanak aria anat tabuh takus yah aria armiguhw hwanaki hwatoh. <sup>5</sup> Aria anat shuruwepit wit tabuh takus utaborigunum, madae sabaibi amnab bukusagunum. Amnab madae budi bubukh atap uwe, uwok, namudok aria atudok wit tatogur arigas atin. <sup>6</sup> Aria aun nakihi wah hatao aria wah habo atudok wit ba tagok. Umum maresh, nukwaruh madae hunu hubuh utaborigunum aria wit amu yarit ba tagok. <sup>7</sup> Aria anat shuruwepit wit tabuh orokohun um segego wape aruhi madururuh. Aria aruhudok segegoiruh madururuh hakitak ba heyawiamukuk wit. <sup>8</sup> Aria anat shuruwepit wit tabuh yapubi amnab, Aria tobuki worigun. Anat tabuki 100-poreit, aria anat tabuki 60-poreit, aria anat tabuki 30-poreit atut. <sup>9</sup> Arpesh arigos sapeyeshi eshesh ko gamo shumnek enyudok baraen.”

*Umum Maresh Ba Jisas Nakripesh Wobuwobrenyi Atin Baraen (Mak 4:10-12; Luk 8:9-10)*

<sup>10</sup> Jisas nakripesh enyudok baraen ba jurug, aria ananim disaipel hanamori anan aria harigan namudok, “Umum maresh ba nyak nyeyagwreh wobuwobrenyi baraen um eshudok arpesh?”

<sup>11</sup> Aria Jisas nakri namudok, “Iruhin neyabik ipak ba padukemesh jurug um baugosinyum um enyudok nyanabeshuk iri baraen um arpes shuwish aburdok wabur Iruhin nape Debeini um ananish arpes shapeum heven. Aria anan da madae niyabik enyudok nyanabeshuk iri baraen um eshudok arpes uwe, uwok.

<sup>12</sup> Aria douk meishi arpes sharao Iruhin ananin baraen shadukemen aria Iruhin ta nukesh enen yopinyi baraen shopunek um eshesh aria eshesh ta shugrem sabainyi yopinyi baraen shopunek. Aria douk meishi arpes madae shugrem enen yopinyi baraen, aria Iruhin ta neyatakuk aria nutrish ihin banenyi aria shokwinyi baraen eshesh da shagremen iri. <sup>13</sup> Um enyudok baugenyum baraen atin eik da yeyagwreh yakripesh um wobuwobrenyi baraen atin.

Esheshis nabes satrugun, aria madae shutik enesh muguhwos.

Eshesh shabuk arigos aria eshesh madae shumnek baraen

ba shunyor baragos uwe, uwok.

<sup>14</sup> Um eshudok arpes, aria enen baraen seiwok profet Aisaia neyagwrehenyuk iri douk nyatogur adur atin. Aria baraen enyudok,

‘Ipak ta pumnek baraen sabaibi nyutob, aria ipak ta mare pudukemesh um baugenyum baraen.

Ipak ta putrugun um sabaibi nyutob, aria ipak ta mare pudukemesh um enen mugu.

<sup>15</sup> Umum maresh? Ipak arpes ipakish urkum apahw nubo sheshuk, aria ipakigos arigos sanoiwos sumnek baraen, aria ipakis nabes nubo seshuk um ta putik enen mugu.

Uwok um, ipakigos arigos ta sumnek baraen, aria ipakish urkum apahw ta shudukemesh um enyudok baugenyum baraen aria ipak pubukuk yoweishi inahos aria putanam panaki um eik aria eik ta gamo igabeyep ba putogur yopishi arpes.’

<sup>16</sup> “Aria ipak panadudareh. Ipakis nabes douk satik eneshenesh. Aria ipakigos arigos semnek baraen. <sup>17</sup> Eik

yakripep adurin baraen, seiwok sabaimi profet aria sabaishi yopishi arpes madae shenek yoweishi inahos iri eshesh shakri um shutik eshudok eneshenesh douk ipak patrishi aria eshesh madae shutrish uwe, uwok. Aria eshesh shakri um shumnek enyudok baraen ipak douk pemnekenyi aria eshesh madae shumneken uwe, uwok.”

*Jisas Nakripesh Baugenyum Baraen Um Anudok Arman Nawashak Shuruwepit Wit Nubarig Iri*

*(Mak 4:13-20; Luk 8:11-15)*

<sup>18</sup> Aria Jisas nakri namudok, “Douk ipak pumnek baugenyum baraen um anudok arman nawashak shuruwepit wit nubarig iri. <sup>19</sup> Eshudok arpes shemnek yopinyi baraen um arpes shuwish agundok Iruhin nape Debeini um ananish arpes um. Aria madae shudukemesh um baugenyum enyudok baraen, eshesh kabi da atudok shuruwepit wit tabuh takus yah iri, aria Satan nunamori eshesh aria atub nyutob natrish enyudok baraen Iruhin nawen numun esheshish urkum apahw iri. <sup>20</sup> Aria atudok shuruwepit wit tabuh takus utabor igunum, atudok wit kabi da arpes da shemnek baraen aria atub nyutob aria shanadudareh umen.

<sup>21</sup> Aria nukwaruh uwoken, aria shasuhw baraen banabi nyutob meyoh. Aria kupaishi shukripesh nyagiyagigi enenyenen baraen um Iruhin ananin baraen aria shukesh bugob um eshudok arpes aria shanunu eshudok arpes, aria shopunek shanunu enyudok bilip atub nyutob. <sup>22</sup> Aria shuruwepit wit da tabuh orokohun um segego wapeyuruhi mandururuh iri, kabi da arpes shemnek baraen, aria esheshish urkum apahw aria barag shakri abudok amnabish eneshenesh abom, aria shakana shutorumori sabaibori utabor. Eshudoki eneshenesh shiyawim Iruhin ananin baraen, aria madae yapuguni worigun nutogur uwe, uwok. <sup>23</sup> Aria atudok shuruwepit wit tabuh yopubi amnab iri, atudok kabi da arpes shemnek baraen aria gamo shadukemesh um baugenyum baraen iri.

Eshesh ko shubuki yopuguni worigun



kabi da atudok yaputi wit um, anat 100-poreit teir, anat 60-poreit teir; aria anat 30-poreit teir.”

*Jisas Nakripesh Wobuwobren Baraen Um Yoweiruhi Utaruh Hakih Nubarig*

<sup>24</sup> Aria Jisas nakripesh kupainyi wobuwobren baraen namudok, “Arpesh shuwish agundok Iruhin nape Debeini um ananish arpesh shapeum heven, douk kabi da anan arman nawashak yoputi shuruwepit wit um ananig nubarig. <sup>25</sup> Aria eshesh arpesh sheshuh obi nyutob, anudok arman ananin horin nanaki aria nawashak yoweiruhi utoruh shuruwep orokohun um wit aria nanak. <sup>26</sup> Arigaha atudok wit tatogur takih tereh tape ba teir, aria shatik aruhudok yoweiruhi utoruh shopunek hatogur.

<sup>27</sup> “Aria amudok henek mour um anan iri hanaki hakripan namudok, ‘Debeini, apak makana nyak nyuwashak yoputi shuruwepit wit atut um nyakig nubarig. Aria yoweiruhi utoruh hatogur mumam nubarig?’

<sup>28</sup> “Aria anan nakripam namudok, ‘Anan horin nanaki aria nenekesh namudok.’

“Aria amam heneman mour iri harigan, ‘Nyak nyakana apak munak muburak aruhudok utoruh mugitaruh aria mubuk aruhudok yoweiruhi utoruh atugun aka?’

<sup>29</sup> “Aria anan nakripam namudok, ‘Namudok uwok. Ta puburak yoweiruhi utoruh aria puburakuk wit shopunek.’

<sup>30</sup> Aria eik yakri wosik um wit aria yoweiruhi utoruh shutogur aragarag, arigaha nabudok nyutob ko mudar wit obi nyutob. Aria eik ta ko ikrip amudok henek enyudok mour iri namudok, ‘Ipak putorum yoweiruhi utoruh iyoh aria punotugoruh um unug um pushairuheh nyih. Aria ipak putorum wit ba putubuk gani eikit worigunit urupat.’ ”

*Jisas Nakripesh Wobuwobren Baraen Um Rowog Mastetim Shurkum (Mak 4:30-32; Luk 13:18-19)*

<sup>31</sup> Aria Jisas nakripesh kupainyi wobuwobrenyi baraen namudok, “Arpesh shuwish agundok Iruhin nape Debeini um ananish arpesh shapeum heven

douk kabi da anan arman nohur anam mastetim shurkum aria nawom gani ananig nubarigum. <sup>32</sup> Mastetip shuruwep da shokushokwip abom um kupaigosi rowosip shuruwep, shurkum makih annab mato iruhw, aria munahwaram enen debeinyi rowog nyenek uhwinyum kupaigosi rowos. Aria armiguhw hwanaki hwawish enyudok rowog ba hwenek was sotem rowogish nyeiguhw.”

*Jisas Nakripesh Wobuwobren Baraen Um Yis (Luk 13:20-21)*

<sup>33</sup> Aria Jisas nakri namudok, “Arpesh shuwish agundok Iruhin nape Debeini um ananish arpesh shapeum heven douk kabi da yis um. Onok armatok kwohur asudok yis aria kwabadigas um sene ushiwish um plaua numun anap debeipi marup. Aria enyudok plaua nyakitak nyanagok nyato nyatogur debeinyi.”

*Jisas Neyagwreh Nakwu Wobuwobrenyi Baraen Um Nakripesh Iruhin Ananin Baraen (Mak 4:33-34)*

<sup>34</sup> Jisas neyagwreh nakwu wobuwobrenyi baraen um nakrip ihish arpesh. Anan madae niyagwreh meyoh nukwu kupainyi baraen uwe, uwok. Anan nakwu wobuwobrenyi baraen atin. <sup>35</sup> Anan douk nakripesh wobuwobrenyi atin um enen baraen seiwok anan profet nyenyemokuk iri nyatogur adur atin da nyakri namudok,

“Eik ko iyagwreh nukwat ikri wobuwobren baraen.

Aria ikripesh baraen um nyunabeshuki enenyenen baraen

seiwok Iruhin nakwarum agudok nahobig um

ba nakriyen nyape arigaha douk atin nyatogur.”

*Jisas Nakripesh Baugenyum Baraen Um Aruhudok Yoweiruhi Utaruh*

<sup>36</sup> Aria Jisas nakitak nakutukuk eshudok worobaishi arpesh shapeik aria nanak nawish urupat. Aria ananim disaipel hanaki hatrun aria hakripan namudok, “Apak makri nyak nyukripap

baugenyum baraen um enyudok wobu-wobrenyi baraen um yoweiruhi uturuh hatogur nubarig iri.”

<sup>37</sup> Aria Jisas nakri namudok, “Arman nawashak yoputi wit iri, anudok eik atuwe Eik douk Anudok Arman yatogur adurinyi arpen iri. <sup>38</sup> Aria nubarig douk agudok nahobig. Aria yaputi shuruwepit wit, douk eshudok arpesh da shape shawish agundok Iruhin nape debeini um ananish arpesh um. Aria yoweiruhi uturuh, douk eshudok arpesh shanawasham Satan iri. <sup>39</sup> Aria anudok horin da nawashak yoweiruhi uturuhip shuruwep, anan da Satan. Aria shurim worigun obi nyutob, abudok nyutob kweipon agudok nahobig gunonukuk obi nyutob. Aria hunek mour iri eshudok da enselahos. <sup>40</sup> Aria amudok douk hagit yoweiruhi uturuh ba heshairuheh nyih iri, amudok kweipon henekesh namudok atin um hahi hagiguki nyumnah um agudok nahobig. <sup>41</sup> Eik douk Anudok Arman yatogur adurinyi arpen iri ta ishopok eik-ish enselahos eshesh ko shunak shutorum ihish arpesh shuni ihish eneshenesh da shanunu bilip um arpesh iri, shuni ihishmorim arpesh shenek yoweishi inahos iri. Eshudok arpesh ta mare shuwish shupe abrudok wabur Iruhin nape Debeini um ananish arpesh um, uwok. <sup>42</sup> Aria ta enselahos shuwashak eshudok yoweishi arpesh shuwish debeihi nyih. Aria ko shupe numun ehudok nyih ba shereh yowiyokuk shurpak naruh shuwegoruh. <sup>43</sup> Um abudok nyutob atub aria eshudok shape yopinyi poe ba madae shenek yoweishi inahos iri ta shutogur anahaeh kabi da nyumnohin aunit lait morim gani numun esheshin Yaken Iruhin napeum douk agundok anan nape Debeini um ananish arpesh um. Ipak arpesh da arigos sapeyepi aria ko pumnek enyudok baraen.”

*Wobuwobren Baraen Um Anan Arman Nuparug Enen Yopunyi Mugu Shatorin Debeibori Utabor Iri*

<sup>44</sup> Aria Jisas nakri namudok, “Arpesh shuwish agundok Iruhin nape Debeini um ananish arpesh shapeum heven

douk kabi da enen yopunyi mugu shatorin debeibori utabor iri um da enesh shebeshuken nyor anag amnabig nubarig. Anan arman natrin aria ta natuken nabeshuken kupaigunum. Aria anan nanadudareh abom aria nanak nekesh ihishmorim ananish eneshenesh um kupaishi arpesh ba shatorish shakon utabor aria anan nasuhw utabor nanak nator agudok nubarig.”

*Wobuwobren Baraen Um Anab Yopiyibi Weiyoub Douk Shatorub Debeibori Utabor Iri*

<sup>45</sup> Aria Jisas ta nakri namudok, “Aria enen kupainyi wobuwobrenyi baraen nyunak namudok. Aria arpesh shuwish agundok Iruhin nape Debeini um ananish arpesh shapeum heven douk kabi anan nenek bisnis iri arman nape naurim anab yopiyopibi weiyoub um. <sup>46</sup> Naurimab nanak arigaha nanak naparug anab yopiyopibi weiyoub douk shatorub debeibori utabor iri. Aria nanak nekesh ihishmorim ananish eneshenesh um kupaishi arpesh ba shatorish shakon utabor, aria anan nasuhw utabor nanak ba nator abudok yopiyibi weiyoub.”

*Wobuwobren Baraen Um Umben Douk Shatuk Eighw Um*

<sup>47</sup> Aria Jisas ta nakri namudok, “Aria shopuk kupainyi wobuwobrenyi baraen nyanak namudok. Shopunek arpesh shuwish agundok Iruhin nape Debeini um ananish arpesh shapeum heven, douk kabi anan umben um eshesh shuwashon nabuh waiyag aria sabaighwi yomoyomogighw eighw hwawish hwatuk anudok umben. <sup>48</sup> Anudok umben shunukin, aria eshesh shanakan nanaki anagasigum waiyag. Aria shape sheagom yopugwuhwi eighw shoguhwur yaureruhw. Aria yoweighwi ta showashoguhuk. <sup>49</sup> Kweipon hahi hagiguki nyumnah hutogur agudok nahobigum ta shubirak namudok atin. Eshesh enselahos ko shunaki shurao yoweishi arpesh da shape orokohun um yopishi arpesh shapeum, <sup>50</sup> aria eshesh ta shuwashak eshudok yoweishi arpesh shuwish ehudok debeihi nyih. Gani numun um ehudok nyih eshesh ko

shureh yowiyokuk aria shurpak naruh shuwatoruh.”

*Enyudok Doukin Baraen Nyani Seiwokin*

<sup>51</sup> Aria Jisas narik ananim disaipel namudok, “Ipak douk padukemesh um enyudok baugenyum ihin baraen?”

Aria amam hakripan namudok, “Wosik apak madukemesh.” <sup>52</sup> Aria anan nakripam namudok, “Namudok aria amudok ihim henek skulumesh um lo iri douk atin ta hanaki hagipesh eik henek skulumesh um shuwish agundok Iruhin nape Debeini um ananish arpeshe shapeum heven, amam hape kabi da anan yaken douk nagrem anat debeiti urupat. Aria nanak nawish numun atudok urupat um anam rum um da sabaishi yomoyomogish yopiyopishi ananish eneshenesh shunukigun ba shakuh omi rum, aria anan nohuri ihishmorim namushi aria jugwaishi eneshenesh aria naraesh natograri aduk.”

*Eshesh Nasaret Shakonakuk Agab Jisas (Mak 6:1-6; Luk 4:16-30)*

<sup>53</sup> Jisas nakripesh enyudok ihinyumorim wobuwobrenyi baraen ba jurug, aria nakitakuk abrudok wabur ba nanak. <sup>54</sup> Aria anan nanak anan kanak ananibur wabur. Aria anan nanak nawish gani numun esheshit urupat douk eshesh Juda shape sheneyagwreh baraen-ati aria apa nenek skulumesh nakripesh Iruhin ananin yopinyi baraen um ihishmorim arpeshe. Eshesh shemnek enyudok baraen aria shakitak yowiyokuk aria shakri namudok, “Anudok arman nanak narawi enyudok yopunyi saki agunum? Aria anan da wosik nenek enyudok Iruhin atun neneken iri mour ko neneken nyatogur mumam? <sup>55</sup> Apak madukemesh anudok arman anan da kamdain nunganin aria Maria da ananik amakek. Aria Jems, Josep, Saimon aria Judas da ananim owarhim. <sup>56</sup> Aria ananiyu ihiyumorim mohwiyariyu, owo da wani apak wape. Namudok mumam aria anan ta wosik nenek eshudok eneshenesh?”

<sup>57</sup> Eshesh shakri namudok aria esheshish urkum apahw yoweshum anan aria shakanukuk agab Jisas. Aria Jisas nakripesh namudok, “Profet ananin

nyeigur ko nyupe ihirub warub. Aria um anan kanak ananibur wabur aria anan kanak ananip awiropish ko mare shunadudareh um ananin nyeigur uwe, uwok.”

<sup>58</sup> Aria anan ta mare nenek sabainyi enyudoki Iruhin atun neneken iri mour abrudok wabur uwe, uwok. Umum maresh? Eshesh da madae shenek bilip um anan uwe, uwok.

## 14

*Herot Nakana Jisas Anan Douk Jon Nenek Baptaismesh Iri*

*(Mak 6:14-29; Luk 3:19-20, 9:7-9)*

<sup>1</sup> Aria abudok nyutob, Herot douk nape debeini um gavman um agudok shokugi nahobig Galili. Aria anan nemnek baraen um Jisas nape nenekeshi eneshenesh.

<sup>2</sup> Aria Herot nakrip amudok henek mour um anan iri namudok, “Anudok arman douk Jon nenek baptaismesh iri atun. Anan atun ta nakitak wonugwehw. Namudok aria anan douk dodogeshin atun um nenek enyudok Iruhin atun nenekenyi mour.”

<sup>3-4</sup> Seiwok Herot narao Herodias, okwok da Filip ananik irohukwik, aria Filip douk watak nape. Filip da Herot ananin wanin. Aria Jon nubo nakrip Herot namudok, “Nyak nyabrig Iruhin ananin lo um nyatrun ananik armatok. Namudok ta mare nyenekesh uwe, uwok.” Namudok aria Herot nasuhw Jon aria napiyakan nakwu senab aria nanur nape shunuweshik-ati urupat. <sup>5</sup> Aria Herot nakana nubo Jon nugok, aria ta nanogugur um eshesh shakana Jon da anan profet.

<sup>6</sup> Anah nyumnah enesh arpeshe shanaki shani Herot shape shawok worigun um urkwip purum ahudok nyumnah seiwok nanakwaram ahi. Aria abudok nyutob Herodias okwokwik nugawik kwanaki kwape kweyorub kwatukobur kwanaki kwanak agundok da shantorum shapeum. Aria okwok kwonekesh namudok aria Herot nanadudareh abom um okwok. <sup>7</sup> Namudok aria Herot nakripok adurin atinyi baraen um okwok namudok, “Adur iruhw nyak ta nyukri nyurik eik um maresh muguhwos aria eik ta

ko ikenyesh atish.”<sup>8</sup> Aria okwokwik amakek Herodias kwakrip nugawik aria nugawik kwonak kwakrip Herot namudok, “Eik yakri nyak nyuwemi Jon nenek baptaisumesh iri ananig barag iruhw um anohw yaurehw aria nyugusah nyunaki nyukeyog.”

<sup>9</sup> Aria King Herot nemnek enyudok baraen aria ananish urkum apahw amamaenyish atish. Aria anan urkum morum dodogowinyi adurinyi baraen da nenekenyi aria anan nanoiwos um ta baraen nyonum eshudok shape shawok worigun shani anan iri um esheshis nabes. Namudok aria nakrip amam soldia um henekesh kabi da armatok kwakri um.<sup>10</sup> Aria anan neshopok anan arman nanak gani shunuweshik-ati urupat um nukrip amam soldia um hurupogesh Jon ananin aruhwigur.<sup>11</sup> Aria eshesh shurawi ananig barag getemi anohw yaurehw aria shako okwudok weroroikwi armatok aria okwok kurao barag konak um okwokwik amakek.<sup>12</sup> Aria Jon ananim disaipel hanaki harao ananit mukut hotusah hanak harumot. Amam harom Jonit mukut jurug, aria hanak hakrip Jisas.

*Jisas Nekesh Worigun Sabaishi Arpesh Shadarehesh Shatogur 5,000-poreish Iri (Mak 6:31-44; Luk 9:10-17; Jon 6:1-13)*

<sup>13</sup> Jisas nemnek baraen um douk eshesh shabo Jon nagok um, aria anan nakutukuk abrudok wabur aria narao anat bot aria nanak anabik da arpesh wokagunum. Douk anan nani ananish disaipel atin shanak. Aria sabaishi arpesh da shemnek baraen um Jisas da nanak um, aria eshesh shakutukuk esheshirub warub aria eshesh shagim yah shanak shaurim anan.<sup>14</sup> Nabudok nyutob Jisas nanak natogur anagas-igum waiyag aria natik sabaishi arpesh apa shebeiman. Aria anan nenemesh giha abom um eshesh aria anan nataurumesh nagabe ihishmorim da arugeh hapeyesh iri.

<sup>15</sup> Aria wabigep amam disaipel hanamorim anan aria hakripan namudok, “Agnudok da arpesh wokagunum, aria hurukum ta aun nubuh. Nyak wosik

ko nyushopok arpesh shunak esheshirub warub aria shutor worigun.”

<sup>16</sup> Aria Jisas nakrip ananim disaipel namudok, “Umum maresh ba eshesh ta shunak? Ipak kanak ta pukesh worigun ba shugnoh.”

<sup>17</sup> Aria amam disaipel hakrip anan namudok, “Apak da madae mubuk sabai-guni worigun agundok uwe, uwok. Apak da mobuk 5-poreig bretog aria biyoguhw eiguhw atish shakuh.”

<sup>18</sup> Aria Jisas nakri namudok, “Haraki agwudok bretog gwani eiguhw um eik.”

<sup>19</sup> Aria Jisas nakrip ihishmorim arpesh um shubuh shupe atap uturuh. Aria anan nohur agwudok 5-poreig bretog gwani agwuhwudok biyoguhw eiguhw aria anan nanig natik gani iruhw heven aria nenek beten aria nani Iruhin heyagwreh. Aria anan nawor agwudok bretog aria nakom disaipel. Aria amam disaipel hasia agwudok bretog um eshudok arpesh.<sup>20</sup> Aria ihishmorim shawok worigun ba duguresh. Aria ihigun morim tutukwanigun worigun douk nakuhuk iri, amam disaipel ta hatorumogun haraguni aria hognuruk 12-poreiruh sararuh.<sup>21</sup> Amudok armam douk hawok worigun iri shadareham hatogur 5,000-poreim. Aria armago wani batowish madae shudarehesh uwe, uwok.

*Jisas Narahaen Iruhigum Waiyag (Mak 6:45-52; Jon 6:16-21)*

<sup>22</sup> Aria arigas atin Jisas nakrip ananim disaipel um haprok huto bot aria hurik hunak gani wobrag waiyag. Aria anan kanak ta nupe ba neshopok eshudok arpesh shunak ba iyoh.<sup>23</sup> Anan neshopokesh shanak shatuh aria anan atun nato gani iruhw anohw yoduhw um niki nenek beten. Aria abudok nyutob aun da nabuh um da anan atun nape gani iruhw yoduhw.<sup>24</sup> Atudok bot iganigadae tanak rougun abom aria uhwin nyaboi gani tarigum bot, aria abar beshiwok bot tanak tanaki.

<sup>25</sup> Aria huruhuruk um gugrukibus aria Jisas narahaen nanaki iruhigum waiyag aria nanaki natogurum amam disaipel.<sup>26</sup> Aria amam hatik anan

narahaen nanaki iruhigum waiyag aria amam hanogugur abom aria arugoguh-wiar wam yowiyokuk. Aria amam hakri namudok, “Anudok douk enen sagab.”

Aria amam hanogugur abom ba hohwar debeg. <sup>27</sup> Aria arigas atin Jisas nakripam namudok, “Ipak pupe dodog. Enyudok douk eik atuwe. Ipak mare punogugur.”

<sup>28</sup> Aria Pita ta nakripan namudok, “Debeini, enyudok douk nyak atin um, aria nyak nyukrip eik aria eik ta irahaen inakugu iruhigum waiyag aria inamagu nyak nagundok.” <sup>29</sup> Aria Jisas nakripan namudok, “Wosik nyak yowi.” Aria Pita nakitak nakutukuk bot aria narahaen iruhigum waiyag nanam Jisas. <sup>30</sup> Aria anan natik enen uhwin dodogowin abom aria nanogugur aria pususuwaran nabuh youg. Namudok aria anan nahwar namudok, “Debeini, nyak nyutaurum eik.”

<sup>31</sup> Aria arigas atin Jisas nasuhw Pita ananis wis natukani. Aria Jisas nakrip anan namudok, “Nyak madae gamo nyenek bilip um eik uwe, uwok. Umum maresh ba nyak nyor biyep urkwip?” <sup>32</sup> Aria amam haprok hato bot, aria uhwin nyagok nyabuh. <sup>33</sup> Aria armam hape bot iri, amam henek lotu um Jisas aria hakri namudok, “Adur atin, nyak douk Iruhin Ananin Nuganin.”

*Jisas Nape Genesaret Aria Nagabe Sabaishi Arugeh Henekeshi Shatogur Yopish*  
(Mak 6:53-56)

<sup>34</sup> Aria Jisas nani ananim disaipel habrig waiyag hanak hatogur gani wabrehah anagas um Genesaret. <sup>35</sup> Arpesh shape nagundok iri shatik Jisas aria shadukeman, aria shenek baraen nyunam ihirub warub bape huruhuruk iri, aria eshesh sharawi ihishmorim arugeh henekeshi um anan. <sup>36</sup> Aria eshesh sharig Jisas debeg um ta nukri wosik aria eshudok arugeh henekeshi ta shususuhw anagas um anan ih rupah. Aria ihishmorim shenekesh namudok iri ta shatogur yopish.

## 15

*Iruhin Ananin Lo Nyenek Uhwin Abom Um Eshesh Juda Esheshim Yamehem Amamin Baraen*  
(Mak 7:1-13)

<sup>1</sup> Aria abudok nyutob anam Farisi hani amudok anam henek skulumesh um lo iri hape iri Jerusalem aria hanaki hatik Jisas. Aria harigan namudok, <sup>2</sup> “Umum maresh? Aria nyakim disaipel apa habrig lo seiwok apakim yamehem hakapenyi? Hawok worigun um, madae hukrup wis uwe aria ko huwok worigun.”

<sup>3</sup> Aria Jisas nakripam namudok, “Umum maresh aria ipak da apa pagipesh ipak kanak ipakin lo aria ipak pabrig Iruhin ananin lo? <sup>4</sup> Umum maresh, Iruhin nakri namudok, ‘Ipak ta pupe shakamum ipakish amakek yaken aria pigipesh esheshin baraen’ aria ‘arpen da nyabubunim enyenyish amakek yaken iri enyen ta shen nyugok.’ <sup>5</sup> Aria ipak da apa pakri namudok, ‘Douk enen arpen nyobuk anabor utobor um nyutaurum enyenyish amakek yaken, aria enyen nyukrip eshesh biyesh namudok, “Eik yagraeh eshudok um iko Iruhin,” <sup>6</sup> aria enyudok arpen ta mare nyere urkum um enyenyin yaken ba gamo nyutauruman uwe, uwok.’ Um ahudoki aih ipak da pabrig Iruhin ananin baraen aria pohur ipakim yamehem henekeshahi aih hato iruhw. <sup>7</sup> Ipak da apa pape biyaruh aparuh iri! Profet Aisaia seiwok neyagwreh Iruhin ananin baraen, aria nenyemagak adurinyi um ipak iri enyudok,

<sup>8</sup> ‘Eshudok arpesh eshesh da apa shohur eikin nyeigur nyato gani iruhw

um esheshig nukwatog atug um shunek lotu um eik aria esheshish urkum apahw shape rougunum um eik.

<sup>9</sup> Amam hadukemesh um henek skulumesh um arpeshin lo atin aria hakri namudok,

“Enyudok Iruhin ananin baraen.” Namudok aria amam da henek lotu um eik meyoh.’ ”

*Jisas Nakripesh Um Eneshenesh Douk Shenek Arpesh Ba Shabo Sisih Numun Esheshish Urkum Apahw Iri (Mak 7:14-23)*

<sup>10</sup> Aria Jisas nahwar ihish arpesh shanamorim anan aria nakripesh namudok, “Ipak pumnek aria gamo pudukemesh. <sup>11</sup> Eneshenesh shawish enen arpen enyenyit nukwat iri, eshudok madae shenek enyudok arpen ba yowen nyubo sisih uwe, uwok. Aria eneshenesh da nukwat takriyeshi, eshudok atish da shenekesh aria enyudok arpen yowen nyabo sisih.”

<sup>12</sup> Aria anob nyutob banakuk aria amam disaipel hanaki hakrip Jisas namudok, “Nyak da nyadukemesh aka uwok? Amam Farisi hemnek enyudok nyakin baraen aria amamish urkum apahw yowesh.”

<sup>13</sup> Aria Jisas ta nakripam namudok, “Eikin Yaken nape heven iri, anan da nagrem anag nubarig. Aria ihish eneshenesh anan kanak madae nuwesh uwe, aria anan ko ta nurim ba nutukeshum aria ta nutuk nukwaruh hunuhapumesh.

<sup>14</sup> Ipak mare urkwip aparuh shur um amudok armamin baraen. Amam kabi da nabes seshuhomi um hakana hiyabig yah um kupaishi arpesh. Aria ta nabes seshuhomi hukana hiyabig yah um kupaishi nabes seshuheshi aria ta biobiom hunak hugurukuk nuwag.”

<sup>15</sup> Aria Pita narik Jisas namudok, “Eik yakri wosik um nyak ta nyuwereh baugenyum enyudok wobuwobrenyi baraen um eshudok shenek arpesh ba shabo sisih aria apak ta mumnek?”

<sup>16</sup> Aria Jisas nakri namudok, “Namudok ta mumam? Ipak shopunek madae pudukemesh uwe, aka? <sup>17</sup> Aria ipak da madae pudukemesh uwe, uwok. Ihish eneshenesh shawish nukwat iri, eshudok shanak um numun nyibur wautem aria sharukegeshuk gani deiwog. <sup>18</sup> Aria enenyenen baraen nyatogur apakig nukwatog enyi, enyudok baraen da nyatogur apakish urkum apahw aria peyagwrehen nyatograri. Aria enyudok baraen atin da nyenek apak arpesh amu yowep

ba mabo sisih abom. Aria Iruhin natik apak nahwarap yoweishi arpesh. <sup>19</sup> Eik yakripep, eshudoki eneshenesh da shatogur arpeshish urkum apahw um shapeyahi aih, eshudok eneshenesh douk eshudok. Yoweishi urkum apahw aria urkum shorum, shabo arpesh shagok um, shenek wehrur um, shabrig shanaraum um, shakwuaruh um, shegiyagigum kwotog um, shoruk nubug kupaishi um. <sup>20</sup> Eshudoki yoweishi eneshenesh da shenek apak arpesh aria yowep ba amu mabo sisih abom um Iruhin ananis nabes. Aria arpesh da shawok worigun ba madae shukrup wis iri ahudoki aih da madae hunek arpesh ba amu yowesh shubo sisih abom uwe, uwok.”

*Onok Kenanik Armatok Kwonek Bilip Abom Um Jisas Iri (Mak 7:24-30)*

<sup>21</sup> Aria Jisas nakutukuk abrudok wabur aria nanak gani warub Tair bani Saidon. <sup>22</sup> Aria onok Kenanik armatok kwape nagundok iri, aria okwok kwanaki kwohwar namudok, “Debeini, nyak Devit Ananin Barhonin, <sup>15:22</sup>nyak ko nyenek gihaum eik. Enen yoweinyi sagab nyanunu eikik nagawik ba amu kwabo sisih abom.”

<sup>23</sup> Aria Jisas madae ta nuwanamok baraen ba nukripok enen baraen uwe, uwok. Aria ananim disaipel hanamori anan aria hakripan namudok, “Okwudok armatok da apa kwohwar, kwohwar aria kwagipeshi apak kwanaki. Aria nyak kitak ba ta nyushopokok ba kunak.”

<sup>24</sup> Aria Jisas natanam nakripok namudok, “Iruhin neshopoki eik yanaki um eshesh Israel atish douk shape kabi da sipsipahos da shanotukuk iri.”

<sup>25</sup> Aria okwudok armatok kwanaki hurukum Jisas kwabuh kwoduk ohrubus aria kwohwido barag gabuh atap amnab aria kwakri namudok, “Debeini, eik yakri nyak nyutaurum eik.”

<sup>26</sup> Aria Jisas natanam nakripok namudok, “Namudok uwok um ta muhur batowishigun worigun aria muwashagun um nubag.”

<sup>27</sup> Aria okwudok armatok kwakri namudok, “Debeini, nyak nyakri adurin baraan. Aria nubag shopunek da gwohur tutukwaniguni worigun nagruki shukam um tebol um ogwogwin debeini iri.”

<sup>28</sup> Jisas nemnek enyudok baraan aria nakri namudok, “Nya, nyak douk nyenek bilip abom um eik. Namudok aria enyudok mugu nyak nyakri eik ta ineken um nyak iri aria douk eik yakri ta nyutogur um nyak.”

Aria banabi abudok nyutob atub okwokwik nagawik ta kwatogur yopuk.

### *Jisas Nagabe Sabaishi Arugeh Henekeshi Arpesh Aria Yopish*

<sup>29</sup> Aria Jisas nakutukuk abrudok wabur aria anan douk nagim anagasigum Galilieg waiyag nanak. Aria nanak nato onohw yoduhw aria nape. <sup>30</sup> Aria sabaishi arpesh shanamori anan. Aria eshesh sharauri eshudok yoweigasi aiyas sapeyeshi, nabes seshuheshi, bishiguh shakokutom eshi, nokwatog gweshukeshi aria sabaishi arpesh da arugeh hapeyeshi shopunek, aria sheshubuk hurukum Jisas ananigas aiyas. Aria anan nagabeyesh shatogur yopish. <sup>31</sup> Aria eshudok arpesh shatik nokwatog gweshukeshi sheneyagwreh, bishiguh shakokutomeshi shatogur yopish, yoweigasi aiyas sapeyeshi shara-haen, nabes seshuheshi ta shatrugun, aria esheshish urkum apahw shakitak yowiyokuk. Aria eshesh shohur Iruhin douk eshesh Israel shenek lotuman iri ananin nyeigur nyato gani iruhw.

### *Jisas Nekesh Worigun Sabaishi Arpesh Shadarehesh Shatogur 4,000-Poreish Iri (Mak 8:1-10)*

<sup>32</sup> Jisas nahwari ananim disaipel hanaki um anan, aria nakripam namudok, “Eik yenek gihaum eshudok arpesh. Eshesh shani eik mape bihotih nyumnegwih jurug aria eshesh worigun wokesh. Eik yanoiwos um eshesh ta nyurub besh ba ishopokesh shunak. Esheshis nabes ta sonatiyanih aria marubigos sesh ba ta shututu gani yah.”

<sup>33</sup> Aria amam disaipel hakripan namudok, “Agundok arpesh wokagunum. Apak ta muraosabaiti bret agunum

ba ta mukesh atudok bret namudokishi sabaishi arpesh?”

<sup>34</sup> Aria Jisas nakri namudok, “Ipak douk pobuk makunig bretog gwakus?”

Aria amam hakripan namudok, “Apak mabuk 7-poreig bretog gwakus aria atur shokuguhwi eiguhw shopunek.”

<sup>35</sup> Aria Jisas nakrip eshudok ihish arpesh um shupe atap amnab. <sup>36</sup> Aria anan nohur agwudok 7-poreig bretog aria eiguhw, aria nenek beten aria nani Iruhin heyagwreh, aria anan nawor agwudok bretog aria nako ananim disaipel aria amam hasiagum eshudok arpesh. <sup>37</sup> Aria ihishmorim shawok worigun ba dugareh. Ihish tutukwanishi worigun shakuk iri douk amam ta hatorumesh ba heshuruk 7-poreiruh suraruh. <sup>38</sup> Amudok armam douk hawok worigun iri shadareham hatogur 4,000-poreim. Aria armago wani batowish madae shudarehesh uwe, uwok. <sup>39</sup> Jisas neshopok ihish arpesh shanak iyoh, aria anan naprok nato anat bot aria nanak gani anagum nahobig shahwaragum Magadan.

## 16

### *Anam Armam Harig Jisas Um Nenek Enen Iruhin Atun Neneken Iri Mour (Mak 8:11-13; Luk 12:54-56)*

<sup>1</sup> Amam Farisi hani Sadyusi hanamorim Jisas aria amam hakana hukwiraeh anan. Aria amam hakrip anan um nenek enen Iruhin atun neneken iri mour. Umum maresh? Amam hakana hutik aria ta hukri adur atin anan douk Iruhin naganin da nanaki. <sup>2</sup> Aria Jisas nakri namudok, “Wabigegwis ipak pakri, ‘Utag owishiborig atug. Yopubi nyutob ko butogur.’ <sup>3</sup> Aria ruwahewgis ipak pakri, ‘Eshah ta harari. Umum maresh, utag iganigadae gatogur owishiborigi aria behrabigi. Namudok aria douk ta uhwin nyahur aria eshah harari.’ Adur atin, ipak patik enyudok kak um utag genekesh ahi aih aria gamo padukemesh um yoweibi aka yopubi nyutob ta butogur. Aria ipak douk madae gamo putik enen kak um pudukemesh um eneshenesh shatogur douk abudok nyutob iri. <sup>4</sup> Eshesh arpesh um doukib nyutob ipak da yoweishi

arapesh aria ipak madae pukon ipakish urkum apahw adur atin um Iruhin uwe, uwok. Ihib nyutob eshesh shahwar um shakana shutik enen Iruhin atun neneken iri mour. Aria eshesh ta mare shutik enyudok kak uwe, uwok. Aria atin enen kak Iruhin atun neneken iri mour ipak ko putrin iri, enyudok profet Jona ananin.” Aria Jisas nakutukuk eshesh aria nanak.

*Jisas Nakrip Ananim Disaipel Um Gamo Hutrugun Um Amam Farisi Hani Amam Sadyusi Amamih Yoweihi Aih Kabi Douk Yis Um*  
(Mak 8:14-21)

<sup>5</sup> Jisas nani ananim disaipel hanak hatogur gani wobrag waiyag, aria amam disaipel urkwip peshukomuk um hurauri anog bretog shopunek. <sup>6</sup> Aria Jisas nakripam namudok, “Ipak ko gamo putrugun aria gamo pudukemesh um amam Farisi hani amam Sadyusi amamih yoweihi aih kabi douk yis um.”

<sup>7</sup> Aria amam disaipel apa heneyagwreh orokohun um amam kanak namudok, “Anan da neyagwreh enyudok baraen umum maresh? Apak da madae murauri anog bretog uwe, uwok.”

<sup>8</sup> Jisas nadukemesh um enyudok baraen amam hakriyenyi aria anan nakripam namudok, “Ipak madae punek bilip wosik um eik uwe, uwok. Umum maresh ba ipak apa pakri namudok, ‘Apak da bretog uwok?’ <sup>9</sup> Ipak da madae gamo pudukemesh aka? Aria ipak da madae pudukemesh um agwudok 5-poreig bretog da 5,000-poreish arapesh shagwahi, aria makuriruh sararuh da ipak poruk tutukwaniguni worigunaruhi? <sup>10</sup> Aria ipak da madae pudukemesh um agwudok 7-poreig bretog da 4,000-poreish arapesh shagwahi aria makuriruh sararuh da ipak poruk tutukwaniguni worigun aruhi? <sup>11</sup> Umum maresh ba ipak madae pudukemesh namudok, eik madae urkum murum bret aria eik yekep baraen ipak?

**16:18** **16:18** Enyudok baraen Jisas nakriyenyi douk nyakri arapesh, eshesh arapesh Jisas ananish atish douk shagipesh ananin baraen iri. Tok Inglis douk nyakri “My church.” Sabaishi arapesh shanam lotu iri shakri enyudok baraen Jisas nakriyen iri nyakri, “Eikit haus lotu”, aria uwok. Ipak punak pusorik Pater Don Grant aria anan nukripep. Putik Jerusalem Baibel aria putarih enyudok baraen Inglis putik “My Church.” Aria debeibi behrab um Church (Sios) douk bakripap um enyudok baraen nyakri Jisas Kraiss ananin Sios o ananish arapesh shagipeshan iri. Aria enyudok baraen madae nyukri “Eikin haus lotu” uwe, amu uwok.

Eik yakri, ipak ta gamo pudukemesh um amudok Farisi hani Sadyusi amamis yis.”

<sup>12</sup> Amam hemnek enyudok baraen aria amam hadukemesh namudok, anan madae niyagwreh um amam ta gamo hudukemesh um yis shenek bretasi uwe, uwok. Anan da neyagwreh um amam ta gamo hudukemesh um Farisi hani Sadyusi amamih yoweihi aih aria amamin baraen.

*Pita Nowereh Baraen Nakri Jisas Anan Douk Kraiss*  
(Mak 8:27-30; Luk 9:18-21)

<sup>13</sup> Jisas nanak um wabur gani Sisaria Filipai aria um abudok nyutob aria anan narik ananim disaipel namudok, “Eshesh ihish arapesh eshesh da apa shakriyen shakana Anudok Arman natogur adurinyi arpen iri douk amiapen?”

<sup>14</sup> Aria amam hakri namudok, “Enesh shakana, nyak da Jon nenek baptaisumesh iri. Aria enesh shakana, nyak da Elaija. Aria enesh shakana, nyak da Jeremaia aka, anan profet.”

<sup>15</sup> Aria Jisas narik amam namudok, “Aria ipak kanak pakana eik da amiapen?”

<sup>16</sup> Aria Saimon Pita nawanam baraen namudok, “Nyak douk anudok arman Iruhin nubokadae nagraehenyum nyunaki ta nyurao ihishmorim ananish arapesh shutanamori. Nyak douk anudok arman Iruhin douk madae nugok iri uwe ananin naganin.”

<sup>17</sup> Aria Jisas nakrip anan namudok, “Saimon Jon ananin naganin, nyak ko nyunadudareh. Umum maresh? Madae enen abudok amnabin arpen da nyeyabigen enyudok baraen um nyak uwe, uwok. Eikin Yaken douk nape heven iri anan atun neyabigen enyudok um nyak. <sup>18</sup> Aria eik yakrip nyak namudok. Nyak douk Pita, aria eik ta irok eikit arapesh shenek lotuati urupat16:18tiyotu dodog iruhw



um amudok utom. Aria enyudok gokin dodog ta mare nyununut uwe, uwok. <sup>19</sup> Aria eik ta douk iken eshudok kihas um nyak um arpesch shuwish aburdok wabur heven Iruhin nape Debeini um ananish arpesch um. Aria maresh nyak nyutapesch um abudok amnab, aria anan Iruhin ta nutapesch gani iruhw heven shopunek. Aria maresh nyak nyukweshihesh abudok amnab, aria anan Iruhin ta nukweshihesh gani iruhw heven shopunek.”

<sup>20</sup> Aria Jisas namumup ananim disaipel dodog abom um amam mare hukrip enen arpen um anan kanak douk anudok arman Iruhin nagraehan aria neshopokan nanaki iri.

*Jisas Nakri Adur Atin Um Anan Ko Shon Nugok Aria Anan Ta Nukitak Nupe*  
(Mak 8:31, 9:1; Luk 9:22-27)

<sup>21</sup> Aria abudok nyutob Jisas apa nakrip amam disaipel namudok anan ta nunam Jerusalem aria anan ta nurao sabairi eriger um amam Juda esheshim debeimi huni amam douk henek skulumesh um lo iri aria debeimi pris. Aria ta shon nugok, aria bihotih nyumneh hunak hunakuk aria anan ko ta nukitak nupe. <sup>22</sup> Aria Pita nemnek enyudok baraan aria narao Jisas nanak anagas aria apa nahan nakri namudok, “Debeini, namudok ta uwok. Eshudok eneshenesh ta mare shutogurum nyak.”

<sup>23</sup> Aria Jisas natanam nakrip Pita namudok, “Satan, nyak yowi kareiguk eikib agab. Nyak nyakana nyutapok eikih yah. Nyak madae nyigipesh Iruhin ananim urkum apahw uwe, uwok. Nyak douk nyagipesh arpesch esheshish urkum apahw atish iri.”

<sup>24</sup> Aria Jisas nakrip ananim disaipel namudok, “Meishi arpesch douk shakana shigipesh eik um, aria eshesh ta shubukuk ihishmorim eneshenesh esheshish urkum apahw shakriyeshi aria shusah esheshin rowogin kruse aria ta shugipesh eik. <sup>25</sup> Umum maresh? Douk meishi arpesch shakana shagabe eshesh kanak aria eshesh ta shunanunu shuwishuk. Aria ta meishi arpesch esheshish urkum apahw shurum eik iri aria eshesh ta mare shugok uwe,

uwok. Eshesh ta shupe. <sup>26</sup> Aria douk enesh arpesch shurao ihish abudok amnabish eneshenesh aria eshesh kanak ta shunanunu shuwishuk, aria eshudok ihish eneshenesh ta shutaurum eshesh mumam? Namudok ta uwok. Aria eshudok arpesch ta shuko maresh eshudok ba ta shutor eshesh kanak esheshiruh yegeshiweruh? <sup>27</sup> Aria Eik Anudok Arman yatogur adurinyi arpen iri ko ipeum eikin Yaken ananit debeiti lait tuni ananin dodog aria eik ta inaki ini eikish enselahos. Aria um abudok nyutob eik ta ikesh yopishi eneshenesh ihishmorim atin atin arpesch um kabi da shapeum maresh yoweishi aria yopishi eneshenesh da shenekesh abudok amnab iri. <sup>28</sup> Eik yakri adurin baraan um ipak, enesh arpesch shetu agundok iri ko mare shugok aria ta shutik Eik Anudok Arman yatogur adurinyi arpen iri inaki kabi da anan king um.”

## 17

*Jisas Ananihw Yegenyihw Hwakabadig Ba Natogur Anahaeh*

(Mak 9:2-13; Luk 9:28-36)

<sup>1</sup> Aria 6-poreih nyumneh hanak hunakuk, aria Jisas narao Pita, Jems nani waninuman Jon, aria naram hato onohw rouhwi hwato abom iri yoduhw. Aria amam atum hape nagundok. <sup>2</sup> Aria amam hape apa hatik aria Jisas ananihw yegenyihw hwakabadig ba natogur anahaeh. Aria ananig yomag gatogur kabi da nyumnahin aun morim, aria ananish rupeh hatogur mamokihw shigorihw abom kabi da anat debeiti lait morim. <sup>3</sup> Aria Moses nani Elaija amam hatogur aria amam disaipel hatik Jisas nani amam biom apa heyagwreh. <sup>4</sup> Pita natik enyudok mugu aria nakrip Jisas namudok, “Debeini, enyudok wosik um apak douk mupe agnudok. Nyak nyukri um, aria eik ko irok bisotup ourogwis. Anap nyakip, anap Moses ananip aria anap Elaija ananip.”

<sup>5</sup> Pita wata apa neyagwreh aria anat utogit arut tenek lait abom iri tabuhi teyawiyam. Aria anah mah hatograri atudok arut hakri namudok, “Anudok Eik kanak Eikin Nuganin. Eik yakri

yanawasham anan aria yanadudareh um anan abom. Aria ipak ta ko punnek ananin baraeen.”

<sup>6</sup> Amam disaipel hemnek enyudok baraeen, aria amam habuh atap amnab hoduk ohrubus aria hawido baragos sabuh amnab, aria amam hanogugur abom. <sup>7</sup> Aria Jisas nanak hurukum amam aria nasusuom aria nakri namudok, “Ipak kitak aria ipak mare punogugur.”

<sup>8</sup> Aria amam hanig hatik iruhw, aria amam madae hutik enen kupainyi arpen uwe, uwok. Aria amam hatik Jisas atun.

<sup>9</sup> Aria amam hakutukuk ahwudok yoduhw aria amam apa habuh yah, aria Jisas nakripam dodog namudok, “Eshudok muguhwos ipak da patrishi, ipak ta mare pukrip enen arpen uwe, uwok, arigaha kweipon nohumu nyumnah Eik Anudok Arman douk yatogur adurin arman iri ko ikutukuk wonugwehw ba ta ikitak ipeum agundok shagok um.”

<sup>10</sup> Aria amam disaipel harigan namudok, “Umum maresh ba amudok henek skulumesh um lo iri apa hakri namudok um Elaija ta nurik nunaki?”

<sup>11</sup> Aria Jisas nakri namudok, “Enyudok baraeen douk adurin. Elaija ta natanamori ba nagabe ihishmorim eneshenesh. <sup>12</sup> Aria eik yakrip ipak namudok, Elaija nubokadae nanaki, aria armam armago madae shudukeman uwe, uwok. Eshesh shagipesh eshesh kanak esheship urkwip aria shenekesh yowiyokuk um anan. Aria um ahudok atuh aih eshesh ta shenekesh yowiyokuk um Eik Anudok Arman douk yatogur adurinyi arpen iri.”

<sup>13</sup> Jisas nakri namudok, aria amam disaipel hadukemesh namudok, anan douk nakri Jon nenek baptaisumesh iri.

*Jisas Nagabe Anan Yoweinyi Sagab Nyapeyan Iri Batowinyin*  
(Mak 9:14-29; Luk 9:37-42)

<sup>14</sup> Jisas nani bimatun disaipel hanak hatogrum sabaishi arpes, aria anan arman nanamorim Jisas aria noduk ohrubus um anan. <sup>15</sup> Aria nakripan namudok, “Debeini, eik yakri nyak nyenek gihaum eikin armanin batowin.

Anan nagugak um aria ananihw yegenyihw hwanak hwatogur hwape yowiyokuk abom. Aria sabaihi anan natu nawish nyih, aria sabaihi anan natu nawish abar.

<sup>16</sup> Aria eik yaran morim nyakim disaipel, aria amam madae hugabeyan ba nutogur yopun uwe, uwok.”

<sup>17</sup> Aria Jisas nakripan namudok, “Ipak douk eshudok arpes da madae penek bilip iri, ipakish urkum aparuh baragos aria ipak penekahi aih douk madae wosik uwe, uwok. Aria makurib nyutob shopunek eik ta ini ipak mupe? Aria makurib nyutob shopunek eik ta isah ipakin amain? Haraki enyudok armanin batowin agnudok um eik.”

<sup>18</sup> Aria Jisas naho enyudok yoweinyi sagab, aria enyudok yoweinyi sagab nyakutukuk anudok batowinyin aria atub nyutob ananin arugeh hatuh.

<sup>19</sup> Aria bagiguki nyutob disaipel atum hanamori Jisas aria harigan namudok, “Umum maresh ba apak douk madae muhiyahuk enyudok yoweinyi sagab?”

<sup>20</sup> Aria anan nakripam namudok, “Ipakin bilip douk shokwin abom, namudok aria ipak ta mare penekesh namudok uwe, uwok. Eik yakripep adurin baraeen, ipak douk pene bilip kabi da anam shokumi rowogim mastetim shurkum, aria ipak ta wosik pukrip ahwudok yoduhw, ‘Nyak kitak ba kare ganudok, aria ohwohw ta hwukitak hwunak. Aria adur atin eshudok ihish ipak ta penekesh.’

[<sup>21</sup> Ipak pukuna penekesh namudok um, aria ipak ta penek beten pushakur um worigun aria ipak ta wosik ko puhayah eshudoki eneshenesh.]”

*Jisas Nakri Ananin Gok Aria Nukitak Nupe Um*

(Mak 9:30-32; Luk 9:43-45)

<sup>22-23</sup> Abudok nyutob Jisas nani ananim disaipel hantorum gani anab debeibi amnab Galili aria Jisas nakripam namudok, “Eshesh ko shuko Eik Anudok Arman douk yatogur adurinyi arpen iri um anam armam amamis wis. Aria amam ko he igok. Aria bihatuh nyumneh hutuh aria eik ta ikitak.”

Amam disaipel hemnek enyudok baraen aria amamish urkum apahw yowesh abom.

*Jisas Nenek Takis Nobuk Utabor Um Iruhin Ananit Debeiti Urupat*

<sup>24</sup> Jisas nani ananim disaipel hanak hatogur wabur Kaperneam, aria armam harao takis um Iruhin ananit debeiti urupat iri hanamori Pita aria harigan namudok, “Ipakin tisa nobuk utabor um Iruhin ananit debeiti urupat aka, uwok?”

<sup>25</sup> Aria Pita nakri namudok, “Wosik anan shopunek nenek takis nabuk utabor.”

Aria Pita nawish urupat, aria Pita watak niyagwreh uwe, aria Jisas narigan namudok, “Saimon, nyakim urkum mor mumam? Anam king um agudok nahobig amam da hurao utabor um kupakupaisi takis um amiapen? Amam da harao takis um amam kanak amamish wanaruh, aka um kupaishi armam armago?”

<sup>26</sup> Aria Pita nakri namudok, “Um eshesh kupakupaishi arpes.”

Aria Jisas nakripan namudok, “Namudok aria amam kanak amamish wanaruh ta mare shenek takis. <sup>27</sup> Aria apak mare menek amamirub nyirub yowerub um apak. Nyak kare gani waiyag ba nyuwashak nyumabur. Aria rarig iri eyur nyak nyanukor iri, nyak nyusuar ba nyupok nukwatirum eyur aria nyak ta nyutik anam utom mur numun nukwat. Nyak nyutuk amudok utom aria nyunak nyuko amudok armam um nyutor ohwak biohw ohwakis takis.”

## 18

*Jisas Nakri Um Amiapen Douk Enyenyin Nyeigur Nyupe Debeinyi Um Agundok Iruhin Nape Debeini Um Ananish Arpes Um*

*(Mak 9:33-37; Luk 9:46-48)*

<sup>1</sup> Abudok nyutob amam disaipel hanamorim Jisas aria harigan namudok, “Amiapen ta nyurao debeinyi nyeigur um agundok Iruhin nape Debeini um ananish arpes shapeum heven?”

<sup>2</sup> Aria Jisas nahwari enen batowin nyanaki aria nyetu orokohun um amam.

<sup>3</sup> Aria nakripam namudok, “Eik yakripep

adurin baraen, ipak nuboo douk mare pubukuk eshudok ipakish yoweishi urkum apahw shape ba shorahi aih, aria ipak ta mare putogur kabi da enyudok shokwinyi batowin um, aria ipak ta mare puwish agundok Iruhin nape Debeini um ananish arpes shapeum heven uwe, uwok. <sup>4</sup> Meishi arpes douk shupe kabi da enyudok batowin um, aria shubukuk esheshish yoweishi urkum apahw shape ba shorahi aih, sheshagrakuk enesh arpes aria eshesh douk ta shurao debeinyi nyeigur abom um agundok Iruhin nape Debeini um ananish arpes shapeum heven. <sup>5</sup> Aria douk meishi arpes urkwip purum eik aria shataurum enen shokwinyi batowin kabi da enyudok batowin um, aria eshesh da shataurum eik.”

*Eneshenesh Douk Shanuk Arpes Um Shenek Yoweishi Inahos*  
*(Mak 9:42-48; Luk 17:1-2)*

<sup>6</sup> Aria Jisas ta nakri namudok, “Douk meinyi arpen nyenekesh ba enen um eshudok shokwishi batowish da nyenek bilip um eik iri nyugrukumori nyenek yoweishi inahos aria enyudok arpen nyenekesh namudok iri douk enesh arpes ko shuweshik anam debeimi utom um enyudok arpen enyenyin aruhwigur aria shuwashen nyubuh gani atapigum youg aria nyugok. <sup>7</sup> Eik yakri debeinyi gihaum agudok nahobigish arpes, eshesh apa shenekesh um kupaishi arpes ba shagruk-morim shenek yoweishi inahos. Adur um eshudok yoweishi inahos ta shutogur. Aria eik yenek giha abom um eshudok douk shenek eshudok yoweishi inahos ba shutogur iri. <sup>8</sup> Namudok aria nuboo ipakish roguh waiyas shonukep um penek yoweishi inahos um, aria ipak putupesh ba puwasheshuk. Namudok wosik um ipak da atin rogur aria atug aiyag shupeumep aria puwishum yopinyi poe aria pupe wosik ihih nyumneh. Aria ta ipak ko biobiyesh roguh waiyas shupeyep aria ta shuwashep puwish um ehudok yoweishi nyih madae hugok iri uwe, uwok. <sup>9</sup> Aria douk ipakis nabes seneken um penek yoweishi inahos aria ipak tuk

anap nabep ba puwashopuk. Namudok wosik um ipak da atup nabep pupeyep aria puwish um yopinyi poe aria pupe wosik ihih nyumneh. Aria ta ipak ko biyos nabes supeyep aria ta shuwashep puwish um yoweiburi wabur hel ehudok yoweihi nyih madae hugok iri uwe, uwok.

<sup>10</sup> “Ipak ko gamo pudukemesh namudok. Ipak ta mare pukuna enen batowin orokohun um eshudok batowish da yoweishigom uwe, uwok. Eik yakrip ipak um gani heven esheshish enselahos, ihib nyutob ta sheyatu um eikin Yaken ananig yomag da nape gani heven iri. [<sup>11</sup> Umum maresh? Eik douk Anudok Arman yatogur adurinyi arpen iri yanamori yataurum eshudok arpeshep douk shanak shawishukuk iri.]”

*Jisas Nakripesh Wobuwobren Baraen Um Atin Nyanak Nyawishuk Iri Sipsip (Luk 15:3-7)*

<sup>12</sup> Aria Jisas ta nakri namudok, “Douk ta anan arman nagrem 100-poreish sipsipahos aria atin enen nyunak nyuwishuk, aria ipak pakri anan ta nenekesh mumam? Anan ta nunak nurimen aka, uwok? Adur atin eik yakripep, anan ta nukutukuk eshudok enesh 99-poreish shiyatukuk anag mihig aria anan ta nutanam nanak nurim enyudok atin da nyanak nyawishuk iri. <sup>13</sup> Eik yakripep adurin baraen, anan ta nanak ba nuparug enyudok sipsip ba jurug, aria anan ta nunadudareh abom. Anan nanadudareh um eshudok 99-poreish sipsipahos madae shunatukuk iri, aria anan ta nuparug enyudok atin arag da nyawishuk iri, aria anan ta amu nunadudareh abom. <sup>14</sup> Aria douk namudok atin um ipakin Yaken nape heven iri anan da nanaiwos um enen um eshudok shokwishi batowish ko shuwishuk uwe, uwok.”

*Apak Munek Yopishi Um Apakin Wanin Nenek Yoweishi Inahos Iri*

<sup>15</sup> Aria Jisas nakri namudok, “Aria douk anan nyakin wanin nenek yoweishi inahos um nyak, aria nyak nyunak ba nyutik anan, aria ta ipak atip pupeum, aria nyak nyukwiraeh um nyugabe baraen nyuni anan. Aria anan ta nemnek nyakin baraen um, aria nyak douk nyagabeyan

nyaran natanamori um nyak. <sup>16</sup> Aria anan da madae nemnek nyakin baraen um, aria nyak nyurao enen aka biyesh arpeshep shiren shunak. Namudok aria ta biyesh aka bishatin arpeshep um ta shenek enyudok baraen nyutogur dodogeshin.”

<sup>17</sup> Aria anan ta mare nukuna nemnek esheshin baraen um, aria nyak nyunak nyukrip eshesh Iruhin ananish arpeshep. Aria anan ta nukuna nunoiwos um nemnek esheshin baraen shopunek, aria nyak ta nyutik anan da kabi eshudok madae shumnek Iruhin ananin baraen iri aria kabi da amudok yoweimi armam harao takis iri.

<sup>18</sup> “Aria eik yakripep adurin baraen, ihishmorim eneshenesh ipak pakri ta patapeshep um abudok amnab iri, eshudoki ta Iruhin shopunek natapeshep um gani iruhw heven. Aria ihishmorim eneshenesh ipak pakri pukweshihesh um abudok amnab iri, eshudok ta Iruhin shopunek ta nukweshihesh um gani iruhw heven.

<sup>19</sup> “Aria eik yakri dodog um ipak namudok. Douk ipak biyep abudok amnabip putogur atish urkum apahw um enesh muguhwos aria penek beten um eshudok muguhwos, aria eikin Yaken nape gani iruhw heven iri anan ta nokep enyudok mugu um ipak. <sup>20</sup> Aria douk biyesh aka bishatin shuntorum um eikin nyeigur, aria eik kanak ta ipe orokohun um eshesh.”

*Jisas Nakripesh Wobuwobren Baraen Um Apakip Urkwip Mare Purum Yoweishi Inahos Kupaishi Shenekesh Um Apak Iri.*

<sup>21</sup> Um abudok nyutob Pita nanamorim Jisas aria narigan namudok, “Debeini, nubokadae eikin wanin ta nenek yoweishi inahos um eik makurib nyutob, aria eik ta ikweshihuk ananish yoweishi inahos makurib nyutob? Eik ta ikweshihesh-ukuk 7-poreib nyutob, aka?”

<sup>22</sup> Aria Jisas nakripan namudok, “Eik douk madae ikrip nyak um ta nyukweshihuk yoweishi inahos 7-poreib nyutob uwe, uwok. Eik yakri nyak ta nyukweshihuk eshudok yoweishi inahos sabaihi um hutogur 490-poreib nyutob.

<sup>23</sup> “Nyak nyumnek. Arpesh shuwish agundok Iruhin nape Debeini um ananish arpesh shapeum heven douk kabi anan king nenekesh um. Anan nakri um ananim heneman mour iri ta hanaki aria hubeiman tukwanibor utabor huni anan. <sup>24</sup> Aria anan douk napeum nenek mour um norig amudok, aria amam harawi anan arman nanaki um king, anan nubokadae rig nurao sabaibori utabor um king batogur um 10 milionibor utabor. <sup>25</sup> Aria anudok arman utabor uwok um ta noko king. Namudok aria king nakripesh um ta shunak shukrip kupaishi um shutor anudok nini ananish armatok batowish aria ta shutogur kabi da shenek mour meyoh um kupaimi armam. Aria ihish ananish eneshenesh eshesh ko shutorish aria utabor ta bunam king. <sup>26</sup> Aria anudok nenek mour meyoh um king iri nemnek enyudok baraan aria nabuh noduk ohrubus hurukum king ananiruh yeriweruh aria nakripan namudok, ‘Nyak ko nyenek gihaum eik ba nyiyatume. Eik ta ko itanam ibeimen ihibormorim utabor nubo nyekeyebor iri.’ <sup>27</sup> Aria anudok arman ananin debeini nenek gihaum anan aria nokweshihuk anan aria nakana utabor bugokuk.

<sup>28</sup> “Aria anudok arman nenek mour meyoh um king iri natogur nanak aria natik anan da henek mour atugun iri. Anudok anan da 10-porein kina atin ta nyape madae nuwanaman abrudok utabor uwe, uwok. Aria anan nasuhw ananin aruhwigur dodog, aria nakripan namudok, ‘Nyak ta nyutanam nyubeime iri ihibor utabor nyak nyarabor um eik iri.’

<sup>29</sup> “Anudok nenek mour atugun iri nemnek enyudok baraan aria nabuh noduk ohrubus aria nakrip anudok arman namudok, ‘Nyak ko ta nyenek gihaum eik aria nyiyatume. Aria eik ta ko itanam ikenyugu ihibor um eik nubo yatrin ba nyukeyobor iri.’

<sup>30</sup> “Aria anudok arman madae numnek baraan uwe, uwok. Amu nanaiwos abom. Aria nanak noweshik anudok nenek mour atugun iri um nupe arigaha nuwanaman utabor aria ta jurug.

<sup>31</sup> “Amam kupaimi da hani anudok henek mour atugun iri hatik anudok nenekesh namudok aria amamish urkum apahw yowesh abom. Aria amam hanak hakrip amamin debeini um ihimorim ahudok yoweih aih anudok nenek mourum debeini da nenekeshum. <sup>32</sup> Namudok aria anudok debeini nohwari anudok neneman mour iri aria nakripan namudok, ‘Nyak douk yowenyari nyenek mour um eik iri. Iganigadae riguk nyanaki nyereh um eik, aria eik yakweshihuk ihin baraan um eikibor utabor nubo bakus um nyak iri eik yakana ta bugokuk namudok. <sup>33</sup> Eik yenek gihaum nyak. Namudok aria umum madesh ba nyak madae nyunek giha shopunek um anudok nani nyak penek mour atugun iri?’ <sup>34</sup> Aria anudok ananin debeini ananish urkum apahw juwehosish abom aria nakrip amudok soldia hanaki huran hunak gani shunuweshik-ati urupat um nurao debeiri eriger arigaha nutanam nukon ihibor utabor nubo king nukonabor iri arigaha niyatabor aria jurug.

<sup>35</sup> “Namudok atin eikin yaken da nape iruhw heven iri, anan ta nenekesh apunih aih um ipak da madae adur atin pukweshihuk yoweishi inahos um anam owarhim da henekesh um ipak iri uwe, uwok.”

## 19

*Jisas Nakripesh Um Agundok Douk Shabrig Eshesh Kanak Da Shanaraum Um (Mak 10:1-12; Luk 16:18)*

<sup>1</sup> Jisas nakripesh enyudok ihin baraan ba nyatuh, aria anan nakutukuk agudok shokugi nahobig Galili aria nani ananim disaipel hanak gani gagadok anag shokugi nahobig Judia um gani wobrab worub Jordan. <sup>2</sup> Aria sabaishi arpesh shagipesh anan. Aria um nagundok anan nagabe esheshih ihih arugeh da hapeyeshi.

<sup>3</sup> Aria anam Farisi hanamori Jisas aria hakana hukwiraeh anan um nukri enen baraan madae yopin uwe iri. Aria amam harigan namudok, “Apakin lo da wosik nyakrium anan arman ta wosik

neyatakuk ananik irohukwik um enen hwarohwin baraen meyoh aka, uwok?”

<sup>4</sup> Aria Jisas nabeimam baraen namudok, “Ipak nuboo patik baraen nyetem Iruhin ananik buk aka, uwok? Enyudok baraen nyakri namudok, ‘Seiwok seiwok Iruhin nokwarum ihish enesh-enesh um aria nenek arpesh shopunek aria nenekesh shatogur arman armatok.’”  
<sup>5</sup> Aria Iruhin nakri namudok, ‘Namudok aria douk arman ta nukutukuk ananish amakenyish aria nunak nunakurop nini ananik armatok shupe aria eshesh biyesh ta shutogur atuhw yegenyihw. <sup>6</sup> Iruhin nakri namudok aria eshesh biyesh da madae shupe tukwotukwan uwe, uwok. Eshesh douk shatogur atuhw yegenyihw. Namudok aria eneshenesh Iruhin nadruneshi, eshudoki douk anan arman ko mare nubrigesh uwe. Amu wouwokuk abom.’”

<sup>7</sup> Aria amam Farisi hakripan namudok, “Namudok aria umum maresh, ba Moses nakop enen lo apak aria nakri namudok, anan arman ta wosik nenek anap shup um nubrig agundok da arman armatok shanaraum um aria niatok ananik irohukwik ba kunakuk?”

<sup>8</sup> Aria Jisas nakripam nabeimam baraen namudok, “Ipak baragos seshukep aria madae pumnek baraen iri. Namudok aria Moses nakri wosik um ipak piyatakuk ipakiyu irorihyeyu. Aria seiwok seiwok Iruhin nakwaram eneshenesh obi, namudok madae shenekesh uwe, uwok. <sup>9</sup> Eik yakripep namudok. Douk meini arman ananik irohukwik madae kuni anan kupaipari arman shenek wehrur uwe, aria anudok arman neyatokuk aria nurao kupaikwi armatok, aria douk anudok arman anan kanak nenek yoweishi inahos um nani okwudok armatok shenek wehrur.”

<sup>10</sup> Amam disaipel hemnek enyudok baraen aria hakrip Jisas namudok, “Aria douk armam hugipesh ahudoki aih aria ba huni amamiyu irorihyeyu shupe atugun akure, aria enyudok meyoh um amudok armam mare ta hurao armago uwe aka, uwok.”

<sup>11</sup> Aria Jisas nakrip ananim disaipel namudok, “Enyudok baraen ihishmorim ta mare shigipeshen uwe, uwok. Iruhin

nukesh dodog um enesh arpesh atish um, ta shugipeshen. <sup>12</sup> Aria ipak gamo pumnek. Sabaimi armam da hape ba madae hurao armago uwe, uwok. Anam, nuboo hanakwarum um amamiruh yegeshiweruh yoweruh aria ta mare hubuki batowish uwe, uwok. Aria anam nuboo shatupok amamiruh yegeshiweruh aria ta mare hubuki batowish uwe, uwok. Aria anam amamip urkwip aparuh shor um hunek enyudok Iruhin ananin mour um hukrip arpesh shuwish agundok Iruhin nape Debeini um ananish arpesh shapeum heven. Namudok aria amam hakri uwok um hurao armago, hape meyoh. Aria meini arman douk wosik um nukuna numnek enyudok baraen, aria anan ta wosik gamo numnek.”

*Jisas Nenekumesh Yopihi Aih Enesh Batowish Aria Nenek Betenumesh (Mak 10:13-16; Luk 18:15-17)*

<sup>13</sup> Um abudok nyutob eshesh arpesh sharawi enesh shokwishi batowish shanamori Jisas. Eshesh shakana ta anan nuwem ananis wis iruhwishum ba nenemesh beten. Aria amam disaipel hahao eshudok arpesh. <sup>14</sup> Aria Jisas nakrip ananim disaipel namudok, “Ipak kutishuk batowish ba shanamorim eik. Umum maresh? Meishi arpesh douk shutogur kabi da eshudok shokwishi batowishum, aria shigipesh eikin baraen shenek yopihi aih iri, eshesh wosik ta shuwish agundok Iruhin nape Debeini um ananish arpesh shapeum heven.” <sup>15</sup> Aria anan nowem ananis wis iruhwishum batowish aria nakutukuk agundok ba nanak.

*Anan Worogwiruhin Arman Nagrem Sabaihi Jah Iri Nanaki Nani Jisas Heyagwreh*

*(Mak 10:17-31; Luk 18:18-30)*

<sup>16</sup> Aria anan worogwiruhin arman nanamori Jisas aria nakri namudok, “Tisa, eik ta inek maresh yopishi enesh-enesh aria yopihi aih aria ta iwish um yopinyi poe aria ipe wosik ihih nyumneh?”

<sup>17</sup> Aria Jisas nakripan namudok, “Umum maresh ba nyak nyarige um yopishi eneshenesh shani yopihi aih?”

Iruhin atun douk anan yopuni. Nyak nyakana nyuwish um yopinyi poe nyupe wosik ihih nyumneh, aria nyak douk nyigipesh Iruhin ananin lo da nyetem ananik buk iri.”<sup>18</sup> Aria anudok arman narik Jisas namudok, “Nyak douk nyakri meinyi lo?” Aria Jisas nakri namudok, “Baraen nyetem um enyudok lo namudok, ‘Ipak mare pubo kupaishi arpesh shugok. Ipak punaraum iri, ipak mare punak puni kupaiwari armago penek wehrur. Ipak mare pukwaruh. Ipak mare pugiyagig ba penek kwot meyoh um kupaishi armam armatok.’<sup>19</sup> Ipak pumnek ipakish amakenyish esheshin baraen pigipeshen. Aria ipak pukri punuwasham ihish arpesh kabi da pakri panawasham ipak kanak morim.’”

<sup>20</sup> Aria anudok worogwiruhin arman nakrip Jisas namudok, “Eik douk yagipesh enyudok ihinyumorim lo yeyaten. Aria douk maresh yopishi eneshenesh maroh yopihi aih da ta shape douk eik watak inekesh uwe?”

<sup>21</sup> Aria Jisas nakripan namudok, “Douk nyak nyakana nyutogur yopuyopunyi arpen um, aria nyak kare ba nyuhur nyakih sabaihi jah aria nyuko kupaishi shutoruh. Shutoruh jurug shuken utabor aria nyunak nyisyabor um arpesh douk eneshenesh wokeshi. Nyak nyenekesh namudok, aria nyak ta nyurao yopiyopishi eneshenesh gani iruhw heven. Aria nyak nyunaki ba nyigipesh eik.”

<sup>22</sup> Aria anudok worogwiruhin arman nemnek enyudok baraen aria ananish urkum apahw yowesh abom aria nanak. Umum maresh, anan douk nagrem sabaishi eneshenesh.

<sup>23</sup> Aria Jisas nakrip ananim disaipel namudok, “Eik yakripep adurin baraen amudok douk hagem sabaibori utabor buni jah iri ta henek debeinyi mour um huwish aburdok wabur Iruhin nape Debeini um ananish arpesh shapeum heven.

<sup>24</sup> Aria eik ta ikripep shopunek, enen takweinyi mahin shahwaren um kamel iri nyukuna nyuwish nyilihw umunihw douk shanuk shokuburi nyumabur ba shutape jah ohwi umunihw, enyudok mare debeinyi mour abom uwe, uwok.

Aria nubo meishi arpesh shogrem sabai-bori utabor bani jah iri shukri shukuna shuwish heven agundok Iruhin nape Debeini um ananish arpesh shapeum, enyudok debeinyi mour abom.”

<sup>25</sup> Aria amam disaipel hemnek enyudok baraen aria hakitak yowiyokuk abom. Aria hakri namudok, “Um namudok, aria meishi ta shurao enyudok yopiyopinyi poe aria shupe wosik ihih nyumneh?”

<sup>26</sup> Aria Jisas ananis nabes duk atin natrum dodog aria nakri namudok, “Abudok amnabish arpesh shakwiraeh ba shatik uwok. Aria Iruhin ta wosik dodogowin um nenek ihish eneshenesh.”

<sup>27</sup> Jisas nakri namudok, aria Pita nawanam baraen aria nakripan namudok, “Nyak nyutik. Apak mabukuk ihish apakish eneshenesh aria magipesh nyak. Aria apak ta murao maresh eneshenesh?”

<sup>28</sup> Aria Jisas nakripam namudok, “Eik yakripep adurin baraen, um abudok nyutob ko ihish eneshenesh ta shutogur namushi atish shupe wosik um, aria Eik Anudok Arman yatogur adurin arpen iri ta itogur dodogoiwe irao debeinyi nyeigur um heven aria eik ikih ipe eikin kingin wagitur. Abudok nyutob ipak douk pagipesh eik iri ipak shopunek ta pupe iruhw 12-poreish yopishi wagiturahos aria pusuhw merik panuhwaram takwiyem um Israelis 12-poreis awiros.

<sup>29</sup> Aria ihishmorim arpesh nubo urkwip aparuh shor um eikin nyeigur iri aria shakutukuk esheshig urusag, owarhim, mohwiyariyu, amakek, yaken, nugashish aria nubarig eshesh ta shurao 100-poreish eneshenesh shuni arpesh shopunek um mour eshesh sheneken iri, aria eshesh ta shurao enyudok yopiyopinyi poe aria shupe wosik ihih nyumneh.

<sup>30</sup> Aria sabaishi douk shape sharigiri debeishi nyeiguhw shapeyeshi eshesh ko shunak shupe shigiguk. Aria sabaishi douk shape shagiguk iri, eshesh ko shunak shupe shurik.”

## 20

*Jisas Nakripesh Wobuwobren Baraen Um Armam Henek Mour Wainig Nubarig Iri*

<sup>1</sup> Aria Jisas ta nakri namudok, “Arpesh shuwish agundok Iruhin nape debeinari um ananish arpesh shapeum heven douk kabi anan arman da nagrem anag nubarig aria nau wain agari. Aria ruwahep wehip anan nanak narawi amudok ta heneman mour um ananig wainig nubarig iri. <sup>2</sup> Amudok ta henek mour iri hakri wosik um hurao atin atin kina um ahudok atuh nyumnah aria anudok debeini neshopokam hanak henek mour ananig wainig nubarig. <sup>3</sup> Aria ahudok atuh nyumnah ruwahep 9-kilok anudok debeini nanak agundok arpesh apa shantorum um aria natik anam armam heyotu atugun nagundok aria mour uwok. <sup>4</sup> Aria anudok debeini nakripam namudok, ‘Ipak shopunek kare penek mour eikig wainig nubarig aria eik ta ikep utabor bigipesh mour kabi da penekeniyi um.’

<sup>5</sup> “Aria amam shopunek hanak henek mour. Aria abudok nyutob um aruh aria wabigep 3-kilok, anudok debeini nanak ba ta nenek apunih aih kabi da iganigadae rig nenekesh um.

<sup>6</sup> “Aria um 5-kilok wabigep anan ta nanak aria natik anam kupaimi armam shopunek heyotu meyoh. Aria narigam namudok, ‘Umum maresh ba ipak da peyotu meyoh agundok um ahudok rouhi nyumnah?’

<sup>7</sup> “Aria amam hakripan namudok, ‘Douk madae anan arman nukop mour apak uwe, uwok.’

“Aria anudok debeini nakripam namudok, ‘Ipak shopunek kare ba penek mour eikig wainig nubarig.’

<sup>8</sup> “Aria wabigep mour nyatuhobi nyutob, anudok debeini nanaki nakrip ananin nasuhw merik um mour iri namudok, ‘Nyak hwari amudok henek mour iri ba nyutorum nyukam utabor. Sagomatin nyak nyurig nyukam utabor amudok da hagiguk hatogur um mour iri, aria nyukam utabor atun atun arigaha nyutogur um amudok da harig hanaki hatogur um mour iri.’

<sup>9</sup> “Aria amudok da hanak henek mour 5-kilok wabigep iri hanaki hurao atin atin kina. <sup>10</sup> Aria nyutob batogur um amudok

da harik hatogur um mour iri hanaki um hurao amamibor utabor, aria amamip urkwip por namudok amam ta hurao sabaibori utabor. Aria uwok, amam shopunek harao atin atin kina shopunek. <sup>11</sup> Amam hatik utabor amam harabori, aria amam hanitok hani anudok debeini nagrem nubarig iri namudok, <sup>12</sup> ‘Amudok armam hagiguk hatograri um mour, amam henek mour um atin arag aua, aria nyak nyokom atatahibor utabor um apak. Aria apak da marik menek debeinyi mour abom ruwahep arigaha douk, aria wah iganigadae hap abom.’

<sup>13</sup> “Anudok debeini nagrem nubarig iri nemnek enyudok baraen aria anan ta nakrip anan um amudok henek mour iri namudok, ‘Arpenyin, eik madae igiyagimen ba inek enen yoweinyi ina um nyak uwe, uwok. Iganigadae ohwak wabo baraen nyakus atugun aria nyakri wosik um nyenek mour shuknih nyumnah aria ta itorin atin arag kina. <sup>14</sup> Nyak nyurao nyakibor utabor aria kare nyunak. Amudok yagiguk yarawam iri douk eik kanak yakri wosik meyoh um yokam atatahibor utabor kabi da yako ipak um. <sup>15</sup> Eshudok eikish muguhwos. Aria eik ta mare igipesh eikim urkum aria isiya eikibor utabor, aka? Aria eik ta ikana inekesh yopuhi aih, aria umum maresh ba nyakish urkum apahw shenek nyigiya um eikih yopuhi aih?’ ”

<sup>16</sup> Aria Jisas nakri namudok, “Eshudok douk nyeiguhw wokeshi shape shagiguk iri, eshesh ko shutogur debeishi shupe shurik. Aria eshudok douk shatogur debeishi shape sharik iri, eshesh ko shupe shugiguk.”

*Ahudok Bihatuh Um Jisas Nakri Agundok Shon Nugok Um Aria Nukitak Nupe (Mak 10:32-34; Luk 18:31-34)*

<sup>17</sup> Aria Jisas nani ananim 12-poreim disaipel hagim yah hatoum Jerusalem. Aria anan nakripam um heyotum huni anan atun hunak aria amam apa hagim yah hanak aria Jisas nakripam namudok,

<sup>18</sup> “Ipak pumnek. Douk apak munak Jerusalem. Aria eshesh ko shuko Eik Anudok Arman yatogur adurinyi arpen



iri um amam debeimi pris huni amudok anam henek skulumesh um lo iri. Aria amam ko heneme kwot eik aria hubo baraan um ko he igok. <sup>19</sup> Aria amam ko huko eik um eshesh kupaishi da madae shunahwaram Juda iri, aria eshudok arpesk ko shububunim eik shugukoruhe aria shupruke aria ko she igok rowogin kruse. Aria bihotuh-ahi nyumnah eik ko ta ikitak um shagok iri um aria ipe.”

*Jems Nani Jon Harig Jisas Um Hakri Hutogur Debeimi*  
(Mak 10:35-45)

<sup>20</sup> Aria Sebedi ananik irohukwik kwanamori Jisas kwani okwokwim biom nagamim. Aria okwok kwabuh kwoduk ohrubus agundok Jisas napeum aria kwarigan um numnek okwokwin baraan. <sup>21</sup> Aria Jisas Narigok namudok, “Nyak nyakri maren baraan?”

Aria okwok kwakrip Jisas namudok, “Nyak ta nyukripe adurin atin baraan namudok. Amudok eikim biom nagamim ta hupe hurukum nyak, anan ta nupe wobrehah um nyakin yopunyi rogur aria anan ta nupe wobrehah um nyakin anagagrinn rogur, um agundok Iruhin nape debeini um ananish arpesk um.”

<sup>22</sup> Jisas nemnek enyudok baraan aria nakripok namudok, “Ipak douk madae gamo pudukemesh um maresh muguhwos ipak da parig eik-umesh iri. Aria ipak ta wosik um ta putaurume pusah eikin debeinyi amain aria pubroh enyudok koutukwi eik ta ibroh enyi aka, uwok?”

Aria Sebedi nagamim hakri namudok, “Ohwak biohw wosik ko utaurumen um usah enyudok amain aria ubroh enyudok koutukwi.”

<sup>23</sup> Aria Jisas nakripam namudok, “Adur atin ipak biom wosik ta ko pubroh enyudok eikin koutukwi um pusah eikin debeinyi amain. Aria enyudok um amiapen ta nyupe wabrehah um eikin yopunyi rogur aria wabrehah um eikin anagagrinn rogur, enyudok douk madae eikish muguhwos um ta iyagwreh ba igraeh ipak um outumeb ba ikripep uwe, uwok. Eshudok shapeyeshi wagiturahos eikin Yaken nubokadae nagraehesh um armam ta hupeyeshi.”

<sup>24</sup> Aria amudok amam 10-poreim disaipel hemnek baraan um Jon nani Jems da henekeshum aria amamirub nyirub juwehosirub aturub um amam biom. <sup>25</sup> Aria Jisas nahwari ihim-morim hanaki um anan aria nakripam namudok, “Ipak padukemesh, eshudok madae shudukemesh um Iruhin iri uwe um esheshih aih apa shenekoh um esheshim debeimi. Aria amudok esheshim debeimi dodogowim atum um ihish arpesk um ta shigipesh amamin atin baraan um shenek debeinyi mour. <sup>26</sup> Aria douk ahudoki aih ta mare hupe orokohunum ipak uwe, uwok. Meini arman nakana nupe debeini orokohun um ipak, aria anan ta nupe kabi da anan nenek mour um ipak iri. <sup>27</sup> Aria meini arman nakana niyotu nirik ba nurao debeinyi nyeigur um ipak iri, anan ko nupe nubuh atap ba nenek mour meyoh um ipak. <sup>28</sup> Namudok atin kabi da Eik Anudok Arman yatogur adurinyi arpen iri douk madae inaki um arpesk ta shenek mour um shutaurum eik uwe, uwok. Eik yanamori yataurum eshesh, aria ikesh eikihw yegenyihw um ta igok aria itor sabaishi arpesk ikweshihesh um esheshish yoweishi inahos shenekesh iri.”

*Jisas Nagabe Biom Nabes Seshuhomi Arman*  
(Mak 10:46-52; Luk 18:35-43)

<sup>29</sup> Aria Jisas nani ananim disaipel hakutukuk wabur Jeriko ba hunak. Aria sabaishi arpesk shagipeshan shanak.

<sup>30</sup> Aria biom nabes seshuhomi hape anagasihum yah. Aria amam hemnek baraan um Jisas douk nagimori yah nanaki aria amam hahwar debeg namudok, “Nyak, Devit ananin barhonin, nyak ko nyenek gihaum ohwak biohw.”

<sup>31</sup> Eshesh arpesk shemnek amam biom hahwar aria eshesh shakripam debeg um mare hiyagwreh huhwar aria amudok biom amu hahwar debeg abom namudok, “Debeini, nyak Devit Ananin barhonin, nyak ko nyenek gihaum ohwak biohw.”

<sup>32</sup> Aria Jisas neyotu ba nahwari amudok biom aria nakri namudok, “Ipak biom pakana eik ta inek maresh um ipak?”

<sup>33</sup> Aria amam biom hakripan namudok, “Debeini, ohwak biohw wakana nyak ta nyupok ohwakis nabes.” <sup>34</sup> Aria Jisas nenek gihaum amam biom aria nuwem wis amamis nabes arigas atin aria ta sanapok yopus aria ta hatrugun. Aria amam biom hagipesh Jisas hanak.

## 21

*Jisas Nawish Jerusalem Kabi Douk King Um*

*(Mak 11:1-11; Luk 19:28-40; Jon 12:12-19)*

<sup>1</sup> Jisas nani ananim disaipel hanak huruhuruk um Jerusalem aria amam hanak hatogur wabur Betfage hurukum gani Olivig mihig. Nagundok aria Jisas neshopok biom disaipel harik hanak.

<sup>2</sup> Anan nakripam namudok, “Punak nabrudok wabur bape barigiri. Aria nagundok ipak biom ta ko putik enen mahin donki shanatogen nyeir maduhw nyani enen nugaen aria pukweshihesh madururuh aria puraesh punam-morim eik.

<sup>3</sup> Enen arpen nyerigep um enen baraen um, aria pukripen namudok, ‘Apakin Debeini nakriyesh,’ aria anan ko nukweshihesh shanaki arigas atin.”

<sup>4</sup> Eshudok eneshenesh shenenek um shuwereh profet ananin baraen nyatogur adurin atin. Aria baraen enyudok.

<sup>5</sup> “Krip Saionibur debeiburi wabur, ‘Tik, ipakin king nanaki um ipak!

Anan samokwiyain arpen nanaki netemori enen mahin donki aria enen nugaen donki nyaran nyanaku.’”

<sup>6</sup> Aria disaipel hanak henekesh kabi douk Jisas nakripam um. <sup>7</sup> Aria amam harawi donki nyani nugaen. Aria amam hawashak amamih rupeh donkiyeb

agab, aria Jisas naprok nato nakih notem agabinyum donki. <sup>8</sup> Sabaishi arpesh shobuk esheshih rupeh gani yah. Aria kupaishi shatupoki shus sapeyeshi rowogoshish nyeiguhw aria sheshubuk yah. <sup>9</sup> Arpesh sharahaen sharik iri aria shagiguk um Jisas iri, amu apa sheyorub shahwar debeg namudok,

“Apak manadudareh um Devit ananin barhonin

aria matuk ananin nyeigur nyato iruhw.

Makri Iruhin wosik ta nunekuman yopunyi anudok arman

douk nanamori Debeini ananin nyeigur iri.

Apak makri eshesh shape iruhw heven iri shopunek shunadudareh-uman

aria shutuk Iruhin ananin nyeigur nyuto gani iruhw.”

<sup>10</sup> Jisas nawish Jerusalem aria ihish arpeshish mishish shakitak yowiyokuk aria shape shanasasorim, “Anan amiapen?”

<sup>11</sup> Aria eshudok sabaishi arpesh shantorum shagipeshan iri shape shahwar, “Anudok douk profet Jisas Nasaretepumin, nape gani shokugi nahobig Galili iri.”

*Jisas Nanak Nawish Narub Um Iruhin Ananit Debeiti Urupat*

*(Mak 11:15-19; Luk 19:45-48; Jon 2:13-22)*

<sup>12</sup> Jisas nanak nawish narub um Iruhin ananit debeiti urupat aria nehiyah eshudok arpesh douk apa shator eneshenesh aria shanakam eneshenesh shakwu utabor iri nagundok. Aria anan nabadiguk tebolhos douk shape shadareh utaboreshi aria wagiturahos shapeyeshi shopunek um eshudok douk shanakam utabor um armiguhw iri. <sup>13</sup> Aria anan nakrip eshesh namudok, “Iruhin ananik buk douk baraen nyakri namudok, ‘Eikit urupat douk ko shuhwarat um shenek betenati urupat.’ Aria ipak douk penekat tatogur kabi douk amudok hakwuaruh iri hanabeshuk-ati urupat.”

<sup>14</sup> Aria Jisas ta nape numun narub um atudok Iruhin ananit debeiti urupat aria enesh nabes seshukeshi shani aiyas yowegas iri shanaki. Eshesh shanaki aria nagabeyesh yopish. <sup>15</sup> Aria amam debeimi pris hani amudok anam henek skulumesh um Iruhin ananin lo iri hatik enyudok aria amam henek nyigiya um ananin mour aria urkum apahw juweshish atish. Umum maresh, amam hatik Jisas douk nenek enyudok Iruhin atun neneken iri mour nyani agundok batowish douk shahwar debeg shakri namudok,

“Apak manadudareh um Devit ananin

barhonin aria mohur ananin nyeigur nyato gani iruhw”

<sup>16</sup> Namudok aria amam hakrip Jisas namudok, “Nyak nyemnek enyudok baraan shokwishi shape shahwarumen iri aka, uwok?”

Aria Jisas nakripam namudok, “Eik douk yemnek. Enyudok Iruhin ananin baraan ipak patarihen aka, uwok? Baraan nyakri namudok, ‘Nyak Iruhin douk nyohur batowish shani eshudok shawok nyumeb iri aria shatuk nyakin nyeigur nyato iruhw.’”

<sup>17</sup> Jisas nakripam enyudok baraan jurug aria nakutukuk amam aria natogurum adukiburum wabur, aria nanak nape nagundok um wabur Betani um nishuh abudok wab.

*Jisas Neyagwreh Baraan Meyoh Aria Enyudok Rowog Fik Yarin*  
(Mak 11:12-14, 20-24)

<sup>18</sup> Aria ruwahep wehip Jisas nakitak aria ta natanam um Jerusalem. Napa nanak yah aria nemnek nyurub ban.

<sup>19</sup> Aria natik enen rowog fik nyeyatu anagas um yah aria nanak huruhurukumen. Aria natik madae enep shuruwep pir uwe, uwok. Natik shus atus seir. Anan natik namudok aria nakrip enyudok rowog namudok, “Nyak kweipon mare ta enep shuruwep piren uwe, uwok.” Aria ahudok atuh nyumnah enyudok rowog yarin.

<sup>20</sup> Aria amam disaipel hatik namudok aria hakitak yowiyokuk hanaboum roguh aria amam hanasorigum namudok, “Kakuri umum maresh aria enyudok rowog fik douk yarin arigas atin?”

<sup>21</sup> Aria Jisas nakripam namudok, “Eik yakripep adurin baraan, ipak douk gamo penek bilip um eik, aria ipak mare pur biyep urkwip aria ipak ko wosik penekesh namudok douk eik yenekesh um enyudok rowog fik um. Aria ipak ta mare penek enyudok atin uwe, uwok. Ipak ta pukrip agudok mihig, ‘Nyak kitak ba kare nyaprok nyubuh gani youg,’ aria enyudok mugu ko nyutogur kabi da ipak pukri um. <sup>22</sup> Aria ipak ta penek bilip um eik ba penek beten aria ihish eneshenesh ipak

penek beten um puraesh iri, eshesh ipak wosik ta ko puraesh.”

*Amam Debeimi Pris Harig Jisas Um Omi Nyakon Dodogowinyi Debeinyi Nyeigur Aria Nenek Enyudok-morim Mour*  
(Mak 11:27-33; Luk 20:1-8)

<sup>23</sup> Aria Jisas natanamori nawish narub um Iruhin ananit debeiti urupat aria apa nenek skulum eshesh arpesk um Iruhin ananin baraan. Aria amam debeimi pris hani eshesh Juda esheshim debeimi hanaki agundok anan napeum aria harigan namudok, “Nyak amiapen nyakripen aria nyuken enyudok big um nyenek eshudok eneshenesh? Aria douk amiapen nyakripen um wosik aria nyuken enyudok dodog?”

<sup>24</sup> Aria Jisas nakripam namudok, “Eik shopunek eik yakana iyarig ipak um enesh muguhwos. Aria ipak ko puwana-mume yopinyi baraan um eik aria eik shopunek ta ikripep um douk amiapen nyakripe ba nyeke big um inek enyudok mour. <sup>25</sup> Nubo Jon nenek baptaisumesh iri nenek baptaisumesh um, anan nubo amiapen nyakripan nyukon big ba nenek enyudok mour? Enyudok mour nyatogur iruhw heven aka, nyatogur abudok amnabish arpesk?”

Amam hemnek namudok aria amam kanak hanitok um baraan hakri namudok, “Apak ta mukana, ‘Enyudok mour nyatogur iruhw heven,’ aria anan ta norigap namudok, ‘Aria umum maresh ba ipak madae penek bilip um anan?’ <sup>26</sup> Aria apak ta mukri namudok, ‘Enyudok mour nyatogur abudok amnabish arpesk esheshin mour,’ aria apak ta munogugur um ihish arpesk. Umum maresh? Ihishmorim douk shadukemesh namudok Jon nenek baptaisumesh iri anan douk nanahwaram profet.”

<sup>27</sup> Aria amudok debeimi pris hani eshesh Juda esheshim debeimi hakrip Jisas namudok, “Apak madae mudukemesh uwe, uwok.”

Aria Jisas nakripam namudok, “Eik shopunek eik ta mare ikripep um douk amiapen nyakripe nyuke big ba yenek enyudoki mour uwe, uwok.”

*Jisas Nakripam Wobuwobren Baraen Um Anan Arman Nani Ananim Biom Nugamim*

<sup>28</sup> Aria Jisas ta nakri namudok, “Aria ipak douk urkwip por mumam um enyudok baraen? Anan arman nabuki biom nugamim. Aria anan nanam ashuken aria nakripan namudok. ‘Nya, kare douk ba nyenek mour wainig nubarig.’

<sup>29</sup> Aria san nunganin nakri namudok, ‘Eik yanoiws’. Aria nape ba uwok, aria nabo urkum um nakitak nanak nubarig.

<sup>30</sup> Aria yaken nanam anudok anan naganin aria nakripan apunin baraen. Aria shokuni nunganin nakri namudok, ‘Wosik eik ta ko inak’. Aria anudok shokuni naganin madae nanak uwe, uwok. <sup>31</sup> Aria um amudok biom nugamim, amiapen da nyagipesh yaken-umam ananin baraen?”

Aria amudok debeimi pris hani eshesh Juda esheshim debeimi hakri namudok, “San nunganin.”

Aria Jisas nakripam namudok, “Eik yakripep adurin baraen, amudok harao takis iri aria oudok weyotu yeh iri armago eshesh ko shurik shuwish um agundok Iruhin nape Debeini um ananish arpeshe um. <sup>32</sup> Umum maresh? Jon nenek baptaisumesh iri natogurum ipak aria neyabigep yopihi aih um ipak, aria ipak madae penek bilip um anan. Aria amudok harao takis iri aria oudok weyotu yeh iri armago eshesh shenek bilip um anan. Enyudok ipak patrin, aria ipak madae penek bilip ba pubukuk yoweishi inahos aria putanam pukon aparuh Iruhin uwe, uwok.”

*Jisas Nakripam Wobuwobren Baraen Um Yoweimi Armam Henek Mour Wainig Nubarig Iri*

*(Mak 12:1-12; Luk 20:9-19)*

<sup>33</sup> Aria Jisas ta nakri namudok, “Ipak ta shopunek pumnek enen wobuwobrenyi baraen. Anan arman nau wain anag nubarig aria naruk narub-umog. Aria numun nubarig anan narok anag bariyaigi nuwag um ko sharauri wainip shuruwep. Aria shurakep pubuh agudok nuwag aria shishishep shumawiyep, um shukwunish wainit ihat tutogur. Aria anan narok

anap pato potem iruhw iri aurop numun nubarig um arpeshe shupeyep um shiyoh nubarig. Aria anan nakrip anam armam um hurao kontrak aria hupe hiyohuman agudok ananig nubarig. Aria anan nanak napeik anabur rougunibur wabur. <sup>34</sup> Aria huruhurukum wainip shuruwep burep, aria neshopok amudok heneman mour iri hunam amudok harao kontrak iri gani wainig nubarig um hudiman wainip shuruwep. <sup>35</sup> Aria amudok armam harao kontrak um henek mour nubarig iri hasuhw amudok henek mour um debeini iri, aria habo anan hakwu wis aria anan han nagok aria anan hakwuman utabor ba nagok. <sup>36</sup> Aria anudok debeini nagrem nubarig iri ta neshopok kupaimi heneman mour iri hanam amudok harao kontrak ba heyoh nubarig iri. Ahudok nyumnah anan neshopok sabaimi henek uhwinyum nubokadae rig neshopokam hanak iri. Aria amudok armam harao kontrak aria hape heyohoman ananig nubarig iri hakitak henekesh apunih aih um kabi douk nubokadae rig henekeshum. <sup>37</sup> Nape ba uwok aria ta nagiguk neshopok ananin naganin nanam agudok nubarig. Aria ananim urkum mor namudok, ‘Eik ish-opok eikin naganin nunak um aria ta wosik amam ta humnekan.’

<sup>38</sup> “Aria amudok henek mour nubarig iri hatigu nunganin nanaki aria hanakripam hakri namudok, ‘Nagrem wainig nubarig iri ananin nunganin anudok kweipon nugrem ihish eneshenesh ananin yaken ananish iri. Ipak yowi mon nugok um agudok ananig nubarig aria apak murag.’

<sup>39</sup> “Namudok aria hanak hasuwan huwashaan natogur adukigum nubarig aria han nagok. <sup>40</sup> Aria Jisas narik amudok debeimi Pris hani eshesh Juda esheshim debeimi aria nakri namudok, ‘Aria douk abudok nyutob anudok nagrem nubarig iri nanaki obi nyutob aria ta nenekam mumam amudok henek mour nubarig iri?’ ”

<sup>41</sup> Aria amudok debeimi hawanam baraen hakri namudok, “Anan ko nuboo amudok yoweimi armam nom nukom debeiri eriger aria hugok. Aria agudok

wainig nubarig anan ko noko kupaimi heyohog. Um abudok nyutob wainip shuruwep burep, aria shudiyep shuko ananep.”

<sup>42</sup> Aria Jisas narigam namudok, “Ipak patrin enyudok baraan nyetem Iruhin ananik buk iri aka, uwok? Baraan enyudok nyakri namudok,

‘Amudok utom douk harok urupat iri hakana yoweimi aria huwasham-ukuk iri,

douk matogur yopumi marik iri utom dodogeshim um shurok urupat um, um mushubonim anagasitum urupat.

Enyudok douk Debeini atun neneken ny-atogur.

Neneken apak matrin aria makitak yowiyokuk

manadudareh makri enyen douk

Debeini atun neneken iri mour.’

<sup>43</sup> “Namudok aria eik yakrip ipak, Iruhin ko ta nupotik ipak aria mare puwish um agundok Iruhin nape Debeini um ananish arpesh shapeum aria ta nurao ananish arpesh douk shasuhw ananin baraan dodog aria shenekesh um yopihi aih iri aria eshesh shunak shuwish um agundok Iruhin nape Debeini um ananish arpesh shupeim. [ <sup>44</sup> Aria douk meishi arpesh shugrukuk ba shubuh shetem amudok utom, um ko tukuresh um biyeh aria purukureshuk shokugun shokugun. Aria meishi arpesh douk amudok utom mugruki ba mubi mutemesh iri, aria ko mushorig eshudok arpesh ba shutogur shenenem kabi douk munyabeg um.]”

<sup>45</sup> Aria amam debeimi pris hani Farisi hemnek Jisas ananin wobuwobrenyi baraan aria hadukemesh hakri anan douk nakriyen nenyum amam atum.

<sup>46</sup> Namudok aria hakri abom um husuhw Jisas um heneman baraan aria ta hanogugur um arpesh. Umum maresh? Eshesh shakri Jisas douk anan profet.

## 22

*Jisas Nakripam Wobuwobren Baraan Um Anagun Debeiguni Worigun Douk Shenekagun Um Biyesh Shanaraum Um (Luk 14:16-24)*

<sup>1</sup> Aria Jisas ta nakri enen kupainyi wobuwobren baraan shopunek um amudok debeimi namudok, <sup>2</sup> “Arpesh shuwish agundok Iruhin nape Debeini um ananish arpesh shapeum heven, douk kabi anan king nenekeshahi aih um. Ananin naganin nakana nurao armatok aria king nenek debeiguni worigun. <sup>3</sup> Atin anan nakrip arpesh um shunaki um agundok shanaraum-oguni worigun. Douk ahudok nyumnah hatogur um shuwok worigun-ahi aria anan neshopok heneman mour iri um hanak hukripesh shanaki. Aria hanak hakripesh ba shanoi-wos um shanaki. <sup>4</sup> Aria anan ta neshopok kupaimi heneman mour iri um hunak aria nakripam namudok, ‘Punak pukrip eshudok nobokuhi yenemesh baraan iri ba shunaki. Pukripesh namudok, “Pumnek. Eik yenek eikigun worigun aria yagunubuk ba nakus. Eikish ababish kauhos shani shanagoki shokushi kupaishi kauhos apak iganigadae maesh. Ihish eneshenesh iganigadae shenenek ba shakus. Ipak yowi munam agundok shanaraum-oguni debeiguni worigun.” ’

<sup>5</sup> “Hanak hakripesh ba madae shumnekam uwe, uwok. Eshesh shakitak shanam esheshin mour. Anan nanam nubarig. Anan nanak nenek mourum ananis bisnis. <sup>6</sup> Aria eshudok enesh shakitak shasuhw amudok heneman mour king iri sham irihwairoh shenekam abraenyim atum aria hagok. <sup>7</sup> Namudok ba king ananibur nyibur juwehosibur atubur, aria neshopok ananim soldia hanak habo eshudok douk shabo ananim hagok iri. Haesh shagok aria howehumesh esheshibur wabur hanubur heyatabur.

<sup>8</sup> “Aria king nahwar amudok anam heneman mour iri hanaki ba nakripam namudok, ‘Agundok eikigun worigun yenek-agun um eikin nunganin nurao armatok um douk nenenek nakus. Aria arpesh yenemesh baraan um shunaki iri, eshesh yoweishi arpesh aria madae shunaki uwe, uwok. <sup>9</sup> Namudok aria douk atin ipak punam sabaihi debeihi yeh aria putorumori ihish arpesh ipak putrishi. Aria ipak pukripesh aria puraesh punaki um

agundok worigun.’<sup>10</sup> Anan nakri namudok, aria amudok heneman nour iri hakitak hagim yeh hanak. Amam hanak aria hakrip sabaishi ba haraesh hanaki. Enesh yopishi enesh yoweishi. Haraeshi aria atudok debeiti urupat douk shenek worigun um eshudok biyesh shanaraum iri amu shunukit.

<sup>11</sup> “Douk shape aria king nanak nawishum nutrish. Nawish aria natik anan arman douk madae nurei yopuhi rupah douk shanoginohw-ahi um agnudok douk arpesh shanaraum um uwe, uwok.<sup>12</sup> Aria king narigan namudok, ‘Arpen, umum maresh? Aria nyak madae nyerei yopuhi rupah ba nyanak nyawishi agundok? Anan douk baraen woka mumukin aria nape.’

<sup>13</sup> “Aria king nakrip amudok heneman mour iri namudok, ‘Ipak puweshik anudok ananish roguhw aiyas aria puwahan nutogur aduk ba nupe arukwutigunum. Nutogur nupe um arukwutigun-ibur wabur arpesh shape shureh ba sharpogur esheshiruh naruh shuwegoruh ba shemnek debeiri eriger um.’”

<sup>14</sup> Aria Jisas nakripam, “Ipak punnek. Iruhin nadukemesh um nuhwari sabaishi arpesh aria nagraeh atin atin meyoh shupe shuni anan.”

*Anam Armam Harig Jisas Um Shenek Takis Um Eshesh Rom Esheshin Debeini Gavman Sisar*

*(Mak 2:13-17; Luk 20:20-26)*

<sup>15</sup> Amam Farisi hanak anabik aria heyagwreh habo baraen um hakri hunek rohwa husarigan enen baraen, ba hurim yeh um heneman kwot Jisas. Amam hakana hukwiraeh hugiyagim Jisas um niyagwreh enen nyaunyatograri baraen um aria amam Farisi ta heneman baraen Jisas um anan kanak ananin baraen.

<sup>16</sup> Amam heshopok amamim disaipel hani Herot ananim armam hanam Jisas aria hakripan namudok, “Tisa, apak madukemesh, nyak nyeyagwreh adurin baraen iri. Um enyudok adurin baraen atin nyak douk apa nyenek skulum arpesh um Iruhin ananin yopihi aih. Nyak madae nyunogugur enen arpen uwe, uwok. Nyak nyeyagwreh

apunin baraen um ihish arpesh, eshudok debeishi nyeiguhw shapeyeshi aria nyeiguhw wokeshi shopunek.<sup>17</sup> Namudok aria nyak kripap. Nyak douk ta nyukri mumam? Enyudok douk wosik um apak ta mukon takis um debeini gavman Sisar aka, uwok?”

<sup>18</sup> Jisas nadukemeshum amamip yoweipi urkwip por ehi aih aria nakri namudok, “Ipak pagiyagigi armam, ipak pakana pugiyagim eik um maresh?”

<sup>19</sup> Ipak ta puyabige anam utom ipak pator takis omi.”

Aria amam harawi anam utom um anan.<sup>20</sup> Aria Jisas narigam namudok, “Arudok aborir aria enyudok nyeigur omiapenyish?”

<sup>21</sup> Aria amam hakana, “Debeini gavman Sisar ananish.”

Aria Jisas nakripam namudok, “Enesh-enesh Sisar ananish ipak puko ananish, aria eneshenesh Iruhin ananish ipak puko Iruhinesh.”

<sup>22</sup> Amam hemnek enyudok baraen, hakitak yowiyokuk aria hakutukuk anan ba hanak.

*Amam Sadyusi Harig Jisas Um Agundok Shagok Iri Ta Shukitak Um*

*(Mak 12:13-17; Luk 20:27-40)*

<sup>23</sup> Ahudok atuh nyumnah amam Sadyusi douk apa hakri um shagokiri kweipon mare ta shukitak uwe iri, hanaki agundok Jisas napeum. Aria harig Jisas namudok,<sup>24</sup> “Tisa, Iruhin ananin lo seiwok nako Moses iri nyakri namudok, ‘Douk anan arman batowish uwok ba nugok, aria ananin wanin nuwaur ananik irohukwik ba kubuki batowish, um ashuken ananip awirop um ta mare diwarihuk iyoh.’<sup>25</sup> Seiwok anap awirop amakek yaken shabuki 7-poreim nagamim hape orokohun um apak. Ashuken nurao onok armatok um ananik irohukwik ba madae nubuki enesh batowish uwe, uwok, aria nagok. Namudok aria wanin ta nuwaur ashukekuman.<sup>26</sup> Aria wanin shopunek madae nubuki enesh batowish uwe aria anan shopunek nagok. Aria rabinari um ashukenyim biom shopunek nagok, okwudok ashukek kwaur ihm-morim owarhim arigaha

kwaaur nagiguki shopunek. <sup>27</sup> Ihim-morim amudok 7-poreim nugamim hagok aria bagiguki nyutob okwok shopunek kwagok. <sup>28</sup> Aria nyak kripap. Kweiponib nyutob arpesh shagok iri ko ta shukitak um, okwudok armatok kweipon kupeim kurao meinari arman um okwokwin raminen um amudok 7-poreim armam? Nyak nyadukemesh, ihm-morim seiwok haraokum amamik irohukwik.”

<sup>29</sup> Aria Jisas nakripam namudok, “Ipak madae pudukemesh um Iruhin ananin baraan douk nyetem ananik buk iri uwe, uwok. Aria ipak shopunek madae pudukemesh um enyudok dodogowinyi dodog Iruhin ananinyi uwe, uwok. Namudok aria ipak peyagwreh nyau-nyatograri yoweinyi baraan. <sup>30</sup> Kweipon eshudok arpesh shagok iri ta shukitakum, eshudok arpesh kweipon mare ta shanaraum uwe, uwok. Eshesh kweipon shupe kabi da enselahos shape iruhibur wabur heven. <sup>31</sup> Aria um enyudok baraan douk arpesh shagok ba shakitak um, eik yakana iyorik ipak. Ipak seiwok madae putarih Iruhin nakripep-enyi baraan um ipak aka, uwok? Anan nakri namudok, <sup>32</sup> ‘Eik Abraham nani Aisak nani Jakob henek lotu um eik iri, eik amamin Iruhin.’ Enyudok baraan nyakri Iruhin anan douk madae shagok iri esheshin Iruhin uwe, uwok. Anan douk arpesh shape iri eshesh shenek lotuman iri.” <sup>33</sup> Eshesh arpesh shemnek enyudok baraan, aria shakitak yowiyokuk um ananin baraan.

*Iruhin Ananin Nyarik Iri Lo  
(Mak 12:28-31; Luk 10:25-28)*

<sup>34</sup> Douk amam Farisi hemnek um Jisas nabeyomuk baraan amam Sadyusi aria amam hantorum hanamori anan. <sup>35</sup> Anan nadukemesh um Iruhin ananin lo nape orokohun um amudok. Anan nakana nukwiraeh nugiyagim Jisas um niyagwreh enen baraan madae yopunyi uwe aria narigan namudok. <sup>36</sup> “Tisa, meinyi lo douk nyarik iri um ihin Iruhin ananin lo aria nyenek uhwin um ihin kupainyi lo?”

<sup>37</sup> Aria Jisas nakripan namudok, “Ipak ko pukri punuwasham Iruhin, apakin Debeini. Ipak ko gamo pukri punuwasham anan adur atin um ipakin

shunukim urkum aria ipakin shunukin mishin aria um ipakinyum shunukinyum tinytin um punasuhw dodog pukri anan atun.’ <sup>38</sup> Enyudok lo enyen debeinyi aria dodogowin nyarikum ihin lo. <sup>39</sup> Aria enen lo nyagipesh enyudok lo enyen douk atatahin um enyudok nyarik iri lo. Enyudok lo nyakri namudok, ‘Ipak ko pukri punuwasham meishi arpesh douk shape huruk um ipak iri kabi da ipak pakri punuwasham ipak kanak morim um.’ <sup>40</sup> Enyudok biyen lo douk mamokin aria baugenyum ihin kupainyi baraenyum Iruhin ananin lo aria shopunek ihin baraan um amam profet henyemagak iri.”

*Jisas Narik Amam Farisi Um Anudok Arman Krai  
(Mak 12:35-37; Luk 20:41-44)*

<sup>41</sup> Amam Farisi hantorum hape atugun, aria Jisas narigam namudok, <sup>42</sup> “Ipak ip urkwip por mumam um anudok arman Krai Iruhin nagraehan neshopokan nanaki iri? Anan douk amiapenyin barhonin?”

Aria amam Farisi hakripan, “Anan douk Devit ananin barhonin.”

<sup>43</sup> Aria Jisas narigam namudok, “Namudok aria umum maresh aria Iruhin ananin Mishin seiwok nyakon urkum Devit aria anan nahwar anudok arman ‘Debeini?’ Umum maresh? Devit seiwok nakri,

<sup>44</sup> ‘Debeini nakrip eikin Debeini namudok,

“Nyak hagipe agundok ehahum eikin yopunyi rogur

arigaha eik ko ta ibo nyakim horim hubuh atap um nyak ba iyoh.” ’

<sup>45</sup> Ipak putik. Devit douk nahwar anudok arman Krai nakri, eikin Debeini. Namudok aria umum maresh ba Krai anan da Devit ananin barhonin?”

<sup>46</sup> Aria madae ananum amudok armam ta wosik nuwanam baraan ba nukrip Jisas uwe, uwok. Aria um ahudok nyumnah aria hagiguki nyumneh, amam hanogugurum horik Jisas um enesh muguhwos shopunek uwe, uwok.

## 23

*Jisas Nakripesh Dodogowinyi Baraen Um Mare Shigipesh Amam Farisi Hani Amam Henek Skulumesh Um Lo Iri Henekahi Yoweih Aih*

*(Mak 12:38-39; Luk 11:43, 46, 20:45-46)*

<sup>1</sup> Aria Jisas nape nakrip eshudok worobaishi arpes shani ananim disaipel. <sup>2</sup> Anan nakri namudok, “Amam Farisi hani amudok henek skulumesh um Iruhin ananin lo iri, hape debeimi henek skulumesh kabi seiwok Moses nape Debeini aria nenekesh um. <sup>3</sup> Namudok aria ihin baraen amam hakripepenyi, ipak ko punnek aria pigipeshen. Aria ehudok yoweih aih amam apa henekahi, ehudoki aih ipak mare pigipesheh uwe, uwok. Amam hakripesh um Iruhin ananin lo aria amam madae ta hugipeshen uwe, uwok. <sup>4</sup> Amam hakrip ipak um pigipesh dodogowinyi lo kabi da amaenyigwi unug hagwem ipakibus agabus, aria ipak penek debeinyi mour um apa pusah agwudok unug. Aria amam madae ta hutaurum ipak ba pusah enyudok dodogowinyi lo uwe, uwok.

<sup>5</sup> “Thish eneshenesh amam henekeshi, amam henekesh um arpes ta shutrum aria shukam big. Amam douk henek shaginohw-oguni bokisigun<sup>23:5</sup>aria haweshikogun nape amamigos yomogos aria roguhw. Aria amamih rupeh henekahi apubusih um rouhi hatogur heiruk. <sup>6</sup> Shenek debeiguni worigun um amam hakana hunak hupe wagiturahos shutao yopugunum um gani debeimi atum hapeim. Eshesh Juda shape sheneyagwreh baraeny-ogwi urusag shopuk amam hakana hunak hupe yopishi wagiturahos shape sharik iri. <sup>7</sup> Amam hakri abom um arpes shukripam shenekumam yopihi nyumnegwih, wabigegwis aria ruwahegwis gani shantorun um agegwiruhum, aria amam hakri abom um arpes shuhwaram ‘Debeini Tisa.’

23:5 **23:5** agundok shokuguni shaginohw-oguni bokisigun amam haweshikogun yomogos sani roguhw iri, amam douk hagipesh eshesh Juda esheshih aih aria haweshikogun nape. Agundok morim bokisigun douk howem enen Iruhin ananin baraen numunum bokisigun aria henyur nyorum urkwip porumen aria hugipeshen. Putik Namba 15:37-41.

<sup>8</sup> “Aria arpes douk mare ta shuhwarep ‘Debeini Tisa’ uwe, uwok. Atun arag arman anan douk ipakin Debeini Tisa aria ipak ihipmorim douk pape ashuken anin. <sup>9</sup> Aria douk atap agudok nahobig ipak ta mare puhwar anan arman ipakin yaken uwe, uwok. Atun arag arman nanahwaram ipakin yaken iri douk nape heven iri. <sup>10</sup> Aria douk mare ta shuhwarep ‘Debeimi’ uwe, uwok. Ipak douk puhwar atun arag Debeini, eik douk Kraisanudok arman Iruhin nagraehe ari neshopoke um yanaki iri. <sup>11</sup> Meishi arpes douk shukri shupe ipakish debeishi, eshesh ta shupe shunek mourum ipak meyoh. <sup>12</sup> Meishi arpes shakana shuto debeishi abom iri eshesh shubuh atap iri. Meishi arpes madae shuhur esheshish nyeiguhw shuto iruhw iri, eshesh ta shunahwaram debeishi arpes.”

*Jisas Nakrip Amam Farisi Hani Amam Henek Skulumeshum Iruhin Ananin Lo Iri Um Yoweih Aih Amam Henek Iri*  
*(Mak 12:40; Luk 11:39-52, 20:47)*

<sup>13-14</sup> Aria Jisas ta shopunek nakri namudok, “Eik yakri giha abom um ipak penek skulumesh um lo iri aria ipak Farisi. Aria ipak ko pupe yoweih aihum. Umum maresh, ipak peyagwreh biyog nukwatog iri. Umum maresh? Ipak padukemesh um putapok witogum arpes shakana shuwish aburdok wabur um Iruhin nape Debeini um ananish arpes shapeum heven. Umum maresh? Ipak kanak shopunek ta mare puwish uwe, uwok. Aria kadak ba arpes shakana shuwishum aria ipak punak putapumesh yah eshesh kabi da putapok witog um esheshis nabes yomogos um.

<sup>15</sup> “Eik yakri giha abom um ipak penek skulumesh um lo iri aria ipak Farisi. Aria ipak ko pupe yoweih aihum. Umum maresh? Ipak peyagwreh biyog nukwatog iri. Ipak panak parahaen ihigunum youg aria amnab umum pakana penek atun arman um nutogur ipakin disaipel. Aria abudok nyutob anan ko nutogur



disaipel ba jurug, aria ipak kanak pabirak namudok aria anan nenek uhwin um ipak um nenek yoweyoweihi aih. Aria ipak penekan aria pushopokan um ta nunam yoweiburi wabur hel kabi da ipak kanakmorim.

<sup>16</sup> “Eik yakri giha abom um ipak Farisi nabes seshuhep iri pakana piyabik yehum kupaishi, aria ipak ko pupe yoweihi aih um. Umum maresh? Ipak pakri namudok, ‘Enen arpen nyukri um Iruhin ananit urupat aria nyukana adur iruhw um nyunek enesh muguhwos, aria ta mare nyunekesh um da enyen nyakrium. Aria douk enen arpen nyukri um gol rakus Iruhin ananit urupat aria nyukri adur iruhw, aria enyudok arpen ta nyenekesh kabi da nyakrium.’ <sup>17</sup> Ipak pagugaki aria nabes seshuhepi, maresh eneshenesh douk yopishi sharikiri um Iruhin ananis nabes? Gol douk yopuri aria rarik iri aka? Iruhin ananit urupat douk yoputi ba tarik iri? Ipak padukemesh, Iruhin ananit urupat atut douk tenek gol ratogur Iruhin ananish muguhwos. <sup>18</sup> Aria shopunek ipak pakri namudok, ‘Douk meinyi arpen nyukri alta aria nyukri adur iruhw um nyunek enesh muguhwos, enyudok douk baraen meyoh. Aria douk nyukri ofa nyutem iruhw alta iri aria nyukri adur iruhw, aria enyen ta nyenekesh kabi douk nyakrium.’ <sup>19</sup> Ipak nabes seshuhep iri, maresh muguhwos douk yopishi ba sharik iri um Iruhin? Ofa douk yopunyi nyarik iri um Iruhin aka? Alta douk yopunyi nyarik iri um Iruhin ananis nabes aka? Enyudok alta douk nyenek enyudok ofa nyatogur Iruhin ananish muguhwos. Aria enyudok alta nyeshagrakuk ofa. <sup>20</sup> Namudok aria meinyi arpen nyukri alta aria nyakana adur iruhw, enyen dodogeshinyum enyenyin baraenyum alta nyani ihishmorim eneshenesh shetem iruhinyum iri. <sup>21</sup> Aria meinyi arpen nyakri Iruhin ananit urupat iri aria nyukri adur iruhw um nyunek enesh muguhwos, enyen dodogeshinyum enyenyin baraenyum Iruhin ananit urupat aria Iruhin anan kanak shopunek, nape atudok urupat iri. <sup>22</sup> Aria meinyi

arpen nyukri heven iri aria nyukri adur iruhw um enyen dodogeshinyum enyenyin baraenyum Iruhin ananin yopunyi wagitur aria anan kanak napeyenyi enyudok wagitur iri.

<sup>23</sup> “Eik yakri gihaum ipak douk penek skulumesh um Iruhin ananin lo iri aria ipak Farisi. Aria Ipak ko pupe yoweihi aihum. Umum maresh? Ipak peyagwreh biyog nukwatog iri. Ihig shokugi apig eneshenesh nubarigish ipak pasiyaeshum 10-poreigunum aria pukon anabikum Iruhin. Aria douk urkum moshukepukukum ihin debeinyi baraenyum Iruhin ananin lo, kabi da yopuhi aih um, urkwip purum arpesh aria punek gihaum arpesh um aria punek bilipum Iruhin ananin baraen aria pigipeshen. Douk ipak ta dodogeshipum pigipesh enyudok baraenyum debeinyi lo, aria ipak mare ta urkwip pukepukuk um nyanyudok enen um shokugi apig enesheneshin lo shopunek uwe, uwok. <sup>24</sup> Ipak nabes seshuhep iri pakana piyabik arpesh um yah, ipak kabi da arpen nyushakam shokuri eshurror enyenyik yabik, aria enyen nyatukor nyawashorukuk. Aria enyen madae nyutik debeinyi mahin Iruhin nakri um mare shunyoh iri kamel douk nyor yabikum, aria enyen nyahurig yabik nyakutuguk.

<sup>25</sup> “Eik yakri giha abom um ipak douk penek skulumeshum Iruhin ananin lo iri aria ipak Farisi. Ipak ko pupe yoweihi aihum. Umum maresh? Ipak peyagwreh biyog nukwatog iri. Ipak gamo pakrup adukisum kas sani yaureruh, aria ipakih yoweihi aih hape numuniruhum. Ahudok aih douk namudok, ipak penek nyigiya um kupaishi esheshish muguhwos aria ipak pakwuaruh-umesh. Umum maresh? Ipakip urkwip douk porum ipak kanak atin. <sup>26</sup> Ipak Farisi da nabes seshuhep iri. Sagomatin ipak pukrup numunipum kap, aria ta adukipum shopunek ta bogrop.

<sup>27</sup> “Eik yakri giha abom um ipak douk penek skulumeshum Iruhin ananin lo iri aria ipak Farisi. Ipak ko pupe yoweihi aihum. Umum maresh? Ipak peyagwreh biyog nukwatog iri. Ipak douk kabi wonugwegwiruh eshesh showatomoruh shakwu shigorihwiti beit. Aduki-

hwum wonugwehw yopuhwum shutruh, aria numun shagoki esheshish bishiguh aria ihishmorim goutukwishi eneshenesh shor. <sup>28</sup> Ipak shopunek pape namudok atin. Arpesh shatik ipakiruh yegeshiweruh, aria shakana ipak douk yopishi arpesh. Aria amu uwok. Numunum ipak douk shunikipum agundok peyagwreh biyog nukwatog um aria agundok pabrig Iruhin ananin lo um.”

<sup>29</sup> Aria Jisas ta nakri namudok, “Eik yakri giha abom um ipak douk penek skulumeshum lo iri aria ipak Farisi. Ipak ko ta pupe yoweih aihum. Umum maresh? Ipak peyagwreh biyog nukwatog iri. Ipak penek yopuruhi wonugwegwiruh um amam profet, aria ipak paginohw-oruh um eshesh yopishi shagok iri arpesh. <sup>30</sup> Aria ipak pakri namudok, ‘Nubo seiwokum babenomi hapeyobi nyutob um, aria apak ta mare mutaurum esheshum shubo amam profet hugok uwe, uwok.’ <sup>31</sup> Um enyudok ipakin baraen ipak kanak powereh agundok ipak patoguromi yamehem seiwok habo amam profet hagok iri um. <sup>32</sup> Ipak mare pigiyagig penekesh namudok ipak douk yopishi arpesh uwe, uwok. Ipak kare, ba punekesh ahudoki yoweih aih kabi da ipakim yamehem seiwok henekeshum aria piyatak ipakim yamehem amamih yoweih aih! <sup>33</sup> Ipak kabi da yoweiguhwi yuguhw um. Iruhin ko nenemep baraen ipak aria ipak ko punam hel, ehudok yoweih nyih ta ipak puruwok um yah wokumep.

<sup>34</sup> “Namudok aria ipak pemnek! Eik ko ishopokugu amam profet aria yopumi urkum morom iri anam here yopumi urkum iri aria amam hadukemesh um Iruhin ananin lo iri hunamagu ipak. Namudok aria ipak ta pubo anam hugok, pupruk anam aria penek nyilim anam hir rowogin kruse aria pupruk anam numun ipak Juda pape peyagwreh-ogwi urusag. Aria ipak ta apa puhiyahamum ipakirub warub aria amam ta huruwok hanam kupairubi warub. <sup>35</sup> Namudok aria Iruhin ko ta nunekep pusah debeinyi amain um agundok pabo ihim-morim yopumi armam hagok um. Amam seiwok hape abudok amnab iri, enyudok debeinyi

amain kweipon nyupe ipak atin. Enesh arpesh seiwok shabo sabaishi yopishi arpesh shagok iri douk parik pabo Abel nagok arigaha shabo Sakaraia, Berekia ananin batowin, anan douk anudok arman ipak seiwok pan nagok orokohunum Iruhin ananit urupat aria um alta. <sup>36</sup> Eik yakripep adurin baraen ipak, enyudok yoweinyi poe ta nyutogurum ehudok yoweih aih, ahudok ko hutogrum eshudok arpesh douk shape agudok nahobig abudok nyutob iri.”

### *Jisas Nenek Gihaum Arpesh Shape Jerusalem Iri*

*(Luk 13:34-35, 19:41-44)*

<sup>37</sup> Jisas natik wabur Jerusalem aria nakri namudok, “O ipak arpesh pape Jerusalem iri, seiwok ipak apa pabo amam profet hagok. Armam Iruhin neshopokam haraumepari ananin baraen iri, ipak douk shopunek pakwu-umam utabor pam hagok. Worobaihi atih nyumneh eik yakri iraevari aria ishigori kabi anat mamokit owot tarauri nugag gwanaki atugun aria teshigorug atatish kapraigiyohos um. Aria ipak pakri amu uwok um eik. <sup>38</sup> Aria douk pumnek! Douk ipakibur wabur ko bunanukuk buniyatakuk aria mare ta enesh arpesh shupe abrudok wabur uwe, uwok. <sup>39</sup> Eik yakrip ipak adurin baraen namudok, ipak ko mare ta putik eik shopunek, arigaha kweipon abudok nyutob butogurum ba ipak ko pukri, ‘Apak makri Iruhin nunekuman yopishium anudok arman douk nanakmorim Iruhin ananin nyeigur iri.’ ”

## 24

### *Jisas Nakripesh Um Horim Hanaki Hununu Iruhin Ananit Debeiti Urupat*

*(Mak 13:1-2; Luk 21:5-6)*

<sup>1</sup> Jisas nakutukuk Iruhin ananit debeiti urupat natogur nanak, aria ananim disaipel hanamori anan. Amam hakana hiyabiganum Iruhin ananit debeiti urupat tuni yopugwi urusag gweyotu huruhuruk iri. <sup>2</sup> Aria anan nakripam enyudok baraen. “Ipak patik agwudok yopugwi urusag? Eik yakripep adurin

atinyi baraan, horim ko hanaki hubrigat aria hununut aria ta mare hukuna huhur anam utom ba humem anam kupaimi utom ba ta utabor butao uwe, uwok. Ihibor utabor ko shruworubor bututu biniyatak tupri tupro bunak atum atum bubuk bukus bunak amnab.”

*Jisas Nakripesh Um Anab Nyutob Sabainyi Amain Kweipon Nyutogur (Mak 13:3-13; Luk 21:7-19)*

<sup>3</sup> Jisas nakih nape ahwudok yoduhw Oliv, aria amam disaipel atum hanamori anan aria harigan namudok, “Nyak kri-pap, meibi nyutob eshudok eneshenesh iganigadae nyakripapeshi ko shutogur? Maren kak ko nyurik nyutogur aria apak ta mudukemesh, nyak ko nyutanamori aria abudok amnab ko butuhuk?”

<sup>4</sup> Aria Jisas nutanam nakripam namudok, “Ipak ko pudukemesh atin. Ta enesh arpesh shunaki shugiyagimep. <sup>5</sup> Umum maresh? Sabaishi kweipon shunaki shukri eikin nyeigur aria shukana, ‘Eik kanak Eik Krai Anudok Arman Iruhin seiwok nagraehe neshopoke yanaki iri.’ Aria shugiyagim sabaishi arpesh ba shunak shuwishuk. <sup>6</sup> Ipak ko punnek debeihwi wanohwin gaha huruk atin aria ipak ta punnek baraanym debeihwi wanohw ko hwutogur rougunum. Aria ipak ko pudukemesh. Aria ipak mare pukitak yowiyokuk uwe, uwok. Eshudok enesh-enesh ko shutogur, aria abudok bagiguki nyutobum amnab ko butuhuk um ta mare butogur arigas uwe, uwok. <sup>7</sup> Aria eshesh anag nahobig ko shukitak shini enesh kupaigi nahobig shurpak. Anan king nini ananishi ko shukitak shuni kupaini king nini ananishi shupe shurpak. Aria anarub warub ko debeirubi nyurub besh aria enyik ko kwutuk. <sup>8</sup> Enyudok ihinyumorim nyarik iri amain kwo nyutogurum kabi da onok armatok kwonomnek rarig iri erigerum kwubunuh ba kubuki batowin um.

<sup>9</sup> “Abudok nyutob eshesh ko shurao ipakum shukep eriger aria shukep amaenyibi aria shep pugok. Aria ihish arpesh esheshish nyirub aparuh ko yowesh um ipak. Umum maresh?

Ipak douk eikipari aria eikin nyeigur nyapeum ipak. <sup>10</sup> Aria um abudok nyutob sabaishi arpesh shenek bilipum eik iri ko shunahuhao eik aria shubukuk esheshin bilip um eik. Aria eshesh ko shunahwaram horik horinum eshesh kanak aria shunarao eshesh kanak um horik horin um shenenem baraan aria shesh shugok. <sup>11</sup> Worobaimi henek rohwa aria hagiyaigiri profet ko hutogur henek rohwa hugiyagim worobaishi arpesh aria ko shigipesham. <sup>12</sup> Yoweihiaihish inahos ko shutogur dedebesh atish. Namudok aria sabaishi arpesh ko shukutukuk ahudoki aih um shukri shunuwasham kupaishi arpesh kabi da eshesh shakri shunuwasham eshesh kanakmorim. <sup>13</sup> Umum maresh? Eshudok douk shugipesh eik atish arigaha shugok iri, eshesh Iruhin ko ta nuraesh shutanamori shupe wosik atin. <sup>14</sup> Aria eshesh ta shukripesh Iruhin ananin yopinyi baraanym arpesh shuwish agundok anan nape Debeini um ananish arpesh um douk ko shanak shukripesh enyudok baraanym iherub warub abudok amnab um, ihish arpesh um shemnek ba shutuh iyoh, aria ahudok yoweihia hugiguki nyumnah ta ko hutogur.”

*Jisas Nakripesh Um Anab Yoweibi Nyutob Ko Butogur Iri (Mak 13:14-23; Luk 21:20-24)*

<sup>15</sup> Aria Jisas ta nakri namudok, “Ipak ko putik enyudok yoweinyi mugu abom iri, seiwok profet Daniel nakrienyi, enyudok mugu ta nyutogur numun Iruhin ananit debeiti urupat. Aria nyununut ba arpesh mare ta shuntorum shanaki shuwish uwe, uwok. Eshesh ta shukuna yoweishi inahos shapeyoti urupat. Meishi arpesh shutarih enyudok baraan iri, eshesh ko gamo shudukemesh atin.”24:15 <sup>16</sup> Aria Jisas nakripam namudok, “Abudok nyutob arpesh shape agudok Judiaig shokugi nahobig eshesh ko shuruwok shunak gani yodururuh-igunum. <sup>17</sup> Meinyi arpen nyetem iruhw urupat iri, ta nyubuh atap um, enyen ko mare urkum murum nyuhur enyenyish enesh-enesh shakus numunum urupat iri uwe,

uwok. <sup>18</sup> Aria meinyi arpen nyetu nubarig iri, enyen ko mare nyutanam urupatum nyuhur enyenyih rouhi rupah uwe, uwok. <sup>19</sup> Debeinyi gihaum wanarahaenyi armago aria armago apa wokesh nyumeb shokwishi batowish iri um abudok yoweibi nyutob. <sup>20</sup> Ipak ko penek beten ba ta mare puruwok um nyumanugasibi nyutob aka, um ahudok nyumnah Sabat uwe, uwok. Anah kupaihi akure, ta wosik. <sup>21</sup> Eik yakripepum ta puruwok. Umum maresh, abudok nyutob debeinyi amain abom ko nyutogur. Sagomatin Iruhin nakwaram agudok nahobig um arigaha douk, namudokinyi amain madae nyutogur uwe, uwok. Aria kweipon babi bagiguki nyutob shopunek ko mare enyudoki amain ko ta nyutogur shopunek uwe, uwok. <sup>22</sup> Seiwok Iruhin mare nukri ba nurupok nyutob banob um enyudok debeinyi amain nyutogur akure, ihish arpeshe ko shugok shutuh. Aria ba uwok, ananim urkum morum ananishi ihish arpeshe anan kanak nagraeheshi. Namudok aria anan ta narupoki abudok yoweibi amaenyib nyutob babuhi banab atub.

<sup>23</sup> “Um abudok nyutob, meishi arpeshe ko shukrip ipak, ‘Ipak putik. Anudok arman Kraish,’ douk Iruhin nagraehan aria neshopokan nanaki iri douk anudok aka, shukripep shukri, ‘Nani nape ganik,’ aria ipak mare penek bilipumesh uwe, uwok. <sup>24</sup> Umum maresh? Aria anam henek roh w hagi yagigi iri armam ko hunaki hukri namudok, ‘Eik anudok arman Iruhin nagraeheshi iri aria neshopoke yanakium iri’ aka, ‘Eik shopunek douk anan profet.’ Aria amam ko henek debeinyi Iruhin atun neneken iri mour aria henek enen kak nyutogur. Eshesh shakana shenek roh w shigi yagim ihish arpeshe, aria eshesh ta wosik um aria eshesh shakana shenek roh w shigi yagimum arpeshe Iruhin douk nagraeheshum ananish iri. Aria namudok ta uwok. <sup>25</sup> Ipak punnek. Eik riguk yakripep jurugum eshudok eneshenesh ko shutogur.

<sup>26</sup> “Namudok aria meishi arpeshe ko shukripep, ‘Ipak putik, Kraish nani nape gani wehigunum arpeshe uwok um,’ aria

ipak mare punnekesh ba punak uwe, uwok. Aka meishi arpeshe shunaki ba shukri, ‘Anudok nanabeshuk nape numun atudok urupat,’ aria ipak mare punek bilipumesh uwe, uwok. <sup>27</sup> Umum maresh? Ipak padukemesh um utag brereyarogum, aria atudok lait tatogurum aun nakihmorim aria brereyarat tanak gani aun nabuhum. Namudok aria Eik Anudok Arman douk yatogur adurinyi arpen iri ta inekesh namudok atinyum abudok nyutob eik ko inamorim aria ihish arpeshe ko shutiwe atin. <sup>28</sup> Agundok arpeshe shagok shakusum, kumub ko bunaki bunahweh enyudok arpen nyagoki.”

*Enyudok Ihinyumorim Amain Nyutogur Nyuneyatakuk Aria Jisas Ko Nutanamori (Mak 13:24-27; Luk 21:25-28)*

<sup>29</sup> Aria shopunek Jisas ta nakri namudok, “Abudok yoweibi nyutobum enyudok amain um arpeshe shemnek debeiri eriger um nyunak nyutuhuk, aria arigas atin

‘Nyumnahin aun nutogur wabin, aria wabin aun ta mare wanyukehin ta arukwutihin  
aria unib weir utagi ta utotobure ugruki,  
aria ihish dodogeshishi eneshenesh sheir utag iri

ko mare shir atugun uwe, uwok.

Eshesh ko shunonug shunak shunaki.’

<sup>30</sup> “Um abudok nyutob Eik Anudok Arman yatogur adurinyi arpen iri ko itogur gani iruhw utag aria ihismorim awiroshish arpeshe shape abudok amnab iri ko shureh. Aria eshesh ko shutik Eik Anudok Arman yatogur adurinyi arpen iri ta item iruhigum hevenig utag aria ibuhi ini eikin dodog aria eikit dodogowiti lait. <sup>31</sup> Aria oruhw ko hwunahwapur debeg abom aria eik ko ishopok eikish enselahos shunak um shutorumori ihish arpeshe eik seiwok yagrahaeshum eik kanak iri. Eshesh enselahos ko shutormori arpeshe ihigunmori um agudok nahobig aria anagasum agudok nahobig aria sharaesh shanaki um eik.”

*Ipak Ko Purae Saki Um Enyudok Rowog Fik Um Pudukem Nyutob Eik Inamori (Mak 13:28-31; Luk 21:29-33)*

<sup>32</sup> Aria Jisas ta nakri shopunek namudok, “Ipak ko purao yopinyi saki um enyudok rowog fik aria pudukemeshum. Abudok nyutob butogurum aria rowogish nyeiguhw ko shunareh shurpaki namusi shus, aria ipak pudukemeshum yopubi wahib nyutob bakana ko butogur. <sup>33</sup> Namudok atin, abudok nyutob ipak putik eshudok ihish eneshenesh riguk yakripep-umeshi shutogur ba jurug aria ipak ko pudukemesh um, Eik Anudok Arman yatogur adurinyi arpen iri eikib nyutob banaki huruhuruk jurug aria bapeimori wit. <sup>34</sup> Eik yakripep adurin baraen, eshudok arpesh douk shape abudok nyutob iri, enesh ta mare shurik shugok uwe, aria eshudok ihish eneshenesh ta shutogur. <sup>35</sup> Utag gani agudok nahobig ko ta shutuh, aria eikin baraen ta mare nyutuh uwe, uwok.”

*Madae Enesh Arpesh Shudukem Ahudok Nyumnah Aria Nyutob Eshudok Eneshenesh Ko Shutogur Um (Mak 13:32-37; Luk 17:26-30, 34-36)*

<sup>36</sup> Aria Jisas ta nakri shopunek namudok, “Madae enesh arpesh shudukem ahudok nyumnah eik ko ta inaki aria eshudok eneshenesh ko shutogurum uwe, uwok. Eshesh enselahos shape heven iri madae shudukemesh uwe, uwok. Aria Eik Iruhin Nuganin shopunek madae idukemesh uwe, uwok. Eikin Yaken atun arag nadukemesh. <sup>37</sup> Namudokehi aih eshesh seiwok shenekehi um Noa ananib nyutobum, eshesh ko shenek ahudok atatahah aih atih shupe abudok nyutob aria Eik Anudok Arman yatogur adurinyi arpen iri ko itanamori. <sup>38</sup> Seiwok abudok nyutob douk debeibusi worubus madae sutogurum uwe, eshesh apa shenek irugis worigun shashoh, shawok abar, aria arpesh apa shanaraum, arigaha ahudok nyumnah Noa nawish korohukahi hatogur. <sup>39</sup> Eshesh madae shudukemesh um enyudok amain ko nyutogur-umeshum uwe, uwok. Aria

eshesh shape namudok atin arigaha abusdok debeibusi worubus satogur sabo ihishmorim arpesh shagok shatuh. Aria douk ko atatahah atih aih ko huto-grum abudok nyutob Eik Anudok Arman yatogur adurinyi arpen iri ko itanamorium. <sup>40</sup> Abudok nyutob biom armam ko hiyotu nubarig aria Iruhin ko nurao anan, aria nukutukuk anan nupeiguk. <sup>41</sup> Bio armago ko apa unek plauain rehinyum unek bret upe, aria Iruhin ko nurao onok aria nukutukuk onok kupeiguk.

<sup>42</sup> “Namudok aria ipak ko pudukemesh atin aria putrugun pupe. Ipak madae pudukemesh um marah nyumnah ipakin Debeini ko nutanamori um. <sup>43</sup> Ipak ko gamo pudukemesh um enyudok baraen namudok. Douk nubo anan urupatinari nudukemesh um marab nyutobum wab nakwuaruhi arman ko nunaki, aria urupatinari anan ko niyoh urupat pupe aria ta mare nukutukuk urupat aria nakwuaruh iri ta nanaki nubrig urupat aria nuwish numunitum uwe, uwok. <sup>44</sup> Aria ipak namudok atin ko pudukemesh atin ba pupe pubeime. Umum maresh, Eik Anudok Arman yatogur adurinyi arpen iri ko inaki anob nyutob ipakip urkwip madae purum eik ta inakiyobi nyutob, aria eik ta inaki.”

*Wobuwobren Baraen Um Anan Nenek Mour Wosik Iri Aria Anan Arigeh Hanari (Luk 12:42-46)*

<sup>45</sup> Aria Jisas ta shopunek nakripesh wobuwobren baraen namudok, “Meinyi arpen nyenek mour iri ba nyor yopunyi saki aria wosik madae nyigiyagig aria nyenek yopunyi mour iri? Debeini ta nugraeh anudoki nenek mouri arman um ta nusuhw merik um amam kupaimi ananim henek mour iri, aria nusiyaum worigunum nyutob amamin debeini nakriyobi. <sup>46</sup> Anudoki arman nenek mour iri anan ko gamo nunadudareh um abudok nyutob ananin debeini ko nutanamori aria nutik anan apa nenek ananin mour. <sup>47</sup> Eik yakripep adurin baraen, debeini ko nugraeh anudoki arman um nusuhw merik aria neyotu nurik um debeini ananish ihish eneshenesh. <sup>48</sup> Aria um anudok nenek mouri arman ta

nutogur yoweini arman aria anan urkum murum anan kanak namudok, 'Eikin Debeini ta mare nunaki arigah uwe, uwok.'<sup>49</sup> Aria anan nikitak um nubo amudok hani anan henek mour atugun iri, aria anan nape apa nawok worigun aria nawok abar nani hawok abar ba hagugak iri.<sup>50</sup> Aria debeini ko nutanamori anah nyumnah anudok nenek mour iri arman madae nudukemesh uwe um ananin debeini ko nanaki uwe, uwok.<sup>51</sup> Aria debeini ko nanaki anah nyumnah aria nenekesh yoweishigom um anudok nenek mour iri, aria ta neshopokan nanak nini eshudok sheneyagwreh biyog nukwatog iri shupe atugun. Um nabrudok wabur eshesh ko shureh yowiyokuk aria shurupogesh esheshiruh naruh shumnek debeiri eriger."

## 25

### *Wobuwobren Baraen Um 10-Poreiyu Weroroiwi Armago*

<sup>1</sup> Aria Jisas ta shopunek nakri namudok, "Um abudok nyutob arpesh shuwishum aburdok wabur Iruhin nape Debeini um ananish arpesh shapeum heven douk kabi enyudok wobuwobren baraenyum 10-poreiyu weroroiwi armago. Anan arman douk atin nurao onok armatok iri, anan nakana ko nunaki. Aria oudok weroroiwi armago wohur owowish lamhos, aria wanak um uparugan yah aria uran unaki.<sup>2</sup> Anas wisiyu um oudok wagugaki armago, aria anas wisiyu wosik wadukemesh iri.<sup>3</sup> Oudok wagugaki warauri owowish lamhos wanaki aria madae usuwi wel unaki shopunek uwe, uwok.<sup>4</sup> Aria oudok wadukemesh iri, woshar kupairi wel owowish atin atin koutukwihos aria waraesh wanaki shopunek shani owowish lamhos.<sup>5</sup> Anudok arman nakana nurao armatok douk atin iri madae nanaki arigas uwe, uwok. Namudok aria ihiyu-morim armago nabes seshuho aria weshuh waku.

<sup>6</sup> "Arigaha orokohunib um wab aria enen arpen nyuhwar nyakri, 'Anudok nurao armatok iri anudok nanaki. Ipak arigah yowi ba munak muranari gani yah.'

<sup>7</sup> "Aria oudok ihiyumorim weroroi-wori wakitak wasusuhw owowish lamhos weshopohesh.<sup>8</sup> Oudok wagugaki wakrip oudok wadukemesh iri namudok, 'Ipak shukop anar ipakir wel. Apakish lamhos ko shakana hugokesh.'

<sup>9</sup> "Oudok wadukemesh iri wakrip oudok wagugaki namudok, 'Namudok ta uwok. Arudok wel ta mare musiar uwe, uwok. Wel madae sabairum ipak ta pushar anar ipakish lamhos aria apak ta mushar anar apakish lamhos uwe, uwok. Ipak kare punak gani stua ba putor ipak kanak ipakir wel.'<sup>10</sup> Aria oudok anas wisiyu wagugaki wanak um unatori anar wel aria anudok nurao armatok iri nanaki natograri. Aria oudok anas wisiyu wadukemesh iri douk wape apa wobeim anudok arman iri wanaman wawish wani anan atudok urupatum shuwok agundok shunaraum-oguni debeiguni worigun. Aria arpesh shawaru wit.

<sup>11</sup> "Aria oudok ono wagugaki shopuk wanak watograri, aria warig namudok, 'Debeini, Debeini, jikumap wit apak shopunek.'

<sup>12</sup> "Aria anan nakripowi namudok, 'Eik yakripep adurin baraen, eik madae idukemeshum ipak uwe, uwok.'

<sup>13</sup> Aria Jisas nakri namudok, "Ipak gamo pupe apa putrugun. Umum maresh abudok nyutob douk eik ko ta itanamori obi nyutob, ipak madae pudukemesh uwe uwok."

### *Jisas Nakripesh Wobuwobren Baraen Um Biom Atun Harao Utabor Um Henek Mour Iri* (Luk 19:11-27)

<sup>14</sup> Aria Jisas ta nakri namudok, "Arpesh shuwish um abrudok wabur Iruhin nape Debeini um ananish arpesh shapeum heven douk kabi enyudok wobuwobrenyi baraenyum anan arman nakana nanak anagun rougunum aria nahwari henek ananin mour iri hanaki. Amam hanaki aria nakom ananibor utabor amamis wisum henek mour.<sup>15</sup> Anan douk nadukemeshum amamin saki nyani agundok amam douk dodogowim um henek mourum aria nakomuk utabor. Anan

nakonukuk 5,000 kina.<sup>25:15</sup>Anan 2,000 kina aria anan 1,000 kina. Douk nakomuk utabor aria anan nanakuk anan ih yah.<sup>16</sup> Nanakuk atin aria anudok narao 5,000 kina iri nanak nakwu abrudok utabor nenek bisnis. Nenekas arigaha ta nenek uhwinyum 5,000 kina winmoni shopunek.<sup>17</sup> Aria anudok anan narao 2,000 kina iri shopunek namudok atin. Anan nanak nakwu abrudok utabor nenek bisnis aria nenek uhwinyum 2,000 kina winmoni shopunek.<sup>18</sup> Aria anudok anan narao 1,000 kina iri, anan nanak narok anag nuwag aria nabeshuk ananin debeini ananibor utabor bor agudok nuwag.

<sup>19</sup> “Douk arigaha roubi nyutob banak badiguk aria amudok heneman mour iri debeini ta natanamori. Aria narigamum hukripanum utabor riguk nakomabor-ukuk um douk henek mourum-abor iri douk batogrum makwunibor?”<sup>20</sup> Anudok sagramatin narao 5,000 kina iri nasuhwi 5,000 kina winmoni aria nenek ananibor utabor batogur um 10,000 kina aria nanaki nako ananin debeini. Aria nakripan nakri namudok, ‘Debeini, nyak seiwok nyekeik 5,000 kina. Nyak nyutik, eik yaraen yanak yenek bisnis aria ta yenek uhwinyum 5,000 kina winmoni shopunek!’

<sup>21</sup> “Aria ananin Debeini nakri namudok, ‘O wosik. Nyak wosik yopunyi arpen nyenek mourum eik iri. Nyak douk gamo nyagabe nyeyoh nyakin mour iri. Nyak wosik gamo nyagabe nyeyoh shokushi eneshenesh, namudok aria douk eik yakri nyak nyusuhw merik um sabaishi eneshenesh. Aria douk nyak yowi ba nyuni eik unadudareh.’

<sup>22</sup> “Anudok narao 2,000 kina iri anan shopunek nanaki nakri namudok, ‘Debeini, nyak seiwok nyekeik 2,000 kina. Aria nyak nyutik, eik yaraen yanak yenek bisnis aria ta yenek uhwinyum kupainyi 2,000 kina winmoni shopunek.’

<sup>23</sup> “Aria ananin debeini nakri namudok, ‘O wosik. Nyak wosik yopunyi arpen nyenek mourum eik iri. Nyak douk gamo nyagabe nyeyoh nyakin mour iri. Nyak

wosik gamo nyagabe nyeyoh shokushi eneshenesh. Namudok aria douk eik yakri nyak nyusuhw merik um minihishi eneshenesh. Aria douk nyak yowi ba nyuni eik unadudareh.’

<sup>24</sup> “Amudok hanakuk aria anudok anan narao 1,000 kina iri shopunek nanaki nakri namudok, ‘Debeini, eik yadukemesh jurugum nyak, nyak juwehosinyi arpen. Nyak nyaurim aria nyatuk worigun kupaishi esheshigos nubarigos. Aria um amnab kupaikwi kupainari shuwashak shuruwepigun worigunobi amnab, nyak ihib nyutob nyaurim nyatuk worigun abudok amnab.’<sup>25</sup> Namudok aria eik yanogugur ba yanak yobeshuk enyudok 1,000 kina numun amnab. Aria nyakibor utabor abrudok ta suwoborugu.’

<sup>26</sup> “Aria ananin debeini nakripan namudok, ‘Nyak yoweini arman arigeh haenyari. Nyak gamo nyadukemesh namudok, eik yaurim aria yatuk worigun kupaishi esheshigos nubarigos shaweshogosi aria eik shopunek yatuk worigun shuruwepigun amnab kupaishi shawashak shuruwep ba natogur iri.’<sup>27</sup> Aria umum maresh ba nyak madae nyubuk eikibor utabor gani benk? Namudok aria eik ta itanamori-obi nyutob eik ko wosik irao eikibor utabor buni enen winmoni shopunek.’<sup>28</sup> Namudok aria ipak ta putrun enyudok 1,000 kina anudok aria ta puko anudok arman douk nenek uhwinyum 10,000 kina iri.’<sup>29</sup> Umum maresh? Meishi arpeshe douk shagrem enesh eneshenesh iri, eik ta ko ikesh enesh sabaishi eneshenesh shopunekum eshesh. Aria meishi arpeshe douk eneshenesh wokesh iri aria shokushi eneshenesh eshesh douk shagremesh iri eik ko ta itrishesh-ukukum eshesh.’<sup>30</sup> Aria anudok yoweini nenek mourum eik iri, ipak ko puhiyahan nutogur arukwutigun um. Aria um abrudok wabur eshesh ko shureh yowiyokuk aria shunarupok esheshiruh naruh shuwegoruh.’”

*Jisas Douk Anudok Arman Natogur Adurinyi Arpen Iri Ko Nenek Kwotog Um*

<sup>25:15</sup> <sup>25:15</sup> Seiwok abudok nyutob Jisas nakri peshe enyudok baraen obi eshesh Juda madae shukwu apakibor utabor kina uwe, uwok. Aria esheshibor utabor douk shahwarabor talent iri bape namudok. Atin talent douk kabi 1000-porein kina um.

### *Ihish Arpesh Shenekahi Aih*

<sup>31</sup> Aria Jisas ta shopunek nakri namudok, “Kweipon nabudok nyutob Eik Anudok Arman yatogur adurinyi arpen iri ko itogur gani iruhw utag aria in-aginohw itanamori kabi anan kingum ini ihishmorim enselahos, aria eik ta itemori eikin debeinyi wagitur aria ibuhi ini eikin dodog aria eikit dodogowiti lait.

<sup>32</sup> Aria ihishmorim arpesh ko shuntorum shunaki shiyotu um eikig yomag. Aria eik ko isiyaesh aria shiyotu um biyob lainab, kabi douk anudok neyoh sipsipahos iri nosiya sipsipahos shanak wobrehahum anan lain aria memehos shunak wobrehahum anan lain. <sup>33</sup> Eik ko isop sipsipahos um eikin yopunyi rogurehah aria memehos um eikin angagrin rogur.

<sup>34</sup> Namudok aria eik king ko ikrip ihishmorim arpesh sheyotu um eikin yopunyi rogurehah iri namudok, ‘Ipak douk eikin Yaken nenekumep yopihi aih iri. Anan nakana nenek yopishi eneshenesh um ipak. Ipak yowi ba puwish agundok pupe abrudok wabur Iruhin nape Debeini um ananish arpesh shupeum. Seiwok eikin yaken nagraeh-aburum ipak iri um seiwok sagomatin anan nenek agudok nahobig gatogurum. <sup>35</sup> Umum maresh? Seiwok eik yape nyurub bae, aria ipak poke worigun. Eik abar bae, aria ipak poke abar. Eik yanaki kupaigunum iri, aria ipak parao eik panak ipakit urupat. <sup>36</sup> Eik rupah uwok, aria ipak poke rupah eik. Eik arugeh hapeye aria ipak pugabe eik. Eik yape shunuweshik-ati urupat, aria ipak panaki patik eik.’

<sup>37</sup> “Aria eshudok shenek yopihi atih aih iri aria shape yopinyi poe iri ko shukripan namudok, ‘Debeini um meibi nyutob apak matik nyak nyurub baen, aria apak meken worigun nyak? Aria um meibi nyutob nyak abar baen aria apak meken abar nyak? <sup>38</sup> Umum meibi nyutob apak matik nyak nyanaki kupaiburi wabur, aria apak marao nyak manak apakit urupat? Aria um meibi nyutob nyak rupah uwok, aria apak meken rupah nyak? <sup>39</sup> Umum meibi nyutob apak matik nyak arugeh hape nyak aka, nyak

nyape shunuweshik-ati urupat, aria apak manaku matrin?’

<sup>40</sup> “Aria eik ko ikripesh namudok, ‘Eik anudok king yakripep adurin baraen, ihishmorim eneshenesh ipak penekeshum enen enyudok arpenyum amudok eikim owarhim nyeiguhw wokam iri, eshudok eneshenesh ipak penekeshum eik.’

<sup>41</sup> “Aria eik king ko ikrip eshudok sheyotu um eikin anagagrin um rogurehah iri namudok, ‘Ipak yoweipari ko punak puwishukuk iri, ipak pruwokukum eik aria ipak kare panak um ehudok yoweih nyih madae hugok iri uwe, uwok. E hudok yoweih nyih seiwok shenek shagraeh um Satan nani ananish yoweishi enelahos iri. <sup>42</sup> Umum maresh? Seiwok eik yape nyurub bae, aria ipak madae puke worigun uwe, uwok. Eik abar bae, aria ipak madae puke abar uwe, uwok. <sup>43</sup> Eik yanaki kupaiburi wabur iri, aria ipak madae purae punak ipakit urupat uwe, uwok. Eik rupah uwok, aria ipak madae puke rupah uwe, uwok. Eik arugeh hapeye, aria eik yape shunuweshik-ati urupat aria ipak madae punaki putik eik uwe, uwok.’

<sup>44</sup> “Aria eshesh shopunek ko shukripan namudok, ‘Debeini, um meibi nyutob apak matik nyak nyurub baen aka, nyak abar baen aka, nyak nyanaki kupaiburi wabur iri aka, nyak rupah woken aka, nyak arugeh hapeyen aka, nyak nyape shunuweshik-ati urupat, aria apak madae gamo mugabeyen uwe, uwok?’

<sup>45</sup> “Aria eik ko ikripesh namudok, ‘Eik yakripep adurin baraen, eneshenesh ipak madae punekeshum enenyum enen enyudok arpenyum amudok eikim owarhim nyeiguhw wokam iri, eshesh eshudoki eneshenesh ipak madae punekeshum eik shopunek uwe, uwok.’

<sup>46</sup> “Aria eshudok arpesh ko shunak shurao yoweinyi poe, ko shurao debeiri eriger madae rutuh uwe iri uwe, uwok. Aria yopishi arpesh eshesh ko shuwish um yopinyi poe aria shupe wosik ihih nyumneh.”



## 26

*Eshesh Juda Esheshim Debeimi Hantorum Hape Heyagwreh Um Hubo Jisas Nugok*

*(Mak 14:1-2; Luk 22:1-2; Jon 11:45-53)*

<sup>1</sup> Jisas nakripesh enyudok ihinyumorim baraan nyatuh aria nakrip ananim disaipel namudok, <sup>2</sup> “Ipak padukemesh, nyumneh douk watak hape biyehum ahudok nyumnah agundok debeguni Pasovaigun worigun nenenekum ko hutogur. Aria eshesh ko shere Eik Anudok Arman yatogur adurinyi arpen iri um horim amamis wis aria hanak henek nyilime rowogin kruse aria igok.”

<sup>3</sup> Umum abudok nyutob amam debeimi pris hani eshesh Juda esheshim debeimi hanak hatik esheshin debeini pris Kaiafas aria hantorum hape ananit urupat. <sup>4</sup> Aria hantorum hape heyagwreh habo baraan hakri huparug anah yah aria hugiyagik husuhw Jisas aria hunak hon nugok. <sup>5</sup> Aria hakri namudok, “Apak ta mare mukana munek eshudok enesheneshum abudok nyutobum agudok debeigi nig uwe, uwok. Umum maresh, ta arpeshtik aria shukri shukitakum debeihwi wanohw.”

*Onok Armatok Kwourak Sanda Iruhw Um Jisas Ananig Barag*

*(Mak 14:3-9; Jon 12:1-8)*

<sup>6</sup> Jisas douk nape wabur Betani. Nape anan arman shahwaran um Saimon iri ananit urupat. Nubo riguk anudok Saimon yoweihi arugeh lepra hapeyan. <sup>7</sup> Abudok nyutob Jisas nape huruk atinyum tebol aria nape nawok worigun, aria onok armatok kwasuhwi enen yopunyi sanda douk shatorin debeibori utabor iri. Nyorori anar yopuri botol douk shenekor anam utom iri aria kwanaki kwouraken nyabuh iruhum Jisas ananig barag. <sup>8</sup> Amudok Jisas ananim disaipel hatik namudok aria akas sanum. Aria hakri namudok, “Umum maresh ba okwok kweyatak enyudok sanda meyoh? <sup>9</sup> Enyudok sanda apak mukri ba munek salimen akure, ta musuhw debeibori utabor aria manak musiyaborum eshudok eneshenesh wokeshi arpeshtik.”

<sup>10</sup> Jisas nadukemeshum amamin baraan aria nakripam namudok, “Umum maresh ba ipak peyagwreh ponawarukok um okwudok armatok? Okwok douk kwonegesh yopuhi aih um eik. <sup>11</sup> Ihib nyutob eshudok eneshenesh wokeshi arpeshtik ko shuni ipak pupe. Aria eik ko mare ini ipak mupe roubi nyutob uwe, uwok. <sup>12</sup> Okwudok armatok kwourak sanda eikihw yegenyihw, okwok kwonegesh namudokum kugabe eikihw yegenyihw um nuhut biyen shurme wonugwehw um. <sup>13</sup> Eik yakripep adurin baraenyum ihigunum um agudok nahobig kweipon shunak ba shukripesh enyudok Iruhin ananin yopunyi baraenyum. Eshesh ko shiyagwrehum eshudok eneshenesh douk okwudok armatok kwonegeshi shopunek, aria esheship urkwip ko purum okwok.”

*Judas Neyagwreh Adurin Baraen Nani Eshesh Juda Esheshim Debeimi Um Hunak Hubo Jisas Nugok*

*(Mak 14:10-11; Luk 22:3-6)*

<sup>14</sup> Aria abudok nyutob, ananum amudok Jisas ananimum 12-poreim disaipel douk shahwaranum Judas Iskariot iri nanaki natik amam debeimi pris. <sup>15</sup> Nanak aria narigam namudok, “Douk eik irigumep um yah inak iwerehemep Jisas um, ipak douk ko putoruwe puke maresh?” Hemnek namudok aria hatorun hakon 30-poreibor siliwaibor utabor. <sup>16</sup> Namudok aria Judas nape nabo urkum naurim yahum nuwerek aria niyabigam aria nukom Jisas um amudok amamis wis.

*Jisas Nani Ananim Disaipel Hape Hawok Agundok Debeiguni Worigun Pasova*

*(Mak 14:12-21; Luk 22:7-14, 21-23; Jon 13:21-30)*

<sup>17</sup> Aria um ahudok harik iri nyumnah um eshesh Juda shenek agundok debeiguni Pasovaigun worigun aria shawok bret douk shotek ba madae tikitak tunugok tutogur debeiti uwe, uwok. Amam disaipel hanakium anan Jisas aria harigan namudok, “Nya, nyak nyakri

apak monak munek agnudok Pasovai-gun<sup>26:17</sup>worigun agnumum nyak nyanak nyugnoh nyini apak?”

<sup>18</sup> Aria nakripam namudok, “Ipak panak puwish debeiburi wabur Jerusalem aria punam anudok arman douk yakripep-uman iri. Punak aria pukripan pukri namudok, ‘Nya, apakin Tisa nakri ananib nyutob<sup>26:18</sup>douk ko huruk atinyum butogur. Aria nakri anan nini ananim disaipel ko hunaki huwok agundok Pasovaigun worigun nyakit urupat.’”

<sup>19</sup> Namudok aria amam hanak henek eshudok kabi douk Jisas nakripamum. Hanak aria henek agundok Pasovaigun worigun.

<sup>20</sup> Douk arigaha wabigep hurukatinyum wab aria Jisas nani ananim 12-poreim disaipel hanaki hape herharis tebol. <sup>21</sup> Amam hape apa hawok worigun, aria nakripam namudok, “Eik yakripep adurin baraen ipak, anan um ipak ko noko eik um eikum horim.”

<sup>22</sup> Aria amam disaipel hemnek namudok aria amamish urkum apahw yowesh, aria amam atun atun harig Jisas namudok, “Debeini nyak nyakri eik aka?”

<sup>23</sup> Aria Jisas nakripam namudok, “Anudok arman douk nakana noko eikum eikum horim iri, anan douk ananum ipak kanak douk nani eik ta aragarag ukutu ohwakis wis sani bret shubuh yaurehw iri. <sup>24</sup> Eik Anudok Arman yatogur adurinyi arpen iri ko igok, namudok Iruhin ananik buk kwakri jurugum eik ko igok. Aria ko debeinyi gihaum anudok arman noko Eik Anudok Arman yatogur adurinyi arpen iri um horim amamis wis iri. Namudok aria seiwok wosik ba amakek mare kwunabuki uwe, uwok.”

<sup>25</sup> Judas anan douk anudok arman nakana noko Jisas um horim amamis wis iri anan

<sup>26:17</sup> <sup>26:17</sup> agundok worigun Pasova, eshesh Juda shenekagun atuh atuh um ihishmorim kwarahos shenekagun shagnoh aria urkwip aparuh shorum seiwok Iruhin nataurum esheshish popehesh yamehesh shakutukuk debeinyi mour gani Isip aria narigumesh shanam Kenan um. <sup>26:18</sup> <sup>26:18</sup> Enyudok baraen nyakri Jisas ananib nyutob douk nyakri abudok nyutob huruhuruk um eshesh shon nugok rowogin kruse. <sup>26:27</sup> <sup>26:27</sup> Enyudok baraen nyakri, “Atudok bret douk eikihw yegenyihw” nyani “Anudok wain douk eikibor owishibor nyagipesh Grikin baraen. Baugenyum enyudok baraen douk biyen baraen. Enesh Kristen shakana bret tani wain sheyabig kak um Jisas ananishw yegenyihw hwani owishibor. Aria enesh shakana bret tani wain douk shatogur adur atin Jisas ananishw yegenyihw hwani owishibor.

narik Jisas namudok, “Debeini Tisa nyak douk nyakri eik aka?”

Aria Jisas nakripan namudok, “Namudok nyak nyakrium.”

*Jisas Nakom Wain Nani Bret Um Ananim Disaipel Hashoh*

(Mak 14:22-26; Luk 22:15-20; 1Kor 11:23-25)

<sup>26</sup> Amam apa hawok worigun aria Jisas nohur anabik bretigun, nenek tenkyu um Iruhin aria nawor bret, aria noko ananim disaipel. Aria nakri namudok, “Ipak suwot bret aria putoh. Atudok bret douk eikihw yegenyihw.”

<sup>27</sup> Aria nohur anap wainip kap, aria nenek tenkyu um Iruhin aria nako ananim disaipel aria nakri namudok, “Ipak suwop kap aria ipak ihipmorim pubroh apudok kap. Anudok wain douk eikibor owishibor.<sup>26:27</sup> <sup>28</sup> Anudok wain douk eikibor owishibor douk ko benek enyudok Iruhin ananin adurin atinyi baraen kontrak nyutogur dodogowin abom. Umum maresh? Eik yourak eikibor owishibor um bukwehshuk yoweishi inahos um sabaishi arpesh iri. <sup>29</sup> Eik douk yakrip ipak, eik ko mare ta iwok wain arigaha kweipon eik ta iwok namuni wain ini ipak gani numunum agundok arpesh shuwishum eikin Yaken nape debeinarium ananish arpesh um.”

<sup>30</sup> Aria amam heyorub anohw awehw aria hanam Olivihw yoduhw.

*Jisas Nakri Pita Ko Nokonaguk Agab Anan*

(Mak 14:27-31; Luk 22:31-34; Jon 13:36-38)

<sup>31</sup> Hanak hakih ahwodok Olivihw yoduhw aria Jisas nakripam namudok, “Kwehigib wab, ipak ihipmorim ko puruwokuk um eik punak atun atunuk. Umum maresh? Baraen nyetem Iruhin ananik buk iri douk nyakri namudok,

‘Eik ko ibo neyoh sipsipahos iri, aria ihishmorim sipsipahos ko shuruwok shunak atin atinyuk.’

<sup>32</sup> “Aria eik ta ko ta ikitakum eshudok shagokum, aria eik ko irik inak um ipak gani shokugi nahobig Galili.”

<sup>33</sup> Aria Pita nakrip Jisas namudok, “Amam kupaimi disaipel ko hutik enesh-enesh shutogurum nyak ba ta hukutukuk amamip bilip um nyak aria huruwok aria amam wokim ko huruwok, aria eik ta mare iruwok ba inyukwreny-ukuk uwe, uwok. Aria upe biohw.”

<sup>34</sup> Aria Jisas nakripan namudok, “Eik yakripen adurin baraenyum douk abudok wab. Nyak ko nyukri nyigiyagig-umesh biyeh atih namudok, Nyak madae nyudukem eik uwe, uwok. Aria owot ko tukitak tiyagwreh.” <sup>35</sup> Aria Pita nakripan namudok, “Eik ko mare igiyagig aria ikri eik douk madae idukem nyak uwe, uwok. Eshesh ko shukana shubo nyak nyugokum, aria eik shopunek ko ini nyak ugok ahudok atuh nyumnah.”

Aria amudok ihim-morim ananim disaipel douk hakripan enyudok atin baraen.

*Jisas Nanak Nenek Beten Getsemani  
(Mak 14:32-42; Luk 22:39-46)*

<sup>36</sup> Jisas nani ananim disaipel hanam anabik shuhwar-agunum Getsemani. Aria nakripam namudok, “Ipak hagipe agundok, aria eik ko inak ganudok ba inek beten.”

<sup>37</sup> Aria anan narao Pita nani Sebedi ananim biom nagamim heiran hanak. Aria ananish urkum apahw amaenyish atish aria amu nemnek yowiyokuk abom.

<sup>38</sup> Aria nakrip amam namudok, “Eikish urkum apahw amaenyish atish aria hurukum eik yakana igok. Ipak pupe agundok puni eik aria pupe piyohe.”

<sup>39</sup> Aria anan nanaku rourougungu shopunek. Aria natu nabuh atap nobuk ananig yomag iruhw amnab aria nenek beten namudok, “Eikin Yain, nyak nyukri wosik um aria nyitiweiguk enyudok debeinyi amain nyakana nyutogurum eik iri. Eik yakri nyak mare nyigipesh eikish urkum apahw shakri um uwe, uwok. Eik yakri nyak wosik ko nyigipesh nyakish urkum apahw shakri um aria ta wosik.”

<sup>40</sup> Aria Jisas ta natanamum amudok bimatum disaipel, aria natik amam heshuh hakuh. Aria narik Pita namudok, “Namudok penekesh mumam? Ipak mare ta dodogeship aria puname pupe piyoh eik um enen aua aka, uwok?” <sup>41</sup> Ipak douk puname pupe piyoh eik aria penek beten ba pupe. Uwok um enesh yoweishi shanaki aria ipak ta pugrukium ipakin bilip. Adur atin, apakish urkum apahw shakana shenek eneshenesh, aria apakihw yegenyihw atuhw douk arigeh hwahw aria dodog uwok um hwonek enesh muguhwos.”

<sup>42</sup> Anan ta natanam biyeh aria nenek beten namudok, “Eikin Yain, douk enyudok amain nyakana nyutogurum eik iri ko mare nyushagrakuk eikum, ba eik ko isah enyudok amain, aria nyak wosik ko nyigipesh nyakish urkum apahw shakri um aria ta wosik”.

<sup>43</sup> Aria anan ta natanamori um amam disaipel aria natik amam watak heshuh. Umum maresh? Amamis nabes amaenyis atus um hishuh atin. <sup>44</sup> Aria anan ta nakutumukuk aria nanak nenek beten bihatuh ahi, aria nenek apunin beten kabi douk nenekan sagomatinyum.

<sup>45</sup> Aria ta natanamori um amam disaipel aria nakripam namudok, “Ipak watak apa peshuh aria purao uhwin aka? Pemnek. Nyutob iganigadae batogur aria eshesh shakana shoko Eik Anudok Arman yatogur adurinyi arpen iri um amudok armam henek yoweishi inahos iri um amamis wis. <sup>46</sup> Ipak kitak, aria apak monak. Putik, arman nakana noko eikum horim amamis wis iri, anudok douk iganigadae nanaki hurukum apak.”

*Judas Nakom Jisas Um Horim Amamis Wis*

*(Mak 14:43-50; Luk 22:47-53; Jon 18:3-12)*

<sup>47</sup> Jisas watak apa neyagwreh aria Judas, anan douk anan um amudok 12-poreim disaipel nanak natograri. Sabaishi arpesh sheiran aria eshesh sharauri bainatog gwani rowos. Amam debeimi pris hani eshesh Juda esheshim debeimi heshopokesh aria shanaki. <sup>48</sup> Anudok arman nakana nokam Jisas

um horim amamis wis iri, watak apa shanaki yah aria nakripamum enen kak namudok, “Eik ko inopuprik anan arman. Aria anudok arman douk anan atun Jisas. Aria ipak gamo pusuwan.”

<sup>49</sup> Aria anan arigas atin nanamori Jisas aria nakri namudok, “Yopubi wab, Tisa.”

Aria Judas nanapuprik Jisas.

<sup>50</sup> Aria Jisas nakripan namudok, “Arpenyin, eneshenesh nyak nyanaki um nyenekesh iri, nyak arigas ba nyenekesh.”

Aria anam armam hanaki howeman wis Jisas aria hasuwan hape dodog.

<sup>51</sup> Aria anan arman neyotu nani Jisas iri, nauruki ananit bainat. Aria anan nabo debeini pris ananin neneman mour meyoh iri aria narpogesh anudok ananin atah takaroh habuhuk atap. <sup>52</sup> Aria Jisas nakripan namudok, “Ta rukwot bainat tubuh tutuk agnudok douk torum. Ihish arpes h sharpak bainatog iri, bainatog ko gununu eshesh. <sup>53</sup> Aria nyak madae nyudukemesh uwe, aka? Eik ko iyorik eikin Yain um aria anan ko neshopoki sabaishi enselahos, shenek uhwinyum 12-poreib amiyeb lainab, aria eshesh ko shunaki shutaurum eik. <sup>54</sup> Aria eik ko ibirak namudok um, aria baraan nyetem Iruhin ananik buk iri ko mare nyutogur adurin baraan uwe um eik, uwok. Iruhin ananik buk kwakri eshudok eneshenesh adur atin ta shutogurum eik.”

<sup>55</sup> Umum abudok atub nyutob Jisas ko nakrip eshudok ihishmorim arpes h namudok, “Ipak pasuhwi bainatog aria rowos aria ipak panaki um gamo pusuhw eik, kabi da ipak pakana gamo pusuhw anan arman nenek wanohw aria nakwuaruh iri aka? Ihishmorim nyumneh eik yape gani numun narub um Iruhin ananit debeiti urupat tataoum, aria yape yakripesh Iruhin ananin yopinyi baraan um arpes h. Aria umum maresh ba ipak madae pusuhwe nabudok nyutob uwe? <sup>56</sup> Aria eshudok ihish eneshenesh douk shatogurum shagim amam profet henyemaguk iri baraan nyatogur adur atin.”

Aria amudok ihm disaipel hakutukuk Jisas aria haruwok.

*Heneman Kwot Jisas Um Eshesh Juda Esheshit Debeiti Kwot*

*(Mak 14:53-65; Luk 22:54-55, 63-71; Jon 18:13-14, 19-24)*

<sup>57</sup> Eshudok arpes h shasuhw Jisas iri eshesh sharan shanak um debeini pris Kaiafas ananit urupat. Eshesh Juda esheshim debeimi hani amam henek skulumesh um Iruhin ananin lo iri amam douk hantorum hape numun urupat.

<sup>58</sup> Pita nagipeshuk Jisas nanak, aria madae nanak huruhuruk um anan uwe, uwok. Anan nanak nawish numun narub um anudok debeini pris ananit urupat. Aria nani amam henek mour heyoh Iruhin ananit debeiti urupat iri hape. Anan nakana nutik maresh muguhwos ta shutogurum Jisas.

<sup>59</sup> Amam debeimi pris hani sabaimi debeimi Juda douk hape hasuhw kwotog iri hahwar amam armam hanaki. Douk hanaki aria hape hakri humnek enen nyunagiyagigi baraan yum Jisas nenekahi aihum amam debeimi humnek. Aria amam hakana huparug enen yoweinyi ina Jisas nenekenyi aria hon nugok.

<sup>60</sup> Sabaimi armam hanaki henek rohwan um nyunagiyagigi baraan yum anan. Aria amam madae huwerek enen adurin yoweinyi ina anan nubokadae nenekenyiumum ta shon nugokumenyi baraan uwe, uwok. Aria biom hanaki <sup>61</sup> hakri namudok, “Anudok arman seiwok nakri namudok, ‘Eik dodogoiwe um ko ibrik Iruhin ananit debeiti urupat aria ta itanam irakotum bihatih nyumneh.’ ”

<sup>62</sup> Aria debeini pris nakitak neyotu narig Jisas namudok, “Nyak wosik um ta nyuwanam enen amamin baraan aka, uwok? Nyak nyakri mumamum enyudok baraan douk amudok henekenyum nyak iri?”

<sup>63</sup> Aria Jisas madae nukri enen baraan uwe, uwok. Aria anudok debeini pris nakripan namudok, “Eik douk yakana iyorik nyakum Iruhin ananin nyeigur anudok Iruhin madae nugok iri aria nape atun nape iri, aria nyak ta nyukripe adurinyi atin baraan. Nyak kripap, nyak douk anudok arman Iruhin nagraehenyum neshopoken nyanaki iri aka, uwok? Nyak douk Iruhin ananin Nuganin aka, uwok?”

<sup>64</sup> Aria Jisas nakripan namudok, “Nyak kanak douk nyakriyen jurug. Aria eik yakrip ipak, kweipon ipak ko putik Eik Anudok Arman yatogur adurinyi arpen iri ipeum anudok Dodogowini Iruhin ananin yopunyi rogurehah. Aria eik ko ipe iruhum hevenig utag aria inaki.”

<sup>65</sup> Aria anudok debeini pris nakitak yowiyokuk um enyudok baraen aria nabrig ananish rupah aria nakri namudok, “Anan douk nabubunim Iruhin. Apak mare muhwari anam shopunek armam hukripapum anudok armanish yoweih aih uwe, uwok. Douk atin ipak pemnek anan nabubunim Iruhin jurug. <sup>66</sup> Ipak pakana apak ta munekan mumam anudok arman?”

Aria amam hakri namudok, “Anan douk nenek yoweishi inahos aria anan apak mon nugok.”

<sup>67</sup> Aria eshesh shokuseh Jisas ananig yomag aria shakwu wis shabo anan. Aria enesh shabo ananish popaeshohos <sup>68</sup> aria shakri namudok, “Nyak douk Iruhin nagraehan iri aka, aria nyak douk ta nyukripap kabi da amam profet henekeshum. Eshudok arpesh shabo nyak iri, eshesh douk amiapen?”

*Pita Nagiyagik Nakri Anan Madae Nudukem Jisas Uwe, Uwok*  
(Mak 14:66-72; Luk 22:56-62; Jon 18:15-18, 25-27)

<sup>69</sup> Pita nape aduk, aria numunum urupatirub narub um Kaiafas ananit urupat. Aria onok weroroikwi kwonek mour iri kwanaki kwatrun aria kwakripan namudok, “Nyak douk anabik nyani anudok Jisas douk nanaki shokugi nahobig Galili iri pape.”

<sup>70</sup> Aria Pita nakri uwok um ihishmorim arpesh esheshis nabes namudok, “Eik madae idukemeshum enyudok baraen nyak nyakriyen iri uwe, uwok”

<sup>71</sup> Aria anan nanak natogur urupat adukum arbudok narubit wit, aria kupaikwi kwonek mour iri kwatrun aria kwakrip eshudok shape huruhuruki namudok, “Anudok arman nubo rig nape nani Jisas anudok Nasaret-epimin iri.”

<sup>72</sup> Aria Pita ta nakri uwok namudok, “Adur iruhw, eik madae idukemeshum anudok arman uwe, uwok.”

<sup>73</sup> Roubi nyutob shopunek aria armam heyotu huruhuruk iri hanaki hakrip Pita namudok, “Adur atin, nyak douk shopunek ananum eshudok arpesh shape shani Jisas iri, nyakip nanup douk powereh nyak.”

<sup>74</sup> Namudok aria Pita neyagwreh dodog namudok, “Adur iruhw, eik madae idukemeshum anudok arman uwe, uwok. Eik mare iyagwreh adurin baraen, aria Iruhin ko nununu eik ba igok.”

Anan nakriyen jurug, aria atub nyutob owot takitak tohwar. <sup>75</sup> Aria Pita urkum morum enyudok baraen Jisas iganigadae nakripanum, “Owot mare tuhwar uwe, nyak ko nyukriyen bihatuh namudok nyak madae nyudukem eik uwe, uwok.”

Aria Pita natogur aduk ba nerek yowiyokuk abom.

## 27

*Eshesh Juda Esheshim Debeimi Harao Jisas Hanak Um Pailat Douk Nape Debeini Gavman Um Shokugi Nahobig Judia Iri*  
(Mak 15:1; Luk 23:1-2; Jon 18:28-32)

<sup>1</sup> Gagruk ruwahep wehip, aria ihishmorim debeimi pris hani eshesh Juda esheshim debeimi hape heyagwreh aria habo baraenyum hubo Jisas nugok. <sup>2</sup> Aria hakitak haweshikan onohw dodogoihwi maduhw aria haran hanam Pailat douk nape debeini gavman iri.

*Judas Nanak Nanobo Aria Nagok*  
(Aposel 1:18-19)

<sup>3</sup> Anudok Judas douk nowereh Jisas aria nako horim um amamis wis, anan natik agundok eshesh shagiyagim Jisas um kwot aria shakon debeinyi amaenyum anan. Namudok aria ananish urkum apahw yoweshum ahudok yoweih aih anan nenekohum Jisas iri. Aria anan ta nenek giha abom numun um ananish urkum apahw. Aria natanam narao abrudok 30-poreibor siliwaibor utabor douk amam debeimi pris hani eshesh Juda esheshim debeimi hakanabor um anan iri. <sup>4</sup> Aria nakripam namudok, “Eik douk yenek yoweishi inahos jurug.”

Aria anudok arman eik yowerehanum ipakis wis iri, anan douk madae nenek enen yoweinyi ina uwe, uwok. Aria ipak kwehig pon nugok meyo.

Aria amam hakripan namudok, “Nyak nyanaki nyakrip apak um maresh? Enyudok nyakin mour.”<sup>5</sup> Aria Judas nawashakuk abrudok siliwaibor utabor numunum Debeini ananit urupatirub narub, aria nanak nanatog onohw maduhw ananin aruhwigur aria naprok ba nataur aria nagok.

<sup>6</sup> Amam debeimi pris hohur abrudok siliwaibor utabor aria hakri namudok, “Abrudok utabor douk maborubukum arman nagokum. Aria apakin lo douk nyakri abrudok utabor apak mare muborubukum abrudok bakus numun Iruhin ananit debeiti urupat iri uwe, uwok.”

<sup>7</sup> Aria habo atin baraenyum abrudok utabor amam hator anab amnab um arpesah apa shatuk amnab ba shenek amnabis marus iri. Amam hanak hator abudok amnabum butogur wonugwegwiruh hapeim um arpesah shurom eshudok arpesah shagoki shanaki rougunum iri. <sup>8</sup> Namudok aria abudok amnab douk shahwarab um, “Owishiboribi amnab” aria douk arpesah wata apa shohwarab enyudok nyeigur. <sup>9</sup> Namudok aria enen baraen seiwok Iruhin nohur profet Jeremaia nenyemaguk iri nyatogur adurin atin. Baraen enyudok nyakri namudok, “Hakitak hohur abrudok 30-poreibor siliwaibor utabor. Abrudok utabor douk eshesh Israel shaborubuk um shutor anudok arman iri. <sup>10</sup> Aria haboruhur hanak hatik eshesh apa sharok amnab um amnabis marusum aria hator anab amnab. Iruhin douk nakripe dodogowinyi baraen namudok aria yeyagwrehan.”

*Pailat Narig Jisas Um Anan Douk Eshesh Juda Esheshin King Aka, Uwok?*

*(Mak 15:2-5; Luk 23:3-5; Jon 18:33-38)*

<sup>11</sup> Harao Jisas hanak honusop neyotu natik anudok debeini um gavman iri aria narigan namudok, “Nyak douk eshesh Juda esheshin king aka?”

Aria Jisas nakripan namudok, “Adur atin, eik douk kabi nyak nyakrium.”

<sup>12</sup> Eshesh Juda esheshim debeimi hani debeimi pris hagiyaig haduk sabainyi baraenyum Jisas. Aria anan madae nutanam niyagwreh enen atin baraen uwe, uwok. <sup>13</sup> Namudok aria Pailat ta narigan shopunek namudok, “Nyak douk madae nyemnek enyudok ihinyumorim baraen amam henemen kwot-enyi?”

<sup>14</sup> Aria Jisas madae niyagwreh enen baraenyum Pailat uwe, uwok. Namudok aria Pailat nor urkum manak matuhukuk meyo.

*Pailat Nakripan Um Shenek Nyilim Jisas Rowogin Kruse Aria Nugok*

*(Mak 15:6-15; Luk 23:13-25; Jon 18:39, 19:16)*

<sup>15</sup> Um ihish kwarahos ahudok nyumnah shenek agundok debeiguni Pasovai-gun worigun obi nyutob, anudok nape Debeini gavman iri douk ko nokweshih anan nanaweshik iri um shunuweshik-ati urupat. Eshesh arpesah eshesh kanak ko shukri nyeigurum anan arman nape nanaweshik iri, aria Pailat ko nukweshih anudok arman nanam eshudok arpesah. <sup>16</sup> Aria um abudok nyutob douk anan yoweini nanaweshik aria nape shunuweshik-ati urupat, ananin nyeigur douk Barabas. <sup>17</sup> Eshesh eshudok arpesah iganigadae shantum shanaki sheyotu, Aria Pailat narigesh namudok, “Ipak pakana eik ta ikweshih amiapen nyunamogu ipak? Eik ta ikweshih Barabas aka, eik ta ikweshih Jisas eshesh douk shakana Iruhin nagraehan aria neshopokan nanaki iri?” <sup>18</sup> Aria Pailat nakri namudok. Umum maresh anan nadukemeshum eshesh douk esheshish urkum apahw douk yoweshum Jisas meyo, aria sharan shanamorim kwotog.

<sup>19</sup> Aria shopunek douk Pailat nape ananin debeinyi nenemesh kwotog-enyi wagitur, ananik irohukwik kwoneki baraen nyunakmori anan namudok, “Nyak mare nyenek enesh muguhwos um enyudok yopunyi arpen uwe, uwok. Eik yeshuh wab aria yatrunk anas yomnis, yemnek debeiri eriger um anan aria madae gamo ishuh wab uwe, uwok. Eik yakri enyudok arpen douk yopunyi.”

<sup>20</sup> Aria amam debeimi pris hani Juda esheshim debeimi hohur eshudok worobaishi arpeshe esheshiruh aparuh um shuhwarum Barabas nutograri aria shubo Jisas nugok.

<sup>21</sup> Aria Pailat narigesh namudok, "Ipak pakana eik ta ikweshihumep meinari arman um amudok biom armam nunamogu ipak?"

Aria eshudok arpeshe shuhwar namudok, "Barabas."

<sup>22</sup> Aria Pailat narigesh namudok, "Aria ipak pakana eik ta inekesh mumam um anudok Jisas eshesh shakri Iruhin nagraehan ba neshopokan nanaki iri?"

Aria ihishmorim shohwar debeg namudok, "Punek nyilimanum rowogin kruse."

<sup>23</sup> Aria Pailat ta narigesh namudok, "Umum maresh? Anan douk nenek maren debeinyi ina?"

Aria eshesh shuhwar debeg abom, "Punek nyilimanum rowogin kruse."

<sup>24</sup> Aria Pailat nadukemesh namudok, eshesh ko mare shumnek ananin baraan uwe, uwok. Aria debeihwi wanohw huruhuruk um hutogur. Aria anan nohur anabar abar aria nakrup ananis wisum ihishmorim arpeshe esheshis nabes. Aria anan nakri namudok, "Eik inahos uwok um anudok arman ananin gok uwe, uwok. Ipak kanak pakri ba eshudok eneshenesh shenenek."

<sup>25</sup> Aria ihishmorim arpeshe shakri namudok, "Eshudok inahos ko shupeum apak aria um apakish batowish."

<sup>26</sup> Namudok aria Pailat nakweshih Barabas nanam eshesh. Aria anan nakri ba amam soldia hakwu nyiguhw hweirohi maduhw aria habo Jisas yowiyokuk. Aria nakom Jisas um soldia amamis wis um hunak henek nyilimanum rowogin kruse.

*Amam Soldia Henek Enenyi Enen Habubunim Jisas*

*(Mak 15:16-20; Jon 19:2-3)*

<sup>27</sup> Aria Pailat ananim soldia harao Jisas hawish debeini gavman esheshit urupat. Hawish aria ihm-morim soldia hanaki heyotu herharihan. <sup>28</sup> Aria hatrun howaruk ananin rupah aria hereman anah owishiborihi rupah. <sup>29</sup> Aria

hauri onohw maduhw kabi da pruwehwihw um aria hadarohw hohwunug kabi anan king ananit hat um aria hahwemun ananig barag. Aria horuman anag shokugi akodiwok ananis wis aria habuh hoduk ohrubus hape henekan enenyenen habubuniman hakri namudok, "O wosik ruwahep nyak eshesh Juda esheshin king."

<sup>30</sup> Aria amam hakusehan, aria hatrunari agudok akodiwok iganigadae hagur ananis wis iri aria amam habo ananig barag worobaihi abom. <sup>31</sup> Douk henekan enyudok enenyenen habubuniman ba jurug aria ta hatrun howaruk ahudok owishiborihi rupah aria ta hereman anan kanak ananin rupah. Aria haran hanak um henek nyiliman um rowogin kruse.

*Amam Soldia Henek Nyilim Jisas Neir Rowogin Kruse*

*(Mak 15:21-32; Luk 23:26-43; Jon 19:17-27)*

<sup>32</sup> Douk hakutukuk wabur aria hatogur hanak huruk atinyum yah, aria amam soldia hatik anan arman nanaki wabur Sairini ananin nyeigur Saimon. Aria amam hasuwan harani ba grok atin hakripan um nutrun rowog kruse Jisas nutauruman aria nunyusah-uman.

<sup>33</sup> Aria eshesh shanak shatogur onok outuk nyeigurikum Golgota. Enyudok nyeigur douk shakri agudok mihig gape kabi da arpenyik barag um. <sup>34</sup> Aria um okwudok outuk armam hakon Jisas anan yoweini wain douk hasharan nani yoweini marasin aria nanagugwi nor ba nubutin atun iri. Aria Jisas nakwiraeh um nubroh aria uwok, madae nubroh anudok wain uwe, uwok. <sup>35</sup> Amam soldia hawaur Jisas jurug iruhum rowogin kruse aria habirak anag baunag kabi da satu um hutik amiapen kadak nyenek uhwinyum aria husia rupah eneshenesh orokhunum amam kanak. <sup>36</sup> Aria amam habuh hape atap um okwudok outuk aria apa heyohan. <sup>37</sup> Aria iruhum ananig barag douk howem enyudok baraan douk shenyemun um kwot iri nyape. Aria baraan nyetem iri nyakri namudok,

ANUDOK DOUK JISAS, ESHESH JUDA  
ESHESHIN KING.

<sup>38</sup> Aria huruhuruk um Jisas amam howaur biom armam hakwu-orugwih iri aria habo arpesch iri douk shopunek shenek nyilimam heir wobuwobur um Jisas. Anan neir um yopunyi rogur ehah aria anan neirum anagagrinn rogur ehah.

<sup>39</sup> Aria arpesch sharahaen yah iri shenek yowi kare shatrun aria sheneyagwreh enenyenen shabubunim Jisas. Eshesh shegigiyarig um baragos,

<sup>40</sup> aria shakri namudok, “Nyak anudok arman douk nyakana nyubrig Iruhin ananit debeiti urupat aria ta nyurukat nyutuhur tiyotu um bihotih nyumneh atih iri aria nyak maresh sheneken ba mare ta nyutaurum nyak kanak. Aria enyudok douk adurin baraenyum nyak douk Iruhin Ananin Nuganin um, namudok aria nyak kitak buhi ba kutukuk nenyudok kruse.”

<sup>41</sup> Amam debeimi pris hani amudok henek skulumesh um lo iri aria hani amam eshesh Juda esheshim debeimi, amam douk shopunek henekan enenyenen habubuniman namudok atin.

<sup>42</sup> Amam hakri namudok, “Anan nataurum kupaishi arpesch, aria anan ko mare nunugabe anan kanak uwe, uwok. Anan douk Israel esheshin king um, aria anan ko nukutukuk rowogin kruse ba nukitak nubuhi, aria apak ko munek bilipum anan. <sup>43</sup> Anan nenek bilipum Iruhin aria nakri namudok, ‘Eik Iruhin Ananin Nuganin.’ Aria douk Iruhin nukri nunuwasham anan abom um, aria Iruhin ko nutauruman.”

<sup>44</sup> Aria amudok biom hakwu-orugwih iri hataur hurukum Jisas iri, amam shopunek heyagwreh atatahin baraen habubunim Jisas-enyi.

*Jisas Nagok*

(Mak 15:33-41; Luk 23:44-49; Jon 19:28-30)

<sup>45</sup> Umum aruh 12 kilok, wab babuh aria beyawiyom ihigunum agudok shokugi Judaig nahobig arigaha 3 kilok. <sup>46</sup> Arigaha nyutob batogurum binyatin aua um 3 kilok aria Jisas nahwar debeg namudok, “Eli, Eli, lema sabaktani?” Enyudok baraen nyakri namudok, “Eikin Iruhin, Eikin Iruhin, umum maresh ba nyak nyakutukuk eik?”

<sup>47</sup> Enesh arpesch sheyotu huruhuruk, shemnek enyudok baraen aria shakri namudok, “Anudok arman nahwarum Elaija.”

<sup>48</sup> Aria anan arman arigas atin nanak nohuri enen spans<sup>27:48</sup> nesegwrin anan nubutini wain. Douk spans shuknin, natuken naweshiken anag akodiwok aria nako Jisas um nubroh. <sup>49</sup> Aria kupaishi shakri namudok, “Yotu! apak ko apa mutrugun ba iyoh, um Elaija ko nanaki natauruman aka, uwok?”

<sup>50</sup> Aria Jisas ta shopunek nahwar anah debeg abom aria ananis yapis sakihuk aria nagok.

<sup>51</sup> Aria um abudok atub nyutob ahudok debeihi rupah heir<sup>27:51</sup> numun Iruhin ananit debeiti urupat iri puwaroh um biyeh gani iruhw arigaha habuh atap. Aria enyik kwatukum amnab shopunek aria debeibori utabor pupuwarobor.

<sup>52</sup> Aria wonugwegwiruh hanupok aria sabaishi Iruhin ananish yopishi arpesch seiwok shagok ba sharomesh iri ta shakitak shape. <sup>53</sup> Shakutukuk wonugwegwiruh shakitak shape arigaha douk Jisas shopunek nakitaki aria eshesh shanak shawish abrudok Iruhin ananibur wabur Jerusalem. Shanak shawish aria worobaishi arpesch shatrish.

<sup>54</sup> Debeini soldia nani amudok douk hani anan hape heyoh Jisas iri hatik enyik kwatuk um, aria hatik ihishmorim eshudok shatogur iri aria hanogugur abom. Aria hakri namudok, “Adur atin, anudok arman douk Iruhin Ananin Nuganin.”

<sup>27:48</sup> <sup>27:48</sup> Enyudok spans douk kabi da shemishawin um arpesch shatukesh yous sheshahim wah bagish shokwish um shukrup marus sani yaureruh um. <sup>27:51</sup> <sup>27:51</sup> Numun Iruhin ananit debeiti urupat amudok mape magiguk iri rum douk Iruhin ananim atum rum. Aria wit um amudok rum douk shawaur anah debeihi tetemenyihirupah meyoh hataurum wit. Aria ahah douk ahudok rupah puwaroh um biyeh gani iruhw arigaha habuh atap. Baraen nyetem Hibru 9:2-7 iri douk nyakrium amudok Iruhin ananim rum.



<sup>55</sup> Sabaiwi armago shopunek weyotu madae rougun abom uwe, uwok. Aria apa watiki eshudok sheyotu hurukum rowog kruse iri. Owo douk wagipesh Jisas gani Galili wanakium unemon garibog um eneshenesh iri. <sup>56</sup> Oudok sabaiwi armago, bio owo douk atin nyeigur Maria. Onok douk kwanaki wabur Makdala. Aria onok douk Jems nani Josep amamik amakek. Aria okwudok onok douk Sebedi ananim nugamim amamik amakek.

*Sharom Jisas Wonugwehw*

*(Mak 15:42-47; Luk 23:50-55; Jon 19:38-42)*

<sup>57</sup> Arigaha wabigep aria anan arman douk noruk worobaibori utabor iri nanaki. Ananin nyeigur douk Josep nanaki wabur nyeiguriburum Arimatea. Anan douk nagipesh Jisas iri. <sup>58</sup> Anan nanaki nanam Pailat aria narik ananum nubre Jisas ananit mukut aria nunak nuruman. Aria Pailat nakri wosik aria nakrip amam soldia um hubreyanari rowog kruse aria hokonan. <sup>59</sup> Aria Josep natrum Jisas aria neshurehan anah namuhi shigorihwihi rupah. <sup>60</sup> Aria Josep narao mukut nanak nawish natemukuk anan kanak ananihw wonugwehw. Ahwodok wonugwehw ohohw onohw umunihw riguk Josep nakrip anam armam harukohw hwawish anabik neirumum utaboriyu burbudu wotaum. Aria Josep nabadigi anam debeimi utom manaki mutapok witegurum ahwudok umunihw. Anan nenekesh namudok jurug aria anan nanak. <sup>61</sup> Aria Maria douk kwanaki Makdala iri kwani okwudok onok Maria wape wobur ehahum wonugwehw aria apa washakamohw.

*Amam Soldia Heyotu Heyoh Wonugwehw agundok Sharom Jisas Um*

<sup>62</sup> Ahudok nyumnah douk eshesh Juda shaurim worigun, mahish aria enesheneshum shenek worigun aria ko shupe shubeim Sabat ba shishohahi nyumnah ahudok hatuh. Aria amam debeimi pris hani amam Farisi hanak hatik Pailat. <sup>63</sup> Hanak aria hakripan namudok, “Debeini, apak urkwip porum enen baraan

douk anudok arman napeum nenek rohwumesh aria nape nakripesh nakri namudok, ‘Eik ko igok aria hukri bihatuhahi nyumnah aria eik ta ikitakum shagokum aria ipe adur atin.’ <sup>64</sup> Namudok aria makri nyak nyukrip amam soldia hunak hupe heyoh gani wonugwehw hwapeim um bihatuh nyumneh. Umum maresh, douk ko ananim disaipel hunaki hukwuman aruh um ananit mukut aria hunek rohwumesh hukri anan douk ta nokitakum shagokum aria nape adur atin. Aria enyudok douk atin shakrienyi baraan nyanagiyagig iri ta nyenek uhwinyum enyudok narik nagiyagik ba nakrienyi baraan.”

<sup>65</sup> Douk Pailat nemnek aria nakripam namudok, “Ipak kare purao anam soldia aria punak piyoh wonugwehw um kabi ipak padukemesh um aria dodogowip um punekenyum.”

<sup>66</sup> Nakripam namudok aria amam hanak henek eneh agushih agundok sharom Jisas um. Heneguk enyudok aria hasopukuk amam soldia heyotu heyoh wonugwehw.

## 28

*Jisas Ta Nakitak Um Shagok Um Aria Nape*

*(Mak 16:1-10; Luk 24:1-10; Jon 20:1-18)*

<sup>1</sup> Ahudok nyumnah Sabat eshesh Juda douk madae shunek mour shape meyo hahi douk hatuh. Aria ruwahep wehip Sandeih nyumnahin aun apa nakihi, aria Maria kwanaki wabur Makdala iri kwani kupaikwi atin nyeigur Maria wanaki ruwahep wehip um utik wonugwehw. <sup>2</sup> Aria atub nyutob debeikwi enyik kwatuk. Umum maresh, enen Debeini ananin ensel nyakitaki heven aria nyabuhi nyagreshuk utom matapok witegur iri aria nyahagi nyape iruhimum. <sup>3</sup> Enyudok enselig yomag genek lait kabi da utag brereyarog um aria enyenyih rupah douk kabi da armir shigori hw um henek lait abom. <sup>4</sup> Amam soldia hanogugur um enyudok ensel aria arugoguhwiar wam aria habuh hakuh amnab kabi douk armam hagokum.

<sup>5</sup> Aria enyudok ensel nyakrip oudok armago namudok, “Ipak mare punogugur uwe, uwok. Eik yadukemesh, ipak douk panamori purim anudok Jisas douk shan shenek nyiliman neir rowogin kruse iri. <sup>6</sup> Anan madae ta nukus agundok uwe, uwok. Anan iganigadae ta nakitak um shagok um aria nape, kabi da riguk nakri um. Ipak yowi ba putik outuk agundok shanubuk um. <sup>7</sup> Ipak kare arigas atin punak pukrip ananim disaipel namudok, anan nagok aria iganigadai ta nakitak um shagok um aria nape adur atin. Ipak gamo punnek. Anan ko nurik um ipak aria nunak um shokugi nahobig Galili aria ipak ko punaku putrun ganudok. Eik douk yanakium ikripep um enyudok baraen.”

<sup>8</sup> Oudok bio watik enyudok ensel aria wanogugur abom, aria shopunek owo wanadudareh abom, aria arigas atin waktukuk wonugwehw aria wahur wonak um ukrip ananim disaipel. <sup>9</sup> Aria Jisas naparago yah, aria nakri namudok, “Ruwahep bio.” Aria owo bio wanak huruhuruk um anan watu wabuh amnab aria wowem owowis wis ananiruh yeriwuruh aria wonek lotu um anan. <sup>10</sup> Aria Jisas nakripo namudok, “Ipak bio mare punogugur. Ipak kare ba pukrip eikim owarhim um amam disaipel hunaku arigas um shokugi nahobig Galili. Aria amam ta hutik eik ganudok.”

#### *Amam Soldia Henek Rohw Hakripesh-nyeni Baraen*

<sup>11</sup> Oudok bio armago wata apa wonak yahum utik amam disaipel, aria amam soldia heyoh wonugwehw iri hanak hawish abrudok debeiburi wabur Jerusalem. Hawish aria hakrip amam debeimi pris um ihishmorim eneshenesh amam hatrish shatogur iri. <sup>12</sup> Aria amudok pris hemnek namudok aria hanak hani eshesh Juda esheshim debeimi hantorum hape habo enen baraen. Aria hakitak hator amudok soldia hakam debeibori utabor. <sup>13</sup> Hakam utabor aria hakripam namudok, “Ipak punak penek rohw pukripesh namudok, ‘Apak meshuh wab aria ananim disaipel hanaki hakwumanaruh aria haran hanak.’ <sup>14</sup> Aria douk

Pailat debeini gavman iri numnek enyudok baraen um, aria apak ko muni anan miyagwreh ba miyatok baraen. Namudok aria baraen ta mare nyupe ipak uwe, uwok.”

<sup>15</sup> Namudok aria amudok soldia horao utabor aria hagipesh debeimi amamin baraen. Aria enyudok baraen soldia henek rohw hagiyaig-enyi nyanak nyanaki orokohun um eshesh Judaish arpesh eshesh kanak arigaha nyanaki um abudok doukib nyutob.

#### *Jisas Nakomuk Mour Ananim 11-Poreim Disaipel*

*(Mak 16:14-18; Luk 24:36-49; Jon 20:19-23)*

<sup>16</sup> Aria Jisas ananim 11-poreim disaipel hagim yah hanakum agudok shokugi nahobig Galili. Aria hanak hatogur ahwodok yoduhw kabi da Jisas nakripamuk um. <sup>17</sup> Hanak hakih hatik Jisas aria henek lotuman hatuk ananin nyeigur nyato gani iruhw. Aria anam amudok hor biyep urkwip aria hakana anudok douk madae Jisas uwe, uwok. <sup>18</sup> Aria Jisas nanaki huruhuruk um amam aria nakripam namudok, “Eikin yaken Iruhin douk nake debeinyi nyeigur eik yatogur dodogoiwe aria yape debeini um ihishmorim eshudok shape iruhw atap iri. <sup>19</sup> Namudok aria ipak douk ta punam ihirub warub um ihis awirosish arpesh aria pukripesh eikin baraen. Pukripesh um shumneken shusuhwen aria shugipesh eik shutogur eikish disaipel. Aria punek baptaisumesh um eikin Yaken ananin nyeigur, um eik Nuganin eikin nyeigur aria shopunek um Iruhin ananin Mishin enyenyin nyeigur. <sup>20</sup> Aria punek skulumesh um shugipesh ihinyumorim baraen douk eik riguk yape yakripepen iri. Eik yakripep adurin atin baraen, Eik douk ini ipak mupe ihih nyumneh arigaha hugiguk iri nyumnah hutogurum agudok nahobig.”

## Iruhin Ananin Yopinyi Baraen Mak Nenyem Iri

### *Banenyi Baraen Um Mak*

1:1-13 Iruhin neshopok Jon nenek bap-  
taisumesh iri nanaki

1:14—13:37 Iruhin neshopok Jisas  
nakripesh ananin yopinyi baraen iri  
nanaki

13:38—15:47 Jisas nemnek eriger aria  
shenek nyiliman rowog kruse aria  
nagok

16:1-20 Jisas wata nakitak nape aria  
nekesh mour ananish disaipel

### *Jon Nenek Baptaisumesh Iri Nakripesh Um Jisas Kraiss Ta Nunaki*

<sup>1</sup> Enyudok douk yopinyi baraen um Jisas Kraiss, Iruhin ananin Nuganin. Nyarik iri enyudok yopinyi baraen nyakitak nyanak um douk namudok. <sup>2</sup> Seiwok Iruhin ananin Mishin nyohur anudok profet Aisaia aria nuwem enen Iruhin ananin baraen namudok. Iruhin nakri, “Eik ta ishopok anan arman nurao eikin baraen nyirik nyunak aria nyak ta nyugiman. Anan ta nugabemen yah nirik. <sup>3</sup> Anan ta nunak nupe wehigunum arpesh uwok um aria nupe nuhwar debeg nukri, ‘Gabeiman yah Debeini. Pugabeyoh hupe wosik um anan nugimah nunaki um.’”

<sup>4</sup> Aria Jon douk nenek baptaisumesh iri natogur nape anagun wehigunum arpesh uwok um aria nape nakripesh nakri, “Ipak pukehuk agabus yoweih aih aria putanam pukon aparuh Iruhin. Ipak punekesh namudok aria eik inek baptaisumep aria Iruhin ta mare nusuhweshumep eneshenesh yoweishi inahos ipak pape penekesh iri aria nukweshihesh niyateshuguk.”

<sup>5</sup> Aria ihishmorim shape sabairubi warub bape shokugi nahobig Judia iri shani ihishmorim shape Jerusalem iri shanak um shumnek Jon ananin baraen. Eshesh shanak aria shawereh esheshish

yoweishi inahos shakrip Jon aria anan nenek baptaisumesh worub Jordan.

<sup>6</sup> Aria Jon nenekah iri rupah douk shenekah enen mahin shohwaren um kamel iri enyenyirub ehirub.<sup>1:6</sup>Aria nawashot iri let douk shenekat anap mahinyip yegenyihwip. Aria worigun anan nagnoh iri douk napeum nawok gormish shani wanarin hani. <sup>7</sup> Aria anan nakripesh nakri, “Eik yarig yanaki, aria anan ta nigimeiri. Anudok nugigi iri douk dodogowin atun neshagrakuk eik. Aria shopunek, eik douk madae yopuweiri um ikweshihuman madururuh ananiyu su uwe. <sup>8</sup> Aria eik douk yenek baptaisumep abar meyoh, aria anan ta nunek baptaisumep um Iruhin ananin Mishin ta nukepen nyuwish nyupenyep numun.”

### *Jon Nenek Baptais Um Jisas*

<sup>9</sup> Aria Jisas nakutukuk wabur Nasaret douk bape shokugi nahobig Galili iri nanaki aria Jon nenek baptaisuman worub Jordan. <sup>10</sup> Douk nenek baptaisuman aria ahudok atuh Jisas nakutukuk worub natowi nakih neyotu anagas aria natik iruhw utag ganupok. Aria natik Iruhin ananin Mishin nyabuhi kabi arudok armir manyun um rabuhi ratem Jisas. <sup>11</sup> Aria anah mah hanaki iruhw heven. Aria enyudok arpen nyeyagwrehi nyakri, “Nyak douk eikin Nuganin. Eik douk urkum manawashamen aria yanadudareh abom.”

### *Satan Nakwiraeh Jisas Um Nunek Yoweishi Inahos*

<sup>12</sup> Aria arigas Iruhin ananin Mishin nyohur Jisas aria nakitak nanak anagun wehigunum arpesh uwok um. <sup>13</sup> Anan nanak nape anan aun shuknin aria 10-poreih nyumneh shopunek. Aria Satan nape nakwiraehan um nunek yoweishi inahos. Aria shopunek, Jisas nanak hurukatinyum urahish mahish shapeum. Aria Iruhin ananish enselahos shanaki shatauruman.

### *Jisas Nohur Mour Neneken Shokugi Nahobig Galili*

<sup>14</sup> Douk Jon nonoweshik napeik, aria Jisas nanam shokugi nahobig Galili aria nape nakripesh Iruhin ananin yopinyi baraan. <sup>15</sup> Anan nakripesh nakri, “Ahudok nyumnah douk Iruhin nakriyoh iri douk ahudok hatogur. Aria abudok nyutob um arpes shuwish um agundok Iruhin nupe Debeini um ipak um douk banaki hurukatin. Douk namudok aria ipak pukeshuk agabus yoweishi inahos aria putanam pukon aparuh Iruhin aria pusuhw ananin baraan pugipeshen!”

*Jisas Nahwar 4-poreim Armam Aria Hagipeshan*

<sup>16</sup> Douk Jisas nape nanarahaen nanak anagas um debeigi waiyag Galili, aria natik Saimon nani ananin wanin Andru douk hape henek bisnis um hatuk eiguhw iri. Amam hawashak anan umben agudok debeigi waiyag aria hape hatuk eiguhw. <sup>17</sup> Douk anan natrum aria nakripam nakri, “Ipak yowi pugipesh eik aria ikiripep um purao arpes shunaki shugipesh eik.” <sup>18</sup> Douk anan nakripam namudok aria ahudok atuh amam hakutukuk amamib umbenab bakusuk aria hagipesh Jisas hanak.

<sup>19</sup> Douk amam hanaku aria Jisas natigu biom hatem bot hape hagabe umbenab. Amam douk Sebedi ananim nugamim, Jems nani ananin wanin Jon. <sup>20</sup> Aria douk Jisas natrum aria ahudok atuh nahwaram um hunaki hugipeshan. Aria amam biom hakutukuk amamin yaken Sebedi nani amudok henekuman mour iri hatemaguk bot aria amam habuhi hani Jisas hanak.

*Jisas Nahiyahuk Enen Yoweinyi Sagab Douk Nyape Anan Arman Iri*

<sup>21</sup> Aria amam hanam anabur wabur shohwarabur um Kaperneam iri. Aria ahudok nyumnah Sabat eshesh Juda mour uwok shape meyoh ahi, amam hanak hawish eshesh Juda shape sheyagwreh baraan-atari urupat aria Jisas nape nenek skulumesh um Iruhin ananin baraan eshesh armam armago. <sup>22</sup> Aria eshesh shemnek ananin baraan aria shakitak yowiyokuk abom. Um mares? Anan douk narao debeinyi big aria nenek skulumesh nakripesh dodogowin atin baraan. Aria amam henek skulumesh

um lo iri douk madae hunek skulumesh namudok uwe, uwok.

<sup>23-24</sup> Aria douk Jisas nape nenek skulumesh aria anan yoweishi sagabehos shapenyani iri nanak nawish atudok urupat aria nahwar debeg nakri, “Jisas, nyanaki wabur Nasaret iri. Nyak nyanamori nyunekap mumam apak sagabehos? Nyak nyanamori nyop mugok aka? Apak madukemen abom nyak. Nyak douk Iruhin ananin abom naganin.”

<sup>25</sup> Aria Jisas naho eshudok sagabehos nakri, “Ipak mokureg aria pukutukuk anudok arman aria putogur punak.”

<sup>26</sup> Aria douk Jisas nahesh aria eshesh shour anudok arman debeg. Aria anan krukruk nape aria eshesh shohwar debeg aria shakitukuk anudok shatogur sharuwok.

<sup>27</sup> Aria eshudok sabaishi arpes shape iri shatik namudok aria eshesh shakitak yowiyokuk abom. Aria shape sheneyagwreh shakri, “Enyudok douk apak memneken iri douk maren baraan? Seiwok apak madae mumneken iri enyudokmori baraan! Anudok arman douk dodogowinari aria eshudok sagabehos shemnek ananin baraan!”

<sup>28</sup> Aria enyudok baraan um enyudok Jisas neneken iri nyowe nyanak shubairubi warub douk bape agudok shokugi nahobig Galili iri.

*Jisas Nagabe Pita Ananik Nakwurikwik*

<sup>29</sup> Aria amam hakutukuk eshesh Juda shape sheyagwreh baraan-ati urupat aria amam ihim-morim, Jisas nani Saimon aria Andru, hani Jems aria Jon, hanam Saimon aria Andru amamit urupat. <sup>30</sup> Aria agundok, Saimon ananik nakwurikwik kwaraubor aria kweshuhw aras. Aria arigas enesh shanak shakrip Jisas um agundok okwok kwaraubor um.

<sup>31</sup> Aria Jisas nanak nasuhw okwokwin rogur nakuhur kwakitak kwape aria okwok yopuk. Aria okwok kwakitak kwape kwonek worigun um eshesh shishoh.

*Jisas Nagabe Sabaishi Arugeh Hapeyeshi*

<sup>32</sup> Douk arigaha wabigep wah hagok aria eshesh armam armago sharauri

arugeh hapeyeshi shani yoweishi sagabehos shapeyesh iri shanaki agundok Jisas napeum. <sup>33</sup> Aria ihishmorim arpesh shape abrudok wabur iri shanaki shantorum shape aduk hurukatin um dua. <sup>34</sup> Aria Jisas nagabe sabaishi arpesh anahaehih arugeh henekesh abrudok wabur iri. Aria shopunek, nahiyahuk sabaishi sagabehos shatogur sharuwok. Aria sagabehos douk shadukeman Jisas. Aria anan nakripesh um eshesh mare shukurip kupaishi arpesh um anan douk Iruhin ananin nuganin um.

### *Jisas Nanak Nakripesh Yopinyi Baraen Shokugi Nahobig Galili*

<sup>35</sup> Wata wab Jisas nakitak nanak anagun arpesh uwok um aria nanak nape nenek beten. <sup>36</sup> Nenek beten aria Saimon nani amudok anam disaipel hape hauriman hanak. <sup>37</sup> Douk hauriman hanak ari-gaha hanak hatrun aria hakripan hakri, "Nya, ihishmorim arpesh shape shaurimen."

<sup>38</sup> Aria Jisas nakripam nakri, "Nyunekesh, apak munam kupairubi warub bape hurukatin iri aria eik ikripesh yopinyi baraen eshesh shopunek. Um maresh, Eik douk yanakmori ikripesh yopinyi baraen sabaishi arpesh."

<sup>39</sup> Aria anan nanak ihirub warub agudok shokugi nahobig Galili aria nape nakripesh Iruhin ananin yopinyi baraen numun eshesh Juda shape sheyagwreh baraen-ogwi urusag. Aria shopunek, nahiyahuk sagabehos douk shape arpesh iri shatogur sharuwok.

### *Jisas Nagabe Anan Arugeh Lepra Hapenyani*

<sup>40</sup> Aria anan ehudok lepra hapenyani nanak um Jisas aria nabuh noduk ohrubus. Aria nakrip Jisas nakri, "Douk nyak nyukri wosik um, nyak ta nyugabeye."

<sup>41</sup> Aria Jisas natrun aria nenek gihau-man. Aria nohur rogur nuwem ananis wis anudok arman aria nakripan nakri, "Eik yakri wosik um. Nyak yopin." <sup>42</sup> Aria ahudok atuh anan yopin.

<sup>43-44</sup> Aria Jisas nakripan dodogowinyi baraen nakri, "Nyak nyunak aria mare

nyukrip enesh arpesh um agundok eik yagabeyen um, uwok. Nyak nyunek atin nyunam pris nutrin, aria nyunak nyunek enyudok ofa um agundok nyak yopinyum um maresh douk Iruhin ananin lo douk nakoguk Moses enyi nyakrium. Nyak nyunekesh namudok aria sabaishi arpesh ta shutrin aria shudukemesh shukri nyak douk iga yopin."

<sup>45</sup> Aria anan nanak aria nape nakrip sabaishi arpesh um agundok Jisas nagabeyanum. Aria baraen nyowe nyanak sabairubi warub. Douk namudok aria Jisas madae nunak nuwish anarub warub uwe, uwok. Anan napeik aduk abrudok warub agundok wehigunum douk arpesh uwok um. Aria sabaishi arpesh shanaki worobaigunum iri shanak agundok anan nanak napeum.

## 2

### *Jisas Nagabe Anan Roguhw Aiyas Shagokanari*

<sup>1</sup> Douk ehudok nyumneh hanak hadiguk, aria Jisas wata shopunek natanam nanam Kaperneam. Aria abudok nyutob eshesh armam armago shopunek shemnek baraen um anan nanak nape urupat um. <sup>2</sup> Douk namudok aria sabaishi arpesh shanak shape numun ananit urupat shuknit aria enesh shape aduk hurukatin um wit. Eshesh shape aria madae onok outuk kwupeik meyoh uwe, uwok. Eshesh shape ba shuknigun aria Jisas nape nakripesh yopinyi baraen.

<sup>3</sup> Douk nape nakripesh baraen aria 4-poreim armam howemori anan roguhwa aiyas shagokanari anas aras aria haran hanaki um Jisas. <sup>4</sup> Amam haran hanak aria sabaishi arpesh shape aria amam yah uwok um huran hunak agundok Jisas napeum uwe, uwok. Douk namudok aria amam hatu hakih modukwitam urupat aria hadar agundok Jisas napeum. Aria anudok roguhwa aiyas shagokanari nor aras aria honahur hereyan kwojarahos aria shokubur hakutunuk nabuh nakus Jisas napeum. <sup>5</sup> Aria douk Jisas natik amudok 4-poreim um henek bilip um anan ta nugabeyan aria anan nakrip anudok roguhwa aiyas shagokanari nakri,

“O nuganin, eik ta ko igabeyen um nyakish yoweishi inahos aria eshudok ta iyateshuk.”

<sup>6-7</sup> Aria douk Jisas nakri namudok aria anam henek skulumesh um lo iri, douk hani eshesh hape agundok iri amamiruh aparuh aturuh heneyagwreh hakri, “Anudok arman neyagwreh namudok um maresh? Anan douk nape nabubunim um Iruhin. Apak madukemesh um Iruhin atun ta wosik nukweshih-esh um arpeshish yoweishi inahos.”

<sup>8</sup> Aria Jisas nadukem amamip urkwip aria nakripam nakri, “Ipak urkwip mare pur namudok, uwok. <sup>9</sup> Um maresh? Enyudok mour douk shopunek atin um eik ikrip anudok roguh w aiyas shagokanari ikri, ‘Eik ta ko ikweshihuk nyakish yoweishi inahos aria iyateshuk’ aka, ikrip-an ikri, ‘Kitak hur nyakis aras nyusuwos aria nyunak’ aria anan ta nikitak nunak? <sup>10</sup> Douk namudok aria Eik Anudok Arman douk yatogur adurinyi arpen iri ta iyabigep um pudukemesh um eik douk dodogoiwe iri aria Iruhin neke big ko ikweshihuk um eshudok atapish arpesh esheshish yoweishi inahos aria iyateshuk.” Aria Jisas nakrip anudok roguh w aiyas shagokanari nakri, <sup>11</sup> “Eik yakripen, nyak kitak hur nyakis aras nyusuwos aria nyunam urupat!” <sup>12</sup> Aria ahudok atuh eshudok ihishmorim arpesh douk shape agundok iri shatrunum nakitak nohur ananis aras nasuwos aria nanak. Aria eshesh shatrun namudok aria ihishmorim shakitak yowiyokuk aria shape shatuk Iruhin ananin nyeigur nyato iruhw. Aria shakri, “Seiwok apak madae mutik enen enyudokmori nyutogur uwe, uwok!”

*Jisas Nahwar Livai  
(Matyu 9:9-13; Luk 5:27-32)*

<sup>13</sup> Aria Jisas nakitak natanam narahaen nanak anagas um debeigi waiyag Galili aria sabaishi arpesh shanaki shatogru-man. Aria anan nape nenek skulumesh nakripesh yopinyi baraen. <sup>14</sup> Anan nakripesh baraen jurug aria anan nanaku aria natik Alfius ananin nuganin Livai douk apa narao takis iri. Jisas natrun nape urupat douk nape narao takis um.

Aria anan nakripan nakri, “Nyak yowi nyugipesh eik ba unak.” Aria Livai nikitak nanaman hanak.

<sup>15</sup> Aria kupaihi nyumnah Jisas nape nawok worigun Livai ananit urupat. Aria sabaimi harao takis iri hani sabaimi kupaimi shopunek henek eneshenesh yoweishi inahos iri hani Jisas nani ananim disaipel hape hawok worigun. Um maresh? Worobaimi amudokmori armam ihih nyumneh apa hagipesh Jisas. <sup>16</sup> Aria anam henek skulumesh um lo iri, amam douk Farisi omi. Amam hatik um Jisas nani shenek eneshenesh yoweishi inahos iri shani harao takis iri shape shawok worigun atugun um aria amam harig ananim disaipel hakri, “Anan nani eshudok shenek eneshenesh yoweishi inahos iri shawok worigun?” <sup>17</sup> Aria Jisas nemnekam namudok aria nakripam nakri, “Arpesh douk madae eneh arugeh henekesh iri ta mare shunam dokta um nugabeyesh, uwok. Eshudok douk arugeh henekesh iri atish ta shunak um dokta nugabeyesh. Aria eik shopunek douk namudok atin, kabi dokta um. Eik douk madae inakumori ihwar yopishi arpesh um shatanam shukon aparuh Iruhin uwe, uwok. Eik douk yanakmori ihwar eshudok douk shenek yoweishi inahos iri um shukeshuk agabus yoweishi inahos aria shatanam shukon aparuh Iruhin.”

*Jisas Nakripesh Um Agundok Shushakur Um Worigun Shape Meyoh Um  
(Matyu 9:14-17; Luk 5:33-39)*

<sup>18</sup> Anah nyumnah Jon douk nenek baptaisumesh iri ananim disaipel hani amam Farisi amamim disaipel hashakur um worigun aria hape henek beten atin. Douk namudok aria enesh arpesh shanak gani Jisas napeum aria sharigan shakri, “Jon ananim disaipel hani amam Farisi amamim hashakur um worigun aria hape henek beten atin. Aria nyakim madae henekesh namudok uwe, um maresh?”

<sup>19</sup> Aria Jisas nakripesh enen wobuwobren baraen nakri, “Ipak pakri abudok nyutob anudok douk kadak narao armatok iri wata nini ananishi nupe um, eshesh ta shushakur um worigun aria shupe meyoh aka? Adur atin ta uwok.

Eshesh ta shuwok worigun aria ta shupe!  
<sup>20</sup> Aria nyutob ta bunaki um kupaishi shuran shunak kupaigunum um. Aria ahudok nyumnah, ananishi ta urkwip purum anan aria ta shushakur um worigun shupe meyoh.”

<sup>21-22</sup> “Aria ta mare enen arpen nyukwuhwaesh anap rupahip um anah namuhi rupah aria nyutapeyop um anohw umunihw um anah jugwaihi rupah, uwok. Enyen nyibirak namudok akure, enyen ta nyunek anohw umunihw ahudok namuhi rupah. Aria shopunek ta nyutapeyop aria ta mare pupe wosik um ahudok jugwaihi rupah uwe, uwok. O ta mare enen arpen nyurak anabar namubari wainibar abar bubuh anap jugwaipi memeip munuhwip douk shape sharuk wainibar abar um uwe, uwok. Enyen nyunekesh namudok akure, abrudok namubari wainibar abar ta buprukeshop aria wain ta nutourakuk atap atin. Aria apudok memeip munuhwip ta yowep. Aria namudok uwok, eshesh ta shisharabar namusi munuhwis atus. Aria asas ta mare tutukaras aria wain ta nur wosik!”

*Jisas Anan Douk Debeini Aria Nakripesh Um Shenek Mour Sabat*  
 (Matyu 12:1-8; Luk 6:1-5)

<sup>23</sup> Anah nyumnah Sabat, eshesh Juda mour uwok shape meyoh ahi, Jisas nani ananim disaipel hakitak hawish hanak anag debeigi nubarig douk shau wit um. Aria agundok ananim disaipel hadi anat urubit wit aria hape haworishat hatoh.  
<sup>24</sup> Aria amam Farisi hatrum namudok aria hakrip Jisas hakri, “Tik, nyakim disaipel henekesh mumam namudok? Apakin lo douk nyakri apak mare munek enen mour ahudok nyumnah Sabat!”

<sup>25-26</sup> Aria Jisas nakripam nakri, “Ipak patarihen baraan seiwok Devit nenyemaguk iri um abudok nyutob anan nani ananim nyurub bam um aka, uwok? Amam nyurub bam aria Devit nawish Iruhin ananit debeiti urupat nohur bret douk shenek ofamat shako Iruhin iri aria nani ananim hatoh. Enyudok douk nyatogur abudok nyutob Abiatar nape debeini pris obi nyutob. Abiatar nakri

wosik aria Devit nani ananim armam hawish hohur bret hatoh. Aria shopunek, apakin lo douk nyakri mare enesh shape meyoh iri arpes shuwok atudok bret, uwok. Amam pris atum wosik. Aria Devit nani ananim hotuhur hatoh.”

<sup>27</sup> Aria Jisas wata shopunek nakrip amam Farisi nakri, “Iruhin douk madae nunek ahudok nyumnah Sabat um nukri ipak aparuh yoweruh aria mare panadudareh uwe, uwok. Anan nenekah um nakri ipak aparuh ta yopuruh aria panadudareh. <sup>28</sup> Aria Eik Anudok Arman douk yatogur adurinyi arpen iri douk Debeiwe um ihishmorim eneshenesh um abudok amnab, aria Debeiwe um ikrip arpes shunek mour ahudok nyumnah Sabat shopunek.”

### 3

*Jisas Nagabe Anan Rogur Yowenyan Iri Um Ahudok Nyumnah Sabat*  
 (Matyu 12:9-14; Luk 6:6-11)

<sup>1</sup> Kupaihi nyumnah Sabat, Jisas nanak nawish eshesh Juda shape sheneyagwreh baraan-ati urupat. Aria anan rogur yowenyan iri arman nanaki nawish nanamesh nape. <sup>2</sup> Aria arpes shape atudok urupat iri shakri shukon baugos um enen baraan Jisas shakri shutik anan ta nubrig enen lo aka, uwok. Douk namudok aria eshesh shape shatrun duk um shakri kadak anan nukri nugabe anudok rogur yowenyan iri ahudok nyumnah Sabat um, aria eshesh shuneman baraan. <sup>3</sup> Aria Jisas nakrip anudok rogur yowenyan iri nakri, “Kitaki nyeyotu agundok orokohun um sabaishi arpes shutrin.” <sup>4</sup> Aria anan nakitak nanak neyotu aria Jisas narigesh nakri, “Apakin lo douk Iruhin nakoguk Moses enyi nyakri munek maren mour ahudok nyumnah Sabat? Mugamoh arpes mugabeyesh aka, mukri uwok umesh? Mugamohesh shupe wosik aka, ba mesh shugok?”

Aria eshesh madae shiyagwreh shukripan enen baraan uwe. <sup>5</sup> Aria anan neyotu natrish aria nyibur juwehosibur. Um mares? Anan natrish um eshesh showeshik esheshiruh aparuh dodog aria shakri uwok um shumnek Iruhin

ananin baraen shugipeshen. Aria anan nakrip anudok rogur yowenyan iri nakri, “Kwanu nyakin rogur.” Aria anan nonu rogur aria enyen yopin abom. <sup>6</sup> Aria amam Farisi hakitak hatogur hanak hani anam Herot ananim armam hape habo baraen um hakri hurim anah yah um hubo Jisas nugok.

*Sabaishi Arpesh Shagipesh Jisas Shanak Shape Hurukatin Um Debeigi Waiyag Galili*  
(Luk 6:17-19)

<sup>7</sup> Aria Jisas nani ananim disaipel haku-tukuk abrudok wabur hakitak hanam debeigi waiyag Galili. Amam hanak aria sabaishi arpesh shagipesham shanak. <sup>8</sup> Eshudok arpesh enesh shanaki shokugi nahobig Galili iri. Aria enesh shanaki shokugi nahobig Judia iri. Aria enesh shanaki debeigi nahobig Idumia, aria enesh shanaki Jerusalem iri. Aria enesh shapeiri gani wobrehah um worub Jordan iri shanaki, aria enesh shape iri hurukatinyum arbudok biarub warub Taia bani Saidon iri shanaki. Eshesh ihishmorim shemnek um Jisas nape nagabe ehudok arugeh hapeyeshi aria eshesh shanaki um nugabeyesh. <sup>9</sup> Aria agundok sabaishi arpesh shanaki shape shuknigun. Douk namudok aria Jisas nakrip ananim disaipel um harauri anat shokwuti bot tunaki tukusuman hurukatin um kadak sabaishi arpesh shukri shunaki hurukatin um anan um aria anan ta nuto nutemaguk bot. Ta neyotu atap um, eshesh ta shishiwokan. <sup>10</sup> Um maresh, nubokuhieb nyutob anan nagabe sabaishi ehudok arugeh hapeyeshi. Douk namudok aria eshudok arugeh hapeyeshi shape shatatis um shunak shususuhw Jisas meyoh aria eshesh ta yopish. <sup>11</sup> Aria abudok nyutob douk yoweishi sagabehos shapenyesh iri shanaki shatik Jisas aria shabuh shatu shakus hurukatin um anan aria shohwar debeg shakri, “Nyak douk Iruhin ananin Nuganin.”

<sup>12</sup> Aria Jisas nakripesh dodogowinyi baraen nakri eshesh mare shukripesh um anan douk Iruhin ananin Nuganin.

*Jisas Nagraeh 12-poreim Aposel Um Hunak Hukrip Arpesh Um Ananin Baraen*  
(Matyu 10:1-4; Luk 6:12-16)

<sup>13</sup> Aria Jisas nato anag mihig aria nahwar sabaimi armam douk anan nakriyam iri hanaki. <sup>14</sup> Aria anan nagraeh 12-poreim armam aria nakom enyudok nyeigur aposel. Aria nakripam um huni anan hupe hurahaen aria neshopokam um hunak hukripesh ananin baraen sabaishi arpesh. <sup>15</sup> Aria shopunek um nukom dodog um huhiyahuk yoweishi sagabehos shutogur shuruwokuk.

<sup>16-17</sup> Amudok 12-poreim aposel Jisas nograeham iri douk amudok. Saimon, douk Jisas nodowon kupainyi nyeigur Pita iri, nani Sebedi ananim nugamim, Jems nani ananin wanin Jon, douk Jisas nodowon kupainyi nyeigur Boanerges iri. Baugenyum enyudok nyeigur douk shakri, “Utag Pogarog.” <sup>18</sup> Amam hani Andru, Filip, Bartolomyu, Matyu iri Tomas. Hani Alfius nunganin Jems iri Tadius iri Saimon douk natogur anap awirop shohwareh um Selot<sup>3:18</sup>iri. <sup>19</sup> Amam hani Judas Iskariot. Anan douk nowereh Jisas um ananim horim iri.

*Enesh Shenek Rohw Shakri Satan Douk Kupainyi Nyeigur Shohwaren Bielsebul Iri Nyataurum Jisas*  
(Matyu 12:24-32; Luk 11:14-23, 12:10)

<sup>20</sup> Aria Jisas natanam nanam urupat aria sabaishi arpesh shanaki shape anan napeum. Aria Jisas nani ananim disaipel hatrish namudok aria amam nyutob uwok um hupe meyoh ba hunek anagun worigun hugnoh uwe, uwok. <sup>21</sup> Aria ananishi, eshesh atop awirop shemnek um agundok anan madae nupe meyoh um nuwok worigun um, aria eshesh shanak um shuran shunak. Um maresh? Eshesh shakri anan douk nagagak.

<sup>22</sup> Anam henek skulumesh um lo iri douk hape iri Jerusalem hanaki henek rohw. Amam hakripesh hakri Jisas douk enyudok Bielsebul douk debeinyi um sabaishi sagabehos iri nyenekan



dodogowin aria anan douk nohiyahuk eshudok enesh sagabehos shatogur sharuwok. <sup>23</sup> Douk namudok aria Jisas nahwar sabaishi shanaki um anan aria nakripesh enyudok wobuwobren baraen nakri, “Satan anan kanak ta mare nuhiyahuk ananishi sagabehos shutogur shuruwok uwe, uwok. <sup>24</sup> Aria douk arpesh shape atug nahobig iri shunadiyogurum shunak shupe sisiguk, aria shunenem horin horik aria shupe shurpak akure, eshesh ta mare dodogowish uwe, uwok. <sup>25</sup> Aria shopunek douk anap awirop shunadiyogur um, aria eshesh kanak shunenem horin horik aria shupe shurpak atin shup akure, eshesh shopunek ta mare dodogowish uwe, uwok. <sup>26</sup> Aria douk Satan nini ananish shunadiyogur um shunak shupe sisiguk, aria eshesh kanak shunenem horim horik ba shupe shurpak atin shupe aria eshesh shopunek ta mare dodogowish uwe, uwok.”

<sup>27</sup> “Aria ta mare anan arman nunak nuwish anan dodogowinari arman ananit urupat aria nutrun nukwumeshi aruh ananish eneshenesh uwe, uwok. Sogomatin anan ta nuweshikuk anudok arman nupeik ba iyoh, aria anan ta kadak nunak nutrun ba nukwuaruh um eneshenesh.”

<sup>28-30</sup> Aria douk amam henek skulumesh um lo iri hakri enen sagab nyataurum Jisas um nenek mour um. Douk namudok aria Jisas nakripam nakri, “Adurigom atin eik yakripep, Iruhin ta ko nukweshihuk um eneshenesh yoweishi inahos arpesh shenekesh iri shuni enyudok ihinyumorim yoweinyi baraen douk eshesh shakriyen um anan iri, aria nukweshiheshuk. Aria enyudok enenyenen douk shububunim um Iruhin ananin Mishin iri, Iruhin ta nusuhw enyudok esheshin yoweinyi douk eshesh shakriyen iri aria ta mare nukweshiheshuk uwe, uwok. Esheshish yoweishi inahos ta shupe um douk arigaha kweipon amnab butuh ahi yumneh.”

*Jisas Ananik Amakek Kwani Ananim Aruhim*

*(Matyu 12:46-50; Luk 8:19-21)*

<sup>31</sup> Aria abudok nyutob Jisas ananik amakek kwani ananim aruhim shanak

shatogur. Aria shanak sheyotu aduk urupat aria shenek baraen nyanaman um nutograri aduk. <sup>32</sup> Aria agundok sabaishi arpesh shape sherssharih um anan aria eshesh shakripan shakri, “Nya, nyakik amakek kwani aruhim sharimen.”

<sup>33</sup> Aria Jisas nakripesh nakri, “Meishi eikish amakek aruhim?”

<sup>34</sup> Aria anan nushakam eshudok nernarih douk shape iri aria nakripesh nakri, “Eikish amakek aruhim douk eshudok! <sup>35</sup> Meishi douk shape shagipesh Iruhin ananin baraen iri douk Eikish aruhim, mohwuhiyu aria amakenyiyu.”

## 4

*Jisas Nakripesh Wobuwobren Baraen Um Anan Nawashak Wit Ananig Nubarig Iri*

*(Matyu 13:1-9; Luk 8:4-8)*

<sup>1-2</sup> Aria Jisas wata shopunek nanak nape nenek skulumesh nakripesh yopinyi baraen gani anagas um debeigi waiyag Galili. Aria sabaishi arpesh abom shanaki shape Jisas napeum. Douk namudok aria anan nakitak nato netem anat bot douk tor waiyag iri. Aria eshesh sheyotu anagas aria anan netemori bot nape nenek skulumesh nakripesh sabainyi yopinyi baraen nakripesh wobuwobren atin. <sup>3</sup> Nakri, “Ipak pumnek! Anan arman nawashak wit ananig nubarig. <sup>4</sup> Anan nawashat aria anat tabuh takus yah, aria armiguhw hwabuhi hwatuhur hwatoh. <sup>5</sup> Aria anat tabuh takus utabor um. Aria douk amnab madae sabaibi uwe aria atat pupuwarat takih arigas. <sup>6</sup> Aria nukwaruh madae hubuh atap uwe. Namudok aria araruh habuh hetemaguk utabor aria wah hatao hat aria yarit. <sup>7</sup> Aria anat tagrukuk segego-iruh madururuh hakih um aria pupuwarat takih. Douk takih, aria aruhudok madururuh heshigarut aria atat madae tukih debet um shurkwip pir uwe. <sup>8</sup> Aria anat tagrukuk yopubi amnab aria pupuwarat takih debet aria sabaiti teir. Anat, 30-poreit teir atin atin apakiwogin. Aria anat 60-poreit, aria anat 100-poreit.”

<sup>9</sup> Douk Jisas nakriyuk namudok aria anan nakripesh nakri, “Aria douk ipak

arigos sapenyep iri aria gamo pumnek eikin baraen aria pugipeshen.”

*Jisas Nakripesh Baugen Um Baraen Um Agundok Douk anan Nakripesh Wobuwobren Atin Um*

*(Matyu 13:10-17; Luk 8:9-10)*

<sup>10</sup> Douk sabaishi arpeshe shakutunukuk shanak, aria Jisas atun nani ananim 12-poreim disaipel hani eshudok enesh shagipesh Jisas iri atish shape. Aria eshesh sharigan um nukripesh um baugenyum um enyudok wobuwobren baraen anan nape nakripesh-enyi. <sup>11</sup> Aria anan nakripesh nakri, “Iruhin douk nakripep baugenyum um baraen um enyudok wobuwobren baraen um ipak atip um ta puwish agundok Iruhin nape Debeini um ananish arpeshe um. Aria ihishmorim adukishi ta uwok. Eshesh ta shumnek wobuwobren atin. <sup>12</sup> Douk namudok aria, ‘Eshesh ta shutrugun aria ta mare shutik enesh eshudok eneshenesh. Aria shopunek ta shumnek baraen, aria ta mare shudukem baugenyum um, uwok. Um maresh, ta shudukem baugenyum um aria wata shutanam shukon aparuh Iruhin aria anan madae nunawasham um esheshish yoweishi inahos aria nukwreyeshuk.’”

*Jisas Nakripesh Baugen Um Baraen Um Anudok Nawashak Wit Nubarig Iri*

*(Matyu 13:18-23; Luk 8:11-15)*

<sup>13</sup> Aria Jisas narigesh nakri, “Ipak madae pudukem baugenyum enyudok wobuwobren baraen iganigadae yakripepen iri uwe? Douk namudok aria ipak ta pudukem ihinyumorim wobuwobren baraen douk ta eik ikripepen iri mumam? <sup>14</sup> Anudok arman nawashak wit iri douk kabi anan nakripesh Iruhin ananin yopinyi baraen iri. <sup>15</sup> Aria atudok douk tabuh takus yah iri douk kabi eshudok arpeshe douk shemnek Iruhin ananin baraen aria Satan nanaki natrish narauguk enyudok yopinyi baraen douk nyape esheshiruh aparuh iri. <sup>16</sup> Aria atudok douk tabuh takus utabor bakus um iri douk kabi eshudok arpeshe douk shemnek Iruhin ananin baraen atin aria shanadudareh-umen abom shasuhwen shakri wosik iri. <sup>17</sup> Aria eshesh sharaen

aria eshesh madae shusuhwen dodog uwe. Eshesh shasuhwen shagipeshen banab nyutob meyoh. Aria douk arigaha enen amaen nyatogramesh o shenekesh enenyenen um agundok shasuhw enyudok Iruhin ananin baraen um, aria arigas atin shakutukuk esheshin bilip. <sup>18-19</sup> Aria atudok douk tabuh tagrukuk segegoiruh madururuh hakih um, douk kabi eshudok arpeshe douk shemnek Iruhin ananin baraen, aria eshesh shenek wari um shakri shupe wosik agundok atap iri. Eshesh mishish shakitak um shugrem sabaishi eneshenesh eshudok aria shanadudareh um agundok atapishi eneshenesh atish. Douk namudok aria eshudok eneshenesh showeshik esheship urkwip aria eshesh madae shusuhw Iruhin ananin baraen dodog uwe. Eshesh urkwip pekeshek abom um enyudok Iruhin ananin yopinyi baraen eshesh shemneken iri. Aria eshesh shakwutinyukuk aria madae shunek ehudok yopihi aih douk Iruhin nakri eshesh shunekeh iri uwe. <sup>20</sup> Aria atudok douk tabuh takusuk yopubi amnab iri douk kabi eshudok arpeshe douk shemnek Iruhin ananin baraen aria shasuhwen dodog shagipeshen iri. Aria eshesh shenek sabaihi yopihi aih. Aria eshesh shape kabi douk apakiwogin witin um. Anat, 30-poreit teir atin atin, anat 60-poreit, aria anat 100-poreit.”

*Jisas Nakripesh Wobuwobren Baraen Um Lam Douk Shahemen Shashapumen Anat Baket Iri*

*(Luk 8:16-18)*

<sup>21</sup> Aria Jisas wata shopunek nakripesh nakri, “Ta mare enen arpen nyihem enen lam aria nyukitak nyushapamen anat baket o nyunyigren shakamum anat bet, uwok. Enyen ta nyihemen aria nyunyem iruhinyum tebol um enyen ta nyutrugun-umesh. <sup>22</sup> Aria eneshenesh douk shanabeshuk shakus iri ta wata shutogur yopugunum. Aria eneshenesh douk arpeshe shoshigarish shakus iri ta wata shishrekesh shukus yopugunum. <sup>23</sup> Aria douk ipak arigos sapenyepi aria pumnek eikin baraen aria pusuwen dodog pugipeshen.”

<sup>24</sup> Aria anan nakripesh enen baraen shopunek nakri, “Ipak urkwip gamo purum enyudok baraen douk ipak pameneken iri aria pugipeshen! Um maresh? Ta ipak gamo pumneken pugipeshen um, Iruhin ta nutaurumep pudukem enen yopinyi baraen shopunek. <sup>25</sup> Aria eshudok douk shurao Iruhin ananin baraen shudukemesh wosik iri, Iruhin ta wata gamo nukripesh enen shopunek. Aria eshudok douk madae shudukem ananin baraen iri uwe, enyudok karowinyi eshesh shasuhwen iri ta wata nutrishenyuguk.”

*Jisas Nakripesh Wobuwobren Baraen Um Anan Nawashak Shurkwip Patogur Um*

<sup>26</sup> Aria Jisas nakripesh enyudok baraen shopunek nakri, “Arpesh shawish um agundok Iruhin nape Debeini um ananish arpesh shapeum ta kabi enyudok wobuwobren baraen um. Baraen enyudok. Anan arman nanak nawashak shurukwip-igun worigun ananig nubarig. <sup>27</sup> Anan nawashep jurug aria nanak. Aria ihibus weibus anan neshuh, aria nyumneh nakitak narahaen. Aria abudok nyutob epudok shurkwip pape pupuwarep pakih. Aria anan douk madae nudukemesh um agundok epep pupuwarep pakih um uwe. <sup>28</sup> Abab amnab kanak benekep pupuwarep pakih debeipi aria shurkwip peir. Aria sagomatin pupuwarep pakih aria parik penek shus, aria pakih rowipi penek urub aria sabaipi shurkwip peir. <sup>29</sup> Douk peir arigaha pauh, aria anudok arman nasuhw ananip ponodaresh iri nogwotep nanak natupok epudok shurkwip. Um maresh? Epep douk pauh aria abudok nyutob um shurim worigun obi nyutob douk batogur.”

*Jisas Nakripesh Wobuwobren Baraen Um Enen Rowog Nyeigurin Um Mastet Iri Eryenyim Shurkum*

*(Matyu 13:31-32; Luk 13:18-19)*

<sup>30</sup> Aria Jisas nakripesh nakri, “Arpesh shawish um agundok Iruhin nape Debeini um ananish arpesh um ta kabi maresh um? Eik ta ikripep maren

wobuwobren baraen um pudukemesh?

<sup>31</sup> Agundok Iruhin nape Debeini um ananish arpesh um ta kabi anam shokumi mastetim shurkum um. Amam douk shokumi abom meshagrakuk sabaipi shuruwep arpesh douk shawep nubarigos iri. <sup>32</sup> Anan arman nau anam mastetim shurkum ananig nubarig. Aria amam puwarom makih munek debeinyi rowog nyeshagrakuk kupaigosi shokugosi rowos seyotu nubarig iri aria nyenek debeishi nyeiguhw. Aria armiguhw hwanak hwem was aria hwetem hwanabeshuk um wah.”

*Jisas Nakripesh Baraen Aria Nakripeshen Wobuwobren Atin*  
*(Matyu 13:34-35)*

<sup>33</sup> Aria Jisas nape nakripesh ananin yopinyi baraen aria nakripesh sabainyi wobuwobren baraen kabi douk iganigadae nakripeshen iri. Anan nakripesh sabainyi wobuwobren baraen douk ta wosik shudukemesh um esheshin saki iri. <sup>34</sup> Aria ihinyumorim baraen anan nakripeshen iri, anan nakripesh wobuwobren atin. Aria abudok nyutob anan atun nani ananim disaipel atum hapeum, anan nape nakripam baugenyum ihinyumorim baraen.

*Jisas Naho Debeinyi Uhwin Aria Nyagok Nyabuh*  
*(Matyu 8:23-27; Luk 8:22-25)*

<sup>35</sup> Douk wabigun ahudok atuh nyumnah, Jisas nakrip ananim disaipel nakri, “Yaipo, apak munak gani wobrehahig um waiyag.” <sup>36</sup> Aria amam hakutukuk eshudok sabaishi armam armago shapeik, aria amam hato atudok bot douk Jisas iganigadae narik nakih netemoti aria haran nanamam hanak. Aria anog botog shopunek gwagipesh amamit bot gwanak. <sup>37</sup> Aria douk amam hanak aria debeinyi uhwin abom nyahur aria nyenek debeibi morub bakitak. Aria abar bakih baprok bot aria atat hurukatin um shuknitum abar. <sup>38</sup> Aria abudok nyutob Jisas nanak nanahem korukwu aria neshuh gani tagigukum bot. Aria douk ananim disaipel hatik namudok aria hanak henyubarun hakri, “Debeini Tisa, apak hurukatin um mugok wo. Nyak

madae urkum murum agundok douk ta apak mugok um uwe?”

<sup>39</sup> Douk amam hakripan namudok aria nakitak naho enyudok uhwin iri morub nakri, “Ipak punak putuhuk abom!”

Aria eshesh shanak shatuhuk abom. Uhwin madae nyahur uwe aria morub shopunek madae bukitak uwe. <sup>40</sup> Aria Jisas natanam nakripam nakri, “Ipak panogugur um maresh? Ipak madae punek bilip uwe um maresh?” <sup>41</sup> Aria amam hanogugur abom aria amam kanak hanakripam hakri, “Anudok manan arman? Uhwin iri abar shopunek douk shemnekan.”

## 5

### *Jisas Nahiyahuk Enen Yoweinyi Sagab Douk Nyape Anan Nagugak Iri Arman (Matyu 8:28-34; Luk 8:26-39)*

<sup>1</sup> Douk uhwin aria eshah shanak shatuhuk, aria Jisas nani ananim disaipel hanak. Amam hanak arigaha hatogur eshesh Gerasa eshesh-mokum um, gani wobrehahig um debeigi waiyag Galili. <sup>2-3</sup> Aria douk Jisas nanatu nabuhi bot atin, aria anan arman urupat wokanari nanaki natogruman. Anan douk nape neshuh wonugwe-gwiruh hapeum nanaki. Anan douk enen yoweinyi sagab nyapenyan aria nanak nape neshuh gani wonugwe-gwiruh um. Aria anan douk madae anan arman dodogowin um nusuwan nuweshikan uwe, uwok. Senab shopunek douk madae dodogowib uwe. Anudok nagugak iri douk dodogowin atun abom aria naprukeshab. <sup>4</sup> Aria sabaihi nyumneh eshesh shasuan shakwu senab showeshik ananish roguhw aiyas aria anan naprukeshab. Anan douk dodogowin atun abom aria arman madae anan dodogowin um nusuwan nuweshikan um nupe wosik uwe. <sup>5</sup> Aria ihih, nyumneh weibus, anan napeum narahaen atin. Anan nanak nape wonugwe-gwiruh um, aria nawish nanak yodururuh um. Aria agundok anan napeum nahwar atin nape. Aria shopunek anan nasuhw eresibori utabor kabi douk nugugwes um aria nape natah ananihw yegenyihw.

<sup>6</sup> Aria anan douk nakutukuk wonugwe-gwiruh hapeum aria wata nape nanaki rougun, aria anan natigi Jisas. Aria anan nanogugur aria nahur nanaki nabuh noduk ohrubus hurukatinyum Jisas. <sup>7</sup> Aria nahwar debeg nakri, “Jisas, Debeini Iruhin abom ananin Nuganin! Nyak nyakri nyuneke mumam eik? Nyak nyukri adurin baraen um gani iruhw um nyak mare nye nyuneke imnek debeiri eriger!” <sup>8</sup> Anan nakri namudok um maresh, Jisas nakrip enyudok yoweinyi sagab douk nyapenyan iri nakri, “Yoweinyi sagab, nyak nyukutukuk anudok arman aria nyutogur nyunak!” <sup>9</sup> Aria Jisas narig anudok nagugak iri nakri, “Nyak nyanahwar mumam?” Aria anan nakri, “Apak sabaipari yoweishi sagabehos mawish mapenyan. Douk namudok aria apak manahwar sagabehos!” <sup>10</sup> Aria anan nape nahwaran debeg Jisas um nakri Jisas mare nishopok eshudok sagabehos shunak rougun. <sup>11</sup> Aria agundok hurukatin, sabaiguhwi burguhw hweyatu hwape hwawok worigun gani wobrehah um anag shokugi mihig. <sup>12</sup> Douk namudok aria eshudok yoweishi sagabehos shakrip Jisas shakri, “Nyak nyishopokap munak muwish gwaguhwi burguhw.” <sup>13</sup> Aria Jisas nakri wosik aria eshesh shakutukuk anudok arman shatograri shanak shawish ogwuhwudok burguhw. Aria ogwuhwudok sabaiguhwi burguhw douk shadarehoguh hwatogur 2,000-poreiguh iri hwahur hwanak hwagrukuk enen natogur. Aria ogwoguh hwabuh hwagrukuk anag waiyag aria ihiguhmorim hwabarahukuk aria hwagok hwatuh. <sup>14</sup> Aria amudok armam douk hape hako ogwuhwudok burguhw iri hatik namudok aria hakitak haruwok. Amam hanak aria hakrip eshudok arpesh douk shape warub iri shani eshudok douk shape hurukatinyum nahobigos iri um enyudok mugu douk nyatogur iri. Aria eshesh shakitak shanak um shakri shutrun. <sup>15</sup> Aria eshesh shanak agundok Jisas napeum aria shatik anudok arman riguk sagabehos shapenyani. Douk anan madae nugugak uwe. Anan wata narao yopumi urkum aria nakitak

nananek rupeh aria nape. Aria douk eshesh shatrun namudok aria eshesh shanogugur abom. <sup>16</sup> Aria shopunek, eshesh shanak shatogurum eshudok arpeshe douk shape shatik enyudok Jisas neneken iri aria shakripesh um agundok sagabehos shakutukuk anudok arman shatograri shanak shawish burguhw aria shaguhw hwagok um.

<sup>17</sup> Douk namudok aria eshesh shape sheshopok Jisas um nukutukuk eshesh um nunak um kupaigunum.

<sup>18</sup> Aria douk eshesh shakripan namudok aria Jisas nato bot um nakri nunak aria anudok arman douk riguk sagabehos shapenyani narigan nakri, “Jisas, eik yakri inamen unak!” <sup>19</sup> Aria Jisas nakripan nakri, “Uwok, nyak wata nyutanam nyunak um nyakibur wabur aria nyukrip nyakish, ipak atop awirop um agundok Debeini nakri gihaum nyak um. Aria shopunek nyukripesh um enenyenen anan neneken um nyak iri.”

<sup>20</sup> Aria douk Jisas nakripan namudok aria anan nanak nawish agudok shokugi nahobig douk 10-poreirub warub bape um aria nakripesh um agundok Jisas nagabeyan um. Aria eshesh shakitak yowiyokuk abom.

*Jisas Nohur Jairus Ananik Nugawik Douk Kwagok Iri Kwakitak Kwape, Aria Nagabe Onok Kwasusuhw Ananiruh Rupeh Iri*

*(Matyu 9:18-26; Luk 8:40-56)*

<sup>21</sup> Douk Jisas nani ananim harao bot hatanam hanak hatogur gani wobrehahig um waiyag, aria habuh heyotu anagas. Douk amam heyotu aria sabaishi arpeshe shanaki shatrum. <sup>22</sup> Aria Jairus, douk debeini um eshesh Juda shape shenyagwreh baraen-atari urupat iri shopunek nanaki. Anan nanaki natik Jisas aria nanak nabuh nakus atop hurukatinyum Jisas ananiruh yeriweruh. <sup>23</sup> Aria neyagwreh debeg nakri, “Nya, eikik shokukwi nugawik arugeh hapeyok aria okwok hurukatinyum kugok. Douk namudok aria yakri nyak nyunaku nyuwemok wis meyoh um okwok wata yopuk aria kwukitak kwupe.”

<sup>24</sup> Douk Jairus nakripan namudok aria Jisas nanaman hanak. Douk amam hanak aria sabaishi arpeshe shopunek shanam shanak. Eshesh shanak wobuwobur aria Jisas naraguk orokohun. Aria shopunek agundok yah eshesh shanak um, eshesh shantoruh um shanak. <sup>25</sup> Aria onok armatok douk owishibor banakok kwape 12-poreish kwarahos iri shopunek kwanamesh shanak. <sup>26</sup> Okwok sabaimi dokta habirak um hakri hugabeyok aria habirak hatik uwok. Okwok kwomnek debeiri eriger um amam dokta hakri hugabeyok um. Aria shopunek, okwokwibor utabor douk kwashabor batuhmaguk um kwator dokta omi um hugabeyok um. Aria okwok madae yopuk uwe. Owishibor banakok bape namudok aria beshagrakuk riguk barik banakok um. <sup>27</sup> Aria douk okwok kwomnek um agundok Jisas nagabe sabaishi ehudok arugeh henekesh um, aria okwok kwani eshudok sabaishi arpeshe shanaki. Aria okwok kwanaki agabehah-inum Jisas aria kwasuhw ananiruh rupah. <sup>28</sup> Umum maresh, okwok kwaneyagwreh kwakri, “Douk eik isusuhw ananiruh rupeh meyoh um, anan ta wata nugabeye.”

<sup>29</sup> Douk namudok aria okwok kwanak kwasuhw ananiruh rupah aria ahudok atuh owishibor tukaruboruk. Aria shopunek, okwok kwomnek um numun okwokwihw yegenyihw owishibor madae anabor bunaki uwe. Aria okwok kwadukemesh um okwok douk yopuk.

<sup>30</sup> Aria ahudok atuh Jisas nadukemesh um enen ananiruh dodog nyakutukuk anan nyatogur nyanak. Aria anan narigesh nakri, “Douk omi nyanaki nyasusuhw eikih rupeh?” <sup>31</sup> Aria ananim disaipel hakripan hakri, “Nyak nyatrish, sabaishi sheyotu shersharir um nyak aria nyak wata nyarigesh um?”

<sup>32</sup> Aria Jisas neyotu natrish um nakri nutik enyudok arpen douk nyasusuhw ananiruh rupeh iri. <sup>33</sup> Aria okwodok armatok kwadukemesh um agundok Jisas nagabeyok um. Aria okwok kwanogugur abom, aria krukruk kwanak kwabuh kwakus hurukatinyum Jisas ananiruh yeriweruh, aria kwape kwakripan um agundok anan nagabeyok um. <sup>34</sup> Aria

anan nakripok nakri, “Nugawik, nyak nyenek bilip nyakri eik dodogoiwe iri aria nyak douk yopin. Aria douk nyakih arugeh douk hatuh abom. Aria nyak nyunak aria nyakihw apahw hwurumen wosik.”

<sup>35</sup> Aria douk Jisas wata nape neyagwreh atin, aria amam hapei Jairus douk debeini um eshesh Juda shape sheneyagwreh baraen-atari urupat iri um ananit urupat aria harauri baraen hanaki hakrip Jairus hakri, “Nyakik nugawik adur kwagok. Namudok aria nyak mare nyukon amaen apakin debeini tisa um nunaku nyakit urupat um.”

<sup>36</sup> Aria Jisas madae numnek amamin baraen uwe, uwok. Aria anan nakrip Jairus nakri, “Nyak mare nyunogugur. Nyak nyunek bilip atin.”

<sup>37</sup> Aria anan nakri uwok um ihishmorim arpeshe shapeik aria Jems nani ananin wanin Jon iri Pita amam hanaman hanak. <sup>38</sup> Amam hanak hatogur Jairus ananit urupat aria Jisas nemnek um eshesh shape shoreh shanaruwor debeg. <sup>39</sup> Aria anan nanak nawish aria narigesh nakri, “Ipak pape peyagwreh pariguk um maresh? Okwudok madae kwugok uwe. Okwok douk kweshuhw meyoh!”

<sup>40</sup> Douk anan nakripesh namudok aria eshesh shape shenekan enenyenen aria shape shagukoruhan.

Aria anan neshopok ihishmorim shak-itak shatograkuk aria anan nani ananim biom atun disaipel hani okwokwin yaken amakek atish shawish numun urupat okwok kwakus um. <sup>41</sup> Eshesh shawish aria Jisas nasuhw okwokwin rogur aria nakripok esheshin baraen nakri, “Talita kum!” Talita kum douk shakri, “Shokukwi armatok, kitak!”

<sup>42</sup> Aria ahudok atuh okwok adur kwakitak kwape kwarahaen. Okwudok nugawik okwokwish kwarahos douk 12-poreish. Aria douk eshesh shatrak namudok aria shakitak yowiyokuk abom!

<sup>43</sup> Aria Jisas nakripesh dodogowinyi baraen um eshesh mare shunak shukrip enesh arpeshe um agundok anan nakwuhur kwakitak kwape um. Aria

anan nakripesh shukok anagun worigun um kwishoh iri.

## 6

*Arpesh Shape Nasaret Iri Shakon Agabus Jisas*

*(Matyu 13:53-58; Luk 4:16-30)*

<sup>1</sup> Aria Jisas wata nakutukuk abrudok wabur nakitak natanam nanak um ananibur wabur. Aria ananim disaipel shopunek hanaman hanak. <sup>2</sup> Aria ahudok nyumnah Sabat eshesh Juda mour uwok shape meyohahi iri, Jisas nanak nawish eshesh Juda shape sheneyagwreh baraen-atari urupat aria nape nenek skulumesh nakripesh yopinyi baraen. Aria sabaishi arpeshe shape shemnek ananin baraen iri shemnekan aria shak-itak yowiyokuk abom shakri, “Enyudok baraen nanak naraenyi meiguni? Omi nyutauruman aria anan douk nadukem enyudokmori yopinyi baraen? Aria shopunek, omi nyutauruman nyenekan dodogowin aria nape nenek enyudok Iruhin atun neneken iri mour? <sup>3</sup> Anan douk nenek mour um narak urusag iri. Aria anan douk Maria okwokwin nunganin. Aria ananiyu mohwiyariyu wani ananim warhim Jems iri Josis, hani Judas iri Saimon douk eshudok shani apak mape agundok.” Eshesh shakri namudok aria shakonuguk agabus.

<sup>4</sup> Aria Jisas nakripesh nakri, “Anan profet ta nunak ihirubmorim warub aria ta shutuk ananin nyeigur nyuto iruhw. Aria ihishmorim shape ananibur wabur iri, shuni ananishi eshesh atup awirop um shuni eshesh anabur wabur ta uwok.” <sup>5</sup> Douk namudok aria Jisas madae nunek enen Iruhin atun neneken iri mour ananibur wabur uwe, uwok. Aria anan nawemesh wis karowish arugeh henekeshi aria nagabeyesh yopish. <sup>6</sup> Aria shopunek, Jisas natik um agundok eshesh madae shunek bilip um uwe aria anan nakitak yowiyokuk abom.

*Jisas Neshopok Ananim 12-poreim Disaipel Um Hunak Hukripesh Iruhin Ananin Baraen*

*(Matyu 10:5-15; Luk 9:1-6)*

Aria Jisas nanak anarub warub douk bape hurukatinyum ananibur wabur iri aria nape nenek skulumesh nakripesh yopinyi baraan. <sup>7</sup> Aria anan nahwar ananim 12-poreim disaipel hanaki heyotu atugun, aria nakom gobi um huhiyahuk yoweishi sagabehos. <sup>8</sup> Aria nakripam nakri, “Aria ta punak ahudok yah um, ipak mare punasuhw anagun worigun nini esharuh. Aria mare punaruk anabor utabor, uwok. Ipak punak meyoh, punasuhw butip atip um punakusim um. <sup>9</sup> Aria ipak punare sandelahos, aria mare punasuhw anah rupah, uwok. <sup>10</sup> Aria ta punak putogur anabur wabur aria abrudok waburish arpesh shukri wosik um shukep anat urupat um pishuh um, ipak punak pupe atudok atut urupat. Ipak pupe arigaha meihi nyumnah pakri pukutukuk aburdok wabur punak ahi, aria ipak kadak pukutuburuk punak. <sup>11</sup> Aria ta punak anabur wabur, aria arpesh shape aburdok wabur iri mare shunadudareh-umep, aria mare shumnek ipakin baraan um, ipak pukutukuk abrudok wabur aria pugudupeshuk nyupruk ipakiruh yeriwuruh kwukusuk aria punak. Ipak punekesh namudok um eshesh shutrip aria ta shudukemesh shukri eshesh douk shenek yoweishi inahos.”

<sup>12</sup> Aria amam hanak biom biom hanak hakripesh Iruhin ananin yopinyi baraan hakri, “Ipak pukeshuk agabus yoweishi inahos aria putanam pukon aparuh Iruhin.” <sup>13</sup> Amam hakripesh Iruhin ananin baraan aria hahiyahuk sabaishi yoweishi sagabehos shopunek douk shape arpesh iri shatogur sharuwok. Aria howayakumesh yopuri wel sabaishi arugeh hapeyesh iri aria hagabeyesh.

*Herot Nakri Um Jisas Douk Jon Nenek Baptaismesh Iri*  
(Matyu 14:1-12; Luk 3:19-20, 9:7-9)

<sup>14</sup> Aria abudok nyutob, King Herot douk nape debeini um gavman iri nemnek baraan um enenyenen douk nyape nyatograri. Um maresh? Jisas ananin nyeigur douk nyarahaen sabairubi warub. Aria enesh shakri, “Jon douk nenek baptaismesh iri wata nakitaki

nape. Aria anan douk dodogowin aria nape nenek enyudokmori mour.”

<sup>15</sup> Aria enesh shakri, “Anan douk profet Ilaija.”

Aria enesh shakri, “Anan douk anan profet kabi douk seiwokimi profet um.”

<sup>16</sup> Douk namudok aria anudok debeini um gavman iri Herot nemnek baraan um enyudok mour Jisas ananim disaipel heneken iri aria nakri, “Jon douk nenek baptaismesh iri douk seiwok yatupok ananin aruhwigur! Aria douk anan wata nakitak nape aria nape nenek enyudok mour!”

<sup>17-18</sup> Herot nakri namudok um maresh, seiwok anan nanatrun armatok ananin wanin Filip aria Jon nape nakrip Herot sabaish atih nakri, “Nyak nyabrig Iruhin ananin lo um nyanatrun armatok Herodias nyakin wanin!” Jon nape nakripan namudok aria Herot neshopok ananim soldia hasuwan haran hanak howeshikan. <sup>19</sup> Aria Herodias okwokwih apahw juwehosihw abom um kwakri kwubo Jon nugok aria okwok kwabirak kwatik uwok. <sup>20</sup> Um maresh, Herot nanogugur um Jon aria nape natauruman. Anan nadukemesh um Jon douk yopuyopuni aria ananin apahw douk yopuhw aria hwanawasham Iruhin. Aria shopunek Herot nakri wosik um numnek Jon ananin baraan aria anan urkum morum sabaishi eshudok eneshenesh aria anan nenek wari abom.

<sup>21</sup> Douk arigaha aria Herodias kwaparug anah yah um kwubo Jon nugok um. Aria douk Jon wata nonoweshik nape, aria ahudok nyumnah douk amakek kwabuki Herot ahi iri hatogur. Aria Herot nenek debeiguni worigun um urkum murum ahudok nyumnah amakek kwanabuki um. Anan nenek worigun aria nahwar debeimi douk hatauruman henek gavmanin mour iri, hani amam debeimi um ami iri, hani ihm-morim debeimi um shokugi nahobig Galili iri um hunak huni anan huwok worigun.

<sup>22</sup> Douk amam hape hawok worigun aria Herodias nugawik kwanaki kwawish kwenek danis. Aria Herot nani amudok douk nahwaram hanaki hani anan hawok

worigun iri hatruk aria hanadudareh um okwok abom.

Aria Herot narigok nakri, “Nyak nyakri eik iken maresh? Eshudok nyak nyukriyesh iri, eik ta ikenyesh.”<sup>23</sup> Aria Herot nakri um iruhw nakripok nakri, “Eik yakripen adurin atin baraen um eik ta iken ihishmorim eshudok nyak nyorigeimesh iri. Aria nyukri isiyamohw eikib amnab buni ihishmorim eikih jah huni utabor, aria iken enesh nyak, aria ohwak unasuwesh shopunek atin um, eik ta ikenyesh!”

<sup>24</sup> Douk anan nakripok namudok aria okwok kwanak kwarig okwokwik amakek kwakri, “Eik ta ikripan um nuke maresh?”

Aria amakek kwakripok kwakri, “Nyukripan nuken Jon douk nenek baptaisumesh iri um ananig barag.”

<sup>25</sup> Aria okwok kwanak arigas kwahur kwanak kwawish aria kwakrip Herot kwakri, “Eik yakri douk atin, nyureme Jon douk nenek baptaisumesh iri ananig barag onohw yaurehw aria nyukeyog!”

<sup>26</sup> Douk okwok kwakripan namudok aria anan nenek wari um Jon. Aria anan ta mare wata nukri uwok. Um maresh? Iganigadae anan nakripok um anan ta nukok ihishmorim eshudok eneshenesh okwok ta kworiganumesh iri. Aria shopunek, amudok douk nahwaram hanaki hani anan hawok worigun iri douk hemnek.<sup>27</sup> Douk namudok aria arigas anan neshopok anan soldia aria nakripan nakri, “Nyak nyunak shunuweshikati urupat nyutupok Jon ananin aruhwigur aria nyiraouri ananig barag.”

Aria anudok soldia nemnek namudok aria nanak natupok Jon ananin aruhwigur.<sup>28</sup> Anan natupenyuk aria nereiri barag onohw yaurehw aria nanaki nako Herodias okwokwik nugawik aria okwok wata kwanak kwako amakek.<sup>29</sup> Aria Jon ananim disaipel hemnek namudok aria hanaki hohur tukwanin atun hanak haruman.

*Jisas Nekesh Worigun Sabaishi Arpesh Abom Armam Atum Douk 5,000-poreim (Matyu 14:13-21; Luk 9:10-17; Jon 6:1-13)*

<sup>30</sup> Douk amam aposel wata hatanamori hani Jisas hape aria hakripan um enyudok mour amam heneken iri nyani baraen amam hakriפש-enyi.<sup>31</sup> Aria agundok sabaishi arpesh sharahaen shenek yawi kare aria Jisas nani ananim madae anob nyutob hupe um hurao uhwin aria huwok worigun um uwe. Douk namudok aria Jisas nakripam nakri, “Yaipo! Kitak apak atup munak anagun wehigunum arpesh uwok um aria munak mupe murao uhwin.”

<sup>32</sup> Aria amam hakitak hato bot aria amam atum hanak anagun wehigun um arpesh uwok um.<sup>33</sup> Aria sabaishi arpesh shatrum hanakum aria eshesh shadukemam. Douk namudok aria arpesh shape ihirub warub iri shakitak shakutukuk esheshirub warub aria shahur sharik shanak shatogur sheyotu agundok douk ta Jisas nini ananim hunak hubuh um. Aria amam douk haviguk hanak hatogur.

<sup>34</sup> Douk hanak hatogur anagas aria amam hetem bot iri hanatu habuh atap, aria hatik eshudok sabaishi armam armago aria Jisas nenek gihaumesh abom. Um maresh, arman madae anan uwe um nuraumesh nukriפש baraen iri. Eshesh shape kabi douk sipsip arman madae anan uwe um niyohesh iri uwe. Douk namudok aria anan nape nenek skulumesh abom nakriפש sabainyi Iruhin ananin baraen.<sup>35</sup> Douk nenek skulumesh arigaha wabigep aun nabuh, aria ananim disaipel hanaki hakripan hakri, “Nya, aun nabuh aria shopunek, agundok apak douk mapeik wehigunum arpesh wakagun um.<sup>36</sup> Douk namudok aria nyak nyishopokesh shunak anarub warub bape hurukatin iri um shunak shunator anagun worigun.”

<sup>37</sup> Aria Jisas nakripam nakri, “Ipak kanak pukesh anagun worigun.”

Aria amam wata harigan hakri, “Nyak nyakri apak munak mutor bret douk ta wosik muturut um 200 kina iri aria munaki mubiromesh aka?”<sup>38</sup> Aria anan narigam nakri, “Ipak pudareh bret ipak pasuhwot iri. Ipak pasuhwi makwunit? Kare putik”

Aria amam hadarehat jurug aria hanaki hakripan hakri, “Apak masuhwi



5-poreit bret tani bias arbus meyoH.”

<sup>39</sup> Aria Jisas nakrip ananim disaipel um hukrip ihishmorim armam armago shunosiaum um karowish atish aria shunak shupe yopuruhi utoruh hatogrum.

<sup>40</sup> Aria amam hakripesh shanasiam um. Aria 50-poreish shanak shape sik, aria 100-poreish shape sik, aria eshesh shape namudok atin shanak. <sup>41</sup> Eshesh shape aria Jisas nohur atudok 5-poreit bret tani asudok biyos arbus nasuwesh nanig natik iruhw heven aria nenek beten nenek tenkyu um Iruhin. Anan nenek tenkyuman jurug, aria nawor atudok bret tani arbus nako ananim disaipel aria hape hasiyaesh hanak. <sup>42</sup> Aria amam hasiyaesh aria ihishmorim shashoh aria dugaresh. <sup>43</sup> Aria atudok bret tani eiguhw douk shashoh dugaresh shakusuk iri, amam disaipel hatrishesh heshuruk 12-poreruh sararuh shishukniruh aria heshubuk shakus. <sup>44</sup> Aria eshudok arpeshe douk shawok agundok worigun iri, armam atum douk sabaimi um 5,000-poreim.

*Jisas Narahaen Netem Nanak Iruhw Um Waiyag Galili*  
(Matyu 14:22-23; Jon 6:16-21)

<sup>45</sup> Douk enyudok nyanakuk, aria Jisas neshopok ananim disaipel hanak arigas hato bot aria harik hanakum wabur Betsaida douk bape gani wobrehahig um waiyag iri. Aria anan napeik um arigaha neshopok eshudok armam armago shanakuk aria anan douk nagimam nanak. <sup>46</sup> Anan neshopokesh shanak shatuh, aria anan nato onohw yoduhw um nukih nunek beten.

<sup>47</sup> Aria wab amam disaipel hetem bot hanak hatogur orokohunig um waiyag. Aria abudok nyutob Jisas atun wata nape nenek beten atin gani iruhw yoduhw. <sup>48-49</sup> Anan nape nenek beten, aria natigu ananim disaipel hetem bot. Aria debeinyi uhwin nyahuri nyawanam tarigum bot aria amam hape henek debeinyi mour, henek mour debeg abom. Aria douk natrum aria hurukatinyum gugruk, anan nakitak nagimam nanak. Anan nabrig agudok waiyag narahaen nanaki iruhw

igum. Anan nanak aria nakri nishagrakuk amam nunak, aria amam hatrun um narahaen nanaki iruhw um. Aria amam hakri anan da sagaben. Douk namudok aria amam hanogugur abom aria hahwar henyugwreh debeg atin. <sup>50</sup> Um maresh? Amam hatrun aria hanogugur abom.

Aria Jisas arigas nakripam nakri, “Ipak mare punogugur, uwok! Ipak ta dodogowip. Enyudok douk eik.” <sup>51</sup> Aria debeinyi uhwin wata nyahur atin. Aria anan nanak natoum nakih nanamam hape bot aria enyudok uhwin nyahur iri nyagok nyabuhuk. Aria ananim disaipel hakitak yowiyokuk. <sup>52</sup> Um maresh? Ruwahepih anan nawor 5-poreit bret tani biyos arbus nako sabaishi arpeshe aria amam madae hudukemesh hukri anan douk dodogowini uwe! Amam urkwip pokomuk abom.

*Jisas Nagabe Sabaishi Arugeh Hapeyeshi Shape Shokugi Nahobig Genesaret Iri*  
(Matyu 14:34-36)

<sup>53</sup> Aria habrig waiyag hanak arigaha hanak hatogur anagas gani wobrehahig um waiyag, um agudok shokugi nahobig Genesaret, aria amam habuh hanuk bot hanak haweshikot. <sup>54</sup> Douk amam howeshiguk bot hanak aria arpeshe iganigadae shatik Jisas shadukeman. <sup>55</sup> Douk namudok aria eshesh shahur shanak ihirub warub bape shokugi nahobig Genesaret iri. Eshesh shanak aria shakripesh sharauri arugeh hapeyeshi shetemi betog aria sharaesh shanaki um Jisas um agundok eshesh shemnek um anan nanak napeum. <sup>56</sup> Aria ihirub debeirubi bani shokurubi warub douk Jisas nanak um, arpeshe sharao esheshish arugeh hapeyeshi shanak sheshubuk agundok douk eshesh apa shapeum. Aria eshesh sharig Jisas dodogowish atish um arugeh hapeyeshi shususuhw anagasih um ananih rupah. Aria ihishmorim douk shasusuhw anagasihum ananih rupah iri, wata yopish.

## 7

*Babenomi Amamin Baraen  
(Matyu 15:1-9)*

<sup>1</sup> Anah nyumnah amam Farisi hani anam henek skulumesh um lo iri, douk hape iri Jerusalem iri hanaki aria hanak hape agundok Jisas napeum. <sup>2</sup> Amam hape aria hatik um Jisas ananim disaipel madae hukwurupuguk wis kabi douk amam Farisi hakri um ba iyoh, aria kadak hunosuhw worigun hugnoh uwe. Douk namudok aria amam Farisi douk hakri Jisas ananim disaipel amamis wis goutukis atus iri.<sup>7:2</sup> <sup>3</sup> Amam Farisi hani ihishmorim Juda esheshin lo douk shagipesh seiwok esheshim babenomi henekenyuguk iri. Aria enen esheshin lo douk namudok. Eshesh madae shukwurupuguk wis ba iyoh um, eshesh ta mare shuwok anagun worigun uwe, uwok. <sup>4</sup> Aria worigun shatorugun maket iri shopunek, douk shanaki shakwurupeshuk ba iyoh aria kadak shugnoh. Eshesh mare shukwurupesh um, eshesh ta mare shishoh. Aria eshesh shagipesh sabainyi lo shopunek douk seiwok esheshim babenomi heneken henyemaguk iri. Aria enen douk enyudok um shukwurup kas suni marus iri yaureruh hani betog um. <sup>5</sup> Douk namudok aria amam Farisi hani amam henek skulumesh um lo iri harig Jisas hakri, “Um maresh? Aria nyakim disaipel douk madae hugipesh enyudok apakim babenomi amamin lo um hukwurupuguk wis ba iyoh aria kadak huwok worigun um uwe?”

<sup>6</sup> Aria Jisas nakripam nakri, “Ipak penek rohw iri. Seiwok profet Aisaia douk neyagwreh Iruhin ananin baraen aria nenyemaguk adurin baraen nyetemaguk Iruhin ananik Buk nakri um ipak! Ipak douk penek rohw kabi douk baraen nyetem Iruhin ananik buk iri nyakrium ipak um! Iruhin nakri, ‘Eshudok arpeshe esheshig nukwatog otug shatuk eikin nyeigur nyato iruhw. Aria esheship urkwip douk madae purum eik uwe. <sup>7</sup> Eshesh apa shakrip kupaishi arpeshe meyoh sheneken iri lo,

<sup>7:2</sup> <sup>7:2</sup> Putik futnot nyape Matyu 15:26 iri.

aria shenek rohwumesh shakri eshesh shakripesh eikin. Douk namudok aria eshesh shenek lotume meyoh.’”

<sup>8</sup> Aria Jisas wata nakripam nakri, “Ipak douk pakutukuk Iruhin ananin yopunyi lo aria pasuhw ipakish popehesh yamehesh sheneken iri lo pagipeshen. <sup>9</sup> Aria ipak douk penek yoweishi inahos abom. Um maresh? Ipak pagipesh ipakih aih abom pekenyuk agabus Iruhin ananin yopunyi lo aria paen nyabuhuk. Aria ipak pasuhwen dodog ipakim babukenyim amamin lo pagipeshen. <sup>10</sup> Um maresh? Seiwok Moses nakripep enyudok Iruhin ananin baraen lo um ipak pumnek ipakish amakenyish esheshin baraen aria putaurumesh. Aria ta enen arpen nyukri nyuho enyenyish amakenyish nyukripesh enen yoweinyi baraen um, enyudok arpen kupaishi arpeshe ta shusuhwen shunak shen nyugok. <sup>11</sup> Aria ipak Farisi pani ipak penek skulumesh um lo iri pakripesh enen sakin baraen. Ipak pakri, ta enen arpen nyunobuk enesh eshudok eneshenesh, o anabor utabor douk ta nyuko enyenyin yaken o amakek um nyutaurumesh um, aria enyen nyukripesh nyukri, ‘Eikibor utabor aria eshudok eneshenesh douk mare ta iko ipak um itaurumep um aria douk yagraehesh um iko Iruhin. Eik yakri eshudok korban.’ Baugenyum um enyudok baraen korban douk shakri, ‘Eshudok douk shagraehesh um shuko Iruhin iri.’ <sup>12</sup> Douk namudok aria enyen madae nyutaurumesh nyukesh eshudok enyenyish amakenyish uwe. Aria ipak pakri, ‘Enyudok arpen nyunekesh namudok um, enyen wosik douk nyenek yopuhi aih.’ <sup>13</sup> Douk namudok aria ipak pasuhw ipakim babukenyim amamin lo dodog pagipeshen. Aria Iruhin ananin lo douk nyakri apak mumnek apakish amakenyish esheshin baraen mutaurumesh um, ipak paen nyabuhuk. Aria shopunek, ipak penek sabainyi shopunek kabi enyudok douk eik yakripepen iri um.”

*Eshudok Douk Shape Numun Aparuh*

*Shatograri Iri Shenek Arpesh Shabosusih  
(Matyu 15:10-20)*

<sup>14</sup> Aria Jisas wata shopunek nahwar eshudok sabaishi armam armago shopunek shanaki anan napeum aria nakripesh nakri, “Ipak ihishmorim ta pumnek eikin baraen aria pudukemen wosik abom. <sup>15</sup> Shape aduk iri eshudok shuni worigun douk arpen nyishoh shuwish numun enenyihw apahw iri ta mare shuneken nyubosusih uwe, uwok. Eshudok douk shape numun enyudok arpen enenyihw apahw aria shutograri aduk iri, douk ta eshudok shuneken nyubosusih. <sup>16</sup> [Aria douk ipak arigos sapenyepi ta pumnek enyudok baraen aria pusuwen dodog pugipeshen.]” <sup>17</sup> Anan nakripeshuk namudok aria nakutishukuk nanak nawish nani ananim disaipel hape urupat. Aria amam hariganum enyudok wobuwobren baraen iganigadae anan nakripeshenyi. <sup>18</sup> Aria anan nakripam nakri, “Ipak shopunek douk madae pudukemesh uwe? Worigun nani ihishmorim eshudok shape aduk, aria arpesh shashoh shabuh esheshiruh aparuh iri ta mare shubuh shunekesh shubosusih uwe, uwok. <sup>19</sup> Um maresh? Worigun eshudok douk shashoh aria madae shunak shubuh shur esheship urkwip uwe. Eshesh douk shabuh shor aparuh aria wata shanak sharkegeshuk.” Jisas douk nakri namudok um nakri ihishmorim mahish aria worigun douk yopishi atish iri.

<sup>20</sup> Aria Jisas wata shopunek nakripam nakri, “Eneshenesh yoweishi inahos esheship urkwip porumesh aria eshesh mishish shakitakumesh shenekesh iri atish ta shunekesh shubosusih. <sup>21-22</sup> Um maresh? Eshudok douk gani numun esheship urkwip parik porum eshudok eneshenesh yoweishi inahos aria eshesh douk shenekesh. Eshesh shakwuaruh, urkwip porum yoweishi inahos, shabo arpesh shagok, shenek wehrur aria dodogeshish madae shukesh atin uwe arpesh. Aria shenek rohwa um kupaishi, aria shopunek madae shusuhw merikwum eshesh kanak uwe. Aria eshesh shabrig enyudok lo um shanaraum um aria shenek nyigiya um kupaishi

esheshish eshudok eneshenesh. Aria shaho kupaishi shakri eshesh atish debeishi, aria shenek rohwa um kupaishi shakri eshesh shenek yoweishi inahos. Aria eshesh shakri shutuk esheshish atish nyeiguhw shuto iruhw aria shenek eneshenesh yoweishi inahos. <sup>23</sup> Ihishmorim eshudok eneshenesh yoweishi inahos douk esheship urkwip porumesh aria shenekesh iri douk shenekesh shabosusih.”

*Onok Armatok Kwanaki Wabur Fonia  
Douk Bape Debeigi Nahobig Siria Iri  
Kwenek Bilip Um Jisas  
(Matyu 15:21-28)*

<sup>24</sup> Aria Jisas nakutukuk abrudok wabur nakitak nanak um kupaigunum um, arbudok biarub warub Taia iri Saidon bape um. Anan nanak natogur aria nanak nawish nape anat urupat. Aria anan nakri uwok um enesh arpesh shudukemesh um anan nanak nape agundok um. Aria anan nabirak um nakri nunabeshuk nupe agundok aria uwok. <sup>25</sup> Aria onok armatok douk okwokwik shokukwi nugawik enen yoweinyi sagab nyapenyok iri kwomnek um Jisas nanak napeum, aria okwok kwanak kwatrun. Okwok kwanak aria kwabuh kwoduk ohrubus kwakus hurukatin um Jisas ananiruh yeriweruh. <sup>26</sup> Okwudok armatok okwok douk kupaiburi waburik, okwok madae Juda uwe. Okwok kwanaki abrudok wabur Fonia, douk bape shokugi nahobig Siria iri. Aria okwok douk kweyagwreh Grikin baraen. Douk okwok kwanak aria kwakrip Jisas abom um nihiyahuk enyudok yoweinyi sagab douk nyape okwokwik nugawik iri nyutogur nyuruwok.

<sup>27</sup> Aria Jisas nakripok enyudok wobuwobren baraen nakri, “Eik ikesh worigun batowish iyoh. Um maresh, enyen douk madae wosik um apak muhur batowishigun worigun muwashagun um nubag gwugnoh uwe, uwok.”

<sup>28</sup> Aria okwok kwakripan kwakri, “Debeini! Nyak nyakriyen iri baraen douk adurin abom. Aria nubag douk gwawish gweyatu shakamenyum tebol aria gwape

gwawok tutukwanigun worigun douk bato wish shashoh shenekesh shanatukuk iri.”

<sup>29</sup> Aria Jisas nakripok nakri, “Nyak nyabeime adurin eikin baraen. Douk namudok aria nyak wata nyutanam nyunak. Yoweinyi sagab douk iganigadae nyakutukuk nyakik nugawik nyatogur nyaruwok.”

<sup>30</sup> Aria okwok wata kwatanam kwanak um urupat aria kwatik um sagab nyakutukuk okwokwik nugawik nyatogur nyaruwok aria okwok kweshuhw wosik okwokwis aras.

*Jisas Nagabe Anan Arigos Seshukani Aria Madae Niyagwreh Atin Iri Uwe*

<sup>31</sup> Aria Jisas nakutukuk abrudok wabur douk bape hurukatin um Tair um iri, aria nanak neshagrakuk Saidon aria nawish nanak agudok shokugi nahobig 10-poreirub warub bape um. Aria nanak nabuhuk debeigi waiyag Galili. <sup>32</sup> Douk anan nanak natogur aria enesh arpes sharauri anan arigos seshukani, aria shopunek madae niyagwreh atin iri uwe shanaki um Jisas. Aria eshesh sharigan abom um nuweman wis aria nugabeyan.

<sup>33</sup> Aria douk Jisas nemnekesh namudok aria naruman hakutukuk eshudok sabaishi armam armago shapeik aria amam atum hanak heyotuk sik. Aria nenyigur anan heh hawish wobuwobur um arigos. Aria nokuseh arpigas sape anan hah aria nagasayak anudok arman ananim yaham. <sup>34</sup> Aria douk Jisas nenekesh namudok jurug, aria anan nanig natik iruhw heven aria hwsaran. Aria nakripan eshesh Juda esheshin baraen nakri, “Efata.” Baugenyum um enyudok baraen Efata douk shakri, “Nyak arigos togaragos nyumnek wosik aria wata niyagwreh.” <sup>35</sup> Aria ahudok atuh ananigos arigos tagaragos sonukuk aria anan nemnek baraen wosik abom. Aria ananim yaham mumukem abom um ta manupok aria nape neyagwreh.

<sup>36</sup> Aria Jisas nakripesh nakri, “Ipak punak aria mare pukrip enesh arpes um agundok yagabe anudok arman um.” Aria douk anan nakripesh namudok aria eshesh shanak shape shakripesh

shanak um agundok Jisas nagabe anudok arigos seshukanari abom um. <sup>37</sup> Eshesh shakripesh shanak, aria eshudok douk shemnek um enyudok iri shakitak yowiyokuk abom aria shakri, “Anan wosik nenek ihinyumorim yopinyi mour abom. Anan nagabe arigos seshukeshi shemnek, aria shopunek nagabe madae shiyagwreh atin iri uwe aria eshesh wata sheneyagwreh.”

## 8

*Jisas Nekesh Worigun 4,000-poreish Armam Armago (Matyu 15:32-39)*

<sup>1-2</sup> Anah nyumnah, kupaishi sabaishi armam armago shantorum shanak shape Jisas napeum. Eshesh shape arigaha 3-poreih nyumneh aria worigun natuh. Aria Jisas nahwar ananim disaipel hanaki aria nakripam nakri, “Eik yakri gihum eshudok arpes. Um maresh? Eshesh shanaki shani apak mape 3-poreih nyumneh agundok aria eshesh worigun wokesh aria nyurub baesh. <sup>3</sup> Aria eik mare ikesh anagun worigun shishoh ba iyoh, aria kadak shatanam shunak um esheshirub warub um, eshesh ta shunak yah aria marubigos sesh aria shutu shubuh. Um maresh? Enesh douk shanaki rougunum.”

<sup>4</sup> Aria ananim disaipel harigan hakri, “Agundok mapeik wehigunum arpes uwok um. Douk namudok aria apak ta munak muparug anagun worigun agunum aria douk ta mubirom eshudok ihishmorim sabaishi arpes?” <sup>5</sup> Aria anan narigam nakri, “Aria ipak pasuhwi makwunit bret?”

Aria amam hakripan hakri, “Apak masuhwi 7-poreit atin.”

<sup>6</sup> Aria Jisas nakrip eshudok sabaishi arpes shabuh shape atap. Aria anan nohuri atudok 7-poreit bret nasuhwot aria nenek beten nenek tenkyu um Iruhin aria nawarut nako ananim disaipel um hisiyat hubiromesh. Aria amam hatrunat, aria hape habiromesh hanak. <sup>7</sup> Aria amam hasuhwi anas karowis shokusi arbus shopunek. Aria Jisas nasuwos nenek beten nenek tenkyu

um Iruhin aria neshopok ananim um hunak husiyasumesh shopunek. <sup>8-9</sup> Aria eshesh shashoh dugaresh aria shakusuk iri, ananim disaipel hatrishesh aria heshurukwi 7-poreiruh sararuh shishukniruh. Aria armam armago shawok eshudok worigun iri douk sabaishi abom um 4,000-poreish. Aria eshesh dugaresh aria Jisas neshopokesh shanak um esheshirub warub. <sup>10</sup> Aria douk anan neshopokesh shanakuk atin, aria ahudok atuh anan nani ananim disaipel hato bot aria hanakum anarub warub douk bape shokugi nahobig Dalmanuta iri.

*Amam Farisi Harig Jisas Um Nunek Enen Iruhin Atun Neneken Iri Mour (Matyu 16:1-4)*

<sup>11</sup> Aria douk anam Farisi hanak Jisas napeum aria hani anan hape hanatutukem. Amam hakri hukwiraehan, douk namudok aria amam hariganum nunek enen Iruhin atun neneken iri mour um hudukemesh um anan douk adur Iruhin neshopokan nanaki iri. <sup>12</sup> Aria Jisas hwsaranaguk abom<sup>8:12</sup>aria nakri, “Ipak doukipari pakri eik inek enen Iruhin atun neneken iri mour aria ipak putrin um maresh? Adur atin eik yakripep, eik ta mare inek enen enyudokmori mour ipak putrin uwe, uwok.”

<sup>13</sup> Anan nakrip amam Farisi namudok aria wata nakutumuk ba hapeik aria nani ananim disaipel hakitak hato bot aria hanak gani wobrehahig um debeigi waiyag Galili.

*Jisas Nakripam Wobuwobren Baraen Um Amam Farisi Hani Herot Amamis Yis Douk Senek Bret Takitak Debeiti Iri (Matyu 16:5-12)*

<sup>14</sup> Amam hanak aria Jisas ananim disaipel urkwip pokomuguk um husuhw anat bret shopunek. Amam douk hasuhw atut bret meyoh tetemumam bot. <sup>15</sup> Aria Jisas nakripam nakri, “Ipak gamo pudukemesh um amam Farisi huni Herot amamis yis.”

<sup>16</sup> Aria douk anan nakripam namudok aria amam kanak hape haneyagwreh

<sup>8:12</sup> **8:12** Jisas nenek giha abom um agundok amam hakanaguk agabus Iruhin um aria anan nakri nurepam aria douk hwsaranaguk.

hakri, “Anan nakripap enyudok baraen um yis um maresh, apak douk madae musuhwi anat bret uwe.”

<sup>17</sup> Aria Jisas iganig nadukemesh um amam hape haneyagwreh namudok um. Aria anan nakripam nakri, “Eik yakri uwok um ipak piyagwreh um agundok ipak bret wokep um. Ipak douk padukem baugenyum eikin baraen aka, uwok? <sup>18-19</sup> Ipak douk nabes sapenyep, aria ipak madae putik eshudok uwe? Aria ipak douk arigos sapenyep, aria ipak madae gamo pumnek uwe? Ipak douk urkwip wokepuguk um agundok nubokuhi yawor 5-poreit bret yabirom sabaishi 5,000-poreish arpesk abom um? Eik yabiromesh shashoh dugaresh aria shakusuk iri ipak patrishesh peshurukwi makwuniruh suraruh shishukniruh aria poruhubuk hakus?”

Aria amam hakripan hakri, “Apak meshurukwi 12-poreiruh sararuh.”

<sup>20</sup> Aria Jisas wata shopunek narigam nakri, “Aria abudok nyutob eik yawor 7-poreit bret yabirom sabaishi 4,000-poreish abom armam armago, eshesh shashoh dugaresh aria shakusuk iri ipak patrishesh peshurukwi makwuniruh sararuh shishukniruh poruhubuk hakus?”

Aria amam hakripan hakri, “Apak meshurukwi 7-poreiruh.”

<sup>21</sup> Aria anan naham aria narigam nakri, “Aria ipak douk madae pudukem enyudok baraen uwe um maresh? Eik douk madae ikripep um asudok aduris yis douk senek bret takitak debeiti iri uwe, uwok.”

*Jisas Nagabe Anan Nabes Seshukan Iri Gani Betsaida*

<sup>22</sup> Aria Jisas nani ananim hanak ari-gaha hanak hatogur wabur Betsaida. Aria agundok enesh arpesk sharauri anan nabes seshukanari shanakumori Jisas aria shariganum nuweman wis aria nugabeyan. <sup>23</sup> Aria douk eshesh shakripan namudok aria anan narum anudok nabes seshukanari hanakumaguk adukum wabur aria Jisas nakuseh arpi-gas sape anudok ananis nabes. Douk

nakusehas jurug aria nowem wis nabes aria narigan nakri, “Nyak nyatik enesh eshudok aka, uwok?”

<sup>24</sup> Aria anudok nabes seshukanari natrugun aria nakri, “Eik yatik arpesh sharahaen aria eik madae gamo itrish wosik uwe. Eik yatrish ruhur atin kabi douk yatik rowos um.”

<sup>25</sup> Aria Jisas wata shopunek nowem wis ananis nabes aria douk anan natrugun duk abom. Ananis nabes yopus abom aria anan gamo natrugun aria natik ihishmorim eshudok eneshenesh wosik.

<sup>26</sup> Aria Jisas neshopokan nanak um ananit urupat aria nakripan nakri, “Nyak kare um nyakit urupat. Nyak mare nyutanam nyunak um wabur uwok.”

*Pita Nakri Jisas Anan Douk Krai Douk Iruhin Nagraehan Neshopokan Nanakumori Nunarao Arpesh Iri*

(Matyu 16:13-20; Luk 9:18-21)

<sup>27</sup> Aria Jisas nani ananim disaipel hakutukuk Galili aria hakitak hanakum anarub warub douk bape shokugi nahobig Sisaria Filipai iri. Douk amam hanak yah aria Jisas narigam nakri, “Ipak pemnek arpesh shakri eik amiapen?”

<sup>28</sup> Aria amam hakripan hakri, “Enesh shakri nyak douk Jon douk nenek baptaisumesh iri, aria enesh shakri nyak Ilaija, aria enesh shakri nyak anan profet.”

<sup>29</sup> Aria anan narigam nakri, “Douk eshesh shakri namudok aria ipak kanak pakri eik amiapen?”

Aria Pita nakripan nakri, “Nyak Krai douk Iruhin nagraehen neshopoken nyanamori nyunarao arpesh iri.”

<sup>30</sup> Aria Jisas nakripam dodogowinyi baraan nakri, “Douk ipak padukemesh aria ipak mare punak pukrip enesh arpesh um eik douk Krai douk Iruhin nagraehe aria neshopoke yanaki iri um.”

*Jisas Nakripesh Um Agundok Ta Ananish Horim Shon Nugok Aria Ta Wata Nukitak Nupe Um*

(Matyu 16:21-28; Luk 9:22-27)

<sup>31</sup> Aria Jisas apa nakrip ananim disaipel nakri, “Eik Anudok Arman douk yatogur adurinyi arpen iri ta imnek debeiri eriger.

Aria eshesh Juda esheshim debeimi huni debeimi pris huni amam henek skulumesh um lo iri, ta hukey agabus aria huneke enenyenen. Aria ta she igok shurume wonugwehw biyeh nyumneh, aria hukri um biyeh atih nyumneh um, eik ta wata ikitak ipe.”

<sup>32</sup> Enyudok baraan anan douk madae nukripam wobuwobren uwe, uwok. Anan nawerehen abom nakripam. Douk namudok aria Pita naran hanak heyotuguk anagas aria nape nahan nakri, “Nyak mare nyukri enyudok baraan.”

<sup>33</sup> Aria Jisas natanam natik ananim disaipel aria naho Pita nakri, “Satan, kareik. Nyak douk madae nyugipesh Iruhin ananim urkum uwe. Nyak nyagipesh arpeship urkwip meyoh!”

<sup>34</sup> Aria Jisas nahwar eshudok sabaishi arpesh shani ananim disaipel shanak agundok anan napeum aria nakripesh nakri, “Arpen douk nyukri nyugipesh eik iri, sagomatin enyen ta nyukri uwok abom um enyen mare nyugipesh enyenyim urkum. Aria enyen mare nyunogugur um shen nyugok um aria nyusah enyenyin rowog kruse um, aria enyen wosik ta nyugipeshe.

<sup>35</sup> Aria ta enen arpen enyenyim urkum murum nyukri enyen mare nyugok aria nyupe namudok atin iri, enyen ta nyugok. Aria enyudok arpen douk nyunek eikin mour aria nyusuhw Iruhin ananin yopinyi baraan dodog iri kupaishi ta shen nyugok. Aria enyen ta wata nyupe wosik ihih nyumneh.

<sup>36</sup> Aria eshudok arpesh douk shunogrem sabaishi eneshenesh eshudok, aria eshesh shukri eshesh douk shape wosik aria ta mare shugok iri, eshesh ta shugok abom.

<sup>37</sup> Ta mare enen arpen nyukwu enyenyish eshudok eneshenesh um nyutor agundok um nyupe wosik ihih nyumneh um, uwok. <sup>38</sup> Aria shopunek douk, sabaishi arpesh shape agundok atap iri shape shenek eneshenesh yoweishi inahos. Eshesh shakenyuk agabus Iruhin ananin baraan shakri enyen madae adurin uwe. Aria ahudok nyumnah Eik Anudok Arman douk yatogur adurinyi arpen iri

itanamori iniri Iruhin ananish yopiy-opishi enselahos inakmori, Iruhin ta nutaurume itogur dodogoiwe atuwe abom itrugun abom aria inaki. Aria abudok nyutob eik inaki obi nyutob, eshudok arpesch douk shenenek abraen um eik, aria shakenyuk agabus eikin baraen iri, eik shopunek ta inekumesh abraen aria ikeshuk agab namudok atin.”

## 9

<sup>1</sup> Aria anan wata shopunek nakripesh nakri, “Adur atin eik yakripep! Enep douk peyotu agundok iri ta mare arigas pugok, uwok. Ipak ta wata pupe aria putik agundok Iruhin dodogowin atun nupe Debeini um ananish arpesch shapeum.”

*Jisas Ananihw Yegenyihw Hwatogur Anahaeh Aria Natrugun Abom (Matyu 17:1-13; Luk 9:28-36)*

<sup>2</sup> Douk 6-poreih nyumneh hanak hadiguk, aria Jisas narao Pita nani Jems aria Jon atum hanaman hato hakih hape onohw rouhwi yoduhw. Amam hakih hape aria amam hatik um Jisas nenek senis natrugun nape anahaeh.

<sup>3</sup> Aria ananish rupeh shopunek hatrugun hatogur shigorihwih abom. Arpesch shape agundok atap iri douk madae enesh shukwrup esheshih rupeh hutrugun abom hutogur shigorihwih namudok uwe. <sup>4</sup> Aria agundok Pita nani Jems aria Jon hatik Ilaija aria Moses hatogur hani Jisas heyotu hape heyagwreh.

<sup>5</sup> Aria Pita nakrip Jisas nakri, “Tisa, enyen douk wosik um apak mape agundok um. Aria apak muwem 3-poreiyu shomeguhwiyu. Nyak onok aria bio um Moses nini Ilaija.” <sup>6</sup> Pita douk nakripan namudok Jisas um maresh, amam hanogugur abom aria Pita madae nudukemesh um maren baraen anan ta nukriyen iri uwe.

<sup>7</sup> Aria douk Pita nape nakripan namudok aria onog orug gwanaki iruhw aria goma nyeshigorum aria amam hemnek anah mah hanaki agwudok orug. Aria

enyudok arpen nyeyagwrehi iri nyakri, “Anudok douk eikin nunganin douk eik urkum manawashaman iri abom. Ipak punnek ananin baraen!”

<sup>8</sup> Aria douk amam hemnek namudok aria ahudok atuh amam hatanam hatrugun aria madae hutik enesh arpesch shopunek shuni amam shiyotuguk uwe. Amam hatik Jisas atun nani amam neyotuguk.

<sup>9</sup> Aria douk amam wata hakutukuk yoduhw hape habuhi aria Jisas nakripam nakri, “Ipak punak aria mare pukrip enesh arpesch um enyudok iganigadae patrin iri, uwok. Ipak pupe arigaha shubo Eik Anudok Arman douk yatogur adurinyi arpen iri igok aria wata ikitak ipe aria ipak douk ko pukripesh-umen.”

<sup>10</sup> Aria douk anan nakripam namudok aria amam hemnek ananin baraen hagipeshen. Aria amam kanak hape heneyagwreh hanakripam hakri, “Douk baugenyum baraen um anan nakri, ‘Eik Anudok Arman douk yatogur adurinyi arpen iri wata ikitaki wonugwehw’, anan douk nakri um maresh?”

<sup>11</sup> Aria amam harigan hakri, “Amudok douk henek skulumesh um lo iri douk hakripesh hakri ta Ilaija nurik nunaki aria Krai, douk Iruhin nagraehan neshopokan nanaki iri ta nugiki um maresh?”

<sup>12</sup> Aria Jisas nakripam nakri, “O enyen adur! Ilaija douk narik nanaki um nugebe eneshenesh eshudok. Aria ipak urkwip purum enyudok baraen douk nyetem Iruhin ananik Buk iri. Baraen douk nyakri, ‘Eik Anudok Arman douk yatogur adurinyi arpen iri ta imnek debeiri eriger aria arpesch ta shukri uwok aria shuke agabus.’ Aria enyen douk nyetem namudok um maresh? <sup>13</sup> Aria adur atin eik yakripep! Kupaini Ilaija<sup>9:13</sup> douk nanaki aria arpesch shagipesh esheship urkwip aria shenek eneshenesh yoweishi inahos um anan. Eshesh shenekesh-uman kabi douk baraen nyetem Iruhin ananik Buk iri nyakrium.”

*Jisas Nagabe Anan Shokuni Yoweinyi  
Sagab Nyapeyan Iri  
(Matyu 17:14-21; Luk 9:37-43)*

<sup>14</sup> Aria Jisas nani ananim 3-poreim disaipel hatanam habuhi hanak haparug amudok anam disaipel agundok douk amam hapeum. Aria amam hatik um sabaishi arpeshe shanak sheyotu shersharih amudok anam disaipel. Aria agundok, anam henek skulumesh um lo iri hani amam Jisas ananim disaipel hape hanatutukem. <sup>15</sup> Aria douk ihishmorim shatigu Jisas aria eshesh shakitak yowiyokuk. Aria eshesh shahur shanak shatogurum anan napeum aria shanadudareh-uman shakri, “O yopuhi nyumnah nyak!” <sup>16</sup> Aria Jisas narig ananim disaipel nakri, “Ipak pani amam panatutukem um maresh?”

<sup>17</sup> Aria anan arman douk nani eshudok sabaishi sheyotu iri nakrip Jisas nakri, “Debeini Tisa, eik yauri eikin nunganin um nyak. Um maresh? Enen yoweinyi sagab nyapeyan nyanaur um aria madae niyagwreh atin uwe. <sup>18</sup> Aria sabaishi nyumneh yoweinyi sagab nyanaur nyatukan nabuh nakus atap aria arpigas satograri ananit nokwat. Aria shopunek, anan nanatukwesh naruh nenek kruti krutek aria ananish roguh waiyas shanadudareh aria dudugeshish abom. Aria eik yarig nyakim disaipel um huhiyahuk enyudok sagab nyutogur nyuruwok aria amam habirak hatik uwok.”

<sup>19</sup> Aria Jisas nemnek namudok aria nakrip eshudok armam armago nakri, “Ipak doukipari, eik yani ipak mape roubum nyutob ipakibur wabur aria ipak madae punek bilip uwe. Aria ipak pakri eik ta wata ipeum itaurumep namudok atin um isah ipakin enenyenen amaen um, aka? Nyauri anudok shokuni!” <sup>20</sup> Aria eshesh sharanari shanak um Jisas. Douk anan nanak aria enyudok sagab nyatigu Jisas aria nyanaur nyatukan nabuh nakus atap aria ohwas sanakan nokwat.

<sup>21</sup> Aria Jisas narig anudok sagab nyanaur iri ananin yaken nakri, “Sagab nyanaur nape makwunih nyumneh?”

Aria anan nakripan nakri, “Seiwok anan wata shokuni um, sagab nyape namudok arigaha douk. <sup>22</sup> Aria shopunek, sabaishi nyumneh enyudok sagab nyakri nyon nugok. Enyen nyanaur nyatukan nabuh argab um nyih hunun nugok. Aria anabik um, nyanaur nyatukan nabuh worub um nubuh sukutan aria nuraguk worub. Aria ta nyak dodogowinum nyugabeyan, nyak nyukri giha aria nyutaurumohw!”

<sup>23</sup> Aria Jisas nakripan nakri, “Adur, ta nyak nyukri um! Um maresh? Eshudok arpeshe douk shunek bilip um eik iri, eshesh ta dodogowish um shunek ihinyumorim enenyenen mour.” <sup>24</sup> Aria ahudok atuh, anudok sagab nyanaur iri ananin yaken nakrip Jisas nakri, “Eik yenek bilip um nyak aria eikin bilip madae dodogowin abom uwe. Aria eik yakri nyak nyutaurume aria eikin bilip nyutogur dodogowin abom.”

<sup>25</sup> Aria douk Jisas natik um eshudok sabaishi shahur shanaki hurukatinyum anan, aria anan naho enyudok sagab nakri, “Nyak yoweinyi sagab douk nyenek anudok nunganin nagugak aria madae niyagwreh atin iri uwe. Eik yakripenyum nyukutunukuk nyutogur nyunak aria mare wata nyutanamori nyuwishan!”

<sup>26</sup> Aria enyudok sagab nyahwar debeg aria nyatuk anudok shokuni arman nyanaur atap aria nyakutunuguk nyatogur nyaruwok. Aria anan krukruk nakus kabi douk shagok iri shakus um. Aria sabaishi arpeshe shopunek shatrun aria shakri anan nagok. <sup>27</sup> Aria Jisas nasuhw ananin rogur aria nonohur nakitak neyotu iruhw.

<sup>28</sup> Aria douk Jisas nani ananim disaipel atum hawish hape urupat aria amam harigan hakri, “Apak douk mabirak aria madae dodogowipam muhiyahuk enyudok sagab uwe, um maresh?” <sup>29</sup> Aria anan nakripam nakri, “Douk ipak pushakur um worigun aria punek beten porik Iruhin nutaurumep akure, ipak ta puhiyahen. Aria douk ipak atip madae dodogowip uwe.”



*Jisas Nakripesh Anah Shopunek Um Agundok Ta Anan Nugok Aria Wata Nukitak Nupe Um*

*(Matyu 17:22-23; Luk 9:43-45)*

<sup>30</sup> Aria amam hakutukuk abrudok wabur aria hawish hanak shokugi nahobig Galili aria hanak. Douk hanak aria Jisas nakri uwok um enesh arpesh shudukemesh um agundok amam hanak hapeum. <sup>31</sup> Um maresh? Anan nape nakripam sabainyi ananin yopinyi baraeen ananim disaipel. Anan nakripam nakri, “Arpesh ta shiyabig eikim horim um Eik Anudok Arman douk yatogur adurinyi arpen iri aria ta husuwe hunak he igok. Aria wata hukri um biyeh atih nyumneh um, eik ta wata ikitak ipe.”

<sup>32</sup> Aria amam madae hudukem baugenyum enyudok baraeen uwe. Aria shopunek, amam hanogugur aria madae horigan uwe.

*Meishi Ta Shupe Debeishi?*

*(Matyu 18:1-5; Luk 9:46-48)*

<sup>33</sup> Douk amam hanak hatogur Kaperneam, aria hanak hawish hape anat urupat aria Jisas narig ananim disaipel nakri, “Iganigadae manaki yah um, ipak pape peyagwreh pakri maresh?”

<sup>34</sup> Aria amam madae hukripan enen baraeen uwe. Um maresh? Iganigadae amam hanak yah um, amam kanak hape hanatutukem um meini ta nupe debeini um amam ihim-morim. <sup>35</sup> Aria Jisas nabuh nape atap, aria nahwar ananim 12-poreim disaipel hanaki aria nakripam nakri, “Eshudok arpesh douk shukri shupe debeishi iri, sagomatin eshesh ta shupe kabi douk shokwishi um. Aria shupe shakamum ihishmorim arpesh shunekumesh mour meyoh aria eshesh ta kadak shupe debeishi.”

<sup>36-37</sup> Aria Jisas nahwari enen batowin nyanaki nenyusap nyeyotu amam hapeum hutrin aria anan natuken nasuwen aria nakripam nakri, “Eshudok arpesh douk urkwip purum eik aria shutaurum enen batowin kabi douk enyudok um, eshesh douk shutaurum eik. Aria eshudok douk shutaurum eik iri douk madae shutaurum eik atuwe uwe,

uwok. Eshesh douk shutaurum anudok douk neshopok eik yanaki iri shopunek.”

*Eshudok Arpesh Douk Madae Shunek Horimum Apak Iri Uwe Douk Shaniguk Apak*

*(Luk 9:49-50)*

<sup>38</sup> Aria Jon nakrip Jisas nakri, “Debeini Tisa, apak matik anan arman nape nahiyahuk sagabehos um nyakin nyeigur aria eshesh shatogur sharuwok. Aria apak makripan um anan mare wata nunekesh namudok uwe, uwok. Um maresh? Anan douk madae nugipesh apak iri uwe.”

<sup>39</sup> Aria Jisas nakripam nakri, “Ipak mare pukripan um nukutukuk enyudok mour anan nape neneken iri. Um maresh? Eshudok douk shenek Iruhin atun neneken iri mour um eikin nyeigur iri ta mare shukri enen yoweinyi baraeen um eik. <sup>40</sup> Aria eshudok douk shataurumep iri douk shaniguk ipak. <sup>41</sup> Adur atin eik yakripep! Eshudok arpesh douk shukri ipak douk eikip aria eshesh douk shukep anabar abar um eikin nyeigur um, Iruhin ta nubukumesh yopishi eshudok eneshenesh shukusumesh.”

*Eneshenesh Yoweishi Inahos Douk Shenek Arpesh Shenek Yoweishi Inahos Shakon Agabus Iruhin Um*

*(Matyu 18:6-9; Luk 17:1-2)*

<sup>42</sup> Aria Jisas nakripesh enyudok baraeen shopunek nakri, “Aria enen arpen nyunek enen um eshudok shokwishi douk shenek bilip um eik iri nyunek yoweishi inahos um, enyen douk nyenek yoweishi inahos abom. Aria ta shusuhwen shuwaur anam debeimi utom um enyenyin aruhwigur aria shuwashen nyubuhuk youg akure, enyen ta nyupe yoweinyi poe. Aria Iruhin ta neneken nyumnek debeiri eriger abom reshagrakuk agundok nyumnek eriger um shuwashen youg um. <sup>43</sup> Douk namudok aria ta enen nyakin rogur nyuneken nyunek yoweishi inahos um, nyak nyutupen nyunakuk aria atin meyoh nyupeik. Douk atin rogur nyupemenyum, nyak ta nyunak nyupe wosik ihih nyumneh. Ta biyesh roguh w shupe aria shuneken nyunak um abrudok

yoweiburi wabur hel, douk nyih hanu hape namudok ihih nyumneh aburi. <sup>44</sup> [Aria abrudok yoweiburi wabur hel douk nyih hanu ihih nyumneh iri hanu um, eheh ta mare hugok atin uwe, uwok. Aria eshudok kabi douk eshuguh um ta shunatuken. Aria shopunek, eshesh ta mare shugok uwe, uwok. Eshesh ta shupe ihih nyumneh.] <sup>45</sup> Aria ta onohw nyakihw yerihw hwuneken nyunek yoweishi inahos nyukanagak agab Iruhin um, nyutupohw hwunakuk aria atuhw hwupeik. Douk atuhw yerihw hwupeimenyum, nyak ta nyunak nyupe wosik ihih nyumneh. Ta bioruh yeriwuruh hupeimen aria huraen nyunak um abrudok yoweiburi wabur hel, douk nyih hanu hape namudok ihih nyumneh aburi. <sup>46</sup> [Aria abrudok yoweiburi wabur douk nyih hanu ihih nyumneh iri hanu um, eheh ta mare hugok atin uwe, uwok. Aria eshudok kabi douk eshuguh um ta shunatuken. Aria shopunek, eshesh ta mare shugok atin uwe, uwok. Eshesh ta shupe ihih nyumneh.] <sup>47</sup> Aria ta anap nabep puneken nyunek yoweishi inahos um, nyak nyutukapuk aria atup meyoh pupeumen. Douk atup pupeumenyum, nyak ta nyunak nyuwish nyupe agundok douk Iruhin nape Debeini um ananish arpes shapeum. Ta biyos nabes supemen aria suneken nyunak um abrudok yoweiburi wabur hel, douk nyih hanu hape namudok ihih nyumneh aburi. <sup>48</sup> Aria abrudok yoweiburi wabur douk

‘nyih hanu ihih nyumneh iri hanu um, eheh ta mare hugok atin uwe, uwok. Aria eshudok kabi douk eshuguh um ta shunatuken. Aria shopunek, eshesh ta mare shugok atin uwe, uwok. Eshesh ta shupe ihih nyumneh.’ <sup>49</sup> “Ihishmorim arpes shape agundok atap iri ta nyih hunish aria hunekesh shukutukuk eneshenesh yoweishi inahos. Ehudok nyih ta hunish aria hunekesh shutogur yopish. Eshesh ta shutogur yopish kabi douk showem sol mahish renekesh shatogur yopish. <sup>50</sup> Aria sol arar douk yopuri. Aria ta arar wata

Aria eshudok kabi douk eshuguh um ta shunatuken.

Aria shopunek, eshesh ta mare shugok atin uwe, uwok.

Eshesh ta shupe ihih nyumneh.’

<sup>49</sup> “Ihishmorim arpes shape agundok atap iri ta nyih hunish aria hunekesh shukutukuk eneshenesh yoweishi inahos. Ehudok nyih ta hunish aria hunekesh shutogur yopish. Eshesh ta shutogur yopish kabi douk showem sol mahish renekesh shatogur yopish. <sup>50</sup> Aria sol arar douk yopuri. Aria ta arar wata

jemiyaer um, arpes ta mare enen ta wosik wata nyunekar ekehr, uwok. Aria ipak douk pape namudok atin kabi douk ekeh iri sol um. Douk namudok aria ipakiruh aparuh ta hur wosik aria ipak mare purpak punitok uwe, uwok. Ipak ta punagabe um pupe atugun.”

## 10

*Jisas Nakripesh Um Agundok Shabrig Enyudok Lo Um Shanaraum Um (Matyu 19:1-12; Luk 16:18)*

<sup>1</sup> Aria Jisas nakitak nakutukuk abrudok wabur nanak um shokugi nahobig Judia. Anan nakitak nabrig worub Jordan aria nanak gani wobrehahibam. Aria sabaishi arpes shanaki shape anan napeum, aria nape nakripesh yopinyi baraen kabi douk ihih nape nakripesh um. <sup>2</sup> Aria anam Farisi hanaki anan napeum henek rohwan man aria hakri hukwiraehan um enen baraen. Aria amam harigan hakri, “Nyak kripap, apakin lo douk nyakri wosik um anan arman niatok ananik irohukwik aka, uwok?”

<sup>3</sup> Aria Jisas narigam nakri, “Seiwok Moses nakripep maren dodogowinyi lo?”

<sup>4</sup> Aria amam hakri, “Moses douk nakri wosik um anan arman nukri niatok ananik irohukwik, anan ta nenekumok anap shup um agundok eshesh sheney-atak um nukok kwunasuop, aria nish-opokok kwunak um okwokwumok um.”

<sup>5</sup> Aria Jisas nakripam nakri, “Moses douk nawemumep-oguk enyudok dodogowinyi lo ipak um maresh? Ipak douk baragos seshukep abom. <sup>6</sup> Aria seiwok baugos um Iruhin nenek enesh-enesh eshudok um, baraen nyetem Iruhin ananik Buk iri douk nyakri, ‘Iruhin nenekesh arman iri armatok. <sup>7</sup> Douk namudok aria arman ta nukutukuk ananish amakenyish aria nunak nini ananik irohukwik shupe sik. <sup>8</sup> Aria eshesh biyesh ta shutogur atin arpen.’ Eshesh ta mare wata shupe kabi douk biyesh um uwe, uwok. <sup>9</sup> Douk namudok aria arpes kanak ta mare shubrig enesh eshudok douk Iruhin nuweshikesh nakri shupe atugun iri uwe, uwok.”

<sup>10</sup> Aria Jisas nani ananim disaipel hanak hawish urupat aria amam hariganum enyudok baraen iganigadae anan nakripesh-enyi. <sup>11</sup> Aria anan nakripam nakri, “Aria anan arman niyatok ananik irohukwik aria wata nurao kupaikwi um, anan douk nabrig enyudok lo um shanaraum um. Aria anan nani okwok douk shenek yoweishi inahos um sheshuh atugun um shenek wehrur. <sup>12</sup> Aria douk namudok atin. Aria onok armatok kwiya-tok okwokwin raminen aria wata kwunak kwurao kupaini um, okwok douk kwabrig enyudok lo um shanaraum um. Aria okwok kwani anan douk shenek yoweishi inahos um sheshuh atugun um shenek wehrur.”

*Jisas Nenekumesh Yopinyi Shokwishi Batowish Um Shupe Wosik*

*(Matyu 19:13-15; Luk 18:15-17)*

<sup>13</sup> Aria enesh arpesh sharauri enesh batowish shanaki um Jisas um nuwemesh wis, aria nnekumesh yopunyi. Aria Jisas ananim disaipel hahaesh hakri, “Ipak mare puraesh punaki um Jisas, uwok.” <sup>14</sup> Aria Jisas nemnekam namudok aria anan nyibur juwehosibur aria naham nakri, “Ipak kutukuk eshudok batowish shunaki um eik. Um maresh? Eshudok arpesh douk shape kabi eshudok shokwishi batowish ta shuwishi abrudok wabur Iruhin nape Debeini um ananish arpesh um. <sup>15</sup> Adur atin eik yakripep! Eshudok arpesh douk shukri shuwishi abrudok wabur Iruhin nape Debeini um ananish arpesh um, aria eshesh mare shukon aparuh Iruhin abom kabi douk batowish shakon aparuh um, eshesh ta mare shuwishi.” <sup>16</sup> Aria anan natuk eshudok shokwishi batowish nuwemesh wis atin atin, aria nenekumesh yopinyi.

*Anan Debeini Douk Nagrem Sabaishi Eneshenesh Eshudok Iri*

*(Matyu 19:16-30; Luk 18:18-30)*

<sup>17</sup> Douk Jisas nakutukuk agundok nakitak nape nanak yah, aria anan arman nahur nanak natogruman. Aria nanak nabuh noduk ohrubus natik atap aria narig Jisas nakri, “Yopuni tisa, eik ta inek maresh aria ta douk ipe wosik abom ihih yumneh?”

<sup>18</sup> Aria Jisas narigan nakri, “Nyak nyahware yopuweiri um maresh? Iruhin atun douk yopuni. <sup>19</sup> Nyak douk nyadukemen enyudok lo douk nyetem Iruhin ananik Buk iri. Enyen douk nyakri, ‘Ipak mare pubo kupaishi arpesh shugok. Mare puni armago punek wehrur um, mare pukwuaruh, aria mare punek roh w um kupaishi pukri eshesh shenek enesh yoweishi inahos. Aria shopunek, mare punek roh w um kupaishi punarukesh esheshish eshudok eneshenesh meyoh, uwok. Aria punnek ipakish amakenyish esheshin baraen aria putaurumesh.’ ”

<sup>20</sup> Aria anudok arman nakrip Jisas nakri, “Tisa, seiwok eik wata shakuwe um yape yanaki arigaha douk, eik yasuhw enyudok ihinyumorim lo yagipeshen.”

<sup>21</sup> Aria Jisas natrun aria anan urkum manawashaman aria nakripan nakri, “Nyak douk atin meyoh yopunyi mour wata nyape, nyak wata nyuneken uwe. Nyak nyunak nyuhur ihishmorim nyakish eshudok eneshenesh nyuko kupaishi shutorish shuken utabor. Aria nyunak nyisiyabor um eshudok yaruhish arpesh. Nyak nyunekesh namudok aria kweipon nyak ta nyirao yopishi eshudok eneshenesh gani iruhw heven. Aria nyak nyunekesh namudok iyoh, aria douk nyunaki nyugipeshe.”

<sup>22</sup> Aria douk anudok arman nemnek namudok, aria anan apahw amaenyihw aria ananin domaen nyotohiyahi abom aria nanak. Um maresh, anan douk nagrem sabaishi eshudok eneshenesh.

<sup>23</sup> Aria Jisas neshakam ananim disaipel nernarih jurug aria nakripam nakri, “Eshudok arpesh douk shanagrem sabaishi eshudok sheneshubuk iri ta shenek debeinyi mour um shuwishi abrudok wabur Iruhin nape Debeini um ananish arpesh um.”

<sup>24</sup> Aria ananim disaipel hemnek ananin baraen aria hakitak yowiyokuk. Aria Jisas wata shopunek nakri, “O ipak eikish arpesh! Eshudok arpesh douk shakri eneshenesh eshudok ta shutaurumesh um shuwishi abrudok wabur Iruhin nape Debeini um ananish arpesh um ta shunek debeinyi mour ba iyoh

aria kadak shuwishi. <sup>25</sup> Aria enen debeinyi mahin shahwaren um kamel iri nyukri nyuwishi nyil, agundok nagor um tret tananyigur um rupeh hanatape um, enyen ta nyunek shokwinyi mour meyoh aria nyuwishi. Aria eshudok arpesh douk shanagrem sabaishi eshudok eneshenesh iri ta shunek debeinyi mour abom aria kadak shuwishi.”

<sup>26</sup> Aria douk ananim disaipel hemnek namudok aria hakitak yowiyokuk abom. Aria amam kanak hape hanarig um hakri, “Anan nakri namudok aria Iruhin ta nunarao meishi shutanamori shupe wosik atin?”

<sup>27</sup> Aria Jisas neshakumam duk aria nakripam nakri, “Arpesh eshesh kanak ta mare dodogowish um shuwishi agundok Iruhin nape Debeini um ananish arpesh um. Eshesh atish ta shubirak shutik uwok. Aria Iruhin nutaurumesh um, eshesh wosik ta shuwishi. Um maresh? Iruhin douk dodogowin abom aria nunek ihishmorim eshudok eneshenesh.”

<sup>28</sup> Aria Pita nakripan nakri, “Jisas nyak mnek, apak douk makutukuk ihishmorim apakish eshudok eneshenesh aria manaki memnek nyakin baraen masuhwen aria magipesh nyak.”

<sup>29-30</sup> Aria Jisas nakripam nakri, “Adur atin eik yakripep! Eshudok arpesh douk shukutukuk esheshig urusag, gwuni esheshish ashukenyish owashish, shuni esheshiyu mohwiyariyu, uni esheshiyu amakenyiyu, uni esheshim arhim, huni esheshish batowish, shuni esheshigos nubarigos um shugipesh eik aria shukripesh eikin yopinyi baraen iri, abudok nyutob eshesh wata shupe agundok atap um, Iruhin ta nukesh sabaishi eshudok eneshenesh shopunek abom shishagrakuk riguk sharik sharaesh iri. Iruhin ta nukesh urusag gwuni ashukenyish owashish, aria mohwiyariyu uni amakenyiyu, uni batowish aria nubarigos. Aria shopunek, kupaishi ta shukesh agabus aria shunekesh shurao amaen shumnek eriger. Aria eshesh ta wata shunak shupe wosik abom ihih nyumneh. <sup>31</sup> Aria eshudok arpesh douk shape debeishi iri ta wata shupe kabi douk shokwishi um. Aria eshudok douk

nyeiguhw wokeshi ta wata nyeiguhw shuto iruhw.”

*Henek Biyeh Atih Um Jisas Nakripesh Um Ta Nugok Aria Wata Nukitak Nupe Um (Matyu 20:17-19; Luk 18:31-34)*

<sup>32</sup> Aria Jisas nakitak nani ananim disaipel hape hagim yah hanak hatu um Jerusalem. Jisas nakitak narik aria ananim disaipel hakitak yowiyokuk aria amamip urkwip por yowep aria hagiman hanak. Aria eshudok arpesh douk shagimam shanak iri shopunek shanogugur. Aria Jisas wata shopunek narao ananim atum hanak aria anan nape nakripam um eshudok eneshenesh douk ta shutoguruman iri. <sup>33</sup> Anan nakripam nakri, “Ipak pumnek! Douk apak munak um Jerusalem. Apak ta munak agundok aria anan arman ta niyabigam Eik Anudok Arman douk yatogur adurin arpen iri um amam debeimi pris huni amam henek skulumesh um lo iri. Aria amam ta husuwe hunak hunek kwotume aria hurae um amam douk madae Juda iri uwe um hunak he igok. <sup>34</sup> Aria ta huneke enenyenen hiyokase aria hukwusehe. Aria ta hupuruke madururuh aria he igok. Aria douk hukri um biyeh atih nyumneh iri, eik ta wata ikitak ipe.”

*Jems Nani Jon Harig Jisas Um Hakri Amam Hupe Debeimi (Matyu 20:20-28)*

<sup>35</sup> Aria Sebedi ananim biom nugamim Jems iri Jon hanaki um Jisas aria hakripan hakri, “Debeini tisa, ohwak wakri ukripen enen baraen aria nyak nyumnekoHW aria nyunek-umohw um eshudok douk ta ohwak warigen-umesh iri.”

<sup>36</sup> Aria Jisas narigam nakri, “Ipak pakri inekumep maresh?”

<sup>37</sup> Aria amam hakripan hakri, “Ohwak wakri abudok nyutob nyak nyurao debeinyi nyeigur, aria dodogowin nyutrugun abom um, ohwak shopunek wakri ohwakish nyeiguhw shuto iruhw aria upe debeihwi. Anan nupe um yopunyi rogur ehah aria anan nupe um anagagrinyum.”

<sup>38</sup> Aria Jisas nakripam nakri, “Ipak douk madae pudukemesh um enyudok ipak parige-umen iri uwe. Ipak wosik ta

dodogowip um pumnek arudok debeiri eriger douk hurukatin um ta eik imnekor iri? Kupaishi ta she imnek debeiri eriger aria ta igok. Aria ipak douk wosik ta pakri um shusuwep shunak shep punomnek debeiri eriger ba iyoh, aria kadak pugok kabi douk eik um?”

<sup>39</sup> Aria amam hakripan hakri, “Wosik, ohwak wosik ta unekesh namudok.”

Aria Jisas nakripam nakri, “Wosik, ipak wosik ta pumnek debeiri eriger douk ta eik imnekor iri. Aria shopunek, ta wosik kupaishi shusuwep shunak shep pumnek debeiri eriger aria ipak anan kweipon nugok um. <sup>40</sup> Aria enyudok um ipak anan nupe um yopunyi rogur ehah, aria anan nupe um anagagrinyum aria ipak nyeiguhw shuto iruhw um, enyen douk Iruhin ananin mour. Eshudok arpesk douk seiwok Iruhin anan kanak nanagraehesh iri eshesh atish ta nyeiguhw shuto iruhw aria enesh shupe um yopunyi rogur ehah, aria enesh shupe anagagrinyum.”

<sup>41</sup> Aria douk amudok anam 10-poreim disaipel hemnek enyudok baraen Jems aria Jon hakriyen iri aria amam nyirub juwehosirub um Jems nani Jon. <sup>42</sup> Aria Jisas nahwari ihim-morim hanaki hape atugun um anan napeum aria nakripam nakri, “Ipak douk padukemesh um eshudok douk madae shudukem Iruhin iri uwe um esheshih aih um esheshim debeimi. Amudok douk shahwaram um debeimi iri, douk dodogowim atum abom aria dodogowim um kupaishi arpesk um shunek sabainyi enenyenen debeinyi mour. <sup>43</sup> Aria ipak ta mare punekesh namudok uwe, uwok. Aria ipak anan nukri nupe debeini um ipak enep um, sagomatin anan ta nenek-umep mour meyoh ipak ihim-morim ba iyoh, aria anan ta kadak nupe debeini um ipak. <sup>44</sup> Aria shopunek, ta ipak anan nukri nyeigur nyuto iruhw iri, sagomatin anan ta nyeigur uwok meyoh um nupe shakamum ipak ihim-morim aria nunek-umep mour meyoh aria anan ta kadak nyeigur nyuto iruh-uman. <sup>45</sup> Aria Eik Anudok Arman douk yatogur adurinyi arpen iri douk madae inakumori kupaishi arpesk

shunekume mour uwe, uwok. Eik yanakmori itaurum arpesk inekumesh mour. Aria um ikesh eik kanak um she igok um itor sabaishi arpesk ikweshihesh um esheshish yoweishi inahos.”

*Jisas Nagabe Anan Nabes Seshukanari  
Nanahwaram Bartimeus Iri  
(Matyu 20:29-34; Luk 18:35-43)*

<sup>46</sup> Aria Jisas nani ananim disaipel hanak hatogur wabur Jeriko aria Jisas nakutubur-ukuk nape nanak. Aria ananim disaipel hani sabaishi arpesk shopunek shanaman shanak. Aria agundok, Timeus ananin nukanin Bartimeus nape. Anan nabes seshukan aria nape anagas um yah. Aria ihih nyumneh anan nape nahwar arpesk sharahaen yah iri um shukon anabor utabor. <sup>47</sup> Aria douk anan nemnek um Jisas douk nanaki wabur Nasaret iri nanaki um, aria anan nahwar debeg nakri, “Jisas, Devit ananin barhonin! Nyak nyukri gihaum eik!”

<sup>48</sup> Aria sabaishi armam armago shahan shakripan um mokureg. Aria anan madae numnekesh uwe. Anan nahwar debeg abom nakri, “Devit ananin barhonin, nyak nyukri gihaum eik!”

<sup>49</sup> Aria Jisas nemnekan aria nanaki neyotu. Aria nakripesh nakri, “Ipak hwaran nunaki agundok.” Aria eshesh shahwaran shakri, “Jisas nahwaren, douk namudok aria nyak mare nyunogugur. Kitak yowi agundok.”

<sup>50</sup> Aria anan nakitak neyotu iruhw nawaruk ananit saket natubukuk aria nakitak nanak gani Jisas neyotu um.

<sup>51</sup> Douk nanak aria Jisas narigan nakri, “Nyak nyakri inekumen maresh?” Aria anan nakripan nakri, “Debeini Tisa, eik yakri inatrugun.”

<sup>52</sup> Aria Jisas nakripan nakri, “Nyak kare. Um maresh? Nyak nyenek bilip nyakri eik dodogoiwe iri aria nyakis nabes douk yopus.”

Aria ahudok atuh anan natrugun aria nanam Jisas hanak.

## 11

*Jisas Nanak Nawish Jerusalem Kabi Douk King Um*

*(Matyu 21:1-11; Luk 19:28-40; Jon 12:12-19)*

<sup>1</sup> Jisas nani ananim disaipel hanak hatogur hurukatin um Jerusalem. Amam hanak hatogur arbudok biyorub shokurubi warub Betfage iri Betani. Amam hanak agundok hurukatin um ahwudok yoduhw Oliv aria Jisas neshopok biom disaipel um hurik hunak. <sup>2</sup> Aria nakripam nakri, "Ipak purik punak babri wabur douk bape iri gani wobrehah iri. Ipak ta punak putogur atin, aria ta putik enen nugaen donki. Enyen douk showeshiken maduhw aria nyeyotu. Riguk enyen douk watak nyuwaru enen arpen nyurahemen uwe, uwok. Ipak punak putogur putrin aria pukweshihen puraen punaki agundok. <sup>3</sup> Aria ipak pupe pukweshihen, aria enen arpen nyorigep nyukri, 'Ipak pakweshihen um, enyudok donki?' Ipak pukripen pukri, 'Debeini nakri nuraen banab nyutob meyoh um nunek enen mour aria anan ta wata nuraenyi arigas atin.' "

<sup>4-5</sup> Aria amam hanak aria hatik enen nugaen donki showeshiken nyeyotu adukehah um witum anat urupat. Aria amam hanak hape hakweshihen aria enesh arpesch douk sheyotowi hurukatin iri sharigam shakri, "Ipak pakweshihen um maresh enyudok nugaen donki?" <sup>6</sup> Aria amam hakriפש enyudok atin baraen kabi douk iganigadae Jisas nakripam um. Douk namudok aria eshesh shakri wosik aria amam haraen hanak. <sup>7</sup> Amam haraen hanakum Jisas aria howem amamig saketog agabinyum um enyudok donki aria Jisas nakih netem iruhinyum aria nanak. <sup>8</sup> Aria sabaishi arpesch shawar esheshig saketog aria shape shagadiog shanak yah. Aria enesh shanak shatupoki nyeiguhwigos rowos um nubarigos aria shape shogosubuk yah um shuginohwah. <sup>9</sup> Aria ihishmorim arpesch douk sharik iri, shani eshudok douk shagiman iri shahwar shakri,

11:15 **11:15** Tik Matyu 21:12

"Apak manadudareh-uman! Iruhin natauruman nunekuman yopinyi aria nupe wosik. Anan douk nanakumori Debeini ananin nyeigur iri. <sup>10</sup> Apak mutuk Iruhin ananin nyeigur nyuto iruhw. Um maresh? Abudok nyutob um Iruhin nupe debeini um ananish arpesch um kabi douk seiwok Iruhin nutaurum apakin baben Devit um douk banaki hurukatin!"

<sup>11</sup> Aria Jisas nani ananim hani sabaishi arpesch shanak arigaha shanak shatogur Jerusalem. Aria Jisas nanak nawish Iruhin ananit debeiti urupat aria natik ihishmorim eneshenesh eshudok shakus numun iri. Anan natrish aria agagun douk iganigadae wabigep aria nani ananim 12-poreim disaipel hanakum Betani.

*Jisas Nakrip Enen Rowog Fik Um Enyen Mare Wata Nyubuki Worigun Nyiren*  
*(Matyu 21:18-19)*

<sup>12</sup> Aria ruwahepih amam wata haktukuk Betani hatanam hape hanaki yah aria Jisas nyurub ban. <sup>13</sup> Aria amam wata hape hanaku rougun aria Jisas natigu enen rowog fik nyeyotu. Anan natrin um nyunareh nyenek sabaisi shus aria nakri enep shurkwip ta pir. Douk namudok aria anan nanak um nakri nudi enep nupah. Aria anan madae nutik enep uwe. Shus atus sape. Um maresh? Enyenyib nyutob um shurkwip pir um douk watak. <sup>14</sup> Aria Jisas nakrip enyudok rowog fik nakri, "Nyak shurkwip ta mare wata enep pir aria arpesch shudiyep shupah uwe, uwok." Aria ananim disaipel hemnekanukuk.

*Jisas Nahiyah Arpesch Douk Shawish Shape Shenek Bisnis Iruhin Ananit Debeiti Urupat Iri*

*(Matyu 21:12-17; Luk 19:45-48; Jon 2:13-22)*

<sup>15</sup> Douk amam hanak arigaha hanak hatogur Jerusalem aria Jisas nawish numun narub um Iruhin ananit debeiti urupat tataoum aria nape nahiyah eshudok douk shenek salim um eshudok

eneshenesh iri shani eshudok douk shatorish iri shatogur sharuwok. Anan nawish nabadigumam tebolhos amudok douk arpesh shanaki shenek senisim<sup>11:15</sup>um utabor aria hekesh kupaibori iri. Aria nabadigumam wagiturahos amudok douk hape henek salim um mashubiguhw armiguhw um kupaishi shatruguh um shunak shunek ofa moguh shuko Iruhin iri. <sup>16</sup> Aria anan nakripesh um mare watak enesh arpesh shirao enesh eshudok eneshenesh shuwishi numun narub um Iruhin ananit debeiti urupat tataoum kupaishi shutorish uwe, uwok. <sup>17</sup> Aria anan nenek skulumesh nakripesh enyudok baraen douk nyape Iruhin ananik Buk iri nakri, "Iruhin nakri, 'Eikit urupat ta tupe um sabaishi arpesh douk shape ihigmorim debeigi nahobig agundok atap iri um shuwishi shupe shunek beten shorige um.' Aria ipak penekat kabi douk shakwuaruh iri esheshit um."

<sup>18</sup> Aria sabaishi shemnek Jisas ananin baraen aria eshesh shakitak yowiyokuk abom. Namudok aria amam debeimi pris hani amudok henek skulumesh um lo iri hemnek Jisas ananin baraen aria hape hatrugun um anah yah um hakri hon nugok. <sup>19</sup> Aria wabigep Jisas nani ananim disaipel hakutukuk Jerusalem hanak.

### *Enyudok Rowog Fik Yarin (Matyu 21:20-22)*

<sup>20</sup> Ruwahepih ruhur atin, Jisas nani ananim disaipel hakitak hagim yah hanak aria amam hatigu enyudok rowog fik. Enyen yarin agundok nukwaruh aria nyato nyanak iruhw um nyeiguhw shani shus shopunek. <sup>21</sup> Aria Pita urkum mormoguk enyudok baraen nabatik Jisas nakrip enyudok rowog-enyi aria nakrip Jisas nakri, "Debeini Tisa, nabatik nyak nyaho nyanyi rowog fik nyakripen um yarin aria douk nyanyi yarin abom."

<sup>22-23</sup> Aria Jisas nakripam nakri, "Ipak ta punek bilip um Iruhin. Adur atin eik yakripep, aria enen arpen madae nyur biyep urkwip um, aria nyunek bilip abom nyukri adur atinyum eshudok enyen nyakriyesh iri ta shutogur abom, aria nyukrip ahwudok yoduhw um

hwunatuk hwugrukuk yous um, enyen ta nyutogur kabi douk enyen nyakrium. <sup>24</sup> Douk namudok aria adur atin eik yakripep. Abudok nyutob ipak punek beten um Iruhin um nukkep enesh eshudok eneshenesh um, aria ipak punek bilip abom pukri adur atin anan ta nukepesh um, anan ta nukkep eshudok ipak parigan-umesh iri. <sup>25</sup> Aria abudok nyutob ipak punek beten aria ipak urkwip purum enesh yoweishi inahos kupaishi shenekesh um ipak iri um, ipak mare pusuwesh aria pukwreyeshuguk. Ipak ta punekesh namudok um ipakin Yaken nape iruhw heven iri shopunek ta mare nusuhwesh um ipakish yoweishi inahos aria nukwreyeshuguk. <sup>26</sup> [Aria ta ipak pusuwesh um yoweishi douk kupaishi shenekesh um ipak iri aria mare pukwreyeshuguk um, ipakin Yaken nape iruhw heven iri shopunek ta nusuhwesh um ipakish yoweishi inahos aria mare nukwreyeshuguk uwe, uwok.]"

### *Amam Harig Jisas Um Omi Nyakon Big Aria Anan Douk Nape Debeini (Matyu 21:23-27; Luk 20:1-8)*

<sup>27</sup> Aria Jisas nani ananim disaipel wata hanakum Jerusalem. Amam hanak hatogur aria Jisas nanak nawish numun narub um Iruhin ananit debeiti urupat tataoum. Aria amam debeimi pris hani amam debeimi Juda hanaki haparugan. <sup>28</sup> Aria harigan hakri, "Nyak nyarao maren big um nyunek enyudok mour? Aria amiapen nyeken enyudok big?"

<sup>29</sup> Aria Jisas nakripam nakri, "Eik shopunek yakri irikep enen baraen. Aria ta ipak pubeime tukwanin um, eik shopunek ta ikripep um omi nyeke big aria douk yenek enyudok mour. <sup>30</sup> Ipak kripe, Jon douk nenek baptaisumesh iri omi nyakon enyudok mour aria douk nenek baptaisumesh? Iruhin nakonen o enesh arpesh meyo?"

<sup>31</sup> Aria amam kanak haneyagwreh hakri, "Aria apak mukri Iruhin nakonen um, anan ta wata norigap nukri, 'Douk namudok aria ipak madae punek bilip um Jon ananin baraen uwe um maresh?'"

<sup>32</sup> Aria ta apak mukri ‘arpeh meyoh shakonen um aria douk neneken’ um, enyudok baraen shopunek ta mare wosik uwe.”

Aria amam hanogugur um eshesh armam armago. Um maresh? Ihishmorim douk shakri Jon anan douk anan adurin profet.

<sup>33</sup> Aria amam hakrip Jisas hakri amam madae hudukemesh uwe, uwok.

Aria Jisas nakripam nakri, “Eik shopunek ta mare ikripep um omi nyeke big aria douk yenek enyudok mour.”

## 12

*Jisas Nakripam Wobuwobren Baraen Um Yowemi Armam Henek Mour Nubarig Iri*

*(Matyu 21:33-46; Luk 20:9-19)*

<sup>1</sup> Aria Jisas nakripam enyudok wobuwobren baraen nakri, “Anan arman nau wain iyoh aria narok narub ananig nubarig. Aria anan narok anag bariyaigi nuwag um ko sharauri wainip orokwipi shurkwip aria shunak shishishep shumakwiyeshap um ihat tutogurep. Aria shopunek, narak anap ourop potem iruhw iri um anan arman nunaki nupe neyoh nubarig ba nupe um. Aria anudok nagrem nubarig iri nakrip kupaimi armam henek kontrak hanaki hape henek mour ananig nubarig aria anan nanak kupaigunum. <sup>2</sup> Douk nanak nape arigaha aria abudok nyutob um wainip shurkwip orokwip shudiyep um batogur. Aria anan neshopok anan nenekuman mour meyoh iri nanak um nukrip amudok henek mour ananig nubarig iri hukani ananip um wainip shurkwip. <sup>3</sup> Aria anan nanak natogur aria amam han aria heshopokan natanam nanak meyoh. <sup>4</sup> Douk anan nanak napeik aria nagrem nubarig iri wata shopunek neshopok kupaini nenekuman mour meyoh iri nanak um nukripam hukani enep shurkwip. Douk nanak natogurumam aria amam wata shopunek haworun barag aria han heneken abraenyin atun aria heshopokan

natanam nanak meyoh. <sup>5</sup> Aria wata shopunek neshopok kupaini nanak aria amam han nagok. Aria anan neshopok anam shopunek hanak aria amam henekeshumam namudok atin. Anam ham henekam abraenyim atum heyokasam, aria anam ham hagok.

<sup>6</sup> “Douk amudok henek mour um anudok nagrem nubarig iri hatuh, aria ananin nunganin douk anan urkum manawash-uman iri atun napeik. Aria anan naneyagwreh nakri, ‘Eikin nunganin nunak um, amam ta humnekan.’ Aria anan neshopokan nanak. <sup>7</sup> Douk nanak natogur aria amam henek mour nubarig iri hatrun aria hanakripam hakri, ‘Anudok nagrem nubarig iri nugokuk um, ananin nunganin ta nugrem ihishmorim ananish eshudok. Douk namudok aria apak mon nugokuk um apak ta muraon ananig nubarig!’ <sup>8</sup> Douk namudok aria amam hasuwan han nagok aria hawashan natogur nakusuk aduk agudok nubarig.”

<sup>9</sup> Aria Jisas narig amudok debeimi Juda nakri, “Aria anudok nagrem nubarig iri ta nunek maresh? Anan ta nunaki nubo amudok henek mour iri hugok hutuh aria ta wata nurao kupaimi hunak hunek mour ananig nubarig. <sup>10</sup> Aria ipak patrin enyudok baraen nyetem Iruhin ananik Buk iri aka, uwok? Baraen enyudok,

‘Amudok utom12:10douk

harok urupat iri hakri wokumam iri douk matogur sagomim utom masah wobratum urupat iri.

<sup>11</sup> Amam douk Debeini nenekam matogur namudok

aria apak manadudareh-umam makri enyen douk Debeini atun neneken iri mour!’ ”

<sup>12</sup> Aria amam debeimi Juda hadukemesh hakri anan nakri enyudok wobuwobren baraen um amam. Douk namudok aria amam juwehosim um anan aria hakri hunek kwotuman aria huweshikan. Aria amam hanogugur um eshesh armam armago aria hakutunukuk ba hanak.



*Amam Harig Jisas Um Shunek Takis  
Um Sisar Aka, Uwok  
(Matyu 22:15-22; Luk 20:20-26)*

<sup>13</sup> Aria anah nyumnah, amam debeimi Juda heshopok anam Farisi hani anam Herot ananim hanak henek roh w um hukwiraeh Jisas horigan enen baraan. Amam henekesh namudok um hakri kadak amam humnekan nukri enen yoweinyi baraan um hunek kwotuman-umen iri. <sup>14</sup> Aria amam hanak agundok Jisas napeum aria harigan hakri, “Debeini Tisa! Apak madukemeshum nyak douk madae nyunogugur enesh arpesh uwe. Aria nyak douk madae nyukrip nyeiguhw shato iruhw-eshi arpesh kupainyi baraan aria nyeiguhw wokeshi nyukripeshuk kupainyi uwe, uwok. Nyak apa nyakripesh atin baraan ihishmorim arpesh. Aria nyak apa nyagipesh adurin atinyi baraan aria nyenek skulumesh wosik um Iruhin anan ih aih. Douk namudok aria nyak kripap. Apakin lo douk nyakri mumam? Enyen douk wosik um munek takis um debeini gavman um Sisar aka, uwok?”

<sup>15</sup> Aria Jisas nadukemesh um amam douk henek roh w. Douk namudok aria anan narigam nakri, “Ipak pakri pukwiraeh um maresh? Ipak haroki anam utom douk pape penek takis omi ba itrum.”

<sup>16</sup> Aria amam hanaki hakon anam utom aria Jisas narigam nakri, “Enyudok nyeigur aria aborir shetem amudok utom iri omiyesh?”

Aria amam hakri, “Debeini gavman Sisar ananish.”

<sup>17</sup> Aria Jisas nakripam nakri, “Sisar ananish eshudok eneshenesh ta puko Sisar. Aria Iruhin ananish ta puko Iruhin.”

Aria douk anan nakripam namudok aria amam hakitak yowiyokuk abom.

*Amam Sadyusi Harig Jisas Um Shagok  
Iri Ta Shukitaki Aka, Uwok?  
(Matyu 22:23-33; Luk 20:27-40)*

<sup>18-19</sup> Aria amam Sadyusi, douk hakri shagok iri ta mare wata shukitaki iri hanaki Jisas napeum aria harigan hakri, “Debeini tisa, seiwok Moses nuwemaguk enyudok Iruhin ananin lo um apak nakri

namudok, ‘Aria anan arman ananik irohukwik madae kubuki enesh batowish aria anan nugokuk um, ananin wanin ta nukwaur. Anan ta nukwaur um shubuki batowish um aria ta shubuh ashukenyik nuwag.’”

<sup>20</sup> Aria amam hakripan shopunek hakri, “Anob nyutob, 7-poreim nugamim douk atish amakenyish shamubuki iri hape. Aria ashuken narao onok irohukwik aria anan nagokuk aria okwok madae kubuki enesh batowish uwe. <sup>21</sup> Aria aninuman nakwaur aria anan shopunek nagok aria okwok madae kubuki enesh batowish uwe. Aria douk anan nagokuk aria rabinari iri nakwaur. Douk nakwaur shape aria anan shopunek nagok aria madae kubuki enesh batowish uwe. <sup>22</sup> Aria namudok atin, ihm-morim amudok 7-poreim haraok aria amam ihm-morim hagokuk aria okwok madae kubuki enesh batowish uwe. Aria okwok shopunek kwagiguk kwagok. <sup>23</sup> Aria abudok nyutob shagok iri wata shukitaki um, okwudok armatok ta kwukitaki aria kwupe um meini? Nyak nyadukemesh, sagramatin ihm-morim amudok 7-poreim haraok iri atum.”

<sup>24</sup> Aria Jisas nakripam nakri, “Ipak madae pudukemesh uwe. Um maresh? Ipak madae pudukem baraan nyetem Iruhin ananik Buk iri uwe. Aria shopunek, madae pudukemesh um agundok Iruhin dodogowini abom um uwe. <sup>25</sup> Abudok nyutob shagok iri wata shukitak-umori, armam armago ta mare shunoraum um atin uwe, uwok. Eshesh ta shupe kabi douk Iruhin ananish enselahos douk shape iruhw heven iri um. <sup>26</sup> Aria ipak ta patarihen iri Iruhin nakripepen iri baraan um agundok ta shagok iri wata shukitaki um aka, uwok? Aria shopunek, ipak patarihen enyudok baraan douk nyetem okwudok buk Moses nenyemok iri aka, uwok? Moses douk natik nyih hanu enen shokwinyi rowog aria Iruhin nakripan enyudok baraan nakri, ‘Eik douk Abraham nani Aisak aria Jekop amamin Iruhin.’ <sup>27</sup> Namudok aria Iruhin douk madae shagok iri esheshin uwe, uwok. Anan douk shape iri esheshin Iruhin. Aria ipakin baraan madae adurin

abom uwe, uwok.”

*Iruhin Ananin Nyarik Iri Lo  
(Matyu 22:34-40; Luk 10:25-28)*

<sup>28</sup> Aria anan nenek skulumesh um lo iri shopunek nanaki nape nemnekam um hape hanatutukem um. Aria shopunek, anan nemnek Jisas nakripamen iri baraen douk yopunyi atin abom. Douk namudok aria anan narig Jisas nakri, “Meinyi Iruhin ananin lo douk nyape nyarik abom nyeshagrakuk ihinyumorim lo?”

<sup>29</sup> Aria Jisas nakripan nakri, “Nyarik iri lo douk enyudok,

‘Ipak Israel ta pumnek! Apakin Debeini Iruhin abom douk anan atun Iruhin.

<sup>30</sup> Douk namudok aria ipak urkwip ta punawasham abom ipakin Debeini Iruhin.

Aria ipakiruh aparuh, huni ipakish mishish shuni ipakip urkwip ta shunawasham abom ihinmorim um ipakin tinytin

aria pukwu ipakin dodog um punek ananin mour.’

<sup>31</sup> Aria nyagimori enyudok iri douk enyudok,

‘Ipak ta urkwip punawasham kupaishi arpesh douk shape hurukatin um ipak iri

kabi ipak urkwip punawasham ipak kanak um.’

Aria enyen douk madae enen kupainyi lo nyishagrakuk enyudok biyen lo uwe, uwok.”

<sup>32</sup> Aria anudok nenek skulumesh um lo iri nakrip Jisas nakri, “Tisa! Nyakin baraen douk yopunyi atin abom. Nyak nyakri adur! Iruhin douk anan atun Debeini abom aria madae anan shopunek nupe debeini kabi douk anan um uwe. <sup>33</sup> Douk namudok aria adur atin, apakip urkwip ta punawasham abom um anan atun. Aria apakiruh aparuh huni apakish mishish shuni apakip urkwip ta shunawasham abom aria muko ihinyumorim um apakin dodog um munek ananin mour. Aria urkwip punawasham kupaishi shape hurukatinyum apak iri kabi douk apak urkwip punawasham apak kanak um. Enyudok biyen lo douk

nyarik iri yopunyi lo abom. Aria ta apak mugipesh enyudok biyen lo um, ehudok aih douk hushagrakuk agundok apak munek ofa um eneshenesh eshudok mashaisheh nyih hanish hashahuk ba mako Iruhin um shani ihinyumorim ofa shopunek.”

<sup>34</sup> Aria Jisas nemnekan um ananin baraen douk yopunyi adurin atin abom aria nakripan nakri, “Abudok nyutob um nyuwishi agundok Iruhin nape Debeini um ananish arpesh um douk banaki hurukatin.” Aria ihishmorim arpesh shanogugur aria madae shorigan um enen shopunek baraen Jisas uwe, uwok.

*Jisas Narigesh Um Kraish Douk Iruhin Nagraehan Neshopokan Nanakumori Nunarao Arpesh Iri*

*(Matyu 22:41-46; Luk 20:41-44)*

<sup>35</sup> Jisas nape nenek skulumesh numun narub Iruhin ananin debeiti urupata tataoum. Aria nakripesh enyudok baraen nakri, “Amudok henek skulumesh um lo iri hakri Devit ananin barhonin ta nutogur Kraish douk Iruhin nagraehan neshopokan nanakumori nunarao arpesh iri um maresh? <sup>36</sup> Seiwok douk Iruhin ananin Mishin nyohur Devit kanak aria nakri enyudok baraen um Kraish nakri, ‘Debeini nakrip eikin Debeini nakri, “Nyak poe agundok um eikin yopunyi rogurehahum arigaha ibo nyakim horim ba hubuhuk.” ’

<sup>37</sup> “Aria tik, Devit kanak douk nahwar anudok arman Kraish ananin Debeini. Douk namudok aria Kraish ta wata nutogur Devit ananin barhonin mumam?”

Aria douk Jisas nakripesh namudok aria sabaishi arpesh shanadudareh abom shakri ananin baraen douk yopunyi adurin atin.

*Amam Henek Skulumesh Um Lo Iri Amamih Yoweih Aih*

*(Matyu 23:1-36; Luk 11:37-54, 20:45-47)*

<sup>38</sup> Aria Jisas nape nakripesh baraen nakri, “Ipak gamo pudukemesh um ipak mare pugipesh amudok henek skulumesh um lo iri um amamih yoweih aih. Amam hanadudareh abom hore rouhi atih रुपeh hurahaen um arpesh shutrum shukri amam da yopumi debeimi armam. Aria

shopunek, hakri hurahaen hunak agundok arpesch apa shantum shapeum, aria shutrum aria shunek-umam yopihi nyumneh. <sup>39</sup> Aria hanak um lotu eshesh Juda shape sheneyagwreh baraenogwi urusag um, amam hanadudareh um hunak hupe hurik, hutem yopishi wagturahos um kadak arpesch shutrum. Aria shenek debeiguni worigun obi nyutob, amam apa hanadudareh um hunak hupe yopugunum douk debeimi atum hapeum. <sup>40</sup> Aria amam apa hanak hawish armago douk armam hagog howosopukuk iri owoig urusag aria hatru hakwumesharuh owowish eshudok eneshenesh. Aria amam hanak hape henek beten um, amam henek rourouni beten meyoh um hakri kupaishi arpesch shutrum. Aria kweipon Iruhin ta nuwanamam amamish yoweishi inahos aria ta nunekam humnek debeiri eriger.”

*Onok Armatok Arman Nagok Nakwusopukuk Iri Kwenek Ofa Kwakon Utabor Iruhin*  
(Luk 21:1-4)

<sup>41</sup> Jisas nape hurukatin um asudok bokis douk shape shakwutu utabor babuh um gani numun Iruhin ananit debeiti urupat. Aria anan nape natik arpesch shanaki shape shakwutu utabor babuh asudok bokis um. Sabaishi shogrem sabaibori utabor iri shanaki shakwutu debeibori utabor babuh bokis. <sup>42</sup> Aria onok armatok douk anan nagok nakwusopuk iri kwanaki kwakwutu biobor shokwubori utabor babuh.

<sup>43</sup> Aria Jisas nahwar ananim disaipel hanaki aria nakripam nakri, “Adur atin, eik yakripep, okwudok arman nagok nakwusopuk iri armatok okwokwibor karowibor biobor utabor, douk kwanaki kwakwutubor bokis iri douk sabaibori abom. Ababor douk beshagrakuk abom abrudok sabaibori utabor douk ihishmorim shanaki shakwutubor iri. <sup>44</sup> Eshudok ihishmorim shanaki shakwutu tukwanibor um esheshibor utabor babuhuk bokis aria tukwanibor debeibori bakwusumeshuk urusag. Aria okwok kwakwutu sabaibori okwokwibor utabor. Aria okwok douk nyaruk armatok iri, madae anabor utabor bukusamokuk

urupat um kwunotor worigun um uwe, uwok.”

## 13

*Jisas Nakri Kupaishi Arpesch Ta Shununu Iruhin Ananit Debeiti Urupat*  
(Matyu 24:1-2; Luk 21:5-6)

<sup>1</sup> Douk Jisas nape iri numun Iruhin ananit debeiti urupat nakitak nakri nutogur aduk, aria anan ananin disaipel nakripan nakri, “Debeini Tisa! Nyak tik agwudok yopugwi urusag douk sharokog yopubori utabor iri.” <sup>2</sup> Aria Jisas nakripan nakri, “Nyak nyatik agwudok urusag aria nyakri yopugwi. Aria anah nyumnah ta kupaishi ta shunaki shununug aria ta mare shukutukuk anam atum utom mutemagak iruhw um kupaimi utom uwe, uwok. Ihibor-morim ta shuburunik bubuk bukus atap atin.”

*Jisas Nakri Sabainyi Eneyenen Amaen Ta Nyutogur*  
(Matyu 24:3-14; Luk 21:7-19)

<sup>3</sup> Aria Jisas nato nakih nape agundok iruhw um yoduhw Oliv wobrehah um Iruhin ananit debeiti urupat tataoum. Aria Pita nani Jems aria Jon hani Andru amam atum hanak hatogruman aria harigan hakri, <sup>4</sup> “Apak makri nyukripap um ahudok nyumnah douk ta eshudok iganigadae nyakripap-umesh iri ta shutogurum. Aria shopunek ta maresh shurik shutogurum apak mutrish aria mudukemesh mukri eshudok douk hurukatin um ta shutogur?”

<sup>5</sup> Aria Jisas nakripam nakri, “Ipak gamo punodukem um ta mare anam armam hunaki hunek rohwumep aria hunekep pugipesh amamin baraen uwe, uwok! <sup>6</sup> Sabaimi armam ta hunaki aria amam atun atun ta hunek rohwumep hukripep um eikin nyeigur hukri, ‘Eik Kraish douk Iruhin nagraehe aria neshopoke yanaki iri.’ Aria amam ta hunek rohw um sabaishi arpesch. <sup>7</sup> Ipak ta pumnek baraen um wanohw hwutogur kupairubi rougunirub warub um. Aria shopunek ta pumnek shupe shurpak hurukatin um ipak pape um. Aria ipak mare punogugur, uwok. Adur wanohw ta hwutogur, aria

hugiguk iri nyumnah ta mare arigas huto-  
gur. <sup>8</sup> Aria anag shokugi nahobig ta  
shukitak shuni kupaigi shokugi nahobig  
shurpak. Anan king nini ananish ta shuk-  
itak shuni kupaini king nini ananish shur-  
pak. Aria anagun agundok atap ta enyik  
kwutuk, aria anagun ta debeirubi nyurub  
besh aria sabaishi ta shugok um nyurub.  
Enyudok ihinyumorim nyurik iri amaen  
ta nyutogur kabi douk arudok rarik iri  
eriger douk armatok kwarig kwomnek  
um aria kadak kwabuki batowin um.

<sup>9</sup> “Douk namudok aria ipak kanak ta  
gamo punadukem. Eshesh ta shunaki  
shusuwep shuraepum debeimi douk hape  
hasuhw kwotog iri. Aria shopunek,  
ta shuwishi shep gani numun eshesh  
Juda shape sheneyagwreh baraen-ogwi  
urusag. Eshesh ta shep um agundok  
pasuhw eikin baraen pagipesh eik um.  
Aria eshesh ta shusuwep shuraepum  
amam debeimi gavman iri huni amam  
king hapeum pukripam Iruhin ananin  
yopinyi baraen douk nyakrium eik iri.  
<sup>10</sup> Aria sagomatin eikish arpesht ta shunak  
ihirubum warub bape agundok atap iri  
shukripesh Iruhin ananin yopinyi baraen  
iyoh, aria hugiguk iri nyumnah ta kadak  
hutogur.

<sup>11</sup> “Aria abudok nyutob eshesh  
shusuwep shuraep shunak shunek kwo-  
tumep um, ipak mare punogugur aria  
pukri ta punak aria piyagwreh mumam,  
uwok. Ihinyumorim baraen Iruhin ta  
nukepen abudok atub nyutob ipak pakri  
piyagwreh um. Douk namudok aria  
maren baraen ipak urkwip purumen  
iri, ipak ta pukriyen. Um maresh?  
Enyen douk madae ipak kanak pukrienyi  
uwe, uwok. Enyen douk Iruhin ananin  
Mishin nyepuhur aria douk pakrienyi.  
<sup>12</sup> Aria enesh arpesht ta nyirub juwehos-  
irub um esheshish ashukenyish owashish  
aria ta shunekumesh kwot shuweshikesh  
aria shunak kupaishi shesh shugok.  
Aria anam aruhim ta nyirub juwehos-  
irub um amamish batowish aria ta  
hunekumesh kwot um huweshikesh aria  
shunak kupaishi shesh shugok. Aria

batowish shopunek ta nyirub juwehos-  
irub um esheshish amakenyish aria ta  
shunekumesh kwot um shuweshikesh  
aria shunak kupaishi shesh shugok.  
<sup>13</sup> Aria ihishmorim arpesht ta shukri  
wokumep aria shukep agabus shukri  
ipak yoweipi um agundok pagipesh eik  
um. Aria eshudok douk shugipesh eik  
dodogowish atish arigaha shugok iri,  
Iruhin ta nunaraesh shutanamori shupe  
wosik abom.”

*Jisas Nakri Debeinyi Amaen Abom Ta  
Nyutogur*  
(Matyu 24:15-28; Luk 21:20-24)

<sup>14</sup> Aria Jisas ta nakri namudok, “Aria  
ipak ta putik kupaishi shuraeri enyudok  
yoweinyi mugu abom shunaki shuwishi  
shunyubuk numun Iruhin ananit debeiti  
urupat aria ta nyunekat tubosusih. Enyu-  
dok yoweinyi mugu Iruhin douk nakri  
uwok um nyukus numun ananit debeiti  
urupat iri.”

Arpen<sup>13:14</sup>nyutorih enyudok baraen  
iri ta gamo nyudukemen wosik.

“Aria abudok nyutob arpesht shape  
ihirubmorim warub bape shokugi naho-  
big Judia iri ta shuruwok shunak um  
yodururuh-igun um. <sup>15</sup> Aria shape aduk  
hurukatin um esheshig urusag iri, ta  
mare shukitak shuwishi urusag um shu-  
nahuri enesh eshudok eneshenesh uwe,  
uwok. Eshesh ta shuruwok shunak  
meyoh abom. <sup>16</sup> Aria eshudok douk shey-  
otu nubarigos iri ta mare wata shatanam  
shusahur shunak um esheshig urusag  
um shunahuri esheshig saketog uwe,  
uwok. <sup>17</sup> Aria gihaum oudok aparuhi-  
wari armago uni oudok douk wasuhw  
batowish douk watak shawok nyumeb  
iri. Ahudok nyumnah owo ta wanomnek  
debeiri eriger! <sup>18</sup> Aria ipak ta punek  
beten um enyudok debeinyi amaen um  
mare ta nyutogur abudok nyumanugos-  
ibi nyutob ta butogrum uwe, uwok.  
<sup>19</sup> Ahudok nyumneh, enyudok amaen ta  
nyutogur aria arpesht ta shumnek debeiri  
eriger. Arudok eriger seiwok Iruhin  
nenek agundok atap nani eneshenesh

13:14 **13:14** Enyudok baraen Jisas madae nukrien uwe. Enyen douk Mak kanak nenyem.

shani arpes shatogur shape shanaki ari-gaha shatograri douk, aria enyudokmori amaen madae enen nyutogur aria nyunek arpes shumnek arudokmori eriger uwe. Aria kweipon shopunek, arpes ta mare wata shumnek anar arudokmori eriger uwe, uwok. <sup>20</sup> Aria Debeini nugraeh sabaihi nyumneh um enyudok amaen nyutogur akure, ta mare enesh arpes shupeik, uwok. Ihishmorim ta shugok shutuh. Aria anan urkum morum ananish arpes anan nanagraehesh iri aria nagraeh karowih meyoh nyumneh um enyudok amaen nyutogur um. <sup>21</sup> Aria ta abudok nyutob enesh arpes shunaki aria shukripep shukri, 'Ipak tik, Kraish douk Iruhin nagraehan neshopokan nanaki iri anudok nape agundok o nani nape ganik um, ipak mare punek bilipumesh uwe, uwok.' <sup>22</sup> Sabaimi armam atun atun ta hunaki hunek rohwmep hukri, 'Eik Kraish.' Aria anam ta hunaki hunek rohwmep aria amam atun atun ta hukri, 'Eik anan profet.' Aria amam ta hunek enenyenen Iruhin atun neneken iri mour. Amam ta hunekesh namudok um hukri hunek rohwmep um Iruhin nanagraehesh iri arpes um shukri adur amam Iruhin nataurumam iri. Aria ta amam dodogowim akure, amam ta hunek rohwmep. Aria ta uwok. <sup>23</sup> Namudok aria ipak gamo pudukemesh um abudok nyutob enyudok debeinyi amaen nyutogur um. Eik douk enyudok yarig yakripepuk um ihishmorim eshudok eneshesh douk ta shutograri."

*Eik Anudok Arman Douk Yatogur Adurinyi Arpen Iri Ta Wata Itanamori (Matyu 24:29-31; Luk 21:25-28)*

<sup>24</sup> "Aria ahudok nyumneh um enyudok amaen douk ta nyunek arpes shumnek debeiri eriger iri ta hunak hutuhuk, aria 'nyumnahin nini wabin aub ta dokotigunumab.

<sup>25</sup> Aria eneshesh shape iruhw utag iri shuni aub iri unib ta grurugwresh aria unib ta unatuk ugruki atap.'

<sup>26</sup> "Aria abudok nyutob, Eik Anudok Arman douk yatogur adurinyi arpen iri ta wata ikutukuk iruhw heven inaki. Eik ta dodogoiwe itrugun abom aria itemori

onog orug inaki. <sup>27</sup> Aria ta ishopok eikish enselahos shunak ihigunmorim um agundok atap aria shuraui ihishmorim eik yanagraehesh iri arpes shunaki shupe atugun."

*Wobuwobren Baraen Um Rowog Fik (Matyu 24:32-35; Luk 21:29-33)*

<sup>28</sup> "Ipak urkwip purum enyudok rowog fik aria pudukemesh. Abudok nyutob enyen nyupe nyunareh obi nyutob, ipak ta putrin aria pudukemesh pukri douk hurukatin um wah atuh hutao. <sup>29</sup> Aria douk ta namudok atin. Ipak ta putik enyudok ihinyumorim amaen douk iganigadae yakripep-umen iri nyutogur nyunakuk, aria ipak ta pudukemesh um eik douk hurukatin um itanamori. <sup>30</sup> Adur atin eik yakripep! Ipak doukipari, enep ta mare arigas pugok uwe, uwok. Ipak ta wata pupe aria enyudok ihinyumorim amaen douk iganigadae yakripep-umen iri ta nyutogur. <sup>31</sup> Ihishmorim eshudok eneshesh douk shape iruhw utag iri shuni utag atug, shuni ihishmorim shape agundok atap iri shuni atapig nahobig shopunek ta burukworesh shunak shuwishuk. Aria eikin baraen ta nyupe ihih nyumneh."

*Ta Mare Enesh Arpes Shudukem Ahudok Nyumnah Eshudok Shutogurum (Matyu 24:36-44)*

<sup>32</sup> Aria Jisas ta nakri namudok, "Madae enen atin arpen nyudukem ahudok nyumnah o aua uwe. Iruhin ananish enselahos shape iruhw iri shani eik ananin nunganin shopunek madae mudukemah uwe. Yain atun nadukemah. <sup>33</sup> Ipak douk madae pudukem ahudok nyumnah douk ta eshudok eneshesh shutogurum uwe. Douk namudok aria ipak ta gamo pudukemesh aria pupe putrugun-umoh. Ipak mare pupe ba urkwip pushukepuk uwe, uwok. <sup>34</sup> Ahudok nyumnah eshudok eneshesh shutogurum ta kabi enyudok wobuwobren baraen um. Baraen enyudok. Anan arman nakri nukutukuk ananit urupat aria nunak anabur rougunibur wabur. Anan nakri um nunak aria nakitak nagraeh-aguk mour um kupakupaimi amam atun atun

douk henekuman mour meyoh iri. Aria nakrip anudok nape neyoh um wit iri um neyoh wit aria nupe nutrugun um anan wata nutanamori um.

<sup>35</sup> “Douk namudok aria ipak ta gamo pudukemesh aria pupe putrugun. Um maresh? Ipak madae pudukem abudok nyutob douk ta urupatinari nutanamori obi nyutob uwe. Anan ta nunaki wabigun o orokohunib um wab o nunaki owotog gwakitak um o nunaki ruwahep. Ipak madae pudukemesh uwe, uwok. <sup>36</sup> Ta wosik atin anan nunaki ahudok atuh aria nutrip um ipak pishuh. Aria uwok, ipak ta pupe putrugun-uman. <sup>37</sup> Aria enyudok baraen eik yakrip ipak enyi, douk eik yakrip ihishmorim arpeshep shopunek. Ipak gamo pudukemesh aria pupe putrugun um eshudok eneshenesh douk iganigadae eik yakripep-umesh iri ta shutogurum.”

## 14

*Amam Debeimi Hakri Hubo Jisas Nugok*

*(Matyu 26:15; Luk 22:1-2; Jon 11:45-53)*

<sup>1</sup> Ekeh douk biyeh shopunek nyumneh watak hapeum shunek agundok debeiguni Pasovaigun worigun aria shuwok bret douk shushaiteh aria madae tukitak debeiti iri uwe. Aria amam debeimi pris hani amam henek skulumesh um lo iri henek rohwa um rihirahaen hanak hape haurim Jisas. Amam hauriman hanakum hakri anan atun nunak nupe anagun um, amam husuwan aria hunak hon nugok. <sup>2</sup> Aria amam wata hakri, “Uwok, apak mare muweshikan abudok nyutob shunek worigun obi nyutob. Um maresh? Ta armam armago shutik namudok aria shuhuri wanohwa aria shop.”

*Onok Armatok Kwourak Sanda Nyabuh Jisas Ananig Barag*

*(Matyu 26:6-13; Jon 12:1-8)*

<sup>3</sup> Aria Jisas nakitak nanak Betani aria nani Saimon douk riguk ehudok arugeh lepra hapenyan aria hape ananit urupat. Aria douk Jisas nape tebol, nape nawok worigun numun urupat, aria onok armatok kwasuhwi anar yopuri botol douk

shenekor anam utom iri kwanak kwawish. Arar douk shukunir um enen yopunyi sanda nyeigrinyum nad iri. Enyen apa shatorin debeibori utabor. Douk kwawish kwanak agundok Jisas napeum aria kwawor botol ba kwourak enyudok sanda nyabuh Jisas ananig barag.

<sup>4</sup> Aria enesh arpeshep shape agundok iri shatik namudok aria eshesh nyirub juwehos-irub aria shakri, “Okwudok kwanunin um enyudok yopunyi sanda?

<sup>5</sup> Douk apak muraen munak kupaishi shutorin aria shukop 300 siliwa-ibor utabor akure, douk ta wosik. Apak ta musuhwa abrudok debeibori utabor munaki aria misiyabor um eshudok yaruhish arpeshep um mutaurumesh!” Eshesh sheneyagwreh namudok aria shape shahaok. <sup>6</sup> Aria Jisas nakripesh nakri, “Ipak pahaok um maresh? Ipak kutukuk, okwok douk kwonekume yopunyi mour abom. <sup>7</sup> Eshudok

utabor wokeshi ta shini ipak shupe ihih nyumneh. Aria meihini nyumnah ipak pakri putaurumesh pukesh anabor utabor um, ipak ta pukesh-abor. Aria eik ta mare ini ipak mupe ihih uwe, uwok. <sup>8</sup> Aria enyudok mour douk okwok dodogowik um kwuneken iri, douk enyudok kweneken. Okwok kwanaki kwourak sanda kwakwrup eikihwa yegenyihwa um kwehig nuhut she igok aria shurume um. <sup>9</sup> Adur atin eik yakripep. Arpeshep shunak ihirubmorim warub agundok atap um shukripesh Iruhin ananin yopunyi baraen um, eshesh ta shukripesh um okwok kweneken iri shopunek aria eshesh ta urkwip purumok.”

*Judas Nani Debeimi Juda Hape Habo Baraen Um Huweshik Jisas*

*(Matyu 26:14-16; Luk 22:3-6)*

<sup>10</sup> Aria abudok nyutob, anan um amudok Jisas ananim disaipel nyeigur-inam Judas Iskariot iri nanak gani amam debeimi pris hapeum. Aria nakripam um anan nakri wosik um niyabigam um agundok Jisas nanak napeum aria amam hunak husuwan huweshikan. <sup>11</sup> Aria amam hemnek Judas ananin baraen aria hanadudareh abom aria habo baraen um amam ta hutorun hukon anabor utabor.

Aria Judas nakitak nanak aria nape nenek urkum um anah yah um niyabigom Jisas aria amam hunak husuwan huweshikan um.

*Jisas Nani Ananim Disaipel Henek Pasovaigun Worigun Hagnoh*

*(Matyu 26:17-25; Luk 22:7-14, 21-23; Jon 13:21-30)*

<sup>12</sup> Douk shenek agundok Pasovaigun worigun um, eshesh apa shawok bret douk shushaiteh ba madae tukitak debeiti iri uwe. Aria ahudok sagramih nyum-nah, eshesh apa shabo sipsipahos um shunek agundok Pasovaigun worigun um. Aria Jisas ananim disaipel harigan hakri, “Nyak nyakri apak munak munekagun agunum agundok Pasovaigun worigun um nyak nyunak nyugnoh?”

<sup>13</sup> Aria Jisas neshopok biom ananim disaipel hanak aria nakripam enyudok baraen nakri, “Ipak punak wabur aria ta puparug anan nusahi anap abar baropi marup. Ipak putrun aria pugipeshan punak. <sup>14</sup> Aria punak puwish atudok urupat anan nunak nuwishat iri aria pukrip atudok urupatinari pukri, ‘Apakin debeini tisa nakri amudok rum douk arpesh shape sheshuh omi douk ta anan nini apak ananim disaipel mupe munek Pasovaigun worigun mugnoh-ami douk mape agunum?’ <sup>15</sup> Ipak porigan aria anan ta niyabigep anam debeimi rum iruhitum urupat. Eshesh douk shagitom aria shagabeyam yopum mape. Aria ipak punak puwish pupe punekumap worigun.”

<sup>16</sup> Aria amudok biom disaipel hakitak hanak wabur aria haparug ihishmorim eshudok kabi douk iganigadae Jisas nakripam um. Aria amam hanak hape henek worigun um hugnoh um Pasova iri.

<sup>17</sup> Douk arigaha wabigep hurukatin um wab aria Jisas nani ananim 12-poreim disaipel hanak hawish hape hawok worigun. <sup>18</sup> Douk hape hawok worigun tebol aria Jisas nakripam nakri, “Adur atin eik yakripep. Ipak anan douk mape mawok worigun iri ta niyabig eikim horim um eik aria amam ta husuwe huweshike aria hurawe hunak um he igok.”

<sup>19</sup> Aria ananim disaipel hemnek namudok aria amamiruh aparuh yoweruh aria amam atun atun harigan hakri, “Ta eik ikrip nyakim horim aka, ta omi?”

<sup>20</sup> Aria Jisas nakripam nakri, “Ipak 12-poreim anan douk ta nini eik ukutu bret tubuh dis aria utoh iri ta nuyabigam um eik. <sup>21</sup> Aria Eik Anudok Arman douk yatogur adurinyi arpen iri ta she igok kabi douk baraen nyetem Iruhin ananik Buk iri nyakri ta igok um. Aria anudok douk niyabig eikim horim um eik iri, yoweishi eshudok eneshenesh abom ta shutogur-uman! Douk namudok aria eik yakri gihauman. Douk seiwok amakek madae kwunabuki akure, ta wosik.”

*Jisas Nakom Bret Aria Wain Ananim Disaipel Hashah*

*(Matyu 26:26-30; Luk 22:15-20; 1Kor 11:23-25)*

<sup>22</sup> Douk amam hape hawok worigun aria Jisas nohur anat bret nasuwat aria nenek beten nenek tenkyu um Iruhin aria naworut nako ananim disaipel. Aria nakripam nakri, “Atudok bret douk eik-ihw yegenyihw. Ipak suwot aria putoh.”

<sup>23</sup> Nakom bret hatoh jurug aria nohuri anap kap wainibar abar borapi aria nenek beten nenek tenkyu um Iruhin aria nako amam atun atun habaroh. <sup>24</sup> Aria anan nakripam nakri, “Abrudok wainibar abar douk eikibor owishibor. Douk butourak um butaurum sabaishi arpesh aria benek enyudok Iruhin ananin adurin atin abom iri baraen kontrak nyutogur dodogowin. <sup>25</sup> Aria adur atin eik yakripep. Eik ta mare wata iwok anabar wainibar abar, uwok. Eik ta ipe arigaha wata inak abrudok wabur Iruhin nape Debeini um ananish arpesh shapeum ba iyoh, aria eik ta kadak wata ibaroh.”

<sup>26</sup> Aria amam heyorub onohw awehw jurug aria hatogur hato um yoduhw Oliv.

*Jisas Nakripam Um Pita Ta Nunek Rohw Nukri Anan Madae Nudukem Jisas Uwe.*

*(Matyu 26:31-35; Luk 22:31-34; Jon 13:36-38)*

<sup>27</sup> Aria Jisas nakrip ananim disaipel nakri, “Kadak ipak ihipmorim ta pukutukuk eik puruwok punakuk atun atun.

Um maresh? Iruhin ananin baraan nyetem ananik Buk iri douk nyakri, 'Eik ta ibouk anudok neyoh sipsipahos iri aria sipsipahos ta shuruwok shunak atin atinyuk.'<sup>28</sup> Aria eshesh ta she igok aria eik ta wata ikitak aria irik inak um Galili. Aria ipak ta pugime punaku."

<sup>29</sup> Aria Pita nakripan nakri, "Ta ihmorim hukutukuk nyak aria huruwok um, eik ta ini nyak upe biohw!"

<sup>30</sup> Aria Jisas nakripan nakri, "Adur atin eik yakripen. Kwehigib wab, nyak ta nyunek roh w biyeh otuh nyukri nyak madae nyudukem eik uwe aria owot ta tukitak tiyagwreh biyeh."

<sup>31</sup> Aria Pita dodogowin atun abom nakrip Jisas nakri, "Adur atin eik yakripen, eik ta mare inek roh w ikri eik madae idukemen uwe, uwok. Ta eshesh shukri shubo nyak nyugok um, eik shopunek ta ini nyak shohw ugok ahudok atuh!" Aria ihmorim disaipel shopunek hakripan enyudok atin baraan.

*Jisas Nape Nenek Beten Nubarig Getsemani*

*(Matyu 26:36-46; Luk 22:39-46)*

<sup>32</sup> Aria Jisas nani ananim disaipel hanak hatogur anagun nyeigur-igunum Getsemani aria anan nakrip ananim disaipel nakri, "Ipak pupe agundok aria eik inak inek beten gani." <sup>33</sup> Aria anan narao Pita nani Jems aria Jon atum hanaman hanak. Aria agundok anan nemnek yowiyokuk abom aria ananihw apahw yowehw abom.

<sup>34</sup> Aria anan nakripam nakri, "Eikin mishin yowen abom aria eik yemnek um yakana igok atin. Douk namudok aria ipak pupe ba piyohe." <sup>35</sup> Aria natanam nanak madae rougun abom uwe aria nabuh nakus ananin domaen nyatik atap aria nenek beten narig Iruhin. Anan narigan um nukri kadak mumam um aria Iruhin wosik nukutukuk enyudok amaen um mare nyutogur-uman. <sup>36</sup> Aria Jisas nenek beten nakri, "O Aba<sup>14:36</sup>eikin Yain nyak douk dodogowini abom iri nyasuhw iruhw atap iri. Eik yakri nyak mare

nyukutukuk enyudok amaen ta nyutogrome iri uwe, uwok. Aria nyak mare nyugipesh eikim urkum uwe, uwok. Nyak nyugipesh nyakim atum urkum."

<sup>37</sup> Douk nenek beten jurug aria anan wata natanam nanak natrugun um ananim biom atun disaipel. Douk anan nanak aria natrum um amam heshuh hagok. Aria anan narig Pita nakri, "Saimon, ipak peshuh pagok aka? Ipak madae dodogowip um pupe punubur um atin aua piyohe uwe aka?" <sup>38</sup> Ipak pupe piyohe aria punek beten. Um Satan nunaki nukwiraehep um, ipak ta mare punek yoweinyi ina. Adur ipak mishish shakitak um pugipesh eikin baraan aria ipakiruh yegeshiweruh douk madae dodogowiruh uwe."

<sup>39</sup> Anan nakripam namudok jurug aria anan wata natanam nanak anah shopunek nanak nenek beten narig Iruhin. Anan nenek anudok atun beten iganigadae narik nenekan iri. <sup>40</sup> Anan nanak nenek beten jurug aria wata natanam nanak narpogun-umam. Aria anan natik um amam yobus sam dodog abom aria amam heshuh hagok. Aria anan nenyubarum hakitak aria amam madae hudukemesh um maren baraan ta amam hukripan um uwe.

<sup>41</sup> Aria Jisas wata shopunek natanam nanak nenek biyeh atih um nanak nenek beten narig Iruhin. Douk anan nenek beten jurug aria watak natanam nanak natogrumam aria nakripam nakri, "Ipak peshuh pape meyoh um douk jurug! Ipak kitak! Nyutob douk banaki, aria douk anan ta niyabig yowemi douk henek yoweishi inahos atin iri um Eik Anudok Arman douk yatogur adurinyi arpen iri. Aria amam ta hunaki husuwe huweshike. <sup>42</sup> Aria kitak munak. Tik anudok douk ta niyabig eikim horim um eik iri anudok nanaki."

*Amam Hanaki Howeshik Jisas*

*(Matyu 26:47-56; Luk 22:47-53; Jon 18:3-12)*

<sup>43</sup> Douk Jisas wata nape nakripam atin, aria Judas, nanak um amudok ananim



disaipel nanaki natogur-umam. Anan naniri sabaimi hanaki. Amam douk debeimi pris hani henek skulumesh um lo iri hani amam debeimi Juda hapeik aria heshopokam hasuhwi bainatog gwani rowos aria hanaki. <sup>44</sup> Aria amam hakitak hanak yah aria Judas nakrip Jisas ananim horim nakri, “Anudok douk kadak putik um eik inak isuwan inapuprikan iri, anudok douk Jisas. Aria ipak punak pusuwan puweshikan dodog aria puran punak.”

<sup>45</sup> Aria Judas nanak natogurum Jisas atin aria nakri, “Debeini tisa!” Aria nanak nanapuprikan. <sup>46</sup> Aria amam hanak hasuwan dodog aria howeshikan. <sup>47</sup> Douk amam howeshikan aria anan neyotu hurukatin iri natuki ananit bainat aria natupak anan douk nenekuman mour meyoh abom um debeini pris iri ananir atah tukarah.

<sup>48</sup> Aria Jisas narigam nakri, “Ipak pasuhwi bainatog aria rowos um punaki pusuwe puweshike kabi douk eik yakwuaruh iri, aka? <sup>49</sup> Ihih nyumneh eik yani ipak mape atugun aria yape yakriפש baraen numun narub um Iruhin ananit debeiti urupat tataoum aria ipak madae pusuwe puweshike uwe. Aria douk ipak ta punek enyudok baraen douk nyetem Iruhin ananik Buk iri nyutogur adurin.” <sup>50</sup> Aria ihm-morim ananim disaipel hakutukuk Jisas haruwok. <sup>51-52</sup> Douk amam howeshik Jisas haran harik hanak aria anan weroroini nanawashok shigorihwihi rupah atuh iri nagim Jisas nanak. Anan nagiman nanak aria amam hakri husuwan huweshikan aria ananir rupah hatukweshih hakusuk aria anan naruwok nanak meyoh.

### *Amam Henek Kwotum Jisas Um Amam Kaunsol*

*(Matyu 26:57-68; Luk 22:54-55, 63-71; Jon 18:13-14, 19-24)*

<sup>53</sup> Aria amam howeshik Jisas haran hanakum debeini pris ananit urupat. Aria amam ihm-morim debeimi pris hani amudok douk henek skulumesh um lo iri hani amam debeimi Juda shopunek hanak hape atudok urupat. <sup>54</sup> Aria Pita nagipesh Jisas nanak aria anan nagiguk

atin. Douk nanak natogur aria nawish narub um anudok debeini pris ananit urupat aria natik amudok douk heyoh Iruhin ananit debeiti urupat iri hautig nyih aria hapeimeh. Aria Pita shopunek nanak nanamam napeum nyih um hiyakan.

<sup>55</sup> Aria amam debeimi pris hani ihm-morim debeimi Juda douk hape hasuhw kwotog iri hahwar anam armam hanaki hape henekuman enen baraen douk madae adurin iri uwe um hakri amam debeimi hon nugokumen iri. Aria amam habirak hatik uwok. <sup>56</sup> Aria sabaishi arpesh shanaki shenekuman kwot shenek roh w shakri Jisas nenek eneshenesh yoweishi inahos aria esheshin baraen douk madae adurin uwe. Aria shopunek, eshesh douk madae shukri atin baraen uwe. Enesh shakri enen aria enesh shakriyuk enen. <sup>57-58</sup> Aria anam armam henek roh w um Jisas hakri amam hemnekan nakri anan ta nubrig Iruhin ananit debeiti urupat douk armam kanak harukat iri tubuh tukus atap. Aria um biyeh atih nyumneh meyoh, anan ta wata nurok kupaiti. Aria atat ta mare nurukat ananis wis, uwok. <sup>59</sup> Aria amam shopunek douk madae hukri atin baraen uwe. Anam hakri enen aria anam hakriyuk enen. <sup>60</sup> Aria amam ihm-morim hape hemnek aria anudok debeini pris nakitak narig Jisas nakri, “Nyak enen baraen um nyukripam um aka, uwok? Nyak nyakri mumam um enyudok baraen amam heneken um nyak iri?”

<sup>61</sup> Aria Jisas neyotu mumuken. Anan madae nukripan enen baraen uwe. Aria anudok debeini pris abom gamo narigan nakri, “Nyak Kraish douk Iruhin nagraehen neshopoken nyanaki iri? Aria nyak douk anudok Iruhin douk apak matuk ananin nyeigur nyato iruhw iri ananin Nuganin?”

<sup>62</sup> Aria Jisas nakripan nakri, “O adur atin douk eik atuwe. Aria ipak ta putik Eik Anudok Arman douk yatogur adurinyi arpen iri inak ipe yopunyi rogur ehahum Dodogowini Iruhin abom. Aria shopunek ta itemi orug inaki gani iruhw heven.”

<sup>63</sup> Aria anudok debeini pris abom nemnek namudok aria anan nyibur juwehosibur abom aria nabrig ananin rupeh. Aria nakripam nakri, “Apak mare wata muhwar enesh shopunek arpesh um shunaki shukripap um enesh yoweishi inahos anan nenekesh iri uwe, uwok. <sup>64</sup> Apak douk iganigadae memnek ananin baraen. Anan douk nabubunim um Iruhin aria ipak pakri mumam?”

Aria amam ihim-morim hakri anan nenek yoweishi inahos aria amam ta hon nugok. <sup>65</sup> Aria howeshiguk ananis nabes aria anam hakitak hanak hakusehan. Aria hadar wis aria hape han aria harigan hakri, “Nyak kripap kabi amam profet um, douk omi nyaen.” Aria amam heyoh Iruhin ananit debeiti urupat iri habowan popaeshohos aria haran hanak.

*Pita Nakri Anan Madae Nudukem Jisas Uwe*

*(Matyu 26:69-75; Luk 22:56-62; Jon 18:15-18, 25-27)*

<sup>66</sup> Aria onok armatok kwonekuman mour anudok debeini pris abom iri kwanaki aria kwatik Pita nape atap narub um anudok debeini pris ananit urupat. <sup>67</sup> Okwok kwatrun um napeum nyih. Aria okwok kwatrun duk aria kwarigan kwakri, “Nubokuhi eik yatrin nyani Jisas douk nanaki wabur Nasaret iri pape.”

<sup>68</sup> Aria Pita nenek rohwa nakri, “Uwok, eik madae idukemen uwe enyudok baraen nyak nyakriyen iri.” Aria anan nakitak nanak hurukatin um atudok wit douk shenekot tape tatiguk anagas iri aria anat owot takitak teyagwreh. <sup>69</sup> Aria okwok wata kwatanam kwatrun aria kwakrip eshudok sheyotu agundok iri kwakri, “Anudok shopunek douk anan Jisas ananin.”

<sup>70</sup> Aria Pita wata shopunek nenek rohwa nakri, “Eik uwok.”

Aria douk madae roubum uwe aria eshesh sheyotu agundok iri wata shakrip Pita shakri, “Adur atin nyak douk enen um Jisas ananin. Um maresh? Nyak douk nyapei shokugi nahobig Galili iri.”

<sup>71</sup> Aria Pita nenek rohwa nakri, “Ta eik inek rohwa um, eik yakri wosik um Iruhin ta ne igok! Eik madae idukeman

uwe, anudok arman ipak pape pakriyan iri.”

<sup>72</sup> Douk anan nakriyuk namudok aria ahudok atuh owot wata shopunek takitak teyagwreh biyeh. Aria Pita urkum morum enyudok baraen iganig Jisas nakriyen iri. Baraen douk enyudok, “Nyak ta nyunek rohwa biyeh otuh nyukri nyak madae nyudukeme uwe, aria owot ta tukitak tiyagwreh biyeh.” Aria anan nerek yowiyokuk.

## 15

*Amam Harao Jisas Hanak Um Debeini Gavman Pailat Nape Um Hunek Kwotuman*

*(Matyu 27:1-2, 11-14; Luk 23:1-5; Jon 18:28-38)*

<sup>1</sup> Aria ruhur atin, amam debeimi pris hani debeimi Juda hani amudok henek skulumesh um lo iri hani ihim-morim debeimi Juda hasuhw kwotog iri hantorum hape habo baraen. Aria amam hohur onohw maduhw haweshik Jisas ananish roguhwa aria haran um Pailat douk nape debeini gavman iri. <sup>2</sup> Douk hanak hatogur, aria Pailat narigan nakri, “Nyak douk eshesh Juda esheshin king aka?”

Aria Jisas nakripan nakri, “Adur, eik douk kabi nyak nyakrium.” <sup>3</sup> Aria amam debeimi pris hape henekuman baraen Jisas hadukuman sabainyi rohwin baraen. <sup>4</sup> Douk namudok aria Pailat narigan shopunek nakri, “Tik, amam henekumen sabainyi baraen. Aria nyak ta nyuwanamam enen baraen aka, uwok?”

<sup>5</sup> Aria Jisas madae nukri enen baraen uwe, aria Pailat nakitak yowiyokuk abom.

*Pailat Nakripesh Um Shunak Shubo Jisas Shunek Nyiluman Nir Rowog Kruse*

*(Matyu 27:15-26; Luk 23:13-25; Jon 18:39—19:16)*

<sup>6</sup> Ihish kwarahos ahudok nyumnah shenek agundok debeigini Pasovai-gun worigun obi nyutob, Pailat apa nakweshih anan nonoweshik iri nanak fri. Anan apa nukweshih anudok douk eshesh armam armago shukriyan iri.

<sup>7</sup> Aria abudok nyutob, anan arman douk nanahwarum Barabas iri nani

anam armam hani gavman sharpak aria habo enesh arpes shagok aria hanaweshik hape. <sup>8</sup> Aria sabaishi arpes shanaki shantorum shape aria shape shakrip Pailat um nukweshih anan nape nonoweshik iri douk eshesh shukriyan iri nunak fri kabi douk ihish kwarahos anan apa nenekesh um.

<sup>9</sup> Aria douk eshesh sharigan namudok aria Pailat narigesh nakri, "Ipak pakri ikweshih eshesh Juda esheshin king nunak fri o pakri meini?"

<sup>10</sup> Pailat douk nakri namudok um maresh, anan douk nadukemesh abom um amam pris amamim debeimi douk henek nyigiya um Jisas. Amam hatik sabaishi arpes shagipesh anan atun aria amam nyirub juwehosirub aturub aria douk harawan hanak henekuman kwot um Pailat. <sup>11</sup> Aria amam debeimi pris hohur sabaishi arpes esheshiruh aparuh aria eshesh nyirub juwehos-irub abom um Jisas. Aria eshesh sharig Pailat um nukweshih Barabas nunak fri.

<sup>12</sup> Aria Pailat wata shopunek narigesh nakri, "Ipak pakri eik inekan mumam anudok arman douk ipak puhwaran eshesh Juda esheshin king iri?"

<sup>13</sup> Aria eshesh wata shopunek shahwar debeg shakri, "Nyak nyenek nyiluman rowog kruse!" <sup>14</sup> Aria Pailat narigesh nakri, "Anan nenek maresh yoweishi inahos um apak mon nugokumesh?"

Aria eshesh madae shumnekan uwe. Eshesh shahwar debeg atin shakri, "Nek nyiluman rowog kruse."

<sup>15</sup> Aria Pailat nakri nunekesh shunadudareh. Douk namudok aria anan nemnek esheshin baraen aria nakweshih Barabas nanak fri. Aria nakrip amam soldia um hunak hubo Jisas huprukan onohw maduhw segegoihw aria hunak hunek nyiluman nir rowog kruse.

*Amam Soldia Hape Henekan Enenyenen Jisas*

*(Matyu 27:27-31; Jon 19:2-3)*

<sup>16</sup> Aria amam soldia hasuhw Jisas haran hanak hawish debeini gavmman ananit debeiti urupat aria hahwar ihm-morim amudok anam soldia shopunek hanak.

15:24 15:24 Tik Aposel 1:26.

<sup>17</sup> Aria amam horuman anat routari owishiboriti saket. Aria harokesh onohw segego hwatogrohwi iri maduhw hwahwunug kabi douk king ananit hat um, aria hwahwem-uman um ananig barag.

<sup>18</sup> Aria amam hape habubuniman hakri, "O ruwahep nyak eshesh Juda esheshin king!"

<sup>19</sup> Aria hohur anah aruh aria hape habo barag sabaih atuh aria hape hokusehan. Aria amam henekan enenyenen hanak habuh hoduk ohrubus hurukatin um anan um hutuk ananin nyeigur nyuto iruhw kabi douk anan king um. <sup>20</sup> Douk amam henekan enenyenen jurug, aria hatrun hawaruk atudok owishiboriti saket. Aria wata hohur ananir rupeh hehuran aria harawan hanakum hunek nyiluman nir rowog kruse.

*Amam Henek Nyilim Jisas Neir Rowog Kruse*

*(Matyu 27:32-44; Luk 23:26-43; Jon 19:17-27)*

<sup>21</sup> Douk hanak orokohunih um yah aria haparug Saimon douk nanaki wabur Sairini iri. Ananim nugamim douk Aleksander nani Rufus. Anan douk nape iri urah nanaki aria nakri nunak nuwish anabur debeiburi wabur. Aria douk amam haparugan namudok aria amam soldia dodogowim atum hakripan um nosah Jisas ananin rowog kruse.

<sup>22</sup> Aria amam harao Jisas hanak anagun douk shahwaragun um Golgota iri. Baugenyum um enyudok baraen douk nyakri arpenyig barag. <sup>23</sup> Aria agundok amam hakutu anan marasin nyeigurinum mer nabuhum wainibar abar aria hakri huko Jisas nuburoh. Aria anan nakri uwok. <sup>24</sup> Aria amam henek nyiluman neiruk rowog kruse aria hohur ananir rupeh hehubuk aria hape habirak kabi douk satu<sup>15:24</sup>um. Amam habirak um anan nunek uhwin iri nunohur anah rupah. Aria amam henekesh namudok atinyum ihim-morim ananir rupeh.

<sup>25</sup> Aria douk ruhur, arigaha 9 kilok wah hatao aria amam henek nyiluman neir rowog kruse. <sup>26</sup> Aria amudok douk henekuman baraen Jisas iri howem enyudok

baraen douk amam henek kwotuman-umen iri hakri,

ESHESH JUDA ESHESHIN KING.

aria heshopen iruhw um rowog kruse agundok Jisas neir um.

<sup>27</sup> Aria agundok amam henek nyilim Jisas neir orokohun aria biom hakwuaruh iri heir wobuwobur hurukatin um anan.

<sup>28</sup> [Amam douk henek nyiluman nani amudok hakwuaruh iri aria henek enyudok baraen nyetem Iruhin ananik Buk iri nyatogur adurin. Baraen douk enyudok, "Eshesh shatrun kabi douk nabrig lo iri um."]

<sup>29</sup> Aria arpeshe shenek yowi kare iri shape shabubuniman aria sharigan shakri, "Nubokuhi nyakri nyak ta nyubrig Iruhin ananite debeiti urupate aria hukri um biyeh atih nyumneh um, nyak ta wata nyurukat!" <sup>30</sup> Douk namudok aria douk nyak nyukweshih nyak kanak aria nyukutukuk rowog kruse nyubihi atap!"

<sup>31</sup> Aria amam debeimi pris hani amam douk henek skulumesh um lo iri shopunek hanaki hape hahan henekan enenyenen. Aria amam kanak hanakripam hakri, "Anan nutaurum kupaishi, aria anan douk madae nutaurum anan kanak uwe." <sup>32</sup> Aria anan douk Kraisheshesh Israel esheshin king douk Iruhin neshopokan nanaki iri akure, douk anan nukutukuk rowog kruse nubihhi atap. Aria apak mutrun aria ta munek bilipuman!" Aria amudok biom douk hataur wobuwobur hurukatin um Jisas iri shopunek hahan hakripan enenyenen.

### *Jisas Nagok*

(Matyu 27:45-56; Luk 23:44-49; Jon 19:28-30)

<sup>33</sup> Douk aun nakihi arigaha 12 kilok aria wab babuhi. Aria ihirub-morim eshesh Juda esheshirub warub betem arukwutigung um atin. Agagun arukwutigung nape namudok arigaha wabigep 3 kilok aria wah wata hatao aria arisigung. <sup>34</sup> Aria wabigep 3 kilok, Jisas nahwar debeg um esheshin baraen nakri, "Eloi, Eloi, lama sabaktani?" Baugenyum um enyudok baraen douk nyakri, "Eikin Iruhin,

eikin Iruhin, nyak nyakutukuk eik um mareshe?"

<sup>35</sup> Aria enesh arpeshe sheyotu agundok iri shemnekan aria shakri, "Ipak pumnek, anan nahwar Ilaija."

<sup>36</sup> Aria anan arman nasahur nanak nohur enen spans<sup>15:36</sup>nosegurin anabar nubutibari abar. Aria nanyaur anah aruh aria natuken nyato um Jisas ananite nokwat um nubarah. Aria anudok arman nakripesh nakri, "Jurug aria apak mupe mutrugun. Ilaija ta nunaki nukweshihan nubuhi rowog kruse aka, uwok?"

<sup>37</sup> Aria Jisas nahwar debeg aria anan nagok. <sup>38</sup> Aria ahudok rupah<sup>15:37</sup>hataur numun Iruhin ananite debeiti urupate iri tukarah um biyeh. Tukarahi gani iruhw arigaha hanak habuh hatao. <sup>39</sup> Aria amam soldia amamin debeini douk neyotu hurukatin um rowog kruse Jisas neir um natik agundok Jisas nagok um aria nakri, "Adur atin anudok arman douk Iruhin ananin nuginin!"

<sup>40</sup> Aria agundok, ono armago weyotuwi madae rougun abom uwe aria wape watrishi. Onok douk Maria douk kwanaki wabur Makdala iri kwani Salome, wani kupaikwi Maria douk kwabuki shokuni Jems nani Josis iri. <sup>41</sup> Oudok armago riguk Jisas nape shokugi nahobig Galili um, owo apa wagipeshan aria wape wenekuman worigung. Aria sabaiwari kupaiwari armago douk waniri Jisas shatowi gani Jerusalem iri shopunek weyotuwi aria wape watrishi.

### *Habre Jisas Hanak Haruman*

(Matyu 27:57-61; Luk 23:50-55; Jon 19:38-42)

<sup>42-43</sup> Aria ahudok nyumnah shabo Jisas ahi, eshesh shape shenek esheshigung worigung aria mahish um ruwahepih Sabat shishoh iri. Aria ahudok atuh nyumnah arigaha wabigep, aria Josep douk nanaki wabur Arimatea iri nanaki. Anan douk anan um eshesh Juda esheshin debeini kaunsol douk nyeigur nyato-uman iri. Aria anan shopunek apa nape natrugun um abudok nyutob arpeshe

shuwish um agundok Iruhin nupe Debeini um ananish arpesih um. Aria Josep madae nunogugur uwe, uwok. Anan nanak um Pailat napeum aria narigan um anan nunak nubre Jisas nunak nuruman. <sup>44</sup> Aria douk Pailat nemnek namudok aria anan nakitak yowiyokuk abom um agundok Jisas nagok arigas abom um. Aria anan nahwar amam soldia amamin debeini nanaki aria narigan nakri, “Adur, Jisas nagok aka, watak?”

<sup>45</sup> Aria anan nakrip Pailat um Jisas douk adur nagok. Douk namudok aria Pailat nakrip Josep um nubreyan nunak aria nuruman. <sup>46</sup> Aria Josep nanak nator anah yopuhi shigorihiwihi rupah nasuah aria nanak nabre iri Jisas rowog kruse nabuhi atap neshurehan aria nanak naruman. Anan nanak nawish nanabuk numun onohw wonugwehw douk sharokohw shawish onok burbuduk iri. Douk nawish nanabukuk aria natogur natotigosi anam debeimi utom manaki neshopam ahwudok wonugwehw. <sup>47</sup> Aria Maria douk kwanaki Makdala iri kwani kupaikwi Maria douk kwabuki Josis iri wape watrugun. Aria watiku agundok douk Josep nanak nabukuk Jisas um.

## 16

### *Jisas Wata Nakitak Nape*

*(Matyu 28:1-8; Luk 24:1-12; Jon 20:1-10)*

<sup>1</sup> Douk wabigep hurukatin um wab ahudok nyumnah Sabat, eshesh Juda shape meyoh ahi hatuh, biwotuk armago wanak wator anar wel douk reisik wosik iri um wakri unak urayok Jisas ananihw yegenyihw. Oudok armago owowish nyeiguhw douk eshudok. Maria douk kwanaki Makdala iri kwani kupaikwi Maria douk kwabuki Jems iri, wani Salome. <sup>2</sup> Aria ruwahepih sagomatinyih nyumnah um wik,16:2 wata ruhur atin, owo wakitak wanak gani wonugwehw hwapeum. Douk owo wanak watogur wonugwehw hwape um aria wah ko hatao. <sup>3</sup> Aria owo wata wape wanak yah

aria wanayagwreh wakri, “Ta omi nyutotigasuk utom douk magah wonugwehw iri?”

<sup>4</sup> Aria owo wanak hurukatin aria wakri utrugunu aria watiku amudok takweimi utom douk magah wonugwehw iri douk madae anam mutao uwe. Amam douk matatigos manak makusuk anagas. <sup>5</sup> Aria owo wanak wawish numun ahwudok wonugwehw aria watik anan weroroini arman, nenenek rouhi shigorihiwihi rupah iri nape. Anan napeum yopunyi rogur ehah numun wonugwehw aria owo wakitak yowiyokuk abom.

<sup>6</sup> Aria anan nakripo nakri, “Ipak mare pukitak yowiyokuk uwe, uwok. Eik yadukemesh, ipak douk paurim Jisas douk nanaki wabur Nasaret iri. Anan douk shenek nyiluman neir rowog kruse iri. Aria ipak tik, okwudok outuk douk shanabuk um. Agundok madae anan nukus uwe, uwok. Anan douk nakitak nape. <sup>7</sup> Aria ipak punak pukrip ananim disaipel huni Pita pukri, ‘Jisas iganigadae narik nanak um Galili. Aria ipak pugiman punak putogruman kabi douk nubokuhi anan nakripep-umaguk um.’ ”

<sup>8</sup> Aria douk owo womnek namudok aria waktukuk wonugwehw watograri aria wosahur wanak. Owo wanogugur abom aria owo arugoguhwiar wao atin wanak. Aria shopunek owo madae ukripaguk enesh arpesih um eshudok owo watrish iri uwe.

### *Jisas Natogur Um Maria Douk Kwanaki Makdala Iri Kwatrun*

*(Matyu 28:9-10; Jon 20:11-18)*

<sup>9</sup> [Douk eshesh Juda shape meyoh ahi nyumnah Sabat iganigadae hatuh. Aria ruwahepih sagomatinyih nyumnah um wik,16:9 ruhur atin Jisas wata nakitak nape. Aria sagomatin anan natogur um Maria douk kwanaki Makdala iri. Okwok douk riguk 7-poreish yoweishi sagabehos shapenyok aria anan wata nahiyaheshuk sharuwok iri. <sup>10</sup> Douk kwatrun-uguk aria okwok kwanak kwatogur um ananim disaipel aria kwatrum um amamiruh aparuh douk yoweruh aria hape hereh. Aria okwok kwakripam um okwok kwatik

Jisas wata nakitak napeum. <sup>11</sup> Aria amam hemnegok aria madae hunek bilip uwe. Amam hakri okwok kwenek rohw.

*Jisas Natogur um Ananim Biom Disaipel Gani Yah Aria Hatrun*  
(Luk 24:13-35)

<sup>12</sup> Douk enyudok nyanakuk aria anah nyumnah, biom Jisas ananim disaipel hakitak hakutukuk wabur aria hagim urahih yah hanak. Amam hanak aria Jisas natogur nape anagun sikigun aria nanaki natogur-umam. <sup>13</sup> Anan natogur-umam hatrun aria amam wata hatanam hanak hakrip amudok anam disaipel um agundok amam hatrun um. Aria douk amam hakripam aria amam shopunek madae hunek bilipumam uwe. Amam hakri amudok biom douk henek rohw.

*Jisas Nakrip Ananim Disaipel Um Mour Amam Ta Huneken Iri*  
(Matyu 28:16-20; Luk 24:36-49; Jon 20:19-23)

<sup>14</sup> Aria hagiguki, ananim 11-poreim disaipel hape hawok worigun aria Jisas nanak natogur-umam. Aria naham nakri, "Ipakigos baragos douk dodogowigos aria seshukep abom. Nubokuhi enesh arpeshe douk shatrue wata yakitak yape aria shanaki shakripep aria ipak madae punek bilip uwe. Ipak pakri eshesh shape shenek rohwmep."

<sup>15</sup> Aria anan nakripam nakri, "Ipak punak ihirubmorim warub bape agundok atap iri aria pukripesh Iruhin ananin yopinyi baraen ihishmorim arpeshe. <sup>16</sup> Ipak pukripesh aria eshudok douk shumnek enyudok baraen shunek bilipumen aria kupaishi shunek baptaismesh iri, Iruhin ta wata nunarawesh shutanamori shupe wosik abom. Aria eshudok douk shumneken aria mare shunek bilipumen iri, Iruhin ta nunekumesh debeiti kwot um eneshenesh yoweishi inahos eshesh shape shenekesh iri. <sup>17</sup> Aria eshudok douk shunek bilip iri, Iruhin ta nutaurumesh nunekesh dodogowish aria ta shunek sabainyi mour kabi douk Iruhin atun neneken iri. Eshesh ta shihyahuk sagabehos douk shape arpeshe iri shukripesh um eikin nyeigur aria ta shutogur shuruwok. Aria shopunek, ta

shiyagwreh enen kupainyi baraen. <sup>18</sup> Aria ta shuhur yuguhw douk hwabo arpeshe shagok iri shusuwoguh esheshis wis um, ogwoguh ta hunatukesh aria ta mare shugok uwe, uwok. Aria ta shuwok anabar abar douk arpeshe apa shabroh ba shagok iri um, eshesh ta mare shugok. Aria eshesh ta shuwemesh wis sharao arugeh iri arpeshe aria eshesh ta wata yopish."

*Iruhin Narao Jisas Nato Um Iruhw Heven*  
(Luk 24:50-53; Aposel 1:9-11)

<sup>19</sup> Aria douk Debeini Jisas nakripesh baraen neyaten aria Iruhin naran nato um iruhw heven. Anan nato aria nanak nape yopunyi rogur ehahum Iruhin. <sup>20</sup> Aria Jisas ananim disaipel hanak sabairubi warub aria hakripesh Iruhin ananin yopinyi baraen sabaishi arpeshe. Aria abudok nyutob amam hape hakripesh yopinyi baraen um, Debeini nataurumam nenekam dodogowim aria henek sabainyi mour Iruhin atun nenekan iri. Aria arpeshe shatik enyudok mour amam heneken iri aria shakri adur atin, amam douk Iruhin nataurumam. Aria amamin baraen douk adurin atin abom.]

## Iruhin Ananin Yopinyi Baraen Luk Nenyem Iri

*Banenyi Baraen Um Luk*

- 1:1-4 Nyarik iri baraen  
 1:5—2:52 Jon nenek baptaisumesh iri natogur aria Maria kwobuki Jisas  
 3:1-20 Jon nenek baptaisumesh iri nagabeman yah Jisas  
 3:21—4:12 Jisas nenek baptais aria Satan nanaki nakwiraehan um nunek yoweishi inahos  
 4:13—9:50 Jisas nanak shokugi nahobig Galili nakripesh Iruhin ananin baraen aria nagabe arugeh haesh iri arpesh  
 9:51—19:27 Jisas nakutukuk shokugi nahobig Galili aria natanam nanak Jerusalem nakripesh Iruhin ananin baraen  
 19:28—23:56 Jisas nanak Jerusalem nakripesh yopinyi baraen aria eshesh Juda esheshim debeimi henekuman baraen aria han henek nyiluman rowog kruse nagok  
 24:1-53 Jisas wata nakitak aria nekesh mour ananish disaipel

*Luk Nowem Enyudok Baraen Nyanak Um Tiofilus*

<sup>1</sup> O Tiofilus, riguk sabaishi arpesh shakwiraeh showem baraen um ihishmorim eshudok eneshenesh douk Iruhin nohur Jisas nenekesh shatogur orokohun um apak iri. <sup>2</sup> Eshesh showem baraen um eshudok eneshenesh douk eshudok arpesh sagomatin shatrish esheshis nabes aria shakripap-umesh iri. Eshudok shakripap iri arpesh douk shenek mour um shakripesh Iruhin ananin baraen iri. <sup>3</sup> Aria shokubur atin eik yape yarigesh yenek surisorik yaurim baugenyum baraen um gani baugos enyen nyakitak nyanakumori. Namudok aria eik shopunek yakri wosik um inyem wosik atin enyudok baraen kabi douk sagomatin nyakitak nyanaki um aria ish-opoken nyunakumagu nyak yopuyopuni arman Tiofilus. <sup>4</sup> Eik yenekesh namudok

um nyak ta nyudukemen wosik enyudok baraen douk riguk shenek skulumen-enyi, douk adurin atin abom.

*Iruhin Ananin Ensel Nyakrip Sekaraia Um Ta Nubuki Anan Nuganin*

<sup>5</sup> Abudok nyutob Herot nape king um shokugi nahobig Judia obi nyutob, anan arman shahwaran um Sekaraia iri shopunek nape. Anan douk anan pris. Aria anan douk nanaki apudok awirop um pris douk shahwaram um Abiya iri. Aria ananik irohukwik douk shahwarok um Elisabet. Okwok shopunek douk kwakitak agundok Aron ananip awirop iri. <sup>6</sup> Aria Iruhin natrish um, eshudok biyesh shagipesh lo atin abom iri biyesh shape. Eshesh shagipeshen sheyaten um Debeini nakripesh-enyi baraen nyani lo seiwok nakoguk Moses enyi. <sup>7</sup> Aria eshesh douk batowish wokesh. Um maresh, Elisabet kupik. Aria eshesh biyesh douk ruwehesh abom.

<sup>8-9</sup> Arigaha aria anah nyumnah douk Sekaraia nani ananip awirop amam pris amamih nyumneh um hunek mour numun Iruhin ananit debeiti urupat um hatogur. Aria amam henek enesh eshudok hagipesh ehudok amamih aih um hudukemesh um ta meini pris nurik nuwish nunek ofa um eshudok nuko Iruhin. Aria ahudok nyumnah, Sekaraia nenek uhwin um nuwish Debeini ananit debeiti urupat um nuweh eshudok sheisik wosik iri um nunek ofa nuko Iruhin um enyudok alta. Amam henekesh namudok aria anan nawish numun Debeini ananit debeiti urupat. Aria Sekaraia neyotu numun nape nuweh eshudok nenek ofamesh nako Iruhin aria Iruhin nape natrun. <sup>10</sup> Aria abudok nyutob nawish nuweh eshudok obi nyutob, ihishmorim arpesh shenek lotu um Iruhin iri shantorum shape aduk shape shenek beten.

<sup>11</sup> Aria enen Debeini ananin ensel nyatogruman aria natrin. Enyen nyatogur meyoh nyeyotu um yopunyi rogur ehahum enyudok alta douk amam pris hape howem eshudok sheisik wosik iri henek ofamesh hako Iruhin iri um. <sup>12</sup> Douk Sekaraia natrin aria anan nakitak yowiyokuk aria nanogukur

abom. <sup>13</sup> Aria enyudok ensel nyakri-pan nyakri, “Sekaraia, nyak mare nyunogugur. Iruhin douk nemnek nyakin beten aria nyakik irohukwik Elisabet ta kwubukumenyi anan nuganin. Aria nyak ta nyuhwaran nyeigur Jon. <sup>14</sup> Aria nyakihw apahw ta hur wosik aria ta nyunadudareh nyuriguk. Sabaishi arpesh shopunek ta shunadudareh abudok nyutob okwok kwunabuki obi nyutob. <sup>15</sup> Aria agundok Debeini nutrun um, anan ta nupe debeini arman. Anan ta mare nuwok wainibar abar buni anabar dodogowibari, uwok. Anan ta wata nur apahw aria Iruhin ananin Mishin ta nyuwishan aria nyupenyang shuknin abom. <sup>16</sup> Anan ta wata nurauri sabaishi arpesh eshesh Israel shukutukuk eneshenesh yoweishi inahos aria wata shutanamori um Iruhin esheshin Debeini. <sup>17</sup> Anan ta dodogowin atun kabi douk profet Elaija um. Aria shopunek, anan ta nurao Elaija ananish aih. Aria anan ta nurik aria Debeini ta nugiguk. Anan ta nubadig arhim amamip urkwip aria amam ta wata urkwip punawasham amamish batowish. Aria ta nubadig madae shumnek baraen atin iri esheship urkwip aria ta wata shurao yopishi arpesh esheship urkwip. Aria anan ta nutaurum Debeini ananish arpesh um shukeshuguk agabus yoweishi inahos aria shunek redi shupe shutik um Debeini nunaki nutaurumesh um.”

<sup>18</sup> Aria Sekaraia nakrip enyudok ensel nakri, “Eik douk ruwogin aria eikik irohukwik shopunek douk ruwogik. Aria eik ta idukemesh mumam aria douk ikri enyudok baraen douk adurin?”

<sup>19</sup> Aria ensel wata nyakripan nyakri, “Eik Gabriel douk yeyotu Iruhin nape-mori. Anan douk nashopoke yanakumori ini nyak wiyagwreh aria ikripen enyudok yopinyi baraen. <sup>20</sup> Aria nyak douk madae nyunek bilip um eikin baraen uwe. Douk namudok aria nyakit nokwat ta tishuk tupe namudok atin. Nyak ta mare niyagwreh atin arigaha ahudok nyumnah Iruhin nakriyahi um enyudok eik yakripenyumen iri baraen nyutogur adurin atin.”

<sup>21</sup> Aria abudok nyutob ensel nyape nyakripan baraen obi nyutob, eshudok armam armago shape aduk iri shape shabeiman. Eshesh shakri maresh shatogruman aria anan douk nape roubi gani numun urupat. <sup>22</sup> Arigaha douk natograri aria nabirak um nakri nunamesh niyagwreh aria nabirak natik uwok. Douk namudok aria eshesh shadukemesh shakri anan natik enesh eshudok eneshenesh gani numun Iruhin ananish debeiti urupat. Aria nakri nukripen baraen um, anan naurumesh rogur meyo. <sup>23</sup> Arigaha douk ananish nyutob um nenek mour pris numun urupat um batuh aria wata natanamum ananish wabur. <sup>24</sup> Anan nanak nape anob nyutob banak badiguk aria ananish irohukwik Elisabet kwanarahaen. Aria kwanabeshuk kwape urupat atut um 5-poreib aub. <sup>25</sup> Aria kwakri, “Arigaha douk Debeini nutaurume namudok. Anan nawarukuk abraen um agundok arpesh shatruweim yape kipiwe um.”

### *Ensel Nyakrip Maria Um Okwok Ta Kubuki Jisas Um*

<sup>26</sup> Douk Elisabet kwanarahaen kwape arigaha douk bakri um 6-poreib aub um, Iruhin neshopok enen ensel nyeigurinyum Gabriel iri nyanak um anabur wabur bape shokugi nahobig Galili iri. Abrudok wabur douk shahwarabur um Nasaret. <sup>27</sup> Enyudok ensel nyaraumokwi baraen onok armatok shahwarok um Maria iri. Okwok douk wata kwurao anan arman shupe atugun uwe, uwok. Okwok douk shakriok um anan arman shahwaran um Josep iri. Anan douk nakitak king Devit ananish awirop iri. <sup>28</sup> Enyudok ensel nyanaki nyatogrumok aria nyakripok nyakri, “Ruwahep Maria, nyakin mishin nyur wosik aria nyanadudareh. Debeini nani nyak nape hurukatin aria nenekumen yopunyi.” <sup>29</sup> Aria Maria kwomnek enyudok baraen aria okwok urkum yowem. Okwok madae kwudukem baugenyum enyudok baraen ensel nyakripoken iri uwe. <sup>30</sup> Aria ensel nyakripok nyakri, “Maria, nyak mare nyunogugur uwe, uwok. Iruhin douk nanadudareh-umen



aria ta nunekumen yopunyi. <sup>31</sup> Mnek! Nyak arman douk wata nyurao anan uwe, aria nyak ta nyonarahean aria nyubuki anan nuganin. Aria nyak ta nyudowon nyeigur Jisas. <sup>32</sup> Aria anan ta nutogur debeini arman. Aria ta shuhwaran Debeini Iruhin abom douk nariguk ihish arpes shani eneshenesh eshudok shabuhuk iri um ananin Nuganin. Debeini Iruhin ta nunekan nutogur king kabi douk ananin babuken Devit um. <sup>33</sup> Aria ihih nyumneh anan ta nupe deben um Jekop ananish popehesh yamehesh. Anan ta nupe Debeini um ananish arpes namudok atin ihih nyumneh.”

<sup>34</sup> Aria Maria wata kwakrip enyudok ensel kwakri, “Enyudok ta nyutogur mumam? Eik wata irao anan arman uwe.”

<sup>35</sup> Aria ensel nyakripok nyakri, “Iruhin ananin Mishin ta nyuwishen aria debeini Iruhin ananin dodog abom ta nyishigorin. Douk namudok aria anudok yopuyopuni nuganin abom nuhut nyunubuk iri ta shuhwaran Iruhin ananin Nuganin. <sup>36</sup> Mnek, okwodok armatok Elisabet douk kwani nyak ipak atup awirop iri douk shakri kwape kupik. Okwok douk ruwogik abom aria okwok douk kwanarahean. Aria douk 6-poreib aub badiyok. <sup>37</sup> Aria eshesh douk madae enesh eshudok eneshenesh douk Iruhin ta nubirak um mare nunekesh iri uwe, uwok.” <sup>38</sup> Aria Maria kwakripan kwakri, “Eik yenekuman mour meyoh Debeini iri. Aria anan wosik nunekume enyudok nyutogur kabi douk nyak nyakrium.” Aria enyudok ensel nyakutukuk nyanak.

#### *Maria Kwanak Kwatik Elisabet*

<sup>39</sup> Enyudok ensel nyanak nyeyagwrehuk um jurug, aria kwape arigaha douk anah nyumneh hanak hadiguk, aria Maria kwanagabe eshudok aria arigas kwaikitak kwatoum yadururuh kwanak. Okwok kwanak um anabur wabur douk bape shokugi nahobig Judia iri. <sup>40</sup> Okwok kwanak kwatogur kwawish Sekaraia ananit urupat aria kwonekumok yopuhi nyumnah Elisabet. <sup>41</sup> Aria douk Elisabet kwomnek um agundok Maria kwonekumok yopuhi nyumnah um, aria batowin nyor okwokwihw

apahw iri nyanagugwanam. Aria Iruhin ananin Mishin nyawish Elisabet abom aria nyapenyok shukunik. <sup>42</sup> Douk nyawishok aria nyakuhur kweyagwreh debeihi mah kwakri, “Nyak nyeshagrakuk ihiyumorim armago um agundok Iruhin nenekumen yopunyi um. Aria shopunek, enyudok batowin nyak nyunyubuki iri, Iruhin ta nunekumen yopunyi atin. <sup>43</sup> Aria enyudok douk nyatogrume um agundok eikin Debeini ananik amakek kwanaki kwatiwe um? Eik douk madae debeikwi armatok uwe. <sup>44</sup> Aria abudok atub nyutob abom eik yemnek agundok nyak nyenekume yopuhi nyumnah obi nyutob, batowin nyor eikihw apahw iri nyanadudareh aria nyanagugwanam. <sup>45</sup> Nyak douk nyenek bilip um Debeini ananin baraen aria nyak douk nyanadudareh. Debeini ta nuneken nyutogur kabi douk riguk anan nakripenyum!”

#### *Awehw Maria Kweyorub Kwatuk Debeini Ananin Nyeigur Nyato Iruhw Um*

<sup>46</sup> Aria Maria kwakri, “Eik yanadudareh abom aria yatuk Debeini ananin nyeigur nyato iruhw. <sup>47</sup> Eikin mishin douk nyanadudareh um Iruhin douk nutaurume naraowe yatanamori yape wosik atin iri. <sup>48</sup> Um maresh? Anan urkum morum eik nyeigur woke iri douk yasuhw ananin mour iri. Douk arigaha kweipon, ihishmorim arpes ta shukri eik douk Iruhin nutaurume aria neneke yanadudareh atin iri. <sup>49</sup> Eshesh ta shukri yanadudareh um enyudok debeinyi yopunyi mour abom douk Debeini Iruhin nenekenyume iri. Aria ananin nyeigur douk nyenek holi abom aria yopuyopunyi. <sup>50</sup> Anan douk nenek giha abom um eshudok arpes douk shape shakamum anan shagipeshan iri. Anan ta nenek gihaumesh arigaha shugokuk aria esheshish batowish shugiguk shukitaki iri shopunek. Anan ta nunekesh namudok atin.

<sup>51</sup> Aria anan dodogowin nenek mour um, anan apa nabo eshudok arpeshe douk shanahur esheshish nyeiguhw shato iruhw aria esheship urkwip porum shunek yoweishi inahos iri nahiyahesh sharuwok shanak atin atinyuk.

<sup>52</sup> Anan neyatakuk امام king nam habuhuk aria natuk nyeiguhw wokeshi arpeshe shato iruhw.

<sup>53</sup> Aria nekesh sabaishi yopishi enesh-enesh eshudok yaruhish arpeshe iri. Aria arpeshe douk shatik sabaishi eshudok eneshenesh iri neshopokesh shanak wis wohis.

<sup>54</sup> Ananim urkum douk wata morum enyudok adurin atinyi baraen douk seiwok nakripaguk apakish yamehesh-enyi.

Aria nanaki um nutaaurum ananish arpeshe eshesh Israel douk shasuhw ananin mour iri.

<sup>55</sup> Aria anan urkum morum nunek yopunyi um Abraham nini ananish batowish iri popehesh yamehesh douk shugiguk shutograri iri aria nenek gihaumesh namudok atin ihih nyumneh.”

<sup>56</sup> Aria Maria kwani Elisabet wape biyab atun aub batuh aria wata kwatanam kwanak um wabur.

#### *Elisabet Kwabuki Jon*

<sup>57</sup> Aria nyutob um Elisabet kwubunuh obi nyutob banak batograri aria kwabanuh kwabuki armanin batowin. <sup>58</sup> Aria okwokwishi shani eshudok douk shape hurukatin iri shemnek um agundok Debeini nenekumok yopunyi um aria eshesh shopunek shanak shanadudareh. <sup>59</sup> Aria douk arigaha 8-poreih nyumneh hadiguk anudok nuganin, aria shanakumori shutah ananihw yegenyihw. Aria eshesh shakri shudowan nyeigur Sekaraia douk ananin yain nanahwarom um. <sup>60</sup> Aria ananik amakek kwakri, “Uwok. Ananin nyeigur ta muhwaran Jon.” <sup>61</sup> Aria eshesh shakripok shakri, “Nya, ipak atup awirop um douk madae anan arman

nunahwar enyudok nyeigur uwe.” <sup>62</sup> Aria eshesh shauraman wis um ananin yaken shariganum shakri nukripesh um meinyi nyeigur anan nakri shuhwar nuganin-uman. <sup>63</sup> Aria anan naurumesh wis um shaurari anat slet aria nowem enyudok baraen nakri, “Ananin nyeigur douk Jon.” Aria eshesh ihishmorim shakitak yowiyokuk abom shape. <sup>64</sup> Aria abudok atub nyutob, Sekaraia ananit nokwat tani yaham wata shanupok neyagwreh aria nape natuk Iruhin ananin nyeigur nyato iruhw. <sup>65</sup> Aria ihishmorim arpeshe shape hurukatinyum eshesh iri shanogugur abom. Aria baraen nyarahaen nyanak ihirub warub douk betem yodururuh agudok shokugi nahobig Judia iri. Aria ihishmorim shadukemesh um enyudok douk nyatogurum Sekaraia nani Elisabet iri. <sup>66</sup> Aria ihishmorim arpeshe douk shemnek um enyudok iri shape urkwip porumen aria shakri, “Anudok nuganin nukitak yopun um, anan ta nutogur manan arman?” Um maresh? Eshesh shadukemesh um Debeini nani anan nape hurukatin aria ananin dodog douk nyapenyan.

#### *Baraen Douk Sekaraia Neyagwrehe Um Debeini Ta Nutogur Nutaaurumep Iri*

<sup>67</sup> Aria Iruhin ananin Mishin nyawish Jon ananin yaken Sekaraia nyapenyan shuknin aria neyagwreh Iruhin ananin baraen kabi douk امام profet heyagwrehe um. <sup>68</sup> Sekaraia nakri, “Apak mutuk Debeini apak Israel apakin Iruhin ananin nyeigur nyuto iruhw.

Anan nanaki nataaurum apak ananish arpeshe aria wata nanarap mape wosik.

<sup>69</sup> Anan nagraehumap anan dodogowin atunari arman um nunarap mutanamori mupe wosik abom iri.

Anudok arman douk nakitak Devit nasuhw Iruhin ananin mour iri ananip awirop.

<sup>70</sup> Kabi douk seiwok ananin Mishin nyawish امام yopumi profet aria hakriyenuguk iri baraen nyakrium.

71 Anan nakri adur abom um ta nutaurumap nunarap mukutukuk apakish horim.  
 Aria shopunek ta nutaurumap um nunarap mukutukuk ihishmorim arpesh douk shakapaguk agabus iri.

72 Riguk nakripeshuk ananin adurin atinyi baraen kontrak apakish popehesh yamehesh um ta nutaurumesh.  
 Aria anan douk wata urkum morum ananin kontrak douk riguk nakriyen  
 um douk ta nugipeshen aria nutaurum apak um.

73 Anan narik nakri iruhw nakripan enen adurin atinyi baraen abom um apakin yamenen Abraham.  
 Aria douk nakri nunekenyumap kabi riguk nakri ta nunekenyumap um.

74 Anan nakri nutaurumap nunarap mukutukuk apakish horim um musuhw ananin mour aria mare munogugur uwe, uwok.

75 Anan nataurumap um nakri apak mupe agundok atap um,  
 apak mupe ananishi atish mupe holi aria mugipesh lo atin iri arpesh aria anan nupe nutrup munek ananin mour.

76 Aria nyak eikin batowin, arpesh ta shuhwaren Debeini abom atunari Iruhin ananin profet.  
 Nyak ta nyurik nyunak nyukrip arpesh um shukutukuk yoweishi inahos shupe wosik atin  
 aria shupe shutik um Debeini um ta nunaki um.

77 Nyak ta nyukrip apak ananish arpesh Israel  
 aria mudukemesh um anan ta nukweshihuk eneshenesh yoweishi inahos apak menekesh iri,  
 aria wata nunarap mutanamori mupe wosik atin.

78 Apakin Iruhin ta nunek enyudok um maresh, anan douk yopuyopunum apak abom aria nenek gihaumap.  
 Aria anan ta nuneki lait douk tabuhi kabi aun nakihumori gani iruhw heven tubuhi tuwishap.

79 Atat ta tubuhmori eshudok arpesh douk shape arukwutigun  
 aria hurukatin um shugok iri aria eshesh ta wata shunatrugun.  
 Anan ta nutaurumap mugipesh ahudok yopuhi yah  
 um mupe wosik aria aparuh hur wosik um.”

80 Aria douk arigaha Jon nakitak yopun aria dodogowin abom um agundok ananim urkum manawasham Iruhin um. Aria nanak nape wehigun um arpesh uwok um. Anan nape agundok arigaha ahudok nyumnah natogur yopugunum aria eshesh Israel shatrun aria nape nakripesh Iruhin ananin baraen ahi iri.

## 2

### *Maria Kukwarumori Jisas (Matyu 1:25)*

1 Aria abudok nyutob Maria kwanara-haen obi nyutob, Sisar Ogastas nenek enen lo nyanak um ihirubmorim warub. Anan nakri ihishmorim arpesh shape abudok debeibi amnab Rom esheshib iri ta shunaki shurao esheshish nyeiguhw shushem bumeb. 2 Abudok nyutob douk sagomatinyib nyutob um shurao nyeiguhw um. Aria Kwirinius douk nape debeini um gavman um shokugi nahobig Siria. 3 Namudok aria ihishmorim arpesh shanak um esheshirub debeirubi warub sisiguk atin um shuwem esheshish nyeiguhw. Eshesh shanak um debeirubi warub douk seiwok esheshish popehesh yamehesh shapenyarubi.

4 Aria abudok nyutob, Josep nape wabur Nasaret douk bape shokugi nahobig Galili iri aria nakitak nanak um Betlehem douk bape shokugi nahobig Juddia iri. Naburdok douk seiwok shobuki King Devit aburi. Aria Josep douk nanak um Betlehem um maresh? Anan douk nakitak agundok King Devit ananip awirop. 5 Anan nani ananik irohuk-wik Maria shanak um shuwem esheshish nyeiguhw. Aria abudok nyutob, Maria douk kwanarahaen. 6 Aria eshesh wata shape Betlehem aria nyutob batogur um okwok kwubunuh um. 7 Aria okwok kwubunuh kwabuki sagomin nuganin.

Douk kwanabuki aria kweshrehan rupeh kwonor nor anas bokis douk shorumesh worigun bulmakauhos shagnoh um. Um maresh? Urupat arpesch sheshuhati douk shuknit um arpesch aria madae anagun nupeik meyoh um eshesh shishuh um uwe, uwok.

### *Enselahos Shakrip Heyoh Sipsipahos Iri Um Jisas*

<sup>8</sup> Aria abudok wab anam heyoh sipsipahos iri harao amamish sipsipahos hatogur aduk abrudok wabur aria hape heyohesh. <sup>9</sup> Aria enen Debeini ananin ensel nyatogrumam aria Debeini nenek agundok amam heyotum bogaragun nakusuk. Namudok aria amam hanogugur abom. <sup>10</sup> Aria enyudok ensel nyakripam nyakri, “Ipak mare punogugur uwe, uwok. Eik yanakumori ikripep yopinyi baraen douk ta nyunek ihish arpesch shunadudareh abom iri. <sup>11</sup> Ahudok nyumnah onok armatok kwabuki anan armanin batowin. Okwok kwanabuki Devit ananibur wabur Betlehem. Anan douk Debeini arman Kraish douk Iruhin nagraehan neshopokan nanakumori nunarao arpesch iri. <sup>12</sup> Aria ipak ta putrun aria pudukeman namudok. Ipak ta putik enen armanin batowin amakek kweshrehan rupeh aria kwonyor nyor anas bokis douk sheremesh worigun bulmakauhos shagnohasi.”

<sup>13-14</sup> Douk enyudok ensel nyakripam namudok aria ahudok atuh sabaishi dodogowishi enselahos abom shape iruhw heven iri shatogur shani enyudok ensel sheyotu. Aria shape shatuk Iruhin ananin nyeigur nyato iruhw. Shakri, “Apak matuk Iruhin ananin nyeigur nyato iruhw. Anan douk nape gani iruhw heven iri. Ipak arpesch pape atap iri douk apa penek Iruhin nanadudareh-umep iri ipakiruh aparuh hur wosik aria punadudareh.”

### *Heyoh Sipsipahos Iri Hanak Hatik Jisas*

<sup>15</sup> Douk enselahos shakutukuk amudok hape heyoh sipsipahos iri shatanam shatomokuk iruhw heven aria amam hanakripam hakri, “Apak munak um Betlehem um mutik enyudok mugu douk

nyatogur iri. Enyudok douk Debeini nakripap-umenyuguk iri.”

<sup>16</sup> Namudok aria arigas amam hakitak hanak aria haparug Maria kwani Josep aria hatik enyudok batowin shopunek nyor bogis kauhos shawok worigunasi. <sup>17</sup> Douk amam hatrin jurug aria hakripesh baraen douk enselahos shakripom-enyi um enyudok batowin iri. <sup>18</sup> Aria ihishmorim arpesch shemnek enyudok baraen amam hakripeshuk um aria shakri, “O, mumam mumam namudok.” <sup>19</sup> Aria Maria madae urkum mukwokuk um enyudok ihinyumorim baraen uwe. Okwok kanak kwape urkum apa morumen. <sup>20</sup> Aria amam hape heyoh sipsipahos iri wata hatanam hanak. Aria amam hanadudareh um Iruhin hape hatuk ananin nyeigur nyato um enyudok amam hatrin aria hemneken kabi douk ensel nyakripomuk um.

### *Shadowan Nyeigur Jisas*

<sup>21</sup> Aria douk Maria kwabuki Jisas aria douk hakri um 8-poreih nyumneh um, eshesh shatah ananihw yegenyihw aria shadowan nyeigur Jisas. Enyudok nyeigur douk Maria wata kupeiguk uwe aria ensel nyakripokuk um shudowan enyudok nyeigur.

### *Simeon Nani Ana Shatik Jisas Numun Iruhin Ananit Debeiti Urupat*

<sup>22</sup> Aria Josep nani Maria shape eneh nyumneh. Eshesh shape shagipesh enyudok lo seiwok Iruhin nakoguk Moses enyi nyakrium. Eshesh shenekesh namudok um Iruhin nutrish aria nukri eshesh douk yopishi. Aria douk ehudok nyumneh hatuhuk aria Josep nani Maria sharao Jisas shanak um Jerusalem um shuko Debeinian. <sup>23</sup> Eshesh shenekesh namudok kabi douk Debeini ananin lo nyakrium. Lo nyakri, “Thim-morim sagomim nugamim amakenyiyu womubuki iri ta puko Debeinian.” <sup>24</sup> Aria eshesh shopunek douk shanak um shurao eshudok eneshenesh um shuko amam pris hunek ofamesh huko Debeini kabi ananin lo nyakrium. Aria Lo douk nyakri namudok, “Arpesch ta shirauri bioguhw armiguhw kabi douk debeibi maishub

um o bioguhw yanporeiguhwi armiguhw kabi douk shokubi maishub um. Eshesh shuraeshi aria shunek ofamesh shisheh shuko eik.”

<sup>25</sup> Aria abudok nyutob, anan arman douk shahwaran um Simeon iri nape Jerusalem. Anan nagipesh lo atin iri arman aria apa nenek lotu um Iruhin. Aria anan apa nape natrugun um arman douk Iruhin nagraehan neshopokan nunakumori nunarao eshesh Israel shupe wosik iri. Aria Simeon, Iruhin ananin Mishin douk nyawishan aria nyapenyan. <sup>26</sup> Aria enyen nyanohur nyakripan um anan ta mare arigas nugok aria ta nutik anudok arman Krai. Anudok douk Debeini nagraehan neshopokan nanakumori nunarao arpesh iri. <sup>27</sup> Namudok aria Iruhin ananin Mishin nyohur Simeon aria nanak nawish numun narub um Iruhin ananit debeiti urupatao. Aria amakenyish shauri nunganin Jisas um shunekuman enyudok douk Iruhin ananin lo nyakrium eshesh ta shunekenyuman iri. <sup>28-29</sup> Aria Simeon natrishan nasuwan ananis wis aria natuk Iruhin ananin nyeigur nyato iruhw nakri,

“Debeini, nyak nyagipesh baraen douk riguk nyakri adurin atin um ta ipe arigaha itrinum.

Aria douk nyak nyukri wosik aria eik yasuhw nyakin mour aria eikihw apahw hwur wosik aria igok.

<sup>30</sup> Um maresh? Eik yatrunk eikis nabes anudok nyakin arman douk nagraehan nanakumori nunek enyudok mour um nunarao arpesh shupe wosik um.

<sup>31</sup> Nyak douk nyeneken ihishmorim arpesh shapeum aria shatrin.

<sup>32</sup> Aria anan douk kabi anat lait um tiyabigesh yah eshudok douk madae shudukem Iruhin iri uwe um shugipeshah.

Aria ta nunek nyakish arpesh eshesh Israel shura debeinyi nyeigur.”

<sup>33</sup> Aria Jisas ananish amakenyish shenek namudok aria shakitak yowiyokuk um enyudok baraen douk Simeon nakriyen um Jisas iri. <sup>34</sup> Aria Simeon narig Iruhin um nunek yopinyi um Jisas

nini ananish amakenyish. Aria nakrip Maria nakri, “Mnek, Iruhin nagraeh enyudok batowin um nyunek sabaishi arpesh eshesh Israel um shukutukuk Iruhin shupeik rougun. Aria shopunek, ta nutaurum sabaishi shutanamori um Iruhin aria wata nunaraesh shutanamori shupe wosik. Anan ta nupe kabi douk anan arman douk Iruhin nakutuni um nunek ananin mour iri. Aria sabaishi arpesh ta shutrun aria shiyagwrehuman enenyenen yoweinyi. <sup>35</sup> Anan ta nunekesh namudok um nunek sabaishi arpesh esheship urkwip panabeshuk pape esheshiruh aparuh iri punowereh putogur yopugunum. Aria nyak Maria, nyakin mishin ta yowen abom kabi douk shaduken anat bainat tawish tabreiri nyakim urkum aria nyemnek debeiri eriger um.”

<sup>36</sup> Aria agundok onok armatok kwenenem profet iri shopunek kwape. Okwokwin nyeigur Ana, aria okwokwin yaken douk shahwaranum Fanuel. Eshesh douk apudok awiropish douk shahwarop um Asa iri. Aria okwok douk ruwogik abom. Okwok douk kwani anan shanaraum shape 7-poreish kwarahos meyoh. <sup>37</sup> Aria eshesh shape aria anan nagokuk aria okwok kwape meyoh um, okwok kwape 84-poreish kwarahos. Aria okwok madae kukutukuk atin Iruhin ananit debeiti urupatao, uwok. Nyumnah wab kwape um kwenek lotu um Iruhin aria kwenek beten atin. Anabik um, okwok kwoshakwur um worigun aria kwape um kwenek beten atin. <sup>38</sup> Aria abudok banab atub nyutob, okwok shopunek kwanaki hurukatin aria kwenek tenkyu um Iruhin. Aria kwape kwakripesh baraen um anudok nunganin Jisas ihishmorim arpesh douk shape shatrugun-uman Iruhin wata nunaki nukweshih arpesh shape Jerusalem iri douk shape shakamum kupaishi iri shutogur wosik atin um.

*Josep Nani Maria Iri Jisas Shatanam Shanak um Nasaret*

<sup>39</sup> Aria douk Josep iri Maria sheneken sheyaten enyudok mour kabi douk Debeini ananin lo nyakrium shuneken iri,

aria eshesh wata shatanam shanak um shokugi nahobig Galili. Eshesh shanak um esheshibur wabur Nasaret. <sup>40</sup> Aria nuganin yopun nakitak dodogowin aria narao sabainyi yopinyi saki. Aria Iruhin nutauruman meyoh nenekuman yopinyi aria nape wosik abom.

*Jisas Natogur Weroroini Batowinyin  
Aria Nanak Nawish Numun Iruhin Ananit  
Debeiti Urupat*

<sup>41</sup> Aria ihish kwarahos Jisas ananish amakenyish apa shanak um Jerusalem um agundok Pasovaigun worigun. <sup>42</sup> Aria douk arigaha Jisas ananish kwarahos shanak shatogur 12-poreish aria eshesh shanak um Jereusalem um agundok Pasovaigun worigun kabi douk seiwok shape shenekesh um. <sup>43</sup> Aria douk arigaha nyumneh shenek agundok worigun um hatuh aria eshesh wata shatanam um wabur. Douk eshesh shanak, aria nuganin Jisas napeik Jerusalem. Ananish amakenyish shopunek madae shudukemesh um agundok anan napemagak uwe, uwok. <sup>44</sup> Eshesh shakri anan ta nani eshudok enesh arpeshe shanak. Namudok aria eshesh shanak anah nyumnah shuknih aria eshesh wata shape shauriman. Eshesh sharig esheshis wanaruh eshudok douk shape atugunum iri. <sup>45</sup> Douk shabirak shatik madae shuparugan uwe aria wata shatanam shanak um Jerusalem um shuriman ganudok. <sup>46</sup> Eshesh shape shauriman arigaha hakri um 3-poreih nyumneh um, eshesh shanak shaparagan nape numun narub um Iruhin ananit debeiti urupat tataoum. Anan nani henek skulumesh um lo iri hape aria nape nemnek amamin baraen aria nasorigam um hukripanum nudukemesh. <sup>47</sup> Aria amam ihm-morim hemnekan aria hakitak yowiyokuk um ananin saki nyani baraen anan nebeyenyumom iri. Aria amam hakri anan douk nadukemesh abom iri. <sup>48</sup> Aria abudok nyutob ananish amakenyish shaparugan obi nyutob, eshesh shakitak yowiyokuk abom. Aria ananik amakek kwakripan kwakri, “Nuganin, nyak nyenekeshumohw mumam namudok? Nyakin yaken

nani eik mishish yowesh abom um nyak aria wape waurimen.”

<sup>49</sup> Aria Jisas nawanamesh baraen nakri, “Ipak pape paurime um maresh? Ipak padukemesh aka, uwok? Eik ta ipe eikin Yain ananit urupat.” <sup>50</sup> Aria eshesh madae shudukem baugenyum baraen anan nakripesh-enyi uwe, uwok.

<sup>51</sup> Aria anan wata nanamesh shatanam shanak um Nasaret. Aria ihih nyumneh anan nemnek esheshin baraen aria nenek eneshenesh eshesh shakripan um nunekesh iri. Aria ananik amakek kwananyur nyorumok urkum enyudok ihinyumorim baraen douk anan neyagwrehen iri. <sup>52</sup> Aria Jisas yopun nakitak um yegenyihw aria shopunek nakitak nadukemum eneheneh yopihi aih hani saki. Aria Iruhin nani arpeshe shanadudareh-uman abom.

### 3

*Jon Douk Nenek Baptaisumesh Iri  
Nakripesh Iruhin Ananin Baraen*

*(Matyu 3:1-12; Mak 1:2-8; Jon 1:19-28)*

<sup>1</sup> Abudok nyutob Taiberias Sisar nape debeini gavman um Rom um 15-poreish kwarahos obi, Pontius Pailat nape debeini gavman um shokugi nahobig Judia. Aria Herot nape debeini um shokugi nahobig Galili, aria ananin wanin Filip nape debeini um shokugi nahobig Ituria iri Trakonitis. Aria Lisantias nape debeini um shokugi nahobig Abilene iri. <sup>2</sup> Aria Anas nani Kaiafas hape debeimi pris. Aria douk abudok nyutob, Sekaraia ananin nuganin Jon nanak nape wehigunum arpeshe uwok um aria Iruhin nakripan ananin baraen. <sup>3</sup> Namudok Jon narahaen neyatarub warub bape hurukatin um abudok worub Jordan iri. Aria anan nape nakripesh um shukeshuguk agabus yoweishi inahos shutanam shukon aparuh Iruhin aria shunek baptais. Aria Iruhin ta nukweshih esheshis yoweishi inahos. <sup>4</sup> Enyudok douk nyatogur nyagipesh enen baraen seiwok profet Aisaia nenyemagak Iruhin ananik Buk iri nyakrium. Baraen nyakri, “Enen arpen nyape nyahwar gani wehigunum arpeshe uwok um nyakri,

'Gabeiman yah Debeini. Pugabeyoh hupe um anan nigimah nunaki um. <sup>5</sup> Pushuragun ihigunum nabuhum atap iri. Aria yoduduruh hani mihigas shopunek ta pukorihogas subuh atap sukuh beriyaigas. Aria pugapesh hakukotomi yeh hupe duratin hupe aria pugapesh ihishmorim yeh ba greg atin hetem. <sup>6</sup> Aria ihishmorim arpesh ta shutik enyudok mour douk Iruhin nuneken um narap matanamori mupe wosik abom um.' "

<sup>7</sup> Aria sabaisi awirosish arpesh shanakumori Jon um nunek baptaisumesh. Eshesh shanaki aria anan nakripesh nakri, "Ipak pape kabi wanohwiguhwi yuguhw um. Omi nyakripep um ta puruwok um um namudok um ta Iruhin ananish urkum apahw ta juwehosish um ipak? Um maresh? Anan ko nenek eshudok yoweishi inahos shutogurum ipak adur atin. <sup>8</sup> Ipak ko penek yopihi aih um puyabig arpesh shutrip aria shukri adur ipak pekeshukuk agabus yoweishi inahos. Aria mare pupe um puneyagwreh pukri Abraham anan douk ipakin yamenen aria Iruhin ta nutrip nukri wosik aka, uwok. Eik yakripep, Iruhin ta nenek abrudok utabor bakus atap iri butogur kabi Abraham ananish batowish um. <sup>9</sup> Arman nabro rowos iri douk nasuhw enen bode nape nawanamen nabro rowos gani atap nukwaruhigos um. Aria ihigos rowos douk yopipi shuruwep madae piragosi uwe ta nubrogos nuwashagos nyih."

<sup>10</sup> Aria ihishmorim arpesh sharigan shakri, "Aria apak ta munekesh mumam?"

<sup>11</sup> Aria anan wata nawanamesh baraan nakri, "Anudok arman douk nanabuk biyog siotog iri ta nukon anat anudok douk siot uwok iri. Aria eshudok arpesh shobuk worigun iri ta shusiyaesh shibiram eshudok worigun wokeshi." <sup>12</sup> Aria amam harao takis iri shopunek hanamori anan um nunek baptaisumam. Aria hanaki harig Jon hakri, "Debeini tisa, apak ta munek maresh?"

<sup>13</sup> Aria anan nakripam nakri, "Purao takis um, ipak ta putrish utabor kabi da gavman shakri um. Ipak mare putrish anabor utabor meyoh uwe, uwok."

<sup>14</sup> Aria amam soldia shopunek hanaki aria harigan hakri, "Apak shopunek ta munek maresh?"

Aria anan nakripam nakri, "Mare pusuhw dodog enesh arpesh aria putrish utabor aka penekumesh enen wehinyi baraan enesh arpesh um putrish anabor utabor meyoh uwe, uwok. Punasuhw abrudok douk shukep um mouribor um atin aria mare ta pukri anabor shopunek uwe, uwok." <sup>15</sup> Aria arpesh esheshish mishish shape shor shanak aria shape shere urkum um Jon. Eshesh shakri anan douk Kraish douk Iruhin nagraehan ba neshopokan nanaki um nurao arpesh iri. <sup>16</sup> Douk namudok aria Jon nakrip sabaishi arpesh nakri, "Eik uwok. Eik douk yenek baptaisumep abar meyoh. Aria anan dodogowin atun neshagrakuk eik iri ta nigigi. Aria eik douk madae yopuwe iri um ta ikweshihuman madururuh um ananin su uwe, uwok. Aria anan ta nenek baptaisumep nekep Iruhin ananin Mishin aria ta nyuwish aria nyupeyep. Aria ta nyugabeyep kabi nyih hanuguk eshudok um. <sup>17</sup> Anan ta ko nunaki kabi da anan arman nasuhwi ananip neitip ananis wis um nunaki niyagom nyubuhashape ananit wit iri ba nushubuk sik. Aria yoputi shuruwepit wit anan ko ta nutubuk sik gani ananit urupat nobuk wit ati. Aria ihish witish nyubuhash anan ko nushaisheh nukwu ehudok yoweih nyih madae ta hugok iri uwe, uwok."

<sup>18</sup> Aria Jon nakripesh Iruhin ananin yopinyi baraan obi nyutob, nakripesh sabainyi enyudokmori baraan shopunek um nuhur esheshiruh aparuh.

### *Herot Nuweshik Jon Nape Um*

<sup>19</sup> Aria Jon nahao Herot douk debeini gavman um shokugi nahobig um Galili iri. Jon nahan um agundok natrun ananin wanin ananik irohukwik Herodias um. Aria shopunek um agundok nenek sabaishi yoweishi inahos um. <sup>20</sup> Aria Herot ta shopunek nenek enesh yoweishi inahos um ta nuweshik Jon um.

*Jon Nenek Baptais Um Jisas  
(Matyu 3:13-17; Mak 1:9-11)*

<sup>21</sup> Douk sabaishi arpesk shenek baptais shatuh aria Jisas shopunek nenek baptais. Anan nenek baptais jurug aria neyotu nape nenek beten aria iruhw utag ganupok. <sup>22</sup> Aria Iruhin ananin Mishin nyabuhi kabi da arudok armir manyun um nabuhi netem Jisas. Aria shemnek anah mah gani iruhw heven aria enyudok arpen nyeyagwreh iri nyakri, “Nyak douk adur atin Eikin Nuganin. Eik douk urkum manawasham aria yanadudareh abom um nyak.”

*Jisas Ananim Yamehem Popehem Amamish Nyeiguhw (Matyu 1:1-17)*

<sup>23</sup> Abudok nyutob Jisas nohur ananin mour nape neneken obi, ananish kwarahos douk shatogur 30-poreish. Aria arpesk shakri Jisas anan douk Josep nanabuki iri nuganin aka, uwok. Josep ananin yain douk Heli.

<sup>24</sup> Aria Heli ananin yain Matat. Matat ananin yain Livai. Livai ananin yain Melki. Melki ananin yain Janai. Janai ananin yain Josep.

<sup>25</sup> Aria Josep ananin yain Matatias. Matatias ananin yain Amos. Amos ananin yain Nahum. Nahum ananin yain Esli. Esli ananin yain Nagai.

<sup>26</sup> Aria Nagai ananin yain Mat. Mat ananin yain Matatias. Matatias ananin yain Semen. Semen ananin yain Josek. Josek ananin yain Joda.

<sup>27</sup> Aria Joda ananin yain Joanan. Joanan ananin yain Resa. Resa ananin yain Serubabel. Serubabel ananin yain Sealtiel. Sealtiel ananin yain Neri.

<sup>28</sup> Aria Neri ananin yain Melki. Melki ananin yain Adi. Adi ananin yain Kosam. Kosam ananin yain Elmadam. Elmadam ananin yain Er.

<sup>29</sup> Aria Er ananin yain Josua. Josua ananin yain Elieser. Elieser ananin yain Jorim. Jorim ananin yain Matat.

Matat ananin yain Livai.

<sup>30</sup> Aria Livai ananin yain Simeon. Simeon ananin yain Juda.

Juda ananin yain Josep.

Josep ananin yain Jonam.

Jonam ananin yain Eliakim.

<sup>31</sup> Aria Eliakim ananin yain Melea.

Melea ananin yain Mena.

Mena ananin yain Matata.

Matata ananin yain Natan.

Natan ananin yain Devit.

<sup>32</sup> Aria Devit ananin yain Jesi.

Jesi ananin yain Obet.

Obet ananin yain Boas.

Boas ananin yain Salmon.

Salmon ananin yain Nason.

<sup>33</sup> Aria Nason ananin yain Aminadap.

Aminadap ananin yain Atmin.

Atmin ananin yain Arni.

Arni ananin yain Hesron.

Hesron ananin yain Peres.

Peres ananin yain Juda.

<sup>34</sup> Aria Juda ananin yain Jekop.

Jekop ananin yain Aisak.

Aisak ananin yain Abraham.

Abraham ananin yain Tera.

Tera ananin yain Nahor.

<sup>35</sup> Aria Nahor ananin yain Seruk.

Seruk ananin yain Reu.

Reu ananin yain Pelek.

Pelek ananin yain Eber.

Eber ananin yain Sela.

<sup>36</sup> Aria Sela ananin yain Kainan.

Kainan ananin yain Arpaksat.

Arpaksat ananin yain Siem.

Siem ananin yain Noa.

Noa ananin yain Lamek.

<sup>37</sup> Aria Lamek ananin yain Metusela.

Metusela ananin yain Enok.

Enok ananin yain Jaret.

Jaret ananin yain Mahalalel.

Mahalalel ananin yain Kenan.

<sup>38</sup> Aria Kenan ananin yain Enos.

Enos ananin yain Set.

Set ananin yain Adam.

Aria Adam douk Iruhin nenekan.



## 4

### *Satan Nakwiraeh Jisas Um Nenek Yoweishi Inahos* (Matyu 4:1-11; Mak 1:12-13)

<sup>1</sup> Aria Iruhin ananin Mishin nyawish Jisas nyapenyan abom aria nagipesh um enyenyim urkum nakutukuk worub Jordan aria nanak. Aria Iruhin ananin Mishin nyaran nyanam wehigunum douk arpesh uwok um. <sup>2</sup> Anan nanak nape agundok um 40-poreih nyumneh shopunek. Aria Satan nape nakwiraehan um nunek yoweishi inahos. Aria ehudok nyumneh nanak nape iri, anan madae nuwok anagun worigun uwe, uwok. Aria douk arigaha ehudok nyumneh hanak hatuh aria debeirubi nyurub ban.

<sup>3</sup> Aria Satan nakripan nakri, “Nyak douk Iruhin ananin Nuganin um, nyak krip amudok utom mutogur bret.” <sup>4</sup> Aria Jisas nakripan nakri, “Baraen nyetem Iruhin ananik Buk iri douk nyakri, ‘Worigun atugun ta mare nutaurum arpesh um shupe wosik atin uwe, uwok.’”

<sup>5</sup> Aria Satan wata narao Jisas natoum anabik aria ahudok atuh neyabigan ihigos nahobigos sape agundok atap iri. <sup>6</sup> Aria Satan nakripan nakri, “Eik ta iken agusudok ihigos nahobigos suni enesh yopishi eshudok eneshenesh shuni arpesh shape agudok nahobig iri. Aria nyak ta nyurao big um nyak atin nyeyoh ihishmorim shuni eneshenesh eshudok arpesh shape ihigos nahobigos iri. Aria ihish atin um eshudok. Douk seiwok yaraesh yeyohesh iri. Aria douk eik ikri iko enen arpen um, eik ta ikenyesh. <sup>7</sup> Aria ta douk nyak nyuduk ohrubus nyunek lotume um, eik ta iken ihishmorim eshudok eneshenesh.”

<sup>8</sup> Aria Jisas wata nakripan nakri, “Baraen nyetem Iruhin ananik Buk iri douk nyakri namudok, ‘Nyak nyunek lotu um Debeini atin nyakin Iruhin aria nyusuhw ananin atin mour.’”

<sup>9</sup> Aria Satan ta naran um Jerusalem. Aria nakih nonem um onok kwato abom iri outuk atudok Iruhin ananit debeiti urupat aria nakripan nakri, “Ta nyak douk Iruhin ananin nuganin um, nyak nyaprok nyubuh atap. <sup>10</sup> Um

maresh? Baraen nyetem Iruhin ananik Buk iri douk nyakri, ‘Iruhin ta nukripesh dodogowinyi baraen um ananish enselahos um shunaki shutaurumen. <sup>11</sup> Aria eshesh ta shejemen shusuwenyukuk iruhw esheshis wis aria ta anam utom mare muwor nyakiruh yeriweruh uwe, uwok.’”

<sup>12</sup> Aria Jisas nakripan nakri, “Baraen nyetem Iruhin ananik Buk iri nyakri, ‘Nyak mare nyukwiraeh um nyusuwokuk Debeini, nyakin Iruhin uwe, uwok.’”

<sup>13</sup> Douk Satan nakwiraeh Jisas um sabaihi yeh um nunek yoweishi inahos ba jurug aria nakutunukuk nanak. Anan nakri kupaibi nyutob aria anan ta nukwiraehan.

### *Jisas Nohur Mour Neneken Shokugi Nahobig Galili* (Matyu 4:12-17; Mak 1:14-15)

<sup>14</sup> Aria Iruhin ananin Mishin nyape Jisas nyenek anan dodogowin aria wata natanam nanak um shokugi nahobig Galili. Aria baraen nyanak sabaigun um agudok shokugi nahobig um enyudok Jisas neneken iri. <sup>15</sup> Aria anan nenek skulumesh numun urusag eshesh Juda shape sheneyagwreh baraen-ogwi aria sabaishi shatuk ananin nyeigur nyato iruhw.

### *Arpesh Shape Nasaret Iri Shakon Agabus Jisas* (Matyu 13:53-58; Mak 6:1-6)

<sup>16</sup> Aria Jisas nanam abrudok wabur Nasaret douk anan wata napenyabur arigah arigah ba yopun um. Aria ahudok nyumnah Sabat eshesh Juda mour uwok shape meyoh ahi hatogur. Aria anan nakitak nanak nawish eshesh Juda shape sheneyagwreh baraen-ati iri urupat douk ihih nyumneh Sabat nape nanak um. Aria nakitak neyotu um nutarih Iruhin ananin baraen. <sup>17-18</sup> Aria habuk onok buk douk shadareshok aria shaweshigok iri. Okwok douk profet Aisaia nenyemok iri. Aria anan napukok aria neparug enen baraen nyakri namudok, “Debeini ananin Mishin nyawishe aria nyapenye. Um maresh? Anan nagraehe neshopoke yanaki um ikripesh yopinyi baraen um yaruhish arpesh iri. Aria douk neshopoke yanamori ikripesh enyudok

baraen, 'Ipak douk horim howeshikep pape shunuweshik-ati urupat iri wata putogur pupe wosik atin. Ipak nabes eshukepi wata putrugun. Aria ikripesh um eshudok arpeshe douk kupaishi shekesh amaen iri wata shupe wosik ba shunadudareh. <sup>19</sup> Aria shopunek, neshopoke yanamori ikripesh baraen um abudok yopubi nyutob douk Debeini ta wata nutaurum ananish arpeshe shupe wosik um.'

<sup>20</sup> Aria Jisas natarih enyudok baraen um jurug aria wata nuwapam buk nakanokuk um anudok neyoh lotu iri. Aria anan wata nanak nabuh nape. Aria eshesh ihishmorim shape numun urupat iri shawanam nabes shape shashakam anan atun. <sup>21</sup> Aria anan nakripesh nakri, "Douk enyudok Iruhin ananin baraen nyetem okwudok Buk iri douk iganigadae pemneken yatarihen iri nyatogur um adurin atin."

<sup>22</sup> Aria eshesh ihishmorim shanadudareh shatuk ananin nyeigur nyato iruhw. Aria eshesh shape urkwip por panak um enyudok yopinyi baraen anan nakrienyi. Aria eshesh shakri, "Mumam mumam namudok. Aria anudok arman anan douk Josep ananin nunganin aka, uwok?"

<sup>23</sup> Aria Jisas nakripesh nakri, "Adurigom atin ipak ta pukripe enyudok shadukemen iri baraen pukri, 'Dokta, nyak nyugabe nyak kanak. Enyudok douk shakripap um nyenekesh shatogur Kaperneam iri shopunek makri nyunekesh shutogur agundok nyakibur wabur.'

<sup>24</sup> Aria Jisas ta nakri, "Adurigom atin eik yakripep. Ta anan profet nikripesh baraen ananibur wabur aria shumnek ananin baraen shugipeshen uwe aka, uwok. <sup>25</sup> Adur atin eik yakripep. Seiwok abudok nyutob Ilaija nape profet obi, sabaiwari armago douk armam hagok aria howosopuk iri wape Israel. Aria abudok nyutob eshah madae anah hurauri um 3-poreish kwarahos aria 6-poreib aub shopunek. Aria debeirubi nyurub baesh um ihirub warub. <sup>26</sup> Aria Iruhin madae neshopok Elaija nunak nutaurum onok Israel douk armam hagok

ba hokusapukuk iri uwe, uwok. Iruhin douk neshopok anan nanak nataurum onok armatok douk anan nagok naksopukuk iri douk kwape kupaiburi wabur shahwarabur um Sarefat iri. Abrudok wabur Sarefat douk bape shokugi nahobig Saidon. <sup>27</sup> Aria douk namudok atin. Abudok nyutob profet Elisa nape agudok atapig nahobig obi, sabaimi armam lep-raih arugeh hapenyam iri hape Israel. Aria Elisa madae nunak nutaurumam ba nenek anan um yopun uwe, uwok. Aria adur atin anan nataurum Naman atun. Naman douk kupaibi amnabin shahwarab um Siria iri."

<sup>28</sup> Aria ihishmorim arpeshe shape numun urupat iri shemnek enyudok baraen aria mishish juwehosish abom um Jisas. <sup>29</sup> Aria eshesh shakitak sharan shanak shatogur aduk um abrudok wabur. Abrudok esheshibur wabur douk batem iruhw anag mihig. Namudok aria shanak anagasibur um natogur nyape um shakri shuwashan nubuh um nugok. <sup>30</sup> Aria eshesh sheyotu aria nawishesh nanak orokohun aria nanak.

*Jisas Nagabe Anan Yoweinyi Sagab Nyapeyan Iri Arman  
(Mak 1:21-28)*

<sup>31</sup> Aria Jisas nanam wabur Kaperneam douk bape shokugi nahobig Galili iri. Anan nanak natogur aria ahudok nyumnah Sabat eshesh Juda mour uwok, shape meyoh ahi, hatogur. Aria anan nape nenek skulumesh um Iruhin ananin baraen. <sup>32</sup> Aria eshesh ihishmorim shemnek aria shakitak yowiyokuk. Um mareshe? Douk neyagwreh dodogowin atin baraen kabi douk sharao debeinyi big iri sheneyagwreh um. <sup>33-34</sup> Aria numun eshesh Juda shape sheneyagwreh baraen-ati urupat, anan arman enen yoweinyi sagab nyapenyam iri arman nape. Aria anan nakitak nahwar debeg nakri, "A! Jisas douk nyanaki wabur Nasaret iri, nyak nyanamori nyunekap mumam apak? Nyak nyakrium nyop nyununup, aka? Eik douk yadukem nyak. Nyak douk Iruhin ananin yopuyopunari arman nyauri ananin baraen iri."

<sup>35</sup> Aria Jisas naho enyudok sagab nakri, “Mokureg aria nyukutukuk anudok arman aria nyutograri.” Aria enyen nyour anudok arman nabuh nakus atap agundok shapeum aria nyakutunagak. Aria madae nyenekan eneb ereb anan uwe, uwok.

<sup>36</sup> Aria douk ihishmorim eshesh shatik namudok aria shanaboum roguh. Aria eshesh sheneyagwreh shakri, “Enyudok maren baraen? Anudok arman douk anan dodogowin narao debeinyi big um. Anan douk naho yoweishi sagabehos aria shemnek ananin baraen aria shakutukuk arpesh shatogur sharuwok!”

<sup>37</sup> Namudok aria baraen um enyudok Jisas neneken iri nyanak ihirub warub douk bape hurukatin um Kaperneam iri.

*Jisas Nagabe Pita Ananik Nakwurikwik Kwani Sabaishi Arpesh*  
(Matyu 8:14-15; Mak 1:29-31)

<sup>38</sup> Aria Jisas nakutukuk atudok eshesh Juda shape sheneyagwreh baraen ati urupat aria nanam Saimon ananit urupat. Aria Saimon ananik nakwurikwik kwa-raubor abom krukruk kweshuhw aras. Douk Jisas nanak aria eshesh shakripan um nunak nugabeyok. <sup>39</sup> Aria anan nanak neyotu hurukatin um agundok okwok kweshuhw um aria naho ehudok arugeh hanegok iri. Aria okwok yopuk abom aria kwakitak kwape kwonekumam worigun.

<sup>40</sup> Aria abudok nyutob aun nape nabuh, eneheneh arugeh hapeyesh iri arpesh esheshish worogwiruh sharaesh shanamori Jisas um nugabeyesh. Aria anan nowemesh ananis wis um eshesh atin atin aria ihishmorim shatogur yopish atish. <sup>41</sup> Yoweishi sagabehos shopunek shakutukuk sabaishi arpesh. Aria eshudok sagabehos shopunek shahwar debeg shakri, “Nyak douk Iruhin ananin naganin.”

Aria Jisas nahaesh aria nakripesh um mare shiyagwreh enen baraen uwe, uwok. Um maresh, eshesh douk shadukemesh shakri anan douk Kraish douk Iruhin nagraehan neshopokan nanamori nurao arpesh iri.

*Jisas Nanam Anarub Warub Nenek Mour*  
(Matyu 8:16-17; Mak 1:32-34)

<sup>42</sup> Arigaha ruwahepih ruhur atur um aria Jisas nakitak nakutukuk Kaperneam nanam anagun wehigunum arpesh uwok um. Aria eshesh arpesh shape shaurim anan. Aria douk arigaha shanak shoparug anan aria shakri shusuhweshan um anan mare nukutishuk ba nunak. <sup>43</sup> Aria anan nakripesh nakri, “Eik ta ko inak kupairubi warub shopunek aria ikripesh yopinyi baraen um arpesh shuwish um agundok Iruhin nape Debeini um ananish arpesh um. Um maresh? Iruhin douk neshopoke yanamori inak ikrip kupaishi shopunek.”

<sup>44</sup> Aria anan nanak nape nakripesh Iruhin ananin yopinyi baraen ihirub warub agudok shokugi nahobig Judia. Anan nape nakripesh Iruhin ananin yopinyi baraen numun urusag um eshesh Juda shape sheneyagwreh baraen-ogwi.

## 5

*Jisas Nahwar Ananim Sagom-atinyim Disaipel Um Hugipeshan*  
(Matyu 4:18-22; Mak 1:16-20)

<sup>1</sup> Anah nyumnah Jisas nanak neyotu anagas um agudok debeigi waiyag Gensaret aria nape nakripesh Iruhin ananin baraen. Aria sabaishi arpesh shape shanaki sharukaruban shanaki hurukatin um anan um shumnek baraen anan nape nakripesh-enyi. <sup>2</sup> Aria agundok, anan natik amudok hape hatuk eiguhw iri amamig biyog botog gwakus. Amam hanukog hakih hagubukuk anagas aria hanak hape hakwrup umbenab. <sup>3</sup> Aria Jisas nato nakih netem Saimon ananit bot. Aria nakripan um neheshigat tanak tur abar aria nape nenek skulumesh um Iruhin ananin baraen eshesh armam armago.

<sup>4</sup> Douk nakripesh baraen jurug aria nakrip Saimon nakri, “Nyak nyurao bot tunak orokohunig um debeigi waiyag aria ipak pukutu ipakib umbenab aria putuk anaguh eiguhw.”

<sup>5</sup> Aria Saimon nakripan nakri, “Debeini, iganigib wab shuknib apak munek debeinyi mour um makutu umbenab aria apak madae mutuk anar atur eyur uwe, uwok. Aria douk nyak nyakri aria eik ta ikutu umbenab bubuh.”

<sup>6</sup> Aria amam hanak hakutu umbenab aria hatuk sabaiguhwi eiguhw aria amamib umbenab hurukatin um tutukurab atin. <sup>7</sup> Aria amudok douk hani Pita hape ananit bot iri hatik namudok aria hawaurum kupaimi douk hape kupaiti bot iri um hunaki hutaaurumam. Aria amam hanaki hataurumam hatukoguhw haguhur amamig biyog botog shishuknig aria hurukatin um gubuhuk debeigi waiyag atin.

<sup>8-10</sup> Aria Saimon douk kupainyi nyeigur um nanahwar Pita nani anam ananim biom douk Jems aria Jon amudok Sebedi ananim nugamim, hatik ogwuhwudok sabaiguhwi eiguhw amam hatukoguhw iri aria amam hakitak yowiyokuk aria hanogugur. Aria Saimon natik namudok aria nabuh noduk ohrubus hurukatin um Jisas aria nakripan nakri, “Debeini, nyak nyukutukuk eik aria nyunak! Um maresh? Eik yenek eneshenesh yoweishi inahos iri!”

Aria Jisas nakripan nakri, “Saimon, nyak mare nyunogugur. Um maresh? Douk arigaha kweipon, nyak ta nyupe nyurao arpesch shunaki shugipesh eik.”

<sup>11</sup> Aria amam hanak amamig botog hakim hagubukuk anagas, hakutukuk ihishmorim amamish eshudok eneshenesh aria hani Jisas hanak.

### *Jisas Nagabe Anan Arugeh Lepra Hapenyani Iri*

*(Matyu 8:1-4; Mak 1:40-45)*

<sup>12</sup> Anah nyumnah Jisas nanak nape anabur wabur aria anan arugeh lepra hapenyani nanaki natogruman. Ananihw yegenyihw douk shuknihw abom um ereb. Aria anan nanak nabuh noduk ohrubus nakus atap aria narig Jisas nakri, “Debeini, nyak nyukri wosik um, eik yakri nyak nyugabeye.”

<sup>13</sup> Aria Jisas nonu rogur nowem ananis wis anudok arman aria nakri, “Eik yakri wosik um. Nyak yopin abom.”

Aria ahudok atuh anan yopin. <sup>14</sup> Aria Jisas nakripan dodogowinyi baraen nakri, “Nyak nyunak aria mare nyukrip enesh arpesch um agundok eik yagabeyen um uwe, uwok. Nyak nyunak arigas um pris nutrin aria nyunak nyenek enyudok ofa um agundok nyak yopin um kabi douk Iruhin ananin lo douk nakoguk Moses iri nyakrium. Nyak nyunekesh namudok aria ihishmorim arpesch ta shutrin aria shudukemesh shukri nyak douk yopin.”

<sup>15</sup> Aria uwok, enyudok baraen um agundok Jisas nagabe anudok arugeh lepra hapenyani um nyowe nyanak rougun. Aria sabaishi arpesch shanaki um shumnek Jisas ananin baraen. Aria shopunek um nugabemesh esheshih arugeh douk hapenyesh iri. <sup>16</sup> Aria ihih anan apa nakitak nanak agundok arpesch uwok um aria nanak nape nenek beten.

### *Jisas Nagabe Anan Roguhw Aiyas Shagokan Iri*

*(Matyu 9:1-8; Mak 2:1-12)*

<sup>17</sup> Anah nyumnah Jisas nanak nape nenek skulumesh um Iruhin ananin baraen. Aria agundok, anam Farisi hani anam henek skulumesh um lo iri shopunek hanaki hape. Amam douk hanaki kupakupairubi warub iri. Anam hanaki Jerusalem iri, aria anam hanaki ihirubmorim warub bape agudok shokugi nahobig Galili iri, aria anam hanaki ihirubmorim warub douk bape Judia iri. Aria abudok nyutob Iruhin nani Jisas napeum nunek Jisas dodogowin um nagabe arpesch arugeh hapeyesh iri. <sup>18</sup> Aria anam armam hasahi anan roguh waiyag aiyas shagokan iri hanaki. Anan neshuh ananis aras aria amam hanasahumori aras hanaki hakim hunak huwish hunabuk agundok Jisas napeum. <sup>19</sup> Aria sabaishi arpesch shape aria amam yah uwok um hishagrakesch huwish um. Aria amam hanasah hatu hakim modukwitam urupat aria haniguk enesh eshudok shetem modukwitam iri heshubukuk aria anan norum aras hanotugon hakwu maduru-ruh aria hakutun nabuhukuk um Jisas. Ihishmorim arpesch shani Jisas shape shersharir aria amam hakutun nabuh

nakus orokohun hurukatin um Jisas napeum.

<sup>20</sup> Aria douk Jisas natik namudok um amam hakri abom um anan douk dodogowin um nugabeyan, aria anan nakrip anudok roguh w aiyas shagokan iri nakri, “Arpenyin, Iruhin nakweshih nyakish yoweishi inahos.”

<sup>21</sup> Aria amam henek skulumesh um lo iri hani amam Farisi hape hansarigum hakri, “Anan douk maran arman aria douk nape nabubunim Iruhin? Apak madukemesh um Iruhin atun ta nukweshih arpeshish yoweishi inahos.”

<sup>22</sup> Aria Jisas nadukem amamip urkwip aria nakripam, “Ipak urkwip mare pur namudok uwe, uwok. <sup>23</sup> Enyudok mour douk shopunek um kabi douk eik ikrip enen arpen um Iruhin ta nukweshih enyenyish yoweishi inahos um o, ikripen um nyukitak nyunak aria enyen ta nyukitak nyunak um. <sup>24</sup> Aria douk eik ta iyabigep um eik Anudok Arman douk yatogur adurinyi arpen iri douk dodogoiwe. Aria eik douk nyeigur nyato agundok atap um ikri Iruhin ta nukweshih arpesh shenekesh iri yoweishi inahos.”

Aria anan nakrip anudok roguh w aiyas shagokan iri nakri, “Eik yakripen, nyak kakitak hur nyakis aras nyunosuwas aria nyunak um urupat!”

<sup>25</sup> Aria ahudok atuh eshudok ihishmorim arpesh douk shape shersharir iri shatrun um nakitak nohur ananis aras nasuwas aria nape nanadudareh natuk Iruhin ananin nyeigur nyato aria napa nanak um urupat. <sup>26</sup> Aria eshesh ihishmorim shakitak yowiyokuk abom. Aria shopunek, eshesh shanogugur aria shatuk Iruhin ananin nyeigur nyato shakri, “Doukih nyumnah apak matik enesh kupaishi eshudok!”

*Jisas Nakrip Livai Um Nugipeshan  
(Matyu 9:9-13; Mak 2:13-17)*

<sup>27</sup> Douk enyudok nyanakuk aria Jisas nakitak nanak aria natik anan arman nyeigurinum Livai douk nape narao takis iri nape. Anan nape urupat anan nape narao takis atari iri. Aria douk Jisas natrun aria nakripan, “Nyak yowi

nyugipesh eik unak.” <sup>28</sup> Aria Livai nakitak nakutukuk eneshenesh ananish eshudok aria nani anan hanak.

<sup>29</sup> Aria douk arigaha anob nyutob aria Livai nakitak nenek anagun debeguni worigun ananit urupat um Jisas. Aria sabaimi harao takis iri hani enesh hwarohwish arpesh shopunek shanak shapeum shuni Livai nini Jisas shuwok agundok worigun. <sup>30</sup> Aria anam Farisi hani anam henek skulumesh um lo iri, douk haniguk amudok Farisi iri hanaki hape. Aria amam hape henekam baraan Jisas ananim disaipel aria harigam hakri, “Ipak pani anam pawok worigun amudok harao takis iri hani eshudok shenek eneshenesh yoweishi inahos iri?”

<sup>31</sup> Aria Jisas nakri, “Arpesh douk arugeh uwok iri ta mare shunak um dokta um nugabeyesh uwe, uwok. Eshudok douk sharao arugeh iri atish ta shunak um dokta um nugabeyesh. <sup>32</sup> Aria eik douk namudok atin kabi douk dokta um. Eik douk madae inakumori ihwar yopishi arpesh shenek yopihi aih iri shatanam um shukon aparuh Iruhin uwe, uwok. Eik yanakumori ihwar eshudok douk shenek yoweishi inahos iri um shukeshuk agabus yoweishi inahos aria shatanam shukon aparuh Iruhin.”

*Jisas Nakripesh Um Agundok  
Shashakur Um Worigun Um  
(Matyu 9:14-17; Mak 2:18-22)*

<sup>33</sup> Aria enesh arpesh shakrip Jisas shakri, “Sabaihi nyumneh Jon ananim disaipel hape henek beten obi nyutob, amam hashakur um amam mare huwok anagun worigun. Aria amam Farisi amamim disaipel shopunek douk henekesh namudok atin. Aria sabaihi nyumneh nyakim madae hunekesh namudok uwe, uwok.”

<sup>34</sup> Aria Jisas nakripesh enyudok wobu-wobren baraan nakri, “Ipak pakri abudok nyutob anudok douk kadak narao armatok iri nini ananishi nupe um, eshesh ta shushakur um worigun aria shupe meyoh aka, uwok? Adur atin ta uwok. <sup>35</sup> Douk nyutob ta bunaki um shuran shunak kupaigunum aria abudok nyutob

ananishi ta urkwip purum anan aria ta shushakur um worigun shupe meyoh.”

<sup>36</sup> Aria Jisas nakripesh enyudok wobu-wobren baraen shopunek nakri, “Ta mare enen arpen nyutupok anap rupahip anah namuhi rupah aria nyutapeyop um anah jugwaihi uwe, uwok. Enyen nyunekesh namudok akure, enyen ta nyunek umunihw ahudok namuhi rupah. Aria shopunek, ta nyukwropop um aria ta mare pupe wosik ahudok jugwaihi rupah, uwok.”

<sup>37</sup> Aria Jisas nakripesh enyudok wobu-wobren baraen shopunek nakri, “Aria shopunek, ta mare enen arpen nyurak anabar namubari wainibar abar bubuk anap jugwaihi memeip munuhwip douk shape shor wainibar abar um uwe, uwok. Enyen nyunekesh namudok akure, abrudok namubari wainibar ta bibrigesh apudok jugwaihi munuhwip aria wain ta nutourakuk atap atin. Aria apudok munuhwip ta yowep. <sup>38</sup> Aria namudok ta uwok. Namubari wainibar abar ta shisharabar namusi atus munuhwis. <sup>39</sup> Aria shopunek, ta mare enen arpen nyukri nyuwok rigibar wainibar abar burik aria wata nyukri nyuwok namubari bugiguk uwe, uwok. Um maresh? Enyen nyakri abrudok jugwaihari abar douk yopubari.”

## 6

*Ahudok Nyumnah Sabat Eshesh Juda Mour Uwok Shape Meyoh Ahi*  
(Matyu 12:1-8; Mak 2:23-28)

<sup>1</sup> Anah nyumnah Sabat, Jisas nakitak nawish nanak anag nubarig douk shau wit agari. Aria ananim disaipel hanak hape hopirak anat urubit wit aria hape hamaprut wis um haworishat hatoh. <sup>2</sup> Aria amam Farisi harigani hakri, “Ipak peneken um enyudok? Apakin lo douk nyakri apak mare munek enen mour ahudok nyumnah Sabat!”

<sup>3</sup> Aria Jisas nakripam nakri, “Ipak patarih baraen nyetem Iruhin ananik Buk iri um abudok nyutob Devit nani ananim nyurub bamum aka, uwok? <sup>4</sup> Devit douk nawish Iruhin ananit debeiti urupat aria nohuri atudok bret douk henek ofa hako Iruhin iri. Aria anan nawok anat aria

nakom anat ananim arman hatoh. Aria shopunek, apakin lo douk nyakri mare enesh meishi arpesh shuwok atudok bret uwe, uwok. Amam pris atum, wosik.”

<sup>5</sup> Aria Jisas wata shopunek nakripam nakri, “Douk eik Anudok Arman douk yatogur adurinyi arpen iri debeiwe iri aria ikrip arpesh um shunek mour ahudok nyumnah Sabat um. Umum maresh? Eik yeyoh ahudok nyumnah sabatih.”

*Jisas Nagabe Anan Rogur Yowenyanari Ahudok Nyumnah Sabat*  
(Matyu 12:9-14; Mak 3:1-6)

<sup>6</sup> Kupaihi nyumnah Sabat, Jisas nanak nawish anat eshesh Juda shape sheneyagwreh baraen-ati urupat aria nape nenek skulumesh um Iruhin ananin baraen. Aria agudok anan arman douk ananin yopunyi rogur douk yowen iri nanaki nanamesh nape. <sup>7</sup> Aria anam henek skulumesh um lo iri hani amam Farisi hape duk atin hatik Jisas um hakri kadak nukri nubrig enyudok lo um nugabe anudok rogur yowenyanari ahudok nyumnah Sabat um, aria amam hunek kwotuman. <sup>8</sup> Aria Jisas nadukem amamip urkwip aria nakrip anudok rogur yowenyanari nakri, “Kitak nyiyotu agudok um eshudok ihishmorim shutrin.” Aria anan nakitak nanak neyotu orokohun.

<sup>9</sup> Aria Jisas nakripam nakri, “Eik yakri isorikep, apakin lo nyakri ta apak munek maresh ahudok nyumnah Sabat? Apak munek yopunyi mugu o munek yoweishi inahos? Mutaaurum arpesh shupe wosik aka, uwok o mesh shugok?”

<sup>10</sup> Aria Jisas neyotu natrish atin atin ari-gaha neyatesh aria nakrip anudok rogur nyenekan iri nakri, “Nu nyakin rogur.” Aria anan nonu rogur aria enyen yopin abom. <sup>11</sup> Aria amudok henek skulumesh um lo iri hani amudok Farisi hatik namudok aria amam nyirub juwehosirub abom um Jisas. Aria amam kanak hape haneyagwrah hakri, “Apak ta muneken mumam anudok arman?”

*Jisas Nagraeh Ananim 12-poreim Aposel*  
(Matyu 10:1-4; Mak 3:13-19)

<sup>12</sup> Aria anah nyumnah Jisas nato anag mihig um nunak nunek beten. Aria agundok anan nanak nape nenek beten um Iruhin anab wab shuknib. <sup>13</sup> Douk nenek beten arigaha gagruk aria nahwar ihm-morim ananim disaipel hanak. Aria anan nagraeh 12-poreim atin um nish-opokam hunak hukriפש ananin baraan iri aria nodowom nyeigur aposel. <sup>14</sup> Anan nagraeh Saimon, douk Jisas nodowon kupainyi nyeigur Pita iri nani ananin wanin Andru, hani Jems iri Jon. Amam hani Filip iri Bartolomyu. <sup>15</sup> Hani Matyu nani Tomas iri kupaini Jems, anan douk Alfius ananin nuganin, hani kupaini Saimon douk neir anap awirop shahwaresh um Selot6:15iri. <sup>16</sup> Amam hani Judas douk kupaini Jems ananin nuganin nani kupaini Judas douk shahwaran um Judas Iskariot iri. Anudok Judas douk ta niyabig Jisas ananim horim um Jisas iri.

*Jisas Nenek Skulumesh Um Iruhin Ananin Baraan Aria Nagabe Eshudok Sharao Arugeh Iri Shatogur Yopish (Matyu 4:24-25; Mak 3:7-12)*

<sup>17</sup> Douk enyudok nyanakuk aria Jisas nani ananim disaipel habuhi habuh hey-otu anabik beriyaigunum aria sabaishi arpeshe shanaki. Enesh douk shagipesh anan iri shani enesh shanaki sabairubi shokurubi warub douk bape shokugi nahobig Judia iri. Enesh shanaki Jerusalem, enesh shanaki arbudok shokurubi warub douk bape hurukatin um debeigwi youg iri. Anarub douk bape hurukatin um arbudok debeirubi warub Tair aria Saidon. <sup>18</sup> Eshesh shanakumori shumnek ananin baraan aria shopunek um nugabemesh eshudok douk sharao arugeh iri. Enesh douk yoweishi sagabehos shapenyesh iri shopunek shanaki aria Jisas nagabeyesh. <sup>19</sup> Aria ihishmorim arpeshe shakri anan douk dodogowini. Douk namudok aria eshesh shakri ta eshesh shunak shususuan meyoh um, eshesh ta wata yopish. Aria eshesh shanak shasusuwan aria eshesh wata yopish.

6:15 **6:15** Putik futnot nyape Matyu 10:4 iri.

*Jisas Nakri Um Arpeshe Shunadudareh Iri Shuni Arpeshe Shureh Iri (Matyu 5:1-12)*

<sup>20</sup> Aria Jisas natanam natik ananim disaipel aria nakripam nakri, "Ipak douk yaruhish um eshudok eneshenesh iri douk pawish agundok Iruhin nape Debeini um ananish arpeshe um! Douk namudok aria ipak douk panadudareh. <sup>21</sup> Aria ipak douk nyurub baep iri douk panadudareh. Um maresh? Iruhin ta nukep worigun pugnoh aria wata dugurep! Aria ipak douk pape poreh iri douk panadudareh. Um maresh? Anah nyumnah ipak ta wata pugukoruh. <sup>22</sup> Aria ipak douk arpeshe shutripum agundok pagipesh eik Anudok Arman douk adurinyi arpen iri aria shunowisep shutripukuk yoweisi nabes um, ipak douk panadudareh. <sup>23</sup> Ipak ta punadudareh pubouk ganiganiguk abom um abudok nyutob eshesh shunekesh-umep namudok um. Um maresh? Ipakish yopishi eshudok douk shakusumep iruhw heven. Seiwok esheshish popehesh yamehesh shopunek douk shenekesh-umam namudok atin amam seiwokimi profet.

<sup>24</sup> "Aria ipak douk pogrem sabaishi eshudok iri eik yakri gihaumep. Um maresh? Yopishi abudok amnabish eshudok ipak panadudareh-umesh ipak paraesh douk. Kweipon ipak ta pumnek debeiri eriger. <sup>25</sup> Eik yakana gihaum ipak douk pawok worigun dugarep iri. Um maresh? Ipak ta wata nyurub bep. Aria kweipon ipak ta pumnek debeiri eriger um debeirubi nyurub bep! Aria eik yakana gihaum ipak douk pape panagukoruh iri. Um maresh? Ipakiruh aparuh ta wata yoweruh aria pureh debeg abom. Aria kweipon ipak ta pumnek debeiri eriger um pureh yowiyokuk. <sup>26</sup> Aria eik yakana gihaum ipak douk ihishmorim arpeshe shatuk ipakish nyeiguhw shakri ipak yopipari abom iri. Ipak ta pumnek aria gamo pudukem amaen douk ta nyutogrump iri. Kweipon ipak ta pumnek debeiri eriger. Um maresh? Seiwok esheshish

popehesh yamehesh douk shenekesh namudok atin abom um shatuk amudok henek rohwmesh iri profet amamish nyeiguhw shato iruhw.”

*Apak Ta Urkum Apahw Shunawasham Apakish Horik Horin (Matyu 5:38-48)*

<sup>27</sup> Aria Jisas apa nakripesh baraen nakri, “Aria eik yakrip ipak douk pemnek eikin baraen iri. Ipak urkum apahw ta punawasham abom um ipakim horim aria punek yopihi aih um eshudok douk shutripukuk yoweisi nabes iri. <sup>28</sup> Aria punek beten um Iruhin um nunekumesh yopihi aih um eshudok douk shenek yoweih aih um ipak aria shukri iruhw um shukri enen amaen nyutogrumep iri. Aria punek beten um Iruhin um nutaum eshudok douk shep shanumugep iri. <sup>29</sup> Aria ta enen arpen nyukri nyubo wobresh popaeshohos um, nyak ta nyutanam nyuken wobresh nyesh shopunek. Aria enen arpen nyukri nyunatrin nyakit saket um, nyak nyuken nyakit siot shopunek. <sup>30</sup> Aria ta enesh arpes shusuwep um pukesh enesh eshudok eneshenesh um, ipak ta pukeshesh. Aria shopunek, ta enen arpen nyutrin nyunohur enesh eshudok um, nyak mare wata nyunak nyusuwen aria ta nyutrinyesh uwe, uwok. <sup>31</sup> EHUDOK aih douk ipak pakri arpes shunekkeh um ipak iri, ipak shopunek ta punek ehudok atih aih um eshesh.

<sup>32</sup> “Aria ipak urkum apahw shunawasham eshudok douk eshesh urkum apahw shunawasham ipak iri atishi um, ipak ta omi nyutuk ipakish nyeiguhw shuto iruhw? Adur atin ta uwok. Shenek eneshenesh yoweishi inahos iri shopunek apa urkum apahw shanawasham eshudok douk eshesh urkum apahw shanawasham eshesh iri atish! <sup>33</sup> Aria ta ipak punek yopihi aih um eshudok douk shenek yopihi aih um ipak iri atish um, ipak ta omi nyutuk ipakish nyeiguhw shuto iruhw? Adur atin ta uwok. Shenek eneshenesh yoweishi inahos iri shopunek apa shenekesh namudok atin! <sup>34</sup> Aria ta pukesh eshudok arpes douk padukemesh um ta wata

shubeyeshumep iri atish um, ipak ta omi nyutuk ipakish nyeiguhw shuto iruhw? Adur atin ta uwok. Shenek eneshenesh yoweishi inahos iri arpes shopunek apa shenekesh namudok atin! <sup>35</sup> Aria namudok ta uwok! Ipak ta urkum apahw punawasham ipakish horik horin aria punek yopihi aih um eshesh. Aria pukesh eshudok aria mare punek urkum um eshesh wata shukepeshi eshudok uwe, uwok. Ipak punekesh namudok aria anah nyumnah Iruhin ta nunekumep sabaishi abom eshudok yopishi eneshenesh gani iruhw heven. Aria shopunek, ipak ta putogur Debeini Iruhin nape iruhw iri ananish batowish. Um maresh? Anan douk yopunum eshudok douk mare shunek tenkyuman iri uwe, shani eshudok douk shenek yoweishi inahos iri aria nataurumesh. <sup>36</sup> Ipakin Yaken apa nenek gihaum eshudok douk shenek yoweishi inahos iri aria nataurumesh. Douk namudok aria ipak shopunek ta punekesh namudok atin.”

*Apak Mare Munek Skelim Um Kupaishi (Matyu 7:1-5)*

<sup>37</sup> Aria Jisas apa nakripesh baraen shopunek nakri, “Ipak mare punek skelimum kupaishi, aria Iruhin shopunek ta mare nunek skelimep uwe, uwok. Aria ipak mare pukesh enen baraen kupaishi pukri eshesh shenek yoweishi inahos iri, Iruhin shopunek ta mare nukep enen baraen nukri ipak penek yoweishi inahos iri. Aria ipak mare pubeimesh yoweishi inahos kupaishi shenekesh um ipak iri aria pukweshihesh um eshesh, aria Iruhin ta nukweshihumep ipakish yoweishi inahos shopunek. <sup>38</sup> Aria ipak pukesh eneshenesh kupaishi um, Iruhin ta wata nukep enesh eshudok ipak. Anan ta nutaurumep nukep sabaishi eshudok aria ta shuknigun abom um ipak. Aria makwunish eshudok ipak pukesh kupaishi um, eshudok Iruhin ta wata nubeyeshumep namudok atin.”

<sup>39</sup> Aria Jisas nakripesh enyudok wobu-wobren baraen nakri, “Anan nabes seshukan iri ta mare niyabig yah um kupaishi nabes seshukan iri, uwok. Aria anan ta niyabigan yah um, amam biom



ta hunak hutu hugrukuk anag nuwag. <sup>40</sup> Aria shopunek, ta mare enen arpen nyanak um skul iri nyukri nyupe debeinyi um enyenyin tisa uwe, uwok. Aria ihishmorim ta sheyatak esheshin skul iyoh aria eshesh ta kadak shutogur kabi douk esheshim tisa ami um.”

<sup>41</sup> “Nyak douk mare nyutik abudok debeibi bagab douk bor nyakip nabep iri uwe. Douk namudok aria nyak ta nyutrugun um agundok shokuguni nyubuhasingun douk nor nyakin arpen enyenyip nabep iri mumam? <sup>42</sup> Nyak douk mare nyutik abudok debeibi bugob douk bor nyakip nabep iri uwe. Douk namudok aria nyak ta mare nyukrip nyakin arpen um nyutukuman agundok shokuguni nyubuhasingun douk nor enyenyip nabep iri uwe, uwok. Nyak nyenek rohwi iri! Sagomatin nyak ta nyurik nyutukuk abudok debeibi bagab douk bor nyakip nabep iri ba iyoh. Aria nyak ta gamo nyunatrugun wosik aria kadak nyutukuman agundok shokuguni nyubuhasingun douk nor nyakin arpen enyenyip nabep iri.”

*Yoweipi Shuruwep Apa Peir Yowegosi Rowos*  
(Matyu 7:16-20, 12:33-35)

<sup>43</sup> Aria Jisas apa nakripesh baraen shopunek nakri, “Yoweipi shuruwep ta mare pir enen yopunyi rowog. Aria yopipi ta mare pir enen yoweinyi rowog uwe, uwok. <sup>44</sup> Arpesh ta shutik shuruwep atip aria ta shudukemesh um enyen douk yopunyi aka, uwok yoweinyi. Arpesh ta mare shudi enep shuruwep nyeigurip um fik iri enen segego watogren iri rowog, uwok. Aria shopunek, ta mare enesh arpesh shudi enep wainip shuruwep enen segego watogren iri rowog, uwok. <sup>45</sup> Aria arpesh shopunek douk namudok atin. Yopunyi arpen douk yopumi urkum mape numun iri apa munek yopuhi aih. Aria yoweinyi arpen douk yowemi urkum mape numun enyenyim urkum iri apa munek yoweihi aih. Um maresh? Arpesh apa shenyagwreh enenyenen nyape numun esheship urkwip iri.”

*Biom Harok Urusag Iri*  
(Matyu 7:24-27)

<sup>46</sup> Aria Jisas apa nakripesh baraen nakri, “Ipak apa pohware pakri, ‘Debeini’ aria ipak madae pugipesh eikin baraen uwe um maresh? Namudok uwok. <sup>47</sup> Eshudok arpesh douk shunakumori eik aria shumnek eikin baraen shugipeshen iri, eshesh ta kabi douk maresh um? <sup>48</sup> Eshesh douk kabi anan arman douk nakitak narok nuwagos arigaha nabuh nasuhw burbudu aria nakitak nawu uroruh aria narok ananit urupat iri. Douk narokat wosik aria eshah harari worub bau bat aria babirak ba madae butukat uwe, uwok. <sup>49</sup> Aria eshudok douk shumnek eikin baraen aria mare shugipeshen iri douk kabi anudok arman douk narok urupat atap meyoh iri. Anan madae nurok anagos nuwagos ba iyoh, aria nu uroruh aria kadak nurukat uwe, uwok. Aria anan narokat aria eshah harari aria worub bau batukat aria tatu.”

## 7

*Jisas Nagabe Anan Nenekuman Mour Anan Debeini Soldia Iri*  
(Matyu 8:5-13)

<sup>1</sup> Douk Jisas nakripesh enyudok baraen neyaten shemneken aria nakitak nanak um Kaperneam. <sup>2</sup> Aria agundok anan debeini um amam soldia iri nape. Anan douk nanaki abrudok wabur Rom. Aria anudok douk nenekuman mour iri arugeh hapeyan aria anan hurukatin um nugok. Aria anudok debeini soldia douk urkum makriyan abom. <sup>3</sup> Aria anan nemnek um Jisas nanaki nape Kaperneam um, aria neshopok anam eshesh Juda esheshim debeimi um hunak hukripan um nunaki nugabe anudok nenekuman mour iri. <sup>4-5</sup> Douk neshopokam hanak hatogur um Jisas aria harigan debeg abom hakri, “Anudok debeini soldia douk yopuyopuni abom. Douk namudok aria nyak nyunak nyutauruman. Anan douk urkum makri apak ihishmorim Juda abom aria anan kanak nakop utabor aria marok apakit urupat mape meyagwreh baraen-atari.”

<sup>6</sup> Aria Jisas nakitak neiram hanak. Douk hanak hurukatin um urupat aria anudok soldia nakitak neshopok anam ananim

arpeshim hanak hakrip Jisas hakri, “Debeini, anudok soldia nakri nyak mare nyunak ananit urupat. Um maresh? Anan douk madae yopuni um nyak nyunak ananit urupat um uwe.”<sup>7</sup> Aria shopunek, anan douk madae yopuni um nunaki hurukatin um nyak aria nutrin uwe. Aria anan nakri nyak nyukri baraen atin aria anudok nenekuman mour iri wata yopun.<sup>8</sup> Anan nadukemesh um nyak nyukri baraen atin um, anan ta wata yopun. Um maresh? Anan douk nape shakamum ananin debeini soldia. Aria anan shopunek douk nape debeini um kupaimi soldia. Aria ta anan nukrip anan um nunak um, anan ta nunak. Aria nukrip anan um nunakumori, anan ta nunaki. Aria ta nukrip anudok nenekuman mour meyoh iri nukri nenekume enyudok mour, anan ta nuneken.”

<sup>9</sup> Aria Jisas nemnek namudok aria nakitak yowiyokuk aria natanam nakrip eshudok sabaishi arpesh shagiman iri nakri, “Eik yakripep, apak kanak Israel, eik madae itik enen atin arpen nyunek bilip dodogowin atin namudok uwe!”<sup>10</sup> Aria amudok douk neshopokam hanakum hukrip Jisas iri wata hatanam hanak urupat aria hatik um anudok nenek mour um anudok soldia iri wata yopun.

*Onok Armatok Anan Nagok Naksopukuk Iri Okwokwin Nuganin Nagok Aria Jisas Wata Nonohur Nakitak Nape*

<sup>11</sup> Douk Jisas napeigu aria nakitak nanak um anabur wabur shahwarabur um Nain iri. Aria ananim disaipel hani sabaishi arpesh shopunek sheiran shanak.<sup>12</sup> Douk nanak natogur Nain aria natik um enesh shasahi anan nagok iri arman shanaki. Anudok arman ananik amakek douk kwabuki anan atun. Aria okwokwin raminen douk nagokuk aria sabaishi arpesh sheirok shanaki.<sup>13</sup> Aria douk Debeini natik namudok aria anan nakri giha abom aria nakripok nakri, “Nyak mare nyureh.”

<sup>14</sup> Aria anan nanak nasuhw asudok bokis douk shore iri anudok-asi ba shanasahumori aria eshudok shanasahi iri, shatik namudok aria sheyotu. Aria

Jisas nakri, “Shokuni! Kakitak, eik yakripen!”<sup>15</sup> Aria anudok nagok abom iri nakitak nape neyagwreh aria Jisas nakrip ananik amakek nakri, “Nyakin nuganin anudok.”<sup>16</sup> Aria douk ihishmorim shatik namudok aria eshesh shanogugur abom aria shatik Iruhin ananin nyeigur nyato iruhw aria shakri, “Anan debeini profet nanaki nape orokohun um apak.” Aria shopunek shakri, “Iruhin nanaki um nutaaurum apak ananish arpesh.”

<sup>17</sup> Aria enyudok baraen nyowe nyanak sabaigunum agudok shokugi nahobig Judia gani kupairubi warub bape hurukatin iri shopunek um enyudok mour Jisas neneken iri.

*Jon Nenek Baptaisumesh Iri Neshopok Biom Ananim Disaipel Um Hunak Humnek Jisas*

*(Matyu 11:2-19)*

<sup>18-19</sup> Douk Jon ananim disaipel hakrip Jon um enyudok Jisas nape neneken iri aria anan nahwar biom hanaki aria neshopokam hanak. Amam hanakum horik Debeini hukri, “Douk Iruhin ta nishopokan nunaki iri douk nyak aka, uwok. Ta mupe mutrugun um kupaini?”<sup>20</sup> Aria amam hanak hatogur um Jisas aria harigan hakri, “Jon douk nenek baptaisumesh iri neshopokohw-aria wanaki um usorigen um, ‘Douk Iruhin nakri um nishopokan nunaki iri arman douk nyak aka, uwok. Ta mupe mutrugun um kupaini?’ ”

<sup>21</sup> Aria abudok nyutob Jisas nagabe sabaishi arugeh hapeyeshi iri shani sagabehos shapenyesh iri. Aria shopunek nagabe sabaishi nabes seshukeshi aria eshesh wata shatrugun.<sup>22</sup> Aria Jisas nakrip amudok Jon ananim disaipel nakri, “Ipak wata punak pukrip Jon um mour douk ipak patrin iri nyuni baraen ipak pemneken iri. Nabes seshukesh iri wata shatrugun, aria eshudok douk shape atap atin iri wata shakitak sharahaen. Aria yagabe arugeh lepra hapenyesh iri wata yopish, aria arigos seshukesh iri wata shemnek. Aria yohur shagok iri wata shakitak shape, aria yakriפש Iruhin ananin yopinyi baraen eshudok douk yaruhish iri arpesh shemneken.”<sup>23</sup> Aria

eshudok arpesch douk urkwip porum eik aria shasuhw eikin baraen iri, eshesh douk shanadudareh!”

<sup>24</sup> Aria douk Jon ananim hatanam hanak aria Jisas nape nakrip eshudok sabaishi arpesch um Jon nakri, “Riguk ipak panak patik Jon gani wehigunum arpesch uwok um, ipak pakri anan douk maran arman aria ipak douk panak patrun? Pakri anan douk madae dodogowin kabi douk worur douk uhwin nyarar nyanak wobuwobur iri, uwok? <sup>25</sup> O panak um putik maresh? Ipak panak um putik anan arman douk nore yopihi atih rupeh iri? Uwok. Shenek yopihi atih rupeh aria shawok yopishi atish worigunish aria shape wosik atin iri, eshudok douk shape king-omi amamig otug urusag. <sup>26</sup> Aria eik yakri ipak pukripe um ipak panak um putik maresh? Ipak panak um putik anan profet, uwok? Adur atin abom anan douk anan profet. Aria shopunek, anan douk neshagrakuk amudok anam profet-omi. <sup>27</sup> Baraen douk nyetem Iruhin ananik Buk abom iri douk nyakrium anudok Jon. Aria Iruhin douk nakri, ‘Eik ta ishopok anan nurao eikin baraen iri nurik nunak. Anan ta nurik nunak nugabeimen yah nyak!’ ”

<sup>28</sup> Aria Jisas nakri, “Eik yakripep, Jon ananin nyeigur douk nyatouk nyeshagrakuk ihishmorim arpesch douk shape agundok atap iri esheshish nyeiguhw. Aria eshudok arpesch douk eshesh nyeiguhw madae shutowesh uwe, aria shawish agundok Iruhin nape Debeini um ananish arpesch um, esheshish nyeiguhw douk shatouk sheshagrakuk Jon ananin nyeigur.”

<sup>29</sup> Aria douk ihishmorim arpesch shani amudok harao takis iri shemnek Jisas neyagwrehan iri baraen aria eshesh shape shanadudareh. Eshesh shanadudareh um agundok riguk eshesh shemnek Iruhin ananin baraen shagipeshen shakri wosik yopinyi baraen aria Jon nenek baptaisumesh um. <sup>30</sup> Aria riguk amam Farisi hani amudok henek skulumesh um lo iri hemnek Iruhin ananin baraen aria hokomukuk agabus Iruhin ananim

urkum aria hakri uwok um Jon nunek baptaisumam um.

<sup>31</sup> Aria Jisas nakri, “Eik ta iyabigep maresh eshudok doukishi arpesch douk shakonaguk agabus Iruhin iri. Eshesh kabi douk omi um? <sup>32</sup> Eshesh kabi douk shokwishi douk shemnek kupaishi esheshin baraen aria madae shugipeshen atin iri uwe. Shokwishi apa shanak shape agundok douk eshesh apa shantorum shapeum aria enesh shape shahwar enesh shakri, ‘Apak manadudareh aria mape mahapur buwaen aria ipak madae putaurumap miyarub uwe! Apak mape mareh meyarub aweruh douk sheyarubaruh um shagok iri um aria ipak madae pureh uwe.’ <sup>33</sup> Um maresh? Douk riguk Jon nenek baptaisumesh iri nanaki aria anan madae nuwok yopishi worigun shuni wainibar abar uwe aria ipak madae punnek ananin baraen pugipeshen uwe. Aria ipak pakri, ‘Anudok enen yoweinyi sagab nyapenyhan aria nagugak!’ <sup>34</sup> Aria douk shopunek, eik Anudok Arman douk yatogur adurinyi arpen iri yanaki aria yape yawok worigun nani wainibar abar aria ipak pakri, ‘Tik nani nawok sabai-guni worigun iri. Anan nawok sabaibari wainibar abar aria nagugak. Aria shopunek, nani amudok harao takis iri hani eshudok shenek eneshenesh yoweishi inahos iri shape!’ <sup>35</sup> Aria eshudok arpesch douk shagipesh Iruhin iri shenekeh iri aih douk heyabigap um Iruhin ananim urkum douk yopumi atum.”

*Onok Kwonek Yoweishi inahos Iri Armatok Kwakwrup Jisas Ananiruh Yeriweruh Um Sanda*

<sup>36</sup> Anan Farisi nahwar Jisas um nunak nini anan huwok worigun ananit urupat. Aria Jisas nakitak nanak natogur anudok Farisi ananit urupat aria nani anan hape tebol hape hawok worigun. <sup>37</sup> Aria abrudok wabur, onok armatok douk kwonek sabaishi yoweishi inahos iri kwape. Aria okwok kwomnek um Jisas nanak nani anudok Farisi hape hawok worigun um. Aria okwok kwakitak kwohur anar yopuri botol douk shenigor utom iri shukunir um yopunyi sanda iri kwasuwor aria

kwanak. <sup>38</sup> Okwok kwanak kweyotu agabin um Jisas hurukatin um ananiruh yeriweruh aria kwape kworeh. Okwok kworeh aria abih habuh hetem ananiruh yeriweruh aria okwok wata kwakwu okwokwig barag kwape kwagabe-aruh. Aria okwok kwanapuprik-aruh ba iyoh, aria douk kwagabeuman yeriweruh kwakwu enyudok sanda.

<sup>39</sup> Aria anudok Farisi douk nahwar Jisas nanaki iri natik namudok aria anan kanak naneyagwreh nakri, "Aria anudok arman douk adurini profet abom akure, anan ta nudukemesh um okwudok armatok douk kwape kwasusuhw ananiruh yeriweruh iri. Aria shopunek, anan ta nudukemesh um okwok douk kwenek yoweishi inahos iri!"

<sup>40</sup> Aria Jisas nakripan nakri, "Saimon, eik yakri ikripen um enen baraen."

Aria Saimon nakri, "Wosik tisa, kripe."

<sup>41</sup> Aria Jisas nakripan nakri, "Anan arman nukom anabor utabor biom armam. Anan nakon 100 kina, aria anan nakon 10 kina atin. <sup>42</sup> Aria amudok biom utabor uwok um wata hubeabor-bunaman um aria anan nakri nyunekesh. Aria nyak nyakri meini ta urkum munawasham abom um anudok nakom utabor iri?" <sup>43</sup> Aria Saimon nakri, "Eik yakri anudok douk nakon 100 kina iri."

Aria Jisas nakri, "Nyak nyakri adurin baraen."

<sup>44</sup> Aria natanam natik okwudok armatok aria nakrip Saimon nakri, "Nyak nyatik okwudok armatok? Eik yanaki nyakit urupat aria nyak madae nyuke anabar abar um inokwrup eikiruh yeriweruh uwe. Aria okwudok kwape kwareh aria okwokwih abih habuh hetem eikiruh yeriweruh aria wata kwakwu okwokwig barag kwape kwagabeume yeriweruh. <sup>45</sup> Aria nyak douk madae nyu- napuprike uwe. Aria okwudok, abudok nyutob eik yanaki atinyum arigaha douk, okwok kwape kwanapuprik eikiruh yeriweruh. <sup>46</sup> Aria nyak douk madae nyuwanume anar yopuri wel barag uwe, aria okwudok kwakwrupame yeriweruh sanda. <sup>47</sup> Okwok urkum douk manawasham eik abom. Namudok aria eik

yakripen, Iruhin douk madae nusuhwesh um eshudok sabaishi yoweishi inahos riguk okwok kwenekesh iri uwe aria nakwreyeshuguk. Eshudok arpeshtok douk shenek karowishi yoweishi inahos aria Iruhin madae nusuhwesh-umesh uwe aria nakwreyeshuguk iri, esheship urkwip ta punawasham Iruhin shokubur atin."

<sup>48</sup> Aria Jisas nakrip okwudok armatok nakri, "Iruhin madae nusuhwesh nyakish yoweishi inahos uwe aria nakwreyeshuguk." <sup>49</sup> Aria eshudok shani anan shape shawok worigun iri eshesh kanak sheneyagwreh shakri, "Anudok anan douk meini arman aria douk nakri Iruhin madae nunasuhwesh um arpeshtok shenekesh iri yoweishi inahos aria nakwreyeshuguk um?" <sup>50</sup> Aria Jisas nakrip okwudok armatok nakri, "Nyak nyenek bilip um Iruhin aria anan douk nanaraen nyatanamori nyape wosik abom. Namudok aria nyak nyunak aria nyakihw apahw hwur wosik."

## 8

### *Ono Armago Wagipesh Jisas*

<sup>1</sup> Douk anob nyutob banakuk aria Jisas nakitak nanak anarub debeirubi warub bani anarub shokurubi. Anan nanak nape nakriresh yopinyi baraen um agundok Iruhin nape Debeini um ananish arpeshtok um. Aria ananim 12-poreim disaipel shopunek hanaman hanak. <sup>2</sup> Amam hani ono armago shopunek douk riguk Jisas nahiyah-umokuk yoweishi sagabehos shani arugeh douk hapenyo iri shanaman shanak. Oudok armago onok douk Maria douk kwanaki wabur Makdala iri. Okwok douk seiwok Jisas nahiyah-umokuk eshudok 7-poreshtok yoweishi sagabehos shapenyok iri shatogur sharuwokuk iri. <sup>3</sup> Aria onok douk Joana douk okwokwin raminen nanahwaram Susa iri. Anan douk nenek mour Herot ananit urupat. Owo wani Susana kwani sabaiwari armago shopunek wagipeshan. Aria owo apa wataurumam nani ananim disaipel um wokam anabor owowibor utabor bani anagun worigun.

*Anan Arman Nawashak Wit Nubarig Iri*

*(Matyu 13:1-9; Mak 4:1-9)*

<sup>4-5</sup> Douk eshesh shanak aria sabaishi arpeshe abom shanaki sabairubi warub iri shape shanaki um shakri shutik Jisas. Douk arigaha sabaishi shanaki sheyotu aria Jisas nakripesh enyudok wobuwobren baraen nakri, “Anan arman nanak nawashak wit ananig um nubarig. Anan nawashat aria anat tabuh takus yah, aria arpeshe sharahaen shoshishat aria armiguhw hwabuh hwatuhur hwatoh. <sup>6</sup> Aria anat tabuh takus utabor um. Aria atat pupuwarat takih aria abar uwok anabar uwe aria yarit. <sup>7</sup> Aria anat tabuh tagrukuk anaruh uturuh iri amnab aria pupuwarat takih aria aruhudok segegoiruhi madaruruh hashapamat. <sup>8</sup> Aria anat tabuh tagrukuk yopubi amnab aria pupuwarat takih aria sabaiti teir. Atat 100-poreib urub beir atin atin apakiwog.”

Aria douk Jisas nakriyuk namudok aria anan nakripesh nakri, “Ipak arigos sapenyepari ta gamo pumnek eikin baraen aria pugipeshen!”

*Baugenyum Um Baraen Um Agundok Jisas Nakripesh Wobuwobren Atin Baraen Um*

*(Matyu 13:10-17; Mak 4:10-12)*

<sup>9</sup> Douk Jisas nakriyuk enyudok baraen aria ananim disaipel hariganum baugenyum baraen um enyudok wobuwobren baraen anan nakriyen iri. <sup>10</sup> Aria Jisas nakripam nakri, “Iruhin douk nakripep baugenyum baraen um enyudok nyanabeshuk iri baraen ipak atip um arpeshe shuwish agundok Iruhin nape Debeini um ananish arpeshe um. Aria ihishmorim kupaishi ta uwok. Eshesh ta shumnek wobuwobren atin aria ta shutik um baugenyum aria ta mare shudukemen. Eshesh ta shumnek baraen aria ta mare shudukem baugenyum uwe, uwok.”

*Jisas Nakripesh Um Baugen Um Baraen Um Enyudok Wobuwobren Baraen Um Atudok Urubit Wit*

*(Matyu 13:18-23; Mak 4:13-20)*

<sup>11</sup> Aria Jisas ta nakri namudok, “Enyudok wobuwobren baraen um anudok

nawashak wit nubarig iri douk nyanak namudok. Atudok wit douk kabi Iruhin ananin baraen um. <sup>12</sup> Aria atudok douk tabuh takus yah iri douk kabi eshudok arpeshe douk shemnek Iruhin ananin baraen, aria Satan nanaki natrish narauguk enyudok baraen douk nyape esheshiruh aparuh iri. Anan nenekesh namudok um eshesh mare shusuhw Iruhin ananin baraen dodog shugipeshen aria Iruhin wata nunaraesh shutanamori shupe wosik abom uwe, uwok. <sup>13</sup> Aria atudok tabuh takus utabor um iri douk kabi eshudok arpeshe douk shemnek Iruhin ananin baraen shanadudareh-umen aria eshesh shemneken meyoh iri. Eshesh madae shusuhwen dodog uwe. Eshesh shenek bilip um enyudok Iruhin ananin baraen shakri adurin banab nyutob meyoh. Aria Satan nokwiraeshesh um shunek yoweishi inahos aria eshesh shakutukuk Iruhin ananin baraen aria wata shatanam shanak shenek yoweishi inahos. <sup>14</sup> Aria atudok douk tabuh tagrukuk uturuh hatogrohi urah iri douk kabi eshudok arpeshe douk shemnek Iruhin ananin baraen, aria eshesh shapeum shakri shunogrem sabaishi eneshenesh eshudok iri. Aria eshesh shanadudareh um eshudok eneshenesh abudok amnabishi atish. Eshesh douk shenek wari um enenyenen amaen douk ta nyutogruresh iri aria mishish shakitak um shurao sabaishi eneshenesh eshudok aria eshesh shape shagipesh harik hapenyesh iri yoweih aih. Aria eshesh madae shunek yopihi aih uwe, uwok. <sup>15</sup> Aria atudok douk tabuh takus yopubi amnab iri douk kabi eshudok arpeshe douk shemnek Iruhin ananin baraen aria shasuhwen dodog shagipeshen iri. Esheshiruh aparuh douk yopuyopuruh abom hape wosik aria sheyotu dodog abom shagipesh Iruhin ananin baraen. Aria eshesh shenek yopihi aih aria shape kabi atudok wit douk sabaiti urubit teir iri.”

*Lam Douk Shahemen Shashapomen Anat Baket Iri*

*(Mak 4:21-25)*

<sup>16</sup> Aria Jisas ta nakri namudok, “Ta mare enen arpen nyahem enen lam aria nyukitak nyushapomen anat baket

o nyunyigren shakamum anat bet uwe, uwok. Enyen ta nyuhemen aria nyunyem iruhw um kadak arpes shuwishamori shutik agundok enyen nyatrugun um.

<sup>17</sup> Aria ihishmorim eshudok douk shanabeshuk iri ta wata shutogur yopugunum. Aria ihishmorim eshudok douk arpes sheshigarish shakus iri ta wata shishurekesh shukus yopugunum.

<sup>18</sup> Aria ipak ko gamo pudukemesh aria gamo pumnek. Um maresh, eshudok arpes douk shurao Iruhin ananin baraan shudukemen wosik iri, Iruhin ta wata gamo nukripesh enen shopunek. Aria eshudok douk madae shudukem ananin baraan iri uwe, enyudok karowin eshesh shasuhwen iri ta wata nutrishenyuk.”

*Jisas Ananik Amakek Kwani Ananim Warhim*

*(Matyu 12:46-50; Mak 3:31-35)*

<sup>19</sup> Douk Jisas nape nakripesh Iruhin ananin yopinyi baraan eshudok sabaishi arpes, aria ananik amakek kwani ananim warhim shanaki um shakri shutrun. Douk shanaki aria sabaishi arpes sheyotu shersharian aria anan neyotowi orokohun. Aria eshesh shabirak aria madae shunak hurukatin um anan uwe. <sup>20</sup> Douk namudok aria enesh shakripan shakri, “Nyakik amakek kwani nyakim warhim shashi shanaki sheyotu aduk. Aria eshesh shakri nyak nyunak nyutrish.”

<sup>21</sup> Aria Jisas nakripesh nakri, “Eshudok douk shemnek Iruhin ananin baraan shasuhwen shagipeshen iri eshesh douk kabi eikik amakek aria eikim warhim um.”

*Jisas Naho Debeinyi Uhwin Nyagok Nyabuhuk*

*(Matyu 8:23-27; Mak 4:35-41)*

<sup>22</sup> Anah nyumnah Jisas nakrip ananim disaipel nakri, “Apak munak gani wobrehahig um waiyag.”

Aria amam hakitak hatobot aria hanak. <sup>23</sup> Douk hanak yah aria Jisas yobusin atun aria nabuh neshuh. Aria debeinyi uhwin nyahur aria abar baprok bawishukuk bot aria atat hurukatin um tubuhukuk atin.

<sup>24</sup> Aria ananim disaipel hatik namudok aria hanak henyubarun um hakri, “Debeini, apak hurukatin um mugok wo!”

Aria anan nakitak naho enyudok uhwin aria morub um shunak shuruk shemshem. Aria uhwin nyanak nyagok nyabuhuk aria morub shopunek madae butuk uwe, uwok. <sup>25</sup> Aria anan narig ananim disaipel nakri, “Ipak madae punek bilip um eik uwe um maresh?”

Aria amam hanogugur aria hape hanasorik um hakri, “Anudok manan arman? Anan naho uhwin aria abar um shunak shugok shubuhuk aria eshesh shopunek shemnekan aria shanak shagok shabuhuk!”

*Jisas Nagabe Anan Yoweishi Sagabehos Shapenyani*

*(Matyu 8:28-34; Mak 5:1-20)*

<sup>26</sup> Aria Jisas nani ananim disaipel hanak arigaha hanak hatogur eshesh Gerasa eshesh-umok um. Agagun douk nape gani wobrehahig um waiyag Galili.

<sup>27-29</sup> Agundok anan abrudok waburin douk yoweishi sagabehos shapenyani aria shenekan nagugak iri nape. Sabaihi nyumneh eshudok sagabehos shasuwan dodog anudok arman. Aria roubum nyutob anan madae nuwah rupeh uwe, uwok aria urupat madae nupeyat uwe. Aria arpes apa shatrun ihih nyumneh aria shasuwan shape shakwu senab shaweshik ananish roguh waiyas. Eshesh shaweshikan aria anan naprukesh abudok senab aria eshudok sagabehos sharan sharuwok shanak wehigunum arpes uwok um. Anan nanak nape ganik wonugwegwiruh-igunum arpes wokum.

Douk amam hanak hatogur aria Jisas nabuh nakih neyotuanagas aria anudok sagabehos shapenyani nanaki natogruman. Aria natik Jisas aria nohwar debeg aria nanak nabuh nakus atap hurukatin um Jisas ananiruh yeriweruh. Aria nahwar debeg nakri, “Jisas, Debeini Iruhin ananin Nuganin! Nyak nyakri nyuneke mumam eik? Eik dodogoiwe yakripenyum yakri nyak mare nyuneke irao debeiri eriger.”

Anan nakripan namudok Jisas um maresh, Jisas douk madae roubi naho

eshudok sagabehos um shukutun-ukuk shutogur shuruwok.

<sup>30</sup> Aria Jisas narigan nakri, “Nyak nyanahwar mumam?”

Aria anan nakri, “Apak sabaishi sagabehos.”

Anan douk nakri namudok um maresh, sabaishi yoweishi sagabehos shawish shapenyan. <sup>31</sup> Aria sabaishi atish eshudok sagabehos dodogowish atish um Jisas shape apa shakri, “Nyak mare nyish-opokap munak mugrukuk agudok nuwag douk gor gabuhuk aria madae gubuh giyotu anagun iri uwe.”

<sup>32</sup> Aria agundok anaguh burghuw hweyotuwu hurukatin um anag mi-hig. Aria eshudok yoweishi sagabehos shakrip Jisas um nushopokesh shunak shuwish ogwuhwudok burghuw aria anan neshopokesh shanak. <sup>33</sup> Aria eshesh shatograri anudok nagugak iri arman shanak shawish ogwuhwudok burghuw. Aria ogwoguh hwatanam hwaruwok hwanak hwagrukuk enen natogur aria hwabuh hwabarahuk agudok waiyag. Aria ogwoguh hwabarahuk aria ihiguh-morim hwagok hwatuh.

<sup>34</sup> Aria amudok armam douk hape hako ogwuhwudok burghuw iri hatik namudok aria hahur hanak hakrip eshudok douk shape debeiburi wabur iri, shani eshudok douk shape hurukatin um nahobigos iri um enyudok mugu douk nyatogur iri. <sup>35</sup> Aria eshudok arpeshe shakitak shanak um shutik enyudok mugu douk nyatogur iri. Eshesh shanak shatogur um Jisas aria shatik anudok douk sagabehos shakutunukuk shatogur sharuwok iri nape. Anan wata narao yopumi urkum aria nakitak nanug rupah aria nanak nape hurukatin um Jisas ananigas aiyas. Douk eshesh shatrun namudok aria eshesh shanogugur abom. <sup>36</sup> Aria eshudok arpeshe douk shatik enyudok mugu Jisas neneken iri um nagabe anudok yoweishi sagabehos shapenyan iri shanakrip eshudok douk shanakumori shutik enyudok mugu douk nyatogur iri. <sup>37</sup> Aria ihishmorim arpeshe shape Gerasa iri shanogugur abom aria

shakrip Jisas um nukutukuk esheshibur wabur ba nunak. Aria anan nakitak nato bot aria natanam nanak gani wobrehahig um waiyag. <sup>38-39</sup> Aria anudok sagabehos shakutunukuk shatogur sharuwok iri nakitak dodogowin um narig Jisas um nakri nunaman hunak.

Aria Jisas nakripan nakri, “Uwok, nyak wata nyutanam nyunak nyakibur wabur aria nyukrip nyakishi arpeshe um enyudok mour Iruhin neneken um nyak iri.”

Aria anudok arman wata natanam nanak um ananibur wabur aria nakrip ihishmorim arpeshe um agundok Jisas nagabeyan um.

*Jisas Nohur Jairus Ananik Nugawik Kwakitak Kwape Aria Nagabe Onok Kwawusuhw Ananik Rupah Iri*

*(Matyu 9:18-26; Mak 5:21-43)*

<sup>40</sup> Aria Jisas natanam nanak arigaha nanak natogur gani wobrehahig um debeigi waiyag aria sabaishi arpeshe shanadudareh-umani. Um maresh? Eshesh douk iganigadae shanaki shape shatrugun-uman. <sup>41</sup> Aria Jairus douk nape debeini um eshesh Juda shape sheneyagwreh baraen-ati urupat iri shopunek nanaki. Anan nanaki aria nabuh nakus atap hurukatin um Jisas ananiruh yeriweruh aria narigan dodog atin um niran nunak ananit urupat. <sup>42</sup> Um maresh? Ananik otuk arag nugawik douk okwokwish kwarahos amakek kwakwubuki-umeshi douk shatogur 12-poreish aria hurukatin um kugok.

Aria Jisas nakitak nape nanak yah aria sabaishi arpeshe shopunek shanaman shanak wobuwobur aria anan nor orokohun. <sup>43</sup> Aria agundok onok armatok douk owishibor banakok kwape 12-poreish kwarahos iri shopunek kwanaki. Okwokwibor utabor douk kweyatabor batuhuk um kwator dokta omi um agundok hape hagabeyok um. Aria amam shopunek habirak madae hugabeyok uwe. Arpen douk madae enen dodogowin um nyugabeyok uwe, uwok. <sup>44</sup> Douk namudok aria okwok kwagimori Jisas kwanaki agabinum aria kwasusuhw apubih um ananik rupah aria owishibor tukarubor-ukuk abom.

<sup>45</sup> Aria Jisas narigesh nakri, “Omi nyanaki nyasusuhw eik?” Aria eshesh ihishmorim shatanam aria eshesh atin atin shakri eshesh uwok. Aria Pita nakri, “Debeini, sabaishi arpeshe sheyotu huruhuruk um nyak aria eshesh shanaki shatatoruh-enyuk meyoh.”

<sup>46</sup> Aria Jisas nakri, “Uwok, eik yadukemesh, enen arpen nyasusuhw eik. Um maresh? Eik yemnek um Iruhin ananin dodog douk nyogabe enen arpen.”

<sup>47</sup> Aria okwudok armatok kwadukemesh um anan nadukemesh um agundok anan nagabeyok um. Aria okwok kruk-kruk kwanaki kwabuh kwakus hurukatin um Jisas ananiruh yeriweruh. Aria eshudok ihishmorim arpeshe sheyotu aria okwok kwakripan um maresh shenegok aria okwok douk kwanaki kwasusuhw ananin rupah aria ahudok atuh wata yopuk abom um. <sup>48</sup> Aria Jisas nakripok nakri, “Nugawik, nyak nyenek bilip nyakri eik dodogoiwe iri aria nyak douk yopin. Douk namudok aria nyak nyunak aria nyakihw apahw hwur wosik.”

<sup>49</sup> Aria douk Jisas wata nape neyagwreh atin aria anan napei Jairus ananit urupat iri nanaki nakrip Jairus nakri, “Jairus, nyakik nugawik kwagok. Douk namudok aria nyak mare nyukon mour debeini Tisa um nunaku nyakit urupat um.” <sup>50</sup> Aria Jisas nemnek namudok aria nakrip Jairus nakri, “Nyak mare nyunogugur uwe, uwok. Nyak nyunek bilip atin aria nyakik nugawik ta wata kwukitak kwupe.”

<sup>51</sup> Aria Jisas nanak arigaha natogur Jairus ananit urupat aria nakrip Pita nani Jon iri Jems atum hani okwudok kwagok iri okwokwish amakenyish atish shanaman shawish numun. Kupaishi shapeik aduk. <sup>52</sup> Aria ihishmorim shape agundok iri shape shorep okwudok kwagok iri armatok. Aria Jisas nakripesh nakri, “Ipak mare pureh, okwudok madae kugok uwe. Okwok kweshuhw meyoh!”

<sup>53</sup> Douk anan nakripesh namudok aria ihishmorim shadukemesh um okwok douk kwagok. Namudok aria eshesh shanagokoruan. <sup>54</sup> Aria Jisas nani

ananim 3-poreim disaipel hani okwokwish amakenyish shanak shawish numun aria anan nasuhw okwokwin rogur nakwuhur aria nakri, “Batowinyik, nyak kakitak!” <sup>55</sup> Aria mishin nyakih nyawishok aria ahudok atuh okwok kwakitak kwape. Aria Jisas nakripesh um shukok anagun worigun. <sup>56</sup> Aria douk okwok kwakitak kwape aria okwokwish amakenyish shakitak yowiyokuk. Aria Jisas nakripesh dodogowinyi baraen um eshesh mare shunak shukrip enesh arpeshe um agundok anan nohur esheshik nugawik kwakitak kwape um.

## 9

*Jisas Nakrip Ananim Disaipel Um Enyudok Mour Douk Ta Amam Hunak Heneken Iri*

*(Matyu 10:5-15; Mak 6:7-13)*

<sup>1</sup> Aria Jisas nahwar ananim 12-poreim disaipel hanaki heyotu atugun, aria nakom gobi nyani dodog um huhiyahuguk yoweishi sagabehos. Aria shopunek um hugabe arugeh douk hape arpeshe iri. <sup>2</sup> Douk anan nakripam jurug aria neshopokam hanakum hukripesh yopinyi baraen um agundok Iruhin nape Debeini um ananish arpeshe um aria hugabe eshudok arugeh haesh iri shutogur yopish. <sup>3</sup> Aria anan nakripam shopunek nakri, “Ipak punak ahudok yah um, ipak mare pusuhw enep butip o esharuh huni worigun aria utabor o eneh kupaihi rupeh shopunek uwe, uwok. <sup>4</sup> Aria punak anabur wabur aria abrudok waburish arpeshe shukri wosik um shukep anat urupat um pishuh um, ipak punak pupe atudok atut urupat. Ipak pupe arigaha mehi nyumnah pukri pukutukuk abrudok wabur punak um, aria ipak kadak pukutubur-ukuk. <sup>5</sup> Aria douk punak anabur wabur aria madae shumnekep aria madae shukep anat urupat um pishuh um, ipak pukutukuk abrudok wabur aria punak. Ipak pikitak pugudupeshuk nyupruk kwotem ipakiruh yeriweruh iri kwukusuk abrudok wabur aria punak. Ipak punekesh namudok um eshesh shutrip aria ta shudukemesh um eshesh douk shenek



yoweihi aih aria Iruhin ta nunekumesh debeiti kwot.”

<sup>6</sup> Aria amam hakitak hape hakripesh Iruhin ananin yopinyi baraen hanak atubur atubur warub. Aria shopunek, hagabe sabaishi arpesch arugeh hapeyesh iri.

*Herot Nemnek Um Enenyenen Jisas Nape Neneken Iri*

*(Matyu 14:1-2; Mak 6:14-16)*

<sup>7</sup> Aria king Herot douk nape debeini gavman um agudok shokugi nahobig Galili iri nemnek um ihishmorim eshudok douk shape shatogur iri aria anan nornor nape. Um maresh? Anan nemnek um enesh arpesch shakri, “Jisas douk Jon nenek baptaisumesh iri. Anan douk nagok aria wata nakitak nape!” <sup>8</sup> Aria enesh shakri Elaija douk seiwok nagok iri anan wata nakitak nape. Aria enesh shakri anan kupaini seiwokin profet wata nakitak nape. <sup>9</sup> Eshesh douk shakri namudok, aria Herot nakri, “Eik yatupok Jon ananin aruhwigur aria anan nagok. Aria douk anudok meinari arman douk eik yemnek um anan nape nenek enenyenen dodogowinyi mour iri?” Douk namudok aria anan nape nabirak um nakri nutik Jisas.

*Jisas Nekesh Worigun Sabaishi Arpesch Aria Armam Atum Douk 5,000-poreim*

*(Matyu 14:13-21; Mak 6:30-44; Jon 6:1-13)*

<sup>10</sup> Aria Jisas ananim aposel wata hatanamori aria hakripan um eshudok amam henekesh iri. Aria anan narao amam aria amam atum hakitak hanam wabur Betsaida. <sup>11</sup> Aria sabaishi arpesch shemnek um Jisas nanak nape abrudok wabur um, aria eshesh shagipeshan shanak. Eshesh shanak shatogurman aria anan nanadudareh-umesh um agundok eshesh shanaki um. Aria anan nape nakripesh baraen um shuwish um agundok Iruhin nape Debeini um ananish arpesch um. Aria shopunek, nagabe eshudok douk sharao arugeh iri.

<sup>12</sup> Douk eshesh shape arigaha aun nape nabuh aria Jisas ananim 12-poreim disaipel hanaki hakripan, “Nyak nyish-opokesh ba shunam warub douk bape

hurukatin um nahobigos iri um shunak shunourim um worigun um shugnoh iri. Aria shopunek um shunourim um urusag um shishuh um. Um maresh? Agundok apak mape wehigunum, arpesch uwok um.”

<sup>13</sup> Aria Jisas nakripam nakri, “Ipak kanak pukesh anagun worigun.”

Aria amam hakripan hakri, “Apak masuhw 5-poreit bret tani bias arbus meyoh. Aria nyak nyakri apak um munak mutorumesh anagun worigun um eshudok sabaishi arpesch aka?”

<sup>14</sup> Aria armam douk 5,000 poreim. Aria armago iri batowish madae shudarehesh uwe.

Aria Jisas nakrip ananim disaipel um hukripesh um hurukatin um 50-poreish shunak shupe anabik aria enesh shopunek hurukatin um 50-poreish shupe anabik. Eshesh shupe namudok atin shunak. <sup>15</sup> Aria amam hakripesh aria ihishmorim shabuh shape atap. <sup>16</sup> Douk shabuh shape aria Jisas nohur atudok 5-poreit bret tani asudok bias arbus nasuwesh aria nanig natik iruhw heven. Aria nenek beten nenek tenkyu um Iruhin. Douk nenek tenkyuman jurug aria nawor atudok 5-poreit bret aria arbus nako ananim disaipel aria amam hape hekeshesh hanak. <sup>17</sup> Douk hekeshesh iyoh aria ihishmorim shashoh arigaha dugareh aria shakusuk iri, amam hatrishesh heshruk 12-poreiruh sararuh shishikniruh aria harhubuk hakus.

*Pita Nakri Um Jisas Anan Kraish Douk Iruhin Nagraehan Neshopokan Nanaki Iri*  
*(Matyu 16:13-19; Mak 8:27-29)*

<sup>18</sup> Anah nyumnah Jisas atun nape nenek beten. Aria ananim disaipel shopunek hani anan hape aria anan narigam, “Ipak pemnek arpesch shakri eik douk amiapen?”

<sup>19</sup> Aria amam hakripan, “Enesh shakri nyak douk Jon nenek baptaisumesh iri, aria enesh shakri nyak Elaija. Aria enesh shakri nyak anan kupaini seiwokin profet douk seiwok nagok aria douk wata nakitak nape iri.”

<sup>20</sup> Aria anan narig amam nakri, “Aria ipak kanak pakri mumam? Ipak pakri eik douk amiapen?”

Aria Pita nakripan, “Nyak Kraish douk Iruhin nagraehen aria neshopoken nyanamori nyurao arpesh iri.”

*Jisas Nakripam Anan Ta Nugok Aria Ta Wata Nukitak Nupe Um*

*(Matyu 16:20-28; Mak 8:30—9:1)*

<sup>21</sup> Aria Jisas nakripam dodogowinyi baraan ananim disaipel um mare hunak hukrip enesh arpesh um anan douk Kraish um uwe, uwok. <sup>22</sup> Aria Jisas apa nakripam baraan shopunek nakri, “Eik Anudok Arman douk yatogur adurinyi arpen iri ta irao debeiri eriger. Aria eshesh Juda esheshim debeimi huni amam debeimi pris huni amam henek skulumesh um lo iri ta huke agabus aria huyokuse. Aria ta he igok aria shurume iyur wonugwehw biyeh nyumneh. Aria douk hukri um biyeh atih nyumneh um, Iruhin ta wata niyohur ikitak ipe.”

<sup>23</sup> Aria nakrip ihim-morim ananim disaipel nakri, “Douk enen arpen nyukri nyugipesh eik um, enyen ta nyukri uwok abom um enyen mare nyugipesh enyen kanak enyenyim urkum. Aria ihih nyumneh enyen ta nyusah enyenyin rowog kruse aria nyugipeshe.<sup>9:23</sup> <sup>24</sup> Um maresh? Eshudok arpesh douk esheship urkwip madae purum eik aria shukri shunagabe esheshiruh aturuh yegeshiweruh aria eshesh shunogugur um shugok um, eshesh ta shugok aria shunak shuwishuk. Aria eshudok douk esheship urkwip purum eik aria mare shunogugur um kupaishi shesh shugok um agundok shagipesh eik um, eshesh ta shupe wosik ihih nyumneh. <sup>25</sup> Douk anan arman nunek mour aria nurao ihishmorim agundok atapish eneshenesh um, aria kweipon nanak nugok aria nunak nuwishuk um, aria ihishmorim eshudok eneshenesh ta shutauruman mumam? Adur atin ta uwok! <sup>26</sup> Aria douk enen arpen nyunogugur um kupaishi arpesh aria nyukri enyen douk

madae eikin disaipel uwe, aria shopunek nyukenyuguk agab eikin baraan um, kweipon eik Anudok Arman douk yatogur adurinyi arpen iri ta ikri enyudok arpen douk madae eikin uwe, uwok. Aria abudok nyutob eik dodogoiwe aria itruguni kabi douk eikin Yain nani ananish yopishi enselahos shatrugun um inaki obi nyutob, eik ta ikripen ikri enyen douk madae eikin uwe, uwok. <sup>27</sup> Adur atin eik yakripep, ipak enep douk peyotu agundok iri ta mare arigas pugok aria ta putik abudok nyutob Iruhin nupe Debeini um ananish arpesh um.”

*Jisas Ananihw Yegenyihw Hwakabadig Hwatogur Anahaeh Aria Natrugun Abom*  
*(Matyu 17:1-13; Mak 9:2-13)*

<sup>28</sup> Douk Jisas nakriyuk enyudok baraan aria 8-poreih nyumneh hanak hadiguk, aria anan nani amam Pita nani Jon aria Jems hanak hato anag mihig um anan nunak nunek beten. <sup>29</sup> Aria douk anan nape nenek beten aria ananig yomag gatogur anahaeh abom. Aria ananih rupeh hatogur shigorihwih abom aria hatrugun kabi douk utag brereyarog ba gatrugun um. <sup>30</sup> Aria ahudok atuh biom armam hatogur heyotu hani anan hape heyagwreh. Amam douk Moses nani Elaija. <sup>31</sup> Amam shopunek douk hatrugun abom aria heyotu hani Jisas hape heyagwreh um agundok ta anan niyatok enyudok mour Iruhin neshopokan nanakumori nuneken iri um nugok Jerusalem um. <sup>32</sup> Aria Pita nani amudok anam biom arpeshim hape yobus sam dodog amaenyim atum aria heshuh hagok. Aria amam wata hakitak hatik agundok Jisas dodogowin aria natrugun abom um nani amudok biom douk hani anan heyotu iri. <sup>33</sup> Abudok atub nyutob amudok biom hakri hukwutukuk Jisas ba hunak aria Pita nakrip Jisas, “Debeini, namudok douk wosik um apak mupe agundok um. Aria apak muwem bioguh atur shomeguh. Nyak anar aria Moses anar aria Ilaija anar.” Aria agundok Pita douk

**9:23** **9:23** Baugenyum baraan um arpen nyusah enyenyin rowog kruse nyugipesh Jisas um douk nyakri namudok. Enyen ta nyugipesh Jisas aria enyen mare nyukri uwok um nyusah enyenyenen amaen aria mare nyunogugur um kupaishi shen nyugok um.

madae nudukemesh uwe, um ta nukripan maren barae Jisas. Douk namudok aria anan douk nakripan namudok.

<sup>34</sup> Aria douk Pita wata nape neyagwreh atin aria onog orug gwanaki iruhw aria goma nyeshigorum. Aria Pita nani amudok biom hanogugur um ogwudok orug gwanaki aria goma nyeshigarum um.

<sup>35</sup> Aria anah mah hatograri ogwudok orug aria mah heyagwrehi hakri, “Anudok douk eikin adurin Nuganin douk eik yanagraehan iri. Ipak pumnekan!”

<sup>36</sup> Aria douk enyen nyeyagwrehi jurug aria amam hatik um Jisas atun neyotuguk. Aria amam madae hiyagwreh hukri enen barae uwe. Aria abudok nyutob shopunek, amam madae hunak hukrip enesh arpesih um eshudok amam hatrish iri uwe, uwok.

*Jisas Nagabe Anan Shokuni Yoweinyi Sagab Nyapeyan Iri*

*(Matyu 17:14-21; Mak 9:14-29)*

<sup>37</sup> Aria ruwahepih amam hakitak hakutukuk agudok mihig habuhi aria sabaishi arpesih shanaki shaparug Jisas yah. <sup>38</sup> Aria anan arman douk nani eshudok arpesih sheyotu iri nahwar nakri, “Tisa tik, eik yarigen dodog um nyunaki nyutik eikin nunganin. Eik douk adur atin anudok atun nunganin! <sup>39</sup> Anan enen yoweinyi sagab nyapeyan aria ahudok atuh nahwar debeg. Aria enyen nyatukan nyonaur atap aria ohwas sakih sabuh wobuwobur ananit nokwat. Enyen nyape nyanunun aria madae nyukutunuguk nyutogur nyunakuk uwe, uwok. <sup>40</sup> Aria eik yakrip nyakim disaipel um huhiyahan aria amam habirak hatik uwok.”

<sup>41</sup> Aria Jisas nakri, “Ipak doukish arpesih, eik yani ipak mape roubi nyutob ipakirub warub aria ipak yoweishi arpesih madae punek bilipume uwe. Aria ipak pakri eik ta wata ini ipak mupe eneh shopunek nyumneh um itaurumep namudok atin um isah enenyenen ipakin amaen aria ta uwok?”

Aria anan nakrip anudok arman nakri, “Nyak haroki nyakin nunganin!”

<sup>42</sup> Aria anudok yoweinyi sagab nyapenyan iri wata napa nanaki atin

aria enyen nyatukan nyonur atap. Aria Jisas nahaen aria nyakutunuguk nyatogur nyaruwok. Douk Jisas nagabeyan aria wata nakrip ananin yaken nakri, “Nyakin nunganin anudok.” <sup>43</sup> Aria ihishmorim arpesih shatik enyudok dodogowinyi mour Iruhin neneken iri aria eshesh shakitak yowiyokuk abom.

*Jisas Wata Shopunek Nakri Um Agundok Ta Anan Nugok Um*

*(Matyu 17:22-23; Mak 9:30-32)*

Aria eshesh urkwip wata pape porum enyudok Jisas neneken iri aria anan nakrip ananim disaipel nakri, <sup>44</sup> “Ipak gamo pumneken wosik enyudok barae douk yakri ikripepen iri! Arpesih ta shukrip eikim horim um eik Anudok Arman douk yatogur adurinyi arpen iri aria ta dodogowim atum husuwe hunak huweshike.” <sup>45</sup> Aria douk nakripam enyudok barae aria amam madae hudukem baugenyum uwe. Baugenyum barae douk nyanabeshuk-umam aria amam hanogugur um horiganumen.

*Jisas Ananim Hanatuturak Um Meini Ta Nupe Debeini Um Amam*

*(Matyu 18:1-5; Mak 9:33-37)*

<sup>46</sup> Aria amam disaipel hape hanogogonim barae um amam meini ta nupe debeini um amam. <sup>47</sup> Aria Jisas douk nadukem amamip urkwip por panak um, aria nasuhwi enen batowin nyanaki nyani anan nyeyotu. <sup>48</sup> Aria anan nakripam, “Douk enen arpen urkum mur um eik aria nyataurum enyudok batowin um, enyen douk nyataurum eik. Aria douk namudok atin, enyudok arpen nyataurum eik iri douk nyataurum anudok douk neshopok eik yanaki iri shopunek. Aria meini orokohun um ipak douk peyotu agundok iri nyeigur wakan iri ta anudok nupe debeini um ipak.”

*Eshudok Douk Madae Shunek Horik Horin Um Ipak Iri Uwe Douk Shaniguk Ipak Iri*

*(Mak 9:38-40)*

<sup>49</sup> Aria Jon nakrip Jisas nakri, “Debeini, apak matik anan arman nape nahiyahuk yoweishi sagabehos um nyakin nyeigur

aria eshesh shatogur sharuwok. Aria apak makripanam anan mare wata nunekesh namudok uwe, uwok. Um maresh? Anan douk madae nugipesh apak iri uwe, uwok.”

<sup>50</sup> Aria Jisas nakripan, “Ipak mare pukripan namudok uwe, uwok. Um maresh? Eshudok douk shataurum apak iri douk shaniguk ipak iri.”

*Enesh Samaria Shakri Uwok Um Jisas Nunak Esheshibur Wabur*

<sup>51</sup> Aria douk ihih nyumneh hape hanak hurukatin um Iruhin wata nurao Jisas nunam iruhw heven um. Aria Jisas nakri abom um nunam Jerusalem, aria anan nakitak nanak. <sup>52</sup> Anan wata nape nagiguk aria neshopok enesh arpesh sharao baraen sharik. Eshesh shanak shawish anabur shokuburi wabur douk bape Samaria iri um shugabeman eshudok um anan nunak nishuh um. <sup>53</sup> Aria arpesh shape nagundok iri shadukemesh um anan ta nunak um Jerusalem um nunek lotu um Iruhin. Douk namudok aria eshesh shakri uwok um nunak nini eshesh nishuh um. <sup>54</sup> Aria douk ananim disaipel Jems nani Jon hatik namudok aria hakripan, “Debeinyi, nyak nyakri apak muhwar nyih hubuhi iruhw heven hunish aka, uwok nyakri mumam?” <sup>55-56</sup> Aria Jisas natanam naham aria amam wata hanam kupaiburi wabur.

*Arpesh Douk Shukri Shugipesh Jisas Iri (Matyu 8:19-22)*

<sup>57</sup> Douk amam hanak yah aria anan arman nakrip Jisas nakri, “Ihigun nyak nyunak um, eik ta inamen unak.”

<sup>58</sup> Aria Jisas nakripan, “Wanarig nubag apa gweshuh hurusigun. Aria armiguhw hwewhuru iruhw iri apa hweshuh was. Aria eik Anudok Arman douk yatogur adurinyi arpen iri urupat uwok um inak ishuh um.” <sup>59</sup> Aria Jisas wata shopunek nakrip kupaini nakri, “Nyak yowi nyugipesh eik.”

Douk anan nakripan namudok aria anudok arman nakri, “Debeini, eik yakri nyukripe inak ba itik eikin yaken anan nagok ba iroman iyoh aria ta inaki inamen unak.”

<sup>60</sup> Aria Jisas nakripan, “Nyak bukeshek shagok iri, kadak eshudok douk madae shunek bilip um eik iri uwe shunak shurumesh. Aria nyak nyunak nyukriפש yopinyi baraen um agundok Iruhin nape Debeini um ananish arpesh um.”

<sup>61</sup> Aria anan arman shopunek nanaki nakrip Jisas nakri, “Debeini, eik yakri igipeshen aria eik yakri inak ikeshuk rogur apak atup awirop ba iyoh.”

<sup>62</sup> Aria Jisas nakripan, “Douk anan arman nukri nuhur eikin mour nuneken aria anan wata urkum mur um enesh-enesh eshudok anan nakutishukuk iri um, anan douk madae wosik dodogowin um nuwish agundok Iruhin nape Debeini um ananish arpesh um uwe, uwok.”

## 10

*Jisas Neshopok 72-poreim Armam Hanak Um Hunek Mour*

<sup>1</sup> Douk enyudok nyanakuk ba iyoh, aria Debeini wata nagraeh 72-poreim armam shopunek aria neshopokam hanak biom biom. Anan neshopokam harik hanak ihirub warub douk anan nakri nunakarubi. <sup>2</sup> Aria anan nakripam, “Sabai-guni worigun jurugigun nape, aria arpesh shagunmesh iri douk karowish. Douk namudok aria ipak punek beten um Debeini douk nagrem agudok nahobig iri um neshopok sabaishi arpesh um shunak shogunum agundok worigun. <sup>3</sup> Ipak ta punak, aria eik ishopokep punak kabi douk sipsipahos douk madae dodogowish iri uwe, punak orokohun um wanarig nubag. <sup>4</sup> Aria ipak mare punaruk anas paus douk ipak pape apa panaruk utabor um suni esharuh iri su. Aria ipak punak arigas, ipak mare piyotu puni enesh arpesh douk puparugeshe yah iri piyagwreh, uwok.

<sup>5</sup> “Aria douk punak puwish anat urupat um, sagomatin ipak ta purik pukri, ‘Apak makri ipak pape atudok urupat iri ipakiruh aparuh hur wosik.’ <sup>6</sup> Aria ta anan yopuni arman nupe atudok urupat um, enyudok baraen ipak pakripanen iri ta nyuni anan nyupeik. O uwok um, enyudok yopinyi baraen ta wata nyutanamori nyupe um ipak kanak atin.

<sup>7</sup> Aria ipak pupe atudok atut urupat aria puwok agundok worigun aria abar eshesh shukepesh iri. Um maresh, ipak penek Iruhin ananin mour aria douk shatorip shekep agundok worigun. Aria ipak mare pupe anat urupat aria wata pukitak punam kupaigwi, uwok. Ipak pupe atudok atut urupat. <sup>8</sup> Aria douk punak anabur wabur aria enesh arpesh shuraep punam esheshig urusag aria shunek anagun worigun shukep um, agundok worigun ipak ta pugnoh. <sup>9</sup> Aria pugabe eshudok arpesh sharao arugeh iri douk shape abrudok wabur iri. Aria pukrip arpesh shape abrudok iri pukri, 'Nyutob douk banaki hurukatin um arpesh shuwish agundok Iruhin nupe Debeini um ipak ananish arpesh um.'

<sup>10-11</sup> "Aria ta punak anabur wabur aria arpesh shape abrudok iri shukepaguk agabus um, ipak punak piyotu yah aria pukri, 'Okwudok nyupruk apak meshishok ipakibur wabur iri okwudok wata magudupeshuk kwakusumepukuk. Apak menekesh namudok um ipak putrup aria ipak urkwip purum enyudok. Nyutob douk banaki hurukatin um arpesh shuwish agundok Iruhin nupe Debeini um ananish arpesh shupe um.' <sup>12</sup> Eik yakripep, ahudok nyumnah Iruhin nunaki nunemesh baraen ihishmorim arpesh ahi, arpesh douk seiwok shape Sodom iri ta shumnek debeiri eriger aria ta madae kabi eshudok shekepuk agabus ipak iri. Aria eshudok douk shekepagak agabus ipak iri ta shunamnek debeiri eriger abom shenek uhwin um shape Sodom iri!"

*Anarub Warub Douk Shemnek Iruhin Ananin Baraen Aria Madae Shusuhwen Iri Uwe*

*(Matyu 11:20-24)*

<sup>13</sup> Aria Jisas apa nakripesh baraen shopunek nakri, "Eik yakri gihaum ipak arpesh pape Korasin bani Betsaida iri. Ipak ta punnek debeiri eriger aria ta pupe yowep abom! Um maresh, seiwok um anan arman nunek enen Iruhin atun neneken iri mour gani Tair bani Saidon kabi douk eik yeneken ipakirub warub um akure, eshesh ta seiwok shukutukuk

yoweishi inahos aria shutanam shukon aparuh Iruhin. Aria eshesh ta shukitak shuwashak yoweishi rupeh aria shunawatom argabus um shiyabigesh um eshesh douk shekeshuguk agabus yoweishi inahos! <sup>14</sup> Aria ahudok nyumnah Iruhin nunaki nunemesh baraen ihishmorim arpesh um, amaen douk ta nyutogur um ipak Korasin puni Betsaida iri ta nyishagrakuk abom enyudok douk ta nyutogur um eshudok douk seiwok shape Tair bani Saidon iri. <sup>15</sup> Aria ipak Kaperneam shopunek, ipak pakri ta Iruhin nukri wosik aria nurawep puto iruhw heven, aka? Iruhin ta nuwashep pugrukuk shagok iri shanak shapeum!"

<sup>16</sup> Aria Jisas nakrip ananim disaipel nakri, "Eshudok douk shumnek ipak iri douk shemnek eik shopunek. Aria eshudok douk shekep agabus ipak iri douk sheke agabus eik shopunek. Aria shuke agabus eik iri douk shakon agabus anudok douk neshopok eik yanaki iri."

*Amudok 72-poreim Armam Wata Hatanamori*

<sup>17</sup> Douk amudok 72-poreim armam wata hatanamori aria amam hanadudareh abom. Aria amam hakri, "Debeini, apak manak maho yoweishi sagabehos douk shawish shape arpesh iri makripesh um nyakin nyeigur aria eshesh shamnekap shatogur sharuwok."

<sup>18</sup> Aria Jisas nakripam, "Adur, eik yatik Satan madae dodogowin uwe aria nakutukuk iruhw heven nagruki kabi douk utag brereyarog um. <sup>19</sup> Ipak mnek. Eik douk yakep dodogowinyi big um pishish yugwuhw hwuni pupiyaumeb shuni ihinyumorim dodog apakin horin Satan ananin. Aria ipak ta mare enesh yoweishi eshudok shunekep uwe, uwok.

<sup>20</sup> Aria ipak mare punadudareh um eshudok sagabehos shemnek ipakin baraen um uwe, uwok. Ipak ta punadudareh um agundok Iruhin nowem ipakish nyeiguhw shetem iruhw heven um."

*Jisas Nanadudareh Aria Nenek Tenkyu Um Iruhin*  
*(Matyu 11:25-27, 13:16-17)*

<sup>21</sup> Aria abudok nyutob, Iruhin ananin Mishin nyenek Jisas nanadudareh abom aria nakri, “Eikin Yain, Debeini um iruhw atap iri! Eik yanadudareh aria yatuk nyakin nyeigur nyato iruhw. Um maresh? Nyak nyabeshuk baugh um nyakih aih aria baraeen um eshudok arpeshe douk shakri eshesh shadukemesh abom aria sharao sabainyi saki iri. Aria nyak wata nyeyabig eshudok kabi douk shok-wishi batowish iri um. Adur Yain, nyak douk nyagipesh nyakim atum urkum aria nyanadudareh um nyenekesh namudok.”

<sup>22</sup> Aria anan apa nakripam baraeen shopunek nakri, “Eikin Yain douk neke ihishmorim eshudok. Aria madae enesh arpeshe shudukem eik ananin nuganin uwe, uwok. Yain atun nadukeme. Aria shopunek, madae enesh arpeshe shudukem Yain uwe, uwok. Eik ananin nuganin yani eshudok douk eik yakri iyabigesh um anan iri atup madukeman.”

<sup>23</sup> Aria Jisas natanamori natik um ananim disaipel heyotu aria nakripam nakri, “Ipak douk patik enyudok mour douk eik yeneken patrin iri, ipak douk panadudareh! <sup>24</sup> Um maresh? Eik yakri pep, sabaimi profet hani sabaimi king hakri hutik enyudok mour ipak patrin iri aria uwok. Amam hakri humnek enyudok baraeen ipak pemneken iri aria uwok.”

### *Anan Samaria Nataurum Ananin Horin Nanaki Jerusalem Iri*

<sup>25</sup> Anah nyumnah anan nenek skulumesh um lo douk seiwok Iruhin nakoguk Moses enyi nanak aria nakri nukwiraeh Jisas. Aria narigan nakri, “Debeini tisa, eik ta inek maresh aria ta douk ipe wosik abom ihih nyumneh?”

<sup>26</sup> Aria Jisas nakripan nakri, “Nyak nyatik Iruhin ananin lo nyakripen mumam? Aria shopunek nyak nyatarihen mumam?” <sup>27</sup> Aria anudok nenek skulumesh um lo iri nakri, “Ipak ta urkwip gamo punawasham abom um Iruhin. Aria ipakiruh aparuh huni ipakish mishish shuni ipakip urkwip ta shunawasham Debeini ipakin Iruhin anan atun aria pukwu ihinyumorim ipakin dodog um punek ananin mour.’ Aria

shopunek, ‘Ipak urkwip ta punawasham abom um eshudok douk shape hurukatin um ipak iri aria putaurumesh kabi douk ipak urkwip panawasham ipak kanak um.’”

<sup>28</sup> Aria Jisas nakri, “Nyak nyakri wosik. Nyak ta nyunekesh namudok aria nyak ta nyupe wosik ihih nyumneh.”

<sup>29</sup> Aria anudok nenek skulumesh um lo iri nakri Jisas nutrun nuhwaran yopunyi arpen. Douk namudok aria anan narig Jisas nakri, “Aria eshudok shape hurukatin um eik iri douk meishi?”

<sup>30</sup> Aria Jisas nakripan enyudok wobuwobren baraeen nakri, “Anan arman nape Jerusalem aria nakitak nabuhum Jeriko. Anan nanak yah aria yowemi armam douk hakwuaruh atuh iri hasuwan aria han heneken atuhig aria anan hurukatin um nugok. Aria amam hanabuk nakusuk aria hatrun hanawar anan ih rupeh hani eshudok anan nasuwesh iri hanasuwesh aria hanak. <sup>31</sup> Aria abudok nyutob anan pris nagim yah nanak. Anan nanak natrun aria neshagrakan nanakuk wobrahum yah aria nanak. <sup>32</sup> Douk anan nanakuk aria anan Livai douk nataurum amam pris iri shopunek nanaki nanak neyotu natrun aria nanak wobraham yah aria neshagrakan nanak. <sup>33</sup> Douk anan nanakuk aria anan Samaria nanak natogur agundok anan nakus um. Aria anan natrun aria anan neneman gihum anudok Juda. <sup>34</sup> Douk namudok aria anan nanak hurukatin um anan aria nourak wel rani wain um ebudok ereb ba iyoh aria naweshigeb. Douk naweshikuman ereb jurug aria nonohur nanem ananin donki aria naran nanak. Anan naran um anat arpeshe shanak shape sheshuhati urupat aria nanak nape natauruman. <sup>35</sup> Douk hanak hape arigaha ruwahepih aria anudok Samaria nakitak neyak anabar utabor nako anudok nagrem atudok urupat iri. Aria nakripan, ‘Nyak nyupe nyutauruman aria ta nyak nyukwu anabor nyakibor utabor nyutauruman um enesh eshudok eneshenesh um, eik ta itanamori aria ibeyaborumen.’”

<sup>36</sup> Aria Jisas narig anudok nenek skulumesh um lo iri nakri, “Nyak nyakri mumam um amudok biom atun. Meini

nagabe anudok douk hakwuaruh atuh iri han hanabukuk iri kabi douk nanagabe eshudok douk shape hurukatin um anan iri um?”

<sup>37</sup> Aria anan nakri, “Anudok douk natron nenek gihauman iri.”

Aria Jisas nakri, “Nyak nyunak aria nyunekesh namudok atin.”

### *Jisas Nanak Natik Mata iri Maria*

<sup>38</sup> Aria Jisas nani ananim disaipel hanak. Douk hanak hatogur anabur wabur aria onok armatok douk kwonohwar um Mata iri kwani amam shanam okwokwit urupat. <sup>39</sup> Aria Mata okwokwik owawik douk kwonohwar um Maria iri kwanaki kwape hurukatin um Debeini ananiruh yeriweruh aria kwape kwomnek ananin baraen. <sup>40</sup> Aria Mata otuk kwape kwenek worigun. Aria okwokwim urkum mor manak um eshudok douk ta kwunekesh iri aria okwokwibur nyibur juwehosibur. Aria okwok kwanak kwakrip Jisas kwakri, “Debeini, eikik owawik kwakutukuk eik aria eik atuwe yape yenek worigun. Aria nyak madae urkum mur um enyudok aria nyukripok kwunaku kwutaurume uwe? Nyak kripok kwunaki kwutaurume!”

<sup>41</sup> Aria Debeini nakri, “Mata, nyak urkum morum sabaishi eshudok aria nyakihw apahw yowehw. <sup>42</sup> Aria atuh yopuhi aih nyak wata nyunekah uwe. Aria Maria douk kwakri kurao ahudok yopuhi aih. Douk namudok aria ta mare enesh arpesh shuturukwah-uguk uwe, uwok.”

## 11

### *Shenek Beten-ahi Aih*

<sup>1</sup> Anah nyumnah Jisas nanak nape nenek beten anabik. Anan nenek beten jurug, aria anan ananin disaipel nakripan nakri, “Debeini, nyak nyunek skulumap um munek beten um kabi douk Jon nenek baptaisumesh iri nenek skulum ananim disaipel um.” <sup>2</sup> Aria Jisas nakri, “Ipak punek beten um, ipak pukri namudok.

‘Apakin Yain, apak makri ihishmorim arpesh shutuk nyakin yopunyi nyeigur nyuto.

Aria apak makri nyak nyupe Debeinyi um sabaishi arpesh.

<sup>3</sup> Aria nyukop doukigun worigun ahudok nyumnah.

<sup>4</sup> Apak douk mokweshih-umesh um yoweishi inahos

kupaishi shenekesh um apak iri.

Douk namudok aria nyak nyukweshih-umap um apakish yoweishi inahos aria nyukwreyeshuk.

Aria nyak mare nyukutukuk Satan um nukwiraeh apak um munek yoweishi inahos uwe, uwok.’”

<sup>5</sup> Aria Jisas nakrip ananim disaipel enyudok wobuwobren baraen nakri, “Douk ipak anan nunam ananin arpenyin ananit urupat orokohunib um wab aria nukri, ‘Arpenyin, eik yakri nyuke 3-poreit bret. <sup>6</sup> Um maresh? Anan eikin arpenyin douk atin nanaki natogurum eik aria eik worigun uwok um ibiroman!’

<sup>7</sup> “Aria douk nape numun urupat aria nukri, ‘Nyak mare nyuke mour! Wit iganigadae yataru aria eik yani batowish meshuh. Aria eik ta mare ikitak iken enesh eshudok uwe, uwok!’ <sup>8</sup> Aria ta mumam? Eik yakripep, anudok urupatinari ta mare nukri anan douk ananin arpenyin nanaki narigan aria ta nukitak nukon bret, uwok. Anan ta nukitak nukon ihishmorim eshudok anan nariganumesh iri. Um maresh? Anan ta nunai-wos abom um numnek ananin arpenyin nupe norigon um eneshenesh. <sup>9</sup> Douk namudok aria eik yakripep, ipak ta punek beten purik Iruhin um nukep eshudok aria anan ta nukepesh. Ipak ta pupe purimesh aria ta putrish. Aria ipak ta pupe pubo wit aria Iruhin ta nijikatumep. <sup>10</sup> Um maresh? Eshudok ihishmorim douk shenek beten sharig Iruhin iri, eshesh ta sharao eshudok eneshenesh. Aria eshudok ihishmorim douk shape shaurim eshudok eneshenesh iri ta shutrish. Aria eshudok douk shupe shubo wit iri Iruhin ta nijikatumesh.

<sup>11</sup> “Douk ipak anan ananin nuganin norigan um nukon anar eiyur akure, anan ta nukitak nukon anar yur, aka?

<sup>12</sup> O ta norigan um nukon anab ihw-rub aria nukitak nukon onok pupiyak? Adur atin ta uwok. <sup>13</sup> Aria ipak douk yoweishi arpesh penek yoweishi inahos

abom iri, ipak douk padukemesh um pukesh yopishi eshudok eneshenesh um ipakish batowish um. Aria apakin Yain nape iruhw heven iri douk yopuyopunari aria ta nukesh ananin Mishin eshudok douk shunek beten sharigan iri.”

*Enesh Shakri Belsebul Nyataurum Jisas Dodogowin Aria Douk Nahiyahuk Eshudok Enesh Yoweishi Sagabehos*

*(Matyu 12:22-30; Mak 3:20-27)*

<sup>14</sup> Aria Jisas nape apa nahiyahuk enen yoweinyi sagab douk madae nyiyagwreh atin iri uwe. Enyen douk nyape anan arman aria nyenekan madae niyagwreh atin uwe. Douk enyen nyatogur nyaruwokuk aria anudok arman wata nape neyagwreh. Aria sabaishi arpes shakitak yowiyokuk aria shape shanasarik um.

<sup>15</sup> Aria enesh shakri, “Enyudok Belsebul douk debeinyi um ihishmorim yoweishi sagabehos iri nyenekan dodogowin aria douk nahiyahuk eshudok enesh yoweishi sagabehos shatogur sharuwokuk.” <sup>16</sup> Aria enesh shakri shukwiraehan. Douk namudok aria eshesh shakripan um nunek enen Iruhin atun neneken iri mour um shudukemesh um anan douk adur Iruhin neshopokan nanaki iri.

<sup>17</sup> Aria Jisas nadukem esheship urkwip por panak um aria nakriפש nakri, “Enesh arpes shape atug nahobig iri shunadiyogurum shunek bias awiros aria eshesh kanak shupe shurpak akure, eshesh ta mare dodogowish. Aria anap awirop shukri shunadiyogurum aria eshesh kanak shupe shurpak akure, eshesh shopunek ta mare dodogowish. <sup>18</sup> Aria douk namudok atin, douk Satan ananish shunadiyogurum aria eshesh kanak shupe shurpak akure, eshesh ta mare dodogowish. Eik douk yakriפש enyudok baraan um maresh? Ipak pakri Belsebul nyataurum eik aria eik douk yahiyahuguk eshudok enesh yoweishi sagabehos. <sup>19</sup> Douk Belsebul nyataurume aria douk ihiyahuk yoweishi sagabehos um, ipak pakri mumam um ipakim douk hagipesh ipak iri? Amam ami nyakam dodog aria douk hahiyahuk yoweishi sagabehos? Ipakim douk heyabigep um

enyudok baraan ipak pakriyen um Belsebul nyataurume um douk madae adurin uwe. <sup>20</sup> Eik douk Iruhin neke dodog aria yahiyahuk yoweishi sagabehos. Douk namudok aria ipak douk patik Iruhin ananin dodog um arpes shuwish agundok anan nape Debeini um ananish arpes um.

<sup>21</sup> “Aria douk anan dodogowini arman nusuhw ananigos burawos nupe neyoh ananit urupat um, ananish eshudok eneshenesh ta shukusuman wosik. <sup>22</sup> Aria douk anan dodogowini abom nishagrakuk anan iri nunaki nini anan hurpak aria non akure, anan ta nunatrun ananigos burawos douk anan nasuwogos iri. Aria anan ta nutrun nukumesh aruh eshudok ananish eneshenesh aria nunak nisiyaesh um kupaishi arpes.

<sup>23</sup> “Eshudok arpes douk madae eikish iri uwe, eshesh douk eikim horim. Aria eshudok douk madae shutaurume um murauri arpes shunakumori eik iri, eshesh douk shapeum shenek eikish arpes shukutukuk eik shanakuk atin atinyuk.”

*Yoweinyi Sagab Wata Nyatanamori um (Matyu 12:43-45)*

<sup>24</sup> Aria Jisas apa nakriפש baraan shopunek, “Abudok nyutob enen yoweinyi sagab nyukutukuk enen arpen nyutogur nyunak um, enyen ta nyunak nyutik um anabik abar uwok um nyunak nyupe um nyarao uhwin. Aria douk enyen mare nyuparug anabik um, enyen ta nyukri, ‘Eik wata itanam inam eikit urupat douk riguk yapenyat iri.’ <sup>25</sup> Aria enyen wata nyanak aria nyutik um atudok urupat shagitat aria yoput tape. <sup>26</sup> Aria enyen nyanak nyurauri eshudok enesh 7-poreish yoweishi sagabehos douk yowesh abom sheshagrakuk enyen iri. Eshesh shanaki aria shuwish shupe atudok urupat aria riguk enyudok arpen nyape wosiwosik atin iri. Aria douk enyen ta nyape yowen abom nyeshagrakuk riguk nyarik nyape um.”

*Arpes Shagipesh Iruhin Ananin Baraan Iri Douk Ta Shanadudareh*

<sup>27</sup> Douk Jisas nape nakriפש enyudok baraan jurug aria onok armatok douk



kwani eshudok sabaishi arpeshe kweyotu iri kwakripan kwakri, “Okwudok armatok douk kwukwarumori nyak iri aria kweken nyumeb iri okwok douk wosik ta kwunadudareh!”

<sup>28</sup> Aria Jisas nakri, “Enyen adur, okwok ta kwanadudareh. Aria eshudok arpeshe douk shemnek Iruhin ananin baraan shusuhwen shugipeshen iri eshesh douk ta shunadudareh abom.”

*Enesh Shahwar Jisas Um Nunek Enen Iruhin Atun Neneken Iri Mour*  
(Matyu 12:38-42; Mak 8:12)

<sup>29</sup> Douk enesh sabaishi arpeshe shopunek shanaki shantorum shape aria Jisas nakripesh nakri, “Ipak doukish arpeshe douk yoweishi arpeshe! Ipak pakri putik enen mour Iruhin atun neneken iri, aria eik ta mare iyabigep enen uwe, uwok. Eik ta iyabigep enyudok Jona ananin atin. <sup>30</sup> Seiwok Iruhin neshopok Jona nanak Ninive nakripesh Iruhin ananin baraan aria shape Ninive iri shakeshuk agabus yoweishi inahos aria shatanam shakon aparuh Iruhin. Aria eik shopunek ta ikripep namudok atin. Douk namudok aria eik Anudok Arman douk yatogur adurinyi arpen iri ta ipe kabi douk enen kak um ipak doukipari. <sup>31</sup> Aria ahudok nyumnah Iruhin nunekumesh kwot arpeshe ahi, kwin douk kwape saut iri ta kwukitak kunekumep kwot ipak doukish arpeshe um yoweishi inahos ipak penekesh iri. Um maresh, okwok kwape rougun aria kwanaki kwomnek king Solomon ananin yopinyi saki. Aria douk eik douk yeshagrakuk king Solomon iri douk yape agundok. <sup>32</sup> Aria ahudok nyumnah Iruhin nunekumesh baraan arpeshe ahi, eshesh shape Ninive iri ta shukitak shunekumep baraan ipak doukipari um eneshenesh yoweishi inahos ipak pape penekesh iri. Um maresh? Eshesh douk shemnek Iruhin ananin baraan Jona nakripeshen iri aria shekeshuk agabus yoweishi inahos aria wata shakon aparuh Iruhin. Aria douk eik douk yeshagrakuk Jona iri douk yape agundok.”

*Apakis Nabes Douk Sape Kabi Douk Lam Um Apakiruh Yegeshiweruh*  
(Matyu 5:15, 6:22-23)

<sup>33</sup> Aria Jisas apa nakripesh baraan shopunek, “Ta mare enen arpen nyushupeh enen lam aria nyukitak nyubeshuken nyunyigren shakamet um anat baket uwe, uwok. Enyen ta nyushupehen aria nyunyem iruhw um kadak arpeshe shuwish um aria shutik agundok enyenysis aris senegogun ba bogaragun um. <sup>34</sup> Aria ipakis nabes douk sape kabi lam um ipakiruh yegeshiweruh. Douk ipakis nabes sutik yopishi eshudok aria ipak urkwip purum yopishi um, ipakiruh yegeshiweruh ta henek lait aria hupe wosik. Aria ipakis nabes sutik yoweishi eshudok aria ipak urkwip purum yoweishi um, ipakiruh yegeshiweruh shopunek ta goutukiruh hupe yoweruh. <sup>35</sup> Douk namudok aria ipak ta pupe punodukumesh um ipakis nabes douk sape kabi lam douk nyape numun ipakiruh aparuh iri mare sutik yoweishi inahos aria ipak urkwip purum yoweishi uwe, uwok. <sup>36</sup> Douk ipakiruh shukniruh yegeshiweruh henek lait um, aria mare anagun goutukigun um, ipak ta penek lait abom kabi douk hanu enyudok lam nyatrugun um.”

*Ehudok Yoweih Aih Amam Farisi Hani Amam Henek Skulumesh Um Lo Iri Henekeh Iri*  
(Matyu 23:1-36; Mak 12:38-40; Luk 20:45-47)

<sup>37</sup> Douk Jisas neyagwreh jurug aria anan Farisi nahwaran um nunak nini anan huwok worigun ananit urupat. Aria Jisas nakitak nanak nape tebol nani anan hapeum huwok worigun. <sup>38</sup> Douk amam hape hawok worigun aria anudok Farisi natik Jisas um madae nugipesh esheshin lo um nunokwrupuguk wis ba iyoh aria kadak nusuhw worigun nugnah um uwe. Aria anan nakitak yowiyokuk abom.

<sup>39</sup> Aria Debeini nakripan nakri, “Ipak Farisi douk pakwrup adukiruh um yaureruh hani kas. Aria ipak numunip um douk pabo susih abom aria ipak shuknip um ahudok yoweih aih um penek nyigiya um eshudok kupaishi um shani eneheneh yoweih aih. <sup>40</sup> Ipak pagagak iri. Iruhin

douk nenek numunish um eshudok shani adukish um shopunek. <sup>41</sup> Ipak pukesh eshudok shor numun ipakiruh yaureruh hani kas iri eshudok douk yaruhish iri um putaurumesh. Ipak punekesh namudok aria ipakish ihishmorim eshudok enesh- enesh ta yopish aria shupe wosik.

<sup>42</sup> “Eik yakri gihaum ipak Farisi, ipak douk pasia yabro wani lombo shani ihig apig aria pakon anagun um Iruhin. Ehdok aih um pakon anagun um ipakig apig<sup>11:42</sup>Iruhin. Ahudok aih um pakon anagun um ipakig apig Iruhin um douk wosik. Aria ipak madae punek aduriah aih um kupaishi uwe. Aria shopunek, ipak urkwip madae punawasham Iruhin uwe. Enyen douk wosik um pakon eshudok Iruhin um. Aria ipak ta punek aduriah aih um kupaishi shopunek aria ipak urkwip ta punawasham Iruhin shopunek.

<sup>43</sup> “O eik yenek giha abom um ipak Farisi, ipak ta pupe yowep abom! Um maresh? Ipak panak apak Juda mape meyagwreh baraen-ogwi urusag um, ipak pakri punak pupe shakus sharik iri wagiturahos. Aria ipak apa pakri punak sabaishi shantorum shapeum eshesh shutrip aria shunemep yopuhi.

<sup>44</sup> “O yenek giha abom um ipak. Ipak ta pupe yowep! Um maresh, arpesh madae shudukem ipakip yoweipi urkwip uwe, uwok. Namudok aria ipak pape kabi douk wonugwegwiruh douk hanabeshuk hape shakam amnab iri um. Aria arpesh madae shudukemesh uwe aria shape sharahaen iruhwiruh um.”

<sup>45</sup> Aria anan nenek skulumesh um lo iri nemnek enyudok baraen aria nakrip Jisas nakri, “Debeini, nyak nyakri namudok aria nyakap baugos aria dodogowinyi baraen apak shopunek!”

<sup>46</sup> Aria Jisas nakri, “O eik yakri gihaum ipak penek skulumesh um lo iri shopunek! Ipak ta pupe yowep abom! Um maresh, ipak powemesh debeibusi bugabus sabaishi arpesh shabususah aria ipak madae ta putaurumesh pubususah uwe, uwok. <sup>47</sup> O eik yene gihaum ipak! Ipak ta pupe yowep abom! Um maresh,

ipakim babukenyim habo amam profet hagok aria ipak douk pape penek wonugwegwiruh um amam um. <sup>48</sup> Ipak douk penekesh namudok aria payabig arpesh um ipak pakri wosik um ahudok yoweih aih ipakim babukenyim henekah iri um habo amam profet hagok um. Aria ipak pape penek wonugwegwiruh um amudok profet. <sup>49</sup> Douk namudok aria Iruhin nagipesh ananim yopumi urkum aria saki nakri, ‘Eik ta ishopokugu profet huni aposel hunakumesh aria eshesh ta shubo anam hugok aria anam ta shom aria shunekam enenyenen.’ <sup>50-51</sup> Douk namudok aria ipak doukipari aria douk baraen nyapenyep um eshudok yoweishi inahos seiwok ipakim popehem yamehem hape henekesh hanaki iri. Seiwok baugos um Iruhin nenek agundok atap, amam habo ihm morim profet hanaki arigaha hatograri douk. Enyudok douk seiwok ipakin yamenen Ken neneken um nabo ananin wanin Abel nagok um nyanaki arigaha abudok nyutob amam habo Sekaraia nagiguk um. Sekaraia ney-otu orokohun um alta nyani Iruhin ananit debeiti urupat aria amam han. Aria ipak penekah iri aih douk heyabig arpesh um ipak douk panadudareh um enyudok ipakim popehem yamehem heneken iri. Aria Iruhin nakri ipak ta pusah ihibusmorim abusdok bugabus ipakim popehem yamehem amamibus.

<sup>52</sup> “O eik yenek gihaum ipak penek skulumesh um lo iri. Ipak ta pupe yowep abom! Um maresh, ipak kanak madae pudukem enyudok adurin baraen uwe. Aria shopunek, ipak madae putaurum eshudok armam armago um shudukem enyudok adurin baraen uwe, uwok. Douk namudok aria ipak kanak madae purao enyudok yopinyi saki uwe aria patapok yah um eshudok douk shape shabirak um shakri shurao yopinyi saki iri!”

<sup>53</sup> Aria douk Jisas nakutukuk eshesh nanak aria amam henek skulumesh um lo iri hani amam Farisi amamirub nyirub juwehosirub abom aria hape hanumogan yowiyokuk abom. Aria amam henek

rohwa um hakri husuwan um enen baraan aria hape harigan sabainyi enenyenen baraan um sabaishi eshudok eneshenesh.<sup>54</sup> Amam henekesh namudok um hakri humnekan um nukri enen baraan douk madae adurin iri uwe um amam hunek kwotuman-umen iri.

## 12

### *Apak Mare Munek Rohw Um Kupaishi (Matyu 10:26-27)*

<sup>1</sup> Douk sabaishi arpeshe abom shanaki sheyotu ba shuknigun aria shanokunish um abom. Aria Jisas nakrip ananim disaipel nakri, “Ipak ko gamo pudukemesh um amam Farisi amamis yis. Eik douk yakri um ehudok amamih aih um henek rohwa um heyagwreh biyen baraan.”<sup>2</sup> Eshudok douk sheshigarish shakus iri, Iruhin ta nuwerehesh shukus yopugunum aria ihishmorim ta shutrish aria shudukemesh.<sup>3</sup> Aria eshudok douk ipak peyagwrehesh weibus iri, Iruhin ta wata nukrip arpeshe shumnekesh aria wata shudukemesh. Aria eshudok douk ipak mirimiri panakripam-umesh numun urusag iri, Iruhin ta wata nuwerehesh. Anan ta nuwerehesh aria arpeshe douk sheyotu iruhwa urusag iri ta shukripesh um ihishmorim shumnek-umesh.”

### *Apak Ta Munogugur um Iruhin Atun (Matyu 10:28-31)*

<sup>4</sup> “Ipak eikish arpeshe, eik yakripep, ipak mare punogugur um eshudok douk ta shubo yegeshiweruh aturuh hugok aria kweipon mare dodogowish um shunek enesh yoweishi inahos eshudok shopunek iri, uwok.”<sup>5</sup> Aria eik yakri iyabigep anudok arman douk ipak ta punoguguran iri. Ipak ta punogugur um Iruhin atun douk ta nep pugok iyoh aria kweipon shopunek anan douk dodogowinam wata neshopokep punam yoweiburi wabur hel iri. Adur atin eik yakripep, ipak punogugur abom um anan atun!

<sup>6</sup> “Ipak padukemesh, arpeshe apa shator 5-poreiguh shokuguhwi armiguhwa um 2 toea atin. Aria Iruhin douk madae urkum mukonaguk um anar arudok shokuri armir uwe.”<sup>7</sup> Aria ipak Iruhin douk nadareh atubur atubur ehirub douk

bakih ipakig barag iri. Aria anan douk nadukemep wosik abom. Douk namudok aria ipak mare punogugur. Iruhin ananim urkum douk morum aguhwudok shokuguhwi karowiguhwa armiguhwa atin. Aria ipakin Iruhin douk urkum morum ipak um meshagrakuk armiguhwa. Douk namudok aria anan ta nutaurumep wosik abom.”

### *Apak Mare Munogugur Um Mukripesh Um Jisas Ananin Nyeigur Um (Matyu 10:19-20, 32-33, 12:32)*

<sup>8</sup> “Eik yakripep, douk enen arpen nyukripesh yopugunum sabaishi arpeshe um agundok enyen nyape eikin um eik Anudok Arman douk yatogur adurinyi arpen iri ta ikripesh yopugunum Iruhin ananish enselahos shapeum enyudok arpen enenyin nyeigur.”<sup>9</sup> Aria enyudok arpen douk nyukripesh yopugunum nyukri enyen douk madae eikin iri uwe, eik shopunek ta inekumen namudok atin enyudok arpen gani Iruhin ananish enselahos esheshis nabes.”<sup>10</sup> Douk enen arpen nyukri enen yoweinyi baraan um eik Anudok Arman douk yatogur adurinyi arpen iri, Iruhin wosik ta nukweshih enyudok yoweinyi baraan enyen nyakriyen um eik iri. Aria enyudok arpen douk nyukri enen yoweinyi baraan um Iruhin ananin Mishin iri, Iruhin ta nusuwen aria mare nukweshih enyudok arpen enenyin baraan enyen nyakriyen um Ananin Mishin Iri.

<sup>11</sup> “Aria abudok nyutob shukri shusuwep shuraep um apak Juda mape meyagwreh baraan-ogwi urusag um, o eshesh gavman shuni amudok nyeiguhwa shatoumam iri um agundok ipak pagipesh eik um, ipak mare punogugur-umam. Aria shopunek mare pukri, ‘Kadak munak muwanamesh baraan mumam? O kadak munak aria mukri maren baraan?’ Uwok.”<sup>12</sup> Um maresh? Abudok atub nyutob ipak pakri piyagwreh um, Iruhin Ananin Mishin ta nyukripep enyudok baraan douk ta ipak pukriyen iri.”

### *Wobuwobren Baraan Um Anan Debeini Nagrem Sabaishi Eshudok Iri*

<sup>13</sup> Anan arman douk nani eshudok sabaishi arpeshe sheyotu iri nakrip Jisas nakri, “Debeini tisa, eik yakri nyak nyunak nyukrip eikin ashuken nisiyaumohw eshudok douk ohwakin yaken nagremesh neshubukuk um ohwak iri.”

<sup>14</sup> Aria Jisas nakripan nakri, “Uwok. Eik douk ami nyakripe um inek jas um ipak aria isiyaumep eshudok um ipak biyep?” <sup>15</sup> Aria Jisas wata natanam nakrip ihishmorim arpeshe nakri, “Ipak pumnek aria gamo pudukemesh um ipak mare penek nyigiya um eneshenesh eshudok. Um maresh? Eshudok douk shogrem worobaishi eshudok iri, esheshish sabaishi eshudok eshesh shogremesh iri ta mare shutaurumesh um shupe wosik, uwok.”

<sup>16</sup> Aria Jisas nakripesh enyudok wobu-wobren baraan nakri, “Anan debeini ananig nahobig sabaiguni worigun jurugun nape. <sup>17</sup> Aria anan urkum mape mor manak aria anan urkum mor, ‘Eik urupat madae anat uwe um inabuk eikish worigun um. Douk namudok aria eik ta inekesh mumam?’ <sup>18</sup> Aria anan naneyagwreh nakri, ‘Eik ta ibrik eikig worigunig urusag aria wata irok debeigwi otug. Aria eik inabuk agundok worigun nini eneshenesh eikish eshudok shopunek. <sup>19</sup> Aria eik kanak ta ineyagwreh ikri, ‘Eik sabaishi eshudok shakusume aria eshesh ta inagremesh um sabaishi kwarahos. Douk namudok aria eik ta ipe meyoh aria inadudareh ipeum ishoh atin.’”

<sup>20</sup> “Aria Iruhin nakripan namudok, ‘Nyak nyagagak iri! Kadak abudok atub wab nyak ta nyugok aria eshudok nyak nyanagremesh nyeshubukuk iri ta omi nyugremesh?’”

<sup>21</sup> Aria douk Jisas nakripeshuk enyudok baraan jurug aria wata shopuk nakri, “Eshudok arpeshe douk esheship urkwip pur abom um shugrem sabaishi eshudok shuneshubuk, aria eshesh urkwip mare purum Iruhin iri, Iruhin natrish ananis nabes um, eshesh kabi douk yaruhish eshudok eneshenesh wokeshi arpeshe um. Eshesh douk shagagak kabi douk anudok nagagak iri arman um.”

*Urkwip Mare Pur Punak Aria Aparuh Mare Yoweruh Um Eshudok (Matyu 6:25-34)*

<sup>22</sup> Aria Jisas nakrip ananim disaipel nakri, “Namudok aria eik yakripep, ipak aparuh mare yoweruh um worigun ipak pugnoh iri nini rupeh ipak punekeh iri, uwok. <sup>23</sup> Um maresh? Enyudok mupe wosik um douk nyeshagrakuk worigun aria yegeshiweruh douk heshagrakuk rupeh. <sup>24</sup> Ipak putik armiguhw. Ogwoguhw douk madae hwunou anagun worigun aria hutormoguni, uwok. Aria ogwoguhw madae hwunarak onog sabaigwi worigunig urusag uwe. Aria Iruhin anan kanak nape nakoguh worigun! Aria ipak douk peshagrakuk armiguhw abom. Douk namudok aria anan ta nutaurumep wosik abom! <sup>25</sup> Ipak ta meinyi arpen um ipak apahw yowehw abom um eneshenesh eshudok aria anan wata nunek ananig nyumneh rouhi aria nupe roubi nyutob agundok atap? Uwok. <sup>26</sup> Aria douk ipak mare wosik um punek enyudok shokwinyi mour um, ipak douk urkwip porum eneshenesh eshudok um maresh?”

<sup>27</sup> “Ipak putik aruruhish douk shakih urah iri. Eshesh madae shunek enen mour uwe. Madae shunek eneh rupeh um shihur iri uwe, uwok. Aria eik yakripep, seiwok Solomon douk nyeigur nyato abom aria nagrem sabaishi eshudok aria nenenek yopihi atih rupeh. Aria ananig rupeh douk madae eneh yopih abom kabi douk eshudok aruruhish um uwe, uwok. <sup>28</sup> Adur atin eshudok aruruhish douk shape aria nuhutih atuh ta shutupesh shunak shishehuk nyih iri douk Iruhin naginohwesh. Aria ipak arpeshe douk ipakin bilip madae dodogowin iri uwe, douk peshagrakuk eshudok aruruhish abom. Douk namudok aria ipak ta pudukemesh um Iruhin ta nutaurumep niginohep rupeh. <sup>29</sup> Aria shopunek, ipakiruh aparuh mare yoweruh um eshudok ta ipak pishoh iri. <sup>30</sup> Um maresh, eshudok douk madae shudukem iruhin iri uwe esheship urkwip douk por abom um sabaishi eshudokmori atish ihih nyumneh. Aria ipakin Yaken douk nadukemesh um eshudok ipak wokesh iri.”

<sup>31</sup> Aria sagomatin ipak ta urkwip purum purik puwish um agundok Iruhin nape Debeini um ananish arpesht um aria anan ta kadak nukesh eshudok ipak wokesh iri shopunek.”

*Ipak Purao Yopishi Eshudok Gani Iruhw Heven Um (Matyu 6:19-21)*

<sup>32</sup> “Ipak arpesht kabi douk karowish sipsipahos iri um ipak mare punogugur, uwok. Um maresh, ipakin Yaken nanadudareh um ipak puwish um agundok Iruhin nape Debeini um ananish arpesht shapeum aria pupe debeipari. <sup>33</sup> Douk namudok aria ipak pukesh ipakish eshudok eneshenesh kupaishi arpesht shutorish shukep utabor aria pusiabor um yaruhish eshudok eneshenesh wokeshi um putaurumesh. Aria agundok ipak pataurum yaruhish arpesht um, agagun kabi douk ponaruk ipakish eshudok apudok munuhwip douk ta mare yowep iri um. Um maresh? Gani heven eshudok ta mare shunak shuwishuk atin. Aria amudok hakwuaruh iri ta mare hunak hurukatin um ipakish eshudok eneshenesh. Aria tutubrugos ta mare sutupesh, uwok. <sup>34</sup> Ipak ta punabuk ipakish yopishi eshudok gani iruhw heven. Aria ihih nyumneh ipakip urkwip ta purum abrudok wabur douk ipakish eshudok eneshenesh shakus aburi atubur.”

*Shenek Mour Iri Shenek Redi Shape (Matyu 24:42-44)*

<sup>35</sup> “Ipak punadareh rupeh pihunug baneh aria punotug letog um pupe punek redi um punek mour. Aria pishir ipakish lamhos aria punek redi pupe putrugun um punek mour. <sup>36</sup> Ipak pupe putrugun kabi douk eshudok shenek mour iri shenek gibegabe shape shatrugun um esheshin debeini um. Anan douk nanak natrish um anagun worigun douk shenek-agun um biyesh douk ta shanaraum um iri aria anan ta wata nutanamori. Eshesh shape shatrugun um kadak anan nukri nunaki nubo wit, aria ahudok atuh eshesh shikitak shijikagun-uman. <sup>37</sup> Aria douk debeini nunaki aria nutik eshudok shenek mouraman iri shupe shunek redi

shutrugun-uman um, eshesh ta shunadudareh abom. Aria adur atin eik yakripep, debeini anan kanak ta nudareh ananish rupah nuhunug nunatugah let aria ta nukripesh shunak shupe aria anan kanak ta nukesh worigun. <sup>38</sup> Aria douk nunaki orokohunib um wab um, o nunaki abudok nyutob sagomatin owotog gwakitak um aria nutrish um shunek redi shupe um, eshesh ta shunadudareh abom!

<sup>39</sup> “Aria ipak urkwip purum enyudok! Douk nagrem urupat iri nudukemesh um abudok nyutob nakwuaruh atuh iri ta nunaki nubrig ananit urupat nuwish um akure, anudok nagrem urupat iri ta mare nukutukuk urupat um ta nubrigat nuwish, uwok. <sup>40</sup> Aria ipak shopunek ta punek redi pupe. Um maresh, eik Anudok Arman douk yatogur adurinyi arpen iri ta wata inaki anob nyutob douk ipak ta pukri eik ta mare inaki obi nyutob.”

*Wobuwobren Baraen Um Biom Henek Mour iri, Anan Yopuni Aria Anan Yoweini (Matyu 24:45-51)*

<sup>41</sup> Aria Pita narig Jisas nakri, “Debeini, nyak nyakripap um enyudok wobuwobren baraen apak atup aka, eshudok ihishmorim arpesht shopunek?”

<sup>42</sup> Aria Debeini Jisas nakri, “Meini nenek mour iri nunek ananin debeini ananin mour wosik iri, anudok ta ananin debeini nugraehan um nusuhw merik um eshudok enesh shenekuman mour iri abudok nyutob anan nunakuk anabik um. Aria anan ta nukesh esheshigun worigun abudok nyutob eshesh shurao worigun obi nyutob. <sup>43</sup> Aria douk ananin debeini nutanamori aria nutrun um nuneke wosik kabi douk anan nakripanaguk um, anudok nenekuman mour iri ta nanadudareh! <sup>44</sup> Adur atin eik yakripep, ananin debeini ta nutrun namudok aria ta nugraehan um nupe debeini um ihishumori ananish eshudok eneshenesh. <sup>45</sup> Aria douk anudok nenekuman mour iri niyagwreh anan kanak nukri, ‘Ah, eikin debeini ta mare nunaki arigas.’ Aria anan nikitak nupe nubo eshudok enesh shenek mour iri. Aria nupe nuwok worigun nini dodogowibari abar aria nugagak. <sup>46</sup> Aria ananin debeini ta wata nutanamori anah nyumnah abudok

nyutob douk anudok nenekuman mour iri nakri anan ta mare nutanamori ahi. Anan ta nutanamori nutrun namudok aria ta non yowiyokuk nupe yowen abom aria nushopokan nunak nini eshudok douk madae shunek bilip um Iruhin iri uwe shupe. <sup>47</sup> Aria anudok nenekuman mour iri nudukemesh um ananin debeini nakripan um nunekesh iri, aria anan mare nunek redi um nunekesh um, ananin debeini ta nunaki aria non debeg abom. <sup>48</sup> Aria nanudok douk madae nudukem ananin debeini nakri um anan nunekesh iri uwe, aria anan nunek enen yoweinyi mour aria douk nyeneken um ta non um, debeini ta nunaki aria non shokubur. Aria shashudok arpesh douk Iruhin nukesh sabainyi yopinyi saki nyuni dodog um shunek mour iri, anan ta nukriפש dodogowin atun um shunek yopinyi mour aria ta shuneken wosik atin. Aria eshudok douk ta nukesh sabaishi eneshenesh abom eshudok um shunek mour um, anan ta nukriפש um shunek yopinyi mour aria ta shuneken wosik abom.”

*Jisas Nanakumori Ta Nisia Arpesh  
(Matyu 10:34-36)*

<sup>49</sup> “Eik douk yanakumori iyutik nyih um hunu ihishmorim yoweishi inahos eshudok douk shape agundok atap iri. Aria eik yakri douk ta ehudok nyih hunu akure, douk ta wosik. <sup>50</sup> Eik ta imnek debeiri eriger, aria eik douk wata imnekar uwe aria eikihw apahw douk yowehw abom! Um maresh? Eik wata imnekar uwe. <sup>51</sup> Aria ipak pakri eik yanakumori inek agundok atapishi arpesh shupe atugun aka uwok? Eik yakriפש, eik yanamori ta isiyaesh. <sup>52</sup> Douk ahudok nyumnah arigaha kweipon, 5-poreis atus awirosish arpesh ta shikitak shunadiyogur um aria 3-poreis ta shutrishuk yoweisi nabes biyos. Aria asudok biyos ta shutrishuk yoweisi asudok 3-poreis. <sup>53</sup> Aria arpesh ta shunadiyogur um. Yakenyim ta hutrum yoweisi nabes nugamim aria nugamim shopunek ta hutrumuk yoweisi nabes yakenyim. Aria amakenyiyu ta utruwaguk yoweisi

nabes owoiyu nugariyu aria nugariyu ta utruwaguk yoweisi nabes amakenyiyu. Aria nakwurihiyeu ta utruwaguk yoweisi nabes mehiyariyu aria mehiyariyu ta utruwaguk yoweisi nabes nakwurihiyeu.”

*Ahudok Aih Um Mudukem Nyutob Um  
(Matyu 16:2-3)*

<sup>54</sup> Aria Jisas nakrip eshudok armam armago nakri, “Douk putik onog orug gwir gwunak gani aun nabuhum, ahudok atuh ipak ta pukri ‘Eshah ta hurauri.’ Aria ta mare roubi nyutob aria ahah ta hurauri, adur.12:54 <sup>55</sup> Aria ipak patik uhwin nyanaki saut iri nyahuri dodog, Aria ipak apa pakri ‘Wah ta hutao.’ Aria wah hatao. <sup>56</sup> Ipak penek rohwi iri! Ipak patik amnab bani utag shenekesh shanak um aria padukemesh um shashudok douk ta shutograri. Aria douk ipak patik eshudok douk shatogur shanak abudok nyutob iri aria ipak madae pudukemesh um shashudok douk ta shutograri uwe um maresh?”

*Ipak Puni Shashudok Douk Shakri  
Shenekumep Kwot Iri Ta Punagabeum Ari-  
gas*

*(Matyu 5:25-26)*

<sup>57</sup> “Ipak kanak ta punek skelimum eneheneh aih aria punek yopihi aih. <sup>58</sup> Douk nyak nyuni enen arpen douk nyukri nyunekumen kwot iri pukri punam kwot um, ipak wata pupe punak yah aria ipak ta pugabe ipakin baraen nyugokumep-aguk yah. Ipak mare pugabeyen um, enyen ta nyuraen nyunam debeini jas douk nasuhw kwotog iri. Aria jas ta nuraen nyunam shusim aria amam ta huweshigen. <sup>59</sup> Aria ganudok eik yakriפש, nyak ta mare nyutograri arigash, uwok. Nyak ta nyugabe nyakin dinau nyiyatenyuk namudok aria ta nyutograri.”

## 13

*Eshudok Arpesh Douk Madae  
Shukeshuk Agabus Yoweishi Inahos Iri Ta  
Shunak Shuwishuk*

12:54 **12:54** Eshesh Juda eshesh um, orug apa gweir aun nabuhum aria eshah hor, kupaigunum uwok.

<sup>1</sup> Aria abudok nyutob, enesh arpes shape agundok iri shakrip Jisas um agundok debeini um gavman iri Pailat nabo enesh Galili shagok um. Anan naesh abudok nyutob eshesh shape shenek ofa um eneshenesh eshudok shuko Iruhin eshi. <sup>2</sup> Aria Jisas nakripesh nakri, "Ipak pakri eshesh sheshagrakuk ihishmorim arpes abom shape Galili iri um shenek enesh-enesh yoweishi inahos um aria Pailat douk naesh shagok namudok? <sup>3</sup> Uwok! Eik yakripep, aria ipak mare pukeshuguk agabus yoweishi inahos aria putanam pukon aparuh Iruhin um, ipak ihishmorim ta pugok namudok atin. <sup>4</sup> Aria ipak pakri mumam um eshudok 18-poreish arpes douk routi urupat tatao wabur Siloam iri tatu taesh shagok iri? Ipak pakri eshesh sheshagrakuk ihishmorim arpes abom shape Jerusalem iri um shenek eneshenesh yoweishi inahos um aria eshesh douk shagok? <sup>5</sup> Uwok! Eik yakripep, aria ipak mare pukeshuguk agabus yoweishi inahos um, ipak ta pugok namudok atin kabi douk eshesh shape Siloam iri shagok um."

*Wobuwobren Baraen Um Enen Rowog Douk Shuruwep Mare Piren Atin Iri Uwe*

<sup>6</sup> Aria Jisas nakripesh enyudok wobuwobren baraen nakri, "Anan arman nawu enen rowog shahwaren um fik iri numun um ananig nubarig douk nawu wain um. Anan nawen nyakih debeinyi aria nanak nape narupamen aria anan madae nutik enep shuruwep pir uwe. <sup>7</sup> Douk natrin namudok aria nakrip anudok nenek mour nubarig iri nakri, 'Mnek, bishatin kwarahos eik yanaki yape yarupamen aria madae itik enep shuruwep pir uwe.' Douk namudok aria eik yakri, 'Nyubrowenyuguk! Um maresh? Enyen nyatao aria nyape nyeyatakuk gris meyoh um amnab.'

<sup>8</sup> "Aria anudok nenek mour nubarig iri nakripan nakri, 'Debeini, nyak kutinyuguk nyutao enyudok atin kwar shopunek. Aria eik ta irak amnab ibur baugenyum aria ibuk bulmakauibas ubas baugenyum um enyen nyurao yopusi gris. <sup>9</sup> Aria nyanyi nuhutin kwar

shuruwep pir um, enyen wosik nyutao. O ta mare enep pir um, nyak wosik kadak nyubrowenyuguk.' "

*Anah Nyumnah Sabat Eshesh Juda Mour Uwok Shape Meyoh Ahi Jisas Nagabe Onok Armatok*

<sup>10</sup> Anah nyumnah Sabat, Jisas nanak nawish nape nakripesh Iruhin ananin baraen anat eshesh Juda shape sheneyagwreh baraen-atari urupat. <sup>11</sup> Aria agundok onok armatok douk enen sagab nyapenyok 18-poreish kwarahos iri kwani eshesh kwape. Okwok douk enyudok yoweinyi sagab nyapenyok aria nyenegok bukaruk atin. Okwok kwabirak aria madae kwukitak kwiyotu iruhw uwe, uwok. <sup>12</sup> Aria Jisas natruk aria nahwarok kwanaki aria nakripok nakri, "Nyak mnek, eik yagabe nyak!"

<sup>13</sup> Aria anan nawemok ananis wis aria ahudok atuh okwok kwakitak kweyotu iruhw abom. Aria okwok kwanadudareh aria kwape kwatuk Iruhin ananin nyeigur nyato iruhw.

<sup>14</sup> Aria anudok debeini um atudok urupat iri juwehosin abom um Jisas um agundok nagabe okwudok armatok ahudok nyumnah Sabat um. Douk namudok aria anan nakitak nakrip eshudok arpes shape iri nakri, "Ihish douk 6-poreih atih nyumneh um apak munek mourum. Aria ta ipak pukri punaki um anudok arman nugabeyep um, ipak punaki anah ahudok mourih nyumnah aria anan nugabeyep. Ipak mare punaki ahudok nyumnah Sabat uwe, uwok!"

<sup>15</sup> Aria Debeini nakripan nakri, "Ipak penek rohwi iri! Ahudok nyumnah Sabat ipak ihishmorim apa pakweshih ipakish bulmakauhos iri donkihos aria paraesh panak shawok abar. <sup>16</sup> Aria enyen douk wosik um eik yagabe okwudok Abraham ananik nugawik douk Satan noweshigok kwape 18-poreish kwarahos iri ahudok nyumnah Sabat um."

<sup>17</sup> Aria Jisas ananim horim abraen nyam abom. Aria ihishmorim arpes shanadudareh um enyudok yopunyi mour Jisas neneken iri.

*Jisas Nakripesh Wobuwobren Baraen Um Enen Rowog Douk Shahwaren Um Mastet Iri Um Enyenyim Shurkum Iri Yis (Matyu 13:31-32; Mak 4:30-32)*

<sup>18</sup> Aria Jisas narigesh nakri, “Agundok arpeshe shuwish um Iruhin nape Debeini um ananish arpeshe um ta kabi maresh um? Eik ta ikripep maren wobuwobren baraen um pudukemesh? <sup>19</sup> Agagun ta kabi anam shokumi mastetim shurkum douk anan arman nawom ananig nubarig iri um. Anan nawom aria makih munek debeinyi rowog. Aria enyen nyenek nyeiguhw aria armiguhw douk hwehwru iruhw iri hwakih hhuwem was nyeiguhw aria hwotem.”

*Wobuwobren Baraen Um Yis Douk Senek Bret Takitak Debeiti Iri (Matyu 13:33)*

<sup>20</sup> Aria Jisas wata shopunek nakripesh nakri, “Agundok arpeshe shuwish um Iruhin nape Debeini um ananish arpeshe um ta kabi maresh um? <sup>21</sup> Agagun ta kabi yis um. Onok armatok kwakitak kwosuhur kwakutus um enen dram plaua aria kwonek budibodigas arigaha yis suwish ihinyumorim um plaua aria seneken nyakitak debeinyi.”

*Shokwuti Wit (Matyu 7:13-14, 21-23)*

<sup>22</sup> Aria Jisas nape nanak sabairubi de-beirubi bani shokurubi warub. Anan nanak nape nenek skulumesh um Iruhin ananin baraen aria nape nanak um nakri nunak um Jerusalem. <sup>23-24</sup> Aria agundok enen arpen nyarigan nyakri, “Debeini, Iruhin ta nunarao atin atin arpeshe shutanamori shupe wosik abom aka, uwok?”

Aria Jisas nakripesh nakri, “Ipak ta dodogowip atip aria puwish atudok shokwuti wit. Eik yakripep namudok um maresh, sabaishi arpeshe ta shukri shuwish atudok shokwuti wit aria eshesh ta shubirak shutik uwok. <sup>25</sup> Aria ahudok nyumnah, anudok yaken um urupat iri ta nukitak nuwarukuk wit aria ipak ta punak piyotu aduk aria ta pupe pubo wit aria pukri namudok. ‘Debeini, jikampogu wit!’ Aria anan ta nukripepi nukri,

‘Eik madae idukemep uwe, ipak meirubi warubip!’

<sup>26</sup> “Aria ipak ta wata pukripan pukri, ‘Apak douk mani nyak mawok worigun iri abar aria shopunek, nyak nyanaki nyenek skulumap nyakripap nyakin baraen apakirub warub!’

<sup>27</sup> “Aria anan ta wata nukitak aria nukri, ‘Eik madae idukem abrudok wabur ipak panaki-aburi uwe. Karemeik ipak penek eneshenesh yoweishi inahos iri!’

<sup>28</sup> Aria ipak ta putik apakin yamenen Abraham nini Aisak iri Jekop huni amudok ihim-morim profet hupe agundok Iruhin nape Debeini um ananish arpeshe shapeum. Aria ipak ta neshopokep punak pupeik aduk. Aria ipak ta pureh punokwukri punaruwor aria punatukesh ipakiruh naruh. <sup>29</sup> Aria arpeshe shape ihigunmorim agundok atap iri ta shunaki shupe shuwok debeiguni worigun agundok Iruhin nape Debeini um ananish arpeshe shapeum. <sup>30</sup> Aria eshudok arpeshe douk nyeiguhw wokeshi ta wata shutogur nyeiguhw shapeyesh iri. Aria eshudok douk nyeiguhw shapeyesh iri ta wata shutogur nyeiguhw wokeshi iri.”

*Jisas Nereh Um Jerusalem (Matyu 23:37-39)*

<sup>31</sup> Aria abudok atub nyutob amam Farisi hanaki aria hakrip Jisas hakri, “Nyak nyukutukuk agundok aria nyunakumaguk kupaigunum. Um maresh? Herot nakri nen nyugok.”

<sup>32</sup> Aria Jisas nakripam nakri, “Ipak punak pukripan namudok atudok wanarit nubat. Pukri, ‘Mnek, doukih iri nuhutih eik ta ihiyahuk yoweishi sagabehos aria shopunek ta igabe arugeh hapeyesh iri arpeshe. Aria hukri um biyeh atih nyumneh ahi, eik ta iyatak eikin mour.’ <sup>33</sup> Aria doukih huni nuhutih iri biyeh, eik ta inak. Um maresh? Eshesh ta mare shubo anan profet nugok anabur kupaiburi wabur, uwok. Eshesh ta shon nugok Jerusalem atugun.

<sup>34</sup> “O ipak arpeshe pape Jerusalem iri, ipak apa pabo amam profet hagok. Aria shopunek, pakwumam utabor amudok douk Iruhin neshopokam haraomepogu



ananin baraen ipak iri! Sabaihi nyum-neh eik yakri iraep pupe atugun kabi douk mamokit owot toshigar atatig nugag atatish kapraigiyohos um. Aria ipak pakri uwok abom! <sup>35</sup> Aria mnek, Iruhin ta nukutukuk ipakibur wabur. Aria eik yakripep, ipak ta mare wata putiwe arigaha abudok nyutob douk ta pukri, ‘Apak makri Iruhin nunekuman yopunyi anudok arman douk nanaki um Debeini ananin nyeigur iri!’ ”

## 14

### *Jisas Nagabe Anan Arugeh Hapeyanari*

<sup>1-2</sup> Anah nyumnah Sabat eshesh Juda mour uwok shape meyoh ahi, Jisas nanak um nuwok worigun anan debeini um amam Farisi iri ananit urupat. Aria agundok anan yegenyihw hwanugokan-ari nape hurukatin um Jisas. Douk namudok aria amam hape hatrun duk um hakri kadak nukri nugabe anudok arman um. <sup>3</sup> Douk namudok aria Jisas nakitak narig amudok henek skulumesh um lo iri hani amam Farisi nakri, “Apakin lo nyakri apak mugabe arpesah ahudok nyumnah Sabat aka, uwok?”

<sup>4</sup> Aria amam madae hukri enen baraen. Aria Jisas nasuhwi anudok arman nagabeyan aria neshopokan nanak. <sup>5</sup> Aria narig amudok tisa hani amudok Farisi nakri, “Aria ipak anan enen ananin batowin o enen bulmakau nyunak nyugrukuk anag nuwag abar barag iri ahudok nyumnah Sabat um akure, anan ta nunak nutukenyi aka, uwok? Adur, anan ta nutukenyi ahudok atuh nyumnah.”

<sup>6</sup> Aria amam baraen uwok um hubeyenyum um.

### *Apak Mare Mutuk Apakish Nyeiguhw Shuto Iruhw*

<sup>7-8</sup> Douk Jisas natik amudok armam douk hanakum agundok worigun iri hanaki, aria amam hakri hupe shakus sharik iri atish wagiturahos. Aria anan nakripesh enyudok wobuwobren baraen nakri, “Aria enen arpen nyuh-warenyum nyunak um anagun worigun douk shenekagun um biyesh shanaraum, um nyak nyunak aria mare nyunak

nyupe nyurik uwe, uwok. Um maresh? Ta anudok douk nahwarenyum nyunak um agundok worigun iri nuhwari anan douk ananin nyeigur nyatouman-uguk um nyak iri shopunek. <sup>9</sup> Aria douk namudok um, anudok douk nahwarep punak um ananigun worigun iri ta nunaki aria nukri, ‘Nyak kakitak aria nani nunaki nupe agundok.’ Aria nyak ta abraen nyen aria nyunak nyupe nyugiguk. <sup>10</sup> Aria namudok douk uwok. Aria enen arpen nyuhwarenyum nyunak um enyenyigun worigun um, nyak nyunak aria nyupe nyugiguk. Nyak nyunekesh namudok aria enyudok arpen douk nyahwarenyum nyunak um enyenyigun worigun iri ta nyunaki nyukripenyum nyukri, ‘Arpen, nyak nyunak nyupe nyurik.’ Enyen ta nyukripen namudok aria eshudok enesh arpesah douk shanakumori agundok worigun iri ta shutrinyum aria shutuk nyakin nyeigur nyuto iruhw. <sup>11</sup> Um maresh? Ihishmorim arpesah douk shutuk esheshish nyeiguhw shuto iruhw shukri eshesh debeishi iri, Iruhin ta wata nunihesh shubuh atap. Eshudok douk madae shutuk esheshish nyeiguhw iri uwe, Iruhin ta wata nutuk esheshish nyeiguhw shuto iruhw.”

### *Apak Ta Munekumesh Yopinyi Um Eshudok Douk Ta Mare Shutanam Shubeimap Eneshenesh Iri*

<sup>12</sup> Aria Jisas nakrip anudok debeini um amam Farisi iri douk nahwaran um nunak um ananigun worigun iri nakri, “Aria nyak ta nyukri nyunek anagun worigun um, nyak mare nyuhwari nyakish arpesah atish shuni nyakish ashukenyish owashish shuni nyakip awirop puni ipak atubur wabur um douk shanabuk sabaishi eshudok eneshenesh iri atish uwe, uwok. Um maresh? Eshesh ta wata shuhwarenyum nyunak nyuwok worigun esheshig urusag. Aria namudok um, eshesh ta shuwanam um nyakish worigun. <sup>13</sup> Aria namudok uwok. Aria nyak nyunek debeiguni worigun um, nyak ta nyuhwari eshudok yaruhish douk eneshenesh wokeshi um eshudok iri, shuni yegeshiweruh yoweruh-eshi shuni aiyas senekeshi shuni nabes seshukesh iri.

14 Um maresh? Eshudokmori arpesht ta mare shuwanamen agundok worigun nyak nyenekagun-umesh iri. Aria Iruhin ta nunekumen yopuhi aih. Aria abudok nyutob eshudok yopishi arpesht douk riguk shagok sharumesh iri wata shukitaki wonugwegwiruh obi nyutob, Iruhin ta nuwanamen eshudok eneshenesh.”

*Jisas Nakripesh Wobuwobren Baraen Um Debeiguni Worigun (Matyu 22:1-10)*

15 Aria anan arman douk nanamam hape hawok worigun iri nemnek namudok aria nakrip Jisas nakri, “Eshudok arpesht douk ta shupe shuwok worigun agundok Iruhin nape Debeini um ananish arpesht shapeum iri, eshesh ta shunadudareh shuriguk.”

16 Aria Jisas nakripan enyudok wobuwobren baraen nakri, “Anan arman nakri nunek anagun debeiguni worigun. Aria anan nahwari sabaishi arpesht um shunak um agundok worigun. 17 Aria ahudok nyumnah hatogrum nunek agundok worigun um, aria anan neshopok anan nenekuman mour iri um nunak nukripesh shunaki. Aria anan nanak nakripesh nakri, ‘Ipak yowi, worigun monekagun nakus.’

18 “Aria eshudok ihishmorim atin atin shakitak aria shakri eshesh ta mare shunak. Aria narigiri nakri, ‘Eik yator anag nubarig aria eik yakri inak itrug. Douk namudok aria eik ta mare inaku.’ 19 “Aria anan nakri, ‘Eik douk atin yator 10-poreish bulmakauhos um shunek mour iri, aria eik yakri inak ikwiraehesh um shunek mour. Douk namudok aria eik ta mare inaku.’

20 “Aria anan nakri, ‘Eik douk atin yarao armatok, douk namudok aria eik ta mare inaku.’

21 “Douk amam hakripan namudok aria anan wata natanam nanak nakrip ananin debeini um enyudok baraen amam hakripan um. Aria anudok urupatinari juwehosin abom aria nakrip anudok nenekuman mour iri nakri, ‘Douk nyunak arigas um ehudok ihishmorim debeihi yeh huni shokuhi douk hape abrudok wabur iri. Aria nyurauri nabes seshukesh iri shuni

eshudok eneshenesh wokesh iri. Eshesh shuni eshudok douk yegeshiweruh yoweruhesh iri, shuni aiyas senekeshi aria nyuhwadesh shunaki eikit urupat.’

22 “Aria anudok nenekuman mour iri wata nanaki aria nakri, ‘Debeini, eik yagipesh nyakin baraen aria anabigit um urupat watak tape meyoh.’

23 “Aria debeini nakripan nakri, ‘Nyak nyunak nyugim debeihi yeh aria shopunek nyugim narub nubarigirub aria nyiraouri arpesht shunaki shuwish eikit urupat. Um maresh? Eik yakri eikit urupat ta shuknit abom. 24 Aria eik yakripen, amudok armam douk nubokuhi yahwaram um hunaki um eikigun worigun iri ta mare wata hunaki huwok anagun eikigun worigun uwe, uwok.’ ”

*Arpesht Shukri Shugipesh Jisas Iri Ta Shukon Eshesh Kanak Abom Um Iruhin (Matyu 10:37-38)*

25-26 Douk sabaishi arpesht shani Jisas shanak aria anan natanam natrish aria nakripesh nakri, “Aria enen arpen nyukri nyunaki nyugipesh eik, aria enyen urkum munawasham abom um enyenyin yaken nini amakek, shuni enyenyik irohukwik kwuni enyenyish batowish, shuni enyenyish ashukenyish owashish shuni enyen kanak, aria eik enyen urkum munawasham karoiwe atuwe um eik iri, enyen ta mare wosik nyugipesh eik uwe, uwok. Enyen nyukri nyugipesh eik um, enyen urkum ta munawashame abom. 27 Aria shopunek, enyudok arpen douk nyukri nyugipesh eik, aria enyen mare nyunek redim nyusah enyenyin rowog kruse aria nyugok um, enyen ta mare wosik nyupe eikin disaipel uwe, uwok.

28 “Aria ta ipak enen nyukri nyurok anat rourouti urupat akure, sagomatin enyen ta nyupe aria urkum mupe murum enyenyibor utabor douk enyen nyanabarubuk iri iyoh. Ababar ta wosik um nyurok atudok urupat nyiyatat aka, uwok? 29 Aria douk sagomatin enyen urkum mare mur namudok iyoh aria nyukitak nyunek simen nyishuhurat, aria enyen mare nyurukat nyiyatat um, ihishmorim arpesht ta shutrut aria shiyakasen, shuneken enenyenen. 30 Eshesh ta shukri,

‘Enyen nyatuhur nyarukat aria enyen madae nyurukat nyiyatat uwe!’

<sup>31</sup> “Aria ta anan king nini 10,000 poreim soldia aria nukri nunak nini kupaini king douk narauri 20,000 poreim soldia iri um ta hurpak um, sagomatin anan ta nupe aria urkum murum anan nini ananim soldia ta wosik dodogowim um hubo anudok anan king nini ananim huhiyaham aka, uwok. <sup>32</sup> Aria anan nunadukem um anan ta mare dodogowin um, ananish horim shuni esheshin king ta wata shupe shunaki rougun aria anan ta nishopok enen nyurao baraen iri. Enyen ta nyurao baraen nyunak nyukrip anudok anan king um amam hunugabe um hupe atugun aria mare hurpak.

<sup>33</sup> “Aria douk namudok atin, ta enen arpen mare nyukeshuk agab ihishmorim enenyish eshudok eneshenesh um, enyen ta mare wosik nyugipesh eik uwe, uwok.”

*Sol Douk Madae Ekehir Iri Uwe Ta Shuwasharuk*  
(*Matyu 5:13; Mak 9:50*)

<sup>34</sup> Aria Jisas nakripesh enyudok wobuwobren baraen nakri, “Sol arar douk yopuri. Aria ta arar wata jemiyaer um, apak yah douk madae anah uwe um wata munekar ekehir um uwe, uwok. <sup>35</sup> Arudokmori sol douk madae yopur um runek enen mour uwe. Apak ta muwasharuk meyoh. Aria ipak arigos sapenyepi ta punnek enyudok baraen!”

## 15

*Jisas Nakripesh Wobuwobren Baraen Um Enen Sipsip Nyanak Nyawishuk Um*  
(*Matyu 18:12-14*)

<sup>1</sup> Anob nyutob amam harao takis iri hani amudok anam henek eneshenesh yoweishi inahos iri hanaki um humnek Jisas ananin baraen. <sup>2</sup> Aria amam Farisi hani amam henek skulumesh um lo iri hape heyagwreh shokubur shokubur um Jisas hakri, “Anudok arman nani eshudok shenek eneshenesh yoweishi inahos iri shape. Aria shopunek, anan nanak um shape shawok worigun!”

<sup>3-4</sup> Aria Jisas nakripesh enyudok wobuwobren baraen nakri “Aria ipak anan

nagrem 100-poreish sipsipahos aria enen nyunak nyuwishuk akure, anan ta nunek maresh? Anan ta nukutukuk eshudok 99-poreish shiyotuguk shupe shuwokuk utoruh anagun aria anan ta nunak nupe nurium enyudok atin sipsip arigaha nunak nuparugen. <sup>5</sup> Douk nuparugen aria anan ta nunadudareh abom aria nutuken nunyusah aria wata nutanam nunak. <sup>6</sup> Douk nunak arigaha nutogur urupat aria anan ta nuhwari ananish arpesh douk shani anan shape atugun iri nukri, ‘Enen eikin sipsip nyanak nyawishuk aria eik yaurimen arigaha yanak yaparugen aria wata yaraenyi. Douk namudok aria yakri ipak punaki puni eik munadudareh!’” <sup>7</sup> Douk Jisas nakriyuk namudok aria wata shopunek nakripesh nakri, “Aria eik yakripep, douk namudok atin shape iruhw heven iri ta shanadudareh um eshudok 99-poreish arpesh douk shakri eshesh shape wosik aria mour wokesh um shukeshuk agabus yoweishi inahos aria wata shukon aparuh Iruhin um. Aria atun arman douk nenek yoweishi inahos iri nukeshuk agab yoweishi inahos aria nutanam nukon apahw Iruhin um, shape iruhw heven iri ta shunadudareh shuriguk abom.”

*Jisas nakripesh Wobuwobren Baraen Um Utabor Bunak Bawishuk Um*

<sup>8</sup> “O ta onok armatok kwunoruk 10-poreibor siliwaibor utabor aria okwok kwunak kwutukuk anam akure, okwok ta kwunek maresh? Okwok ta kwukitak kwushupeh lam aria kugit okwokwit urupat. Aria okwok gamo kwupe kwurimam arigaha wata kwuparugom. <sup>9</sup> Douk kwuparugom aria okwok ta kwuhwari okwokwish arpesh douk shani okwok shape atugun iri kwukri, ‘Anam eikim utom manak mawishuk aria eik wata yaurimom aria yanak yaparugom. Aria eik wata yanadudareh aria yakri ipak punaki puni eik manadudareh!’

<sup>10</sup> “Aria eik yakripep, douk namudok atin, Iruhin nini ananish enselahos ta shunadudareh shuriguk abom um agundok atin arpen meyoh douk nyenek yoweishi inahos iri wata nyukeshuk agab

aria nyutanam nyukon apahw Iruhin um.”

*Jisas nakriresh Wobuwobren Baraen Um Anan Nuganin Nakutukuk Ananin Yaken Nanak Rougun Iri*

<sup>11</sup> Aria Jisas ta nakriresh enen wobuwobren baraen shopunek nakri, “Anan arman nabuki biom nugamim. <sup>12</sup> Aria shokuni nuganin nakrip yaken nakri, ‘Yain, eik yakri uwok um ipe arigaha nyak nyugokuk aria ohwak douk ta unosia eshudok nyak nyagraehesh um ohwak iri uwe, uwok. Eik yakri nyisiyaesh-umohw douk!’ Aria yaken nakitak nosiyamam ananish eshudok eneshenesh ananim biom nugamim.

<sup>13</sup> “Aria douk madae roubi uwe aria shokuni nuganin nohur ananish eshudok eneshenesh nanak nenek salimesh um utabor nasuabor aria nanak nape rougun kupaigi nahobig. Anan nanak aria nape nawashokuk ananibor utabor. Anan nawashabor um ehudok yoweih aih douk anan nape nenekoh iri. <sup>14</sup> Douk nawashak ananibor utabor arigaha neyaboruk, aria debeirubi nyurub baesh agudok nahobig. Aria anan eneshenesh wokan abom nenenem yaruhish. Anan madae nunabukuk anabor karowibor utabor um nunator worigun um uwe, uwok. <sup>15</sup> Douk namudok aria anan nanak nape nenek mour um anan abrudok waburin arman. Aria anudok arman neshopokan nanak nape nenekuman mour um neyoh ananiguhw burghw. <sup>16</sup> Aria agundok anan nakri nuwok eshudok worigun douk burghw hwape hwashoh iri. Aria madae enen arpen nyukri nyukon anagun worigun um nishoh iri uwe, uwok.

<sup>17</sup> “Aria douk nape aria anan urkum wata mor um agundok anan nape yoweishigom um aria nakri, ‘Thishmorim shenek mour um eikin yain iri douk shapeum shawok sabaiguni worigun. Aria eik yape agundok aria yagok um nyurub abom! <sup>18</sup> Douk namudok aria nyunekesh, eik wata itanam inak um eikin yain. Aria eik ta ikripan ikri, “Yain, eik yenek yoweishi inahos um Iruhin nani nyak. <sup>19</sup> Aria douk eik madae yopuwe iri

abom um nyak nyuhware nyakin nuganin um, uwe. Aria nyak nyusap eik ipe shakamum nyak inekumen mour meyoh.”’ <sup>20</sup> Douk anan nakri namudok aria anan nakitak nape nanak um ananin yaken.

“Douk anan wata nape nanak rougun aria ananin yaken natrunogu aria neman giha abom um ananin nuganin. Aria anan nahur nanak nemetegan aria nanapuprikan.

<sup>21</sup> “Aria anudok nuganin nakrip yaken nakri, ‘Yain, eik yenek yoweishi inahos um Iruhin nani nyak. Aria eik douk madae yopuwe iri um nyuhware nyakin nuganin uwe, uwok.’

<sup>22</sup> “Aria yaken nahwar eshudok shenek mouruman iri nakri, ‘Ipak purauri eikih sagomatinyih yopuhi rouhi rupah punaki puhuraman aria purman enen ring ananish hah. Aria purman ono su. <sup>23</sup> Aria punak pubo nyanyi sagomatinyin yopunyi bulmakau aria apak munek debeiguni worigun muwok enyudok bulmakau aria munadudareh. <sup>24</sup> Um maresh, eik yakri anudok eikin nuganin seiwok nagok. Aria uwok, anan wata nape. Eik yakri anan ta nanak nawishuk. Aria uwok, eik wata yaparugan.’ Aria anan nakriresh namudok aria eshesh shape shenek worigun aria shanadudareh abom.

<sup>25</sup> “Douk eshesh shape shenekagun aria anudok sanin nuganin napei nubarig nanaki aria nemnek um agundok eshesh shape sheyarub shatukabur um. <sup>26</sup> Aria anan nahwar anan nenek mour iri nanaki aria narigan nakri, ‘Ipak pape penek maresh?’ <sup>27</sup> Aria anan nakripan nakri, ‘Nyakin wanin nanaki aria nyakin yaken nabo enyudok sagomatinyin yopunyi bulmakau aria apak munek worigun. Um maresh, ananin shokuni nuganin douk madae nugok uwe. Anan wata natanamori.’

<sup>28</sup> “Aria douk ashuken nemnek namudok aria anan juwehosin abom aria nakri uwok abom um nunak nuwish urupat um. Douk namudok aria ananin yaken nanaki aria nenekuman shokwin shokwin um nunak urupat. <sup>29</sup> Aria anan nakrip yaken nakri, ‘Sabaishi kwarahos

eik yape yenekumen debeinyi atin mour kabi douk anan nenek mour meyoh um nyak iri um. Aria eik madae iken agab um nyakin baraan atin uwe. Aria nyak madae nyuke enen shokwinyi meme meyoh um eik ini eikish arpesh munenek anagun worigun mugnoh aria munadudareh uwe, uwok! <sup>30</sup> Aria anudok nyakin nugandin nanak neyatakuk nyakish eshudok eneshenesh um oudok weyotu yeh iri armago. Aria douk anan wata natanamori aria nyak nyaboman enyudok sagomatinyin yopunyi bulmakau.'

<sup>31</sup> "Aria yaken nakripan nakri, 'Nya, ihih nyumneh ohwak wape atugun aria eikish eneshenesh eshudok douk nyakish shopunek. <sup>32</sup> Aria douk apakiruh aparuh ta yopuruh abom aria munadudareh aria munek worigun. Um maresh, anudok nyakin wanin apak makri anan seiwok nagok, aria uwok. Anan wata nape aria douk anan wata natanamori. Aria apak makri anan ta nanak nawishuk, aria douk apak wata moparugan.'"

## 16

### *Jisas Nakripesh Wobuwobren Baraan Um Nasuhw-umesh Merik Iri Douk Nadukemesh Abom Iri*

<sup>1</sup> Aria Jisas nakripam enyudok wobuwobren baraan ananim disaipel nakri, "Anan debeini douk nagrem sabaishi eneshenesh eshudok iri nape. Aria anan nenek mour iri shopunek douk natauruman nasuhw merik um eshudok enesh shenek mour iri nape. Aria enesh shanaki shakrip anudok debeini shakri, 'Anudok nenekumen mour iri douk nyenekan um nasuhw merik iri nape nakwuaruh um nyakish eshudok eneshenesh shani nyakibor utabor.' <sup>2</sup> Aria anudok debeini nahwari anudok nasuhw merik iri aria nakri, 'Maren enyudok baraan eik yemneken um shakri nyak nyape nyakwuaruh um eikish eshudok eneshenesh um? Douk namudok nyak nyunak nyudareh ihishmorim eshudok douk nyak nyasuesh iri shuni eshudok douk seiwok nyawasheshuk um nyenek mour um. Nyak nyudarehesh aria nyusume anap shup aria nyunaki nyiyabige. Um

maresh? Nyak ta mare wata nyupe nyusuhw merik uwe, uwok.'

<sup>3</sup> "Aria anan nenek mour iri naneyagwreh nakri, 'Eikin debeini nakri niyate um mour. Douk namudok aria eik ta inek maresh? Eik madae dodogoiwe um irok nuwagas um uwe. Aria shopunek, eik douk abraenyiwe um inak ihawar kupaishi arpesh um shuke eshudok eneshenesh um. <sup>4</sup> Aria douk eik yadukemesh um eshudok douk ta eik inekesh iri um abudok nyutob eikin debeini niyate um mour um, arpesh ta wata shurae inak um esheshig urusag.'

<sup>5</sup> "Douk namudok aria anan nahwar ihishmorim arpesh douk shenek dinau um ananin debeini iri shanaki shatron. Aria anan narik sagomatinyin nakri, 'Nyak nyenek dinau um makwunish eshudok eneshenesh eikin debeini ananish?'

<sup>6</sup> "Aria anan nakripan nakri, 'Eik yenek dinau um 100-poreish welish drepahos douk shenegor rowos shahwaragas um oliv iri.'

"Aria anudok nasuhw merik iri nakripan nakri, 'Arigah nyunak nyuhur apudok shup um eshudok eneshenesh nyak nyenek dinaumesh iri shetem um aria wata nyuwem 50-poreish atish.'

<sup>7</sup> "Aria wata shopunek kupaini nanaki natogruman aria narigan nakri, 'Nyak nyenek makunin dinau?'

"Aria anan nakripan nakri, 'Eik yenek dinau um 100-poreigas begas um wit douk shenek plaua-agasi.'

"Aria anan nakripan nakri, 'Nyak nyunak nyuhur apudok shup um eshudok eneshenesh nyak nyenek dinaumesh iri shetem-opi aria wata nyuwem 80-poreigas begas atugas.'

<sup>8</sup> "Aria anudok debeini natuk anudok nenek rohwa nasuhw merik iri ananin nyeigur nyato iruhw. Um maresh? Anan douk gamo nadukemesh aria nenenek anah yopihi yah um nutaurum amudok armam nabouk amamin dinau nyagokuk um nenekam hanadudareh aria kweipon amam ta wata hutaauruman. Eshudok arpesh shagipesh agundok atapihi aih aria shukonaguk agabus Iruhin iri, eshesh douk ta gamo shudukemesh um shuni kupaishi shakonaguk agabus Iruhin

iri shunek enenyenen mour um. Eshesh douk sheshagrakuk Iruhin ananish arpesch douk sharahaen arisigunum iri um shenek mour um.”

<sup>9</sup> Aria Jisas ta nakri namudok, “Adur atin eik yakripep, ipak ta pukesh ipakibor utabor kupaishi arpesch um putaurumesh aria punekesh shutogur ipakish arpesch. Ipak punekesh namudok aria kweipon ipakibor utabor butuh um, ipak ta pugok aria punak pupe wosik ihih nyumneh gani iruhw heven.

<sup>10</sup> “Eshudok arpesch douk shusuhw karowish eshudok eneshenesh aria shunak shiyohesh wosik iri, eshesh ta shunodukem um eshesh kanak um shusuhw sabaishi eshudok eneshenesh shiyohesh. Aria eshudok douk shunek shokwinyi mour aria shunek rohww um, eshesh shunek debeini mour um, eshesh ta shunek rohww namudok atin. <sup>11</sup> Aria ta ipak mare gamo piyoh agnudok atapibor utabor wosik um, ipak ta omi nyukep yopishi eshudok eneshenesh douk shakus iruhw heven iri um piyohesh? Adur atin ta uwok. <sup>12</sup> Aria ta ipak mare gamo pubuk kupaishi esheshish eshudok eneshenesh um, ipak ta wata omi nyukep ipakish eshudok eneshenesh? Adur atin ta uwok.

<sup>13</sup> “Ta mare enen arpen nyenek mour iri ta nyunek mour um biom debeimi. Douk enyen nyunek mour um biom um, enyen ta nyukri uwok um anan, aria ta urkum munawasham anan. Aria enyen ta nyumnek anan ananin baraen aria anan ta mare nyumnekan. Aria ipak douk gamo punadukemesh um ipak kanak um mare punek mour um Iruhin nini utabor shopunek uwe, uwok.”

### *Enen Shopunek Jisas Ananin Baraen*

<sup>14</sup> Douk amam Farisi hemnek namudok aria hape henekan enenyenen um Jisas. Um maresh, amamip urkwip douk panakri utabor abom. <sup>15</sup> Aria Jisas nakripam nakri, “Ipak pakri punek ipak-ih i yopihi aih agundok kupaishi arpesch shapeum shutrip aria shuhwarep yopishi arpesch. Aria Iruhin douk nadukem ipakip urkwip por panak um. Eshudok

douk arpesch shatrish aria mishish shakitakumesh abom iri, eshudok douk Iruhin natrish aria nakri yoweishi abom.

<sup>16</sup> “Aria enyudok lo seiwok Iruhin nakoguk Moses-enyi nyani amam profet hakripesh-enyi baraen nyape dodogowin arigaha nyanak nyatogurum abudok nyutob Jon douk nenek baptaisumesh iri natogur napeum. Aria abudok nyutob banaki arigaha douk, eshesh shape shakripesh Iruhin ananin yopinyi baraen um arpesch shuwish um agundok Iruhin nape Debeini um ananish arpesch um ihirub warub. Aria ihishmorim arpesch shape shenek debeinyi mour dodogowish atish um shakri shuwish.

<sup>17</sup> “Iruhw atap ta shunak shuwishuk. Aria enyudok lo douk seiwok Iruhin nakoguk Moses enyi ta mare anabik shokugun meyoh nunak nuwishuk uwe, uwok.”

### *Jisas Nakri Um Armam Armago Shanabrig Shanaraum Um*

*(Matyu 5:31-32; 19:9; Mak 10:11-12)*

<sup>18</sup> “Aria anan arman nubrig shanaraum um ananik armatok aria wata nukri nurao kupaikwi um, anan douk nabrig enyudok lo um shanaraum um. Aria ta anan arman nurao onok armatok douk seiwok okwokwin arman neyatok kwape iri um, anan douk nabrig enyudok lo um shanaraum um.”

### *Anan Debeini Arman Nagrem Sabaishi Eshudok Eneshenesh Iri Nani Lasarus*

<sup>19</sup> Aria Jisas nakripesh enen baraen nakri, “Anan debeini douk nagrem sabaishi eshudok eneshenesh iri nape. Aria ihih nyumneh anan nenek yopihi atih rupeh douk shatorih debeibori utabor iri. Aria anan nape wosik aria napeum nawok yopuguni atugun worigun. <sup>20</sup> Aria agundok anan nanahwaram Lasarus iri douk eneshenesh wokan iri um shopunek nape. Anan sabaibi ereb bapenyan aria sharanum nanak nape adukitum wit um anudok debeini ananirub narub. <sup>21</sup> Anan nape agundok um nakri nunatorum tutukwanigun worigun anudok debeini nunekesh shagrukuk iri. Aria shopunek, nubag gwanaki gwape gwabiyak ananib ereb.

<sup>22</sup> “Douk Lasarus nape arigaha anan nagok aria Iruhin ananish enselahos sharanum nanak nani Abraham hape agundok douk Iruhin ananish arpesh shagok shanak shapenyaburi wabur. Aria anudok debeini shopunek nagok aria sharuman. <sup>23</sup> Aria anan nanak nape agundok shagok iri shanak shapeum. Aria agundok, anan nanomnek debeiri eriger aria natrugunu aria natik Abraham nani Lasarus hapeiri rougun. <sup>24</sup> Douk namudok aria nahwar Abraham nakri, ‘O yamenen Abraham, nyak nyukri gihaum eik aria nyishopok Lasarus nuseguri ananilh hah abar aria nunaki nubuwehume yaham. Um maresh, ehudok debeihi nyih hanuwe abom aria yanamnek debeiri eriger!’

<sup>25</sup> “Aria Abraham nakripan nakri, ‘O baruhon, douk nyak urkum mormoguk seiwok. Seiwok nyak nyape nyarahen amnab um, nyak nyarao ihishmorim yopishi eshudok eneshenesh. Aria Lasarus narao ihishmorim yoweishi. Aria douk abrudok wabur ananilhw apahw hwape wosik aria nanadudareh. Aria nyak nyape um nyenemnek debeiri eriger. <sup>26</sup> Aria shopunek, orokohun um apak mani ipak, Iruhin nenek anat debeti baret tabuhuk gani atap. Douk namudok aria arpesh shupe agundok iri shukri shubi-shuwis shunaku nagundok ipak pape um, eshesh ta shubirak shutik uwok. Aria arpesh shupe nagundok iri ta mare shubi-shuwishi aria shunaki agundok apak mape um uwe, uwok.’

<sup>27</sup> “Aria anudok debeini nakri, ‘Douk namudok aria Abraham, eik yakripen, nyak nyishopok Lasarus nunak um eikin yaken ananit urupat. <sup>28</sup> Anan nunak nukripugu eikim 5-poreim owarhim dodogowinyi baraan. Um maresh, ta wosik atin aria amam shopunek mare hunaki abrudok wabur douk shenemnek debeiri eriger um.’

<sup>29</sup> “Aria Abraham nakripan nakri, ‘Amam douk harao okwudok Buk douk seiwok Moses nani amam profet howem Iruhin ananin baraan nyetemok iri. Aria amam ta hutrin hugipeshen aria enyen ta nyutaurumam.’

<sup>30</sup> “Aria anan nakri, ‘Uwok, yamenen Abraham! Enyudok baraan atin ta mare nyutaurumam. Douk enen nyagok iri wata nyukitaki wonugwehw nyunak nyukripan akure, amam ta hukeshuk agabus yoweishi inahos aria hutanam hukon aparuh Iruhin.’

<sup>31</sup> “Aria Abraham nakripan nakri, ‘Douk amam mare humnek Moses nini amam profet amamin baraan husuwen hugipeshen um, enen nyagok iri arpen wata nyukitaki wonugwehw aria nyunak nyukripan-umen iri baraan shopunek ta mare humneken aria hukenyuk agabus yoweinyi uwe, uwok!’ ”

## 17

### *Yoweih Aih Ta Henek Arpesh Shukutuk Bilip Iri*

*(Matyu 18:6-7, 21-22; Mak 9:42)*

<sup>1</sup> Aria Jisas nakrip ananim disaipel nakri, “Eshudok eneshenesh douk ta shunek arpesh shunek yoweishi inahos iri ta shutogur. Aria enyudok arpen douk nyunek kupainyi nyunek yoweishi inahos iri, enyen douk ta gihaumen. <sup>2</sup> Aria enen arpen nyunek enen um eshudok shokwishi batowish um nyunek yoweishi inahos um, enyen douk nyenek yoweishi inahos abom. Aria ta shusuhwen shuwaur anam debeimi utom enyenyin aruhwigur aria shuwashen nyubuhuk youg akure, enyen ta nyupe yoweinyi poe. Aria Iruhin ta neneken nyumnek debeiri eriger abom reshagrakuk agundok nyumnek eriger um shuwashen nyubuh youg um. <sup>3</sup> Aria ipak gamo pudukemesh. Aria enen Kristen nyukri nyunek enesh yoweishi inahos um, ipak ko puhen. Aria enyen wata nyukeshuguk agab yoweishi inahos aria nyutanam nyukon apahw Iruhin um, pukweshiheshuk eshudok yoweishi inahos enyen nyenekesh iri. <sup>4</sup> Aria ta enyen nyunekumen enesh yoweishi inahos arigaha nyudareheh hunak hutogur 7-poreih um anah nyumnah, aria enyen wata nyunaki 7-poreih um nyukripan um nyukri enyen nyakutukuk eshudok yoweishi inahos enyen nyenekesh um nyak iri um, nyak mare nyusuhwesh

nyupe eshudok enyenyish yoweishi inahos aria nyutoriheshuk um enyen.”

*Jisas Nakri Um Shunek Bilip Um*

<sup>5</sup> Aria amam aposel hakrip Debeini hakri, “Nyak nyunek apakin bilip nyutogur dodogowin.”

<sup>6</sup> Aria Debeini wata nakripam nakri, “Ipak pugipesh Iruhin wosik aria ipakin bilip ta nyutogur shokwin abom aria kabi douk anam shokumi mastetim shurkum um akure, ipak ta pukrip epudok shuruwep peirenyi rowog pukri, ‘Nyunatuk um nukwaruh nyunak nyubuh youg aria wata nyukih.’ Aria adur atin, enyen ta nyugipesh ipakin barae.”

*Shenek Mour Meyoh Iri Shenekoh Iri Aih*

<sup>7</sup> “Aria ipak anan nenekumen mour meyo h iri nunak nupe nuwor amnab nubarig o niyoh sipsipahos. Aria douk nuneguk mour jurug aria wata nutanamori atin aria ta wosik nyukripan um arigas nunaki nupe nuwok worigun aka mumam?” <sup>8</sup> Adur atin ta uwok. Nyak ta nyukripan namudok, ‘Kare nyuwashak yopuhi rupah aria nyunak nyunek redimeim eikigun worigun aria nyunaki nyuke-agun ba ignah. Aria nyak nyupe nyubeime ba iwok eikigun iyatagun aria nyak kadak nyuwok nyakigun.’ <sup>9</sup> Aria nyak ta nyunek tenkyu um anudok nenekumen mour meyo h iri um agundok nagipesh nyakin barae um o ta uwok? Aria ta uwok. <sup>10</sup> Douk namudok aria ipak shopunek ta punekesh namudok atin. Aria ipak punek enyudok mour douk Iruhin nakripep um puneken iri piyaten um, ipak ta pukri, ‘Apak douk nyeiguhw wokap mape shakamum Iruhin munek mour meyo h iri. Apak douk menek anan nakripap um muneken iri atin.’”

*Jisas Nagabe 10-poreim Arugeh Lepra Hapenyam Iri*

<sup>11</sup> Aria Jisas nape nanak um Jerusalem. Anan nagim yah nawish nanak orokohunigum agudok biyog shokugi nahobig Samaria aria Galili. <sup>12-13</sup> Aria douk nanak arigas um nunak nuwish anabur wabur aria 10-poreim armam arugeh

lepra hapenyam iri hanaki haparugan. Aria amam wata heyoturi rougun aria hahwarari debeg hakri, “Jisas, Debeini, nyak nyukri nyenek gihaum apak!”

<sup>14</sup> Aria douk Jisas natrumori aria nakripam nakri, “Ipak kare punak puyabigom ipakiruh yegeshiweruh amam pris.” Aria amam hatanam hanak atin, aria arugeh lepra hanakuk abom aria amamiruh yegeshiweruh wata yopuruh.

<sup>15</sup> Aria anan natik um anan wata yopun aria anan wata natanam nanak aria nahawar debeg atin nape natuk Iruhin ananin nyeigur nyato iruhw. <sup>16</sup> Aria nanak nabuh noduk yomag nakus atap hurukatin um Jisas neyotu um aria nenek tenkyuman. Anudok arman, anan douk anan um eshesh Samaria.

<sup>17</sup> Aria Jisas natik namudok aria nakri, “Iganigadae yagabe 10-poreim. Aria amudok anam 9-poreim hapeik agnum?”

<sup>18</sup> Maresh namudok um anudok kupaibi amnabin atun natanamori nanaki nenek tenkyu um Iruhin um?” <sup>19</sup> Aria Jisas nakripan nakri, “Kitak kare. Nyak nyenek bilip nyakri eik dodogoiwe iri aria douk yopin.”

*Jisas Nakri Um Abudok Yopubi Nyutob Douk Ta Iruhin Nutogur Yopugunum Aria Nutaurumap Um*

(Matyu 24:23-28, 37-41)

<sup>20</sup> Aria anah nyumnah amam Farisi harig Jisas um ta meibi nyutob um arpesh shuwish agundok Iruhin nape Debeini um ananish arpesh um ta butogur. Aria anan nuwanamam barae nakri, “Aga-gun ta mare enesh arpesh shutrugun shudukem-agun kabi douk shatik enesh eshudok shadukemesh um uwe, uwok. <sup>21</sup> Ta mare shukri, ‘Tik, natogur agundok o natogur ganik.’ Um maresh? Iruhin nape Debeini um arpesh shuwish agundok anan nape Debeini um ananish arpesh um douk iganigadae nape numunipum.”

<sup>22</sup> Aria anan nakrip ananim disaipel nakri, “Nyutob butogur, ipak ta mishish shukitak um pakri putik anah nyumnah eik Anudok Arman douk yatogur adurinyi arpen iri itanamori ipe debeiwe iri aria



itrugun abom ahi. Aria ipak ta mare pu-truh. <sup>23</sup> Aria arpesht ta shukripep shukri, 'Krais natanamori. Wata tiku, nani nape gani.' O ta shukri, 'Anudok nape agundok!' Aria eik yakripep. Ipak mare punak pugipeshesh uwe, uwok. <sup>24</sup> Ipak padukemesh um agundok utag gatrugun obi nyutob. Agag gatrugun abom kabi aun nakihumori arigaha ganak gabuh aun nabuhum. Aria eik Anudok Arman douk yatogur adurinyi arpen iri ta inekesh namudok atin abudok nyutob eik ta itanamori um. Ihishmorim arpesht ta shitiwe. <sup>25</sup> Aria sagomatin eik ta imnek debeiri eriger aria doukish arpesht ta shukeik agabus iyoh.

<sup>26</sup> "Enehenesh aih douk shenekeh abudok nyutob seiwok Noa nape obi nyutob, ehudokmori atin ta shenekeh abudok nyutob hurukatin um eik Anudok Arman douk yatogur adurinyi arpen iri ta itanamori obi nyutob. <sup>27</sup> Ihishmorim arpesht shapeum shawok worigun aria abar iri, aria armam armago shanaraum. Eshesh shape shenekesh namudok arigaha ahudok nyumnah Noa nawish korohuk aria abar babo ihishmorim arpesht beyateshuk.

<sup>28</sup> "Aria shopunek, abudok nyutob seiwok Lot nape obi nyutob douk shenekesh namudok atin. Shapeum shawok worigun, shawok abar, shator eshudok eneshenesh, shenek salim um eshudok eneshenesh, shau eneshenesh nubarig, aria shanarok urusag. <sup>29</sup> Aria douk arigaha ahudok nyumnah Lot nakutukuk wabur Sodom nanakuk aria Iruhin nenek nyih iri juwehosibori utabor salfa shagruk iri iruhw utag. Eshesh shagruki kabi douk eshah hormori aria shabuhi shabo ihishmorim arpesht shagok shatuh.

<sup>30</sup> "Aria abudok nyutob eik Anudok Arman douk yatogur adurinyi arpen iri itanamori yopugunum obi nyutob, arpesht shopunek ta shenekesh namudok atin. <sup>31</sup> Ahudok nyumnah, arpen nyupe aduk urupat iri ta mare wata nyuwish um nyunohuri enenyish eshudok eneshenesh. Aria enyudok douk nyeyotu nubarig iri ta mare wata nyutanam nyunak um urupat um nyunohuri

eshudok eneshenesh uwe, uwok. <sup>32</sup> Ipak urkwip puramaguk Lot ananik irohukwik. <sup>33</sup> Eshudok arpesht douk urkwip purum shukri eshesh kanak shupe wosik um, aria mare shusuhw eikin baraan shugipeshen iri ta shunak shuwishuk. Aria eshudok douk madae urkwip purum eshesh kanak uwe aria shugipesh eik iri ta shupe wosik."

<sup>34</sup> Aria Jisas nakri, "Eik yakripep, abudok wab, biom armam ta hishuh atus aras. Anan ta inaran aria anan ta nishuhuk. <sup>35</sup> Aria bio armago ta upe unek plaua um uweh bret um. Aria onok ta inaraok aria onok ta kwupeik. <sup>36</sup> [Aria biom armam ta hiyotu nubarig. Aria anan ta inaran, aria anan ta niyotuguk.]"

<sup>37</sup> Aria Jisas ananim disaipel hemnek namudok aria harigan hakri, "Debeini, enyudok ta nyutogur agnum?"

Aria Jisas neyagwreh nakripam wobuwobren baraan nakri, "Agnudok douk mahish shagok shakus um, armiguhw ta apa hwanaki hwanatorumori um."

## 18

### *Wobuwobren Baraan Um Onok Armatok Kworep Jas Nasuhw kwotog Iri Um Nutaurumok Iri*

<sup>1</sup> Aria Jisas nakrip ananim disaipel enyudok wobuwobren baraan um nunek skulumam um hunek beten ihih nyumneh aria mare hukutunuk atin. <sup>2</sup> Aria nakripam nakri, "Anabur wabur, anan jas douk nasuhw kwotog iri nape. Anudok jas madae nunogugur Iruhin atun uwe, uwok. Aria anan madae nukri gihaumesh atin uwe arpesht o nunoguguresh uwe, uwok. <sup>3</sup> Aria abrudok atubur wabur onok armatok anan nagok nokusopuk iri kwape. Ihih nyumneh okwok kwape um kwanak um anudok jas aria kwakripan kwakri, 'Anan eikin horin nenek rohume aria nenek kwotume meyoh. Aria eik yakri nyak nyutaurume um kwot.'

<sup>4</sup> "Aria roubum nyutob anudok jas nemnek okwokwin baraan aria nakri uwok um nutaurumok. Aria arigaha anan nenek urkum aria nakri, 'Adur, eik douk madae inogugur Iruhin uwe,

o madae inogugur arpes h aria ikri gi-haumesh atin uwe. <sup>5</sup> Aria okwudok armatok kwanaki kowemume abudok bugob aria nyunekesh. Eik ta itaurumok um kwot. Uwok um, okwok ta kwupe um ta kwunaki atin kwunaki aria eik ta arigeh heimok abom!’ ”

<sup>6</sup> Aria Debeini nakripam nakri, “Ipak ta pumnek enyudok baraen anudok yoweini jas nakriyen iri. <sup>7</sup> Aria ipak pakri mumam? Eshudok arpes h douk Iruhin nana-graehesh um shupe ananish iri shukri shureh shubeiman nyumnah wab um nutaurumesh um, anan ta mare nutaurumesh arigas uwok? <sup>8</sup> Adur atin eik yakripep, anan ta nutaurumesh arigas um enyudok rohwin yi baraen. Aria abudok nyutob eik Anudok Arman douk yatogur adurinyi arpen iri itanamori abudok amnab obi nyutob, ipak pakri eik ta itik um arpes h douk shenek bilip um eik iri o uwok?”

*Wobuwobren Baraen Um Anan Farisi Nani Anan Narao Takis Iri*

<sup>9-10</sup> Enesh arpes h douk shakri eshesh atish douk shugipesh lo atin iri arpes h shapeum shenek yopihi aih atih iri aria shakri ihishmorim kupaishi douk yoweishi. Douk namudok aria Jisas nakripesh enyudok wobuwobren baraen nakri, “Biom armam hato um Iruhin ananit debeiti urupat um hunek beten. Anan Farisi aria anan narao takis iri. <sup>11</sup> Aria Farisi nakitak neyotu aria numun ananin urkum atin nenek beten nakri, ‘Iruhin, eik yenek tenkyumen. Um maresh? Eik douk madae kabi ihishmorim kupaishi arpes h douk shenek yoweishi inahos iri uwe. Enesh shakwu orugwih iri. Enesh shenek wehrur iri, aria enesh madae shugipesh lo atin iri uwe. Aria shopunek, eik douk madae kabi nani yoweini arman narao takis iri uwe. <sup>12</sup> Ihig wik, biyeh nyumneh eik apa yeshakur um worigun aria yape yenek beten atin. Aria ihishmorim eshudok eik yaparuges h iri, eik apa yosiyaesh aria yeken anabigish<sup>18:12</sup>um nyak!’

<sup>13</sup> “Aria anudok narao takis iri neyotukuk rougun aria madae karowih atin

nupuhur nutik iruhw heven uwe, uwok. Anan neyotu aria nape naguduk mishin aria nakri, ‘Iruhin, eik yenek eneshenesh yoweishi inahos iri. Nyak gihaume!’ ”

<sup>14</sup> Aria Jisas nakri, “Eik yakripep. Iruhin douk natik anudok narao takis iri aria nahwaran nagipesh lo atun iri arman aria anan wata natanam nanak um ananit urupat. Aria anudok Farisi uwok. Um maresh? Arpes h douk shutuk esheshish nyeiguhw shuto iruhw iri, Iruhin ta nesh shubuhuk. Eshudok douk madae shutuk esheshish nyeiguhw shuto iruhw iri uwe, Iruhin ta nutuk esheshish nyeiguhw shuto iruhw.”

*Jisas Nenekumesh Yopihi Aih Shokwishi Batowish Um Shupe Wosik*

*(Matyu 19:13-15; Mak 10:13-16)*

<sup>15</sup> Aria enesh arpes h sharauri esheshish shokwishi batowish um Jisas um nuwemesh wis aria nunekumesh yopihi aih. Aria douk ananim disaipel hatik namudok aria hahaesh. <sup>16</sup> Aria Jisas nahwari eshudok shokwishi batowish shanaki hurukatin um anan aria nakri, “Ipak kutukuk shokwishi batowish shunakumori eik. Um maresh? Eshesh ta shuwish agundok Iruhin nape Debeini um ananish arpes h um. <sup>17</sup> Eshudok arpes h douk shakri uwok um Iruhin nupe esheshin debeini kabi douk batowish shakri wosik um, eshesh ta mare shuwish agundok Iruhin nupe Debeini um ananish arpes h shapeum uwe, uwok.”

*Jisas Nani Anan Nagrem Sabaishi Eshudok Eneshenesh Iri Heyagwreh*

*(Matyu 19:16-30; Mak 10:17-31)*

<sup>18</sup> Aria anan eshesh Juda esheshin debeini narig Jisas nakri, “Yopuni Tisa! Eik ta inek maresh aria ta douk ipe wosik abom ihih nyumneh?”

<sup>19</sup> Aria Jisas nakripan nakri, “Nyak nyahware yopuweiri um maresh? Iruhin atun douk yopuni. <sup>20</sup> Nyak douk nyadukemen enyudok lo douk nyetem Iruhin ananik Buk iri. Enyen douk nyakri, ‘Ipak mare punek wehrur, mare pubo kupaishi arpes h shugok, mare pukwuaruh, aria mare punek roh w atin. Aria ipak pumnek

ipakish amakenyish esheshin baraen aria putaurumesh.’”

<sup>21</sup> Aria anudok arman wata nakrip Jisas nakri, “Seiwok eik wata shokuwe um, ari-gaha douk, eik yasuwen dodog enyudok ihinyumorim lo aria yagipeshen.”

<sup>22</sup> Aria douk Jisas nemnek namudok aria wata nakripan nakri, “Nyak douk atuh aih wata hape, nyak wata nyunekah uwe. Nyak nyunak nyuhur ihishmorim nyakish eshudok eneshenesh nyuko kupaishi shutorish shuken utabor. Aria nyak wata nyisiyabor um yaruhish arpes. Nyak nyunekesh namudok aria sabaishi yopishi eshudok eneshenesh ta shukusumen iruhw heven. Aria douk nyunekeshuk namudok ba iyoh, aria nyak douk nyunaki nyugipeshe.”

<sup>23</sup> Aria anudok arman nemnek namudok aria anan apahw amaenyihw abom. Um maresh? Anan douk nanabuk sabaishi eshudok eneshenesh abom. <sup>24</sup> Aria Jisas natik um anan apahw yowehw abom um aria nakri, “Eshudok arpes douk shagrem sabaishi eneshenesh eshudok iri shukri shuwish abrudok wabur Iruhin nape Debeini um ananish arpes um, eshesh ta shunek debeinyi mour iyoh, aria ta kadak shuwish. Uwok um, ta uwok. <sup>25</sup> Aria enen debeinyi mahin nyeigurinyum kamel iri nyukri nyuwish nyil douk umunihw um tret tananyigur um, enyen ta nyunek debeinyi mour aria douk ta nyuwish. Aria eshudok arpes douk shanabuk sabaishi eshudok eneshenesh iri shukri shuwish abrudok wabur Iruhin nape Debeini um ananish arpes um, eshesh ta shunek debeinyi mour abom shishagrakuk kamel aria kadak shuwish. Uwok um, ta uwok.”

<sup>26</sup> Aria eshudok arpes douk shape shemnekan neyagwreh iri sharigan shakri, “Douk namudok aria Iruhin ta wata nunarao meishi arpes shutanamori shupe wosik abom?”

<sup>27</sup> Aria Jisas wata nakripesh nakri, “Eshudok douk arpes shubirak um shunekesh aria shubirak um shutik uwok iri, Iruhin anan atun ta nunekesh.”

<sup>28</sup> Aria Pita nakri, “Tik, apak douk makutukuk apakirub warub bani ihish-

morim eshudok eneshenesh aria enyudok manaki magipeshen.”

<sup>29-30</sup> Aria Jisas nakripam nakri, “Adur atin eik yakripep amudok armam douk amamip urkwip porum hukri Iruhin nupe debeini um amam um abrudok wabur arpes shuwish um Iruhin nupe Debeini um aria douk hukutukuk amamirub warub o amamiyu armago o ashukenyish owashish o amakenyish o batowish iri, Iruhin ta nunekumam enyudok. Douk abudok amnab Iruhin ta nukom sabaishi eshudok shishagrakuk eshudok douk amam hakutishukuk iri. Aria kweipon shopunek, amam ta hupe wosik abom ihih nyumneh.”

*Henek Biyeh Atih Um Jisas Nakripesh Um Anan Ta Nugok Aria Wata Nukitak Um (Matyu 20:17-19; Mak 10:32-34)*

<sup>31</sup> Aria Jisas narao ananim 12-poreim disaipel hanak anagas aria nakripam nakri, “Mnek! Douk apak ta muto munak um Jerusalem. Aria ihinyumorim baraen douk seiwok amam profet henyemaguk um eik Anudok Arman douk yatogur adurinyi arpen iri ta nyutogur adurin. <sup>32-33</sup> Eshesh ta shukam eik amudok douk madae hudukem Iruhin iri uwe. Aria amam ta hurae hububunime, hukwusehe aria ta huneke enenyenen. Aria amam ta hureye madururuh aria he igok. Aria douk hukri um biyeh atih nyumneh um, eik ta wata ikitaki ipe.”

<sup>34</sup> Aria douk amam disaipel hemnek ananin baraen aria amam madae hudukemen uwe. Baugenyum baraen nyanabeshuk um amam. Douk namudok aria eshudok douk Jisas nakripam-umesh iri amam madae hudukemesh uwe.

*Jisas Nagabe Anan Nabes Seshukanari Aria Wata Natrugun*

*(Matyu 20:29-34; Mak 10:46-52)*

<sup>35</sup> Aria Jisas nanak natogur hurukatin um wabur Jeriko aria anan nabes seshukanari nape anagasih um yah. Anan apa nape nahwar arpes um shukon utabor. <sup>36</sup> Aria douk nemnek um eshudok sabaishi arpes shanaki um shishagrakan shunak aria anan narig nakri, “Yaipo shenek maresh?”

<sup>37</sup> Aria eshesh shakripan shakri, “Jisas napeiri wabur Nasaret iri nanaki.”

<sup>38</sup> Aria anan nemnek namudok aria nahwar nakri, “Jisas, Devit ananin barhonin! Nyak nyukri nyenek gihaum eik!”

<sup>39</sup> Aria eshudok sharig iri shahan shakripan um mokureg. Aria anan nuhwar debeg abom nakri, “Devit ananin barhonin! Nyak nyukri nyenek gihaum eik!”

<sup>40-41</sup> Aria Jisas nemnek namudok aria neyotu aria nakriפש nakri, “Arigah harokanari punaki agundok.”

Aria douk sharani aria Jisas narigan nakri, “Nyak nyakri inekumen maresh?”

Aria Anan nakriפש Jisas nakri, “Debeini, eik yakri um ta inatrugun.”

<sup>42</sup> Aria Jisas nakriפש nakri, “Trugun, nyak nyenek bilip nyakri eik dodogoiwe iri aria nyakis nabes douk ta yopus.”

<sup>43</sup> Aria ahudok atuh nabes yopus natrugun aria nani Jisas hanak. Aria anan nape nanadudareh um Iruhin natuk ananin nyeigur nyato iruhw. Aria eshudok sabaishi arpeshe shopunek shatik namudok aria eshesh ihishmorim shatuk Iruhin ananin nyeigur nyato iruhw.

## 19

### *Jisas Nanak um Sakias Ananit Urupat*

<sup>1</sup> Aria Jisas nawish nanak abrudok wabur Jeriko aria anan nanak um nakri nukutuburuk nugim yah nunak. <sup>2</sup> Aria anan arman shahwaran um Sakias iri nape abrudok wabur. Anan douk debeini um امام harao takis iri. Aria anan douk nanabuk sabaibori utabor iri. <sup>3</sup> Aria Sakias nakri nutik Jisas um nudukemesh um anan douk meini. Aria sabaishi arpeshe shatatapanuguk aria anan madae nutrun uwe. Um maresh? Sakias shopunek douk banani arman abom. Namudok aria anan nabirak um nutik Jisas aria nabirak natik uwok. <sup>4</sup> Douk namudok aria anan nahur narik atin nanak nato enen rowog nyeigurinyum fik iri um nakri nutik Jisas. Um maresh? Anan nadukemesh um Jisas ta nunak ahudok yah.

<sup>5</sup> Aria douk arigaha Jisas nanak natograri okwudok outuk aria napuhur

natik iruhw aria nakri, “Sakias, buhi arigas. Doukih nyumnah, eik ta inak ipe nyakit urupat.”

<sup>6</sup> Aria Sakias arigas atin nabuhi atap aria nanak nanadudareh um Jisas. Aria امام hanakum Sakias ananit urupat.

<sup>7</sup> Aria douk ihishmorim arpeshe shatik namudok aria shape sheneyagwreh shoku shokwin baraen um Jisas shakri, “Anudok arman nanak neshuh anudok nenek yoweishi inahos atish iri ananit urupat.”

<sup>8</sup> Douk امام hanak urupat aria Sakias nakitak neyotu nakriפש Debeini nakri, “Debeini, nyak muneke. Douk enesh- enesh eikish eshudok ta isiyaesh um biyeh. Wobresh ta iko yaruhish arpeshe iri. Aria nubokuhi ikri inek rohwa um enen arpen inaruken enesh enyenyish eshudok eneshenesh meyo um, douk ta wata ibeyeshamen aria ta wata iken enesh shopunek arigaha idareheh um 4-poreih.”

<sup>9</sup> Aria Jisas nakriפש nakri, “Doukih nyumnah, Iruhin wata nanaraep ipak ihishmorim pape atudok urupat iri patanamori pape wosik. Um maresh? Nyak shopunek douk nyakitak apudok atop awirop Abraham ananip. <sup>10</sup> Umum maresh? Eik Anudok Arman douk yatogur adurin arpen iri douk yanakumori itik um eshudok arpeshe douk shanak shawishuk iri um itaurumesh inaraesh shutanamori shupe wosik.”

### *Jisas Nakriפש Enen Wobuwobren Baraen Um 10-poreim Henek Mour Iri Harao Utabor Um (Matyu 25:14-30)*

<sup>11</sup> Aria abudok nyutob eshesh shape shemnek enyudok baraen Jisas nakriפש Sakias um, aria Jisas shopunek nakriפש enen wobren baraen. Um maresh? Anan douk nanaki hurukatin um Jerusalem. Aria eshesh shakri ta abudok nyutob um arpeshe shuwish agundok Iruhin nupe Debeini um ananish arpeshe um ta butogur douk atin aria Jisas ta nupe esheshin debeini. <sup>12</sup> Aria anan nakriפש nakri, “Anan debeini arman nakri nunak um anabur rougunibur wabur um shunekan king aria ta wata nutanamori um ananibur wabur. <sup>13</sup> Aria

hurukatin um nunak obi nyutob, anan nahwari ananim 10-poreim armam douk henekuman mour iri hanaki aria nokomuk 20 kina 20 kina amam atun atun. Aria nakripamuk nakri, 'Ipak punak punek bisnis kupakupai-gunum atin um abrudok utabor eik yekepabor iri aria punek winmoni-ibor. Ipak punak pupe punekesh namudok arigaha eik wata itanamori.'

<sup>14</sup> "Aria eshudok arpeshe douk shani anan shape atub amnab iri shakri uwok um anan. Douk namudok aria anan narik aria eshesh sheshopok anam harao baraan hagipeshan. Amam hanak aria hakri, 'Apak makri uwok um anan nupe apakin king um.' <sup>15</sup> Aria eshesh madae shumnekam uwe aria shenekan king aria wata natanamori. Anan natanamori atin aria nenekumam baraan amudok henekuman mour iri douk nukomuk utabor iri um hunaki hutrun. Aria nakri norigam um amam atun atun henek makwunibor winmoni-ibor utabor.

<sup>16</sup> "Aria narik iri natograri aria nakri, 'Debeini, eik meyoh enyudok 20 kina nyak nyekeyenyuk iri yenek bisnis aria profetin douk nyatogur 200 kina!'

<sup>17</sup> "Aria anudok king nakri, 'Nyak yopuni arman nyenekume mour iri. Nyak nyeneken wosik abom. Eshudok eshesh douk karowish meyoh, aria nyak apa nyeyohesh wosik atin. Namudok aria nyak ta ineken um nyupe debeinyi aria nyiyoh 10-poreirub debeirubi warub.'

<sup>18</sup> "Aria douk narik iri nanakuk aria anudok anan nanaki nakri, 'Debeini, eik meyoh enyudok 20 kina nyak nyekeyenyuk iri yenek bisnis aria profetin douk nyatogur 100 kina.' <sup>19</sup> Aria king nakripan nakri, 'Nyak ineken um nyupe debeinyi nyiyoh 5-poreirub debeirubi warub.'

<sup>20</sup> "Aria anudok anan nenekuman mour iri nanaki nakri, 'Debeini, nyak-ibor utabor 20 kina abrudok. Eik yetapeyen rupahip aria yenyubuk nyakus. <sup>21</sup> Um maresh? Nyak douk juwehosinyi atin iri, aria eik yanogugur abom. Yanogugur abom um eneshenesh kupaishi sheneshubuk iri, nyak apa nyanashuhur. Nyak madae nyorig atin

uwe. Aria worigun kupaishi shanuwesh iri, nyak apa nyanaurimesh.'

<sup>22</sup> "Aria king nakripan nakri, 'Nyak yoweini arman abom nyenekume mour iri. Eik ta ikwu nyak kanak nyakin baraan douk nyak nyakriyen um eik iri aria inekumen kwot. Nyak douk nyadukemesh um agundok eik juwehosiwe atuwe abom um. Aria yatrish yonahur eshudok kupaishi sheshubuk iri um. Aria yatrish yanaurim worigun kupaishi shanuwesh iri um. <sup>23</sup> Douk namudok aria nyak madae nyunak nyuborur-ume um benk uwe? Um eik wata itanamori aria inak inaboruhur um, eik irao anabor profetibor shopunek.'

<sup>24</sup> "Douk namudok aria king nakripan eshudok arpeshe sheyotu agundok iri nakri, 'Putrun enyudok 20 kina aria puko anudok anan douk nasuhw 200 kina iri.'

<sup>25</sup> "Aria eshesh shakripan anudok king shakri, 'Debeini, anan douk wosik nasuhw sabaibori um 200 kina.'

<sup>26</sup> "Aria anan nakri, 'Eik yakripep, ihish arpeshe douk shusuhw sabaishi eshudok iri ta wata shukesh enesh shopunek. Aria eshudok douk eshudok wokeshi, eshudok karowish eshesh sheneshubuk iri, eshesh ta wata shutrishesh aria shupeik meyoh abom. <sup>27</sup> Aria douk ipak puraui eshudok eikish horim douk shakri uwok um eik ipe esheshin king iri punaki agundok eik yape um itrish aria pesh shugok.' "

*Jisas Nawish Jerusalem Kabi Douk Anan King Um*

*(Matyu 21:1-11; Mak 11:1-11; Jon 12:12-19)*

<sup>28</sup> Aria douk Jisas nakripeshuk enyudok wobuwobren baraan um jurug, aria nakitak narik nape nagim yah nanak um Jerusalem. <sup>29</sup> Douk nanak arigaha hurukatin um abrudok biarub warub Betfage aria Betani, douk bape hurukatin um yoduhw Oliv iri aria nakripan biom disaipel harik hanak. <sup>30</sup> Aria nakripan enyudok baraan nakri, "Ipak purik punak babri wabur bape gani yah iri. Ipak ta punak puwish atin aria ta putik enen nugaen donki douk shoreyen maduhw aria shenyuseh nyeyotu. Enyudok donki douk watak enen arpen nyuraheyen uwe.

Ipak putrin aria pukweshihen puraen punaki. <sup>31</sup> Aria ta enen arpen nyukri nyorigep nyukri, 'Ipak pakweshihen um donki?' ipak pukripesh pukri, 'Debeini nakriyen.'

<sup>32</sup> Aria amam hanak aria hatik um eshudok anan nakripam-umesh iri shatogur kabi douk anan nakri um. <sup>33</sup> Aria douk amam hape hokweshihi enyudok donki aria shagremen iri sharigam shakri, "Ipak pakweshihen um mare enyudok nugaen donki?"

<sup>34</sup> Aria amam hakripesh hakri, "Debeini nakriyen."

<sup>35</sup> Amam hakripeshuk namudok aria haraen hanakum Jisas. Douk hanak hatogur aria howem amamig saketog agabainyum enyudok nugaen donki aria hataurum Jisas nato nakih netem. <sup>36</sup> Douk nakih netem aria enyen nyape nyanak. Aria arpes shape showaruk esheshig saketog shogubuk yah um shakri shuginohwah. <sup>37</sup> Aria anan nanak natogur agundok yah hanakum yoduhw Oliv iri, hurukatin um Jerusalem. Aria sabaishi arpes douk shape shagipeshan shasuhw ananin baraen iri shanadudareh aria shape shenek tenkyu um Iruhin. Aria shahwar debeg atin shape shatuk ananin nyeigur nyato iruhw um ihinyumori Iruhin atun neneken iri mour douk Jisas neneken shatrin iri.

<sup>38</sup> Eshesh shahwar shakri, "Iruhin nunek yopunyi um anudok King douk nanakumori Debeini ananin nyeigur iri. Iruhin ananihw apahw douk yopuhw abom um apak arpes! Apak mutuk Iruhin ananin nyeigur nyuto iruhw."

<sup>39</sup> Aria anam Farisi douk heir eshudok sabaishi arpes iri hakrip Jisas hakri, "Tisa, kwakripesh eshudok shasuhw nyakin baraen shagipeshen iri um mare shenekesh namudok uwe, uwok."

<sup>40</sup> Aria Jisas nakripam nakri, "Eik yakripep, eshudok shukri mare shenekesh namudok um akure, utabor ababor kanak ta bupe buhwar butuk eikin nyeigur nyuto iruhw."

### *Jisas Nerep Jerusalem*

<sup>41</sup> Douk Jisas nanaki hurukatin um Jerusalem natrubur aria nape nerepobur. <sup>42</sup> Anan nerepobur aria nakri, "Aria doukih nyumnah ipak arpes pape Jerusalem iri pakri pudukem ehudok aih douk ta puraeh aria hunekep pupe wosik iri akure, enyen ta wosik. Aria douk ehudok aih hanobeshuk-umep aria ipak madae pudukemesh uwe. <sup>43</sup> Aria mnek, nyumneh ta hutogrum ipakish horik horin shunaki shiyotu shiyar shurihep aria shini ipak purpak um. Eshesh ta shurok dodogoiburi nabur abom shiyar shurihep. <sup>44</sup> Aria eshesh ta shubrigen shununin abom nyani nyakish batowish douk shape numun narub iri. Aria eshesh ta mare shukutukuk anam utom mutemaguk kupaimi kabi douk sharik sharok narub shabremum uwe, uwok. Um maresh? Abudok nyutob Iruhin nanakumori nakri nutaurumep um, ipak madae puturub pudukemab nyutob uwe."

### *Jisas Nehiyah Arpes Douk Shenek Bisnis Numun Narub Iruhin Ananit Debeiti Urupat Tatao Um Iri*

*(Matyu 21:12-17; Mak 11:15-19; Jon 2:13-22)*

<sup>45</sup> Aria Jisas nanak nawish numun narub Iruhin ananit debeiti urupat tataoum aria nape nehiyah arpes douk shape shenek salim um eshudok eneshenesh gani numun iri. <sup>46</sup> Aria anan nakripesh nakri, "Baraen nyetem Iruhin ananik Buk iri douk nyakri namudok. Iruhin nakri, 'Eikit urupat douk tape um shunek beten um.' Aria ipak penekeshumat kabi douk shakwuaruh iri shanaki shape shanabeshuk um."

<sup>47</sup> Aria ihih nyumneh anan nape nenek skulumesh um ananin baraen numun narub Iruhin ananit debeiti urupat tataoum. Aria amam debeimi pris hani amam douk henek skulumesh um Iruhin ananin lo iri hani amudok anam eshesh Juda esheshim debeimi hakri hubo Jisas nugok. <sup>48</sup> Aria amam habirak madae huparug anah yah um hon nugok um uwe, uwok. Um maresh, ihishmorim arpes shakri shumnek ihinyumorim ananin baraen abom aria eshesh shakri uwok um shukut-unaguk.

## 20

*Debeimi Harig Jisas Um Omi Nyakon Big Aria Douk Nenek Enyudok Mour (Matyu 21:23-27; Mak 11:27-33)*

<sup>1</sup> Anah nyumnah Jisas nape numun narub Iruhin ananit debeiti urupat tataoum aria nape nenek skulumesh um yopihi aih aria nape nakripesh Iruhin ananin yopinyi baraan. Aria abudok nyutob, amam debeimi pris hani amudok henek skulumesh um lo iri hani amudok anam eshesh Juda esheshim debeimi hanaki hatrun. <sup>2</sup> Aria amam harigan hakri, “Nyak nyarao maren big um nyunek enyudok mour? Aria omi nyeken enyudok big?”

<sup>3</sup> Aria Jisas nawanamam baraan nakri, “Eik shopunek yakri iyorigep um enen baraan. <sup>4</sup> Ipak kripe, Jon douk nenek baptaisumesh iri omi nyakon enyudok mour aria anan douk nenek baptaisumesh? Iruhin nakripan aria douk nenek baptaisumesh o, enesh arpeshe meyoh?”

<sup>5</sup> Aria amam hemnek aria amam kanak hape haneyagwreh hakri, “Ta mukripan maren baraan? Ta mukri Iruhin nakonen um, anan ta wata norigap nukri, ‘Douk namudok aria ipak madae punek bilip um Jon ananin baraan uwe um maresh?’ <sup>6</sup> Aria shopunek, ta mukri arpeshe meyoh shakonen um, eshudok sabaishi arpeshe ta shop shukwumap utabor. Um maresh? Eshesh shakri Jon anan douk anan adurin profet abom.”

<sup>7</sup> Douk namudok aria amam hakripan hakri amam madae hudukemesh uwe.

<sup>8</sup> Aria Jisas wata nakripam nakri, “Eik shopunek douk namudok atin. Eik ta mare ikripep um omi nyutaurume nyeke big aria eik douk yenek enyudok mour um.”

*Jisas Nakripesh Wobuwobren Baraan Um Yoweimi Armam Henek Mour Nubarig Douk Shau Wain Agari (Matyu 21:33-46; Mak 12:1-12)*

<sup>9</sup> Aria Jisas nakripesh enyudok wobuwobren baraan nakri, “Anan arman narib anag nubarig aria nawu wain.

Douk nawon neyatagun aria nakrip kupaime armam hanaki henek kontrak heyohog. Aria shuruwep wainip pukri burep obi nyutob, amam hunadi anabigipum aria anan hudiman anabigipum. Aria anan nakomaguk nubarig aria nanak um anabur rougunibur wabur nanak nape roubum nyutob. <sup>10</sup> Douk nape arigaha abudok nyutob um wainip shuruwep burep aria ta shudiyep um butogur. Aria anan neshopok anan arman douk nenekuman mour iri nanak um nukripam hudi iri enep shuruwep huko anan nusuwepamani. Douk nanak natogur aria amudok henek mour nubarig iri hakitak han aria wata heshopokan nanak wis wohis. <sup>11</sup> Douk namudok aria anan wata neshopok kupaini nenekuman mour iri nanak. Anan nanak natogur aria namudok atin. Amam han henekuman yoweih aih aria wata heshopokan nanak wis wohis. <sup>12</sup> Aria douk anan natik namudok aria anan wata neshopok anan shopunek nanak. Douk nanak natogur aria namudok atin. Amam han henekan enenyenen aria honahur hawashan natogur adukigam nubarig.

<sup>13</sup> “Aria nagrem nubarig iri nakri, ‘Douk, namudok aria eik ta inak inek maresh? Aria ishopok eikin nuganin meyoh douk eik urkum manawashaman abom iri nunak. Aria anan douk wosik, amam ta humnek ananin baraan.’ <sup>14</sup> Aria henek mour nubarig iri hatrun nanaki aria amam hanakripam hakri, ‘Anudok arman douk nagrem nubarig iri ananin nuganin. Kweipon anan ta nurao ananish eneshenesh eshudok iri. Douk namudok aria apak mon nugokuk um apak munarao agudok nubarig.’

<sup>15</sup> “Aria amam hanak hasuwan, hawashan natogur aduk um agudok nubarig aria han nagok.

“Aria nagrem agudok nubarig iri ta nunaki nunekam mumam amudok henek mour ananig nubarig iri? <sup>16</sup> Eik yakripep, anan ta nunaki nom hugok aria nukrip kupaime hunaki hunek mour ananig nubarig.”

Aria douk eshesh arpeshe shemnek namudok aria shakri, “Apak makri uwok um nunekesh namudok uwe, uwok.”

<sup>17</sup> Aria Jisas natrish duk aria narigesh nakri, “Baugenyum um enyudok baraen nyetem Iruhin ananik Buk iri douk nyakri mumam? Baraen douk enyudok. ‘Amudok sagramatinyim utom<sup>20:17</sup>douk harok urupat iri hakri uwok-umom aria hakwreyomuk iri, amam douk matogur sagramatinyim yopumi utom abom.’ <sup>18</sup> Aria ihishmorim arpesh douk shutu shuto amudok utom iri ta shubuh prurakeresh shunek-umaguk shokugun atugun. Aria ta amam mubuh mubo enen arpen um, enyudok arpen ta misharigen abom nyunenekum minyabeg.”

<sup>19</sup> Jisas nakripesh enyudok wobuwobren baraen aria amam henek skulumesh um lo iri hani amam debeimi pris hadukemesh hakri enyudok wobuwobren baraen douk nakriyen nenyem amam. Namudok aria abudok nyutob amam hakitak hakri hutik anah yah um husuwan douk aria amam hanogugur um eshesh armam armago.

*Harig Jisas Um Shunek Takis Um Sisar Aka Uwok*

*(Matyu 22:15-22; Mak 12:13-17)*

<sup>20</sup> Aria amam hape hatrugun um anab yopubi nyutob um amam huparug anagun aria kadak husuwan. Aria amam heshopok anam armam hanaki hape hatrun. Amudok armam douk debeimi heshopokam hanaki iri, amam douk henek rohwa hakri amam adur hagipesh lo atin iri armam henek yopinyi atin iri. Amam hanaki hatik Jisas um huni anan hiyagwreh um hakri humnekan nukri niyagwreh enen baraen douk madae yopinyi uwe aria amam husuwan huranam debeini gavman um shokugi nahobig Judia iri aria hunekuman kwot.

<sup>21</sup> Aria amudok henek rohwa iri hanaki aria hakrip Jisas hakri, “Debeini, apak madukemesh um nyak douk madae nyunogugur um enesh arpesh uwe. Aria nyak douk madae nyukrip debeishi nyeiguhw-ishi arpesh kupainyi baraen, aria nyeiguhw wokeshi nyukripeshuk kupainyi uwe, uwok. Nyak apa nyakripesh atin baraen ihishmorim arpesh. Aria nyak apa nyagipesh adurin atin baraen

aria nyenek skulumesh wosik um Iruhin ananish aih. <sup>22</sup> Douk namudok aria nyak kripap. Apakin lo douk nyakri mumam? Enyen douk wosik um munek takis um debeini gavman Sisar aka, uwok?”

<sup>23-24</sup> Aria Jisas douk nadukemesh um agundok amam hakri hunek rohwan um. Douk namudok aria anan nakripam nakri, “Ipak puyabige anam utom ba itrum. Enyudok nyeigur nyani aborir shetem amudok utom iri douk omiapenyish?”

Aria amam hakri, “Sisar ananish wo.”

<sup>25</sup> Aria anan nakripam nakri, “Douk namudok aria Sisar ananish eshudok enesh enesh ta puko Sisar. Aria Iruhin ananish puko Iruhin.”

<sup>26</sup> Aria amam habirak um humnekan niyagwreh enen yoweinyi baraen agundok sabaishi arpesh shapeum hakri hunek kwotuman umen iri aria habirak hatik uwok. Namudok aria amam hakitak yowiyokuk um enyudok baraen anan nebeyeny-umam iri. Aria amam mukareg baraen wokam.

*Amam Sadyusi Harig Jisas Um Shagok Iri Ta Wata Shakitak Um*

*(Matyu 22:23-33; Mak 12:18-27)*

<sup>27-28</sup> Amam Sadyusi apa hakri shagok iri ta mare wata shukitaki uwok. Aria anam amudok Sadyusi hanaki Jisas napeum aria harigan hakri, “Debeini tisa, seiwok Moses nawem-mopuk enen baraen. Aria baraen douk nyakri namudok, ‘Aria anan arman nurao onok armatok aria okwok mare kwubuki enesh batowish, aria anan nugokuk um, ananin wanin ta nukwaur. Anan nukwaur um wata shubuki batowish um shubuh ashuken-umanig nuwag.’

<sup>29</sup> Aria anob nyutob, 7-poreim nugamim douk atish amakenyish shomubuki iri hape. Aria ashuken narao onok armatok aria batowish madae nubuki enesh uwe aria nagok. <sup>30</sup> Aria douk ashuken nagokuk aria netemoni agab iri nukwaur. Anan nakwaur aria namudok atin. Batowish madae nubuki enesh uwe aria nagok. <sup>31</sup> Douk anan nagokuk aria netemoni agab anudok iri nakwaur. Aria namudok atin. Batowish madae nubuki enesh uwe aria shopunek nagok.



Douk namudok aria amudok 7-poreim nugamim ihim-morim harao okwudok armatok aria batowish madae anan nubuki enen uwe. Aria amam shopunek hagok hatuh. <sup>32</sup> Aria okwok shopunek kwagok kwagiguk. <sup>33</sup> Douk namudok aria abudok nyutob shagok iri wata shukitak um, okwudok armatok ta kwukitaki aria kwupe um meini? Nyak nyadukemesh, sagomatin ihim-morim amudok 7-poreim douk haraok iri atom.”

<sup>34</sup> Aria Jisas nakripam nakri, “Douk abudok nyutob, armam armago apa shanaraum. <sup>35</sup> Aria eshudok arpeshe douk Iruhin nakri wosik um wata shukitak iri wonugwegwiruh aria shunak shupe iruhw heven abom iri ta mare shunaraum atin uwe, uwok. <sup>36</sup> Eshesh ta shupe kabi douk ananish enselahos um aria ta mare shugok uwe, uwok. Eshesh shape Iruhin ananish batowish. Um maresh? Anan douk wata neshuhur shakitak iri. <sup>37</sup> Aria Moses douk neyabigap adur atin um shagok iri ta wata shukitak um. Enyudok baraen seiwok Moses nenyem Iruhin ananik Buk iri um agundok nyih hanuwi enen shokwinyi rowog iri um douk nahwar Debeini nakri, ‘Debeini anan douk Abraham nani Aisak iri Jekop amamin Iruhin.’ <sup>38</sup> Douk namudok aria enyudok baraen douk nyakri anudok Iruhin anan douk madae shagok iri esheshin Iruhin uwe, uwok. Anan douk shape iri esheshin Iruhin. Anan natrish um, anan douk nakri eshesh ihishmorim douk shape iri atish.”

<sup>39</sup> Aria amudok anam douk henek skulumesh um Iruhin ananin lo hawana-man baraen Jisas hakri, “Tisa, nyak nyabeimom baraen wosik abom.” <sup>40</sup> Aria amam hanogugur um horigan um enen shopunek baraen.

*Jisas Narigesh Um Kraiss Douk Omi Anan Barhonin*  
(Matyu 22:41-46; Mak 12:35-37)

<sup>41</sup> Arigaha aria Jisas nakripam nakri, “Aria arpeshe apa shakri Devit ananin barhonin ta nutogur Kraiss, douk Iruhin nagraehan neshopokan nanakumori nunarao arpeshe iri um maresh? <sup>42-43</sup> Iruhin ananik Buk douk shahwarok um Sam iri, Devit kanak douk nowem

baraen nyetem namudok nakri, ‘Debeini nakrip eikin Debeini nakri, “Nyak nyupe agundok eiken yopunyi rogur ehah arigaha ibo nyakim horim hubuhuk.”’ <sup>44</sup> Aria tik. Devit kanak douk nahwar anudok arman Kraiss ananin Debeini. Douk namudok aria Kraiss ta wata nutogur Devit ananin barhonin mumam?”

*Henek Skulumesh Um Lo Iri Henekheh Iri Yoweihhi Aih*  
(Matyu 23:1-36; Mak 12:38-40; Luk 11:37-54)

<sup>45</sup> Aria ihishmorim arpeshe wata shape shemnek Jisas um agundok neyagwreh um. Aria anan nakrip ananim disaipel nakri, <sup>46</sup> “Ipak gamo pudukemesh um ipak mare pugipesh amudok henek skulumesh um lo iri amamih yoweihhi aih. Amam hanadudareh abom um hakri hupe um hure rouhi atih rupeh aria hupe hurahaen um arpeshe shutrum aria shukri amam yopumi debeimi armam. Aria shopunek, hakri hurahaen hunak agundok arpeshe apa shantorom shapeum, um shutrum aria shunekumam yopihi nyumnah. Aria hanak eshesh Juda shape sheneyagwreh baraen-ogwi urusag um, amam hakri hunak hupe shakus sharik iri wagiturahos abudok nyutob shenek lotu obi nyutob. Aria shenek debeguni worigun um, amam hakri hunak hupe shakus sharik iri wagiturahos. <sup>47</sup> Aria amam apa hanak hawish armam hagok hawosopuk iri armago owowig urusag aria hatru honahur owowish eshudok eneshenesh. Aria henek beten harig Iruhin um, amam henek rourouni rohwin beten um arpeshe shutrum. Aria kweipon Iruhin ta nuwanamam amamish yoweishi inahos aria ta nunekam humnek debeiri eriger.”

## 21

*Nyaruk Armatok Kwonek Ofa Utabor Kwoko Iruhin*

<sup>1</sup> Douk Jisas napuhur natrish aria natik arpeshe douk shanabuk sabaishi eshudok iri shape shenek ofa. Eshesh shakwutu utabor babuh bogis sakus numun Iruhin ananik debeiti urupat iri. <sup>2</sup> Aria anan

natik onok utabor wokok iri armatok douk anan nagok nakusopuk iri. Okwok um kwanaki aria kwenek ofa kwakwutu biyabor shokubori utabor babuh asudok bokis. <sup>3</sup> Aria Jisas natruk namudok aria nakri, “Adur atin, eik yakripep. Okwudok anan nagok nakusopuk iri douk utabor wokok abom. Aria okwok kwanaki kwakwutu sabaibori utabor kweshagrakuk eshudok ihishmorim. <sup>4</sup> Eshudok ihishmorim arpes, douk sabaibori utabor bakusumeshuk aria sharauri karowibor meyoh shanaki shenek ofa. Aria okwudok armatok utabor wokok abom. Aria karowibor okwok kwaborabuk um kunator eshudok um douk kwanaki kwonek ofa kweyatabor kwoko Iruhin.”

*Jisas Nakri um Ta Kupaishi Shunaki Shununu Iruhin Ananit Debeiti Urupat Um (Matyu 24:1-2; Mak 13:1-2)*

<sup>5</sup> Abudok atub nyutob anam Jisas ananim disaipel hatik Iruhin ananit debeiti urupat aria hape heneyagwreh hakri, “Atudok urupat douk yoputi abom. Atat douk shakwu yopubori atubor utabor sharukat. Aria shopunek, shagino-hwat shakwu yopiyopishi eshudok douk arpes shanaki shape shako Iruhin um.”

Aria Jisas nemnekam aria nakri, <sup>6</sup> “Ihishmorim eshudok douk ipak patrish iri, anob nyutob ta mare wata anam utom mutem dodog kupaimi kabi douk patrabor um, uwok. Ihibormorim ta bututu bubuh bukus amnab atugun.”

*Jisas Nakri Enenyenen Amaen Ta Nyutogur (Matyu 24:3-14; Mak 13:3-13)*

<sup>7</sup> Aria amam harigan hakri, “Tisa, ta meibi nyutob enyudok nyak nyakriyen iri nyutogur? Aria ta mares shurik shutogurum mutrish aria mudukemesh um enyudok amaen douk ta hurukatin um nyutogur?”

<sup>8</sup> Aria Jisas nakri, “Ipak gamo pudukemesh um. Mare anam armam hunaki hunek rohwmep aria hunekep pugipesh amamin baraen uwe, uwok. Sabaimi armam ta hunaki kupakupaibi nyutob hukripep um eikin nyeigur hukri namudok. Anan ta nunaki nukripep um eikin nyeigur nukri, ‘Eik Kraish

douk Iruhin nagraehe aria neshopoke yanaki iri.’ Aria anam ta hukripep hukri nyutob douk hurukatin um butogur. Aria ipak mare pumnek amamin baraen aria punak pugipesham uwe, uwok. <sup>9</sup> Ipak ta pumnek baraen um wanohw hwutogur kupairubi rougunirub warub um, o shupe shunotutukam shurpak um agundok shukri uwok um debeimi hupe esheshim debeimi um, ipak pumnek aria mare punogugur uwe, uwok. Eshudok ta shurik shutogur. Aria hugiguk iri nyumnah ta mare arigas hutogur.”

<sup>10</sup> Aria Jisas apa nakri, “Anag nahobig ta shukitak shuni kupaigi nahobig shurpak. Anan king nini ananish arpes ta shukitak shuni kupaini king nini ananishi shurpak. <sup>11</sup> Debeikwi enyik ta kwutuk. Aria ta eshesh nyurub besh abom. Aria yoweishi eshudok ta shutogur shunek eneshenesh yoweishi eshudok shubo arpes. Eshesh ta shutogur kupakupairubi warub. Aria ipak ta putik enesh kupaishi abom eshudok shutogur iruhw utag aria ta punogugur.

<sup>12</sup> “Aria abudok nyutob eshudok mare arigas shutogur obi nyutob, kupaishi arpes ta shurik shunaki shusuwep shunekep enenyenen. Eshesh ta shuraep piyotum kwotog numun eshesh Juda shape sheneyagwreh baraen-ogwi urusag aria ta shuweshikep punak pupe shunuweshik-ati urupat. Aria eshesh ta shishapokep punak piyotu agundok amam king huni debeimi gavman iri hapeum. Eshesh ta shunekep namudok um mares, ipak douk pagipesh eik aria pakripesh eikin baraen. <sup>13</sup> Aria abudok nyutob eshesh shunekep namudok um, abudok douk yopubi nyutob um pukripesh eikin yopinyi baraen um. <sup>14</sup> Douk namudok aria ipak mare punogugur pukri ta pubeimesh maren esheshin baraen uwe, uwok. <sup>15</sup> Um mares, eik kanak ta itaurumep ikep baraen douk ta ipak piyagwrehen iri nyuni yopunyi saki. Aria ipakim horim ta shubirak um mare shukenyuk agabus enyudok eikin baraen douk yakripepen iri nyubuhuk uwe, uwok. <sup>16</sup> Ipakish amakenyish o ashukenyish iri owashish

atus awiros um o enesh ipakishi arpesht ta shiyabig ipakish horik horin um agundok ipak pape um aria ta shunak shusuwep shuraep shunak shunek kwotumep. Aria anep ta shep abom pugok. <sup>17</sup> Ihishmorim arpesht ta shukri wokumep abom aria shukepuk agabus. Um maresh, ipak douk eikish abom arpesht douk pagipesh eik iri. <sup>18</sup> Aria Iruhin ta nutaurumep pupe wosik aria ta mare anabur atubur ehibur batogur ipakigos baragos iri ta bunak buwishuk uwe, uwok. <sup>19</sup> Aria douk ipak pugipesh eikin baraen aria piyotu dodog um, ipak ta pupe wosik ihih nyumneh.”

*Jisas Nakri um Ta Shuwor Debeiburi Wabur Jerusalem Um*

*(Matyu 24:15-21; Mak 13:14-19)*

<sup>20</sup> Aria Jisas apa nakripam baraen, “Aria abudok nyutob putik amam ami hunaki hiyotu hiyorhurih abrudok wabur Jerusalem obi nyutob, ipak ta pudukemesh pukri nyutob douk hurukatin um butogur. <sup>21</sup> Umum maresh? Abudok nyutob arpesht shape shokugi nahobig Judia iri ta shuruwok shunak yadururuh shunak shupeik. Aria eshudok douk shape numun Jerusalem iri ta shukutuburuk. Aria eshudok douk shapeiri kupairubi warub bape hurukatin um Jerusalem iri mare wata shunaki shuwish Jerusalem uwe, uwok. <sup>22</sup> Abudok douk Iruhin ananib nyutob um nuwanamesh yoweishi inahos eshudok arpesht douk shapeum shenek eneshenesh yoweishi inahos iri. Enyudok ta nyutogrum nyunek ihinyumorim baraen nyetem Iruhin ananik Buk iri douk nyakrium enyudok ta nyutogur um Jerusalem iri nyutogur adurin atin. <sup>23</sup> Aria gihaum wanarahaen iri armago uni oudok douk wasuhw batowish douk watak shawok nyumeb um ehudok nyumneh iri. Debeinyi abom amaen ta nyutogur abudok amnab. Iruhin ta juwehosin abom aria ta nunekumesh debeiti kwot abom eshesh Israel. <sup>24</sup> Enesh ta shutupokesh bainatog aria enesh ta shuweshikesh shunak um ihigosmorim nahobigos. Aria eshudok arpesht douk madae Juda iri uwe ta shishishobur shupe

debeishi um abrudok wabur Jerusalem. Eshesh ta shupe um arigaha esheshib nyutob Iruhin nagraehab-umesh um shupe debeishi bunak butuh.”

*Debeinyi Amaen Nyutogur Nyunakuk Aria Eik Anudok Arman Douk Yatogur Adurinyi Arpen Iri Ta Kadak Itogur (Matyu 24:29-31; Mak 13:24-27)*

<sup>25</sup> Aria Jisas apa nakripesh baraen nakri, “Enenyenen ta nyutogur um wabin nini nyumnahin aub aria unib. Ihishmorim arpesht shape abudok amnab iri ta shumnek um agundok youg aria debeibi morub batu um. Aria eshesh ta shunogugur abom aria esheshiruh aparuh ta yoweruh. <sup>26</sup> Sabaishi arpesht ta shutik enyudok douk nyakri nyutogur um abudok amnab iri aria eshesh ta shunogugur abom. Aria eshesh ta marubigos sesh aria shutu shubuh shukus atap kabi douk shagok iri shabuh shakus um. Um maresh? Eneshenesh shape iruhw utag iri shuni aub aria unib ta grurugwresh aria shunatuk shubuhi.

<sup>27</sup> “Aria abudok nyutob ta douk kadak shutik eik Anudok Arman douk yatogur adurinyi arpen iri irari onog orug inaki. Eik ta itrugun abom aria dodogoiwe atuwe inaki.

<sup>28</sup> “Aria eshudok shupe shutogur obi, ipak pikitak piyotu aria pupuhur putrugun. Um maresh? Abudok nyutob Iruhin nakri wata nutrip aria nukwashihupum yoweishi inahos ipak pape penekesh iri aria nuraep putanamori pupe wosik um douk banaki hurukatin.”

*Jisas Nakripesh Wobuwobren Baraen Um Rowog Nyeigurin Um Fik Iri Um Shutrin Aria Shudukem Nyutob*

*(Matyu 24:32-35; Mak 13:38-41)*

<sup>29</sup> Aria Jisas nakripesh enyudok wobuwobren baraen nakri, “Ipak punek urkum um enyudok rowog nyeigurinyum fik nyuni kupaigosi rowos. <sup>30</sup> Abudok nyutob putik um agagas supe sunareh obi, ipak ta pudukemesh pukri wah hutao obi nyutob douk hurukatinyum butogur. <sup>31</sup> Aria douk ta namudok atin. Abudok nyutob ipak putik enyudok ihinyumorim amaen douk iganigadae yakriepumen iri nyupe

nyutogur um, ipak ta pudukemesh um abudok yopubi nyutob arpes shuwish agundok Iruhin ta nupe Debeini um ipak ananish arpes um douk hurukatin um butogur.

<sup>32</sup> “Aria adur atin eik yakripep. Doukishi arpes ta mare arigas shugok shutuh aria enyudok ihinyumorim amaen douk eik yakripepumen iri ta nyutogur. <sup>33</sup> Ihishmorim eshudok shape iruhw utag iri shuni ihishmorim shape abudok amnab iri shuni amnab shopunek ta brukwuresh shunak shuwishuk abom. Aria eikin baraen ta nyupe abom ihih nyumneh.”

*Jisas Nakrip Ananim Disaipel Um Hupe Hutrugun Abom Um Ahudok Nyumnah Hutogrum*

<sup>34</sup> Aria Jisas apa nakripam baraen nakri, “Ipak ta gamo pudukemesh. Ta wosik atin ipak pupe um puwok sabai-guni atugun worigun o puwok dodogow-ibari abar pugugak aria pupe um punek nyigiya um eneshenesh agundok atapishi atish um. Aria ipak pupe um punek enyudokmori atin um, ahudok eik itanamori ahi nyumnah ta hutogrumep ahudok atuh kabi enen mahin madae nyudukemesh uwe aria ahudok atuh nyeir maduhw aria roguh shakitak yowiyokuk um. <sup>35</sup> Umum maresh? Ahudok nyumnah ta hutogrum ihishmorim arpes shape abudok amnab iri. <sup>36</sup> Namudok aria ihih ipak ta gamo punatrugun aria pupe. Ipak punek beten porik Iruhin ihih nyumneh um nutaurumep aria abudok yoweibi nyutob bukri butogur um, ipak wosik ta piyotu dodogowip arigaha punak putogur piyotu agundok eik Anudok Arman douk yatogur adurinyi arpen iri itogur ipeum.”

<sup>37</sup> Aria ehudok nyumneh Jisas nape numun narub Iruhin ananit debeiti urupata tataoum aria nape nenek skulumesh ananin baraen. Aria weibus obi, anan apa natoum Olivihw yaduhw aria nanak neshuh agundok. <sup>38</sup> Aria ihishmorim arpes apa shakitak ruwahegwis atus shanak um Iruhin ananit debeiti urupata tataoum um shumnek ananin baraen.

## 22

*Judas Nani Debeimi Habo Baraen Um Niyabigam Jisas Hunak Husuwan Um*  
(Matyu 26:1-5, 14-16; Mak 14:1-2, 10-11; Jon 11:45-53)

<sup>1</sup> Ahudok nyumnah eshesh Juda shenek agundok debeiguni Pasovai-gun<sup>22:1</sup>worigun douk shawok bret shashaiteh madae tukitak debeiti iri uwe douk hanaki hurukatin. <sup>2</sup> Aria amam debeimi pris hani amam douk henek skulumesh um lo iri hape haurim anah yah um hakri hubo Jisas nugok um. Um maresh? Amam hanogugur um hakri ta huneken yopugunum aria armam armago ta shom.

<sup>3</sup> Aria Satan nawish Judas Iskariot. Anan douk anan um amudok Jisas ananim 12-poreim disaipel. <sup>4</sup> Douk Satan nawishan aria nanak nani amam debeimi pris hani amam heyoh Iruhin ananit debeiti urupat iri amamim debeimi heyagwreh um huweshik Jisas um. Aria anan nakripam nakri wosik um niyabigam um Jisas nanak napeum aria amam hunak husuwan. <sup>5</sup> Aria douk hemnek namudok aria amam hanadudareh hariguk abom. Aria amam habo baraen um hakri ta hukon anabor utabor. <sup>6</sup> Aria Judas nakri wosik um hukon anabor utabor um aria anan nape natrugun um anab yopubi nyutob um niyabigam Jisas hunak husuwan um. Anan nape natrugun um nakri nutik mare enesh arpes shuni anan shupe aria anan nunak nukripam hunaki husuwan huran hunak.

*Biom Jisas Ananin Disaipel Henek Redium Pasovaigun Worigun*

(Matyu 26:17-25; Mak 14:12-21; Jon 13:21-30)

<sup>7</sup> Arigaha aria ahudok nyumnah hanak hatograri um shuwok bret douk shushaiteh madae tukitak debeiti iri uwe. Aria ahudok nyumnah, eshesh apa shabo nugaesh sipsipahos um shishoh abudok nyutob shunek agundok debeiguni Pasovaigun worigun um. <sup>8</sup> Aria Jisas nakrip Pita aria Jon um enyudok baraen aria neshopokam hanak. Nakri, “Ipak punak aria punek redium agundok

Pasovaigun worigun um apak mugnoh iri.”

<sup>9</sup> Aria amam wata harigan hakri, “Nyak nyakri unak unek redimagun agnum?”

<sup>10</sup> Aria anan nakripam nakri, “Ipak mnek! Ipak ta punak puwish atin wabur aria anan arman nasahi anap abar barop iri marup iri ta nuparugep. Aria pugipeshan punak puwish atudok urupat anan nunak nuwishat iri. <sup>11</sup> Ipak puwish aria pukrip atudok urupatin yaken pukri, ‘Apakin Debeini Tisa nakri amudok rum douk arpesh shape shashoh omi douk ta anan nini apak ananim disaipel muwok Pasovaigun worigun um douk agunum?’

<sup>12</sup> Aria anan ta niyabigep anam debeimi iruhim rum douk eshudok shape shawok woriguneshi shakusomi. Aria ipak puto pukih pupe punek redimap um worigun.”

<sup>13</sup> Aria douk hanak aria hatik um enyudok nyatogur kabi douk iganigadae Jisas nakripam um. Aria amam henek redium Pasovaigun worigun.

*Jisas Nakom Bret Aria Wainibar Abar Ananim Disaipel Hashoh*

*(Matyu 26:26-30; Mak 14:22-26; 1Kor 11:23-25)*

<sup>14</sup> Douk arigaha abudok nyutob um huwok worigun obi nyutob batogur, aria Jisas nani ananim aposel hanaki hape heyorharieh tebol.

<sup>15</sup> Amam hape aria anan nakripam nakri, “Eik oub bakitak abom um ini ipak muwok agundok Pasovaigun worigun iyoh, aria kadak irao debeiri eriger.

<sup>16</sup> Adur atin eik yakripep. Eik ta mare wata iwok anagun agundokmori Pasovaigun worigun, uwok. Eik ta ipe namudok arigaha wata ini ipak muwok adurigun Pasovaigun worigun abrudok wabur Iruhin nape Debeini um ananish arpesh shapeum.”

<sup>17</sup> Aria Jisas nohuri anap kap wain abar borap iri nenek beten nenek tenkyu um Iruhin aria nakripam nakri, “Suwap kap aria ipak ihipmorim punosiyabor. <sup>18</sup> Eik yakripep, douk arigaha kweipon, eik ta mare iwok anabar abrudokmori wainibar abar, uwok. Eik ta ipe namudok arigaha abudok nyutob um arpesh shuwish um

agundok Iruhin nupe Debeini um ananish arpesh um butogur.”

<sup>19</sup> Aria wata nohuri bret nenek beten nenek tenkyu um Iruhin aria naworut nako amam. Aria nakripam nakri, “Atudok bret douk eikihw yegenyihw. Eik yekepohw um itaurumep. Aria ipak pupe punekesh namudok um ipak urkwip wata purum eik.”

<sup>20</sup> Aria douk amam hawok bret heyatat aria wata nenekesh namudok atin. Anan nohuri kap wainibar abar boropi nako amam aria nakripam nakri, “Abrudok wainibar abar douk eikibor owishibor douk ta butourak butaurum ipak arpesh iri. Abrudok owishibor douk benek enyudok Iruhin ananin namunyi adurin atinyi baraen kontrak nyutogur dodogowin. <sup>21</sup> Aria anudok arman douk ta niyabig eikim horim aria shusuhwe shurao eik iri douk anudok nani eik wape wawok worigun enyudok tebol. <sup>22</sup> Eik Anudok Arman douk yatogur adurinyi arpen iri ta she igok kabi douk seiwok Iruhin nakri um ta shenekesh um. Aria anudok douk niyabig eikim horim um eik iri, anan douk yakri giha abom um anan. Um maresh? Anan ta debeinyi amaen abom ta nyutogur-uman.”

<sup>23</sup> Aria douk Jisas nakripam namudok aria amam hape harigan um ta amiapen nyunek enyudok.

*Amam Disaipel Hanagaganim Baraen Um Amiapen Ta Nyupe Debeini Um Amam*

<sup>24</sup> Aria amam disaipel hohur enen baraen aria hape hanagaganim um hakri amam kanak ta meini abom nupe amamin debeini. <sup>25</sup> Aria Jisas nakripam nakri, “Amam king hape abudok amnab iri douk dodogowim atum abom hapeum arpesh shunek enesh eshudok eneshenesh aria eshesh apa shemnek amamim baraen aria shenekesh. Aria amudok douk hape esheshim debeimi iri, arpesh apa shahwaram shakri yopumi hataurumesh iri. <sup>26</sup> Aria ipak mare punekesh namudok, uwok. Ipak meinari arman nukri niyotu nurikumep iri, anan ta nupe abom kabi douk anan nyeigur wokan iri nenek mour meyoh um kupaishi iri um. <sup>27</sup> Ipak pakri

meinari arman douk nape debeini um ipak ihipmorim? Anudok douk nape tebol nawok worigun iri o, anudok douk noruhuman worigun iri? Adur, debeini douk anudok nape tebol nawok worigun iri. Aria eik douk yani ipak mape aria yenekesh kabi douk anudok noruhuman worigun iri aria yenek mour um yataurum ipak. <sup>28</sup> Aria abudok nyutob amaen nyutogur nyukwiraeh obi, ipak douk pani eik pape aria madae pukutukuk eik uwe. <sup>29</sup> Aria eikin Yain douk neke big um ipe debeiwe iri um arpesh. Aria douk namudok atin. Eik douk ikep big um ipak pupe debeipi pusuhw merik um enesh arpesh. <sup>30</sup> Eik douk yenekep namudok um puni eik mupe eikin tebol muwok worigun iri abar agundok eikish arpesh shapeum. Aria ipak ta putem yopishi wagiturahos douk amam king atum hapenyesh iri. Aria ipak ta pupe debeipari pusuhw kwotog um asudok 12-poreis awiros um eshesh Israel.”

*Jisas Nakri Pita Ta Nukri Anan Madae Nudukem Jisas Uwe, Uwok*  
(Matyu 26:31-35; Mak 14:27-31; Jon 13:36-38)

<sup>31</sup> Aria Jisas nakri, “Saimon, Saimon! Nyak mnek! Iruhin nakripan wosik Sattan um nukwiraeh ipak ihishmorim um punosiam um pukutukuk bilip kabi douk sheyogomuk ouguhith wit um. <sup>32</sup> Aria Saimon, eik yenek beten yarig Iruhin um nataurumen um mare nyukutukuk nyakin bilip um eik, uwok. Aria abudok nyutob nyutanam nyugipesh eik obi, nyak wata nyutaurum nyakim ashukenyim owarhim douk hagipesh eik iri um hiyotu dodog.”

<sup>33</sup> Aria Pita wata nakrip Jisas nakri, “Debeini, eik yenek redi um ini nyak unuweshik aria shopunek yakri um ini nyak ugot atin.”

<sup>34</sup> Aria Jisas nakripam nakri, “Pita, kwehigib wab, owot ta madae arigas tiyagwreh aria nyak ta nyunekuk rohwi biyeh atih nyukri nyak madae nyudukem eik uwe.”

*Jisas Nakrip Ananim Um Husuhw Banagos Suni Bainatog Aria Paus Um Ta Hanaruk Utabor Um*

<sup>35</sup> Aria Jisas wata nakripam nakri, “Riguk eik yeshopokep panak penek mour um, ipak madae punasuhw banagos aria su uni paus panaruk utabor um uwe. Aria abudok nyutob ipak panak meyoh um, ipak eneshenesh wokep aka, uwok?”

Aria amam hakripan hakri, “Uwok, apak madae eneshenesh wokap uwe, uwok.”

<sup>36</sup> Aria anan nakripam nakri, “Aria douk, anudok douk nanoruk anabor utabor anas paus iri o nanabuk anag banag iri ta nunasuwesh. Aria meinyi arpen douk bainat wokeni ta nyenek salim enyenyit saket aria nyutor anat bainat.

<sup>37</sup> “Um maresh? Baraen douk shenyem nyakrium eik iri nyetem Iruhin ananik Buk iri ta nyutogur adurin. Baraen enyudok, ‘Anan douk shakwrupan morim yowemi henek yoweishi inahos iri.’ Adur, enyudok baraen douk nyakrium eik um douk nyape nyatogur adurin.”

<sup>38</sup> Aria amam disaipel hakripan hakri, “Debeini, tik. Apak douk masuhw biyog bainatog.”

Aria anan nakripam nakri, “Jurug.”

*Jisas Nakih Nenek Beten Olivihw Yoduhw*  
(Matyu 26:36-46; Mak 14:32-42)

<sup>39</sup> Aria Jisas nakutukuk Jerusalem natogur natoum yoduhw Oliv kabi douk ihih nyumneh anan nape nanak um. Aria ananim disaipel hagipeshan hanak. <sup>40</sup> Aria douk anan nanak natogur aria nakripam, “Ipak ta punek beten um abudok nyutob kwiraeh nyutogur-umep um, ipak mare punek yoweishi inahos.”

<sup>41</sup> Douk nakripamuk namudok aria nanaku rougun shopunek. Rougun um douk kabi arpesh shawashak anam utom manak mabuh um. Douk nanak aria nabuh noduk ohrubus nape nenek beten nakri, <sup>42</sup> “Yain, ta nyukri wosik um, nyak nyukutuk enyudok amaen ta nyutogrome iri. Aria eik yakri uwok um nyugipesh eikim urkum, uwok. Nyak nyugipesh

nyakim atum urkum.”<sup>43</sup> [Aria enen en-sel nyape iri iruhw heven nyabuh nyatogruman aria nyatauruman nyenekan dodogowin.<sup>44</sup> Aria ananin mishin yowen abom aria natogur dodogowin nape nenek beten kabi iganigadae narik nenekan um. Aria kihakwuh nyatogur kabi douk owishibor bakih babuh bagruk atap um.]

<sup>45</sup> Douk nenek beten jurug aria nakitak nanak um nutik ananim disaipel. Aria nanaku, aria anan natrum um amam heshuh hagok. Amamish mishish yowesh abom um enyudok douk ta nyutogur iri aria amam madae dodogowim uwe aria heshuh.<sup>46</sup> Aria anan nanak narigam nakri, “Ipak peshuh um maresh? Kakitak aria punek beten um abudok nyutob kwiraeh nyutogurumep um, aria ipak mare punek yoweishi inahos.”

*Judas Nariki Um Jisas Ananim Horim Hanaki Hasuhw Jisas Haran Hanak*

*(Matyu 26:47-56; Mak 14:43-50; Jon 18:3-11)*

<sup>47</sup> Aria douk Jisas wata nape neyagwreh atin aria Judas anan um amudok 12-poreim disaipel nariki um sabaimi armam hanak hatograri. Aria Judas nanaki hurukatin um Jisas um nakri nunop-uprikan.<sup>48</sup> Aria Jisas nakripan, “Judas, douk nyak nyiyabigesh eik Anudok Arman douk yatogur adurinyi arpen iri um eikish horim um agundok nyanaki nyanaprike um, aka?”

<sup>49</sup> Aria Jisas ananim disaipel douk hani anan heyotu iri hatik um enyudok douk Jisas ananim horim hakri hunekenyuman iri aria amam harigan hakri, “Debeini, nyak nyakri maresh? Apak mukwumam apakig bainatog aka?”

<sup>50</sup> Aria anan um amam disaipel natupak anan nenek mour um debeini pris iri ananah anagagrih atah abom aria tukarah.

<sup>51</sup> Aria Jisas nakri, “Jurugih ehudokmori aih.”

Aria nasuhw anudok arman ananah atah neshopoh hape agundok hatakum aria ahah wata yopuh.

<sup>52</sup> Aria Jisas narig amam debeimi pris hani amam heyoh Iruhin ananit debeiti urupat iri um amamim debeimi hani eshesh Juda esheshim debeimi douk hanakumori husuwan huran hunak iri. Anan narigam nakri, “Ipak pakri eik anan yoweini arman douk yenek onohw wanohw iri o, yakwuaruh iri um pasuhwi bainatog aria rowos um punaki purae um?”<sup>53</sup> Ihih nyumneh eik yani ipak mape numun narub Iruhin ananit debeiti urupat tataoum aria ipak madae pukri um puweme ipakis wis ba pusuwe uwe. Aria abudok nyutob douk ipakib nyutob abom um Satan nape arukwutigun atin aria dodogowin atun um nubo eik ibuhuk um.”

*Pita Nakri, “Eik Madae Idukem Jisas Uwe”*

*(Matyu 26:57-58, 69-75; Mak 14:53-54, 66-72; Jon 18:12-18, 25-27)*

<sup>54</sup> Douk Jisas neyagwreh um jurug aria hasuwan haran hanak hawish debeini abom pris ananit urupat. Aria Pita nagiguk atin nape nagipesham nanak.<sup>55</sup> Aria agundok iganigadae armam hautig nyih orokohunirub um narub douk shenekarub sheyorsharih abom debeini pris ananit urupat tataoum. Aria amam hanak hapeum nyih hape atugun aria Pita shopunek nanak napeimeh.

<sup>56</sup> Aria onok kwenek mour agundok iri kwanaki kwatrun napeum nyih aria kwatrun wosik aria kwakri, “Anudok arman shopunek douk nani Jisas iri.”

<sup>57</sup> Aria Pita nenek rohwa nakri, “Eik madae idukeman uwe Jisas.”

<sup>58</sup> Aria douk shapeigu madae roubi uwe aria anan arman wata natrun aria nakri, “Nyak shopunek douk nyeir Jisas ananim iri.” Aria Pita nakripan, “Adur, eik uwok!”

<sup>59</sup> Aria shape arigaha roubi nyutob hurukatin um atin aua nyanakuk, aria kupaini neyagwrehi debeg nakri, “Adur atin. Anudok arman douk nani Jisas iri. Um maresh? Anan shopunek douk nape iri shokugi nahobig Galili iri.”

<sup>60</sup> Aria Pita nakri, “Nya, baraen nyak nyeyagwrehen iri, eik madae idukemen uwe.”

Aria Pita wata nape neyagwreh atin aria owot teyagwreh. <sup>61</sup> Aria douk owot teyagwreh aria Debeini natanam natruni wosik Pita. Aria Pita wata urkum morum enyudok baraen nabatik Debeini nakripan-enyi. Baraen enyudok, "Owot ta madae arigas tiyagwreh aria nyak ta nyunek roh w biyeh atih nyukri, nyak madae nyudukem eik uwe." <sup>62</sup> Aria Pita urkum morum enyudok baraen aria natogur aduk aria nareh yowiyokuk abom.

*Amam Soldia Henekan Enenyenen Jisas Aria Han*  
(Matyu 26:67-68; Mak 14:65)

<sup>63</sup> Aria amudok douk heyotu heyoh Jisas iri henekan enenyenen heyokasan aria han. <sup>64</sup> Aria amam howeshik ananis nabes anap rupahip aria harigan hakri, "Nyak kripap kabi amam profet um, douk amiapen nyaen?" <sup>65</sup> Aria amam habubuniman aria hape heyokasan um sabainyi enenyenen yoweinyi baraen shopunek.

*Amam Harao Jisas Um Eshesh Juda Esheshim Debeimi Kansol Um Humnek Ananin Baraen*  
(Matyu 26:59-66; Mak 14:55-64; Jon 18:19-24)

<sup>66</sup> Douk gagruk aria eshesh Juda esheshim debeimi hani debeimi pris hani amudok henek skulumesh um lo iri hanaki hape atugun. Aria amam harauri Jisas hanaki agundok amam hapeum. <sup>67</sup> Aria amam harigan hakri, "Nyak kripap anudok arman Krai douk. Iruhin nakri um nugraehan neshopokan nunakumori nunarao arpesih iri douk nyak?"

Aria anan nakripam, "Aria ta ikripep um, ipak ta mare punek bilip um eikin baraen. <sup>68</sup> Aria ta eik iyorigep enen baraen akure, ipak ta mare pubeyenyume. <sup>69</sup> Aria douk arigaha kweipon, eik Anudok Arman douk yatogur adurinyi arpen iri ta ipe yopunyi rogur ehahum dodogowin atun abom iri Iruhin"

<sup>70</sup> Aria ihm-morim harigan hakri, "Namudok aria nyak douk Iruhin ananin adurini Nuganin?"

Aria anan nakripam nakri, "Ipak pakri adur. Eik douk kabi ipak pakri um."

<sup>71</sup> Aria amam hakri, "Apak mare wata murim enen shopunek baraen. Baraen douk enyudok memneken anan kanak nakriyen."

## 23

*Debeimi Henek Kwot Um Jisas Um Pailat Douk Nape Debeini Gavman Um Judia Iri*

(Matyu 27:1-2, 11-14; Mak 15:1-5; Jon 18:28-38)

<sup>1</sup> Douk amam hemnek Jisas ananin baraen um jurug aria amam ihm-morim hakitak haran hanakum Pailat douk nape debeini gavman iri. <sup>2</sup> Aria hanak hape henek roh w henekuman baraen hakri anan nohur arpesih um shuni gavman shurpak. Aria shopunek hakri, anan nakri eshesh mare shunek takis uwe um debeini gavman iri Sisar. Aria shopunek hakri, anan nakri anan douk Krai, anan king douk Iruhin nagraehan neshopokan nanakumori nunarao arpesih iri.

<sup>3</sup> Aria Pailat narigan nakri, "Nyak douk eshesh Juda esheshin king?"

Aria Jisas nakripan nakri, "Adur, eik douk kabi nyak nyakrium."

<sup>4</sup> Aria Pailat wata nakrip amam debeimi pris hani eshudok sabaishi arpesih nakri, "Eik madae iparug enesh yoweishi inahos anan nenekesh iri uwe."

<sup>5</sup> Aria amam dodogowim atum hakri, "Anan nenek skulumesh um enen baraen eshesh armam armago aria nohur esheshiruh aparuh um shuni gavman shurpak. Enyudok douk nenyuhuri shokugi nahobig Galili aria nanak ihrub warub apak Israel apakirub. Aria douk enyudok nyanak nyatograri agundok."

<sup>6</sup> Aria Pailat nemnek enyudok baraen aria narigesh nakri, "Anudok arman Jisas anan douk anan um eshesh Galili?"

<sup>7</sup> Aria douk Pailat nemnek um shakri Jisas anan douk nape iri shokugi nahobig Galili douk Herot nape debeini um, aria anan neshopokan nanak um Herot. Abudok nyutob Herot shopunek douk nanak nape Jerusalem.



*Herot Douk Nape Debeini Um Shokugi Nahobig Galili Iri Nemnek Jisas Ananit Kwot*

<sup>8</sup> Aria Herot douk nanadudareh abom um abudok nyutob anan natik Jisas um. Um maresh? Anan nemnek baraen um agundok shape shakriyan um aria roubum nyutob anan nape natrugun um nakri nutrun. Anan nakri nutrun um nunek enen Iruhin atun neneken iri mour. <sup>9</sup> Douk namudok aria Herot narigan sabainyi baraen Jisas. Aria Jisas madae nunogugur um nuwanaman enen baraen uwe, uwok. <sup>10</sup> Aria amam debeimi pris hani amam henek skulumesh um lo iri hanak heyotu hurukatin aria dodogowim atum hape henekuman dodogowin atin baraen. <sup>11</sup> Aria Herot nani ananim soldia hape henekan enenyenen Jisas. Amam habubuniman aria hanak hohuri anah dudukeh-ahi rupah douk debeimi atum hanawashoh iri aria hanaki haweshigah-uman. Aria wata heshopokan nanak um Pailat. <sup>12</sup> Aria riguk Herot nani Pailat apa hananem horim. Aria ahudok nyumnah Pailat neshopok Jisas nanak um Herot ahi, amam wata hanagabe um aria hape atugun.

*Pailat Nakri Hunek Nyilim Jisas Nir Rowog Kruse*

*(Matyu 27:15-26; Mak 15:6-15; Jon 18:39—19:16)*

<sup>13</sup> Aria Pailat nahwar debeimi pris hani amam debeimi um eshesh Juda iri hani eshudok sabaishi armam armago shanaki. <sup>14</sup> Aria anan nakripesh nakri, “Ipak parauri anudok arman um eik aria pakri nohur arpesh um shuni gavman shurpak. Aria douk ipak douk pape aria eik yape yarigan um enyudok baraen. Aria eik douk madae iparug yoweishi inahos anan nenekesh iri uwe. Eik yatik um enyudok ipak penek kwotuman-enyi anan douk madae nuneken uwe. <sup>15</sup> Aria Herot shopunek douk madae nuparug enesh yoweishi inahos Jisas nenekesh iri uwe. Aria anan wata neshopokan natanamori um apak. Aria mnek. Anudok arman douk madae nunek enesh yoweishi inahos um ta mon nugokumesh iri uwe, uwok. <sup>16</sup> Douk

namudok aria eik ta ikripam huprukan hukwu enesh eshudok meyoh aria wata ikweshihan nunak fri.”

<sup>17</sup> [Abudok nyutob eshesh douk shagipesh ahudok aih. Ihish kwarahos ahudok nyumnah hutogrum shunek Pasovaigun worigun um, Pailat ta nukweshih-umesh anan nonoweshik iri nutogrumeshi nupe fri.]

<sup>18</sup> Aria ihishmorim arpesh shani atuh shahwar shakri, “Buwon nugok! Aria nyukweshih-umapari Barabas!”

<sup>19</sup> Anudok arman Barabas douk nonoweshik napeum agundok nohur onohw wanohw Jerusalem nani gavman aria nabo enesh arpesh shagok um.

<sup>20</sup> Aria Pailat nakri nukweshih Jisas nunak fri aria anan wata gamo narigesh.

<sup>21</sup> Aria eshesh shahwar shakri, “Nek nyiliman rowog kruse! Nek nyiliman rowog kruse!”

<sup>22</sup> Aria Pailat wata shopunek nakripesh anah shopunek henekeh biyeh atih um nakri, “Anan nenek maresh yoweishi inahos um apak mon nugokumeshi? Eik madae iparug enesh yoweishi inahos um ta mon nugokumesh iri uwe. Douk namudok aria eik ta ikripam huprukan enesh eshudok shabo arpesh-eshi meyoh aria ikweshihan nunak.”

<sup>23</sup> Aria eshesh shape shahwar debeg abom um shakri shunek nyilim Jisas um rowog kruse aria shon nugok. Eshesh shahwar arigaha aria esheshin baraen nyabouk Pailat ananin nyabuhuk. <sup>24</sup> Namudok aria Pailat nakri wosik um shubo Jisas nugok kabi douk eshesh shakri um. <sup>25</sup> Aria nakweshih-umesh Barabas nanak fri. Anan douk nonoweshik um agundok nani gavman sharpak, aria nabo enesh arpesh shagok um. Aria douk Pailat nakweshih-umesh anudok eshesh shakri-anari nanak aria nekesh Jisas um shenekesh-uman kabi douk eshesh shakri um.

*Harao Jisas Hanak Um Hunek Nyiluman Rowog Kruse*

*(Matyu 27:32-44; Mak 15:21-32; Jon 19:17-27)*

<sup>26</sup> Douk Pailat nekesh Jisas nor esheshis wis aria amam soldia haran hanak. Amam hanak yah aria haparug Saimon

douk nanaki wabur Sairini iri nanaku-mori nuwish Jerusalem. Aria amam hasuwan howem rowog kruse anan ih ereh aria henekan nenyusah nagim Jisas.

<sup>27</sup> Aria sabaishi arpes shagipesh Jisas shanak. Ono armago shopunek wanamesh shanak aria owo wape warepan. Owo woreh wanakukuri wanaruwar abom.

<sup>28</sup> Aria Jisas natanam nakripo nakri, "Ipak armago pape Jerusalem iri, ipak mare purep eik uwe, uwok. Ipak purep ipakish batowish shuni ipak kanak. <sup>29</sup> Um maresh, nyutob ta butogur aria abudok nyutob arpes ta shukri,

'Kupaiwari armago wani oudok douk wata ubuki enesh batowish iri uwe wani oudok douk madae usuhw enesh batowish wukesh nyumeb iri uwe owo ihyumorim douk wanadudareh.'

<sup>30</sup> "Aria abudok nyutob, arpes ta shukrip yodururuh shukri, 'Kitak putukwarihi putu pushapumap.' Aria ta shukrip mihig shukri, 'Putukwarihi pubuhi pushapumap aria pubeshukap.'

<sup>31</sup> Eik douk madae inek enesh yoweishi inahos uwe, aria douk eshesh shakri shubo eik douk yape kabi naminyi rowog iri um. Aria ipak douk pape kabi yarinyi rowog iri um agundok penek yoweishi inahos um ta shenekesh-umep mumam mumam? Eshesh ta shunekumep yoweishi inahos abom."

<sup>32</sup> Aria amam soldia harao Jisas nani biom henek yoweishi inahos iri hanakum hom hugok.

<sup>33</sup> Aria eshesh shanak shatogur agundok douk nape kabi arpenyig barag um. Aria agagun douk shahwaragun, "Arpenyig Barag." Aria agundok, amam henek nyilim Jisas um rowog kruse. Aria amudok biom henek yoweishi inahos iri, anan shenek nyiluman neir wobur ehahum Jisas aria anan neir wobur ehah-uman. <sup>34</sup> Aria Jisas nakri, "Yain! Nyak mare nyusuwesh uwe eshudok yoweishi inahos eshesh shenekesh um

eik iri aria nyukweshihesh-ukuk. Eshudok shenekesh um eik iri douk madae shudukemesh uwe."

Aria amam soldia habirak satu<sup>23:34</sup>um hanasia anan ih rupeh.

<sup>35</sup> Aria arpes shoyotu shape shatrun aria eshesh Juda esheshim debeimi hape habubuniman. Aria hakri, "Anan douk nataurum kupaishi. Aria ta anan douk Kraish douk Iruhin nagraehan nanaku-mori nunarao arpes iri um, anan wata nataurum anan kanak."

<sup>36</sup> Aria amam soldia shopunek hanak hurukatin aria habubuniman aria hakon anabar nubutibari abar. <sup>37</sup> Aria hakri-pan hakri, "Aria adur nyak douk Juda esheshin king um, douk nyutaurum nyak kanak."

<sup>38</sup> Aria amam howem enen baraen aria hakih heshopen iruhw um rowog kruse Jisas neir um. Baraen enyudok,

ANUDOK ARMAN DOUK ESHESH JUDA ESHESHIN KING.

<sup>39</sup> Aria anan um amudok biom yoweimi armam douk heir wobuwobur iri, nabubunim Jisas nakri, "Nyak douk Kraish, douk Iruhin nagraehen neshopoken nyanakumori nyunarao arpes iri? Namudok um nyak nyutaurum nyak kanak aria nyutaurum ohwak shopunek!"

<sup>40</sup> Aria anudok anan neir wobur iri nahan nakri, "Apak ihishmorim douk meir otuhw maduhw. Apak douk shap um ta mugok iri atup. Aria nyak nyanogugur um Iruhin aka, uwok? <sup>41</sup> Ohwak douk wosik shaohw um ohwakish yoweishi inahos ohwak wenekesh iri. Aria anudok arman madae nunek enesh yoweishi inahos uwe, uwok."

<sup>42</sup> Aria anan nakrip Jisas nakri, "Jisas, nyak urkum mur um eik abudok nyutob nyak nyupe debeini um nyakish arpes um."

<sup>43</sup> Aria Jisas nakripan nakri, "Adur eik yakripen. Doukih nyumnah nyak ta nyuni eik upe yopuburi wabur heven."

*Jisas Nagok*

(*Matyu 27:45-56; Mak 15:33-41; Jon 19:28-30*)

<sup>23:34</sup> <sup>23:34</sup> Agudok baunag satu, agog douk eshesh Rom esheshih aih um shubirak shunek uhwin um eshudok eneshenesh um. Tik Aposel 1:26

<sup>44</sup> Douk aun nakihi arigaha 12 kilok wah madae hutao uwe aria wab babuhi. Aria ihigunmorim um eshesh Juda esheshirub warub arukwutigun tituguk. Agagun arukwutigun nape namudok arigaha wabigep 3-kilok aria wah madae hatao aria arisigun. <sup>45</sup> Aria rupah<sup>23:45</sup>douk shahaur numun Iruhin ananit debeiti urupat iri puwaroh um biyeh. <sup>46</sup> Douk enyudok nyanakuk aria Jisas nahwar debeg nakri, “Yain, eik yeken eikin mishin nyor nyakis wis.”

Douk nakriyuk namudok aria anan adur nagok.

<sup>47</sup> Aria anudok debeini soldia douk nasuhw merik um 100-poreim soldia iri natik namudok aria natuk Iruhin ananin nyeigur nyato iruhw. Aria nakri, “Adur atin. Anudok arman douk yopuni.”

<sup>48</sup> Aria ihishmorim arpesh douk shanaki um shutik enyudok iri shatik namudok aria esheshiruh aparuh yoweruh abom um shabo Jisas nagok um. Aria eshesh shohwido shanak atin atin aria shanak um esheshirub warub. <sup>49</sup> Aria sabaishi Jisas ananish um shani ono armago douk wagipeshi Jisas gani shokugi nahobig Galili wanaki iri, sheyotu madae rougun aria shape shatik enyudok douk shape sheneken um Jisas iri.

### *Sharom Jisas Um*

*(Matyu 27:57-61; Mak 15:42-47; Jon 19:38-42)*

<sup>50</sup> Aria anan arman douk shahwaran um Josep iri nape. Anan douk yopini arman. Anan douk nanaki eshesh Juda esheshibur wabur shahwarabur um Arimatea iri. Aria anan douk anan kansol douk neir eshesh Juda esheshim debeimi iri. <sup>51</sup> Aria enyudok baraen amudok debeimi heyagwrehen um hakri hubo Jisas nugok um, anan douk madae nini amam nusuwen uwe. Anan nakri uwok. Aria anan apa nape natrugun um abudok nyutob um arpesh shuwish um agundok Iruhin nupe Debeini um ananish arpesh um. <sup>52</sup> Aria anudok arman Josep nanak Pailat napeum aria narigan um nunak nubrei Jisas nunak nuruman.

<sup>53</sup> Aria douk Pailat nakri wosik aria anan nanak nabrei Jisas nabuhi atap aria neshrehan anah yopuhi shigorihihi rupah. Aria nonohur nanak nawish onohw wonugwehw douk shenekoh onok burbuduk iri aria nawish nanabukuk agundok. Ahwudok wonugwehw douk madae shurom enen nyagok iri arpen uwe, uwok. <sup>54</sup> Aria ahudok nyumnah eshesh douk shape shenek gwinygwaen um eshudok. Ahudok nyumnah Sabat hurukatin um hutogur aria eshesh mour ta uwok, shupe meyo.

<sup>55</sup> Aria armago douk wani Jisas shape iri Galili shanaki wagipesh Josep wanak aria watiguk ahwudok wonugwehw anan nanak nabukuk Jisas um. Aria shopunek watik agundok Jisas ananig barag aria aiyas shakus um. <sup>56</sup> Aria owo watanam wanak um wabur wanak wagabe anan marasin nani yopuri wel reisik yopuri unar iri. Owo wenek redimar um wakri unak urayok Jisas ananihw yegenyihw. Douk wenek redi um eshudok um jurug aria ahudok nyumnah Sabat hatogur. Aria owo warao uhwin kabi douk Iruhin ananin lo nyakrium.

## 24

### *Jisas Wata Nakitak Nape*

*(Matyu 28:1-10; Mak 16:1-8; Jon 20:1-10)*

<sup>1</sup> Aria sagomih nyumnah<sup>24:1</sup>um wik, madae gamo gugruk uwe, oudok armago wasuhw arudok wel reisik yopuri unar iri douk nubokuhi wenek redimar iri wanak um ahwudok wonugwehw douk Josep narom Jisas um. <sup>2</sup> Douk owo wanak watogur aria watik um amudok utom douk shagah wonugwehw Jisas nakus um douk matatigas manak makusuk anagas. <sup>3</sup> Douk namudok aria owo wanak wawish. Douk wawish aria owo madae utik Debeini Jisas nukus numun uwe, uwok. <sup>4</sup> Aria owo weyotu namudok wape wenek urkwip. Aria ahudok atuh biom armam heneki hatrugun abom iri rupeh iri hanaki heyotu agundok owo weyotu um. <sup>5</sup> Aria owo watik namudok aria

owo wanogugur abom aria wourem watik atap. Aria amudok biom armam harigo hakri, “Ipak panaki paurim anudok douk wata nakitak nape iri agundok sharom shagok iri um maresh? <sup>6</sup> Agundok madae anan nukus uwe. Anan douk nakitak nape. Ipak punek urkwip um enyudok baraen douk nubokuhi wata nape Galili aria nakripep-aguk um. <sup>7</sup> Baraen douk enyudok, ‘Eik Anudok Arman douk yatogur adurin arpen iri ta shiyabige um henek yoweishi inahos iri armam husuwe hunek nyilume rowog kruse aria igok. Aria hukri um biyeh atih nyumneh um, eik ta wata ikitaki ipe.’ ”

<sup>8</sup> Douk amam hakripo namudok aria owo wata urkwip poramoguk enyudok baraen nubokuhi Jisas nakriפשוק um. <sup>9</sup> Aria owo waktukuk wonugwehw hwape um aria wanak wakripuk ananim 11-poreim disaipel hani ihishmorim shapeik iri um enyudok ihinyumorim owo watrin iri. <sup>10</sup> Aria armago douk wanak wakripuk amam aposel um enyudok owo watrin iri douk oudok. Maria, douk kwanaki wabur Makdala iri kwani Joana iri Jems ananik amakek douk shopunek kwonahwaram Maria iri. Oudok biwotuk wani ono armago shopunek. <sup>11</sup> Aria amam aposel hemnek aria hakri enyudok owo wakripam-enyi baraen douk rohwin shagugak iri sheyagwrehen iri. Namudok aria amam madae hunek bilipumo uwe. <sup>12</sup> [Aria Pita nakitak nahur nanak um wonugwehw-igunum agundok wonugwehw hwape um. Anan nanak natogur aria nepebig natigu numun aria natigu ehudok shigorihwihi rupeh hakusuk. Aria anan wata natanam nanak um urupat aria nape nenek urkum nanak um enyudok nyatogur iri mugu.]

*Biom Armam Hatik Jisas Yah Douk Hanak Um Wabur Emeus Iri (Mak 16:12-13)*

<sup>13</sup> Aria ahudok atuh nyumnah, biom hanakum anabur wabur nyeiguriburum Emeus. Rougun um agundok shupe Jerusalem shunak um Emeus um douk hurukatin um 11 kilomita. <sup>14</sup> Douk amam hanak aria hape haneyagwreh hanakum

enyudok ihinyumorim mugu douk nyatogur iri. <sup>15</sup> Amam haneyagwreh aria shopunek henek urkum hape hanarigum hanak. Aria Jisas anan kanak nanaki hurukatin aria nani amam hanak atin. <sup>16</sup> Aria amam hatrun aria amam madae hudukeman hukri anan douk Jisas uwe, uwok.

<sup>17</sup> Aria anan narigam nakri, “Ipak pape panaki aria pape peyagwreh um maresh?”

Douk anan narigam namudok aria amam heyotu abom. Aria amamiruh aparuh yoweruh abom aria amamigos yamagos sotohiyahi.

<sup>18</sup> Aria anan shahwaran um Kliopas iri narigan nakri, “Sabaishi kupairubi warubish douk shanaki shape Jerusalem iri shadukemesh um enyudok douk nubokuhiyeh nyumnah nyatogur Jerusalem iri. Aria douk ta nyak atin nyape Jerusalem iri madae nyudukem enyudok mugu douk nubokuhiyehi nyatogur iri uwe?”

<sup>19</sup> Aria Jisas narigan nakri, “Maresh shatogur?”

Aria amam hakripan hakri, “Enyudok sheneken um Jisas douk nanaki wabur Nasaret iri. Anudok Jisas anan douk anan profet. Aria ihishmorim arpesh shani Iruhin shatrun um, anan douk dodogowin atunari arman abom. Anan apa nenek Iruhin atun neneken iri mour. Aria anan dodogowin atun nakriפשוק yopinyi atin baraen. <sup>20</sup> Aria apakim debeimi pris hani amudok anam apakim debeimi um apakin kansol iri hekeshan nor gavman esheshis wis aria amam debeimi um gavman iri habo baraen um hon nugok. Aria anan douk henek nyiluman rowog kruse aria han nagok. <sup>21</sup> Aria apak douk munek bilip makri arman douk Iruhin nagraehan neshopokan nanakumori nukweshih apak Israel um mupe wosik iri douk ta anan. Aria baraen douk madae enyudok atin uwe, uwok. Enyudok douk nyatogur nubokuhiyeh nyumnah. Aria doukih douk henek biyeh atih um. <sup>22-23</sup> Aria iganigadae ono armago douk wani apak masuhw ananin baraen magipeshen iri wenekop makitak

yowiyokuk agundok ruhur atin wanak um wonugwehw hwape um aria madae utrun nukus numun wonugwehw um uwe. Aria owo wata watanamori aria wakripap wakri owo adur watik enesh enselahos aria shakripo iri shakri Jisas ta nakitak nape.

<sup>24</sup> “Aria anam apakim armam hakitak hanakum wonugwehw hwape um aria hatik um oudok armago wakrienyi baraden douk adurin. Aria namudok atin, amam shopunek madae hutrun nukus uwe, uwok.”

<sup>25</sup> Aria Jisas nakripam nakri, “Ipak atin urkwip madae enep pupenyep uwe. Ipak baragos seshuk aria ipakip urkwip madae arigas purum enyudok ihinyumorim baraden douk seiwok amam profet hakrienyuk iri aria punek bilipumen pukri adurin uwe. <sup>26</sup> Ipak ta padukemesh aka, uwok? Kraiss douk Iruhin nagraehan neshopokan nanakumori nunarao arpesih iri ta shon nurao debeiri eriger nugok iyoh aria Iruhin douk ta nutuk ananin nyeigur nyuto iruhw.”

<sup>27</sup> Aria Jisas nananubur neyagwreh Moses nenyemaguk nyetem Iruhin ananik Buk iri baraden nape nakripam arigaha neyaten aria nakripam um ihmomorim profet henyemaguk iri. Anan nape naworumom baugos um hudukemesh um enyudok ihinyumorim baraden nyetem Iruhin ananik buk iri douk nyakrium anan kanak.

<sup>28</sup> Aria douk nakripam nanak aria hurukatin um hunak hutogur abrudok wabur douk amam hakri hunakabur iri, aria anan nenek rohwa abom aria nagim yah nanak. <sup>29</sup> Aria amam dodogowim hasuweshan um nini amam hupe aria hakripan hakri, “Nyak yowi nyuni apak mupe agundok. Aun douk hurukatin um nubuhuk aria hurukatin um wab.”

Aria anan nanak nawish nani amam hape.

<sup>30</sup> Douk hape aria amam hapeum hakri huwok worigun aria anan nakitak nani amam hape herharis tebol. Aria nohur bret nenek beten nenek tenkyu um Iruhin aria naworut nako amam. <sup>31</sup> Aria abudok

nyutob amam hatrun aria wata hadukeman. Aria anan brukwaranuk aria amam madae hutrun uwe.

<sup>32</sup> Aria amam hanakripam hakri, “Iganigadae magim yah manakumori anan douk nakripohw iri baraden nyetem Iruhin ananik buk iri. Aria anan douk naworamohw baugenyum baraden abom. Aria abudok nyutob ohwakish mishish douk sheyotuh abom aria ohwak wanadudareh.”

<sup>33</sup> Douk amam haneyagwreh namudok abom um jurug aria abudok nyutob amam wata hakitak hatanam hanakum Jerusalem. Amam hanak hatogur aria haparug amudok 11-poreim disaipel hani eshudok enesh shagipesh Jisas iri shantorum shape. <sup>34</sup> Aria eshesh shakripam shakri, “Adur atin. Debeini wata nakitak. Anan douk natogurum Saimon aria natrun.”

<sup>35</sup> Aria amam biom shopunek, hakriפש um enyudok nyatogur-umam yah iri nyani agundok anan nawor bret nakomat aria amam douk hatrun yamag hadukeman um.

*Jisas Natogurum Ananim Disaipel Hatrun*

*(Matyu 28:16-20; Mak 16:14-18; Jon 20:19-23)*

<sup>36</sup> [Aria douk amam wata hape hakriפש enyudok baraden atin aria ahudok atuh Jisas anan kanak natogur meyoh aria neyotu agundok eshesh shapeum. Aria nakriפש nakri, “Eik yakri Iruhin nunekep ipakiruh aparuh hur wosik.”]

<sup>37</sup> Aria eshesh shakitak yowiyokuk aria shanogugur abom. Um maresh? Eshesh shenek urkwip shakri eshesh ta shatik anan yoweini sagaben.

<sup>38</sup> Aria anan narigesh nakri, “Ipak panogugur aria pakitak yowiyokuk um maresh? Aria ipak por biyep urkwip um maresh? <sup>39</sup> Tiki eikigas aiyas aria roguhwa. Enyudok douk eik kanak Jisas. Ipak punaki pusuwe ipakis wis aria pishakome aria ipak ta pudukemesh. Sagabehos busiguh aria eibug madae enesh shupenyesh uwe. Aria eik douk patrue eibug aria busiguh shapeye.”

<sup>40</sup> Douk anan nakri enyudok aria neyabig ananis wis aria aiyas. <sup>41</sup> Aria eshesh shatron aria shanadudareh aria shopunek, eshesh shakitak yowiyokuk. Aria eshesh madae shunek bilip abom shukri anan douk Jisas uwe, uwok.

Douk namudok aria anan narigesh nakri, “Ipak pabuk anagun worigun agundok aka, uwok?” <sup>42</sup> Aria eshesh shohuri anap wobrap iri arbup shakonap. <sup>43</sup> Aria anan natrishop aria napoh esheshis nabes.

<sup>44</sup> Aria anan nakriפש nakri, “Riguk eik wata yani ipak mape aria yakriפשuk yakri, ihinyumorim baraan douk henyem Iruhin ananik Buk nyakrium eik iri ta nyutogur adurin atin. Enyudok baraan enen douk nyape Moses nenyemaguk iri Iruhin ananin lo. Aria enen nyape amam profet henyemaguk iri, aria enen nyape buk shahwarok um Sam iri.”

<sup>45</sup> Aria anan nutaurumesh nohur esheship urkwip um shudukemesh wosik baugenyum baraan nyetem Iruhin ananik Buk iri. <sup>46</sup> Aria nakriפש, nakri, “Baraan nyetem Iruhin ananik Buk iri douk nyakri Kraish douk Iruhin nagraehan neshopokan nanakumori nunarao arפש iri ta numnek debeiri eriger aria shon nugok. Aria douk hukri um biyeh atih nyumneh um, anan ta wata nukitak nupe. <sup>47</sup> Aria um Jisas ananin nyeigur, eshesh ta shukitak um mour Jerusalem shupe shukriפש yopinyi baraan ihish arפש arigaha shiyatak ihis awirosish arפש shape agundok atap iri. Eshesh ta shukriפש um Jisas ananin nyeigur um shukeshuk agabus yoweishi inahos aria shatanam shukon aparuh Iruhin aria anan ta nukweshih esheshish yoweishi inahos. <sup>48</sup> Aria ipak ta pukriפש baraan um eshudok douk patrish shatogur iri. <sup>49</sup> Aria ipak mnek. Enyudok douk seiwok eikin Yain nakri adurin atin baraan um ta nukepen iri douk enyudok ta douk ishopoken nyubuhi nyuwishep. Aria ipak pupe agundok Jerusalem arigaha purao enyudok dodog nyanaki iruhw heven iri nyubuhi nyuwishep dodogowip iyoh.”

### *Heven*

*(Mak 16:19-20; Aposel 1:9-12)*

<sup>50</sup> Aria anan naraesh shakutukuk Jerusalem shanak arigaha shatogur wabur Betani. Douk shanak shatogur aria anan nohur roguhwa nakriפש yopinyi baraan um Iruhin nunekumesh yopinyi.

<sup>51</sup> Aria douk anan wata nape nakriפש atin aria Iruhin wata naran nakutishuk natoum iruhw heven. <sup>52</sup> Aria eshesh sheyotu shenek lotuman agundok um jurug aria wata shatanam shanak um Jerusalem. Aria eshesh shanadudareh shariguk. <sup>53</sup> Aria shapeum shatuk Iruhin ananin nyeigur nyato iruhw namudok atin gani numun Iruhin ananit debeiti urupat.

*Iruhin Wata Narao Jisas Natoum Iruhw*

## Iruhin Ananin Yopinyi Baraen Jon Nenyem Iri

### *Banenyi Baraen um Jon*

1:1-18 Jisas Krai kupainyi nyeigur Baraen nyatogur arpen

1:19-51 Jon nenek baptaisumesh iri nakripesh baraen um Jisas nanakumori. Aria Jisas narik nanak nahwar ananim 4-poreim disaipel

2:1 —12:50 Jisas nakripesh Iruhin ananin baraen aria nenek 7-porein Iruhin atun neneken iri mour sabaishi shatrin

13:1 —19:42 Jisas nanak Jerusalem nakripesh Iruhin ananin baraen aria eshesh shenek kwotuman aria shenek nyiliman rowog kruse aria nagok

20:1-31 Jisas ta nakitak um shagok um aria natogurum ananish disaipel shatrun

21:1-25 Jisas nanak shokugi nahobig Galili aria natogurum ananim 7-poreim disaipel hatrun

### *Jisas Krai Anan Douk Amu Baugos Abom Um Agundok Shupe Aria Mare Ta Shugok Um*

<sup>1</sup> Seiwok Iruhin watak nenek agudok nahobig uwe aria anudok arman shahwaran um Baraen iri douk nape. Nani Iruhin hape. Aria anan douk adur atin Iruhin. <sup>2</sup> Seiwok baugos um shanarubur shanakwaram um, anan nani Iruhin hape. <sup>3</sup> Iruhin madae nenek enen enyudok anan atun uwe, uwok meyoh. Iruhin nakwu anudok arman Baraen nenek eshudok ihishmorim eneshenesh. <sup>4</sup> Anan douk adur atin baugos um agundok arpeshe shupe abom aria mare shugok um. Shopunek anan douk kabi anat lait tagruk iri tadukogun aria ihishmorim arpeshe shanotrugun um. <sup>5</sup> Atudok lait douk tadukemesh um tagruki tudukogun agundok arukwutugun um. Aria arukwutugun ko nubirak um nubuwehat aria ta amu uwok.

<sup>6</sup> Iruhin neshopok anan narauri ananin baraen iri arman nanaki. Aria ananin nyeigur douk Jon. <sup>7</sup> Anan douk nanamori nukrip arpeshe um atudok lait. Umum ihishmorim shumnek nakripesh-enyi baraen aria shusuhw anudok arman nape kabi lait morim um ananin baraen dodog aria shugipeshen. <sup>8</sup> Anan Jon douk madae atudok lait uwe, uwok. Aria Jon douk nanamori nukripesh baraen um anudok arman nape kabi lait morim um. <sup>9</sup> Anudok arman douk nape kabi adur atin tagruk iri lait morim douk nanamorim atap agudok nahobig um nutaurum ihish arpeshe ta shudukem Iruhin iri.

<sup>10</sup> Seiwok Iruhin nakwu anudok arman Baraen nenek atap agudok nahobig aria douk napenyog. Aria eshudok atapishi arpeshe um agudok nahobig douk madae shatrun aria shudukem anan uwe, uwok. <sup>11</sup> Aria anan adur atin nanamorim ananibur shokuburi wabur. Aria ananish arpeshe douk shakonaguk agabus aria shakri uwok um anan. <sup>12</sup> Aria enesh douk shemnekan aria shasuhw ananin baraen dodog shagipeshen. Namudok aria eshesh douk nekesh debeishi nyeiguhw um shubuh ananig nuwag aria nagraehesh um shutogur Iruhin ananish batowish. <sup>13</sup> Aria eshesh madae shutogur Iruhin ananish batowish meyoh um amakenyish esheshis nyomais uwe, uwok. Aka um eshesh kanak shutogur shupe meyoh aka, enesh shukripesh aria anob nyutob ko shutogur Iruhin ananish batowish uwe, uwok. Iruhin anan kanak nagraehesh aria shatogur ananish batowish.

<sup>14</sup> Anudok arman shahwaranum Baraen iri douk narao arpenyihw yegenyihw aria nanaki nani apak mape. Apak douk matik um agundok anan dodogowin atun abom um, aria ananin nyeigur nyato gani iruhw um. Iruhin anan douk atun arag nunganin meyoh aria douk natauruman nenekan natogur dodogowin, aria nyeigur nyato iruhw aria neshopokan nanaki. Ahudoki aih um shenek gihaum arpeshe shataurumesh meyoh abom um hani sheyagwreh adurin atin baraen um douk nyape um anan. <sup>15</sup> Aria Jon douk nakripesh um anudok arman iri. Nakripesh namudok nakri,

“Arman nuboo riguk yakripepuman iri douk anudok. Douk yakripep namudok. Yakri, ‘Anudok arman nugimori eik iri anan douk debeini abom um eik. Aria eik shokuwe iri meyoh. Umum maresh? Eik watak shiyubuki uwe aria anan douk seiwok nape.’”

<sup>16</sup> Anan douk apa nataurum apak meyoh ihih nyumneh abom iri. Aria ihih nyumneh anan douk napeum nenekumop yopihi aih um apak sabaishi arpes. <sup>17</sup> Seiwok Iruhin douk nakonari lo Moses nanaki nakripeshen. Aria Iruhin neshopok Jisas Kraiss nanaki nauri Iruhin ananin giha aria nataurumap meyoh aria nakripap adurin atinyi baraan. <sup>18</sup> Aria seiwok madae enen atin arpen nyutik Iruhin uwe amu uwok meyoh. Aria anudok ananin Nuganin douk adur atin nape huruk um ananin Yaken iri, anan atun douk natik Iruhin. Natrun aria douk nakripapuman. Namudok aria apak madukeman.

*Jon Nenek Baptaisumesh Iri Nakripesh Yopyini Baraan*

*(Mat 3:1-12; Mak 1:7-8; Luk 3:15-17)*

<sup>19</sup> Eshesh Juda esheshim debeimi heshopok anam pris hani anam um apudok awirop Livai hakutukuk Jerusalem aria hanak hatik Jon. Hanak aria harigan hakri, “Nyak amiapen?” <sup>20</sup> Jon nemnek aria madae nukrium nubeshuk-umam baraan aria ta mare nukripam uwe, uwok. Aria adur atin nowereh-umam baraan. Aria anan nakripam-enyi baraan douk enyudok. Anan nakri namudok, “Eik madae Kraiss uwe, uwok, anudok douk Iruhin nakri um ba nagraehan aria neshopokan nanamori nurao arpes iri uwe, uwok.”

<sup>21</sup> Aria harigan hakri, “Namudok aria nyak douk meinyari? Nyak Ilaija aka?” Aria nakripam nakri, “Eik douk madae Ilaija uwe, uwok.” Aria ta harigan hakri, “Nyak douk atin anudok profet douk mape matrugun-umen um ta nyutograri iri aka, uwok?” Aria anan nakripam nakri, “Uwok”.

<sup>22</sup> Namudok aria harigan hakri, “Namudok aria kripap. Nyak douk amiapen? Umum maresh? Apak ta musuhw enen

baraen mutanam um mukrip amudok debeimi douk heshopokap ba manamori marigen iri. Kripap, nyak nyakri nyak douk adur atin meinari arman?” <sup>23</sup> Aria Jon nakripam nakri, “Eik anudok arman douk seiwok profet Aisaia nenyemaguk iri baraan nakriyanari. Aria baraan enyudok,

‘Enen arpen nyape nyohwar gani wehigunum arpes uwok um iri nyakri, “Gapesh yah hupe yopuh um Debeini nigimah nanaki um.” ’

<sup>24</sup> Amudok armam douk hanaki harig Jon enyudok baraan iri douk amam Farisi heshopokam hanaki harigan. <sup>25</sup> Aria harigan hakri, “Nyak douk nyakri nyak madae Kraiss uwe uwok aka, Ilaija aka, anudok debeini profet uwe, uwok. Namudok aria amiapen nyakripen ba nyenek baptaisum arpes?”

<sup>26</sup> Aria Jon ta nakripam nakri, “Eik yenek baptaisumesh abar meyoh. Aria agundok douk atin anan arman douk nani ipak peyotu. Aria ipak madae pudukeman uwe, uwok. <sup>27</sup> Anan douk nagimori eik iri. Aria eik douk madae yopuwe iri um ikweshihuman maduru-ruh um ananiyu su uwe, uwok.” <sup>28</sup> Jon douk neyagwreh enyudok baraan wabur Betani. Ababur douk bape gani wobrehahibum worub Jordan douk anan nape nenek baptaisumesh um.

*Jisas Anan Douk Kabi Iruhin Ananin Nugaen Sipsip Um*

<sup>29</sup> Gagruk ruwahepih aria Jon natik Jisas nanaki um nutrun. Aria Jon nakripesh nakri, “Putik anudok arman. Anan douk kabi Iruhin ananin Nagaen Sipsip um. Anan douk nanamori nukweshih yoweishi inahos um apak ihishmorim mape menekesh agudok atapig nahobig iri aria Iruhin nukweshihesh.

<sup>30</sup> Arman anudok douk yakripepuman iri. Douk yakripepuman yakri, ‘Anan nagimori eik iri arman douk adur atin debeini. Eik uwok, shokuwe iri meyoh. Umum maresh, eik douk watak shiyobuki uwe aria anan douk seiwok narik nape. <sup>31</sup> Eik kanak douk madae idukemesh um anan adur atin douk anudok Iruhin



nagraehan iri meinari arman um uwe, uwok. Aria eik douk yanaki yenek bap-taisumesh um abar aria natogur yop-ugunum aria ipak Israel ta ko putrun pudukeman.’ ”

<sup>32</sup> Aria Jon nakriפש enyudok baraan um shudukem Jisas um. Nakriפש nakri, “Eik yatik Iruhin ananin Mishin nyabuhi iruhw heven kabi arudok armir manyun um nyabuhi nyape Jisas. <sup>33</sup> Eik kanak douk madae idukemesh um arman douk Iruhin nagraehan aria neshopokan nanaki iri douk anan um uwe, uwok. Aria Iruhin douk neshopok eik yanamori inek bap-taisumesh aria nakriפש nakri, ‘Ko nyutik eikin Mishin nyubuhi nyupe anan arman aria nyuwishan. Aria anudok arman douk ko nekesh eikin Mishin nyuwish sabaishi arpesh aria nyupeyesh.’ <sup>34</sup> Eik douk yatik enyudok mugu nyatogur aria douk yakriפש. Anan douk adur atin abom um Iruhin ananin naganin.”

#### *Jisas Narao 4-Poreim Harik Iri Disaipel*

<sup>35</sup> Gagruk ruwahepih aria Jon nani biom ananim disaipel heyotu worub Jordan. <sup>36</sup> Heyotu aria Jon natik um Jisas nanakmorim neshagrakuk amam nanak. Aria nakri, “Ipak putik anudok arman. Anan douk Iruhin ananin Nagaen Sipsip.”

<sup>37</sup> Douk ananim biom disaipel hemnekan nakri namudok aria heir Jisas hanak. <sup>38</sup> Jisas natanam natrum um hagiman hanak aria narigam nakri, “Ipak paurim maresh?” Aria amam harig anan hakri, “Rabai, nyak nyape agnum?” Muwanam enyudok baraan Rabai um, douk nyakri Debeini Tisa. <sup>39</sup> Aria nakriפש nakri, “Yowi puname munak aria putik agundok eik yapeum.” Aria hanaman hanak hatik agundok napeum. Hatrugun aria hani anan hape agundok ahudok nyumnah. Umum maresh? Nyumnah douk hatogur 4-klok wabigep.

<sup>40</sup> Amudok biom douk hemnek Jon aria hagipesh Jisas hanak iri, anan douk Andru. Anan douk Saimon Pita ananin wanin. <sup>41</sup> Aria Andru nanak arigas atin naurim ananin ashuken Saimon. Nanak naparugan natrun aria nakriפש nakri, “Apak iganigadae maparug aria matik Mesaia.” Muwanam enyudok baraan um,

douk nyakri Kraiss anudok douk Iruhin nagraehan aria neshopokan nanamori nunarao arpesh iri.

<sup>42</sup> Aria Andru narao Saimon um Jisas aria nakri, “Nyak Saimon. Nyak douk Jon ananin naganin. Kweipon aria douk ko ta shuhwarenyum Sifas.” Baugenyum baraan enyudok nyeiguhw Sifas aria Pita douk shakri atin baraan. Shakri utom.

#### *Jisas Nahwar Filip Nani Nataniel*

<sup>43</sup> Aria gagruk ruwahepih Jisas nakri um nanam agudok shokugi nahobig Galili. Nanak aria naparug Filip aria nakriפש nakri, “Yowi nyugipesh eik.”

<sup>44</sup> Filip nani Andru aria Pita douk hanaki atubur wabur Betsaida. <sup>45</sup> Douk Filip nanak naparug Nataniel aria nakriפש nakri, “Anudok arman douk Moses nowem Iruhin ananin baraan okwudok lo nyetemok iri buk nyani enyudok enen amam profet henyemoguk aria hakriפש um ko nunaki iri douk maparugon. Anan douk Josep ananin naganin shahwaran um Jisas iri. Anan douk nanaki wabur Nasaret iri.”

<sup>46</sup> Aria Nataniel narig Filip nakri, “Nyak douk adur atin nyakri wosik um enesh yopishi eshudok ko shutogur aburdok wabur Nasaret aka uwok?” Aria Filip nakriפש nakri, “Namudok aria, yowi unak aria ba nyutrun.”

<sup>47</sup> Douk Jisas natik Nataniel nanaki um nutrun, aria neyagwreh enen baraan um anan nakri, “Anudok arman nape Israel iri, anan douk anan um yopunari arman. Nyunogiagigi baraan douk madae niyagwrehen iri uwe, uwok.” <sup>48</sup> Aria Nataniel narig Jisas nakri, “Nyak nyadukeme mumam?”

Aria Jisas nakriפש nakri, “Filip watak nunaku nuhwaren uwe, aria eik douk yatrin nyape shukamenyum rowog fik.”

<sup>49</sup> Aria Nataniel nakri, “Debeini Tisa, nyak douk Iruhin ananin Naganin. Aria adur atin apak Israel apakin king.” <sup>50</sup> Aria Jisas watak apa nakriפש Nataniel nakri, “Nyak nyenek bilip um eik, um maresh douk agundok douk yakriפש nyum yatrin nyape shukamenyum rowog um, aka? Yakriפש, eneh nyumneh ta nyutik

enenyenen Iruhin atun neneken iri mour. Eik ta ineken nyenek uhwinyum enyudoki iri mour.”<sup>51</sup> Aria Jisas ta nakripam nakri, “Adur atin yakripep. Eneh nyumneh ipak ta putik utag tukurog gunak giyotukuk tukwotukwan aria ta putik iruhw heven. Aria ta putik Iruhin ananish enselahos shenek to buh shunamorim Eik douk Anudok Arman yatogur adurinyi arpen iri.”

## 2

### *Biyesh Shanaraum Aria Shenek Worigun Wabur Shuhwarabur Um Kana*

<sup>1</sup> Biyeh nyumneh hanak hatuhuk aria hakri biyeh atuh um, aria biyesh arpes shunaraum abrudok wabur Kana. Abrudok wabur Kana douk bape agudok shokugi nahobig Galili. Aria Jisas ananik amakek douk shopunek kwanak kwatrish. <sup>2</sup> Aria Jisas nani apak ananim disaipel douk shopunek shohwarop aria monak matrish um agundok eshudok biyesh arpes shunaraumoguni worigun. <sup>3</sup> Douk arigaha shawok wainibar abar sheyatabar aria Jisas ananik amakek kwakrip Jisas namudok, “Wainibar abar douk shabroh sheyatabar.” <sup>4</sup> Aria Jisas nakripok namudok, “Nya, nyak yopukwi armatok mare nyukrip eik um inek enesh eshudok uwe, uwok. Eikib nyutob um inek enyudokmorim mour um douk watak bunaki uwe, uwok.”

<sup>5</sup> Aria ananik amakek kwakrip eshudok douk shenek mour um worigun iri namudok, “Anan nukripep um penek maresh um, aria ipak ko penekesh.”

<sup>6</sup> Atudok urupat douk shobuk 6-poreis debeisi utaboris marus saku. Shosubuk saku um shereiri abar bor aria eshesh Juda shugipesh eneh esheshih aih aria shishrokuh um. Asudok marus atup atup eshesh ta shushar sabaibari abar um 100 lita bubuk buros.

<sup>7</sup> Aria Jisas nakrip eshudok douk shenek mour iri namudok, “Pishar abar asudok marus.” Nakripesh aria shereiri abar shourakabar bubuk marus arigaha shunukis atus.

<sup>8</sup> Aria nakripesh namudok, “Arigah pugi anabar purabar punak um debeini

um agundok worigun iri.” Namudok aria shagi anabar sharabar shanaman. <sup>9</sup> Sharabar aria nokwiraehabar aria abrudok abar douk Jisas nenekabar batogur wainibar jurug. Aria anan douk madae nudukemesh uwe um abrudok wainibar abar banaki meigunum iri uwe, uwok. Aria eshudok douk shenek mour iri sharao anabar shanak shokonabar iri douk shadukemesh. Namudok aria debeini um agundok worigun iri nohwari anudok narao armatok iri nanaki. <sup>10</sup> Aria nakripam namudok, “Thim armam henek worigun um henekesh namudok, sago-matin amam hurik hurauri yopuni wain aria shunoh ba iyoh. Aria anudok anan madae yopuni iri uwe amam ko hugiguk hurani aria shunoh. Aria nyak douk nyobukuk adurini yopuni wain nakusuk arigaha namukadae atin nyonuhuri aria shanoh.”

<sup>11</sup> Aria enyudok douk dodogowinyi nyarik iri Iruhin atun neneken iri mour douk Jisas neneken iri. Neneken um niyabig Iruhin ananin debeinyi dodogowinyi dodog. Anan neneken abrudok wabur Kana bape um agudok shokugi nahobig Galili iri. Aria apak ananim disaipel matrish menek bilip makri anan douk adur atin Iruhin ananin nugin.

<sup>12</sup> Douk shenek enyudok um jurug aria Jisas nabuhum Kaperneam. Nani ananik amakek kwani ananim owarhim aria apak ananim disaipel. Mabuh aria mape eneh nyumneh nagundok.

### *Jisas Nawish Iruhin Ananit Debeiti Urupat Aria Nehiyah Shenek Bisnis Iri*

(*Mat 21:12-13; Mak 11:15-17; Luk 19:45-46*)

<sup>13</sup> Nyutob hurukatin um eshesh Juda ko shenek agundok debeiguni Pasovai-gun worigun um nutogur. Aria Jisas natoum Jerusalem. <sup>14</sup> Nato aria nanak nawish numun aburdok nabur Iruhin ananit debeiti urupat tataoum aria natik armam hape henek bisnis hanokom um kauhos shani sipsipahos aria armiguhw douk hwape kabi douk maishub um. Aria shopunek natik armam hape herharah tebolhos aria henek bisnis harao kupairubi worubish esheshibor utabor

aria hekesh kupaibori utabor. <sup>15</sup> Natik namudok aria nohur anaruh madururuh nereharuh hatogur kabi douk anat margit um aria nakwu atudok margit nape nehiyah sabaimi armam hani sipsipahos aria kauhos shatogrukuk aduk um agundok Iruhin ananit debeiti urupat tataoum. Nabadig-umam tebolhos amudok henek bisnis harao kupairubi warubish esheshibor utabor aria hekesh kupaibori utabor iri aria utabor prakarubor banakuk atum atumuk. <sup>16</sup> Aria nakrip amudok henek bisnis um armiguhw iri namudok, “Puhur ipakiguh armiguhw ba kare punak! Ipak douk mare penek eikin Yain ananit urupat tutogur um kabi douk anat maketit urupat um uwe, uwok.”

<sup>17</sup> Aria apak ananim disaipel urkwip ta porum enen baraan nyetem Iruhin ananik Buk iri. Aria baraan douk nyakri namudok, “Eikim urkum adur atin makri munawasham um nyakit urupat, kabi nyih hanuwe um. Namudok aria eik yenek mour dodog yagapesh atudok urupat tupe wosik atin.”

<sup>18</sup> Eshesh Juda esheshim debeimi hatik enyudok aria hakripan debeg hakri namudok, “Nyak ta nyenek enen maren kak um Iruhin atun neneken iri mour ba apak mutrin aria mudukemesh mukri nyak douk adur atin Iruhin neken big aria nyanaki nyenek enyudok agundok numun ananit urupat.”

<sup>19</sup> Jisas nemnek aria ta nakripam nakri namudok, “Ipak pudigur atudok Iruhin ananit debeiti urupat tubuh tukus atap, aria um bihatuh nyumneh aria eik ta ituhur tiyotu iruhw.”

<sup>20</sup> Aria amam ta hakri namudok, “Um 40-poreish kwarahos apakishi sharok atudok Iruhin ananit debeiti urupat, aria nyak nyakana ta nyurukat um bihatuh nyumneh atih aka?”

<sup>21</sup> Aria douk Iruhin ananit debeiti urupat anan nakriyat iri, anan douk nakri anan kanak ananihw yegenyihw.

<sup>22</sup> Namudok aria abudok nyutob shan nagok aria Iruhin ta nonuhuri wonugwehw um batogur, aria apak ananim disaipel urkwip ko porum enyudok baraan nubokadae riguk anan nakriyenjuk iri.

Aria douk, menek bilip makri Jisas neyagwrehen iri baraan nyani enyudok nyetem Iruhin ananik Buk iri douk adurin atin.

### *Jisas Douk Nadukemesh Um Ihish Arpesh Esheshih Aih*

<sup>23</sup> Ehudok nyumneh douk shenek agundok Pasovaigun worigun ehi, Jisas douk nape Jerusalem. Nape aria nenek sabainyi Iruhin atun neneken iri mour douk arpesh shatrin aria sabaishi shasuhw ananin baraan shagipeshen.

<sup>24</sup> Douk Jisas natrish namudok um agundok shasuhw ananin baraan dodog um aria madae nubo urkum nenek bilip um eshesh douk shenek bilip aria shasuhw ananin baraan um uwe, uwok. Umum maresh? Anan douk nadukemesh um ihish arpesh esheship urkwip por ahi aih. <sup>25</sup> Douk madae enen arpen ta nyukuna nyukrip Jisas um arpesh shape shenek ahi aih uwe, uwok. Anan nadukemesh um ihish arpesh esheshish urkum apahw shape ahi aih.

## 3

### *Jisas Nani Nikodemus Heyagwreh Baraan*

<sup>1</sup> Anan arman shahwaran um Nikodemus iri douk nape. Anan douk anan Farisi aria anan debeini um Juda esheshin kaunsol. <sup>2</sup> Anab wab, anudok arman Nikodemus nanak natik Jisas aria nakripan nakri namudok, “Debeini Tisa, apak madukemesh um nyak douk anan tisa douk Iruhin nakripen um nyanaki nyenek skulum apak um ananin baraan iri. Aria enyudok Iruhin atun neneken iri mour douk nyak nyape nyenek iri, apak madae enen arpen ta wosik nyenek uwe, uwok. Umum maresh? Iruhin douk nini enen arpen shupe um, aria enyudok arpen ko nyenek enyudoki mour.”

<sup>3</sup> Aria Jisas ta nakripan nakri namudok, “Adur atin yakripen, douk enen arpen mare ta nyutogur namunyi um, enyen ko mare nyuwish abrudok wabur Iruhin nape Debeini um ananish arpesh shapeum uwe, uwok.” <sup>4</sup> Aria Nikodemus ta narigan nakri namudok, “Enen ruwehenyi arpen douk ta nyutogur enen moduhwuraen batowin mumam? Aria enyen

wosik douk ko ta nyuwish enyenyik amakekwibur nyibur aria ta kunyubuki anah shopunek aria nyutogur kabi douk enen moduhwuraen batowin um, aka uwok?”

<sup>5</sup> Aria Jisas ta nakri namudok, “Adur atin yakripen. Douk arpeshtu mare shutogur namushi um agundok shenek baptaisum abar iri aria shurao Iruhin ananin Mishin nyunekesh shutogur namushi um, aria eshesh ta mare shuwish abrudok wabur Iruhin nape Debeini um ananish arpeshtu shapeum uwe, uwok. <sup>6</sup> Arpeshtu douk shabuki batowish iri eshudok douk adur shatogur arpeshtu. Aria arpeshtu douk Iruhin ananin Mishin nyawish nyapeyesh iri, eshesh douk adur atin shatogur Iruhin ananish batowish. <sup>7</sup> Aria ipak mare pukitak yowiyokuk um enyudok baraeen eik yakriyenyi um, ‘Douk ipak ta putogur namushi um.’ <sup>8</sup> Aria uhwin nyahur um enyen kanak enyenyih yah aria nyanam kupa-kupaigunum. Nyak nyumnek enyenyin sirisoro nyunak um, aria nyak madae nyudukemesh um enyen nyanaki agunum aria enyen nyunak agunum. Aria ihish arpeshtu douk Iruhin anin Mishin nyunekesh shatogur namushi iri douk namudok atin.”

<sup>9</sup> Aria Nikodemus ta narig Jisas namudok, “Enyudok mugu nyak nyakriyenyi ta nyutogur mumam?” <sup>10</sup> Aria Jisas nakripan nakri namudok, “Umum maresh ba nyak nyarig eik namudok? Nyak douk anan um eshesh Israel esheshin tisa, aria enyudok eik yakrienyi baraeen nyak madae nyudukemen uwe aka? <sup>11</sup> Adur atin yakripen. Apak douk meyagwreh um eshudok madukemesh iri aria makripep baraeen um eshudok matrish iri. Aria ipak douk pakenyuk agabus enyudok apakin baraeen. <sup>12</sup> Eik yakripep baraeen um eshudok shatogur agudok atapig nahobig iri aria ipak douk madae penek bilip um eikin baraeen uwe, uwok. Namudok aria ta ikri um ikripep um iruhw hevenish eshudok akure, ipak douk ta mare pusuhw eikin baraeen pukri adurin uwe, uwok. <sup>13</sup> Aria douk madae enen arpen nyuto um iruhw heven uwe, uwok. Aria douk Eik Anudok Arman yatogur adurinyi arpen

iri eik atuwe yakutukuk iruhw heven aria yabui agudok nahobig. <sup>14</sup> Seiwok Moses nahao enen rowog agundok wehigunum douk arpeshtu uwok um. Aria nowaur anar yur douk nenekor brasin ain iri rataur. Aria douk ta namudok atin. Eik Anudok Arman douk yatogur adurin arpen iri ko shutuke shiyaur itaur enen rowog. <sup>15</sup> Umum ihishmorim arpeshtu douk shusuhw eikin baraeen shigipeshen iri, eshesh douk ko shupe wosik abom ihih nyumneh. <sup>16</sup> Iruhin anan douk atun arag Nuganin meyoh nape. Aria Iruhin nakri nanawasham abom ihish arpeshtu um agudok nahobig, namudok aria anan neshopoki anudok atun naganin um eshesh. Aria eshesh shusuhw ananin baraeen dodog aria eshesh ta mare shunak shuwishuk uwe, uwok. Aria ko shupe wosik abom ihih nyumneh. <sup>17</sup> Iruhin madae neshopok ananin Nuganin nunamori agudok atapig nahobig um nunemesh baraeen arpeshtu kabi douk anan jas um uwe, uwok. Aria anan douk neshopokan nanamori nurao ihish arpeshtu shutanamori shupe wosik atin. <sup>18</sup> Eshudok douk shusuhw ananin baraeen shugipeshen iri, Iruhin ko mare nunekumesh baraeen aria nukri um eshesh ko shunak um debeihi nyih, uwok. Aria eshudok douk madae shusuhw ananin baraeen shugipeshen iri uwe, Iruhin douk nenekumesh baraeen aria riguk anan adur nakri eshesh yoweishi ta shunam debeihi nyih. Umum maresh? Eshesh douk madae shunek bilip um anudok Iruhin ananin atun Nuganin uwe, uwok. <sup>19</sup> Baugenyum baraeen um agundok Iruhin ko nunemesh baraeen um douk namudok. Arman nape kabi laitmori douk nanaki nabui agudok atapig nahobig, aria arpeshtu esheship urkwip panasuhw yoweishi inahos pape kabi douk arukwutigun um. Aria lait shanoiwsat. Umum maresh? Eshesh douk shapeum shenek yoweishi inahos atin iri. <sup>20</sup> Ihish arpeshtu douk shapeum shenek yoweishi inahos iri, eshesh douk shenek horin horik um anudok arman douk nape kabi lait um iri. Eshesh douk shakri uwok um esheshish yoweshi inahos shutogur yopugunum aria ihishmorim shanoiws

um shanaki um lait. <sup>21</sup> Aria eshudok douk shenek adurih yopihi atih aih iri, eshesh douk shanamori anudok arman kabi douk lait um. Arpesh shanaki um shutik enyudok yopunyi mour douk Iruhin nakri um eshesh shuneken iri douk sheneken um Iruhin ananin dodog.”

*Jon Nenek Baptaisumesh Iri Nowereh Adurin Baraen Um Jisas Douk Amiapen*

<sup>22</sup> Douk enyudok nyanakuk aria Jisas nani ananim disaipel hanam agudok shokugi nahobig Judia. Hanak hape agundok aria hape henek baptaisumesh. <sup>23</sup> Jon douk shopunek nape nenek baptaisumesh aburdok wabur Aion. Aburdok wabur douk bape hurukatin um Salim aria sabaibari abar bor nagundok. Namudok aria arpesh shanaki aria nape nenek baptaisumesh. <sup>24</sup> Aria abudok nyutob, Herot douk watak nuweshik Jon nupe shunuweshik-ati urupat uwe, uwok.

<sup>25</sup> Aria anam Jon ananim disaipel hani anan arman Juda um eshesh hape hanitok baraen um agundok eshesh Juda shagipesh esheshin lo aria sheshrokuh abar um shakri Iruhin nutrish aria nuwawesh yopishi um. <sup>26</sup> Aria amam disaipel hanamori Jon aria hakripan hakri namudok, “Debeini Tisa, anudok arman nubokuhi riguk nani nyak pape gani wobrehah-ibam worub Jordan aria douk nyakripapaman iri anan douk nape nenek baptaisumesh. Aria ihish arpesh douk shanam anan atun aria shakutukuk apak.”

<sup>27</sup> Jon nemnek baraen aria nakripam namudok, “Douk Iruhin nape heven iri nukri uwok um nuken mour enen arpen um, enyen meyoh ta mare nyuhur enyudok mour nyuneken uwe, uwok. <sup>28</sup> Ipak douk pemneken enyudok baraen riguk yakriyen iri. Douk yakri, ‘Eik douk madae anudok arman douk Iruhin nakri um nagraehan aria neshopokan nanamori nurao arpesh iri uwe, uwok. Aria eik douk Iruhin nagraehe aria neshopoke yarigi. Anudok arman douk ta nigigi.’ <sup>29</sup> Aria douk arman nakana nurao onok armatok um, namudok aria okwudok armatok ta kutogur ananik irohukwik. Aria ananin arpenyin ta niyotu apa nubuk arigos

nunadudareh um numnek anudok nurao armatok iri ananin mah. Namudok aria douk eik yanadudareh abom um eikish urkum apahw. <sup>30</sup> Umum maresh? Ananin nyeigur ta nyuto iruhw aria eikin nyeigur ta nyubuk atap.”

*Anudok Nanaki Heven Iri Nenek Uwhinyum Ihishmorim*

<sup>31</sup> “Aria anudok anan nape gani iruhw heven aria nabuhi iri, anan douk debeini um ihishmorim um eshudok eneshenesh. Aria anudok douk natogur agudok nahobig iri, anan douk nadukem agudok nahobigih aih aria neyagwreh agudok nahobigin baraen. Aria anan nape iruhw heven ba nanaki iri, douk debeini neshagrakuk ihish arpesh shubuh atap aria anan nukih netemuk iruhw. <sup>32</sup> Anan nakripap um eshudok anan natrishi aria nemenekenyi baraen. Anan nakripap, aria madae enesh arpesh shumnek ananin baraen aria shusuhwen shugipeshen uwe, uwok. <sup>33</sup> Eshudok douk shemnek ananin baraen shasuhwen shagipeshen iri, eshesh showerehen shakri Iruhin nakriyen iri baraen douk adurin atin abom. <sup>34</sup> Anudok arman Iruhin neshopokan nanaki iri anan douk nakrip arpesh um Iruhin ananin baraen. Umum maresh? Iruhin nakoni ananin Mishin nyawish nyape shuknin um anudok arman aria nyatauruman nenek enyudok mour. <sup>35</sup> Aria, Yaken douk urkum manawasham abom um ananin Nuganin aria nakon ihishumori eshudok aria anan nape debeinarimesh. <sup>36</sup> Aria eshudok douk shumnek anudok Nuganin ananin baraen shusuhwen shigipeshen iri, eshesh ta shupe wosik abom ihih nyumneh. Aria eshudok douk shukonaguk agabus Nuganin iri aria mare shugipesh ananin baraen iri, eshesh ta mare shupe ihih nyumneh uwe, uwok. Aria Iruhin ananish urkum apahw juwehosish atish um eshesh aria ko shunam debeihi nyih shumnek eriger ihih nyumneh.”

**4**

*Jisas Neyagwreh Nani Onok Armatok Um Eshesh Samaria*

<sup>1</sup> Arigaha aria amam Farisi hemnek um shakri “Jisas neshagrakuk Jon nenek baptaisum sabaishi arpesih aria nanukesh shagipesh anan.” <sup>2</sup> Aria Jisas anan kanak douk madae nunek baptaisum enesh arpesih uwe, uwok. Aria apak ananim disaipel atup menek baptaisumesh. <sup>3</sup> Douk Jisas nemnek um amam Farisi hemnek enyudok aria ta shopunek nakutukuk Judia aria natanam nanam agudok anag shokugi nahobig Galili.

<sup>4</sup> Aria ahudok yah hanam Galili iri douk hawish hanak agudok anag shokugi nahobig Samaria. Aria anan douk nagimah nanak. <sup>5</sup> Nanak arigaha nanak natogur anabur wabur shohwarabur um Sikar. Abatur douk bape agudok shokugi nahobig Samaria iri aria bape hurukatin um abudok shokubi amnab seiwok Jekop nako ananin nuganin Josep obi. <sup>6</sup> Anag abar bakihogi nuwag seiwok Jekop narukogi, gape noburudok wabur. Jisas nagim rouhi yah nanaki abom aria nakana nupe nurao uhwin. Namudok aria anan nahagi nape anagasum abarig nuwag.

<sup>7</sup> Nape aria douk onok um eshesh Samaria kwanaki um kwure abar aria nakripok namudok, “Shuke anabar abar ba ibroh.” <sup>8</sup> Aria apak ananim disaipel douk manak mawish aburdok wabur Sikar um mutori anagun mugnoh iri worigun.

<sup>9</sup> Aria okwudok armatok kwakripan kwakri namudok, “Nyak douk Judaipimin aria eik douk Samaria-ipyarik. Nyak ko mare nyorige um iken abar nyubroh uwe, uwok.” Okwok kwakri namudok umum maresh? Eshesh Juda shani eshesh Samaria douk madae shuni kupaishi aka shuwok worigun aturuh yaureruh uwe, uwok. <sup>10</sup> Aria Jisas nakripok baraen nakri namudok, “Nyak douk nyudukemesh um yopishi eshudok Iruhin nakri um nukenyesh meyoh iri, namudok aria nyak douk nyudukemesh um amiapen douk nyarigen um nyuken abar, aria douk ko nyerige um iken yopubari abar douk arpesih shabroh aria benekesh shupe wosik abom ihih nyumneh iri.” <sup>11</sup> Kwomnek namudok aria

kwakripan kwakri namudok, “Debeini, nyak douk baket woken um ta nyereiri abar um. Aria shopunek agudok abarig nuwag douk gabuh abom gani atap. Aria abrudok abar douk arpesih shubroh aria shupe wosik abom ihih nyumneh um ko nyubaruri agunum?” <sup>12</sup> Apakin yamenen Jekop nenemapukuk agudok abarig nuwag apak. Anan nani ananim nugamim shabrohag. Shabarur um ananish kauhos aria sipsipahos shopunek shabroh. Aria nyak douk nyakri nyak debeini nyenek uhwin um Jekop, aka?”

<sup>13</sup> Aria Jisas nakripok namudok, “Eshudok arpesih douk shuwok agudok nuwag-ibar abar iri, eshesh ko ta abar besh. <sup>14</sup> Aria meishi eshudok douk shurao abar eik ikeshabar iri, eshesh ko mare ta abar besh shopunek uwe, uwok. Abrudok abar eik ikeshabar iri, ababar ko butogur bukih buwish bupe numun um eshesh aria ko bunekesh shupe wosik abom ihih nyumneh.”

<sup>15</sup> Okwudok armatok kwomnek aria kwakripan namudok, “Debeini, nyak nyuke abrudok nyakriyabar iri abar. Nyuke um aria abar ko mare ta be aria ipeum ta mare apa inaki agundok ba ire abar uwe, uwok.”

<sup>16</sup> Aria Jisas nakripok nakri namudok, “Kare ba hwari nyakin raminen aria ta punaki agundok.”

<sup>17</sup> Kwomnek aria kwakripan, “Eik raminen madae anan uwe, uwok.” Aria Jisas nakripok, “Enyudok douk adur atin, um nyakana nyak raminen uwok um. <sup>18</sup> Umum maresh? Nubokadae riguk nyak douk nyurao 5-poreim armam. Aria anudok douk atin nyanaman pape iri, anan douk madae nyakin adurin raminen uwe, uwok. Nyakin baraen douk adurin atin.”

<sup>19</sup> Aria okwudok armatok kwakripan, “Debeini arman, eik yadukemesh um nyak douk anan profet. <sup>20</sup> Apakish popehesh yamehesh eshesh Samaria douk shenek lotu um Iruhin ahwudok yoduhw. Aria ipak Juda douk pakri agundok arpesih ta shunak shunek lotu um Iruhin um douk nape gani Jerusalem atugun.”

<sup>21</sup> Aria Jisas nakripok namudok, “Nya, nyusuhw eikin baraan aria nyunek bilipumen. Nyutob ta butogur, aria ipak ta mare punek lotu um Yain um ahwodok yoduhw aka, um Jerusalem. Ipak wosik ta punek lotu um ihigun morim. <sup>22</sup> Ipak Samaria douk madae pudukem anudok douk penek lotumanari uwe, uwok. Apak Juda douk madukeman anudok monek lotumanari. Umum maresh? Mour douk Iruhin neneken um nurao arpeshtutanamori shupe wosik atin um douk neneken iri nyakitak um apak Juda. <sup>23</sup> Aria nyutob ta butogur iri douk abudok batogur jurug um arpesht douk shenek lotu um Yain iri ta shukri adurin atin aria shurao ananin Mishin enyenyin dodog aria shenek lotuman. Eshesh ta shenek lotuman um aduriah yopuhi atuh aih kabi douk anan napeum. Aria Yain nakri nunawasham namudokishi arpesht um shenek lotuman. <sup>24</sup> Iruhin anan douk yegenyihw uwok. Anan douk Mishin atin. Namudok aria arpesht shukri shunek lotu um anan iri, esheshish mishish ta shurao Iruhin ananin Mishin enyenyin dodog aria shugipesh adurin atinyi baraan aria shenek lotuman.”

<sup>25</sup> Okwudok armatok kwomnek aria kwakripan kwakri namudok, “Yadukemesh um Mesaia ko nunaki. Anudok arman Kraish douk Iruhin nagraehan aria ko neshopokan nunamori nurao arpesht iri. Abudok nyutob anan nutogur um, anan ta nukripap um ihishmorim eshudok.”

<sup>26</sup> Aria Jisas ta nakripok nakri namudok, “Eik atuwe eik adur atin anudok arman, douk yape yanamen weyagwreh iri.”

<sup>27</sup> Douk nawerehumok baraan aria apak ananim disaipel watak manak matograri. Aria apak munihap meyoh makitak yowiyokuk um agundok matrun nani onok armatok shape shenyagwreh baraan um. Matrun, aria madae anan norig okwudok armatok nukri, “Nyanaki agundok um maresh?” aka norig Jisas nukri, “Nyani okwudok armatok pape peyagwreh baraan um maresh?” Madae morishesh uwe, uwok.

<sup>28</sup> Aria okwudok armatok kwobukuk baket douk kwakri kure abar um aria ta kwatanam um wabur. Kwanak aria kwakrip amam armago kwakri namudok, <sup>29</sup> “Ipak yowi munak ba putik anudok arman douk nakripe um ihishumori eshudok riguk yape yenekesh iri eshudok. Aria anan douk adur atin Kraish aka, meinari?” <sup>30</sup> Namudok aria shakutukuk wabur shanak um shutik Jisas.

<sup>31</sup> Aria nabudok nyutob apak ananim disaipel meyagwreh dodog um Jisas makri namudok, “Debeini Tisa, suh anangun worigun ba kukwesh.”

<sup>32</sup> Nemnek aria nakripap nakri namudok, “Eik yagnoh iri worigun douk madae pudukem-ogun uwe, uwok.” <sup>33</sup> Namudok aria apak ananim disaipel mape manasorim makri namudok, “Iganigadae enen arpen nyaraumanari anangun worigun nagnoh aka, uwok?”

<sup>34</sup> Aria Jisas nakripap nakri namudok, “Eikish worigun douk eshudok. Igipesh anudok douk neshopoke yanaki iri um ananim urkum aria iyatak enyudok mour douk nekeyen um ineken iri. <sup>35</sup> “Ipak apa panakripam namudok, ‘Nubatib aub bape um, aria mutuk worigun nubarigos.’ Eik yakripep, ipak pupok ipakis nabes ba putik nubarigos! Worigun douk nauhogos um apak mutukagun.

<sup>36</sup> Armam hatuk worigun iri ko hurao yopibori utabor. Umum maresh? Amam ta hutorumori worigun iri um eshudok shabadig nyirub iri arpeshtish mishish shutanamori um shupe wosik abom ihih nyumneh! Anudok nau worigun nubarigos iri aria anudok natuk worigun nubarigos iri biobiom ko hunadudareh abom. <sup>37</sup> Enyudok enen baraan apa sheyagwrehen iri douk adurin baraan. Baraan enyudok, ‘Anan arman nau worigun aria kupainari nanaki natukesh!

<sup>38</sup> Eik yeshopokep panak um purimori worigun nubarig douk riguk ipak madae punek mour um uwe, uwok. Kupaimi heneguk mour aria ipak puwish purimori worigun douk haweshag iri aria harik heneguk debeinyi mour um. Amam henek debeinyi mour aria ipak parao yopuguni worigun.”

<sup>39</sup> Sabaishi Samaria shape Sikar iri douk shasuhw Jisas ananin barae n aria shagipeshen. Umum maresh? Eshesh douk shemnek okwudok armatok kwakri, “Anan nakripe um ihishmori riguk yape yenekesh iri eshudok.” <sup>40</sup> Douk namudok aria eshesh Samaria shanaki agundok Jisas napeum aria dodogowish shakripan um nini eshesh shupe. Namudok aria nani eshesh nape biyeh nyumneh aburdok wabur. <sup>41</sup> Sabaishi arpesh shemnek ananin barae n shakri adurin aria shasuhwen shagipeshen.

<sup>42</sup> Aria shakrip okwudok armatok shakri, “Apak douk madae mumnek nyakin barae n atin aria munek bilipumen uwe, uwok. Apak kanak memnek ananin barae n aria madukemesh makri anan douk anudok arman douk ko nutaurum ihip mape agudok nahobig iri aria ta nurap mutanamori mupe wosik atin.”

#### *Jisas Nagapesh Anan Nenek Mour Um Gavman Iri Ananin Nuganin Aria Yapun*

<sup>43</sup> Jisas nape aburdok wabur biyeh nyumneh um jurug aria nakutukuk agundok aria nanam shokugi nahobig Galili. <sup>44</sup> Riguk Jisas anan kanak nakri enyudok barae n namudok, “Anan profet, ananibur wabur douk madae shumneken uwe um ananin barae n aria shukri anan douk debeini uwe, uwok.”

<sup>45</sup> Namudok aria abudok nyutob nanak natogur agudok shokugi nahobig Galili obi nyutob, eshesh Galili shanadudareh abom um agundok anan nanak um. Umum maresh? Abudok nyutob riguk shenek agundok debeiguni worigun Pasova obi nyutob, eshesh douk shanak aria shatik ihinyumori anan neneken iri debeinyi Iruhin atun neneken iri mour.

<sup>46</sup> Aria nanak natogur natik aburdok wabur Kana. Ababur douk bape agudok shokugi nahobig Galili. Aburdok wabur douk nubokuhi nabadig abar meyoh batogur wainibar abar iri. Aria abudok nyutob anan nenek mour um gavman iri ananin nугanin douk eneh arugeh hapeyan aria anan douk nape wabur Kaperneam. <sup>47</sup> Douk anudok arman nemnek um Jisas nakutukuk agudok shokugi

nahobig Judia aria nanamori shokugi nahobig Galili aria nanak narigan abom um nanaman hunam Kaperneam aria nugapesh ananin nугanin um yapun. Anan douk ehudok arugeh henekan aria hurukatinyum nakana nugok. <sup>48</sup> Aria Jisas nakripan nakri, “Aria ipak putiwe um mare inek enenyenen Iruhin atun neneken iri mour um, ipak ta mare punek bilipume, uwok.” <sup>49</sup> Anudok nenek mour um gavman iri nemnek aria nakrip Jisas nakri, “Debeini arman, yowi unak arigah. Ta eikin nугanin nugok.”

<sup>50</sup> Aria Jisas nakripan nakri, “Kare. Nyakin nугanin ta yopun, ta mare nugok uwe, uwok.” Anudok arman nasuhw Jisas ananin barae n nakri adurin aria nanak. <sup>51</sup> Nape nanak yah aria ananim henekuman mour iri hanaki haparugan. Aria hakripan hakri, “Nyakin nугanin iga yopun. Ta mare nugok uwe, uwok.”

<sup>52</sup> Aria narigam abom um meibi nyutob douk ananin nугanin watak yopun um. Aria hakripan hakri, “Arugeh hatuh nabatik 1 kilok wabigep.”

<sup>53</sup> Namudok aria yaken watak nadukemesh um nabatik douk abudok hakri obi nyutob abom Jisas nakripan nakri, “Kare, nyakin nугanin ta mare nugok uwe, uwok.” Namudok aria anan nani ihishmorim shape ananit urupat iri shasuhw Jisas ananin barae n shagipeshen. <sup>54</sup> Jisas douk nakutukuk shokugi nahobig Judia aria nanaki nape Galili. Aria enyudokmori Iruhin atun neneken iri mour douk nenek enyudok aria nyatogur biyen.

## 5

#### *Jisas Nagabe Anan Arugeh Han Iri Gani Waiyag Betesda*

<sup>1</sup> Enyudok nyanakuk aria anah debeihi nyumnah douk eshesh Juda shape shenek lotu aria shenek debeguni worigun um hutogur. Aria Jisas nakitak nanak um Jerusalem um nutrish um agundok worigun. <sup>2</sup> Aria agundok Jerusalem, anat debeiti wit shahwarat um Sipsip Esheshit Debeiti Wit iri douk tape arbudok narub douk shenekarub berbarih



Jerusalem iri. Aria hurukatin um atudok wit, anag waiyag gor. Enyudok baraen Hibru shahwarogum douk shakri Betesda. Aria hurukatin um agudok waiyag douk anat debeiti urupat tatao aria sharok 5-poreish womagahos. <sup>3</sup> Aria sabaishi arugeh haesh iri arpesh shanaki shape sheshuh eshudok womagahos. Enesh nabes seshukesh iri, enesh aiyas senekesh aria sharahaen yowiyokuk iri shani eshudok douk roguhwi aiyas shagokesh iri shanaki shape. [Eshesh shape shatrugunum abar bunagwugwi um. <sup>4</sup> Um maresh? Anob nyutob Debeini ananin ensel apa nyabuh abar aria nyenek abar banagwugwi. Aria douk abar bunagwugwi aria meinyi arugeh hen iri arpen nyurik nyukitak nyubuh agudok waiyag iri, enyen douk ta yopin.]

<sup>5</sup> Aria agudok, anan aiyas sagokan iri nape namudok um 38-poreish kwarahos iri douk nape enen womaga douk nyatao hurukatin um agudok waiyag iri. <sup>6</sup> Douk Jisas natik anudok aiyas sagokan iri neshuh aria nadukemesh um anan douk aiyas sagok nape roubum nyutob. Aria Jisas narigan nakri, “Nyak nyakrium ta yopin aka?”

<sup>7</sup> Aria anan nakripan nakri, “Debeini, abudok nyutob abar banagwugwi obi nyutob, eik douk arpen woke um nyiyohur nyunak nyukutuwe waiyag iri. Eik kanak yakri inak ibuh aria kupaishi shanak arigas sheshagrak eik sharik shanak shabuh.”

<sup>8</sup> Aria Jisas nakripan nakri, “Nyak kakitak nyuhur nyakish reish nyunasuwesh aria nyunak.” <sup>9</sup> Aria ahudok atuh anudok arman yopun aria nakitak nohur ananish reish nasuwesh aria nanak.

Aria ahudok nyumnah Jisas nagabe anudok aiyas sagokanari um douk Sabat. <sup>10</sup> Douk namudok aria eshesh Juda esheshim debeimi hakrip anudok douk Jisas nagabeyan iri hakri, “Apakin lo seiwok Iruhin nakoguk Moses um douk nyakri, ahudok nyumnah Sabat douk mare munek enen mour uwok, mupe meyoh. Aria nyak douk mare nyususuwesh nyakish reish nyurahaen uwe, uwok.”

<sup>11</sup> Aria anan nakripam nakri, “Anudok neneke yopuwe iri douk nakripe um ikitak ihur eikish reish inasuwesh aria inak.”

<sup>12</sup> Aria amam harigan hakri, “Meini arman nakripenyum nyunohur nyakish reish nyunasuwesh aria nyunak?”

<sup>13</sup> Aria anudok arman douk Jisas nagabeyan yopun iri douk madae nudukem Jisas uwe, uwok. Um maresh? Sabaishi arpesh shape agudok aria Jisas douk nanakuk. <sup>14</sup> Arigaha douk anob nyutob banakuk aria Jisas watak naparugan numun narub agudok Iruhin ananin debeiti urupat tataoum aria nakripan nakri, “Tik, nyak douk yopun jurug. Nyunak aria mare watak nyukri nyunek enesh yoweishi inahos shopunek, uwok. Ta enen adur debeinyi amaen nyutogrumen.” <sup>15</sup> Aria anudok arman nanak nakrip eshesh Juda esheshim debeimi um anudok nagabeyan iri douk Jisas. <sup>16</sup> Douk namudok aria amam hape heyokas Jisas. Um maresh? Anan douk nagabe anudok arman ahudok nyumnah Sabat. <sup>17</sup> Aria Jisas nakripam nakri, “Eikin Yain douk nenek ananin mour nape namudok ihihmorim nyumneh. Namudok aria eik shopunek yape yeneken namudok atin.”

<sup>18</sup> Douk Jisas nakri namudok aria amam debeimi Juda adur hakri hon nugok. Um maresh? Anan douk madae nubrig enyudok lo um mare shunek enen mour ahudok nyumnah Sabat um atin uwe, uwok. Anan nakri Iruhin douk adur ananin Yain. Aria douk namudok um, anan nakri nunek anan kanak adur nutogur atatahin atun um Iruhin.

### *Iruhin Ananin Nuganin Anan Adur Dodogowin Atun Um Nunek Mour*

<sup>19</sup> Aria Jisas nawanamesh baraen nakri, “Adur atin yakripep. Eik Iruhin ananin Nuganin, eik kanak ta mare inek enesh eshudok, uwok. Eik ta inek eshudok douk eik yatik eikin Yain nenekesh iri atish. Eshudok douk Yain nenekesh iri, eik shopunek ta inekesh. <sup>20</sup> Yain ananim urkum douk adur manawasham um eik aria anan neyabige ihishmorim eshudok anan nape nenekesh iri. Anan ta niyabige

inek enen douk nyeshagrakuk enyudok douk Yain narik neyabige yeneken iri. Ineken aria ipak ta putrin aria pikitak yowiyokuk. <sup>21</sup> Yain apa nohur shagok iri norukesh yapis aria watak shakitak shape. Aria douk namudok atin. Eik ananin nunganin shopunek ta ihur eshudok eik ikri ishuhur iri. Ishuhur irukesh yapis aria watak shukitak shupe. <sup>22</sup> Aria Yain anan kanak ta mare nusuhw enen arpen enyenyit kwot, uwok. Enyudok mour um nusuhw kwotog um douk nako eiken. <sup>23</sup> Anan douk nenekesh namudok um ihishmorim arpesh ta shutuk eikin nyeigur nyuto iruhw kabi shatuk eikin Yain ananin nyeigur um. Aria enyudok arpen douk madae nyutuk eik ananin nunganin eikin nyeigur iri uwe, enyen douk madae nyutuk eikin Yain ananin nyeigur uwe, douk neshopoki eik yanaki, uwok.

<sup>24</sup> “Adur atin yakripep. Eshudok arpesh douk shumnek eikin baraen aria shugipesh anudok douk neshopoke yanaki iri um, eshesh ta shupe wosik abom ihih nyumneh. Aria eshesh ta shiyotum atudok kwot Iruhin ananin aria ta shenek uhwinyum atudok debeiti kwot. Eshesh douk shakutukuk agundok shagok um aria ta shupe wosik abom ihih nyumneh. <sup>25</sup> Adur atin yakripep. Nyutob douk ta butogur, aria douk batogur jurug, um shagok iri ta shumneki eik Iruhin ananin Nunganin eik mah. Aria eshudok douk shumneke aria shugipeshe iri, eshesh ta shukitak shupe wosik abom aria mare ta shugok uwe, uwok. <sup>26</sup> Yain douk adur baugos um agundok arpesh shupe wosik abom aria mare watak shugok um. Aria douk namudok atin. Anan nenek eik yatogur baugos um agundok arpesh shupe wosik abom aria mare watak shugok atin um. <sup>27</sup> Aria Iruhin douk nekeyen jurug enyudok big um isuhw arpesh esheshig kwotog um. Um maresh? Eik douk Anudok Arman douk yatogur adurinyi arpen iri.

<sup>28</sup> “Aria ipak mare pikitak yowiyokuk um shagok iri ta watak shutanamori. Nyutob douk bape banaki, um arpesh douk seiwok shagok aria sharumesh shor

wonugwegwiruh iri ta shumneki eik mah aria ta watak shukitak esheshiruh wonugwegwiruh um. <sup>29</sup> Aria eshudok douk shenek yopuhi aih iri ta shukitak shupe wosik abom aria mare watak shugok, uwok. Eshudok douk shenek eneshenesh yoweishi inahos iri ta shukitaki shunak shiyotum debeiti kwot aria shirao debeiri eriger.”

### *Baugenyum Baraen Nyatogur Yopugun Um Jisas*

<sup>30</sup> Aria Jisas nakri, “Eik kanak ta mare inek enesh eshudok um eikim urkum, uwok. Eik yagipesh eikin Yain nakripeyen iri baraen aria yenek skelum arpesh. Namudok aria yasuhw kwotog um, eik douk adur yenek skelum esheshin baraen um yopihi adurih aih. Um maresh? Eik madae igipesh eikim urkum aria inek enyudok mour uwe, uwok. Eik yagipesh anudok douk neshopoke yanaki ananin baraen aria yenek enyudok mour anan nakri um eik ineken iri.

<sup>31</sup> “Douk eik kanak ikri ikripesh um eik kanak akure, enyudok eikin yeyagwrehen iri baraen ta mare shusuhwen shukri adurin uwe, uwok. <sup>32</sup> Aria douk anan nataurume nape nakripesh um eik. Aria eik yadukemesh um enyudok baraen anan nakriyen um eik iri douk adurin atin.

<sup>33</sup> “Seiwok ipak peshopok anam harao baraen iri hanak harig Jon nenek baptaisumesh iri. Aria anan nakripep adurin atinyi baraen um eik. <sup>34</sup> Aria eik douk madae ikri um enesh arpesh shukripesh eikin baraen kupaishi um shudukemesh um eik amiapen uwe, uwok. Eik yakri enyudok baraen um yakri Iruhin watak nuraep putanam pupe wosik abom ihih nyumneh. <sup>35</sup> Jon anan nape kabi lam douk hanin aria bogaragun um arpesh um. Aria ipakiruh aparuh douk yopuruh aria panadudareh um ananin lait douk tatrugun abudok banobi adurib nyutob iri.

<sup>36</sup> “Aria enyudok mour eik yeneken iri douk adur nyeshagrakuk enyudok baraen douk Jon nakriyen um eik iri. Enyudok mour douk Iruhin nekeyen um ineken iyaten aria douk enyudok yape yeneken

iri, enyen meyoh ta nyiyabig arpesh aria shudukemesh um eik douk Yain neshopoke iri aria douk yanaki. <sup>37</sup> Aria eikin Yain douk neshopoki eik yanaki, anan kanak douk nakripep baugenyum baraen um eik. Ipak douk madae pumnek ananit nokwat tiyagwreh anabik uwe, uwok. Aria shopunek ipak douk madae putrun uwe. <sup>38</sup> Ananin baraen shopunek douk madae nyupe ipakiruh aparuh uwe, uwok. Um maresh? Ipak douk madae punek bilip um eik douk anan neshopoke yanaki uwe, uwok.

<sup>39</sup> “Ipak pakri enyudok baraen nyetem Iruhin ananik Buk iri ta nyunekep pupe wosik abom ihih nyumneh! Douk namudok aria ipak pape patarih sabainyi baraen nyetem okwudok Buk iri, aria penek urkwip um pakri pudukemen. Enyudok nyetem Buk iri baraen douk nyakrium eik! <sup>40</sup> Aria ipak adur pakri uwok um punamori eik um pupe wosik abom ihih nyumneh.

<sup>41</sup> “Aria eik yakri uwok um arpesh shutuk eikin nyeigur, uwok. <sup>42</sup> Aria eik yadukemep um ipakip urkwip douk madae punawasham Iruhin uwe, uwok. <sup>43</sup> Eik douk yanaki um eikin Yain ananin nyeigur, aria ipak douk madae puke aparuh pukri pumnek eikin baraen uwe, uwok. Aria douk anan arman meyoh nunaki nukripep um anan kanak ananin nyeigur akure, ipakiruh aparuh ta yopuruh aria ta kweipon pumnek ananin baraen. <sup>44</sup> Ipak urkwip porum pakri ipak kanak punatuk ipakish nyeiguhw shuto iruhw. Madae karowihi um pukwiraeh punek eneh aih um pukri anudok adur atun iri Iruhin meyoh nutuk ipakish nyeiguhw shuto iruhw uwe, uwok. Douk namudok aria ipak ta pusuhw eikin baraen pugipeshen mumam? Adur atin ta uwok. <sup>45</sup> Aria ipak douk mare pure urkum pukri eik ta inekumep kwotog um eikin Yain, uwok. Arman nunekumep kwotog iri douk anudok ipak pakri ta nutaurumep iri. Anan douk Moses. <sup>46</sup> Aria douk ipak punek bilip um Moses ananin baraen akure, ipak ta punek bilip um eikin shopunek. Um

maresh? Moses nyenyemaguk iri baraen douk nyakrium eik. <sup>47</sup> Ipak douk madae punek bilip um enyudok baraen seiwok Moses nyenyemaguk iri uwe, uwok. Namudok aria ipak ta punek bilip um eikin baraen mumam? Ta uwok.”

## 6

*Jisas Nekesh Worigun Sabaishi Arpesh Armam Atum Shadareham Hatogur 5,000-poreim*

*(Matyu 14:13-21; Mak 6:30-44; Luk 9:10-17)*

<sup>1</sup> Aria anob nyutob banakuk, aria Jisas nabinawish nanam gani wobrehah um agudok debeigi waiyag Galili. Enyudok enen nyeigur douk shahwarog um Taiberias. <sup>2</sup> Aria sabaishi arpesh abom shagipeshan. Um maresh? Eshesh douk shatik enyudok Iruhin atun neneken iri mour douk anan neneken um nagabe eshudok arugeh henekeshi arpesh yopish um. <sup>3</sup> Jisas nanak nato anag mihig aria nakih nani ananim disaipel hape nagundok. <sup>4</sup> Aria abudok nyutob um eshesh Juda shenek agundok debeiguni worigun Pasova um douk hurukatinyum ta butogur.

<sup>5</sup> Jisas natrugun neyatagun aria natik um sabaishi arpesh abom shape shanamanari. Aria narig Filip nakri, “Filip, ta munak mutur anat bret agnum, um eshudok sabaishi arpesh ta shutoh iri?”

<sup>6</sup> Jisas narigan enyudok baraen um nakri nukwiraehan. Anan douk nadukemesh um enyudok mugu douk ta nuneken iri.

<sup>7</sup> Aria Filip nawanaman baraen nakri, “Douk apak ta muwashak 200-poreibor silwai-bor utabor um aria ta mutur anat bret akure, atudok bret ta mare sabaiti um eshudok sabaishi arpesh um ta shuwok anabik mudukigun meyoh uwe, uwok.”

<sup>8</sup> Aria anudok anan Jisas ananin disaipel Andru douk Saimon Pita ananin wanin nakri, <sup>9</sup> “Anan shokuni neyotu agundok iri douk noruk bias shokusi arbus sani 5-poreig shokugwi bretog. Aria eshudok douk shopunek ta shunek maresh um shutaurum eshudok sabaishi arpesh?”

<sup>10</sup> Aria Jisas nakripap nakri, “Kripesh shupe atap.” Agundok douk sabairuhi uturuh hatogur aria sabaishi arpesh shabuh shape. Sabaishi arpesh aria armam atum sabaimi atum abom hatogur 5,000-poreim. <sup>11</sup> Douk shabuh shape jurug, aria Jisas nohur bret nasuwat nenek tenkyu um Iruhin aria nape nasiyat um arpesh. Nasiyatumesh jurug, aria asudok biyos arbus douk nosuhur nenekesh namudok atin. Aria eshesh sabaishi shashoh arigaha dugaresh atish. <sup>12</sup> Douk sabaishi dugaresh aria nakrip apak ananim disaipel nakri, “Putrish putorum bret douk shatoh aria takusuk iri. Um maresh? Ta mununu anat aria ta tukusuguk meyoh uwe, uwok.” <sup>13</sup> Memnek namudok aria matorumat matruk 12-poreiruh suraruh aria shunukiruh aturuh um tutukwanit um agudok 5-poreig bretog douk eshudok sabaishi arpesh shani batowish shagwoh aria gwakusuk iri.

<sup>14</sup> Douk eshudok arpesh shatik enyudok Iruhin atun neneken iri mour douk anan Jisas neneken iri aria shakri, “Adur atin, anudok arman douk anudok profet Iruhin nakri um ta neshopokan nanamori agundok atap iri.”

<sup>15</sup> Jisas natrish aria nadukemesh um eshesh hurukatinyum ta shunaki shusuhwan shupe aria shunegan nutogur esheshin king. Namudok aria nakutukuk eshesh aria anan atun nanak nato yoduhw.

*Jisas Narahaen Nanak Iruhw Um Agudok Debeigi Waiyag*

*(Matyu 14:22-23; Mak 6:45-52)*

<sup>16</sup> Douk arigaha wabigep aria apak ananim disaipel makitak mabuh um agudok debeigi waiyag. <sup>17</sup> Apak mapeum Jisas aria anan madae nanaki aria mabuh mato anat bot aria mabimawish manak um wabur Kaperneam. Abudok nyutob douk iganigadae wab, aria Jisas douk watak nunaki nutogrumap uwe, watak. <sup>18</sup> Aria abudok nyutob, debeinyi uhw win douk nyahur aria nyohur waiyag ba debeibi morub bakitak aria waiyag yoweg. <sup>19</sup> Apak ta menek pul manak 5 o 6 kilomita rougun um anagas aria

douk Jisas narahaen iruhw um waiyag nanaki hurukatinyum bot. Douk matik namudok aria manogugur abom. <sup>20</sup> Aria Jisas nakripapari nakri, “Mare punogugur uwe, uwok. Enyudok douk eik Jisas.” <sup>21</sup> Douk memnek aria manadudareh um mutukan nutowi bot. Aria ahudok atuh matik um bot tanak tatogur gani wobrehah um agudok waiyag douk apak mape menek pul manak um.

*Armam Armago Shape Shaurim Jisas*

<sup>22</sup> Ruwahepih aria eshudok sabaishi arpesh douk watak shape gani wobrehah um agudok waiyag. Shadukemesh um nabatik madae anat atut bot tur nagundok uwe, uwok. Atut meyoh tor aria douk apak ananim disaipel iganigadae mato menek pul manak. Jisas madae nunamap munak uwe, uwok. <sup>23</sup> Aria abudok nyutob, onog botog gworari wabur Taiberias iri douk gwanak gwatograri. Gwatograri hurukatin um agundok douk Jisas nenek tenkyu um Iruhin um bret aria nako eshudok arpesh shatoh um. <sup>24</sup> Douk eshudok arpesh shatik um Jisas nani apak ananim disaipel madae mupe agundok uwe, aria shabuh shato agwudok botog shanam Kaperneam um shurim Jisas nagundok.

*Jisas Anan Douk Adur Atin Kabi Atudok Bret Tabuhi Iruhw Heven Iri Um*

<sup>25</sup> Douk arigaha shanak shaparugan gani wobrehah um agudok waiyag aria shakripan shakri, “Debeini Tisa, meibi nyutob nyanaki agundok?” <sup>26</sup> Aria Jisas nawanamesh baraen nakri, “Adur atin yakripep, ipakip urkwip douk madae purum enyudok yeneken iri debeinyi mour kabi enen kak eik yeyabigepum aria douk panaki paurime uwe, uwok. Ipak douk pawok bret ba dugarep atip namudok aria douk ipak apa paurim eik. <sup>27</sup> Mare pupe punek mour um agundokmori worigun douk ta pishoh aria shunak shuwishuk iri uwe, uwok. Aria ipak douk punek mour um purim agundok anagun worigun douk ta puragun aria ta nunekep pupe wosik abom ihih nyumneh iri. Agundok worigun douk Eik Anudok Arman douk yatogur adurinyi arpen iri ta ikepagun. Um maresh? Yain Iruhin

douk neke big aria nakripe wosik um inek enyudokmori mour.”

<sup>28</sup> Namudok aria sharigan shakri, “Aria apak ta munek maresh, um apak ta munek Iruhin ananin yopinyi mour?”

<sup>29</sup> Aria nakripesh nakri, “Mour douk Iruhin nakri um puneken iri douk enyudok. Anan douk neshopoki eik yanaki, aria nakri ipak ta pusuhw eikin baraen dodog pugipeshen.” <sup>30</sup> Namudok aria eshesh watak sharigan shakri, “Ta nyunek maren Iruhin atun neneken iri mour um apak mutrin aria munek bilip um nyakin baraen? <sup>31</sup> Apakish yamehesh douk shawok atudok bret mana gani wehigunum arpesh uwok um. Shatoh kabi douk Iruhin ananin baraen nyetem ananik Buk iri nyakrium. Nyakri namudok. ‘Anan nekesh bret tabuhi iruhw heven iri shatoh.’”

<sup>32</sup> Jisas nemnek aria nakripesh nakri, “Adur atin yakripep, atudok bret tabuhi iruhw heven iri douk madae Moses nukapat iri uwe, uwok. Eikin Yain nekep atudok adurit bret douk tabuhi iruhw heven iri. <sup>33</sup> Bret douk Iruhin nekepat iri douk takutukuk iruhw heven aria tabuhumori tutaaurum eshudok atapishi arpesh um shupe wosik abom ihih nyumneh.”

<sup>34</sup> Aria eshesh shakripan shakri, “Debeini, apak makri nyak nyupeum ta nyukop atudok bret ihih nyumneh.”

<sup>35</sup> Aria Jisas nakripesh nakri, “Eik douk atudok bret douk ta shurat aria shupe wosik abom ihih nyumneh um. Eshudok douk shunakmori eik aria shusuhw eikin baraen shugipeshan iri, eshesh mare ta nyurub besh shopunek uwe, uwok. Aria eshesh mare ta abar besh shopunek uwe, uwok. <sup>36</sup> Aria ta douk yakripep, ipak douk patik eik aria madae pusuhw eikin baraen penek dodog pukri adurin uwe, uwok. <sup>37</sup> Ihish arpesh douk eikin Yain nagraehesh um shunakmori eik iri ta shunakmori eik. Eshudok douk shunakmori eik iri, eik ta mare inowishesh ikeshuk agab uwe, uwok. <sup>38</sup> Eik douk madae ikutukuk iruhw heven aria ibuhmori igipesh eik kanak eikim urkum um inek eneyenen mour um eikim urkum morumen iri uwe, uwok. Aria douk yanamori

igipesh eikin Yain douk neshopoke yanaki iri um ananim urkum. <sup>39</sup> Aria anan neshopoke yanaki iri nakri um ineken iri douk enyudok. Nakri mare ikutukuk enen um eshudok ihishmorim arpesh douk anan nagraehesh um shunamori eik iri shunak shuwishuk uwe, uwok. Aria nakri eik ta irukesh yapis eshesh aria watak ishuhur shukitak shupe abudok nyutob ko hugiguk iri nyumnah hutogurum. <sup>40</sup> Adur, eikin Yain nakriyenyi douk enyudok atin. Nakri ihishmorim arpesh douk shutik eik ananin Nuganin aria shusuhw eikin baraen shugipeshan iri, eshesh douk ta adur shupe wosik abom ihih nyumneh. Aria douk ta watak irukesh yapis ishuhur shukitak shupe ahudok hugiguk iri nyumnah hutogurum.”

<sup>41</sup> Eshesh Juda shemnek aria urkwip juwehosip abom aria shape sheneyagwreh shokwin atin baraen um enyudok Jisas nakri anan douk atudok bret tabuhi gani iruhw heven iri um. <sup>42</sup> Namudok aria shakri, “Anudok arman anan douk Josep ananin nuganin shahwaranum Jisas iri. Ananish amakenyish douk madukemesh. Aria douk mumam namudok, um iganigadae nakri anan douk nape gani iruhw heven aria nabuhi?”

<sup>43</sup> Jisas nemnek aria nawanamesh baraen nakri, “Ipak um maresh ba urkwip juwehosip aria ipak pape peyagwreh panaboum baraen orokohun um ipak kanak meyoh? <sup>44</sup> Madae enen arpen ta nyukana nyunakmori eik uwe, uwok. Aria douk Yain neshopok eik yanaki aria nuhur enyudok arpen akure, enyen wosik ta nyunakmori eik aria nyusuhw eikin baraen nyugipeshen. Aria enyudok arpen, eik douk ta watak inyuhur nyukitaki wanugwehw ahudok hugiguk iri nyumnah hutogurum. <sup>45</sup> Baraen douk profet henyem nyetem Iruhin ananik Buk iri douk nyakri, ‘Iruhin ta nunek skulum ihish arpesh um ananish aih.’ Namudok aria sabaishi arpesh douk shumnek eikin Yaken ananin baraen aria shudukemen wosik iri, eshesh ta shunakmori eik. <sup>46</sup> Madae enen arpen nyutik Yain uwe, uwok. Eik douk yani Iruhin wape iri aria yakitak yanaki iri atuwe yatron.

<sup>47</sup> “Adur atin yakripep, ihishmorim arpesch douk shusuhw eikin baraen shugipeshen iri, eshesh douk ta shupe wosik abom ihih nyumneh. <sup>48</sup> Eik Jisas douk atudok bret douk arpesch ta shurat aria tunelesh shupe wosik abom ihih nyumneh iri. <sup>49</sup> Seiwok ipakish popehesh yamehesh douk shawok atudok bret mana gani wehigunum, aria eshesh douk shagok. <sup>50</sup> Aria arpesch douk shuwok atudok adurit bret douk takutukuk iruhw heven tabuhi iri, eshesh douk ta mare shugok, uwok. <sup>51</sup> Eik kanak douk atudok adurit bret douk tabuhi gani iruhw heven um ta tunelesh arpesch shupe wosik abom ihih nyumneh iri. Arpesch douk shuwok atudok bret iri ta shupe wosik abom ihih nyumneh. Atudok bret douk eikihw yegenyihw. Ta ikesh eikihw yegenyihw um itaurum ihishmorim eshudok atapishi arpesch um shupe wosik abom ihih nyumneh.”

<sup>52</sup> Douk eshesh Juda shemnek namudok aria juwehosish abom. Aria eshesh kanak apa shanogogonim shakri, “Anudok arman nakri ta nukop ananihw yegenyihw muhwoh mumam?”

<sup>53</sup> Aria Jisas nakripesh nakri, “Adur atin yakripep, douk ipak mare puwok Eik Anudok Arman douk yatogur adurinyi arpen iri eikihw yegenyihw o puwok eikibor owishibor um, ipak ta mare pupe wosik abom ihih nyumneh, uwok. <sup>54</sup> Aria eshudok arpesch douk shuwok eikihw yegenyihw hwuni eikibor owishibor iri, eshesh ta shupe wosik abom ihih nyumneh. Aria ahudok hugiguk iri nyumnah hukri hutogur obi nyutob, eik douk ta watak ishuhur shukitak shupe. <sup>55</sup> Um maresh? Eikihw yegenyihw ohwohw douk kabi adurigin worigin abom um. Eikibor owishibor douk shopunek kobi aduribar abar abom um. <sup>56</sup> Eshudok arpesch douk shuwok eikihw yegenyihw hwuni eikibor owishibor iri, eshesh douk shape eik aria eik yape eshesh. <sup>57</sup> Eikin Yain douk baugos abom um agundok shupe wosik abom ihih nyumneh iri um douk neshopoki eik yanaki. Aria eik douk yape dodogoiwe um anan aria ta ipe wosik abom ihih nyumneh. Aria

douk namudok atin. Eik douk dodogoiwe iri aria eshudok arpesch shuwok eikihw yegenyihw iri, eik douk ta inekesh shupe wosik abom ihih nyumneh abom. <sup>58</sup> Eik douk atudok bret douk tabuhi gani iruhw heven iri. Atudok bret douk madae kabi atudok seiwok ipakish yamehesh shatoh aria eshesh ta shagok um uwe, uwok. Arpesch douk shuwok atudok bret iri, eshesh ta shupe wosik abom ihih nyumneh.”

<sup>59</sup> Jisas nakripesh enyudok baraen aburdok wabur Kaperneam. Nakripeshen abudok nyutob nape nenek skulumesh yopinyi baraen gani numun eshesh Juda shape sheneyagwreh baraen-ati urupat obi nyutob.

*Baraen Jisas Neyagwrehen Iri Douk Ta Nyutaurum Arpesch Um Shupe Wosik Abom Ihih Nyumneh*

<sup>60</sup> Sabaishi arpesch douk shapeum shemnek ananin baraen aria shagipeshen iri douk shemnek enyudok baraen aria sheneyagwreh shakri, “Enyudok baraen douk juwehosin abom um apak mugipeshen um. Ta omi nyupe nyumneken aria nyugipeshen?”

<sup>61</sup> Jisas douk madae enesh arpesch shukripan uwe, aria nadukemesh um eshesh douk juwehosish aria shape sheneyagwreh shokubur atin um enyudok baraen douk nakripeshen iri. Namudok aria nakripesh nakri, “Ipak douk pemnek enyudok baraen nyenek ipakip urkwip yowep aria juwehosip, aka?”

<sup>62</sup> Aria douk ta mumam, douk ipak putik Eik Anudok Arman douk yatogur adurin arpen iri ito iruhw douk riguk yapeum?

<sup>63</sup> Arpesch meyoh ta mare dodogowish um shugok um eshesh kanak um shupe wosik ihih nyumneh, uwok. Iruhin ananin Mishin atin wosik dodogowin atin abom um nyunekesh shupe wosik abom ihih nyumneh. Enyudok eik yakripep enyi baraen douk ta nyutaurum ipakish mishish aria ta nyunekep pupe wosik abom ihih nyumneh. <sup>64</sup> Yakripep baraen aria anep madae punek bilipume uwe, uwok.” Jisas anan douk sagramatin riguk nohur ananin mour nape neneken um

aria nadukemesh um eshudok arpesch douk ta mare shunek bilipuman iri, shani anudok arman douk ta niyabig ananim horim um anan Jisas aria husuwan hunak hon nugok iri. <sup>65</sup> Aria Jisas watak shopunek nakri, “Douk namudok aria yakripep yakri, ‘Douk Iruhin ta mare nuken dodog enen arpen um, enyen meyoh ta mare dodogowin um nyunaki nyunek bilip um eik, uwok.’”

<sup>66</sup> Jisas nakripesh enyudok baraan um jurug, aria sabaishi arpesch douk shapeum shagipeshen shemnek ananin baraan iri watak shakutunukuk aria shatanam. Madae shukri um shugipeshan uwe, uwok.

<sup>67</sup> Jisas natik namudok aria narig apak ananim 12-poreim disaipel nakri, “Aria ipak douk shopunek pakri pukutukuk eik punak, aka?” <sup>68</sup> Aria Saimon Pita nawanaman baraan nakri, “Debeini, apak mukutukuk nyak aria ta watak manam amiapen? Aria uwok. Baraan douk ta nyutaurumap um mupe wosik abom ihih nyumneh um douk nyape um nyak atin. <sup>69</sup> Douk apak menek bilip abom aria madukemesh um, nyak douk yopuyopuni arman douk Iruhin nagraehen aria nashopoken nyanaki iri.” <sup>70</sup> Aria Jisas nabeimam baraan nakri, “Eik kanak yagraeh ipak 12-poreim armam. Aria ipak 12-poreim, ipak anan douk Satan ananin nuganin.” <sup>71</sup> Enyudok baraan douk nakriyen nenyem Judas, anudok Saimon Iskariot ananin nuganin. Anan douk anan um amudok 12-poreim disaipel, aria anan ta niyabig Jisas um ananim horim aria amam hunaki husuwan hunak hon nugok.

## 7

### *Jisas Ananim Warhim Madae Hunek Bilipuman Uwe*

<sup>1</sup> Enyudok nyanakuk aria Jisas nape agudok shokugi nahobig Galili nape narahen nanak warub. Amam debeimi Juda hakri hon nugok. Namudok aria madae nunak nurahaen nunak agudok shokugi nahobig Judia uwe, uwok. <sup>2</sup> Aria ahudok nyumnah um eshesh Juda shunek lotu

um Iruhin aria shurak auros aria shuwish shupe shunek worigun um douk hurukatin um hutogur. <sup>3</sup> Aria Jisas ananim warhim hakripan hakri, “Nyukutukuk agundok aria nyunak um Judia. Nyunak um nyakishi arpesch shagipesh nyak iri shutik enyudok Iruhin atun neneken iri mour douk nyak nyape nyeneken iri. <sup>4</sup> Aria enen arpen nyukri um ihishmorim shumnek enyen um, enyen douk mare nyunabeshuk nyunek enyenyin mour atin uwe, uwok. Aria douk nyak nyenek enyudok aria ta nyeneken yopugunum, um ihishmorim ta shutrin atin.” <sup>5</sup> Ananim baugem warhim heyagwreh enyudok. Um maresh? Amam shopunek madae hunek bilipuman uwe, uwok.

<sup>6</sup> Jisas nemnek aria nakripam nakri, “Eikib yopubi nyutob um inak um douk watak butogur uwe, uwok. Ihih nyumneh eheh douk ipakih. Ipak pakri punak um, aria ipak douk wosik ta punak meibi nyutob ipak pakri punak um. Eik uwok. <sup>7</sup> Eshudok atapishi arpesch ta mare shutripuk yoweisi nabes aria shukepuk agabus ipak uwe, uwok. Eik douk wosik ta shutiwe yoweisi nabes aria ta shukeik agabus. Um maresh? Eik douk yape um yakripesh um eshudok yoweishi inahos douk eshesh shapeum shenekesh iri. <sup>8</sup> Ipak atip wosik punam agundok debeiguni worigun. Eik ta mare arigas inaku uwok. Um maresh? Eikib yopubi nyutob um inak um douk watak butogur uwe, uwok.” <sup>9</sup> Nakripam namudok aria watak napeik Galili.

### *Jisas Nagiguk Nanak um Agundok Debeiguni Worigun Shurak Auros Shupe Um*

<sup>10</sup> Douk ananim warhim hanam agundok debeiguni worigun aria Jisas shopunek nakitak nagiguk nanak. Nanak aria madae nunak yopugunum uwe, uwok. Nanabeshuk atin nanak. <sup>11</sup> Eshesh Juda esheshim debeimi douk hape hauriman agundok shenek worigun um. Hape harigesh hanak hakri, “Patrun anudok arman nape agunum?”

<sup>12</sup> Sabaishi arpesch douk shanaki shantorum um shunek agundok debeiguni

worigun. Aria shape shanaboum shokwin baraen sheneyagwreh shokubur atin um Jisas. Enesh shakri anan yopuni arman. Aria enesh shakri anan yoweini arman douk nenek rohw um arpesh meyoh. <sup>13</sup> Aria yopugunum douk madae enesh arpesh shupe shiyagwreh-uman enen baraen uwe, uwok. Um maresh? Eshesh douk shanogugur um Juda esheshim debeimi.

<sup>14</sup> Shenek agundok debeiguni worigun arigaha shanak sheyotu orokohun aria Jisas nanak nawish narub um Iruhin ananit debeiti urupat tataoum aria nape nenek skulumesh um Iruhin ananin baraen. <sup>15</sup> Douk eshesh Juda esheshim debeimi hatrun aria hakitak yowiyokuk. Aria hakri, “Anudok arman douk madae nunek skul enen apakin skul uwe, uwok. Aria mumam namudok um anan nadukemesh abom nariguk um?”

<sup>16</sup> Namudok aria Jisas nawanamam baraen nakri, “Enyudok baraen eik yenek skulumep-enyi douk madae inek skulumep um eikin baraen uwe, uwok. Yenek skulume-enyi douk Iruhin neshopoke yanaki iri ananin baraen. <sup>17</sup> Aria enen arpen nyukri abom um nyugipesh Iruhin ananim urkum um, enyen douk ta nyudukem baugenyum enyudok baraen eik yenek skulumep-enyi. Enyen ta nyudukemesh um enyudok baraen douk Iruhin nakripe iri um inaki ikripepen o eik meyoh yananyuhur yakripepen. <sup>18</sup> Arpen douk enyen kanak urkum mur um enen baraen aria nyiyagwrehen iri, enyudok arpen douk nyeyagwreh um nyutuk enyen kanak enyenyin nyeigur nyuto iruhw. Aria eik douk yakri ituk anudok douk neshopoke yanaki iri ananin nyeigur nyuto iruhw. Aria eik, rohwinyi baraen douk madae iyagwrehen atin uwe, uwok. Yeyagwreh adurin atin baraen. <sup>19</sup> Seiwok Moses nekep lo douk Iruhin nakonenyuk iri. Aria douk madae karowin um enen arpen nyusuwen nyugipeshen wosik uwe, uwok. Aria douk ipak douk pakri pubo eik igok um maresh?”

<sup>20</sup> Aria eshudok sabaishi arpesh shawanaman baraen shakri, “Nyak

enen yoweinyi sagab nyapenyen. Omi nyakrium nyen nyugok?” <sup>21</sup> Aria Jisas nawanamesh baraen nakri, “Eik yenek atin Iruhin atun neneken iri mour um sabatih nyumnah gani abarig waiyag aria ipak ihipmorim patrin pakitak yowiyokuk. <sup>22</sup> Aria Moses douk nekepaguk ehudok aih um putah nugamimiruh yegeshiweruh um. Aria ehudok madae punek mour ahi iri uwe nyumnah Sabat, ipak douk shopunek patah nugamimiruh yegeshiweruh. Adur, ehudok aih douk madae Moses nuhuhur nukepehuk uwe, uwok. Ihih douk ipakim popehem yamehem meyoh hehuhur hekepehuk. <sup>23</sup> Ipak apa pagipesheh kabi enyudok lo douk Iruhin nakoguk Moses um enyudok patah nugamimiruh yegeshiweruh um. Aria ahudok nyumnah Sabat douk madae punek mour um uwe, ipak ta penek mour um patah nugamimiruh yegeshiweruh. Aria nubokuhi eik yagabe anan arugeh han iri arman yopun abom ahudok nyumnah Sabat um, ipak douk patiwé aria juwehosip abom um maresh? <sup>24</sup> Mare putik enenyenen nabes meyoh aria pukri enyudok yopunyi o yoweinyi, namudok uwok. Aria enenyenen ipak ta pudukemen wosik aria douk punek adurih atih aih abom aria punek skelumen.”

### *Eshesh Shakana Shudukemesh Jisas Anan Douk Krai O Uwok*

<sup>25</sup> Enesh armam armago shape Jerusalem iri shatik enyudok Jisas neneken iri mour aria sheneyagwreh shakri, “Arman atun ta anudok, douk apakim debeimi hape apa hauriman um hon nugok iri aka? <sup>26</sup> Aria douk tik. Anan douk nape neyagwreh agundok sabaishi shantorum shapeum, aria amam douk madae hukri uwok um niyagwreh uwe, uwok. Aria amam douk hadukemesh hakri anan Krai douk Iruhin nagraehan aria neshopokan nanakmori nunarao arpesh iri aka? <sup>27</sup> Aria ananibur wabur douk madukemabur. Aria abudok nyutob Krai nutogrum, apak ta mare enen arpen nyudukem um abrudok wabur douk anan nunaki abur iri, uwok.”



<sup>28</sup> Jisas douk watak nape apa nenek skulumesh baraeen gani numun narub atudok Iruhin ananit debeiti urupat tataoum. Aria anan watak neyagwreh debeinyi baraeen nakri, “Adur, ipak douk pakri ipak padukem eik wosik. Wabur yanaki abur iri shopunek pakri padukemabur wosik. Aria eik douk madae inakumori eikim urkum uwe, uwok. Anudok neshopok eik yanaki iri douk adurin abom. Aria ipak douk madae pudukem anan uwe, uwok. <sup>29</sup> Aria eik douk yadukeman. Um maresh? Eik douk yani anan wape aria neshopoke yanaki.”

<sup>30</sup> Douk nakri enyudok baraeen aria amam debeimi Juda hakri husuwan hunak huweshikan nupe shunuweshik-ati urupat. Aria madae anan atun nuweman wis uwe, uwok. Um maresh? Abudok nyutob douk ta shon nugok um douk watak butogur uwe. <sup>31</sup> Aria sabaishi arpeshe shenek bilip um Jisas aria shakri, “Abudok nyutob Kraish nutogur obi nyutob, aria anan douk ta nutogur nunek sabainyi Iruhin atun neneken iri mour nyishagrakuk enyudok anudok arman neneken iri aka? Aria ta uwok.”

*Debeimi Heshopok Anam Heyoh Iruhin Ananit Debeiti Urupat Iri Um Hunak Husuhwi Jisas*

<sup>32</sup> Arigaha aria amam Farisi heneke um eshudok sabaishi arpeshe shape sheneyagwreh shanak shokubur atin um enyudok Jisas neneken iri. Namudok aria amam hani amam debeimi pris heshopok anam armam heyoh Iruhin ananit debeiti urupat iri um hunak husuhw Jisas hurani.

<sup>33</sup> Aria Jisas nakripam nakri, “Eik ta ini ipak mupe banab nyutob meyoh. Aria ta watak itanam inak um anudok douk neshopoke yanaki iri. <sup>34</sup> Aria ipak douk ta pupe purime, aria ta mare putiwe uwe, uwok. Agundok eik inak ipeum, ipak ta mare punaku.”

<sup>35</sup> Aria eshesh Juda esheshim debeimi heneyagwreh hakri, “Nakri ta nunak agnum, um apak ta mubirak mare mutrun um? Aria nakri ta nunam eshesh Grik esheshirub debeirubi warub douk enesh apak Juda shanak shapenyarub iri aka? Um nakri nunak nunek skulumesh Iruhin

ananin baraeen eshesh Grik aka? <sup>36</sup> Anan douk nakri, ‘Ipak ta pupe purime, aria ta mare putiwe uwe, uwok.’ Aria shopunek douk nakri, ‘Ipak ta mare punaku agundok douk eik inak ipeum, uwok.’ Baugenyum enyudok baraeen douk nyakri mumam?”

*Jisas Nakri Um Iruhin ananin Mishin Douk Ta Nyunek Arpeshe Shupe Wosik Abom Ihih Nyumneh Iri*

<sup>37</sup> Ahudok hagiguk iri nyumnah um agundok debeiguni worigun nutuh um douk debeihi nyumnah abom. Aria Jisas nakitak neyotu neyagwreh debeg atin aria nakri, “Eshudok arpeshe douk abar baesh iri, eshesh douk ta shunakmori eik aria ta ikesh anabar abar shubroh. <sup>38</sup> Eshudok arpeshe douk shusuhw eikin baraeen shugipeshen iri, abar douk ta bunekesh shupe wosik abom ihih nyumneh kabi douk madae bugeru iri worub iri ta bur bupe namudok gani numun esheshiruh aparuh aria butoguri aduk.” Enyudok ta nyutogur kabi baraeen nyetem Iruhin ananik Buk iri nyakrium. <sup>39</sup> Jisas douk nakri enyudok baraeen um Iruhin ananin Mishin. Nakripesh um agundok douk shenek bilip um anan iri anah nyumnah ta shuraen nyupenyesh um. Aria seiwok arigaha douk Iruhin Ananin Mishin douk madae nyunaki nyuwishesh uwe, uwok. Um maresh? Jisas douk watak shon nugok aria nukitaki nuto um iruhw heven nukih nurao debeinyi nyeigur uwe.

*Eshudok Sabaishi Arpeshe Douk Enesh Shakri Jisas Anan Kraish Aria Enesh Shakri Uwok*

<sup>40</sup> Douk shemnek enyudok baraeen aria enesh shakri, “Adur atin anudok arman douk anudok profet douk Iruhin nakri abom um ta neshopokan nunakmori agundok atap iri.” <sup>41</sup> Aria enesh shakri, “Uwok. Anan Kraish douk Iruhin nagraehan aria neshopokan nanakumori nurao arpeshe iri.” Aria enesh shakri, “Kraish ta mare nukitak agundok shokugi nahobig Galili, uwok. <sup>42</sup> Um maresh? Baraeen nyetem Iruhin ananik Buk iri nyakri Kraish ta nukitak apudok Devit ananip

awirop, aria amakek ta kwunabuki aburdok wabur Betlehem douk seiwok King Devit napeum.”<sup>43</sup> Namudok aria shanadiyogurum. Enesh shakri Jisas anan adur anan Kraisi. Aria enesh shakri uwok, shenek rohwa.<sup>44</sup> Anam armam douk hakri husuwan hunak huweshikan nupe, aria madae enen karowin arpen nyukri um nyuweman wis uwe, uwok.

*Eshesh Juda Esheshim Debeimi Madae Hunek Bilip Um Jisas Uwe*

<sup>45</sup> Namudok aria amudok heyoh Iruhin ananit debeiti urupat iri watak hatanam hanak um amam debeimi pris hani amam Farisi. Hatanam aria amudok debeimi harigam hakri, “Ipak madae pusuwan purani uwe um maresh?”<sup>46</sup> Aria amam hawanamam baraan hakri, “Riguk douk madae enen karowin arpen gamo nyiyagwreh kabi douk anudok arman neyagwreh um uwe, uwok.”

<sup>47</sup> Amam Farisi hemnek aria hawanamam baraan hakri, “Aria ipak douk shopunek nenek rohwumep um ananin baraan aka?”<sup>48</sup> Ipak douk da patik um apak anan debeini o anan Farisi nenek bilip um Jisas aka? Aria uwok meyoh.<sup>49</sup> Aria eshudok sabaishi arpeshe douk shenek bilipuman iri, eshesh douk madae shudukem Iruhin ananin lo uwe, uwok. Namudok aria Iruhin ta nunekumesh debeinyi baraan aria ta shupe yowesh abom.”

<sup>50</sup> Anan arman shahwaran um Nikodemus iri douk anan um amudok debeimi armam Farisi. Anan douk riguk nanak natik Jisas iri. Anan nakitak aria nakrip amudok debeimi nakri,<sup>51</sup> “Yaipo, kabi douk apakin lo seiwok Iruhin nakoguk Moses enyi nyakrium, apak ta mare arigas mukri enen arpen enyen douk nyenek yoweishi inahos, uwok. Apak ta mumnek enyenyin baraan douk mudukemesh um eshudok enyen nyenekesh iri iyoh, aria ta mukri.”

<sup>52</sup> Aria hawanaman baraan hakri, “Aria nyak douk shopunek enen um eshesh Galili aka? Nyak gamo nyutarih baraan nyetem Iruhin ananik Buk iri um, ta nyudukemesh um anan profet ta mare

anan nukitak shokugi nahobig Galili, uwok.”

<sup>53</sup> [Douk arigaha ihishmorim arpeshe shanak sisig-ikuk um esheshig urusag.

## 8

*Harauri Onok Armatok Douk Kwonek Wehrur Kwani Kupainari Arman Iri Um Jisas*

<sup>1</sup> Aria Jisas natoum yoduhw shahwarohwum Oliv iri.<sup>2</sup> Ruwahepih ruhur atur wata shopunek nakitak nanak nawish numun um aburdok nabur Iruhin ananit debeiti urupat tataoum. Aria ihishmori arpeshe shanaki shantorum aria nabuh nape nenek skulumesh um Iruhin ananin baraan.<sup>3</sup> Aria amam douk henek skulumesh um lo iri hani amam Farisi harauri onok armatok douk shaparugok kwonek wehrur kwani kupaini arman iri. Harakwi aria hakripok kweyotu agundok douk ihishmorim shantorum shapeum.

<sup>4</sup> Aria harig Jisas hakri, “Debeini Tisa, okwudok kworao arman iri armatok douk shaparugok kwonek yoweishi inahos um kwonek wehrur kwani kupaini arman.

<sup>5</sup> Enen apakin lo seiwok Iruhin nakoguk Moses enyi douk nyakri, armatok kwonek enyudokmori iri douk shukwumok utabor arigaha kwugok. Aria nyak douk nyakri mumam?”<sup>6</sup> Harigan namudok um hakri hukwiraehan um ta nukri mare shubo okwudok armatok aria ta hukri anan douk nabrig enyudok lo aria ta hunekuman kwot.

Aria baraan douk madae nukripam enen aria nabuh natao meyoh nakwu ananin hah nape nowem enen baraan atap.<sup>7</sup> Amam watak heyotu hape harigan aria nakitak neyotu iruhw aria nakripam nakri, “Ipak meini arman douk madae nunek enesh yoweishi inahos iri uwe, anan douk wosik ko nurik nukwumok marik iri utom.”

<sup>8</sup> Nakripamuk namudok aria watak nabuh natao atap nape nowem enen baraan amnab.<sup>9</sup> Douk hemnek enyudok baraan aria ihim-morim atun atun hape hakutukuk agundok aria hanak. Amam takwiyem harik aria eshudok enesh douk shape shakutukuk agundok shanak. Shanak arigaha arigaha aria

shakutukuk Jisas atun napeik. Okwudok armatok otuk douk wata kweyotu agundok Jisas nataoum.

<sup>10</sup> Jisas nakitak neyotu aria narigok nakri, “Nya, amudok armam amum? Douk madae anan niyotuguk um nunekumen baraen um eshudok yoweishi inahos nyak nyenekesh iri aka?” <sup>11</sup> Aria kwakripan kwakri, “Debeini, madae anan niyotuguk uwe, uwok.”

Aria nakripok nakri, “Eik shopunek namudok atin. Eik ta mare inemen baraen um yoweishi inahos nyak nyenekesh iri, uwok. Nyak wosik kare nyunak aria mare ta nyunek enesh yoweishi inahos shopunek uwe, uwok.”]

*Jisas Anan Douk Lait Douk Tabuhi Um Ihish Eshudok Atapishi Arpesh Shutrugun Um*

<sup>12</sup> Jisas ta nakripesh enyudok baraen shopunek nakri, “Eik kanak kabi douk lait um. Eik douk yanaki yabuh agundok atap um ihish arpesh wosik shunatrugun. Aria eshudok arpesh douk shusuhw eikin baraen shugipeshen iri, eshesh ta mare shurahaen arukwutigun um eshudok shunek yoweishi inahos iri uwe, uwok. Aria eshesh ta shupe shurahaen lait tabuhi um atugun, um eshudok shunek yopishi atin um. Aria eshesh douk ta shupe wosik abom ihih nyumneh.”

<sup>13</sup> Douk amam Farisi hemnek namudok aria hakripan hakri, “Nyak nyenek roh. Nyak douk nyak atin nyape nyakripap baraen um nyak kanak. Namudok aria nyakin baraen ta mare mukri adurin uwe, uwok.”

<sup>14</sup> Aria Jisas watak nawanamam baraen nakri, “Enyen douk adur um eik atuwe yape yakripep baraen um eik kanak, aria eikin baraen douk adurin atin. Umum maresh? Eik douk yadukem agundok douk yape aria yakitak yanamori gani agundok ta watak ikitak inak um. Aria ipak douk madae pudukem agundok eik yape aria yakitak yanamori gani agundok ta watak inak um uwe, uwok. <sup>15</sup> Ipak shopunek pagipesh agundok atapih aih aria penek skelim arpesh. Aria eik madae inek skelim enen arpen enyenyih aih uwe, uwok. <sup>16</sup> Aria douk ikri

inek skelim enen arpen enyenyih aih akure, eik ta inek skelumen adur atin. Um maresh? Enyen douk madae eik atuwe inek skelumen uwe, uwok. Aria Yain douk neshopoki eik yanaki aria douk shopunek nani eik wonek mour. <sup>17</sup> Enen baraen nyetem ipak kanak ipakin lo iri douk nyakri namudok. Nyakri, ‘Douk biom armam hiyagwreh hukri atin baraen um, aria amamin baraen douk adurin.’ <sup>18</sup> Eik yani eikin Yain douk wonekesh namudok. Eik douk yeyagwreh yakripepum eik kanak. Aria eikin Yain douk neshopok eik yanaki aria douk shopunek nani eik weyagwreh enyudok atin baraen um eik.”

<sup>19</sup> Aria harigan hakri, “Nyakin Yaken douk nape agnum?”

Aria Jisas nawanamam baraen nakri, “Ipak douk madae pudukem eik o pudukem eikin Yain uwe, uwok. Douk pudukem eik akure, eikin Yain shopunek ta pudukeman.”

<sup>20</sup> Jisas nakripesh enyudok baraen abudok nyutob nape nenek skulumesh um Iruhin ananin baraen obi nyutob. Nakripeshen numun um aburdok nabur Iruhin ananit debeiti urupataoum hurukatinyum amudok rum douk shobuk ofaibor utabor bakus um. Nape nakripesh aria madae anam armam hukitak husuwan hunak hunekuman baraen uwe, uwok. Um maresh? Ananib nyutob um shon nugok um douk watak bunaki uwe, uwok.

*Jisas Nakri, “Ipak Ta Mare Punak Agundok Douk Eik Inak Um”*

<sup>21</sup> Aria Jisas watak nakripesh nakri, “Eik douk ta inakuk aria ipak ta pupe purime. Ta pupe purime aria ipakish yoweishi inahos ta watak shupe aria shep pugok. Pugok aria ta mare punaku agundok eik inak ipeum uwe, uwok.”

<sup>22</sup> Namudok aria eshesh Juda esheshim debeimi heneyagwreh hakri, “Namudok mumam, um nakri, ‘Ipak ta mare punaku agundok douk eik inak ipeum?’ Aria nakri um ta anan kanak nunobo nugok aka, uwok?”

<sup>23</sup> Aria Jisas watak nakripam nakri, “Ipak douk agundokish arpesh aria eik

douk yape iri gani iruhw iri. Ipak douk agundok atapishi, aria eik douk madae agundok atapin arman uwe, uwok. <sup>24</sup> Douk namudok aria eik douk yakripep yakri ipakish yoweishi inahos ta watak shupe aria ta pugok. Namudok aria douk ipak mare punek bilip pukri Eik Douk Seiwok Yape Namudok Atin Iri Um, 8:24 namudok aria ipakish yoweishi inahos douk ta watak shupe aria ipak ta pugok.”

<sup>25</sup> Douk shemnek namudok aria shari-gan shakri, “Nyak meinyi arpen?” Aria nawanamesh baraen nakri, “Eik douk anudok arman douk nubokuhi watak sagramatin yakripepum. <sup>26</sup> Eik sabainyi baraen douk yakri ikripepum yoweishi inahos ipak penekesh iri aria inemep kwotogum. Aria abudok nyutob douk ta uwok. Douk ta ikrip ipak eshudok atapish arpeshep enyudok baraen douk yemnek anudok neshopoke yanaki iri nakriyen iri. Anan douk adurini aria inahos wokan iri arman.”

<sup>27</sup> Aria eshesh douk madae shudukemesh um anan nape nakripepesh um ananin Yaken um uwe, uwok. <sup>28</sup> Namudok aria watak nakripepesh nakri, “Abudok nyutob putuk Eik Anudok Arman douk yatogur adurin arpen iri piyaur rowog kruse obi, abudok nyutob ta douk pudukeme wosik pukri Eik Douk Seiwok Yape Namudok Atin Iri. Aria abudok nyutob ta douk pudukeme um ihinyumori yeneken iri douk madae iyagwreh eik atuwe ineken uwe, uwok. Aria ta pudukemesh pukri baraen yakripepen iri douk Yain neyabigeyen aria douk yakripepen. <sup>29</sup> Anudok neshopok eik yanaki iri douk nani eik wape ihih nyumneh madae nukutukuk eik atuwe ipeik uwe, uwok. Um maresh, ihih nyumneh eik yape um yenek enyudok douk anan nakriyen iri.” <sup>30</sup> Jisas watak nape nakripepesh enyudok baraen atin, aria sabaishi arpeshep adur shasuhwen dodog shagipeshen.

*Adurinyi Baraen Ta Nyukweshih Arpeshep Um Esheshish Yoweishi Inahos*

8:24 8:24 Baugenyum enyudok baraen um Jisas nakri anan douk Seiwok Nape Namudok Atin Iri Um, anan nakri um anan douk adurin Iruhin. Aria douk baraen nyetem Kisim Bek 3:14 iri nyani enen nyetem Ais 43:10 iri nyakrium. Tik enyudok atin baraen shopunek nyetem Jon 8:28, 58 aria Jon 13:19

*Aria Shupe Wosik*

<sup>31</sup> Namudok aria Jisas watak nakrip eshudok Juda douk shasuhw ananin baraen shakri adurin iri nakri, “Douk ipak pusuhw eikin baraen dodog pugipeshen um, ipak adur ta putogur eikip iri douk pugipesh eik iri. <sup>32</sup> Putogur eikipari aria ta pudukem adurinyi baraen. Aria enyudok adurinyi baraen ta nyukweshih um ipakish yoweishi inahos aria pupe wosik atin.”

<sup>33</sup> Aria eshesh watak shawanaman baraen shakri, “Apak douk Abraham ananish barheshish. Aria douk madae anesh arpeshep shuweshikap mupe munemesh mour meyohep uwe, uwok. Aria namudok nyakri um, um nyakri apak ta mutukweshih mupe wosik atin um ta mumam?”

<sup>34</sup> Aria Jisas watak nawanamesh baraen nakri, “Adur atin yakripep. Ihishmorim arpeshep douk shape shenek yoweishi inahos iri, eshesh douk yoweishi inahos showeshikesh dodog aria shenekesh shape shenemen mour meyohep. <sup>35</sup> Arpen douk nyape shakamum kupainyi nyape nyenek mour meyohep anat urupat iri, enyen douk nyenek mour meyohep. Ta mare nyupe opudok awirop uwe, uwok. Awiropanari ananin nunganin wosik ta nupe ihih nyumneh. <sup>36</sup> Namudok aria eik Iruhin ananin Nunganin ikweshih-hep-aguk um yoweishi inahos um, aria ipak adur ta putukweshih pupe wosik abom. <sup>37</sup> Eik yadukemesh um ipak douk adur Abraham ananish barheshish. Aria douk pakri pubo eik igok. Um maresh? Eik yakripepenyi baraen douk madae pusuwen uwe, uwok. <sup>38</sup> Eik douk yakripep baraen um eshudok eikin Yain neyabigeyen um. Aria ipak penek ehudok aih douk paraeh um ipakin yaken iri.”

<sup>39</sup> Aria eshesh watak shabeiman baraen shakri, “Apakin yaken douk Abraham.”

Jisas nemnek aria nebeimesh baraen nakri, “Douk ipakin yaken Abraham akure, aria enenyenen peneken iri ta

nyudukem enyudok yopinyi seiwok Abraham neneken iri atin. <sup>40</sup> Eik douk yakripep sabainyi adurinyi baraeen douk yemnek Iruhin nakripe enyi. Aria ipak douk pakri abom um pe igok. Abraham douk madae nunekesh eshudokmori yoweishi inahos uwe, uwok. <sup>41</sup> Eneshenesh yoweishi inahos penekesh iri douk penek enyudok ipakin yaken neneken iri.” Aria eshesh watak shakripan shakri, “Apakiyu amakeniyu madae wiyotu yeh upubuki uwe, uwok. Apak douk atun Yain meyh. Anan douk Iruhin atun. Apak douk ananish batowish.” <sup>42</sup> Aria watak nakriפש nakri, “Aria adur Iruhin ipakin Yaken akure, ipakip urkwip ta punawasham eik. Um maresh? Eik douk yani Iruhin wape iri aria yanaki aria douk enyudok yape. Madae ikitak inamori eikim urkum uwe, uwok. Anan neshopoke aria douk yanaki. <sup>43</sup> Ipakip urkwip madae purum eikin baraeen wosik aria pudukemen uwe um maresh? Ipak madae pudukemen uwe, ipak douk pakri uwok um pumnek eikin baraeen aria pogah ipakigos arigos. <sup>44</sup> Ipak douk adur atin ipakin yaken Satan ananish batowish. Aria douk adur dodogowip atip um punek yoweishi inahos douk anan mishin nyakitak-umesh iri. Seiwok sagomatin watak baugos um nabo arpesh shagok arigaha douk. Enenyenen adurinyi baraeen douk madae nugipeshen o niyagwrehen uwe, uwok. Um maresh, ehudok adurihi aih douk madae eneh hupenyan uwe, uwok meyh. Abudok nyutob niyagwreh enen rohwin baraeen atin, enyudok douk adur nagipesh ananah aih atih. Um maresh? Anan douk napeum nenek rohwin aria adur atin baugos um agundok shagiyagig um. <sup>45</sup> Eik douk yakripep adurinyi baraeen. Aria douk namudok, aria madae punek bilipume uwe, uwok. <sup>46</sup> Ipak ta wosik enen arpen nyukripe um enesh yoweishi inahos douk yenekesh iri aka, uwok? Aria uwok meyh. Eik douk yakripep adurinyi baraeen, aria ipak douk madae pusuhw eikin baraeen pukri adurin uwe um maresh? <sup>47</sup> Ihish Iruhin ananish arpesh douk shemnek ananin baraeen aria shasuhwen dodog shagipeshen. Aria

ipak douk adur madae Iruhin ananish arpesh uwe, uwok meyh. Namudok aria douk madae punneken atin uwe ananin baraeen.”

### *Jisas Narik Nape Aria Abraham Douk Shanabuki*

<sup>48</sup> Aria eshesh Juda esheshim debeimi hawanaman baraeen hakri, “Riguk apak douk makripen adurin baraeen. Nyak douk anan yowen meyh iri arman douk nyanaki Samaria iri. Aria douk enen yoweinyi sagab nyapeyen.”

<sup>49</sup> Aria nawanamam baraeen nakri, “Eik madae enen yoweinyi sagab nyupeye, uwok. Aria eik douk yatuk eikin Yain ananin nyeigur nyato iruhw aria ipak douk pabo eikin nyabuh. <sup>50</sup> Eik douk madae ipeum ituk eikin nyeigur nyuto iruhw uwe, uwok. Aria anan douk nohur arpesh aria eshesh shatuk eikin nyeigur nyato iruhw. Aria anan douk ta nunemesh debeinyi baraeen eshudok douk sheke agabus eik iri. <sup>51</sup> Adur atin yakripep. Eshudok arpesh douk shusuhw eikin baraeen dodog shugipeshen iri, eshesh ta mare shugok, uwok. Ta adur shupe ihih nyumneh.”

<sup>52</sup> Aria eshesh Juda esheshim debeimi watak hakripan hakri, “Douk apak adur madukemesh um nyak adur enen yoweinyi sagab nyapeyen. Abraham nani amam profet douk seiwok hagok. Aria nyak nyakri, ‘Enyudok arpen douk nyusuhw nyakin baraeen dodog nyugipeshen iri ta mare nyugok uwe, uwok. Ta adur nyupe ihih nyumneh.’ <sup>53</sup> Nyak nyakri nyak anan debeini nyariguk apakin yamenen Abraham aria anan nabuhuk atap, aria uwok? Anan douk seiwok nagok aria amam profet douk shopunek seiwok hagokuk. Aria nyak nyakri nyak douk adur meini arman?”

<sup>54</sup> Aria Jisas watak nakri, “Douk eik ipeum ituk eikin nyeigur nyuto iruhw akure, eik ta itogur nyeigur wokan iri arman meyh. Aria anudok natuk eikin nyeigur nyato iruhw iri douk eikin Yain. Aria douk adur anudok douk ipak pakri puhwaran um ipakin Iruhin iri. <sup>55</sup> Ipak douk madae pudukeman uwe, uwok. Eik

wosik adur yadukeman. Namudok aria douk eik ikri eik madae idukeman uwe, eik douk ta shuhware yenek rohwi iri kabi douk ipak um. Aria eik douk adur yadukeman wosik aria yagipesh ananin baraen. <sup>56</sup> Ipakin yamenen Abraham douk adur nanadudareh um nakri nutik eikih nyumnah um inaki agundok atap um. Anan douk natik eik agundok yanakumori um aria douk adur nanadudareh.”

<sup>57</sup> Aria eshesh Juda esheshim debeimi watak hakripan hakri, “Abraham seiwok nagok aria nyak, nyakish kwarahos douk wata sabaishi shunak shutogur 50-poreish uwe, watak. Aria nyak douk nyakri nyatik Abraham aka? Nyak nyenek rohwi.” <sup>58</sup> Aria Jisas nebeimam baraen nakri, “Adur atin yakripep. Abraham anan douk wata shunabuki uwe aria Eik Douk Seiwok Yape Namudok iri.”8:58 <sup>59</sup> Douk nakri enyudok baraen aria hohuri utabor um hakri hon nugok. Aria nanabeshuk aria nakutukuk agundok Iruhin ananit debeiti urupata tataoum aria natogur nanak.

## 9

### *Jisas Nagabe Anan Nabes Seshukanari*

<sup>1</sup> Jisas nape nanak aria natik anan nabes seshukanari arman. Anan douk seiwok amakek kwanabuki atun um nabes seshukan nape namudok atin. <sup>2</sup> Aria apak Jisas ananim disaipel marig Jisas makri, “Tisa, omi nyenekan aria yoweishi shenekan aria anan douk nabes seshukan nor ananik amakek okwokwihw apahw aria kwanabuki? Ananish yoweishi inahos meyoh shenekan aka, ananish amakenyish esheshish yoweishi inahos shenekan?”

<sup>3</sup> Douk amam harigan namudok aria Jisas nakri, “Anan nabes madae sishukan um yoweishi inahos anan nani ananish amakenyish esheshish uwe, uwok. Anan douk nabes seshukan um eik iyabig arpesh um enyudok douk Iruhin ta watak nugabeyan um. <sup>4</sup> Aria douk abudok nyutob douk kabi nyumnah um, aria apak ta mupe munek Iruhin douk neshopok eik

yanaki iri um ananin mour. Aria anab ta bunaki iri nyutob ta kabi douk wab um. Aria abudok nyutob ta mare enesh arpesh shupe shunek Iruhin ananin mour uwe, uwok. <sup>5</sup> Douk abudok nyutob eik yape agundok atap um, eik yape kabi douk lait um. Aria eik yenek sabainyi yopinyi mour yopugunum atugun um sabaishi shutiwe aria ta shugipeshe munek enyudokmori atin yopinyi mour.”

<sup>6</sup> Douk Jisas nakriyuk namudok aria nokuseh amnab nakwu arpigas nenegab batogur kabi masir um. Aria noruhur naraeyok anudok nabes seshukanari ananis nabes. <sup>7</sup> Douk naraeyokuman aria nakripan nakri, “Nyak nyunak waiyag shahwaragum Siloam iri aria nyishrokuh.” Baugenyum enyudok nyeigur Siloam douk shakri “Neshopokan nanak.” Douk nanak neshrokuh aria anan nabes watak satrugun aria natanamori um urupat.

<sup>8</sup> Aria eshudok douk shani anan shape atugun iri shani eshudok riguk shatik nape nanakrep arpesh um shukon eshudok eneshenesh iri douk shatrun um watak natrugun um aria shakri, “Nani douk nabes seshukan riguk nape nanakrep arpesh um shukon eshudok eneshenesh iri o nani kupaini?”

<sup>9</sup> Aria enesh shakri, “Douk anan atun.” Aria enesh shakri, “Anan uwok. Anan douk kabi anudok nabes seshukanari um.” Aria anan kanak adur nakri, “Douk eik atuwe, nabes seshuke iri.”

<sup>10</sup> Nakripesh namudok aria eshesh sharigan shakri, “Nyak nyenekas mumam nyakis nabes um douk watak nyatrugun um?” <sup>11</sup> Nemnek aria nebeimesh baraen nakri, “Anan arman shahwaran um Jisas iri nanaki nohur amnab nokusehab nenek masir aria naraeyokume nabes. Anan naraeyokume aria neshopoke yanak yeshrokuh agudok waiyag Siloam. Aria eik yakitak yanak yeshrokuh aria eikis nabes watak satrugun. Aria douk eik yatrugun.” <sup>12</sup> Aria eshesh sharigan shakri, “Anudok Jisas douk nape agunum?” Aria anan nakri, “Eik madae idukeman uwe, uwok.”

*Amam Farisi Hatik Anudok Douk Riguk Nabes Seshukanari*

<sup>13</sup> Aria eshesh sharao anudok riguk nabes seshukanari shanak um amam Farisi. <sup>14</sup> Aria ahudok nyumnah Jisas nokuseh amnab nagabe anudok nabes seshukanari ananis nabes um douk Sabat, ahudok nyumnah douk lo nyakri mare shunek enen mour um uwe, uwok. <sup>15</sup> Douk sharan shanak shatogur um gani amam Farisi hapeum aria amam hariganum agundok anan nenekesh mumam aria douk watak natrugun um. Aria anan nakripam nakri, “Anan nokuseh amnab nenekab batogur masir aria naraeyokume eikis nabes. Naraeyokume douk yanak yakruparuk aria watak yatrugun.” <sup>16</sup> Nakri namudok aria anam amam Farisi hakri, “Anudok nagabeiman nabes anudok arman iri, anan douk madae Iruhin nishopokan nunaki iri uwe, uwok. Um maresh? Anan douk madae nugipesh enyudok lo um mare enesh shunek enen mour ahudok nyumnah Sabat um uwe, uwok.”

Aria anam hakri, “Aria anan douk anan napeum nenek yoweishi inahos iri, anan douk ta mare nunek enyudokmori Iruhin atun neneken iri mour uwe, uwok.” Douk heyagwreh namudok aria anam hore enep urkwip aria anam hasuhw enep.

<sup>17</sup> Aria amam Farisi watak shopunek gamo harig anudok riguk nabes seshukanari hakri, “Nyak nyakriyan mumam anudok nagabeimen nabes iri? Anan douk anan yopini arman aka, anan yoweini?”

Aria anan nawanamam baraen nakri, “Anan douk anan profet.” <sup>18</sup> Anan nakri namudok, aria amudok debeimi Juda douk madae hukrium hunek bilip um agundok riguk anan douk nabes seshukan aria douk watak natrugun um uwe, uwok. Aria amam henekumesh baraen ananish amakenyish shanaki. <sup>19</sup> Douk shanaki aria harigesh hakri, “Anudok douk ipakin nuganin? Aria shopunek anan douk seiwok amakek kwanabuki aria nabes seshukan nape namudok atin? Aria anan douk nenek maresh, um douk watak natrugun um?”

<sup>20</sup> Aria ananish amakenyish shakri, “Adur, anudok douk ohwakin nuganin. Aria abudok nyutob amakek kwanabuki atinyum anan madae nutrugun uwe, uwok.” <sup>21</sup> “Aria ohwak douk madae udukemesh uwe um anan nenekesh mumam aria douk watak natrugun um. Shopunek ohwak douk madae udukem anudok nagapesh-uman nabes iri uwe, uwok. Anan douk nubokadae yopun. Porig anan kanak ba nukripep!” <sup>22</sup> Eshesh Juda esheshim debeimi douk riguk habo baraen, um hakri meishi arpesh shukri Jisas anan douk Iruhin nagraehan aria neshopokan nanakmori nunarao arpesh um, amam ta mare hukutishuk shuwish atudok eshesh Juda shape sheneyagwreh baraen-ati urupat uwe, uwok. <sup>23</sup> Douk namudok aria anudok nabes seshukanari ananish amakenyish shanogugur aria shakri, “Anan douk nubokadae yopun. Porig anan kanak ba nukripep.”

<sup>24</sup> Aria amam hahwar anudok nabes seshukanari anah shopunek aria harigan hakri, “Nyak nyuhur Iruhin ananin nyeigur um kadak nyak ta nyukri adurin atin baraen! Apak madukemesh um anudok arman nagabeimen nabes iri douk anan nenek eneshenesh yoweishi inahos iri.” <sup>25</sup> Aria anan nawanamam baraen nakri, “Eik madae idukemesh uwe. Anan douk anan yopini aka, anan douk nenek yoweishi inahos iri. Aria adur eik yadukemen iri douk anudok. Seiwok nabes seshuke, aria douk watak yatrugun.” <sup>26</sup> Aria amam debeimi Juda harigan hakri, “Anan neneken mumam aria douk nagabeimen nabes nyatrugun?”

<sup>27</sup> Aria anan nawanamam baraen nakri, “Eik douk iganigadae yakripep, aria ipak douk pakri uwok um pumnek. Ipak pakri pumnek sabaih atih um maresh? Aria ipak douk shopunek pakri pugipesh anan putogur ananish disaipel aka?”

<sup>28</sup> Aria amam heyokasan hakri, “Nyak douk anudok nagabeimen nabes iri ananin disaipel. Apak uwok. Apak douk Moses ananim disaipel. <sup>29</sup> Apak madukemesh um seiwok Iruhin douk nani Moses heyagwreh. Aria douk anudok Jisas, apak douk

madae mudukemesh um agundok anan nanamori uwe, uwok.”

<sup>30</sup> Aria anudok seiwok nabes seshukan iri nakri, “Enyudok douk adur enen anahaehin dodogowinyi mour aria eik yakitak yowiyokuk um ipak madae pudukem anan uwe, uwok! Anan nagabeime eikis nabes aria ipak douk madae pudukemesh um anudok anan napeum aria nakitak nanamori uwe aka. <sup>31</sup> Apak madukemesh um Iruhin ta mare numnek enyudok douk shenek eneshenesh yoweishi inahos iri sharigan umen iri, uwok. Anan ta numnek eshudok douk shenek lotuman iri aria shagipesh ananaih aih aria urkum iri atish. <sup>32</sup> Seiwok arigah arigaha douk, apak douk madae mutik mumnek um enen arpen nyagabeimen nabes kupainyi, douk amakek kwenyubuki atinyum seshuken sape namudok aria enyen ta nyutrugun uwe, uwok. <sup>33</sup> Aria anudok arman nagabe eikis nabes aria eik yadukemesh namudok arman douk madae nini Iruhin hupe iri aria nushopokan nunaki iri, anan ta mare nunek enen enyudokmori mour, uwok.”

<sup>34</sup> Aria amam Farisi nyirub juwehosirub aria hakripan hakri, “Riguk watak amakek kwenyubuki atin um nyenek eneshenesh yoweishi inahos arigaha douk aria nyakri nyupe nyunek skulumap um baugenyum baraen um Iruhin ananin baraen apak?” Aria amam hasuwan hawashan natogur aduk atudok eshesh Juda shantorum shape sheneyagwreh baraen-ati urupat.

*Eshudok Douk Madae Shunek Bilip Iri Uwe, Eshesh Douk Shape Kabi Nabes Seshukesh Iri Um*

<sup>35</sup> Jisas nape aria nemnek um enyudok eshesh Juda esheshim debeimi hasuhw anudok riguk nabes seshukan iri aria hawashan natogur aduk um. Nemnek aria nakitak nauriman nanak. Douk nanak naparugan aria narigan nakri, “Nyak nyenek bilip um Anudok Arman douk natogur adurinyi arpen iri aka, uwok?” <sup>36</sup> Aria anan nawanaman baraen nakri, “Debeini, Anudok Arman natogur adurinyi arpen iri douk meini?

Yakri nyukripeiman aria eik ta inek bilipuman.”

<sup>37</sup> Aria Jisas nakripan nakri, “Nyak douk nyatrun. Anudok arman, anan douk nani nyak pape peyagwreh.” <sup>38</sup> Douk Jisas nakri namudok aria anudok arman nakri, “Debeini, eik yenek bilip um nyak.” Aria nabuh noduk ohrubus natao hurukatin um Jisas natuk ananin nyeigur nyato iruhw.

<sup>39</sup> Aria Jisas nakripan nakri, “Eik yanaki agundok atap um inek skelim arpesha aria isiyaesh. Yanakmori eshudok douk nabes seshukesh madae shudukem Iruhin iri uwe um ta shutrugun, aria eshudok douk wosik shakana shutrugun shudukem Iruhin iri watak nabes sishukesh.”

<sup>40</sup> Jisas nakri namudok aria anam Farisi douk hani anan heyotu agundok iri harigan hakri, “Nyak nyakri apak douk shopunek nabes seshukap aka?”

<sup>41</sup> Aria Jisas nakripam nakri, “Aria ipak nabes sishukep akure, Iruhin ta watak nugabeyep aria ipak ta mare enesh yoweishi inahos shupenyep, uwok. Aria ipak douk pakri ipak patrugun. Douk namudok aria baraen um ipakish yoweishi inahos douk watak shapenyep.”

## 10

*Wobuwobren Baraen Um Narub Douk Sipsipahos Sheyotu Arub Iri*

<sup>1</sup> Jisas nakripesh nakri, “Adur atin yakripep, arman douk madae nuwishi wit arbudok sipsipahos sheyotu arub iri narub, aria naproki nubi nuwishi iri douk madae yopini arman uwe, uwok. Anan douk nakwuaruh atuh iri. <sup>2</sup> Aria arman douk nuwish wit um arbudok narub meyoh um arbudok sipsipirub narub iri, anan douk adur nape neyoh eshudok sipsipahos iri. <sup>3</sup> Arbudok nyutob neyoh sipsipahos iri nukri nunaki obi nyutob, aria anan nape neyoh wit um arbudok narub iri ta nukitak nijikuman wit. Nijikuman aria ta nuwish norig eshesh atin atin sipsipahos um esheshish nyeiguhw. Norigesh douk shumnek ananaih mah aria ta nurikumesh nuraesh nutogur aduk.



<sup>4</sup> Douk narao ihishmorim ananish sipsipahos shutogur adukirub um narub iyoh, nurikumesh aria eshesh ta shugiman shanak. Um maresh? Eshesh douk shadukem ananish mah. <sup>5</sup> Kupaini arman ta mare shugipeshan uwe, uwok. Um maresh, eshesh douk madae shudukem ananish mah uwe, uwok. Namudok aria douk ta shunogugur aria ta shuruwok-umanuguk.” <sup>6</sup> Jisas nakripesh enyudok wobuwobrenyi baraen, aria eshesh douk madae shudukem baugenyum uwe, uwok.

*Jisas Anan Douk Yopini Arman Neyoh Iruhin Ananish Arpesh Kabi Sipsipahos Um*

<sup>7</sup> Eshesh douk madae shudukem baugenyum uwe, enyudok wobuwobren baraen aria Jisas watak nakripesh nakri, “Adur atin yakripep. Eik kanak douk adur atudok wit douk sipsipahos shunak shuwishat aria shuwish shupe numun narub. <sup>8</sup> Ihim-morim armam douk riguk harik hanaki aria eik douk atin yanaki iri, amudok armam douk hakwuaruh atuh iri. Aria sipsipahos douk madae shumnek amamin baraen aria shugipesham atin uwe, uwok. <sup>9</sup> Eik douk adur atudok wit. Enyudok arpen douk nyuwish atudok wit aria nyuwish numun narub iri, enyen ta nyuwish Iruhin nuraen aria ta watak nyutanamori nyupe wosik atin. Aria ta nyunek witogur arbudok narub nyunak nyurim worigun um nyishoh iri. <sup>10</sup> Hakwuaruh iri douk hanakumori hukwumesh aruh, hesh aria hununish. Aria eik douk yanakmori itaurumesh shurao eikin dodog abom shupe wosik aria shunadudareh shupe wosik abom ihih yumneh.

<sup>11</sup> “Eik douk adur yopunari arman douk yape yeyoh sipsipahos iri. Aria eik douk yakri wosik um igok um itaurum eshudok sipsipahos shupe wosik. <sup>12</sup> Arman douk shatorun um nupe niyoh sipsipahos iri, anudok armam douk madae adur nunogrem eshudok sipsipahos iri uwe, uwok. Anan douk nenek mour um nupe niyohesh meyo. Aria abudok nyutob nukri nutik anat wanarit nubat tunakumori, anan ta nukutish shiyotuguk

aria nuruwok. Aria atudok nubat ta tunaki tihyahesh arigaha tusuh enen aria enesh ta shuruwok shunak atin atinyuk. <sup>13</sup> Anudok arman naruwok um maresh? Anan douk nenek mourum utabor atubor iri. Ananim urkum madae adur murum nukri nutaurum eshudok sipsipahos uwe, uwok.

<sup>14</sup> “Eik douk adur yopunari arman yeyoh sipsipahos iri. Eik douk yadukemesh wosik um eikishi sipsipahos aria eshesh shopunek shadukem eik. <sup>15</sup> Aria kabi douk Yain nadukem eik aria eik yadukem anan um. Aria eik douk yakri wosik um igok um itaurum eikish sipsipahos shupe wosik. <sup>16</sup> Eshudok enesh arpesh kabi eikish sipsipahos um douk eikishi. Aria eshesh douk shapeik rougun madae shuni eshudok sipsipahos douk sheyotu arbudok eikirub narub iri shiyotu um uwe, uwok. Aria eik douk shopunek yakri ta iraesh shunaki aria ta shumnek eikin baraen. Aria douk ta shuni eshudok enesh sharik iri shutogur atish shiyotu atubur nabur aria eik atuwe ipe iyohesh. <sup>17</sup> Eikin Yain douk adur urkum makri munawasham eik abom. Um maresh? Eik douk yakri wosik um she igok itaurum arpesh aria ta watak shopunek ikitaki ipe. <sup>18</sup> Ta mare enen arpen nyubo eik igok um enyenyim urkum uwe, uwok. Eik ta igok um eik kanak eikim urkum. Iruhin neke big um inek enyudok aria douk ta ineken. Neke big um igok um aria shopunek neke big um ta watak nutaurume ikitaki ipeum.” <sup>19</sup> Douk Jisas nakripesh enyudok baraen aria eshesh Juda esheshim debeimi watak shopunek hanadiyogur um henek biyab lainab. <sup>20</sup> Sabaimi hakri namudok. Hakri, “Enen yoweinyi sagab nyapeyan aria nagagak abom. Ipak pemnek ananin baraen um maresh?”

<sup>21</sup> Aria anam hakri, “Enen yoweinyi sagab nyapenyannari ta mare niyagwreh namudok uwe, uwok. Aria yoweinyi sagab ta nyuhur anan nabes seshukanari ananis nabes watak nutrugun mumam? Namudok ta uwok.”

*Eshesh Juda Esheshim Debeimi Henenem Horim Um Jisas*

<sup>22</sup> Abudok nyutob um eshesh Juda shantorum shape Jerusalem aria shenek worigun um urkwip purum seiwok esheshish popehesh yamehesh watak shopunek shagabe Iruhin ananit debeiti urupat shawish shenek lotu um Iruhin um douk banak batoguri. Aria abudok nyutob shantorum obi nyutob douk nyumanugos-ibi nyutob. <sup>23</sup> Aria Jisas nanak nawish numun narub Iruhin ananit debeiti urupat tataoum aria nape narahaen nanak enyudok debeinyi womaga douk shahwaren um Solomon ananin womaga iri. <sup>24</sup> Aria eshesh Juda esheshim debeimi hanaki hantorum herharahan aria harigan hakri, “Banob um meibi nyutob aria nyak ta nyukripap um nyak adur meini arman? Aria nyak Kraisdouk Iruhin nagraehen aria neshopoken nyanakmori nyurao arpesh um, aria douk apak makri adur nyukripap um apak ta mudukemesh.”

<sup>25</sup> Aria Jisas nabeimam baraen nakri, “Eik douk yakripep, aria ipak douk madae pusuhw eikin baraen pukri adur uwe, uwok. Ihin mour douk yohur eikin Yain ananin nyeigur aria yeneken nyatogur patrin iri, enyen douk adur nyeyabigep agundok eik douk meini arman um. <sup>26</sup> Aria ipak douk madae pusuhw eikin baraen pukri adur uwe, uwok. Um maresh? Ipak douk madae eikish sipsipahos uwe. <sup>27</sup> Eikish sipsipahos douk shadukem eikih mah. Eik douk shopunek yadukem eshesh wosik aria douk shagipesh eik. <sup>28</sup> Shagipeshe aria ta yataurumesh um mare shunak shuwishuk uwe, uwok. Eik ta itaurumesh um adur shupe wosik abom ihih nyumneh. Aria ta mare enen arpen nyunaki nyutiweyesh eikis wis uwe, uwok meyoh. <sup>29</sup> Eikin Yain douk nekeyesh iri, anan douk debeini nenek uhwin um ihishmori arpesh shape shakam. Aria douk ta mare enen arpen nyunaki nyutrunchesh ananis wis uwe, uwok meyoh. <sup>30</sup> Eik yani Yain douk adur atin watogur atun meyoh.”

<sup>31</sup> Douk amam Juda hemnek namudok

aria watak shopunek hohuri utabor um hakri hon nugok. <sup>32</sup> Aria Jisas watak nakripam nakri, “Eikin Yain nakripe um inek sabainyi anan atun neneken iri mour aria douk yeneken nyatogur ipak patrin. Aria ipak urkwip porum meinyi debeinyi mour douk eik yeneken aria ipak douk pakri pukwume utabor?”

<sup>33</sup> Aria amam watak hawanaman baraen hakri, “Apak douk madae mukri um mukwumen utabor um agundok nyenek enyudok Iruhin atun neneken iri mour nyatogur um uwe, uwok. Aria makri menyum agundok nyenek enenyenen nyabubunim Iruhin um. Nyak douk arpen meyoh, aria nyakri nyak Iruhin.”

<sup>34</sup> Aria Jisas watak nebeimam baraen nakri, “Enen baraen nyetem ipakin lo iri douk nyakri namudok. Iruhin nakri, ‘Ipak douk god omi.’<sup>10:34</sup> <sup>35</sup> Eshudok arpesh seiwok Iruhin nekeshi ananin baraen iri, anan douk nahwadesh god omi. Aria apak madukemesh um Iruhin ananin baraen nyetem ananik Buk iri douk adurin atinyi. Madae nyukri kupaenyi atin uwe, uwok. <sup>36</sup> Aria eik douk Yain meyoh nagraehe yape ananiwe atuwe aria neshopoke yanakmori agundok atap. Eik yabuhia aria yakripep yakri eik douk Iruhin ananin nuganin. Namudok aria ipak pakri eik yape yenek enenyenen yabubunim Iruhin um maresh? Um agundok yakri, ‘Eik douk ananin nuganin’ um aka? <sup>37</sup> Aria eik mare inek eikin Yain Iruhin ananin mour um, aria ipak douk wosik mare pusuhw eikin baraen pukri adur uwe, uwok. <sup>38</sup> Aria eik douk adur yenek ananin mour. Aria douk ipak pakri uwok um punek bilip um eik um agundok yakri eik douk Iruhin neshopoke yanakmori. Aria ipak douk patiwene yenek sabainyi Iruhin atun neneken iri mour nyatogur aria douk ta punek bilipume. Punekesh namudok um ipak ta adur pudukemesh abom um Yain nape eik aria eik yape anan.”

<sup>39</sup> Douk nakri namudok aria amam

<sup>10:34</sup> <sup>10:34</sup> Enyudok baraen ‘Ipak douk god omi’ douk nyetem Sam 82:6. Baugenyum baraen nyakri Iruhin ananish arpesh shenek ananin mour iri shape debeishi um ihishmorim eneshesh eshudok shakus agundok atap um.

watak hakri husuwan hunak huweshigan nupe shunuweshik-ati urupat. Aria nakutumukuk ba nanak. <sup>40</sup> Nakutumukuk nanak aria nabinawish worub Jordan nanak um agundok douk riguk Jon nenek baptaisumesh iri nape nenek baptaisumesh um. Nanak aria nape nagundok. <sup>41</sup> Aria sabaishi arpes shanaki agundok anan napeum aria shakri, “Adur atin, Jon anan douk madae nunek enen Iruhin atun neneken iri mour uwe, uwok. Aria ihinyumori baraen anan neyagwrehen abom um anudok arman iri douk nyatogur adurin atin abom.” <sup>42</sup> Aria sabaishi arpes shape agundok iri shenek bilip um Jisas shakri anan douk adur Kraiss.

## 11

### *Lasarus Nagok*

<sup>1</sup> Anan arman shahwaran um Lasarus iri douk arugeh hapeyan. Anan nani ananiyu bio mohwiyariyu, Maria kwani okwokwik awik Mata douk wape abrudok wabur Betani. <sup>2</sup> Aria Maria douk okwudok armatok riguk kwourak sanda Jisas ananiruh yeriweruh aria watak kwakwu okwokwig barag kwubatiguman yeriweruh iri. Aria douk okwokwin mohunin Lasarus arugeh hapeyan. <sup>3</sup> Aria ananiyu mohwiyariyu wonek baraen nyanak um Jisas wakri, “Debeini, nyakin arpen douk nyak urkum manawashaman iri douk arugeh hapeyan.”

<sup>4</sup> Douk Jisas nemnek namudok aria nakri, “Baugos um ehudok arugeh han um douk madae hon um adur nugok uwe, uwok. Ekeh douk han um arpes shutik Iruhin ananin dodog aria shutuk anan nini eik ananin Nuganin ohwakish nyeiguhw shuto iruhw.” <sup>5</sup> Jisas anan douk adur urkum manawasham Mata kwani okwokwik awik Maria wani Lasarus. <sup>6</sup> Anan douk nemnek um agundok Lasarus arugeh hapeyan um, aria nape biyeh nyumneh shopunek nagundok douk anan napeum.

<sup>7</sup> Douk nape biyeh nyumneh hanak hadiguk aria nakrip apak ananim disaipel nakri, “Apak watak mutanam munak um Judia.” <sup>8</sup> Douk apak memnek aria makri, “Debeini Tisa, nubokuhi atin amam Juda

hakri hukwumen utabor. Aria douk watak shopunek nyakri nyunak ganudok aka?”

<sup>9</sup> Aria Jisas nawanamap baraen nakri, “Anah nyumnah douk 12-porein aua um wah hutaoum. Aria douk enen arpen nyukri nyurahaen nyumnah wah hatao obi nyutob um, enyen ta ko nyutrugun wosik aria ta mare nyutu uwe, uwok. <sup>10</sup> Aria enyen nyukri nyurahaen wab um, enyen douk ta nyunotutuk aria nyutu nyubuh. Um maresh? Agagun douk arukwutigun aria enyen ta mare nyunatrugun wosik uwe, uwok.” <sup>11</sup> Douk Jisas nakriyuk namudok aria nakri, “Apakin arpen Lasarus douk neshuh. Aria eik ta watak inak inyubaran.”

<sup>12</sup> Aria apak ananim disaipel makri, “Debeini, anan douk eneh arugeh hapeyan ba neshuh um, anan douk ta watak yopun.” <sup>13</sup> Jisas douk nakri um agundok Lasarus adur nagok um. Aria apak ananim disaipel memnek aria makri anan nakri um aduribus jobus san aria neshuh.

<sup>14</sup> Namudok aria Jisas nowerehamap baraen nakri, “Lasarus douk nagok. <sup>15</sup> Aria eik urkum morum ipak aria yanadudareh. Um maresh? Anan nagok um, eik douk madae inak itogrumesh uwe, uwok. Yanadudareh um maresh, apak ta munak mutrish aria ipak ta putik enen mour ta eik ineken iri aria ta punek bilip pukri eikin baraen douk adurinyi. Aria douk ipak yowi ba munak.”

<sup>16</sup> Eshesh Juda douk shakri shubo Jisas nugok. Namudok aria Tomas douk shahwaran um Didimas iri nakrip apak ananim disaipel nakri, “Kitak munam Debeini munak. Munak um kadak shukri shubo anan nugok um, aria eshesh douk shopunek shubo apak muni anan mugok ahudok atuh.”

### *Jisas Anan Douk Debeini Aria Dodogowin Um Nukrip Shagok Iri Watak Shukitak Shupe*

<sup>17</sup> Douk Jisas nanak natogur hurukatinyum Betani aria anan nemnek um Lasarus douk sharuman nor wonugwehw 4-poreih nyumneh. <sup>18</sup> Abrudok wabur Betani douk madae bupeik rougun um

Jerusalem uwe, uwok. Bape iri hurukatin, kabi douk biyen atin kilomita um. <sup>19</sup> Aria sabaishi Juda shanaki shani Maria aria Mata shapeum shugabemo owowiruh aparuh um agundok owowin mohunin nagok um. <sup>20</sup> Douk Mata kwomnek um agundok Jisas nape nanakumori aria kwakitak kwanak um kuparugan yah. Aria Maria douk kwapeik urupat.

<sup>21</sup> Douk Mata kwanak aria kwakrip Jisas kwakri, “Debeini, douk nyak nyupe agundok akure, eikin mohunin ta mare nugok uwe, uwok! <sup>22</sup> Aria douk shopunek yadukemesh um, maresh eshudok douk nyak nyunek beten nyorig Iruhin um nunekesh iri, anan ta nunekesh.”

<sup>23</sup> Aria Jisas nakripok nakri, “Nyakin mohunin ta watak nukitaki.”

<sup>24</sup> Mata kwomnek aria kwakripan kwakri, “Eik yadukemesh, ahudok hugiguk iri nyumnah ihishmorim shagok iri watak shukitakumori shagokum, aria anan douk ta watak nukitaki.” <sup>25</sup> Aria Jisas nakripok nakri, “Douk eik atuwe debeiwe iri aria dodogoiwe um ihur shagok iri watak shukitak shupe wosik um. Aria eshudok douk shasuhw eikin baraen shagipeshen aria shagok iri, eshesh douk ta watak shukitak aria adur shupe wosik atin. <sup>26</sup> Aria eshudok douk watak shape aria shusuhw eikin baraen shugipeshen iri, eshesh ta mare shugok uwe, uwok.” Aria anan narig nakri, “Nyak nyenek bilip nyakri enyudok baraen douk adur atin aka, uwok?”

<sup>27</sup> Aria Mata kwakri, “Adur, Debeini. Eik douk yenek bilip yakri nyak douk Iruhin ananin Nuganin. Yakri nyak Kraiss, douk Iruhin nagraehen aria neshopoken nyanakmori nyurao arpesih iri.”

### *Jisas Nereh Um Lasarus*

<sup>28</sup> Douk Mata kwakriyuk enyudok baraen aria watak kwatanamum kwanak kwahwar okwokwik awik Maria. Douk kwanaki aria kwakripok shokubur kwakri, “Apakin Debeini Tisa douk nanaki aria nakri nyak nyunak nyutrui.”

<sup>29</sup> Douk Maria kwomnek namudok aria arigas kwaikitak kwanak um kutik Jisas.

<sup>30</sup> Anan Jisas douk watak nunak nutogur wabur uwe, uwok. Watak neyotu

yah agundok douk Mata kwarik kwanak kwaparugan um. <sup>31</sup> Enesh Juda douk shani Maria shape okwokwit urupat um shugabeimok apahw. Douk shatik um okwok arigas kwaikitak kwanak um aria shakri okwok ta kwanakum wonugwehw um kwupe kureh. Namudok aria shakitak shagipeshok shanak.

<sup>32</sup> Douk Maria kwanak kwatogur agundok Jisas natogur napeum aria kwatrun. Kwatrun aria kwanak kwabuh kwoduk ohrubus hurukatinyum anan aria kwakri, “Debeini, douk nyak nyupe agundok akure, eikin mohunin ta mare nugok uwe, uwok.”

<sup>33</sup> Jisas natruk um kworeh aria eshesh shanamok iri Juda douk shopunek shataurumok shereh. Natic namudok aria ananihw apahw yowehw abom aria nenek giha. Aria anan shopunek nakri nunamesh shureh. <sup>34</sup> Aria douk narigesh nakri, “Ipak panak paruman agnum?”

Aria eshesh shakri, “Debeini, nyak yowi ba nyutik.” <sup>35</sup> Douk shanak aria Jisas nereh. <sup>36</sup> Eshudok Juda shatik um agundok Jisas nereh um aria shakri, “Ipak putik, ananim urkum douk yowem abom um manawasham Lasarus.”

<sup>37</sup> Aria enesh shakri, “Anan douk nagabe anan nabes seshukanari aria anan watak natrugun. Aria namudok mumam, um anan madae nutaurum Lasarus um mare nugok um uwe?”

### *Jisas Nohur Lasarus Nakitak Nape*

<sup>38</sup> Jisas ananihw apahw watak shopunek yoweh abom aria nenek gihaum eshudok arpesih aria nanak arigah nanak natogurum wonugwehw. Ahwudok wonugwehw douk shatukohw shawish onok burbuduk shenek hurupihw. Aria agundok umunihw um douk shabodigi utom shanak shashapomuk wonugwehw. <sup>39</sup> Aria Jisas nakri, “Bodiguk amudok utom douk matao umunihw um wonugwehw iri.”

Aria anudok nagok iri ananik mohwukwik Mata kwakri, “Debeini, apak maruman noruk nubatih nyumneh aria anan douk ta nisig.”

<sup>40</sup> Aria Jisas nakripok nakri, “Eik douk iganigadae yakripen. Douk nyak

nyusuhw eikin baraen nyukri adurin um, nyak douk ta nyutik agundok Iruhin adur dodogowin atun um.”<sup>41</sup> Namudok aria eshesh shanak shabodiguk amudok utom. Aria Jisas nanig natik iruhw aria nakri, “Yain, eik douk yenek tenkyumen. Um maresh? Nyak douk nyemnek eikin beten.”<sup>42</sup> Eik yadukemesh um ihih nyak wosik nyemneke um agundok yenek beten yahwarenyum. Aria eik urkum morum eshudok sheyotu agundok iri, aria douk yakri namudok. Um yakri eshesh shutik enyudok mour douk eik ta ineken iri aria shunek bilip shukri eik douk nyak nyeshopoke aria douk yanaki.”<sup>43</sup> Douk nakriyuk enyudok aria nahwar debeg nakri, “Lasarus, arigah kitak tograri!”

<sup>44</sup> Aria anudok nagok iri adur nakitak natograri. Ananish roguhwa aria aiyas douk sheshrehash rupeh. Ananig yomag shopunek shesherehog anah rupah. Aria Jisas nakripesh nakri, “Ipak pukweshihuk rupeh aria anan nunak.”

*Eshesh Juda Esheshim Debeimi Hape Habo Baraen Um Hubo Jisas Nugok*

*(Matyu 26:1-5; Mak 14:1-2; Luk 22:1-2)*

<sup>45</sup> Sabaishi Juda douk shanaki shani Maria shapeum shugabeimok apahw. Eshesh douk shatik enyudok Jisas neneken iri mour aria adur shenek bilipuman.<sup>46</sup> Aria enesh shatanam shanak shakrip amam Farisi um enyudok Jisas neneken iri.<sup>47</sup> Shakripam aria amam hani debeimi pris hahwar amudok anam debeimi Juda douk hape hasuhw kwotog iri hanaki. Hanaki hape atugun aria hakri, “Anudok arman douk nenek sabainyi Iruhin atun neneken iri mour. Aria apak douk ta munekan mumam?”<sup>48</sup> Apak mukri muku-tunuguk ba nupe nunek enyudokmori atin um, ihishmorim arpesh ta shunek bilip um anan atun. Namudok aria eshesh Rom esheshim debeimi ta hunaki hununu atudok Iruhin ananit debeiti urupat aria ta hubo eshudok ihishmorim apakishi arpesh shugok.”

<sup>49</sup> Aria anudok arman shahwaran um Kaiafas iri douk nani amam hape. Anan douk debeini pris um enyudok kwar. Anan nemnek aria nakripam nakri, “Ipak

douk madae pudukem enesh eshudok uwe, uwok.”<sup>50</sup> Ta pudukemesh aka, uwok? Enyen douk wosik um mubo atun arman nugok aria mutaurum eshudok ihishmorim Judaish arpesh um shupe wosik. Aria ta douk uwok um, apak ihipmorim Juda ta mugok mutuh.”

<sup>51</sup> Enyudok baraen douk madae anan meyoh nukriyen uwe, uwok. Anan douk debeini pris um enyudok kwar. Namudok aria Iruhin nohur anan nakri enyudok baraen kabi amam profet heyagwreh um. Nakriyen um Jisas douk ta nugok um nutaurum ihishmorim eshesh Juda.<sup>52</sup> Aria shopunek anan ta mare nugok um nutaurum eshesh Juda atish um shupe wosik, uwok. Anan ta nugok um nurao ihishmorim Iruhin ananishi batowish douk shanak shape kupakupa irubi warub iri um shutogur atish arpesh.

<sup>53</sup> Aria ahudok nyumnah arigaha douk eshesh Juda esheshim debeimi hape habo baraen um hurim anah yah um hubo Jisas nugok.

<sup>54</sup> Douk namudok aria agundok eshesh Juda shapeum, Jisas douk madae nurahaen yopugunum atin uwe, uwok. Aria nakitak nakutukuk abrudok wabur nanak um anagun douk nape hurukatinyum wehigunum arpesh uwok um. Nanak um anabur wabur shahwarabur um Efraim iri aria nani apak ananim disaipel mape agundok.

<sup>55</sup> Aria ahudok nyumnah um eshesh Juda shunek esheshigun debeiguni worigun Pasova um douk hanaki hurukatin. Aria sabaishi arpesh shape sabairubi warub iri shakitak shato um Jerusalem. Shanak um shugipesh esheshin lo shunagapesh eshesh kanak um Iruhin nutrish nukri wosik yopishi aria nuhut biyen shunak shuwok agundok worigun.<sup>56</sup> Douk sabaishi arpesh shanaki aria shape shaurim Jisas. Eshesh sheyotu numun narub Iruhin ananit debeiti urupat tataoum aria eshesh kanak shape sheneyagwreh shakri, “Ipak pakri mumam? Anan ta nunaki um agundok worigun aka, uwok?”

<sup>57</sup> Aria amam debeimi pris hani amam Farisi douk hakripesh um douk enen arpen nyudukemesh um agundok Jisas

nanak napeum, aria ta enyen nyunaki nyukripam um amam hunak husuwan huweshikan.

## 12

*Maria Kwourak Sanda Kwakwrup Jisas Ananiruh Yeriweruh (Matyu 26:6-13; Mak 14:3-9)*

<sup>1</sup> Douk 6-poreih nyumneh watak hapeum shunek agundok debeiguni worigun Pasova, aria Jisas nakitak nanak um Betani. Betani douk Lasarus ananibur wabur. Anudok douk riguk nagok aria Jisas watak nonohur nakitak nape iri. <sup>2</sup> Jisas nanak nape agundok aria eshesh shenekuman anagun worigun. Mata kwape kwowah worigun aria Lasarus iri Jisas douk hani eshudok shanaki um shuni Jisas shuwok worigun iri shape shersharieh tebol. <sup>3</sup> Aria Maria kwakitak kwohur enen yopinyi sanda nyeigurinyum nad douk shatorin debeibori utabor iri aria kwanak kwouraken kwape kwenyayok Jisas ananiruh yeriweruh. Kwouraken iyoh aria watak kwakwu okwokwig barag kwape kwogabe yeriweruh. Aria arpeshe shape numun urupat iri shemnek enyudok sanda nyeisik yopuri unar.

<sup>4</sup> Aria anan Jisas ananin disaipel shahwaran um Judas Iskariot iri douk nanamesh shape agundok. Aria anan douk ta niyabig Jisas um ananim horim aria amam husuwan hunak hon nugok iri. Douk anudok Judas natik namudok aria nakri, <sup>5</sup> “Um maresh aria ipak madae pukri um enesh arpeshe shutor enyudok sanda aria shukop 300 siliwaibor utabor uwe? Shukop aria misiyabor um eshudok yaruhish arpeshe.” <sup>6</sup> Anan douk madae urkum murum yaruhish arpeshe aria douk nukri namudok uwe, uwok. Anan douk nakwuaruh atin iri. Shopunek asudok amamis bokis douk hape hakutu utabor borasi douk anan neyohos aria apa nakwumobor aruh abrudok utabor.

<sup>7</sup> Jisas nemnek namudok aria nakri, “Ipak ruwokuk um okwok douk kwonek enyudok aria kwogapesh eik um ahudok nyumnah ta she igok aria shunak shurume um. <sup>8</sup> Yaruhish arpeshe um eshudok

iri ta shini ipak pupe ihih nyumneh. Aria eik ta mare ini ipak mupe roubium uwe, uwok.”

*Debeimi Pris Habo Baraen Um Hubo Lasarus Nugok*

<sup>9</sup> Sabaishi Juda douk shemnek baraen um Jisas nanak nape Lasarus ananit urupat gani Betani. Namudok aria eshesh shanak um shutrun. Aria eshesh douk madae shunak um shutik Jisas atun uwe, uwok. Eshesh shopunek shanak um shutik Lasarus douk nagok aria Jisas watak nonohur nakitak nape iri. <sup>10</sup> Douk namudok aria amam debeimi pris habo baraen um hakri hubo Lasarus nugok shopunek. <sup>11</sup> Um maresh? Sabaishi Juda douk shatik um agundok Jisas nonohur nakitak napeum, aria eshesh shakutukuk esheshim debeimi Juda shanak shasuhw Jisas ananin baraen shagipeshen.

*Jisas Nanak Nawish Jerusalem Kabi Anan King Um*

*(Matyu 21:1-11; Mak 11:1-11; Luk 19:28-40)*

<sup>12</sup> Sabaishi arpeshe douk shanaki shape Jerusalem um shunek agundok debeiguni worigun Pasova. Douk ruwahepih aria eshudok sabaishi arpeshe shemnek baraen um shakri Jisas douk neyotuwu yah nape nanakmori Jerusalem. <sup>13</sup> Douk namudok aria eshesh shanak shatupoki palmenigas aragas shanak arigaha shaparugan aria shahwar shakri,

“Apak manadudareh um Iruhin!

Apak makri Iruhin nunekuman yopinyi anudok arman douk nanakumori Debeini ananin nyeigur iri.

Makri anan nunekuman yopinyi apak Israel apakin King!”

<sup>14</sup> Jisas naparug enen nugaen donki douk nakih netem aria nanak kabi douk enyudok baraen nyetem Iruhin ananik Buk iri nyakrium. Baraen enyudok <sup>15</sup> nyakri,

“O ipak arpeshe pape abrudok debeiburi wabur Saion iri,

ipak mare punogugur.

Tik, ipakin King anudok apa nanaki.

Anan netemori enen nugaen donki aria nape nanaki.”

<sup>16</sup> Aria abudok nyutob, apak ananim di-saipel douk madae mudukem baugenyum enyudok baraen uwe, uwok. Aria arigaha douk Jisas watak natanam natoum iruhw heven, aria abudok nyutob apak douk madukemen. Urkum morum aria madukemesh makri enyudok baraen nyetem Iruhin ananik Buk iri douk nyakrium anan. Eshesh douk shopunek urkum morum enyudok douk eshesh kanak shenekesh um anan iri.

<sup>17</sup> Aria abudok nyutob Jisas nahwar Lasarus nakitak natograri wonugwehw aria watak napeum, sabaishi arpeshe douk sheyotu shatrun. Douk namudok aria eshesh shanak shanakripam um enyudok anan neneken iri. <sup>18</sup> Aria sabaishi arpeshe shemnek um enyudok Jisas neneken iri, um nohur Lasarus um. Douk namudok aria eshesh shanak shaparugan yah. <sup>19</sup> Amam Farisi hatik namudok aria hanakripam hakri, “Tik, apak meneken iri mour douk madae dodogowin uwe, uwok. Ihishmorim armam armago douk shashi shanak shagipesh Jisas atun.”

### *Enesh Grik Shakri Shutik Jisas*

<sup>20</sup> Enesh eshesh Grik douk shanak um Jerusalem shani eshudok arpeshe douk shanak um shunek lotu um Iruhin ahudok debeihi nyumnah douk shenek agundok debeiguni worigun ahi. <sup>21</sup> Aria eshudok Grik shanaki shatogurum Filip. Anan douk nanaki abrudok wabur Betsaida douk bape agudok shokugi nahobig Galili iri. Shanaki aria shakripan shakri, “Debeini, apak makri mutik Jisas.” <sup>22</sup> Filip nemnek aria nanak nakrip Andru. Aria amam biom hanak hakrip Jisas. <sup>23</sup> Hakripan aria anan nawanam baraen nakri, “Abudok nyutob um Iruhin nunek Eik Anudok Arman douk yatogur adurinyi arpen iri um irao debeinyi nyeigur um douk abudok batogur. <sup>24</sup> Adurin atin yakripep. Douk urubit wit tukri mare tugruki tubuh tukus amnab aria yarit um, atat douk ta atudok atat ta tugok jurug. Aria douk atat mamokit tugruki ba tubuh tukus yopubi

amnab aria tugok um, atat douk ta watak pupurot arah tukih aria ta sabaiti urubit tir. Kabi ta eik igok aria shurume um.

<sup>25</sup> Enyudok arpen douk enyen urkum murum enyen atin um nyukri nyupe wosik nyupe roubi nyutob agundok atap iri, enyen ta mare nyupe roubi uwe, uwok ta nyunununukuk. Aria enyudok arpen douk watak nyupe agundok atap aria enyen mare urkum murum enyen atin aria nyunek eikin mour iri, enyen douk ta nyupe wosik abom ihih nyumneh. <sup>26</sup> Aria enyudok arpen douk nyunek eikin mour iri, enyen ta adurin nyugipesh eik. Aria agundok eik inak ipeum, enyen shopunek ta nyunaku nyuni eik upe. Aria eikin Yain ta nutuk enyenyin nyeigur nyuto iruhw.”

### *Jisas Nakri um Agundok Ta Shon Nugok Um*

<sup>27</sup> Aria Jisas watak shopunek nakri, “Douk eikihw apahw douk adur yowehw abom aria baraen uwok um ta ikri um. Eik ta mare iyorig Yain um nukweshihuk yah um enyudok amaen ta mare nyutogurume um uwe, uwok. Baugos um agundok eik yanakmori agundok atap um, douk yanakmori iwish um enyudok amaen atin. <sup>28</sup> Yain, nyak nyunek enyudok ihinyumori mour kabi nyak nyakrium. Nyuneken um nyunatuk nyakin nyeigur nyuto iruhw.”

Douk Jisas nakri namudok aria anah mah hanaki gani iruhw heven. Aria ahudok mah hakri, “Eik iga yatuk eikin nyeigur nyato iruhw. Aria douk ta watak shopunek gamo ituken nyuto iruhw um anah shopunek.” <sup>29</sup> Aria eshudok sabaishi arpeshe douk sheyotu hurukatin iri shemnek ahudok mah aria shakri utag pogarog. Enesh shakri enen ensel nyani Jisas heyagwreh.

<sup>30</sup> Aria Jisas nakripesh nakri, “Ahudok mah hanaki iruhw utag iri douk madae hunaki um hutaurum eik uwe, uwok. Ahah douk hanakium hutaurum ipak. <sup>31</sup> Aria douk, Iruhin ta nunekumesh kwot eshudok douk shukon agabus iri. Aria shopunek anan ta

12:32 **12:32** Jisas nakri ta shon shunaur rowog kruse aria nugok. Namudok aria Iruhin ta nunohur nuto iruhw heven nukih nurao Debeinyi nyeigur kabi douk baraen nyetem Filipai 2:9-11 iri nyakrium.

nubo Satan nubuhuk. Anan douk nape debeini um agundok atap iri. <sup>32</sup> Aria eik ta shutuke shiyaur iruh12:32aria ta iyonuki ihishmorim arpesh shunakmori eik.” <sup>33</sup> Anan douk nakri namudok um eshesh shumnek aria shudukem ahudok yah douk ta anan nugok um.

<sup>34</sup> Douk namudok aria eshudok sabaishi arpesh shakrip Jisas shakri, “Apak madukemesh um, apakin lo nyakri abudok nyutob Kraish nutogurum, anan ta mare nugok uwe, uwok. Aria ta nupe adur ihih nyumneh. Aria namudok nyakrium, um nyakri ‘Ta shusuhw Anudok Arman douk natogur adurinyi arpen iri aria shon nugok nir rowog kruse um?’ ‘Anudok Arman natogur adurinyi arpen iri’ douk adur meini?”

<sup>35</sup> Aria Jisas nakripesh nakri, “Eik douk ta ini ipak mupe banab nyutob meyoh kabi hanu anat lait tabuhumepum. Douk namudok aria ipak pupe punek yopihi atih aih abudok nyutob atudok lait hanut tabuhumepum. Um ipak mare pupe arukwutigunum uwe, uwok. Meinyi arpen nyarahaen arukwutigunum iri, enyen douk ta mare nyudukem agundok enyen nyanak um uwe, uwok. <sup>36</sup> Douk abudok nyutob eik atudok lait watak yani ipak mape um, ipak adur pusuhw eikin baraen dodog pugipeshen. Punekesh namudok um, ipak ta putogur arpesh douk shara-haen laitigun um iri.”

*Sabaishi Juda Madae Shunek Bilip Shukri Jisas Ananin Baraen Douk Adurin Uwe, Uwok*

Douk Jisas nakriyuk namudok aria nakutishukuk nanak nanabeshuk nape anagun. <sup>37</sup> Anan watak nanamesh shape obi nyutob, anan douk nenek sabainyi Iruhin atun neneken iri mour shatrin. Shatrin aria eshesh madae shunek bilip um anan uwe, uwok. <sup>38</sup> Eshesh shenekesh namudok um enyudok baraen seiwok profet Aisaia neyagwrehen aria nyetem Iruhin ananik Buk iri nyutogur adurin atin. Baraen enyudok. Nyakri, “Debeini, apak douk makripesh nyakin baraen, aria eshesh madae shusuhwen shukri adurin uwe, uwok.

Eshesh shatik enyudok dodogowinyi mour nyak Debeini nyeneken iri aria eshesh madae shukri nyak douk Debeini uwe, uwok.”

<sup>39</sup> Eshesh douk madae shukuna wosik shunek bilip um Jisas uwe, uwok. Um maresh? Enyudok enen Aisaia nenyemori baraen douk nyetem namudok, <sup>40</sup> Iruhin nakri,

“Eik yatapok esheship urkwip pani esheshis nabes.

Namudok aria mare ta shutrugun wosik shutik eshudok urkwip purumesh aria shudukem baugenyum baraen.

Namudok aria ta shukri um shatanam shuke aparuh eik

um igabeyesh shupe wosik. Aria shakri uwok.”

<sup>41</sup> Seiwok Aisaia douk natik agundok Jisas adurin dodogowin atun nyeigur nyato-uman um aria nowemagak enyudok baraen um anan.

<sup>42</sup> Enyen douk adur. Aria abudok nyutob sabaimi eshesh Juda esheshim debeimi henek bilip um Jisas. Aria amam douk hanogugur um amam Farisi aria madae huwerek amamin bilip yopugunum uwe, uwok. Um maresh? Hakri ta amam Farisi hukri uwok um ta mare huwish hunamesh hunek lotu agudok urusag douk eshesh Juda douk shape shenyagwreh baraen-ogwi uwe, uwok.

<sup>43</sup> Umum maresh? Amam henek bilip iri douk mishish shakitak abom um arpesh ta meyoh shutuk amamishi nyeiguhw shuto iruhw. Aria hakri karowin atin um Iruhin kanak ta nutuk amamish nyeiguhw shuto iruhw uwe, uwok.

*Jisas Nakripesh Um Ananin Baraen Ta Nyunekumesh Kwotog Arpesh*

<sup>44</sup> Aria Jisas nakripesh debeg nakri, “Eshudok arpesh douk shunek bilip um eik iri, eshesh douk madae shunek bilip um eik atuwe uwe, uwok. Eshesh douk shenek bilip um anudok douk neshopok eik yanaki iri shopunek. <sup>45</sup> Aria abudok nyutob eshudok douk shatik eik obi nyutob, eshesh douk shatik anudok douk neshopok eik yanaki iri. <sup>46</sup> Eik douk yanaki agundok atap kabi lait um. Yanakmori eshudok douk shusuhw eikin



baraen shugipeshen iri ta mare watak shupe arukwutigun atin uwe, uwok.

<sup>47</sup> “Aria arpeshe douk shemnek eikin baraen aria mare shusuhwen dodog shugipeshen iri, eik douk ta mare inek skelumesh um kwot kabi douk jas um uwe, uwok. Eik douk madae inaki agundok atap um inek skelum arpeshe uwe, uwok. Eik douk yanakmori inarao arpeshe shutanamori shupe wosik.

<sup>48</sup> Aria eshudok douk shuke agabus eik shukri uwok um shusuhw eikin baraen iri, esheshin jas douk kweipon ta nunekumesh kwotog iri douk nape. Enyudok atin baraen douk eik yakripeshen aria eshesh madae shigipeshen iri uwe, enyen kanak ta nyunek skelumesh aria nyunekumesh kwotog kabi jas um ahudok hugiguk iri nyumnah hutogrum.

<sup>49</sup> Um maresh? Enyudok baraen douk madae eik meyoh urkum murumen aria ipe ikripeshen uwe, uwok. Enyen douk eikin Yain nakripeyen abom aria neshopoke yanaki um ikripesh. Aria anan douk neyabige um ikripesh mumam.

<sup>50</sup> Aria eik yadukemesh um Iruhin ananin baraen ta nyunek arpeshe um shusuhwen shugipeshen aria shupe wosik abom ihih nyumneh. Namudok aria ihinyumori enyudok eik yakriyen iri baraen, enyen douk eikin Yain meyoh nakripeyen aria douk yanaki yakripepen.”

## 13

### *Jisas Nakwrupumam Yeriweruh Ananim Disaipel*

<sup>1</sup> Ahudok nyumnah um shunek agundok debeiguni worigun Pasova um douk hanaki hurukatin. Aria Jisas douk nadukemesh um abudok nyutob ta nukutukuk agundok atap nunak nini Yain hupeum douk banaki. Aria abudok nyutob anan napeum, ananim urkum douk adur manawasham ihishmorim ananishi arpeshe douk mape agundok atap iri arigaha ta nugok um. Aria douk shopunek anan watak neyabigap um anan urkum manawasham apak abom um.

<sup>2</sup> Satan douk iga nawish Saimon ananin nuganin Judas Iskariot. Nawishan aria

nako yoweimi urkum um anan ta nuw-ereh Jisas um ananim horim aria amam husuwan hunak hon nugok. Douk arigaha wabigep aria amam hape hawok worigun.

<sup>3</sup> Jisas nadukemesh um Iruhin douk nakri wosik aria neshopoki anan um nupe Debeini um ihishmorim eshudok eneshenesh. Aria shopunek nadukemesh um anan douk nani Iruhin hape iri nakitak nanaki aria ta watak nutanam nunak nini anan hupe.

<sup>4</sup> Aria nakitak nowar ahudok rouhi rupah douk nohunug aduk iri nahubukuk aria nohur enen tawor naweshiken nyape apahwinum.

<sup>5</sup> Naweshiken nyape aria nohuri abar nourakabar anohw yaurehw aria nape nakwrupumap yeriweruh apak ananim disaipel. Nakwruporuh-umap iyoh aria watak nabatik abar enyudok tawor douk naweshiken nyape apahwinum iri.

<sup>6</sup> Nakwruporuh-umap nanak natogurum Saimon Pita aria Saimon nakripan nakri, “Nyak douk Debeini. Namudok aria eik douk yakri uwok um nyak nyukwrup eikiruh yeriweruh uwe, uwok.”

<sup>7</sup> Aria Jisas nakripan nakri, “Douk, nyak madae nyudukem baugenyum uwe, enyudok mour douk eik yeneken iri. Aria nuhut biyen nyak wosik ta nyudukemesh.”

<sup>8</sup> Aria Pita nakripan nakri, “Uwok, eik yakri uwok abom um nyak nyukwrup eikiruh yeriweruh!”

Aria Jisas watak shopunek nakripan nakri, “Douk eik mare ikwrup nyakiruh yeriweruh um, nyak douk ta mare nyupe eikin disaipel uwe, uwok.”

<sup>9</sup> Saimon Pita nemnek namudok aria nakri, “Debeini, namudok um, nyak douk ta mare nyukwrup eikiruh yeriweruh aturuh uwe, uwok. Yakri nyukwrup roguhw aria barag shopunek.”

<sup>10</sup> Aria Jisas nakri, “Enyudok arpen douk nyeshrokuh jurug iri, enyen douk yopin aria mare ta nyukri um nyishrokuh shopunek uwe, uwok. Enyen ta nyunokwrup yeriweruh aturuh. Enyenyihw yegenyihw shuknihw wosik yopuhw. Ipak sabaipi douk yopipi. Aria atun

meyoh douk madae yopun uwe, uwok.”  
<sup>11</sup> Jisas douk nadukeman anudok disaipel douk ta nuwerek anan um ananim horim aria husuwan hunak hon nugok. Namudok aria anan douk nakri namudok. Nakri, “Ipak ihipmorim douk yopipari, aria atun arman meyoh douk madae yopun uwe, uwok.”

<sup>12</sup> Douk nakwrupumap yeriweruh iyoh aria watak nohur ahudok rouhi nahunug aduk iri rupah nohahw. Aria nanak nabuh nape agundok iganigadae napeum. Nape aria narigap nakri, “Ipak padukem baugenyum mour um enyudok iganigadae yenekenyumep iri aka, uwok?”  
<sup>13</sup> Ipak pani eik meyagwreh um, ipak douk padukemesh pohware Debeini Tisa aria Debeini. Aria pohware namudok um, enyen douk adur. Um maresh? Eik douk ipakin Debeini Tisa aria Debeini. <sup>14</sup> Eik douk ipakin Debeini aria ipakin Debeini Tisa shopunek, aria eik douk iga yakwrup ipakiruh yeriweruh. Aria yakri ipak atin atin douk shopunek punak punataurum punakwrup ipakiruh yeriweruh. <sup>15</sup> Eik yenek ahudok aih yeyabigep aria ipak shopunek punak punekah namudok atin kabi douk yenekah um ipak um. <sup>16</sup> Adur atin yakripep. Enen nyape shukamum anan debeini nyenekuman mour meyoh iri, enyen douk madae debeinyi nyishagrakuk enyenyin debeini uwe, uwok. Aria douk namudok atin. Enen nyarao baraen iri douk madae debeinyi nyishagrakuk enyudok enen douk nyeshopoken nyanak iri uwe, uwok. <sup>17</sup> Aria douk ipak douk padukem baugenyum baraen um ahudok aih eik yenekah iri. Aria douk ipak pugipeshah um, Iruhin ta nutaurumep nunekumep yopihi aih aria nunekep punadudareh!

<sup>18</sup> “Aria eik douk madae ikriyen um ipak ihipmorim uwe, uwok. Eik yadukemep ipak douk eik nubokadae yagraehep iri. Aria enyudok Iruhin ananin baraen douk nyetem ananik Buk iri douk ta adurin nyutogur adurin atin abom. Baraen douk enyudok. ‘Anudok arman douk nani eik wape wawok worigun

atugunmorim iri watak natanam natogur horin um eik.’ <sup>19</sup> Enyudok douk eik yakriyen iri douk watak nyutogur uwe, aria douk yakripep. Yarik yakripep um abudok nyutob nyukri nyutogurum, ipak douk ta punek bilip pukri Eik Douk Seiwok Yape Namudok Iri.13:19 <sup>20</sup> Adur atin yakripep. Arpen douk nyumnek enyudok arpen douk eik ishopoken nyunak iri enyenyin baraen aria nyuraen iri, enyen douk nyemnek eikin baraen aria nyarao eik shopunek. Aria enyen douk nyemnek eikin baraen nyarao eik iri, enyen douk nyemnek anudok douk neshopoki eik yanaki iri ananin baraen aria nyarao anan shopunek.”

*Judas Ta Nuwerek Jisas Um Ananim Horim Aria Huran Hunak Hon Nugok (Matyu 26:20-25; Mak 14:17-21; Luk 22:21-23)*

<sup>21</sup> Douk Jisas nakriyuk namudok iyoh aria ananihw apahw amu yowehw abom. Aria douk amu nawerehen nakripam nakri, “Adur atin yakripep. Ipak sabaipi pape agundok iri, ipak anan douk ta nuwerek eik um horim aria ta husuwe hurae hunak he igok.”

<sup>22</sup> Douk Jisas nakri namudok aria apak ananim disaipel matanam manashakamum. Makri anan douk nakri meini. <sup>23</sup> Aria anudok disaipel douk Jisas anan urkum makri munawashaman iri douk nape hurukatinyum anan Jisas iri. <sup>24</sup> Douk namudok aria Saimon Pita nouramanagu barag aria nakri, “Nyak kwasorigan. Anan douk nakri um amiapen?”

<sup>25</sup> Aria anudok disaipel natotigos nanak harokatinyum Jisas aria narigan nakri, “Debeini, nyak nyakrium amiapen?”

<sup>26</sup> Aria Jisas nakri, “Anudok douk eik isegur bret abrudok ekehibari abar ikonot iri, arman douk ta anudok atun.” Aria nohuri anagun bretigun naseguragun nako Saimon ananin nunganin Judas Iskariot. <sup>27</sup> Douk Judas natrun bret natoh neyatat aria Satan adur nawishan. Aria Jisas nakripan nakri, “Arigah kare neken arigas enyudok douk nyakri nyuneken

iri!”<sup>28</sup> Nakripan namudok, aria apak ihipmorim mape agnudok mape mawok worigun iri douk madae mudukem baugenyum enyudok baraen uwe, uwok.<sup>29</sup> Judas anan douk neyoh apakibor utabor. Douk namudok aria apak ananipari makri Jisas ta neshopokan um nunak nutori anagun worigun um agundok debeiguni worigun Pasova nunenek um, aka neshopokan um nunak nukeshuk anabor utabor eshudok yaruhish iri.<sup>30</sup> Douk Judas nawok atudok bret iyoh, nakitak aria natogur nanakuk aria iganigadae wab.

### *Jisas Nakripam Enen Namunyi Lo Ananim Disaipel*

<sup>31</sup> Douk Judas natogur nanakuk aria Jisas nakripap nakri, “Douk Eik Anudok Arman douk yatogur adurinyi arpen iri, Iruhin douk neke yarao Debeinyi nyeigur. Aria eik ta inek arpeshe shutik agundok Iruhin dodogowin atun natrugun abom um aria ta shutuk ananin nyeigur nyuto iruhw.<sup>32</sup> Aria douk eik ta ituk Iruhin ananin nyeigur nyuto iruhw um Iruhin anan kanak shopunek ahudok atuh ta nutuk Eik Anudok Arman douk yatogur adurinyi arpen iri eikin nyeigur nyuto iruhw.<sup>33</sup> O ipak douk adurip kabi eikish batowish-umori, eik douk ta ini ipak mupe banab nyutob meyoh aria ta watak ikwutipokuk inak. Inakuk aria ipak douk ta pupe purime. Riguk douk yakrip eshesh Juda esheshim debeimi aria douk shopunek yakrip ipak enyudok atin baraen. Ipak douk ta mare punak agundok eik inak ipeum uwe, uwok.<sup>34</sup> Aria eik yakri ikripep enen namunyi lo douk ta pusuwen pugipeshen iri. Enyudok lo douk namudok. Ipak atin atin, ipakip urkwip douk adur pukri punawasham um ipak aria kupaishi arpeshe shopunek. Um maresh? Kabi douk eik yarig urkum makri munawasham um ipak morim, aria ipak shopunek douk punekesh namudok atin.<sup>35</sup> Aria douk ipak atin atin ipakip urkwip adur pukri punawasham um, ihishmorim arpeshe ta shutrip aria ta shudukemesh shukri ipak douk pagipesh eik iri.”

*Jisas Nakri um Pita Ta Nukon Agab Um (Matyu 26:31-35; Mak 14:27-31; Luk 22:31-34)*

<sup>36</sup> Douk Jisas nakripap namudok jurug aria Saimon Pita narigan nakri, “Debeini, nyak nyakri nyunak meiguni?”

Aria Jisas nakri, “Douk nyak ta mare nyuname unak agundok douk ta eik inak um. Aria anob nyutob nyak wosik ta nyugipesh nyunaku.”<sup>37</sup> Aria Pita narigan nakri, “Debeini, aria nyak nyakri douk eik ta mare inamen unak um maresh? Eik douk madae inogugur um igok um agundok yagipesh nyak um uwe, uwok!”

<sup>38</sup> Aria Jisas nawanaman baraen nakri, “Pita, douk adur nyakri nyak ta nyugok um agundok nyagipesh eik um, aria ta uwok? Adur atin yakripen. Kwehigib ruwahepib wab, nyak ta nyunek rohwmesh biyeh atuh nyukri nyak madae nyudukem eik uwe, uwok, aria owot ta kadak tukitak tiyagwreh.”

## 14

*Jisas Anan Atun Douk Ahudok Atuh Yah Um Arpeshe Shunak Shutogurum Iruhin Um.*

<sup>1</sup> Aria Jisas nakrip apak ananim disaipel nakri, “Ipakish mishish ta mare yowesh uwe, uwok. Ipak ko punek bilip um Iruhin aria eik shopunek ta punek bilipume.<sup>2</sup> Gani numunitum atudok eikin Yain ananit urupat douk sabaipi abom rip pape. Aria eik douk ta inak igabeimep anabik nupeimep. Douk madae anam rum mukus akure, eik ta mare igiyagimep ikripep namudok uwe, uwok.<sup>3</sup> Adur ta inak igapeshumep-aguk ipakiyu outumeb upemepaguk aria watak itanamori irumep. Aria abrudok wabur eik inak ipeum, ipak shopunek ta puni eik mupe.<sup>4</sup> Aria yah douk hanak um agundok eik yakri inak um, ipak douk wosik padukemah.”<sup>5</sup> Aria Tomas nakripan nakri, “Debeini, apak douk madae mudukem agundok nyak nyakri nyunak um uwe, uwok. Yah ta mudukemah mumam, um munamagu?”<sup>6</sup> Aria Jisas nawanaman baraen namudok. Nakri, “Eik kanak douk adur ahudok yah um

arpesh shunak shutik Iruhin um, adur eik douk baugos um enyudok shiyagwreh adurin atin baraen um, aria douk shopunek adur baugos um enyudok shupe wosik abom ihih nyumneh um. Uwok um enen arpen ta nyugipesh kupaihi yah aria nyunak nyutik eikin Yain uwe, uwok. Yah douk adur eik kanak. <sup>7</sup> Douk ipak padukem eik aria ta wosik abom um, eikin Yain douk shopunek ta pudukeman. Aria douk arigaha kweipon ipak wosik pape padukeman aria patrun jurug.”

<sup>8</sup> Aria Filip nakripan nakri, “Debeini, apak douk madae mukrium enesh eshudok kupaishi uwe, uwok. Aria makri nyiyabigap Yain atun aria jurug.” <sup>9</sup> Aria Jisas nebeiman baraen nakri, “Filip, eik douk yani ipak mape roubi nyutob aria nyak douk watak nyudukem eik uwe? Yakripen, eshudok arpesh shatik eik iri douk iga shatik Yain. Aria nyak douk nyarige um watak iyabigep Yain um maresh? <sup>10</sup> Nyak douk atin nyunek bilip um enyudok eik yakri Yain nape eik aria eik yape anan aka? Baraen yakripepen iri douk madae eik meyoh urkum murumen aria ipe ikripepen uwe, uwok. Aria Yain douk napenye iri nenek ananin mour aria nohur eik yakripep enyudok baraen. <sup>11</sup> Ipak douk punek bilip um eik um enyudok yakri eik yape um Yain aria Yain nape eik um. Uwok um, ipakip urkwip watak purmaguk enyudok Iruhin atun neneken iri mour douk eik yape yeneken iri aria ipak punek bilip um eik. <sup>12</sup> Adur atin yakripep. Enyudok arpen douk nyusuhw eikin baraen nyugipeshen iri, ihinyumori mour eik yeneken iri, enyen douk shopunek ta nyuneken. Adur, enyen ta nyunek debeinyi atin abom mour nyishagrakuk enyudok eik yeneken iri. Um maresh? Eik douk ta inak itik eikin Yain. <sup>13</sup> Maresh eshudok douk ipak punek betenmesh um eikin nyeigur iri, eik douk ta inekeshumep. Eik ananin nunganin inekesh namudok aria Yain ananin nyeigur ta shutuken nyuto iruhw. <sup>14</sup> Aria maresh eshudok douk ipak punek beten porige um eikin nyeigur iri, eik douk ta inekeshumep.”

### *Jisas Nakri Ta Nushopoki Iruhin ananin Mishin Nyunaki*

<sup>15</sup> “Douk ipak urkwip pakri punawasham eik um, eikin baraen douk adur ta pusuwen pugipeshen wosik atin. <sup>16</sup> Aria ta inek beten iyorik Yain aria ta watak nukepari Enyudok Enen douk ta Nyutaurumep um Dodogowip iri. Nukepen aria ta nyuni ipak pupe ihih nyumneh. <sup>17</sup> Enyudok Nyutaurumep iri douk Iruhin ananin Mishin douk nyape um nyeyagwreh adurin atin baraen iri. Aria arpesh douk shapeum shenek yoweihi amnabih aih iri ta mare shuraen nyupenyesh uwe, uwok. Um maresh? Eshesh douk madae shutrin aria shudukemen uwe, uwok. Aria ipak douk padukemen. Enyen douk nyani ipak pape aria ta nyuwish nyupenyep. <sup>18</sup> Eik douk ta ikwutipokuk inak aria ta mare ikutipuk pupeik kabi douk yaruhish batowish um uwe, uwok. Ta wata itanam-umepari. <sup>19</sup> Mare roubi um uwe aria arpesh douk shapeum shenek yoweihi amnabih aih atin iri ta mare wata shutik eik uwe, uwok. Aria ipak wosik ta putiwe. Eik douk ta yakitak yape wosik abom ihih nyumneh aria ipak shopunek ta adur pupe ihih nyumneh. <sup>20</sup> Aria ahudok nyumnah hutogurum, um she igok aria watak ikitakumori, shagok um, ipak ta pudukemesh pukri eik douk yape eikin Yain, ipak pape eik aria eik yape ipak. <sup>21</sup> Eshudok arpesh douk shusuhw eikin dodogowinyi baraen shugipeshen wosik iri, eshudok arpesh douk adur urkwip pakri punawasham eik. Aria eikin Yain ta adur urkum mukri munawasham eshudok arpesh. Aria eik shopunek ta urkum mukri munawasham eshudok arpesh aria ta itogur iyabigesh eik kanak um adur shudukeme.”

<sup>22</sup> Jisas nakri namudok aria Judas nakri, “Debeini, namudok mumam namudok um nyakri nyutogurum apak atapish arpesh aria shapeum shenek ehudok amnabih yoweihi aih iri nyakri uwok um nyiyabig nyak um eshesh?” Anudok Judas douk madae anudok douk Judas Iskariot uwe, uwok.

<sup>23</sup> Aria Jisas nawanaman baraen nakri,

“Eshudok arpeshe douk eshesh urkwip adur pakri punawasham eik iri, eshesh douk ta shusuhw eikin baraan aria shugipeshen wosik. Aria eikin Yain anan douk ta urkum mukri munawasham eshesh. Aria eik ini Yain ta unaki uni eshesh mupe ihih nyumneh. <sup>24</sup> Eshudok madae urkwip pakri punawasham eik iri douk madae shusuhw eikin baraan shugipeshen uwe. Aria enyudok baraan douk pemneke yeyagwrehen iri douk madae iyagwreh enen eikin baraan uwe, uwok. Eik douk yeyagwreh eikin Yain douk neshopoke yanaki iri ananin baraan.

<sup>25</sup> “Enyudok ihinyumorim baraan douk watak yani ipak mape aria yakripepen. <sup>26</sup> Aria enyudok Iruhin ananin Mishin douk enyudok douk ta nyutaurumep dodogowip iri. Eikin Yain ta nishopoken nyunakmori eikin nyeigur. Enyen nyunaki aria ta nyiyabigep ihinyumorim enenyenen pudukemen. Enyen ta watak nyuhur ipakip urkwip aria ipak ta watak urkwip purum enyudok ihinyumorim baraan douk eik yakripepen um. <sup>27</sup> Eik ta ikwutipokuk inak, aria ehudok aih um shape wosik aparuh hor wosik um douk ehudok ikepehuk. Ehudok aih adur eikih aria douk ehudok yekepehuk. Eik madae ikep ehudok aih kabi arpeshe shapeum shenek amnabih atih aih iri ta shukepeh um uwe, uwok. Namudok aria ipakish mishish douk mare yowesh pukri punogugur uwe, uwok. <sup>28</sup> Ipak douk pemneke yakripepen yakri, ‘Eik ta ikwutipokuk inak aria ta watak itanamumepari.’ Douk ipakip urkwip adur pakri punawasham eik akure, ipak ta punadudareh um enyudok eik inak itik Yain. Um maresh? Anan douk debeini neshagrakuk eik. <sup>29</sup> Enyudok ihinyumorim baraan watak nyutogur uwe aria douk yakripepumen. Namudok aria nuhut abudok nyutob enyen nyukri nyutogur obi nyutob, ipak douk ta punek bilip um eik pukri eik yakripepuguk adurinyi baraan. <sup>30</sup> Eik ta mare watak ini ipak mupe roubi um miyagwreh sabainyi baraan shopunek uwe, uwok. Um maresh? Debeini um agundok atap

iri douk hurukatin um nunaki. Anan nunaki, aria ta mare dodogowin um nunek enesh eshudok um eik uwe, uwok. <sup>31</sup> Aria eik yakri agundok atapish arpeshe ta shudukemesh um agundok eik douk adur urkum manawasham eikin Yain. Aria shopunek yakri shudukemesh um enyudok yeneken iri douk Yain nakripe ananin dodogowinyi baraan aria douk yeneken. Aria ipak douk kitak muku-tukuk agundok ba munak.”

## 15

### *Jisas Nakri Anan Douk Adurinyi Rowog Wain*

<sup>1</sup> Jisas watak shopunek nakri, “Eik douk enyudok adurinyi rowog wain. Aria eikin Yain douk anudok nenek mour numun agudok wainig nubarig iri. <sup>2</sup> Ihish nyeiguhw douk shato iruhw eik enyudok rowog wain aria madae enep shuruwep piresh iri uwe, anan douk natupeshuk. Eshudok douk shuruwep peiresh iri, anan douk nagamohesh nagapeshesh neshuru banesh um wata sabaipi shuruwep pir. <sup>3</sup> Aria douk namudok atin. Enyudok baraan eik yakripepen iri douk nyape ipakiruh aparuh aria nyenekep patogur yopipari. <sup>4</sup> Ipak ta adur putogur punasusuhw pupe eik aria eik shopunek ta adur itogur inosusuhw ipak. Enen nyeigur enyen kanak ta mare shuruwep pir uwe, uwok. Aria douk enyudok nyeigur nyanasuhw enyudok rowog wain um, aria enyen douk wosik shuruwep ta pir. Aria douk namudok atin. Aria ipak mare putogur punasusuhw eik aria pusuhw eikin baraan dodog pugipeshen um, ipak kanak ta mare dodogowip um punek yopihi aih uwe, uwok.

<sup>5</sup> “Eik douk enyudok rowog wain aria ipak douk nyeiguhw. Namudok aria arpen douk nyutogur nyunasusuhw eik aria eik itogur inasusuhw enyen iri, enyen douk ta nyunek sabaihi yopihi aih aria yopuguni worigun. Aria douk ipak mare putogur punasusuhw eik um, aria ipak douk ta mare dodogowip um punek enen yopunyi mugu uwe, uwok. <sup>6</sup> Enyudok arpen douk madae nyutogur nyunasusuhw eik aria madae nyusuhw

eikin baraen dodog nyugipeshen iri uwe, eikin Yain ta nenekeshumen kabi douk natupok enen nyeigur enyudok rowog wain aria nunyubukuk ba yarin um. Aria enyudokmori nyeigur douk ta shutorumen shunyubukuk atugun aria shuwashen nyubuhuk nyih hanu um. <sup>7</sup> Aria ipak patogur panasusuhw eik aria eikin baraen nyupe ipak um, aria abudok nyutob ipak punek beten porige um eneshenesh eshudok ipak pakripe-umesh iri, aria adur atin, eshudok ta shutogur-umep kabi douk ipak penek beten porige um. <sup>8</sup> Aria douk ipak punek sabaihi yopihi aih um, aria namudok arpesh ta shutrip aria ta shutuk eikin Yain ananin nyeigur nyuto iruhw. Punekesh namudok aria arpesh ta shutrip shukri ipak douk adur pagipesh eik iri.

<sup>9</sup> “Eik douk urkum makri munawasham ipak kabi douk eikin Yain anan urkum makri eik um. Eikim urkum makri munawasham ipak aria ihih ipak urkwip ta adur purum enyudok. <sup>10</sup> Aria douk ipak pugipesh eikin baraen adur atin um, aria eikim urkum ta mukri munawasham ipak. Aria ihih ipak ta urkwip purum enyudok aria ta pupe wosik. Kabi douk eik yagipesh eikin Yain ananin dodogowinyi baraen aria ananim urkum mukri manawasham eik aria eik urkum mukri murum enyudok yape wosik um. <sup>11</sup> Eik douk yakripep enyudok baraen. Um maresh? Eik adur yakri ipak ta purao ehudok eikih aih um yanadudareh um hupeyep. Namudok aria ipak ta pupe um punadudareh puriguk. <sup>12</sup> Eikin dodogowinyi baraen douk enyudok. Ipak atin atin ipakip urkwip douk pakri punawasham ipak pini kupaishi arpesh kabi douk eik urkum makri munawasham ipak um. <sup>13</sup> Ehudok aih um enen arpen urkum adur mukri munawasham enyenyish arpesh aria nyugok um nyutaurumesh um, enyudok douk nyishagrakuk ihihmorim aih um urkwip pakri punawasham kupaishi um. <sup>14</sup> Aria douk ipak adur pusuhw eikin baraen dodog pugipeshen um, aria ipak douk eikish arpesh. <sup>15</sup> Douk eik ta mare wata ihwarep peneme mour meyo h iri uwe,

uwok. Um maresh? Arpen nyenek mour um enyenyin debeini, enyen douk madae nyudukemen atin uwe enenyenen enyenyin debeini nakri um nuneken iri uwe, uwok. Aria douk, eik ta wata ihwarep eik kanak eikish arpeshim meyo h. Um maresh? Ihinyumori eikin Yain nakripe-yenyi baraen douk yakripepen yeyaten. <sup>16</sup> Ipak douk madae punagraeh eik uwe, uwok. Eik yanagraeh ipak um adur punek sabaihi yopihi aih aria yopuguni worigun. Aria ehudok yopihi aih ta adur hupe namudok atin. Namudok aria eikin Yain ta nukep ihishmori douk ipak puhur eikin nyeigur nyuto iruhw aria poriganum nukepesh iri. <sup>17</sup> Dodogowinyi baraen eik yakripep um pugipeshen iri douk enyudok. Ipak atin atin urkwip douk pakri adur punawasham ipak pini ihish arpesh.”

*Eshudok Atapishi Arpesh Ta Shunenem Horik Horin Um Eshesh Douk Shagipesh Jisas Iri*

<sup>18</sup> “Aria arpesh douk shapeum shagipesh ehudok amnabih yoweihi aih iri shukep agabus aria shenenem horik horin um, ipak aria pudukemesh um eshesh douk sharik sheke agabus eik aria shenenem horik horin um eik shopunek. <sup>19</sup> Aria ipak pakri pugipesh enyudok douk eshesh shapeum sheneken iri um, aria esheship urkwip douk ta shukri shunawasham shukri ipak douk esheship iri. Aria eik douk yanagraehepum pupe eikish arpesh aria ipak douk mare pugipesh ehudok amnabih aih uwe, uwok. Namudok aria eshesh douk shakri uwok um ipak aria shape shenek horik horin um ipak. <sup>20</sup> Ipakip urkwip douk ta purum enyudok baraen douk nubokadae yakripepen iri. Baraen enyudok. ‘Arman nenek mour meyo h um kupaini arman iri, anan douk madae nishagrakuk ananin debeini uwe, uwok.’ Aria douk namudok atin. Eshesh douk shenek enenyenen um eik ipakin Debeini aria ipak shopunek ta shunekep enenyenen. Aria shopunek ta eshesh shumnek eikin baraen akure, ipakin shopunek ta shumneken aria shugipeshen. <sup>21</sup> Enyudok yakripep

um douk ta shunekenyumep. Um maresh? Ipak douk eikip pagipesh eik aria eshesh douk madae shudukem anudok neshopoki eik yanaki iri uwe, uwok. <sup>22</sup> Aria eik douk madae ibuhi agundok atap aria ikripesh Iruhin ananin baraen shumneken akure, Iruhin ta mare nukri baraen nyupenyesh um shenek eneshenesh yoweishi inahos uwe, uwok. Aria eik douk yabui yakripeshen shemnek aria yah douk wokesh um shukri shunabeshuk um eneshenesh shenekesh iri yoweishi um. <sup>23</sup> Eshudok arpeshe douk shakri uwok um eik aria shenek horik horin um eik iri, eshesh douk shopunek shakri uwok um eikin Yain aria shenek horik horin um anan shopunek. <sup>24</sup> Eik yenek enenyenen Iruhin atun neneken iri mour douk riguk madae enen arpen nyuneken iri uwe nyatogur aria shatrin. Aria eshesh douk shatik eik yeneken nyatogur aria shakri uwok aria shenenem horik horin um eik yani eikin Yain shopunek. Aria douk adur, um eik mare inek enyudok mour shutrin akure, aria Iruhin ta mare nukri eshesh douk shenek yoweishi inahos aria ta mare adur nunemesh debeinyi baraen uwe, uwok. <sup>25</sup> Enyudok douk sheneken nyatogur um enen baraen nyetem Iruhin ananik Buk iri nyatogur adurin atin. Baraen enyudok. 'Baugenyum baraen uwok enen uwe, aria shakri uwok um eik. Sheneme horik horin eik meyo.'

<sup>26</sup> "Aria nuhut biyen enyudok Nyutaurumep um Putogur Dodogowip iri ta nyunaki. Enyen douk Iruhin ananin Mishin douk nyeyagwreh adurin atin baraen iri. Enyen douk nyani Yain shape aria ta nyunaki. Enyen douk nyani Yain nyape aria ta ishopoken nyukutun-uguk nyunaki. Ta nyunaki aria nyukripep sabainyi eikin baraen. <sup>27</sup> Aria ipak douk shopunek ta pukripesh eikin baraen. Um maresh? Riguk watak sagomatin yohur enyudok mour obi nyutob arigaha douk, ipak douk pagipesh eik aria patiwé aria padukemesh."

## 16

<sup>1</sup> Jisas watak apa nakripesh baraen nakri, "Eik douk yakripep enyudok

sabainyi baraen um yakri ipak mare pukutukuk eik uwe, uwok. <sup>2</sup> Aria ta shukrip ipak um pukutukuk eshesh Juda shanotorum shape sheneyagwreh baraen-ogwi urusag putogrukuk aduk um mare punamesh punek lotu. Aria nyutob ta butogur um enesh arpeshe ta shep pugok iri ta shunek urkum shukri eshesh wosik shenek Iruhin ananin yopunyi mour. Aria uwok. <sup>3</sup> Ta shunemep enyudok um maresh? Eshesh douk madae shudukem eik aka, shudukem eikin Yain uwe, uwok. <sup>4</sup> Eik douk yakripep enyudok um abudok nyutob shukri shunemep enyudok obi nyutob, aria ipak ta urkwip purum pukri eik douk yarik yakripep debeinyi baraen um enyudok.

### *Mour Douk Iruhin ananin Mishin Ta Nyuneken Iri*

"Riguk watak sagomatin um yakitak um inek mour um douk madae ikripep enyudok baraen uwe, uwok. Um maresh? Eik douk watak yani ipak mape. <sup>5</sup> Aria douk, eik ta inak itik anudok douk neshopoki eik yanaki iri. Aria ipak douk madae anan norige um agundok ta eik inak um uwe, uwok. <sup>6</sup> Aria eik yakripep enyudok baraen um ta inak um. Namudok aria ipakish mishish douk yowesh abom. <sup>7</sup> Aria adur atin yakripep. Eik ikutukuk ipak pupeik inak um, enyudok douk wosik um itaurum ipak. Aria douk eik ikri mare inak um, aria enyudok Nyutaurumep iri ta mare nyunak-umepari uwe, uwok. Aria douk eik inak um, eik douk ta ishopokenyi nyunaki nyuni ipak pupe aria nyutaurumep. <sup>8</sup> Aria abudok nyutob Enyen nyunaki obi nyutob, Enyen douk ta nyiyabigesh agundok atapishi arpeshe um yoweishi inahos douk eshesh madae shudukemesh uwe aria shape shenekesh um. Shopunek ta nyuwormesh baugos nyiyabigesh yopuhi aih huni agundok Iruhin ta nunekemesh debeinyi baraen um shenek yoweishi inahos um. <sup>9</sup> Enyen douk ta nyiyabig arpeshe aria shudukemesh um eshesh douk shenek yoweishi inahos. Um maresh? Eshesh madae shunek bilip um

eik um uwe. <sup>10</sup> Aria Enyen nyuwormesh baugos niyabigesh yopihi aih. Umum maresh? Eik ta inak itik eikin Yain aria ipak ta mare watak putiwe uwe, uwok. <sup>11</sup> Aria Enyen ta nyunaki niyabigesh um agundok Iruhin ta nunekumesh debeinyi baraen um esheshish yoweishi inahos. Aria shudukemesh um eshesh yoweishi arpesh. Umum maresh? Iruhin douk nenekuman debeiti kwot Satan douk debeini um enenyenen um ahudok atapih aih iri.

<sup>12</sup> “Eik sabainyi baraen douk yakri ikripepumen iri. Aria douk ta ikripep aria ta mare pudukemen uwe, uwok. Namudok aria ta mare ikripep. <sup>13</sup> Aria abudok nyutob enyudok Iruhin ananin Mishin douk nyeyagwreh adurin atin iri nyunaki obi nyutob, Enyen ta niyabigep aria pudukem ihinyumori adurinyi baraen. Enyen ta nyunaki aria ta mare nyuwereh enyen atin aria niyagwreh enen baraen um enyen kanak uwe, uwok. Aria ta nyukripep enyudok baraen douk nyemnek Iruhin nakriyen iri. Aria ta nyukripep um eshudok ta kweipon shutogur iri. <sup>14</sup> Enyen douk ta adur nyutuk eikin nyeigur nyuto iruhw um agundok nyiraouri eikin baraen nyunaki nyukripep um. <sup>15</sup> Eneshenesh eikin Yain nagremesh iri douk eikishi atish. Namudok aria douk yakripep yakri Iruhin ananin Mishin ta nyukripep baraen douk nyemnek eik yakripen um.

*Amam Disaipel Amamiruh Aparuh Ta Yoweruh Aria Ta Watak Hunadudareh*

<sup>16</sup> “Banab nyutob meyoh aria ipak ta mare watak putrue uwe, uwok. Inakuk aria ta mare roubi um aria ta watak itanamori putiwe.” <sup>17</sup> Namudok aria anam ananim um disaipel hatanam hanasorim um hakri, “Baugenyum enyudok baraen um nakri banab nyutob meyoh apak ta mare watak mutrun aria mare roubi um ta watak nutanamori mutrun um douk nyakri maresh? Aria shopunek nakri apak ta mare mutrun. Umum maresh? Anan douk ta nunak nutik ananin Yaken.” <sup>18</sup> Amam hape hanasorim hakri, “Baugenyum enyudok baraen um nakri banab nyutob meyoh um douk adur

nyakri maresh? Apak madae mudukemen uwe, uwok.”

<sup>19</sup> Jisas natrum aria nadukemesh um amam douk hakri horigan. Namudok aria nakripam nakri, “Eik douk yakri, ‘Banab nyutob meyoh ipak ta mare watak putiwe, uwok. Aria ta mare roubum aria ta watak itanamori putiwe.’ Ipak douk pape panasosorim um pakri pudukem baugenyum enyudok baraen eik yakriyen iri aka, uwok? <sup>20</sup> Adur atin yakripep. Ipak ta aparuh yoweruh pureh punokwukri atin um ehudok yoweihi aih shenekeh um eik. Aria arpesh shapeum shagipesh atapih yoweihi aih iri ta shunadudareh. Ipak ta aparuh yoweruh, aria agundok aparuh yoweruh um ta wata hunak huwishuk aria ta watak punadudareh puriguk abom. <sup>21</sup> Abudok nyutob onok armatok kwupe kwabirak um kwubunuh kubuki batowin obi nyutob, okwokwihw apahw douk yowehw. Umum maresh? Okwokwib nyutob um kumnek eriger um douk batogur. Aria abudok nyutob okwok kwubunuhuk kubuki batowin um jurug, aria okwokwim urkum ta mare watak mur um arudok eriger uwe, uwok. Umum maresh? Okwok douk kwubunuh kwobuki batowin nyatogur nyape agundok atap aria kwanadudareh. <sup>22</sup> Aria ipak douk namudok atin. Douk abudok nyutob ipakib um ipakish mishish yowesh um. Aria eik ta watak itanamori itrip aria ipakiruh aparuh ta wata adur um hupe wosik aria punadudareh abom. Aria ta mare enesh arpesh shunaki shukri uwok um agundok ipak ta punadudareh puriguk um uwe, uwok. <sup>23</sup> Abudok nyutob bukri butogur obi nyutob, ipak ta mare porige enen baraen uwe, uwok. Adur atin yakripep. Eikin Yain ta nukep maresh eneshenesh eshudok ipak porigan um nukepesh um eikin nyeigur iri. <sup>24</sup> Riguk arigaha douk, ipak douk madae porig Iruhin um nukep enesh eshudok um eikin nyeigur uwe, watak. Ipak douk porigan um, aria ta nukepesh. Namudok aria ipak ta punadudareh puriguk abom.”

*Jisas Nenek Uhwin Um Eneheneh Um*



*Ehudok Yoweih Aih Arpesh Shape Agundok Atap Iri Shenekheh Iri*

<sup>25</sup> “Douk enyudok sabainyi baraen douk eik yape yakripenen wobuwobren atin. Aria nyutob ta butogur um eik ta mare watak ikripep wobuwobren um uwe, uwok. Aria ta watak adur iwerehenyumep aria ikripep um eikin Yain um pudukeman wosik. <sup>26</sup> Aria abudok nyutob bukri butogurum, ipak kanak ta punek beten porig eikin Yain um eikin nyeigur. Eik douk mare ikripep um eik kanak ta iyorik Yain um ta nataurumep uwe, uwok. <sup>27</sup> Um maresh? Eikin Yain anan kanak douk urkum manawasham abom um ipak. Anan douk urkum manawasham ipak um maresh? Ipak douk nubokadae urkwip panawasham eik aria shopunek penek bilip pakri adur eik douk yani Iruhin wape iri aria yanaki. <sup>28</sup> Adur, eik douk yani Yain wape iri aria seiwok yakutunuguk yanakmori agundok atap. Aria douk, eik ta watak ikutukuk agundok atap aria watak itanam inak itrung.”

<sup>29</sup> Aria apak ananim disaipel memnek namudok aria makripan makri, “Adur, douk nyak nyowerehumap baraen yopugunum abom aria madae nyukripap wobuwobren atin uwe, uwok. <sup>30</sup> Douk apak madukemesh um nyak douk adur nyadukem ihishmorim eshudok. Aria enen arpen nyukri nyorigen enen baraen obi nyutob, enyen douk watak nyorigen uwe, aria nyak douk iganigadae nyadukem enyudok baraen enyen nyakri nyorigenyumen iri. Apak douk matik namudok aria menek bilip makri nyak douk nyani Iruhin pape iri aria nyanaki.”

<sup>31</sup> Jisas watak nabeimam baraen aria nakri, “Aria riguk arigaha douk ipak penek bilip um eik aka, uwok? <sup>32</sup> Ipak pumnek. Nyutob ta butogur aria douk abudok batogur jurug. Um ipak ihishmorim ta shihyahep aria pukutukuk eik atuwe ipeik. Aria ipak ta puruwok punak atun atunuk, punak um ipakirub warub sisiguk atin. Aria douk ta mare eik atuwe ipeik uwe, uwok. Um maresh? Eikin Yain douk nani eik wape. <sup>33</sup> Eik douk yakripep enyudok baraen um yakri ipak adur pupe putogur puturuh eik aria

aparuh hupe wosik abom. Eshudok atapishi arpesh ta shunekkep enenyenen aria ta purao debeiri eriger. Aria ipak mare punogugur uwe, uwok. Ipak adur ta piyotu dodogowip atip. Eik douk yenek uhwinyum ehudok atapih yoweih aih jurug.”

## 17

*Jisas Nenek Beten Um Nataurum Ananim Disaipel*

<sup>1</sup> Douk Jisas nakriyuk enyudok jurug aria napuhur natik iruhw heven aria nenek beten nakri, “Eikin Yain, abudok nyutob um eik igok um abudok batogur. Aria nyak nyutuk eikin nyeigur nyuto iruhw um eik nyakin Nuganin shopunek ta ituk nyakin nyeigur nyuto iruhw. <sup>2</sup> Um maresh? Nyak douk nyeke enyudok big um ipe debeiwe iri um ihishmorim arpesh um itaurum eshudok arpesh douk nyak nyekeyesh iri um shupe wosik abom ihih nyumneh. <sup>3</sup> Aria baugos um agundok shupe wosik abom ihih nyumneh um douk namudok. Eshesh shudukem nyak atin douk adurin atun Iruhin aria shudukem eik Jisas Krais douk nyak nyeshopoke yanaki iri. <sup>4</sup> Eik yenek enyudok mour yeyaten, douk nyak nyeshopokei um inaki ineken iri. Yeneken douk agundok atapishi arpesh shatiwe aria shatuk nyakin nyeigur nyato iruhw. <sup>5</sup> Yain, nyak douk watak nyunek agundok atap uwe, aria eik douk yani nyak wape aria nyeke debeinyi nyeigur nyeneke adur yatogur dodogoiwe um lait abom. Aria douk eik yakri nyak wata nyuke enyudok atin debeinyi nyeigur nyuneke adur itogur um lait abom kabi riguk aria sagomatin nyekeyen um.

<sup>6</sup> “Aria eik yowereh nyak um amudok armam douk nyak nyekeyam iri um agundok atap. Amudok amam agundok atapim. Amam douk nyakim armam aria douk nyako eikam. Nyekeyam aria nyakin baraen douk hasuwen hagipeshen wosik. <sup>7</sup> Aria douk amam hadukemesh um ihishmori eshudok nyak nyekeyesh iri douk nyakish atish. <sup>8</sup> Baraen nyak

nyakripeyen iri douk yakripam aria hasuwen hadukemesh hakri adurin. Hakri riguk eik adur yani nyak wape iri aria nyeshopoke yanaki. <sup>9</sup> Aria eik douk yenek beten yarigenyum nyutaurumam. Madae inek beten iyorigenyum nyutaurum arpesh douk shapeum shenek ahudok atapihi yoweihi aih iri uwe, uwok. Eik yenek beten um nyutaurum amudok armam douk nyak nyekeyam iri. Um maresh? Amam douk nyakim. <sup>10</sup> Ihishmorim nyakishi arpesh douk eikishi. Aria ihishmorim eikishi arpesh douk nyakishi. Aria kupaishi shatik eshudok ohwakishi arpesh aria shadukemesh um agundok eik adur dodogoiwe atuwe aria shatuk eikin nyeigur nyato iruhw um. <sup>11</sup> Aria douk eik hurukatinyum ikutukuk agundok atap inaku ini nyak upe. Aria amam ta hupeik agundok atap. Aria eikin adurin yopuyopuni Yain, eik yakri nyak nyutaurumam abom aria amam hupe dodogowim um nyakin dodogowinyi nyeigur douk nyak nyekeyen iri. Nyutaurumam um amam adur hupe atun arman meyoh kabi ohwak wanaboum wape atun arag um. <sup>12</sup> Abudok nyutob eik yani amam mape um, eik douk yape yeyoham yataurumam hape wosik um nyakin dodogowinyi nyeigur douk riguk nyak nyekeyen iri. Yape yatatapam aria madae anan nunakrebe-iguk uwe. Aria anudok atun douk ta nunak um yoweiburi wabur hel iri atun ta nunakrebe-iguk. Anan douk nunakrebe-iguk um enyudok baraen nyetem nyakik Buk iri nyutogur adurin atin.

<sup>13</sup> “Aria douk eik ta watak inaku ini nyak upe. Douk namudok aria douk watak yape agundok atap aria yakripam enyudok baraen. Yakripam um amam humnek aria amamiruh aparuh hupe wosik abom hunadudareh huriguk kabi douk eikihw apahw hwape wosik hwanadudareh um. <sup>14</sup> Eik yakripam nyakin baraen aria agundok atapishi yoweishi arpesh douk adur shatogur horik horin um amam. Um maresh? Amam madae hugipeshesh um hunek ehudok atapih yoweihi aih uwe, uwok.

Hagimeh kabi eik madae igipeshesh munekeh um uwe, uwok. <sup>15</sup> Aria eik madae iyorigen um nyurao amudok armam hukutukuk agundok atap uwe, uwok. Aria eik yarigen um nyatatapam um yoweini arman um mare nununum. <sup>16</sup> Aria eik madae igipeshesh agundok arpesh um munek eneshesh agundok yoweishi inahos um ehudok atapih yoweihi aih uwe, uwok. Aria amudok shopunek douk namudok atin. Amam douk madae hugipeshesh uwe, uwok. <sup>17</sup> Enyudok nyakin baraen douk adurin atin abom. Aria eik douk yakri nyak nyuweshik nyakin baraen nyupe numun amamiruh aparuh um amam ta hupe nyakim yopumi armam atum. <sup>18</sup> Aria eik douk yeshopokam um hunak agundok atap hunek eikin mour. Yeshopokam um hunak huneken kabi riguk eik yani nyak wape iruhw aria nyak nyeshopoki eik yanaki agundok atap aria yenek nyakin mour um. <sup>19</sup> Eik douk yakri itaurum amam aria iken eik kanak um adur itogur nyakiwe atuwe abom. Yekesh namudok um amam shopunek adur um hutogur nyakim atum abom.

*Jisas Nenek Beten Narig Iruhin Um Nutaurum Ihishmorim Arpesh Shagipesh Anan Iri*

<sup>20</sup> “Aria eik douk madae inek beten iyorigenyum nyutaurum amudok eikim disaipel atum uwe, uwok. Eik shopunek yenek beten yarigenyum nyutaurum eshudok arpesh douk ta anah nyumnah shumnek nyakin baraen amam hukripeshen iri aria shunek bilip um eik iri. <sup>21</sup> Eik yarigenyum eshesh ta adur shupe atish arpesh. Yain, yakri shupe kabi nyak nyape eik, eik yape nyak aria wanaboum watogur atun arag um. Yakri adur um shunakrop um shupe kabi ohwak um agundok atapishi arpesh shutrish aria shunek bilip shukri eik douk nyak nyeshopokei aria douk yanaki. <sup>22</sup> Aria eik douk yekesh enyudok atin dodog nyani debeinyi nyeigur douk nyak nyako eik um. Yekeshen um eshesh adur shupe atish arpesh kabi ohwak wanaboum wape atun arman um. <sup>23</sup> Nyak

nyape eik aria eik douk yape eshesh um eshesh adur shutogur atish arpesch abom. Shunekesh namudok um agundok atapishi arpesch ta shudukemesh shukri eik douk nyak nyeshopoke yanaki. Aria shopunek ta shudukemesh um nyak douk urkum manawasham eshesh kabi nyak urkum manawasham eik um.

<sup>24</sup> “Yain! Seiwok nyak watak nyunek agundok atap uwe aria nyak douk adur urkum makri manawasham eik. Namudok aria nyeneke yatogur lait abom aria yatogur dodogoiwe atuwe. Douk namudok aria douk yakri eshudok arpesch nyak nyekeyesh iri douk shunaku shuni eik mupe agundok eik yapeum. Yakri mupe aria shutik agundok douk eik adur yatogur lait abom um aria dodogoiwe atuwe um. <sup>25</sup> Eikin yopuni adurin Yain, agundok atapishi arpesch douk madae shudukem nyak uwe, uwok. Aria eik douk yadukemen. Aria eshudok eikishi arpesch shopunek shadukemesh um eik douk nyak nyeshopoke yanaki. <sup>26</sup> Eik douk yowereh nyak um eshesh aria shadukemen. Aria douk ta watak ipe ikripesh um esheship urkwip adur pakri punawasham kupaishi shini ohwak kabi nyak urkum makri manawasham eik um. Aria ikripesh shopunek um eik kanak ta ipe eshesh um.”

## 18

*Judas Narauri Jisas Ananim Horim Nanaki Neyabigam Um Jisas Aria Husuwan Haran Hanak*

*(Matyu 26:47-56; Mak 14:43-50; Luk 22:47-53)*

<sup>1</sup> Douk Jisas nenek beten narig Iruhin um jurug aria nani apak ananim disaipel makitak mabimawish anat shokwuti banot shahwarat um Kidron iri aria manak gani wobrehah. Gani wobrehah um banot douk anagos rowos shahwargos um oliv iri seyotu. Manak mawish aria mape agnudok.

<sup>2</sup> Riguk Jisas nani apak ananim disaipel manak mawish sabaihi agundok agusudok rowos oliv sataoum. Douk namudok aria anudok Judas douk ta nuwereh Jisas um ananim horim aria husuwan

hunik hon nugok iri douk nadukemagun. <sup>3</sup> Aria abudok wab amam debeimi pris hani Farisi heshopok anam soldia hani amudok anam heyoh Iruhin ananit debeiti urupat iri hanak. Hakitak hehem nyihish lamhos hasuwesh, hasuhw bainatog gwani burawos aria Judas narikumam hanak. <sup>4</sup> Jisas douk nadukemum sabainyi enyudok douk ta nyutoguruman iri. Douk hanak aria anan nanak huruhuruk aria narigam nakri, “Ipak paurim amiapen?”

<sup>5</sup> Aria amam hakri, “Apak maurim Jisas douk nanaki wabur Nasaret iri.”

Aria Jisas nakri, “Eik douk enyudok wo.”

Anudok Judas douk nuwereh Jisas um husuwan hunak hon nugok iri douk nanamam heyotu. <sup>6</sup> Douk hemnek um Jisas nakri, “Eik douk enyudok wo” aria wata hatatigos hanak um agabus aria hanak hatu habuh hakus atap.

<sup>7</sup> Aria Jisas watak shopunek narigam nakri, “Ipak panaki paurim amiapen?”

Aria amam hakri, “Apak maurim Jisas douk nanaki wabur Nasaret iri.”

<sup>8</sup> Aria Jisas nawanamam baraen nakri, “Iganigadae yakripep wo. Arman pape pauriman iri douk eik atuwe. Aria douk ipak paurim eik panaki um, ipak douk pusuhw eik atuwe. Amudok pukutumuk hunak.” <sup>9</sup> Anan douk nakri enyudok baraen um enen baraen riguk anan kanak nakriyen iri nyutogur adurin atin. Baraen enyudok. “Yain, eik madae idiguk anan um amudok armam douk nyak nyekeyam iri nunak nuwishuk uwe, uwok.”

<sup>10</sup> Saimon Pita douk noruki anat bainat neyotu agundok. Douk natukoti atin natupok Markus ananin yopunyi rogur ehahih atah tukarah. Anudok Markus douk nenek mourum debeini pris iri.

<sup>11</sup> Jisas natik namudok aria nakrip Pita nakri, “Rukuk bainat agundok iganigadae nyatukatmori. Nyak nyakri eik ta mare isah enyudok amaen douk eikin Yain nakri um ta inyusah iri aka, uwok?”

*Amam Soldia Harao Jisas Hanak Um Anas*

<sup>12</sup> Aria amudok soldia hani amamin debeini soldia hani amudok iganigadae

heyoh Iruhin ananit debeiti urupat iri hasuhw Jisas howeshikan. <sup>13</sup> Howeshikan aria harik haranum Anas. Anas ananin nugawinen Kaiafas douk nape debeini pris abom um enyudok kwar. <sup>14</sup> Anudok Kaiafas, riguk douk nakrip eshesh Juda esheshim debeimi nakri enyen douk wosik um atun arman meyoh nugok um nutaurum ihishmorim arpes.

*Pita Nakri Anan Madae Nudukem Jisas Uwe*

(Matyu 26:69-70; Mak 14:66-68; Luk 22:55-57)

<sup>15</sup> Douk hasuhw Jisas haran hanak aria Pita nani anudok anan disaipel hagipeshan hanak. Anudok anan disaipel, douk adur debeini pris nadukeman wosik. Douk nadukeman namudok aria anan adur neirum Jisas hawish numun anudok debeini pris ananig ahwog. <sup>16</sup> Amam hawish aria Pita neyotukuk aduk wit. Aria anudok disaipel douk adur debeini pris nadukeman wosik iri watak natanam nakrip okwudok armatok kweyoh wit iri, aria narao Pita hawish.

<sup>17</sup> Hawish aria okwudok armatok kwarig Pita kwakri, "Aria nyak douk shopunek enenyum Jisas ananin disaipel?"

Aria Pita nakri, "Uwok, eik uwok." <sup>18</sup> Agagun douk nyumanugos-igun aria eshesh shenek mour agnudok iri shani amam heyoh Iruhin ananit debeiti urupat iri shautig eneh nyih aria sheyotu shersharh um hiyokesh. Aria Pita douk shopunek nanamesh sheyotum nyih hiyokan.

*Debeini Pris Nemnek Jisas Ananit Kwot*  
(Matyu 26:59-66; Mak 14:55-64; Luk 22:66-71)

<sup>19</sup> Aria abudok nyutob, anudok debeini pris nape narig Jisas. Narigan um apak ananim disaipel mani enyudok baraan douk nape nenek skulum arpes um. <sup>20</sup> Aria Jisas nakripan nakri, "Eik yakripesh eikin baraan ihish arpes yopugunum atugun. Eik adur yenek skulumesh gani numun apak Juda mawish mape meyagwreh baraan-ogwi urusag gani numun um narub agundok Iruhin ananit debeiti urupat tataoum.

Yakripeshen agundok ihishmorim Juda douk manaki mantorum um. Eik douk madae ibeshuk enen baraan ikripesh shokubur anabik uwe, uwok. <sup>21</sup> Nyak nyarig eik um maresh? Nyorik eshudok douk shemnek eikin baraan iri shukripen. Eshesh douk adur shadukemen um eik yakripeshen iri baraan."

<sup>22</sup> Douk Jisas nakri namudok aria anan neyoh Iruhin ananit debeiti urupat iri nabowan popaeshohos. Aria nakri, "Nyak mare nyukripan baraan debeg atin um anudok debeini pris uwe, uwok."

<sup>23</sup> Aria Jisas nebeiman baraan nakri, "Douk eik ikri enen madae adurin iri uwe baraan um, nyak nyukrip ihishmorim sheyotu agundok iri um enyudok baraan douk eik yakriyen iri. Aria douk eik madae ikri enen adurin iri baraan uwe um, aria nyak douk nyae meyoh um maresh?" <sup>24</sup> Aria abudok nyutob Anas neshopok Jisas nanak um debeini pris Kaiafas obi nyutob, ahwudok maduhw douk haweshik Jisas ananish roguhwa um douk watak hwor.

*Pita Wata Shopunek Nakri Anan Madae Nudukem Jisas Uwe*

(Matyu 26:71-75; Mak 14:69-72; Luk 22:58-62)

<sup>25</sup> Saimon Pita douk watak neyotu um nyih aria eshesh shani anan sheyotu iri sharigan shakri, "Aria nyak douk shopunek enenyum Jisas ananin disaipel aka, uwok?"

Aria Pita nagiyagig nakri, "Uwok, eik uwok." <sup>26</sup> Anan nenek mour meyoh um debeini pris iri douk nani anudok iganig Pita natupokan atah iri amam atup awirop. Douk anudok arman natik Pita aria narigan nakri, "Iganigadae douk yatrin nyani Jisas peyotu nubarig douk rowos oliv sataoum?" <sup>27</sup> Pita watak shopunek nagiyagig anah shopunek aria ahudok atuh owot adur takitak tape teyagwreh.

*Sharao Jisas Um Pailat Douk Nape Debeini um Gavman Um Judia Iri*

(Matyu 27:1-2, 11-14; Mak 15:1-5; Luk 23:1-5)

<sup>28</sup> Aria ruhur atin eshesh Juda shakitak shakutukuk Kaiafas ananit urupat sharao

Jisas shanak. Sharan shanak um Pailat douk nape debeini um gavman um Judia iri ananit urupat. Agagun douk watak ruhur aria shakri uwok um shuwishi numun urupat uwe, uwok. Shakri ta shuwishi aria Iruhin nutrish nukri shan-abosusih aria eshesh ta mare shuwok agundok worigun Pasova uwe, uwok. Namudok aria douk sheyotuguk aduk.18:28

<sup>29</sup> Douk namudok aria Pailat nakitak natograri aduk aria narigesh nakri, "Ipak douk pakri punekuman maren baraen anudok arman?"

<sup>30</sup> Aria eshesh Juda shakri, "Anan madae nunek enesh yoweishi inahos akure, apak ta mare muranium nyak uwe, uwok."

<sup>31</sup> Eshesh shakri namudok aria Pailat nakripesh nakri, "Ipak meyoh pusuwan aria punak punekuman baraen. Punekenyuman baraen kabi douk ipakin lo nyakrium puneken um eshudok douk shenek yoweishi inahos iri um."

Aria eshesh Juda shakri, "Ipak Rom pakri apak mare mubo enen arpen nyugok uwe, uwok." <sup>32</sup> Eshesh douk shakri namudok um enen baraen riguk Jisas nakriyen um shon nugok nir rowog kruse um nyutogur adurin atin.

<sup>33</sup> Aria Pailat wata natanam nanak nawish ananit urupat nape nasuhw kwotog um aria nahwar Jisas nawish. Nawish aria narigan nakri, "Nyak douk eshesh Juda esheshin king?"

<sup>34</sup> Aria Jisas narigan nakri, "Enyudok baraen douk nyak meyoh nyarige aka, uwok enesh shakripenyum eik aria douk nyarige?"

<sup>35</sup> Aria Pailat nebeiman baraen nakri, "Eik douk madae anan Juda uwe, uwok. Aria nyak nyenek maresh aria nyakishi shani amam debeimi pris douk shasuhwen sharaenyumori eik um innnek nyakit kwot?"

<sup>36</sup> Aria Jisas nebeiman baraen nakri, "Agundok eik yape debeiwe-irium eikish arpeshe um douk madae agundok atapishi arpeshe apa shagime um uwe, uwok. Aria

eik ipe debeiweirium eshesh namudok akure, eshudok shenekume mour iri ta shenek wanohw aria ta mare shusuhwe iri shunaki shiyubuk eshesh Juda eshesh wis uwe, uwok. Aria agundok eik yape debeiwe iri um eikishi arpeshe um douk madae kabi agundok atapishi arpeshe apa shenekesh um uwe, uwok."

<sup>37</sup> Aria Pailat narigan nakri, "Namudok aria nyak douk anan king aka, uwok?"

Aria Jisas nakri, "Nyak nyakri wo, eik douk king. Eikik amakek douk kweyubuki aria yanaki agundok atap um inek enyudok mour ikripesh adurin atin baraen. Ikripesh aria sabaishi arpeshe douk apa shagipesh adurinyi baraen aria ta shugipesh eikin baraen."

<sup>38</sup> Aria Pailat narigan nakri, "Enyudok adurin atin baraen douk maresh?" Pailat nakriyuk namudok aria nakitak natogur nakrip eshesh Juda nakri, "Eik madae iparug enesh anan nenekesh iri yoweishi inahos uwe, uwok. <sup>39</sup> Aria anah ipak padukemoh iri aih douk namudok. Ihish kwarahos ipak penek agundok debeiguni worigun Pasova um, eik apa yakweshih anan nonoweshik nape shunuweshik-ati urupat iri natogur nanak meyoh. Douk namudok aria ipak pakri wosik um eik ikweshih anudok ipak Juda ipakin king nunak meyoh aka, uwok?" <sup>40</sup> Aria eshesh shahwar debeg shakri, "Uwok, anudok uwok. Apak makri nyukweshihi Barabas nutogur-umapari." Anudok Barabas anan douk apa nenek wanohw aria nakwuaruh atuh iri.

## 19

*Pailat Nakri Ta Shunek Nyilim Jisas Rowog Kruse*

*(Matyu 27:15-31; Mak 15:6-20; Luk 23:13-25)*

<sup>1</sup> Douk eshesh shakri namudok aria Pailat nakrip amam soldia habo Jisas haprukan onohw maduhw kabi margit um. <sup>2</sup> Haprukan maduhw um jurug, aria hadaresh anah pruwewihw maduhw

18:28 **18:28** Pailat douk nape debeini um gavman iri nani ananishi, eshesh douk Rom. Aria eshesh Rom douk madae shugipesheh atih uwe ehudok aih douk eshesh Juda shagipesheh aria Iruhin ta nutrish aria nahwaresh yopishi um uwe, uwok. Douk namudok aria eshesh Juda shakri uwok um shuwishi anudok kupaibi amnabin ananit urupat aria Iruhin nutrish ba nukri shanabosusih iri uwe, uwok.

hadareshohw henekohw kabi anan king ananit hat um aria hahwemunan barag. Aria shopunek hanuguman anah owishiborihi rupah. <sup>3</sup> Douk henekuman eshudok iyoh aria hanak hurukatin hakri, “Ruwahep, nyak eshesh Juda esheshin king” Hakripan namudok aria habowan popaeshohos.

<sup>4</sup> Douk amam hanum jurug aria Pailat watak shopunek nakitak natograri anah shopunek aria nakripesh nakri, “Ipak tiki, eik douk ta iran nutograri aduk. Nutograri aria ipak kanak ta pudukemesh um eik douk madae iparug enesh yoweishi inahos anan nenekesh iri uwe, uwok.”

<sup>5</sup> Aria Jisas nakitak natograri. Natograri aria ahudok owishiborihi rupah douk hohurumanari. Pruwehwihw maduhw shopunek hwotemori ananig barag aria natograri. Douk natograri aria Pailat nakrip eshesh Juda nakri, “Ipak tiki! Arman douk anudok.”

<sup>6</sup> Douk natograri aria amam debeimi pris hani amudok heyoh Iruhin ananit debeiti urupat iri hatrun aria hahwar debeg hakri, “Nek nyiliman rowog kruse! Nek nyiliman rowog kruse!”

Aria Pailat nakripam nakri, “Ipak kanak puran punak punek nyiliman rowog kruse. Eik douk madae iparug enesh yoweishi inahos douk pakri anan nenekesh iri uwe, uwok.”

<sup>7</sup> Aria eshesh Juda shawanaman baraen shakri, “Enen apakin lo seiwok Iruhin nakoguk Moses um douk nyakri, arpen nyububunim um Iruhin iri douk shen nyugok. Aria lo douk nyakri apak douk mon nugok. Um maresh, anan nakri anan douk Iruhin ananin nuganin.” <sup>8</sup> Douk Pailat nemnek enyudok baraen aria adur nanogugur abom neshagrakuk agundok douk narik nanogugur um. <sup>9</sup> Aria anan wata narao Jisas hawish urupat aria narigan nakri, “Nyak meiburi waburin?” Narigan aria Jisas madae nuwanaman baraen uwe, uwok.

<sup>10</sup> Aria Pailat nakripan nakri, “Nyak nyakri uwok um nyuni eik wiyagwreh um maresh? Nyak douk nyadukemesh. Eik douk yarao big um wosik ikweshihen nyunak meyoah aka, ikripesh shunek

nyilimen rowog kruse.” <sup>11</sup> Jisas nemnek aria nawanaman baraen nakri, “Nyak douk Iruhin meyoah nakri wosik aria douk nyarao enyudok big um nyasuwokuk eik. Aria anudok douk narauri eik um nyak iri, anan douk adur nenek debeishi yoweishi inahos sheshagrakuk eshudok douk ta nyak nyunekesh iri.”

<sup>12</sup> Douk Pailat nemnek enyudok baraen aria nape natrugun um anah yah um nukweshih Jisas nunak meyoah. Aria eshesh Juda shahwar debeg shakri, “Douk nyak nyukweshih anudok arman nunak meyoah um, aria nyak douk madae anudok debeini um gavman um Rom iri Sisar ananin arpenyin uwe, uwok. Meini arman douk nukri anan nape king iri, anudok arman douk Sisar ananin horin.”

<sup>13</sup> Douk Pailat nemnek enyudok baraen aria narauri Jisas hatograri aduk. Hatograri aria nanak netem enyudok wagitur douk jas notem um aria nape nasuhw kwotog um. Netem enyudok wagitur agundok douk shahwaragun um “Utabor Bakus Um.” Hibriuin baraen douk shakri, “Gabata.” <sup>14</sup> Aria ahudok nyumnah, eshesh Juda douk shape shenek redi um worigun um ruwahepih shunek agundok debeiguni worigun Pasova. Aria douk nyumnah hatogur oruhw, aun netem orokohun aria Pailat nakrip eshesh Juda nakri, “Ipak tiki ipakin king!”

<sup>15</sup> Aria eshesh wata shahwar debeg shakri, “Bukanaguk! Bukanaguk! Punak punek nyiliman rowog kruse!”

Aria Pailat narigesh nakri, “Ipak pakri eik inek nyiliman ipakin king nir rowog kruse aka, uwok?”

Aria amam debeimi pris hebeiman baraen hakri, “Anudok douk madae apakin king uwe, uwok. Apakin king douk debeini gavman Sisar atun!” <sup>16</sup> Douk shakri namudok aria Pailat nekesh Jisas um esheshis wis um shunak shenek nyiliman rowog kruse.

*Amam Soldia Henek Nyilim Jisas Neir Rowog Kruse*  
(Matyu 27:32-44; Mak 15:21-32; Luk 23:26-43)

Aria amam soldia harao Jisas haku-tukuk wabur hanak. <sup>17</sup> Hanak aria Jisas anan kanak nasah ananin rowog kruse nanak um anag mihig. Agudok mihig douk gape kabi enen nyagok iri enyenyig barag um. Hibruin baraeen douk shah-warag Golgota. <sup>18</sup> Douk hanak hakih aria amam soldia henek nyilim Jisas neir rowog kruse. Shopunek henek nyilim biom armam heir wobuwobur aria Jisas neir orokohun.

<sup>19</sup> Aria Pailat douk nowemori enen baraeen aria amam heshopen nyape kruse douk Jisas neir um. Baraeen douk nyakri namudok. Nyakri,

JISAS DOUK NANAKI WABUR NASARET IRI, ESHESH JUDA ESHESHIN KING.

<sup>20</sup> Aria sabaishi Juda shanaki shape shatahrih enyudok baraeen. Um maresh? Agundok amam soldia henek nyilim Jisas neir kruse um douk nape iri hurukatin meyoh um abrudok debeiburi wabur. Aria enyudok baraeen, Pailat douk nenyem binyatin baraeen. Nenyem eshesh Juda esheshin, Rom esheshin nyani eshesh Grik esheshin. <sup>21</sup> Aria eshesh Juda esheshim debeimi pris hatrin aria hakrip Pailat hakri, “Nyak mare nyunyem nyukri, ‘Eshesh Juda esheshin king’ uwe, uwok. Nyak nyunyem nyukri, ‘Anudok arman nakri anan douk eshesh Juda esheshin king.’”

<sup>22</sup> Aria Pailat nakri, “Nyeneken, baraeen eik yenyem iri douk nyupe namudok atin.”

<sup>23</sup> Amam soldia henek nyiliman-aguk um kruse ba iyoh, aria hanak hohur ananin rupeh hasiyaeh hehubuk um nubatigunum. Hasiyaeh aria amam atun atun honohur sisiguk atin. Aria amam honohur ananit routi siot shopunek. Atudok siot douk madae shutapeyat aria shukwrop anabus apubus supe uwe, uwok. Atat douk shenekat iruhw aria tabuh tape namudok tabuh tatao amnab.

<sup>24</sup> Namudok aria amam soldia heneyagwreh hakri, “Apak mare ta muworut uwe, uwok. Mubirak meyoh kabi shabirak satu um aria anudok nenek uhwinumat iri douk ta anan nunosuwat.”

Amam douk henekesh namudok um enyudok baraeen nyetem Iruhin ananik Buk iri nyutogur adurin atin. Baraeen enyudok.

“Eshesh shenesiyao eikih rupeh shanosuweh  
aria shabirak kabi shabirak satu,  
um shenek uhwinumat eikit siot.”

Aria amam soldia douk adur henekesh kabi enyudok baraeen nyakrium.

<sup>25</sup> Ono armago douk wanak weyotu harokatin um enyudok kruse Jisas nataur um. Owo douk Jisas ananik amakek kwani okwokwik wawik wani Maria douk kworao Klopas iri. Aria onok douk kupaikwi Maria shopunek douk kwanaki Makdala iri. <sup>26</sup> Jisas natruguni natigi ananik amakek kwani anudok disaipel douk anan adur urkum makri manawashaman iri sheyotu hurukatin. Aria nakripi amakek nakri, “Nanudok douk nyakin nunganin.” <sup>27</sup> Aria watak nakrip anudok disaipel nakri, “Nokwudok douk nyakik amakek.” Aria banab abudok nyutob anudok disaipel nemnek namudok aria narao Maria shanak aria kwape ananit urupat.

*Jisas Adur Nagok*

(*Matyu 27:45-56; Mak 15:33-41; Luk 23:44-49*)

<sup>28</sup> Aria Jisas douk nadukemesh um ananin mour douk nyatuh. Aria nakri, “Eik abar bae.” Anan douk nakri namudok um nunek enen baraeen nyetem Iruhin ananik Buk iri nyutogur adurin.

<sup>29</sup> Aria agundok, anap marup shukunip um nubutibari abar douk pakus. Douk amam soldia hemnek namudok aria hanak hohur enen spans<sup>19:29</sup>hesegwurin abrudok abar arigaha shuknin. Aria hatuken henyak anag shokugi akodiwok um hisop aria hatuken nyato um Jisas ananit nokwatum nuwok abrudok abar.

<sup>30</sup> Douk Jisas nawok abrudok abar um jurug aria nakri, “Mour enyudok nyatuh.” Douk nakriyuk namudok aria barag gabuh aria mishin nyakihuk aria nagok.

*Anan Soldia Nakwuman Burawog Agundok Rabusinum Jisas*

<sup>31</sup> Aria ahudok nyumnah habo Jisas nani amudok anam biom armam um, eshesh Juda douk shape shaurim worigun um ruwahepih shunek agundok debeiguni worigun um ahudok anah debeihi nyumnah Sabat. Aria eshesh Juda douk shakri uwok um amam hir kruse ahudok debeihi nyumnah uwe, uwok. Namudok aria shanak sharig Pailat um shunak shushubur amamigas aiyas. Shakri shushuburagas um hugok arigas aria shubreami shunak shurumam. <sup>32</sup> Douk shakrip Pailat nakri wosik aria amam soldia hanak heshubur amudok biom armam amamigas aiyas. Harik heshubur sagomin ananigas aria hanak heshubur anudok anan ananigas shopunek. Amudok douk henek nyilimam hataur wobuwobur um Jisas iri. <sup>33</sup> Douk heshuburuk amamigas aiyas iyoh aria hanakum hushubur Jisas ananigas. Hanak aria hatik um anan douk nagok. Namudok aria amam madae hushubur ananigas aiyas uwe, uwok. <sup>34</sup> Aria anan soldia nohur ananig burawog aria nador agundok rabusinum Jisas. Nadron aria ahudok atuh owishibor bani abar shau shabui. <sup>35</sup> Aria anudok arman natik enyudok iri douk nakrip ipak. Anan douk adur nadukemesh um baraen anan nakripepenyi douk adurin atin. Enyudok madae rohwin uwe, uwok. Anan douk nakripep um punek bilip um Jisas. <sup>36</sup> Aria enyudok douk nyatogur namudok um enyudok baraen nyetem Iruhin ananik Buk iri nyutogur adurin atin. Baraen enyudok. "Eshesh ta mare shushubur enen bripigur uwe, uwok." <sup>37</sup> Aria enen shopunek baraen douk nyakri, "Arpesh ta shutik anudok arman douk shakwuman burawog iri."

*Shanak Sharum Jisas Onohw Wonugwehw Douk Shatupak Ono Burbudu Um Aria Sharokohw Iri*  
(Matyu 27:57-61; Mak 15:42-47; Luk 23:50-56)

<sup>38</sup> Douk enyudok nyanakuk, aria Josep douk nanaki wabur Arimatea iri nanak narig Pailat um nubrei Jisas kruse aria nunak nuruman. Josep anan douk

shopunek anan nagipesh Jisas iri, aria nanogugur um eshesh Juda esheshim debeimi aria nabeshuk ananin bilip. Douk nanak narig Pailat nakripan iri um wosik aria nanaki nabreyan um enyudok kruse um nunak nuruman. <sup>39</sup> Anudok Nikodemus douk riguk anab wab nanak natik Jisas iri shopunek nani Josep hanakum hurum Jisas. Nikodemus nakitaki nasuhwi anas seisik yopuri unar wosik iri gris nanaki. Asudok yomagis gris douk shahwaras um mer iri alos. Shenek budibodigas aria shabadigas atugun aria amaenyis um douk 30-porein kilogram. <sup>40</sup> Aria amam hagipesh eshesh Juda esheshih aih um shurom arpesh um. Douk hanahur hanak howanaman asudok gris ananihw yegenyihw iyoh aria heshurehan anah shigorihiwihi rupah. <sup>41</sup> Aria hurukatin um agundok amam soldia henek nyilim Jisas kruse um, anab amnab douk bape. Aria agundok, onohw namuhwi wonugwehw douk hwape. Eshesh douk watak shurom enen arpen uwe, uwok. <sup>42</sup> Aria ahudok nyumnah eshesh Juda douk shape shenek gibegabe eneshenesh eshudok um ruwahepih ta shunek debeiguni worigun um ahudok anah debeihi nyumnah Sabat. Aria ahwudok namuhwi wonugwehw douk shopunek hwape iri hurukatin meyoh. Namudok aria hawish harom Jisas ahwudok wonugwehw.

## 20

*Jisas Nagok Aria watak Shopunek Nakitak Nape*

(Matyu 28:1-8; Mak 16:1-8; Luk 24:1-12)

<sup>1</sup> Aria ruwahepih ruhur ahudok sagom atinyih nyumnah<sup>20:1</sup>um wik, watak arukwutigun aria Maria douk kwanaki Makdala iri kwakitak kwanak um kutik wonugwehw agundok harom Jisas um. Douk kwanak aria kwatik um amudok utom douk hatotigasam um hogah umunihw um nuwag iri douk madae mutao umunihw-igum uwe, uwok. Manak makusuk anagas. <sup>2</sup> Douk kwatiguk namudok aria kwatanam kwahur kwanak kwakrip Saimon Pita



nani anudok anan disaipel douk Jisas anan urkum makri munawashaman iri aria kwakri, “Enesh shanaki shawish wonugwehw aria shohur apakin Debeini sharan shanak. Aria apak douk madae mudukem agundok shanak shanabuk um uwe, uwok!”

<sup>3</sup> Douk okwok kwakripam namudok aria Pita nani anudok anan disaipel hakitak hahur hanak gani douk wonugwehw hwape um. <sup>4</sup> Hahur hanak, aria anudok anan disaipel neshagrakuk Pita aria anan narik nanak natogur agundok wonugwehw hwape um. <sup>5</sup> Narik nanak natogur aria madae nuwish uwe. Neyotu aduk meyoh nape nushakamagun natigu numunihum wonugwehw. Natrugun aria natigu ahudok shigorihwihi rupah atuh hokusuk. <sup>6</sup> Saimon Pita douk nagiman nanak aria nanaki adur nawish wonugwehw. Nawish aria natik rupah atuh hokus. <sup>7</sup> Aria ahudok rupah douk heshureh barag um douk madae huni ahudok anah hukus atugun uwe, uwok. Ahah douk kabi enesh shadareshah aria hanak hokusuk sik. <sup>8</sup> Aria anudok disaipel douk narik nanak natogurum wonugwehw iri shopunek nagipesh Pita nawish natik ahudok rupah. Natruh aria nenek bilip nakri adur atin Jisas douk nakitak nape. <sup>9</sup> Aria abudok nyutob, amudok biom disaipel douk shopunek watak gamo hudukem baraen nyetem Iruhin ananik Buk iri uwe, um Jisas douk ta nugok aria ta watak nukitak nupeum uwe, uwok. <sup>10</sup> Douk amudok biom disaipel hakutukuk wonugwehw aria watak hatanam wabur.

*Jisas Natogur Um Maria Douk Kwanaki Makdala Iri*  
(Matyu 28:9-10; Mak 16:9-11)

<sup>11</sup> Douk amam hanak aria Maria kweyotuguk adukihw um wonugwehw kwape kworeh. Kworeh aria kwohwido kwape kwatigu numunihw um wonugwehw. <sup>12</sup> Kwatrugun aria kwatigu biyesh enselamos douk sheneki shigorihwihi atih rupeh iri shape. Kwatrish shape okwudok outuk douk sagomatin Jisas nakus um. Enen

nyape barag gakus um aria enen agundok aiyas um.

<sup>13</sup> Aria sharigok shakri, “Nyak nyape nyereh um maresh?”

Aria okwok kwakri, “Enesh shanaki shohur eikin Debeini sharan shanak. Sharan aria eik douk madae idukem agundok shanak shanabuk um uwe, uwok.”

<sup>14</sup> Douk kwakriyuk namudok kwakri kutanam kutrugunukuk aria kwatik Jisas neyotu. Kwatrun aria madae kwudukemesh um anan douk Jisas uwe, uwok.

<sup>15</sup> Aria Jisas narigok nakri, “Nya, nyak nyape nyereh um maresh? Aria shopunek douk nyape nyaurim amiapen?”

Douk narigok namudok aria okwok kwakri anan douk nenek mour agundok nubarig iri. Namudok aria kwakripam kwakri, “Debeini, douk nyak nyunohur nyunak nyunabukuk anagun um, nyak watak nyukripe-magun aria inak inohuri.”

<sup>16</sup> Aria Jisas adur nahwarok um okwokwin nyeigur nakri, “Maria.” Aria okwok kwatanam kwatrun aria kweyagwreh baraen Hibru kwakri, “Rabonai.” Enyudok baraen Rabonai douk nyakri, “Debeini Tisa.”

<sup>17</sup> Aria Jisas nakripok nakri, “Nyak mare nyususuhwe uwe, uwok. Um maresh? Eik douk watak itanam ito ikih itik eikin Yain uwe, watak. Aria nyak douk nyunak nyukrip eikim warhim amam disaipel, um eik ta itanam ito ikih itik eikin Yain. Anan douk shopunek ipakin Yaken. Anan douk eikin Iruhin aria ipakin Iruhin shopunek.”

<sup>18</sup> Aria okwudok Maria kwanaki Makdala iri kwatanam kwanak. Kwanak aria kwakrip apak Jisas ananim disaipel um agundok kwakutukuk Debeini aria nakripokum kwunaki kwukripap enyudok baraen douk kwakripap um.

*Jisas Natogurum Ananim Disaipel*  
(Matyu 28:16-20; Mak 16:14-18; Luk 24:36-49)

<sup>19</sup> Aria wabigun um ahudok sago matinyih nyumnah um wik20:19huruk atin um wab aria apak Jisas ananim

disaipel manak mawish mantorum mape anat urupat. Apak douk manogugur um eshesh Juda esheshim debeimi aria manak mawish mawaruguk witog numun aria mape. Douk mape aria Jisas nanaki neyotu agundok apak mape um aria nakri, “Ipakiruh aparuh hur wosik.”<sup>20</sup> Douk nakriyuk namudok aria neyabigap wis agundok amam soldia henek nyiliman kruse um aria agundok rabusinum douk soldia nakwuman burawog um. Douk anan neyabigap nyubrug matrug aria adur manadudareh mariguk abom um agundok matik apakin Debeini um.

<sup>21</sup> Aria Jisas watak shopunek nakripap nakri, “Ipakiruh aparuh hur wosik. Eik ta ishopokep punak punek eikin mour kabi riguk eikin Yain neshopoki eik yanamori agundok atap um.”<sup>22</sup> Douk nakri namudok aria nahapur ananip yap panakmori apak aria nakri, “Ipak purao Iruhin ananin Mishin.”<sup>23</sup> Douk ipak ta pusuhw enesh arpesesh esheshish yoweishi inahos pupe aria pukwreyeshuk um, aria esheshish yoweishi inahos ta mare watak shupenyesh uwe, uwok. Aria douk ipak pusuhw esheshish yoweishi pupe aria mare pukri pukwreyeshuk um, aria esheshish yoweishi inahos ta watak shupenyesh.”

### *Tomas Natik Jisas*

<sup>24</sup> Tomas enyudok enen nyeigur shahwaran um Didimas iri douk nanaki um apak Jisas ananim 12-poreim disaipel mapeum. Aria abudok nyutob riguk Jisas nanaki natogrumap obi nyutob, anan douk madae nini apak mupe uwe, uwok.<sup>25</sup> Aria apak anap disaipel makrip Tomas makri, “Apak matrun apakin Debeini.”

Aria Tomas nakri, “Douk eik itik nyubrug wis douk nyiguhw hwawish um aria iwem hah-umog, eik ta inek bilip ikri adur. Aria shopunek um douk iwem wis agundok rabusinum douk soldia nakwuman burawog um, eik ta inek bilip ikri adur. Uwok um, ta uwok.”

<sup>26</sup> Douk arigaha anag wik gatuhuk aria apak Jisas ananim disaipel watak manak mantorum mape atugun atudok urupat.

Aria abudok nyutob Tomas douk shopunek nani apak mape. Mawish mawaru ihigwumorim witog aria mape numun. Mape aria Jisas nanaki neyotu agundok apak mapeum aria nakri, “Ipakiruh aparuh hur wosik.”<sup>27</sup> Aria nakrip Tomas nakri, “Nyak yowi wem nyakih hah agundok eikis wis douk nyiguhw hwawish um. Aria shopunek nyuwem wis agundok rabusum. Nyak mare nyusuhw biyep urkwip uwe, uwok. Eik yakri nyak douk adur nyunek bilip um eik.”

<sup>28</sup> Aria Tomas nebeiman baraen nakri, “Nyak douk eikin Debeini aria eikin Iruhin!”

<sup>29</sup> Aria Jisas nakripan nakri, “Nyak douk nyatiwe aria douk nyenek bilipume. Aria eshudok arpesesh douk madae shutik eik aria shusuhw eikin baraen shukri adurin iri, eshesh wosik ta adur shunadudareh.”

### *Baugenyum Baraen Um Jon Nenyem Okwudok Buk Um*

<sup>30</sup> Jisas douk nenek sabainyi Iruhin atun neneken iri mour shopunek aria apak ananip disaipel matrin. Neneken aria eik douk madae inyem um sabainyi anan neneken iri mour okwudok buk uwe, uwok.<sup>31</sup> Aria baraen um Jisas neneken iri mour nyetem okwudok buk iri, eik douk yenyem um yakri ipak putarihen aria punek bilip pukri Jisas anan douk Kraiss, anudok douk Iruhin nagraehan aria neshopokan nanakmori nunarao arpesesh iri. Aria shopunek um punek bilip pukri Jisas anan douk adur Iruhin ananin abom Nuganin. Aria shopunek um punek bilipuman namudok aria ipak ta adur pupe wosik abom ihih nyumneh.

## 21

### *Jisas Natogur Um Ananim 7-poreim Disaipel*

<sup>1</sup> Douk enyudok nyanakuk aria Jisas watak shopunek natogurum apak ananim disaipel anah shopunek. Natogrumap gani debeigi waiyag nyeigurig um Taiberias. Anan douk natogrumap namudok.<sup>2</sup> Saimon Pita nani Tomas douk ananin enyudok kupainyi nyeigur douk Didimas, nani Nataniel douk nanaki wabur Kana agudok shokugi nahobig

Galili, nani anam douk ohwak Sebedi ananim biom nugamim. Apak sabaipi mani amudok anam biom Jisas ananim disaipel manak aria mape atugun. <sup>3</sup> Mape aria Saimon Pita nakripap nakri, “Eik douk ta inak ituk anaguhw eiguhw.”

Aria apak makripan makri, “Apak shopuk ta munamen.” Aria manak mato bot aria abudok wab shuknib apak manak aria madae mutuk anap atup arbut uwe, uwok.

<sup>4</sup> Ruwahep wehip aria Jisas nanak ney-otu anagas um agudok waiyag. Apak ananim disaipel douk matrui, aria madae mudukemesh mukri anan douk Jisas uwe, uwok.

<sup>5</sup> Aria anan narigap-agu nakri, “Yaipo, ipak patuk anaguhw eiguhw aka, uwok?”

Aria apak mebeimanari baran makri, “Uwok.” <sup>6</sup> Aria anan nakripap-agu nakri, “Ipak puwashak ipakin umben nubuhuk yopunyi rogur ehahum bot aria ipak ta putuk anaguhw.” Apak memnek douk mawashak umben nabuh aria mabirak umben um monukan aria madae monukanari uwe, uwok. Um maresh, sabaiguhwi eiguhw hwatuk aria umben adur amaenyin atin.

<sup>7</sup> Aria anudok disaipel douk Jisas urkum makri adur manawashaman iri nakrip Pita nakri, “Nanudok douk apakin Debeini.” Douk Pita nemnek namudok aria nakitak nohur ahudok rouhi rupah douk nape nahunug aduk iri nohur. Um maresh? Iganigadae anan noharukuk um hatuk eiguhw um. Aria nabuh waiyag napaur nanak um anagas. <sup>8</sup> Aria apak mapeik bot iri disaipel mape manuk anudok umben douk shukninum eiguhw iri manak um bot. Apak douk madae muruguk rougun um anagas uwe, uwok. Morari hurukatin meyoh kabi douk 100 mita um. <sup>9</sup> Douk arigaha manak matogur anagas aria matik eneh nyih hanu hakus. Anap arbut douk poteh ehudok nyih aria matik anat bret shopunek takus agundok.

<sup>10</sup> Aria Jisas nakripap nakri, “Ipak huraki anaguhw eiguhw iganigadae patukoguh iri.”

<sup>11</sup> Douk anan nakri namudok aria Saimon Pita nato bot nanuki anudok

umben eiguhw hwatuk um natomori anagas. Anudok umben adur shukninum 153-poreiguh debeiguhwi atuguh eiguhw. Adur sabaiguhwi, aria umben douk madae tukeren uwe, uwok.

<sup>12</sup> Aria Jisas nakripap nakri, “Yowi puwok anagun worigun.” Aria apak disaipel douk madae anan nukrium norigan nukri, “Nyak amiapen?” uwe, uwok. Um maresh? Apak madukemesh um anan douk apakin Debeini. <sup>13</sup> Aria Jisas nanaki nohur atudok bret nokopat. Nokop bret aria watak shopunek nohur eiguhw nenekesh namudok atin nape nakopaguh.

<sup>14</sup> Aria ahudok douk henek biyeh atih um agundok Jisas nagok aria watak nakitak nape aria natogurum apak ananim disaipel um.

*Jisas Nakrip Pita Nakri, “Nyak Nyukesh Worigun Eikish Sipsipahos”*

<sup>15</sup> Douk apak mawok eiguhw aria bret meyatesh aria Jisas narig Saimon Pita nakri, “Saimon, Jon ananin nunganin, nyak douk adur urkum makri munawasham eik abom nyeshagrakuk amudok anam disaipel aka, uwok?”

Aria Pita nakri, “Debeini, adur wo. Nyak douk nyadukemesh. Eik douk adur urkum makri munawasham nyak.”

Douk nakri namudok aria Jisas nakripan nakri, “Nyak nyukesh worigun eikish nugaesh sipsipahos.”

<sup>16</sup> Aria Jisas watak shopunek narig Saimon Pita anah shopunek nakri, “Saimon, Jon ananin nunganin, nyak douk urkum makri munawasham eik abom aka, uwok?”

Aria Pita nakri, “Debeini, adur wo. Nyak douk nyadukemesh. Eik douk adur urkum makri munawasham nyak.”

Aria Jisas nakripan nakri, “Nyak nyiyoh eikish sipsipahos.”

<sup>17</sup> Aria Jisas watak narigan anah shopunek aria hatogur biyeh atih. Nakri, “Saimon, Jon ananin nunganin, nyak douk urkum makri munawasham eik aka, uwok?”

Douk narigan biyeh atuh enyudok atin baran aria Pita ananihw apahw adur yowehw abom. Aria nakrip Jisas nakri, “Debeini, nyak douk adur

nyadukem ihishumori eshudok, aria nyadukemesh um eik douk urkum makri munawashamen abom.”

Aria Jisas nakripan nakri, “Nyak nyiyoh eikish sipsipahos. <sup>18</sup> Aria adur atin yakripen, abudok nyutob nyak watak werorowinyum, nyak kanak nyanawashak let aria nyanak agundok douk nyakri nyunak um. Aria abudok nyutob nyunak ruwoginum, nyak douk ta nyuhur roguhwy nyusuhweshaguk iruhw aria ta kupainyi arpen nyunatugat-umen. Aria shopunek enyen ta nyusuhw nyakish roguhwy aria nyuraen nyunak agundok douk nyak nyukri uwok um nyunak um.” <sup>19</sup> Jisas douk nakri enyudok baraen um nuyabigam um ahudok yah douk kweipon ta shubo Pita nugok aria arpesh shutrun shutuk Iruhin ananin nyeigur nyuto iruhw um. Aria Jisas nakripan nakri, “Nyak ta nyugipesh eik.”

*Jisas Nani Ananin Disaipel Douk Anan Urkum Makri Munawashaman Iri*

<sup>20</sup> Pita natanam natrugunuguk aria natik anudok disaipel douk Jisas adur urkum makri munawashaman iri nagipesham nanaki. Anan douk anudok disaipel douk riguk hape hawok worigun aria natotigos nanak huruk atinyum Jisas aria narigan um ta meini niyabig Jisas ananim horim um anan iri. <sup>21</sup> Douk Pita natrun aria narig Jisas nakri, “Debeini, nyak nyakriyan mumam anudok?”

<sup>22</sup> Aria Jisas nebeiman baraen nakri, “Douk eik ikri anan mare nugok aria nupe arigaha eik watak itanamori akure, enyudok douk madae nyakin mour uwe, uwok. Eikin mour atin. Nyak ta nyugipesh eik atuwe.”

<sup>23</sup> Enyudok baraen douk shakriyen nyanak aria eshesh shagipesh Jisas iri shanakripam shanak. Shakri Jisas nakri anudok disaipel ta mare nugok uwe, uwok. Aria Jisas douk madae nukri namudok uwe, uwok. Anan douk nakri, “Douk eik ikri anan mare nugok, aria nupe arigaha eik watak itanamori um, enyudok douk madae nyakin mour uwe, uwok. Eikin mour.”

<sup>24</sup> Aria anudok disaipel douk adur eik Jon douk yowem baraen okwudok buk iri.

Aria apak douk madukemesh um enyudok baraen douk yakriyen aria yenye-mari douk adurin atin.

<sup>25</sup> Aria Jisas shopunek douk nenek sabainyi enenyenen mour. Aria douk shukri shuwem baraen um enyudok sabainyi mour Jisas neneken iri ono bumbek akure, agudok atapig nahobig douk ta mare gusuhw oudok sabaiwari bumbek ukus um uwe, uwok.

## Douk Amam Aposel Heneken Iri Mour

### *Banenyi Baraen Um Aposel*

1:1-26 Jisas nakomuk mour ananim disaipel aria nato iruhw heven.

2:1—8:3 Jisas ananish disaipel sharao Iruhin ananin Mishin enyenyin dodog um shunek mour shukripesh Iruhin ananin yopinyi baraen hurukatin um Jerusalem.

8:4 —12:25 Jisas ananish disaipel shanak shakripesh baraen agusudok biagos shokugosi nahobigos judia iri Samaria.

13:1—21:16 Pol nanak sabairubi warub nakripesh Jisas ananin baraen sabaisi arpesh.

21:17 —28:31 Pol nanak Jerusalem nakripesh baraen um anan neneken iri mour um sabaishi Kristen aria eshesh juda shenek kwotuman aria nanak nonoweshik Rom.

<sup>1</sup> Tiofilus, okwudok eikik yarik yenyemok iri buk, eik douk yawem baraen um ihishmori eshudok enesh- enesh douk Jisas narik nenekesh iri shani enyudok douk nenek skulumesh um <sup>2</sup> arigaha ahudok nyumnah Iruhin naran nato iruhw heven um. Abudok nyutob Iruhin watak nuran nuto obi nyutob uwe, Iruhin ananin Mishin nyenekan dodogowin aria nakripamuk dodogowinyi baraen ananim aposel douk nagraeham um hunak hukripesh ananin baraen iri. Nakripamuk um ihinyumori mour douk amam ta huneken iri. <sup>3</sup> Sagomatin douk shan nemnek debeiri eriger nagok aria wata shopunek nakitak nape. Nakitak nape aria natogrumam sabaihi nyumneh ananim aposel. Aria douk nenek sabaishi eshudok eneshenesh hatrun aria henek bilip hakri anan adur douk nakitak nape. Aria 40-poreih nyumneh douk nagok aria wata nakitak nape narahaen, amam douk hatrun aria nakripam um arpesh shuwish um agundok Iruhin nape debeinium ananish arpesh um. <sup>4</sup> Wata hapeyobi nyutob, anan

douk nakripamuk enyudok dodogowinyi baraen nakri, “Ipak mare pukutukuk Jerusalem, uwok. Aria pupe putrugunum enyudok yopinyi presen douk eikin Yain nakri um ta nukepen iri. Enyudok douk riguk eik yakripepumen iri. <sup>5</sup> Jon douk nenek baptaisumesh abar iri douk nenek baptaisumesh abar meyoh. Aria karowih nyumneh hunak hudiguk aria Iruhin ta nishopok ananin Mishin nyuwishep aria adur nyupenyep wosik.”

<sup>6</sup> Aria abudok nyutob amam aposel hani Jisas hanaki hantorum hape atugun obi nyutob, amam douk harig Jisas hakri, “Debeini, nyutob douk ta abudok, um nyak ta wata nyutaurum apak Israel mutogur dodogowip aria anan apakin arman nutogur king aria nusuhw merikwumap aka, uwok?”

<sup>7</sup> Aria Jisas nawanamam baraen namudok. Nakri, “Iruhin nakri uwok um ipak pudukemesh. Ahudok nyumnah ta hutogur iri, eikin Yain ananin mour. Anan dodogowin um nukri meibi nyutob, o meihi nyumnah hutogrum apak Israel mupe debeipi um, enyudok douk anan atun dodogowin um nuneken.

<sup>8</sup> Aria ipak douk ta purao dodog abudok nyutob Iruhin ananin Mishin nyubuhi nyuwishep obi nyutob. Purao dodog aria ta pukripesh eikin baraen abrudok wabur Jerusalem buni ihirubmorim warub bape agusudok biagos shokugosi nahobigos judia iri Samaria. Pukripeshen agundok um jurug aria ta punak pukripeshen ihirubmorim rougunirub warub douk bape agundok atap iri.”

### *Iruhin Narao Jisas Nato Iruhw Heven*

<sup>9</sup> Douk Jisas nakripamuk enyudok baraen um jurug, amam heyotu hatrun aria Iruhin naran natoum iruhw heven. Nato douk onog orug gwanaki gwabeshukan-ukuk aria amam madae hutrun uwe. <sup>10</sup> Anan nanakuk aria amam watak heyotu hape hatrugun duk iruhw um utag. Aria ahudok atuh biom armam heneki shigorihiwihi atih rupeh iri hanaki hani amam heyotu. <sup>11</sup> Hanaki heyotu aria hakri, “Ipak armam douk panaki agudok shokugi nahobig Galili iri, ipak

mare piyotu agundok pupe putiku iruhw utag, uwok. Anudok Jisas douk Iruhin natrivan naran nato iruhw heven iri, anah nyumnah ta wata shopunek putrun nunaki kabi douk patrui nato iruhw heven um.”

### *Shagraeh Anan Arman Um Nurao Judas Ananin Mour*

<sup>12</sup> Douk Jisas natoumoguk iruhw heven aria amam aposel wata hakutukuk ahwudok yoduhw Oliv aria hatanam hanak um Jerusalem. Ahwudok yoduhw Oliv douk hwape iri hurukatin meyoh um Jerusalem. Rougunum douk hurukatin um atin kilomita. <sup>13</sup> Douk hanaki hawish wabur Jerusalem aria hatu anam rum anat iruhit urupat douk amam hapenyam iri. Amam aposel amamish nyeiguhw eshudok: Pita, Jon, Jems, Andru, Filip, Tomas, Bartolomyu, Matyu, kupaini Jems anudok Alfius ananin nuganin, anan Judas kupaini Jems ananin nuganin. Amudok ihim-morim hani Saimon. Anudok Saimon douk anan Selot.1:13

<sup>14</sup> Amudok ihim-morim armam hantorum hape aria ihih nyumneh hape henek beten harig Iruhin. Ono armago wani Jisas ananik amakek Maria kwani ananim warhim eshesh shopunek shanaki sheir amam aposel adur shape atugun aria shape shenek beten um Iruhin.

<sup>15</sup> Aria abudok nyutob, arpes shagipesh Jisas iri douk shatogur 120-poreish. Aria anah nyumnah, eshesh douk shape aria Pita nakitak neyotu nakripesh nakri, <sup>16</sup> “Eikish ashukenyish owashish, seiwok Iruhin ananin Mishin douk nyohur Devit aria neyagwrehuk enen baraen douk nyetem Iruhin ananik Buk iri. Enyen douk nyakrium anudok Judas douk narikum Jisas ananim horim hanaku hasuhw Jisas hanak han iri. Aria douk enyudok baraen douk nyatogur adurin kabi seiwok Devit nakrimaguk um. <sup>17</sup> Riguk anudok Judas douk neir apak Jisas ananip mape marahaen atugun. Douk nani apak menek enyudok atin mour iri.”

<sup>18</sup> Abrudok utabor douk hako Judas um yoweishi inahos anan nenekesh

iri um anan douk nasuhwabor nanak nator anab amnab. Natorub aria nabuh netu nagok nakus abudok amnab, ananihw yegenyihw puwarohw aria nyibur batogur bakus atap. <sup>19</sup> Aria ihishmorim shape Jerusalem iri shemnek um enyudok nyatogurum Judas iri. Abudok amnab douk Judas nagok nakusab iri, esheshin baraen douk shahwarab, “Akel-dama.” Enyudok baraen douk nyakri, “Owishibor bakusab iri amnab.”

<sup>20</sup> Pita gamo nakripesh nakri, “Baraen nyakrium enyudok nyatogurum Judas iri douk nyetem Buk Song. Baraen douk enyudok.

‘Ananit urupat ta tupe wohit aria mare enen arpen nyunak nyupe, uwok.’ Enen shopunek baraen nyetem iri nyakri namudok. Nyakri,

‘Ananik outuk douk ta kupeik meyoh. Kupainyi arpen wosik nyirao ananin mour.’

<sup>21</sup> “Namudok aria douk apak mugraeh anan arman um nurao Judas ananin mour. Mugraeh anan um amudok douk hani apak mape marahaen atugun atin ihih nyumneh mani Debeini Jisas nani apak marahaen-ehi. <sup>22</sup> Mugraeh anan arman douk nani apak mape marahaen abudok nyutob Jon nenek baptaisumesh iri nape nakripesh baraen obi nyutob arigaha abudok nyutob Iruhin narao Debeini Jisas nakutupukuk nato iruhw heven obi nyutob. Aria anudok mugraehan iri arman, anan ta nirap mukripesh baraen um Debeini Jisas douk nagok aria wata shopunek nakitak nape.”

<sup>23</sup> Pita nakripesh namudok aria shagraeh biom armam. Anan Josep. Josep douk nanahwar biyesh nyeiguhw shopunek. Enen Barsabas aria enen Justus. Anudok nani anan douk shahwaran um Matias iri. <sup>24</sup> Shagraeham hape aria henek beten harig Iruhin namudok. Hakri, “Debeini, nyak douk nyadukem ihishmorim arpes esheship urkwip. Aria amudok biom armam, apak douk makri niyabigap anudok douk nyak nyagraehan iri. <sup>25</sup> Niyabigap um nurao enyudok mour aposel douk

Judas nakutinyuk nanak um ananibur yoweiburi wabur iri.”

<sup>26</sup> Namudok aria hakitak howem amamish nyeiguhw shetem biobor utabor aria shakutubor enesh eshudok muguhwos. Shakutubor douk sheyakabor aria Matias ananin nyetemom iri manatuk matowi aria anan nenek uhwin. Aria douk hakutun natanamum amudok anam 11-poreim aposel.

## 2

### *Iruhin ananin Mishin Nyabuhi Nyawish Jisas Ananish Arpesh*

<sup>1</sup> Ahudok debeihi nyumnah Pentikos douk hatogri, aria ihishmorim shasuhw Jisas ananin baraan shagipeshen iri douk shantorum shape atugun. <sup>2</sup> Aria ahudok atuh enen guha nyanaki iruhw utag. Enyudok guha douk kabi enen dodogowinyi uhwin nyahur um. Namudok aria atudok shape atari urupat douk shukunit abom meyoh. <sup>3</sup> Aria shatik nyih. Ehudok nyih douk hape kabi yehepitog um tutukareh hanak sisiguk. Aria arpesh shape iri ehudok nyih habuhi hetemesh atin atin ihishmorim shatuh. <sup>4</sup> Aria eshesh ihishmorim douk Iruhin ananin Mishin nyawish nyapenyesh aria shape sheneyagwreh sabainyi sisigin kupainyi baraan. Sheneyagwreh kabi Iruhin ananin Mishin nyeshuhur ba shiyagwreh um.

<sup>5</sup> Enesh Juda douk apa shenek lotu um Iruhin aria shanak shape ihigomormim nahobigos agudok atap iri douk shanaki shape Jerusalem abudok nyutob. <sup>6</sup> Douk shemnek enyudok guha aria sabaishi shanaki shantorum shape. Shanaki shantorum shape aria shakitak yowiyokuk um eshesh atin atin shemnek eshudok shagipesh Jisas iri sheneyagwreh Iruhin ananin baraan eshesh ihirub warub esheshin kupainyi baraan. <sup>7</sup> Adur shakitak yowiyokuk shorshor shape aria shakri, “Eshudok arpesh sheneyagwreh namudok iri, eshesh ihishmorim douk shanaki agudok shokugi nahobig Galili iri atish. <sup>8</sup> Aria namudok mumam um apak ihishmorim memnekesh sheneyagwreh apakin sisigin ganiganigin baraan um?

<sup>9</sup> Apak ihishmorim, anap douk manaki agudok shokugi nahobig Partia, Midia aria Elam. Anap manaki abudok debeibi amnab Mesopotemia. Anap manaki agudok shokugi nahobig Judia, Kapadosia, Pontus aria Esia. <sup>10</sup> Anap manaki abudok amnab Frigia aria Pamfilia. Anap manaki agudok nahobig Isip. Anap manaki warub bape abudok debeibi amnab Libia hurukatin um debeiburi wabur Sairini iri. Aria anap douk shopunek manaki Rom. <sup>11</sup> Anap Juda aria anap kupairubi warub douk magipesh eshesh Juda esheshih aih um shenek lotu um Iruhin iri. Anap manaki agudok nahobig Arebia. Aria anap douk manaki enyudok unai Krit. Aria apak ihishmorim douk memnekesh sheneyagwreh apakin kupainyi baraan um yopinyi mour douk Iruhin neneken iri.”

<sup>12</sup> Eshesh ihishmorim shakitak yowiyokuk aria shorshor shapeum enyudok mugu iganigadae nyatograri. Aria shape shanasorim shakri, “Enyudok mugu iganigadae nyatograri douk adur maresh?”

<sup>13</sup> Aria enesh shanumogesh aria shakri, “Eshudok arpesh douk shawok sabaini namuni wain ba shagugak aria douk shape sheneyagwreh namudok.”

### *Pita Nakripesh Iruhin Ananin Baraan Sabaishi Arpesh*

<sup>14</sup> Douk eshesh sheneyagwreh namudok aria Pita nani amudok amam 11-poreim aposel hakitak heyotu. Heyotu aria Pita neyagwreh debeg atin nakripesh baraan eshudok sabaishi arpesh nakri, “Ipak Juda pani ipak ihipmormim douk panaki pape Jerusalem iri, ipak gamo pumnek eik aria ta ikripep baugenyum baraan um enyudok mugu iganigadae nyatogur patrin iri. <sup>15</sup> Douk watak 9 kilok ruhur wata reir aria eshudok arpesh douk madae shuwok abar shugugak kabi douk ipak pakri um uwe, uwok. <sup>16</sup> Enyudok mugu douk nyatogur nyagipesh enen baraan seiwok profet Joel nenyemaguk iri nyakrium. Baraan enyudok. <sup>17</sup> Iruhin nakri, ‘Ahudok hugiguk iri nyumneh hutogurum,

eik douk ta inek enyudok mugu.  
Ta ikeshi eikin Mishin nyubuhi nyuwish  
ihishmorim arpes.

Aria ipakim nugamim aria nugariyu ta  
shukripesh

eikin baraen kabi amam profet  
hakripeshen um.

Ipakim weroroimi armam ta hutik eshu-  
dok

kabi habo yomnis hatrish iri um.

Aria ipakim ruwehemi ta hishuh hubo  
yomnis.

18 EHUDOK NYUMNEH ARMAM ARMAGO  
shenekume mour iri,

eik ta ishopoki eikin Mishin nyubuhi  
nyuwishesh.

Nyuwishesh aria ta shukripesh eikin  
baraen

kabi amam profet hakripeshen um.

19 Ta inek enenyenen eik atuwe yeneken  
iri mour nyutogur

iruhw utag aria ta ineken nyutogur agun-  
dok atap shopunek.

Owishibor nyih aria debeigusi nyugus ta  
shutogur.

20 NYUMNAHIN AUN TA INEKAN NUTOGUR  
arukwutiginin.

Wabin ta inekan nutogur kabi owishi-  
borini um.

Eshudok shutogur shunakuk

aria ahudok Debeini ananin debeihi  
nyumnah ta hugikuk hutogur.

Hutogur aria ihishmorim arpes ta shutik  
agundok anan adur dodogowin atun aria  
natrugun abom um.

21 Aria eshudok arpes douk shape shah-  
war Debeini

um nuraesh iri, anan ta nuraesh  
shutanamori shupe wosik abom.’ ”

22 Pita apa neyagwreh aria nakripesh  
nakri, “Ipak Israel, ipak pumnek enyudok  
eikin baraen. Anudok Jisas nanaki

wabur Nasaret iri, Iruhin douk nenekan  
dodogowin aria nenek enenyenen anan

Iruhin atun neneken iri mour. Nenekan  
agundok aria ipak douk patrin paduke-  
men. Anan douk nenek enyudok um

ipak pudukemesh pukri Jisas anan  
douk Iruhin meyoh neshopokan nanaki  
iri.

23 Nubokuhi Iruhin douk nekep  
anudok arman ipakis wis aria poko  
henek yoweishi inahos iri armam henek

nyiluman rowog kruse aria pan nagok.  
Iruhin douk nekepan penekesh-uman

namudok kabi seiwok anan kanak  
urkum moromen aria nadukemesh um  
ta nuneken um.

24 Douk pan nagok aria  
Iruhin nonohur nakitak nape. Madae  
nukutunukuk nupemoguk arudok eriger

douk shagok iri shemnekor iri uwe,  
uwok. Um mares?

Gok douk madae  
dodogowinyi um nyuweshiguk anudok  
arman uwe, uwok.

25 Seiwok king Devit  
douk nakriyuk enyudok baraen um Jisas.

Nakri,

‘Eik yatik Debeini nani eik nape hu-  
rukatin ihih nyumneh.

Neyotu nagime agundok hurukatin aria ta  
mare inogugur

ikri inehikesh um enesh eshudok enesh-  
enesh, uwok.

26 Namudok aria eikihw apahw adur  
hwor wosik

aria yanadudareh yeyagwreh yopunyi  
atin baraen.

Eik yape yatrugun um Iruhin

aria adur yadukemesh um anan ta nutau-  
rume.

27 Um mares? Nyak ta mare nyukutukuk  
eikin mishin nyupeik

abrudok wabur douk yoweishi shagok  
shanak-aburi, uwok.

Ta mare nyukutukuk anudok nyakin yop-  
uyopuni nunganin nagok aria adur

nutarukuk uwe, uwok.

28 Ahudok yah um adur shupe ihih nyum-  
neh um douk nyeyabigesh.

Nyak ta nyuni eik upe huruk

aria ta nyuni eik unadudareh uriguk.’ ”

29 Pita apa neyagwreh nakripesh  
nakri, “Eikish ashukenyish washish, eik  
yadukemesh aria yakri ikripepum adur

pudukem apakini baben Devit. Anan  
douk seiwok nagok sharuman. Sharuman

aria ananin hwor wonugwehw douk hwor  
agundok apak mape um arigaha douk.

30 Anudok Devit anan douk anan profet.  
Namudok aria nadukem enyudok Iruhin

ananin baraen, douk nakri um iruhw  
nakri adur atinyum ta nunek anan Devit

ananin barhonin nutogur king kabi anan  
Devit um.

31 Seiwok Devit nadukemesh  
um enyudok Iruhin nakri um ta nuneken  
iri.

Aria douk nakriyuk enyudok



baraen um Kraiss ta wata nukitaki wonugwehw um. Nakri, ‘Ta nugok aria ta mare adur nupeik agundok shagok iri shanak shapeum, uwok. Ananihw yegenyihw ta mare hwutar.’<sup>32</sup> Anudok Jisas nagok um, Iruhin douk nonohur nakitak nape. Apak ihishmorim douk matrun aria makri adur.<sup>33</sup> Nonohuri agundok nagok um aria naran nato iruhw heven nakih nyeigur nyato iruhw nape agundok yopunyi rogur ehah um Iruhin. Aria Iruhin nakon ananin Mishin kabi seiwok nakri adurin atinyi baraen um ta nukonen um. Aria enyudok douk ipak patrin aria pemneken iri, enyudok douk nekepari ananin Mishin nyabuhi nyawishap.<sup>34</sup> Devit douk madae nuto um iruhw heven uwe, uwok. Aria seiwok anan douk nakriyuk enyudok baraen, nakri,

‘Debeini nakrip eikin Debeini nakri,  
“Nyak nyupe agundok yopunyi rogur ehah

<sup>35</sup> arigaha itaurumen ibo nyakish horim shubuhuk.”’

<sup>36</sup> Namudok aria ipak ihishmorim Israel ta gamo pudukemesh um anudok Jisas douk pan penek nyil-uman rowog kruse iri. Iruhin douk nenekan natogur debeini iri Kraiss, douk anan Iruhin nagraehan aria neshopokan nanakumori nurao arpesh iri.”

*Sabaishi Arpesh Shatanam Shakon Aparuh Iruhin Aria Shenek Baptais*

<sup>37</sup> Douk eshudok armam armago shemnek enyudok Pita nakripeshen iri baraen aria adur nyabadig esheshiruh aparuh numun. Aria sharig Pita nani amudok anam aposel shakri, “Apakim warhim, aria apak douk ta munek maresh?”

<sup>38</sup> Aria Pita nakripesh nakri, “Ipak ihishmorim pukeshuguk agabus yoweishi inahos aria putanam pukon aparuh Iruhin. Puneakesh namudok aria punek baptaisum Jisas Kraiss ananin nyeigur. Namudok aria ipakish penekesh iri yowesh inahos, Iruhin ta mare wata nusuhwesh nupe, uwok. Ta nukwreyeshukuk. Namudok aria ta nukep meyoh ananin Mishin.<sup>39</sup> Seiwok Iruhin douk nakri enen adurin atinyi baraen

um ta nukep ananin Mishin. Nuko ipak puni ipakish batowish aria ihishmorim arpesh douk shape rougun-irub warub iri. Eshudok douk Iruhin apakin Debeini nahwadesh um shunakumori anan iri.”

<sup>40</sup> Aria Pita nakripesh sabainyi kupaunyi baraen shopunek. Dodogowin atun nakripesh nakri, “Ipak ta gamo punodukemesh um mare purao arudok debeiri eriger douk shenek yoweishi inahos iri arpesh kweipon ta shemnegor iri.”<sup>41</sup> Sabaishi arpesh douk shemnek Pita ananin baraen shasuhwen shakri adurin aria shenek baptais. Ahudok nyumnah douk adur sabaishi 3,000 armam armago douk Iruhin neshuhur shawish um eshesh shagipesh Jisas iri.

*Eshesh Shagipesh Jisas Iri Shape Atugun Aria Shenek Eneheneh Yopihi Aih*

<sup>42</sup> Eshudok namushi shanaki shagipesh Jisas iri douk shanapeum shemnek amam aposel henek skulumesh um Iruhin ananin baraen aria sharao baraen um shudukemesh. Aria shanak shani eshesh sharik shenek bilip iri shape atugun shanagapesh shawok worigun aria shenek beten shanak atugun atin.

<sup>43</sup> Iruhin nataurum ananim aposel henek enenyenen anan Iruhin atun neneken iri mour nyatogur aria ihishmorim arpesh shatrin. Shatrin shakitak yowiyokuk aria adur shanogugur.<sup>44</sup> Aria ihishmorim shagipesh Jisas iri douk adur shape atugun atin aria shanasia eneshenesh esheshish eshudok shanakam um. Madae shukri enesh eshudok douk esheshish atish uwe, uwok.<sup>45</sup> Apa shenek salim um esheshish eshudok eneshenesh douk sheneshubuk urusag iri o shogremesh iri. Aria utabor sharabor um eshudok iri douk apa shanaki shosiyabor shako eshudok douk yaruhish iri.<sup>46</sup> Ihih nyumneh apa shanak shantorum numun narub Iruhin ananit debeiti urupat tataoum. Esheshiruh aparuh yopuyopuruh shanadudareh abom aria esheshigun worigun apa shanasiyagun shagnoh shanak atugun atin esheshig urusag.

<sup>47</sup> Ihih nyumneh apa shatuk Iruhin ananin nyeigur nyato iruhw aria kupaishi arpesh shatrish shanadudareh shakri

wosik. Aria ihih nyumneh Debeini napeum narao enesh arpes shatanamori shape wosik abom aria shawish um eshudok shagipesh Jisas iri.

### 3

#### *Anan Arman Douk Aiyas Yowegas Iri Natogur Yopun*

<sup>1</sup> Anah nyumnah 3 kilok wabigep, Pita nani Jon hakitak aria hanak um atudok Iruhin ananit debeiti urupat. Abudok nyutob douk apa shape shenek beten um. <sup>2</sup> Wit douk shawishat aria shawish numun agundok Iruhin ananit urupat tataoum iri douk shahwarat yoputi wit. Aria shanaki shasap anan arman nape atudok wit. Shanasap napeum meishi arpes shukri shunaki shuwish numun narub atudok debeiti urupat tataoum aria anan nahwaresh um shukonaguk utabor. <sup>3</sup> Douk natik Pita nani Jon hanakum huwish aria nahwaram um hukonaguk enesh eshudok eneshenesh. <sup>4</sup> Pita nani Jon hatrun duk aria Pita nakri, "Nyak truhwari!"

<sup>5</sup> Aria natanam natrum duk um nakri ta hukonaguk enesh eshudok eneshenesh.

<sup>6</sup> Aria Pita nakripan nakri, "Eik utabor woke. Aria ta iken eshudok enesh eik yasuhweshi um eshudok. Um Jisas Krai nanaki wabur Nasaret aria ananin nyeigur, eik yakripenyum nyukitak nyurahaen!"

<sup>7</sup> Nakripan namudok aria nasuhw ananin yopunyi rogur nonohur nakitak neyotu. Aria ahudok atuh anudok arman ananiruh yeriweruh aria nuhuraohwiruh shatogur dodogowish. <sup>8</sup> Aria nakitak naprok nato iruhw nabuh neyotu aria nape narahaen. Aria neir Pita aria Jon hawish numun narub atudok Iruhin ananit debeiti urupat tataoum. Nanadudareh um Iruhin aria narahaen natukobur natuk ananin nyeigur nyato iruhw. <sup>9</sup> Ihishmorim arpes shatrun um nape narahaen aria natuk Iruhin ananin nyeigur nyato iruhw. <sup>10</sup> Aria shadukemesh shakri anudok arman douk apa nape atudok wit Iruhin ananit debeiti urupat douk shahwrat um yoputi wit iri.

Apa nape nahwaresh um eshudok enesh enesh iri. Shatrun shadukeman aria shakitak yowiyokuk. Aria baraen wokesh shapeum shakri maresh shenekan aria douk nakitak narahaen um.

#### *Pita Nakripesh Iruhin Ananin Baraen Gani Numun Iruhin Ananit Debeiti Urupat*

<sup>11</sup> Ihishmorim armam armago shemnek um enyudok iri douk shakitak yowiyokuk aria shahur shanaki um shutik anudok arman. Shanaki aria shatrun um nana-suhw Pita nani Jon aria heyotu enyudok womaga um atudok Iruhin ananit urupat douk shahwaren um Solomon ananin womaga iri. <sup>12</sup> Douk arigaha Pita natrish aria nakripesh nakri, "Ipak Israel, ipak pakitak yowiyokuk um enyudok um maresh? Ipak pakri iganigadae ohwak wagapesh anudok arman um ohwakin dodog o pakri wasuhw Iruhin ananin baraen watogur yopuyopuh abom aria douk wagapeshan narahaen aka? Adur atin, ohwak uwok! <sup>13</sup> Apakim yamehem Abraham nani Aisak aria Jekop amamin Iruhin nagapeshan yopun aria douk narahaen. Iruhin nenek enyudok aria natuk ananin nuganin Jisas douk nenekuman mour iri ananin nyeigur nyato iruhw. Aria douk anudok Jisas douk pasuhwan pako amam horim um hunak hon nugok abom um. Pailat anudok debeini um gavman iri douk nakri nukweshihan nunak fri, aria uwok. Aria pakonaguk agabus pakri uwok-umen abom. <sup>14</sup> Anan douk Iruhin ananin yopuni nagipesh lo atin iri arman, aria ipak pakri wok-uman. Pahwar Pailat um nukweshihi anudok anan arman douk nabo arpes shagok iri nanakumepari. <sup>15</sup> Aria anudok yopuni arman douk nape Debeini um ahudok yah douk mugipeshah aria mupe wosik abom ihih nyumneh um douk pan nagok. Aria Iruhin wata nonohur nakitak nape. Aria ohwak douk watrun wakri adur aria wakripesh-uman. <sup>16</sup> Ohwak douk wasuhw Jisas ananin baraen dodog wakri adurin. Aria anudok arman douk patrun aria padukeman iri douk natogur yopunum Jisas ananin nyeigur atin. Wenek bilip abom um Jisas ananin nyeigur

aria douk Jisas anan meyoh nagapeshan dodogowin agundok ipak ihipmorim ipakis nabes.

<sup>17</sup> Eikishi ashukenyish owashish, eik douk yadukemesh um enyudok ipak pani ipakim debeimi peneken um Jisas iri. Ipak douk madae pudukemesh wosik uwe aria douk peneken um pan nagok um. <sup>18</sup> Seiwok Iruhin nohur amam profet aria ihim-morim hakriyuk um anudok Kraish douk Iruhin nagraehan aria neshopokan nanakumori nurao arpesch iri. Hakri anan ta numnek debeiri eriger. Namudok aria douk enyudok Iruhin nakriyeniyi baraan douk nyatogur adurin atin abom. Douk pabo Jisas nagok.

<sup>19</sup> Namudok aria douk ipak pubukuk yoweishi inahos aria putanam pukon aparuh Iruhin. Punelesh namudok aria anan ta mare wata nusuhw ipak penekesh iri yoweishi inahos nupe, uwok. Ta nukwreyesh-uguk. <sup>20</sup> Punelesh namudok um, Debeini ta nunek yopubi nyutob butogrumep putogur dodogowip aria ipakish mishish shur wosik punadudareh. Aria ta nishopoki Kraish anudok douk nagraehan um nurao arpesch iri nunakumori ipak. Anudok arman douk Iruhin nagraehan um nurao ipak iri douk Jisas. <sup>21</sup> Douk, anan ta nupe iruhw heven arigaha abudok nyutob Iruhin nagraehab um nunek eneshenesh eshudok shutogur namushi obi nyutob, aria anan ta kweipon nunaki. Kabi douk seiwok amam Iruhin ananim profet hakriyeniyukuk iri ananin adurin atinyi baraan nyakrium. <sup>22</sup> Umum maresh? Seiwok Moses douk nakriyuk enyudok baraan nakri,

‘Debeini ipakin Iruhin ta nukap anan profet kabi eik um. Anudok nukapan iri profet douk ta anan um ipak kanak.

Aria ipak ta pusuhw ihinyumorim anan nukripep-eniyi baraan pugipeshen.

<sup>23</sup> Eshudok arpesch douk mare shumnek ananin baraan shusuhwen shugipeshen iri, eshesh ta shupeik sik abom.

Ta mare shuni Iruhin ananish arpesch shupe atugun, uwok. Aria Iruhin ta nesh shugok.’ ”

<sup>24</sup> “Adur, profet Samuel nani ihim-morim profet douk hagamori anan iri heyagwreh Iruhin ananin baraan obi nyutob, amam douk shopunek hakriyehuk ehudok douk hatograri iri nyumneh. <sup>25</sup> Iruhin nohur amam profet heyagwrehen iri baraan nyani enyudok enen adurin atin abom iri baraan kontrak seiwok Iruhin nakripaguk ipakim yamehem um, enyudok douk ipakin. Ipak ta pugrem yopishi eneshenesh eshudok douk enyudok baraan kontrak nyakrium ta puraesh iri. Kabi douk nakripaguk Abraham um. Nakri, ‘Um nyakish batowish aria yamehesh, eik ta inekumesh yopinyi ihishmorim agundok atapishi arpesch.’ <sup>26</sup> Aria Iruhin nagraeh anudok ananin nasuhw ananin mour iri aria neshopokan narik nanakumori ipak um nutaurumep nunekumep yopinyi. Nunekumep yopinyi um agundok nutaurumep pukutukuk ihishmorim yoweishi inahos um pape penekesh iri.”

## 4

### *Howeshik Pita Nani Jon Hape Shunuweshik-ati Urupat*

<sup>1</sup> Pita nani Jon wata hape hakripesh baraan armam armago aria amam pris hani iri debeini um amam heyoh Iruhin ananit debeiti urupat iri hanak hatograri agundok Pita nani Jon hapeum. Hani amam Sadyusi hanaki. <sup>2</sup> Hanaki aria juwehosim um hakri Pita nani Jon hape henek skulum arpesch um Jisas nagok aria wata shopunek nakitak. Hakri namudok aria kweipon shagok iri ta wata shopunek shikitaki. Amudok debeimi hakri Pita nani Jon mare hukripesh namudok, uwok. <sup>3</sup> Namudok aria hasuwam henyigram heshuh shunuweshik-ati urupat. Hakri ruwahepih kadak hunek baraan. Um maresh? Douk wabigep hurukatin um wab um. <sup>4</sup> Aria sabaishi douk shemnek amam hakripeshen iri baraan aria shenek bilip um Jisas. Aria shadarehesh um, eshudok sharik shenek bilip iri shopunek um douk shatogur sabaishi abom um 5,000-poreish arpesch.

*Harao Pita Nani Jon Um Eshesh Juda Esheshin Debeini Kaunsol Aria Henekum Baraen*

<sup>5</sup> Ruwahepih aria amam debeimi Juda douk hape hasuhw kwotog iri hani amudok amam eshesh Juda esheshim debeimi hanaki hantorum hape Jerusalem. Hani amudok anam douk henek skulumesh um lo iri. <sup>6</sup> Amam hani debeini abom pris Anas nani Kaiafas hani Jon aria Aleksander. Amudok anam hani anam amam atup awirop um douk shopunek hanaki hanak hantorum hape. <sup>7</sup> Aria heshopok Pita nani Jon hakitak heyotu hatik amudok debeimi aria hape harigam hakri, “Ipak douk omi nyekep big ba dodogowip aria douk peneken enyudok? Um pogapesh anudok arman yopunum? Pohur meinyi nyeigur penyem aria douk peneken?”

<sup>8-9</sup> Iruhin ananin Mishin douk nyawish Pita abom nyapenyan wosik aria nakripam nakri, “Ipak Israel esheship debeipari pani ipakim takwiyem, doukih atin ipak pakri porik ohwak um wenek yopuhi aih um wagapesh anan aiyas yowegasini um aka? Pakri pudukemesh um agundok nenekesh mumam aria douk yopunum? <sup>10</sup> Aria namudok um ipak ihishmorim puni ihishmorim Israel douk gamo pudukemesh. Anudok arman douk yopuni abom aria douk neyotu agundok ipakis nabes patrui iri, anan douk yopun abom um Jisas Krai nanaki wabur Nasaret iri ananin nyeigur. Anudok Jisas douk penek nyilimam rowog kruse nagok paruman aria Iruhin wata nonohur nakitak nape iri.

<sup>11</sup> Jisas anan douk anudok arman douk enen baraen nyetem Iruhin ananik Buk iri nyakrianari. Baraen enyudok.

‘Amudok utom douk ipak parok urupatam iri

pakri wokumam iri aria pamabukuk iri, Iruhin douk namanam matogur anam yopumi marik iri utom aria mosah wobratum urupat aria tatao dodog.’

<sup>12</sup> Madae enen agundok atapinyi arpen ta nyurap mutanamori mupe wosik abom uwe, uwok meyh. Iruhin madae nuken

big kupainyi arpen um nyutaurumap uwe, uwok. Jisas atun abom.”

<sup>13</sup> Amudok debeimi hemnek Pita aria Jon amamin baraen aria hakitak yowiyokuk. Um maresh? Amam hadukemesh um Pita nani Jon douk madae hunek skul uwe. Aria hatik um amam madae hunogugur uwe, aria dodogowim atum hape heyagwreh baraen. Aria debeimi hadukemesh um riguk Jon aria Pita douk hani Jisas hape harahe hanak atugun.

<sup>14</sup> Hatik anudok arman douk ananigas aiyas yopugas iri nanamam heyotu atugun, aria amudok debeimi baraen wokam um hubenyumam iri. <sup>15</sup> Namudok aria hakrip Pita nani Jon um hukutukuk amudok rum debeimi hapenyomi hutograguk aduk. Douk hatograguk aria amam heyagwreh habo baraen namudok. <sup>16</sup> Hakri, “Ta munegam mumam amudok biom armam? Ihishmorim arpesh shape agundok Jerusalem iri douk shadukemesh um enyudok amam heneken iri debeinyi mour Iruhin atun neneken iri. Aria apak douk ta mukri mubeshuken mumam, ta uwok. <sup>17</sup> Aria mukri enyudok baraen mare wata shiyagwrehen nyunak um enesh arpesh shopunek shumneken um, apak ta mukrip amudok biom armam dodogowinyi baraen um amam mare hukripesh Iruhin ananin baraen shopunek um enyudok Jisas ananin nyeigur, uwok.”

<sup>18</sup> Douk habo baraen namudok aria wata hahwaram hawish. Hawish aria hakripam dodogowinyi baraen um amam mare wata hupe hunek skulum enesh arpesh um enyudok Jisas ananin nyeigur o hupe hukripesh Iruhin ananin baraen um enyudok nyeigur, uwok.

<sup>19</sup> Aria Pita nani Jon hakripam hakri, “Ohwak ukutukuk Iruhin ananin baraen nyupeik aria ugipesh ipakin um, ta ipak pukri Iruhin ta nutruhw nukri wosik o maresh? Ipak kanak ta punek skelum enyudok baraen. <sup>20</sup> Ohwakig nokwatog ta mare gwishuk um wemneken iri baraen o eshudok watrish shatograri iri uwe, uwok.”

<sup>21</sup> Aria amudok debeimi hakripam enen dodogowinyi baraen shopunek aria hes-hopokam hanak. Ihishmorim arpesch douk shatuk Iruhin ananin nyeigur nyato iruhw um nagapesh anudok aiyas yowegasini um. Namudok aria amudok debeimi douk hanogugur aria yah wakom um hom o huweshikom um. <sup>22</sup> Anudok arman douk Pita aria Jon henek enyudok Iruhin atun neneken iri mour aria hagapeshan yopun iri, anan douk neshagrakuk 40-poreish kwarahos.

*Eshesh Shagipesh Jisas Iri Shenek Beten Um Shurao Dodog Aria Shukripesh Iruhin Ananin Baraen*

<sup>23</sup> Douk amudok debeimi hakweshih Pita nani Jon aria wata hatanam hanak um amamishi. Hanak aria hakripesh ihinyumorim baraen douk debeimi pris hani eshesh Juda esheshim debeimi hakripam-enyi. <sup>24</sup> Douk shemnek enyudok baraen aria ihishmorim shantorum shape atugun aria shenek beten um Iruhin. Shenek beten namudok, shakri, "Debeini, nyak dodogowin atinyi abom. Nyak douk nyenek iruhw, nyenek atap shani youg iri eneshenesh douk shapenyagun iri. <sup>25</sup> Seiwok nyakin Mishin nyohur apakin yamenen Devit douk nenek nyakin mour iri aria nakriyuk enyudok baraen. Nakri,

'Kupaishi arpesch douk eshesh madae Juda iri uwe douk juwehosish atish abom um maresh?

Eshudok arpesch douk shabo baraen nyape atugun meyoh um shukitak um wanohw um maresh?

<sup>26</sup> Esheshim king hape agundok atap iri douk

hape hugapesh wanohwish eneshenesh um hukitak um wanohw.

Esheshim debeimi douk hantorum hape atugun

um hakri huni Debeini nini anudok douk anan nagraehan

um nurao arpesch iri hurpak!'

<sup>27</sup> Aria adur atin, nubokuhi amudok biom debeimi um gavman iri, Pontius Pailat nani Herot douk hanaki hantorum hape atugun. Hani eshesh Israel shani enesh arpesch douk eshesh madae Juda iri uwe shopunek. Shantorum

shape abrudok wabur Jerusalem aria shabo baraen um shunumogesh Jisas. Anudok yopini arman douk seiwok nagraehan aria nasuhw nyakin mour iri.

<sup>28</sup> Shanaki shantorum shapeum shunek ihinyumorim mour douk seiwok nyak kanak dodogowin atin aria nyakrium douk ta shuneken iri. <sup>29</sup> Aria douk Debeini, nyutiki apak aria urkum murum enyudok dodogowinyi wanohwin baraen douk sheyagwrehen um apak munek nyakin mour iri. Namudok aria nyutaurumap um mare munogugur, aria dodogowip atop abom mukripesh nyakin baraen. <sup>30</sup> Nyishopoki nyakin dodog um nyugapesh arugeh hapeyeshi yopish. Aria makri nyunek enenyenen nyak atin nyeneken iri mour nyutogur um Jisas ananin nyeigur, anudok yopuyopuni abom arman douk nasuhw nyakin mour iri."

<sup>31</sup> Douk shenek beten um jurug aria atudok shantorum atari urupat kututukarot tunatunaki. Aria Iruhin ananin Mishin nyabuhi nyawishesh nyapenyesh nyeyatesh aria shanak dodogowish atish shape shakripesh Iruhin ananin baraen. Sheyagwrehen debeg atin aria madae shunogugur uwe, uwok.

*Eshesh Shagipesh Jisas Iri Shasuhw Atin Baraen Aria Shanagapesh Um Eneshenesh*

<sup>32</sup> Ihishmorim shasuhw Jisas ananin baraen iri douk shape atugun abom aria shasuhw atum urkum. Madae enen arpen nyukri enesh enyenyish eshudok eneshenesh douk enyenyish atish uwe, uwok. Aria shanosiya ihishmorim eneshenesh esheshish eshudok atugun atin. <sup>33</sup> Amam aposel douk harao Iruhin ananin dodog aria dodogowim atum apa hakripesh baraen um Debeini Jisas nagok aria wata nakitak um. Namudok aria Iruhin nataurumesh meyoh eshesh ihishmorim shagipesh Jisas iri. <sup>34-35</sup> Namudok aria eshesh shenek bilip iri madae enen arpen eneshenesh woken um enesh eshudok uwe. Ihishmorim shape wosik iri atish. Eshudok douk shogrem anab

amnab o urusag iri ta shekeshesh shatorish sharao utabor. Aria abrudok utabor douk sharabor shanaki shako amam aposel. Shako amam aria hosiyabor um eshudok yaruhish iri. <sup>36</sup> Aria anan arman shahwaran Josep iri douk nape. Anan douk shanabuki enyudok unai Saiprus aria nakitak opudok awirop Livai. Amam aposel douk hodowan enyudok nyeigur Barnabas. Baugenyum enyudok nyeigur douk shakri, “Nakripesh yopinyi baraeen um shupe dodogowish iri.” <sup>37</sup> Anudok Josep douk nokesh anab ananib amnab aria kupaishi shatorub shakon utabor. Shakonabor aria narabor nanak nako amam aposel.

## 5

### *Ananaias Nani Ananik Irohukwik Shenek Rohwum Amam Aposel Um Esheshibor Utabor*

<sup>1</sup> Shenekesh namudok atin aria anan arman shahwaran um Ananaias iri nani ananik irohukwik Safaira douk shape. Aria eshesh shekesh anab um esheshib amnab kupaishi shutorub aria shukesh utabor. <sup>2</sup> Aria ananik irohukwik kwadukemesh aria tukwanibor nasuaboruk aria narauri tukwanibor atubor nanak nako amam aposel. Nenek rohw nakri narauri shuknibor nanaki nakomabor.

<sup>3</sup> Aria Pita narigan nakri, “Ananaias, nyenekesh mumam aria Satan douk nawishen aria neneken nyogiyagim Iruhin ananin Mishin um? Nyagiyagimen um agundok nyanabukuk tukwanibor utabor douk nyarabor um nyakib amnab iri um? <sup>4</sup> Nubokuhi watak nyukesh amnab shutorub ahi uwe, abudok amnab douk nyakib atub. Arigaha douk nyeke-shab shatorub iyoh aria utabor shopunek wosik nyakibor. Nyukri nyunekabor mumam, enyudok nyakin mour. Aria maresh sheneken, um nyarao amudok yoweimi urkum aria nyanaki nyenek rohw nyakri nyasuhw iri shuknibor utabor um? Arpen douk madae nyugiyagim enen arpen uwe, uwok. Nyagiyagim Iruhin.”

<sup>5</sup> Douk nemnek Pita ananin baraeen aria natu nabuh nakus abom aria nagok. Aria ihishmorim shemnek um Ananaias nagok

um aria shanogugur abom. <sup>6</sup> Aria anam weroroimi hanaki hashapoman anah rupah haran hatogur aria hanak haruman.

<sup>7</sup> Arigaha biyen atin aua nyanak nyadiyuk aria Ananaias ananik irohukwik Safaira shopunek kwanak kwawishi agundok atugun Pita napeum. Agundok raminen nagok um douk madae kwudukemesh uwe, uwok. <sup>8</sup> Kwawishi aria Pita nakripok nakri, “Kripe, utabor nyak nyani raminen parabor um amnab iri douk abrudok atubor, aka?”

Aria okwok kwakri, “Adur wo, abrudok atubor.”

<sup>9</sup> Aria Pita nakripok nakri, “Mumam namudok um nyak nyani nyakin raminen pabo baraeen um pakri pukwiraeh Debeini ananin Mishin um? Hanak haromuk nyakin raminen iri amudok hawishi wit douk. Ta husah nyak hutogur shopunek.”

<sup>10</sup> Douk Pita nakripok namudok atin kwabuh kwatu kwakus agundok ananigas aiyas abom um aria kwagok. Aria amudok weroroimi armam hawishumori douk hatik um kwagok kwakus. Aria hokuhur hakusah hatogur hanak harumok hurukatin um agundok harom raminen um. <sup>11</sup> Namudok aria ihishmorim Iruhin ananish arpesh shani ihish arpesh shemnek um enyudok aria shanogugur abom.

### *Amam Aposel Henek Enenyenen Iruhin Atun Neneken Iri Mour*

<sup>12</sup> Amam aposel henek enenyenen Iruhin atun neneken iri mour nyatogur aria arpesh shatrin. Aria ihishmorim shasuhw Jisas ananin baraeen shagipeshen aria ihih nyumneh shanaki shantorum shape enyudok debeinyi Solomon ananin womaga um atudok Iruhin ananit debeiti urupat. <sup>13</sup> Adukishi kupaishi arpesh douk shanogugur aria madae shunak shuni eshesh shunatorum uwe, uwok. Aria eshudok adukishi arpesh shatuk amam aposel hani eshesh douk shasuhw Jisas ananin baraeen shagipeshen iri esheshish nyeiguhw shato iruhw. <sup>14</sup> Aria sabaishi arpesh abom shenek bilip um Debeini aria shape shawish um eshudok douk sharik shenek bilip iri.

<sup>15</sup> Douk shatik enyudok amam aposel heneken iri mour aria douk um shosahi arugeh haesh iri shanaki sheshubuk anagasih um yeh. Sharabikumesh reish shabomesh betog aria sheshubuk shakus um shakri kadak Pita nura-haen nunaki aria nunek betenmesh o uwok um, shakri ananir aborir meyoh ruwetesh aria yopish. <sup>16</sup> Sabaishi arpesh shape iri shakurubi warub hurukatin um Jerusalem iri shopunek shanaki. Sharawari arugeh haesh iri shani eshudok douk sagabehos shapenyesh iri shanaki um hugabeyesh. Aria ihishmorim sharaeshi iri douk nagabeyesh aria yopish atish.

*Ensel Nyataurum Amam Aposel Hakutukuk Shunuweshik-ati Urupat Aria Hatograri*

<sup>17</sup> Namudok aria debeini pris abom nani ihim-morim ananim arpeshim amam Sadyusi henek nyigiya abom um amam aposel um enyudok amam hape heneken iri. Aria juwehosim abom. <sup>18</sup> Juwehosim namudok aria hakitak hasuwam henyigram hawish hape shunuweshik-ati urupat iri douk shenek eneshenesh yoweishi inahos shapenyat iri. <sup>19</sup> Aria abudok wab, enen Debeini ananin ensel nyanaki nyejik witog atudok shunuweshik-ati urupat. Nyejikog douk nyarao amam nyatogur aduk aria nyakripam nyakri, <sup>20</sup> “Punak puwish numun Iruhin ananit debeiti urupat tataoum aria pupe pukripesh ihishmorim baraen um ehudok namuhi aih um Iruhin nurao arpesh shutanamori shupe wosik abom um.”

<sup>21</sup> Amam aposel hemnek enyenyin baraen aria gagruk atin hanak hawish hape henek skulum armam armago um Iruhin ananin baraen.

Aria anudok debeini pris nani ananim armam henekumam baraen ihim-morim eshesh Juda esheshim debeimi um esheshit debeiti kwot iri hanaki aria hantorum um hiyagwreh baraen. Hanaki hantorum aria henek baraen nyanam shunuweshik-ati urupat um hurauri amam aposel hunaki agundok amam debeimi hapeum. <sup>22</sup> Douk amam heyoh

Iruhin ananit urupat iri hanak hatogur, aria madae hutik anam aposel hupe uwe, uwok. Namudok aria watak hatanam hanak hakripam namudok debeimi hakri, <sup>23</sup> “Manak matogur shunuweshik-ati urupat um, witog douk matik shugwaru abom gwape dodog. Heyoh urupat iri polis heyotu heyohat. Aria manak mejikog mawish aria madae mutik anan atun nupeik uwe, uwok.”

<sup>24</sup> Douk debeini um amam apa heyoh Iruhin ananit debeiti urupat iri nani amam debeimi pris hemnek namudok aria hakri, “O, amudok aposel ta hanak hawishuk mumam?”

<sup>25</sup> Aria anan arman nawishi nakripam nakri, “Mnek! Amudok armam douk penyigram hape shunuweshik-ati urupat iri douk heyotu numun narub um Iruhin ananit debeiti urupat tataoum aria hape henek skulumesh um Iruhin ananin yopinyi baraen.”

<sup>26</sup> Douk hemnek namudok aria debeini nani ananim heyoh Iruhin ananit urupat iri hanak harawari amam aposel hanaki. Madae hom o hushuwokam uwe, uwok. Hanogugur um hakri ta arpesh shunaki shom shukwumam utabor.

*Amam Aposel Douk Madae Hunogugur Um Hukripom Baraen Debeimi Uwe*

<sup>27</sup> Douk amam haram hanaki hawish aria homusop heyotu hatik amudok debeimi um eshesh Juda esheshit debeiti kwot iri. Aria debeini pris abom nakripam nakri, <sup>28</sup> “Apak makripep dodogowinyi baraen um makri mare puhur Jisas ananin nyeigur punyem aria punek skulumesh Iruhin ananin baraen, uwok. Aria tik, douk ihishmorim arpesh shape Jerusalem iri douk shemneken sheyaten ipakin baraen. Aria ipak pakri pukop baraen apak um pakri apak mabo Jisas nagok.”

<sup>29</sup> Aria Pita nani amudok anam aposel hawanamam baraen namudok. Hakri, “Apak ta mugipesh Iruhin ananin baraen atin. Arpeshin mare mugipeshen, uwok.

<sup>30</sup> Ipak pabo Jisas penek nyiliman neir rowog kruse aria nagok. Aria apakish popehesh yamehesh esheshin Iruhin watak nonohur nakitak nape. <sup>31</sup> Nakitaki

aria Iruhin naran natoum iruhw nakih nanasap nape debeini agundok yopunyi rogur ehahum anan Iruhin. Aria douk napeum nuyabigap yah aria nunarap nutanam um Iruhin mupe wosik. Iruhin nenekesh namudok um nutaurum apak Israel um mukeshuk agabus yoweishi inahos, mutanam mukon aparuh aria anan mare watak nusuwen nupe um apakish yoweishi inahos, uwok. Ta nukwreleshuk. <sup>32</sup> Aria apak mani enyudok Iruhin ananin Mishin douk makrip arpesk um enyudok apak matrin nyatogur um Jisas iri. Enyudok Mishin douk Iruhin nako eshudok douk shasuhw ananin baraen shagipeshen iri.”

*Debeimi Hakri Hubo Aposel Hugok Aria Gamaliel Natupokumam Baraen*

<sup>33</sup> Douk amudok debeimi hemnek enyudok baraen aria juwehosim abom. Aria hakri hubo amam aposel hugok. <sup>34</sup> Aria amudok debeimi, anan shahwaran um Gamaliel iri nakitak neyotu. Anan douk anan Farisi aria shopunek douk nenek skulumesh um lo iri. Ihish arpesk apa shatuk ananin nyeigur nyato iruhw. Douk anan nakitak neyotu aria nakripesh um shurauguk amudok aposel huto-graguk aduk um banab nyutob meyo.

<sup>35</sup> Douk hatograguk aria nakrip amam debeimi hasuhw kwotog iri nakri, “Ipak Israel, ta ipak pukri punek maresh um amudok armam um, ipak douk gamo punek urkwip aria douk punekenyumam.

<sup>36</sup> Riguk anob nyutob, anan arman shahwaran um Teudas iri douk nakitak aria nakri anan douk debeini dodogowini arman. Aria narao sabaimi armam hurukatin um 400-poreim hagipeshan. Aria shanuguk aria ananim hagipeshan iri hanogugur hanak atun atunuk. Aria enyudok hakri huneken iri nyanak nyabuhuk.

<sup>37</sup> Enyudok nyanakuk arigaha anob nyutob aria Judas douk nanaki agudok shokugi nahobig Galili iri nakitak nanuk enesh arpesk shagipeshan. Abudok nyutob gavman shape sharao nyeiguhwish um arpesk shadarehesh obi nyutob, anan nakitak um enyudok aria nohur wanohw um hiyatok gavman. Aria shanuguk

aria ananishi shagipeshan iri shanogugur shanak atun atunuk. <sup>38</sup> Namudok aria douk yakripep. Ipak mare pukwiraeh um punekam maresh um amudok armam, uwok. Pukweshiam hupe meyo. Enyudok heneken iri, ta amam meyo henyuhur heneken um amamip urkwip um, enyen ta nyunak nyubuhuk. <sup>39</sup> Aria ta Iruhin meyo nomuhur heneken um, ipak ta pubirak um putapam aria ta pubirak putik uwok. Punekesh namudok aria ta putik um pani Iruhin parpok.

<sup>40</sup> Amudok debeimi hemnek Gamaliel ananin baraen hakri wosik aria hahwar amam aposel hawishi. Hawishi douk haprukam hakwu enesh eshudok aria hakripam dodogowinyi baraen hakri um hunak aria mare watak huhur enyudok nyeigur Jisas hunyem aria hupe hukripesh Iruhin ananin baraen, uwok. Douk hakripam um jurug aria heshopokam hanak.

<sup>41</sup> Aria abudok nyutob hakutukuk amam debeimi hanak obi nyutob, amam douk hanadudareh abom. Um maresh? Amam douk hadukemesh hakri Iruhin douk natrum aria nakri wosik um shom aria harao abraen um agundok hakripesh baraen abom um Jisas um. <sup>42</sup> Ihih nyumneh amam hape hakripesh Iruhin ananin baraen abom um Jisas Kraisa aria gamo henek skulumesh um shudukemesh wosik. Hakripesh hakri Jisas anan douk Kraisa, anudok douk Iruhin nagraehan aria neshopokan nanakumori nunarao arpesk iri. Hape hakripeshen numun narub Iruhin ananit debeiti urupat tataoum. Anabik um hakripeshen esheshig urusag.”

## 6

*Shagraeh 7-Poreim Armam Um Hutaurum Amam Aposel Iri*

<sup>1</sup> Aria abudok nyutob, arpesk shagipesh Jisas iri douk shatogur sabaishi abom. Aria eshudok Juda douk sheneyagwreh enyudok baraen Grik aria shagipesh Jisas iri shani eshesh wobresh Juda sheneyagwreh enyudok enen baraen Hibru iri shanatutukem. Eshesh sheneyagwreh Grik iri shakri abudok nyutob shasiya



eshudok shako eshesh yaruhish iri obi nyutob, shakri esheshiyu amam hagok hawosopukuk iri armago douk madae shuko atin uwe, uwok.

<sup>2</sup> Namudok aria amam 12-poreim aposel hahwar ihishmorim shagipesh Jisas iri shanaki atugun aria hakripesh hakri, “Namudok madae wosik um apak mukutukuk enyudok mour um mukripesh Iruhin ananin baraen um nyupeik aria mupe um misiya worigun um.

<sup>3</sup> Namudok aria ashukenyish owashish, douk ipak ta pugraeh 7-poreim anam ipakimi armam aria hiyotu um enyudok mour. Pugraeh amudok douk harao Iruhin ananin Mishin nyapenyam wosik abom aria harao yopinyi saki iri. <sup>4</sup> Aria ihih nyumneh apak ta mupe um munek beten musorik Iruhin aria mukripesh ananin yopinyi baraen.”

<sup>5</sup> Ihishmorim shemnek namudok aria shanadudareh shakri wosik um amamin baraen. Aria shagraeh Stiven. Anudok Stiven douk narao Iruhin ananin Mishin nyapenyam wosik abom aria dodogowin atun abom um bilip. Aria anam douk amudok. Filip, Prokorus, Nikanor, Timon, Parmenas aria Nikolas. Anudok Nikolas douk madae anan Juda uwe. Anan douk nanaki wabur Antiok aria riguk napeum nagipesh eshesh Juda esheshih aih um shenek lotu um. <sup>6</sup> Douk shagraeham aria sharam um amam aposel. Sharam um amam douk henek betenumam aria howemam wis um hurao Iruhin ananin dodog aria hunek enyudok mour.

<sup>7</sup> Namudok aria Iruhin ananin baraen nyanak sabaigunum shemneken. Aria sabaishi arpesch abom shape Jerusalem iri douk shagipesh Jisas. Sabaimi pris abom shopunek hakri wosik aria henek bilip um Jisas.

### *Juda Esheshim Debeimi Henekuman Kwot Stiven*

<sup>8</sup> Iruhin douk nenekuman yopinyi abom Stiven aria natauruman meyoh nakon ananin dodog. Namudok aria nenek enenyenen Iruhin atun neneken iri mour nyatogur arpesch shatrin. <sup>9</sup> Aria

6:9 **6:9** Eshudok Juda apa shenek lotu atudok urupat shahwarat um Friman iri, riguk anob nyutob douk shape shukam um kupaihi arpesch shape shenekumesh mour meyoh iri. Aria douk shape fri.

anam armam hakitak aria hani anan harpak baraen. Amudok armam apa hani eshesh henek lotu anat eshesh Juda shape sheneyagwreh baraen-atari urupat shasuhw lotu um Friman iri.6:9 Amudok armam amam douk anam Juda aria hanaki debeirubi warub Sairini bani Aleksandria. Amam hani amudok anam hanaki agusudok biagos shokugosi nahobigos Silisia aria Esia hakitak hani Stiven harpak baraen. <sup>10</sup> Iruhin ananin Mishin nyakon debeinyi saki aria neyagwreh obi nyutob, amam douk madae huni anan hunogogonim arag atin um baraen uwe, uwok.

<sup>11</sup> Namudok aria amudok armam hanabeshuk hakripaguk kupaimi um hunek rohwa aria hukrip arpesch hukri, “Apak memnek Stiven neyagwreh enenyenen yoweinyi baraen um Moses aria Iruhin.”

<sup>12</sup> Douk henek rohwaumesh namudok shani esheshim debeimi hani amudok henek skulumesh um lo iri aria heshuhur juwehosish abom um eshesh Juda. Namudok aria shanak shasuhw Stiven sharan shanak um agundok debeimi um eshesh Juda esheshit debeiti kwot iri hapeum.

<sup>13</sup> Aria sharauri anam armam um hunek rohwa hukripan enen rohwinyi baraen. Sharam hanaki aria hakri, “Ihish nyumneh anudok arman apa neyagwreh enenyenen yoweinyi baraen um Iruhin ananit debeiti yoputi abom urupat tani ananin lo. <sup>14</sup> Apak douk shopunek memnekan nakri anudok Jisas nanaki wabur Nasaret iri ta nubrig atudok Iruhin ananit debeiti urupat aria ta nunek kupaihi aih um ehudok aih seiwok Moses nakoguk apakish popehesh yamehesh iri um.”

<sup>15</sup> Aria ihim-morim amudok hape iri debeimi, amamis nabes douk satak sape Stiven. Hatrun aria hatik um ananig yamag douk gatogur kabi enen ensel enenyig yamag abom um.

## 7

### *Stiven Nakripam Ananin Baraen Debeimi*

<sup>1</sup> Douk henekuman enyudok rohwin baraen um jurug aria debeini pris abom

narig Stiven nakri, “Enyudok baraden douk adur nyakriyen aka, uwok?”

<sup>2</sup> Aria Stiven nakripam nakri, “Eikim ashukenyim owarhim aria yakenyim, ipak pumnek eik. Seiwok anudok dodogowin atun abom aria natrugun um iri Iruhin douk natogurum apakin yamenen Abraham. Natogruman obi nyutob, abrudok wabur Haran douk watak nunak nupe uwe, uwok. Watak nape agudok nahobig Mesopotemia. <sup>3</sup> Natogruman aria nakripan nakri, ‘Nyukutukuk nyakip awirop puni nyakib amnab aria nyunak nupe anab amnab douk ta iyabigenyab iri.’

<sup>4</sup> Namudok aria Abraham nakutukuk eshesh Kaldia esheshib amnab nanak nape abrudok wabur Haran. Nanak nape agudok arigaha douk ananin yaken nagok aria Iruhin neshopokan nanakumori abudok amnab douk ipak papenyab iri. <sup>5</sup> Iruhin madae nukon anab amnab um ananib abom uwe, uwok. Uwok madae nukon anagun mudukigun uwe, uwok meyoh. Aria nakripan enen adurin atinyi baraden um kweipon ta nukonab aria ananib abom. Anan nini ananish batowish aria barheshish douk shugimori anan iri. Aria abudok nyutob Iruhin nakripan enyudok baraden obi nyutob, Abraham anan batowish douk madae enesh uwe, uwok. <sup>6</sup> Iruhin nakripan namudok. Nakri, ‘Nyakish barheshish ta shunak shupe kupaishi arpeshe esheshig nahobig. Aria agudok nahobigish arpeshe ta dodogeshishumesh shupe shunekumesh mour meyoh. Ta shupe shunekesh enenyenen um 400-poreish kwarahos. <sup>7</sup> Aria eik ta iyesh inekumesh baraden eshudok douk nyakish barheshish shupe shenekumesh mour meyoh iri.’ Aria Iruhin nakripan. ‘Ta iyesh inemeshuk baraden abudok amnabishi aria eikish arpeshe ta wata shukutukuk babudok amnab shutanamori um abudok. Shunaki aria ta shupe shunek lotume agudok.’

<sup>8</sup> Aria Iruhin nakripuk Abraham enen adurin atinyi baraden kontrak abom um anan ta nutah nugamimiruh yegeshiweruh. Namudok aria abudok nyutob Abraham ananik irohukwik kwabuki

Aisak aria watak 8-poreih nyumneh meyoh huduyan aria Abraham natah ananihw yegenyihw. Arigaha Aisak nabuki Jekop aria natah ananish yegenyihw. Aria Jekop nabuki amudok apakim 12-poreim yamehem aria shopunek nenekeshumam namudok atin.

<sup>9</sup> Aria amudok yamehem henek nyigiyaum amamin wanin Josep hako kupaishi shatorun shakomaguk utabor aria sharan um agudok nahobig Isip. Sharan um nunak nupe nunekumesh mour meyoh. Aria Iruhin douk nani anan hape. <sup>10</sup> Namudok aria natauruman um enenyenen nyatogruman iri amaen aria nape wosik. Aria abudok nyutob nanak natogurum anudok debeini um Isip iri king Fero aria nani anan heyagwreh obi nyutob, Iruhin douk nakon yopunyi saki anan Josep. Namudok aria nenek king Fero ananim urkum manawashaman abom. Aria nenekan nape debeini abom um agudok nahobig Isip. Aria shopunek nenekan nasuhw merik um eneshenesh shakus anan Fero ananit urupat iri.

<sup>11</sup> Arigaha anob nyutob aria yoweih nyumnah hatogrum ihirub warub agudok nahobig Isip aria Kenan sharao debeinyi amaen abom. Namudok aria apakish yamehesh worigun uwok um shishoh iri. <sup>12</sup> Douk arigaha Jekop nemnek um shakri shape shator worigun Isip aria sagomatin nakrip ananim nugamim douk apak mahwaram um yamehem iri hanak um Isip. <sup>13</sup> Hatorish hanaki aria hagiguk iri hakri hunak aria amamin wanin Josep nawerehen nakripam um anan kanak. Namudok aria anudok debeini arman Fero nadukem Josep ananip awirop.

<sup>14</sup> Enyudok nyanakuk, aria Josep nenekuman baraden ananin yaken Jekop um nini ananip awirop ihishmorim shunakumori Isip. Shadarehesh um douk shanak shatogur 75-poreish arpeshe.

<sup>15</sup> Aria Jekop nanak um Isip. Nabuh nape agudok aria nagok. Nani ananim nugamim douk apak mahwaram um yamehem iri. <sup>16</sup> Hagok aria amamiruh yegeshiweruh douk shararuh shanak um abrudok wabur nyeigur-ibur um Sekem. Shanak aria sharumam onohw

wonugwehw seiwok Abraham natik Hamor ananim nugamim natoruhw anabor utabor iri.

<sup>17</sup> Arigaha aria abudok nyutob seiwok Iruhin nakripanuk enen adurin atinyi baraan promis Abraham um nukweshih ananish yamehesh shape Isip iri shunak shupe fri um douk hurukatin um butogur. Aria abudok nyutob eshesh Israel douk shatogur sabaishi abom gani Isip. <sup>18</sup> Douk arigaha anob nyutob aria kupaini arman natogur king nape debeini um Isip. Aria anudok king douk madae nudukem Josep uwe, uwok. <sup>19</sup> Nakitak nagiyagim apakish yamehesh eshesh Israel aria nenekumesh yoweihi aih abom. Aria nenekesh shawashakuk esheshish weshubuk iri batowish um shugok.

<sup>20</sup> Aria abudok nyutob shobuki Moses. Anan douk anan yopuni nuganin aria Iruhin ananim urkum manawashaman. Kwanabuki aria amakenyish shasuhwan shabirakan bibatun aub meyoh ananit urupat. <sup>21</sup> Douk bibatun aub batuh aria shanak shanyukwronuk aduk. Aria anudok king Fero ananik nugawik kwanak kwoparugan. Kwoparugan kwonahur kwanak kwabirakan aria natogur kabi okwokwin nuganin abom um. <sup>22</sup> Douk yopun aria heyabigan um ihinyumorim eshesh Isip esheshin debeinyi saki. Aria neyagwreh um douk apa dodogeshin atun neyagwreh dodogowinyi baraan. Mour shopunek dodogowin atun um nenek sabainyi debeinyi mour.

<sup>23</sup> Douk arigaha ananish kwarahos shanak shatogur 40-poreish aria anan urkum morum nakri nunak nutik ananish ashakenyish owashish eshesh Israel.

<sup>24</sup> Nanak aria natik anan arman um eshesh Isip nabo anan Israel nenekan yowiyokuk. Aria Moses nanak nataurum anudok Israel aria nabo anudok Isip abom ba nagok. <sup>25</sup> Moses douk nenek urkum nakri ananishi arpesheh eshesh Israel douk ta shudukemesh um Iruhin douk nakri nukwu anan Moses um nuraesh nutaurumesh shupe wosik, aria uwok. Madae shudukemesh uwe. <sup>26</sup> Douk ruwahepih aria Moses wata natik biom Israel harpak. Natik namudok aria

nakri nusuhwesham um hupe atugun. Aria nakripam nakri, 'Yaipo! Ipak douk saniwan. Namudok parpok panareim yogap um maresh?'

<sup>27</sup> Aria anudok douk nabo anudok anan nenekan enenyenen iri neshi- wokuk Moses. Aria narigan nakri, 'Omi nyenekenyum nyupe debeini um apak? Shopunek douk omi nyenekenyum nyupe jas aria nyusuhw apakin baraan?' <sup>28</sup> Nyak atin nyakri nyubo eik kabi nubatik nyabo anudok arman eshesh um Isip nagok um aka?' <sup>29</sup> Douk Moses nemnek enyudok baraan aria nakutukuk Isip naruwok nanak um eshesh Midian esheshib amnab. Nanak nape agundok nuraio irohukwik aria nabuki biom nugamim.

<sup>30</sup> Nape agundok arigaha 40-poreish kwarahos shanak shadiguk, aria anah nyumnah enen Iruhin ananin ensel nyatogruman. Nyatogruman anagun wehigunum arpesheh uwok um, hurukatin um yoduhw nyeigurihwum Sainai. Natrin nyor nyih douk hanu hakih nyeiguhwishum enen shokwinyi rowog. <sup>31</sup> Moses natik enyudok aria nape nere urkum ba nakitak yowiyokuk. Douk gamo nanak hurukatin um nakri gamo nutik ehudok nyih aria nemnek Debeini nakri, <sup>32</sup> 'Eik douk nyakim yamehem Abraham nani Aisak aria Jekop amamin Iruhin.' Douk Moses nemnek namudok aria sheyaruban. Aria nanogugur aria madae nukri um nutrugun uwe.

<sup>33</sup> Aria Debeini wata nakripan nakri, 'Warouguk su bukouguk. Um maresh? Agundok nyeyatu um douk shuknigun abom um eik.' <sup>34</sup> Aria nakripan nakri, 'Eik yatrin enenyenen yoweinyi amaen douk eshesh Isip sheneken um eikish arpesheh shape Isip iri. Eik yemnek um agundok shoreh shahware um, aria douk enyudok yabuhmori ikweshihesh um shupe wosik atin. Namudok aria douk kitak aria ta ishopen nyutanam nyunak um Isip.'

<sup>35</sup> Sagomatin, eshesh Israel douk shanumogan Moses aria sharigan shakri, 'Omi nyenekenyum nyupe apakin debeini aria nyupe kabi jas nyusuhw apakit kwot?' Aria douk anudok arman Moses Iruhin neshopokan nanak um Isip natogur

esheshin debeini aria nataurumesh nakweshihesh naraesh shape wosik. Iruhin neshopok enyudok ensel douk nyatoguruman um enyudok shokwinyi rowog iri aria nyatauruman dodogowin um nunek enyudok mour. <sup>36</sup> Moses narikumesh aria naraesh shakutukuk Isip shanak. Shanak obi nyutob, anan douk nenek enenyenen Iruhin atun neneken iri mour shatrin. Neneken Isip, neneken agwudok youg shahwarog um Owishibor-igwi Youg iri gwagweru. Neneken agundok wehigunum arpesh uwok um. Nape nenek enyudok um 40-poreish kwarahos. <sup>37</sup> Aria douk anudok Moses douk nakrip eshesh Israel abom nakri, 'Iruhin ta nugraeh anan ipak kanak aria nunekan nutogur anan profet kabi eik um.'

<sup>38</sup> Arigaha aria apakish yamehesh shanak shantorum shape agundok wehigunum arpesh uwok um. Shape agundok aria douk anudok Moses nani eshesh shape abom. Anan nanak nato ahwudok yoduhw Sainai aria enen ensel nyakripan Iruhin ananin baraen um nunaki nukrip apak. Enyudok nyakripani-enyi baraen douk ta nyunek arpesh shupe wosik abom ihih nyumneh.

<sup>39</sup> Aria apakish yamehesh shakri uwok um shumnek Moses ananin baraen. Shenek dehik shanumogan aria esheship urkwip porum shakri shutanam um Isip. <sup>40</sup> Namudok aria shakitak shakrip Eron shakri, 'Nekumep anam godomi um ta hurikumap huyabigap yah iri. Anudok Moses douk narikumap iri makutukuk Isip manaki iri douk madae mudukeman uwe. Nanak aria maresh shenekan.'

<sup>41</sup> Aria abudok nyutob shenek enen nugaen bulmakau aria shahwaren esheshin god. Sheneken aria shenek ofa sheken eshudok enyudok madae adurini uwe god. Aria shanadudareh um enyudok eshesh shakwu esheshis wis sheneken iri. <sup>42</sup> Douk Iruhin natic namudok aria nekeshuk agab. Nakutishukuk um shunek lotu um unib o nyumnahin nani wabin aub douk shape iruhw iri. Kabi douk enen baraen seiwok anam profet henyemagak Iruhin ananik Buk iri nyakrium. Baraen nyakri,

'Ipak Israel! Ipak douk papenyesh 40-poreish kwarahos agundok wehigunum douk arpesh uwok um.

Pape aria mahish douk paesh patahesh iri, douk madae punek ofamesh puko eik uwe, uwok.

<sup>43</sup> Atudok patasah iri selit lotuit urupat douk madae pusah eikit uwe, uwok.

Atudok douk pasah anudok rohwin god shahwaran um Molek iri ananit.

Pasah selit lotuit urupat tani anudok rohwin god shahwaran um Refan iri ananik penegok iri unuk.

Pasah eshudok douk penekesh shadukem rohwin god omi iri um punek lotumam.

Douk namudok aria eik ta ishopokep punak rougun pupe pugimori de-beiburi wabur Babilon.'

<sup>44</sup> "Apakish yamehesh watak shape agundok wehigunum arpesh uwok um obi nyutob, atudok selit lotuit urupat douk sharokat um shutrut shukri Iruhin nani eshesh napeum douk shogremat tatao. Sharokat shagipesh anar aborir douk ensel nyeyabig Moses natrur iri. Aria Iruhin nakripan um shurukat shugipesh arudok aborir. <sup>45</sup> Arigaha apakish yamehesh shagokuk aria esheshish batowish shagremat. Arigaha Josua nakitak aria narao ihishmorim Israel shosah atudok selit lotuit urupat shanak. Iruhin nahiyahuk kupaibi amnabishi arpesh narik aria eshesh Israel shanarao esheshib amnab shagiguk. Aria atudok urupat douk shanaki sharokat tatao agundok apakib amnab arigaha king Devit ananib nyutob. <sup>46</sup> Iruhin natic Devit aria napeum nenekuman yopinyi atin. Namudok aria Devit nenek beten narig Iruhin um nukripan wosik aria Devit ta nurokuman anat urupat. Nurukat um anudok atun Iruhin douk seiwok Jepok nenek lotuman iri. <sup>47</sup> Aria Devit uwok aria ananin nunganin Solomon narokuman atudok urupat.

<sup>48</sup> Aria anudok dodogowin abom atun iri Iruhin, arpesh sharokog iri urusag douk madae nupenyog atin uwe, uwok. Kabi douk seiwok anan profet nakri um. Baraen enyudok. Debeini nakri,

49 'Iruhw heven, agundok douk eikin kingin wagitur eik yetem um, aria agundok atap douk yeshapak eikiruh yeriweruh hetem um. Ta purokume tape mumam iri urupat? Eik douk ta inak ipeum irao uhwin agnum? Uwok.

50 Ihishmorim eshudok eneshenesh douk eik kanak yenekesh.'"

51 Aria Stiven gamo naham nakri, "Ipak douk pukenyuk agabus baraan atin iri! Ipak padukem eshesh haiden abom. Baragos aria arigos sheshuk abom aria madae pukri um punnek Iruhin ananin baraan uwe. Pakri uwok um punnek Iruhin ananin Mishin enyenyin baraan. Ipak padukem ipakish yamehesh abom. 52 Wata kripe! Meini profet douk ipakish yamehesh shape shatrun meyoh madae shon shunekan enenyenen iri uwe? Adur madae anan uwe. Amudok douk hakripesh um Anudok Nenek Yopihi Atih Aih Iri ta nunakumori iri douk sham hagok. Aria anan douk natogur jurug aria ipak poneyabigam um anan aria pasuwan panak pan nagok. 53 Iruhin ananin lo douk nyakripi eshesh ensel shanaki shekepen. Ipak paraen aria madae pugipeshen abom uwe, uwok."

### *Debeimi Habo Stiven Nagok*

54 Douk amudok debeimi hemnek enyudok Stiven ananin baraan aria juwehosim abom hawok naruh hawegaruh aria hatrun. 55 Aria Stiven douk shuknin abom um Iruhin ananin Mishin iri, aria napuhur natrugun duk iruhw heven. Natrugun aria natik um agundok Iruhin napeum douk yopugun abom natrugun abom nape anabik um sik. Aria natik Jisas neyotu agundok Iruhin ananin yopunyi rogur ehahum. 56 Natik namudok aria nakri, "Yaipo mnek! Eik yatik iruhw heven nanupok aria yatigu Anudok Arman natogur adurinyi arpen iri neyotu agundok Iruhin ananin yopunyi rogur ehahum."

57 Douk hemnek namudok aria hahwar debeg abom aria hogah amamigos arigos. Aria aragarag hakitak arigas hanak hamutegan. 58 Douk hasuwen haran hatogur aduk abrudok wabur aria hape

hakwuman utabor. Aria amudok douk henek rohwin baraan iri douk hawaruk amamih rouhi rupeh hehuruk aduk iri aria hehubukuk um anan weroroini arman shahwaran um Sol iri.

59 Abudok nyutob amam wata hape hakwuman utabor Stiven obi nyutob, anan douk nenek beten nakri, "Debeini Jisas, nyak nyurao eikin mishin!" 60 Aria nabuh noduk ohrubus natao atap aria nahwaroguk debeihi mah nakri, "Debeini, nyak mare nyusuhwesh nyupe um eshudok henekeshume iri yoweishi inahos uwe, uwok. Nyukwreyeshuk." Douk nahwaroguk namudok aria nagok.

## 8

1 Aria Sol douk nakri wosik um agundok habo Stiven nagok um.

### *Sol Nape Nenekesh Enenyenen Eshesh Iruhin Ananish Arpesh*

Ahudok atuh nyumnah habo Stiven nagok ahi, amam debeimi hape henekesh enenyenen ihishmorim Iruhin ananish arpesh shape Jerusalem iri. Aria ihishmorim sharuwok shanam ihirub warub um agusudok biagos shokugosi nahobigos Judia iri Samaria. Shanak aria ihm-morim amam aposel atum hapeik Jerusalem. 2 Aria anam armam douk hagipesh Iruhin ananin aih wosik abom iri hanak harom Stiven aria herepan hariguk abom.

3 Aria Sol nape nenekesh enenyenen ihishmorim Iruhin ananish arpesh nakri nesh aria nakwiraeh um nununish. Nanak um ihig urusag nasuhw armam armago aria naraesh nanak naweshikesh shape shunuweshik-ati urupat.

### *Filip Nakripesh Debeini Ananin Baraan Gani Shokugi Nahobig Samaria*

4 Eshesh Iruhin ananish arpesh sharuwok shanak sabairubi warub sisigirub atin, aria agundok shanak shapeum douk shape aria shakripesh Iruhin ananin baraan. 5 Aria Filip nanak um anabur debeiburi wabur agudok shokugi nahobig Samaria aria nape nakripesh Kraiss ananin yopunyi baraan agundok. Nakri Jisas douk anudok arman Kraiss

douk Iruhin nagraehan aria neshopokan nanakumori nurao arpesih iri. <sup>6</sup> Sabaishi arpesih abom shemnek ananin baraen aria shatik enyudok Iruhin atun neneken iri mour douk anan Filip neneken nyatogur iri. Namudok aria gamo shabuk arigos huruk um baraen neyagwrehen iri. <sup>7</sup> Nagapesh sabaishi arpesih douk yoweishi sagabehos shapenyesh iri. Nagapeshesh aria eshudok yoweishi sagabehos shahwar debeg atin abom aria shakutukuk eshudok arpesih. Shopunek nagapesh sabaishi douk roguhwi aiyas shagokesh madae shurahaen iri uwe shani eshudok douk aiyas yowegas shurahaen yowiyokuk iri aria ihishmorim yopish atish iri. <sup>8</sup> Namudok aria abrudok waburish arpesih douk shanadudareh shariguk abom.

<sup>9</sup> Aria abrudok debeiburi wabur, anan arman shahwaran um Saimon iri douk nape. Roubi nyutob nape nenek ouruh hani sabagwiruh eshesh Samaria shatrin aria shakitak yowiyokuk. Aria nanagunukuk nakripesh nakri anan douk debeini arman abom. <sup>10</sup> Aria ihishmorim nyeiguhwi shatoweshi arpesih shani nyeiguhwi-wokeishi douk dodogowish atish um shumnek ananin baraen. Aria shakri namudok, shakri, “Enyudok Iruhin ananin dodog shahwaren um dodogowinyi dodog abom iri douk nyape anudok arman.” <sup>11</sup> Roubi nyutob nape nenek ouruh hani sabagwiruh shatrish aria shakitak yowiyokuk abom. Namudok aria eshesh douk dodogowish atish um shumnek ananin baraen. <sup>12</sup> Aria Filip anak nakripesh yopinyi baraen um agundok arpesih shuwish um agundok Iruhin nape debeini um ananish arpesih um. Aria shopunek douk nakripesh baraen um enyudok nyeigur Jisas Krais. Aria abudok nyutob eshesh shenek bilip um Jisas aria armam hani armago shopunek shenek baptais. <sup>13</sup> Aria Saimon douk shopunek nenek bilip um Jisas aria nenek baptais. Douk shanakrup jurug aria Filip anak meiguni um, anan shopunek neiran. Filip nenek enenyenen Iruhin atun neneken iri mour Saimon natrin aria nakitak yowiyokuk abom.

<sup>14</sup> Amam aposel hape Jerusalem iri douk hape aria hemnek um eshesh Samaria douk sharao Iruhin ananin baraen aria shenek bilip. Namudok aria heshopok Pita nani Jon hanakum hutaurumesh. <sup>15</sup> Douk anak habuh aria henek beten um eshudok shenek bilip iri um shurao Iruhin ananin Mishin. <sup>16</sup> Um maresh? Iruhin ananin Mishin douk watak nyubihi nyuwish enesh uwe, uwok. Watak apa shenek baptais abar atubar um agundok shenek bilip shakri shugipesh Debeini Jisas ananin nyeigur um. <sup>17</sup> Namudok aria Pita nani Jon howemesh wis aria douk sharao Iruhin ananin Mishin.

<sup>18</sup> Saimon natik um amam aposel howemesh wis eshudok arpesih sharao Iruhin ananin Mishin aria narawi anabor utabor nanaki um nukomabor. <sup>19</sup> Aria nakripam nakri, “Yaipo, ipak puko eik enyudok dodog shopunek. Puke um eshudok eik iwemesh eikis wis iri, eshesh douk shopunek shurao Iruhin ananin Mishin.”

<sup>20</sup> Aria Pita nakripan nakri, “Nyak nyakri ta nyutor enyudok presen douk Iruhin apa nakopen meyoh iri um aka? Eik yakri nyak nyuni nyakibor utabor punak um yoweiburi wabur aria nyih hunin! <sup>21</sup> Nyak mare nyunaki nyuni apak mupe um nyukri nyutaurum-apum enyudok Iruhin ananin mour, uwok. Um maresh? Iruhin natrin yum, nyor yoweimi urkum abom aria goutukim atom. <sup>22</sup> Namudok aria nyak ta nyukomuk agab amudok nyakim yowemi urkum aria nyutanam nyukon apahwi Iruhin. Aria ta nyunek beten nyorik Debeini um nutaurumen. Namudok aria anan wosik ta mare nusuhwesh nupe um eshudok yoweishi inahos nyak urkum morumesh iri nupe, uwok. Ta nukwreyeshuk. <sup>23</sup> Um maresh? Eik yatrin aria yadukemesh um nyak nyenek nyigiya aria oub bakitak abom um nyakri nyurao enyudok presen douk Iruhin nakopen meyoh iri um. Aria eneshenesh yoweishi douk showeshiken dodog abom.” <sup>24</sup> Saimon nemnek namudok aria nabeimam baraen nakri, “Ipak punek beten porik Debeini um nutaurume, aria enyudok ipak pakriyen iri ta

mare enen nyutogrume uwe, uwok.”

<sup>25</sup> Aria Pita nani Jon hape agundok hape hakriפש Debeini ananin baraen. Aria shopunek hakriפש um enenyenen anan nenekenyumam iri. Douk hakriפש um jurug aria hatanam hanak um Jerusalem. Hatanam hape hanak aria hakriפשuk Iruhin ananin baraen sabairubi warub bape agudok shokugi nahobig Samaria iri.

*Filip Nakripan Iruhin Ananin Baraen Anan Debeini Arman Um Eshesh Itiopia*

<sup>26</sup> Enen Debeini ananin ensel nyanaki nyakrip Filip nyakri, “Nyukitak nyunak saut aria nyunak nyutogur ahudok yah douk hakitak Jerusalem hanakukum wabur Gasa iri. Ahudok yah douk hawish hanak agundok wehigunum arpesch uwok um.” <sup>27</sup> Douk nemnek namudok aria nakitak nanak. Nanak natogur yah aria naparug anan arman um eshesh Itiopia nubo sheyakuman outoguh iri douk nasuhw merik iri. Anudok arman douk nasuhw enen debeinyi mour um gavman um agudok nahobig Itiopia. Onok armatok shahwarok um Kadesi iri douk kwape debeikwi armatok kwin um gavman. Aria anudok arman douk kwonegan nape debeini um neyoh ihibormorim gavmanibor utabor. Anudok arman douk nanakumori Jerusalem um nunek lotu um Iruhin <sup>28</sup> aria douk natanamori um nunak wabur. Netem ananin wilkar nyape nyanak aria nape natic enen baraen nyetem Iruhin ananik Buk seiwok profet Aisaia nenyemaguk iri. <sup>29</sup> Aria Iruhin ananin Mishin nyakrip Filip nyakri, “Nyak nyunak hurukatin um nyanyi wilkar enyen nyape nyunak aria nyak nyunak nyuni enyen punak hurukatin.” <sup>30</sup> Namudok aria Filip nasahur nanak hurukatin. Nanak aria nemnek anudok netem wilkar iri nape natarih enen baraen seiwok profet Aisaia nenyemaguk iri. Nemnek aria narigan nakri, “Nyak wosik nyadukem baugenyum enyudok nyape nyatarihen iri baraen o uwok?” <sup>31</sup> Aria debeini nebeiman-ari baraen Filip nakri, “Ta idukemesh mumam baugenyum enyudok baraen. Enesh shiyabige akure, wosik ta idukemen.” Aria nakrip Filip nato

iruhw wilkar nakih nani anan hape atugun. <sup>32</sup> Agundok anudok arman nape natarihen um Iruhin ananin baraen douk nyakri namudok. Nyakri,

“Anan mukareg kabi enen sipsip douk sharaen shanak um shen nyugok shutahen iri.

Nadukem enen nugaen sipsip abom douk abudok nyutob

sharupok enenyirub ehirub obi nyutob ta nyeyotu mokureg um.

Namudok atin madae karowih nyukri enen baraen uwe, uwok.

<sup>33</sup> Shenekan abranyin atun abom shanabukuk atap aria madae shunekuman yopunyi adurin baraen uwe.

Anan batowish aria barheshish uwok, um kupaishi shupe shukriפש um anan um.

Um maresh? Eshesh shan nagok aria madae nupe agundok atap uwe, uwok.”

<sup>34</sup> Natarih enyudok baraen neyaten aria narig Filip nakri, “Nyak kripe. Anudok profet douk nawemaguk baraen nyakrium omi? Nakri um anan kanak o nakri um kupaini?” <sup>35</sup> Aria Filip nape nakripan um nudukem enyudok baraen iganigadae nape natarihen iri. Nakripan neyaten aria nakripan kupainyi um Jisas ananin yopunyi baraen shopunek.

<sup>36</sup> Douk hape heyagwreh hanak aria hanak hatogur anabik abar borum. Aria anudok debeini arman nakrip Filip nakri, “Tik, abar abrudok bor agundok. Ikri inek baptais akure, ta mare enen arpen nyunaki nyukriפש um uwok?” <sup>37</sup> [Namudok aria Filip nakripan nakri, “Ta nyakigun numun abom nukri adur nyunek bilip um Jisas um, aria nyak wosik ta nyunek baptais.” Aria nakri, “Adur, yenek bilip abom yakri adur abom um Jisas Kraisa anan douk Iruhin ananin nunganin.”] <sup>38</sup> Namudok aria anudok debeini nakri aria wilkar nyeyotu. Nyeyotu douk hakitak habuh atap aria hanak habuh abar. Habuh aria Filip nenek baptaisuman. <sup>39</sup> Douk hakutukuk abar hatoumori anagas aria ahudok atuh Debeini ananin Mishin nyarauguk Filip

aria anudok debeini madae nutrun uwe. Natic namudok aria wata shopunek nape nanak aria nanadudareh abom. <sup>40</sup> Aria Filip wata natic um anan douk wata neyotu anabur wabur nyeiguribur um Asdot. Aria nawish ihirub-morim warub nakripesh Iruhin ananin baraen nanak arigaha nanak natogur Sisaria.

## 9

### *Sol Nekeshuguk Agab Yoweishi Inahos Aria Nenek Bilip Um Jisas*

<sup>1</sup> Aria abudok nyutob Sol wata apa dodogowin atun um nakri nubo Debeini ananish arpes shugok. Namudok aria nanak um anudok debeini pris abom <sup>2</sup> aria narigan um nenekuman sabaisi shus um amam debeimi um eshesh Juda shape sheneyagwreh baraen-ogwi urusagani Damaskus aria nakonas nasuwas nanak. Baraen nyetem asudok shus iri douk nyakri wosik um Sol nuwish Damaskus aria nukri nuparug enesh arman o armago douk shagipesh ahudok yah Jisas ananish shupe agundok um, anan wosik nusuhwesh nuweshikesh aria wata nuraesh um Jerusalem.

<sup>3</sup> Douk nenekuman shus nakonas nasuwos aria nanak. Nanak arigaha nanak natogur hurukatin um Damaskus aria ahudok atuh anat lait tabuhi gani iruhw heven aria agundok anan nape nanak um natrugun abom. <sup>4</sup> Namudok aria nabuh natu nakus abom atap. Aria nemnek anah mah aria enyudok arpen nyakri, “Sol! Sol! Nyak nyape nyenek enenyenen namudok aria nyeneke yemnek debeiri eriger um maresh?”

<sup>5</sup> Aria Sol narigan nakri, “Debeini, nyak omi?” Aria enyudok arpen nyakri, “Eik Jisas douk nyak nyape nyenek enenyenen-ume um yemnek debeiri eriger iri. <sup>6</sup> Douk nyukitak nyuwish abrudok wabur Damaskus aria enen arpen ta nyukripenyum enesh eshudok nyak ta nyunekesh iri.” <sup>7</sup> Amudok heiran hanak iri baraen wokam aria heyotu. Hemnek mah atin aria arpen madae hutik enen uwe, uwok. <sup>8</sup> Douk nakitak neyotu iruhw nakri nutrugun aria madae nutik enesh eshudok eneshenesh uwe,

uwok. Ruhur raweshiguk ananis nabes. Namudok aria hasuhw ananin rogur aria haran hawish Damaskus. <sup>9</sup> Biyeh atih nyumneh madae nutrugun uwe, uwok. Aria abudok nyutob, worigun iri abar madae nishoh uwe, uwok. Nape meyoh.

<sup>10</sup> Aria abrudok wabur Damaskus, anan arman nagipesh Kraisi iri douk nape. Anan douk shahwaran um Ananias iri. Anan nape aria kabi nanabek yomnis um aria Debeini nakripan nakri, “Ananias!”

<sup>11</sup> Aria Debeini nakripan nakri, “Nyukitak aria nyunak um ahudok yah shahwarah um Dudurih Yah iri. Nyunak nyutogur aria anan arman shahwaran um Judas iri ananit urupat tataoum, aria nyorigesh um anan arman nyeigurinum Sol. Ananibur wabur Tarsus. Douk nape nenek beten. <sup>12</sup> Nenek beten aria kabi nabo yomnis um aria natic anan arman shahwaran um Ananias iri nawish urupat. Nawish aria naweman ananis wis um wata shopunek nutrugun.”

<sup>13</sup> Aria Ananias nawanaman baraen nakri, “Debeini, eik douk yemnek sabaishi arpes shanogugur um anudok arman. Shanogugur um ihihmori yoweihai anan nenekeh um nyakish arpes shape Jerusalem iri. <sup>14</sup> Aria douk anudok nanakumori agundok. Nanakumori nusuhw ihishmorim arpes shenek lotu o shenek beten um nyakin nyeigur iri aria nuweshikesh. Amam debeimi pris hakripani aria narawi big um nunaki nunek enyudok.”

<sup>15</sup> Aria Debeini nakripan nakri, “Nyak kare. Anudok arman douk yagraehan um nunek eikin mour iri. Yagraehan um nunak nukrip arpes madae shudukem eik iri aria eikin baraen uwe shuni esheshim king-omi aria shuni eshesh Israel um shudukem eikin nyeigur aria eikin baraen. <sup>16</sup> Aria eik kanak ta iyabigan enenyenen amaen douk ta nyutogruman aria numnek debeiri eriger abom um ta nurar um eik iri.”

<sup>17</sup> Douk Ananias nemnek namudok nanak nawish atudok urupat aria naweman wis Sol. Aria nakripan nakri, “Eikin ashuken Sol, Debeini Jisas douk natogrumen yah abudok nyutob nyape nyanakumori agundok aria neshopoke yanaki.



Yanakumori nyak wata nyutrugun aria nyurao ananin Mishin nyuwishen aria nyupenyen wosik abom.”<sup>18</sup> Aria ahudok atuh enen enyudok kabi eiguhwih parukekeh iri um hanatuki Sol ananis nabes aria wata shopunek natrugun. Natrugun abom aria nakitak nanak nenek baptais.<sup>19</sup> Douk nenek baptais jurug, nawok anagun worigun aria wata shopunek dodogowin.

### *Sol Nakripesh Iruhin Ananin Yopinyi Baraen Damaskus*

Sol nape eneh nyumneh aburdok wabur Damaskus. Nani eshesh shagipesh Jisas iri shape.<sup>20</sup> Nape aria nanak um urusag douk eshesh Juda shape sheneyagwreh baraen-ogwi aria nakripesh baraen. Nakripesh nakri Jisas anan douk Iruhin ananin nuganin.<sup>21</sup> Aria ihishmorim shemnek ananin baraen iri douk shakitak yowiyokuk. Aria shape sheneyagwreh shakri, “Arman apa nabo eshudok arpeshe douk shenek lotu o shenek beten um Jisas ananin nyeigur iri douk anudok. Nenekesh namudok Jerusalem aria anudok nanakumori agundok um nuweshik agundokishi aria wata nuraesh um amam debeimi pris.”

<sup>22</sup> Aria Sol nape natogur dodogowin atun abom neshagrakuk agundok narik nape nakripesh baraen um Jisas um. Aria eshesh Juda shape Damaskus iri douk shemnek ananin baraen aria shakitak yowiyokuk. Aria madae shukri um shuwanam enen baraen uwe, uwok. Nakripesh wosik abom um Jisas anan douk Krai, anudok arman douk Iruhin nagraehan neshopokan nanakumori nurao arpeshe iri.

<sup>23</sup> Douk sabaihi nyumneh hanak hadiguk aria amam Juda hanak hantorum hape habo baraen um hubo Sol nugok.

<sup>24</sup> Aria enesh shakripan enyudok amam hakri huneken-uman iri. Nyumnah wab amam hape hatrugun-uman abrudok debeiburi wabur Damaskusig witog um hakri hutrun nukri um nunak nutogur aria hon nugok.<sup>25</sup> Aria anab wab aria enesh shagipesh anan iri arpeshe sharan shatoum aburdok debeiburi utaboribur nabur douk sharokabur shersharir

abrudok wabur iri. Shakih iruhw shaduron madururuh enen kubin nabuh nape aria shasuhw madururuh shape aria skakutun nabuhuk adukehah-ibur um abrudok wabur.

### *Sol Natanam Nanam Jerusalem*

<sup>26</sup> Douk shakutuni aduk aria nanak um Jerusalem. Nanak aria nakri nini eshesh shagipesh Jisas iri shupe atugun. Aria eshesh shanoguguran aria shakri anan douk madae nugipesh Jisas uwe, uwok.<sup>27</sup> Aria Baranabas nanaki narao Sol um amam aposel. Naran aria nakripesh um agundok Sol natik Debeini yah aria Debeini nakripan baraen um. Aria gamo nakripesh um agundok anan Sol dodogowin atun nakripesh baraen um Jisas gani Damaskus um.<sup>28</sup> Namudok aria Sol nani eshesh shape. Shape aria nape narahaen nanak abrudok debeiburi wabur Jerusalem aria dodogowin atun nape nakripesh yopinyi baraen um Debeini ananin nyeigur.<sup>29</sup> Aria nani enesh Juda douk apa sheneyagwreh enyudok baraen Grik iri eshesh shape sheneyagwreh baraen aria shanogogonim-umen. Namudok aria shape shaurim anah yah um shon nugok.<sup>30</sup> Douk amam hagipesh Jisas iri hemnek namudok aria haran habuhuk um Sisaria. Habuh agundok aria heshopokan nanak um Tarsus.<sup>31</sup> Namudok aria ihirubmorim warub agusudok biyogos atin shokugosi nahobigos, Judia, Galili aria Samaria, ihishmorim Jisas ananish arpeshe douk shape wosik aria aparuh hor wosik. Shatogur dodogowish aria shagipesh Debeini ananin baraen abom aria wosik shape shakamum anan. Iruhin ananin Mishin nyenekesh shatogur dodogowish abom aria sabaishi arpeshe shawishmori Jisas ananish arpeshe.

### *Pita Nagapesh Ainias Yopun*

<sup>32</sup> Pita narahaen nanak sabairubi warub aria anah nyumnah nanak um anabur wabur nyeiguribur um Lida. Nanak natik Iruhin ananish arpeshe aria nani eshesh shape agundok.<sup>33</sup> Nape abrudok wabur aria natik anan arman shahwaran um Ainias iri. Ananihw yegenyihw aria bishiguh douk shagok

abom aria neshuh aras atus um 8-poreish kwarahos. <sup>34</sup> Pita natrun namudok aria nakripan nakri, “Ainias, douk Jisas Krais nagapeshen aria yopin. Arigah kakitak nyogapesh nyakis aras.” Pita nakripan namudok aria ahudok atuh Ainias nakitak. <sup>35</sup> Aria ihishmorim arpesh douk shape arbudok warub Lida bani Saron iri shatik anudok arman Ainias aria shekeshuk agabus yoweishi inahos. Aria shatanam shakon aparuh Debeini.

*Tabita Kwagok Aria Pita Wata Nokuhur Kwakitak Kwape*

<sup>36</sup> Abrudok wabur Jopa, onok armatok shahwarok um Tabita iri kwape. Okwok douk kwagipesh Jisas iri. Eshesh Grik esheshin baraen shakri shuwanam enyudok nyeigur Tabita um douk shahwarok Dorkas. Ihih nyumneh okwok kwape um kwenek yopihi atih aih aria kwekesh eshudok eneshenesh um yaruhish arpesh iri. <sup>37</sup> Aria abudok nyutob arugeh hapeyok aria kwagok. Kwagok aria okwokwihw yegenyihw douk shakwrupohw aria shahwubuk wakus anam iruhwim rum. <sup>38</sup> Abrudok wabur Lida douk bape hurukatin um Jopa. Aria eshesh shagipesh Debeini aria shape Jopa iri douk shemnek um agundok Pita nanaki nape Lida um. Namudok aria sheshopok biom armam um hunak hurani. Hanak aria hakripan dodog hakri, “Nya, yowi nyuni ohwak munak arigas!”

<sup>39</sup> Douk Pita nemnek namudok aria neiram hanak. Hanak hatogur aria sharan shato um amudok iruhwim rum. Nakih iruhw aria ihiyumorim armago douk amam hagog howosopukuk iri wanaki weyotu weyor warih Pita aria wape woreh. Woreh aria weyabigan eneh rupeh shehuruk aduk iri rupeh hani ehudok eneh douk Dorkas watak kwani owo kwape aria kwokwosheh iri. <sup>40</sup> Aria Pita neshopok ihishmorim shatograkuk aduk. Shatograkuk aria nabuh noduk ohrubus natao nenek beten um Iruhin. Nenek beten um jurug, natanamum okwok aria nakri, “Tabita, arigah kakitak!” Aria kwatrugun abom. Douk kwatrugun kwatik Pita aria kwakitak kwape abom.

<sup>41</sup> Kwakitak kwape aria nasuhw okwokwin rogur nakuhur kwaikitak kweyotu iruhw. Aria wata nahwar oudok armago douk amam hagog howosopuk iri wani Iruhin ananish arpesh shawish numun. Shawish neyabigeshok aria shatruk um yopuk. <sup>42</sup> Namudok aria baraen nyanak ihigun abrudok wabur Jopa aria shemenek um enyudok Pita neneken iri. Aria sabaishi arpesh shenek bilip um Debeini. <sup>43</sup> Aria Pita nani anan arman shahwaran um Saimon iri hape Jopa sabaihi nyumneh. Anudok Saimon douk napeum nagapesh mahishis um shunek eneshenesh eshudok um.

## 10

*Enen Ensel Nyatogrum Kornilius Nyakripan Baraen*

<sup>1</sup> Anan arman shahwaran um Kornilius iri nape abrudok wabur Sisaria. Anan douk nape debeini um 100-poreim soldia. Anan nani ananim soldia douk anam um enyudok debeinyi ami shahwaren um eshesh Itali iri esheshin ami. <sup>2</sup> Anan nani ihishmorim shape ananit urupat iri apa shenek lotu um Iruhin shape shukamum anan aria shagipesh ananin baraen wosik abom. Aria anan apa nataurum eshesh yaruhish arpesh aria nekesh sabaishi eneshenesh eshudok. Aria ihih nyumneh apa nenek beten um Iruhin. <sup>3</sup> Aria anah nyumnah wabigep hurukatin um 3 kilok anan nape aria natik enesh eshudok kabi nabo yomnis natrish um. Aria natik abom enen Iruhin ananin ensel nyanaki nyawish-uman urupat aria nyakripan nyakri, “Kornilius!”

<sup>4</sup> Kornilius napuhur natrin abom aria nanogugur. Aria nakri, “Debeini, maresh?”

Aria enyudok ensel nyakri, “Iruhin anan urkum morumenyum agundok nyak nyape nyenek beten nyarigan um. Enyudok nyenek iri yopinyi um nyekesh yaruhish um eshudok eneshenesh iri um douk shopunek natrin aria urkum morumen. <sup>5</sup> Aria douk nyak ta nyishopok anam armam hunak um wabur Jopa aria huraumen iri anan arman shahwaran um Pita iri. Enyudok enen nyeigur shahwaran Saimon. <sup>6</sup> Anan douk

kupaini arman amam atish nyeiguhw um Saimon hape. Anudok Saimon anan douk nagapesh mahishis yegenyihwis um shunek eneshenesh eshudok iri. Ananit urupat tatao hurukatin um youg.”

<sup>7</sup> Enyudok ensel nyakripanuk namudok Kornilius aria wata nyanakuk. Aria Kornilius nahwar biom armam henekuman mour ananit urupat iri hani anan soldia apa nataurum Kornilius iri hanaki. Anudok soldia apa nenek lotu um Iruhin aria nagipesh anan nakriyehi aih. <sup>8</sup> Douk hanaki nakripam um ihinyumorim enyudok nyatogruman iri aria neshopokam hanakum Jopa.

#### *Pita Natik Enesh Eshudok Kabi Nanabek Yomnis Natrish Um*

<sup>9</sup> Ruwahepih aria amudok biom atun hape hanak atin arigaha aria hurukatin um hunak hutogur Jopa. Aria abudok nyutob douk nyumnah oruhw aria Pita nakitak nato iruhwitam urupat um nunek beten. <sup>10</sup> Nyirub shopunek ban aria nakri nuwok enesh eshudok. Aria abudok nyutob watak shape shenek worigun obi nyutob, enesh eshudok douk shatogruman aria natrish kabi nanabek yomnis natrish um. <sup>11</sup> Aria natik um utag ganupok aria natik enen enyudok kabi anah debeihi rupah um. Shasukuk nubatibus apubus sisiguk aria shape shakutuh habuhumori atap. <sup>12</sup> Aria natigu enesh-enesh mahish sharari ahudok kabi rupahmori. Natik ihiguhwmori yuguhw aria armiguhw hwani ihishmorim eneshenesh mahish sharari. <sup>13</sup> Natrish aria nemnek anah mah. Aria enyudok arpen nyakri, “Pita, nyukitak nyubo eshudok mahish nyishoh!”

<sup>14</sup> Aria Pita nakri, “Debeini, adur atin uwok! Seiwok arigaha douk, eik douk madae iwok enesh uwe eshudokmori mahish. Eshudok douk apak Juda mahwadesh shanabosusih iri aria nyakin lo nyakrium mare mishoh iri.” <sup>15</sup> Anah shopunek enyudok arpen wata nyakripani nyakri, “Eshudok Iruhin nenekesh yopish iri, nyak mare nyuhwadesh shanabosusih iri, uwok.”

<sup>16</sup> Enyudok natrin nyatogur biyeh atih aria ahudok atuh wata shopunek sharaen nyatouk iruhw heven.

<sup>17</sup> Pita natik enyudok aria wata nape nenek urkum um nakri nudukem baugenyum.

Aria abudok atub nyutob, amudok armam douk Kornilius neshopokam hanak iri douk harigesh shakripam um Saimon ananit urupat aria hanaki heyotu wit.

<sup>18</sup> Aria hahwar harigesh hakri, “Anudok arman Saimon douk nanahwar kupainyi nyeigur Pita iri douk nanaki nape agundok o uwok?”

<sup>19</sup> Aria abudok nyutob, Pita douk watak nape nabirak um nakri nudukem baugenyum baraen um eshudok iganigadae natrish iri. Aria Iruhin ananin Mishin nyakripan nyakri, “Mnek! Biom atun armam douk hanaki haurimen. <sup>20</sup> Kakitak nyubuh aria nyunamam punak. Mare nyukri nyupe nyunek urkum uwe, uwok. Um maresh? Amam douk eik meyoh yeshopokam hanaki.”

<sup>21</sup> Aria Pita nakitak nabuh atap aria nakripam nakri, “Arman ipak pape paurliman iri douk eik. Aria douk panakumori maresh?”

<sup>22</sup> Aria hakripan hakri, “Kornilius nakripap aria douk manaki. Anan douk nape debeini um 100-poreim soldia aria yopuni arman. Anan apa nenek lotu um Iruhin aria nape shukamum anan. Ihishmorim Juda shopunek shatrun shakri yopuni arman. Aria enen Iruhin ananin ensel nyakripan um nunekumenyi baraen nyak nyunaku ananit urupat. Nyunaku um numnek maren baraen nyak nyiyagwrehen iri.”

<sup>23</sup> Douk hakripanum jurug aria naram hawish numun urupat. Hawish nabiro-mam worigun aria abudok wab douk hani anan heshuh atudok urupat.

#### *Pita Nanak Natogur Kornilius Ananit Urupat*

Ruwahepih aria nanamam hanak. Anam eshesh Jopa douk hagipesh Kraisi iri shopunek heiran hanak. <sup>24</sup> Pita nani amudok hanak arigaha ruwahepih aria hanak hatogur Sisaria. Hanak hatogur obi nyutob, Kornilius douk

nape natrugun-umam. Nani ananip awirop aria enesh ananishi arpesch douk nahwadesh shanaki.

<sup>25</sup> Douk Pita nanak nawish urupat aria Kornilius natrun aria nabuh noduk ohrubus abom agundok Pita neyotu um aria natuk ananin nyeigur nyato iruhw. <sup>26</sup> Aria Pita nonohur nakitak aria nakri, “Kitak! Eik douk arpen meyoh kabi nyak um.”

<sup>27</sup> Pita wata nani Kornilius heyagwreh atin aria nawish numun. Nawish aria natik sabaishi arpesch shantorum shape.

<sup>28</sup> Aria nakripesh nakri, “Ipak kanak padukemesh abom. Apak Juda apakih aih, apak ta mare enen arpen nyunak nyutik enen kupainyi arpen douk enyen madae Juda iri uwe, uwok. Mare nyunak nyuni enyen nyupe o nyunak harokatiny-umen, uwok meyoh. Aria eik douk Iruhin neyabige um nakri mare ihwar enen kupainyi arpen nyanabosusih aria yoweinyi agundok ananis nabes um, uwok. <sup>29</sup> Namudok aria douk peshopok amudok armam hanameigu aria madae ikri uwok uwe. Yemnek atin aria yanaki. Aria douk yakri iyorigep. Ipak douk penekume baraen um maresh?”

<sup>30</sup> Aria Kornilius nakri, “Nubokuhi, douk biyeh atih nyumneh hanak hadiguk, eik yape eikit urupat yape yenek beten douk abudok atub nyutob 3 kilok. Aria ahudok atuh yatik anan arman neneki hatrugun-abom iri rupah aria neyotu agundok eik yape yenek beten um. <sup>31</sup> Aria nakripe nakri, ‘Kornilius, Iruhin nemnek nyakin beten aria urkum morum enyudok yopinyi mour um nyako yaruhish iri um.’ <sup>32</sup> Aria nakripe nakri, ‘Arigah nyishopok anam armam hunak um Jopa hurumori anan arman shahwaran um Pita iri. Kupainyi nyeigur shahwaran Saimon. Anan douk anan arpenyin nanaki nani kupaini Saimon hape. Anudok kupaini Saimon douk nagapesh mahishis yegenyihwis um shunek eneshenesh eshudok um. Anan douk nape hurukatin um youg.’

<sup>33</sup> Douk namudok aria yeshopoku amudok armam hanaku harumenyi. Aria douk nyenek yopihi aih abom um nyanakumori. Douk apak ihishmorim enyudok manaki mape agundok Iruhin

nape natrup aria makri mumnek ihinyumorim baraen douk Debeini nakripen dodogowinyi baraen, aria neshopoken nyanakumori nyukripap-enyi.”

### *Pita Nakripesh Baraen Kornilius Ananit Urupat*

<sup>34</sup> Pita nemnek aria nape nakripesh nakri, “Adur atin, douk eik douk yadukemesh abom. Iruhin anan douk madae nutik enesh arpesch nukri eshesh wosik yopishi aria enesh nutrish nuhwaresh yoweishi uwe, uwok. <sup>35</sup> Aria ihismorim awirosish arpesch, anan apa nanadudareh um eshudok douk shape shakamum anan aria shenek yopihi atih aih iri. <sup>36</sup> Enyudok baraen Iruhin neneken nyanakumori apak Israel iri, ipak douk padukemen. Nakripap yopinyi baraen um Jisas Kraiss anan douk Debeini abom um ihishmorim arpesch aria anan nenekap mani Iruhin mape atugun aparuh hor wosik. <sup>37</sup> Padukemen enyudok baraen um Jisas douk nyakitaki agudok shokugi nahobig Galili aria nyanak ihirubmorim warub agudok shokugi nahobig Judia iri. Jon nenek baptaisumesh iri nakripesh baraen um shunek baptaisum jurug aria enyudok nyutogur. <sup>38</sup> Ipak padukeman anudok Jisas douk nanaki wabur Nasaret iri. Um agundok Iruhin nakon ananin Mishin nyawishan aria nenekan dodogowin abom um Iruhin nani anan hape huruk aria narahaen nanak warub nenek yopinyi mour nagabe ihishmorim arpesch douk Satan nubokadae nanunish abom iri.

<sup>39</sup> Aria apak matik ihinyumorim mour anan neneken nyatogur Jerusalem bani ihirub warub apak Juda apakirub iri aria douk makripeshumen. Yah shan nagok um douk shenek nyiliman enen rowog kruse aria douk nagok. <sup>40</sup> Aria hakri biyeh atih nyumneh um, Iruhin wata shopunek nonohur nakitak. Nakitaki aria nenekan nanaki yopugunum matrun. <sup>41</sup> Aria anan madae nutogurum ihishmorim arpesch uwe, uwok. Natogurum apak atup, douk riguk Iruhin nanagraehapum mukripesh ananin yopinyi baraen

iri. Douk nakitaki wonugwehw aria mani anan mawok worigun. <sup>42</sup> Aria nakripapuk dodogowinyi baraen um nakri mukripesh ananin baraen. Nakri gamo mukripesh um anan douk Iruhin nagraehanum ta nusuhwumesh kwotog eshudok watak shape iri arpesh shuni eshudok shagok iri. <sup>43</sup> Seiwok ihim-morim profet douk hakriyan-ukuk iri um anudok Jisas. Hakri ihishmorim arpesh shusuhw ananin baraen dodog shugipeshen iri, Iruhin ta nukweshih esheshish yoweishi inahos um enyudok Jisas ananin nyeigur atin.”

*Kupaishi Arpesh Douk Eshesh Madae Juda Iri Sharao Iruhin ananin Mishin*

<sup>44</sup> Abudok nyutob Pita apa nakripesh enyudok baraen obi nyutob, Iruhin ananin Mishin nyabuhi nyawish ihishmorim arpesh douk shape shemnek enyudok Iruhin ananin baraen iri. <sup>45</sup> Amam Juda henek bilip um Jisas aria hapei Jopa heir Pita hanaki iri, amam douk hakitak yowiyokuk abom um agundok Iruhin nekesh meyoh um ananin Mishin nyawish eshudok douk eshesh madae Juda iri uwe shopunek um. <sup>46</sup> Hakitak yowiyokuk um agundok hemnekesh sheneyagwreh kupakupainyi baraen aria shatuk Iruhin ananin nyeigur nyato iruhw um. Aria Pita neyagwreh nakri, <sup>47</sup> “Eshudok arpesh douk shopunek sharao Iruhin ananin Mishin kabi apak Juda maren um. Namudok aria arpen ta mare enen nyunaki aria nyukripesh um mare shunek baptais uwe, uwok.”

<sup>48</sup> Namudok aria Pita nakripesh dodogowinyi baraen um eshesh ta shunek baptaisum Jisas Kraiss ananin nyeigur. Douk shenek baptais iyoh aria shariganum nini eshesh shupe eneh karowih nyumneh shopunek.

## 11

*Pita Natanam Jerusalem Aria Nakripesh Um Anan Neneken Iri Mour*

<sup>1</sup> Amam aposel hani eshesh Jisas ananish arpesh shape agudok shokugi nahobig Judia iri shemnek um agundok kupaishi arpesh douk eshesh madae Juda

iri uwe shemnek Iruhin ananin yopinyi baraen aria shasuhwen shagipeshen um. <sup>2</sup> Namudok aria abudok nyutob Pita nanak natograri Jerusalem obi nyutob, eshesh Juda shenek bilip aria dodogowish atish um agundok shatah yegeshiweruh um aria shahan shakri, <sup>3</sup> “Nyak nyanak nyawish kupaishi arpesh douk madae shutah esheshiruh yegeshiweruh iri uwe esheshit urupat aria nyani eshesh pawok worigun.”

<sup>4</sup> Namudok aria Pita nakripesh baraen um ihishmorim shatograri iri eshudok eneshenesh. Aria nakripesh namudok. <sup>5</sup> Nakri, “Eik yape yenek beten abrudok debeiburi wabur Jopa aria yatik um kabi yabo anas yomnis um. Urkum mape aria yatik enen enyudok kabi anah debeihi rupahmori hape habuhi iruhw utag. Shasuhuguk nubatibus apubus sisiguk aria shape shakutuh habuhi agundok eik yapeum. <sup>6</sup> Gamo yatruh hurukatin aria yatik eneshenesh agundok atapishi mahish sharari ahudok rupah. Yatik enesh yabish, enesh wanarish madae shishoh iri uwe. Yatik anaguh yuguhw hwani armiguhw. <sup>7</sup> Yatrish aria yemnek anah mah. Aria enyudok arpen nyakri, ‘Pita, arigah nyukitak nyubo eshudok mahish nyishoh.’ <sup>8</sup> Aria eik yakri, ‘Debeini, adur atin uwok. Eik madae ishoh uwe eshudokmori mahish, douk shanabosusih madae yopish iri uwe.’ Eik yakri namudok. <sup>9</sup> Aria enyudok arpen nyeyagwrehi gani iruhw heven iri nyakri shopunek, ‘Eshudok douk Iruhin nenekesh yopish iri, nyak mare nyuhwaresh shanabosusih iri uwe, uwok.’ <sup>10</sup> Enyudok yatrin nyatogur biyeh atih aria wata shopunek sharaen nyatomoguk iruhw utag.

<sup>11</sup> Aria abudok nyutob abom biom atun armam douk sheshopokam Sisaria hanakumogu hurmori eik aria douk hanak hatogur atudok eik yapenyat iri urupat. <sup>12</sup> Iruhin ananin Mishin nyakripe um mare ikana uwok. Nyakripe um ta ini amam muni atuh munak. Amam 6-poreim douk hagipesh Jisas aria hape Jopa iri shopunek haname manak um Sisaria. Manak matogur aria ihim-morim manak mawish Kornilius ananit uru-

pat. Anudok douk neshopokugu amudok hanaku harauri eik iri. <sup>13</sup> Mawish aria nakripe agundok natik enen ensel nyawish nyeyotu numun ananit urupat um. Natrin aria nyakripan namudok. Nyakri, 'Nyishopok anam armam shahwaran um Pita iri. Kupainyi nyeigur douk shahwaran Saimon. <sup>14</sup> Puruman punaki aria nukripep baraen um nyak nyuni ihishmorim shape nyakit urupat iri pumneken aria Iruhin ta wata nuraep putanam aria pupe wosik abom.'

<sup>15</sup> Douk arigah yanaki yahur baraen yape yakriפש, aria Iruhin ananin Mishin nyabuhi nyawishesh kabi riguk wata sagomatin nyabuhi nyawish apak um. <sup>16</sup> Aria eik urkum morum enyudok baraen riguk Debeini Jisas nakriyen iri. Nakri, 'Jon nenek baptais-umesh abar, aria ipak ta punek baptais Iruhin ananin Mishin nyubuhi nyuwishep aria nyupenyep.' <sup>17</sup> Eik yadukemesh abom um Iruhin douk nekesh meyoh enyudok atin Mishin kupaishi arפש. Nekesh kabi riguk nako apak meyoh abudok nyutob munek bilip um Debeini Jisas Kraisi obi nyutob. Namudok aria eik douk madae debeini arman um iweshikuman yah Iruhin um nunek ananin mour um uwe, uwok."

<sup>18</sup> Douk shemnek enyudok baraen aria madae shukri um shuhon shukripan enenyenen uwe, uwok. Aria shatuk Iruhin ananin nyeigur nyato iruhw aria shakri, "Namudok aria Iruhin douk nakri wosik um nubadig kupaishi arפש esheshiruh aparuh um shukeshuk agabus yoweishi inahos shatanam shukon aparuh anan aria nutaurumesh shupe wosik abom ihih nyumneh."

*Sagomatin Eshesh Iruhin Ananish Arפש Shape Antiok Iri Sharao Nyeigur Kristen Um*

<sup>19</sup> Riguk abudok nyutob shabo Stiven nagok obi nyutob, eshesh shenekesh enenyenen eshesh shagipesh Jisas iri aria sharuwok shanak atin atinyuk. Enesh sharuwok shanak arigaha shanak shatogur shape Fonisia. Enesh shatogur shape enen unai nyeigirinyum Saiprus.

Aria enesh douk shanak shape Antiok. Shanak shape aria shape shakriפש baraen eshesh Juda atish um Debeini Jisas. <sup>20</sup> Aria anam douk hagipesh Jisas aria hape enyudok unai Saiprus iri hani anam hape anabur wabur Sairini iri hanakum Antiok aria hakriפש baraen eshesh kupaishi shopunek. Hakriפש eshesh Grik yopinyi baraen um Debeini Jisas. <sup>21</sup> Debeini nanakumam huruk nataurumam dodogowim atum hakriפשen aria sabaishi arפש shenek bilip. Shakutukuk eneshenesh yoweishi inahos aria shatanam um Debeini.

<sup>22</sup> Eshesh Iruhin ananish arפש shapeik Jerusalem iri douk shemnek um enyudok aria sheshopok Barnabas nanak um Antiok um nutaurumesh. <sup>23</sup> Douk Barnabas nanak natogur aria natik um Iruhin nataurumesh meyoh aria shape wosik abom. Natik namudok aria nanadudareh abom. Aria gamo nakriפש baraen eshesh ihishmorim. Nakriפש um esheship urkwip purum dodogowish atish abom shugipesh Debeini ananin baraen namudok atin ihih nyumneh. <sup>24</sup> Barnabas anan douk yopuni arman. Iruhin ananin Mishin nyawishan abom nyapenyan wosik aria dodogowin atun abom um bilip. Namudok aria sabaishi arפש shawish abom um eshudok Debeini ananish arפש.

<sup>25</sup> Aria Barnabas wata nanak um Tarsus um nurim Sol. <sup>26</sup> Nanak douk naparugan aria naranum Antiok. Aria shuknin kwar amam biom hani Iruhin ananish arפש shape aria hape henek skulumesh abom sabaishi arפש Iruhin ananin baraen. Aria douk abrudok wabur Antiok douk sagomatin arפש shodowesh enyudok nyeigur Kristen eshesh shagipesh Jisas iri.

<sup>27</sup> Aria abudok nyutob anam profet douk hapei Jerusalem habuhmori Antiok. <sup>28</sup> Aria Iruhin ananin Mishin dodogowin atin nyahur anan um amudok profet shahwaran um Agabus iri nakitak neyotu aria nakriפש enen baraen. Nakriפש um ta nyurub besh abom ihirub warub douk bape shukamum eshesh Rom iri. Abudok nyutob Klodius nape king obi nyutob, um nyurub besh obi um douk

nuhut butogur. <sup>29</sup> Namudok aria eshesh shagipesh Jisas iri shabo baraen um shutorum utabor aria shunak shushopokabor bunak um esheshishi arpesh douk shape Judia iri. Eshesh ihishmorim atin atin shanaborubuk iri utabor douk shasiyabor um biyeh kabi shanaborubuk um aria wabrabor shaborubuk um enyudok mour. <sup>30</sup> Douk shatorum-abor aria shanak sheshopokabor um eshesh Iruhin ananish arpesh esheshim debeimi gani Jerusalem. Shako Barnabas aria Sol harabor hanak.

## 12

### *Herot Nabo Jems Nagok Aria Noweshik Pita Nape Shunuweshik-ati Urupat*

<sup>1</sup> Aria abudok nyutob anudok king Herot nape nenekesh enenyenen enesh Iruhin ananish arpesh. <sup>2</sup> Anan nakri aria habo Jon ananin wanin Jems harpogishan hakwu bainat aria nagok. <sup>3</sup> Douk natik um eshesh Juda shanadudareh um agundok nakri aria habo Jems nagok um, aria wata nakripesh shasuhw Pita showeshikan shopunek. Anan douk nenek enyudok abudok nyutob eshesh Juda shenek debeguni worigun aria shawok bret douk shashaiteh aria madae tukitak debeiti iri uwe. <sup>4</sup> Douk nasuwan jurug aria naweshikan nape shunuweshik-ati urupat. Aria nubatib lainab um amam soldia hape heyohan. Abudok nubatib lainab heyotu heyohan iri douk heyotu um nubatim nubatim. Herot nakri agundok debeguni Pasovaigun worigun nunak nubuhuk aria nuhut ta nurauri Pita agundok ihishmorim arpesh shapeum aria nunekuman baraen aria non nugok.

<sup>5</sup> Namudok aria Pita nape shunuweshik-ati iri urupat aria amam soldia hape heyohan. Aria eshesh Iruhin ananish arpesh douk shape aria dodogowish atish shape shenek beten sharig Iruhin um natauruman.

### *Ensel Nyataurum Pita Nakutukuk Shunuweshik-ati Iri Urupat*

<sup>6</sup> Herot nakri ruwahepih aria kadak nuran nutograri aduk um nunekuman baraen. Aria abudok wab, biom soldia heyotu wobuwobur aria Pita douk

huweshikan biyob senab neshuh orokohun. Anam kupaimi soldia douk heyohan heyotu wit um atudok shunuweshik iri sheshuh-atari urupat. <sup>7</sup> Aria ahudok atuh enen Debeini ananin ensel nyanaki nyeyotu agundok Pita neshuh um aria numunitum atudok shunuweshik-ati iri urupat gor atin nakusuk meyoh. Enyudok ensel nyeshudukesh Pita nakitak aria nyakri, “Kitak arigas.” Aria ahudok atuh senab batokweshihuk Pita ananis wis.

<sup>8</sup> Aria enyudok ensel nyakripan nyakri, “Gamo washok let tupe dodog aria hur nyakish sandelahos ba reyesh.”

Pita neshuhur neshur aria ensel wata nyakripan nyakri, “Hur nyakit saket reyot aria yowi nyugipeshe ba anak.” <sup>9</sup> Aria Pita nakutukuk shunuweshik-ati iri urupat nagipesh enyudok ensel nanak. Anan Pita douk madae nudukemesh um enyudok ensel nyeneken iri douk abom adurin atin abom um uwe, uwok. Anan nakri douk natik enesh eshudok meyoh kabi nabo yomnis natrish um. <sup>10</sup> Douk hanak heshagrakuk amudok heyohan heyotu harik iri soldia arigaha hanak heshagrakuk amudok anam heyotu hagiguk iri. Heshagrakuk amam aria hanak hatogurum atudok debeiti ainabit wit douk shejikat atin shawish abom um wabur Jerusalem um. Atudok wit atat meyoh tanajikumam meyoh aria hatogur aduk. Hatogur hape hagim anah yah hanak aria ahudok atuh enyudok ensel nyakutukuk Pita.

<sup>11</sup> Aria Pita douk nadukemesh um enyudok nyatogruman iri aria nakri, “Adur wo! Douk abom yadukemesh. Debeini neshopoki ananin ensel nyanaki nyataurume aria yaruwok um Herot ananis wis. Shopunek nyataurume yaruwokumaguk enenyenen amaen douk eshesh Juda shakri shunekenyume iri.”

<sup>12</sup> Douk nadukemesh um enyudok nyatogruman iri douk adurin aria nanak um Jon ananik amakek Maria okwokwit urupat. Anudok Jon kupainyi nyeigur douk Mak. Sabaishi arpesh shanaki shantorum shape atudok urupat aria shape shenek beten sharig Iruhin um nutaurum Pita. <sup>13</sup> Pita nanak nabo wit adukitum urupat aria Roda douk kwenek mour

meyoh um enesh iri kwakitak kwanakumori kutik omi nyeyotu aduk. <sup>14</sup> Douk kwomnek Pita anan mah kwadukemah aria kwanadudareh abom. Wit madae kwijikatuk uwe aria wata kwahur kwawish numun. Kwawish kwakripesh kwakri, “Pita nanudok neyotu aduk!”

<sup>15</sup> Aria shakripok shakri, “Nyak nyenek rohw.” Aria okwok dodogowik otuk kwakri, “Adur wo! Nani neyotu aduk.” Aria eshesh wata shakripok shakri, “Nyanyudok ananin ensel.”

<sup>16</sup> Aria Pita nape apa naguduk atudok wit. Douk shejikat shatrun aria shakitak yowiyokuk abom. <sup>17</sup> Aria naurumesh wis atus um nakri mare shiyagwreh, uwok. Aria nanak nakripesh um agundok Debeini natauruman nakutukuk shunuweshik-ati iri urupat natogrumori. Aria nakripeshuk nakri, “Pukrip Jems nini amudok anam ashukenyim warhim um enyudok nyatogrum eik iri.” Douk nakripeshuk namudok aria nakutukuk eshesh nanak kupagunum.

<sup>18</sup> Douk arigaha ruhur atin ruwahep aria amudok soldia madae hudukemesh abom um agundok Pita nanak mumam aria douk madae anan nupe um uwe. <sup>19</sup> Namudok aria Herot nakripesh shape shauriman abom. Shauriman aria madae shuparugan uwe. Namudok aria nenekumam kwotog amam soldia nakri um ta nom hugok. Douk enyudok nyanakuk aria Herot nakutukuk agudok shokugi nahobig Judia nanak nabuh nape anob nyutob abrudok wabur Sisaria.

### *Herot Nagok*

<sup>20</sup> Herot nabuh nape Sisaria aria juwehosin um arpeshep douk shape arbudok warub shahwarorub-um Taia aria Saidon iri. Namudok aria arbudok biarub warubish shanak shantorum atugun aria shanaki shatrun. Sagomatin sharik shani Blastus douk debeini um anan king neshuhom iri rum aria shabo baraen nyape atugun. Douk nakri wosik um nutaurumesh aria kadak shanaki shutik king Herot. Aria shakripanum shupe atugun, wanogwiruh uwok. Um maresh? Arpeshep shape abudok amnab nahobig iri, esheshgun worigun douk apa shanak

shape shanatorgun king Herot ananig nahobig.

<sup>21</sup> Aria anan king Herot nagraeh anah nyumnah. Arigaha douk ahudok nyumnah hanak hatograri aria nakitak nor eneh rupeh amam king atum hehur iri rupeh. Nenekeh douk aria nakih netem ananin debeinyi wagitur aria nape nakripesh enen baraen. <sup>22</sup> Douk armam armago shatik namudok aria shahwar shakri, “Anudok douk madae anan meyohin arman niyagwreh uwe, uwok. Anudok anan douk anan god!” <sup>23</sup> Aria ahudok atuh enen Debeini ananin ensel nyabo king Herot aria arugeh hapeyan. Um maresh? Anan Herot madae nukripeshudok armam armago um shutuk Iruhin ananin nyeigur nyuto iruhw uwe, uwok. Aria nape nanatrish shape shatuk ananin nyeigur atin nyato iruhw. Namudok aria eshuguh hwatograri gani numinum aria nagok.

<sup>24</sup> Aria Iruhin ananin baraen dodogowin atin nyanak sabaigunum, sabaishi arpeshep shemnek aria shenek bilip um Jisas.

<sup>25</sup> Barnabas nani Sol heyatok amamin mour Jerusalem aria wata hakutukuk agundok hanakum Antiok. Jon kupainyi nyeigur shahwaran um Mak iri shopunek haran nanamam hanak.

## 13

### *Iruhin Ananish Arpeshep Sheshopok Barnabas Nani Sol Hanak Sabaigunum Henek Iruhin Ananin Mour*

<sup>1</sup> Anam profet hani tisa omi douk hani eshesh Iruhin ananish arpeshep shape abrudok wabur Antiok. Amamish nyeiguhweshudok, Barnabas iri Simeon. Simeon ananin enyudok enen nyeigur douk Niger. Anan Lusius douk nanaki debeiburi wabur Sairini iri. Anan Manain. Anan douk anudok debeini um gavman iri Herot ananish amakenyish sharan nani eshesh nape iri. Aria anan douk Sol. <sup>2</sup> Anob nyutob aria eshesh shashakur um worigun aria shape shenek beten atin. Shenekesh namudok aria Iruhin ananin Mishin nyakripesh nyakri, “Pukwiraeh



Barnabas nini Sol um hunak hunek enyudok mour douk yahwaram um huneken iri.”<sup>3</sup> Namudok aria shashakur um worigun shape meyoh aria shape shenek beten sharig Iruhin um nutaurumam. Showemam wis aria sheshopokam hanak.

*Barnabas Nani Sol Hatogur Hakriפש Iruhin Ananin Baraen Enyudok Unai Nyeigurinyum Saiprus*

<sup>4</sup> Iruhin ananin Mishin nyohur Barnabas nani Sol aria nyeshopokam hanakum Selusia. Habuh agundok aria harao korohuk hanakum enyudok unai nyeigurinyum Saiprus.<sup>5</sup> Arigaha douk hanak hatogur Salamis aria hape hakriפש Iruhin ananin baraen gani numun eshesh Juda esheshig shape sheneyagwreh baraen-ogwi urusag. Jon Mak douk neiram um nutaurumam um mour.

<sup>6</sup> Hakitak hawish hanak ihirub warub enyudok unai aria hanak hatogur Pafos. Hatogur Pafos aria haparug anan arman shahwaran um Barjisas iri. Anan douk anan eshesh Juda esheshin nenek rohwumesh iri profet. Aria anan napeum nenek ouruh hani sabagwiruh iri.<sup>7</sup> Anudok arman Barjisas douk nani anan debeini um gavman um enyudok unai iri hape. Ananin nyeigur Sergius Paulus. Anan douk nadukem enenyenen iri. Aria narig Barnabas iri Sol um hunaki hutrun. Um maresh? Anan nakri numnek Iruhin ananin baraen.<sup>8</sup> Aria anudok arman Elimas nape natupok baraen. Anan douk anudok arman douk napeum nenek ouruh hani sabagwiruh iri. Aria shawanam ananin nyeigur um eshesh Grik esheshin baraen aria shahwaran Elimas. Elimas nakwiraeh um nakri nuwanamaguk Sergius Paulus um anan mare nusuhw Debeini ananin baraen nugipeshen, uwok.<sup>9</sup> Aria Sol, enyudok enen nyeigur shahwaran um Pol iri narao Iruhin ananin Mishin nyapenyan wosik abom aria natrun duk Elimas.<sup>10</sup> Aria nakripan nakri, “Satan ananin nuganin! Nyak nyenek horim abom um ihihumori yopihi aih. Aria shukninyum ihinyumori shenek rohwumesh-umeh iri aih hani ihihumori yoweih aih. Nyak nyape nyabirak um nyuwanam Iruhin ananin

adurin baraen um nyutogur rohwothwinyi. Aria nyak ta nyakri uwok um nyukutihukuk ehudok aih, uwok?<sup>11</sup> Aria mnek! Douk Debeini ta nen aria nyakis nabes ta sishuk. Nyumneh ta mare nyutrih aria ta nyupe namudok atin um eneh nyumneh.”

Pol nakripan namudok aria ahudok atuh enen enyudok kabi onog behrabigwi orug um gwabuhi goweshiguk ananis nabes. Aria nape narahaen nanak um nakri nuparug enen arpen um nyusuhw ananin rogur aria nyiyabigan yah.<sup>12</sup> Douk nape debeini um gavman um enyudok unai iri natik enyudok aria nenek bilip um Debeini. Anan nakitak yowiyokuk abom um Debeini ananin baraen douk Pol nani Barnabas heyagwrehen iri.

*Sol Nani Barnabas Hanak Henek Mour Wabur Antiok Douk Bape Agudok Shokugi Nahobig Shahwarag Um Pisidia*

<sup>13</sup> Pol nani amam heiran iri hakutukuk Pefos harao korohuk hanak hatogur wabur nyeiguriburum Perga. Abrudok wabur douk bape agudok shokugi nahobig Pamfilia. Aria Jon wata nakwutumuk natanamum Jerusalem.<sup>14</sup> Amam hakutukuk Perga aria hanak hatogur Antiok. Antiok douk bape agudok shokugi nahobig nyeigurigum Pisidia. Arigaha ahudok nyumnah Sabat douk eshesh Juda madae shunek mour ahi uwe hanak hatograri, aria hanak hawish hape atudok urupat douk eshesh Juda shape sheneyagwreh baraen-atari.<sup>15</sup> Hawish hape aria debeimori um atudok urupat iri hatarih Iruhin ananin lo seiwok nakoguk Moses enyi um jurug aria hatarih enen baraen shopunek douk seiwok amam profet henyemaguk iri. Douk hakriפש baraen um jurug aria henekumam baraen Pol nani Barnabas. Baraen enyudok. Hakri, “Ashukenyim, ipak enen baraen um pakri pukriפש um shupe dodogowish um, apak wosik makri punaki pukriפש douk.”

<sup>16</sup> Hemnek namudok aria Pol nakitak neyotu naurumesh wis aria nape nakriפש. Nakri, “Ipak Israel pani ipak ihipmorim kupaipari douk penek lotu um Iruhin iri, ipak punnek eikin

baraen. <sup>17</sup> Eshesh Israel shenek lotuman iri Iruhin nagraeh apakish yamehesh aria abudok nyutob shanak shape kupaishi esheshib amnab Isip obi nyutob, anan douk nenekesh shatogur sabaishi meyoh abom. Shape agundok arigaha anan douk dodogowin atun abom, aria naraesh shakutukuk Isip shanaki. <sup>18</sup> Shanaki shanak shape wehigunum arpesh uwok um aria anan nape nataurumesh. Eshesh shakana uwok um anan madae shumnek ananin baraen, aria anan nani eshesh nape nataurumesh um 40-poreish kwarahos. <sup>19</sup> Nanunu 7-poreis debeisi awiros um arpesh abudok amnab Kenan aria nekesh amnab ananish arpesh eshesh Israel shagremab. <sup>20</sup> Enyudok ihinyumolim douk nyatogur atin hurukatin um sabaishi 450-poreish kwarahos. Enyudok nyanakuk aria nenekumesh debeimi armam jas um heyohesh iri. Debeimi heyohesh arigaha anudok profet Samuel natogur.

<sup>21</sup> Aria abudok nyutob shakrip Samuel um nunekumesh anan king obi nyutob, Iruhin nagraehumesh Kis ananin nuganin shahwaran um Sol iri natogur esheshin king. Nape king um 40-poreish kwarahos. Anudok arman king Sol douk nakitak opudok Benjamin ananip awirop. <sup>22</sup> Aria Iruhin neyatakuk Sol aria nenek Devit nape esheshin king. Baraen Iruhin nakrip arpesh um shudukem Devit um douk enyudok. Nakri, 'Eik yaparug Jesi ananin nuganin Devit. Eik urkum manawashaman aria anan ta nunek ihinyumolim mour douk eik ikripanum nuneken iri.' <sup>23</sup> Aria Iruhin nenek enyudok mour nyatogur kabi seiwok nakri adurin atinyi baraen um ta nuneken nyutogur iri. Agundok atap Devit ananip awirop panak arigaha Iruhin nagraeh Jisas um nurao apak arpesh mutanamum Iruhin aria mupe wosik. Nagraehan aria neshopokan nanakumolim Israel.

<sup>24</sup> Jisas wata nutogur uwe aria Jon nenek baptaisumesh iri nape nakripesh baraen ihishmorim eshesh Israel. Nakripesh um shukeshuguk agabus yoweishi inahos, shatanam shukon aparuh Iruhin aria shunek baptais. <sup>25</sup> Jon

hurukatin um niyatok ananin mour aria nakripesh nakri, 'Ipak pakana eik amiapen? Eik madae anudok arman douk pape patrugun uman ta nutograri iri uwe, uwok. Aria mnek! Arman pape patrugun-uman iri ta eik iyatok eikin mour um jurug, aria anan ta kadak nutogur. Aria eik douk madae debeiwe iri um ikweshih madururuh ananiyu su uwe, uwok. Anan douk debeini arman abom.' "

<sup>26</sup> Pol baraen apa nape nakripesh nakri, "Ipak Israel eikip ashukenyim owarhim douk Abraham nahwarepum yamehem iri pani kupaipari penek lotu um Iruhin iri, enyudok baraen um Iruhin nurap mutanamori mupe wosik um douk neneken nyanakumolim apak ihipmorim. <sup>27</sup> Shape Jerusalem iri armam armago shani esheshim debeimi madae shudukemesh um anan douk nunakumolim nutaurumesh aria wata nuraesh iri uwe, uwok. Esheship urkwip madae gamo purumen wosik uwe enyudok baraen seiwok amam profet henyemaguk aria shape shatarihen ihih nyumneh Sabat douk eshesh Juda mour uwok shape meyoh ehi. Aria shenek amamin baraen nyatogur adurin um shabo Jisas nagok um. <sup>28</sup> Madae shuparug enesh yoweishi inahos uwe douk nenekesh um ta shon nugokumesh, uwok. Aria sharig Pailat um non nugok. <sup>29</sup> Douk shenek enenyenen mour riguk amam profet henyemaguk Iruhin ananik Buk iri baraen nyakrium ta shuneken-uman iri um jurug, aria shabrean-ari rowog kruse shanak sharuman onohw wonugwehw. <sup>30</sup> Aria Iruhin wata norukwan yapis aria wata nakitaki. <sup>31</sup> Aria sabaihi nyumneh natogurum amam armam douk hapei Galili heiran hanakum Jerusalem iri. Natogrumam aria hatrun. Aria douk amudok armam douk hape hakripap ananin baraen apak Israel.

<sup>32</sup> Aria ohwak douk enyudok wanakumolim wakripep enyudok yopinyi baraen. Baraen enyudok. Enyudok mour seiwok Iruhin nakripesh enen adurin atinyi baraen apakish yamehesh um ta nuneken-umesh iri douk enyudok <sup>33</sup> neneken um nutaurum apak esheshish batowish. Um agundok Jisas nagok aria

wata nonohur nakitaki um. Baraen nyetem Iruhin ananik Buk Song iri douk nyetem namba 2 Song. Baraen enyudok, 'Nyak eikin Nuganin. Doukih eik yatogur jurug nyakin Yain.'

<sup>34</sup> "Baraen douk Iruhin nakriyen um ta nuhur Jisas nukitaki aria mare nutar abom um douk enyudok. Nakri,

'Eik ta ikep enesh yopiyopishi abom eshudok kabi riguk yakripan adurin atinyi baraen Devit um ta ikenyesh iri.

Aria eshudok adur ta shutogur kabi eik yakri adurin atinyi baraen um.'

<sup>35</sup> Namudok aria enen baraen shopunek nyetem Buk Song iri nyakri namudok. Nyakri,

'Nyak ta mare nyunek nyakin yopuni arman nasuhw nyakin mour iri nugok nutaraguk abom uwe, uwok.'

<sup>36</sup> "Apak ihishmorim douk madukemesh. King Devit napeyehi nyumneh, anan douk nagipesh Iruhin nakri-enyi atin aria nagok. Nagok douk sharuman hurukatin um sharom ananim yamehem um aria natar. <sup>37</sup> Aria anudok arman douk nagok aria Iruhin wata nonohur nakitaki douk madae nutar uwe. <sup>38</sup> Namudok aria ashukenyim owarhim, ohwak wakri ipak ihishmorim gamo pudukemesh. Ohwak wakripep baraen namudok. Wakri anudok arman Jisas ta wosik nutaurumep nuneguk ipakish debeishi shokwish penekesh iri yoweishi inahos. <sup>39</sup> Lo seiwok Iruhin nakoguk Moses enyi ta mare nyuneguk ipakish yoweishi aria Iruhin nutrip nuhwarep yopishi arpes, uwok. Aria ihishmorim arpes shenek bilip um anudok arman Jisas iri, Iruhin douk nahwaresh yopishi arpes. <sup>40</sup> Aria ipak gamo pudukemesh um enyudok seiwok amam profet hakriyenjuk iri um mare nyutogrumep, uwok. Baraen enyudok. Hakri,

<sup>41</sup> 'Ipak peyagwreh enenyenen yoweinyi um Iruhin ananin baraen iri, ipak putrugun pugugak pupe aria pugok!

Eik yenek enen mour ahudok nyumneh um ipak papeyeh iri.

Aria enen arpen nyukri nyukripep um enyudok mour douk eik ta ineken iri, aria ipak ta mare pukri adurin, uwok.' "

<sup>42</sup> Pol nani Barnabas hakutukuk atudok urupat hape hatogur aduk aria eshesh armam armago shakripam um wata hunaki ahudok anah nyumnah Sabat douk eshesh Juda shape meyoh ahi aria gamo hukriפש enyudok atin baraen. <sup>43</sup> Douk shakutukuk urupat shatogur aduk aria sabaishi Juda shani kupaishi iri armam armago douk shagipesh eshesh Juda shenek lotu iri, shani Pol nani Barnabas shanak. Shanak aria amam gamo hakriפש baraen um hakri huhur esheshiruh aparuh aria shupe dodogowish atish um agundok Iruhin nape nataurumap meyoh um.

<sup>44</sup> Douk arigaha ahudok anah nyumnah eshesh Juda mour uwok shupe meyoh ahi hanak hatograri, aria hurukatin um ihishmorim arpes shape abrudok wabur iri shanakumori shumnek Debeini ananin baraen. <sup>45</sup> Aria eshesh Juda shatik sabaishi armam armago shanaki shantorum aria shenek nyigiya. Esheshiruh aparuh yoweruh abom aria shape shakri uwok um Pol nakriפש-enyi baraen shenekan enenyenen.

<sup>46</sup> Shenekesh namudok, aria Pol nani Barnabas dodogowim atum heyagwreh baraen aria hakriפש hakri, "Douk adur. Enyudok Iruhin ananin baraen ta urik ukrip ipak Juda purik. Aria pekenyuk agabus aria namudok douk ipak meyoh pakri ipak madae yopipari um pupe wosik abom ihih nyumneh uwe, uwok. Namudok aria douk ta ukutipukuk unak um kupaishi douk eshesh madae Juda iri uwe aria ukriפש. <sup>47</sup> Um maresh? Debeini douk nakriפש dodogowinyi baraen namudok, nakri,

'Eik yenek ipak jurug pape kabi enen lam um, um kupaishi arpes ta shunatrugun um.

Um putaurum ihirub warubishi arpes shape agundok atap iri,

aria Iruhin wata nuraesh shutanamori shupe wosik abom.' "

<sup>48</sup> Kupaishi arpeshe douk eshesh madae Juda iri uwe shemnek enyudok baraeen aria shanadudareh. Shakri Debeini ananin baraeen yopinyi abom. Aria eshudok ihishmorim douk Iruhin nagraehesh jurug um shupe wosik abom ihih nyumneh iri douk shasuhw ananin baraeen dodog shagipeshen.

<sup>49</sup> Aria Debeini ananin baraeen nyanak ihirub warub bape agudok shokugi nahobig Pisidia iri. <sup>50</sup> Aria eshesh Juda shahur ono nyeiguhw shato iruhw iri owi armago douk wenek lotu um Iruhin iri wani debeimi um abrudok wabur iri aria juwehosish um Pol nani Barnabas. Shape shenekam enenyenen aria sheneyagwreh dodog um hukutukuk esheshib amnab ba hanak. <sup>51</sup> Hakitak um hunak aria hagudupeshuk nyupruk amamiruh yeriweruh kwakusuk abrudok wabur Antiok aria hanak um Aikoniam. Hagudupeshuk nyupruk um eshesh shutik aria shudukemesh um eshesh douk baraeen nyapenyesh um ehudok eshesh shenekeh iri aih. <sup>52</sup> Amam hanakuk, aria eshesh Antiok shagipesh Jisas iri douk sharao Iruhin ananin Mishin nyapenyesh wosik abom aria shanadudareh shariguk.

## 14

### *Pol Nani Barnabas Henek Mour Aikoniam*

<sup>1</sup> Hanak hatogur Aikoniam aria henekesh namudok atin kabi hanak kupairubi warub um. Hanak hawish eshesh Juda shape sheneyagwreh baraeen atari urupat aria hape hakripesh Debeini ananin baraeen. Hakripesh baraeen wosik douk sabaishi Juda shani eshesh Grik shemneken aria shenek bilip um Jisas. <sup>2</sup> Aria eshesh Juda douk shakri uwok um shunek bilip iri juwehosish um eshesh Kristen aria sheshuhuri shenekesh juwehosish um kupaishi douk eshesh madae Juda iri uwe. Aria esheshiruh aparuh douk madae hur wosik um eshesh shugipesh Jisas iri uwe, uwok. <sup>3</sup> Aria Pol nani Barnabas hape

roubi nyutob abrudok wabur Aikoniam. Hape aria dodogowim atum hakripesh Debeini ananin baraeen. Aria Debeini nomuhur henek enenyenen Iruhin atun neneken iri mour. Heneken namudok aria Debeini neyabig arpeshe aria shadukemesh shakri baraeen hakripeshenyi um agundok Iruhin nutaurumesh meyoh um douk adurin atin. <sup>4</sup> Aria eshudok sabaishi arpeshe shape abrudok wabur iri shakitak shanosiyam. Wobresh shaniguk amam aposel aria wobresh shaniguk eshesh Juda sik. <sup>5</sup> Namudok aria kupaishi arpeshe shani eshesh Juda shani ihim-morim esheshim debeimi shakitak shakri shunekam enenyenen amam biom aposel. Shakri shukwumam utabor shom hugok. <sup>6</sup> Douk hemnek um enyudok aria hakitak haruwok hanak. Hanak um biarub debeirubi warub shahwararub um Listra aria Derbe bani anarub bape iri hurukatin iri douk bape agundok shokugi nahobig Likonia iri. <sup>7</sup> Hanak aria hape hakripesh Iruhin ananin yopinyi baraeen agundok.

### *Pol Nani Barnabas Henek Mour Listra*

<sup>8</sup> Anan arman aiyas yowegas aria madae nurahaen atin iri uwe douk nape abrudok wabur Listra. Watak nor apahw obi nyutob aiyas yowegas aria amakek douk kwanabuki. Anan madae nurahaen atin uwe, uwok. <sup>9</sup> Aria anan douk nape nemnek Pol um nape nakripesh baraeen um. Pol natrun duk anudok arman aria natik um anan nenek bilip nakri Jisas ta nugabeyan. <sup>10</sup> Aria nakripan debeg nakri, "Kakitak yetu iruhw!" Aria anudok arman naprok nato nakitak neyotu iruhw aria nape nanarahaen nanak.

<sup>11</sup> Douk sabaishi armam armago shatik enyudok Pol neneken iri aria shape shahwar um esheshin ganiganigin baraeen douk sheyagwrehen agudok shokugi nahobig Likonia iri aria shahwar shakri, "Amam godomi douk hanakumori armam aria amudok habuhumap iri!" <sup>12</sup> Barnabas douk shahwaran anudok god Sus. Aria Pol douk neyagwreh baraeen iri, namudok aria shahwaran

14:12 **14:12** Eshesh Grik apa shakri sabaimi godomi hape. Shakri anudok god Sus, shakri anan douk debeini abom um ihim-morim esheshim godomi. Aria anudok anan god Hermes, ananin mour douk shakri narahem baraeen.

Hermes.14:12 <sup>13</sup> Atudok debeiti urupat shenek lotu um anudok god Sus atari douk tatao adukehah um abrudok wabur. Aria anan pris douk apa nenek ofa um eshudok nako Sus iri nanak nauri enesh ababish bulmakauhos shani aruruhish douk shagrugeshi madururuh iri. Naraesh nanakumori atudok debeiti wit douk shawish abrudok wabur um. Um maresh? Anudok pris nani eshudok sabaishi arpesch shakri shunek ofa um eshudok bulmakauhos shuko Pol nani Barnabas.

<sup>14</sup> Douk Pol nani Barnabas hemnek um enyudok shakri shuneken-umam iri aria hakri uwok abom aria hawor amamih rupeh. Aria hahur hanak hawish agundok eshudok sabaishi arpesch sheyotum aria hahwar hakri, <sup>15</sup> "Ohwakishi arpesch, ipak peneken um enyudok mugu? Ohwak douk armam meyoh kabi ipak um! Ohwak wanakumori ukripep Iruhin ananin yopinyi baraen um pukutukuk ehudokmori rohwi aih. Um agundok penek lotu um madae adurimi godomi um aria putanamum anudok adurin Iruhin douk nape ihih nyumneh iri. Anan douk nenek iruhw heven bani agundok atap aria youg aria nenek ihishmorim eneshenesh shape-nyogun iri. <sup>16</sup> Adur seiwokib nyutob, anan douk nape nanatrish meyoh ihishmorim awirosish arpesch aria shagipesh eneyenen eshesh kanak shakri shuneken iri. <sup>17</sup> Aria anan douk madae nunobeshuk-umep uwe, uwok. Anan apa nenekumep yopihi aih. Napei iruhw heven aria nenek eshah horumepari. Nenek worigun natogrump sabaiguni um yopubi nyutob. Nekep worigun natogrump aria nenekep panadudareh pariguk." <sup>18</sup> Hakripesh enyudok baraen eshudok sabaishi arpesch aria madae shumneken uwe. Aria henek debeinyi mour um hakri mare shunek ofa um eshudok bulmakauhos shuko amam, uwok.

### *Shakwuman Utabor Pol*

<sup>19</sup> Aria eshesh Juda douk shapei arbudok biarub warub Antiok bani Aikoniam iri shanakumori Listra. Shanaki shagiyagiman meyoh um esheship urkwip um enen rohwin baraen um sabaishi

abrudok waburishi arpesch aria shemneken shakri adur. Namudok aria shakwuman utabor Pol shanukan shatogur adukehahum abrudok wabur. Eshesh shakri nagok jurug. <sup>20</sup> Aria abudok nyutob eshesh shagipesh Jisas iri shanaki sheyotu sheyar-sharihan obi nyutob, anan wata nakitak aria nawish abrudok wabur. Ruwahepih aria nani Barnabas hanak um Derbe.

### *Pol Nani Barnabas Harahe Hanak Hakripeshuk Baraen Eshesh Shagipesh Jisas Iri Um Shupe Dodog Um Bilip*

<sup>21</sup> Hanak hatogur Derbe aria hape hakripesh Iruhin ananin yopinyi baraen agundok. Aria henek sabaishi arpesch shagipesh Jisas. Aria wata hatanamum Listra. Hatogur Listra aria hanak um Aikoniam. Hanak hatogur Aikoniam aria wata hatanamum Antiok douk bape agudok shokugi nahobig Pisidia iri. <sup>22</sup> Hanaki arbudok warub aria dodogowim atum hape hakripeshuk baraen eshesh shagipesh Jisas iri um agundok shunek bilip dodogowish atish um. Hakripeshuk hakri, "Apak makri muwish agundok Iruhin nape Debeini um ananish arpesch um, aria sagomatin apak ta muwish um sabainyi amaen." <sup>23</sup> Hatanam hanaki obi nyutob, ihirub warub Iruhin ananish arpesch shapenyarub iri douk hagraeh-umeshuk armam sisigum atin um heyoh eshesh Kristen iri. Hakri uwok um worigun aria henek betenureshuk. Henek beten hakrip Debeini shenek bilipman iri um nutaurumesh aria shur ananis atus wis.

<sup>24</sup> Hawish hanak heyatak warub agudok anag shokugi nahobig Pisidia um jurug, aria hanak hatogur agudok anag shokugi nahobig nyeigurigum Pamfilia. <sup>25</sup> Aria hakripesh baraen anabur wabur nyeiguriburum Perga. Hakripeshuk agundok aria habuhum Atalia.

<sup>26</sup> Hanak habuh abrudok wabur aria harao onok korohuk hatanamum Antiok. Hatanamum abrudok wabur douk riguk eshesh Iruhin ananishi arpesch shenek beten sharig Iruhin um nutaurumam meyoh, hur ananis wis atus aria hunek enyudok mour um. Aria douk enyudok heneken heyaten aria wata

hatanamori. <sup>27</sup> Hanak hatograri Antiok aria henekumesh barae ihishmorim Iruhin ananish arpes shanaki shantorum aria hakripesh um ihinyumori mour douk Iruhin nataurumam aria nohur amamish roguhweneneken iri. Aria shopunek hakripesh um agundok Iruhin neyabigesh yah kupaishi douk eshesh madae Juda iri uwe um shunek bilip um Jisas um. <sup>28</sup> Aria hani eshesh shagipesh Jisas iri hape roubi nyutob agundok.

## 15

### *Debeimi Hantorum Hape Jerusalem Heyagwreh Baraen*

<sup>1</sup> Anam armam hape agudok shokugi nahobig Judia aria hanakumori Antiok. Hanaki aria hape hakripesh eshesh Kristen hakri, "Aria ipak mare putah yegeshiweruh kabi Moses nakripeshuk-enyi lo nyakri um, Iruhin ta mare nuraep putanamori pupe wosik abom, uwok."

<sup>2</sup> Hakripesh namudok aria Pol nani Barnabas hani amam hanatutukem aria hani amam hanitok debeinyi barae. Namudok aria eshesh Iruhin ananish arpes shagraeh Barnabas aria Pol hani anam abrudok waburimi Kristen shopunek um hunak um Jerusalem. Hunak um huni amam aposel aria eshesh Kristen esheshim debeimi hiyagwreh um enyudok barae.

<sup>3</sup> Shagraeham aria sheshopokam hanak. Aria abudok nyutob hawish hanak agusudok shokugosi nahobigos Fonisia iri Samaria obi nyutob, amam douk hape hakripaguk eshesh Kristen um agundok kupaishi douk eshesh madae Juda iri uwe shatanam shakon aparuh Iruhin um. Ihishmorim Kristen shemnek enyudok barae aria shanadudareh shariguk.

<sup>4</sup> Hanak arigaha hanak hatogur Jerusalem aria Iruhin ananish arpes shani esheshim debeimi shani amam aposel shanaki shakam roguhweneneken shanadudarepam. Aria hakripesh um enenyenen mour douk Iruhin nohur amamis wis neneken nyatogur iri.

<sup>5</sup> Aria enesh shenek bilip aria douk shaniguk amam Farisi sik iri shakitak

sheyotu aria shakri, "Eshudok kupaishi arpes douk eshesh madae Juda iri uwe, ipak ta putah esheshiruh yegeshiweruh aria pukripesh um shugipesh lo seiwok Iruhin nakoguk Moses enyi."

<sup>6</sup> Namudok aria amam aposel hani eshesh Kristen esheshim debeimi hantorum hape aria hape heyagwreh um hugapesh enyudok barae. <sup>7</sup> Douk heyagwreh rounyi barae um jurug aria Pita nakitak neyotu nakri, "Eikim ashukenyim owarhim, ipak douk padukemesh. Riguk sagomatin douk mape aria Iruhin nakop mour. Aria eik douk neke enyudok mour um ikrip kupaishi ananin yopinyi barae um shumneken aria shunek bilip um anan. <sup>8</sup> Aria Iruhin douk nadukem ihishmorim arpes um apakip urkwip iri douk neyabig apak Juda abom um agundok anan urkum manawasham kupaishi arpes um. Neyabigap um agundok nekesh ananin Mishin kabi riguk nako apak um. <sup>9</sup> Kupaishi douk madae nukesh anah yah aria apak Juda nukop anah kupaihi uwe, uwok. Eshesh shenek bilipuman. Douk namudok aria nagabeyeshuk um eneshenesh shapenyesh iri yoweishi nenekesh abom shatogur yopish. <sup>10</sup> Namudok aria douk ipak pakri pukwiraeh Iruhin um maresh? Um agundok pakri puwemesh amaen eshesh shagipesh Jisas iri um. Enyudok amaen um mugipesh lo um, apakish yamehesh shani apak douk mabirak um munyusah mabirak matik uwok. <sup>11</sup> Aria apak menek bilip makri Jisas nataurumop meyoh aria Iruhin ta wata nurap mutanamori mupe wosik. Nurap kabi narik narao eshesh kupaishi arpes um."

<sup>12</sup> Pita neyagwreh um jurug aria ihishmorim sheneyagwreh. Sheneyagwreh aria shape shemnek Barnabas nani Pol heyagwreh barae. Hakripesh um enenyenen debeinyi mour douk Iruhin nataurumam nohur amamis wis neneken nyatogur aria kupaishi shatrin iri.

<sup>13</sup> Douk heyagwreh um jurug aria Jems nakitak neyagwreh nakri, "Eikishi arpes, ipak pumnek eikin barae!"

<sup>14</sup> Saimon douk nakripesh um agundok sagomatin Iruhin urkum manawasham

kupaishi douk eshesh madae Juda iri uwe, aria nagraeh enesh um shupe ananish abom um. <sup>15</sup> Amam profet amamin baraan douk nyatogur adurin nyagipesh enyudok baraan douk Pita nakripap-enyi. Baraan enyudok. Iruhin nakri, <sup>16</sup> ‘Kweipon eik ta wata itanamori, aria atudok Devit ananit tetu iri urupat ta wata itahur irokat. <sup>15:16</sup> Eneshenesh sharok urupat um douk yowesh

aria ta wata itahur irokat.

<sup>17</sup> Eik inekesh namudok um ihishmorim arpesh douk

eshesh madae Juda iri uwe ta shupe shurim Debeini.

Ihishmorim douk eik yanagraehesh um shupe eikish iri.’

<sup>18</sup> Seiwok Debeini nakriyuk enyudok baraan aria douk shopunek douk nakriyen.”

<sup>19</sup> Jems wata nakri, “Eik yakri namudok. Yakri eshudok kupaishi douk shemnek Iruhin ananin baraan aria shape shatanam shakon aparuh anan iri, yakri apak Juda mare mukesh debeinyi mour um shugipesh apakin lo, uwok.

<sup>20</sup> Aria munek anap shup punakumesh aria mukriyesh um mare shuwok worigun mahish douk shenek ofamesh shako rohwiwi godomi iri. Mukriyesh um mare shonukesh armam armago shenek wehrur meyoh um. Mukriyesh um mare shuwok mahish douk arpesh shukwunishesh aruhwiguhw meyoh shugok shutahesh iri. Aria shopunek mukriyesh um mare shuwok owishibor, uwok. <sup>21</sup> Apak douk madukemesh. Seiwok arigaha douk enyudok lo seiwok Iruhin nakoguk Moses enyi douk shape shatarihen urusag apak Juda mape meyagwreh baraan-ogwi um ihih nyumneh Sabat. Aria enyudok baraan douk shakriyeshen ihirub debeirubi warub.”

*Shenek Shup Panak um Kupaishi Kristen Douk Eshesh Madae Juda Iri Uwe*

<sup>22</sup> Namudok aria amam aposel hani ihishmorim Iruhin ananish arpesh shani

esheshim debeimi shabo baraan aria shakri shugraeh anam armam um eshesh kanak um hunak huni Pol iri Barnabas hunam Antiok. Aria shagraeh Judas douk nanahwar enyudok enen nyeigur Barsabas iri nani Sailas. Amudok biom armam, amam douk heyotu harik um eshesh Kristen iri. <sup>23</sup> Shagraeham aria shakam opudok shup hasuwop hanak. Baraan nyetem shup iri nyakri namudok. Nyakri,

Apak aposel mani eshesh Kristen esheshim debeimi douk ipak pohwarapum ashukenyim iri menekumep-ogu opudok shup ipak apakim ashukenyim douk ipak madae Juda iri uwe.

Apak makri yopuhi nyumnah um ipak ihipmorim pape abrudok wabur Antiok iri pani ipak douk pape agusudok biogos shokugosi nahobigos Siria iri Silisia.

<sup>24</sup> Apak memnek um agundok anam apakim hagipesh Kraiss iri hanaku hakriyep enen rohwin baraan henekep pakitak yowiyokuk aria aparuh yoweruh um. Apak madae mukriyesh um hunaku hunek enyudok uwe, uwok.

<sup>25</sup> Memnek namudok aria mantorum mape atugun aria ihishmorim mabo baraan makri wosik um mugraeh anam armam um huraumep-ogu baraan iri. Hunigu apakim arpeshim Barnabas iri Pol hunaku. Apak douk urkwip panawashamam abom iri. <sup>26</sup> Amudok biom douk madae hunogugur atin um agundok henek apakin Debeini Jisas Kraiss ananin mour aria arpesh shom hugok um uwe, uwok. <sup>27</sup> Namudok aria moshopoku Sailas iri Judas hanaku. Amam ta wata hukriyep nukwatog meyoh enyudok atin baraan douk menyemagu shup iri. <sup>28</sup> Iruhin ananin Mishin nyani apak mape aria mabo baraan makri wosik um mare wata muwemep anab bugob, uwok. Aria apak makri enyudokmori mare wata puneken, uwok. Enyudokmori.

<sup>29</sup> Mare puwok worigunish mahish

<sup>15:16</sup> <sup>15:16</sup> Enyudok baraan madae nyukri um adurit urupat uwe, uwok. Enyen douk nyakrium Devit ananip awirop. Eshesh douk shakutukuk Iruhin ananin baraan aria nyeigur nyabuhuk um shupe debeishi um.

douk shenek ofamesh shako rohwimi god omi um, mare puwok owishibor, mare puwok mahish douk shakwunishesh aruhwiguhw meyoh shagok shatahesh iri, mare shenek wehrur meyoh um. Ipak pugipesh ehudokmori aih um douk ta punek yopinyi. Baraen enyudok atin.

Yopuhi nyumnah ipak.

<sup>30</sup> Shenek shup shakomap hasuop aria sheshopokam hanakum Antiok. Hanak hatogur aria hahwar ihishmorim Iruhin ananish arpesch shanaki shantorum aria hekesch shup. <sup>31</sup> Douk shatarih baraen sheyaten aria shanadudareh abom. Um maresh? Enyen douk yopinyi um nyutaurumesh shupe dodogowish um bilip aria esheshiruh aparuh yopuruh. <sup>32</sup> Judas nani Sailas amam kanak douk hatogur profet. Aria roubum nyutob hape hakripesh sabainyi yopinyi baraen eshesh shagipesh Kraish iri aria shatogur dodogowish um bilip. <sup>33</sup> Douk hape anob nyutob Antiok um jurug aria eshesh Kristen shenekumam yopihi nyumneh aria wata sheshopokam hatanam hanak um eshudok douk sheshopokam hanaki iri. <sup>34</sup> [Aria Sailas wata shopunek nakri nupeik Antiok.] <sup>35</sup> Aria Barnabas iri Pol douk hape Antiok. Hani sabaishi shape shenek mour um shakrip eshesh shape Antiok iri Kristen um Iruhin ananin baraen shakripesh aria shenek skulumesh um shudukemen wosik.

#### *Pol Nani Barnabas Hanadi-yogurum*

<sup>36</sup> Anah nyumneh hanak hadiguk aria Pol nakrip Barnabas nakri, "Wata utanam um ihirubmorim debeirubi warub douk riguk wanak wakripeshuk Debeini ananin baraen arub iri. Unak aria utik ohwakish arpesch eshesh Kristen, um eshesh ta shape wosik um esheshin bilip aka, mumam." <sup>37</sup> Barnabas nemnek namudok aria nakri Jon Mak shopunek nini amam hunak. <sup>38</sup> Aria Pol nakri uwok um huran hunak um. Um maresh, riguk haran hanak aria madae nini amam hupe arigaha mour nyutuh aria hutanamori uwe, uwok. Aria nakutumuk agudok shokugi nahobig Pamfilia aria

natanamori. <sup>39</sup> Douk hanitok arigaha aria hanasiyam. Barnabas narao Mak harao korohuk hanak um enyudok unai Saiprus. <sup>40</sup> Aria Pol nagraeh Sailas nani anan hanak. Hanak aria eshesh Kristen shakripam shakri, "Wosik, Iruhin ta nupe um nutaurumep meyoh." <sup>41</sup> Hawish hanak agusudok shokugosi nahobigos Siria aria Silisia aria Pol nape nakripaguk Iruhin ananish arpesch anan Iruhin ananin baraen um shupe dodogowish um bilip.

## 16

### *Timoti Nani Sailas Aria Pol Hanak Henek Mour*

<sup>1</sup> Pol nani Sailas hanak arigaha hanak hatogur Derbe aria hakutukuk Derbe hanak hatogur Listra. Hatogur aria haparug anan nagipesh Kraish iri arman shahwaran um Timoti iri nape agundok. Ananik amakek douk onok Juda aria shopunek kwonek bilip um Kraish. Aria ananin yaken douk anan um eshesh Grik. <sup>2</sup> Aria eshesh Kristen shape Listra bani Aikoniam iri shakri Timoti anan douk yopuni arman abom. <sup>3</sup> Anan Pol nakri nuran nini anan hunak. Namudok aria natah ananishw yegenyihw. Natah ananishw yegenyihw um maresh, ihishmorim Juda shape arbudok warub iri shadukemesh um ananin yaken douk anan um eshesh Grik. <sup>4</sup> Aria hawish hanak warub hape hakripaguk Iruhin ananish arpesch um enyudok baraen douk amam aposel hani eshesh Kristen esheshim debeimi heneken Jerusalem iri. Aria hakripeshuk um shugipeshen. <sup>5</sup> Namudok aria Iruhin ananish arpesch shape ihirub warub iri shatogur dodogowish atish um bilip. Ihih nyumneh sabaishi arpesch shawishum eshesh Iruhin ananish arpesch aria shatogur sabaishi abom.

### *Pol Nape Troas Aria Natik Enesh Eshudok Kabi Nabo Yomnis Natrish Um*

<sup>6</sup> Hanak aria Iruhin ananin Mishin madae nyukri wosik um hukripesh baraen um agudok shokugi nahobig Esia uwe, uwok. Namudok aria hawish hanak agusudok biogos shokugosi nahobigos,



Frigia iri Galesia. <sup>7</sup> Hanak arigaha hanak hatogur Misia aria hakri um huwish agudok anag shokugi nahobig Bitinia. Aria Jisas ananin Mishin madae nyukri wosik um hunak huwish uwe, uwok. <sup>8</sup> Namudok aria hawish hanak orokohunig um agudok shokugi nahobig Misia arigaha hanak habuh anabur wabur nyeiguriburum Troas. <sup>9</sup> Aria abudok wab Pol natik enesh eshudok kabi nabo anas yomnis natrish um. Aria natik anan arman nape agudok shokugi nahobig Masedonia iri neyotu aria nahwar dodog napeum Pol nakri, “Yowi nyutaurumap agundok Masedonia.” <sup>10</sup> Douk Pol natik enyudok jurug, aria arigas apak maurim yah um munak um Masedonia. **16:10** Munak um maresh, madukemesh makri Iruhin neyabigap um munak mukriפש ananin yopinyi barae ganudok.

### *Lidia Kwatogur Kristen*

<sup>11</sup> Namudok aria mato korohuk kwakutuk Troas kwahur kwabrig youg kwanakum enen unai nyeigurinyum Samotres. Aria ruwahepih kwahur kwanakum Neapolis. <sup>12</sup> Korohuk kwopunik aria manak atapih arigaha manak matogur Filipai. Abrudok wabur Filipai douk sagom-atinyum debeiburi wabur um agudok shokugi nahobig Masedonia. Ababur douk eshesh Rom shanaki sharkogwabur shapenyabur iri. Matogur abrudok wabur aria mape eneh nyumneh.

<sup>13</sup> Aria ahudok nyumnah Sabat douk eshesh Juda mour uwok shape meyoh ahi hanak hatograri, aria manak matogur adukehah-iburum abrudok wabur. Matogur manak um anab worub. Apak makri anagasib um abudok worub, makri onok outuk ta kwape douk enesh Juda shanak shape shenek beten um. Manak matogur matik ono armago wanaki wantorum wape aria mani owo mape meygwreh barae. <sup>14</sup> Onok armatok kwani owo wape wemnekap um meygwreh iri douk Lidia. Okwok

kwanaki debeiburi wabur Taiataira aria kwape um kwenek enen mour bisnis um owishiborihi rupeh iri. Okwok douk shopunek kwenek lotu um Iruhin iri aria Debeini nabadig okwokwih apahw gamo kwabuk arigos um Pol neyagwrehen iri barae. <sup>15</sup> Douk kwomnek barae aria kwani ihishmorim shape okwokwit urupat iri shenek baptais. Douk kwenek baptais worub jurug aria kwakripap kwakri, “Ipak pakri eik yenek bilip um Debeini abom um, yowi puname mupe eikit urupat.” Okwok dodogowik otuk aria magipesh okwokwin barae.

### *Showeshik Pol Iri Sailas Hape Filipai*

<sup>16</sup> Aria anah nyumnah manak um okwudok outuk um munek beten aria onok armatok kwaparugap yah. Okwok douk anam hatoruk um kwunekumam mour meyoh iri. Enen sagab nyapenyok aria nyape nyakuhur kwakrip arpes um enenyenen ta nyutogrumesh iri. Namudok aria kwape kwatorumesh debeibori utabor eshesh douk shanatoruk iri. Um agundok kwakrip arpes um enenyenen ta nyutogrumesh iri um. <sup>17</sup> Okwudok armatok kwagipesh Pol nani apak aria kwape kwahwar debeg kwakri namudok kwakri, “Amudok armam douk henek mour um dodogowini Iruhin abom nabouk ihishmorim yoweishi eshudok eneshenesh shabuhuk iri. Amam douk hape hakriפש um ahudok yah um Iruhin wata nuraep putanamori pupe wosik abom um!” <sup>18</sup> Kwenekesh namudok um sabaihi nyumneh arigaha kwenek Pol arigehin umok. Arigaha anah nyumnah natanam nakrip enyudok nyapenyok iri sagab nakri, “Eik yakriפש um Jisas Krai ananin nyeigur um nyukutukuk okwudok armatok abom aria nyutograri.” Aria abudok atub nyutob enyudok sagab nyakutuk abom okwudok armatok.

<sup>19</sup> Arigaha hanatoruk iri hatik um agundok kwukriפש barae arpes aria kwutorumam utabor um douk uwok. Aria hakitak hasuhw Pol nani Sailas hanukam haram um agundok sabaishi apa shanaki shantorum shapeum. Haram

**16:10** **16:10** Enyudok barae nyakri Luk nenyem okwudok Buk iri douk shopunek nani Pol omi hanak. Douk namudok aria douk nenyem nakri, “Apak maurim yah aria munak um Masedonia.”

um debeimi um abrudok wabur iri.  
<sup>20</sup> Haram um amam mejistret aria hakripam hakri, “Amudok armam douk anam Juda. Amam hape henek enenyenen abrudok apakibur wabur aria henek arpesh juwehosish aria debeinyi baraen nyakitak.

<sup>21</sup> Hape hakripesh baraen um enyudok douk apak Rom apakin lo nyakrium mare mumneken aria mugipeshen iri.”

<sup>22</sup> Aria eshudok sabaishi armam armago shopunek shape shanumogesh rohwin baraen shenekam enenyenen. Namudok aria amam mejistret hatrum hawarukuk amamih rupeh aria hakri um shom shukwumam wagon. <sup>23</sup> Douk shakwumam wagon sabaihi atih sham shenekam enenyenen um jurug aria shenyigram hawish hape shunuweshik-ati urupat. Aria amudok mejistret hakrip anudok neyoh shunuweshik-ati urupat iri um gamo niyohom wosik Pol nani Sailas. <sup>24</sup> Douk mejistret nakripan enyudok dodogowinyi baraen namudok aria narao amam hawish abom um numunim rum atudok shunuweshik-ati urupat. Hawish aria howem amamigas aiyas anag amaenyigari gagor iri plag, aria nowem kupaigari iruhw aria naweshikag.

<sup>25</sup> Arigaha orokohunib um wab aria Pol nani Sailas hape henek beten aria heyorub aweruh um Iruhin. Eshudok enesh shanak shunuweshik-ati urupat iri douk shape shemnekam. <sup>26</sup> Aria ahudok atuh onok debeikwi enyik kwatuk kwogwagworish uroruh douk shawaruh um atudok shunuweshik-ati urupat iri. Aria ahudok atuh ihigwumorim witog gwanejik gwanakuk aria senab batokweshihuk ihishmorim shonoweshik iri esheshis wis. <sup>27</sup> Anudok neyoh shunuweshik-ati urupat iri nakitak aria natik um ihigwumorim witog gwanejik gwape. Natik namudok aria nakri ihishmorim shonoweshik iri douk sharuwok aria natuki ananit bainat um nunobo. <sup>28</sup> Aria Pol nahwaragu debeg nakri, “Mare nyunobo! Apak ihipmorim enyudok mape atin!”

<sup>29</sup> Aria anudok neyoh shunuweshik-ati urupat iri nahwaram shurauri eneh nyih. Nahwarogu aria nahur nawish um agun-

dok Pol nani Sailas hapeum. Sheyaruban aria nanogugur abom nabuh natu agundok Pol iri Sailas hapeum. <sup>30</sup> Douk nakitak naram hatogur aduk aria narigam nakri, “Debeimi armam, eik ta inek mare, um Iruhin ta wata nurae itanamori ipe wosik abom?”

<sup>31</sup> Aria hakripan namudok hakri, “Nyunek bilip um Debeini Jisas aria Iruhin ta wata nuraen nyutanamori nyupe wosik abom. Nyak nyuni ihishmorim shape nyakit urupat iri.” <sup>32</sup> Aria hape hakripan Debeini ananin baraen. Nani eshudok ihishmorim douk shape ananit urupat iri. <sup>33</sup> Namudok aria abudok wab, abudok atub nyutob anan naram nanak nakrup-umam ereb. Aria wab atub anan nani ananish ihishmorim shenek baptais. <sup>34</sup> Aria naram hawish numun ananit urupat nakom anagun worigun ba hagnoh. Anan nani armatok aria batowish shani ihishmorim shani eshesh shape esheshit urupat iri shanadudareh abom. Um maresh? Douk eshesh shenek bilip um Iruhin iri.

<sup>35</sup> Ruwahepih ruhur atin aria amam debeimi mejistret heshopoki anam howem shus iri um hanak hukrip anudok neyoh shunuweshik-ati urupat iri hakri, “Nyukweshih amudok biom armam hunak.” <sup>36</sup> Hakripan aria anan nanak nakrip Pol nakri, “Amam mejistret heneki baraen nyanaki um ikweshihep punak. Namudok aria douk ipak wosik ta pukutukuk atudok shunuweshik-ati urupat punak aria ipakiruh aparuh hur wosik.”

<sup>37</sup> Aria Pol nakrip amam howem shus iri nakri, “Ohwak douk onohw um Rom kabi ipak um. Henekumohw rohwin baraen aria madae huparug enesh yoweishi inahos uwe douk hakri ohwak wenekesh iri, uwok. Aria sabaishi arpesh shape shatruhw aria howeshikohw um eshudok aria henyigroh wawish wape shunuweshik-ati urupat. Aria douk hakri hushopokohw unabeshuk atin unak aka? Adur atin uwok. Amam mejistret kanak ta hunaki agundok huraohw ukutukuk shunuweshik-ati urupat aria utohur unak.”

<sup>38</sup> Aria amam howem shus iri hanak hakrip amam mejistret enyudok baraen.

Douk hemnek um Pol nani Sailas amam douk shopunek anam um eshesh Rom aria hanogugur abom. <sup>39</sup> Hanogugur aria hanak shunuweshik-ati urupat hakrip Pol iri Sailas hakri, “Apak makri gihaumep um enyudok meneken-umep iri.” Douk haram hatograri aduk aria hakripam um hukutukuk abrudok debeiburi wabur hunak kupaigunum. <sup>40</sup> Douk hakutukuk atudok urupat aria hanak um Lidia okwokwit urupat. Hanak hatogur hatik eshesh Kristen aria hakripeshuk enen baraen um shupe dodogowish um bilip. Hakripeshuk aria hakutish-ukuk aria hanak.

## 17

### *Eshesh Tesalonaika Shakri Shubo Pol Nini Sailas*

<sup>1</sup> Hanak arigaha hanak hatogur Amfipolis aria hatogur Apolonia. Shopunek hakutukuk abrudok wabur aria hanak hatogur Tesalonaika. Anat eshesh Juda shape sheneyagwreh baraen-atari urupat douk tatao ganudok. <sup>2</sup> Aria Pol nagipesh ananah aih, bihatih sisigih nyumneh Sabatih douk madae shunek mour ehi uwe, anan douk nanak nawish atudok urupat shape sheneyagwreh baraen-atari. Nawish aria nani eshesh Juda shape sheneyagwreh um Iruhin ananin baraen nyetem ananik Buk iri. <sup>3</sup> Aria gamo nakripesh baugenyum Iruhin ananin baraen. Nakripesh um agundok Iruhin nagraeh Kraiss um shan nemnek debeiri eriger nagok aria wata shopunek nakitak napeum. Nakripesh namudok nakri, “Anudok Jisas eik apa yakripepuman iri anan douk Kraiss, douk Iruhin nagraehan aria neshopokan nanakumori nurae arpeshe iri.” <sup>4</sup> Enesh Juda shemneken shenek bilip um Debeini Jisas aria shagipesh Pol nani Sailas. Enesh sabaishi Grik shenek lotu um Iruhin iri shani sabaiwari nyeiguhw shato-umo iri armago shopunek wagipesham.

<sup>5</sup> Aria eshesh Juda shenek nyigiya um agundok sabaishi arpeshe shagipesh Pol omi um. Aria shanak sharauri sabaishi yoweishi arpeshe. Eshudok arpeshe douk shapeum shenek yoweishi inahos aria ihih shapeum shanaki shape agundok

abrudok waburishi apa shanaki shantorun shapeum. Abudok nyutob sharauri sabaishi armam armago shanaki shantorun aria abrudok wabur shabruhur shasuabur shenekabur um shenek arpeshe um juwehosish sheneyagwreh iri o shahwar um wanohwin baraen iri. Aria shanak shersharieh Jeson ananit urupat shaurim Pol nani Sailas. Shaurimam um shakri shuparugam aria shuram shutograri um eshudok sabaishi arpeshe. <sup>6</sup> Shaurimam aria madae shuparugam uwe aria shasuhw Jeson nani anam Kristen sharam um debeimi um abrudok wabur iri. Aria shahwar shakri, “Amudok armam douk henek eneshenesh yoweishi inahos sabairubi warub agundok atap iri. Aria douk amudok hanakumori abrudok apakibur wabur. <sup>7</sup> Hanaki aria Jeson naram hanak hape ananit urupat. Amam douk habrig Sisar ananin lo um hakri anan kupaini king shopunek nape. Hakri ananin nyeigur douk Jisas.” <sup>8</sup> Eshudok sabaishi arpeshe shani debeimi abrudok wabur iri shemnek enyudok baraen aria shakitak yowiyokuk aria shape shahwar debeg sheneyagwreh debeinyi baraen. <sup>9</sup> Namudok aria amudok debeimi henek Jeson nani amudok anam hator kwot jurug aria hakweshiam hanak.

### *Pol Nani Sailas Henek Mour Beria*

<sup>10</sup> Aria abudok wab abom eshesh Kristen sheshopok Pol nani Sailas hakutukuk Tesalonaika hanak um Beria. Hanak hatogur aria hanak hawish anat eshesh Juda shape sheneyagwreh baraen-atari urupat. <sup>11</sup> Eshesh Juda shape Tesalonaika iri douk madae shumnek baraen namudok uwe, uwok. Eshudok shape Beria iri douk shakri shumnek amamin shuriguk. Aria ihih nyumneh shape shatah Iruhin ananin baraen um shakri shudukemesh um baraen Pol nakripeshenyi douk nakripeshen adurin o rohwinyi. <sup>12</sup> Shenekesh namudok aria sabaishi Juda shenek bilip um Debeini. Sabaishi nyeiguhw shato-umo iri armago wani anam armam eshesh Grik shopunek shenek bilip.

<sup>13</sup> Arigaha aria eshesh Juda shape Tesalonaika iri shemnek um agundok Pol nakripesh Iruhin ananin baraen Beria

um. Namudok aria shanaki shagiyagim armam armago shape Beria iri shohur esheshiruh aparuh aria juwehosish um Pol. <sup>14</sup> Namudok aria arigas atin eshesh Kristen sheshopok Pol nabuhum yous um. Aria Sailas nani Timoti wata hapeik Beria. <sup>15</sup> Amudok armam harao Pol iri douk heiran hanak arigaha hanak hatogur debeiburi wabur Atens. Douk wata hakri hutanam um Beria aria Pol nakripam um hukrip Sailas iri Timoti um wata hugipesh anan arigas atin.

*Pol Nape Nakripesh Iruhin Ananin Baraen Atens*

<sup>16</sup> Aria abudok nyutob nape apa natrugun-umam Atens obi nyutob, ananihw apahw douk yowehw abom um agundok natik abrudok wabur shukunibur um sabaimi madae adurim uwe god omi douk eshesh meyoh shenekom iri. <sup>17</sup> Namudok aria nanak um urupat douk eshesh Juda shape sheneyagwreh baraen-atari aria nani eshesh Juda shani enesh Grik douk shenek lotu um Iruhin iri shape shanogogonim baraen um Iruhin nape iruhw iri. Aria ihih nyumneh nanak nani arpeshe shanaki shantorum maket iri shape sheneyagwreh. <sup>18</sup> Aria anam tisa omi douk hadukem enenyenen iri hanaki hani Pol harpak baraen. Anam douk shahwaram um Epikurian aria anam shahwaram Stoik iri. <sup>17:18</sup> Anam hakri namudok. Hakri, “Anudok neyagwreh rohwin yi baraen iri douk nakri niyagwreh maren rohwin yi baraen?” Anam hakri, “Aria nakri nukripap baraen um anam kupairubi warubim god omi aka?”

Hakri enyudok baraen um maresh, hemnek Pol nakripesh um Jisas ananin yopinyi baraen aria nakripesh um agundok nagok wata nakitakumori. <sup>19</sup> Namudok aria harao Pol hatoum anag mihig nyeigurigum Ariopagus. Agag douk anam debeimi kaunsolomi hantorum hapeum. Hanak hakih aria hakripan hakri, “Apak makri gamo mudukemesh um enyudok namunyi baraen nyak nyape nyakripesh-enyi. <sup>20</sup> Enen baraen memneken nyakriyen

iri, riguk apak douk madae mumneken atin uwe, uwok. Namudok aria apak makri mudukem baugenyum enyudok baraen.” <sup>21</sup> Ihishmorim eshesh Atens shani kupairubi warubish shanaki shani eshesh shape abrudok wabur Atens iri, esheshih nyumneh douk shakri shupe meyoh aria shunupe um shunakripesh um namunyi baraen aria shumneken.

<sup>22</sup> Namudok aria Pol nakitak neyotu natik amudok hadukem enenyenen iri um agudok mihig Areopagus aria nakri, “Ipak pape abrudok wabur Atens iri, eik yatrip um ipak dodogowip atip abom um agundok penek eneheneh aih um penek lotu um. <sup>23</sup> Sagomatin yara haen yanak abrudok ipakibur wabur yatik eneshenesh penek lotumesh iri. Yara haen yanak aria yanak yaparug enen alta shopunek douk powem eshudok penek ofamesh iri. Aria enyudok alta showem enen baraen nyakri,

ENYUDOK ALTA DOUK ANAN GOD MADA E MUDUKEMAN IRI UWE ANANIN. Aria anudok Iruhin douk penek lotuman meyoh aria madae pudukeman iri uwe, anan douk anudok eik yape yakripepuman.

<sup>24</sup> “Anudok Iruhin douk nenek agundok atap nani eneshenesh shapenyagun iri, anan douk debeini abom um iruhw heven aria agundok atap. Aria lotuig urusag arpeshe sharukog-uman iri douk madae nupenyog atin uwe, uwok. <sup>25</sup> Anan douk madae eneshenesh wokan um enesh eshudok eneshenesh aria nukri um enesh arpeshe shukon roguh w shutauruman um enesh eshudok eneshenesh uwe, uwok. Anan kanak norukwop yapis apak ihipmorim. Aria nataurumop dodogowip mape marahaen aria nakop ihishmorim eneshenesh um ihishmorim arpeshe. <sup>26</sup> Iruhin nenek atun arman aria ihismorim awirosish arpeshe sisigiruh yegeshiweruh nenekesh shakitak anudok atun arman ananip awirop. Aria anan kanak nohur asudok awirosish arpeshe shanak ihigunum agundok atap sisigigun atin shanak shape. Watak

17:18 **17:18** Abudok biyab lainabim armam douk shahwaram um Epikurian iri Stoik, amudok armam apa hagipesh seiwokimi hadukem enenyenen iri amamip urkwip.

nukwarum asudok awirosish arpesih sisi-giruh yegeshiweruh uwe aria nagraeh esheshish kwarahos douk ta shunak shupe abudok amnab anan nakri um shunak shupeum. Neyabigesh amnab sisig atin um agundok banak batuh um aria sharab batogur esheshib. <sup>27</sup> Nenekesh namudok um shupe shutrugun-umani shunak arigah arigaha wosik um ta shuparugan abom um. Aria anan douk madae nupeik rougun um apak ihishmorim atin atin uwe, uwok. <sup>28</sup> Kabi enen arpen nyakrium. Nyakri, 'Anan norukwop yapis nenekop mape marahaen kabi douk mape um.' Kabi anam ipakimi douk hadukemesh aria heyagwreh enenyenen baraen iri hakri um. Hakri, 'Apak shopunek ananish batowish.' <sup>29</sup> Aria Pol baraen apa nakri, "Apak mape Iruhin ananish batowish aria mare wata mukri anan douk nape kabi gol o siliwa o nape kabi anam utom um, uwok. Mare mukri enesh shadukemesh iri arpesih meyoh urkwip por aria douk shenekan esheshis wis, uwok.

<sup>30</sup> "Seiwok arpesih watak shudukemesh obi nyutob uwe, Iruhin douk madae niyagwreh nuriguk um enenyenen eshesh shape shenekan abudok nyutob iri uwe, uwok. Aria douk nakripap dodogowinyi baraen ihishmorim arpesih mape ihirub warub iri. Nakri mukeshuk agabus yoweishi inahos aria mutanam mukon aparuh anan. <sup>31</sup> Umum maresh? Anan douk nagraeh anah nyumnah hapeum ta debeiti kwot tunenek um. Atudok kwot ta nunek kwot um ihishmorim arpesih um eneshenesh menekesh iri. Atat douk adurit abom kwot. Aria Iruhin nagraeh anan arman um ta nupe debeini nusuhw atudok kwot iri. Anudok arman douk nagok aria Iruhin wata nonohur nakitak nape. Namudok aria apak ihishmorim douk madukemesh makri adur abom um kweipon anan ta nusuhw atudok debeiti kwot."

<sup>32</sup> Douk shemnek um agundok Pol nakri anan arman nagok aria wata nakitak um aria enesh shanumogesh abom anan. Aria enesh shakri, "Apak makri mumneken um gamo nyukripap enyudok atin baraen." <sup>33</sup> Namudok aria Pol nakutishukuk natogur nanak. <sup>34</sup> Aria

anam armam hagipesh Pol hanak aria henek bilip um Jisas. Amudok armam, anan Dionisius. Anan douk nani amudok debeimi armam amam hantorum hape agudok mihig Areopagus iri atin mour. Anan nani onok armatok shahwarok um Damaris iri kwani enesh arpesih shopunek. Eshesh shenek bilip um Kraisa aria shagipesh Pol.

## 18

### *Pol Nanak Nenek Mour Korin*

<sup>1</sup> Enyudok nyanakuk aria Pol nakutukuk Atens nanak um Korin. <sup>2</sup> Nanak natogur aria naparug anan arman um eshesh Juda. Ananin nyeigur Akwila aria douk shanabuki agudok shokugi nahobig Pontus. Madae roubi uwe nani ananik irohukwik Prisila shakutukuk agudok nahobig Itali shanakumori Korin. Um maresh? Klodius douk nape debeini gavman um eshesh Rom iri neshopok ihishmorim Juda um shukutukuk Rom shunakuk. Pol nanak natrish <sup>3</sup> aria nani eshesh shape abom. Shape aria nani eshesh shape shenek mour. Um maresh? Anan shopunek natape urupatish selahos kabi eshesh um. Shatapeyesh um kupaishi shutorish shukesh utabor aria shunak shukwish um shurok urusag. <sup>4</sup> Ihih nyumneh douk eshesh Juda mour uwok shape meyoh ehi, anan douk nanak nawish um eshesh Juda shape sheneyagwreh baraen-atari urupat. Nawish aria dodogowin atun nani eshesh shape sheneyagwreh. Um nakri nuhur eshesh Juda shuni eshesh Grik esheship urkwip aria shunek bilip um Jisas.

<sup>5</sup> Abudok nyutob Sailas nani Timoti hakutukuk agudok shokugi nahobig Masedonia hanaki obi nyutob, Pol ihih nyumneh napeum nakripesh Iruhin ananin yopinyi baraen. Dodogowin atun nakrip eshesh Juda nakri, "Jisas anan Kraisa, douk Iruhin nagraehan aria neshopokan nanakumori nurao arpesih iri." <sup>6</sup> Aria shanabukan arigos um ananin baraen aria shakripan enenyenen. Namudok aria nekeshuk agab nakitak neneguk ehudok aih um agundok madae shumnek Iruhin ananin

baraen um uwe. Nakitak nagudupeshuk nyupruk ananin rupeh kwakusuk aria nakripeshuk dodogowinyi baraen nakri, “Ipak pakri punak puwishuk um, enyudok douk madae eik inekep um douk punak puwishuk uwe, uwok. Ipak meyoh peneken um ipak kanak. Aria douk eik ta inak um kupaishi douk eshesh madae Juda iri uwe aria ta ikripeshen.”

<sup>7</sup> Aria nakutukuk atudok urupat eshesh Juda shape sheneyagwreh baraen-atari aria nanak um Titius Jastus ananin urupat. Titius Jastus douk nenek lotu um Iruhin iri. Ananin urupat douk tatao hurukatin um atudok urupat. <sup>8</sup> Anan arman shahwaran um Krispus iri douk debeini um atudok eshesh Juda shape sheneyagwreh baraen-atari urupat. Krispus nani ihishmorim shape ananin urupat iri douk shenek bilip um Debeini. Sabaishi Korin shopunek shemnek Pol nakripesh-enyi baraen shenek bilip aria shenek baptais.

<sup>9</sup> Aria anab wab Pol natik enesh eshudok kabi nabo yomnis natrish um. Natrish aria Debeini nakripan nakri, “Mare nyunogugur nyukri nokwat tishuk, uwok. Nyukripesh baraen aria mare nyukri nyubukuk enyudok nyeneken iri mour, uwok. <sup>10</sup> Um maresh? Eik yani nyak yape huruk aria ta mare enesh arpesh shukri shuneken enenyenen, uwok. Um maresh? Sabaishi abrudok waburishi watak shenek bilip iri uwe douk eikish.”

<sup>11</sup> Aria Pol nape nani eshesh um enen shuknin enen tukwanin kwarahos abrudok wabur Korin. Nape nakripesh Iruhin ananin baraen.

<sup>12</sup> Arigaha anob nyutob aria Galio nape debeini gavman um abudok debeibi amnab douk shahwarab Akaia iri. Aria abudok nyutob eshesh Juda shantorum shape shabo baraen aria shakitak shasuhw Pol sharanum kwot. <sup>13</sup> Shanak aria shakri, “Anudok arman nape nohur arpesh um shubrig lo aria shugipesh eneh sikh aih um shenek lotu um Iruhin um.”

<sup>14</sup> Pol nakri um nuwanam baraen aria Galio nakripesh eshesh Juda nakri, “Anudok arman nunek enen shokwinyi o debeinyi ina um, eik ta ikri wosik um imnekat ipak Juda ipakit kwot. <sup>15</sup> Aria enyudok douk panatutukem um baraen nyani enesh

nyeiguhw iri um enen ipakin lo. Aria eik ta mare imnek ipakig kwotog um enyudokmori, uwok. Ipak kanak punak punagabeyen.”

<sup>16</sup> Aria neyagwreh dodog um shutogur shunak aria apa shakutukuk urupat shasuhw kwotog-atari aria shatogur shanak. <sup>17</sup> Namudok aria shakitak shasuhw Sostenes douk debeini um eshesh Juda shape sheneyagwreh baraen-atari urupat iri aria shan agundok adukitum kwotogit urupat tataoum. Shan aria Galio nape nanatrish meyoh. Madae nukri enen baraen uwe, uwok.

*Pol Natanam Um Abrudok Wabur Antiok Douk Bape Agudok Debeigi Nahobig Siria Iri*

<sup>18</sup> Pol wata nani eshesh Kristen nape sabaihi nyumneh abrudok wabur Korin. Aria wata nakutishukuk nani Prisila kwani Akwila sharao korohuk shanak um debeigi nahobig Siria. Watak shura korohuk uwe aria Pol nakitak natupok ananin barag banog um abrudok wabur Senkria. Nenekesh namudok um maresh, anan douk nakripan enen adurin atinyi baraen Iruhin abom um nunek enesh eshudok eneshenesh. <sup>19</sup> Shanak arigaha shanak shatogur Efesus aria Pol nakutukuk Prisila kwani Akwila agundok. Anan nanak nawish eshesh Juda shape sheneyagwreh baraen atari urupat aria nani eshesh Juda shape shanogogonim um baraen um nakri nishuhur um shenek bilip um Jisas. <sup>20</sup> Aria eshesh douk shariganum nini eshesh nupe eneh nyumneh shopunek. Aria anan nakripesh um uwok. <sup>21</sup> Aria abudok nyutob nakri nukutishukuk nunak obi nyutob, anan douk nakripeshuk namudok. Nakri, “Aria Iruhin nukri wosik um, eik ta wata itanamori itrip.” Nakripeshuk aria nanak nato korohuk kwakutukuk Efesus kwanak. <sup>22</sup> Arigaha kwatogur kweir Sisaria aria nabuh nanak um Jerusalem. Nanak natik eshesh Iruhin ananish arpesh shani esheshim debeimi nenemeshuk yopuhi nyumnah aria wata nabuh-ukuk um Antiok. <sup>23</sup> Pol nabuh nape roubi nyutob Antiok um jurug aria

wata nakutuburuk nanak. Nanak nawish nanak sabairubi warub abudok debeibi amnab Galesia iri Frigia aria nape nakripaguk eshesh shagipesh Jisas iri um shupe dodogowish um bilip.

### *Apolos Nakripesh Iruhin Ananin Baraen Efesus*

<sup>24</sup> Aria anan arman um eshesh Juda douk shahwaran um Apolos iri nanakumori Efesus. Anan douk shanabuki wabur Aleksandria. Nadukem eneyenen abom aria neyagwreh nakripesh baraen wosik. Baraen nyetem Iruhin ananik Buk iri douk nadukemen wosik.

<sup>25</sup> Riguk enesh shenek skuluman um Debeini anan yah aria douk anan dodogowin atun abom nakripesh wosik um Jisas nenekesh iri. Aria anan madae gamo nudukemen uwe Jisas ananin baraen uwe, uwok. Nadukem enyudok wosik, douk Jon nenek baptaisumesh iri nakripesh-enyi atin. <sup>26</sup> Nanak nawish eshesh Juda shape sheneyagwreh baraen-atari urupat aria dodogowin atun nape nakripesh baraen. Madae nunogugur um eshesh armam armago uwe, uwok. Arigaha Prisila kwani Akwila shemnekan aria sharan shanak um esheshit urupat. Shanak aria gamo shakripan wosik um ahudok yah douk Iruhin nakri um arpesh shugipeshah iri. <sup>27</sup> Arigaha aria Apolos nakri nunak um agudok shokugi nahobig shohwarag Akaia um.

Aria eshesh Efesus douk shagipesh Jisas iri shatauruman shenekumesh anap shup eshesh Kristen shape Akaia iri. Shenekap um shakri nunak nutogur aria mare shukonuguk agabus, aria shatauruman. Douk nanak natogur aria nataurumesh wosik abom eshesh Kristen douk Iruhin nataurumesh meyoh aria shasuhw ananin baraen dodog shagipeshen iri. <sup>28</sup> Baraen eshesh Juda shariganum agudok sabaishi arpesh shantorum shapeum douk dodogowin atun nagapeshen-umesh. Dodogowin atun nabukuk esheshin rihirahaemin baraen aria gamo neyabigen wosik baraen nyetem Iruhin ananik Buk iri um Jisas. Nakri Jisas anan Kraish, douk Iruhin

nagraehan aria neshopokan nanakumori nurao arpesh iri.

## 19

### *Pol Nenek Mour Wabur Efesus*

<sup>1</sup> Abudok nyutob Apolos wata nape Korin obi nyutob, Pol douk narpogun nanaki orokohunig um agudok shokugi nahobig Galesia arigaha nanak natograri Efesus. Natograri Efesus aria naparug enesh shagipesh Jisas iri shape agudok.

<sup>2</sup> Aria narigesh nakri, “Abudok nyutob penek bilip um Debeini obi nyutob, ipak ta paraen aka, uwok enyudok Iruhin ananin Mishin?”

Aria shakripan shakri, “Uwok. Apak madae karowih mumnek um enen Iruhin ananin Mishin douk nyape uwe, uwok.”

<sup>3</sup> Aria Pol narigesh nakri, “Aria abudok nyutob penek baptais obi nyutob, ipak douk penek baptais mumam?”

Aria shakripan shakri, “Monek baptais kabi Jon nakrupesh abar aria nenek baptaisumesh um.”

<sup>4</sup> Aria Pol nakripesh nakri, “Riguk Jon nenek baptaisumesh abar aria nakripesh nakri, ‘Ipak pukeshuk agabus yoweishi inahos putanam pukon aparuh Iruhin aria punek baptais abar. Aria punek bilip um anudok Debeini douk ta nugimori eik iri.’ Anudok arman douk Jisas.” <sup>5</sup> Douk shemnek enyudok baraen aria shenek baptais abar um Debeini Jisas ananin nyeigur.

<sup>6</sup> Pol nowemesh wis aria enyudok Iruhin ananin Mishin nyabuhi nyawishesh aria shape shakripesh kupakupainyi baraen. Aria shape sheneyagwreh Iruhin ananin baraen kabi amam profet hakripeshen um. <sup>7</sup> Amudok harao Iruhin ananin Mishin iri douk hurukatin um 12-poreim armam.

<sup>8</sup> Pol nanak nawish eshesh Juda shape sheneyagwreh baraen-atari urupat aria dodogowin atun nape nakripesh Iruhin ananin baraen. Nenek enyudok um biyab atun aub. Nakripesh aria nabirak um nakri nuhur esheshiruh aparuh um shunek bilip um Jisas aria shuwish agudok Iruhin nape Debeini um ananish arpesh um. <sup>9</sup> Nakripesh aria enesh douk baragos seshuk abom aria madae

shunek bilip uwe, uwok. Namudok aria shape shenyagwreh enenyenen yoweinyi baraen um Debeini ananin Yah. Sheneyagwreh yopugunum atugun aria sabaishi arpesh shape shemnek. Namudok aria Pol nakwutish-ukuk narao eshesh shagipesh Kraisi iri atish shanaman shanak. Shanaman aria ihih nyumneh nape nakripesh Debeini ananin baraen numun anat urupat douk Tiranus nape nenek skulum arpesh atari. <sup>10</sup> Nenekesh namudok um biyesh kwarahos arigaha ihishmorim Juda shani eshesh Grik douk shape agudok shokugi nahobig Esia iri shemnek Debeini ananin baraen.

*Skeva Ananim 7-poreim Nugamim Hakri Hugapesh Anan Sagab Nyapenyanyan Iri Arman*

<sup>11</sup> Iruhin nataurum Pol dodogowin atun aria nenek enen sik Iruhin atun neneken iri mour. <sup>12</sup> Namudok aria sharauri anas hankisis o rupehis shanaki shasem Pol aria shanak shasem eshudok arugeh haesh iri aria wata yopish. Sagabehos shapenyesh iri shakutishukuk aria wata yopish.

<sup>13</sup> Aria enesh Juda douk sharahaen shanak shagabe sagabehos shapenyesh iri douk shopunek shakwiraeh um shugabeyesh um Debeini Jisas ananin nyeigur. Shakripesh namudok sagabehos. Shakri, "Apak makripep dodog um Pol nakripesh-uman iri Jisas ananin nyeigur um pukutukuk eshudok arpesh putogur punakuk." <sup>14</sup> Aria anan eshesh Juda esheshin debeini pris shahwaran um Skeva iri douk nabuki 7-poreim nugamim. Aria ananim nugamim douk hape henek enyudok. <sup>15</sup> Anah nyumnah hanak hape hagapesh anan arman aria sagab nyape anudok arman iri nyakripam namudok. Nyakri, "Eik yadukem Jisas nani Pol atum. Aria ipak meipari?" <sup>16</sup> Aria enyudok sagab nyapenyanyan iri arman nakitaki nam yowem. Nam henenem ereb aria amamiruh yegeshiweruh hape yoweruh abom. Nam nakweshih-umam rupeh aria hagog hape hakutukuk ananit urupat haruwok hanak.

<sup>17</sup> Aria ihishmorim Juda shani eshesh Grik shape Efesus iri shemnek um

enyudok aria shanogugur abom. Aria shatuk Debeini Jisas ananin nyeigur nyato iruhw abom. <sup>18</sup> Sabaishi arpesh douk shenek bilip iri shanaki agudok sabaishi arpesh shantorum shapeum aria shawereh eneshenesh yoweishi inahos riguk shape shenekesh iri. <sup>19</sup> Sabaishi arpesh douk shapeum shenek ouruh hani sabagwiruh iri sharauri esheshiyu bumbek douk baraen nyakrium enyudokmori nyetemo iri. Sharao shanaki aria shashaiweh agudok ihishmorim arpesh shapeum. Shadareh utabor shukri shutor oudok bumbek akure, douk butogur debeibori abom um 50,000 kina. <sup>20</sup> Namudok aria Debeini ananin baraen nyatogur dodogowin atin abom nyenek mour arpesh shatogur dodogowish um bilip aria shanak shakripeshen sabai-gunum.

*Eshesh Efesus Juwehoshish Aria Shahwar Shakripan Eneyenen Pol*

<sup>21</sup> Enyudok nyatogur nyanakuk aria Pol anan urkum morum nakri nunak um agusudok biogos shokugosi nahobigos Masedonia iri Akaia. Nakri nunak um agudok jurug aria douk nunak um Jerusalem. Aria Pol nakri namudok nakri, "Douk inak itogur Jerusalem um jurug aria eik ta inak itik debeiburi wabur Rom shopunek." <sup>22</sup> Aria Pol neshopok Timoti nani Erastus hanak um Masedonia. Amudok biom armam douk hataurum Iruhin ananin mour iri. Aria anan wata napeik agudok shokugi nahobig Esia.

<sup>23</sup> Aria abudok nyutob abom dedebeinyi atinyi baraen nyakitak Efesus um ahudok Debeini ananin Yah. <sup>24</sup> Anan arman shahwaran um Demetrius iri apa nakwu siliwa nenek aboriguh aria eshudok eneshenesh. Aria anan douk nenek enen bisnis um shakwu siliwa shenek aboriguh um shokushokugwi urusag tempel. Shenekog gwape kabi debeiti urupat douk shenek lotu um rohwiwki armatok kwonohwaram god iri shahwarok um Artemis iri. Anan nakom sabainyi mour henek mour um siliwa iri aria harao debeibori utabor abom. <sup>25</sup> Aria Demetrius nahwar amudok armam hani enesh arpesh shenek enyudokmori mour iri shanaki shantorum



atugun aria nakripesh nakri, “Ipak douk munek enyudok atin mour iri, ipak padukemesh. Apak maparug debeibori utabor um douk maparugabor um enyudok mour meneken iri. <sup>26</sup> Ipak kanak wosik patrin jurug aria pemneken enyudok anudok arman Pol neneken iri. Nakri amam debeimi god omi douk arpesh shenekam esheshis wis iri madae adurimi uwe, uwok. Nakripesh namudok douk nyabuh sabaishi arpesh esheshiruh aparuh aria shakri ananin baraen douk adurin. Nakripeshen abrudok wabur Efesus aria shopunek hurukatin um ihishmorim arpesh shape agudok shokugi nahobig Esia iri shemneken shatuh. <sup>27</sup> Enyudok Pol ananin baraen ta nyunek apakin bisnis nyurao yoweinyi nyeigur. Aria douk madae enyudok atin uwe, uwok. Aria arpesh ta shukri atudok urupat munek lotu um okwudok armatok god Artemis um douk nyeigur uwokat. Aria okwudok armatok god Artemis douk ihishmorim arpesh shape Esia iri shani ihishmorim shape ihirub warub agundok atap iri shenek lotumok. Aria Pol ananin baraen ta nyunek okwokwin debeinyi nyeigur mare wata nyuto iruhw, uwok.”

<sup>28</sup> Douk eshudok sabaishi arpesh shemnek enyudok baraen juwehosish abom aria shakitak shahwar debeg shakri, “Apak Efesus apakik armatok god Artemis douk debeikwi abom!” <sup>29</sup> Namudok aria ihishmorim abrudok waburish arpesh shape shahwar debeg atin. Aria shasuhw Gaius nani Aristarkus shanukam sharam shanak um agundok eshesh apa shanak shantorum shapeum. Amudok armam douk hanaki Masedonia aria hani Pol hape harahaen iri. <sup>30</sup> Pol nakri nunak agundok shantorum um aria nukripesh enen baraen, aria eshesh shagipesh Jisas iri shakri uwok aria shasuhweshan nape. <sup>31</sup> Anam armam douk debeimi um gavman um agudok shokugi nahobig Esia iri douk Pol ananim arpeshim. Amudok armam shopunek henekumani baraen um mare nunak agundok shantorum shape sheneyagwreh baraen um, uwok.

<sup>32</sup> Aria eshudok sabaishi arpesh shape

shahwar debeg atin. Enesh shahwar enen baraen aria enesh shahwar enen sik. Shenekesh namudok um maresh, sabaishi madae shudukem baugenyum baraen um agundok shanaki shantorum um, uwok. <sup>33</sup> Eshesh Juda shenyigur Aleksander nawish orokohunish um eshudok sabaishi arpesh aria enesh shakripan um baugenyum baraen. Aria nawaaurumesh rogur um nakri eshesh mokureg aria nawanamesh baraen. <sup>34</sup> Neyotu aria eshesh shemnek um anan douk anan Juda aria ihishmorim shenek atut nokwat shahwar debeg shakri, “Apak Efesus apakik armatok god Artemis douk debeikwi abom!” Shape apa shahwar namudok roubi nyutob um biyen aua.

<sup>35</sup> Arigah aria anan debeini um gavman um abrudok debeiburi wabur iri nenekesh mukareg. Aria nakripesh nakri, “Ipak armam armago pape Efesus iri, ihishmorim arpesh douk shadukemesh shakri ipak abrudok waburip pogrem atudok debeikwi godik okwokwit urupat douk penek lotuat iri. Amudok okwokwim utom magruki iruhw utag aria penek lotumam iri douk shopunek ipak pogremam. <sup>36</sup> Ta mare enen arpen nyukri nyununu enyudok baraen, uwok. Aria douk mokureg mare pukri punek enen enyudok arigas, uwok. <sup>37</sup> Amudok biom armam douk madae hukwumesh-aruh enesh eshudok gani numunig um lotuig urusag o hiyagwreh enenyenen yoweinyi baraen um apakik debeikwi godik Artemis uwe, uwok. Aria amudok douk param hanaki meyoh. <sup>38</sup> Aria Demitrius nini ananim henekuman mour iri hukri hunekuman kwot enen arpen um, aria nyumneh kwotog gwunenek ehi douk hape. Amam debeimi um gavman iri douk hape, um Demitrius nini ananish shunak shugapesh baraen um. <sup>39</sup> Ipak enen baraen shopunek um, aria abudok nyutob abrudok waburish shunak shunatorium shupe shiyagwreh baraen obi nyutob, aria ipak douk punak pugabeyen. <sup>40</sup> Doukih apak ta enen baraen nyupenyap um mohur enyudok aria juwehosip mahwar mariguk um. Amam debeimi um gavman um Rom

iri hukri horigap hunekumap baraen akure, apak ta mare muwanamam enen baugenyum baraen um enyudok apak meneken iri, ta uwok.”<sup>41</sup> Douk nakriפש enyudok baraen um jurug aria nakriפש shanosiyam.

## 20

### *Pol Nanak Um Masedonia Gani Agudok Nahobig Grik*

<sup>1</sup> Douk enyudok baraen nyanak nyawishuk, um arpesih juwehosish shahwarum, aria Pol nahwar eshesh Kristen um shunaki shutrun. Shanaki douk nakriפשuk enen baraen um shupe dodogowish um Debeini aria nenemeshuk yopuhi nyumnah. Aria nakutishukuk nanak um shokugi nahobig Masedonia. <sup>2</sup> Nawish nanak agudok shokugi nahobig aria nape nakriפשuk sabainyi baraen eshesh Kristen um shupe dodogowish um Debeini. Arigaha aria douk nanak natogur agudok nahobig Grik. <sup>3</sup> Natogur nape biyab atun aub. Aria abudok nyutob nape nagabe eneshenesh um nakri nurao korohuk nunak um agudok nahobig Siria obi nyutob, enen baraen nyanaki nyadukan. Um agudok amam Juda hakri hon nugok um. Namudok aria Pol wata urkum morum nutanam um Masedonia. <sup>4</sup> Pirus ananin nuganin shahwaran um Sopater iri douk nanaman hanak. Anan douk nanaki wabur nyeigur-iburum Beria. Amudok anam shopunek heiran. Amamish nyeiguhw eshudok. Aristarkus nani Sekundus. Amam biom douk hanaki wabur Tesalonaika. Anan Gaius. Anan nanaki wabur nyeigur-iburum Derbe. Anan Timoti aria amudok anam biom hanaki agudok shokugi nahobig Esia iri shopunek heiran. Amam douk Trofimus nani Tikikus. <sup>5</sup> Amudok armam harik aria hatogur hape heyotumap Troas. <sup>6</sup> Ahudok nyumneh douk eshesh Juda shenek worigun shawok bret douk shashaithe madae tukitak debeiti iri uwe habuh hanakuk. Aria apak marao korohuk makutukuk Filipai manak.20:6 Hakri um 5-poreih

nyumneh hanak hadiguk um, aria manak matogur maparug amudok harik iri abrudok wabur Troas. Maparugam aria mape atug wik agudok.

### *Yutikus Nagok Aria Pol Nonohur Naktak Nape Abrudok Wabur Troas*

<sup>7</sup> Mape aria Sarere wab manak mani eshesh Jisas ananish arpesih mantorum mape um muwok worigun aria murao Komunio. Pol nape nakriפש rounyi baraen arigah orokohunib um wab. Um maresh, anan nakri nukutishukuk nunak ruwahepih iri. <sup>8</sup> Amudok mantorum mapenyomi iruhwim rum douk sabaishi lamhos hanish shataur. <sup>9</sup> Aria anan weroroini arman shahwaran um Yutikus iri douk natem windua. Abudok nyutob Pol wata nape neyagwreh obi nyutob, Yutikus yobus sape san aria nabes sape eshuk arigah arigaha neshuh nagok abom. Neshuh nagok aria biyep rip uwok, nagruki iruhwim abom natu nagruki nabuh nakus atap. Douk shabuhi shonohur aria shatik iganigadae nagok. <sup>10</sup> Namudok aria Pol nabuh neshuh netem iruhin um hakus aria nakriפש nakri, “Ipakish mishish mare yowesh, uwok. Mishin wosik wata nyaran!” <sup>11</sup> Aria Pol wata naraesh shato iruhw urupat shakih nawor bret shatoh. Douk shatoh jurug aria nani eshesh shape sheneyagwreh roubi nyutob arigaha gagruk aria nakutishukuk nanak. <sup>12</sup> Anudok weroroini arman douk nape wosik aria ruwahep sharan shanak um gani eshesh shapeum. Aria esheshiruh aparuh wata hanadudareh abom.

### *Pol Nakutukuk Troas Nanak um Miletus*

<sup>13</sup> Aria apak marik manak marao korohuk aria manak um anabur wabur nyeigur-iburum Asos. Pol nanaki atapih aria nakriפש um mutogur mupe mutrugun um nutograri aria muran munak. <sup>14</sup> Douk nanaki naparugap Asos aria matukan korohuk manak um Mitilini. <sup>15</sup> Makutukuk Mitilini aria ruwahepih manak matogur hurukatin um enen unai

20:6 **20:6** Sabaishi shadukemesh iri shakri Pol nanak natogur Filipai aria narao amudok anam hani Luk douk nenyem okwudok Buk iri aria hanak. Namudok aria douk nowem enyudok baraen “Apak”. Putik Aposel 16:10.

nyeigurinyum Kios. Douk anah nyumnah hanak hadiguk aria manak matogur Samos. Matogur Samos aria ruwahepih wata manak matogur Miletus. <sup>16</sup> Pol anan urkum morum nakri mare nunak nutogur Efesus, uwok. Nakri uwok um nupe eneh nyumneh agudok shokugi nahobig Esia hunakuk meyoh. Um maresh? Nakri ta dodogowin um, nakri nunak nutogur Jerusalem aria ahudok debeihi nyumnah shahwarah um Pentikos iri ta hutogur.

*Pol Nakomaguk Roguhw Aria Nakripamuk Baraen Amam Iruhin Ananish Arpesh Esheshim Debeimi Hape Efesus Iri*

<sup>17</sup> Manak matogur mape Miletus aria Pol nenek baraen nyanak um amam Iruhin ananish arpesh esheshim debeimi hape Efesus iri um hunaki hutrun. <sup>18</sup> Hanak hatograri aria nakripam nakri, “Sagomatin yanak yatograri agudok shokugi nahobig Esia aria ihih nyumneh yani ipak mape yenekeh iri aih douk padukemeh. <sup>19</sup> Ipak padukemesh. Ehudok sabaihi nyumneh yape yenek Debeini ananin mour ahi, eshesh Juda douk shabo baraen um she. Aria yaunih eik kanak, aria yereh abih atih abom yenek ananin mour. <sup>20</sup> Aria douk padukemesh. Madae inogugur uwe, um agudok yakripep ihinyumorim yopinyi baraen um ta nyutaurumep iri um uwe, uwok. Abudok nyutob yakripepen agudok sabaishi shantorum um aria ipakig urusag um, eik douk madae kutukure uwe, uwok. <sup>21</sup> Dodogoiwe atuwe yakripesh dodogowinyi baraen eshesh Juda shani eshesh madae Juda iri uwe. Yakripesh um shukenyuk agabus yoweinyi shatanam shukon aparuh Iruhin aria shunek bilip um apakin Debeini Jisas.

<sup>22</sup> Aria douk ta igipesh Iruhin ananin Mishin nyakripeyen iri baraen aria ta inak um Jerusalem. Inak aria madae idukemesh uwe um ta maresh shuto-grume. <sup>23</sup> Yadukemesh um ihirub de-beirubi warub inak arub iri, Iruhin ananin Mishin douk nyakripe um ta shuweshike inoweshik ipe aria ta shuke sabainyi amaen.

<sup>24</sup> Aria eik madae inogugur igok um uwe, uwok. Yanahwar hwarohiwe meyoh. Yakri arigaha iyatak ahudok yah um inek enyudok Debeini Jisas nekeyen um ineken iri mour arigah ineken iyaten. Enyudok mour um ikripesh Iruhin ananin yopinyi baraen um agudok nutaurumap meyoh um.

<sup>25</sup> Aria douk punnek. Riguk yarahaen yape yakripep baraen ipak ihipmorim um arpesh shuwish agudok Iruhin nape Debeini um ananish arpesh um. Aria douk, eik yadukemesh abom um ipak ta mare wata enen arpen nyutiwe shopunek, uwok. <sup>26</sup> Namudok aria douk yakri ikripep enyudok dodogowinyi baraen ahudok nyumnah. Baraen enyudok. Aria ipak enep pakri pukonaguk agabus Iruhin aria pakri punak puwishuk um, baugenyum baraen madae nyupe um eik uwe, uwok. <sup>27</sup> Um maresh? Eik madae inogugur aria ibeshukuk enen baraen nyurmeik um ihinyumorim baugenyum baraen um mour douk Iruhin nakri um nuneken iri. <sup>28</sup> Ipak gamo pudukemesh aria ipak kanak puni ihishmorim Iruhin ananish arpesh douk ananin Mishin nyekepeshe um putaurumesh iri. Gamo putaurumesh aria putaurumesh wosik ananish arpesh douk ananin Nuganin nagok natorish ananibor owishibor iri. <sup>29</sup> Eik yadukemesh. Ta eik inakuk aria henek rohwumesh iri armam ta hunaki um ipak aria hunek rohwm Iruhin ananish arpesh kabi wanarig nubag um. <sup>30</sup> Nyutob ta bunaki, um anam armam ipak kanak ta hukripesh enen rohwin baraen eshesh shagipesh Jisas iri um hunukesh shukitak shugipesham um. <sup>31</sup> Namudok aria gamo pudukemesh. Aria ipakip urkwip purum eshudok biyesh atin kwarahos, nyumnah wab yape yakripep baraen um ipak ihipmorim. Yareh abih atih aria yape yenek skulump.

<sup>32</sup> Namudok aria douk yepuraguk Iruhin ananis wis um nutaur-umep. Shopunek ananin baraen um agudok anan yopun um ipak aria nutaur-umep meyoh um ta nyutaur-umep pupe dodogowip. Enyen ta nyutaur-

umep nyunekep pugrem yopishi eshudok eneshenesh douk Iruhin nakri um nuko eshudok arpeshe douk nenekesh shape ananish atish iri.

<sup>33</sup> Eik madae inek nyigiya um kupaishieh rupeh o esheshibor utabor kabi siliwa iri gol um uwe, uwok. <sup>34</sup> Ipak kanak padukemesh. Yakwu asudok eikis wis yenek mour yakwaram eshudok douk eik yani eikim henek mour hani eik mashoh iri. <sup>35</sup> Sabaihi aih aria mour eik yeneken iri, eik douk yeyabigep um munek mour dodogowip atup namudok um mutaurum eshudok madae dodogowish um shunek mour aria yaruhish iri. Aria apak ta urkwip purum enyudok barae douk Debeini Jisas anan meyoh nakriyeneyuk iri. Barae enyudok, nakri, 'Meinyi arpen nyukri nyukesh enesh eshudok kupaishi, enyudok arpen douk nyanadudareh abom nyariguk nyeshagrakuk agundok kupaishi arpeshe sheken enesh eshudok aria nyanadudareh um.' "

<sup>36</sup> Douk Pol nakripam enyudok barae um jurug, nabuh noduk ohrubus aria nani amudok ihim-morim armam henek beten um Iruhin. <sup>37</sup> Aria ihim-morim hereh, hanasupam aria hanoprikan. <sup>38</sup> Amamip urkwip yowep abom aria hereh um enyudok barae douk Pol nakri um ta mare wata hutrun um. Aria haran hanak um korohuk.

## 21

### *Pol Narao Korohuk Nanak um Jerusalem*

<sup>1</sup> Douk makutukuk amudok debeimi manak mato korohuk aria manak. Mahur mabrig youg manak wosik atin aria manak matogur enen unai nyeigur-inyum Kos. Arigaha ruwahepih manak matogur enyudok enen unai shahwaren um Rodes. Wata shopunek makutukuk Rodes aria mahur manak matogur wabur Patara. <sup>2</sup> Matogur agundok aria maparug onok korohuk douk kwakri kwunak um Fonisia iri. Namudok aria manak mato okwudok aria kworap manak. <sup>3</sup> Manak arigaha matigu unai Saiprus, aria makutin nyapeik anagagur eheh moshagraken manak matogur agudok shokugi nahobig Siria. Manak matogur agundok aria

korohuk kwanak kweir wabur nyeigur-iburum Tair. Kweir um shuniguk anah jah. <sup>4</sup> Maparug enesh shagipesh Jisas iri shape agundok aria mani eshesh mape atug wik. Iruhin ananin Mishin nyawish enesh Kristen aria nyeshuhur dodogowish atish shakrip Pol um mare nunak um Jerusalem, uwok. <sup>5</sup> Aria apakih nyumneh makri muni eshesh mupe ehi hatuh aria wata makutishukuk manak. Ihim-morim hagipesh Kraisi iri hani batowish aria amamiyu armago shanamap makutukuk abrudok wabur matogur adukibur um aria manak um youg agundok korohuk kweir um. Manak matogur aria ihim-morim moduk ohrubus anagasig um youg aria munek beten. <sup>6</sup> Douk munek beten jurug aria mani eshesh monokom roguhw. Apak wata manak mato korohuk aria eshesh shatanamum esheshig urusag.

### *Matogur Sisaria Aria Anan Profet Shahwaran Um Agabus Iri Nakripan Enen Barae Pol*

<sup>7</sup> Manak mato korohuk kwakutukuk Tair aria manak matogur wabur nyeigur-iburum Tolemes. Manak matogur menekumesh yopuhi eshesh Kristen aria mani eshesh mape atuh nyumnah abrudok wabur. <sup>8</sup> Ruwahepih aria makutukuk Tolemes manak matogur Sisaria. Aria makutukuk korohuk manak mani eshesh mape Filip ananit urupat. Aria anan douk nakripesh Iruhin ananin barae eshudok douk wata shutogur Kristen iri uwe um shukon aparuh Iruhin. Anan douk anan um amudok 7-poreim armam douk riguk shagraeham Jerusalem um hutaurum amam aposel iri. <sup>9</sup> Anan nabuki nubatiyu nugariyu aria owo madae urao anam armam uwe, uwok. Owo douk apa wakripesh Iruhin ananin barae kabi douk amam profet hakripeshen um.

<sup>10</sup> Mape Sisaria eneh nyumneh shopunek aria anan profet shahwaran um Agabus iri nape iri agudok shokugi nahobig Judia aria nabuhi Sisaria. <sup>11</sup> Nanaki agundok apak mapeum nohur Pol ananit let noweshik ananigas aiyas iri roguhw aria nakri, "Iruhin ananin

Mishin nyakri namudok. Nyakri, 'Eshesh Juda shape Jerusalem iri ta shenekesh namudok um anudok nagrem atudok let iri. Shuweshikan aria ta shunaur um kupaishi douk eshesh madae Juda iri uwe esheshis wis.'

<sup>12</sup> Douk memnek enyudok baraen aria mani enesh arpeshe shape Sisaria iri mape makripan dodog Pol um mare nunak um Jerusalem, uwok. <sup>13</sup> Aria Pol nakri, "Peyagwreh baraen dodogowip atip poreh namudok pakri punek eik-ihw apahw yowehw um maresh? Eik madae ikri um inak um Jerusalem aria shuweshike atuwe um uwe, uwok. Aria yakri shukri she igok um, douk wosik she igok. She um ituk Debeini Jisas ananin nyeigur nyuto iruhw." <sup>14</sup> Makripan dodog um mare nunak um douk mabirak matik uwok, aria madae mukri um mukripan dodog shopunek uwe, uwok. Aria makri, "Wosik Debeini ananin mour. Anan nukri nuneken mumam aria wosik nunekesh kabi anan nakri um."

*Pol Nanak Natogur Jerusalem Aria Nakrip Debeimi Um Mour Anan Nenekan Iri*

<sup>15</sup> Douk mape Sisaria eneh nyum-neh um jurug aria magapesh eshudok manak um Jerusalem. <sup>16</sup> Enesh shagipesh Jisas aria shape Sisaria iri douk sheirap manak. Manak aria sharap um anan arman douk ta munak muni anan mupe ananit urupat iri. Ananin nyeigur Nason aria shanabuki enyudok unai Saiprus. Anan kanak douk riguk nagipesh Jisas iri. <sup>17</sup> Douk manak matogur Jerusalem aria eshesh Kristen shanadudareh abom shanaki shenekumap yopuhi nyumnah.

<sup>18</sup> Ruwahepih aria mani Pol manak um mutik Jems. Ihim-morim eshesh Kristen esheshim debeimi douk shopunek hanaki hani Jems hantorum hape. <sup>19</sup> Pol natrum nenekumam yopuhi nyumnah um jurug, aria nakripesh um ihinyumorim mour douk Iruhin neneken nyatogur anan Pol ananin mour aria kupaishi douk eshesh madae Juda iri uwe shatrun aria shenek bilip um Debeini um.

*Pol Nemnek Debeimi Amamin Baraen Aria Nanak Nawish Iruhin Ananit Debeiti Urupat*

<sup>20</sup> Douk hemnek Pol ananin baraen aria hatuk Iruhin ananin nyeigur nyato iruhw. Aria hakripan hakri, "Apakin ashuken, nyak douk nyadukemesh. Sabaibi tausenab um Juda douk shenek bilip um Jisas. Aria eshesh ihishmorim douk dodogowish atish abom shagipesh enyudok lo seiwok Iruhin nakoguk Moses enyi.

<sup>21</sup> Aria enesh shakripesh um shakri nyak nyakrip ihishmorim Juda douk shanak shani kupaishi shape iri um shukutukuk enyudok lo. Shakri nyakripesh um mare shutah esheshim nugamimiruh yegeshiweruh, mare shugipesh apak Juda apakih aih. <sup>22</sup> Adur apak madukemesh. Eshesh ta shumnek um agundok nyak nyanakumori. Namudok aria ta munek maresh? <sup>23</sup> Aria ta nyunekesh kabi douk apak mukripenyum. Apak agundok douk nubatim anam apakimi armam hakri enen adurin atinyi baraen abom um Iruhin um hunek enesh eshudok eneshenesh. <sup>24</sup> Karemam aria nyunak um nyugipesh ihishmorim aih. Puneken um Iruhin nutrip nukri ipak wosik abom yopipari. Aria nyak wosik nyubuk-umam utabor nyutor-umam ofa um amam shopunek huhwar amamigos baragos. Nyunekesh namudok aria ihishmorim arpeshe ta shudukemesh shukri ihinyumorim baraen shakripesh um nyak iri douk madae adurin uwe. Aria eshesh wosik ta shudukemesh um nyak wosik nyagipesh enyudok Iruhin ananin lo. <sup>25</sup> Aria arpeshe douk eshesh madae Juda aria shenek bilip iri douk menekumesh anap shup makripesh enyudok baraen riguk maweshiken nyakus atugun iri. Baraen enyudok. Mare shuwok worigun mahish douk shenek ofamesh um madae adurimi god omi iri uwe, mare shuwok owishibor, mare shuwok mahish douk shakwunishesh meyoh shagok shatahesh iri, armam armago mare shunek wehrur meyoh uwe, uwok."

<sup>26</sup> Pol nemnek debeimi amamin baraen aria ruwahepih narao amudok nubatim armam hanak henek ehudok aih um Iruhin nutrum nukri wosik amam douk

yopum. Aria Pol nanak nawish Iruhin ananit debeiti urupat nakripaguk amam pris um ahudok nyumnah douk ta hunek enyudok nyunak nyutuh aria hutogur yopum abom ahi, aria um agundok amam sisig atin hurauri eshudok aria amam pris hunek ofamesh um huko Iruhin.

*Eshesh Juda Shawish Shasuhw Pol Numun Iruhin Ananit Debeiti Urupat*

<sup>27</sup> Douk ahudok 7-poreih nyumneh henek enyudok um hurukatin um hutuh aria enesh Juda douk shape iri agudok shokugi nahobig Esia iri shatik Pol nawish nape numun Iruhin ananit debeiti urupat. Namudok aria shakripesh enen rohwin baraen sabaishi arpes sheshuhuri juwehosish um aria shanak shasuhw Pol. <sup>28</sup> Shasuwan aria shahwar shakri, “Ipak Israel, arigah yowi taurumap! Arman anudok douk nanak ihirub warub nakrip ihish arpes um shukri uwok um apak Israel um atudok Iruhin ananit debeiti urupat shukri yowetari tabo susih iri. Aria shopunek nakripesh um nununu Iruhin ananin lo seiwok nakoguk Moses enyi. Aria madae nunek enyudok atin uwe, uwok. Aria shopunek narauri anam kupaimi armam douk amam madae Juda iri uwe hanaki hanak hawish numun narub atudok Iruhin ananit urupat tataoum. Hawish aria henek Iruhin ananit urupat goutukwit.” <sup>29</sup> Shakri namudok um maresh, anob nyutob douk shatik Trofimius nape iri Efesus iri nani Pol hape Jerusalem aria shakri Pol naran hawish narub numun atudok Iruhin ananit urupat tataoum.

<sup>30</sup> Namudok aria ihishmorim arpes shape Jerusalem iri shakitak yowiyokuk aria shape shahwar shanaki shanak aria shahur shanaki shantorum. Shanaki shasuhw Pol shanukan shatogur aduk Iruhin ananit debeiti urupat aria arigas shawaruguk witog.

*Debeini Soldia Narawi Ananim Soldia Hanaki Haraoguk Pol*

<sup>31</sup> Eshudok sabaishi arpes shakri shubo Pol nugok aria ahudok atuh baraen nyanak nyatogrum debeini um sabaimi soldia iri, eshesh Rom esheshim. Shakripan namudok shakri, “Ihishmorim shape

Jerusalem iri juwehosish aria shape shahwar shanaki shanak.” <sup>32</sup> Namudok aria ahudok atuh narao anam debeimi hagimaguk anan iri hani anam soldia aria hahur habuhukuk um eshudok sabaishi arpes. Douk eshesh Juda shatik anudok debeini um amam soldia nani iri ananim soldia hanaki aria wata shakutun-ukuk um agundok shanum. <sup>33</sup> Anudok debeini soldia nanak um Pol nasuhwan aria dodogeshin um ananim soldia huweshikan biyab senab. Aria narigesh nakri, “Anudok meini arman aria nenek maresh?” <sup>34</sup> Aria eshudok sabaishi arpes, enesh shahwarari shakripani enen baraen. Enesh shahwarari shakripani kupainyi. Shahwar shakripani namudok aria anudok debeini soldia nabirak um numnek baugenyum baraen nabirak natik uwok. Namudok aria neshopok amam soldia um huran huwish anat amam soldia amamit urupat. <sup>35</sup> Amam soldia haran hanak hatogur hurukatin um atudok urupatig beiwog aria hatukag hagrauruk iruhw meyoh. Um maresh? Eshesh arpes juwehosish abom aria dodogowish atish um shakri shon nugok. <sup>36</sup> Ihishmorim shanaki aria shahwar shakri, “Buwon nugok!”

*Pol Naworumesh Baugos Um Agundok Anan Nenek Bilip Um Kraiss Um*

<sup>37</sup> Amam soldia hurukatin um hurao Pol huwish amamit urupat aria nakrip debeini soldia nakri, “Ta wosik ikripen enen baraen aka, uwok?”

Aria anudok debeini soldia narig Pol nakri, “Nyak nyadukemen enyudok kupainyi baraen Grik aka?” <sup>38</sup> Eik yakri nyak ta anudok arman douk napeiri Isip iri. Anob nyutob riguk nanaki nohur wanohw nani gavman aria neyotu narik um 4,000 poreim armam hasuhw wanohwishi eshudok aria hanak um wehigunum arpes uwok um.”

<sup>39</sup> Aria Pol wata nakripan nakri, “Eik anan um Juda. Sheyubuki debeiburi wabur Tarsus douk bape agudok shokugi nahobig Silisia iri. Eik douk yani eshesh abrudok wabur nyeigur nyato iruhmobur iri atish arpes. Aria yakri nyukripe

wosik um ikripesh eikin baraen eshudok arpesh.”<sup>40</sup> Anudok debeini soldia nakripan wosik aria Pol nakitak neyotu nowurumesh rogur arigaha mukareg aria nape neyagwreh enyudok kupainyi baraen Hibru aria nape nakripesh ananin baraen.

## 22

<sup>1</sup> Nakripesh namudok, nakri, “Eikim ashukenyim owarhim aria yakenyim, ipak punnek eik. Douk yakri ibeimep ipakin baraen aria ikripep adurin baraen um eik.”<sup>2</sup> Douk shemnek um neyagwreh um eshesh kanak Juda esheshin kupainyi baraen Hibru aria sheyotu mukareg abom.

Douk mokureg aria Pol nakri,<sup>3</sup> “Eik douk anan um Juda aria sheyubuki debeiburi wabur Tarsus agudok shokugi nahobig Silisia. Aria yakitak yopuwe abrudok wabur Jerusalem. Arman shahwaran um Gamaliel iri gamo nenek skulume wosik um ihinyumorim apakish yamehesh esheshin lo douk seiwok Iruhin nakoguk Moses enyi. Namudok aria riguk, eik douk dodogoiwe atuwe abom yagipesh Iruhin kabi ipak ihipmorim douk pape iri um.”<sup>4</sup> Aria yenekesh enenyenen armam armago douk shagipesh ahudok Yah um bilip um Jisas iri. Yakri um shugok abom. Yasuhw armam armago shopunek yoweshikesh senab aria yenyigresh shape shunuweshik-ati urupat.<sup>5</sup> Debeini pris abom nani ihim-morim eshesh Juda esheshim debeimi hape hasuhw kwotog iri douk hadukemesh. Aria amam ta hukripep um enyudok yakripep-enyi baraen douk adurin. Amam henek shus hekeyas yasuhwas um ashukenyim owarhim amam Juda hape Damaskus iri aria yanak. Yanak um iweshiki arpesh shagipesh ahudok Yah iri aria iraeshi um Jerusalem. Iraeshi aria debeimi hunekesh shurao eriger um enyudok sheneken iri.

*Pol Nakripesh Um Agundok Natogur Kristen Um*

<sup>6</sup> Douk yanak arigaha hurukatin um nyumnah aun nawaruruh aria hurukatin um inak itogur Damaskus. Aria

ahudok atuh anat tatrugun abom iri lait tabuhi gani iruhw utag tabuhi agundok eik yeyotu um, aria bogaragun abom.<sup>7</sup> Namudok aria yabuh yatu yakus atap aria yemnek anah mah aria enyudok arpen nyakripe nyakri, ‘Sol Sol, nyak nyape nyae nyenek enenyenen um eik um maresh?’<sup>8</sup> Aria eik yarig yakri, ‘Debeini, nyak meinyi?’

Aria nakri, ‘Eik Jisas douk yanaki wabur Nasaret iri. Douk nyak nyape nyae nyeneke enenyenen iri.’<sup>9</sup> Amudok heire iri armam, lait wosik hatrut. Aria anudok nani eik wape weyagwreh iri, anan mah douk madae humnekah uwe, uwok.

<sup>10</sup> Aria eik yarig yakri, ‘Debeini, douk ta inek maresh?’

Aria debeini nakripe nakri, ‘Kakitak nyunak nyuwish abrudok wabur Damaskus. Nyuwish aria ta shukripen um ihinyumori mour douk eik yagraehen yeshopoken um nyak nyuneken iri.’<sup>11</sup> Yatik atudok tatrugun abom iri lait aria nabes seshuke madae itrugun uwe. Namudok aria amudok eikim heire iri hasuhw eikin rogur aria manak mawish wabur Damaskus.

<sup>12</sup> Aria abrudok wabur Damaskus anan arman shahwaran um Ananias iri douk nape. Anan nagipeshen wosik Iruhin ananin lo. Nenek lotu um douk nakri adurin atin nenek lotu. Aria ihish Juda shape Damaskus iri shatrun shakri anan yopunyi arpen.<sup>13</sup> Anan Ananias nanaki neyotu hurukatin um eik aria nakri, ‘Eikin ashuken Sol, wata trugun.’ Aria abudok nyutob abom wata shopunek yatrugun aria yatrungun.<sup>14</sup> Aria nakripe nakri, ‘Ohwakim yamehem amamin Iruhin nagraehenyum nyudukem enyudok mour douk anan nakri um nyak nyuneken iri. Shopunek anan nagraehenyum nyutik ananin arman douk apa nenek yopuhi atih aih iri aria nyumnek anan kanak nini nyak piyagwreh.’<sup>15</sup> Nyak ta nyukripesh ananin baraen. Nyukrip ihishmorim arpesh um enyudok douk nyatrin aria nyemneken iri.<sup>16</sup> Aria douk wata nyupe nyutrugun um maresh? Kakitak nyunek baptais. Nyusuhw ananin nyeigur um

nenek baptaisumen abar aria ta nukweshih nyakish yoweishi inahos.’”

*Pol Nakripeshum Agundok Iruhin Neshopokan Nanak Nakripesh Baraen Kupaishi Arpesh Um*

<sup>17</sup> “Aria wata yatanamori um Jerusalem. Yanaki yape aria abudok nyutob yawish numun narub agundok Iruhin ananit debeiti urupat tataoum aria yape yenek beten obi nyutob, eik douk yatik enen enyudok kabi yabo yomnis yatrin um.

<sup>18</sup> Yatrin yatik Debeini aria nakripe nakri, ‘Arigas ahudok atuh nyukutukuk Jerusalem nyunakuk. Um maresh? Arpesh shape agundok iri ta mare shumnek nyakin baraen douk nyukripeshen um eik iri.’

<sup>19</sup> “Aria eik wata yakri, ‘Debeini, eshesh kanak shadukemesh abom um nubokadae eik douk yanak um eshesh Juda shape sheneyagwreh baraen-ogwi urusag yasuhw eshudok shenek bilip um nyak iri yoweshikesh aria yaesh. <sup>20</sup> Aria riguk abudok nyutob habo Stiven douk nakripesh nyakin baraen iri nagok obi nyutob, eik shopunek yeyotu hurukatin yatrum aria yakri wosik. Aria abudok nyutob hape han nagok obi nyutob, eik douk yeyotu yape yeyohumam rupeh.’

<sup>21</sup> “Aria Debeini nakripe nakri, ‘Kare, ta ishopoken nyunak um rougun um eshudok arpesh douk eshesh madae Juda iri uwe.’”

*Pol Nakrip Amam Soldia Um Anan Douk Anan Eshesh Rom*

<sup>22</sup> Eshudok armam armago shape shemnek Pol arigaha nanak nakri enyudok baraen um nakri um nunak um kupaishi douk eshesh madae Juda iri uwe shapeum, aria eshesh shohur nokwatog shape shahwar debeg shakri, “Buwon, buwon nugok nunakuk. Eshudokmori arpesh douk madae shukri wosik um shupe agundok atap uwe, uwok.”

<sup>23</sup> Eshesh shape shahwar sheyarik rupeh, shohur nyupruk shawashak kwato iruhw. <sup>24</sup> Aria debeini soldia dodogeshin um amam soldia haran hawish amamit urupat. Anan nakri nudukemesh aria nakrip amam soldia um huprukan enesh

eshudok aria horigan arigas um nudimam baugos um agundok eshesh Juda shape shahwar shagipeshan namudok um. <sup>25</sup> Aria howeshikan neyotu um hakri hureyan enesh eshudok aria nohur nokwat nakrip anan debeini um 100-poreim soldia aria nakri, “Aria ipak pakri lo wosik nyakripepum pubo enen arpen um eshesh Rom aka? Ipak douk watak punekume kwot uwe aria parik poreye eshudok. Ehudok aih douk pakri penek yopihi aka?”

<sup>26</sup> Douk anudok soldia nemnek enyudok aria nanak abom um debeini soldia aria narigan nakri, “Nyak nyakri nyunek maresh? Anudok arman douk nani eshesh Rom atish arpesh meyoh abom.”

<sup>27</sup> Aria anudok debeini soldia nanak narig Pol nakri, “Nyak douk nyani eshesh Rom atish arpesh o mumam?”

Aria Pol nakripan nakri, “Adur wo.”

<sup>28</sup> Aria anudok debeini soldia nakri, “Eik yawashok debeibori utabor yatorin aria douk yatogur anan um Rom.”

Aria Pol nakripan nakri, “Eik uwok. Eikish amakenyish riguk shani eshesh Rom shatogur atish arpesh aria douk eik wata yagipeshesh namudok atin.” <sup>29</sup> Aria ahudok atuh amudok soldia hakri um hubo Pol aria wata hakutunukuk. Debeini soldia natik um Pol douk iganigadae nakripam howeshikan neyotu. Shopunek nemnek um Pol nakri anan douk anan eshesh Rom aria anan nanogugur abom.

<sup>30</sup> Anudok debeini soldia douk nakri abom um nudukem baugenyum baraen um eshesh Juda shakri shunekuman kwot Pol um. Namudok aria ruwahepih nakweshihanuk um senab douk haweshik Pol obi. Aria nenekumam baraen debeimi pris hani ihim-morim debeimi Juda douk apa hape hasuhw kwot iri hanaki hantorum. Douk hantorum iyoh, aria narauri Pol nanaki nakripan neyotu agundok debeimi hantorum hapeum.

## 23

*Pol Nakripam Baraen Amam Debeimi Um Eshesh Juda Esheshim Hasuhw Kwotog Iri*



<sup>1</sup> Pol neyotu natrum duk amudok debeimi Juda apa hape hasuhw kwotog iri aria nakripam nakri, “Eikim bahenomi, eikih nyumneh yape yenek mareh aih o mour arigaha doukih aria Iruhin natik eik um, eikim urkum douk mor yopum abom.” <sup>2</sup> Pol nakri namudok aria debeini pris abom Ananias neshopok anam armam heyotu hurukatin um Pol iri um habowan nokwat. <sup>3</sup> Aria Pol nakripan nakri, “Nyak atin nyape kabi onok arbaok nadukehok douk shawatomok shigorih-witi beit aria shatrak shakri onok namukwi iri. Nyemnek, Iruhin ta nen. Nyak douk nyape agundok um nyugipesh lo aria nyunekume kwot. Aria wata nyabrig lo um nyakripam um hubo eik.”

<sup>4</sup> Aria anam heyotu hurukatin um Pol iri hakripan hakri, “Nyak nyape nyeyagwreh yoweinyi baraen um Iruhin ananin debeini pris.” <sup>5</sup> Aria Pol wata nakri, “Bahenomi, eik madae idukemesh um anan douk debeini pris abom uwe, uwok. Yadukemesh um baraen nyetem Iruhin ananik Buk iri nyakri namudok. Nyakri, ‘Mare piyagwreh yoweinyi baraen um anudok arman douk nape debeini aria nataurum ipakish arpesh iri, uwok.’ ”

<sup>6</sup> Pol natrum aria nadukemam amudok debeimi douk hantorum hape iri. Anam Farisi aria anam Sadyusi. Namudok aria neyagwreh debeihi mah nakripam namudok debeimi hape hasuhw kwotog iri. Nakri, “Eikim bahenomi, eik douk anan Farisi aria eikin yain shopunek anan Farisi. Eik yadukemesh aria yakri adur abom um shagok iri ta wata shukitak. Aria douk yakrip arpesh enyudok baraen. Aria baugos um agundok shenekume atudok kwot um douk namudok.”

<sup>7</sup> Pol nakri enyudok baraen aria amam Farisi hani Sadyusi hape hanitok. Namudok aria ihm-morim amudok hanaki hantorum iri debeimi hakitak hanadiyogurum. Anam hani amam Farisi aria anam hani amam Sadyusi. <sup>8</sup> Um maresh? Amam Sadyusi apa hakri shagok iri ta mare wata shukitaki, uwok. Shopunek hakri sagabehos aria Iruhin ananish enselahos douk hakri madae enesh uwe. Aria amam Farisi apa hakri shagok iri ta wata

shukitak aria enselahos aria sagabehos adur shape.

<sup>9</sup> Namudok aria hape hahwar hanariguk atin. Anam henek skulumesh um lo iri douk shopunek anam Farisi. Amudok armam hakitak heyotu heyagwreh debeg atin aria hakri, “Apak madae muparug enesh yoweishi inahos uwe, douk anudok arman nenekesh iri, uwok. Enen sagab o enen Iruhin ananin ensel nyukri nyuni anan nyiyagwreh aria anan douk nukri enyudok baraen um, wosik ananin baraen douk adurin.” <sup>10</sup> Hanatutukem aria baraen nyatogur dedeben atin. Namudok aria debeini soldia nanogugur abom. Nakri ta husuhw Pol honukan tukwotukwan aria huprukeshan um biyeh. Namudok aria neshopok ananim soldia um hubuh huraui Pol nukutukuk amudok debeimi aria huran huwish amam soldia amamit urupat.

<sup>11</sup> Aria abudok wab, Debeini nanaki neyotu nagim Pol aria nakri, “Nyiyotu dodogowin atin aria mare nyukri nyunogugur, uwok. Dodogowin atin nyukripesh um eikin baraen agundok Jerusalem aria debeiburi wabur Rom shopunek nyak ta nyunekesh namudok atin.”

### *Amam Juda Habo Baraen Um Hubo Pol Nugok*

<sup>12</sup> Ruwahepih ruhur watak reir amam Juda hanaki hantorum hape atugun aria hakri iruhw hakri adur atin um mare huwok worigun o abar arigaha hubo Pol nugokuk. <sup>13</sup> Shadareham um amudok habo baraen namudok iri douk sabaimi abom heshagrakuk 40-poreim. <sup>14</sup> Aria hanak hatik debeimi pris hani eshesh Juda esheshim debeimi aria hakripan hakri, “Apak mabo enen adurin atinyi baraen um makri mare muwok anagun worigun arigaha mubo Pol nugok. <sup>15</sup> Namudok aria ipak puni amudok anam debeimi hape hasuhw kwotog iri punekuman baraen debeini soldia abom um nuraui Pol nubuhi agundok ipak pape um. Pukripan pukri ipak pakri gamo porigan um nukripep baugenyum ananin baraen. Aria apak ta apa mutrugun mupe yah. Ta mare arigas nunak nutogragu um ipak aria ta mon nugok yah meyo.”

<sup>16</sup> Aria Pol ananik mohwukwik okwok-win nuganin iganigadae nemneguk um agundok hakri hubo Pol nugok um. Namudok aria nanak nawish amam soldia amamit urupat aria nakrip Pol. <sup>17</sup> Aria Pol nahwar anan debeini um 100-poreim soldia iri nanaki aria nakripan nakri, “Nyarao anudok weroroini arman um debeini abom soldia. Anan nakri nukripan enen baraan.” <sup>18</sup> Aria anudok soldia naran um debeini soldia abom aria nakripan nakri, “Anudok Pol douk nonoweshik iri nahware yanak aria nakripe um iraouri anudok weroroini arman um nyak. Um maresh? Anan douk enen baraan nakri nukripen um.”

<sup>19</sup> Aria anudok soldia nasuhw ananin rogur naranuk um anagas amam atum aria narigan nakri, “Nyak maren baraan douk nyakri nyukripe-umen?” <sup>20</sup> Aria anudok weroroini arman nakri, “Amam Juda habo baraan um hakri nuhut horik nyak um nyurao Pol nyubuh um amam debeimi Juda hape hasuhw kwotog iri. Amam henek rohw um hakri gamo horigan shopunek um nukri baugenyum ananin baraan. <sup>21</sup> Aria nyak mare nyumnekan. Um maresh? Sabaimi armam heshagraguk 40-poreim ta hunabeshuk hupe hutrugun yah. Amam habo enen adurin atinyi baraan um mare huwok worigun o abar arigaha hubo Pol nugok aria douk ta huwok worigun. Douk amam hape henek eneshenesh hape hatrugun um nyak nyukripam wosik aria douk huneken.” <sup>22</sup> Aria anudok debeini soldia nakripan nakri, “Mare nyukrip enesh arpesih um agundok nyakripe enyudok baraan um, uwok.” Aria neshopokan nanak.

*Debeini Soldia Narao Pol Nanak um Debeini Um Gavman Nyeigurinum Feliks*

<sup>23</sup> Aria anudok debeini soldia abom nahwar biom debeimi um 100-poreim soldia iri hanaki aria nakripam nakri, “Punak purao 200-poreim soldia, purao 70-poreim amudok anam soldia douk hahur hwasahos iri, purao 200-poreim soldia hasuhw burawos iri aria pukutukuk agundok kwehigib wab atub punak um Sisaria. <sup>24</sup> Punek redim enesh hwasahos um Pol nahuresh iri. Aria puran

wosik mare enesh yoweishi inahos shuto-gruman arigaha nunak nutogurum Feliks douk debeini um gavman iri.” <sup>25</sup> Aria anudok debeini soldia abom nenek anap shup. Baraan nyetem shupe iri nyakri namudok. Nyakri,

<sup>26</sup> Eik Klodius Lisias yenekumenyugu apudok shup nyak debeini arman Feliks douk nyape debeini um gavman iri. Yopuhi nyumnah nyak.

<sup>27</sup> Eshesh Juda shasuhw anudok arman aria hurukatin um shakri shon nugok. Aria eik yemnek um anan douk anan um eshesh Rom aria eik yani eikim soldia manak maranukuk aria nape wosik. <sup>28</sup> Yakri idukem baugenyum baraan douk shako anudok arman um aria yaran yabuh um esheshim debeimi douk hape hasuhw kwotog iri. <sup>29</sup> Mabuh aria madae iparug enesh nenekesh iri yoweishi inahos uwe, uwok. Um ta mon nugok-umeshi o muweshikan nupe shunuweshik-ati urupat um. Yarigesh aria shakripe sheneman baraan um shakri nabrig enen esheshin lo. <sup>30</sup> Douk arigaha baraan nyatogrume um agundok amam Juda habo baraan um hakri hon nugok um aria douk anudok arigas yeshopokan nanakumogu nyak. Aria yakrip amudok douk hunekuman baraan iri um nyak nyupe nyumnek nyakigos arigos aria douk hunekuman baraan. Um nyak nyumnek aria nyudukem enyudok douk hakri hunekuman baraenyeni.

<sup>31</sup> Namudok aria amam soldia hagipesh amamin debeini ananin baraan aria abudok wab harao Pol hanak arigaha hanak hatogur wabur shahwarabur um Antipatris. <sup>32</sup> Gagruk ruwahepih aria amudok hanak atapih iri soldia wata hatanam um amamig urusag gani Jerusalem. Aria amam hahur hwasahos iri atum haran habuh um Sisaria. <sup>33</sup> Douk haran hanak hatogur hakon shup debeini um gavman iri aria horaguk Pol um ananis wis. <sup>34</sup> Anudok debeini um gavman iri natik shup aria narig Pol um agudok shokugi nahobig douk anan nanaki agi. Aria Pol

nakripan nakri anan douk nanaki agudok shokugi nahobig Silisia. <sup>35</sup> Douk nemnek namudok aria nakrip Pol nakri, “Amudok henekumen baraen iri hunak hutograri aria ta kadak imnek nyakin baraen.” Aria anudok debeini um gavman iri nakrip amam soldia um huweshik Pol nupe Herot ananit debeiti gavmanit urupat.

## 24

### *Eshesh Juda Esheshim Debeimi Henekuman Kwot Pol*

<sup>1</sup> Aria 5-poreih nyumneh hanak hadiguk aria debeini pris abom Ananias nanak um Sisaria. Nani anam eshesh Juda esheshim debeimi hani anan arman nyeigurinum Tertulus. Anan douk nadukem eshesh Rom esheshin lo aria ta nutaurum amam Juda niyagwreh-umam baraen. Habuhi aria hakrip debeini gavman um enyudok baraen douk hakri huneken um Pol iri. <sup>2</sup> Feliks nahwar Pol nanaki aria Tertulus nape nenek-uman baraen. Nakri namudok. “Debeini gavman Feliks, nyak yopuni arman aria apak douk mape wosik roubi nyutob abom wanogwiruh madae anaruh uwe. Nyak nyataurum apakish arpes nyagapesh eneshenesh eshudok shape wosik ihirub warub. Aria apak douk mape wosik abom meshagrakuk kabi riguk marik mape um. <sup>3</sup> Namudok aria apak manadudareh um enyudok aria menek tenkyumen.

<sup>4</sup> Yakri uwok um iraoumen roubi nyutob um iyagwreh um, aria douk yarigenyum nyukri wosik nyutaurumap aria nyumnek apakinyi banenyi baraen.

<sup>5</sup> Matik anudok arman douk nape nenek sabaishi yoweishi inahos. Napeum nenek eshesh Juda shape ihirub warub bape agudok atap iri shohur wanogwiruh aria shakri shuni gavman shurpak. Aria anan douk debeini um anap awiropish arpes douk shahwaresh um Nasaret iri. <sup>6</sup> Shopunek anan douk nakri um nunek atudok Iruhin ananit debeiti urupat tunabosusih, aria apak manak masuhwan. [Aria douk makri munekuman kwot um enen apakin lo. <sup>7</sup> Aria Lisias douk debeini um amam soldia iri

nanaku dodogowin atun aria natrupanari. <sup>8</sup> Namudok aria Lisias nakri douk shakri um shunekuman baraen aria douk shunaki agudok nyak nyape um aria shuneken-uman.] Douk nyukri nyorigan um, nyak kanak aria douk ta nyumnekan aria ta nyudukem ihinyumori douk apak makonenyi baraen douk adurin.” <sup>9</sup> Amam Juda shopunek hataurum Tertulus hape hakwiraeh henekuman sabainyi baraen Pol. Aria hakri enyudok ihinyumorim baraen douk adurin atin.

### *Pol Nakripan Ananin Baraen Feliks*

<sup>10</sup> Aria Feliks douk debeini um gavman iri nauraman rogur Pol um niyagwreh. Aria Pol nakripan nakri, “Eik yadukemesh um nyak douk nyape nyutaurum eshudok sabaishi arpes shape agudok shokugi nahobig iri um sabaishi kwarahos aria nyasuhw esheshig kwotog. Aria douk eik yanadudareh abom um iwanamam amamin baraen aria nyak nyumnekan. <sup>11</sup> Douk nyukri nyorigesh akure, nyak kanak ta nyumnek baraen namudok. Nabokadai, douk 12-poreih nyumneh hanak hadiguk, eik douk yanak um Jerusalem um inek lotu um Iruhin. <sup>12</sup> Aria amam Juda henekume kwot iri douk madae hutruue ini enen arpen upe unotutukam aria unitok baraen gani numun Iruhin ananit debeiti urupat uwe, uwok. Madae shutruue isonuk sabaishi arpesh inekesh juwehosish gani numun eshesh Juda shape shenyagwreh baraenogwi urusag uwe o anabik um abrudok wabur Jerusalem, uwok. <sup>13</sup> Aria enyudok baraen iganigadae henekume kwot um ta mare huparug enen baugenyum, um nyak nyudukemesh nyukri amam hakriyen iri baraen douk adurin um, ta uwok.

<sup>14</sup> Aria enyudok douk eik yakri ikripenyum baraen douk adurin. Baraen enyudok. Eik yagipesh anah sikih Yah aria yenek lotu um apakish yamehesh esheshin Iruhin. Aria ahudok yagipeshah iri Yah, eshesh Juda shakri ahah douk madae wosik yopuhi uwe, uwok. Eik yenek bilip um enyudok ihinyumorim baraen douk nyetem Iruhin ananin lo iri. Enyudok baraen douk seiwok Moses

nakripeshenyuk iri nyani enyudok enen douk amam profet henyemaguk iri. Madae inabuken arigos uwe. <sup>15</sup> Eik yenek bilip yakri adur kabi amudok armam um. Eik yadukemesh abom um Iruhin ta nuhur ihishmorim shagok iri yopishi arpes shuni yoweishi aria ta wata shukitaki shupe. <sup>16</sup> Namudok aria ihih nyumneh eik dodogoiwe atuwe yenek yopuhi aih aria urkum mor madae ikri eik yenek enesh yoweishi inahos uwe, uwok. Yakri uwok um inek eneh aih aria Iruhin nini arpes shutrue shukri yenek yoweishi inahos, uwok.

<sup>17</sup> Yanak anarub kupairubi warub yapeik enesh kwarahos aria wata yatanamori um Jerusalem. Yaraumeshi anabor utabor enesh eikish arpes eshesh Juda douk yaruhish iri. Aria shopunek yanakmori inek ofa um enesh eshudok um Iruhin. <sup>18</sup> Yenek enyudok aria yagipesh eneh apakih aih shopunek um Iruhin nutruwe abom itogur yopue iri agundok ananis nabes um. Yawish yeneken numun narub agundok Iruhin ananit debeiti urupat tataoum aria shatrue. Madae sabaishi arpes shuni eik mupe gani numun uwe. Madae enesh shuni eik mupe miyagwreh munitok muhwar uwe, uwok meyoh. <sup>19</sup> Aria anam Juda hapei agudok shoguhi nahobig Esia iri hawishi aria hametege. Douk amudok armam enen baraen um, douk hunaki agundok nyakis nabes um aria hunekume baraen. <sup>20</sup> Madae anam amudok armam wosik hukripenyum hemneke yakri yenek maresh yoweishi inahos nobokuhieb nyutob douk yeyotu yape yeyagwreh agundok amam debeimi Juda hantorum hape hasuhw kwotog um. <sup>21</sup> Aria atin baraen meyoh douk yeyotu agundok amam hapeum aria yahwar yakri namudok. Yakri, 'Baugenyum baraen um doukih nyumnah penekume kwot um douk penek kwotume um agundok yakri adur um shagok iri ta wata shukitak-umori.' "

<sup>22</sup> Feliks anan douk nadukemesh jurug um Debeini ananah Yah, um agundok shunek bilip um Jisas aria shunekkeh iri aih. Namudok aria nakrip amam Juda

um hupe hutrugun. Nakripam nakri, "Debeini soldia abom Lisias nunaki aria kadak igapesh enyudok ipakin baraen." <sup>23</sup> Aria nakrip anan debeini um 100-poreim soldia iri um nunyigur Pol nuwish nupe shunuweshik-ati urupat. Aria nakripan um mare niyohan abom hurukatin, uwok. Nakripan um abudok nyutob Pol ananishi shukri shunaki shukon enesh eshudok douk anan Pol nukriyesh iri obi nyutob, anan soldia douk mare nukripesh um uwok.

### *Feliks Noweshik Pol Nape Shunuweshik-ati Urupat Um Biyesh Kwarahos*

<sup>24</sup> Eneh nyumneh hanak hadiguk aria Feliks nani iri ananik irohukwik Drusila shanaki. Okwok douk onok Juda. Shanaki aria Filiks nenekuman baraen Pol nanaki aria nemnek enen baraen um agundok shenek bilip um Krai Jisas um. <sup>25</sup> Aria Pol nape nakripan um shunek yopihi aih um. Nakripan um agundok sheyoh eshesh kanak um. Aria shopunek nakripan um agundok kweipon Iruhin ta nunekumap baraen um yoweishi inahos iri um. Douk Feliks nemnek namudok aria nanogugur. Aria nakrip Pol nakri, "Doukih jurug aria nyunak douk. Nuhutibum anob nyutob ikri imnekenyum obi nyutob, eik ta wata inekumen baraen nyunaki."

<sup>26</sup> Aria abudok nyutob Feliks douk nape natrugun um Pol um nakri Pol ta nunek grisuman nukon anabor utabor aria nukweshihan nunak meyoh. Namudok aria sabaihi nyumneh nahwar Pol nanaki nani anan hape heyagwreh baraen.

<sup>27</sup> Douk arigaha biyesh kwarahos shanak shadiguk aria Porsius Festus narao Feliks ananin mour nape debeini um gavman. Feliks nakri nunek eshesh Juda shunadudareh-uman, namudok aria nakutukuk Pol nonoweshik napeik.

## 25

### *Pol Nakri Sisar Douk Nape Debeini Gavman Um Rom Iri Numnek Ananit Kwot*

<sup>1</sup> Festus nanaki aria narao mour nape debeini um gavman um agudok shokugi nahobig Judia. Douk nape biyeh atih nyumneh um jurug aria nakutukuk Sis-aria aria natoum Jerusalem. <sup>2</sup> Nakih

Jerusalem aria amam debeimi pris hani eshesh Juda esheshim debeimi hanaki henekuman baraan Pol hape hakrip Festus. Aria hakripan dodogowim atum hakri namudok. <sup>3</sup> “Nyutaurum apak aria nyurauri Pol nunaki agundok Jerusalem.” Um maresh? Amam habo baraan um hakri nunaki aria hon nugokuk yah. <sup>4</sup> Aria Festus nakripam nakri, “Pol nonoweshik nape Sisaria aria eik kanak hurukatın um ta wata itanam inak. <sup>5</sup> Namudok aria ipakim debeimi huni eik munak. Nukri nenek enen yoweinyi um, amam wosik hunekuman kwot.”

<sup>6</sup> Festus nani eshesh shape Jerusalem 8-poreih o 10-poreih nyumneh hadiguk aria wata nabuhum Sisaria. Ruwahepih nanak nape urupat nasuhw kwotog um aria nakripam um hurauri Pol nunaki. <sup>7</sup> Douk Pol nanak natograri aria amudok Juda hapeiri Jerusalem habuhi hakitak heyotu herharihan aria hape hakri, “Anudok arman nenek sabaishi yoweishi inahos.” Hadukuman sabainyi baraan aria habirak um hiyabig Festus um amamin baraan douk adurin aria habirak hatik uwok.

<sup>8</sup> Aria Pol nabeimam baraan nakri, “Eik madae inek enen yoweinyi um eshesh Juda esheshin lo o atudok Iruhin ananit debeiti urupat o anudok arman Sisar douk nape Debeini gavman um Rom iri uwe, uwok.”

<sup>9</sup> Aria Festus douk nakri nunek amam Juda hunadudareh-uman, namudok aria narig Pol nakri, “Nyak nyakri wosik um nyunak um Jerusalem aria eik imnek enyudok nyakin baraan agundok o mumam?”

<sup>10</sup> Aria Pol nakri, “Atudok urupat douk yeyotuwat iri douk Sisar ananit abom. Eik ta inek kwot atudok atut urupat. Nyak kanak nyadukemesh abom. Eik douk madae inek enesh yoweishi inahos um eshesh Juda uwe, uwok. <sup>11</sup> Aria eik yabrig enen lo aria yenek enesh yoweishi inahos douk shukrium eik ta igokumesh iri um, enyudok douk wosik ta igok. Aria enyudok baraan amam Juda henekume kwot um douk madae adurin uwe, uwok. Namudok aria douk madae wosik um nyak nyuko eik um amam Juda amamis

wis uwe, uwok. Eik yakri pukripe inak um Rom um Sisar numnek eikit kwot.”

<sup>12</sup> Namudok aria Festus natanam nani ananim armam douk hadukemesh iri heyagwreh um jurug aria nakrip Pol nakri, “Nyak nyakri Sisar numnek nyakit kwot. Namudok aria wosik ta mishopoken nyunak um Sisar!”

### *Festus Nakrip Agripa Um Pol Ananit Kwot*

<sup>13</sup> Eneh nyumneh hanak hadiguk aria anudok king shahwaran um Agripa iri nani ananik mohwukwik Bernaisi shanakumori Sisaria. Shanakumori shutik Festus aria shunekuman yopuhi nyumnah. <sup>14</sup> Shape Sisaria eneh nyumneh hanakuk aria Festus nakrip anudok king um Pol ananin baraan. Nakripan nakri, “Anan arman nape shunuweshik-ati urupat douk riguk Feliks noweshikan napeik iri. <sup>15</sup> Aria nubokuhieg wik yanak um Jerusalem um eshesh Juda esheshim debeimi pris hani anam esheshim debeimi hape heneman baraan aria harigum eik ibeiman ananish yoweishi inahos.

<sup>16</sup> Aria yakripam yakri, ‘Apak Rom apakih aih, um showemesh sabaibusi bugabus kupaishi um, apak douk madae mudukemesh uwe, uwok. Arpen kwotog gupenyen iri, sagramatin nyiyotu agundok shenekumen baraan iri shapeum aria mishukabar-umen um nyuwanamesh baraan um eshudok shenemen kwotogumesh iri ba iyoh.’

<sup>17</sup> Namudok aria hani eik manaki aria madae anob nyutob banakuk meyoh uwe. Ruwahepih yanak yape kwotogit urupat aria yakripam um huran nuwishi. <sup>18</sup> Aria amudok henekuman baraan iri hakitak heyotu, aria baraan henekuman iri douk madae enen adurin uwe, um yoweishi inahos douk hakri nenekesh iri, uwok. Eik yakri amam ta hukri anan nenek enesh yoweishi inahos, aria uwok. <sup>19</sup> Amam atin juwehosim um anan um ahudok Yah shenek lotu um Iruhin um hani anan arman shahwaran um Jisas iri. Anan nagok aria Pol nakri anan wata nakitak nape. <sup>20</sup> Enyudokmori baraan, eik douk madae idukemesh uwe um agundok

inneken aria iparug baugenyum baraen um uwe, uwok. Namudok aria yarig Pol um yakri nukri wosik um nunak um Jerusalem aria eik innnek ananit kwot agundok. <sup>21</sup> Aria Pol nakri nunak um Sisar douk Debeini um apak Rom iri um numnek ananit kwot nugapeshen. Aria anan nakri nupe shunuweshik-ati urupat. Namudok aria eik yakri anan nupe shunuweshik-ati urupat arigaha meibi nyutob aria ishopokan nunak um Sisar.” <sup>22</sup> Aria Agripa nakrip Festus nakri, “Eik kanak yakri innnek anudok arman.”

Aria Festus nakripan nakri, “Wosik nuhut ta nyumnekan.”

### *Amam Soldia Harauri Pol Um Agripa Numnek Ananin Baraen*

<sup>23</sup> Ruwahepih aria Agripa nani Bernaisi sheneki yopuhi atih rupeh aria shanaki. Shanaki aria ehudok aih eshesh armam armago shenekesh um shatuk esheshish nyeiguhw shato iruhw um douk shenek yopihi. Shanaki aria shawish debeiti shantorum atari urupat, shani anam debeimi ami hani debeimi um abrudok wabur iri. Shawish iyoh aria Festus nakrip amam soldia harauri Pol hawishi. <sup>24</sup> Aria Festus nakri, “King Agripa nyani ipak ihipmorim pani ipak pape iri, ipak tiki anudok arman. Ihishmorim Juda armam armago shape agundok iri shani eshudok douk shape Jerusalem iri shanaki agundok eik yapeum aria shenekuman baraen shahwar debeg shakri, ‘Buwon nugok. Mare nupe, uwok.’” <sup>25</sup> Aria eik yatik um anan madae nunek enesh yoweishi inahos uwe um shenekan ta nugokumesh, uwok. Aria anan kanak nakri Sisar douk debeini um gavman iri numnek ananin baraen. Namudok aria eik yakri ta ishopokon nunak Rom. <sup>26</sup> Aria eik madae iparug enen ananin baraen gamo nyutogur uwe, um inekuman anap shup apakin debeini um gavman iri uwe, uwok. Namudok aria eik yauri anudok arman um nyak King Agripa nyani ipak ihipmorim shopunek um mumnek ananin baraen. Um mumneken wosik aria eik iparug enen baraen um inyem shup iri. <sup>27</sup> Um maresh?

Namudok douk madae wosik um ishopok enen nyonoweshik iri nyunak aria mare ishopok baraen um eshudok douk shenekumen baraen umesh iri um.”

## 26

### *Pol Nakripan Ananin Baraen King Agripa Iri*

<sup>1</sup> Douk Festus neyagwreh um jurug aria Agripa nakrip Pol nakri, “Nyak wosik douk nyiyagwreh nyakin baraen.”

Aria Pol nohur rogur nape nakripan ananin baraen namudok. <sup>2</sup> Nakri, “King Agripa, doukih eik yanadudareh um iwanamam baraen amam Juda douk henekenyume iri. Ibeyenyumam aria yakri nyak nyupe nyumneken um ihishmorim eshudok amam Juda henekume baraenyumesh iri. <sup>3</sup> Eik yanadudareh abom. Um maresh? Nyak nyadukemesh abom um ihihmori apak Juda apakih aih hani ihinyumori douk apa manitok baraen um mugipeshen sisigin atin um. Namudok aria yakri nyumnek eikin baraen aria mare nyukri arigehin arigas, uwok.

<sup>4</sup> Riguk wata shokuwe yape eikig nahobig obi nyutob, arigaha yanak yape Jerusalem arigaha douk, ihishmorim Juda douk shadukemesh, um agundok yape um o yaraen um. <sup>5</sup> Roubi nyutob shadukeme aria amudok Juda hukri, amam wosik hukriפש-umen. Shadukemesh um eik douk anan Farisi aria yagipesheh wosik amamih aih. Ehdok aih douk dodogowih atih abom heshagraguk ihishmorim aih douk amam Farisi hagipesheh henek lotu um Iruhin um. <sup>6</sup> Aria douk yeyotu agundok henekume kwot. Baugenyum baraen um agundok henekume kwot um douk namudok. Eik yakri adur yape yatrugun um Iruhin nunek enyudok nyutogur kabi seiwok nakripamuk adurin atinyi baraen apakim yamehem um ta nuneken nyutogurum. <sup>7</sup> Asudok apakis 12-poreis awiros shenek lotu um Iruhin nyumnah wab aria shakri adur shape shatrugun um enyudok baraen nyutogur adurin. Aria debeini king, eik yakri nyumnek.

Eik douk shopunek yenek bilip yape ya-trugun um eshudok. Aria baugenyum baraen um amam Juda henek kwot-ume um enyudok baraen um douk namudok atin. <sup>8</sup> Namudok mumam, um ipak enep Juda pakri mare munek bilip um agundok Iruhin ta wata nuhur shagok iri wata shukitaki?

<sup>9</sup> Riguk eik kanak yakri inek sabaishi eshudok um yakri ikwiraeh isuwokuk Jisas douk nanaki wabur Nasaret iri ananin nyeigur nyubuhuk. <sup>10</sup> Enyudok douk yeneken Jerusalem. Amam debeimi pris hoke big dodogoiwe um amam aria yoweshik sabaishi Iruhin ananish arpeshe shonoweshik shape. Aria abudok nyutob amam hakri hubo enesh Jisas ananish arpeshe shugok obi nyutob, eik douk shopunek yakri wosik um hesh shugok. <sup>11</sup> Sabaihi nyumneh yenekesh sharao debeiri eriger gani numunig um ihigwumormim eshesh Juda shape sheneyagwreh baraen-ogwi urusag. Yenekesh namudok um yakri shukonaguk agabus Debeini Jisas aria shiyagwreh enenyenen um anan. Juwehosiwe-umesh abom aria shopunek yanak um kupairubi rougnirub debeirubi warub um iyesh inekesh enenyenen.”

*Pol Nakripesh Um Agundok Natogur Kristen Um*

<sup>12</sup> “Yaesh namudok eshesh Kristen aria anah nyumnah amam debeimi pris heke big dodogoiwe um amam aria henek anap shup hekeyap yasuop yanak um Damaskus. Opudok shup pakri wosik um inekesh enenyenen eshesh Jisas ananish arpeshe. <sup>13</sup> Aria debeini King, yakripen adurin atin. Orokohunih um nyumnah yape yanak yah aria anat lait douk tabuhi tenek uhwinyumaguk wah abom iri tabuhi gani iruhw utag tabuhi tasuhw eik yani amudok heire mape manak iri. <sup>14</sup> Namudok aria apak ihipmormim mabuh matu makus atap, aria yemnek anah mah. Aria enyudok arpen nyeyagwrehi enen baraen Hibrui iri nyakripe nyakri, ‘Sol! Sol! Nyak nyape nyeneke enenyenen namudok um maresh? Nyak apa nyenenek debeiri eriger um nyak kanak

kabi enen bulmakau nyape nyaduken aiyas enenyenin debeini nasuwen iri wanohwinyi rowog um.’ <sup>15</sup> Aria eik yarig yakri, ‘Debeini, nyak amiapen?’

Aria Debeini nakri, ‘Eik Jisas douk nyak nyape nyeneke enenyenen iri.’ <sup>16</sup> Aria nakripe nakri, ‘Kakitak yotu iruhw. Douk yatogrumen agundok um igraehen aria nyusuhw eikin mour. Um nyunak nyukriפש um enyudok douk nyatogrumen nyatrin iri nyuni enen douk nuhut um ta iyabigen iri. <sup>17</sup> Ta ishopoken nyunak um nyakish arpeshe eshesh Juda shuni kupaishi aria enenyenen nyutogrumenyum, eik ta itaurumen nyupe wosik. <sup>18</sup> Ta ishopoken nyunak um nyuhur esheshis nabes nyunekesh shukutukuk arukwutigunum um aria shutogur-umori agundok lait tabuh um. Um Satan mare wata dodogowin um nuweshikesh, aria wata shutanamori um Iruhin shusuhw eikin baraen dodog shugipeshen. Aria anan ta mare wata nusuhwesh nupe um esheshish yoweishi inahos, uwok. Ta nukwreyeshuguk. Aria eshesh ta shurao yopishi eshudok douk Iruhin neshubuk um eshudok arpeshe douk shenek bilip um eik aria nenekesh shutogur ananish atish iri.’ ”

*Pol Nakrip King Agripa Um Anan Neneken Iri Debeini Ananin Mour*

<sup>19</sup> “Namudok aria debeini King Agripa, eik douk yatik enyudok nyabuhi iruhw heven aria yatrin kabi yabo yomnis yatrin iri um jurug aria madae ikrium isuwokuk baraen uwe, uwok. <sup>20</sup> Sagomatin yakriפשen abrudok wabur Damaskus um jurug aria yanak yakriפשen Jerusalem. Arigaha aria yanak yakriפשen ihirub warub agudok shokugi nahobig Judia ba iyoh aria yanak um kupairubi warubish arpeshe douk eshesh madae Juda iri uwe, uwok. Yakriפש um shukeshuk agabus yoweishi inahos, shatanam shukon aparuh Iruhin aria shunek yopihi aih shiyabigesh um agundok eshesh shakutukuk yoweishi inahos um. <sup>21</sup> Douk namudok aria amam Juda hanaku hasuwe numun narub agundok Iruhin ananit

debeiti urupat tataoum aria hakri he igok.  
<sup>22</sup> Aria riguk Iruhin kanak nataurume arigah arigaha doukih enyudok yeyotu agundok yakri pep adurin atin baraen ipak douk nyeiguhw shatoumep iri pani ipak nyeiguhw wokepari. Aria yeyagwrehe iri baraen douk enyudok atin seiwok amam profet hani Moses hakriyenjuk iri um enen enyudok ta nyutogrum. <sup>23</sup> Baraen hakriyenjuk iri enyudok. Hakri, 'Anudok arman Krai, anudok douk Iruhin nagraehan aria ta nishopokan nunaki iri, anan douk adur ta nunaki numnek debeiri eriger. Aria anan ta sagomatinyin arman abom um nugok aria wata nukitakumori. Aria ta nukrip ananish arpeshe eshesh Juda shuni kupaishi yopinyi baraen um Iruhin ta wata nuraesh shutanamori shupe wosik kabi douk lait tabuhumesh um.'

#### *Pol Nakri King Agripa Nunek Bilip Um Krai*

<sup>24</sup> Douk Pol neyagwrehe ananin baraen namudok aria Festus narpokuman baraen aria nahwar debeg atin nakri, "Pol, nyak nyogugak. Nyenek skul nyariguk aria nyakin sabainyi saki nyeneken nyogugak."

<sup>25</sup> Aria Pol nawanaman baraen nakri, "Debeini Festus, eik madae igugak uwe, uwok. Enyudok yeyagwrehe iri baraen douk adurin. Urkum morumen douk yeyagwrehe. <sup>26</sup> King Agripa douk nadukemesh um enyudok ihinyumorim nyatograri iri. Namudok aria eik madae inogugur uwe aria douk yakripesh-umen. Yadukemesh um enyudok ihinyumorim eik yeyagwrehe iri, enyen douk natin aria nadukemen. Um maresh? Enyen madae nyunabeshuk nyutograguk anabik um anagas uwe, uwok. <sup>27</sup> King Agripa, nyak nyenek bilip nyakri amam profet amamin baraen adurin o uwok? Eik yadukemesh um nyak douk nyenek bilipumen."

<sup>28</sup> Aria Agripa narig Pol nakri, "Mumam namudok? Nyak nyakri ta abudok banab nyutob meyo nyunek eik itogur Kristen

aka?" <sup>29</sup> Aria Pol nawanaman baraen nakri, "O banab nyutob o roubi. Meibi nyutob ta ineken nyutogur Kristen. Aria eik douk yenek beten yarig Iruhin um yakri nyak nyuni ipak ihipmorim doukih pape pemnekeum yeyagwrehe iri, yakri ipak pudukem eik. Yakri ipak putogur Kristen. Aria abudokmori senab douk yakri uwok um shureyep anab, uwok."

<sup>30</sup> Douk Pol nakri namudok aria King Agripa nani Bernaisi iri Festus shani ihish arpeshe shanaki shantorum iri shakitak sheyotu iruhw. <sup>31</sup> Douk shatogur aduk aria eshesh biyesh atin sheneyagwrehe shakri, "Anudok arman madae nunek enesh yoweishi inahos uwe, um ta mon nugok o muweshikan-umen iri, uwok." <sup>32</sup> Aria Agripa nakrip Festus nakri, "Anudok arman mare nukri um nunak Sisar numnek ananin baraen akure, anan ta mukweshihan nunak meyo. Aria uwok."

## 27

#### *Amam Soldia Harao Pol Hanak Um Debeiburi Wabur Rom*

<sup>1</sup> Douk shabo baraen um apak ta muraok korohuk munak um agudok debeigi nahobig Itali, <sup>27:1</sup> aria sharo Pol nani amudok anam honoweshik iri um Julius ananis wis um nuram hunak. Anudok arman Julius douk nape debeini um 100-poreim soldia. Anan nani ananim soldia douk anam um anudok debeini gavman Sisar ananin debeinyi ami.

<sup>2</sup> Aria mato onok korohuk douk kworari Adramitium kwanaki iri. Okwudok korohuk shakri kwunak shuweshikok shunak anarub warub douk bape agudok shokugi nahobig Esia iri. Mato aria kworap manak. Aristarkus douk napeiri Tesalonika iri douk nanamap manak. Abrudok wabur Tesalonika douk bape agudok shokugi nahobig Masedonia. <sup>3</sup> Manak arigaha ruwahepih manak matogur Saidon. Julius nenek yopuhi aih um Pol aria wosik nakripan nanak natik ananish arpeshe um shukon worigun o eshudok anan nakriyesh iri. <sup>4</sup> Arigah makutukuk Saidon manak. Manak uhwin dodogowin atin

27:1 **27:1** Abudok nyutob Pol nanakumori Jerusalem aria wata nanak um Rom obi nyutob, Luk ta nanaman hanak. Putik Aposel 16:10 iri Aposel 21:17.



aria korohuk kwatanam kwanak wobrehahin um unai shahwaren um Saiprus iri. Manak agundok uhwin madae nyanak um uwe. <sup>5</sup> Mabrigog manak hurukatin um agusudok biyagos shokugosi nahobigos shahwaragos um Pamflia aria Silisia arigaha manak matogur wabur nyeiguriburum Maira. Abrudok wabur douk bape agudok shokugi nahobig Lisia.

<sup>6</sup> Korohuk kwatogur kweir agundok aria debeini um amam soldia iri narpug kupaikwi douk kworari Aleksandria kwanaki um kwakri kwunak um agudok nahobig Itali iri. Aria narap manak mato okwudok. <sup>7</sup> Mato aria kwakutukuk Maira kwape kwanak shokubur atin um eneh nyumneh. Amam boskru henek debeinyi mour arigaha manak matogur hurukatin um anabur wabur Nidas. Uhwin dodogowin atin aria apak mabirak um munak aria uwok. Namudok aria mahur manak wobrehah-inyum unai Krit agundok uhwin madae enen uwe. Manak hurukatin um anap borup shahwarapum Salmone iri. <sup>8</sup> Henek debeinyi mour um korohuk aria mahur manak hurukatin um anagasin um enyudok unai. Arigaha manak matogur anagun douk shakri yopugunum kruruhiyor unak ur wosik abudok nyutob uhwin nyahur um. Agagun douk nape hurukatin um anabur debeiburi wabur nyeigur-iburum Lasea.

<sup>9</sup> Mape agundok sabaihi nyumneh arigaha aria ahudok debeihi nyumnah um eshesh Juda shashakur worigun um hanak heshagrakuk. <sup>27:9</sup> Aria abudok nyutob youg douk shopunek yoweg abom um munak um. Aria Pol nakripam um hudukemesh nakri, <sup>10</sup> "Yaipo, eik yadukemeshum douk mukri munak abom um, yoweibi nyutob ta butogrumop. Sabaihi jah huni korohuk ta shunak shuwishuk. Aria mare jah huni korohuk atish uwe. Arpesh shopunek ta shugok."

<sup>11</sup> Aria debeini soldia nasuwokuk henek mour korohuk iri amamin debeini nani korohukinari amamin baraan. Pol nakripam enyi madae nusuwen uwe.

<sup>12</sup> Asudok basis korohuk kwanak kweir

um douk madae yopus uwe, um korohuk kwur abudok nyutob debeinyi uhwin nyahur um, uwok. Namudok aria sabaimi armam habo baraan um hakri hukutukuk agundok hunak. Hakri hukwiraeh um hunak hutogur Finiks aria douk hupe agundok abudok nyutob debeinyi uhwin nyahur obi nyutob. Finiks douk shohwar anas basis sape enyudok unai Krit. Asas douk sape satik agundok aun nabuhum.

### *Debeinyi Uhwin Nyahur Aria Youg Yoweg*

<sup>13</sup> Enen shokwinyi uhwin nyahur nyanaki saut iri nyape nyahur aria amam hakri korohuk ta kwahur wosik arigaha kwunak kutogur asudok basis Finiks. Namudok aria hanuk anka henyem iruhw aria kwape kwahur kwanak huruhuruk um anagasinum enyudok unai Krit.

<sup>14</sup> Aria madae roubi uwe enen takweinyi uhwin abom shahwarenyum Not Is iri nyahur nyakih nyabrigi enyudok unai. <sup>15</sup> Nyahur nyabuhi nyabo korohuk aria mabirakok um kwuwishen kwunak mabirak mati uwok. Namudok aria uhwin nyape nyaraok nyanak. <sup>16</sup> Nyarap manak arigaha manak wobrehahin um enen shokwinyi unai shahwaren um Kauda iri. Manak agundok aria menek debeinyi mour um mabirak um mutuki anat shokwuti bot korohuk kwape kwanukat iri um tutem iruhw.

<sup>17</sup> Hatuk bot hutem iruhw aria horeyok anaruh madururuh korohuk um korohuk dodogowik. Hanogugur um hakri ta uhwin nyuraok nyunak nyishopok kuto kwupe anat arukot douk takih orokohunig um youg hurukatin um agudok nahobig Afrika. Namudok aria haunih selahos shabuhi habreyeshuk aria uhwin nyape nyaraok nyanak. <sup>18</sup> Uhwin nyape namudok nyahur dedeben atin youg yoweg aria korohuk madae kwahur wosik uwe, uwok. Ruwahepih aria hape honik jah howashah habuhukuk youg. <sup>19</sup> Wata shopunek ruwahepih douk hakri biyeh atih um amamis wis hape hohur madururuh, enesh selahos,

<sup>27:9</sup> <sup>27:9</sup> Ahudok nyumnah um eshesh Juda shashakur worigun ahi abudok nyutob ihish kwarahos douk shopunek apa dedeben atinyi uhwin abom nyahur ogwudok youg nyeigurigum Mediteranian.

anag parag douk shawaur selahos um hawashesh shabuhukuk youg. <sup>20</sup> Sabaihi nyumneh nyumnahin aun aria unib madae mutrish uwe, uwok. Uhwin nyape nyahur dodogowin atin. Namudok aria madae mukrium ta mupe uwe, uwok. Makri ta mugok um atin.

<sup>21</sup> Namudok aria sabaihi nyumneh madae hurao worigun uwe. Aria Pol nakitak neyotu natrum aria nakripam nakri, "Ipak pukri pumnek eik aria mupeik Krit mare arigas munaki um, ta wosik. Ta mare munek debeinyi mour namudok o munak muwashakuk anah jah namudok, uwok. <sup>22</sup> Aria douk yakripep, mishish mare yowesh aria dodogowip pupe. Ta mare anan nugok, uwok. Ta korohuk otuk kwunak kuwishuk. <sup>23</sup> Eik Iruhin ananiwe aria douk yenek lotu um anan. Aria nabotikib wab enen ananin ensel nyanaki nyeyotu hurukatin um eik aria nyakripe namudok. <sup>24</sup> Nyakri, 'Pol, mare nyunogugur. Nyunak arigaha nyunak nyutogrum debeini um gavman iri Sisar nutrin. Iruhin nataurumen meyoh nenekumen yopunyi aria amudok ihm-morim hani nyak pape korohuk iri ta hupe wosik.' <sup>25</sup> Namudok aria ipak dodogowip pupe. Eik yakri adur abom um Iruhin ta nuneken nyutogur kabi nakripe um. <sup>26</sup> Aria apak uhwin ta nyurap aria munak mutogur anabik um enen unai."

<sup>27</sup> Arigaha sakri 14-poreibus weibus um, uhwin nyarap mahur anabigigum youg nyeigurigum Mediterenian. Aria hurukatin orokohunib um wab amam boskru hakri korohuk kwanak huruk um anab amnab. <sup>28</sup> Namudok aria hado enesh amaenyishi eshudok eneshenesh onohw maduhw aria hakutuhw youg um hakri hunek meta um youg aria hudukem barukog um. Douk hatukohwi aria hatik um barukogum youg douk 40 mita. Douk kwayom kwanaku henekesh namudok atin aria hatik um barukog 30 mita meyoh. <sup>29</sup> Hatik namudok aria hanogugur hakri ta munak mutao onok burbuduk namudok aria honik nubatish anka hos agundok kwagiguk um korohuk hakutish youg um shusuhw korohuk kwur meyoh. Aria hape henek beten um gugruk arigas.

<sup>30</sup> Aria amam boskru hape haurim yah um huruwok hukutukuk korohuk. Namudok aria hakutu shakuti bot tabuh tor youg aria henek roh w um hakri wata hunik enesh anka hos gani kwarik um korohuk hukutishuk youg. <sup>31</sup> Aria Pol nakrip amam soldia hani amamin debeini nakri, "Amudok boskru hukri mare hupe korohuk um, ipak ta mare pupe, uwok. Ta pugok." <sup>32</sup> Namudok aria amam soldia hatupakuk madururuh hasuhw atudok shokwuti bot iri aria tagrukuk youg.

<sup>33</sup> Hurukatin gugrukuk aria Pol dodogeshin um amam ihm-morim um huwok anagun worigun. Nakripam nakri, "Roubum nyutob ipak urkwip yowep aria madae puwok anagun worigun uwe, uwok. Pape meyoh arigaha 14-poreih nyumneh. <sup>34</sup> Namudok aria douk dodogeshiwe um puwok enesh eshudok um dodogowip. Ipak ihipmorim ta pupe wosik aria ta mare enesh eshudok shunekep, uwok." <sup>35</sup> Nakripam jurug aria nohur anat bret nanaki agundok amam hapeum nenek tenkyu um Iruhin iyoh, aria naworut nape natoh. <sup>36</sup> Ihim-morim hatik namudok amamish mishish shor wosik aria shopunek hawok anagun worigun. <sup>37</sup> Ithismorim motem korohuk iri douk sabaipari um 276-poreip. <sup>38</sup> Douk hawok worigun um jurug aria honik wit hawashat tagrukuk youg um korohuk hworhworik.

### *Korohuk Yowek*

<sup>39</sup> Arigaha gagruk aria amam boskru hatigu anagas um anab amnab. Aria amam madae hudukemesh uwe um agagun douk meiguni um uwe, uwok. Aria hatigu anas basis douk sawish abom aria yoputi arukot takus. Namudok aria hukri wosik um, hukri hukwiraeh huraok kuwish asudok basis arigaha kwonak kwusuhw arukot. <sup>40</sup> Namudok aria hatupak madururuh douk anka hos sheiraruh iri shagrukuk sharaouguk youg. Aria abudok atub nyutob hakweshihuk madururuh douk hasuhw stia iri. Aria hohur sel hunyaur gani kwarik um, um uhwin nyuraok kwunak wosik um anagas. <sup>41</sup> Aria korohuk kwanak kwato anag shokugi mi-hig arukotig shukam youg aria kwotao.

Gani kwarik um douk kotak kwape dodog abom madae kunogugwanam uwe, uwok. Agundok kwagiguk um youg dodogowig otug gwape gwadudar muduk atin.

<sup>42</sup> Aria amam soldia hakri hubo shon-oweshik iri shugok um hakri ta hupaur hunak hukih anagas aria huruwok. <sup>43</sup> Aria anudok debeini um 100-poreim soldia iri nakri uwok um nubo Pol nugok aria nakripam uwok. Aria dodogeshin um amudok hapaur wosik iri um hutem haprok hubuh hurik atin arigaha hunak hukih hiyotu anagas. <sup>44</sup> Aria ihm-morim hapeik iri douk hanasuhw palag iri o tutukwanigasi um korohuk iri hugiguk hupaur hunak. Memnek namudok aria ihishmorim manak matogur anagas wosik.

## 28

### *Pol Nape Unai Nyeigurinyum Malta*

<sup>1</sup> Manak arigaha manak matogur wosik anagas enyudok unai aria memnek um enyudok unai douk shahwaren um Malta. <sup>2</sup> Arpesh shape enyudok unai iri douk shenek yopinyi abom um apak. Eshah hape hor aria nyumanugas. Namudok aria shautik eneh nyih aria sharap manak meyotumeh. <sup>3</sup> Aria Pol nape natarmori anat unat nyigasi um nunaki nugosem nyih. Nogosem aria anar renek wanohw iri yur remneguk nyih ratograri atin ronuh naruh um Pol ananin rogur aria reir namudok. <sup>4</sup> Abrudok waburishi shatik um arudok yur ronuh naruh um rogur reir uriyarik um aria shanakripam shakri, “Adur atin, anudok arman nubonabo enen arpen nyagok iri. Anan madae nugokuk youg uwe, aria douk anudok god douk apa nenek yopuhi aih iri nakri uwok um wata natauruman um wata nupe, uwok.” <sup>5</sup> Aria Pol neyariguk arudok yur rabuhuk nyih aria rogur madae erigerishin o nyukri nyunek maresh uwe, uwok. <sup>6</sup> Aria eshesh shape shatrugun um shakri kadak rogur nyunugok o ahudok atuh nubuh nutu nugok um. Aria shape shatrugun um roubi aria madae shutik enen yoweinyi enyudok nyuto-gruman uwe. Aria wata shakri uwok

um esheshish mishish aria shakri, “Anan douk anan god!”

<sup>7</sup> Anan debeini um enyudok unai iri ananib annab douk baperi hurukatin agundok sheyotu um. Ananin nyeigur Publius. Publius nanaki narap um ananit urupat aria biyeh atih nyumneh neyohap nape nenekumap yopihi atih aih. <sup>8</sup> Aria ananin yaken douk arugeh hapeyan neshuh aras. Ananihw yegenyihw juwehosihw aria neshishrak. Pol nanak nawish neshuhw-omi rum nenek betenuman arigaha naweman wis aria nagabeyan wata yopun. <sup>9</sup> Douk Pol nenek enyudok aria ihishmorim eshudok enesh shape enyudok unai aria arugeh haesh iri shanaki aria nagabeyesh yopish. <sup>10</sup> Namudok aria shenekumap yopihi aih shakop sabaishi yopiyopishi eshudok. Abudok nyutob makri munak obi nyutob, shakitak sharauri sabaishi eshudok douk apak wokesh iri shanakumori korohuk.

### *Makutukuk Malta Manak Um Rom*

<sup>11</sup> Abudok nyutob mape enyudok unai obi nyutob, apak douk mape biyab atun aub. Aria abudok nyutob debeinyi uhwin nyahur obi nyutob, onok korohuk kworari Aleksandria iri kwanaki kwor enyudok unai. Kwarik um okwudok korohuk douk shenek bioguhw aboriguh hwape. Ogwuhwudok aboriguh douk hwadukem um biom nugamim anudok madae adurini god shahwaran um Sus iri ananim hape. Mato okwudok korohuk aria manak. <sup>12</sup> Manak arigaha manak matogur debeiburi wabur Sirakyus aria mape biyeh atih nyumneh agundok. <sup>13</sup> Aria wata makutukuk Sirakyus manak matogur kupaiburi nyeiguri-iburum Regium. Ruwahepih aria enen uhwin nyakitaki saut iri nyape nyahur nyatowi. Hakri biyeh nyumneh um munak mutogur Puteoli. <sup>14</sup> Matogur agundok aria maparug enesh Kristen. Aria shari-gapum muni eshesh mupe anag wik agundok. Mape anag wik um jurug aria douk makitak manak atapih manak um Rom. <sup>15</sup> Aria Kristen shape Rom iri shemnek um apak hurukatin munak mutogurum, aria shanakumori shutrup. Enesh shanaki arigaha shaparugap anat debeiti maket

abrudok wabur shahwarburum Apius iri. Enesh shaparugap kupaiburi douk biyog atut urusag gwape kupaishi shapenyog iri urusag gwataum. Douk Pol natrish aria ananin mishin nyor wosik dodogowin aria nenek tenkyu um Iruhin.

<sup>16</sup> Manak arigaha manak matogur douk mawish abrudok debeiburi wabur Rom aria debeimi um gavman iri hakripan wosik Pol um anan atun nupe anat sikit urupat aria anan soldia nupe niyohan.

*Pol Nakripesh Iruhin Ananin Yopinyi Baraen Abrudok Debeiburi Wabur Rom*

<sup>17</sup> Biyeh atih nyumneh hanak hadiguk aria Pol nenekumam baraen eshesh Juda esheshim debeimi um hunaki huni anan hiyagwreh enen baraen. Douk hanaki hantorum aria nakripam nakri, “Eikim bahenomi owarhim, eik madae inek enen yoweinyi um apakish arpesih uwe. Madae inek enen yoweinyi aria inunu ehudok aih douk apakish yamehesh shagimeh um uwe, uwok. Aria shasuhwe showeshike Jerusalem aria sheyor yor amam Rom douk debeimi um gavman iri amamis wis. <sup>18</sup> Hemnek eikit kwot aria madae huparug enen yoweinyi uwe um ta he igokumenyi. Namudok aria hakri hukweshihe inak. <sup>19</sup> Aria eshesh Juda shakom agabus amamin baraen shakri uwok. Douk madae anah shopunek yah uwe aria yakri wosik um inakumori Sisar meyoh numnek eikit kwot. Aria eik kanak douk baraen uwok um inekumesh kwot eikish arpesih eshesh Juda iri. <sup>20</sup> Douk namudok aria yenemepogu baraen um punaki itrip aria ikripep baraen. Eik yenek bilip aria yape yatrugun um anudok arman douk apak ihishmorim Israel madukemeshum ta nutogur aria mape matrugun-uman iri. Aria baugenyum um baraen um anudok sen nor eikis wis um douk namudok.”

<sup>21</sup> Aria hakripan hakri, “Madae anam armam huneki anap shup gani Judia aria hukripapum nyak uwe, uwok. O shopunek madae anam Kristen douk hunaki agundok aria hukripap enen baraen um nyak o hiyagwrehumen enen yoweinyi baraen uwe, uwok. <sup>22</sup> Aria douk apak makri mumnek nyak urkum morumen iri baraen. Um maresh? Apak madukemesh

um ihirub warub douk shape sheneyagwreh enenyenen um apudok parigiri awiropish arpesih douk shakitak eshesh Juda aria nyak nyawishesh iri.”

<sup>23</sup> Namudok aria hagraeh anah nyumnah. Douk ahudok nyumnah hanak hatograri aria sabaishi arpesih abom sheshagrakuk sharik shanak iri shanaki shantorum atudok Pol napenyat iri urupat. Ruwahap arigaha wab anan nape nakripesh baraen um arpesih shuwish agundok Iruhin nape Debeini um ananish arpesih um. Aria nakripesh enen lo seiwok Iruhin nakoguk Moses enyi nyani enen baraen douk amam profet henyemaguk iri. Dodogowin atun nakripesh enyudok baraen um nakri nuhur esheshiruh aparuh um shunek bilip um Jisas. <sup>24</sup> Enesh shemnek Pol ananin baraen aria shenek bilip um Jisas. Aria enesh madae shusuhw ananin baraen uwe, uwok. <sup>25</sup> Namudok aria abudok nyutob Pol nakri niyatok ananin baraen obi nyutob, eshesh kanak shakitak aria enesh shakri adurin, enesh shakri madae adurin uwe. Aria shakitak shanak. Nakriyen iri baraen douk enyudok. Nakri, “Iruhin ananin Mishin nyawish profet Aisaia aria nyonohur nakripeshuk enyudok adurinyi baraen apakish yamehesh. Aisaia nakri,

<sup>26</sup> ‘Kare um eshudok arpesih aria pukripesh namudok. Pukri, “Baraen ipak ta pupeum pumneken, aria baugenyum ta mare pudukemen, uwok.

Putrugun um ta pupe um putrugun, aria eshudok ta putrish aria mare pudukemesh.

<sup>27</sup> Um maresh? Eshudok armam armago esheshigos baragos douk seshuk, shogah esheshigos arigos aria showeshik esheshis nabes.

Uwok um, esheshis nabes ta sutrugun aria shutik eshudok, arigos seshuk sunakuk um shumnek baraen shudukemen, baragos sugor aria shudukem baugenyum baraen

esheship urkwip purumen wosik aria ta wata shutanamori eik igabeyesh um shupe wosik.” ’

<sup>28</sup> “Namudok aria ipak ta pudukemesh. Eshudok arpesh douk shakripesh baraen um enyudok yopinyi mour Iruhin neneken um nutaurum apak aria wata nurap mutanam mupe wosik abom um, eshesh douk shanak shakrip kupaishi douk eshesh madae Juda iri uwe. Eshudok kupaishi ta shumneken aria shusuhwen dodog abom shugipeshen.”

<sup>29</sup> [Douk Pol nakri enyudok baraen um jurug aria eshesh Juda shakitak shanak. Shape shanak yah aria eshesh kanak shape shanitok debeinyi baraen shanak um enyudok Pol nakripesh-enyi baraen.]

<sup>30</sup> Biyesh kwarahos Pol nape anat urupat douk anan kanak nape natorut iri. Aria nakri wosik nanadudareh um ihishmorim arpesh douk shanakumori shutrun iri. <sup>31</sup> Nape nakripesh baraen um arpesh shuwish agundok Iruhin nape Debeini um ananish arpesh um. Shopunek nape nenek skulumesh um Debeini Jisas Krai ananin baraen. Madae nunogugur uwe aria dodogowin atun nape nakripeshen. Shopunek madae enen arpen nyunaki aria nyukripan um mare nukripeshen uwe, uwok.

## Apudok Shup Douk Pol Nenekap Panam Eshesh Rom Iri

*Enyudok Banenyi Baraen Pol Nenyem  
Nyanam Eshesh Rom Iri*

1:1-17 Nyarik iri baraen um Pol nenek tenkyu um Iruhin um eshesh Rom shenek bilip um Kraiss iri

1:18—3:20 Iruhin douk nyibur juwehosibur um ihishmorim arpes, eshesh Juda shani eshesh madae Juda iri uwe shopunek

3:21—4:25 Arpes shenek bilip um Jisas Kraiss iri Iruhin douk nahwaresh yopishi

5:1—8:39 Apak ihipmorim monek bilip um Jisas Kraiss iri douk mani Iruhin mape atug barag aria manadudareh. Apak douk mani Kraiss magok aria wata shopunek mani anan makitak aria mape wosik um Iruhin ananin Mishin atin

9:1-11:36 Iruhin nagipesh ananim urkum aria nagraeh arpes douk anan kanak nakriyeshi. Aria nakripap enen baraen um kweipon eshesh Juda shupe mumam mumam um

12:1-15:13 Apak Kristen munekeh iri aih

15:14—16:27 Pol neyagwreh nyatuh iri baraen aria nenemesh ruwahap eshesh Kristen shape Rom iri

*Pol Nakripesh Um Enyudok Mour  
Aposel Douk Anan Nenekan Iri*

<sup>1</sup> Eik Pol, douk yenek Kraiss Jisas ananin mour iri yenemepogu apudok shup. Yenekap panamagu ipak Iruhin ananish arpes douk pape Rom iri. Eik anan douk Iruhin nahware um yatogur aposel aria neshopoke inak ikripesh ananin yopinyi baraen.

<sup>2</sup> Enyudok yopinyi baraen douk seiwok Iruhin neyabig ananim profet um nakri adur atin um kweipon enyudok baraen ta nyutogur. Neyabigam aria amam henyem nyetemaguk ananik Buk. <sup>3</sup> Enyudok

baraen douk nyakrium Iruhin ananin nuganin, apakin Debeini Jisas Kraiss. Anan douk narao arpenyihw yegenyihw natogur arpen aria nakitak king Devit ananip awirop. <sup>4</sup> Aria douk Iruhin nowerehan um ananin dodog. Yaken ananin Mishin nyowerehan nyeyabigap um anan douk Iruhin ananin Nuganin. Enyen nyowerehan abudok nyutob eshesh shan nagok aria Iruhin wata nonohur nakitak napeum. <sup>5</sup> Iruhin nakri wosik aria Kraiss nagraehe meyoh um inek mour aposel ituk ananin nyeigur nyuto iruhw. Ituk ananin nyeigur um inak ihirub warub bape abudok amnab iri aria ihwar eshudok ihish arpes madae Juda iri uwe ikripesh um shumnek Kraiss ananin baraen aria shunek bilipuman. <sup>6</sup> Aria ipak arpes pape Rom iri, ipak douk shopunek pani eshudok arpes douk Iruhin nahwarep um pupe Jisas Kraiss ananishi iri.

<sup>7</sup> Eik yenek apudok shup panamagu ipak ihipmorim pape Rom iri. Ipak douk Iruhin anan urkum manawashamep aria nahwarep um pupe ananish atishi. Eik yakri apakin Yaken Iruhin nini Debeini Jisas Kraiss hutaurumep meyoh aria ipakiruh aparuh hur wosik.

*Pol Nakri Nunak Nutik Rom*

<sup>8</sup> Sagomatin, um Jisas Kraiss ananin nyeigur, eik douk yenek tenkyu um yenek lotuman iri Iruhin um ipak ihipmorim. Um maresh, ihishmorim arpes shape ihirub warub iri douk shemnek baraen um ipak pasuhw Kraiss ananin baraen dodog pagipeshen abom um. <sup>9</sup> Aria Iruhin douk eik yakon eik kanak um yenek ananin mour abom. Yenekesh namudok yakripesh enyudok yopinyi baraen um ananin nuganin. Iruhin douk natrue aria nadukemesh um eik apa urkum morum ipak um beten. <sup>10</sup> Nakri adur um ihih nyumneh yenek beten obi nyutob, eik douk yenek beten um ipak. Aria douk yarigan um Iruhin nugipesh ananim atum urkum aria nukri wosik um douk anah hagiguk iri nyumnah nuneme anah yah aria eik inaku itrip. <sup>11</sup> Eik yakri abom um inaku itrip um itaurumep aria pu-rao enen yopinyi um putogur dodogowip

aria purao enyudok yopinyi douk Iruhin ananin Mishin nyukepen meyoh iri. <sup>12</sup> Eik yakri namudok. Ipak puni eik ihipmorim munataurum ahudok atuh. Ipak putik eikin bilip nyutogur dodogowin aria eik shopunek ta itik ipakin bilip aria itogur dodogoiwe. <sup>13</sup> Eikish ashukenyish owashish douk pagipesh Kraisi iri, eik yakri ipak ta pudukemesh um enyudok. Sabaihi nyumneh arigaha douk eik yakri um inaku itrip, aria enesh eshudok shapeum shatupokume yah um inakugu. Riguk eik yataurum eshudok enesh douk eshesh madae Juda iri uwe, aria shatogur Kristen. Douk yakri inak um itaurum ipak shopunek kabi riguk yataurum eshesh madae Juda iri uwe shopunek um. <sup>14</sup> Eik douk enen tuwehin nyapenye um agundok Debeini narao eik um. Namudok aria eik ta inak ikripesh ananin yopinyi baraan sabaishi arpes. Eshesh Grik shuni eshesh douk madae Grik iri uwe, shuni eshudok sharao debeinyi saki iri shuni eshudok madae shudukemesh iri uwe. <sup>15</sup> Namudok aria eik douk mishin nyakitak abom um inaku ikripep Iruhin ananin yopinyi baraan ipak pape Rom iri shopunek.

#### *Iruhin Ananin Baraan Douk Dodogowin Atin Abom*

<sup>16</sup> Eik douk madae inek abraen um agundok ikripesh um enyudok Iruhin ananin yopinyi baraan um uwe, uwok. Um maresh, enyen douk Iruhin ananin dodog abom um anan nunarao ihishmorim arpes douk shunek bilip iri aria shupe wosik abom ihih nyumneh. Narik narao Iruhin ananin baraanym eshesh Juda aria eshesh madae Juda iri uwe nagiguk naraeny-umesh. <sup>17</sup> Umum maresh? Enyudok Iruhin ananin yopinyi baraan adur apa nyowereh ananin yopihi aih. Nyowerehah um agundok anan narao arpes shasuhw ananin baraan dodog shagipeshen um douk nahwadesh yopishi arpes. Eshesh shenek bilip atin aria Iruhin natrish nahwadesh yopishi arpes. Kabi douk baraan nyetem Iruhin ananik Buk iri nyakrium. Nyakri namudok,

“Arpen nyusuhw Iruhin ananin baraan dodog nyugipeshen iri, anan ta nuhwaren yopunyi arpen aria enyen ta nyupe wosik ihih nyumneh.”

#### *Ihipmorim Mape Agundok Atap Iri Douk Makon Agabus Iruhin*

<sup>18</sup> Iruhin douk nape gani iruhw heven aria douk nape neyabigap madukemesh um agundok anan nyibur juwehosibur um. Aria ta nebeimesh yoweinyi poe ihish arpes douk shakon agabus aria shenek ihishmorim eneheneh yoweih aih iri. Eshesh douk shabeshuk adurinyi baraan nyabuhuk aria kupaishi ta mare shudukemen uwe, uwok. <sup>19</sup> Anan ta nebeimesh yoweinyi poe. Um maresh? Eneh Iruhin ananin aih douk madae hunabeshuk uwe, uwok. Anan kanak neyabigesheh hatogur yopugunum shadukemeh. Aria eshesh apa shenek yoweishi inahos atin shape. <sup>20</sup> Seiwok baugos um Iruhin nakwaram agudok nahobig obi nyutob arigaha douk, eshesh douk shatik eneshenesh anan nenekesh iri eshudok. Shatik eshudok aria eshesh douk shanodukem um eshesh kanak ta shudukem ehudok Iruhin ananin biyeh aih douk arpes madae shunodukemum eshesh kanak shutrih esheshis nabes iri uwe, uwok. Ehudok biyeh aih douk ehudok. Sagomatin ananim dodogowimi abom urkum aria dodog, amam douk mape ihih nyumneh iri. Aria anan nape sik aria deben um ihishmorim eshudok neshagrakuk ihish debeishi arpes. Ihish arpes shatik eneshenesh Iruhin nenekesh iri aria shadukemesh um ananin aih. <sup>21</sup> Eshesh douk adur shadukemesh um Iruhin anan nape, aria madae shukri anan douk debeini Iruhin aria shukri shutuk ananin nyeigur nyuto shunek tenkyuman uwe, uwok. Shenekesh namudok aria esheship urkwip pagugak abom um Iruhin aria baragos seshukesh madae shur urkum adur atin uwe, uwok. <sup>22</sup> Eshesh douk shakri eshesh wosik shadukem enenyenen iri arpes, aria uwok. Eshesh douk shagugak abom. <sup>23</sup> Aria madae shunek lotu um anudok Iruhin douk madae nugok atin iri uwe.

Ihishmorim shatanam um shenek lotu um anam rohwhomi god douk eshesh meyoh shabarum iri. Eshudok douk shabarish shape kabi da arpesht ta mare shupe abom ihih nyumneh iri uwe, shani armiguhw hwani mahish aria yuguhw.

*Enenyenen Arpesht Sheneken Iri Yoweinyi Ina*

<sup>24</sup> Douk shenekesh namudok aria Iruhin nakutishukuk shawish um enenyenen yoweinyi ina abom douk eshesh mishish shakitakumen iri shani kupaishi shenenem um yoweih abraenyih aih um esheshiruh yegeshiweruh. <sup>25</sup> Eshesh shakri uwok um anudok Iruhin ananin adurin atin baraan aria shatanam um shemnek rohwin baraan shagipeshen. Madae shenek lotu um Iruhin douk nenek eneshenesh iri uwe, o shuneman mour anan uwe, uwok. Eshesh wata shakutunaguk aria shatanam shenek lotu um eshudok douk anan kanak nakwarmesh iri, aria shenek lotu um eshudok atish. Iruhin anan douk nanodukem um anan kanak um apak arpesht mutuk ananin nyeigur nyukih ihih nyumneh. Adur atin.

<sup>26</sup> Shenekesh namudok aria Iruhin nakutishukuk shawish um yoweih abom abraenyih aih. Esheshiyu armago shopunek waktukuk yopihi aih um wuni owowim rahaem sheshuh um aria wani kupaiwari armago wananem yoweih aih. <sup>27</sup> Armam shopunek henekesh namudok atin. Hakutukuk yopihi aih um huni amamiyu irorihyey sheshuh um aria amam mishish shakitak um huni kupaimi hunenem yoweih aih. Henekesh namudok aria harao yoweinyi poe douk nyenek wosik um amam kanak um enyudok heneken iri yoweinyi ina. <sup>28</sup> Eshesh douk shakri uwok um urkwip porum Iruhin abom um. Namudok aria nakutishukuk shakonuguk agabus abom, shorshor um shagipesh esheship yoweipi urkwip aria shenek enenyenen yoweinyi abom. Shenek ehudok aih douk madae yopihi um arpesht shunekesh iri uwe. <sup>29</sup> Eshesh douk shapeum shenek ihishmori yoweishi inahos. Shenek yoweih abom, shakri eneshenesh eshudok esheshish atish, shatrishuk

yoweisi nabes kupaishi, shenek nyigiya um kupaishiyesh eshudok eneshenesh, shabo kupaishi shagok, sharpak shanitok, shagiyagim kupaishi shanaruken eneshenesh eshudok meyoh, urkwip madae pur punak yopip aria shenekumesh yoweishi inahos kupaishi, shanumogesh um kupaishi, <sup>30</sup> sheneyagwrehumesh yoweinyi rohwin baraan um kupaishi aria shunekesh shurao yoweishi nyeiguhw, shenek horim horik um Iruhin, shanakripam um shabo mishish shariguk shatuk esheshish nyeiguhw shato, shape urkwip porum sabaihi yeh um shunek yoweinyi ina um, madae shemnek amakenyish esheshin baraan. <sup>31</sup> Madae shudukemesh um meih aih yoweih aria meih yopihi aih uwe, uwok. Madae shunek eshudok douk shenek promis adurinyi atin baraan um shakri shunekesh iri uwe. Esheship urkwip madae pukri kupaishi o shukri gihumesh atin uwe, uwok. <sup>32</sup> Eshesh douk shadukemen enyudok Iruhin ananin yopinyi lo. Enyen douk nyakri, "Arpesht shugim ahudok iri ta shugok." Aria shapeum shenek yoweinyi ina atin. Aria douk madae shunek enyudok yoweinyi atin uwe, uwok. Eshesh shopunek shape shanadudareh um arpesht douk shapeum shenek enyudok atin yoweinyi ina iri.

## 2

*Kwot Kweipon Iruhin Nunekatum Nunek Kwot Um Ihish Arpesht Iri Douk Yoputi Abom*

<sup>1</sup> Enyudok iganigadae yenyem iri baraan douk adurin atin. Namudok aria ipak meipari douk ta padukemesh baraan kupaishi pakri eshesh shenek yoweinyi ina iri, eik yakana ikrip ipak atin atin. Ipak madae wosik um ta punabeshuk um yoweishi inahos ipak penekesh iri uwe, uwok meyoh. Ipak mnek! Ipak ta paduk baraan um kupaishi pakri eshesh shenek yoweishi inahos. Namudok douk ipak panadukum baraan nyatanamori um ipak kanak. Um maresht? Ipak douk padukemesh baraan kupaishi iri, ipak douk shopunek ta penek enyudokmori atin. <sup>2</sup> Apak



douk madukemesh. Iruhin ta nenek yopihi aih um nenemesh kwotog eshudok arpes shagipesh ehudokmori iri. <sup>3</sup> Aria ipak ta padukemesh baraan kupaishi iri, ipak shopunek ta penek enyudokmori atin. Namudok aria ipak pakri wosik ta puruwok punak punabeshukuk aria Iruhin ta mare nunemep kwotog uwe, uwok? Namudok ta uwok meyoh. <sup>4</sup> Ipak douk patruh aria patik ahudok Iruhin ananin yopihi aih? Anan douk nape noborubukep um roubi nyutob aria madae nubeimep yoweinyi ina arigas uwe, uwok. Ipak ta urkwip porumen o uwok, ehudok Iruhin ananin yopihi aih? Anan douk nape noborubukep um roubi nyutob um nakri pukeshuk agabus yoweishi inahos aria putanamori pukon aparuh anan. <sup>5</sup> Aria uwok. Ipakigos baragos seshuk abom aria madae punogugur abom pukri um pukeshuk agabus yoweishi inahos uwe, uwok. Penekesh namudok aria ipak meyoh pape panasonuki enesh yoweishi inahos shape shatowep shatogur dedebesh atish. Pape penekesh namudok arigaha ahudok nyumnah douk Iruhin ta nugipesh aduriah atih aih ba nyibur juwehosibur um aria nunemesh debeigwi kwotog ihish arpes ahi iri hutogrum, anan douk ta nukkep ipakin yoweinyi poe. <sup>6</sup> Ahudok nyumnah hutogrum, anan ta nuwanamesh poe ihishmorim arpes kabi douk eshesh kanak shenekeh iri aih um eshesh kanak. <sup>7</sup> Eshudok arpes douk shapeum shenek yopinyi shaurim yah um Iruhin nutuk esheshish nyeiguhw shuto aria nutaurumesh shupe wosik ihih nyumneh iri, eshesh Iruhin ta nutaurumesh aria shupe wosik atin ihih nyumneh. <sup>8</sup> Aria enesh arpes douk urkwip porum eshesh atish aria shakenyuk agabus enyudok Iruhin ananin adurin baraan nyapeik aria shagipesh yoweinyi ina. Eshudokmori arpes, Iruhin ta nyibur juwehosibur meyoh abom aria ta nuwanamesh yoweinyi atin poe. <sup>9</sup> Ihish shenek yoweinyi iri arpes ta shupe yowesh abom aria shurao debeinyi amaen nyuni debeiri eriger. Ta nyurik nyutogur um eshesh juda aria eshesh madae juda iri

uwe shopunek ta nyutogrumesh. <sup>10</sup> Aria ihishmorim arpes shenek yopishi iri, Iruhin ta nenekeshumesh namudok. Ta wata nuraesh nuhwaresh yopishi arpes aria nutuk esheshish nyeiguhw shuto aria aparuh hur wosik shupe wosik atin. Ta nurik nenekesh um eshesh juda shurik aria kupaishi shopunek ta namudok atin. <sup>11</sup> Um maresh, Iruhin douk madae nutik agundok nyeiguhw shato um o nyeiguhw wokesh um aria douk nunek skelumesh uwe, uwok. Nagipesh atuh yopihi aduriah aih meyoh aria nenek skelumesh.

<sup>12</sup> Ihish arpes douk madae shudukem enyudok lo seiwok Iruhin nakoguk Moses enyi aria shenek yoweinyi iri, Iruhin ta mare nugipesh enyudok lo aria nunek skelumesh. Aria eshesh ta shunak shuwishuk atin. Aria ihishmorim juda douk wosik shadukemesh um enyudok lo aria shenek yoweinyi iri, Iruhin ta nugipesh enyudok lo atin aria nunemesh debeiti kwot. <sup>13</sup> Arpes douk shemneken meyoh enyudok lo iri, Iruhin douk madae nutrish aria nuhwaresh yopishi uwe, uwok. Aria eshudok shagipesh lo iri atish douk nahwaresh yopishi arpes. <sup>14</sup> Eshesh kupaishi douk eshesh madae juda iri uwe, eshesh douk madae shudukem enyudok lo uwe, uwok. Adur, eshesh madae shudukemen uwe, aria abudok nyutob eshesh urkwip porum shunek eneh yopihi aih kabi lo nyakrium, aria agundok shadukemesh um enyudok lo nubokadae nyor esheshigos baragos. <sup>15</sup> Um maresh? Ehudok shenekeh iri aih douk howereh enyudok lo abom um nyakri enyi baraan douk adur Iruhin nenyem jurug numun esheshiruh aparuh. Aria eshesh douk wata urkwip porumen aria shadukemesh abom um anob nyutob douk shenek yopihi aih aria anob nyutob shenek yoweih aih. <sup>16</sup> Iruhin ta urkum morum enyudok yarik yakripepenyi baraan aria ta nunek skelum arpes. Enyudok ta nyutogur namudok kabi enyudok Iruhin ananin yopinyi baraan eik yakripepenyi nyakrium. Ahudok nunek skelimesh ahi nyumnah, anan ta nukrip Jisas Krais um nushw kwotog nunek skelum ihipmori panabeshuk iri

arpeship urkwip puni ihihmori eneheneh yoweihí aih.

*Eshesh Juda Shakri Enyudok Lo Ta Wosik Nyutaurumesh Um Shutogur Yopishi Arpesh*

<sup>17</sup> Aria mumam um ipak douk shahwarep Juda iri? Ipak panahwar ipak wosik Juda aria panadudareh pakri ipak douk Iruhin ananish arpesh. Aria shopunek pakri enyudok lo douk enyen wosik ta nyutaurumepum kwotog aria pagipeshen pakri Iruhin nutrip nuhwarep yopishi arpesh. <sup>18</sup> Ihihmori aih Iruhin nakri um punekeh iri douk wosik padukemeh. Umum maresh, ipak douk penek skul um enyudok ananin lo aria wosik padukem yopihi adurish aih um punekehum. <sup>19</sup> Ipak wosik padukemesh, aria pakri wosik ta piyabigesh yah eshudok nabes seshukesh iri o pupe kabi lait aria piyabig arpesh shape wab iri um eshesh ta shunatrugun. <sup>20</sup> Ipak pakri enyudok lo douk baugos abom um ihinyumori saki nyani adurin baraen. Namudok aria pakri ipak wosik ta punek skul um shorshor um yopihi aih iri shuni eshudok douk madae gamo shudukemesh iri uwe, uwok. <sup>21</sup> Ipak douk penek skul um kupaishi, aria ipak kanak douk madae punek skul um ipak kanak uwe, uwok. Ipak douk pakrip kupaishi um mare shukwuaruh, aria ipak kanak apa pakwuaruh. <sup>22</sup> Ipak apa pakri arpesh mare shunek wehrur um, uwok. Aria ipak kanak apa penek wehrur um. Ogwuhwudok aboriguh shabarguhi douk kupaishi shenekoguh um shunek lotumaguh iri, ipak Juda douk pakri uwokmoguh abom. Aria agwudok urusag shawish shenek lotumaguh um, ipak douk apa pawish pakwuaruh um enesh eshudok. <sup>23</sup> Ipak apa patuk ipakish nyeiguhw shakih pakri ipak wosik parao Iruhin ananin lo padukemen. Aria uwok. Ipak pabrig enyudok lo aria penek Iruhin ananin nyeigur nyabuhuk abom. <sup>24</sup> Ipak douk penekesh kabi da baraen nyetem Iruhin ananik Buk iri nyakrium. Nyakri,

“Ipak meyoh penek yoweinyi ina aria eshesh douk madae Juda iri uwe shatrip aria douk shabubunim Iruhin ananin nyeigur.”

*Ehudok Aih Um Amam Juda Hatah Yegeshiweruh Um Ta Mare Hutaurumam Uwe, Uwok*

<sup>25</sup> Aria douk ipak ta pugipesh enyudok lo abom piyaten um, wosik ehudok aih um patah ipakiruh yegeshiweruh um wosik ta hutaurumep. Aria ipak madae pugipeshen piyaten abom um, namudok aria ipak douk patogur kabi da arpesh douk madae shudukem Iruhin aria madae shutah yegeshiweruh iri uwe. <sup>26</sup> Ipak urkwip purum eshesh kupaishi douk madae shutah esheshiruh yegeshiweruh iri uwe. Aria eshesh ta shunek enenyenen enyudok lo nyakriyen iri um, Iruhin douk natrish nakri eshesh shape ananish adurish arpesh shatah yegeshiweruh iri um. <sup>27</sup> Eshesh madae Juda iri uwe douk adur madae shutah esheshiruh yegeshiweruh uwe, uwok. Aria ta eshesh shugipesh enyudok lo um, eshesh ta shunek baraen nyuto ipak Juda shiyabigep ipakih penekeh iri yoweihí aih. Um maresh, ipak Juda douk patah ipakiruh yegeshiweruh aria baraen um enyudok lo henyem ipakik buk um ipak padukemen, aria uwok. Ipak pabrigen. <sup>28</sup> Aria eshudok adurishi Juda douk meishi? Adurishi abom Juda douk madae eshudok arpesh shatah adukiruh um esheshiruh yegeshiweruh meyoh iri uwe, uwok. <sup>29</sup> Eshudok adurishi Juda douk shagipesh enyudok lo abom numun esheship urkwip. Eshesh shagipesh baugenyum baraen aria ehudok aih douk amu kabi shatah esheshiruh yegeshiweruh abom um. Enyudok nyetem Buk iri lo douk madae nyutaurumesh um gamo shugipeshen wosik uwe, uwok. Iruhin ananin mishin meyoh nyenekesh gamo shagipeshen wosik. Eshudokmori arpesh, agundok atapishi arpesh ta mare shutuk esheshish nyeiguhw shuto uwe, uwok. Ta Iruhin atun nutukesh shuto iruhw.

### 3

#### *Yoweih Aih Douk Ta Mare Henek Uhwinyum Yopihi Aih*

<sup>1</sup> Namudok aria eshesh Juda douk shenek uhwinyumagak eshesh madae Juda iri uwe mumam? Aka ehudok aih um shatah esheshiruh yegeshiweruh um douk henekumesh maresh yopishi eneshenesh? <sup>2</sup> Adur Iruhin nenekumesh sabaishi yopishi eneshenesh. Sago-matinyish douk eshudok. Iruhin nekesh ananin baraen eshesh Juda um shiyohen.

<sup>3</sup> Nekeshenyi aria enesh madae gamo shugipeshen wosik uwe uwok. Shenekesh namudok aria ipak ta pukriyen mumam? Shenekesh namudok aria ipak pakri ta Iruhin mare gamo nugipesh enen nako Moses enyi adurinyi baraen wosik uwe aka? <sup>4</sup> Adur atin ta uwok. Ihish arpesh apa shenek roh, aria Iruhin uwok. Anan douk napeum neyagwreh adurin atin baraen kabi ananik Buk kwakrium. Kwakri namudok,

“Ihish arpesh ta shutik nyak aria shukri nyakin baraen douk adurin atin.

Aria enesh arpesh shunemen kwot obi nyutob, nyak ta nyunek uhwinyumat.”

<sup>5</sup> Douk atin eik yakri igipesh apak arpeshim urkum meyoh aria ikri enen baraen. Aria baraen enyudok. Aria douk atin apak munek enesh yoweishi inahos um aria arpesh shutrish ba gamo shudukem Iruhin aria shukri anan adur atin yopunari um, namudok aria douk ta mukri mumam? Abudok nyutob anan Iruhin ta nyibur juwehosibur um nuwanamap yoweishi inahos um eshudok yoweishi inahos apak monekesh iri um, aria ta mukri anan nenek yoweishi um apak aka, uwok? <sup>6</sup> Adurigom atin ta uwok. Aria anan ta mare nupe um nunek aduriah atih aih akure, anan ta mare gamo nunek skelum ihishmorim agundok atapishi arpesh um kwotog uwe, uwok. <sup>7</sup> Aria douk atin enen arpen nyukri, “Eik ikitak iyagwreh enen rohwin baraen aria enyudok nyunek Iruhin ananin adurin atin baraen nyunowereh nyutogur yopugunum aria eshesh ihishmorim shumneken aria shutuk Iruhin

ananin nyeigur nyuto um, aria namudok douk ta mumam, um ta nahwadesh shenek yoweishi inahos iri aria ta wata nuwaname yoweinyi poe?” <sup>8</sup> Aria enen kupainyi arpen ta nyunek roh, nyukri, “Yaipo! Apak munek enesh yoweishi inahos um yopihi aih ta hutogur.” Aria apak wosik ta mukri namudok aka, uwok? Adur atin, enesh arpesh douk shenek roh, shenek enenyenen um eik Pol shaduk baraen shakri eik yakri namudok. Aria uwok. Arpesh shakri namudok iri, kweipon Iruhin ta adur nuwanamesh yoweinyi poe kabi douk eshesh shenekehi yoweih aih um.

#### *Madae Enen Arpen Nyenek Yopuhi Aduriah Aih Atuh Iri Uwe, Uwok*

<sup>9</sup> Eshudok yoweishi douk showeshik ihipmorim. Namudok aria um mumam? Apak Juda adur munek uhwinyum meshagrakuk eshesh madae Juda iri uwe um munek yopihi aih um aka, uwok? Aria adur atin namudok ta uwok. <sup>10</sup> Kabi baraen nyetem Iruhin ananik Buk iri nyakrium. Douk nyakri namudok,

“Madae enen arpen nyenek yopuhi aduriah aih atuh iri uwe, uwok.

Atin arpen meyoh nyenek yopuhi aih iri douk madae enen uwe.

<sup>11</sup> Nyadukem yopuhi aih iri arpen douk shopunek madae enen uwe, uwok.

Aria enen arpen nyupe nyunek mour um nyurim Iruhin uwe, uwok.

<sup>12</sup> Ihishmorim arpesh douk shatanam shakonagak agabus.

Aria ihishmorim shatogur yoweishi arpesh.

Madae enen arpen nyunek yopuhi aih uwe, uwok.

Amu wouwokuk abom.

<sup>13</sup> Esheshin baraen douk kabi anaruh wonugwegwiruh douk

enesh shatarari arpesh shor aria paworuruh

aria ba yoweiri unar rakihumori.

Eshesh douk shapeum shenek roh, um kupaishi aria esheshin baraen douk wanohwin atin

kabi yowenari marasin nor yoweiguhwi yuguhw-mori.

14 Eshesh douk shapeum sheneyagwreh sabainyi yoweinyi baraden douk apa nyanunu kupaishi nyenekesh madae shupe wosik uwe, uwok.

15 Eshesh douk apa shanak arigah atin ba shabo kupaishi shagok.

16 Ihigun agundok douk eshesh shunak um, eshesh douk apa shenekesh enenyenen eshesh kupaishi shenekesh sharao debeiri eriger.

17 Ehudok aih um shuni kupaishi shupe atugun shukesh aparuh hur wosik um kupaishi douk madae shudukemeh uwe, uwok.

18 Eshesh douk madae ta shunogugur um Iruhin uwe, uwok.”

19 Namudok aria apak douk madukemesh. Enyudok baraden nyetem lo Iruhin nakoguk Moses enyi iri, enyen douk nyakrium eshesh Juda douk shape shakamum enyudok lo iri. Amam henyem um apak ihipmorim mutarihen aria mudukemen um mare enen arpen ta nyiyagwreh nyukri enyen douk adur nyape yopunyi arpen, aria ta uwok. Aria apak ihipmorim mape agundok atap iri douk baraden nyapeyap iri kweipon Iruhin ta nunemap kwotog. 20 Aria ta putik. Ahudok yah um shagipesh lo um Iruhin ta mare nutrish nuhwaresh yopishi arpesh uwe, uwok. Enyudok lo enenyin adurin mour douk nyenekap madukumesh um apak menek yoweishi inahos iri.

*Arpen Nyusuhw Krai Ananin Baraden Dodog Nyugipeshen Iri Douk Adur Nyatogur Yopunyi Arpen*

21 Aria douk, Iruhin neyabigesh ananin adur yopih yah um nuhwar arpesh um yopishi arpesh. Aria adur um bilip atin apak douk maparug ahudok yopuhi yah. Ahudok yah douk madae mugipesh enyudok lo um uwe, uwok. Adur sabainyi baraden nyetem Iruhin ananik Buk iri douk nyakrium ahudok yopuhi yah. 22-23 Ahudok yah douk namudok. Ihishmorim arpesh shusuhw Jisas Krai ananin baraden dodog ba shigipeshen iri, Iruhin apa nahwaresh yopishi arpesh. Anan nenekesh namudok

um ihishmorim agundok atapishi arpesh shopunek ta shenek bilip um Krai atin aria shugim ahudok atuh yah. Umum maresh? Anan nenekesh namudok atin um ihishmorim arpesh. Apak ihipmorim douk monek yoweishi inahos iri aria adur atin mapeik rougun um Iruhin aria madae muraao ananin yopihi aih uwe, uwok. 24 Anan adur nataurum apak meyoh aria nahwarap um yopishi arpesh. Nahwarap um yopishi arpesh um enyudok mour douk Krai Jisas neneken um natorup aria nakweshiap mape wosik atin um. Apak madae munekuman enesh yopishi eneshenesh aria nohwarap yopishi arpesh uwe, uwok. Nohwarap yopishi arpesh meyoh um enyudok mour douk Jisas Krai neneken iri atin.

25 Iruhin neshopoki Krai Jisas nanaki shan nagok aria ananibor owishibor batourak bakrup ihish arpesh. Bakrup eshudok arpesh douk shasuhw anan Krai ananin baraden dodog shagipeshen iri. Namudok aria Iruhin madae nyibur juwehosibur nukri urkum murum yoweinyi eshesh sheneken iri uwe, uwok. Umum maresh? Anan nakweshiheshuk um niyabig ananin yopihi adur aih um nohwarap yopishi arpesh um. Seiwok arigaha douk anan nape meyoh madae nukri um nuwanamesh yoweinyi poe um eshudok eshesh shenekesh iri yoweishi inahos uwe, uwok. 26 Iruhin nenek enyudok um douk niyabigap ananin yopihi adur aih ba matrih. Nenekesh namudok um niyabigap anan douk yopini abom nenek yopihi atih aih iri. Aria shopunek nenekesh namudok ba neyabigap um ihishmorim shasuhw Jisas ananin baraden dodog shagipeshen iri douk anan apa nahwaresh nakri yopishi arpesh. 27 Namudok aria douk apak yah wakap um mubo mishish mutuk apak kanak apakish nyeiguhw shuto iruhw aria mukri apak douk yopipari abom iri. Umum maresh? Ahudok yah douk heshuk. Ahah douk heshuk um maresh? Apak ta mare mugipesh lo aria mutogur yopishi arpesh uwe, uwok. Apak ta monek bilip meyoh um Jisas aria Iruhin ta nohwarap yopishi

arpesh. <sup>28</sup> Umum maresh? Apak makri namudok. Iruhin madae nuhwar arpesh yopishi um agundok shugipesh lo um uwe, uwok. Anan douk nahwadesh yopishi um agundok shasuhw Kraiss ananin baraan dodog aria shagipeshen um. <sup>29</sup> Aria pakri mumam? Aria Iruhin ta eshesh Juda esheshin atun aria eshesh madae Juda iri uwe ta uwok aka? Adur atun uwok. Anan douk eshesh madae Juda iri uwe esheshin shopunek. <sup>30</sup> Umum maresh? Iruhin anan douk adur atin meyoh. Ithismorim arpesh douk shasuhw Kraiss ananin baraan dodog shagipeshen iri, anan apa natrish nahwadesh yopishi arpesh. Eshudok Juda shatah yegeshiweruh iri shenek bilip um Kraiss iri shani eshesh madae shutah yegeshiweruh iri uwe shenek bilip um Kraiss iri douk nahwadesh yopishi arpesh arag atin. <sup>31</sup> Apak monek bilip um Kraiss aria Iruhin nahwarap yopishi arpesh. Aria douk ta enyudok bilip nyenekap makenyuk agabus enyudok lo mare dodogowin uwe aka? Adur atin ta uwok. Apak monek bilip um Kraiss aria ta adur abom munek enyudok lo nyutogur dodogowin.

#### 4

#### *Abraham Nasuhw Iruhin Ananin Baraan Dodog Nagipeshen Aria Iruhin Nahwaran Yopuni Arman*

<sup>1</sup> Aria apak ta mukri mumam, um anudok apak Juda apakin yamenen Abraham? Anan douk arpen meyoh kabi apak um. Anan nenek meihi aih aria douk nenek bilip um Kraiss um? <sup>2</sup> Aria douk adur um anan nunek enen yopunyi mour aria um enyudok ba nutogur yopuni arman akure, namudok aria anan ta wosik ko nunadudareh um enyudok mour aria nutuk ananin nyeigur nyuto iruhw. Aria uwok. <sup>3</sup> Baraan nyetem Iruhin ananik Buk iri nyakri namudok. "Abraham nasuhw Iruhin ananin baraan dodog nagipeshen. Namudok aria Iruhin nahwaran um yopuni arman."

<sup>4</sup> Apak douk madukemesh. Arpesh shenek mour iri apa sharao utabor. Aria abrudok utabor douk madae shutrubor

um shurabor meyoh kabi sharao enen mugu douk shekesh-umen meyoh um iri uwe, uwok. Abrudok utabor douk shatorish um shenek mour um. <sup>5</sup> Aria enyudok arpen douk madae nyunek mour um nyutogur yopunyi, aria nyusuhw Iruhin ananin baraan dodog nyugipeshen meyoh iri, anan douk natik enyenyin bilip aria nahwaren yopunyi arpen. Anudok Iruhin apa nahwar shenek yoweishi inahos iri arpesh shatogur yopishi arpesh.

<sup>6</sup> Seiwok David douk nakriyuk enyudok atin baraan um agundok arpesh shunadudareh um. Eshudok arpesh, Iruhin douk madae nutik enen sheneken iri mour aria kweipon ta nuhwadesh yopishi arpesh uwe, uwok. Anan nahwadesh yopishi arpesh meyoh. <sup>7</sup> Seiwok Devit douk nakriyuk namudok.

"Eshudok arpesh douk Iruhin madae nunasuhw esheshish yoweishi inahos nupe uwe aria nakwreyeshuk iri, eshesh wosik ta shunadudareh.

<sup>8</sup> Arpesh douk Iruhin ta mare wata urkum murum esheshin yoweinyi iri, eshesh wosik ta shunadudareh."

<sup>9</sup> Devit douk nakriyuk um agundok arpesh shunadudareh um. Aria douk mumam? Aria douk nakri um eshesh Juda shatah yegeshiweruh iri atish um shunadudareh aka? Namudok uwok. Eshesh madae shutah yegeshiweruh iri uwe shopunek shanadudareh. Ipak urkwiporum nubo riguk yakriyenyi baraan um apudok shup douk petem Iruhin ananik Buk iri. Enyen douk nyakri, "Abraham nasuhw Iruhin ananin baraan dodog nagipeshen. Aria douk Iruhin natik ananin bilip namudok aria nahwaran yopuni arman."

<sup>10</sup> Abudok nyutob Iruhin nahwar Abraham douk yopuni arman obi nyutob, anan Abraham douk natah ananihw yegenyihw aka, watak? Adur, abudok nyutob anan douk wata nutahohw uwe, uwok. Aria Iruhin anan narik nahwaranagak um yopuni arman.

<sup>11</sup> Anan narik nasuhw Iruhin ananin baraan dodog nagipeshen aria yegenyihw nagiguk natahohw. Aria agundok natah

yegenyihw um, douk natahohw um nenek kak meyoh. Nenek kak meyoh um anan urkum murum abudok nyutob anan madae nutah yegenyihw obi nyutob uwe, aria Iruhin natik ananin bilip aria narik nahwaran yopuni arman. Namudok aria Abraham anan douk natogur ihishmorim shasuhw Iruhin ananin baraen dodog shagipeshen aria anan Iruhin nahwadesh yopishi esheshin yamenen. Eshesh douk shenek bilip atin iri. Aria madae shutah yegeshiweruh iri uwe, uwok. <sup>12</sup> Abraham anan douk shopunek nape shatah yegeshiweruh iri esheshin yamenen. Eshesh douk madae shuhwaran yamenen agundok shatah yegeshiweruh atugun um uwe, uwok. Shopunek shahwaran yamenen mumam, eshesh douk shape numun um shagipesh apakin yamenen Abraham ananiruh yeriweruh. Umum agundok shasuhw Iruhin ananin baraen dodog shagipeshen kabi anan madae nutah ananihw yegenyihw uwe aria narik nasuhw Iruhin ananin baraen nagipeshen um.

*Iruhin Ananin Adurin Atin Baraen Douk Nakriyen Nyanam Ihish Arpesh Shasuhw Ananin Baraen Dodog Shagipeshen Iri*

<sup>13</sup> Seiwok Iruhin nakripan enen adurin atinyi baraen Abraham. Nakripan um ta nukon ihib amnab anan Abraham nini ananish barheshish douk kweipon shugiguk shutogur iri um shunagremab. Aria putik, Abraham douk madae nugipesh enyudok lo aria seiwok Iruhin natrun nakripan enyudok ananin adurin atinyi baraen uwe, uwok. Anan douk nasuhw Iruhin ananin baraen dodog nagipeshen aria Iruhin natrun aria nahwaran yopuni arman. Aria douk nenek enyudok aria Iruhin seiwok nakripan enyudok adurin atinyi baraen. <sup>14</sup> Namudok aria ta eshudok shagipesh enyudok lo iri atish shunarao eshudok douk Iruhin nakripesh adurin atin baraen um nukepesh iri aria shunagremesh um, aria ehudok aih um pusuhw ananin baraen dodog pugipeshen um ta mare nyutaurumap uwe, uwok. Enyudok Iruhin nakripep-enyi adurin atin

baraen shopunek ta mare nyutaurumap nyunekumap enen yopinyi uwe, uwok. <sup>15</sup> Umum maresh? Enyudok lo Iruhin nakoguk Moses enyi douk nyeyabigap um Iruhin ta nyibur juwehosibur aria nuwanamesh yoweinyi poe eshudok arpesh douk shabrig lo iri. Aria ta enyudok lo mare enen akure, Iruhin ta mare nukri arpesh shabrig lo aria shenek yoweishi inahos uwe, uwok. <sup>16</sup> Namudok aria Iruhin nakri nenek yopuhi aih um apak um enyudok adurin atin baraen douk nyanamori apak um bilip atin. Anan nakri namudok um atun nutaurumesh meyoh nuraesh shutanamori aria enyudok baraen nyutogur adurin atin um ihish Abraham ananish barheshish. Eshesh douk shagipesh lo iri atish aka, uwok. Eshesh shenek bilip um Iruhin kabi Abraham seiwok nenek bilip um Iruhin um, eshesh shopunek. Anan douk apak ihipmorim apakin yamenen. <sup>17</sup> Enyudok yakri enyi baraen douk kabi Iruhin ananik Buk kwakri um. Kwakri Iruhin nakrip Abraham nakri, “Eik yeneken nyatogur arpesh douk shape sabairubi warub nahobig iri esheshin yamenen.” Iruhin natik Abraham um, anan douk adur nape apakin yamenen. Abraham apa nenek bilip um anudok Iruhin douk apa nohur shagok iri aria shakitak shape. Shopunek anudok Iruhin apa nakri baraen atin aria eneshenesh wata shutograri uwe aria douk shatogur arpesh shatrish.

<sup>18</sup> Aria abudok seiwokib nyutob, Abraham anan douk wata nutrish uwe eshudok douk Iruhin nakripan um ta nunekesh iri. Aria anan douk adur nasuhw Iruhin ananin baraen dodog nagipeshen nakri anan adur ta nunekesh kabi nakripan baraen um. Abraham nenekesh namudok aria douk “Natogur arpesh douk shape sabairubi warub nahobig iri esheshin yamenen.” Enyudok douk kabi Iruhin nakripan um. Nakripan namudok, nakri, “Nyakish yamehesh ta adur shutogur sabaishi.” <sup>19</sup> Abraham rowogin ananish kwarahos hurukatin um shunak shutogur 100-poreish aria ananihw yegenyihw douk hwatogur kabi

hwagok iri um. Ananik irohukwik Sara shopunek kwape kupik aria adur rowogik. Anan natik namudok aria uwok. Aria adur nasuhw Iruhin ananin baraeen dodog.<sup>20</sup> Iruhin nakripan ananin adurin atinyi baraeen namudok aria anan madae nukri um nunek biyep urkwip um nukutukuk bilip uwe, uwok. Adur nasuhw Iruhin ananin baraeen dodog aria enyudok bilip atin nyenekan dodogowin. Aria nape nanadudareh natuk Iruhin ananin nyeigur nyato iruhw.<sup>21</sup> Anan adur nadukemesh abom um Iruhin anan dodogowin atun um ta nunek enyudok douk nakripan adurin atinyi baraeen um ta nuneken iri.<sup>22</sup> Namudok aria Abraham “Nasuhw Iruhin ananin baraeen dodog nagipeshen aria Iruhin nahwaran yopuni arman.”<sup>23</sup> Enyudok baraeen, “Iruhin nahwaran yopuni arman” um, enyen douk henyem nyetem Iruhin ananik Buk. Enyen douk madae hinyem nyukri um Abraham atun uwe, uwok.<sup>24</sup> Aria amam henyemagak nyakrium apak shopunek. Apak douk monek bilip um Iruhin douk nohuri Jisas apakin Debeini nakitak wonugwehw iri. Namudok aria apak shopunek Iruhin ta nuhwarap yopishi arpesh.<sup>25</sup> Iruhin neshopok Jisas aria nanaki nagok. Um maresh? Apak monek yoweishi inahos. Nagok aria Iruhin ta nonohur nakitak napeum Iruhin nunek apak nutrup nuhwarap yopishi arpesh.

## 5

### *Iruhin Nohwarap Yopishi Arpesh*

<sup>1</sup> Apak douk masuhw Iruhin ananin baraeen dodog magipeshen aria anan natrup nahwarap yopishi arpesh. Namudok aria douk apakin Debeini Jisas Kraisenekap apakiruh aparuh hor wosik aria mani Iruhin mape atugun.<sup>2</sup> Apak douk monek bilip um Jisas. Namudok aria anan meyoh narapari manaki mawish agundok Iruhin nataurumap meyoh um. Aria douk manadudareh abom. Umum maresh? Apak douk adur madukemesh um kweipon apak ta munak iruhw heven murao debeishi nyeiguhw aria muni Iruhin mupe.<sup>3</sup> Aria apak mare munadudareh um enyudok atin uwe, uwok.

Abudok nyutob amaen nyutogrupap um, apak shopunek manadudareh. Umum maresh? Amaen douk nyatogrupap um mutogur dodogowip aria miyotu musah enenyenen amaen.<sup>4</sup> Aria ehudok aih um apak dodogowip um miyotu musah enenyenen nyutogrupap iri amaen um, ehudok aih ta hunekap mutogur yopishi arpesh aria miyotu dodog. Aria ehudok aih um miyotu dodog um ta hunekap adur mudukemesh um Kraisenekap ta nunaki aria nunekumap yopihi aih.<sup>5</sup> Apak douk mape matrugun um enyudok aria douk madae mupe mutrugun meyoh uwe, uwok. Umum maresh? Iruhin douk nakop ananin Mishin nyapeyap aria nyataurumap ba madukemesh um enyudok adur ta nyutogur. Enyudok ananin Mishin douk nyenekap madukemesh um agundok Iruhin anan adur urkum manawasham apak um.

<sup>6</sup> Abudok nyutob Iruhin nakriyobi apak wata dodogowip um aria wata mape monek yoweinyi obi nyutob, Kraisenekap nanaki nagok. Nagok um wata nunarao apak douk mokon agbus Iruhin iri aria wata mutanam um anan Iruhin.<sup>7</sup> Adur atin. Apak ta mare enen arpen nyukri wosik um nyugok ba nyutaurum enen yopunyi arpen uwe, uwok. Aria wosik um ta enen yopunyi atin arpen adur ta wosik nyukri nyugok um nyutaurum enen adur yopunyi arpen.<sup>8</sup> Aria wosik um ta Iruhin anan douk adur neyabigap um agundok anan urkum adur munawasham apak abom um niyabigap namudok. Abudok nyutob apak douk wata mape monek yoweinyi atin aria Kraisenekap nanaki nagok um apak.<sup>9</sup> Nagok aria ananibor owishibor botourak bakrup apak aria Iruhin natrup ba nahwarap um yopishi arpesh. Namudok aria apak adur madukemesh um Kraisenekap ta nurap mutanam aria mupe wosik atin. Aria agundok Iruhin nyibur juwehosibur atubur um yoweinyi apak moneken iri um, anan ta mare nenekap murao eriger uwe, uwok.<sup>10</sup> Riguk apak douk mape Iruhin ananish horik horin. Aria ananin Nuganin wata nanaki nagok um apak, Iruhin wata nahwarap ananish arpesh aria nenekap mani anan mape

atugun. Krai douk nagok aria wata naki-tak nape aria apak adur madukemesh abom um anan ta wata nurap mutanam um adur mupe wosik atin. <sup>11</sup> Aria douk madae namudok atin uwe, uwok. Douk apakin Debeini Jisas Krai douk shopunek nenekap matogur Iruhin ananish arpes. Anan nenekap namudok aria adur man-adudareh um Iruhin.

*Adam Nakwarum Gok Aria Jisas Nakwarum Agundok Mape Wosik Um*

<sup>12</sup> Apak douk madukemesh. Atun arman nenek yoweishi inahos aria ahudok yoweih aih hatogur agundok atap. Ahudok aih hatogur aria hakwaromori gok. Namudok aria gok nyatogurum ihishmorim arpes. Um maresh? Ihishmorim arpes shenek yoweishi inahos atish. <sup>13</sup> Lo seiwok Iruhin nakoguk Moses enyi douk wata nyutogur uwe, aria ehudok aih um shenek yoweishi inahos um shatogur shape agundok atap. Aria Iruhin madae nukop lo uwe uwok aria Iruhin ta mare urkum murum ihishmori atin atin yoweishi inahos douk arpes shenekesh iri uwe, uwok. <sup>14</sup> Namudok aria abudok nyutob Adam natogur napenyobi arigaha banak batogurumori abudok nyutob Moses natogur napenyobi, ihishmorim arpes douk shagok. Enesh shenekesh iri yoweishi inahos douk madae shubrig Iruhin ananin dodogowinyi lo kabi enyudok Adam neneken iri um uwe namudok, aria eshesh shopunek shagok.

Namudok aria Adam anan douk natogur kabi enen kak meyoh um anudok arman kweipon ta nutogur iri. Umum maresh? Adam nokwarum gok aria Jisas nokwarum agundok mape wosik abom um. <sup>15</sup> Ehudok aih um Iruhin nataurumap meyoh um hani eshudok Adam nenekesh iri yoweishi inahos douk madae hanaki shopunek arag atin uwe, uwok meyoh. Adur, atun arman meyoh nenek yoweishi inahos aria sabaishi arpes namudok shagok. Aria ehudok aih um Iruhin nataurumap meyoh um douk adur hatogur dedebbeh um anudok atun arman Jisas Krai. Iruhin nataurumap namudok aria douk apak sabaipari douk marao Iruhin ananin yopinyi shuraen

meboh iri mugu. Enyudok shuraen meyoh iri mugu douk adur nyeshagrakuk abom um agundok shagok um. <sup>16</sup> Aria enyudok Iruhin ananin shuraen meyoh iri mugu douk madae nyenekeshumap namudok atin kabi enyudok yoweinyi ina Adam neneken iri nyenekeshumap um uwe, uwok. Adam nenek atin yoweinyi ina aria Iruhin nenek kwotumap nakri apak ihipmorim ta munak muwishuk. Apak ihishmorim arpes wata monek yoweishi inahos aria Iruhin adur nataurumap nenek giha abom nakop meyoh ananin yopinyi shuraen meyoh iri mugu um agundok aria nahwarap yopishi arpes. <sup>17</sup> Adur atin atun arman madae numnek Iruhin ananin baraen. Aria anan nenekesh iri yoweishi inahos shakwarumori gok. Aria enyudok gok nyape debenyum ihish arpes kabi debeimi king-omi hape debeimi um. Aria ehudok aih um Iruhin nenemap giha aria nataurumap meyoh abom um douk adur dedebbeh atih heshagrakuk enyudok gok. Aria apak adur madukemesh um apak douk marao ehudok Iruhin ananin yopihi aih um agundok nataurumap meyoh aria nohwarap yopishi arpes um. Aria apak ta mupe debeipari ihih nyumneh kabi amam debeimi king um. Iruhin nataurumap namudok um anudok atun arman Jisas Krai nenekah iri aih atuh.

<sup>18</sup> Namudok aria apak madukemesh namudok. Atun arman nenek atin yoweinyi ina aria apak ihipmorim mape yoweinyi poe aria ta munak muwishuk. Aria wata namudok atin. Atun arman nenek atin yopinyi mour aria Iruhin natik namudok aria wata nahwar ihishmorim yopishi arpes. Aria douk nenekapum mupe wosik aria mare mugok uwe, uwok. <sup>19</sup> Atun arman madae numnek Iruhin ananin baraen. Namudok aria sabaishi arpes shatogur shenek yoweishi inahos atish iri. Aria namudok atin. Atun arman wata nasuhw Iruhin ananin baraen nagipeshen namudok aria sabaishi arpes ta shutogur yopishi arpes. <sup>20</sup> Enyudok lo nyatogur um ihish arpes shudukemesh abom um mareh aih douk yopih, aria mareh aih douk yoweh. Aria enyudok lo nyohur



arpesh um shunek yoweishi inahos. Eshesh shenek sabaishi atish yoweishi inahos, aria agundok Iruhin nataurumesh meyoh um neshagrakuk agundok shenek yoweishi inahos abom um. <sup>21</sup> Riguk eshudok yoweishi inahos shape dedebesh abom namudok aria shakwarumori gok. Aria um douk namudok atin. Enyudok Iruhin nataurumap meyoh um douk nyatogur nyanawashak debegun aria nape debegun. Anan nenekeshumap namudok aria nahwarap yopishi arpesh um ta mupe wosik ihih nyumneh. Anan atun nenekap matogur namudok um enyudok apakin Debeini Jisas Kraiss neneken iri mour.

## 6

### *Apak Douk Mani Kraiss Magok Atugun*

<sup>1</sup> Namudok aria apak ta mukri maren baraan? Aria mukri apak mupe um munek yoweishi inahos namudok atin um Iruhin nupe um nutaurumap meyoh namudok atin, aka? <sup>2</sup> Adur atin ta uwok. Apak douk kabi magok iri um. Aria ehudok aih shenek yoweishi inahos um douk makutuhukuk. Aria namudok ta mumam, um douk wata mupe munek yoweishi inahos namudok atin um? Namudok uwok. <sup>3</sup> Ipak douk padukemesh aka, uwok? Apak ihipmorim douk menek baptaisum agundok manak matukur Kraiss Jisas um. Aria shopunek mani anan magok um agundok manak matukur anan um. <sup>4</sup> Namudok aria agundok apak menek baptaisum douk mani Kraiss magok shopunek aria Iruhin naromap atugun. Nenekesh namudok um apak shopunek um ta mugipesh namuhi yopihi aih kabi apakin Yaken nakwu ananin dodogowinyi aria debeinyi dodog abom ba nohuri Kraiss nakitak um.

### *Apak Douk Ta Muni Kraiss Mupe Ihih Nyumneh*

<sup>5</sup> Apak adur manak matukur Kraiss aria mani anan magok kabi anan nagok um. Aria namudok atin, apak douk manak matukur anan aria adur ta muni anan mukitak wonugwehw kabi anan seiwok nakitak wonugwehw um. <sup>6</sup> Apak madukemesh. Ahudok harik hapeyapi

iri yoweih aih douk hani Kraiss hagokuk rowog kruse um Iruhin niyatok enyudok dodog douk nyape nyenek yoweih aih ba nyapeyap iri. Iruhin nenekesh namudok aria ehudok yoweih aih um shenek yoweishi inahos um douk mare wata shopunek shuweshikap uwe, uwok. <sup>7</sup> Umum maresh? Shagok iri arpesh douk enyudok dodog um shenek yoweishi inahos um douk wata nyuweshikesh atin uwe, uwok.

<sup>8</sup> Apak douk manak matukur Kraiss aria kabi mani anan magok um. Namudok aria adur monek bilip mudukemesh um apak shopunek ta wata muni anan mupe wosik. <sup>9</sup> Umum maresh? Apak madukemesh adur. Kraiss nagok aria shopunek nakitak um, anan ta mare wata nugok shopunek uwe, uwok. Gok douk madae dodogowin um wata nyuweshik anan uwe, uwok. <sup>10</sup> Anan douk nagok atuh arag aria nohudok atuh arag nagok um douk nanunu enyudok um shenek yoweishi inahos um. Kweipon ta mare wata nugok shopunek uwe, uwok. Aria douk napeum nape kabi Iruhin nakri um, um natuk anan Iruhin ananin nyeigur nyato iruhw um. <sup>11</sup> Aria ipak douk namudok atin. Ipak punubo urkwip pukri ipak adur pagok aria pabouk enyudok dodog um penek yoweishi inahos um shatuhuk. Pakri ipak douk panak pantoruhw Kraiss Jisas aria pape kabi Iruhin nakri um. <sup>12</sup> Ipak mare purauri yoweishi inahos um shiyoh-umep aruhudok ipakiruh yegeshiweruh douk adur apa hagok hatar iri uwe, uwok. Punekesh namudok um kadak yoweishi inahos shenekep um aria pugipeshuk ehudok ipak mishish shakitakumeh iri yoweih aih. <sup>13</sup> Aria mare wata shopunek purauri yoweishi inahos um tukwaniruh um ipakiruh yegeshiweruh hunamaguk um punek enesh yoweishi inahos uwe, uwok. Aria ipak ta pukon ipak kanak um Iruhin aria pupe kabi arpesh douk shagok iri aria wata shopunek shakitak shape iri um. Aria ipak shopunek ta pukon ihigunum um ipakiruh yegeshiweruh um Iruhin um nenek mourumaruh um hugipesh um yopihi aih atih.

<sup>14</sup> Namudok aria yoweishi inahos mare wata shiyohop uwe, uwok. Umum maresh, ipak douk awom ta pupe shakamum lo pugipeshen aka, uwok. Umum maresh? Ipak douk pape shakamum agundok Iruhin nataurumap meyo um.

*Apak Ta Mupe Munek Mour Um Yopihi Atih Aih*

<sup>15</sup> Douk opak wata mupe shakamum enyudok lo Iruhin nakoguk Moses enyi aria mugipeshen uwe, uwok. Douk mape shakamum agundok Iruhin nape nenemap giha aria nataurumap meyo um. Aria douk ta mumam? Mape namudok aria ta wosik um wata mupe munek yoweishi inahos aka, uwok? Adur atin ta uwok. <sup>16</sup> Ipak douk padukemesh. Abudok nyutob ta ipak pukon ipak kanak um anan debeini aria pupe shakamum anan pupe punek ananin mour um, namudok aria ipak douk pagipesh ananin baraen kabi douk naweshikep um pape peneman garibog um. Aria douk namudok atin. Pakri pugipesh yoweih aih um, ba kweipon eheh ta hunekep pugok. Aria pakri pugipesh Iruhin ananin baraen um, kweipon anan ta nuhwarep yopishi arpesh. <sup>17</sup> Namudok aria opak douk manadudareh um Iruhin um enyudok. Adur, riguk ipak douk pape shakamum yoweishi inahos aria pape penemesh garibog. Aria Iruhin wata nataurumep pemnek ananin shakriep-enyi baraen aria adur pakri adurin atin pasuhwen aria pagipeshen abom. Namudok aria opak douk monek tenkyu um Iruhin um enyudok. <sup>18</sup> Iruhin nakweshih-epaguk um yoweishi inahos pape wosik atin aria nenekep pape shakamum anan aria pape pagipesh ananin yopihi atih aih. <sup>19</sup> Ipakip urkwip douk wata dodogowip um gamo pudukemesh uwe, watak. Namudok aria yakri ikwu opak arpeship urkwip meyo aria ikriep um enyudok baraen. Riguk ipak douk pape shakamum yoweishi inahos penemesh garibog aria pakwu anabigiruh um ipakiruh yegeshiweruh penek yoweishi inahos shanabo susih iri shani eneshenesh yoweishi inahos shopunek. Penek yoweishi namu-

dok aria adur showeshikep dodog meyo. Aria douk ipak ta pukon ipak kanak um Iruhin, pupe shakamum anan aria punek garibog um punek ananin yopihi aih aria adur pupe ananip atip.

<sup>20</sup> Riguk abudok nyutob yoweishi inahos showeshikep dodog pape penemesh garibog obi nyutob, ehudok yopihi aih douk madae huweshikep uwe, uwok.

<sup>21</sup> Riguk ipak penek yoweih aih aria douk parao abraen um ehudoki aih. Aria ipak douk parao maresh yopishi eshudok um eshudok riguk penekesh iri yoweishi inahos? Aria uwok. Ehudok aih douk hokwarum gok atin. <sup>22</sup> Aria douk Iruhin nakweshih-epaguk um eshudok yoweishi inahos aria pape wosik atin. Nakweshih-hep aria nepusop pape shakamum anan pape penek ananin mour. Aria ta parao yopishi eshudok namudok. Aria ta adur pupe ananip atip punek yopihi aih aria kweipon ta adur pupe wosik ihih nyumneh. <sup>23</sup> Umum maresh? Yoweishi inahos ta shekesh shashudok arpesh douk shape shakamum shenekesh iri. Enyudok poe douk shugok atin um. Aria enyudok Iruhin nakopen meyo iri yopunyi mugu douk enyudok. Aria ta adur mupe wosik ihih nyumneh. Apak douk monak matoruhw Krai Jisas apakin Debeini aria ta nunekap mupe namudok.

## 7

*Enyudok Wobren Baraen Um Shana-  
raum Um Douk Nyakripap Um Mugipesh  
Namuhi Aih*

<sup>1</sup> O eikish ashukenyish owashish, enyudok agundok atapinyi lo douk padukemen. Namudok aria douk enyudok yakri ikriep um baraen douk padukemen wosik abom iri. Arpen wata nyupe obi nyutob, enyudok lo douk dodogowin atin aria nyoweshiken. <sup>2</sup> Namudok aria onok armatok kwurao anan arman aria anan wata nupe obi nyutob, enyudok lo douk wata nyaweshikesh dodog eshesh biyesh shopunek atin. Aria douk anan nugokuk um, okwok enyudok lo douk madae nyuweshigok uwe, uwok. Kwape meyo atin. <sup>3</sup> Namudok aria douk okwokwin wata nupe aria okwok kwunak

kwuwaur kupaini um, okwok douk ta shuhwarok kwabrig shanaraum um iri. Aria douk okwokwin nugokuk um, enyudok lo douk madae nyuweshigok uwe, uwok. Kwape meyh atin. Namudok aria kwukri kwurao kupaini um, namudok okwok douk madae kubrig shanaraum uwe, uwok.

<sup>4</sup> Namudok aria eikish arpes, ipak patukur Kraisa aria namudok douk pagok pani anan. Namudok aria enyudok lo Iruhin nakoguk Moses enyi douk shopunek madae nyuweshikep uwe, uwok. Douk apak mape anudok arman douk Iruhin nonohur nakitak wonugwehw iri ananipari. Mape ananip um munek Iruhin ananip yopihi atih aih. <sup>5</sup> Um maresh? Riguk abudok nyutob apak wata mape magipesh ehudok harik hapenyap iri yoweih aih obi nyutob, enyudok lo douk nyohuri eneshenesh yoweishi numun apakiruh yegeshiweruh aria nyenekap mape menek yoweishi inahos. Namudok aria ehudok yoweih aih douk hakwaromori gok. <sup>6</sup> Aria douk enyudok lo douk madae nyuweshikap uwe, uwok. Um mare, apak douk mani Kraisa magok aria makutukuk ihishmori eshudok douk showeshikap iri. Aria douk madae mupe um munek mour mugipesh enyudok lo seiwok henyemaguk iri nyakrium uwe, uwok. Apak menek Iruhin ananin mour um ahudok ananip namuhi yah douk ananin Mishin nyokwarumah iri.

*Apak Makri Um Munek Yopishi Inahos Aria Yoweishi Inahos Shanunu Apak*

<sup>7</sup> Aria ta mukri mumam? Mukri enyudok lo enyen kanak douk yoweinyi aka, uwok? O adur atin uwok. Aria ta enyudok lo mare nyiyabige mareh aih yoweih akure, eik ta mare idukem yoweishi inahos uwe, uwok. Enyudok lo atin nyeneke aria yadukem yoweishi inahos. Douk namudok. Lo nyakri, "Nyak mare nyunek nyigiya um kupaishi esheshish eshudok eneshenesh." Douk lo mare nyukri namudok akure, aria ehudok aih um shene nyigiya um ta mare idukemeh uwe, uwok. <sup>8</sup> Enyudok lo nyeyabige yah um yoweishi inahos aria yoweishi inahos shawishi

shohur eneheneh aih um shenek nyigiya numun eikihw yegenyihw. Douk enyudok lo uwok akure, yoweishi inahos ta mare dodogowish uwe, uwok. <sup>9</sup> Riguk wata idukem enyudok lo obi nyutob uwe, eik douk yape aria enyen madae nye igok uwe, uwok. Aria arigaha enyudok lo nyatogur nyeyabige yoweishi inahos aria yoweishi inahos shakitaki dodogowish atish um <sup>10</sup> eik kanak yadukemesh um yape rougun um Iruhin aria shabo eik yagok. Enyudok lo seiwok Iruhin nakoguk Moses enyi, enyen douk nakonaguk um nyutaurum apak mupe wosik. Aria eik wata yatik um, enyudok lo nyae yagok. <sup>11</sup> Um maresh? Enyudok lo meyh nyeyabigesh yah yoweishi inahos, aria yoweishi inahos shaparugah shagimahi aria shagiyagim eik ba shae yagok. Um maresh? Eik yape rougun abom um Iruhin. <sup>12</sup> Namudok aria apak douk madukemesh. Enyudok lo, enyen kanak douk Iruhin ananin atin. Ihinyumori baraen douk enyudok lo nyakriyenyi, enyen shopunek Iruhin ananin nyenek holi iri aria yopinyi atin.

<sup>13</sup> Aria douk mumam? Aria ta ikri enyudok yopinyi lo nyae yagok aka? O adur atin uwok. Yoweishi inahos meyh shae yagok. Yoweishi inahos meyh shakwu enyudok yopinyi lo aria nyae yagok um apak mutik eshudok yoweishi inahos aria mukri o adur atin, eshudok douk yoweishi inahos. Namudok aria enyudok lo nyeyabigap yoweishi inahos aria madukemesh um eshesh douk yoweishi abom.

*Debeiruhi Wanogwiruh Hakitak Numunipam Apak*

<sup>14</sup> Apak madukemesh. Enyudok lo, enyen douk Iruhin ananin Mishin nyakwarumen. Aria eik douk yoweinyi arpen meyh yenek yoweishi inahos iri. Yoweishi inahos showeshike aria sheyohur yape yagipesh esheship atip urk-wip. <sup>15</sup> Ehudok yape yenekeh iri aih douk madae idukemeh uwe, uwok. Um maresh? Aih yakri um inekkeh iri douk madae inekkeh atin uwe, uwok. Aria aih yakri uwok um inekkeh iri, ehudok

apa yenekeh. <sup>16</sup> Eik apa yenek ehudok aih douk yakri uwok um inekesh iri. Yenekesh namudok aria yadukemesh um enyudok lo enyen douk yopinyi atin. <sup>17</sup> Namudok aria eshudok yoweishi inahos douk madae eik meyoh inekesh uwe, uwok. Yoweishi inahos shape numun eik iri atish sheneke. <sup>18</sup> Eik douk yape um yagipesh harik hapeyen iri yoweih aih. Aria yadukemesh um numuniwe um eik douk madae eneh yopihi aih hupeye uwe, uwok. Um maresh? Yabirak yakri um inek yopihi aih yabirak yatik uwok. <sup>19</sup> Yopishi inahos yakri um inekesh iri douk madae inekesh atish uwe, uwok. Aria yape um yenek yoweishi inahos douk yakri uwok um inekesh iri. <sup>20</sup> Aria douk yape um yenek yoweishi inahos douk yakri wokumesh iri, eshudok douk madae eik meyoh inekesh uwe, uwok. Yoweishi shape numun eik iri meyoh shenekesh.

<sup>21</sup> Namudok aria douk yatik ahudok dodogowihi aih hapenye iri um inek yoweishi inahos. Ahudok. Yakri um inek yopuhi obi nyutob, ahudok hapenye iri yoweih hakitaki hatupokume yah. <sup>22</sup> Adur, numun eikim urkum douk yanadudareh um Iruhin ananin lo yakri igipeshen. <sup>23</sup> Aria wata yatik kupainyi dodogowinyi lo nyenek mour nyape numun um eik um inek yoweishi inahos. Enyudok dodogowinyi lo apa nyani enyudok Iruhin ananin lo douk eik urkum makriyen iri nyarpok. Aria enyudok dodogowinyi lo nyape nyenek mour numun um eik iri nyoweshike dodog yape yenek mour um enyen atin. <sup>24</sup> O gihaum eik yape yowewe abom. Omi ta nyutaurume nyukweshihe um ahwudok yegenyihw douk apa hwagok iri? <sup>25</sup> Eik yenek tenkyu abom um Iruhin. Anan meyoh nakri aria Jisas Krai apakin Debeini ta nukweshihe ipe wosik atin.

Aria douk eik yape namudok. Eik kanak yape yagipesh Iruhin ananin lo um douk yagipeshen um eikim urkum atin. Aria numun um eik uwok. Ehudok harik hape iri atin yoweih aih hape howeshike dodog aria yape yenek yoweishi inahos atin.

## 8

### *Krais Nakop Iruhin ananin Mishin Aria Nyapeyap*

<sup>1</sup> Namudok aria apak armam armago douk matukur Krai Jisas iri, baraen douk madae enen nyupeyap um kweipon Iruhin nunemap baraen aria nuwanamap yoweinyi poe um, uwok. <sup>2</sup> Um maresh? Iruhin ananin Mishin enyenyih dodogowihi aih hataurumap aria nyakweshiap um yoweih aih hani enyudok shagok um. Iruhin ananin Mishin nyenekap mape wosik atin namudok um enyudok Krai ananin mour atin. <sup>3</sup> Enyudok lo seiwok Iruhin nakoguk Moses um douk madae dodogowip um nyutaurumap uwe, uwok. Um maresh? Apak madae dodogowip um mugipeshen uwe. Namudok aria enyudok mour douk lo madae dodogowin um nyuneken iri uwe, Iruhin ananin meyoh neneken. Neshopoki ananin nuganin nabuhi natogur arpen kabi apak monek yoweishi inahos iri, aria shan nagok nenek ofa nator apakish yoweishi inahos. Namudok aria Iruhin nenek skelum ehudok harik hapenyap iri yoweih aih nakri eshesh douk yoweishi inahos aria naesh shabuhuk. <sup>4</sup> Iruhin nataurumap namudok um douk apak mugipesh miyateh ehudok yopihi arpeshih aih douk lo nyakrium apak munekeh iri. Iruhin nanemap enyudok apak douk mare mupe um mugipesh ehudok harik hapenyap iri yoweih aih iri uwe. Anan douk neneken um apak douk mape um magipesh enyudok Iruhin ananin Mishin nyakripapen iri. <sup>5</sup> Eshudok arpesh douk shapeum shugipesh ehudok harik hapenyesh iri yoweih aih iri, esheship urkwip douk porum eshudok shakwarumesh iri yoweishi inahos atish. Aria eshudok arpesh douk shugipesh Iruhin ananin Mishin iri, esheship urkwip douk porum Iruhin ananin Mishin nyakripesh-enyi atin. <sup>6</sup> Eshudok arpesh douk urkwip porum shakri shugipesh sharik shapenyesh iri yoweishi inahos atish iri, eshesh ta shugok shunak shuwishuk. Aria eshudok douk urkwip porum shakri shugipesh Iruhin ananin

Mishin nyakripesh-enyi atin iri, eshesh ta shupe wosik ihih nyumneh aria aparuh hur wosik. <sup>7</sup> Eshudok arpesh douk urkwip porum shakri shugipesh sharik shapenyesh iri yoweishi inahos atish iri, eshesh douk Iruhin ananish horik horin. Um maresh? Eshesh douk madae shugipesh Iruhin ananin lo uwe, uwok. Aria eshesh ta mare dodogowish um shugipeshen uwe, uwok. <sup>8</sup> Eshudok arpesh douk shupe um shugipesh harik hapenyesh iri yoweih aih atin iri, eshesh ta mare shugipesh Iruhin ananim urkum aria shunekan nunadudareh uwe, uwok.

<sup>9</sup> Ipak douk Iruhin ananin Mishin nyapenyep aria madae pupeum um pugipesh harik hapenyep iri yoweih aih uwe. Pape um pugipesh enyudok douk Iruhin ananin Mishin nyakripen iri atin. Arpesh douk madae Kraish ananin Mishin nyupenyesh iri uwe, eshesh douk madae ananishi uwe, uwok. <sup>10</sup> Ipakiruh yegeshiweruh douk yoweishi inahos sharuh aria ta hugok. Um maresh? Apak munek yoweishi inahos. Aria ta Kraish nupenyep um, ipakish mishish ta shupe ihih nyumneh. Um maresh, ipak Iruhin douk nahwarep yopishi arpesh. <sup>11</sup> Iruhin douk nohur Kraish nakitaki wonugwehw. Aria douk anan Iruhin ananin Mishin nyupenyep um, aria kweipon anan shopunek ta nunek arhudok ipakiruh hugok iri yegeshiweruh wata dodogowiruh hupe wosik ihih nyumneh. Iruhin ta nukri aria ananin nyapenyep iri Mishin ta nyunekep namudok.

### *Iruhin ananin Mishin Nyenekap Matogur Ananish Batowish*

<sup>12</sup> Namudok aria eikish ashukenyish owashish, apak douk enen tuwehin nyapenyep um mubeyen. Enyudok tuwehin douk mare mubeyen um enyudok mugipesh ehudok harik hapenyep iri yoweih aih um uwe, uwok. Apak ta mugipesh Iruhin ananin Mishin nyakriyen iri baran. <sup>13</sup> Aria ipak pupe um pugipesh ehudok harik hapenyep iri yoweih aih um, namudok adur ta pugok. Aria ta ipak purao dodog um

Iruhin ananin Mishin aria pubouguk harik hapenyep iri yoweih aih hugokum, ipak ta pupe wosik ihih nyumneh.

<sup>14</sup> Eshudok arpesh douk Iruhin ananin Mishin nyarikumesh um enenyenen iri, eshesh douk Iruhin ananish batowish. <sup>15</sup> Um maresh? Ipak douk madae purao enen mishin douk wata nyuweshikep dodog aria nyenekep punogugur shopunek iri uwe, uwok. Parao enyudok Mishin douk nyenekep patogur Iruhin ananish batowish iri. Aria douk enyudok ananin Mishin atin nyopuhur aria mahwar Iruhin makri, "Yain! Yain!" <sup>16</sup> Iruhin ananin Mishin meyoh nyanaki nyanatukur apakish mishish aria makri apak Iruhin ananish batowish. <sup>17</sup> Apak douk adur mape Iruhin ananishi batowish. Namudok aria kweipon ta mugrem eshudok douk Iruhin neshubuk shakusumap iri. Ta mugrem eshudok kabi Kraish naraesh iri um. Aria douk apak murao debeiri eriger kabi riguk Kraish narar iri um, kweipon apak shopunek ta murao debeishi nyeiguhw aria mupe wosik abom kabi anan um.

### *Kweipon Ta Murao Debeishi Nyeiguhw Aria Mupe Wosik Iruhw Heven*

<sup>18</sup> Eik yadukemesh um abudok yopubi abom nyutob kweipon ta butogur um mupe wosik um douk yopubi abom beshagrakuk arudok eriger douk mape memnekar iri. <sup>19</sup> Ihishmori eneshenesh Iruhin nenekesh iri eshudok douk shape shatrugun aria shatrugun abom um abudok nyutob Iruhin nuwerek apak ananish batowish nunekap mutogur yopugunum obi nyutob. <sup>20</sup> Douk ihishmorim eshudok Iruhin nenekesh iri douk madae shupe wosik uwe aria ta yowesh. Aria douk madae eshesh meyoh shunekesh namudok uwe, uwok. Iruhin meyoh nagipesh ananim atum urkum aria nenekesh shape namudok. Nenekesh shape namudok shape shatrugun um yopishi eshudok douk adur atin anob nyutob Iruhin ta nunekeshumesh iri. <sup>21</sup> Douk ihishmori Iruhin nenekesh iri eshudok douk shonoweshik shape dodog aria ta yowesh. Aria kweipon anah nyumnah, Iruhin ta wata nukweshih eshudok anan nenekesh

iri. Nukweshihesh aria ta wata shuto-gur yopish abom shupe wosik kabi apak Iruhin ananish batowish mupe wosik atinyum.

<sup>22</sup> Apak douk madukemesh. Ihishmori eneshenesh Iruhin nenekesh iri eshudok douk shemnek debeiri eriger kabi armago wonohur kweiguh iri womnegor um. Aria seiwok baugos um douk shape shoreh yowiyokuk arigaha douk abudok nyutob. <sup>23</sup> Aria douk madae eshudok eneshenesh atish uwe, uwok. Apak douk marao Iruhin ananin Mishin. Enyudok mishin douk nyarik iri yopinyi muraen meyoh iri mugu Iruhin narik nakopen aria sabaishi yopishi eneshenesh ta shugiguk shanaki. Aria apak douk shopunek memnek debeiri eriger mareh gani numun apakiruh aparuh. Mape namudok aria mape matrugun um ahudok nyumnah douk Iruhin ta nutogur nuwerekh baraen yopugunum apak douk ananish batowish aria nukop namuruhi yegeshiweruh um. <sup>24</sup> Apak makri adur Iruhin ta nutaurumap namudok. Anan narap matanamori mape wosik. Aria douk mape matrugun um. Madukemesh um anan adur ta nutogur nunekap murae arhudok namuruhi yegeshiweruh. Aria enyudok yopinyi apak mape matrugun-umen iri, apak ta mupe shokubur mutrugun-umen arigaha kweipon ta nyutogur um apak. Um mareh? Eshudok matrish apakis nabes iri douk wata mupe mutrugun-umesh atin uwe, uwok. <sup>25</sup> Aria ta apak mupe mutrugun um enesh eshudok douk wata mutrish iri uwe aria mukri adur um eshesh ta muraesh um, apakip urkwip douk por dodogowip um eshudok aria mape matrugun-umesh.

<sup>26</sup> Aria douk namudok atin. Iruhin ananin Mishin nyutaurum apak arpeshe douk madae dodogowip iri uwe. Apak douk madae mudukemesh uwe um ta munek beten mumam mumam musorik Iruhin um uwe, uwok. Aria ananin Mishin meyoh nyerekh gani numuninum nyenekumap beten apak. Enyudok baraen enyen nyakrip Iruhin um nutaurum apak um, apak arpeshe douk madae dodogowip um miyagwrehan atin uwe,

uwok. <sup>27</sup> Anan Iruhin douk natik numun apakiruh aparuh iri aria anan shopunek nadukem ananin Mishin enyenyim urkum. Umum mareh? Ananin Mishin douk nyagipesh ananim urkum atin aria nyenek beten um apak ananish arpeshe.

### *Iruhin Ananim Urkum Manawasham Abom Apak Ananish Arpeshe*

<sup>28</sup> Ihinyumori enenyenen nyatogurum arpeshe douk eshesh urkwip panawasham Iruhin iri um, enyudok enyen douk Iruhin neneken nyatogruresh um nunekesh shupe wosik. Eshudok arpeshe douk anan nagipesh ananim atum urkum aria nahwashesh shagipesh anan iri. <sup>29</sup> Um mareh, eshudok arpeshe seiwok wata sagomatin anan narik nadukemesh iri aria nanagraehesh shape sik um shudukem ananin nuganin shugipesh anan aih. Iruhin nenekesh namudok um Kraish ta nupe esheshin ashuken aria eshudok sabaishi arpeshe shupe ananish owashish. <sup>30</sup> Eshudok arpeshe douk riguk anan nagraehesh iri douk shopunek nahwashesh shanakmori anan. Aria eshudok nahwashesh iri arpeshe douk nahwashesh yopishi arpeshe. Namudok aria eshudok nahwashesh yopishi arpeshe, anan douk nekesh anan aih yopihi aih um shupe wosik kabi ananin nuganin napeum shurae debeishi nyeiguhw.

### *Iruhin Anan Urkum Manawasham Apak Abom Nenek Giha Aria Ta Mare Nukutupuguk Uwe, Uwok*

<sup>31</sup> Namudok aria apak ta mukri mumam, um ehudok yopihi aih Iruhin nenekeh-umap iri? Aria Iruhin nutaurum apak um, omi ta wosik dodogowin um nyunek horik horin um apak? Uwok meyoh. <sup>32</sup> Anan douk madae nusuhuk ananin Nuganin nupeik uwe, uwok. Anan douk neshopokan nanaki aria nagok um apak ihipmorim. Namudok aria adur atin. Kweipon anan ta wata nuwanumep-ari ihishmori eshudok nukopeshari meyoh. <sup>33</sup> Apak douk Iruhin nagraehap iri ta omi nyunek kwotumap nyukri apak munek enesh yoweishi inahos? Adur atin ta madae enen uwe. Apak douk Iruhin meyoh natrup aria

nahwarap yopishi arpes. <sup>34</sup> Aria ta omi nyukri apak munek yoweishi inahos aria ta neshopokap munak muwishuk? Adur atin, ta uwok. Riguk Krai Jisas douk nagok aria nakitak nape shopunek. Aria douk nape enyudok nunak um Iruhin nape nenek beten narigan um nutaurumap. <sup>35</sup> Namudok aria ta meinyi arpen nyunaki nyurapuk um agundok Krai anan urkum manawasham abom um? Aria enenyenen o amaen o arpes shunekap enenyenen o nyurub bep um o eneshenesh uwok um o enesh yoweishi eshudok shunekap um o shopunek mugok um? Adur atin ta uwok. <sup>36</sup> Adur, enyudokmori enyen ta nyatogrumap kabi Iruhin ananik Buk kwakri um. Kwakri namudok.

“Apak mape nyakipari. Namudok aria ihih nyumneh douk shakri shopunek mugok um atugun. Apak douk shagimap kabi shagipesh um sipsip douk

sharaesh shanak um shesh shutahesh iri.”

<sup>37</sup> Aria nyeneken enyudokmori amaen. Krai anan urkum manawasham apak abom aria ihih nyumneh nenekap dodogowip abom menek uhwymum enyudok ihinyumori amaen. <sup>38</sup> Adur, eik douk yadukemesh abom. Ta mare enesh eshudok shurapakuk um enyudok Iruhin urkum manawasham abom um, uwok meyoh. Namudok aria mugok um o mupe um, eshesh enselahos o eneshenesh shape debeishi shasuhw agudok nahobig iri yoweishi sagabehos o eshudok shatogur doukib nyutob o kweiponibi o eneshenesh dodogowish atishi yoweishi douk madae mutrish iri uwe, <sup>39</sup> o eshudok enesh dodogowishi shape iruhw atap iri o enesh Iruhin nenekesh iri, eshudok eneshenesh ta mare shurapakuk um enyudok anan urkum manawasham apak abom uwe, uwok meyoh. Enyudok anan urkum manawasham apak abom douk Jisas Krai apakin Debeini neyabigap.

## 9

*Pol Apahw Yowehw Abom Um Enesh Israel Um Eshesh Shakon Agabus Krai*

<sup>1</sup> Douk eik yakri ikripep enen adurin atinyi baraen. Eik douk Krai ananiwe aria madae inek rohwe uwe, uwok. Eikish urkum apahw shor um yopihi aih aria Iruhin ananin Mishin nyeyabige yadukemesh um eikin baraen douk adurin atin. <sup>2</sup> Enyudok baraen douk namudok. Eikihw apahw douk yowehw abom aria ihih nyumneh douk yape yenek giha aria apahw yowehw abom um eikish arpes eshesh Israel. <sup>3</sup> Eikish arpes eshesh Israel douk shani eik apak atubor owishibor. Aria douk yakri abom um Iruhin wata nuraesh shutanamori. Eik douk yenek urkum meyoh yakri ta anah yah akure, yakri ta Iruhin nunek eik itogur yowewe iri madae inek bilip um Krai aria irao esheshik outuk inak iwishuk. Yakri eik inak iwishuk aria eshesh wosik Iruhin nuraesh shupe wosik. <sup>4</sup> Eshesh Israel douk Iruhin nanagraehesh iri arpes. Anan nenekesh shatogur ananish batowish. Aria douk neyabigesh shatik agundok douk anan narao debeinyi nyeigur aria natrugun abom um. Shopunek nakripep adurin atinyi dodogowinyi baraen douk nani eshesh shape atugun sheyagwrehen iri. Nekeshi enyudok lo um Moses ananis wis um. Neyabigesh aduriah yah um shunek lotuman numun ananit debeiti urupat um. Sharao baraen douk Iruhin nakri enyen adurin atin abom iri. <sup>5</sup> Eshesh douk shakitak amudok nyeiguhw hwakiham iri debeimi popehem yamehem amamis awiros. Krai anudok arman Iruhin neshopokan nanaki iri, anan douk nanaki natogur arpen aria nakitak eshesh Israel. Anan nape debeini um ihishmori eshudok. Anan douk adurin Iruhin abom aria yakri ihih nyumneh apak ta mutuk ananin nyeigur nyuto iruhw. Adur atin.

*Iruhin Nagraeh Arpes Um Ananim Urkum Meyoh Um.*

<sup>6</sup> Iruhin ananin baraen douk mare nyunak nyushukuk atap meyoh uwe, uwok. Arpes shakitak Israel iri douk madae ihishmorim douk adurishi Israel douk Iruhin nagraehesh iri uwe, uwok. <sup>7</sup> Namudok aria apak mare mukri, “Eshesh douk Abraham ananibor owishibor aria ihishmorim adur ananish atishi

batowish,” uwok. Seiwok Iruhin douk nakrip Abraham namudok, nakri, “Eshudok Aisak ananibor owishibor atishi ta shurao nyakip awiropin nyeigur.”<sup>8</sup> Baugenyum baraen douk nyape namudok. Abraham ananish batowish eshudok ananibor owishibor, eshesh ihishmorim douk madae Iruhin ananish batowish uwe, uwok. Arpesh shape Iruhin ananish adurish batowish iri, eshesh douk eshudok um Iruhin nagipesh ananin adurin atinyi baraen aria neshubuki.<sup>9</sup> Umum maresh? Enyudok baraen douk nyakri namudok. Nyakri, “Abudok yakri obi nyutob butogur aria eik ta wata itanamori aria Sara ta kubuki enen armanin batowin.”

<sup>10</sup> Aria douk madae enyudok atin uwe, uwok. Rebeke okwokwim biom nugamim douk atun yaken Aisak. Anan douk apakin yamenen um apak Juda.<sup>11</sup> Aria Iruhin douk nagipesh ananim atum urkum um agundok nagraeh arpesh um. Anan madae urkum murum mour aria aih henekeh iri aria kadak nagraeham uwe, uwok. Anan nagraeham meyoh. Namudok aria Iso nani Jekop amamik amakek douk madae kwumubuki um hunek yoweishi inahos o yopishi uwe,<sup>12</sup> aria Iruhin nakrip amamik amakek nakri, “Ashuken ta nupe shakamum wanin.” Iruhin nakripok namudok um apak mudukem ehudok Iruhin ananish aih. Mudukemesh um agundok nagipesh ananim atum urkum aria nagraeh arpesh um. Anan douk madae nurik nutik esheshih aih aria douk nagraehesh uwe, uwok.<sup>13</sup> Enyudok douk nyatogur kabi ananik Buk kwakri um. Kwakri, “Eik urkum manawasham Jekop, aria Iso uwok.”

<sup>14</sup> Namudok aria ta mukri mumam? Aria ta mukri Iruhin nenek yoweih aih aka? Adur atin uwok.<sup>15</sup> Umum maresh? Anan douk seiwok nakrip Moses namudok nakri, “Aria ta ikri gihaum enen arpen meyoh um, enyen ta inemen giha meyoh. Aria ikri giha abom um enen arpen meyoh um, eik ta inek gihaumen.”

<sup>16</sup> Namudok aria agundok Iruhin nagraeh arpesh um douk madae nutik esheshin yopinyi mour o nugipesh esheship urkwip um douk nagraehesh uwe, uwok. Anan nenek gihaumesh meyoh aria nagraehesh.

<sup>17</sup> Umum maresh? Iruhin ananik Buk kwakri Iruhin nakrip king Fero namudok. Nakri, “Eik yeneken nyutogur king um iyabigesh eikin gobi um ihishmorim arpesh. Iyabigesh um eshesh ta shukripesh um eikin nyeigur ihirub warub agundok atap. Douk namudok aria eik douk yeneken nyatogur debeini king aria yenek eshudok yoweishi inahos shatogrumen.”

<sup>18</sup> Namudok aria douk madukemesh. Aria ta Iruhin nukri nenek gihaum enen arpen um, anan ta nenek gihaumen. Nukri nuweshik enen enyenyim urkum um mare nyusuhw baraen um, anan douk ta nigipeshen kabi douk nakrium.

*Ehudok Biyeh Aih Um Iruhin Juwehosin Nukesh Yoweinyi Poe Enesh Arpesh Aria Nenek Gihaum Enesh Um*

<sup>19</sup> Namudok aria douk ipak enen arpen ta wata nyukripe nyukri, “Aria nyakri namudok um, aria namudok ta natrupum munek yoweishi inahos aria wata nohwarap yoweipari? Amiapen ta wosik nyigipesh enyenyim urkum aria nyukri uwok mumam Iruhin?”<sup>20</sup> Aria nyak arpen, nyak nyakri nyak meinyi arpen, um wata nyakri nyuwanam-uman baraen Iruhin um? “Anap marup anan arman nape nenekap iri, apap douk madae putanam pukripan pukri, ‘Nyak nyenekesh namudok um maresh?’ Uwok.”

<sup>21</sup> Arman narok marus iri ta nunak nutuki amnab aria nukwu abudok amnab nurok bias marus. Anap ta nenegap dodogowip um nukwup um enen yopiyopinyi mour abom. Aria anap marup ta nenekap mare yopup abom iri um enen meyohin mour. Aria wosik, enyudok mour douk neneken adurin.

<sup>22</sup> Iruhin shopunek nenek mour namudok atin. Anan nakri niyabig agundok anan nyibur juwehosibur abom, um ihishmorim arpesh wosik shudukem



ananin dodog. Aria arpesh douk nenekesh um ta shurao yoweinyi poe iri douk shenek redi shapeum shutrun. Aria anan douk wata nape natrish meyoh roubi nyutob um kweipon aria nununish.

<sup>23</sup> Anan douk nenekesh namudok um nakri niyabig apak ihipmorim anan nenek giha iri um apak mutik agundok anan dodogowin atun abom um aria natrugun um. Nakri niyabig apak arpesh douk seiwok anan narik nenekesh shupe wosik um ta shurao debeishi nyeiguhw aria shuni anan shupe wosik iri. <sup>24</sup> Umum maresh? Eshudok anan nahwadesh iri arpesh douk apak. Anap Juda aria anap madae Juda iri uwe. <sup>25</sup> Enyudok nyatogur kabi baraen profet Hosea nenyemagak iri nyakrium. Iruhin nakri namudok,

“Arpesh douk eshesh madae eikish iri uwe,  
eik ta ihwadesh eikish arpesh.

Eshudok eik madae urkum mukriyeshi munawashamesh iri uwe, eik ta wata urkum munawashamesh.”

<sup>26</sup> Aria shopunek nakri,

“Abrudok atubur wabur douk eik yakriyesh yakri, ‘Ipak madae eikish arpesh um uwe’,

abrudok atubur wabur kweipon ta wata ihwadesh,

‘Nape ihih nyumneh abom iri Iruhin ananish batowish.’”

<sup>27</sup> Profet Aisaia douk urkum morum eshesh Israel aria nakriyuk debeg namudok. Nakri,

“Adur, ta eshesh Israel shutogur sabaishi abom kabi sabaiti arukwut um, o uwok.

Iruhin ta wata nunarao enesh karowish shutanamori shupe wosik.

<sup>28</sup> Umum maresh? Anan ta dodogowin atun nunek sabaigwi kwotog niyatok aria arigas ihish shape atap iri arpesh ta nunekesh shurao debeiri eriger abom.”

<sup>29</sup> Enyudok douk kabi seiwok Aisaia nakriyenyuk um. Nakri,

“Aria ta dodogowin abom atun Debeini iri mare nukutuk enesh apakishi arpesh shupeik akure, douk

apak ta mutogur kabi arbudok biyorub warub um,

Sodom iri Gomora.”

*Eshesh Israel Douk Madae Shusuhw Krai Ananin Baraen Shugipeshen Uwe, Uwok*

<sup>30</sup> Namudok aria ta mukri mumam? Aria ta mukri namudok. Eshesh madae Juda iri uwe douk madae shupe um shunek debeinyi mour um shurao agundok Iruhin nahwadesh yopishi arpesh um uwe, eshesh douk sharaen. Eshesh douk shasuhw Iruhin ananin baraen dodog shagipeshen meyoh aria anan natrish nahwadesh yopishi arpesh. <sup>31</sup> Aria eshesh Israel uwok. Eshesh douk shape shenek debeinyi mour um shagipesh lo seiwok Iruhin nakoguk Moses enyi um Iruhin nutrish nuhwadesh yopishi arpesh. Aria uwok. Eshesh madae shutogur yopishi arpesh uwe, uwok. <sup>32</sup> Umum maresh? Eshesh douk madae shukri um shunek bilip meyoh aria Iruhin nuhwadesh yopishi arpesh uwe, uwok. Eshesh douk shakri shunek debeinyi mour abom um shugipesh enyudok lo aria douk nuhwadesh yopishi arpesh. Eshesh madae shenek bilip um Krai aria eshesh douk shanatutuk amudok shanatutukom iri utom. Namudok aria eshesh douk shatu. <sup>33</sup> Baraen nyetem Iruhin ananik Buk aria nyakri wobren baraen um Krai amudok utom iri enyudok. Iruhin nakri,

“Mnek! Eik yosop anam utom matao abrudok wabur Saion, um arpesh shunatatutukom shutu um.

Yosop onok burbuduk kwataoum kwunek arpesh shunatatutukok.

Aria ihish arpesh shunek bilip um anudok arman iri ta

mare shurao abraen uwe, uwok.”

## 10

*Eshesh Israel Douk Madae Shurao Iruhin Ananin Yopihi Aih Uwe, Uwok*

<sup>1</sup> Eikish ashukenyish owashish, numun um eik douk nakri um Iruhin wata nurao eshesh Israel shutanamori shupe wosik. Aria ihih nyumneh apa yenek beten yarigan um enyudok. <sup>2</sup> Eshesh douk yatrish yadukemesh wosik abom. Aria douk yakri enyudok baraen. Yakri eshesh dodogowish atish abom um agundok shagipesh Iruhin ananin aih um.

Aria eshesh douk madae shudukemeh wosik aria douk shugipesh uwe, uwok. <sup>3</sup> Um maresh? Eshesh douk shakri uwok um shudukem ahudok yah douk Iruhin natik arpesh nahwawesh yopishi arpesh um. Aria shape sheshakomogun um shugipesh anah eshesh kanak esheshih yah um Iruhin nutrish nuhwaresh yopishi arpesh um. Namudok aria shakri uwok um shupe shakamum anan shugipesh ananah yah aria nutrish nuhwaresh yopishi arpesh, shakri uwok. <sup>4</sup> Apak douk madukemesh. Apak Israel douk mape magipesh lo arigaha Krai natogur aria menekesh jurug um mugipesh enyudok lo um. Namudok aria ihish arpesh douk shasuhw Krai ananin baraan dodog shagipeshen iri, Iruhin ta nahwawesh yopishi arpesh.

<sup>5</sup> Moses douk seiwok nowemagak enyudok baraan um agundok shugipesh lo aria Iruhin nutrish nuhwaresh yopishi arpesh um. Nenyemagak nakri, “Enyudok arpen douk nyugipesh ihimori aih abom douk lo nyakriyeh iri um, enyen ta nyupe wosik abom douk aria kweipon shopunek. <sup>6</sup> Aria ta baraan douk nyakrium arpesh shunek bilip um Krai meyoh aria Iruhin nuhwaresh yopishi arpesh um douk nyakri namudok. Nyakri, “Nyak mare nyunobo urkum nyukri, ‘Omi ta nyuto um iruhw heven?’” Namudok ta wata nyiraouri Krai nubuhi. <sup>7</sup> “Shopunek mare nyukri, ‘Omi ta nyugrukukum shagok iri esheshig nahobig?’” Namudok ta wata nyiraouri Krai nukitaki um agundok nagok um. <sup>8</sup> Aria enyudok baraan nyakri, “Baraan douk nyape hurukatin abom um nyak. Nyape nyakit nokwat tani numun nyakim urkum.” Enyudok baraan, enyen douk masuhwen dodog magipeshen aria apa meyagwreh mape makripeshen iri. Enyen douk enyudok. <sup>9</sup> Aria nyak nyuhur nokwat nyukripesh nyukri, “Jisas anan douk Debeini” aria numun nyakim urkum nyunek bilip nyukri Iruhin adur wata nonohur nakitaki wonugwehw napeum, namudok Iruhin ta wata nuraen nyutanamori nyupe wosik. <sup>10</sup> Um maresh? Apak urkwip pakri adur munek bilip abom

um Krai douk nagok wata nakitaki aria Iruhin natrup nohwarap yopishi arpesh. Aria nokwatog apa moguhur makripesh makri apak menek bilip um Krai. Douk namudok aria Iruhin wata narap matanamori mape wosik. <sup>11</sup> Enyudok douk kabi Iruhin ananik Buk kwakri um. Kwakri, “Arpesh shusuhw ananin baraan dodog shugipeshen iri ta mare esheshirub nyirub yoweirub, uwok.” <sup>12</sup> Um maresh? Enyudok baraan nyakri eshesh Juda shani eshesh madae Juda iri uwe douk atugunish arpesh meyoh abom. Debeini douk anan atun nape Debeini um apak ihishmorim abom. Ihish arpesh douk apa shahwaran um nutaurumesh iri, anan apa nenek blesimesh naraesh shatanamori shape wosik. <sup>13</sup> Umum maresh? Enyudok douk kabi Iruhin ananik Buk kwakri um. Kwakri, “Ihishmorim arpesh douk shuhware Debeini um nutaurumesh iri, anan ta wata nuraesh shutanamori shupe wosik.”

<sup>14</sup> Aria ta eshesh madae shunek bilipuman um, eshesh ta shuhwaran mumam? O ta madae shumnek ananin baraan um, eshesh ta shusuhw ananin baraan dodog shugipeshen mumam? O ta madae enesh shukripesh ananin baraan um, eshesh ta shumneken mumam? Aria uwok. <sup>15</sup> Aria ta Iruhin madae neshopok arpesh shunak shukripesh ananin yopinyi baraan um, eshesh ta shukripeshen mumam? Uwok. Iruhin ananik Buk kwakri namudok. Kwakri, “Arpesh sharauri yopinyi baraan iri douk shenek yopinyi mour abom.”

*Eshesh Israel Madae Shugipesh Iruhin Ananin Yopinyi Baraan Abom Uwe, Uwok*

<sup>16</sup> Aria douk madae ihishmorim Israel shusuhw enyudok Iruhin ananin yopinyi baraan dodog shugipeshen uwe, uwok. Seiwok profet Aisaia nakriyuk enyudok. Nakri, “Debeini, omi nyasuhw enyudok ohwak wakri-enyi baraan dodog nyagipeshen? Aria uwok.” <sup>17</sup> Namudok aria douk madukemesh. Apak douk memnek Iruhin ananin baraan aria enyudok baraan nyopohur masuhwen dodog magipeshen. Enyudok baraan douk

memnek eshesh shakripesh Krai ananin barae iri shakripapen.

<sup>18</sup> Aria douk yarig. Aria eshesh madae shumnek enyudok yopinyi barae uwe, uwok? Eshesh Israel douk shemneken. Apak douk madukemesh.

“Ihishmorim arpes shape ihirub warub agundok atap iri douk shemneken jurug.

Enyudok barae douk nyanak nyeyatokuk ihirub warub.”

<sup>19</sup> Aria shopunek yakri irig. Aria eshesh Israel madae shudukemen uwe enyudok barae? Sagomatin yakri ikripep enyudok Iruhin ananin barae douk Moses nakrienyuk iri. Nakri,

“Eik ta iraouri enesh meyoish nyeiguhw wokeshi arpes douk shorshor um eikin barae iri.

Ta iraeshi itaurumesh aria ipak ta putik namudok aria punek nyigiya.

Aria ta juwehosip um yopihi aih ta inekhumesh iri.”

<sup>20</sup> Profet Aisaia douk dodogowin atun nakriyuk enyudok Iruhin ananin barae. Nakri,

“Arpes douk madae shupe um shurime iri uwe douk shaparage.

Eik douk yanowereh yatogur abom um arpes douk madae shisorik enesh um eik iri uwe.”

<sup>21</sup> Aria ta eshesh Israel, anan Aisaia douk nakriyuk enyudok. Iruhin nakri,

“Roubum nyutob eik yape yawauramesh, yahwadesh aria uwok meyoish.

Eshudok arpes apa shonogonim eikin barae abom aria shenyubukuk.”

## 11

### *Iruhin Nenek Gihaum Enesh Israel*

<sup>1</sup> Namudok eik douk yakri. Aria Iruhin douk ta nekeshuk agab abom um ananish arpes aka? O uwok meyoish! Eik Pol douk shopunek anan um Israel iri. Eik Pol anan um Abraham ananin barhonin. Eik douk yakitak opudok Benjamin ananip debeipi awirop iri. <sup>2</sup> Iruhin madae nukeshuk agab ananish arpes uwe, uwok. Seiwok wata sagomatin anan nadukemesh aria nagraehesh. Enyudok barae douk nyakrium Ilaija aria nyetem Iruhin ananik Buk iri aria douk padukemesh. Ilaija nakrip

Iruhin nenek kwot um eshesh Israel namudok. Nakri, <sup>3</sup> “Debeini, eshesh shabo nyakim profet douk apa

hakripesh nyakin barae iri hagok, aria shawor nyakish altahas.

Aria douk enyudok eik atuwe yapeik aria shape shaurime um she igok.”

<sup>4</sup> Aria Iruhin wata nawanaman maren barae Ilaija? Iruhin douk nakripan nakri,

“Uwok. Eik yaroo sabaishi 7,000-poreish Israelish arpes.

Aria eshesh douk madae shunek lotu um anudok rohwin god Bal uwe, uwok.”

<sup>5</sup> Aria douk namudok atin. Douk enesh karowishi Israel douk Iruhin nataurumesh meyoish aria nagraehesh shape ananish iri douk shape. <sup>6</sup> Anan douk madae nutik esheshin yopinyi mour douk aria naraesh uwe, uwok. Iruhin nataurumesh meyoish aria douk naraesh shape ananish arpes. Aria Iruhin natik esheshin mour meyoish aria douk naraesh

akure, aria namudok douk madae nutaurumesh meyoish abom aria douk naraesh uwe, uwok. <sup>7</sup> Namudok aria ta mukri mumam? Eshudok douk eshesh Israel dodogowishi atish shape shaurimesh iri douk madae shuparuges uwe, uwok.

Aria karowish Israel meyoish douk Iruhin nagraehesh iri atish wosik shaparuges. Eshudok enesh kupaishi uwok. Esheshigos baragos sheshuk abom. <sup>8</sup> Enyudok douk nyatogur kabi Iruhin ananik Buk kwakri um. Kwakri,

“Iruhin nenekesh yobus saesh abom aria shakri uwok um shumnek ananin barae. Aria nenekesh nabes madae sutrugun uwe, arigos madae sumnek uwe.

Shape namudok atin seiwok arigaha douk.”

<sup>9</sup> Seiwok Devit douk shopunek nakriyuk enyudok. Nakri,

“Eik yakri abudok nyutob eshesh shupe shuwok debeiguni worigun obi nyutob,

yakri abudok atub nyutob nyunek yoweishi inahos shutogrumesh kabi sheir nyumarub shape dodogum

o kabi mahish shagrukuk nuwagas um.

Yakri eshudok yoweishi inahos shuto-grumesh abom shuwanamesh esheshih yoweih aih.

<sup>10</sup> Yakri nyunek esheshis nabes sishuk um mare shutrugun.

Aria shopunek yakri nyunekesh shusah esheshin amaen nyunihesh shukutom atish shupe namudok ihih nyumnegwih.”

*Iruhin Shopunek Nape Narao Eshesh Madae Juda Iri Uwe*

<sup>11</sup> Namudok aria yakri iyorigep shopunek. Agundok eshesh Juda shatu um madae shenek bilip um Krai aria douk ta shanak shawishuk aka? Adur atin uwok. Eshesh douk madae shenek bilip um Krai aria shakutukuk yah shenek yoweishi inahos. Namudok aria Iruhin douk wata nataurum eshesh madae Juda iri uwe wata naraesh shatanamori shape wosik atin. Iruhin nenekesh namudok um nakri eshesh Israel shutrun nutaurum um eshesh madae Juda iri uwe namudok aria shunek nyigiyaumesh aria eshesh shakana shenek bilip um Krai shopunek. <sup>12</sup> Eshesh Israel douk shakon-aguk agabus Iruhin. Douk namudok aria anan nataurumesh wosik abom um ihish agundok atapishi eshesh madae Juda iri uwe nenekumesh yopinyi. Eshesh Israel douk shakutukuk anan ih. Namudok aria anan douk narao eshesh madae Juda iri uwe nenekumesh yopinyi abom. Aria kweipon anob nyutob, ihishmorim Israel ta shutanamori um Iruhin. Aria abudok nyutob, Iruhin ta nunekumesh yopinyi abom um ihishmorim eshesh madae Juda iri uwe nishagrakuk enyudok kabi riguk narik neneken-umesh yopinyi iri um. <sup>13</sup> Douk yakri ikripep enen baraen ipak madae Juda iri uwe. Eik douk Iruhin nagraehe um inaki ikripep ananin baraen ipak. Namudok aria douk yanadudareh um enyudok yeneken iri mour. <sup>14</sup> Yakri inek enyudok mour namudok um ihur eikish arpeshe eshesh Israel esheshiruh aparuh aria shunek nyigiyaum ipak douk

Iruhin nenekumep yopinyi pape wosik iri. Yakri inek enyudok um Iruhin wata nutaurum enesh aria nunaraesh shutanamori shupe wosik atin. <sup>15</sup> Adur, abudok nyutob Iruhin nekeshuk agab eshesh Israel obi nyutob, anan douk apa narauri sabaishi agundok atapishi arpeshe um ihirub warub shanaki shani anan shape atugun. Namudok aria abudok nyutob Iruhin wata shopunek nukri narao eshesh Israel shuwish ananip awirop obi nyutob, namudok ta nunekumesh yopinyi abom sabaishi arpeshe aria ta shupe kabi shagok aria wata shakitakumori.11:15

<sup>16</sup> Kabi douk enyudok wobuwobren baraen um. Enyudok. Sagomatinyit bret douk shenekat plaua aria shuteh shako Iruhin um, atat douk Iruhin ananit. Namudok aria atudok sabaiti bret shagiguk shuteh iri, atat douk shopunek Iruhin ananit atat. Shopunek ta shuko Iruhin anaruh rowogiruh nukwaruh ananiruh um, aria nyeiguhwish um douk shopunek ananish atish.11:16

<sup>17</sup> Iruhin douk natupakuk anabik um nyeiguhw enyudok shawen iri rowog oliv aria nawashenyukuk. Aria natupaki nyeigur kupainyi wanarin rowog oliv nanaki nadrunen um enyudok shawen iri rowog oliv. Ipak madae Juda iri uwe, ipak douk kabi enyudok wanarin rowog oliv um. Namudok aria douk ipak pani enesh Israel douk pape parao enesh-enesh yopishi abom um eshudok douk shatogurum eshesh Juda iri. Paraesh kabi wanarin rowog oliv nyape nyarao ihat douk tanaki nukwaruh enyudok shawen iri rowog oliv um. <sup>18</sup> Namudok aria ipak madae Juda iri uwe mare punagunukuk pukri pishagrakuk eshesh enesh Israel douk shadukem eshudok shanabirak iri nyeiguhw uwe, uwok. Pakri punadudareh um, sagomatin ta pur urkum ba iyoh. Ipak douk atin nyeigur meyoh. Ipak madae putaurum nukwaruh uwe, uwok. Arhudok nukwaruh apa hatau-

11:15 **11:15** Enesh shakri baraen nyetem nyagiguk um Rom 11:15 iri, shakri baugenyum douk nyakri Iruhin ta nunek shagok iri arpeshe wata shukitaki. **11:16** **11:16** Baugenyum enyudok wobuwobren baraen douk nyakrium bret tani rowog iri nyanak namudok. Seiwokishi Juda eshesh douk Iruhin ananishi arpeshe. Aria doukeshi shagiguk shatograri iri douk shopunek ananish atish.

rum ipak dodogowip. <sup>19</sup> Aria ipak madae Juda iri uwe atin ta pukri namudok, pukri, "Iruhin douk natupok eshudok nyeiguhw nawasheshukuk aria wata nadron apak eshesh Israel esheshik outuk." <sup>20</sup> O namudok wosik. Eshesh douk madae shunek bilip um Kraish uwe aria Iruhin douk nadiyeshuk. Aria ipak douk pasuhw Kraish ananin baraan dodog pagipeshen aria douk pape wosik. Aria gamo pudukemesh. Ta mare pukri pubo mishish aria putuk ipak kanak puto. Ipak ta punogugur aria pupe dodogowip um Iruhin. <sup>21</sup> Umum maresh? Iruhin douk madae nukuna wosik um eshesh Juda uwe, douk shape kabi eshudok adurish nyeiguhw iri uwe, uwok. Ipak douk namudok atin. Douk ipak mare pumnek baraan pugipeshen um, anan ta mare nukuna wosik um ipak uwe, uwok. <sup>22</sup> Douk putik enyudok aria gamo pudukemesh um ehudok Iruhin ananish biyeh aih. Ehudok aih um nenek gihaum arpesih um hani ehudok eneh um juwehosin um aria nekesh yoweinyi poe um. Anan apa juwehosinum arpesih douk shakutukuk ananish aih iri. Aria ipak, ta pugipesh ananin baraan um, anan ta nenek gihaumep. Wokumum, ipak shopunek ta nutupepukuk namudok atin. <sup>23</sup> Aria eshesh Israel douk shadukem eshudok enesh nyeiguhw, aria eshesh wata shukri shusuhw Kraish ananin baraan dodog shugipeshen um, Iruhin ta wata nurawi enyudok rowog douk riguk sheir shatak um. Umum maresh? Iruhin anan douk dodogowin um nunek enyudok. <sup>24</sup> Ipak madae Juda iri uwe douk padukem enyudok wanarin rowog oliv enyenyish nyeiguhw um. Iruhin madae nugipesh arpesih aih<sup>11:24</sup>aria nukweshrigep-ari nunaki nudrunep enyudok enen shawen iri rowog oliv douk madae ipakin abom iri uwe. Namudok aria adur atin. Anan ta wata narauri enyudok shawen iri rowogish nyeiguhw aria nanaki nadrunesh eshesh kanak esheshin rowog douk riguk sharik sheir um.

### *Iruhin Nenek Gihaum Ihishmorim*

11:24 **11:24** Arpesih aih um shatupoki nyeiguhw um anagos yopugosi rowos shanaki shadrunches agusudok anagos yopugosi rowos um yopipi shuruwep pir.

### *Arpesih Aria Nutaurumesh Meyoh*

<sup>25</sup> O eikish ashukenyish owashish, eik yakri uwok um ipak pugugakum enyudok seiwok nyanabeshuk iri baraan. Ta ipak urkwip pur aria pakri ipak wosik abom padukemesh iri arpesih aria namudok ta uwok. Namudok aria douk yakri ikripep-umen. Enyen enyudok. Eshesh enesh Israel, esheship urkwip douk peshuk abom. Eshesh ta shupe namudok atin arigaha abudok nyutob eshesh madae Juda iri uwe shutogur sabaish kabi Iruhin nakri um aria ta shutanamori um anan. <sup>26</sup> Eshesh madae Juda iri uwe shuwishi iyoh, aria Iruhin ta wata nutaurum ihishmorim Israel. Ta wata nuraesh shutanamori shupe wosik kabi ananik Buk kwakri um. Kwakri,

"Arman nunaraesh shutanamori shupe wosik iri ta nukitaki Saion nunaki. Anan ta nutogur nukweshih eshudok Jekop ananish popehesh yamehesh douk ta shugiguk shutograri.

Nukweshiheshuk um ehudok aih um shape shubor-bukon um Iruhin ananin baraan.

<sup>27</sup> Aria eik ta ipe ini eshesh mupe atugun muweshik enyudok adurin abom atin iri baraan kontrak.

Abudok nyutob inekuk ihishumori debeishi shokwishi shenekesh iri yoweishi inahos."

<sup>28</sup> Namudok aria eshesh Israel douk shekenyuguk agabus Iruhin ananin yopinyi baraan. Namudok aria eshesh shatogur Iruhin ananish horim. Shenekesh namudok um maresh? Umum Iruhin nurauri ipak madae Juda iri uwe wata puwishi pusuhw enyudok baraan pugipeshen. Aria eshesh Israel, Iruhin douk seiwok ananim urkum manawashamesh abom. Umum maresh? Anan douk urkum morum enyudok adurin atinyi baraan kontrak abom seiwok nakrip esheshim yamehem-enyi.

<sup>29</sup> Umum maresh? Iruhin nakri nahwar enesh arpesih um shugipeshan aria nukri um nunekumesh enesh yopishi eshudok meyoh um, anan douk wata nukri um nubadig urkum atin uwe,

uwok. <sup>30</sup> Seiwok ipak madae Juda iri uwe madae pigipesh Iruhin ananin baraan. Aria douk eshesh Israel shakenyuk agabus. Namudok aria Iruhin wata nenek gihaum ipak madae Juda iri uwe aria nataurumep meyoh. <sup>31</sup> Namudok aria eshesh Israel douk namudok atin. Iruhin nenek gihaum ipak madae Juda iri uwe nataurumep meyoh namudok aria eshesh Israel douk shakenyuk agabus abom ananin baraan. Shenekesh namudok um maresh? Um anan ta wata nenek gihaumesh nutaurumesh meyoh. <sup>32</sup> Iruhin douk noweshik ihish arpes shape shakon agabus anan. Nenekeshumesh namudok um wata nakri nune gihaumesh meyoh eshesh ihishmorim.

<sup>33</sup> O yaipo! Iruhin anan douk nadukemesh abom iri. Ananim urkum douk dedebem abom atin! Anan nadukem eneshenesh aria urkum morum apak arpes nenek gihaumap nutaurumap meyoh. Apak arpes douk madae mudukem baugenyum um ananim urkum muni anan ih aih uwe, uwok. <sup>34</sup> Enyudok douk kabi Iruhin ananik Buk kwakri um. Kwakri,

“Omi nyadukem Debeini ananim urkum?

O omi nyakon enen baraan um nudukemesh? Uwok meyoh.”

<sup>35</sup> “Omi nyarik nyakon enesh eshudok um anan ta wata nubeyeshumen? Uwok.”

<sup>36</sup> Anan kanak abom baugos um ihishmori eshudok eneshenesh. Anan douk nagrem ihishmori abom eshudok aria neyohesh shape wosik atin. Anan nenek ihishmori eshudok shatogur eneshenesh shapeum shutuk ananin nyeigur nyuto. Eik yakri apak ihishmorim ta mutuk ananin nyeigur nyuto iruhw ihih nyumneh. Adur atin.

## 12

*Apak Ta Mukon Apak Kanak Um Iruhin Kabi Enen Ofa Shoko Anan Um*

<sup>1</sup> Eikish ashukenyish owashish, enyudok sabainyi rigukinyi baraan yenek opudok shup iri douk adurin atin. Namudok aria douk dodogoiwe um yakri ikripep enyudok baraan. Iruhin nenek gihaumap

aria nataurumap meyoh atin. Namudok aria eik yakri ipak ta pukon ipak kanak abom um Iruhin kabi shakon enen ofa um. Ipak douk patogur namushi arpes aria pukon ipak kanak abom um Iruhin pupe wosik atin aria pupe ananishi atish. Penekesh namudok um ta pugipesh anan nakriyehi aih. Punek enyudok aria namudok douk adur abom um penek lotu um Iruhin adur atin. <sup>2</sup> Aria ipak mare wata pupe purahaen kabi agundok atapishi arpes shape sharahaen um uwe, uwok. Ipak ta pukri wosik um Iruhin nune ipakip urkwip putogur namipi. Namudok aria ipak ta dodogowip abom um pudukemesh wosik um ehudok Iruhin nakriyehi aih. Ehudok aih douk yopiyopihi abom, adur atin aria anan mishin nyakitak-umeh abom iri.

*Apak Ta Mugipesh Apakin Presen Iruhin Nokopen Iri Aria Mune Ananin Mour*

<sup>3</sup> Iruhin nataurume meyoh aria douk yakri ikrip ipak ihipmorim. Ipak padukem ipakih aih iri apa hanak hatogur heyotu mumam, aria ipak mare wata punabuk urkwip pukri ipak debeipi abom peshagrakuk kupaishi uwe, uwok. Iruhin nataurumep pasuhw ananin baraan dodog pagipeshen panak patogur peyotu mumam, aria ipakip urkwip ta pur wosik atin aria pukri ipak douk namudok namudok. <sup>4</sup> Apak douk madukemesh. Apak ihishmorim douk aturuh yegeshiweruh. Arhudok yegeshiweruh aturuh douk sabaigunum. Agundok sabaigunum um douk nenek sisi gin mour. <sup>5</sup> Aria apak douk namudok atin. Apak douk ihipmorim, aria matukur Kraisa aria matogur kabi atuhw yegenyihw um. Namudok aria apak ihishmorim atin atin douk manadudareh. <sup>6</sup> Iruhin nagipesh anan ih yopihi aih aria nataurumap meyoh nakop sisigin yopinyi presen. Namudok aria ta Iruhin neken presen enen arpen um nyukriפש ananin baraan um, enyen ta nyukriפש um nyutaurum enenyin bilip. <sup>7</sup> Aria enen arpen nyarao presen um nyutaurum kupaishi Iruhin ananish arpes um, aria

enyen ta nyutaurumesh. Aria enen arpen nyarao presen um nyunek skulum kupaishi um Iruhin ananin baraen um, enyen ta nyunek skulumesh wosik atin. <sup>8</sup> Aria enen arpen nyarao presen um nyuhur kupaishium shiyotu dodogowish um bilip um, aria enyen ta nyunek enyudok mour abom. Arpen douk nyarao presen um nyukesh eshudok kupaishi iri, enyen douk nyukesh nyuriguk abom. Arpen nyarao presen um nyupe debeinyi um Iruhin ananish arpesih iri, enyen ta mishin nyikitak abom um nyunekesh um nyiyohesh wosik. Arpen nyarao presen um nyenek gihaum kupaishi arpesih aria nyutaurumesh iri um, enyen ta nyunadudareh abom aria nyutaurumesh wosik atin.

#### *Adurihi Aih Abom Um Urkwip Panawasham Um Kupaishi*

<sup>9</sup> Agundok ipak urkwip panawasham um, ipak mare pukri punek roh wuwe, uwok. Ipak ta adur urkwip punawashamesh. Aria pukeshuk agabus eneshenesh yoweishi inahos aria punawasham yopinyi dodog. <sup>10</sup> Ipak ipak urkwip ta punawasham Iruhin abom um ananish arpesih aria pukesh aparuh abom kabi ipak atup awirop abom um. Ipak ihishmorim atin atin mare putuk ipakish nyeiguhw shuto iruhw uwe, uwok. Ipak ta putuk kupaishi esheshish atish nyeiguhw shuto iruhw. <sup>11</sup> Ihih nyumneh ipak ta punek mour dodogowip atip abom um punek Iruhin ananin Mishin nyupuhur punek Kraish ananin mour. Aria mare arigeh hep uwe, uwok. <sup>12</sup> Ipak ta punadudareh abom um agundok padukemesh um Kraish ta nutanamori ba putrun um. Amaen nyukri nyutogur-umep um, ipak ta piyotu dodogowip atip. Beten ta puneken ihih nyumneh. <sup>13</sup> Enesh Iruhin ananish arpesih shukri eneshenesh wokesh um enesh eshudok eneshenesh um, ipak ta putaurumesh. Kupaishi arpesih shukri shunaki shutogrumep um, ipak wosik putaurumesh wosik atin.

<sup>14</sup> Arpesih shunekep enenyenen um, aria ipak wosik porig Iruhin um

nunekumesh yopihi aih. Mare porigan um nununish uwe, uwok. Porigan um nunekumesh yopinyi. <sup>15</sup> Punadudareh um, puni eshesh punadudareh. Shureh iri, puni eshesh pureh. <sup>16</sup> Agundok pupeum, ipak douk pupe atin arpen abom um. Mare urkwip purum pukri ipak pape debeipari abom uwe, uwok. Ipak ta puni nyeiguhw wokeshi purahaen atugun. Mare punek urkum pukri ipak douk padukemesh abom iri uwe, namudok uwok. <sup>17</sup> Enesh shukri shunekumep yoweih aih um, ipak mare wata pubeimesh yoweishi inahos uwe, uwok. Ipak ta punek yopihi aih. Ipak ipak urkwip ta purum punek ehudok aih douk um ihishmorim arpesih shatrih shakri eheh yopihi iri. <sup>18</sup> Mare pukri urkwip purum wanogwiruh uwe, uwok. Aria ipak ta purim yah um puni ihish arpesih pupe atugun aria aparuh hur wosik atin. <sup>19</sup> Eikish arpesih, ipak kanak mare puwanamesh yoweishi inahos douk shenekesh umep iri uwe, uwok. Pukwariheshuk um Iruhin aria kadak anan meyoj juwehosin um aria douk ta nutrish aria nuwanamen-umesh. Ipak padukemesh. Iruhin ananik Buk, Debeini douk nakri,

“Shawanamesh yoweih aih um, enyudok eikin mour. Kadak eik meyoj ta iwanamesh yoweishi inahos.”

<sup>20</sup> Aria namudok.

“Ta enesh ipakish horik horin nyurub besh um, ipak publiromesh. Abar besh um, pukesh abar shubaroh.

Ipak penekesh namudok aria eshesh ta abraen nyesh abom um ehudok eshesh shenekeh iri aih.”

<sup>21</sup> Mare purauri yoweih aih hunek uhwinyumep uwe, uwok. Ipak ta punek yopihi aih aria pubo yoweih aih hubuhuk.

## 13

#### *Apak Ta Mupe Shakamum Debeini Gavman*

<sup>1</sup> Ihishmorim arpesih ta shupe shakamum amudok debeimi gavman. Apak

madukemesh. Madae anan gavman nutogur nupe meyoh uwe, uwok. Ihinyumorim gavmanin mour douk Iruhin nakriyen aria douk nyakitak. Ihin nape iri gavman douk Iruhin meyoh nonusap nape. <sup>2</sup> Namudok aria arpesh shubrig baraen um gavman iri, eshesh douk shabrig Iruhin neneken iri mour. Aria arpesh shunekesh namudok iri ta shurao yoweinyi poe um ahudok shenekeh iri yoweih aih. <sup>3</sup> Debeini gavman douk madae nupeum nunek eshudok shenek yopihi aih iri shunogugur uwe, uwok. Anan douk napeum nunek eshudok shenek yoweishi inahos iri shunogugur. Ta ipak mare pukri punogugur gavman um, aria ipak douk ta punek yopinyi atin. Namudok aria amam ta hutuk ipakish nyeiguhw shuto. <sup>4</sup> Um maresh? Amam gavman douk hasuhw Iruhin ananin mour um hutaaurumep pupe wosik. Aria ta punek yoweih aih um, ipak wosik ta punogugur. Ipak padukemesh. Amam douk hasuhw debeinyi big aria madae hurraen meyoh uwe, uwok. Amam douk hasuhw Iruhin ananin mour um hubeimesh yoweinyi poe eshudok arpesh shenek yoweishi inahos iri. <sup>5</sup> Namudok aria apak ta mupe shakamum gavman. Apak mare mukri amam agundok ta hubeimap yoweishi inahos um aria douk mugipesh amamin baraen, namudok uwok. Apakip urkwip ta pur yopihi aih aria mukri ehudok aih douk adurihi. Namudok aria apak douk mugipesh.

<sup>6</sup> Douk namudok, aria ipak douk penek tagis. Um maresh? Debeimi gavman douk hasuhw Iruhin ananin mour iri. Ihih amam douk dodogowim atum aria hanape um hasuhw enyudok atin mour um gavman. <sup>7</sup> Maresh eshudok douk ipak ta puko gavman um, ipak ta pukesh. Harao tagis iri, ipak punek tagis pukom. Hagipesh enenyenen lo harao utabor um gavman iri, ipak ta punek tagis pukom. Meimi debeimi, ipak wosik pupe shakamum amam. Namudok douk nyeiguhw shato-umam iri, ipak ta pukri amam douk yopumi.

*Iruhin Nakri Apak Ta Urkwip*

### *Punawasham Kupaishi Arpesh Abom*

<sup>8</sup> Ipak mare bubuk enen tuwehin nyupe uwe, uwok. Umum maresh? Ta mare ta nyutuk enyudok tuwehin. Ipak douk mour nyapenyepum urkwip punawasham kupaishi arpesh aria ipak shopunek. Um maresh? Arpen urkum manawasham kupaishi iri douk nyagipesh lo adur atin. <sup>9</sup> Enyudok lo douk nyakri, "Mare punek wehrur um. Mare pukwu orugwih. Mare punek nyigiya um kupaishi eshudok eneshenesh." Enyudok lo nyani sabainyi enyudok enen nyape iri lo douk sabainyi nyetem enyudok atin lo. Enyudok. Ipakip urkwip ta punawasham kupaishi arpesh kabi ipak urkwip punawasham ipak kanak um. <sup>10</sup> Arpen douk enyenyim urkum manawasham kupaishi arpesh iri, enyen douk madae nyunekumesh enesh yoweishi inahos uwe, uwok. Namudok aria eshudok arpesh douk urkwip panawasham kupaishi iri, eshesh douk shagipeshen adur atin enyudok lo.

### *Apak Ta Mupe Yopinyi Poe Abom*

<sup>11</sup> Eik douk yakri ipak punek enyudok um urkwip punawasham kupaishi. Um maresh? Douk mapenyobi nyutob douk padukemob. Nyutob douk batogrum pukutukuk yobus aria pikitak. Um maresh? Seiwok wata sagomatin menek bilip um Kraiss um, abudok nyutob um Iruhin nutogur nurap mutanam mupe wosik um douk watak roubi. Aria douk banob nyutob banaki hurukatin meyoh. <sup>12</sup> Wab douk hurukatin um butuh aria hurukatin um nyumnah hakri hutogur. Namudok aria apak mukutukuk ihihmori shenekeh weibus iri yoweih aih. Mukutihukuk aria marao sabaihi yopihi aih douk shenekeh nyumnegwih iri. Musuhweh hupenyap aria kabi munek wanohwihw suruhw hwapenyap um. <sup>13</sup> Apak ta mupe murahaen wosik atin kabi arpesh shape sharahaen nyumnegwih iri um. Apak mare muwok dodogowibari abar aria munek dehik muwish mutogur, uwok. Mare munek wehrur um. Mare mupe munabirak hanabosusih iri eneheneh abraenyih yoweih aih. Mare juwehosip



murpak munitok o munek nyigiya um kupaishi eshudok eneshenesh, uwok. <sup>14</sup> Aria ipak ta parao Debeini Jisas Kraiss nupe ipakiruh aparuh aria urkwip. Putukur anan um pugipesh ananah atih aih. Ipak douk mare urkwip purum pukri pugipesh harik hapeiri-numunih yoweih aih, uwok.

## 14

### *Apak Mare Mupe Munumogesh Enesh Apakishi Arpesh*

<sup>1</sup> Arpen douk nyasuhw Kraiss ananin baraan aria madae nyugipeshen wosik abom iri uwe, enyudok arpen ipak wata puraen nyuwish-umepari. Ipak mare puni enyen punogogonim baraan um eneheneh aih enyen ta nyunekeh iri uwe, uwok. <sup>2</sup> Enen arpen douk dodogowinyi um nyasuhw Kraiss ananin baraan aria apa nyawok ihishmori eshudok eneshenesh. Aria kupainyi arpen enyenyin bilip douk madae dodogowin uwe, uwok. Namudok aria mahish madae nyishoh uwe. <sup>3</sup> Enen arpen apa nyawok ihishmori eshudok eneshenesh iri, enyen mare nyupe nyunek skelim enyudok enen douk madae nyuwok ihishmori eshudok eneshenesh iri uwe, uwok. Namudok atin, enyudok arpen madae nyuwok ihishmori eshudok iri uwe, enyen mare nyukrip enyudok enen douk nyawok ihishmori eshudok iri. Aria mare nyukri enyen douk yoweinyi uwe, uwok. Um maresh? Enyudok arpen douk Iruhin shopunek nanaraan iri. <sup>4</sup> Nyak douk meinyi arpen, um nyukripen enenyenen yoweinyi enyudok arpen douk nyenekuman mour um kupaini arman iri? Nyak nyukwrenyuguk. Kadak enyenyin debeini meyoh nukrium enyen nyusuhw ananin mour nyeyotu dodog o madae nyiyotu dodog uwe. Aria enyen ta nyiyotu dodog. Um maresh? Ta Debeini meyoh nutaurumen nyiyotu dodog.

<sup>5</sup> Enen arpen nyatik anah nyumnah um douk nyakri anah debeih um shunek lotu um Iruhin heshagrakuk ehudok eneh nyumneh. Aria kupainyi nyutrih um, enyen douk nyakri ihishmorim nyumneh

eheh douk shopunek atih um munek lotu um. Ihish atin atin arpesh ta shudukemesh aria wosik, um ihishmori esheship urkwip poramohi iri douk adurihi. <sup>6</sup> Arpen nyukri anah anahae-hih nyumnah douk debeih heshagrakuk ahudok anah nyumnah um, enyen douk urkum morum nyutuk Debeini ananin nyeigur aria douk nyakri namudok. Aria arpen apa nyawok ihishmori eshudok eneshenesh iri, enyen douk urkum morum nyutuk Debeini ananin nyeigur aria douk nyashoh. Enyen apa nyenek tenkyu um Iruhin aria nyashoh. Aria arpen nyukri uwok um nyuwok enesh eshudok eneshenesh iri, enyen shopunek urkum morum nyutuk Debeini ananin nyeigur aria douk nyakri wokumesh. Enyen shopunek apa nyenek tenkyu um Iruhin. <sup>7</sup> Apak douk madae enen arpen nyupe um enyen kanak atin uwe, uwok. Mugok um shopunek. Madae enen arpen nyugok um enyen kanak atin uwe, uwok. <sup>8</sup> Aria apak mupe um, apak douk mape um Debeini atun. O ta mugok um, namudok douk magok um anan atun. Namudok aria mugok um o mupem, apak douk Debeini ananip atop. <sup>9</sup> Aria douk namudok atin, aria Kraiss douk nagok aria wata shopunek nakitak nape. Nakitak napeum nupe Debeini um shagok iri shani eshudok douk wata shape iri. <sup>10</sup> Aria nyak nyape nyanomogesh enen ipak kanak um maresh? Nyakri enyen douk nyenek yoweishi inahos um? Ipak padukemesh. Kweipon apak ihishmorim ta miyotum Iruhin ananik kwot iri atop. <sup>11</sup> Apak ta munekesh kabi Iruhin ananik Buk kwakri um. Kwakri namudok.

“Debeini nakri, ‘Adur atin yakri. Kweipon ihishmorim arpesh ta shunaki shubuh shuduk ohrubus aria shunek lotu um eik. Ihishmorim ta shuhur nokwatog shuhwar shukri eik douk adurin Iruhin.’”

<sup>12</sup> Namudok aria apak douk madukemesh. Apak ihishmorim atin atin ta mukrip Iruhin um bagehum ihishmori apak menekeh iri aih.

*Apak Mare Munek Enesh Inahos Um*

*Apak Iruhin Ananish Arpesh Aria Nyutu Nyunek Yoweishi Inahos Uwe, Uwok*

<sup>13</sup> Namudok aria apak mare wata mupe munumogesh apak atin atin um esheshih aih, uwok. Aria apakip urkwip ta pur namudok. Mare pukri punek eneh aih um hunek enen um ipak Iruhin ananin arpen nyutu nyunek yoweishi inahos, uwok. <sup>14</sup> Eik douk yatukur Debeini Jisas. Namudok aria yadukemen wosik abom enyudok baraen. Baraen enyudok. Iruhin mare nutik enesh shashoh iri eshudok aria nuhwaresh yoweishi uwe, uwok. Aria arpen nyutik enesh eshudok aria urkum murum nyukri eshesh douk yowesh um, aria eshesh douk yowesh abom um enyudok arpen. Namudok aria enyen kanak mare nyishoh uwe, uwok. <sup>15</sup> Namudok aria ta nyak nyuwok enesh eshudok aria enen um ipak Iruhin ananip um nyatrin um nyawok enesh eshudok aria douk enyenyihw apahw yowehw aria nyatu um, aria nyak douk nyakutukuk ehudok yopihi aih um urkum manaiwah kupaishi um. Namudok aria nyak mare nyunek enen Iruhin ananin arpen nyutu um nyak nyashoh iri eshudok eneshenesh uwe, uwok. Enyudok arpen douk shopunek Kraiss nagok um wata nuraen um ananin iri. <sup>16</sup> Aria ipak pakri enesh eshudok eneshenesh eshesh douk yopishi um, aria ipak ta gamo pudukemesh. Ta ipakihi aih hunekesh aria kupaishi shukri nyak douk yoweinyi um eshudok eneshenesh eshesh douk yoweishi. <sup>17</sup> Agundok shawok worigun abar um, agagun douk madae baugos um agundok arpesh shuwish um agundok Iruhin nape Debeini um ananish arpesh um uwe, uwok. Aria arpesh shuwish agundok um douk mugipesh yopihi aih, aparuh hur wosik aria munadudareh um. Ehudokmori aih douk Iruhin ananin Mishin nyakwarumeh iri. <sup>18</sup> Um maresh? Meinyi arpen nyugipesh ehudok aih aria nyunekuman mour Kraiss iri, Iruhin ta nutrin aria nunadudareh-umen. Arpesh shopunek ta shukri enyen douk yopunyi arpen.

<sup>19</sup> Namudok aria apak ta dodogowip atup mugipesh ihihmori aih douk apa

hataurumap atin atin arpesh henekap aparuh hur wosik aria mape wosik um. Shopunek apak ta mugipesh ihihmori aih douk apa henek kupaishi Iruhin ananish arpesh shatogur dodogowish um bilip iri. <sup>20</sup> Ipak mare urkwip purum pushoh iri worigun mahish atish aria pununu Iruhin ananin mour uwe, uwok. Adur, ihishmori worigun mahish douk mishoh wosik. Aria ta ipak puwok enesh eshudok aria enesh arpesh shutrip um pawok eshudok aria douk esheshiruh aparuh yoweruh ba shutu um, ipak douk penek yoweishi inahos namudok. <sup>21</sup> Aria ipak apa pawok mahish o wainibar abar o penek kupaishi eshudok aria penek kupaishi Iruhin ananish arpesh shatu um, aria wosik um mare wata penekesh namudok uwe, uwok. Namudok douk wosik.

<sup>22</sup> Nyak nyukri urkum mur um enesh eshudok eneshenesh um nyukri nyugipesh marom urkum um, enyudok nyakin mour, nyuni Iruhin. Mare nyukrip enesh. Arpen douk urkum mur um enesh nyushoh iri eshudok nyukri eshesh wosik yopishi aria mare urkum mur um nyukri enyen nyenek yoweishi inahos um, enyudok arpen wosik ta nyunadudareh. <sup>23</sup> Aria arpen nyur biyep urkwip aria nyuwok enesh eshudok eneshenesh um, Iruhin nakri enyudok arpen douk baraen nyapenyen. Um maresh? Enyen nyawok eshudok douk enyen madae nyudukemesh abom um Iruhin nakri wosik o uwok um enyen nyishoh iri. Ihishmori eshudok douk arpesh madae gamo shudukem Iruhin ananim urkum aria shunekesh iri, eshudok douk shenek yoweishi inahos.

## 15

*Apak Ta Mugipesh Kraiss Ananim Urkum Aria Mutaaurum Kupaishi*

<sup>1</sup> Apak anap douk dodogowip um munek bilip um Kraiss iri, apak douk mour nyapeyapum mutaurum eshudok wata dodogowish um bilip iri uwe aria musah esheshin amaen um agundok shawok worigun um aria apak mare urkum mugipesh apakim atum uwe,

uwok. <sup>2</sup> Apak ihishmorim atin atin ta mutaurum eshudok douk shape hurukatin um apak iri. Mutaurumesh um shupe wosik aria shusuhw Kraiss ananin baraan dodog abom aria shugipeshen. <sup>3</sup> Apak madukemesh. Kraiss anan shopunek douk nakri uwok um nugipesh ananim atum urkum uwe, uwok. Anan douk nagipesh enyudok kabi Iruhin ananik Buk kwakri um. Kwakri, “Kraiss nakrip Iruhin um enyudok baraan douk shoruk nubut shenek enenyenen um, enyudok baraan douk nyanaki nyato eik shopunek.” <sup>4</sup> Ihinyumori baraan seiwok henyem Iruhin ananik Buk iri douk henyemagak um apak mutrin aria murao saki. Henyemagak um abudok nyutob amaen nyutogrumap-obi nyutob, apak ta miyotu dodogowip um bilip. Murao Iruhin ananin baraan aria nyunekap mutogur dodogowip atup aria madukemesh abom um Kraiss ta wata nutanamori mutrun um.

<sup>5</sup> Apak apa morao dodog um Iruhin atun. Anan atun apa nenekap meyotu dodogowip um bilip. Aria eik yakri anan wosik ta nataurum ipak um pugipesh Kraiss ananin aih aria pupe atugun aparuh hur wosik atin. <sup>6</sup> Yakri punekesh namudok um ipak sabaishi ta pupe atin arpen meyoh pupe putuk Iruhin, apakini Debeini Jisas Kraiss ananin Yakenin nyeigur nyuto iruhw.

*Kraiss Nagok Um Eshesh Juda Shani Eshesh Madae Juda Iri Uwe Shopunek*

<sup>7</sup> Ipak ihipmorim ta purao kupaishi shuwish-umepari kabi Kraiss nanarao ipak um. Arpesh ta shutrip punekesh namudok aria ta shutuk Iruhin ananin nyeigur nyuto iruhw. <sup>8</sup> Eik yakripep um Kraiss douk nanaki natogur anan nataurumesh um mour iri um agundok nutaurum eshesh Juda um. Anan nenek enyudok neyabigesh um Iruhin nagipesh abom ihinyumori ananin baraan neneken nyatogur adurin atin. Kraiss nenek enyudok um Iruhin ananin adurin atinyi baraan seiwok nakripuk eshesh Juda esheshim yamehem um nyutogur adurin atin. <sup>9</sup> Kraiss shopunek nataurum eshesh Juda namudok um

nakri eshesh madae Juda iri uwe shutik enyudok aria shutuk Iruhin ananin nyeigur nyuto iruhw. Shutuken um agundok anan apa nenek gihaum arpesh um. Kraiss nenek enyudok kabi Iruhin ananik Buk kwakri um. Kwakri, “Namudok aria eik ta inak ini eshesh madae Juda iri uwe mupe aria ini eshesh mutuk nyakin nyeigur nyuto iruhw.

Aria ta iyarub aweruh ituk nyakin nyeigur nyuto iruhw.”

<sup>10</sup> Shopunek Iruhin ananik Buk douk kwakri,

“Ipak madae Juda iri uwe, ipak wosik ta puni Iruhin ananish arpesh punadudareh.”

<sup>11</sup> Aria shopunek kwakri,

“Ihipmorim ipak madae Juda iri uwe, ipak putuk Debeini ananin nyeigur nyuto iruhw.

Ipak ihipmorim ta piyarub aweruh putuk ananin nyeigur nyuto iruhw.”

<sup>12</sup> Aisaia shopunek nakri,

“Anan arman ta nukitak Jesi ananip awirop.

Anan ta nukitak nupe debeini king um ihishmorim arpesh douk eshesh madae Juda iri uwe.

Aria eshesh ta shudukemesh um anan ta nutogur nunekumesh yopihi aih.”

<sup>13</sup> Eik douk Pol yakrip ipak um Iruhin anan douk baugos um agundok apak madukemesh abom um Kraiss ta nutogur nunekumep yopinyi um. Ipak douk pape pasuhw enyudok Iruhin ananin baraan dodog. Namudok aria eik yakri anan wosik nunekep punadudareh abom aria ipakish mishish shur wosik. Yakri nunekehumep namudok. Ananin Mishin dodogowin atin nyunekep punadudareh abom. Yakri punadudareh um agundok ipak padukemesh abom um Kraiss ta nutogur nunekumep yopinyi um.

*Pol Nanadudareh Um Anan Neneken Iri Iruhin Ananin Mour*

<sup>14</sup> Ipak eikish ashukenyish owashish, eik yadukemesh abom um ipak kanak adur penek yopihi atih abom iri. Shopunek ipak parao ihinyumori yopinyi saki abom aria panodukem um panagapesh

um Iruhin ananish aih. <sup>15</sup> Enen baraeen yenyemuk um apudok shup iri douk dodogowinyi aria eik madae inogugur uwe. Yenyemagu yakri ihur ipakish urkum apahw um pugipeshen. Um maresh? Eik douk Iruhin nutaurume meyoh <sup>16</sup> aria neneke um inek Kraish Jisas ananin mour. Neneke um inak itaurum kupaishi douk eshesh madae Juda iri uwe. Eik douk yenek mour kabi anan pris um yakripesh Iruhin ananin yopinyi baraeen. Yenekesh namudok um eshesh shunakumori Iruhin aria ananin Mishin nyunekesh shupe yopish shupe ananish atish. Yenekesh namudok aria Iruhin ta nutrish mishin nyakitak kabi anan mishin nyakitak um enesh yopishi eshudok douk shenek ofa-umesh shako anan iri um.

<sup>17</sup> Eik yatukur um Kraish Jisas aria yanadudareh um enyudok mour yeneken um Iruhin iri. <sup>18</sup> Eik ta mare ikripesh kupainyi baraeen uwe, uwok. Ta ikripesh baraeen um enyudok mour atin douk Kraish neyohur yeneken iri. Neyohur yeneken um itaurum eshesh madae Juda iri uwe irigumesh um shumnek baraeen o shutik aih yenekeh iri aria shugipesh Iruhin ananin baraeen. <sup>19</sup> Iruhin ananin Mishin enyenyin dodog nyenek sabainyi Iruhin atun neneken iri mour. Aria shopunek enyenyin dodog nyataurume yenek enenyenen Iruhin atun neneken iri mour. Namudok aria yarik yakitak um mour Jerusalem yape yakripesh enyudok yopinyi baraeen um Jisas Kraish arigaha yanak yatogur agudok shokugi nahobig nyeigurig um Ilirikum. Yakripeshen aria ihishmorim arpeshe shemnek. <sup>20</sup> Riguk arigaha douk, eik douk urkum makri abom um yakri inak ikripesh Iruhin ananin yopinyi baraeen. Yakri inak ikripeshen agundok douk wata shumnek um Kraish ananin nyeigur um uwe. Agundok kupaimi hanak hakripesh shemneken um douk yakri uwok um wata inak ikripesh Iruhin ananin baraeen uwe, uwok. Yakri uwok um kupaimi hurumaguk ururuh aria eik kadak inak iwem urupat, namudok yakri uwok. <sup>21</sup> Yakri inek mour kabi Iruhin ananish Buk kwakrium. Kwakri namudok, “Eshudok arpeshe douk wata enesh

shukripesh baraeen um anan iri uwe, eshesh ta shutrun.

Aria eshesh douk madae shumnek baraeen um anan iri uwe, eshesh ta shudukemen.”

*Pol Nakri Nunak Nutik Iruhin Ananish Arpeshe Shape Rom Iri Um Jurug Aria Nunak Um Nahobig Spen*

<sup>22</sup> Sabaihi nyumneh yakri inaku itrip, aria enyudok mour um yakripesh Iruhin ananin baraeen um nyatape um yah aria madae inaku uwe. <sup>23</sup> Aria douk enyudok mour douk yape yeneken agudok shokugi nahobig iri douk yeneken yeyaten. Aria eik douk sabaishi kwarahos yape yabirak um yakri inaku itripum, yabirak yatik uwok. <sup>24</sup> Aria douk adur yakrium ta itripum atugun. Yakri inaku itrip ini ipak mupe munadudareh anob nyutob. Ini ipak mupe jurug, douk putaurume um eshudok um yah aria kadak inak um agudok nahobig Spen. <sup>25</sup> Aria douk abudok nyutob ta inak um Jerusalem. Iraomesh utabor eshesh Iruhin ananish arpeshe shape Jerusalem iri. <sup>26</sup> Um maresh? Iruhin ananish arpeshe shape Masedonia iri shani eshudok shape Akaia iri douk shabo baraeen aria shakri wosik um shutorum utabor aria shurabor bunak um Jerusalem. Aria eshesh ta sharabor aria shisiyabor um eshudok Iruhin ananish arpeshe douk eneshenesh wokesh um eshudok iri. <sup>27</sup> Enyudok douk eshesh meyoh mishish shakitak aria sheneken. Adur, eshesh douk mour nyapenyesh um shutaurum Iruhin ananish arpeshe shape Jerusalem iri. Um maresh? Eshesh Juda douk sharik shakripesh Iruhin ananin yopinyi baraeen eshesh madae Juda iri uwe shadukem Iruhin aria esheshish mishish shape wosik. Namudok aria douk eshesh madae Juda iri uwe douk tuwehin nyapenyesh um wata shukesh yopishi eshudok eneshenesh um shutaurumesh um aruhudok yegeshiweruh iri. <sup>28</sup> Abudok nyutob eik inak um Jerusalem ikeshuk utabor douk shatorumabor iri ba iyoh, aria ta inaku inak um nahobig Spen. Ikri inaku inak obi nyutob, sagomatin ta irik itogurmagu ipak agundok Rom. <sup>29</sup> Eik yadukemesh. Abudok nyutob ikri

inak itogurmagu ipak obi nyutob, Kraisa ta nunekumep yopinyi abom aria ta munadudareh muriguk meyoh abom.

<sup>30</sup> Eik yakri ipak urkwip purum apakin Debeini Jisas Kraisa nini agundok Iruhin ananin Mishin nyapuhur aria apak urkwip panawasham kupaishi Iruhin ananishi arpesih um. Namudok aria eik dodogoiwe atuwe yakri ikrip ipak eikish ashukenyish owashish um puni eik munasupam munek wanohw um muboyoweihi aih hubuhuk um. Aria douk yakri punek beten pusorik Iruhin um nutaurume. <sup>31</sup> Yakri putaurume namudok aria eshudok shape Judia aria madae shunek bilip um Jisas Kraisa iri uwe, yakri shubirak um mare shunekume enen yoweinyi uwe, uwok. Utabor eshesh shekeabor iri shopunek yakri punek beten porigan um nuhur ananish arpesih shape Jerusalem iri, um eshesh shunadudareh um enyudok mour douk eik yeneken um itaurumesh iri. <sup>32</sup> Ipak punek betenume namudok aria ta Iruhin nukri wosik um inak-umagu, eik ta inadudareh iriguk abom. Aria ta inaku ini ipak mupe irao uhwin mare inogugur aria ini ipak munadudareh. <sup>33</sup> Iruhin anan douk baugos um agundok apak mupe wosik aria aparuh hor wosik um. Aria eik yakri anan wosik ta nini ipak ihipmorim pupe. Adur atin.

## 16

### *Pol Nenekumesh Yopuhi Nyumnah Sabaishi Iruhin Ananish Arpesih Shape Rom Iri*

<sup>1</sup> Eik yakri ikripep um punek yopinyi um apakik mohwukwik Fibi. Okwok apa kwenek mour meyoh aria kwataurum Iruhin ananish arpesih shape Senkria iri. <sup>2</sup> Yakri ipakip urkwip purum Debeini pakri okwok douk ananik arpenyik aria puraok kwuni ipak pupe. Puraok punak kwuni ipak pupe kabi Iruhin ananish arpesih ta shenekesh um. Aria maresh eshudok douk kwukri putaurumok um, ipak wosik putaurumok. Um maresh? Riguk okwok douk kwataurum sabaishi arpesih shani eik. <sup>3</sup> Eik

yakri ipak punekume yopuhi nyumnah um Prisila kwani Akwila. Eshesh douk shani eik manasupam menekuman mour Kraisa Jisas. <sup>4</sup> Eshesh biyesh douk madae shunogugur um kupaishi shesh shugok um shutaurum eik uwe, uwok. Aria douk madae eik atuwe inek tenkyumesh uwe, uwok. Iishmorim Iruhin ananish arpesih douk eshesh madae Juda iri uwe shopunek shenek tenkyumesh. <sup>5</sup> Shopunek yakri punekume yopuhi nyumnah um eshudok Iruhin ananish arpesih douk apa shantorum esheshit urupat iri. Punekume yopuhi nyumnah um eikin arpen Epainetus. Agudok shokugi nahobig Esia douk anan narik nasuhw Kraisa ananin baraen nagipeshen. <sup>6</sup> Punekume yopuhi nyumnah um Maria. Okwok douk kwenek debeinyi mour um kwataurum ipak. <sup>7</sup> Punekume yopuhi nyumnah um Andronikus nani Junias. Amam biom hani eik, apak douk Juda atup awirop aria douk riguk hani eik monoweshik shunuweshik-ati urupat. Amam aposel douk hadukemam wosik abom amudok biom armam aria hatuk amamish nyeiguhw shato iruhw. Amam biom douk harik hasuhw Kraisa ananin baraen hagipeshen aria eik yagiguk. <sup>8</sup> Punekume yopuhi nyumnah um Ampliatos. Anan douk eikin arpen aria eik urkum manawashaman abom douk nanaturuk abom um Debeini. <sup>9</sup> Punekume yopuhi nyumnah um Urbanus. Anan douk nani apak manawapam um Kraisa ananin mour atin iri. Punekume yopuhi nyumnah um Stakis shopunek. Anan douk eikin arpen. <sup>10</sup> Punekume yopuhi nyumnah um Apeles. Anan douk nasah enenyenen amaen aria neyotu dodog abom adur nyeigur nyakihan um agundok nagipesh Kraisa adur atin um. Punekume yopuhi nyumnah um eshudok douk shani Aristobulus nani ananishi shape ananit urupat iri. <sup>11</sup> Punekume yopuhi nyumnah um Herodion. Anan douk nani eik ohwak Juda atup awirop iri. Punekume yopuhi nyumnah um eshudok douk shanaturuk Debeini aria shani Narsisus nani ananish shape ananit urupat iri. <sup>12</sup> Punekume yopuhi nyumnah um Trifina kwani Tri-

fosa. Owo apa wonek debeinyi mour um Debeini. Punekume yopuhi nyumnah abom um eikikwi arpenyik Persis. Okwok douk shopunek apa kwenek debeinyi mour um Debeini. <sup>13</sup> Punekume yopuhi nyumnah um Rufus. Anan yopini arman douk apa nagipesh Debeini wosik iri. Punekume yopuhi nyumnah um ananik amakek shopunek. Okwok douk apa kwataurume kabi okwokwin nuganin um. <sup>14</sup> Punekume yopuhi nyumnah um Asinkritus nani Flegon, Hermes, Patrobas iri Hermas hani amudok anam ashukenyim warhim Kristen douk hana-man hape iri. <sup>15</sup> Punekume yopuhi nyumnah um Filologus aria Julia, Nereus nani ananik mohwukwik shani Olimp as aria ihishmorim Iruhin ananish arpes apa shani eshesh shape iri. <sup>16</sup> Apak Iruhin ananish arpes apa magipesh um munek yopuhi nyumnah um kupaishi, eik yakri ipak ihipmorim ta urkwip punawasham ipak atin atin aria punapuprik um. Ihishmorim Iruhin ananish arpes douk shape sisigirub warub aria shanatukur Kra is iri douk shenemepogu yopuhi nyumnah ipak.

*Pol Nakripesh Um Gamo Shudukemesh Um Eshudok Arpes Douk Apa Shadiyogur Iruhin Ananish Arpes Iri*

<sup>17</sup> Eikish ashukenyish owashish, douk yakri ikripep enen dodogowinyi barae n. Eik yakri ipak ta gamo pudukemesh um eshudok arpes apa shadiyogur kupaishi aria shenekesh shakutukuk bilip iri. Eshudokmori arpes apa shakenyuk agabus barae n douk riguk ipak paraen iri. Ipak ta piyotumeshuk rougun. <sup>18</sup> Um maresh? Eshudokmori arpes douk madae shunek apakin Debeini Kra is ananin mour uwe, uwok. Eshesh douk apa shape shagipesh harik hapenyesh iri yoweih i aih atih. Shapeum sheneyagwreh ekehinyi barae n nyani enyudok douk shenek roh w shagiyagig um arpes um barae n aria apa shagiyagim eshudok douk madae shudukem yoweishi inahos uwe, uwok. <sup>19</sup> Ihishmorim arpes douk shemnek barae n um agundok ipak pagipesh Iruhin ananin barae n um.

Namudok aria eik douk yanadudareh-umep. Yanadudareh aria douk yakri ipak pudukem yopihi aih abom um pugipeshesh wosik atin. Aria yoweih i aih yakri ipak mare pudukemeh um pukri pugipeshesh uwe, uwok. <sup>20</sup> Iruhin anan douk baugos um agundok apak aparuh hur wosik. Aria anan douk hurukatin um ta nubo Satan nubuh aria nutuk ipak putem iruhw. Eik yakri apakin Debeini Jisas nutaurumep meyo h um.

*Enesh Iruhin Ananish Arpes Shenek Yopuhi Nyumnah Um Eshesh Rom*

<sup>21</sup> Timoti douk nani eik wanasupam um Iruhin ananin mour iri douk neshopokugu yopuhi nyumnah um ipak. Amudok anam hani eik apak Juda atup iri shopunek henemepogu yopuhi nyumnah. Amamish nyeiguhw eshudok. Lusius, Jeson iri Sosipater. <sup>22</sup> Eik Tertius, Debeini ananin arpen douk yeshopokugu yopuhi nyumnah um ipak. Eik douk yowem Pol nakri enyi barae n apudok shup. <sup>23</sup> Gaius neshopokugu yopuhi nyumnah. Eik Pol apa yape ananit urupat aria apa neyohe wosik atin. Eshesh Iruhin ananish arpes apa shanaki shantorum shenek lotu ananit urupat iri shopunek apa nenekumesh yopinyi atin.

Erastus, anudok neyo h gavmanin mani aburdok debeiburi wabur iri, anan shopunek neshopokugu yopuhi nyumnah um ipak. Apakin ashuken Kwartus shopunek neshopokugu yopuhi nyumnah um ipak.

<sup>24</sup> [Eik yakri apakin Debeini Jisas Kra is nutaurumep meyo h ipak ihishmorim.]

*Apak Mutuk Iruhin Ananin Nyeigur Nyuto Iruhw*

<sup>25</sup> Apak mutuk Iruhin ananin nyeigur nyuto iruhw. Anan atun wosik atin um nunekep piyotu dodogowip um pusuhw ananin yopinyi barae n dodog pugipeshen. Kabi douk yakripep Iruhin ananin yopinyi barae n um Jisas Kra is um. Anan ta nunekumep namudok atin kabi douk enyudok barae n seiwok nyanabeshuk nyape arigaha roubi nyutob abom <sup>26</sup> douk Iruhin nowerehen nyatogur yopugunum iri nyakrium. Anan nape ihih nyumneh iri douk dodogowin atun

nakripap aria apak makrip ihib um debeibi amnabish arpesh um enyudok ananin baræen. Enyudok baræen douk seiwok amam profet henyemaguk iri. Namudok aria ihishmorim arpesh douk shadukem enyudok nyanabeshuk iri baræen. Iruhin nenekesh namudok um eshesh kupaishi ta shusuhw ananin baræen dodog shugipeshen aria shugipesh ananih aih.

<sup>27</sup> Iruhin douk anan atun nadukem enenyenen abom iri. Namudok aria eik yakri apak ta mutuk ananin nyeigur nyuto iruhw ihih nyumneh. Jisas Krai atun ta nutaurumap aria mutuk Iruhin ananin nyeigur namudok. Adur atin.

## Parik Iri Shup Douk Pol Nenekap Panam Eshesh Korin Iri

*Banenyi Baraen Pol Narik Neneken  
Nyanak Um Eshesh Korin Iri*

1:1-9 Pol nenek tenkyu um Iruhin um  
eshesh Kristen shape Korin iri

1:10—4:21 Eshesh Kristen shanadiyogurum shape biyehigun, aria Pol nakripesh baraen um Kristen shunekah iri aih hani ehudok amam aposel hunekeh iri.

5:1—7:40 Eshesh Kristen shenek enesh yoweishi inahos aria Pol nakripesh um yopihi aih douk eshesh shanaraum iri ta shunekah iri

8:1—11:1 Pol nakripesh baraen um mahish douk shaesh shenek ofamesh um madae adurimi god omi iri uwe. Aria nakripesh um gamo shudukemesh aria mare shugipesh eshesh Israel esheshish yoweishi inahos douk riguk shape shenekah iri.

11:2—14:40 Ehudok aih um murao kumunio um hani enen baraen um yopinyi presen douk Iruhin ananin Mishin apa nyakopen iri.

15:1-58 Baugenyum baraen um Kraiss wata nakitak napeum

16:1-4 Utabor eshesh Korin shaborubuk um bunam enesh Kristen douk shanahwaram yaruhish iri

16:5-24 Pol nakripesh ananin baraen nyatuh aria nenemesh yopuhi nyumnah eshesh Korin

1-2 Eik Pol douk Iruhin kanak anan urkum mor aria nahware um itogur aposel um neshopoke inak inek Jisas Kraiss ananin mour aria yenekumep-ogu apudok shup ipak. Eik yani apakin wanin Sostenes wape aria wenekumep-ogu apudok shup ipak Iruhin ananish arpesh pape Korin iri. Ipak douk panak punatukur Kraiss Jisas aria Iruhin nenekep putogur ananish yopishi arpesh. Aria nahwarep um pupe ananip atip abom. Ohwak wonekap-umagu ipak pani ihishmorim arpesh shape ihirubmorim

warub iri. Eshudok douk shahwar apakin Debeini Jisas Kraiss ananin nyeigur iri. Anan douk apak mani eshesh apakin atun Debeini.

<sup>3</sup> Ohwak wakri apakin Yain Iruhin nini apakin Debeini Jisas Kraiss hutaumep meyoh aria hunek ipakiruh aparuh hur wosik.

### *Pol Nenek Tenkyu Um Iruhin*

<sup>4</sup> Ihih nyumneh eik yape um yenek tenkyu um Iruhin um agundok anan nenekep panatukur Kraiss Jisas aria nataumep meyoh um. <sup>5</sup> Ipak douk panatukur Kraiss aria parao ihishmorim yopishi eshudok eneshenesh. Eshesh douk eshudok. Ipak parao ihinyumorim yopinyi saki, aria parao Iruhin ananin debeinyi dodog um piyagwreh enenyenen yopinyi baraen, aria um pukripesh ananin yopinyi baraen abom. <sup>6</sup> Um maresh? Enyudok yopinyi baraen um Kraiss apak makripepen iri douk nyape dodogowin abom numun ipakiruh aparuh. <sup>7</sup> Douk namudok aria abudok nyutob ipak panadudareh aria pape patrugun um apakin Debeini Jisas Kraiss um nutogur yopugunum obi nyutob, ipak douk madae tutukwanip um enenyenen yopinyi presen douk Iruhin ananin Mishin nyekepen iri uwe, uwok. <sup>8</sup> Aria Jisas Kraiss ta nutaurumep nenekep piyotu dodogowip arigaha punak putogrum ahudok hugiguk iri nyumnah. Anan ta nutaurumep namudok um hahudok nyumnah anan nutanamori um, ipak ta mare enen baraen nyupenyep, uwok. <sup>9</sup> Aria Iruhin douk nagipesh ananin baraen abom nenek ananin mour wosik iri nahwarep aria panaki pantoruh ananin nuganin Jisas Kraiss apakin Debeini. Aria ipak pani anan pasuhw atum urkum.

### *Iruhin Ananish Arpesh Shanadiyogurum*

<sup>10</sup> Aria ipak Kristen! Eik douk Debeini Jisas Kraiss neke big um inek ananin mour. Douk namudok aria eik douk yakri ikripep dodogoiwe atuwe um pugipesh enyudok eikin baraen. Baraen enyudok. Eik yakri ipak ihishmorim ta pusuhw



atum urkum abom. Aria ipak punekesh namudok um, ipak ta mare punadiyogurum, uwok. <sup>11</sup> O ipak Kristen, enesh shaniguk Kloe iri shakripe shakri ipak kanak pape panatutukem panitok um baraen. <sup>12</sup> Eik yakri um enyudok. Ipak enep pakri, "Apak magipesh Pol iri." Aria enep pakri, "Apak magipesh Apolos iri." Aria enep pakri, "Apak magipesh Pita iri." Aria enep pakri, "Apak magipesh Kraiss iri."

<sup>13</sup> Ipak penegesh um namudok. Ipak pakri Kraiss nanagwuduk shoku-shokugun atin aka? Uwok, eik Pol yagok rowog kruse um itaurumep? Adur atin uwok. Aria ipak douk madae shunek baptaisumepum eik Pol eikin nyeigur uwe. <sup>14</sup> Eik douk yenek baptaisum Krispus nani Gaius atum. Aria eik yenek tenkyu um Iruhin um agundok eik madae inek baptaisum enep shopunek um uwe. <sup>15</sup> Douk namudok aria douk ta mare enesh arpes shukripep shukri eshesh sharao baptaisum eikin nyeigur, uwok. <sup>16</sup> Adur, eik yenek baptaisum Stefanis nani ananip awirop shopunek. Aria eik ta yenek baptaisum enesh shopunek aka, uwok. Enyudok eik madae idukemesh uwe. <sup>17</sup> Kraiss douk madae nukripe um inak inek baptaisum arpes uwe, uwok. Anan nakripe um inak ikriפש Iruhin ananin yopinyi baraen. Aria ikriפש enyudok baraen um, eik mare iyagwreh baraen kabi douk shadukemesh abom iri arpes sheyagwrehen iri baraen, uwok. Um maresh? Ta arpes urkwip purum eik atuwe shukri eik yadukemesh abom iri aria yakriפש baraen yopinyi abom um wosik. Aria eshesh urkwip mare purum enyudok dodogowinyi baraen abom um Kraiss nagok rowog kruse um.

### *Iruhin Ananin Saki Iri Dodog Douk Kraiss Atun*

<sup>18</sup> Eshudok arpes douk shagim ahudok yah douk ta arpes shunak shuwishuk iri shagimah iri douk shakri enyudok baraen um Jisas nagok rowog kruse um douk rohwin wehinyi baraen. Aria apak douk Iruhin nape narap matanamori mape wosik iri makri enyudok baraen douk Iruhin ananin debeinyi dodog abom.

<sup>19</sup> Baraen nyetem Iruhin ananik Buk iri douk nyakri namudok. Iruhin nakri, "Eik ta ibo eshudok douk shadukemesh abom iri esheshin saki aria nyeigur iyatenyuk.

Aria shopunek ta ibouk esheship gamo shadukemesh-umep abom iri urkwip iyatepuk."

<sup>20</sup> Douk namudok aria douk amudok hadukemesh abom iri armam amamin saki ta nyutaurumam mumam? Aria amudok douk hanak um debeinyi skul harao debeinyi saki iri amamin saki ta nyutaurumam mumam? Aria shadukemesh iri arpes douk shani kupaishi shapeum shanitok baraen atin iri esheshin baraen ta nyutaurumesh mumam? Uwok meyoh. Iruhin douk nenek agundok atapish arpes douk shadukemesh abom iri esheshin saki nyatogur kabi douk rohwinny um.

<sup>21</sup> Iruhin douk nadukemesh abom iri nagipesh ananim urkum aria nenek eshudok arpes um eshesh kanak shugipesh esheshin debeinyi saki aria shubirak mare shudukem anan, uwok. Aria anan nakri nura arpes shatanam shupe wosik um douk namudok. Anan nakri wosik um apak mukriפש ananin yopinyi baraen sabaishi arpes. Aria eshudok douk shukri enyudok baraen douk adurin aria shusuhwen shugipeshen iri, anan ta nuraesh shutanamori shupe wosik. Enyudok baraen apak makriפשen iri, agundok atapishi arpes douk shahwaren rohwinny. <sup>22</sup> Um maresh? Eshesh Juda douk dodogowish atish um shakri shutik enyudok Iruhin atun neneken iri mour. Aria eshesh Grik shagipesh ahudok yah abom douk eshudok douk shaurim sabainny saki iri shagipeshah iri. <sup>23</sup> Aria apak douk makriפש baraen um shenek nyilim um Kraiss rowog kruse aria shan nagok um. Apak makriפשen aria eshesh Juda shemneken aria nyenekesh shakri uwok abom umen. Aria eshesh Grik shakri enyudok baraen douk rohwinny. <sup>24</sup> Aria apak Juda mani ipak Grik shopunek douk Iruhin nahwarap iri makri enyudok baraen douk nyakrium Iruhin ananin dodog nyani saki douk Kraiss atun abom.

<sup>25</sup> Um maresh? Enyudok Iruhin ananin baraeen douk arpesch shahwareen um rohwin iri, enyen douk nyeshagrakuk abom arpeschin saki. Aria mour douk Iruhin neneken aria arpesch shatrin shakri madae dodogowin iri uwe douk dodogowin atin abom nyeshagrakuk arpeschin dodog.

<sup>26</sup> O ipak eikish arpesch, ipak wata urkwip purmaguk riguk sagomatin Iruhin nahwarep patogur Kristen obi nyutob. Abudok nyutob, ipak ihipmorim douk enep karowip meyoh parao sabainyi agundok atapin saki. Aria shopunek, enep karowip meyoh parao debeishi nyeiguhw, aria enep karowip meyoh patogur dodogowipari nyeiguhw shatoumepi. <sup>27</sup> Aria eshudok arpesch douk agundok atapishi arpesch shahwaresh rohwhishi iri, eshesh douk Iruhin nanagraehesh um shupe ananish atish. Anan nenekesh namudok um nunekesh abraen eshudok shadukemesh abom iri arpesch. Aria eshudok arpesch douk agundok atapishi arpesch shatrish shakri eshesh madae dodogowishi iri uwe, eshesh douk Iruhin nanagraehesh um nunekesh abraen dodogowishi arpesch. <sup>28</sup> Aria eshudok arpesch douk arpesch shahwaresh yoweishi rohwhishi nyeiguhw wokesh iri, eshesh douk Iruhin nanagraehesh um nunek eneshenesh dodogowishi eshudok shuni nyeiguhw shatoumeshi arpesch mare dodogowish aria shutogur rohwhish nyeiguhw wokeshi. <sup>29</sup> Anan douk nenekesh namudok um mare enen atin arpen enyen kanak nyutuk enyenyin nyeigur nyuto um nyukri Iruhin nutrin uwe, uwok. <sup>30</sup> Iruhin douk nenekep patukur Kraiss Jisas aria Iruhin nenek Kraiss natogur baugos um apakin saki. Apak douk matukur Kraiss aria Iruhin douk natrup nakri apak adurishi arpesch. Aria Kraiss atun nenekap mape Iruhin ananip atup. Aria natorup nakweshihap um yoweishi inahos douk showeshikap iri aria nenekap mape wosik. <sup>31</sup> Douk namudok aria Iruhin nakri apak mugipesh enyudok baraeen nyetem ananik Buk iri. Baraeen douk enyudok, “Eshudok arpesch douk shukri shutuk esheshish nyeiguhw

shuto iruhw iri, eshesh ta shutuk Debeini ananin atin nyeigur nyuto iruhw.”

## 2

### *Enyudok Baraeen Um Kraiss Nagok Neir Rowog Kruse Um*

<sup>1</sup> O ipak Kristen. Riguk eik yanamagu ipak yakripep Iruhin ananin baraeen obi nyutob, eik douk madae ikripep ikwu eikin debeinyi saki abom o yopiyopinyi baraeen kabi hadukemesh iri hakripepum uwe, uwok. <sup>2</sup> Um maresh? Abudok nyutob eik yanaku yani ipak mapeum, eik yakri uwok abom um eikim urkum muramaguk enesh kupaishi eshudok enesh-enesh, uwok. Eik yakri urkum murum Jisas Kraiss atun abom nini agundok nagok rowog kruse um. <sup>3</sup> Aria yanaku yani ipak mape um, eik douk madae dodogoiwe uwe, uwok. Eik apa yanogugur aria sheyarube yowiyokuk. <sup>4</sup> Aria yape yakripep Kraiss ananin yopinyi baraeen um, eik douk madae ikripep kabi douk shadukemesh iri arpesch um aria ihur ipakip urkwip uwe, uwok. Eik yakripep baraeen um, eik douk yeyabigep Iruhin ananin Mishin enyenyin dodog atin. <sup>5</sup> Eik yenekesh namudok um maresh, eik yakri uwok abom um arpeschin saki nyunekep douk punek bilip um Kraiss. Eik yakri Iruhin ananin dodog atin nyunekep douk punek bilip uman.

### *Iruhin ananin Mishin Nyokap Saki*

<sup>6</sup> Adur, eshudok douk dodogowish um shagipesh Iruhin ananin aih iri, apak makripesh saki nyape-enyi baraeen. Aria enyudok saki douk madae agundok atapish arpesch esheshin uwe, uwok. Enyen douk madae eshudok debeishi douk shape shasuhw merik agundok atap iri douk shape shabirak shanak abom um shunak shuwishuk iri esheshin uwe, uwok. <sup>7</sup> Enyudok saki apak makripepen iri douk Iruhin ananin atin. Seiwok enyen nyanabeshuk aria arpesch madae shudukemen uwe. Aria seiwok baugos um, Iruhin wata nunek iruhw atap uwe aria anan nagraeh enyudok saki um apak um murao ananin dodog nyuni yopihi aih douk hape kabi lait iri um. <sup>8</sup> Aria

douk madae hudukemesh atin um anan um amam debeimi armam douk nasuhw merik agundok atap iri madae hudukem baugenyum enyudok saki uwe, uwok. Douk amam hudukemen akure, amam ta mare husuhw Debeini douk nyeigur nya-toumanari hunek nyiluman rowog kruse aria hon nugok, uwok. Anan douk De-beini abom nyeigur nyatouman iri. <sup>9</sup> Aria amam madae hudukem enyudok Iruhin ananin saki uwe kabi douk ananik Buk kwakri um. Buk douk kwakri namudok, “Eshudok douk madae enesh arpesh shutrish o shumnekumesh o urkwip purumesh shukri ta shutograri iri, eshudok douk Iruhin nagabeyesh shakus um eshudok arpesh douk esheship urkwip panawasham anan iri.”

<sup>10</sup> Eshudok arpesh douk madae shudukemesh uwe, uwok. Aria Iruhin nenek ananin Mishin nyowerehesh um apak aria madukemesh. Ananin Mishin atin douk nyatik ihishmorim um Iruhin ananish urkum aria aih douk shanabeshuk um apak iri aria nyadukemesh. <sup>11</sup> Aria douk ipak omi nyadukem kupainyi arpen enyenyim urkum mor manak um? Uwok. Enyudok arpen enyenyim urkum atin nyadukem enyenyim urkum. Aria douk namudok atin. Aria uwok abom um enen atin arpen nyudukem Iruhin ananim urkum uwe, uwok. Ananin Mishin atin nyadukemam. <sup>12</sup> Aria apak douk madae muraao agundok atapim urkum uwe, uwok. Apak douk marao enyudok Mishin douk Iruhin nakopen um nyutaurumap mudukem eshudok douk anan nekepeshi meyoh iri. <sup>13</sup> Aria abudok nyutob apak makripesh Iruhin ananin baraen obi nyutob, apak douk madae mukwu arpeshin saki aria mukripesh baraen uwe, uwok. Apak makripesh enyudok baraen douk Iruhin ananin Mishin nyakripap-enyi. Aria mawereh baugenyum enyudok baraen makrip eshudok arpesh douk sharao Iruhin ananin Mishin nyapenyesh iri. <sup>14</sup> Aria eshudok douk Iruhin ananin Mishin madae nyupenyesh iri uwe ta mare shuraao eneshenesh yopishi eshudok

douk ananin Mishin nyekepesh iri. Um maresh? Eshesh shakri eshudok Iruhin ananin Mishin nyekepesh iri douk rohishi meyoh. Aria eshesh madae shudukemesh uwe. Um maresh? Enyen douk Iruhin ananin Mishin atin abom apa nyutaurum arpesh nyeyabigesh um baugenyum um baraen um eshudok yopishi. <sup>15</sup> Aria eshudok arpesh douk Iruhin ananin Mishin nyapenyesh iri ta shunek skelimum ihishmorim enesh-enesh eshudok. Aria ta mare enen arpen wosik um nyunek skelimum eshudok arpesh douk Iruhin ananin Mishin nyapenyesh nyasuhw merikw-umesh iri, uwok. <sup>16</sup> Um maresh? Iruhin ananik Buk douk kwakri namudok, “Madae enen arpen nyudukem Debeini ananim urkum mor manak um uwe. Aria ta mare enen arpen nyukripan um enesh eshudok eneshenesh uwe, uwok.”

Aria apak douk marao Krai ananim um urkum mapenyap.

### 3

#### *Henek Mour Sios Iri Douk Henek Iruhin Ananin Mour Iri*

<sup>1</sup> O ipak Kristen! Riguk eik yakripep Iruhin ananin baraen obi nyutob, eik douk madae ikripep kabi yakrip eshudok douk sharao Iruhin ananin Mishin nyapenyesh nyasuhw merikw-umesh iri um uwe, uwok. Eik yakripepen kabi yakrip eshudok douk shagipesh agundok atapih aih iri um. Aria shop-unek, yakripepen kabi yakrip shokwishi batowish um. Um maresh? Eik yatripum ipak wata dodogowip um agundok pagipesh Krai ananin aih um. <sup>2</sup> Aria eik madae ikripep dodogowinyi baraen uwe, uwok. Um maresh? Riguk ipak douk wata dodogowip um puwok dodogowiguni worigun uwe. Aria douk shop-unek, ipak wata dodogowip uwe. Douk namudok aria eik yekep nyumaguhw atin. <sup>3</sup> Um maresh? Ipak wata pape pagipesh ehudok harik hapenyep iri yoweih aih. Ehudok aih penenek nyigiya um, hani ehudok um panatutukem atin um. Ipak douk penekesh namudok aria

ehudok aih ipak penekheh iri douk heyabigap um ipak douk wata pape pagipesh harik hapenyepi aih. Ehudok ipakih aih douk kabi agundok atapish arpesh meyoh shenekeh iri um. <sup>4</sup> Enen arpen nyakri, "Eik yagipesh Pol iri." Aria enen nyakri, "Eik yagipesh Apolos iri." Aria enyudok ipakin baraden douk nyeyabigap um ipak douk watak pape kabi agundok atapish arpesh um. <sup>5</sup> Ipak urkwip purum enyudok. Apolos douk meini aria eik Pol amiapen? Ohwak douk wenek Debeini ananin mour iri otuhw. Aria enyudok mour riguk ohwak wanaku weneken iri nyataurumep pasuhw Kraiss ananin baraden pagipeshen. Aria Debeini nakohw sisigin mour. <sup>6</sup> Eik yau shurkwipigun worigun yarig aria Apolos nakrupesh abar um mare ta yarish. Aria Iruhin atun nenekesh shatogur. <sup>7</sup> Douk namudok aria enyudok nyau worigun iri nyani enyudok douk nyakrupesh abar iri eshesh biyesh douk nyeiguhw wokesh. Aria Iruhin atun douk nenekesh shatogur iri anan atun douk debeini aria nyeigur nyato iruhw iri. <sup>8</sup> Enyudok arpen douk nyau worigun iri nyani enyudok douk nyakrupesh abar iri eshesh biyesh douk shasuhw atum urkum aria shenek atin mour iri. Aria eshesh biyesh, atin atin ta shurao esheshibor utabor atatahibor um enyudok mour eshesh shenekeh iri. <sup>9</sup> Um maresh? Ohwak biyohw douk wani Iruhin manoprom munek ananin mour. Aria ipak kabi douk Iruhin ananig nubarig um.

*Henek Mour Sios Iri Amam Kabi Douk Amudok Harok Urusag Iri*

Aria ipak shopunek douk pape kabi Iruhin ananit urupat um. <sup>10</sup> Eik Pol douk Iruhin nataurume meyoh aria neke enyudok saki um itogur kabi anan nadukemesh abom um narok urusag iri arman. Eik douk yabuk sagomatinyim utom douk apa mosah wabrat um urupat iri. Aria kupaishi shape sharok urupat tetem amudok utom. Aria eshesh atin atin shupe shurok atudok urupat um, eshesh ta gamo shunadukemesh wosik aria shupe shurokat. <sup>11</sup> Um maresh? Ipak padukemesh, Iruhin douk nosap

Jisas Kraiss nape narik kabi douk amudok sagomatinyim utom douk mosah wabrat urupat iri. Douk namudok aria ta mare enen arpen dodogowin um nyubuk anam kupaimi utom shopunek um musah urupat um uwe, uwok. <sup>12-13</sup> Aria ta enen arpen nyukwu gol o siliwa o yopubori utabor douk shatorubor debeibori utabor iri o rowos o worur um nyurok atudok urupat um, ahudok nyumnah Kraiss nutanamori ahi, eshesh atin atin esheshin mour ta nyutogur yopugunum. Aria eshesh ta shutrin aria shudukemesh um enyen douk yopinyi aka yoweinyi. Aria hahudok nyumnah Kraiss nutanamori ahi, ta huni nyih hunaki. Ehudok nyih ta hunuwi mour ihishmorim arpesh atin atin shenekeh um hukwiraehen iri um huwerehenumesh. Aria eshesh shudukemesh um esheshin mour douk yopinyi aka yoweinyi. <sup>14</sup> Arpesh shenekeh iri mour, enyen douk kabi ogwudok urusag eshesh sharokog iri um. Aria ta enen arpen enyenyit urupat nyih madae hunut huwarut um, enyen ta nyurao yopishi eshudok eneshenesh um enyenyin mour enyen nyeneken iri. <sup>15</sup> Aria ta enen arpen enyenyit urupat nyih hunut huworut um, enyen ta mare nyurao enesh yopishi eshudok eneshenesh uwe, uwok. Aria enyen kanak Iruhin ta watak nuraen nyutanamori nyupe wosik kabi douk matukenyi nyih um.

*Iruhin Ananish Arpesh Douk Shape Kabi Ananit Debeiti Urupat Um*

<sup>16</sup> Ipak ihipmorim douk pape kabi Iruhin ananit debeiti urupat um. Aria ananin Mishin douk nyape numun ipakiruh aparuh. Ipak padukem enyudok aka, uwok? <sup>17</sup> Douk namudok aria ta enen arpen nyununu Iruhin ananit debeiti urupat um, Iruhin ta nen nununin aria neshopoken nyunak um yoweiburi wabur hel. Um maresh? Atudok urupat yoputi abom aria ananit atut. Aria ipak kanak douk pape kabi atudok urupat um.

*Apak Mare Mutuk Arpesh Esheshish Nyeiguhw Shuto Iruhw*

<sup>18</sup> Ipak mare punek rohwa um ipak kanak, uwok. Aria ipak enen arpen

nyukri enyen douk nyadukemesh abom iri arpen kabi douk agundok atapishi arpes shakri um, enyen ta nyunekesh namudok. Sagomatin enyen ta nyutanam nyutogur enyudokmori arpen douk agundok atapishi arpes shahwaren hwarohwin iri ba iyoh. Aria enyen ta kadak nyutogur nyadukemesh abom iri arpen. <sup>19</sup> Um maresh? Iruhin natik agundok atapin saki, anan nakri enyen douk hwarohwin saki. Enyen douk kabi enen baraan nyetem Iruhin ananik Buk iri nyakrium. Enyen nyakri namudok, "Iruhin nasuhw shadukemesh abom iri arpes um douk namudok. Anan nakwu eshesh kanak esheshih rohwi hani saki aria nenekesh shape yoweishi kabi douk arpes shore madururuh um mahish shanak sheir um." <sup>20</sup> Aria enen shopunek baraan nyetem Iruhin ananik Buk iri shopunek nyakri namudok, "Debeini nadukemesh um eshudok shadukemesh iri arpes esheship urkwip ta mare pukwarum eneh yopihi aih uwe, uwok."

<sup>21</sup> Douk namudok aria douk ipak mare enen arpen nyutuk enen arpen enyenyin nyeigur nyuto iruhw uwe, uwok. Ihishmorim eshudok eneshenesh shani arpes shopunek douk ipakish atish. <sup>22</sup> Eik Pol yani Apolos aria Pita mani ihipmorim agundok atap, pani agundok arpes shupe aria madae shugok um, nani gok, nyani eshudok ihishmorim shani arpes douk shape iri, shuni eshudok douk ta kweipon shutogur iri, eshudok ihishmorim douk ipakish atish. <sup>23</sup> Aria ipak ihipmorim douk Krai Jisas ananip atip. Aria Krai douk Iruhin ananin.

## 4

### *Debeini Atun Ta Nunek Skelim Um Eshudok Douk Shenek Mouruman Iri*

<sup>1</sup> Ipak ta urkwip purum apak aria pakri apak douk mape shakamum Krai aria munek ananin mour iri. Apak douk Iruhin nenekap um mupe debeipi um enyudok mour um mukripesh ananin adurin atin baraan douk seiwok nyanabeshuk nyape iri. Aria douk enyen nyatogur yopugunum. <sup>2</sup> Aria enyudok arpen douk enyenyin debeini neken mour

um nyuneken iri, enyen ta nyuneken wosik abom. <sup>3</sup> Aria ta ipak o kupaishi arpes shukri shunek skelim eik aih um, o shunek skelim eik um kwot, enyudok eik madae idarehen uwe, uwok. Aria eik kanak shopunek, eik yakri uwok um inek skelum eik aih, uwok. <sup>4</sup> Adur atin, eik urkum mor wosik atin aria madae murum ikri eik yenek enesh yoweishi inahos um uwe. Aria enyudok ta madae nyunekesh aria ikri eik yopuwe iri uwe, uwok. Debeini anan atun wosik ta nunek skelime. <sup>5</sup> Aria douk abudok nyutob douk Debeini nakriyab um nunek skelim arpes obi nyutob douk wata butogur uwe. Douk namudok aria ipak mare arigas punek skelim um enen arpen uwe, uwok. Ipak ta putrugun um arigaha ahudok nyumnah Debeini nutanamori ahi aria anan kadak nunek skelimesh. Anan ta nurauri enesh enesh eshudok douk shanabeshuk shakus arukwut-igunum shutogur yopugunum. Aria ta nuwerek ihishmorim arpes esheship panabeshuk iri urkwip putogur yopugunum. Aria abudok nyutob Iruhin ta nukrip apak ihishmorim atin atin um apak meneken iri mour. Anan ta nunadudareh-umep aria nutuk apakish nyeiguhw nukripap atatahin baraan um apak atin atin mour apak moneken iri.

### *Eshesh Kanak Korin Shape Shatuk Eshesh Nyeiguhw Shato Iruhw*

<sup>6</sup> O ipak Kristen, eik douk yenek urkum um yakri itaurumep. Douk namudok aria eik yakripep baraan um eshudok douk shenek Iruhin ananin mour iri, eik yohur baraan yenyem ohwak eik yani Apolos. Eik yenekesh namudok um yakri ipak pudukem baugenyum baraan um enyudok baraan douk nyakri, "Ipak mare pishagrakuk enyudok baraan douk amam henyemagak Iruhin ananik Buk iri, uwok." Eik yakripep namudok um ipak mare punadudareh um putuk enen arpen enyenyin nyeigur nyuto iruhw aria punih kupainyi enyenyin nyubuh, uwok. <sup>7</sup> Ipak douk omi nyenekep um pupe debep um kupaishi arpes? Ihishmorim yopishi eshudok eneshenesh ipak paraesh iri douk Iruhin atun nekepesh. Douk

namudok aria ipak mare punogunukuk pakri ipak atip dodogowipari, uwok. Um maresh? Ihishmorim yopishi eshudok eneshenesh ipak paraesh iri douk Iruhin atun nekepesh.

<sup>8</sup> O adur, douk ipakiruh aparuh shukniruh. Ipak parao ihishmorim eneshenesh yopishi eshudok aria patogur debeipari. Apak douk madae mutaurumep uwe, uwok. Enyudok douk ipak kanak patogur king-omi. Aria eik yakri ipak pupe debeimi king-omi abom um apak shopunek muni ipak mupe debeimi king-omi atop. <sup>9</sup> Um maresh? Eik urkum morum yakri Iruhin douk nenek apak aposel mape magiguk abom kabi douk nyeiguhw wokeshi arpesh douk shape shagiguk abom iri. Apak douk mape kabi amudok armam douk henek kwot aria nasuhw amamit kwot aria nakri amam ta hugok iri. Anan nakri ihishmorim arpesh shape iruhw atop iri shuni Iruhin ananish enelahos shiyotu shutrum esheshis nabes aria shom hugok iri. <sup>10</sup> Apak douk makripesh Kraiss ananin baraen aria agundok atapishi arpesh douk shahwarap hwarohwipari. Aria ipak douk patukur Kraiss aria parao sabainyi saki peshagrakuk apak hwarohwipari. Apak douk madae dodogowip uwe, aria ipak douk dodogowip abom. Aria apak nyeiguhw wokap, aria ipak douk nyeiguhw shato iruhumep. <sup>11</sup> Seiwok manaki arigaha douk, apak nyurub bap, abar bap aria monare yoweih rupeh. Aria arpesh shap, aria apak penyigun uwok um munak mupeum uwe. <sup>12</sup> Aria apak kanak menek debeinyi mour aria magrem apakish eshudok eneshenesh. Aria arpesh shahapum, apak apa marig Iruhin um nunekumesh yopinyi. Eshesh shenek enenyenen yoweinyi um apak aria apak dodogowip mape manatrish meyoh. <sup>13</sup> Eshesh sharukap nubut aria apak makripesh yopinyi atin baraen. Seiwok manaki arigaha douk, apak mape magiguk abom nyeiguhw wokap kabi douk agundok atapish nyubuhas douk shawashesh-uguk anagas iri um.

*Pol Nakrip Eshesh Korin Um Shugipesh*

### *Ananish Aih Abom*

<sup>14</sup> Eik douk madae iwemagu enyudok baraen um inekep abraen ipak uwe, uwok. Eik douk urkum manawashamep kabi douk eikish batowish um aria eik douk yowemagu enyudok baraen um yakri iyabigep yopuhi yah um mare punek yoweishi inahos. <sup>15</sup> Adur, ta 10,000-poreim armam hupe hiyoh ipak douk patukur Kraiss iri. Aria ipak douk madae sabaimi yakenyim uwe. Eik douk yakripep Iruhin ananin yopinyi baraen pasuhwen pagipeshen aria douk eik atuwe abom yape ipakin yaken. Ipak douk patogur eikish batowish um Iruhin ananin yopinyi baraen douk eik yakripepen aria pemneken pagipeshen iri. <sup>16</sup> Douk namudok aria eik yakri ipuhur um pupe um pugipesh eikih atih aih. <sup>17</sup> Aria shopunek, eik yeshopok Timoti nanak-umogu ipak. Anan douk eikin nuganin douk eik urkum manawashaman abom iri. Eik yahwaran nuganinum ipak pumnekan, anan douk nataurume wenek Debeini ananin mour iri. Aria anan apa neneken wosik. Eik douk yeshopokan nanakumogu nukripep um nuhur ipakip urkwip um ipak wata urkwip purum eikih aih douk yape yenekeh um yagipesh Kraiss Jisas um. Aria ihirub warub, ihish Iruhin ananish arpesh shantorum shape aria yanak yakripesh baraen um, eik yakripesh um shugipesh ehudok atih aih huni baraen.

<sup>18</sup> Ipak enep pakri eik ta mare inaku aria ipak pape patuk ipakish nyeiguhw shato iruhw aria pakri ipak padukemesh abom iri. <sup>19</sup> Aria eik ta Debeini nukri wosik um eik inakumagu, eik ta inaku arigas. Aria eik ta inaku aria ta mare igiyagim eshudok douk shape shanagunukuk iri um esheshin baraen atin uwe, uwok. Eik yakri idukem esheshin dodog aria aih douk eshesh sharah aria shenek mour um shopunek. <sup>20</sup> Um maresh? Arpesh madae shiyagwreh baraen atin aria shuwish um agundok Iruhin nape Debeini um ananish arpesh um uwe, uwok. Eshesh douk Iruhin nutaurumesh sharao ananin dodog aria douk shawish. <sup>21</sup> Ipak pakri mumam?

Pakri eik isuhw gargit inaku iyep igabeyep o pakri eik urkum munawashamep aria inaku ikripep shokubur?

## 5

### *Ehudok Aih Um Shenek Wehrur Um Hape Um Eshesh Korin*

<sup>1</sup> Eik yemnek enen baraan um ehudok yoweih aih um shenek wehrur um hapeum ipak. Ehudok douk yoweih aih abom. Eshesh haiden douk madae shudukem Iruhin iri uwe douk madae shenekeh atih uwe ehudokmori aih. Ehudok aih douk ehudok. Anan arman nape nanasonuk ananik kwakabaran iri amakek douk ananin yakenik irohukwik. <sup>2</sup> Aria douk ipak pape patuk ipakish nyeiguhw shato iruhw aria pakri ipak yopipari abom padukemesh iri um maresh? Namudok uwok! Enyen douk wosik um ipak aparuh yoweruh aria pureh um anudok nenek ehudok yoweih aih um. Aria ipak pukripan um anan mare wata nunaki nini ipak pupe abudok nyutob ipak punak puntorum pupe um. <sup>3</sup> Adur eik arpen yapeik rougun um ipak, aria eikin mishin douk nyani ipak pape. Aria eik douk yenek skelimum anudok arman douk nenek ehudok aih iri kabi douk yani ipak mape atugun abom um aria yakri anan douk nenek yoweih aih abom. <sup>4</sup> Douk namudok aria eik yakri namudok. Ahudok nyumnah ipak puntorum pupe um Debeini Jisas ananin nyeigur um, eikim urkum ta mupe kabi douk yani ipak mape um. Aria ananin dodog ta nyuni ipak nyupe. <sup>5</sup> Aria ipak ta punemoguk anudok arman um nukutipukuk nunak nur Satan ananis wis. Ipak punekan namudok um Satan nubo ananihw yegenyihw aria nubo ananih yoweih aih abom nununuh wouwokuk. Aria shopunek, ipak punekan namudok um Iruhin ta wata nunarao anudok arman ananin mishin nyutanam nyupe wosik ahudok nyumnah Debeini nutanamori ahi.

*Eshesh Korin Ta Shishopok Anudok Nenek Yoweih Aih Iri Nupeik Aduk*

<sup>6</sup> Ipak pakri ipak atip yopipari abom padukemesh iri aria pape patuk ipakish nyeiguhw shato iruhw. Aria ehudok aih douk madae yopihi uwe. Ipak douk padukemesh enyudok wobuwobren baraan douk nyakrium yis douk senek bret takitak debet um. Baraan enyudok, "Anagun shokugun um yisigun apa senek ihitmorim bret takitak debeiti." <sup>7</sup> Aria ipak ta puwashakuk asudok yarisi yis um ipak putogur yopishi arpesh abom kabi douk namuti bret yis wokat iri um. Adur, eik douk yadukemesh, ipak douk pape yopishi arpesh kabi douk yis wokat iri bret um. Um maresh? Apakin sipsip douk shenek agundok debeiguni Pasovaigun worigun aria shaen shenek ofa umen shako Iruhin iri, enyen douk Krai. Eshesh douk shan nagok kabi douk shenek ofa um enen yopunyi sipsip shako Iruhin um. <sup>8</sup> Douk namudok aria apak ta munegabe apak kanak aria mupe munek garibog um muwok agundok debeiguni Pasovaigun worigun. Apak ta mukahuk agabus eneheneh apakih yoweih aih kabi douk arpesh apa shawashakuk yarisi yis aria shape shenek garibog um agundok debeiguni worigun um shuwok bret yis wokat um. Aria apak ta mugipesh yopihi aih huni adurin atinyi baraan.

<sup>9</sup> Eik yarik yenekap-umepagu iri shup, eik yakripep yakri, "Ipak mare punadudareh atin um eshudok douk shenek wehrur iri." <sup>10</sup> Eik douk madae ikri um pukutukuk eshudok abom um douk madae shusuhw Iruhin ananin baraan dodog shugipeshen iri uwe, aria douk shenek wehrur iri. O eshudok douk shenek nyigiyaum kupaishi esheshish eshudok eneshenesh iri. O eshudok douk shakwuaruh atih iri o eshudok douk shenek lotu um madae adurimi god omi iri uwe, uwok. Aria pakri pukutishukuk um, ipak ta pukutishuk agundok atap. <sup>11</sup> Aria baugenyum enyudok baraan eik yenyemagu iri douk namudok. Aria anan arman douk nakri ipak pahwaran wanin iri nunek ehudok yoweih aih um shenek wehrur um o nunek nyigiyaum nurao kupaishi esheshish eshudok eneshenesh o nunek lotu um madae adurimi god omi uwe o nabubunim kupaishi o nuwok abar

nugagak o nukwuaruh um, ipak mare puni anan punadudareh aria puni anan puwok worigun uwe, uwok.

12-13 Enyudok mour um shunek skelimum eshudok arpesh douk shapeik aduk um Iruhin ananish arpesh iri, enyen douk madae eikin mour uwe, uwok. Iruhin atun ta nunek skelimesh. Aria enyudok mour um shunek skelimum Iruhin ananish arpesh um douk ipakin. Namudok aria ipak ta punek skelimesh. "Aria ipak punak puntorum pupe um, ipak ta pukrip anudok yoweini arman um nukutipuk ba nunak."

## 6

### *Ipak Kristen Mare Punek Kwot Um Kupaishi Kristen*

<sup>1</sup> Aria ipak Kristen atip enen nyuni kupainyi punitok um enen baraen um, enyen ta nyenekesh mumam? Aria ta nyeshagrakuk Iruhin ananish arpesh douk ta wosik um shugabe ipakin baraen aria nyanak nyenek kwotumen um amudok debeimi haiden douk hasuhw kwotog iri aka? Aria enyen ta abraen mare nyen um agundok nyanak nyahwar amudok haiden um husuhw enyenyit kwot um uwe. <sup>2</sup> Adur atin ipak padukemesh um kweipon apak Iruhin ananish arpesh ta munek skelimum ihishmorim atapishi arpesh esheshih aih. Aria ta apak ta munekesh namudok um, douk ipak kanak douk mare ta wosik punek skelimum enyudok shokwinyi baraen uwe um maresh? <sup>3</sup> Ipak padukemesh aka, uwok? Kweipon apak ta munek skelimum enselahos esheshih aih shopunek. Douk namudok aria apak douk ta wosik munek skelimum baraen um enenyenen nyatogur abom agundok atap iri. <sup>4</sup> Douk namudok aria ipak pakri punek skelim baraen um enesh eshudok um, ipak apa pugraeh eshesh douk Iruhin ananish arpesh douk madae shurao enen big iri uwe um shunek skelimeny-umep. <sup>5</sup> Eik douk yowemagu enyudok baraen um yakri inekep abraen ipak. Ipak kanak ta madae anan nudukemesh abom um nupe orokohun um ipak Iruhin ananish arpesh

aria nunek skelimum kupaishi Kristen esheshin baraen uwe? <sup>6</sup> Aria douk enen Kristen douk nyarao kupainyi Kristen um kwot um amudok debeimi haiden douk hasuhw kwotog iri um hunek skelim um esheshin baraen!

<sup>7</sup> Adur, ipak apa penek kwot um kupaishi Kristen. Douk namudok aria ehudok ipakih aih douk heyabigap um ipak douk madae dodogowip um pugipesh Iruhin ananish aih uwe, uwok. Ipak pekehuguk agabus abom. Ipak douk madae pupe putrish meyoh aria shunek yoweishi inahos um ipak wobur atin uwe um maresh? Aria ipak douk madae pupe putrish meyoh aria pukutishuk shutrip shukumesh-aruh ipakish eshudok eneshenesh uwe um maresh? <sup>8</sup> Aria ipak madae punekesh namudok uwe, uwok. Ipak kanak wata pakitak penek yoweishi inahos um kupaishi ipakishi Kristen. Ipak penek rohwmesh panarukesh esheshish eshudok eneshenesh meyoh.

<sup>9-10</sup> Ipak padukemesh um enyudok aka, uwok? Eshudok arpesh douk shenek eneshenesh yoweishi inahos iri ta mare shuwish agundok Iruhin nape Debeini um ananish arpesh um, uwok. Douk namudok aria ipak mare punek rohwm um ipak kanak, uwok. Um maresh? Eshudok douk shenek ehudokmori yoweih aih um shani kupaishi arpesh shenek wehrur um, aria shenek lotu um madae adurimi god omi iri uwe, shuni amudok armam douk hanukesh kupaimi amamiyu armago iri, huni amudok douk hanukesh kupaimi armam um henek yoweishi inahos iri, huni eshudok douk shakwuaruh iri, shuni eshudok douk shenek nyigiya um shakri shurao kupaishi esheshish eshudok eneshenesh iri, shuni eshudok douk apa shawok abar shagugak iri, shuni eshudok douk apa sheneyagwreh agabusin um kupaishi iri, shuni eshudok douk apa shabo kupaishi shanatrish eshudok eneshenesh iri, ihishmorim eshudokmori arpesh ta mare shuwish agundok Iruhin nape Debeini um ananish arpesh um, uwok. <sup>11</sup> Riguk ipak enep douk pape penek ehudokmori yoweih aih. Aria Iruhin nakrup ipakiruh aparuh



aria nenekep patogur ananip atip aria nahwarep yopishi arpesh. Anan douk nenekep namudok um agundok ipak patukur Debeini Jisas Kraisa aria nataurumep um. Aria Iruhin douk nako ananin Mishin atin aria nenekep patogur namudok.

*Apakiruh Yegeshiweruh Ta Hupe Yopuruhi Um Mutuk Iruhin Ananin Atin Nyeigur Nyuto Iruhw*

<sup>12</sup> Adur, enen arpen douk nyakri namudok, “Ihishmorim eshudok douk wosik um eik inekesh.” Aria eshudok ihishmorim eik inekesh iri ta mare shutaurume, uwok. Enyudok baraden douk nyakri, “Ihishmorim eshudok douk wosik um eik inekesh iri” douk shape, aria eik ta mare ikutukuk enesh eshudok shupe debeishi-umari eik, uwok. <sup>13</sup> Aria enen arpen ta nyukri, “Aparuh douk worigun-iruh. Aria araruh douk hapeum worigun nubuh nur um.” Enyudok enyen douk adur, aria anah nyumnah Iruhin ta neyatokuk aparuh aria worigun. Iruhin douk madae nunek apakiruh yegeshiweruh um munek ehudok yoweih aih um muni kupaishi munek wehrur um uwe, uwok. Anan douk nenekep um punek ananin mour. Aria anan douk Debeini um apakiruh yegeshiweruh aria apa neyoharuh. <sup>14</sup> Iruhin douk nakwu ananin dodog aria wata nohur Debeini nakitak nape. Aria kweipon anan ta nuhur apak shopunek mukitak mupe. <sup>15</sup> Aria ipak madae pudukemesh uwe? Ipak douk pape anabik um Kraisa ananihw yegenyihw. Douk namudok aria ta eik irao anabik um Kraisa ananihw yegenyihw inak iko okwudok douk kweyotu yah iri okwokwihw yegenyihw um, enyen douk wosik aka, uwok? Adur atin, namudok douk uwok. <sup>16</sup> Aria ipak douk padukem enyudok aka, uwok? Ta anan arman nunak um onok armatok douk kweyotu yeh iri um, eshesh biyesh douk shatogur atin arpen. Um maresh? Iruhin ananik Buk douk kwakri, “Eshesh biyesh ta shutogur atin arpen.” <sup>17</sup> Aria enyudok arpen douk nyunak nyaturkur Debeini iri douk nyani anan esheshish mishish shatogur atin mishin meyoh.

<sup>18</sup> Aria ipak ta puruwok-umaguk ehudok yoweih aih um shenek wehrur um. Ihishmorim eneheneh yoweih aih arpesh shenekeh iri, eshesh douk shenekehuk adukiruh um esheshiruh yegeshiweruh. Aria enyudok arpen nyunek ehudok yoweih aih iri, enyen douk nyenek yoweishi inahos um enyeniyhw yegenyihw. <sup>19</sup> Aria ipak padukem enyudok aka, uwok? Ipak kanak douk pape kabi Iruhin ananin Mishin enyenit debeiti urupat um. Enyen douk Iruhin nekepen aria nyape numun ipak. Aria ipak douk madae pugrem ipak kanak uwe, uwok. Ipak douk Iruhin ananip atip. <sup>20</sup> Douk Iruhin natorip, anan nenek debeinyi mour. Douk namudok aria ipakiruh yegeshiweruh ta hupe um putuk Iruhin ananin atin nyeigur nyuto iruhw.

## 7

*Armam Armago Shanaraum Um*

<sup>1</sup> Douk eik yakri iwanam enyudok baraden douk ipak peneki shup porige iri um. Baraden enyudok. Aria anan arman mare nurao onok armatok nupe meyoh um, enyen douk wosik. <sup>2</sup> Aria sabaihi eneheneh yoweih aih um shenek wehrur um hape. Douk namudok aria enyen douk wosik um ihishmorim armam ta hunarao amamiyu armago sisiguk. Aria ihiyumorim armago ta unarao owowim armam sisiguk. <sup>3</sup> Aria arman ananihw yegenyihw douk ananik irohukwik kwasuhw merikw-umohw. Aria anan mare nunokrimohw, uwok. Aria armatok okwokwihw yegenyihw douk okwokwin raminen nasuhw merik-umohw. Aria okwok mare kwunokrimohw, uwok. <sup>4</sup> Irohukwik mare kwukri okwok kwasuhw merik um okwokwihw yegenyihw, uwok. Okwokwin raminen nasuhw merik-umohw. Aria raminen shopunek mare nukri anan nasuhw merik um ananihw yegenyihw, uwok. Ananihw yegenyihw douk ananik irohukwik kwasuhw merik-umohw. <sup>5</sup> Aria eshudok douk shanaraum iri, eshesh mare enen nyukri uwok um nyuni enen shishuh um. Aria ta eshesh shubo baraden aria shukri wosik um shupe meyoh anob nyutob um shupe shunek

beten atin um, namudok douk wosik. Aria abudok nyutob butuh aria eshesh wata shopunek shunak shishuh atugun. Um maresh? Ta wosik atin eshesh mare shusuhw merik um eshesh kanak aria Satan nukwiraehesh um shunek yoweishi inahos aria eshesh shunekesh. <sup>6</sup> Enyudok baraen douk yakriyen um arpesht shanaraum, enyen douk madae dodogowinyi lo douk ipak ta pugipeshen iri uwe, uwok. Enyen douk yakripep meyoh um yakri itaurumep. <sup>7</sup> Eik kanak yakri ipak ihipmorim mare ta panaraum. Eik yakri pupe meyoh kabi douk eik um. Aria Iruhin nekesh sisigin yopinyi presen ihishmorim arpesht. Enesh arpesht Iruhin nekesh enyudok presen um shupe meyoh. Aria enesh nekesh presen um shanaraum.

<sup>8</sup> Aria eshudok douk madae shanaraum iri uwe shani oudok armago douk armam hagok hawosopukuk iri, eik yakri namudok. Ta eshesh shupe meyoh kabi douk eik um, enyen douk wosik. <sup>9</sup> Aria ta eshesh mare dodogowish um shusuhw merik um eshesh kanak um, enyen douk wosik um eshesh ta shanaraum. Ta shupe meyoh um aria esheshiruh aparuh hukitak abom aria eshesh shenek wehrur um.

<sup>10</sup> Aria eshudok douk shanaraum iri, eik yekesh enyudok lo. Enyudok lo douk Debeini ananin, madae eikin uwe. Enyen douk nyakri namudok. Mare onok armatok kwukitak kwunak kwukutukuk okwokwin raminen, uwok. <sup>11</sup> Aria okwok kwukwutunuk um, okwok ta kwunak kwupe meyoh. Okwok mare kwurao kupaini arman, uwok. Uwok um, okwok ta wata kutanam kwunak um okwokwin raminen. Aria anan raminen shopunek mare niyatokuk ananik irohukwik, uwok.

<sup>12</sup> Aria ipak kupaipari, eik kanak yakri ikripep namudok. Enyudok baraen enyen douk madae Debeini ananin uwe, uwok. Eik yakri namudok. Aria anan arman natogur Kristen iri, douk narao onok armatok mare kutogur Kristen iri uwe, aria okwok kwukri wosik um kupeuman um, anan mare niyatok, uwok. <sup>13</sup> Aria ta onok armatok kwutogur Kristen iri, douk kwurao anan arman mare nutogur Kristen iri uwe, aria anan nukri wosik

um nini okwok shupe um, okwok mare kwiyatok anan, uwok. <sup>14</sup> Um maresh? Raminen douk madae nutogur Kristen iri uwe douk natukur ananik irohukwik douk kwatogur Kristen iri aria namudok anan natogur yopuni raminen kabi douk Iruhin nanagraehan iri um. Aria irohukwik douk madae kutogur Kristen iri uwe shopunek douk namudok atin. Okwok kwutukur okwokwin raminen douk natogur Kristen iri aria okwok kwatogur yopukwi irohukwik kabi douk Iruhin nanagraehok iri um. Uwok um, ipakish batowish ta mare shutogur Iruhin ananish, uwok. Aria uwok, douk eshesh douk shatogur Iruhin ananish atish arpesht kabi douk anan nanagraehesh iri um.

<sup>15</sup> Aria ta enyudok arpen douk madae nyutogur Kristen iri uwe nyukri nyukutukuk enyenyik armatok o enyenyin arman um, enyen wosik ta ko nyukutinyukuk. Aria ta ehudokmori aih hutogrum enyudok nyenek bilip iri arman o armatok um, enyen douk madae enen baraen nyutapesh uwe, uwok. Um maresh? Iruhin douk nahwarap um mugipesh ehudok aih um aparuh hur wosik um. <sup>16</sup> Armatok, nyak wosik ta nyutaurum nyakin raminen um Iruhin nuran nutanamori aka, uwok? Enyudok nyak madae nyudukemesh uwe. Aria nyak arman shopunek, nyak wosik ta nyutaurum nyakik irohukwik um Iruhin nuraok kwutanamori aka, uwok? Enyudok nyak madae nyudukemesh uwe.

### *Apak Ta Mupe Kabi Douk Riguk Marik Mape Aria Iruhin Nahwarap Abom Um*

<sup>17</sup> Aria eik yakri ikripep enen shopunek baraen. Eik yakri ipak ta pupe ipakiyu outumeb sisiguk kabi douk riguk Debeini nekepo iri. Aria pupe namudok atin kabi douk seiwok sago-matin ipak pape aria Iruhin nahwarep um. Eik apa yakripepsh yekesh enyudok atin lo ihishmorim Iruhin ananish arpesht douk shape ihinyumorim sios um ihirub warub iri. <sup>18</sup> Eik yakri namudok, anudok arman douk kupaini arman natahuk ananishw yegenyihw aria Iruhin kadak nahwaranari, anan mare

wata nugabe ananig nyubrusug um nun-abeshukog, uwok. Aria anudok arman douk madae nutah ananihw yegenyihw uwe, aria Iruhin nahwaran iri, anan mare ta nutah ananihw yegenyihw, uwok. <sup>19</sup> Ehudok aih um hatah yegeshiweruh um hani ehudok um madae hutah yegeshiweruh um uwe ta mare hunek enesh yoweishi inahos, uwok. Aria ehudok aih um mugipesh Iruhin ananin lo um douk yopihi abom heshagrakuk ehudok aih um hatah yegeshiweruh um hani agundok madae hutah yegeshiweruh um uwe. <sup>20</sup> Seiwok sagomatin ipak pape panakumo iri outumeb aria Iruhin nahwarep patogur Kristen um, ipak ta pupe namudok atin abom. <sup>21</sup> O aria ipak pape shakamum kupaishi penekumesh mour meyoh aria Iruhin nahwarep um, ipak aparuh mare yoweruh um enyudok, uwok. Aria ta ipak puparug anah yah um putukweshih pupe wosik abom um, ipak wosik ta pugipeshah. <sup>22</sup> Um maresh? Enyudok arpen douk nyape shakamum kupaishi nyenekumesh mour meyoh aria Debeini nahwaren iri, enyen douk anan nakweshihen nyape wosik. Aria enyen douk Debeini ananin atin abom. Aria douk namudok atin, enyudok arpen nyape wosik aria Debeini nahwaren iri, enyen douk nyape shakamum Kraish nyenekuman mour meyoh. <sup>23</sup> Iruhin douk nenek yopinyi dedeben atinyi mour um nator ipak nakweshih um ipakish yoweishi inahos douk showeshikep iri. Douk namudok aria ipak mare pugipesh agundok atapihi aih aria pukutihuk huweshikep pupe shakamum eheh, uwok. <sup>24</sup> O ipak Kristen. Ipak ta puni Iruhin pupe abom aria pupe ipakiyu outumeb sisiguk kabi douk sagomatin ipak pape aria Iruhin nahwarep um.

*Madae Shunaraum Uwe Iri Armam Armago Esheshin Baraen*

<sup>25</sup> Debeini douk madae nuke enen lo um eshudok arpeshep douk wata shunaraum iri uwe, uwok. Aria eik douk Debeini nenek gihaume aria yenek ananin mour wosik aria yakri ikripep enen eik kanak eikim urkum. Eik ta ikripep adurin

atin baraen. Douk namudok aria ipak gamo pumnek eikin baraen. <sup>26</sup> Douk abudok nyutob enenyenen amaen nyape nyatogur. Douk namudok aria eik yakri enyen douk wosik um ipak pupe namudok atin kabi douk papeum. <sup>27</sup> Aria anan arman narao onok armatok jurug um, anan mare wata niatok, uwok. O ta anan watak nurao onok armatok um uwe, anan mare urkum murum nukri nurao onok shopunek, uwok. <sup>28</sup> Aria ta anan nurao onok armatok nusuwok um, anan douk madae nunek yoweishi inahos uwe, uwok. Aria ta onok armatok douk wata kwape meyoh iri kwukri kwurao anan arman um, okwok douk madae kwunek yoweishi inahos uwe. Aria shanaraum iri arpeshep ta shurao sabainyi amaen agundok atap. Douk namudok aria eik yakri uwok um enyudokmori amaen nyutogur um ipak, uwok.

<sup>29</sup> O ipak Kristen, baugenyum baraen eik yakriyen iri douk enyudok. Douk nyutob douk banab. Douk namudok aria ipak armam douk pasuhw armago iri ta pupe kabi douk armago wokepari um. <sup>30</sup> Aria shoreh iri ta shupe kabi douk eshesh madae shureh um uwe. Aria shanadudareh iri ta shupe kabi douk eshesh madae shunadudareh um uwe. Aria eshudok douk shanator eshudok eneshenesh iri ta shupe kabi douk eshudok eneshenesh wokesh douk madae esheshish iri uwe. <sup>31</sup> Aria eshudok douk shakwu agundok atapishi eshudok shenek mour iri ta shupe kabi douk eshesh urkwip madae pur abom um agundok atapishi eshudok eneshenesh um uwe. Um maresh? Apak madukemesh, agundok atap nani eneshenesh eshudok douk shanaki hurukatin abom um shunak shuwishuk.

<sup>32</sup> Eik yakri uwok um eneshenesh eshudok shunek ipakiruh aparuh yoweruh, uwok. Arman douk madae nurao onok armatok iri uwe, ananim urkum apa morum nugipesh Debeini ananim urkum aria nunek ananin atin mour. <sup>33</sup> Aria arman douk narao armatok iri, ananim urkum apa morum agundok atapishi eshudok eneshenesh. Aria anan nakri nunek eshudok douk ananik irohukwik kwakriyesh iri um nunegok kwunadu-

dareh. <sup>34</sup> Douk namudok aria ananim urkum puwarom um biyeh. Aria onok armatok douk wata kwurao anan arman iri uwe, okwokwim urkum douk morum kwunek Debeini ananin atin mour. Okwokwim urkum morum kwakri kwukon okwok kanak um Debeini aria kwupe ananik atuk. Aria okwudok douk kworao arman iri, okwokwim urkum apa morum agundok atapishi eshudok eneshenesh. Okwok kwakri kwunek eshudok douk okwokwin raminen nakriyesh iri. <sup>35</sup> Eik douk yowemagu enyudok baraen um yakri itaurumep pupe wosik atin. Eik madae ikriyen um itupok-umep yah uwe, uwok. Eik yakripep enyudok baraen um ipak pupe wosik aria ipakip urkwip mare wata purum enesh kupaishi eshudok eneshenesh. Eik yakri ipak pukon ipak kanak abom um Debeini aria punek ananin atin mour.

<sup>36</sup> Aria shagraeh-uman onok armatok anan arman, aria eshesh biyesh shukri eshesh ta mare shunaraum aria shupe arigaha ruwehesh um, enyen douk wosik. Aria ta anan nunek urkum nukri anan douk nenek yoweishi inahos um okwok, aria ta anan mare dodogowin um nusuhw merikwum ananim urkum, aria anan nukri eshesh ta shunaraum, eshesh douk madae shunek yoweishi inahos uwe. Anan ta nugipesh ananim urkum aria eshesh shunaraum. <sup>37</sup> Aria ta anan arman anan kanak nukri uwok abom um nuraok shagraehok-uman iri armatok, aria mare enesh arpesh shuraok umanari um nuraok, aria anan nasuhw merik wosik shopunek um ananim urkum um, enyen douk wosik. Anan mare nuraok. <sup>38</sup> Douk namudok aria anudok arman douk nuraok ananik armatok douk shagraehok-uman iri um, anan douk nenek yopuhi aih. Aria anudok douk madae nuraok ananik armatok iri uwe, douk nenek yopuhi aih neshagrakuk anudok naraok armatok iri. 7:38

<sup>39</sup> Aria anan arman nuraok onok armatok aria anan wata nupe um, okwudok armatok ta kwupe um anudok atun arman. Aria ta anan nugokuk um, okwok douk madae enesh eshudok shutapok uwe, uwok. Aria kwukri kwurao kupaini

um, okwok wosik ta kuran. Aria okwok ta kwurao anan nasuhw Debeini ananin baraen iri. <sup>40</sup> Aria eik kanak yakri namudok. Aria okwok kwupe meyoh akure, okwok ta kwunadudareh kwuriguk kwishagrakuk oudok douk warao armam iri. Aria enyudok baraen douk eik kanak yakriyen. Eik yadukemesh um eik yarao Iruhin ananin Mishin nyapenye aria nyeyabige enyudok baraen.

## 8

*Warehosish Mahish Douk Shenek Ofamesh Shako Rohwimi Godomi Iri Kristen Mare Shushoh Uwe, Uwok.*

<sup>1</sup> Douk eik yakri ikripep um eshudok mahish douk shashoh shenek ofamesh shako rohwimi godomi douk madae adurimi iri uwe. Ipak pakri, “Apak ihishmorim douk madukemesh iri.” Enyudok enyen douk adur, aria enyudokmori saki apa nyakwaram ehudok aih um arpesh shatuk esheshish nyeiguhw shato iruhw um. Aria ta apak urkwip punawasham kupaishi arpesh um, ehudok aih ta hutaurum apak muni eshesh hunekap mutogur dodogowip um musuhw Kraais ananin baraen mugipeshen um. <sup>2</sup> Enyudok arpen douk nyakri enyen nyadukem eneshenesh eshudok iri, enyen douk madae gamo nyudukemesh uwe. <sup>3</sup> Aria enyudok arpen douk enyenyim urkum manawasham Iruhin iri, enyen douk Iruhin nadukemen wosik um enyen douk ananin.

<sup>4</sup> Aria enyudok baraen um shawok mahish douk shaesh shenek ofamesh um amudok rohwimi douk madae adurimi godomi iri uwe, eik yakri ikripep namudok. Apak madukemesh, amudok rohwimi douk madae adurimi godomi iri uwe, uwok. Anam douk wehiguhi aboriguh meyoh. Aria anam douk madae sabaimi godomi hupe uwe, uwok. Anan douk atun adurini Iruhin abom nape. 5-6 Adur, sabaishi eshudok douk arpesh shahwaresh shakri, “god” iri o shakri, “debeimi” iri. Aria ta adur sabaimi amudokmori “godomi” o sabaimi “debeimi” hupe iruhw heven o agundok atap

akure, amudokmori bukomuk. Apak douk atun meyoh Iruhin abom nape. Anan douk apak mahwaran makri Yain iri. Anan douk baugos um ihishmorim eneshenesh eshudok. Aria apak douk mape um mutuk ananin atin nyeigur abom nyuto iruhw. Aria anan atun douk Debeini. Anan douk Jisas Krai. Aria um Jisas ananin nyeigur atin, Iruhin nenek ihishmorim eneshenesh eshudok shani arpes. Aria um Jisas atun Iruhin norukap yapis aria mape.

<sup>7</sup> Aria enesh arpes madae shudukemesh uwe. Riguk enesh shape shagipesh amudok madae adurimi godomi iri uwe. Douk namudok aria douk eshesh shawok eshudok mahish douk shenek ofamesh shako rohwimi godomi iri um, eshesh shakri eshudok mahish douk warehosish abom aria eshesh shashoh. Aria numun esheship urkwip por shakri eshesh douk madae shudukemesh aria shenek yoweishi inahos um agundok shawok eshudok mahish um. <sup>8</sup> Aria eshudok worigun ta mare shurap punak hurukatin um Iruhin, uwok. Aria ta apak mukri uwok um muwok eshudokmori worigun um shopunek, Iruhin nutrup um ta mare nukri apak yoweipari, uwok. O aria mishakur um shopunek, Iruhin ta nutrip aria mare nukri apak ta mutogur yopipari mishagrakuk seiwok marik mape um, uwok.

<sup>9</sup> Aria ipak ta gamo wosik pudukemesh. Um mares? Ta wosik atin ehudok aih um puwok warehosish eshudok worigun um douk ipak pakri wosik um punekeh iri hunek eshudok douk shagipesh Krai aria madae dodogowish iri uwe shenek yoweishi inahos. <sup>10</sup> Nyak nyadukemesh um amudok rohwim douk madae adurimi uwe. Aria nyak nyunak agehw aria nyuwok eshudok warehosish. Aria ta enen arpen douk madae dodogowin um bilip iri uwe nyutrin um, enyen ta nyunekesh mumam? Nyak ta nyuhur enenyihw apahw um nyuwok eshudok douk shako warehos iri aka, uwok? Adur atin, enyen ta nyushoh. <sup>11</sup> Douk namudok aria nyak douk nyadukemesh um amudok rohwim douk madae adurimi uwe. Aria nyakin saki ta nyununu

enyudok arpen douk madae nyusuhw Krai ananin baraen dodog iri uwe um enenyin bilip. Enyen douk Krai nataurumen iri. <sup>12</sup> Aria abudok nyutob ipak pawok eshudok warehosish obi nyutob, ipak penekesh shenek yoweishi inahos aria pununu esheshin bilip um Krai. Aria ipak penek yoweishi inahos um Krai shopunek. Um mares? Enesh ipakish ashukenyish owashish esheship urkwip douk madae dodogowip uwe. Aria abudok nyutob eshesh shutik ipak aria shuwok eshudok warehosish um, eshesh douk shenek urkwip shukri eshesh shenek yoweishi inahos um. <sup>13</sup> Douk namudok aria ta worigun aria mahish eik yashoh iri shunek kupainyi Kristen nyunek yoweishi inahos um, kweipon kweipon eik ta mare wata ishoh atin mahish. Ta wosik atin inek enyudok Kristen douk mare dodogowin um bilip iri uwe nyunek yoweishi inahos.

## 9

*Pol Nanadudareh Um Anan Madae Nurae Enesh Eshudok Eneshenesh Uwe Um Enyudok Mour Aposel Anan Neneken Iri*

<sup>1</sup> Eik ta enesh eshudok eneshenesh showeshike aka, yape meyoh? Uwok, eik yape meyoh. Aria eik douk anan aposel douk Iruhin nagraehe um inak ikripesh ananin baraen iri aka, uwok? Eik yatik Jisas douk nape apakin Debeini iri aka, uwok? Eik yenek Debeini ananin mour aria ipak douk patogur Kristen aka, uwok? <sup>2</sup> Aria enesh arpes shukri eik madae anan aposel um uwe, adur atin ipak ta pukri eik douk anan aposel. Eik douk yanaku yakripep Debeini ananin baraen aria ipak pasuhwen dodog pagipeshen aria patukur anan. Aria douk um enyudok atin, ihishmorim arpes shatrip aria shadukemesh shakri eik douk anan aposel.

<sup>3</sup> Aria arpes sheneke um, eik apa yawanamesh baraen yakripesh namudok. <sup>4</sup> Yakri, enyen douk wosik um apak aposel murao worigun um mour apak moneken iri aka, uwok? <sup>5</sup> Enyen douk wosik um apak aposel murao Kristenyu armago aria wuni apak murahaen kabi

douk amudok anam aposel hani Debeini ananim owarhim hani Pita sharahaen um aka, uwok? <sup>6</sup> Aria enyen douk wosik um eik ini Barnabas ohwak otuhw upe unek mour um urim utabor, aria kupaimi aposel ipak kanak pupe putaurumam pukom utabor um aka?

<sup>7</sup> Meini arman apa nenek mour sol-dia aria anan kanak nanator ananish eneshenesh eshudok? Aria omi apa nyau worigun nubarig aria enyen kanak madae nyuwok enesh eshudok worigun uwe? O omi apa nyanak nyeyoh bulmakauhos aria enyen kanak madae nyuwok anaguhw esheshiguhw nyumaguhw uwe?

<sup>8</sup> Enyudok eik yagipesh arpeship urkwip atip aria yakri namudok aka? Uwok. Enyudok lo douk seiwok Iruhin nakoguk Moses enyi douk nyakri enyudok atin. <sup>9</sup> Iruhin douk nakrip Moses nowem enyudok lo namudok. Iruhin nakri, "Ipak mare puweshik eshudok bulmakauhos douk shape sheshish shuruwepit wit um shuworish oureh aria esheshig nokwatog, uwok." Aria Iruhin douk madae urkum murum bulmakauhos atish aria anan nukri namudok uwe, uwok. <sup>10</sup> Anan douk urkum morum apak shopunek aria nakri namudok. Adur, baugenyum enyudok baraen douk nyakrium apak. Enyudok baraen nyakri namudok. Enyudok arpen nyunek mour um nyuwor amnab iri, nyuni enyudok douk nyaworuk oureh um worigun iri, eshesh ta shudukemesh um eshesh ta shurao anagun worigun um douk eshesh shenek mourumagun iri. <sup>11</sup> Aria apak aposel douk namudok atin. Apak maumep yopishi eshudok douk Iruhin ananin Mishin nyekepesih iri um ipakiruh aparuh. Douk namudok aria ta ipak pukop eshudok um putaurum apakiruh yegeshiweruh um, enyen douk wosik aka, uwok? <sup>12</sup> Aria ta ipak pekesh eshudok kupaishi arpesh douk shakripep Iruhin ananin yopinyi baraen iri um, adur atin, enyen douk wosik abom um pukop ipakish eshudok eneshenesh apak shopunek.

Aria eshudok douk apak wosik ta munatripesih iri, apak mare munatripesih

uwe. Seiwok sagomatin apak manaku matogrumep um, aria manaki arigaha douk, apak makri uwok um mutapok yah um Kraisi ananin yopinyi baraen nyutogur dodogowin um, uwok. Douk namudok aria apak masah ihinyumorim enenyenen amaen. <sup>13</sup> Ipak padukemesh, amudok armam douk henek mour numun Iruhin ananit debeiti urupat iri apa harao tukwanigun worigun douk sharaesh um shenek ofamesh shako Iruhin iri. Aria amudok henek mour enyudok alta douk shape showem eneshenesh eshudok shenek ofamesh shako Iruhin iri, amam apa harao tukwanish um eshudok. <sup>14</sup> Aria douk namudok atin. Debeini douk nenek enyudok lo nakri namudok. Amudok armam douk hape henek mour um hakripesh ananin yopinyi baraen iri, eshudok douk shemneken shasuhwen iri ta shukom eneshenesh eshudok um shutaurum amamiruh yegeshiweruh.

<sup>15</sup> Eik douk Iruhin neke big um irao enesh eshudok aria madae irao enesh eshudok eneshenesh uwe. Aria douk shopunek, eik douk madae iwem enyudok baraen um ikri ipak puke enesh eshudok eneshenesh eik uwe, uwok. Eik douk yanadadareh um agundok yenek Iruhin ananin mour yataurumep meyoh aria madae irao enesh eshudok eneshenesh um uwe. Douk namudok aria eik yakri uwok um enen arpen nyutriweik agundok eik yanadadareh aria yatuk eikin nyeigur um enyudok mour eik yeneken meyoh iri um, uwok. Aria enen arpen nyukri nyutriweik agundok yatuk eikin nyeigur um, eik yakri uwok abom. Enyen douk wosik um eik igokuk aria ta meyoh. <sup>16</sup> Aria eik douk madae ituk eikin nyeigur nyuto iruhw um agundok yakripesh Iruhin ananin yopinyi baraen um uwe, uwok. Eik douk yah uwok um iweshik eikit nokwat um mare inak ikripesh um. Enyen douk Iruhin neshopoke um inak ikripesh ananin yopinyi baraen. Douk namudok aria eik ta inak ikripesh. Aria ta eik mare ikripesh um, anan ta nuke debeinyi amaen. <sup>17</sup> Aria ta eik kanak inek enyudok Iruhin ananin mour akure, eik ta irao enesh yopishi eshudok eneshenesh

um enyudok mour. Aria uwok. Enyen douk Iruhin kanak nekeyen aria yeneken. <sup>18</sup> Douk namudok aria eik ta irao maresh um enyudok mour eik yeneken iri? Yopishi eshudok eik iraesh iri douk eshudok. Eik yakripesh Iruhin ananin yopinyi baraan um, eik yakripeshen meyoh. Eik madae ikripesh um shuke eneshenesh eshudok uwe, uwok. Eshudok douk Iruhin nakri wosik um eik iraesh um enyudok mour eik yeneken iri douk madae iraesh uwe.

*Pol Nape Shakamum Ihishmorim Arpesh Um Nutaurumesh*

<sup>19</sup> Eik douk madae ipe shakamum enen arpen inekumen mour meyoh uwe, uwok. Eik yape wosik. Aria eik kanak yape shakamum ihishmorim arpesh yenekumesh mour um yakri ikwiraeh um irao sabaishi arpesh abom shutanamori shunak um Iruhin. <sup>20</sup> Douk namudok aria eik yani eshesh Juda mape um, eik yatogur kabi anan Juda um. Eik yenekesh namudok um yakri iraouri enesh Juda shutanamori shunak um Iruhin. Aria yani eshudok douk shape shakamum Iruhin ananin lo shagipeshen iri mape um, eik yape kabi douk yape shakamum enyudok lo iri um yakri irao enesh eshudok arpesh shagipesh enyudok lo iri shutanamori shunakum Iruhin. <sup>21</sup> Aria yani eshudok douk madae shudukem Iruhin iri uwe mape um, eik madae igipesh enyudok lo kabi douk eshesh um uwe. Eik yenekesh namudok um yakri irao enesh eshudok arpesh shutanamori shunak um Iruhin. Aria eik yenekesh namudok um, eik douk madae ikenyuk agab enyudok lo inek yoweishi inahos uwe, uwok. Eik douk yape shakamum Kraiss ananin lo yagipeshen. <sup>22</sup> Aria yani eshudok douk madae dodogowish um shusuhw Kraiss ananin baraan dodog shugipeshen iri uwe mape um, eik yape kabi eshesh um yakri inekesh shusuhw Kraiss ananin baraan dodog shugipeshen. Eik yagipesh ihishmorim arpesh esheshih aih um yakri ikwiraeh ihishmorim yeh um irao enesh shatanam shunak um Iruhin. <sup>23</sup> Eik yenek enyudok ihinyumori mour um yakri sabaishi arpesh

shumnek Iruhin ananin yopinyi baraan aria shugipeshen. Aria kweipon, eik ini eshudok arpesh douk shasuhw enyudok yopinyi baraan shagipeshen iri murao yopishi eneshenesh eshudok douk ananin yopinyi baraan nyakriyesh iri.

*Apak Mahur Dodogowip Atup Um Murao Yopishi Eshudok Eneshenesh*

<sup>24</sup> Ipak padukem enyudok aka, uwok? Arpesh shahur iri douk ihishmorim shahur, aria atin meyoh nyarao prais. Douk namudok aria ipak ta pahur dodogowip atip um purao enyudok prais. <sup>25</sup> Eshudok ihishmorim arpesh douk shukri shahur shishagrakuk kupaishi iri, ihih nyumneh eshesh apa shenek debeinyi mour abom um shenek lainum esheshiruh yegeshiweruh. Eshesh douk shenekesh namudok um shurao asudok prais douk ta yowes aria supeimesh banab nyutob meyoh iri. Aria apak douk mahur um murao yopinyi prais douk ta nyupemap um ihih nyumneh iri. <sup>26</sup> Douk namudok aria eik yahur, aria eik madae iyahur meyoh um inak itogur anagun um rohwi yah uwe, uwok. Eikis nabes satak sapeigu mak abom aria yahur dodogoiwe atuwe um yakri ishagrakuk ihishmorim arpesh. Aria eik yape kabi anan arman douk nenek boksen iri um. Eik madae iwashak eikish roguhwan shanak meyoh uwe, uwok. <sup>27</sup> Eik yabo eikihw yegenyihw debeg atin um inekohw hwugipesh eikim urkum. Um maresh? Ta wosik atin um eik ikripesh Iruhin ananin yopinyi baraan kupaishi arpesh aria eik kanak ta Debeini nukri uwokume um aria mare irao yopinyi prais.

## 10

*Ta Yoweih Aih Hutogrumap Aria Mutu Munek Yoweishi Inahos*

<sup>1</sup> O ipak eikish arpesh, eik yakri ipak ta pudukem enyudok. Seiwok ihishmorim apakish popehesh yamehesh eshesh Israel shape shakamum ogwudok orug douk gwape gwarik-umesh um yah iri. Aria eshesh shagim amnab shanak shabrig ogwudok debeigwi youg nyeiguri um Owishiborigwi

Youg. <sup>2</sup> Eshesh shagipesh Moses aria shawish shanak ogwudok orug gwoshi-garish gwani youg aria shagipesh ananin baraen shani anan shasuhw atum urkum. Aria enyen kabi douk shenek bap-taisum. <sup>3-4</sup> Aria ihishmorim shawok agundok worigun iri abrudok abar douk Iruhin nekeshesh iri. Abrudok abar douk batograri amudok debeimi utom burbuduk douk Iruhin nekesham aria manamesh shanak iri. Okwudok burbuduk douk Kraish. <sup>5</sup> Aria sabaishi eshudok arpes, Iruhin nakri uwok um esheshih aih aria juwehosin abom nekesh agab aria naesh shagok. Anan naesh shagok aria esheshiruh yegeshiweruh hakus hanakuk agundok wehigunum arpes uwok um.

<sup>6</sup> Aria eshudok ihishmorim douk shatogurum shakripap yopinyi dodogowinyi baraen apak doukipari um apak mishish mare shikitak um munek yoweishi inahos kabi douk seiwok eshesh shenekesh um, uwok. <sup>7</sup> Aria eshudok douk shakripap um apak mare munek lotu um amudok madae adurimi god omi uwe kabi douk seiwok eshesh enesh shagipesham um. Iruhin ananik Buk douk kwakri um eshesh kwakri namudok,

“Eshesh shape shawok worigun abar aria shakitak shape sheyarub aria shenek eneshenesh yoweishi inahos shenek wehrur um.” <sup>8</sup> Aria apak shopunek mare munek yoweishi inahos monek wehrur um kabi douk seiwok eshesh enesh shenekesh um. Aria atuh nyumnah, sabaishi 23, 000-poreish shagok aria shanak shawishuk abom. <sup>9</sup> Aria apak mare mukwiraeh Debeini kabi douk seiwok enesh shakwiraehan aria yuguwh hwaesh shagok um. <sup>10</sup> Aria apak mare munumogesh aria munek prukpan um Iruhin kabi douk seiwok enesh shenekesh um aria enyudok ensel douk nyabo arpes shagok iri nyaesh shagok aria shanak shawishuk abom um.

<sup>11</sup> Enyudok ihinyumorim nyatogur um eshesh iri douk nyape kabi enen kak um kupaishi arpes shutrin aria mare shunek yoweishi inahos. Aria enyudok baraen douk nyakrium ehudok aih aria shopunek douk shenyem nyetem

Iruhin ananik Buk. Enyudok baraen shopunek douk shenyem um nyukripap dodogowinyi baraen apak doukipari um gamo mumnek um apak mare mugipesh esheshih yoweih aih. Apak douk man-aki jurug hurukatin um abudok nyutob um ahudok hugiguk iri nyumnah hutogur. <sup>12</sup> Douk namudok aria enyudok arpen douk nyukri enyen nyeyotu dodog iri, enyen ta gamo nyudukemesh um ta wosik atin enyen nyutu nyunek yoweishi inahos. <sup>13</sup> Ihinyumorim kwiraeh douk nyatogur um ipak iri douk madae enen kupainyi uwe, uwok. Enyudokmori atin kwiraeh shopunek apa nyatogur um ihishmorim arpes. Aria Iruhin apa nagipeshen wosik ananin adurin atinyi baraen um nakri ta nutaurumep aria ta mare nukutupukuk um enen kwiraeh nyunek uhwin um ipakin dodog, uwok. Abudok nyutob kwiraeh nyutogur-umep obi nyutob, Iruhin ta nutaurumep nunekumep anah yah um pishagrakuk enyudok kwiraeh. Ahudok yah douk namudok. Anan ta nutaurumep nunekep piyotu dodogowip.

*Apak Munek Lotu Um Yain Iruhin Atun Aria Mare Mugipesh Warehos Shuni Madae Adurimi god Omi Uwe Shopunek*

<sup>14</sup> Douk namudok aria ipak eikish Iruhin ananish arpes douk eik urkum manawashamep iri. Ipak ta pukomuk agabus aria mare pugipesh amudok madae adurimi god omi uwe. <sup>15</sup> Ipak douk padukemesh iri arpes. Douk namudok aria ipak putik enyudok eik yenyemagu iri baraen punek skelumen. Aria ipak kanak ta pudukemesh um eikin baraen douk adurin atin. <sup>16</sup> Apak manadudareh um Iruhin um abrudok wainibar abar borap iri kap aria mabaroh um, ababar douk benekap mani Kraish douk ananibor owishibor batorumap iri mape atugun aria masuhw atum urkum. Aria apak mawor atudok bret matoh um, atat douk tenekap mani Kraish ananihw yegenyihw aria anan douk nagok um nataurumap aria mape atug barag. <sup>17</sup> Aria douk atut bret apak sabaipari matogur atin arpen. Um



maresh? Apak ihishmorim douk mawok atudok atut bret.

<sup>18</sup> Aria ipak urkwip purum eshesh Israel shenekeh iri aih. Eshudok arpeshe douk shawok eshudok mahish aria worigun douk sheshem tebol shenek ofamesh shako Iruhin iri douk shani Iruhin shashuw atum urkum aria shenek lotuman. <sup>19</sup> Aria eik yakri mumam? Eshudok mahish aria worigun douk shenek ofamesh shako madae adurimi god omi iri uwe iri douk arpeshe meyoh shenekam iri douk adurigun worigun o eshudok warehos douk adurishi? Eik yakri namudok aka, uwok? <sup>20</sup> Uwok. Eik douk yakri namudok. Eshudok douk arpeshe madae shudukem Iruhin iri uwe shenek ofamesh shako rohwomi god iri, eshudok douk madae shenek ofamesh shuko Iruhin uwe, uwok. Aria eik yakri uwok um ipak puni amudok henek rohw iri pusuhw atum urkum. <sup>21</sup> Ipak madae wosik um punek lotu um Debeini puwok wainibar abar ananin koutukwi iri, aria wata shopunek puwok papudok douk shenek ofamabor shako rohwomi god iri shopunek uwe, uwok. Ipak madae wosik um puni Debeini pupe atug barag atum urkum aria puwok ananigun worigun, aria wata shopunek punak puwok eshudok douk shenek ofamesh shako rohwim iri god omi uwe, uwok. <sup>22</sup> Apak makri munek Debeini juwehosin um apak aka, uwok? O apak douk dodogowip abom meshagrakuk anan aka, uwok?

*Apak Ta Mupe um Mutuk Iruhin Ananin Atin Nyeigur Nyuto Iruhw*

<sup>23</sup> Enesh shakri namudok, “Enyen douk wosik um munek ihishmorim enesh-enesh eshudok.” Enyudok enyen douk adur, aria ihishmorim eshudok ta mare shutaur-umap. Aria eshesh shakri, “Enyen douk wosik um munek ihishmorim eneshenesh eshudok.” Aria eshudok ta mare shutaurumap shunekap mutogur dodogowip um musuhw Kraiss ananin baraen dodog mugipeshen um. <sup>24</sup> Aria ipak mare urkwip purum pakri punagabe ipak atip um ipak pupe wosik, uwok. Ipak ta urkwip purum putaurum kupaishi shopunek.

<sup>25</sup> Mahish douk shatorish maket iri, eshudok wosik putorish aria pishoh. Ipak mare punek urkwip aria punasorik um, uwok. <sup>26</sup> Um maresh? Iruhin ananik Buk kwakri, “Agundok atap pani ihishmorim eshudok shani annab, eshesh douk Debeini ananish atish.”

<sup>27</sup> Aria ta enen arpen douk madae nyusuhw Kraiss ananin baraen iri uwe nyukri nyuhwar-umep um punak puni enen puwok worigun iri mahish, aria ipak mishish shikitak punak um, ipak ta punak. Punak aria eshudok worigun eshesh shunekeshumep iri, eshudok ipak ta pishoh. Ipak mare punek urkwip aria porig, uwok. <sup>28</sup> Aria ta enen arpen nyukripep nyukri, “Eshudok mahish douk shaesh shenek ofamesh um henek rohw iri god omi” iri um, ipak mare pishoh, uwok. Ipak punek urkum um enyudok arpen douk nyakripep iri nyuni eshudok enesh arpeshe esheship urkwip. Ta ipak pishoh aria eshesh shugipeshep shishoh aria esheship urkwip pur shukri eshesh shenek yoweishi inahos. <sup>29</sup> Eik douk madae ikri um ipakip urkwip uwe. Eik yakri um enyudok arpen douk nyakripep um eshudok mahish shani worigun iri enyenyim urkum. Aria enen arpen ta nyukri, “Eik yape meyoh. Douk namudok aria enyudok arpen douk enyenyim urkum madae dodogowim iri uwe ta nyuneke aria mare iwok eshudok worigun aria mahish um maresh? Eik ta ishoh. <sup>30</sup> Aria eik inadudareh inek tenkyu um Iruhin um eshudok worigun iri mahish aria ishoh um, kupaishi arpeshe douk shenek prukpanume um maresh? Ehudokmori aih eik yakri uwok-umeh.”

<sup>31</sup> Douk namudok aria baugenyum enyudok baraen douk namudok. Aria ipak puwok worigun aria mahish o abar o punek maresh um, ipak ta punekesh um putuk Iruhin ananin atin nyeigur nyuto iruhw. <sup>32</sup> Ipak ta punek urkum um ihishmorim arpeshe. Eshesh Juda shuni eshudok douk madae shudukem Iruhin iri uwe, shuni Iruhin ananish arpeshe douk shashuw ananin baraen shagipeshen iri. Eshudok ihishmorim arpeshe ipak madae punek anah aih um

punek enen um eshesh shunek yoweishi inahos, uwok. <sup>33</sup> Aria eik shopunek douk namudok atin. Eneshenesh eik yenekesh iri, eik apa yenekesh um yakri itaurum ihishmorim arpes. Eik madae inek urkum um ikri itaurum eik atuwe uwe, uwok. Eik yeneken um yataurum ihishmorim arpes um Iruhin wata nuraesh shutanamori shupe wosik abom.

## 11

<sup>1</sup> Ipak ta pugipesh eikih aih kabi douk eik yagipesh Krai anan um.

### *Sheshigor Baragos Shenek Lotu Um*

<sup>2</sup> Ihih nyumneh ipak urkwip porum eik aria pasuhwen dodog pagipesh eikin baran douk yakriepen iri. Douk namudok aria douk eik yanadudareh-umep aria yatuk ipakish nyeiguhw shato iruhw.

<sup>3</sup> Aria douk eik yakri ipak ta pudukem enyudok baran um abudok nyutob ipak punak pupe punek lotu obi nyutob. Baran enyudok. Krai ananin Debeini douk Iruhin. Aria ihm-morim armam amamin Debeini douk Krai, aria armatok okwokwin debeini douk okwokwin arman. <sup>4</sup> Douk namudok aria ta meini arman nishigor ananig barag aria nunek beten o nukriפש enen baran douk Iruhin ananin Mishin nyakripan-enyi um, anan douk naunih Krai ananin nyeigur nyabuh. <sup>5</sup> Aria ta meikwi armatok madae kwishigor okwokwig barag aria kwunek beten o kwukriפש enen baran douk Iruhin ananin Mishin nyakriפש-enyi um, okwok douk kwaunih okwokwin arman ananin nyeigur nyabuh. Okwok kwenekesh namudok aria okwok abraen nyapeyok kabi douk kwowar okwokwig barag um. <sup>6</sup> Aria ta armatok madae kwishigor barag um, okwok ta kwurupog banag. Aria armago apa abraen nyao um urpok baragos banagos o wohwaragos um. Douk namudok aria owo ta wishigorgos. <sup>7</sup> Aria armam mare hishigor amamigos baragos, uwok. Um mares? Amam douk heyabigesh um agundok Iruhin dodogowin natrugun abom um. Aria armago douk weyabigesh agundok armam dodogowim hatrugun abom um.

<sup>8</sup> Um mares? Seiwok Iruhin madae nurae anagun um armatokihw yegenyihw aria nunek arman uwe, uwok. Anan nurae anagun um armanihw yegenyihw aria nenek armatok. <sup>9</sup> Aria shopunek, Iruhin douk madae urkum murum armatok aria nunek arman um nutaurumok uwe, uwok. Anan urkum morum arman aria nenek armatok um kwutauruman. <sup>10</sup> Douk namudok aria ipak pupe punek lotu obi nyutob, armago ta wishigor baragos. Owo wishigorgos um eshudok Iruhin ananish yopishi enselahos douk shani ipak shape iri shutik aria shukri wosik, owo douk wape shakamum owowim armam.

<sup>11</sup> Apak douk manokrop-umum apakin Debeini aria mape shakamum anan. Aria armatok okwok otuk ta mare kwupe okwok otuk. Aria arman atun um, anan shopunek ta mare nupe anan atun, uwok. Eshesh biyesh arman nutaurum okwok aria armatok kwutaurum anan aria douk shape. <sup>12</sup> Iruhin douk nurae anagun um arman ananihw yegenyihw aria nenek armatok. Aria douk namudok atin, anan nenek armam aria armago aria armago wobuki armam. Aria Iruhin douk baugos um arpes shani ihishmorim eneshenesh.

<sup>13</sup> Ipak kanak punenek skelimum enyudok baran um ipak kanak. Ahudok aih um armago madae wishigor owowigos baragos aria unek beten um Iruhin um, enyen douk madae yopihi aih uwe. <sup>14</sup> Aria apak arpes apakin saki douk nyeyabigep namudok. Enyen douk madae wosik um armam amamigos baragos sutogur debegos um uwe, uwok. <sup>15</sup> Aria ta armago owowigos baragos sutogur rougos um, agagos douk seneko watogur watrugun yopuhi. Um mares? Iruhin anan kanak nako rougosi baragos um wishigor owowigos baragos. <sup>16</sup> Aria ta enen arpen nyukri uwok um nyugipesh enyudok baran um, enyen ta nyudukemesh um apak douk madae mugipeshuk enen kupaihi aihin uwe, uwok. Apak douk magipesh ehudok atih aih douk ihishmorim Iruhin ananish arpes shape ihirub sisigirub ihirub-morim warub shagipeshen iri.

*Eshesh Korin Shawok Debeini Ananigun Worigun Komunio Aria Shanunugun*

<sup>17</sup> Douk eik yakri ikripep enen dodogowinyi barae. Aria eik ta mare ituk ipakish nyeiguhw shuto iruhw, uwok. Um maresh? Abudok nyutob ipak panak pape penek lotu aria penekkeh iri aih douk madae hataurumep atin uwe, uwok. Eheh apa henekep pape yowep. <sup>18</sup> Sagomatin eik yakri ikriyen iri um enyudok. Abudok nyutob ipak Iruhin ananish arpeshe panak pape penek lotu obi nyutob, ipak apa pape um pakri punasiyaum atin. Aria eik yemnek barae um ipak penekesh namudok um aria yakri douk adur. <sup>19</sup> Adur, ipak ta punasiyam um eshudok arpeshe douk shagipesh adur aih iri ta hunowereh hutogur yopugunum. <sup>20</sup> Douk namudok aria worigun ipak pasuwogun panak abudok nyutob panak penek lotu obi nyutob douk madae Debeini ananigun uwe. <sup>21</sup> Umum maresh? Ipak ihipmorim atin atin apa penekesh arigas pohur ipakigun worigun pagnoh. Ipak madae pishukabar um kupaishi arpeshe ba pukesh anagun worigun uwe. Douk namudok aria enesh nyurub baesh shape, aria kupaishi shawok sabaibari wainibar abar aria shagugak. <sup>22</sup> Aria ipak urusag wokep um pupe puwok worigun aria abar um aka? O ipak panabukeshuk arigos Iruhin ananish arpeshe pakri eshesh yoweishi aria ipak madae pukesh anagun worigun eshudok worigun wokeshi uwe aria penekesh abraen? Eik ikripep maren barae? Aka pakri eik ta ituk ipakish nyeiguhw um ehudok aih ipak penekkeh iri? Adur atin enyudok ta uwok.

*Debeini Jisas Nakom Bret Aria Wainibar Abar Ananim Disaipel*

(Matyu 26:26-29; Mak 14:22-25; Luk 22:14-20)

<sup>23</sup> Enyudok barae eik yakripepen iri, enyen douk Debeini anan kanak nekeyen iri. Barae douk enyudok. Abudok wab Judas neyabig Jisas ananim horim um Jisas obi nyutob, Debeini Jisas nohur bret <sup>24</sup> nenek tenkyu um Iruhin aria naworut nakrip ananim disaipel nakri, "Atudok

bret douk eikihw yegenyihw, eik douk yekepohw um itaurumep. Aria meibi nyutob ipak puwok abrudok abar um, ipak ta punekesh um urkwip purum eik. Ipak ta pupe punekesh namudok um urkwip purum eik." <sup>25</sup> Douk amam hatoh heyatat aria anan nohur kap wainibar abar barop iri aria nenekesh namudok atin aria nakri, "Abrudok abar douk eikin namunyi dodogowinyi barae kontrak. Eikibor owishibor douk ta butourak um butor ipak aria ta bunek enyudok kontrak nyutogur dodogowin. Aria abudok nyutob ipak puwok abrudok abar um, ipak ta punekesh um urkwip purum eik."

<sup>26</sup> Aria abudok nyutob ipak puwok atudok bret aria puwok abar bor apudok kap iri um, ipak punekesh um piyabigesh um agundok Debeini nagok um. Aria ipak pupe punekesh namudok atin arigaha punak putogrum ahudok nyumnah anan nutanamori ahi.

*Apak Ta Munek Skelim Um Apakip Urkwip Iyoh Aria Kadak Murao Debeini Ananigun Worigun*

<sup>27</sup> Douk namudok aria enen arpen enyenyim urkum madae mur wosik uwe aria nyuwok Debeini ananigun worigun, atudok bret tuni abar meyoh um, enyen douk nyenek yoweishi inahos um Debeini ananihw yegenyihw hwani ananibor owishibor. Aria enyen douk barae nyapenyen um nyenek eshudok yoweishi inahos um. <sup>28</sup> Aria sagomatin, arpen ta nyunek skelimum enyenyim urkum ba iyoh aria kadak nyuwok atudok bret tuni abrudok abar. <sup>29</sup> Um maresh? Enyen ta mare nyudukem baugenyum barae um Debeini ananihw yegenyihw abudok nyutob enyen nyuwok atudok bret tuni abrudok abar obi nyutob um, agundok douk enyen kanak nyenek yoweishi aih aria nyenek kwot um enyen kanak. <sup>30</sup> Aria ipak douk penekesh namudok aria sabaipari madae dodogowipari uwe. Aria sabaipari arugeh hapeyep aria enesh shagok. <sup>31</sup> Aria sagomatin apak munek skelimum apak kanak wosik akure, Debeini ta nunek skelimap aria mare nutik enen barae nyupenyap,

uwok. <sup>32</sup> Aria Debeini nunek skelimum apakih aih aria nugabeyap um, anan douk nenekap namudok um nunekap mutogur yopishi arpesih um kweipon apak mare muni agundok atapishi arpesih munak muwishuk, uwok.

<sup>33</sup> Douk namudok aria ipak eikish arpesih, abudok nyutob ipak punak pupe um puwok Debeini ananigun worigun obi nyutob, ipak ta pishukabar um kupaishi shopunek. <sup>34</sup> Aria enen arpen nyurub ben um, enyen ta nyishoh enyenyit urupat. Aria abudok nyutob ipak punak pupe punek lotu um ipak ta mare punek enesh yoweishi inahos. Aria Debeini nunek skelimep um, anan ta mare nutik enen baraen nyupenyep, uwok.

Aria enen baraen eik douk wata ikripepen iri uwe, eik ta ikripep abudok nyutob eik inaku itogrumep obi nyutob.

## 12

### *Yopinyi Presen Iruhin ananin Mishin Nyakopen Iri*

<sup>1</sup> O ipak eikish arpesih. Eik yakri uwok um ipak purpur um enyudok sabainyi yopinyi presen douk Iruhin ananin Mishin nyekepen iri. <sup>2</sup> Ipak padukemesh, seiwok ipak madae pudukem Iruhin obi nyutob uwe, ipakip urkwip douk panadudareh um eshudok warehos douk madae shiyagwreh atin iri uwe. Aria eshesh shenekep panak pagipeshesh. <sup>3</sup> Douk namudok aria eik yakri um ikripep enyudok baraen. Enyudok arpen douk Iruhin ananin Mishin nyupenyen aria nyunyuhur nyukripen baraen iri, enyen ta mare nyukri, "Jisas anan douk yoweini," uwok. Aria enyudok arpen douk madae Iruhin ananin Mishin nyupenyen iri uwe ta mare nyukri, "Jisas anan douk Debeini," uwok.

<sup>4</sup> Adur, enyen douk sabainyi sisigin yopinyi presen douk Iruhin ananin Mishin apa nyakopen iri. Aria enyudok ihinyumorim presen douk enyudok atin Iruhin ananin Mishin nyakopen. <sup>5</sup> Aria sabainyi sisigin mour Debeini ananin nyape. Aria ananish arpesih douk sheneken um anan atun. <sup>6</sup> Aria eheh douk sabaihi yeh um apak munek mour um.

Aria atun Iruhin meyoh nakop ananin dodog apak ihishmorim ananish arpesih um nunekop dodogowip um munek enyudok mour.

<sup>7</sup> Iruhin ananin Mishin apa nyeyabigap enyenyin dodog nyatogur ihishmorim arpesih atin atin um nyutaurum ihishmorim Iruhin ananish arpesih. <sup>8</sup> Enen arpen, Iruhin ananin Mishin nyeken dodog um nyukrip kupaishi arpesih um Iruhin ananin baraen um nyiyabigesh yopipi urkwip aria shugipeshep. Aria kupainyi arpen, enyudok atin Iruhin ananin Mishin nyeken dodog aria saki um nyukriפש baugenyum um Iruhin ananin baraen um sabaishi arpesih shudukem Iruhin wosik. <sup>9</sup> Aria enen arpen, enyudok atin Iruhin ananin Mishin nyataurumen abom um nyunek bilip um nyunek Iruhin atun neneken iri mour. Aria kupainyi arpen, enyudok atin Iruhin ananin Mishin nyeken dodog um nyunek beten um arugeh haesh iri arpesih aria Iruhin wata nugabeyesh. <sup>10</sup> Aria enen arpen, Iruhin ananin Mishin nyataurumen nyeken dodog um nyunek Iruhin atun neneken iri mour. Aria kupainyi arpen, Iruhin ananin Mishin nyeken dodog um nyutogur profet um nyukriפש Iruhin ananin baraen douk Iruhin neyabiganen iri. Aria enen arpen, enyen nyeken dodog um nyunek skelimum sabainyi kupainyi baraen douk arpesih shakriפש iri um eshesh shudukemesh um enyen douk Iruhin ananin baraen o yoweini Satan ananin. Aria enen arpen, enyen nyeken dodog um nyiyagwreh sabainyi kupainyi baraen. Aria kupainyi arpen, enyudok atin Iruhin ananin Mishin nyeken dodog um nyuwanam enyudok kupainyi baraen nyukriפש baugenyum um. <sup>11</sup> Aria enyen douk enyudok atin Iruhin ananin Mishin nyenek enyudok ihinyumori mour abom. Enyen nyagipesh enyenyim urkum atum aria nyekesh sisigin yopinyi presen ihishmorim arpesih atin atin. Enesh nyekeshuk enen sik, aria enesh nyekeshuk sik.

*Apak Ihishmorim Douk Mape Anabik*

### *Um Ahwudok Otuhw Yegenyihw Um*

<sup>12</sup> Arpenyihw yegenyihw douk otuhw meyoh. Aria sabaigunum shokushokugunum um yegenyihw hwanadran um atugun aria hwonek atin arpen. Aria Kraish douk namudok atin. <sup>13</sup> Um maresh? Apak ihishmorim atin Iruhin ananin Mishin nyenek baptaisumap aria nyenekop matogur kabi atin arpen um. Apak Juda mani ipak douk riguk madae pudukem Iruhin iri uwe. Apak mani eshudok douk shape shakamum kupaishi arpeshe shenek-umesh mour meyoh iri, mani eshudok douk shape meyoh iri, marao atin Iruhin ananin Mishin nyapenyap.

<sup>14</sup> Apak madukemesh, arpenyihw yegenyihw douk madae anabik atugun nunekohw uwe, uwok. Ohohw douk sabaigunum shoku-shokugun nanadran um atugun aria nenek enen arpen. <sup>15</sup> Aria ta yerihw hwukri, “Eik douk madae wis uwe, douk namudok aria eik madae ipe anabikihwum um ahwudok yegenyihw uwe.” Douk yerihw ta hwukri namudok, aria ohohw douk madae hwupe anabikihwum um ahwudok yegenyihw. <sup>16</sup> Aria ta arigos sukri, “Eik douk madae nabep uwe, douk namudok aria eik madae ipe anabikihwum um ahwudok yegenyihw uwe.” Douk arigos ta sukri namudok, aria agagos douk madae supe anabikihwum um ahwudok yegenyihw. <sup>17</sup> Aria ta ihihwumorim shuknihw yegenyihw hwutogur nabep atup akure, ohohw ta hwumnek baraen mumam? Aria ta ihihwumorim shuknihw yegenyihw hwutogur arigos atugos akure, ohohw ta hwumnih eshudok eneshenesh mumam? <sup>18</sup> Aria arpenyihw yegenyihw douk madae ohohw kanak hwupe namudok uwe, uwok. Ohohw douk seiwok Iruhin nagipesh ananim urkum aria nenek ihigunmorim shokushokugunum um ahwudok yegenyihw nape ahwudok shuknihw yegenyihw. <sup>19</sup> Aria ta ihihwumorim shuknihw yegenyihw douk barag atug o aiyas atugas akure, ahwudok yegenyihw ta hwupe mumam? <sup>20</sup> Aria yegenyihw douk madae hwupe namudok uwe. Ohohw douk sabaigunum

shokushokugun um nape aria nenek otuhw yegenyihw.

<sup>21</sup> Aria nabes ta mare sukrip wis sukri, “Apak makri uwok um ipak. Aria ipak uwok akure, apak atup wosik ta mupe wosik!” Aria barag ta mare gukrip yeriwuruh gukri, “Eik yakri uwok um ipak. Aria ipak uwok akure, eik atuwe wosik ta ipe wosik!” Adur atin enyudok ta uwok. <sup>22</sup> Aria agundokiruh um yegeshiwuruh douk apak makri araruh madae dodogowiruh iri uwe aria madae hupe akure, yegenyihw ta mare hwupe wosik uwe, uwok. <sup>23</sup> Aria agundokiruh um douk apak makri araruh nyeiguhw wokaruh iri, apak apa meyoharuh wosik atin. Aria agundokiruh um apak apa abraenyipumaruh iri, apak apa mobeshukaruh aria mushapumaruh. <sup>24</sup> Aria agundokiruh um douk apak madae abraenyipumaruh iri uwe, apak madae mugabeyaruh aria muyoharuh namudok uwe. Aria Iruhin douk nenek ihigunmorim sabaigunum sisigigun um yegenyihw hwanak hwanadran atugun aria hwenek otuhw debeihwi yegenyihw. Aria anabigiruh um douk nyeiguhw wokaruh, aria anan nakoruh nyeiguhw shato iruhumoruh. <sup>25</sup> Anan nenekesh namudok um ahwudok shuknihw yegenyihw mare hwunabrig aria hwunasiya um uwe, uwok. Aria agundok sabaiguni sisigigun um ahwudok yegenyihw ta hwunagapesh aria hwunagabe um. <sup>26</sup> Douk namudok aria ta anabigihw um yegenyihw hwumnek eriger, ihihwumorim yegenyihw shopunek ta hwumnek eriger. Aria ta anabigihw um hwurao debeinyi nyeigur um, ihihwumorim yegenyihw shopunek ta hwunadudareh.

<sup>27</sup> Douk namudok aria ipak ihipmorim atin atin douk pape kabi anabikihw um Kraish ananihw yegenyihw um. <sup>28</sup> Aria Iruhin douk nagraeh ihishmorim ananish arpeshe um shunek ananin mour. Sagomatin um douk aposel, Iruhin nagraeham um hanak hukripesh ananin baraen iri. Aria eshesh profet, douk Iruhin neyabigesh baraen shanak shakrip arpeshe iri. Aria eshudok douk shenek skulumesh um Iruhin ananin baraen iri.

Aria eshudok douk shenek Iruhin atun nape neneken iri mour. Aria eshudok douk shenek beten um arugeh hapeyesh iri aria Iruhin wata nagabeyesh iri. Aria eshudok douk shataurum kupaishi Iruhin ananish arpesch iri. Aria eshudok douk shenek sisigin enenyenen mour um sios iri. Aria eshudok douk sheneyagwreh sabainyi kupainyi baraen iri. <sup>29</sup> Aria ipak pakri mumam? Ipak pakri amam ihm-morim hutogur aposel omi atum? Aka pakri ihishmorim shutogur profet iri atish? Aka pakri ihishmorim shutogur tisa omi aria shunek skulumesh um Iruhin ananin baraen um shumneken shugipeshen wosik iri atish? Aka ipak pakri ta ihishmorim shunek Iruhin atun nape neneken iri mour? <sup>30</sup> O ipak pakri ta ihishmorim arpesch shurao dodog um shugabe arugeh hapeyesh iri arpesch? O pakri ta ihishmorim arpesch shurao dodog um shiyagwreh sabainyi kupainyi baraen aka? Aka pakri ta ihishmorim shudukemesh um shuwanam baugenyum um enyudok sabainyi kupainyi baraen? Adur atin ta uwok. Ihishmorim douk shenek esheshin sisigin mour douk Iruhin nekeshen iri. <sup>31</sup> Aria ipak ihishmorim oub ta bikitak abom um purao sagomatinyin presen douk Iruhin ananin Mishin nyako arpesch-enyi.

*Apakip Urkwip Ta Punawasham Abom Um Kupaishi Arpesch*

Aria douk eik yakri ikripep um eneh yopihi aih abom douk heshagrakuk ihinyumorim enyudok yopinyi presen iri.

### 13

<sup>1</sup> Aria eik idukemesh um iyagwreh sabainyi kupainyi baraen nyuni enselamos esheshin shopunek, aria eik urkum mare munawasham arpesch um, eikin baraen douk wehinyi. Enyen kabi douk wiruh o nyubrap douk sheneyagwreh meyoh iri um. <sup>2</sup> Aria ta Iruhin ananin Mishin nyuke yopinyi presen um ikripesh Iruhin ananin baraen, kabi amam profet hakripesh um, aria ta eik idukem baugenyum um ihinyumorim Iruhin ananin nyanabeshuk iri baraen, aria irao ihinyumorim Iruhin ananin

yopinyi saki shopunek, aria isuhw Iruhin ananin baraen dodog abom igipeshen um inek beten ishopok yodururuh um hutotigos hunak hupe kupaigunum, aria eik urkum madae munawasham kupaishi arpesch um, eik douk madae yopuwe iri uwe inek enesh eshudok um yoweishi eneshenesh, uwok. <sup>3</sup> Aria eik ikesh ihishmorim eikish eneshenesh um eshudok douk yaruhish arpesch iri, aria ikri wosik um kupaishi shusuhwe shishaiweh eik um nyih aria she igok, aria eik urkum madae munawasham kupaishi arpesch um, ihishmorim ehudok eik yenekeh iri aih ta mare hutaaurume uwe, uwok.

<sup>4</sup> Enyudok arpen douk enyenyim urkum manawasham kupaishi arpesch iri douk mare juwehosim arigas atin uwe. Aria enyen mare nyuwanamesh atin uwe yoweishi inahos eshesh shenekesh um enyen iri. Enyen apa nyenek yopihi aih um ihishmorim arpesch nyutaurumesh. Aria madae nyunek nyigiya atinyum eshudok douk shanagrem sabaishi eshudok eneshenesh iri uwe. Aria madae nyutuk enyenyin nyeigur nyuto iruhw atin uwe. <sup>5</sup> Enyen madae nyubo mishin atin um uwe, aria madae urkum murum enyen atin uwe, uwok. Enyen apa nyape shakamum kupaishi arpesch aria madae juwehosin arigas atin uwe. Aria mare nyusuhw yoweih aih uwe um kupaishi shenekesh-umen iri uwe, uwok. <sup>6</sup> Aria enyen madae nyunadudareh-umeh atih uwe yoweih aih, uwok. Enyen apa nyanadudareh um yopihi durdurih atih aih. <sup>7</sup> Ihih nyumneh enyen apa nyape um nyenek enyudokmori atin. Enyenyihw apahw apa hwor wosik aria nyeyotu dodog abudok nyutob amaen nyatogurumen nyeneken nyemnek eriger obi nyutob. Enyen madae nyiyagwreh rohwin baraen um kupaishi nyukri eshesh shenek yoweishi inahos uwe. Enyen nyakri Iruhin anan kanak ta nutaurumesh aria shunek yopihi aih. Enyen apa nyasuhw Iruhin ananin baraen dodog nyagipeshen aria nyape nyatrugun-umen um nutaurumen nyuni eshudok shenek yoweishi inahos iri shopunek. Aria enyen apa nyeyotu

dodogowin aria nyakri wosik um nyusah ihinyumorim amaen douk ta nyutogur-umen iri.

<sup>8</sup> Aria ehudok yopihi aih um urkwip punawasham kupaishi arpesh um ta mare hutuh hunak huwishuk uwe, uwok. Ehudok aih um Iruhin ananin Mishin nyuhur ananish arpesh shunek mourum shukripesh ananin baraeen kabi amam profet hakripesh um ta nyutuh. Enyudok sabainyi yopinyi presen um shenyagwreh kupakupainyi baraeen um ta nyutuh. Aria ehudok aih um sharao saki um shudukem Iruhin um shopunek ta hutuh. <sup>9</sup> Um maresh? Douk apak madae gamo mudukem ihinyumorim saki uwe. Apak madukem tukwanin atin. Aria shopunek, abudok nyutob Iruhin ananin Mishin nyohur arpesh shakripesh Iruhin ananin baraeen um, eshesh shakripesh tukwanin atin. <sup>10</sup> Aria kweipon Jisas Krai nutanamori obi nyutob, eshudok douk madukem tukwanish atish iri ta shunak shuwishuk. <sup>11</sup> Seiwok eik wata yape kabi shokwinyi batowin um, eik yeyagwreh kabi batowin um. Aria yemnek baraeen o yatik eshudok um, eik yenek urkum-umesh kabi douk shokwinyi batowin um. Aria douk eik yakitak yopuwe aria yakutukuk ehudok shokwishiyeh aih. <sup>12</sup> Douk apak matik eshudok um, apak matrish ruhur atin kabi douk matik aboriguh wenyir um. Aria kweipon ahudok aduriah nyumnah hutogur aria apak ta mutrish wosik abom. Aria douk abudok nyutob eik madae idukem ihishmorim eshudok uwe. Aria kweipon ahudok nyumnah, eik ta idukem ihishmorim eneshenesh eshudok abom kabi douk Iruhin nadukem eik wosik abom um.

<sup>13</sup> Aria douk ehudok bihotih aih douk wata hape. Ehudok aih um munek bilip um, hani ehudok um mape matrugun um Jisas Krai nutanamorium, hani ehudok um urkwip punawasham kupaishi arpesh um. Ehudok bihotih aih douk hape. Aria sagomih yopihi aih abom douk heshagrakuk ihishmorim iri douk ehudok yopihi aih um urkwip punawasham kupaishi um.

## 14

### *Sabainyi Yopinyi Presen Iruhin ananin Mishin Nyakopen Iri*

<sup>1</sup> Ipak ta punek mour dodogowip atip um ipakip urkwip punawasham kupaishi arpesh. Ipak mishish ta shikitak abom um purao ihinyumorim yopinyi presen douk Iruhin ananin Mishin apa nyakopen iri. Aria nyarik iri abom nyeshagrakuk ihinyumorim presen douk ipak ta mishish shikitak abom um puraen iri douk enyudok um Iruhin ananin Mishin nyupuhur nyutaurumep pukripesh ananin baraeen um kabi amam profet hakripesh um. <sup>2</sup> Apak madukemesh, enyudok arpen douk nyeyagwreh kupainyi baraeen douk arpesh madae shudukemen iri uwe, enyen douk madae nyukripesh baraeen enesh arpesh uwe, uwok. Enyen douk nyakrip Iruhin atun. Um maresh? Madae enen arpen nyudukem enyudok baraeen enyen nyeyagwrehen iri uwe. Enyen douk Iruhin ananin Mishin nyenyuhur nyeken dodog aria nyeyagwreh enyudok baraeen douk seiwok nyanabeshuk nyape iri. <sup>3</sup> Aria enyudok arpen douk Iruhin ananin Mishin nyenyuhur aria nyeyagwreh ipakin baraeen nyakripesh Iruhin ananin baraeen iri, enyen nyakripeshen iri baraeen douk nyutaurum arpesh nyenekesh shasuhw Krai ananin baraeen dodog aria nyogabeimesh esheshiruh aparuh hur wosik aria shenek yopihi aih. <sup>4</sup> Enyudok arpen douk nyeyagwreh kupainyi baraeen iri douk nyataurum enyen kanak nyatogur dodogowin. Aria enyudok douk Iruhin ananin Mishin nyenyuhur aria nyeyagwreh ipakin baraeen nyakripesh Iruhin ananin baraeen iri douk nyataurum ihishmorim Iruhin ananish arpesh nyenekesh shatogur dodogowish shasuhw Krai ananin baraeen dodog. <sup>5</sup> Eik yakri wosik um ipak ihishmorim piyagwreh sabainyi kupainyi baraeen. Aria eik yakri abom um ipak purao enyudok yopinyi presen um Iruhin ananin Mishin nyupuhur piyagwreh ipakin baraeen aria pukripesh Iruhin ananin baraeen um. Um maresh? Ta enyudok arpen douk nyeyagwreh kupainyi baraeen iri nyiyagwreh um, enen kupainyi arpen ta nyuwanam enyudok

baraen nyukripesh um Iruhin ananish arpesh shumneken aria nyutaurumesh shutogur dodogowish. Aria ta mare enen arpen nyuwanam enyenyin baraen um, enyenyin baraen ta mare nyutaurum enesh arpesh, uwok. Douk namudok aria enyudok arpen douk Iruhin nenyuhur aria nyeyagwreh ipakin baraen nyakripesh ananin baraen iri nyeneken iri mour douk nyeshagrakuk abom enyudok nyeyagwreh kupainyi baraen iri.

<sup>6</sup> O ipak eikish arpesh, ipak urkwip purum enyudok baraen. Aria eik inaku ini ipak mupe aria iyagwreh kupainyi baraen ikripep Iruhin ananin baraen um, eik ta itaurumep um pusuhw Iruhin ananin baraen dodog putogur dodogowip mumam? Aria ta eik inyanam-umep um, enyen douk wosik. Aria ta eik ikri itaurumep um, eik ta ikripep um enen baraen douk Iruhin neyabigeyen iri, o ikripep um enen baraen um purao yopinyi saki o ikripep enen baraen douk Iruhin ananin Mishin nyeyohur nyakripeyenyi o inek skulumep um enesh namushi eshudok eneshenesh um, eshudok eneshenesh douk wosik.

*Mukripesh Iruhin Ananin Baraen Um, Apak Ta Mukripesh Apakin Baraen*

<sup>7</sup> Eneshenesh eshudok kabi douk buwaen o gita douk madae gamo shupe shiyagwreh shenek yopinyi gaha abom iri uwe douk namudok atin. Aria arpesh ta mare shubirakesh wosik um, eshesh ta mare shiyagwreh wosik. Aria apak ta mumnekesh aria ta mudukem yopinyi gaha mumam? <sup>8</sup> Aria ta arpen nyihapur oruhw iri mare nyihapuruhw hwiagwreh wosik um, amudok henek wanohw iri ta hunek garibog aria hupe hutrugun um hunek wanohw mumam? <sup>9</sup> Aria ipak shopunek douk namudok atin. Ipak pukripesh Iruhin ananin baraen um, ipak ta piyagwreh pukripesh esheshin baraen douk eshesh shadukemen iri. Aria ipak pukripesh baraen kupainyi um, eshesh ta shudukem baugenyum ipakin baraen

mumam? Ipakin baraen ta nyunakuk atap meyoh. <sup>10</sup> Adur, sabainyi kupainyi baraen nyape agudok atapig nahobig. Aria madae enen rohwin wehinyi baraen nyupe uwe. Ihinyumorim baraen douk baugenyum baraen nyape. <sup>11</sup> Aria ta eik mare idukem baugenyum baraen douk kupainyi arpen nyakriyen iri um, enyen ta nyukri eik kupaiburi waburiwe iri. Aria eik shopunek ta ikri enyen douk kupaiburi waburin. <sup>12</sup> Ipak douk oub bakitak um pakri purao sabainyi yopinyi presen douk Iruhin ananin Mishin apa nyekepen iri. Douk namudok aria ipak ta punek mour dodogowip um purao enyudok presen um putaurum Iruhin ananish arpesh shusuhw ananin baraen dodog shutogur dodogowish um.

<sup>13</sup> Douk namudok aria enyudok arpen douk nyeyagwreh kupainyi baraen douk arpesh madae shudukemen iri uwe, enyen ta nyunek beten nyurig Iruhin um nuken saki um nyuwanam enyudok baraen um arpesh shudukemen. <sup>14</sup> Um maresh? Ta eik iyagwreh inek beten kupainyi baraen eik madae idukemen iri uwe um, agundok douk eikin mishin atin nyenek beten. Aria eikim urkum douk mapeik meyoh. <sup>15</sup> Douk namudok aria douk eik ta inekesh mumam? Eik ta inek beten ini eikin mishin nyuni eikim urkum shopunek. Aria eik ta iyarub ini eikin mishin nyuni eikim urkum shopunek. <sup>16-17</sup> Aria ta ipak puni ipakish mishish atish putuk Iruhin ananin nyeigur punek tenkyu uman, aria enen arpen douk madae nyurao enyudok presen<sup>14:16-17</sup>um nyudukem enyudok baraen ipak peyagwrehen iri nyuni ipak nyupe um, enyen ta nyumnek ipakin beten aria nyukri adur mumam? Adur, ipak ta punek yopini beten punek tenkyu um Iruhin, aria ipak ta mare putaurum enyudok arpen douk nyani ipak nyape iri uwe, uwok. Um maresh? Enyen douk madae nyudukem enyudok baraen ipak penek beten peyagwreh-enyi uwe, uwok.

<sup>18</sup> Eik yenek tenkyu um Iruhin. Um

14:16-17 **14:16-17** Baugenyum enyudok baraen Grik douk biyen. Enen nyakri arpen madae nyurao enyudok presen um nyudukem enyudok baraen eshesh sheyagwrehen iri uwe. Aria enen nyakri arpen douk wata nyutogur Kristen iri uwe.



maresh? Eik yeshagrakuk ipak abom um agundok yeyagwreh sabainyi kupainyi baraeen um. <sup>19</sup> Aria abudok nyutob yani Iruhin ananish arpeshe mape menek lotu obi nyutob, eik yakri ikripesh baneniyi<sup>14:19</sup> baraeen douk ta shudukemen iri um itaurumesh. Eik yakri uwok um ikripesh sabainyi 10,000-porein baraeen um ikripesh kupainyi baraeen uwe, uwok.

<sup>20</sup> O ipak eikish arpeshe, ipakip urkwip douk wata pape kabi shokwishi esheship um. Aria douk jurug. Shunek yoweih aih um, ipak ta pupe kabi shokwishi douk madae dodogowish um shunek yoweishi inahos iri uwe. Aria ipakip urkwip ta putogur kabi yopishi esheshipi um. <sup>21</sup> Enen Iruhin ananin lo douk nyetem ananik Buk iri douk nyakri namudok. Debeini nakri,

“Eik ta ihur kupairubi warubish arpeshe douk sheneyagwreh kupainyi baraeen iri um shukripesh eikin baraeen eshudok eikish arpeshe aria eshesh ta mare shugipeshen uwe, uwok.”

<sup>22</sup> Douk namudok aria apak madukemesh, enyudok presen um piyagwreh sabainyi kupainyi baraeen um, enyen douk Iruhin madae nukepen um niyabigep ananin dodog ipak douk pasuhw Kraiss ananin baraeen pagipeshen iri uwe, uwok. Anan douk nekep enyudok presen um nakri niyabigesh ananin dodog eshudok douk madae shunek bilip-uman iri uwe. Aria enyudok presen douk Iruhin ananin Mishin nyekepen um nyupuhur um pukripesh Iruhin ananin baraeen um, enyudok Iruhin douk madae nuko eshudok madae shunek bilip-uman iri uwe, uwok. Anan douk nekesh enyudok presen um putaurum eshudok douk shenek bilip um anan iri.

<sup>23</sup> Douk namudok aria ta ihishmorim Iruhin ananish arpeshe punak pupe atugun aria ihishmorim pupe piyagwreh sabainyi kupainyi baraeen, aria enesh douk madae shusuhw Kraiss ananin baraeen iri uwe shini ipak shupe um,

eshesh ta shumnekep aria shukri ipak pogugak iri. <sup>24</sup> Aria ta Iruhin ananin Mishin nyupuhur aria pukripesh Iruhin ananin baraeen ipakin baraeen, aria ta enen arpen douk madae nyunek bilip iri uwe o enen douk madae gamo nyudukem Iruhin ananin baraeen iri uwe nyuni ipak nyupe um, ipak ihishmorim ipakin baraeen ta niyabigen aria enyen ta nyudukemesh um enyen douk nyenek yoweishi inahos iri. Aria ipakin baraeen enyen nyumneken aria ta nyunek kwot-umen. <sup>25</sup> Aria ihinyumorim enyenyim manabeshuk iri urkum ta munawereh mutogur yopugunum. Aria enyen ta nyubuh nyuduk ohrubus aria enyenyig yomag gutik atap aria ta nyutuk Iruhin ananin nyeigur nyuto iruhw. Aria enyen ta nyukripesh yopugunum nyukri, “Adur atin Iruhin nani ipak nape.”

*Ihinyumorim Mour Apak Munek Lotu Muneken Iri Ta Muneken Wosik*

<sup>26</sup> O ipak eikish arpeshe, baugenyum eikin baraeen nyakri mumam? Abudok nyutob ipak panak pape penek lotu um ipak apa penek maresh? Ipak douk Iruhin ananin Mishin nyepuhur aria apa penek sisigin mour. Enen nyeyarub, enen nyenek skulumep um Iruhin ananin baraeen um pudukemen pugipeshen wosik. Aria enen nyakripep um Iruhin neyabigen iri baraeen. Aria enen nyeyagwreh kupainyi baraeen, aria enen nyawanam enyudok kupainyi baraeen. Aria ipak ta punek enyudok ihinyumorim mour um putaurum Iruhin ananish arpeshe shutogur dodogowish um agundok shasuhw Kraiss ananin baraeen shagipeshen um. <sup>27</sup> Aria ta enesh shukri shiyagwreh kupainyi baraeen um, biyesh o biyesh atin meyoh ta shiyagwreh. Aria eshesh ta shiyagwreh atin atin. Aria shopunek, kupainyi arpen ta nyuwanam esheshin baraeen. <sup>28</sup> Aria ta mare enen arpen nyuwanam-uman baraeen iri nyupe agundok um, enyudok arpen douk nyukri niyagwreh kupainyi baraeen iri ta nyuweshik enyenyit nokwat aria

14:19 **14:19** Enyudok baraeen um Grik douk nyakri 5-porein baraeen o 5-porein wod. Aria ta Inglis nyakri 5 words. Aria baugenyum enyudok baraeen douk nyakri baneniyi baraeen meyoh.

nyupe meyoh. Enyen mare nyiyagwreh abudok nyutob Iruhin ananish arpes shunatorum shupe um, uwok. Enyen atin ta wosik nyuni Iruhin atun nyiyagwreh. <sup>29</sup> Aria biom o biom atun meyoh armam douk Iruhin ananin Mishin nyumhur um hukriפש ananin baraen iri hukriפש baraen. Aria ipak enep pape iri ta pupe punek skelimum enyudok baraen. <sup>30</sup> Aria ta abudok atub nyutob enen arpen nyupe um lotu aria enyen nyumnek Iruhin nukriפש enen baraen um, enyudok douk nyeyotu nyape nyeyagwreh iri ta mokureg aria punnek enyudok enen nyukitak nyiyagwreh iri. <sup>31</sup> Um maresh? Ipak ihipmorim douk Iruhin ananin Mishin nyepuhur um pukriפש ananin baraen iri ta piyagwreh atin atin. Ipak punekesh namudok um ihishmorim shumneken shudukemen wosik aria shutogur dodogowish. <sup>32</sup> Aria eshudok arpes douk sharao enyudok yopinyi presen um Iruhin ananin Mishin nyishuhur shukriפש ananin baraen iri ta shiyohen wosik enyudok presen. <sup>33-34</sup> Um maresh? Iruhin douk nakri uwok um apak muneken hwaroh enyudok mour um munek lotu um uwe, uwok. Anan nakri apak muneken wosik aria apakiruh aparuh hur wosik.

Aria ihirub warub, ihishmorim Iruhin ananish arpes shunatorum shupe um, armago mare ukitak wiyagwreh enen baraen uwe, uwok. Owo ta upe wehigun. Owo mare upe iruhw um armam kabi douk Iruhin nakoguk Moses enyi lo nyakrium. Owo ta upe shakamum amam. <sup>35</sup> Aria ta owo ukri udukem baugenyum enen baraen um, owo ta unak urusag aria kadak uworig owowim armam. Aria ta Iruhin ananish arpes shunatorum shupe aria onok armatok kwukitak kwiyotu kwiyagwreh um, ehudokmori aih douk abraenyihi aih.

<sup>36</sup> Ipak pakri ipak kanak douk baugos abom um Iruhin ananin baraen nyakitak nyanaki um aka? O ipak atip parao Iruhin ananin baraen abom aria kupaishi uwok?

<sup>37</sup> Aria enen arpen nyukri enyen Iruhin ananin Mishin nyenyuhur um nyukriפש Iruhin ananin baraen um, o nyukri enyen

nyarao enen yopinyi presen douk Iruhin ananin Mishin nyekepen iri um, enyen ta nyudukemesh um enyudok baraen douk eik yenyemagu um ipak iri douk Debeini ananin lo. <sup>38</sup> Aria ta enyen nyukri uwok um nyumnek enyudok baraen um, ipak shopunek pukenyuguk agabus enyudok arpen.

<sup>39</sup> Douk namudok aria ipak eikishi arpes. Ipakish mishish ta shikitak abom um Iruhin ananin Mishin nyupuhur pukriפש ananin baraen. Aria ipak mare punek enen lo um pakri mare piyagwreh kupainyi baraen um uwe, uwok. <sup>40</sup> Aria ipak Iruhin ananish arpes punak pupe punek lotu um, ipak ta puneken wosik ihinyumorim enyudok lotuin mour um nyutogur yopinyi adurin lotu.

## 15

### *Seiwok Krai Nagok Aria Douk Wata Nakitak Nape*

<sup>1</sup> O ipak eikish arpes. Eik wata yakri ihur ipakip urkwip um enyudok Iruhin ananin yopinyi baraen douk eik yakriפש iri. Ipak douk pasuhwen dodog pagipeshen aria douk peyotu dodogowip um enyudok baraen. <sup>2</sup> Aria enyen douk um enyudok baraen atin, ta ipak pusuwen dodog um, Iruhin douk naraep patanamori pape wosik. Aria ta uwok um, ipak douk penek bilipumen meyoh.

<sup>3</sup> Nyarik iri baraen douk nyeshagrakuk ihinyumorim baraen douk riguk eik yarik yaraen iri, enyudok eik douk yakriפש. Enyen douk enyudok. Krai nagok um nukweshihap um apakish yoweishi inahos kabi douk baraen nyetem Iruhin ananik Buk iri nyakrium. <sup>4</sup> Aria sharuman nor wonugwehw biyeh nyumneh aria hakri um biyeh atih nyumneh um, anan wata nakitak nape kabi douk Iruhin ananin baraen nyakrium. <sup>5</sup> Aria anan narik natogurum Pita, aria kadak nagiguk natogurum ananim 12-poreim aposel. <sup>6</sup> Aria enyudok nyanakuk aria atub nyutob meyoh, anan natogurum sabaishi shagipesh anan iri. Eshesh

douk sabaishi abom sheshagrakuk 500-poreish. Eshudok shatrun iri, sabaishi douk wata shape, aria enesh douk shagok. <sup>7</sup> Aria enyudok nyanakuk aria anan wata natogur um Jems, aria wata shopunek natogurum ihim-morim aposel hatrun. <sup>8</sup> Douk natogur-umesh neyatesh aria eik natogrume aria yagiguk yatrun. Eik douk kabi enen batowin douk amakek kweyobuki yowewe iri.<sup>15:8</sup>

<sup>9</sup> Eik douk nyeigur woke yape shakamum ihim-morim aposel. Aria eik douk madae wosik um arpeshe shuhware aposel uwe. Um maresh? Seiwok eik yape yabo Iruhin ananish arpeshe yanunish. <sup>10</sup> Aria Iruhin kanak nataurume meyoh aria neneke yatogur yopuni iri arman kabi douk yapeum. Aria agundok um anan nataurume meyoh um douk madae nunakuk atap meyoh uwe, uwok. Eik yenek mour dodogoiwe atuwe yeshagrakuk ihim-morim amudok anam aposel. Aria enyudok mour enyen douk madae eik kanak ineken uwe, uwok. Enyen douk Iruhin nenek gihaume aria neke ananin dodog aria yeneken. <sup>11</sup> Douk namudok aria enyudokmori baraan um apak makri eik yeneken o amam heneken um, enyudokmori bukenyuk. Apak ihim-morim aposel douk makripesh enyudok atin baraan um shabo Krai nagok sharuman aria wata nakitak napeum. Aria eshesh shemneken aria ipak shopunek pemneken aria pasuhwen dodog pagipeshen.

### *Shagok Iri Arpeshe Ta Wata Shukitaki*

<sup>12</sup> Ihih nyumneh apak mape um makripesh baraan um Krai nagok aria Iruhin wata nonohur nakitak napeum. Aria ipak enep apa pakri shagok iri ta mare wata shukitaki? Adur atin eshesh ta wata shukitaki. <sup>13</sup> Aria ta adur shagok iri ta mare wata shukitak um, Krai shopunek douk Iruhin mare nunohur nukitak nupe uwe. <sup>14</sup> Aria ta adur Iruhin madae nuhur Krai nukitak nupeum uwe, enyudok baraan douk apak mape makripeshen iri douk rohwin baraan meyoh. Aria ipakin

bilip um Krai shopunek douk rohwin. <sup>15</sup> Aria douk namudok um, douk apak matogur kabi armam douk henek rohwin hakripesh Iruhin ananin baraan iri um. Um maresh? Apak makri Iruhin wata nohur Krai nakitak nape. Aria ta adur kweipon Iruhin ta mare nuhur shagok iri shukitak shupe um, Iruhin douk madae nuhur Krai nukitak nupe uwe. <sup>16</sup> Adur, ipak enep pakri Iruhin ta mare nuhur shagok iri shukitak shupe, uwok. Aria ta enyudok ipakin baraan douk adurin um, Krai shopunek, Iruhin douk madae nunohur nukitak nupe uwe. <sup>17</sup> Aria ta adur Iruhin madae nuhur Krai nukitak nupe um uwe, ipakin bilip um Krai nakitak napeum douk madae adurin uwe. Aria enyen ta mare nyutaurumep, uwok. Aria douk ipak douk wata pape um penek yoweishi inahos atin douk showeshikep dodog iri. <sup>18</sup> Aria eshudok arpeshe douk shasuhw Krai ananin baraan shagipeshen aria shagok iri, eshesh shopunek douk shagok shanak shawishuk abom. <sup>19</sup> Aria apak douk madukemesh abom um Krai nape iruhw heven aria mape matrugun manak um nutaurumap. Aria mukri ta nutaurumap douk abudok atub nyutob douk mape agundok atap um, apak douk shunek giha-umap abom. Enyen douk wosik um shenek gihaumesh atin ishishmorim eshudok enesh arpeshe. Aria apak, eshesh ta shenek gihaumap abom shuriguk.

<sup>20</sup> Aria enyen douk madae namudok uwe, uwok. Krai douk nagok aria adur atin Iruhin wata nonohur nakitak nape. Aria anan douk riguk narik abom nakitak nape kabi douk narik iri worigun jurugigun nape nubarigos iri um. Douk namudok aria apak madukemesh um shagok iri ta wata shukitak shupeum. <sup>21</sup> Atun arag arman meyoh nakwarmorigok. Aria wata namudok atin, atun arag meyoh kupaini arman nakwarmorigehudok aih um shagok iri watak shukitaki shupe um. <sup>22</sup> Enyudok douk namudok. Ishishmorim arpeshe douk shakitak Adam

<sup>15:8</sup> <sup>15:8</sup> Pol nenek urkum um ananish yoweih aih douk anan narik nenekeh iri aria douk nakri anan yoweini kabi douk batowin amakek kwenyubuki ba yowen iri.

ananip awirop iri apa shagok. Aria namudok atin, ihishmorim arpeshe douk shantoruh Kraisi iri, kweipon Iruhin ta wata nishuhur shukitak shupe aria mare wata shugok atin. <sup>23</sup> Aria apak ihishmorim atin atin mape matrugun um apakib nyutob sisiguk. Sagomatinyin narik iri arman douk Kraisi. Anan douk nape kabi narik iri worigun jurugigun nape nubarig iri um. Aria kweipon ahudok nyumnah anan nutanamori ahi, apak ihishmorim ananish arpeshe ta wata mukitaki aria mupe. <sup>24</sup> Douk enyudok nyunakuk aria hugiguk iri abom nyumneh ta hutogur. Aria abudok nyutob Kraisi ta nubouk ihinyumorim enenyenen gavman douk nyasuhw merik um iruhw atap iri nyubuhuk. Aria anan atun ta nurao debeinyi nyeigur. Aria anan ta dodogowin abom aria nupe debeini king um ihishmorim dodogowishi eshudok sagabehos aria nuraesh shuni ananin debeinyi nyeigur shunak um ananin Yain Iruhin. <sup>25</sup> Um maresh? Kraisi ta nupe debeini king arigaha Iruhin nugraeh ihishmorim ananish horim shubuh shupe shakamum Kraisi atun. <sup>26</sup> Aria Iruhin ta niyatakuk ihishmorim eshudok enesh horim iyoh aria nugiguk iri horin ta anan niyatonuk iri douk gok. <sup>27</sup> Um maresh? Seiwok Iruhin nakri namudok, “Kweipon eik ta inek ihishmorim eshudok eneshenesh shuni arpeshe shopunek shupe shakamum anan atun.” Aria enyudok baraen douk nyakri Iruhin nenek “ihishmorim eshudok eneshenesh” shape shakamum Kraisi. Aria baugenyum enyudok baraen douk madae nyukri Iruhin douk nenek ihishmorim eshudok eneshenesh shape shakamum Kraisi iri, aria Iruhin shopunek nape shakamum Kraisi uwe, uwok. <sup>28</sup> Aria Iruhin ta nunekesh shupe shakamum Kraisi ba iyoh aria ananin Nuganin anan kanak ta wata nupe shakamum Iruhin douk sagomatin narik nenek ihishmorim eshudok eneshenesh shape shakamum Kraisi iri. Iruhin douk nenekesh namudok um anan atun nupe debeini um ihishmorim eshudok eneshenesh shuni arpeshe.

<sup>29</sup> Aria ta adur shagok iri ta mare

wata shukitak um, kupaishi arpeshe douk shape sharao shagok iri esheshiyu outumeb aria shenek baptaisumesh um maresh? Aria adur shagok iri ta mare wata shukitaki um, arpeshe douk shenek baptaisumesh um shutaurum shagok iri um maresh? <sup>30</sup> Aria mumam mumam um apak? Sabaishi arpeshe shahap aria shakri shop um enyudok Kraisi ananin mour. Aria douk ta shagok iri ta mare wata shukitaki um, apak douk mape munek enyudok mour um maresh? <sup>31</sup> O ipak eikish arpeshe. Eik yanadudareh-umep abom um agundok apak matukur apakin Debeini Kraisi Jisas um. Douk namudok aria eik yakri ikripep enyudok baraen namudok. Adur atin, ihih nyumneh eik yape kabi douk yagok iri um. <sup>32</sup> Aria ipak pakri eik yagipesh arpeshim urkum atin aria douk yenek enyudok mour um, eik yakri ipak pukripe. Eik yape Efesus um, eik urkum morum irao maresh eshudok yopishi eneshenesh aria douk yani wanohwishi arpeshe abom kabi douk wanarish mahish um marpak? Aria adur shagok iri ta mare wata shukitaki um, “Apak muwok debeguni worigun nini abar. Um maresh? Nuhut apak ta mugok munak muwishuk” kabi douk enesh arpeshe shakri um.

<sup>33</sup> Ipak mare pugipesh enesh arpeshe shunek rohwmep iri, uwok. Enen baraen douk nyakri namudok, “Aria apak muni shenek yoweishi inahos iri arpeshe munoprom um, eshesh ta shubouk apakih yopihi aih hubuhuk.”

<sup>34</sup> Ipak ta pukutukuk rohwihi aih aria ipakip urkwip pur wosik atin. Aria pukutukuk yoweihhi aih ipak pape penekheh iri. Eik yakri inekep abraen nyupeyep um enyudok baraen. Baraen douk enyudok. Ipak enep douk madae pudukem Iruhin uwe.

*Hagak Iri Yegeshiweruh Hukitakumori Ta Hupe Anahaeh*

<sup>35</sup> Enen arpen ta nyirig nyukri, “Kweipon shagok iri arpeshe ta shukitaki mumam? Eshesh ta shukitaki aria shurao maroruh yegeshiweruh?” <sup>36</sup> Enyudok nyarig namudok iri douk nyogugak iri.

Apak madukemesh, ta shuruwepit wit o marep kupaipi shurkwip ta mare pugok aria putar aria epep ta mare pupurep pukih. <sup>37</sup> Eshudok douk apak mawesh iri douk madae mu eshudok douk ta nuhutih ta shutogur iri uwe, kabi douk shus aria nyeiguhw um, uwok. Apak mau shurkwip meyoh. Anep witip shurkwip o kupaipi worigunip. <sup>38</sup> Aria Iruhin anan kanak nenekep patogur aria nekep shus aria nyeiguhw kabi anan nakri um. Ihipmorim sabaipari sisigip yomogip shurkwip Iruhin douk nekep sisigis yomogis shus sani nyeiguhw. <sup>39</sup> Ithiruhmorim yegeshiweruh douk madae hupe atug yomag uwe, uwok. Arpesh anaruh sikiruh yegeshiweruh, burguhwanaruh sikiruh, armiguhwanaruh sikiruh, aria eiguhwanaruh sikiruh. <sup>40</sup> Aria shape iruhw heven iri eshudok douk shape iruhw, aria shape agundok atap iri douk shape atap. Aria shape iruhw iri esheshiruh hatrugun-iruhi yegeshiweruh douk anaruh sikiruh. Aria shape atap iri esheshiruh anaruh sikiruh. <sup>41</sup> Nyumnahin aun douk natruguni anahaeh, aria wabin natruguni anahaeh. Aria unib watruguni anahaeh. Aria owo atuk atin shopunek douk watruguni anahaeh.

<sup>42</sup> Aria shagok iri arpesh shukitaki um douk ta namudok atin. Arhudok yegeshiweruh douk marumoruh iri arhudok ta hutarukuk. Aria arhudok douk ta wata hukitaki iri ta mare wata yoweruh aria hutar uwe, uwok. Araruh ta yopuruh aria hupe um hupe ihih nyumneh. <sup>43</sup> Arhudok yegeshiweruh apak marumoruh iri apa yoweruh aria hatar. Aria arpesh madae shanadudareh-umoruh uwe. Aria yegeshiweruh douk ta wata hukitaki iri, araruh ta yopuruh aria hutrugun abom. Aria yegeshiweruh apak marumoruh iri douk madae dodogowiruh uwe. Aria yegeshiweruh douk ta wata hukitaki iri ta dodogowiruh abom. <sup>44</sup> Ahwudok yegenyihw apak marumohw iri, ohohw douk agundok atapihw. Aria ahwudok douk ta wata hwukitaki iri, ohohw douk Iruhin ananin Mishin nyapenyohw iri. Araruh douk bioruh yegeshiweruh hape.

Onohw agundok atapihw, aria onohw Iruhin ananin Mishin nyapenyohw iri. <sup>45</sup> Aria baraden nyetem Iruhin ananik Buk iri shopunek douk nyakri namudok, "Sagomatinyin narik iri arman Adam douk natogur arpen mishin nyapenyen iri." Aria nagiguk natograri iri Adam douk nakitaki wonugwehw aria natogur yopunyi Mishin douk arpesh sharaen aria nyenekesh shape wosik ihih nyumneh iri. <sup>46</sup> Aria araruh douk madae hunaki iruhw heven iri yegeshiweruh hurik hutogur uwe, uwok. Araruh douk agundok atapiruh harik hatogur hape. Aria arhudok hanaki iruhw heven iri douk hagiguk hatogur. <sup>47</sup> Narik iri arman, Iruhin douk nohur amnab nakwnishab nenekan natogur arpen aria nape. Aria nagiguk iri arman douk nanaki iruhw heven iri. <sup>48</sup> Agundok atapish iri arpesh douk shape kabi nanudok arman douk Iruhin nakwu amnab nenekan iri. Aria shanaki iruhw heven iri, eshesh shape kabi anudok arman douk nanaki iruhw heven iri. <sup>49</sup> Douk apak mape kabi douk agundok atapini arman um. Aria kweipon shopunek ta namudok atin, apak ta mupe kabi douk anudok douk nunaki iruhw heven iri um.

<sup>50</sup> O ipak eikish arpesh, eik yakri abom um ikripep enyudok baraden goruren um ipak. Agundok atapishi arpesh ta mare shunak shupe agundok douk Iruhin ta nupe Debeini um ananish arpesh shupeum uwe, uwok. Agundok atapishi arpesh douk ta shugok aria shutar aria ta mare shugrem yopishi eshudok eneshenesh douk ta shupe um shupe aria mare yowesh atish iri. <sup>51</sup> Ipak mnek, eik yakri iwerehen ikripep enen baraden douk seiwok nyanabeshuk nyape iri. Baraden enyudok. Apak ihishmorim Iruhin ananish arpesh douk wata mape iri ta mare mugok uwe, uwok. Aria Iruhin ta nunekap mutogur anahaeh. <sup>52</sup> Enyudok ta nyutogur ahudok atuh kabi douk nabes senek brebre um. Enyen ta nyutogur abudok nyutob douk ta hwugiguk iri oruhw hwiagwreh um. Oruhw ta hwiagwreh aria shagok iri arpesh ta wata shukitaki aria ta mare wata shugok

atin. Aria apak douk wata mape agundok atap iri, Iruhin ta nunekop mutogur anahaeh. <sup>53</sup> Um maresh? Aruhudok apakiruh yegeshiweruh douk apa yoweruh hatar iri ta hutanam hutogur anahaeh um hupe wosik ihih nyumneh. Aria apak arpesh apa magok iri ta mutanam mutogur anahaeh um mare wata mugok atin uwe, uwok. Apak ta mupe wosik abom ihih nyumneh. <sup>54</sup> Aria abudok nyutob apak ta mutogur anahaeh. Aria enyudok ta nyunek enyudok baraen nyetem Iruhin ananik Buk iri nyutogur adurin atin. Baraen douk yakri namudok,

“Iruhin nabouk agundok arpesh shagok abom um nyabuhuk aria nenek uhwinyum gok.”

<sup>55</sup> “Gok, nyakin dodog aria burawog um nyubo arpesh shugok um douk enyum?”

<sup>56</sup> Nyakig burawog douk eneshenesh yoweishi inahos. Aria Iruhin ananin lo douk nyeken dodog eneshenesh yoweishi inahos. <sup>57</sup> Aria apak ta munek tenkyu um Iruhin. Um maresh? Anan nenekap matogur dodogowip aria mabo yoweishi inahos shabuhuk um apakin Debeini Jisas Kraiss ananin debeinyi dodog atin.

<sup>58</sup> Douk namudok aria ipak eikish arpesh douk eik urkum manawashamep iri. Ipak ta piyotu dodogowip. Ipak mare punogugur aria punehigos putanam uwe, uwok. Ipak ta piyotu dodogowip aria pupe um punek Debeini ananin atin mour. Um maresh, ipak padukemesh, enyudok mour ipak peneken um putuk Debeini ananin nyeigur nyuto iruhw um ta mare puneken nyunakuk meyoh. Enyen ta nyukwarmori sabaishi yopishi eshudok eneshenesh iri.

## 16

### *Utabor Um Shutaurum Iruhin Ananish Arpesh Um*

<sup>1</sup> Douk eik yakri ikripep um abrudok utabor douk ipak pape patarumabor um pakri puko Iruhin ananish arpesh shape Jerusalem iri um. Eik yarik yeyabig ahudok yah um ihishmorim Iruhin ananish arpesh shape ihirubmorim warub um

shokugi nahobig Galesia iri. Aria douk eik yakri ipak shopunek ta pugipesh eshesh. <sup>2</sup> Eik yakrip eshesh shape Galesia iri enyudok atin baraen douk ta ikrip ipak um. Baraen douk enyudok. Ihishmorim Sandeih nyumneh, ipak ihishmorim atin atin ta pusiya abrudok utabor ipak parabor agudok ganakuk iri wik aria pubukuk anabor bukuk sik um ipakig urusag. Aria purao debeibori um, ipak pubukuk debeibori, o purao karowibor um, pubukuk karowibor. Ipak punekesh namudok um abudok nyutob eik inakmagu, ipak ta mour uwok um purim utabor um pukesh-abor um. <sup>3</sup> Aria eik yakri ipak pugraeh anam armam um hurao ipakibor utabor hunak um Jerusalem iri shopunek hupe. Aria meih nyumnah eik itogragu, aria ta inek anap shup um eshesh shape Jerusalem iri um ikripesh um amam aria ikomap husuwap hunak. <sup>4</sup> Aria ta wosik um eik shopunek inakumagu, amam ta huni eik munakugu.

### *Pol Nakri Nunak Nutik Iruhin Ananish Arpesh Shape Korin Iri*

<sup>5</sup> Eik ta inaku itrip, aria sagomatin eik ta irik inaku itiguk eshesh shape shokugi nahobig Masedonia iri ba iyoh, aria ta kadak inaku itik ipak. Um maresh? Eik ta iwish inaku namudok Masedonia um. <sup>6</sup> Aria eik madae idukemesh uwe. Eik ta inaku ini ipak mupe roubum o eneh karowih nyumneh, o ini ipak mupe arigaha abudok yoweibi nyutob douk ta eshah atuh hur obi nyutob bunak butuhuk. Aria eik wata ikri inak meiburi kupaiburi wabur um, ipak wosik putaurume um eshudok eneshenesh aria eik inak. <sup>7</sup> Eik yakri uwok um itripukuk meyoh aria inak uwe, uwok. Eik yakri ta Debeini nukri wosik um, eik yakri ini ipak mupe karowihi um roubi nyutob shopunek. <sup>8</sup> Aria eik yakri ipe agundok Efesus arigaha ahudok nyumnah shunek agundok debeguni worigun shahwarogun um Pentikos iri hutogur. <sup>9</sup> Um maresh? Iruhin nenekume yopihi yah hapeime um inek yopinyi mour um itaurum sabaishi arpesh ikripesh ananin baraen aria shatanam shukon aparuh

anan. Aria sabaishi shopunek shak-wiraeh eik um shakri sheneke um eik mare inek enyudok mour.

<sup>10</sup> Aria ta Timoti nunaku nutogur-umep nukripep um, ipak ta punek ananihw apahw hwur wosik. Um maresh? Anan douk nenek Debeini ananin mour kabi douk eik yape yeneken um. <sup>11</sup> Mare putrun aria pukri anan douk anan ro-hwini arman aria pukanaguk agabus uwe, uwok. Ipak punekan ananihw apahw hwur wosik aria putauruman pukon enesh eshudok eneshenesh aria peshopokan nutanam nunaki um eik. Eik douk yape yatrugun um anan nani anam Iruhin ananim armam shopunek.

<sup>12</sup> Douk eik yakri ikripep um apakin ashuken Apolos. Eik yeshopokan um nunigu amudok Iruhin ananim armam douk hanaku hatrip iri um hunaku. Aria anan nakri uwok um nunaku ahudok nyumnah. Aria meihi nyumnah anan kanak nutik anah yopihi yah um nunaku-magu, anan ta nunaku.

### *Enen Shopunek Nyagiguk Iri Baraen*

<sup>13</sup> Ipak ta gamo putaurum ipakish horik horin aria gamo pusuhw Kraiss ananin baraen dodog pugipeshen wosik. Ipak mare pupe urkum mushukepuk uwe, uwok. Ipak ta piyotu dodogowip aria mare punogugur um enesh eshudok eneshenesh. <sup>14</sup> Ipak punek enesh-enesh eshudok um, ipakip urkwip ta punawasham Iruhin nini arpesh aria punekesh.

<sup>15-16</sup> Aria ipak padukemesh um Stefanas nani ananip awirop douk shape shokugi nahobig Akaia iri. Eshesh douk sago-matin um shatogur Kristen iri. Aria kupaishi arpesh shape shokugi nahobig Akaia iri shagiguk shatogur Kristen. Ihih nyumneh Stefanas nani ananish shapeum shenek enyudok mour um shutaurum Iruhin ananish arpesh. Aria ipak eik-ishi arpesh, eik yakri ikripep dodogoiwe atuwe um ipak pupe shakamum amudokmori armam huni ihishmorim arpesh douk shataurumam shape shenek enyudok mour iri. <sup>17</sup> Eik douk yanadudareh um agundok Stefanas nani Fortunatus iri

Akaikus hanaki um. Um maresh? Ipak douk madae punaki putiwe uwe. Aria douk madae punaki putiwe um, aria douk amam hanaki hatiwe aria hutaaurume. <sup>18</sup> Aria amam hanaki aria henek eik yani ipak manadudareh aria apakiruh aparuh hor wosik. Douk namudok aria ipak ta punadudareh um amudokmori armam aria putuk amamish nyeiguhw shuto iruhw.

<sup>19</sup> Iruhin ananish arpesh shape sabairubi shokurubi warub douk bape shokugi nahobig Esia iri shenek-umep yopihi nyumneh ipak. Aria Akwila aria Prisila shani Iruhin ananish arpesh douk apa shape shenek lotu esheshit urupat iri shopunek shenekumep yopihi nyumneh Debeini ananin nyeigur. <sup>20</sup> Ihishmorim Kristen shape agundok iri shenekumep yopihi nyumneh ipak. Aria ipak ta pugipesh apak Iruhin ananish arpesh apakih aih aria punapuprik ipakish Iruhin ananish arpesh.

<sup>21</sup> Douk eik kanak Pol eikis wis yowemagu enyudok atin banenyi baraen namudok. "Eik yenekumep yopuhi nyumnah ipak."

<sup>22</sup> Aria enen arpen nyukri uwok um urkum munawasham Debeini um, eik yakri Iruhin nen nyugok.

Aria eik yakri Debeini, nyak nyunaki. <sup>23</sup> Eik yakri Debeini Jisas nutaurumep meyoh.

<sup>24</sup> Eik urkum manawasham ipak ihishmorim douk pani eik matukur Kraiss Jisas iri.

## Pagiguk Iri Shup Douk Pol Nenekap Panam Eshesh Korin Iri

*Banenyi Baraen Pol Nagiguk Neneken  
Nyanak Um Eshesh Korin Iri*

1:1-11 Pol nenek beten um eshesh Korin  
aria nenek tenkyu um Iruhin um  
eshesh

1:12—7:16 Pol nakriפש baraen um  
apak Kristen munekeh iri aih hani  
sabainyi amaen apak ta minyusah iri

8:1—9:15 Baraen um utabor eshesh  
shaborubuk um shuko eshudok  
yaruhish Kristen iri um

10:1—12:21 Pol nakriפש baraen um  
ananih aih hani amaen douk naraen  
um nenek Kraiss ananin mour um.  
Nakri Kraiss atun natauruman meyoh  
nenekan dodogowin.

13:1-10 Eshesh Korin ta shunek skelum  
eshesh kanak um eshesh shenek bilip  
wosik atin um Kraiss o uwok.

13:11-14 Pol nakriפש ananin nyatuh  
iri baraen aria nenemesh yopuhi  
nyumnah

<sup>1</sup> Eik Pol, anan Kraiss Jisas ananin  
apospel. Iruhin anan meyoh nakri aria na-  
graehe um enyudok mour aposel um inak  
ikriפש ananin baraen. Eik yani apakin  
wanin Timoti weneku apudok shup um  
ipak Iruhin ananishi arpeshe douk pape  
wabur Korin iri. Wenekap-umogu ipak  
pani ihish Iruhin ananish arpeshe douk  
shape ihirub warub um agudok shokugi  
nahobig Akaia iri. <sup>2</sup> Ohwak wakri apakin  
Yain Iruhin nini Debeini Jisas Kraiss  
hutaaurumep meyoh aria hunek ipakiruh  
aparuh hur wosik.

*Pol Nenek Tenkyu Um Iruhin Um Agun-  
dok Natauruman Nagabe Ananin Mishin  
Um*

<sup>3</sup> Apak ta mutuk apakin Yain Iruhin  
ananin nyeigur nyuto iruhw. Anan  
douk apakin Debeini Jisas Kraiss ananin  
Iruhin aria ananin Yain shopunek. Aria  
anan douk baugos abom um agundok

shenek gihaum kupaishi aria shatau-  
rumesh meyoh um. Anudok Iruhin apa  
nagabe eshudok arpeshe douk amaen ny-  
atogrumesh aria esheshiruh aparuh apa  
hor wosik. <sup>4</sup> Ihinyumori amaen ny-  
atogur um apak iri, anan apa nataurumap  
nagabe apakish mishish aria apakiruh  
aparuh hor wosik. Nataurumap na-  
mudok um apak wosik abom um mu-  
taurum eshudok arpeshe douk enenye-  
nen amaen nyatogrumesh iri aria es-  
heshiruh aparuh hur wosik. Apak mu-  
taurumesh kabi Iruhin narik nataurum  
apak um. <sup>5</sup> Debeiri eriger riguk Kraiss  
nemnekar iri, apak shopunek ta mem-  
nekar. Aria namudok atin. Kraiss douk  
nataurumap nagabe apakish mishish  
aria nenek apakiruh aparuh abom hor  
wosik. <sup>6</sup> Abudok nyutob amaen ny-  
atogrum apak menyusah obi nyutob,  
enyudok douk nyatogrum Iruhin wata  
narao ipak patanamori aria ipakiruh  
aparuh hor wosik. Iruhin nenek apakiruh  
aparuh hor wosik aria anan shopunek  
nataurumep aria ipakiruh aparuh hor  
wosik. Amaen douk nyatogrumep um  
Iruhin nunekep piyotu dodog. Ipak  
douk pasah enyudok amaen kabi apak  
menyusah iri um, aria peyotu dodogowip.  
<sup>7</sup> Aria apak madukemesh abom um abu-  
dok nyutob amaen nyutogrumep obi nyu-  
tob, ipak ta piyotu dodog. Madukemesh  
um ipak pani apak marao eriger na-  
mudok aria ta wata punaki punoprom  
pani apak um agundok Debeini nunek  
apakiruh aparuh hor wosik um.

<sup>8</sup> O apakish ashukenyish owashish,  
apak makri ipak padukemesh um enyu-  
dok amaen douk nyatogrumap agu-  
dok shokugi nahobig Esia iri. De-  
beinyi amaen abom nyopubuk atap aria  
nyabouk apakin dodog nyabuhuk. Na-  
mudok aria apak mor urkwip makri  
apak ta mugok um atin. <sup>9</sup> Adur atin,  
apakigun um numun douk abom mem-  
nek yowegun kabi jas nakri um enen  
arpen ta nyugok aria enyen nyemnek  
yowen um. Enyudok douk nyatogrum  
apak kabi madae urkwip porum apakin  
dodog, uwok. Enyudok nyatagrumap um  
apak ta urkwip porum Iruhin ananin



atin dodog douk nohuri shagok iri arpesk shakitak shape iri. <sup>10</sup> Enyudok abom debeinyi amaen ta nyop mugok, aria uwok. Iruhin anan wata narap mape wosik. Kweipon anan shopunek ta wata nurap mupe wosik abom. Enenyenen amaen nyukri nyutogrumap obi nyutob, apak douk madukemesh abom um anan adur ta nupe um nutaurumap namudok atin. <sup>11</sup> Aria ipak ta putaurumap puhwar Iruhin um anan nutaurumap. Iruhin ta numnek ipakin beten aria ta nutaurumap. Aria sabaishi ta shutik namudok aria shunek tenkyu um Iruhin um enyudok anan neneken nataurum apak meyoh um.

*Sagomatin Pol Nakri Nunak Um Korin Aria Ta Nakri Uwok Um Nanak*

<sup>12</sup> Eik apa yanagunukuk um enyudok atin. Enyudok. Eikim urkum mor wosik aria yadukemesh abom um eik apa yenek adurihi hani yopihi aih. Yani ipak mape obi nyutob douk yenekeh yariguk. Ehudok aih, eik douk madae igipesh agundok atapishi arpeskin saki aria douk inekesh uwe, uwok. Ekeh douk hanakumori Iruhin atun. Anan douk nataurume meyoh aria neyohur yenekeh. <sup>13-14</sup> Abudok nyutob yenekumep-ugu parik iri shup pani apudok doukip obi nyutob, eik apa yowemagu baraan douk wosik putarihen aria pudukem baugenyum iri atin. Adur, douk abudok nyutob, ipak douk madae pudukemen wosik uwe um ihin yenyem iri baraan, uwok. Aria eik yadukemesh um anob nyutob, ipak ta pudukemesh abom um baugenyum ihenyumori eikin baraan. Pudukemesh aria ahudok nyumnah Jisas apakin Debeini nutanamori ahi hutogrum, ipak ta putuk eikin nyeigur punadudareh kabi eik ta ituk ipakish nyeiguhw inadudareh um ipak um. <sup>15-16</sup> Eik douk yadukemesh abom um abudok nyutob eik inaku itrip obi nyutob, ipak ta punadudareh um eik. Douk namudok aria yakri um inaku itiguk ipak purik aria wata ikutip pupeik aria inak um agudok anag shokugi nahobig Masedonia. Aria abudok nyutob ikutukuk Masedonia obi nyutob, eik douk yakri

um wata inaki itripuk. Yakri inekesh namudok um itaurumep aria Iruhin nunekep punadudareh biyeh. Aria shopunek yakri inaku itrip um ipak ta putaurume um inak um agudok shokugi nahobig Judia. <sup>17</sup> Aria douk ta mumam? Ipak pakri eik yakri enyudok baraan um inakumagu ipak pakri eik yenek rohwmep, aka? Ipak pakri eik atin yeyagwreh adurin atinyi baraan meyoh aria wata yakri uwok um inakugu, aka? Kabi agundok atapishi arpesk apa shenekesh um, um agundok pakri eik apa yakri wosik aria uwok shopunek atin um? Adur, namudok eik madae inekesh atin uwe um, uwok. <sup>18</sup> Iruhin apa nagipesh ihenyumori ananin baraan wosik. Aria douk namudok atin. Eik apa yakripep adurin atin baraan. Madae ipeum ikripep wosik aria wata inabadig ikripep um uwok shopunek atin uwe, uwok. <sup>19</sup> Eik yani Sailas aria Timoti douk makripep baraan um Iruhin ananin Nuganin Jisas Krai. Aria padukemesh. Krai douk madae nunek rohwm nukri wosik aria wata nukri uwok shopunek atin uwe, uwok. Krai anan douk napeum nakri wosik atin. <sup>20</sup> Ihenyumorim Iruhin nakripepenyi adurin atinyi baraan promis douk nyape. Aria Krai douk nagipesh enyudok ihenyumorim baraan aria neneken nyatogur adurin atin. Namudok aria abudok nyutob apak memnek enyudok Iruhin ananin adurin atinyi baraan obi nyutob, apak apa makri um Krai ananin nyeigur makri, "Adur" aria matuk Iruhin ananin nyeigur nyato iruhw. <sup>21</sup> Iruhin meyoh apa nenek ipak pani apak menek bilip um Krai meyotu dodog. Aria douk nanagraehap nakop ananin Mishin aria mape ananishi arpesk. <sup>22</sup> Anan douk nenek ananin kak nanagraehap mape ananipari atup. Aria nakop ananin Mishin nyawish nyape apakiruh aparuh. Enyudok ananin Mishin douk nyarik iri yopinyi enyudok um ihishmorim yopishi eshudok douk Iruhin nakri um kweipon ta nukopesh iri. Enyudok Mishin douk maraan nyapenyap. Namudok aria apak madukemesh abom um ihishmori eshudok enesh douk adur ta muraesh um

atin.

*Pol Madae Nunak Arigas Um Korin Uwe*

<sup>23</sup> Douk eik yakri um Iruhin ananin nyeigur um inek enyudok eikin baraen nyutogur adurin. Adur atin, eik madae inaku Korin arigas uwe, uwok. Um maresh? Eik yakri uwok um inaku ikripep enen dodogowinyi baraen aria inek ipakip urkwip yowep. Yakri uwok um inakumagu douk namudok. <sup>24</sup> Eik douk madae ikri apak mupe debeipari um mugapesh um ipakin bilip um Kraiss uwe, uwok. Agundok penek bilip um Kraiss um douk peyotu dodog. Apak apa mani ipak manoprom um mour ipak ta pugipesh Kraiss wosik aria punadudareh abom puriguk.

## 2

<sup>1</sup> Eik yenek urkum namudok aria yakri uwok um inaku, uwok. Um maresh? Yakri ta inaku aria inekep ipakiruh aparuh yoweruh kabi riguk um. <sup>2</sup> Aria ta eik inaku inek ipakiruh aparuh yoweruh akure, aria ta wata omi nyupe um nyunek eik inadudareh? Douk ipak enyudok yenekep aparuh yoweruh iri atip. <sup>3</sup> Ipak douk penek eik yanadudareh iri. Namudok aria yakri uwok um inaku itrip itik ipakih aih aria eikihw apahw yowehw, uwok. Douk namudok aria eik yeneku shup douk riguk yenekapugu iri. Eik yadukem ipak. Aria eik inadudareh um enesh eshudok um, ipak ihipmorim shopunek apa panadudareh-umesh. <sup>4</sup> Adur, abudok nyutob yeneku shup obi nyutob, eik douk apahw yowehw abom aria urkum yowem yareh yariguk. Aria eik madae inekapumagu inek ipakiruh aparuh yoweruh uwe, uwok. Yenekapumagu ipak pudukemesh um agundok eik urkum manawashamep abom um.

*Eshesh Korin Madae Shushuwesh Shupe Eshudok Douk Eshesh Shenekesh Iri Yoweishi Inahos Um Kupaishi, Uwok*

<sup>5</sup> Aria anan arman nenek enesh arpesih um ipak aparuh yoweruh um, anan douk madae nunek eik apahw yowehw uwe, uwok. Eik yakri uwok um iyagwreh

sabainyi dodogowinyi baraen um enyudok, uwok. Aria yakri ikri anudok arman douk nenek ipak ihipmorim um ipakiruh aparuh yoweruh. <sup>6</sup> Aria amaen douk ipak sabaipari pako anudok arman um pugapeshan um douk jurug. <sup>7</sup> Douk ipak mare wata punasuhwen pupe, uwok. Pukwrenyuguk. Ipak ta pugapesh ananihw apahw um wata hwur wosik. Uwok um, ta ananihw apahw yowehw aria nupe yowen abom. <sup>8</sup> Namudok aria douk yeyagwreh dodog um piyabigan aria nudukemesh um ipakip urkwip wata panawashaman atin. <sup>9</sup> Apudok riguk yenekap iri shup douk yenekapugu um ikwiraeh ipak meyoh. Yakri idukem ipakih aih um ipak apa pagipesh eikin baraen um ihishmorim eshudok eneshenesh aka, uwok. <sup>10</sup> Aria ipak madae pusuwen pupe um yoweishi inahos um anudok arman nenekeshumep iri um, eik douk shopunek madae isuwen ipe, yakri nyeneken. Aria ta anudok arman nenek enesh yoweishi inahos um eik aria eik ta ikwreyeshuk mare isuwesh um, aria eik douk yakri nyeneken. Kraiss douk natiwe aria nadukeme. Eik yenekesh namudok um yakri ipak pupe wosik. <sup>11</sup> Eik apa yenekesh namudok um maresh? Yakri ta Satan nunek uhwinyumap aria nop mubuhuk. Aria apak wosik madukem ehudok ananih aih um nenek rohwumesh um.

*Pol Nakri Nutik Taitus Abom*

<sup>12</sup> Abudok nyutob yanak yatogragu wabur Troas um ikripesh yopinyi baraen um Kraiss obi nyutob, eik douk yatik um Debeini nenekume yah um inek enyudok ananin mour. <sup>13</sup> Aria eikihw apahw douk madae hwur wosik uwe, uwok. Um maresh? Eik madae iparug eikin wanin Taitus agundok uwe, uwok. Namudok aria yenekumeshuk yopuhi nyumnah eshesh Troas aria yakutishukuk yanak yatogur agudok anag shokugi nahobig Masedonia.

*Iruhin Atun Apa Nataurum Ananim Aposel Dodogowim Aria Henek Ananin Mour*

<sup>14</sup> Aria douk yenek tenkyu um Iruhin. Um maresh? Ihih nyumneh anan

apa nataurum apak mantoruh Kraisa aria mani anan manoprom aria mabo yoweihi aih habuhuk.<sup>2:14</sup>Iruhin nohur apak makriפש ananin yopinyi baraan aria arpes shape ihirub warub iri shemneken shadukem Kraisa wosik. Agundok shadukem Kraisa um douk kabi shemnek anar yopuri unar douk rowe ranak ihirub warub aria shemnekar shanadudareh um.<sup>15</sup> Um maresh? Apak douk kabi enen sanda nyeisik yopuri unar iri um. Enyudok sanda douk Kraisa nenek ofamen nako Iruhin iri. Enyen douk nyeisik nyanak um eshudok douk Iruhin nape naraesh shatanamori shape wosik iri shani eshudok douk shape shagipesh ahudok yah hanak um yoweiburi wabur iri shopunek.<sup>16</sup> Eshudok douk shape shagipesh ahudok yah hanakum yoweiburi wabur iri, enyudok yopinyi sanda douk nyeisig kabi unar um. Aria arudok unar ta runekesh shugok shunak shuwishuk. Aria eshudok douk Iruhin nape naraesh iri, eshesh douk shemnek enyudok sanda nyeisig yopuri unar aria ta runekesh shupe wosik abom ihih nyumneh. Aria enyudokmori mour ta omi dodogowin um nyuneken? Uwok meyoh.<sup>17</sup> Anam sabaimi armam apa harahaen hanak aria hanator utabor um agundok hakriפש Iruhin ananin baraan um. Aria apak madae muneken kabi amam heneken um uwe, uwok. Apak mantoruh Kraisa iri, apak douk Iruhin nakop enyudok mour aria neshopokap manak meneken wosik. Anan natrup um douk madae munek roh wu, uwok. Makriפש ananin baraan wosik abom.

### 3

#### *Amam Aposel Douk Henek Mourum Iruhin Ananin Namunyi Kontrak Iri*

<sup>1</sup> Baraan iganigadae makriפש um, ipak apa pakri apak wata mape matuk apakish nyeiguhw shato iruhw, aka? Ipak apa pakri apak madae dodogowipari uwe, aria morig ipak o kupaishi um punek anap shup aria putuk apakish nyeiguhw shuto iruhw aka, uwok? Kabi anam

hape henekesh um? Adur atin uwok.<sup>2</sup> Ipak kanak douk kabi apakip shup abom um arpes shutrip aria shudukem apakih aih. Baraan nyape apudok shup iri douk nyape numun apakip urkwip um ihishmorim arpes shutrin aria shutarihen shudukem apakih aih.<sup>3</sup> Ipak kanak douk adur abom pape kabi anap shup douk Kraisa nenekap iri um. Nenek apudok shup um agundok munek enyudok ananin mour aria mataurumep patogur Kristen um. Anan douk madae nukwu ink nunekap uwe, uwok. Nakwu Iruhin douk nape ihih nyumneh iri ananin Mishin nenekap. Aria douk madae nunekap nuwem baraan nyutem utabor uwe, uwok. Nenekap nenyem nyape numun arpeship urkwip.<sup>4</sup> Apak douk makriפש enyudok baraan um maresh? Apak makriפש Iruhin anan dodogowin atun abom. Kraisa nataurumap aria madukemesh um Iruhin ta nunek ananin mour nyutogur yopin abom.<sup>5</sup> Adur, apak kanak ta mare wosik um munek enyudok mour, uwok. Iruhin atun nutaurumap dodogowip aria douk wosik meneken.<sup>6</sup> Iruhin anan kanak nutaurumap aria wosik munek enyudok ananin mour um manak makriפש baraan um enyudok ananin namunyi kontrak. Enyudok namunyi kontrak douk madae hunyem nyutem um shus meyoh uwe, uwok. Enyen douk Iruhin ananin Mishin meyoh nyakwarumen. Aria enyudok enen baraan lo henyem shus meyoh iri, enyen douk nyenek arpes shagok shanak shawishuk. Aria Iruhin ananin Mishin douk nyenekesh shape wosik abom.<sup>7</sup> Ipak urkwip purum enyudok. Enyudok mour douk amam hakriפש Iruhin ananin lo seiwok nakoguk Moses enyi heneken iri, enyen douk nyenek arpes shagok. Abudok nyutob Iruhin nowemori enyudok lo beriyaibori utabor aria nekeshenyi obi nyutob, anan Iruhin douk natruguni abom aria bogaragun. Namudok aria sagomatin, Moses ananin domaen douk nyatrugun abom aria eshesh Israel madae wosik um shutik ananin domaen uwe,

2:14 **2:14** Baugenyum enyudok baraan nyetem Grik iri douk madae nyutogur wosik uwe, uwok.

uwok. Aria madae roubi uwe aria ananin domaen wata nyape nyatrugun wosik atin arigah arigaha aria hagokenyuk. <sup>8</sup> Aria enyudok namunyi mour um Iruhin nohur apak manak makripesh ananin baraen aria sharao ananin Mishin um, enyen douk dedeben atin abom. Enyen douk nyeshagrakuk seiwokin mour abom um lo. Douk apak menek enyudok namunyi mour aria matik um Iruhin neneken nyape um nyatogur dodogowin atin aria bogaragun abom. Enyen douk nyeshagrakuk agundok enyudok seiwok Moses neneken iri mour ba bogaragun um. <sup>9</sup> Enyudok seiwokin mour douk nyagipesh lo nyeneken iri, enyen douk apa nyenekumap baraen aria nyakrium apak yoweipari atup aria ta mugok munak muwishuk. Enyudok seiwokin mour douk nyani iri Iruhin ananit debeiti lait nyanaki. Aria enyudok namunyi mour um makrip arpesih um shutogur yopish um, enyen douk nyarauri debeiti abom Iruhin ananit lait teshagrakuk atudok seiwokin mour nyarati iri. <sup>10</sup> Enyudok namunyi mour douk Iruhin napuhur meneken iri, enyen douk dedeben atin abom nyatrugun nyeshagrakuk agundok seiwok harik heneken iri mour nyatrugun um. Namudok aria douk, enyudok seiwokin mour nyatrugun um douk madae nyutrugun uwe, uwok. <sup>11</sup> Enyudok seiwokin nyarik iri mour douk nyape banab nyutob meyoh aria nyatuh. Enyen douk nyani atudok debeiti Iruhin ananit lait nyanaki. Namudok aria douk madukemesh. Enyudok namunyi mour douk ta nyupe ihih nyumneh abom iri, enyen douk nyarauri debeiti abom Iruhin ananit lait. Atat douk tatrugun abom teshagrakuk seiwokin mour nyarati iri.

<sup>12</sup> Apak douk madukemesh abom makri adur um atudok lait ta tatrugun abom tupe namudok atin. Namudok aria apak douk mare munogugur atin uwe, uwok. Apa meyotu dodog aria makripesh Iruhin ananin baraen yopugunum. <sup>13</sup> Apak douk madae munekesh kabi Moses nenekesh um uwe, uwok. Abudok nyutob ananin domaen wata nyape nyatrugun obi nyutob, anan douk

nohuri anap rupahip aria nashapomuk domaen. Nenekesh namudok um eshesh Israel mare shutik ananin domaen douk nyape nyatrugun atin arigah arigaha aria ta hagokenyuk iri. <sup>14</sup> Aria eshesh Israel douk baragos seshukesh abom. Seiwok arigaha douk, eshesh shatarih Iruhin ananin baraen um seiwokin kontrak obi nyutob, eshesh douk madae shudukemen atin uwe baugenyum, uwok. Agundok atup rupahip wata pape aria poweshiguk esheship urkwip. Madae enen arpen nyupniguk uwe, uwok. Opudok rupahip punaniguk obi nyutob, apak Iruhin ta nupniguk abudok atub nyutob arpesih shunotukur Kraish obi nyutob. <sup>15</sup> Seiwok arigaha douk, abudok nyutob shatarih Iruhin ananin baraen seiwok nakoguk Moses enyi um, apudok rupahip douk watak poweshik esheship urkwip. <sup>16</sup> Aria eshudok arpesih douk shatanam shukon aparuh Debeini iri, eshudok Iruhin apa nakweshih-umeshuk apudok rupahip. <sup>17</sup> Aria enyudok baraen um yakri Debeini um, enyen douk nyakri Iruhin ananin Mishin. Meinyi arpen douk Debeini ananin Mishin nyapenyen iri, enyen douk madae enesh eshudok shuweshiken uwe, uwok. Enyudok arpen douk kabi riguk nyonoweshik aria douk wata shakweshihen um. <sup>18</sup> Aria apak ihishmorim douk madae enesh eshudok shubeshuk apakigos yamagos uwe, uwok. Namudok aria Debeini ananit debeiti lait tatrugun tanaki tasuhw apak matrugun aria tatanam tatrugun tasuhw kupaishi arpesih. Ihih nyumneh apak mape um marao atudok lait namudok atin aria tenekap matogur anahaeh abom madukem Debeini-eh aih. Debeini anan douk Mishin. Anan kanak napeum nenekap matogur namudok aria meshagrakuk kabi riguk marik mape um.

## 4

### *Amam Aposel Douk Hape Kabi Annabis Marus Um*

<sup>1</sup> Iruhin anan nenek gihaumap aria nakop enyudok mour. Namudok aria apak douk mare arigehop mukri mukutinyuk uwe, uwok. <sup>2</sup> Apak douk

mekehuk agabus ihihmorim ehudok abraenyihi shanabeshuk shenekeh iri yoweihi aih. Mare munek roh w mutogur anahaeh um Iruhin ananin baraan mukriפש kupaini uwe, uwok. Apak apa makriפש ananin adurinyi baraan yopugunum atugun. Um makri ihishmorim arפש shutrip shudukem apakih aih, aria esheship urkwip pukri apak douk menek Iruhin ananin mour wosik aria anan natrup nakri wosik. <sup>3</sup> Aria ta enesh arפש baragos seshukesh mare shudukem baugenyum enyudok makriפשenyi Iruhin ananin yopinyi baraan um, eshudok arפש douk shape shagipesh ahudok yah douk hanakum yoweiburi wabur iri. <sup>4</sup> Eshesh douk madae shunek bilip um Krai s uwe, uwok. Um maresh? Satan agundok atapin rohwin god noweshiguk esheship urkwip abom aria madae shutik atudok lait douk tatrugun-umesh iri uwe, uwok. Atudok lait douk takitak enyudok Iruhin ananin yopinyi baraan. Enyen douk nyeyabigap um agundok Krai s natrugun abom aria nadukemum Iruhin um. <sup>5</sup> Mnek, apak douk madae mupe um mukriפש baraan um apak kanak aria mupe mutuk apakish nyeiguhw shuto iruhw uwe, uwok. Apak apa makriפש namudok. Makri, "Jisas Krai s anan douk Debeini. Aria apak apa magipesh anan ih aih aria mape shakamum ipak mape menekumep mour meyoh." <sup>6</sup> Seiwok wata sagomatin Iruhin nakri, "Lait tutogur tuhiyahuk arukwutigun um." Aria douk anudok atun Iruhin neneki ananit lait tanaki tatrugun numun apakip urkwip. Atudok lait tatrugunumap matik Krai s ananin domaen aria madukemesh um agundok Iruhin dodogowin atun abom aria natrugun nariguk um.

<sup>7</sup> Apak aposel douk madukem amnabis marus madae dodogowimi armam uwe, uwok. Aria apak douk enesh yopishi eshudok eneshenesh shapenyap kabi debeibori abom utabor bor numun amnabis marus um. Yopishi eshudok eneshenesh douk shapenyap um ihish arפש shutrish aria shudukemesh um enyudok dodogowinyi gobi apak masuhwen

munek ananin mour um douk nyeshagrakuk ihishmori eneshenesh eshudok. Enyudok gobi douk nyanakumori Iruhin atun. Apak aposel uwok. <sup>8</sup> Adur, ihigun manak um douk enenyenen amaen nyatogrumap, aria enyen madae nyupabuk atap abom uwe, uwok. Sabaishi eshudok apa shenekap enenyenen shanumogap, aria madae mugugak abom mupe namudok uwe. <sup>9</sup> Anabik um shenekap enenyenen, aria Iruhin madae nukutupaguk atin uwe, uwok. Nani apak mape. Apa shap matu, aria madae mugok abom uwe, uwok. <sup>10</sup> Ihih nyumneh apak douk shap shakri apak mugok abom um atugun, kabi shabo Jisas nagok um. Aria agundok shap aria apak wata dodogowip mape um douk mape um arפש shutrup aria shudukemesh shukri Jisas anan douk adur abom nape apak. <sup>11</sup> Ihih nyumneh apak mape o marahaen um, arפש apa shokwiraeh um shop mugok. Enyudok douk nyatogrumap um arפש shutik apak apa magok aria shudukemesh shukri Jisas anan adur nape abom apak. <sup>12</sup> Enenyenen amaen nyatogrum apak aposel aria makri um mugok um atugun. Apak mape namudok aria ipak ta pupe wosik abom namudok atin.

<sup>13</sup> Baraan nyetem Iruhin ananik Buk iri nyakri namudok. "Eik douk yenek bilip um Iruhin, namudok aria douk yakriפש-uman." Apak aposel douk shopunek munek bilip um Jisas aria magipesh ehudok atih aih makriפש um Iruhin ananin baraan. <sup>14</sup> Apak menekesh namudok um maresh? Apak madukemesh namudok. Jisas douk nagok aria Iruhin wata nonohur nakitak nape. Namudok aria kabi nohur Jisas nakitak napeum, anan ta wata shopunek nuhur apak munotukur Krai s aria mukitaki aria nurauri ipak puni apak munak miyotu abom agundok Iruhin napeum. <sup>15</sup> Eik yakri namudok um maresh? Eik yadukemesh um ihinyumorim enyudok douk nyatogrum apak um nyutaurum ipak punek bilip um Krai s aria pupe wosik. Aria ehudok aih um Iruhin nataurumap meyoh um douk

hape hatogrum sabaishi arpesih abom aria shenek bilipuman. Namudok aria eshudok arpesih ta shunadudareh aria shunek tenkyu um Iruhin shuriguk. Aria ta shutuk ananin nyeigur nyuto iruhw.

*Amam Aposel Douk Hasuhw Krai  
Ananin Baraen Aria Heyotu Dodogowim  
Atum Um Ananin Mour*

<sup>16</sup> Douk namudok aria apak madae aparuh yoweruh mukri mukutukuk ananin mour uwe, uwok. Adur, apakiruh yegeshiweruh douk hape hagok aria madae dodogo-wiruh uwe, aria numun apakiruh aparuh apa harao namunyi dodog aria ihih nyumneh hapeum hatogur namuruhi. <sup>17</sup> Um maresh? Apak madukemesh um enyudok amaen nyatogrumap marao eriger aria douk madae debeinyi uwe, uwok. Ta muraen banab nyutob meyoh. Enyudok douk nyatogrumap um kweipon apak ta mutrugun abom mupe wosik ihih nyumneh agundok Iruhin napeum. Agundok kweipon mupe wosik um douk neshagrakuk abom ihinyumorim amaen douk nyape nyatogrumap. <sup>18</sup> Apak douk madae mupe um mutik enyudok enenyenen amaen douk nyatogrumap iri uwe, uwok. Apak mape aria urkwip por abom um eshudok douk apak madae mutrish apakis nabes iri uwe. Um maresh? Eshudok douk apa matrish iri, eshesh ta shupe banab nyutob meyoh. Aria yopishi eshudok douk apak madae wosik um mutrish iri uwe, eshesh ta shupe ihih nyumneh abom.

## 5

<sup>1</sup> Apak madukemesh um, ta arhudok douk mapenyoruh agundok atap iri yegeshiweruh hukri hunak yoweruhuk, aria arhudok anaruh Iruhin nakri nukoparuh iri douk hakusumap gani iruhw heven. Arhudok yegeshiweruh douk madae arpesih shunekaruh wis uwe, uwok. Aria araruh ta hupe abom namudok atin ihih nyumneh. <sup>2</sup> Aria douk apak mape agundok atap obi nyutob, apak douk mape moreh makri mura

arhudok anaruh apakiruh yegeshiweruh douk hakus iruhw heven iri. Makri muraruh um muruhur hishigarup kabi rupeh um. <sup>3</sup> Um maresh? Abudok nyutob mura arhudok yegeshiweruh muruhur obi nyutob, apak ta mare wata mupe kabi magor mape meyoh um, uwok. <sup>4</sup> Abudok nyutob wata mape agundok atapiruh yegeshiweruh<sup>5:4</sup>obi nyutob, apakiruh aparuh apa yoweruh aria mape moreh. Aria apak douk madae mukri uwok um agundok atapiruh yegeshiweruh uwe, uwok. Aria makri um mura namuruhi iruhwiruh yegeshiweruh muruhur. Arhudok doukiruh yegeshiweruh douk ta hutogur anahaeh abom hutogur yopuruh hupe namudok atin. <sup>5</sup> Aria enyudok arpen douk nyataurumap um ehudok aih iri douk Iruhin. Anan douk narik adur nakop ananin Mishin. Enyudok Mishin douk sagramatinyin abom um eshudok enesh yopishi douk Iruhin nakri adur um ta nukopesh iri. Apak douk marao enyudok ananin Mishin. Douk namudok aria madukemesh um ihishmorim yopishi eshudok adur ta muraesh abom um atugun. <sup>6</sup> Apak apa urkwip porum enyudok aria ihih nyumneh mape dodogowip madae urkwip yowep uwe. Apak douk madukemesh. Abudok nyutob apak wata mape um arhudok yegeshiweruh obi nyutob, apak madae muni Debeini mupe agundok anan napeum uwe, uwok. <sup>7</sup> Douk mape agundok atap obi nyutob, apak madae mutrun uwe, uwok. Apak douk masuhw ananin baraen dodog aria mape magipeshen atin. <sup>8</sup> Aria douk yakri. Apak douk dodogowip mape aria makri abom um mukutukuk arhudok yegeshiweruh munak muni Debeini mupe atugun. <sup>9</sup> Aria apak wata mupe agundok atap, o mupe gani iruhw um, sagramatin apak ta dodogowip atop urkwip pur abom um mugipesh anan nakri ahi aih um munekan nanadudareh-umap. <sup>10</sup> Um maresh? Apak madukemesh um apak ihishmorim ta munak mutogur miyotu um Krai ananit kwot. Aria ta apak

5:4 5:4 Baraen nyetem Grik um douk nyakri selig urusag. Baugenyumum douk nyakri apakiruh yegeshiweruh.

munek yopishi o yoweishi inahos abudok nyutob mape arhudok yegeshiweruh obi nyutob, apak ihishmorim atin atin ta mura o yopinyi o yoweinyi poe wosik um aih apak menekeh iri.

*Apak Aposel Douk Mour Nyapenyap Um Mutaaurum Arpesh Shuni Iruhin Shupe Atugun*

<sup>11</sup> Apak douk madukemesh um agundok manogugur um Iruhin aria mape shakamum anan. Namudok aria douk mape mohur arpesh esheship urkwip um shunek bilipuman. Iruhin douk nadukemesh um apakip urkwip aria aih. Ekeh douk yopihi atih. Aria eik Pol yakri ipakip urkwip shopunek pakri apak adur munek yopinyi mour. <sup>12</sup> Enyudok baraan douk madae mukriyen um munek ipak putuk apakish nyeiguhw shuto iruhw uwe, uwok. Apak douk mowem-umepagu enyudok baraan um makri ipak putarihen aria punadudareh um apakih aih. Makri punadudareh aria wosik dodogowip um puwanamesh baraan eshudok douk apa shanadudareh meyoh um arpeshish nyeiguhw iri. Eshudokmori arpesh douk madae shunududareh um aih hape numun esheship urkwip iri uwe, uwok. <sup>13</sup> Aria ta adur apakin baraan o aih hatogur kabi shagugak iri esheshih um, o nyenekesh. Enyudok douk munek Iruhin ananin mour atin. Aria ta apak urkwip pur wosik um, aria apak douk menekeh namudok um mutaurum ipak. <sup>14</sup> Krai anan douk urkum manawasham apak abom. Aria enyudok apa nyapuhur um munek enyudok apakin mour. Um maresh? Apak douk madukemesh um, atun arman meyoh narao apak ihishmorim apakiyu outumeb aria nagok. Namudok aria apak ihishmorim douk magok iri atup. <sup>15</sup> Anudok arman douk nagok um ihishmorim arpesh. Nagok um apak wata mape iri um apak mare wata urkwip purum mugipesh apakip atip urkwip, uwok. Apak ta urkwip purum anudok douk narao apakiyu outumeb nagok wata nakitaki aria mugipesh ananim atum urkum. <sup>16</sup> Namudok aria apak douk madae mupe um mugipesh

shapeum shagipesh ahudok atapihi aih iri esheship urkwip aria munek skelum enesh arpesh esheshih aih uwe, uwok. Adur, riguk apak douk magipesh epudokmori urkwip aria mape mograeh um mudukemesh um Krai ananin aih, aria douk madae munekesh namudok atin uwe, uwok. <sup>17</sup> Namudok aria ta enen arpen nyutukur Krai um, aria Iruhin douk neneken nyatogur naminyi iri. Gamo pumnek! Douk, seiwokihi yoweih aih douk hanak hawishuk aria namihi hatogur hape. <sup>18</sup> Ehudok ihishmorim namihi aih douk Iruhin meyoh nenekehmap. Seiwok douk mape ananishi horim. Aria anan wata nenekap mani anan mape atugun um enyudok Krai ananin mour atin. Aria ahudok nyumnah douk nakop enyudok mour um mutaurum ananish horim shutanamori shuni anan shupe atugun. <sup>19</sup> Apakin baraan douk namudok. Iruhin nape narauri ihishmorim arpesh shatanamori shani anan shape atugun um enyudok Krai ananin mour atin. Anan douk madae nukri um urkum mur um eshesh shenekesh iri yoweishi inahos uwe, uwok. Aria douk nakop mour apak um mukriyesh enyudok baraan um nyuhur ananish horim wata shatanam shuni anan shupe atugun. <sup>20</sup> Namudok aria apak douk enyudok morao Krai ananin nokwat aria makriyep ananin baraan. Enyudok douk kabi Iruhin anan meyoh nakwu apakig nokwatog nahwarari ihishmorim arpesh um. Apak douk morao Krai ananin nokwat aria makrip ihishmorim arpesh namudok. Makri, “Yaipo, ipak pukutukuk agundok penek horim um Iruhin um aria wata putanam puni anan pupe atugun.” <sup>21</sup> Krai anan douk yopuni. Madae nunekesh atish uwe yoweishi inahos. Aria Iruhin douk nakri nutaaurumap, namudok aria ihishmori apak menekeh iri yoweishi inahos douk nenekesh shato Krai atun abom aria natogur kabi nenek yoweishi inahos atin iri um. Iruhin nenekesh namudok um apak munatukur Krai aria mutogur Iruhin ananishi yopishi arpesh.

## 6

*Amam Aposel Hanak Hakripesh Iruhin Ananin Baraen Aria Harao Sabainyi Amaen*

<sup>1</sup> Apak douk apa mani Iruhin manoprom menek mour. Aria douk dodogowip atup makri mukripep namudok. "Iruhin douk nataurumep meyoh. Aria ipak mare pukri enyudok douk enen rohwin mour, uwok. Ipak ta punek yopihi aih." <sup>2</sup> Iruhin douk nakri namudok, "Eik kanak yagraeh nyutob um wata iraep aria putanamori pupe wosik abom. Arigaha douk abom abudok nyutob eik yemnekep aria yataurumep meyoh."

Aria douk pumnek! Iruhin nenek gihaumap aria nataurumap meyoh um douk abom abudok nyutob. Narap matanamori mape wosik atin um douk arigaha kweipon.

<sup>3</sup> Apak douk madae munek eneh aih douk hunek enesh arpes shutu shunek yoweishi inahos aria kupaishi shutrish shuhwar apakin mour yoweishi inahos shapeyenyi uwe, uwok. <sup>4</sup> Aria apak meneken iri mour, apak meyabig ihish arpesh aria shadukemesh um apak douk masuhw Iruhin ananin mour iri. Apak douk meyabigesh namudok. Apak meyotu dodogowip atup um eneyenen nyatogrumap iri amaen, agundok shenekap eneyenen um, shenekap aparuh yoweruh morao debeiri eriger um, apak douk meyotu dodog. <sup>5</sup> Shap showeshikap, horim sher sharihap aria shahwar shakripap yoweinyi baraen apak apa menek debeinyi mour, madae mishuh wosik atin uwe, aria nyurub bap mape, <sup>6</sup> apa menek yopihi aih, madukemesh um Iruhin wosik, madae juwehosip arigas atin uwe, apa menek yopunyi atin um arpesh mataurumesh, morao dodog Iruhin ananin Mishin, madae munek rohwi atin uwe. Aria apak douk meyabig ehudok aih abom um urkwip panawasham kupaishi um. <sup>7</sup> Apa makripesh adurin atinyi baraen aria munek mour um Iruhin ananin dodog, apa masuhw yopihi atih aih kabi masuhw wanohwish eshudok um yopinyi rogur

ehah um anugagrish roguhw aria manak um wanohw mabo yoweishi inahos shabuhuk um. <sup>8</sup> Enesh apa shatuk apakish nyeiguhw, enesh shanumogesh apak, enesh shenekap dehik, enesh apa shakrip kupaishi shakri apak munek yopinyi mour, enesh shakri menek rohwi iri. Aria esheshin baraen douk madae adurin uwe, uwok. Apak apa meyagwreh adurin atin baraen. <sup>9</sup> Apak douk mape kabi madae enesh arpes shudukemap um uwe, aria uwok. Sabaishi shadukemap abom. Mape kabi arpes shakri shugok iri um, aria uwok. Wata mape atin. Shap shakumap eshudok eneshenesh, aria madae shop abom ba mugok uwe, uwok. <sup>10</sup> Anabik um aparuh yoweruh abom, aria manadudareh um douk manadudareh mape namudok atin. Apak douk mape kabi eshudok yaruhish um, aria apak apa mataurum sabaishi arpes shanaparug sabaishi yopishi eshudok eneshenesh. Anabik um eshudok eneshenesh wokap abom, aria apak douk magrem ihishmori Iruhin ananish yopiyopishi eshudok eneshenesh.

<sup>11</sup> O ipak Iruhin ananish arpes pape Korin iri, apakip urkwip douk panawasham abom ipak. Namudok aria apak douk makripep ihinyumorim baraen douk nyape numun apakiruh aparuh iri. Madae mubeshukuk enen uwe, uwok. <sup>12</sup> Apak madae muweshiguk apakip urkwip um ipak uwe, uwok. Apak douk urkwip panawashamep. Aria ipak douk poweshiguk ipakip urkwip um apak. <sup>13</sup> Ahudok nyumnah douk ikripep kabi anan yain nakrip ananish batowish um. Apak douk urkwip panawasham ipak. Namudok aria ipak ta punek ehudok atih aih kabi apak menekeh um ipak um. Ipakip urkwip shopunek ta punawasham abom apak.

*Apak Douk Kabi Iruhin Ananit Urupat Um*

<sup>14</sup> Ipak mare puni eshesh madae shunek bilip um Iruhin iri uwe punoprom o punek mour atugun atin, uwok. Um maresh? Eshesh douk enesh kupaishi aria anahaehish. Nyumneh iri weibus douk madae shunorirum shutogur uwe,



uwok. Namudok atin, yopihi aih douk madae huni yoweishi inahos shunorirum uwe, uwok. <sup>15</sup> Krais douk madae nini Satan hupe atugun husuhw atin uwe, uwok. Aria ipak pakri shenek bilip um Krais iri ta shuni eshudok madae shunek bilipman iri uwe shupe atugun shusuhw atin aka? O uwok meyoh. <sup>16</sup> Atudok shenek lotu um Iruhin atari urupat douk madae tuni ogwudok onog shenek lotu um rohwiwi godomi um gunorirum uwe, uwok. Ipak douk padukemesh. Apak atin atin douk anudok abom nape ihih nyumneh iri Iruhin napenyogwi urusag. Kabi riguk anan kanak nakriyuk um. Nakri,

“Eik ta ini eshesh mupe aria ipe inek yowi kare um eshesh. Eik ta ipe esheshin Iruhin aria eshesh shupe eikish arpesh.”

<sup>17</sup> Namudok aria Debeini wata nakri, “Ipak pukutishukuk punak pupeik sik. Mare pupe pusuhw eshudok douk eik yatrish yakri shanabosusih iri, aria eik ta irapue pupe eikish arpesh.

<sup>18</sup> Eik ta ipe ipakin Yain aria ipak pupe eikish batowish. Eik Dodogoiwe abom atuwe Debeiwe iri yakri namudok.”

## 7

<sup>1</sup> O ipak abom eikish arpesh, Iruhin douk nowem um enyudok iganigadae yakripep-enyi adurin atinyi baraen um apak. Namudok aria apak munagapesh um apak kanak mukwreik ihishumori eneshenesh yoweishi inahos. Eshudok yoweishi inahos douk apa shenek apakiruh yegeshiweruh aria mishish shanabosusih shape yowesh iri. Apak ta munogugur mupe shakamum Iruhin aria dodogowip atup um munek yopihi abom aih agundok Iruhin nutrup um.

*Pol Nanadudareh Um Eshesh Korin Shatanam Shakon Aparuh Iruhin*

<sup>2</sup> Apak douk madae munek enesh yoweishi inahos um enen ipak Korin uwe, uwok. Madae mununu enen uwe. Madae munek rohwiwi um enen munaruken enesh eshudok eneshenesh meyoh abom uwe, uwok. Namudok aria apak makri ipakip

urkwip ta punawasham apak. <sup>3</sup> Mnek, eik douk madae ikri enyudok baraen um ikep agab ipak uwe, uwok. Douk yakri, apakip urkwip douk panasuhw ipak abom. Mugok o watak mupe um, apakip urkwip ta panawashamep abom namudok atin. <sup>4</sup> Eik apa yanadudareh yariguk um ipak. Yadukemesh um ipak ta punek yopinyi atin. Aria douk yatuk ipakish nyeiguhw shato iruhw. Enyudok ihinyumorim amaen nyatogrumap, aria eikihw apahw douk madae yowehw uwe, uwok. Yanadudareh abom yariguk.

<sup>5</sup> Abudok nyutob matogur mape agudok shokugi nahobig Masedonia obi nyutob, apak douk madae mupe um muraou uhwin aria aparuh hur wosik uwe, uwok. Mape agundok aria enenyenen amaen nyape um nyatogrumap sabaih atih. Shanaki shani ipak panitok baraen. Apakish mishish yowesh abom aria manogugur. <sup>6</sup> Aria meishi arpesh douk aparuh apa yoweruh iri, Iruhin apa nenekesh shape wosik shanadudareh. Douk anan neshopok Taitus nanaku aria namudok anan Iruhin douk nenek apakiruh aparuh wata hor wosik manadudareh. <sup>7</sup> Apak douk madae aparuh hur wosik um agundok Taitus nanak um atin uwe, uwok. Anan douk nakriפש um agundok ipak penek ananihw apahw hor wosik um. Apak memnekesh namudok aria aparuh hor wosik. Nakripap um agundok ipak pakri abom um putik eik um. Um agundok ipak aparuh yoweruh um riguk ipak penekume anah aih aria eikihw apahw yowehw um. Nakriפש-umep um agundok shenyagwreh enenyenen um eik aria ipak panawasham eik um. Nakriפש um ipak namudok aria eik douk yanadudareh abom yariguk.

<sup>8</sup> Eik yadukemesh. Yarik yenekep iri shup douk penekep ipakiruh aparuh yoweruh. Aria eik madae urkum yowem um agundok ipak aparuh yoweruh um uwe, uwok. Adur, riguk douk wosik eikim urkum yowem, aria douk uwok. Yadukemesh um, apudok shup penekep aparuh yoweruh aria parao abraen. Aria ipak douk aparuh yoweruh banab nyu-

tob meyoh. <sup>9</sup> Aria douk yanadudareh. Yanadudareh um douk madae inanadudareh um agundok ipakiruh aparuh yoweruh um uwe, uwok. Eik douk yanandudareh um maresh? Ipak douk aparuh yoweruh parao abraen. Douk namudok aria ipak pekeshuk agabus abom penekesh iri yoweishi inahos aria pakon aparuh Iruhin. Enyudok douk Iruhin meyoh nakriyen um nutaurumep aria douk nyatogrump. Apak kanak douk madae munekumep enesh yoweishi inahos uwe, uwok. <sup>10</sup> Agundok Iruhin nunekap aparuh yoweruh muraao abraen um douk nenekumap um mukutishuk abom apak menekesh iri yoweishi inahos. Makutishuk aria anan wata narap matanamori mape wosik abom. Namudok aria enyudokmori nyukri nyutogrump um, apak mare mukri aparuh yoweruh, uwok. Aria agundok eshesh haiden aparuh yoweruh shurao abraen um douk apa nyenekesh shagok. <sup>11</sup> Ipak gamo urkwip purum agundok Iruhin nenekep aparuh yoweruh um. Enyudok douk nyatogur nyakwarum-umep sabaihi yopihi aih. Enyen douk enyudokmori. Iruhin nenek gihaumep aria pakitak pagapesh enyudok ipakin baraen. Nepuhur pakitak pasuhw anudok douk nenek yoweishi inahos iri aria nenekep panogugur um Iruhin iri. Douk ipak pakri abom um puni apak mupe aturuh aparuh. Dodogowip atip pagapesh anudok douk nenek yoweishi inahos iri anan aih. Ihimorim aih penekeh um pugapesh eshudok yoweishi inahos iri douk nyeyabigap wosik abom um ipak adur madae enesh yoweishi shupenyap uwe, uwok. <sup>12</sup> Riguk yeneku apudok shup um, eik douk madae inekapumagu itaurum um anudok nenek yoweishi inahos iri o anudok douk anan nenekuman yoweishi inahos iri uwe, uwok. Eik douk yenekapumagu yakri ipakih aih hutogur yopugunum Iruhin nutrip aria ipak gamo pudukemesh um ipak douk urkwip panawasham apak abom. <sup>13</sup> Douk namudok aria apak aparuh hor wosik manadudareh mape dodog.

Aria shopunek apak douk manadu-

dareh mariguk abom um agundok ipak ihishmorim pagapesh-uman apahw Taitus aria penekan nanadudareh nariguk um. <sup>14</sup> Aria Taitus, eik douk yakripan um agundok eik yanagunukuk um ipak um ipakih yopihi aih. Aria ipak douk madae puneke irao abraen um agundok yanagunukuk um uwe, uwok. Ihinyumorim baraen yakripan um ipak um douk adurin atin. Aria douk namudok atin. Douk Taitus nadukemesh um, enyudok baraen apak managunukuk um ipak um douk adurin atin. <sup>15</sup> Abudok nyutob anan nanak natogrump ipak obi nyutob, ipak douk paran aria pemnek ananin baraen pagipeshen wosik abom. Abudok nyutob, ipak douk panogugur abom um pakri ta putauruman ba yowen um aria Debeini nutrip nukri ipak penek yoweishi inahos. Douk anan wata urkum mor namudok aria ananim urkum manawashamep abom neshagrakuk kabi riguk um. <sup>16</sup> Douk eik Pol yanadudareh abom. Um maresh? Eik yadukemesh abom um ipak ta punek yopihi atih aih abom.

## 8

### *Eshesh Korin Shatorum Utabor Um Shutaurum Iruhin Ananish Arpesh Shape Judia Iri*

<sup>1</sup> O ipak eikishi arpesh, apak douk makri mukripep aria pudukemesh um agundok Iruhin nenekumesh yopinyi abom eshesh ananish arpesh douk shape ihirub warub agudok shokugi nahobig Masedonia iri. Anan douk nataurumesh meyoh. <sup>2</sup> Debeinyi amaen nyatogrumpesh, aria enyudok douk nyataurum esheshih aih abom um bilip. Aria eshesh douk shapeum shanadudareh shariguk. Adur, eshesh douk eshudok yaruhish abom, aria shanadudareh namudok aria shatorum debeibori utabor um shutaurum eshudok enesh Iruhin ananish arpesh. <sup>3</sup> Adur atin yakripep. Eshesh douk sheyakabor shaborubuk sheshagrakuk abom mak douk eshesh ta shukesh um. Apak douk madae dodogeship-umesh um shiyakabor namudok uwe, uwok. Eshesh meyoh sheneken. <sup>4</sup> Eshesh douk shakri

abom um shataurum eshesh Iruhin ananish arpesh shape agudok shokugi nahobig Judia iri. Namudok aria shabuk utabor iyoh aria dodogeshish um apak murabor-umesh. <sup>5</sup> Eshesh douk shaborubuk abom beshagrakuk kabi apak makri ta butogur um. Aria eshesh douk madae shubuk utabor atabor uwe, uwok. Sagomatin eshesh sharik shakon eshesh kanak Debeini shor ananis wis. Douk shenek enyudok iyoh, aria shagipesh kabi Iruhin nakri um shanaki shemnek apakin baraan shasuhwen shagipeshen. <sup>6</sup> Riguk douk Taitus nanaku narik nohur enyudok mour um patorum utabor pataurum kupaishi um. Aria douk wata dodogeshish-uman um nunaku nutaurumep piyatak enyudok mour um putaurum kupaishi meyoh um. <sup>7</sup> Ipak douk peshagrakuk kupaishi Iruhin ananish arpesh um ihimorim yopihi aih. Peshagrakuk um agundok pasuhwen Kraiss ananin baraan dodog um, um agundok pakripesh Debeini ananin baraan um, padukemesh um Iruhin ananin baraan wosik um, mishish shakitak um punek Iruhin ananin mour um. Aria shopunek peshagrakuk um agundok ipak urkwip panawasham apak abom um. Aria douk, apak makri ipak ta pishagrakuk abom shopunek um agundok putorum utabor aria putaurum Iruhin ananish arpesh meyoh um.

<sup>8</sup> Enyudok douk madae ikripep enen dodogowinyi baraan um ipak pugipeshen uwe, uwok. Eik atin yakri ikripep um pudukemesh um agundok kupairubi warubish Iruhin ananish arpesh mishish shakitak abom um shataurum kupaishi um. Um yakri ikwiraehep aria idukemesh um ipak urkwip panawasham eshesh shape Judia iri pekesh peshagrakuk kupaishi shekesh um o eshesh sheshagrakuk ipak. <sup>9</sup> Ipak douk padukemesh um agundok apakini Debeini Jisas Kraiss urkum manawasham apak abom aria nataurumap meyoh um. Anan douk nagrem sabaishi yopishi eshudok eneshenesh abom iri, aria wata nakutukuk ihimorim eshudok natogur anan yaruhish um eshudok iri arman um nutaurum ipak. Natogur yaruhish um eshudok iri,

um nutaurum ipak purao sabaishi Iruhin ananish yopishi eshudok eneshenesh aria pupe wosik.

<sup>10</sup> Douk yakri ikripep eikin baraan um agundok utabor bunotorum um. Nyanyik enen kwar, sagomatin ipak parik mishish shakitak um punek enyudok mour aria douk parik peneken. <sup>11</sup> Namudok aria douk yakri wosik ipak dodogowip atip um punek enyudok mour piyaten. Enyudok mour douk sagomatin ipak mishish shakitak um puneken aria douk penyuhur nyape iri. Ipak paborubuk mumam, utabor aria pusiabor namudok kabi panaborubuk um. <sup>12</sup> Arpesh douk enesh eshudok eneshenesh shakus aria mishish shakitak abom um shuko Iruhin um, Iruhin apa nanadudareh um nunatrish eshudokmori eneshenesh. Anan madae nirik atin um shukon eshudok douk eshesh wokesh um uwe, uwok. <sup>13</sup> Eik douk madae ikri um ipak piyak ihibormorim ipakibor utabor puko eshudok yaruhishi arpesh, um eshesh shupe wosik aria ipak wata eshudok eneshenesh wokep, namudok uwok. Eik yakri um mutaur-umesh um eshesh apak mupe arag atin. <sup>14</sup> Douk, ipak patik eshudok aria ipak wosik putaurum eshudok yaruhishi arpesh. Namudok douk nuhut biyen ipak pakri punak pubuhuk eshudok wokep aria eshesh shutik eshudok um, eshesh douk ta wata shuwanamep ipakish. Douk punabiram namudok aria ta pupe arag atin. <sup>15</sup> Enyudok douk kabi baraan nyetem Iruhin ananik Buk iri nyakrium. Nyakri namudok. "Arpen nyanatorium sabaishi eshudok eneshenesh iri douk ta wosik-umen abom. Mare enesh shukusuk meyoh uwe, uwok. Enyudok enen arpen douk nyanatorium karowish iri, eshesh douk wosik-umen. Mare ta shutuh uwe."

*Pol Nakrip Taitus Nani Anam Hanakum Korin*

<sup>16</sup> Eik Pol douk yanadudareh abom um Iruhin. Yenek tenkyuman um agundok nohur Taitus aria anan mishin nyakitak abom um nakri nutaurum ipak Korin. Nakri nutaurumep kabi eik yakri itaurumep um. <sup>17</sup> Apak marigan um nunaku nutik ipak obi nyutob, anan douk

nakri wosik. Um maresh? Anan mishin nyakitak abom um nutaurumep. Aria douk anan meyoh nanagraeh um nunaku nutrip. <sup>18</sup> Apak douk meshopok anan um apak Iruhin ananip um nanamanugu. Anudok arman douk nyeigur nyato iruhuman um nakripesh Iruhin ananin yopinyi baraen wosik. Ihishmorim Iruhin ananish arpesh ihirub warub douk shatuk ananin nyeigur nyato iruhw. <sup>19</sup> Aria douk madae namudok atin uwe, uwok. Anarub warubish Iruhin ananish arpesh douk shograehan um nini ipak purahaen aria nutaurumap um enyudok mour um mutorum utabor munak mutaurum yaruhish um. Apak douk munek enyudok mour um Debeini anan kanak nurae debeinyi nyeigur. Aria shopunek um miyabig arpesh um agundok apak mishish shakitak abom um mutaurum Iruhin ananish arpesh douk yaruhish iri. <sup>20</sup> Apak douk gamo mudukemesh abom um agundok masuhw abrudok debeibori utabor douk ipak pani kupaishi paborubuk um putaurum kupaishi um. Makri ta enesh shunekap baraenyum-abor. Namudok aria meshopok anudok arman nani Taitus hanamepogu. <sup>21</sup> Apak douk makri abom um munek yopihi atih aih. Aria makri uwok um munekeh agundok Iruhin ananis nabes atus um, uwok. Makri munekeh wosik atin um yopihi atih aih um arpesh shopunek shutrih.

<sup>22</sup> Apak douk moshopok anudok anan apakin ashuken um neiram shopunek. Sabaihi apak mograehan um enenyenen mour aria matik um anan wosik dodogowin aria mishin nyakitak neneken. Anan douk nadukemesh um ipak ta punek yopihi atih aih. Namudok aria douk anudok mishin nyakitak abom um nunek enyudok mour nishagrakuk agundok riguk anan mishin nyakitak neneken um. <sup>23</sup> Taitus ipak douk padukeman. Anan douk nani eik wanoprom wenek Iruhin ananin mour wataurum ipak iri. Amudok anam apakimi heiranogu iri armam, amam douk hanagraeh harao nukwatog um sabaishi Iruhin ananish arpesh douk shape anarub warub iri. Amamih aih douk apa henekeh aria arpesh shatrih

shatuk Krai ananin nyeigur nyato iruhw. <sup>24</sup> Namudok aria eik yakri ipak Korin ta punekumam yopihi aih amudok biom atun armam. Um yakri kupairubi warubishi Iruhin ananish arpesh shutik namudok aria shudukemesh abom um ipak douk urkwip panawasham amam. Namudok aria eshesh ta shudukemesh um agundok apak manadudareh um ipak um douk madae munek roh wuwe, uwok.

## 9

### *Iruhin Ananish Arpesh Shape Korin Iri Ta Shubuk Utabor Um Shutaurum Eshudok Enesh Iruhin Ananish Arpesh*

<sup>1</sup> Ipak douk padukemesh um agundok utabor banatorum um, um putaurum Iruhin ananish arpesh shape agudok shokugi nahobig Judia iri um. Namudok aria eik ta mare iwemagu rounyi baraen um enyudok, uwok. <sup>2</sup> Um maresh? Eik yadukemesh. Ipak douk mishish shakitak um putaurum kupaishi Iruhin ananish arpesh. Yani eshesh Masedonia mape obi nyutob, eik apa yanadudareh um ipak Korin yakripesh yakri, “Yaipo, eshesh agudok shokugi nahobig Akaia douk nubokuhiyen kwar meyoh shenek garibog shapeum enyudok mour.” Douk eshesh Masedonia shemnek namudok um ipak Korin oub bakitak um putorum utabor putaurum eshudok yaruhish um, aria enyudok nyahuresh mishish sabaishi shopunek um shakri shubuk utabor shutaurum kupaishi. <sup>3</sup> Aria eik douk yakri uwok um enyudok apak meyagwreh-enyi baraen um manadudareh um ipak um nyunak nyubouk atap meyoh, uwok. Yakri ipak punek garibog pupe um amudok apakimi hunak hutogur aria pukomi eshudok kabi yakripamugu um. Namudok aria douk enyudok yeshopokam hanaku. <sup>4</sup> Apak douk madukemesh um ipak douk penek garibog pape um pukesh utabor eshudok yaruhish. Yakri namudok douk ta enesh Masedonia shukri shiramugu aria shutrip um mare punek garibog uwe, aria apak ta muraoumep abraen. Aria ipak shopunek ta purao abraen. <sup>5</sup> Namudok aria yakri wosik um ishopokugu amudok biom atun

apakimi hurik hunaku. Yakri hurik-mogu hutauremep punek garibog um yopishi eshudok eneshenesh douk riguk ipak parik pakri adurin atinyi baraan um peshopokesh shunak um eshesh Judia iri. Yakri eik ikri inak itogragu aria eshudok douk pugapeshesh shukus. Um yakri arpeshe shutik namudok aria shukri apak madae dodogowip um ipak putorum utabor uwe, uwok. Ipak panadudareh meyoh aria paborubuk.

<sup>6</sup> Ipak urkwip gamo purum enyudok baraan. Arpen nyu karowigun worigun iri ta wata nyunarok karowigun. Arpen nyu sabaiguni iri ta nyunarok sabaiguni. <sup>7</sup> Namudok aria yakri ipak atin atin ta gamo punek urkum aria ipak kanak mishish shukitak um pakri pukesh mumam mumam. Ipak mare aparuh yoweruh o kupaishi dodogowish aria douk pukesh, namudok uwok. Um maresh? Iruhin apa urkum manawasham arpeshe douk eshesh meyoh mishish shakitak aria shanadudareh um shukon eshudok iri. <sup>8</sup> Aria Iruhin anan douk wosik um ta nukep ihishmorim abom yopishi eshudok aria ipak ta pusuhw sabaishi abom. Namudok aria ihish nyumneh ipak ta pugrem ihishmorim eshudok eneshenesh. Aria enesh ta shutourak shukus meyoh um punek ihinyumori enenyenen yopinyi mour. <sup>9</sup> Kabi Iruhin ananin baraan nyetem ananik Buk iri nyakrium. Nyakri namudok.

“Arpen douk nyukesh sabaishi yopishi eneshenesh eshudok yaruhish arpeshe iri, enyudok arpen enenyeh yopihi aih ta mare hunak huwishuk, uwok. Ta hupe ihish nyumneh.”

<sup>10</sup> Iruhin apa nakop mawagun iri worigun mawagun. Wata nakop mashoh iri mashoh. Aria anan ta nukop ihishmorim shunuwesh iri worigun ipak puwesh aria ta nunekesh shutogrumep. Aria namudok atin. Anan ta nukep eshudok ipak ta pugremesh aria putaurum sabaishi kupaishi arpeshe. <sup>11</sup> Anan ta nupe um nutaurumep putik sabaishi eshudok um ipak wata pupe um sabaibi nyutob putaurum

eshudok yaruhish arpeshe. Namudok aria sabaishi arpeshe ta shunek tenkyu um Iruhin um ipakish yopishi eshudok douk pukop masuhwesh manak makeshesh iri.

<sup>12</sup> Enyudok peneken iri mour douk madae puneken um putaurum Iruhin ananish yaruhish arpeshe atish uwe, uwok. Enyen douk shopunek peneken um sabaishi arpeshe shutrin shutuk Iruhin ananin nyeigur abom aria shunek tenkyuman shuriguk. <sup>13</sup> Enyudok ipak peneken iri mour um putaurum yaruhish um, enyen douk ta nyuwereh ipakish yopihi aih. Aria eshesh ta shudukemesh shukri enyudok ipak pasuhwen pagipeshen iri Kraiss ananin yopinyi baraan douk pagipeshen wosik abom. Ta wata shutik sabaishi eshudok ipak poko eshesh shani ihish arpeshe um, aria eshesh ta shutuk Iruhin ananin nyeigur nyuto iruhw. <sup>14</sup> Aria ta shudukemesh shukri Iruhin nutaurumep meyoh abom nenekumep yopinyi. Namudok aria eshesh ta urkwip punawashamep aria shorik Iruhin um nunekumep yopinyi. <sup>15</sup> Apak ta munek tenkyu um Iruhin. Um maresh? Anan douk nakopari ananin sagomatinyin yopinyi abom presen. Enyen douk ananin Nuganin. Aria apakin baraan douk madae wosik um munakripesh um enyudok yopinyi presen uwe, uwok.

## 10

### *Pol Nawanamesh Baraan Eshudok Shakri Shunumogesh Ananin Mour Iri*

<sup>1</sup> Enesh ipak Korin apa shakri abudok nyutob eik yani ipak mape obi nyutob, shakri eik apa yaunih eik kanak. Aria shakri abudok nyutob yanak yapeik kupaigunum obi nyutob, shakri eik apa yenekumepogu shup yakripep dodogowinyi atinyi baraan. Aria douk yakri ipak urkwip purum ehudok Kraiss ananin yopihi aih um nunih anan kanak aria neyagwreh shokwin baraan um. Eik douk yakri igipesh ehudok atih aih aria douk yarigep um punek eikin baraan. <sup>2</sup> Aria douk yakri ikripep um gamo pudukemesh. Ikri inak itogrumogu, eik yakri ipak mare punek dodogeshiwe atuwe ikripep dodogowinyi

baraen, uwok. Eshudok enesh douk shakri apak mape um magipesh eshudok arpesht douk madae shudukem um Iruhin iri uwe esheshih aih iri, eik adur yakri um ta dodogeshiwe atuwe ikripesh dodogowinyi baraen. <sup>3</sup> Adur, apak douk mape agundok atap. Aria ahwudok wanohw douk marpokohw um mubouk eneshenesh yoweishi inahos, apak douk madae murpokohw kabi eshudok madae shudukemesh um Iruhin iri um uwe, uwok. <sup>4</sup> Eshudok douk masuhwesh marpak ahwudok wanohw iri douk mare mukwu enesh agundok atapishi wanohwishi eshudok eneshenesh uwe, uwok. Makwu Iruhin ananish dodogowish abom atishi eshudok eneshenesh aria menekohw. Eshesh douk dodogowish atish abom wosik um shubo Satan ananish dodogowih atihi yoweih aih hubuhuk. <sup>5</sup> Enesh Satan ananish arpesht shani anan apa shatapok-umesh yah eshudok armam armago douk shakri shurao saki um Iruhin iri. Aria apak dodogowip marpokuk yah um mubouk ihishumori esheshin baraen nyani esheshih aih. Apak apa motapok ihipmori arpesht urkwip aria apa mataurumesh mohur esheship urkwip um urkwip pur wosik abom aria shugipesh Kraish atun. <sup>6</sup> Apak wata mape meshukabar um ipak pusuhw ihinyumorim Iruhin ananin baraen pugipeshen iyoh. Douk ipak pugipeshen iyoh aria abudok nyutob ihishmorim eshudok douk shaken agabus baraen iri, apak ta mare mukri wosik umesh uwe, uwok. Ta mukripesh dodogowinyi baraen um mare shuwish shupe shuni Iruhin ananish arpesht shunek lotu atugun uwe, uwok.

<sup>7</sup> Ipak patik aduk eikihw yegenyihw aria pakri eik douk madae dodogowini arman uwe. Aria douk yakri. Ta ipak enen arpen nyukri enyen douk adur nyenek Kraish ananin mour iri um, aria eik yakri enyen nyigim eik nyunek urkum. Apak douk shopunek munek enyudok Kraish ananin mour atin kabi enyen um. <sup>8</sup> Debeini Jisas Kraish douk nakop big aria natrup um mupe debeipi um ipak mutaurumep. Nakri uwok um mukwu enyudok

big aria munekep pubuhuk, uwok. Nakri mutaurumep piyotu dodogowip atip um bilip. Namudok aria ta eik ikri inadudareh iriguk um namudok akure, eik ta mare abraen nyupeye, uwok. <sup>9</sup> Aria eik yakri ipak mare punek urkum pukri shup eik yape yenekap iri douk yenekapumagu inek ipak punogugur, uwok. Mare punaruk urkwip namudok. <sup>10</sup> Ipak enep apa pakri namudok. Pakri, "Anudok Pol nenekap iri shup douk nowemori enenyenen dodogowin atinyi baraen nyetem iri. Aria abudok nyutob nani apak mape matrun um, anan douk madae dodogowin abom uwe, uwok. Neyagwreh enyi baraen shopunek ta mare nyutaurumap uwe." <sup>11</sup> Peyagwrehume enyudok iri douk yakri pudukemesh. Enenyenen baraen mape rougun menyemagu shup iri douk padukemen. Meibi nyutob mukri munaku muni ipak mupe obi nyutob, aria aih apak munekeh iri ta wosik abom um baraen douk marik menyemumep-ogu shup iri.

<sup>12</sup> Apak makri uwok abom um mukri apakih aih douk kabi eshudok arpesht douk apa shatuk esheshish nyeiguhw shato iruhw iri, makri uwok. Eshesh apa shanatutik um aria shenek skelim esheshih aih um shadukemesh eshesh shape mumam. Shagipesh esheship urkwip atin aria shenek skelimum eshesh kanak. Eshudokmori arpesht douk shenek dehik abom iri. <sup>13</sup> Apak ta mare munagunukuk mishagrakuk enyudok kak douk Iruhin nako apak munek enyudok ananin nakopen iri mour munak miyotu um, uwok. Apak ta muneken munak miyotu agundok Iruhin nakripap-enyi kak atin. Aria apak ta munagunukuk um enyudok atin mour douk meneken arigaha manak matogromagu ipak agundok Korin iri atin. <sup>14</sup> Riguk apak manaku nagundok Korin aria makripep Jisas Kraish ananin yopinyi baraen. Aria abudok nyutob manakumagu ipak um, apak douk madae mishagrakuk Iruhin ananin kak uwe, uwok. Ipak Korin douk parik iri um abudok amnab douk Iruhin nako apak um munek mour munak mutogur um. <sup>15</sup> Aria apak madae munagunukuk um enyu-

dok mour douk kupaishi sheneken aria sheshagrakuk enyudok kak douk Iruhin nakop um apak iri uwe, uwok. Apak apa munek Iruhin ananin mour wosik atin. Um makri ipak ta pusuhw Kraiss ananin baraan dodog pishagrakuk agundok riguk parik pasuhwen pagipeshen um. Namudok aria apakin mour ta nyutogur deben agundok. <sup>16</sup> Aria abudok nyutob, apak ta kadak munak mukripesh Iruhin ananin yopinyi baraan arbudok rougnirub warub douk bape bagigukmori ipak iri. Apak ta mare munak arbudok anarub warub douk kupaimi hanak henek mour arub iri, uwok. Um maresh? Apak douk makri uwok um munagunukuk um enyudok mour douk amam harik hanak henekenyuk iri. <sup>17</sup> Kabi enen baraan nyetem Iruhin ananik Buk iri nyakrium. Nyakri, "Arpen nyukri nyunagunukuk um enesh eshudok enesh-enesh iri, enyen ta nyunagunukuk um Debeini atun." <sup>18</sup> Umum maresh? Apak madukemesh. Debeini natik arpeshe douk shatuk esheshish nyeiguhw shato iruhw iri um, anan nakri eshudok arpeshe douk nyeiguhw wokesh. Aria arpeshe douk Debeini nutrish nuhwaresh yopishi iri, eshesh adur nyeiguhw shato iruhumesh abom.

## 11

*Pol Nenekehi Aih Douk Madae Atatahik Um Ehudok Aih Amudok Henek Rohw Iri Aposel Henekeh Iri Uwe.*

<sup>1</sup> Eik Pol yakri ipak gamo punnek enen shopunek enyudokmori baraan. Eik ta iyagwreh kabi rohwise sheneyagwreh um. Enyen douk rohwinny, aria yarigep um publik arigos. <sup>2</sup> Eik douk urkum mor abom um ipak kabi Iruhin anan urkum morumep um. Eik yakri ipak punatukur Kraiss aria pupe ananip atip. Ipak douk eik meyoh yakripep baraan um Kraiss aria yataurumep yaraepuman. Yaraepuman kabi yarao onok kwape wosik abom iri weroroikwi armatok kwanak um raminen um nuraok iri um. Anan douk Kraiss. <sup>3</sup> Arudok yur Satan douk radukemesh atin abom um agundok shenek rohwe um kupaishi um. Seiwok sagramatin renek

rohwe um Eva aria eik douk yanogugur um ipak. Yakri ta runekeshumep namudok atin aria urkwip pushukepek. Yakri ta mare pukutukuk agundok pape wosik abom aria urkwip purum Kraiss atun um. <sup>4</sup> Apak douk manaku makripep adurinyi baraan atin um Jisas. Aria anam wata hanaku hakripepek enen kupainny baraan um Jisas. Douk pemneguk amamin baraan pasuhwen aria parao enen kupainny mishin. Enyudok mishin douk madae nyudukem enyudok Iruhin ananin Mishin riguk parik paraen iri um uwe, uwok. Iruhin ananin yopinyi baraan douk pape um parao enen kupainny. Madae nyudukem enyudok apak marik makripepen iri um uwe, uwok. Aria douk yadukemesh. Abudok nyutob amam hanaku hakripep amamin baraan obi nyutob, ipak douk panadudareh pape um punnekam. <sup>5</sup> Ipak mnek. Eik yadukemesh um, amudok anam aposel douk ipak pahwaram debeimi abom iri, amamin saki nyani aih douk madae shishagrakuk eikish uwe, uwok. <sup>6</sup> Aria eik madae gamo iyagwreh wosik um uwe, nyenekesh. Aria eikin saki douk deben. Ihih nyumneh ihihmori menekeh iri aih, apak douk mayabigep patrih aria padukemesh wosik. Padukemesh um agundok apak madukemesh mariguk um.

<sup>7</sup> Ipak douk padukemesh. Eik yakripep Iruhin ananin yopinyi baraan aria madae ihwarep um irao utabor um enyudok mour uwe, uwok. Eik yenekesh namudok yaunih eik kanak um ituk ipak puto iruhw. Aria douk mumam? Ipak pakri eik yenekesh namudok aria yenek yoweishi inahos aka? Adur atin uwok. <sup>8</sup> Abudok nyutob yanaku yani ipak mape aria yenek mour yataurum ipak obi nyutob, eik douk kupairubi warubish Iruhin ananish arpeshe shataurume sheke utabor. Aria namudok douk kabi yakwumabor aruh esheshibor utabor um itaurum ipak um. <sup>9</sup> Abudok nyutob yani ipak mape aria utabor uwok um enesh eshudok eneshenesh obi nyutob, eik douk madae dodogoiwe ipeum enen ipak um nyukeyesh uwe, uwok. Eik douk amudok anam apakimi armam hapei agudok

shokugi nahobig Masedonia aria hanaki iri atum apa hataurume um ihishmori eshudok eik urkum makriyesh iri. Kabi riguk um, douk arigaha kweipon eik ta mare iwemep enen enyudokmori amaen, uwok. <sup>10</sup> Eik douk enyudok Kraiss ananin adurin atin baraen nyapenye aria douk yakri adurin atin. Ihirub warub agudok shokugi nahobig Akaia, ta mare enesh arpes shunek eikit nokwat tishuk um agundok iyagwreh um, uwok. Yape um yakrip ipak pani sabaishi arpes enyudok Iruhin ananin yopinyi baraen meyoh. Eik madae irikep um puke enesh eshudok eneshenesh uwe, uwok. <sup>11</sup> Ipak pakri eik yeyagwreh enyudok um maresh? Aria pakri eik urkum madae munawasham ipak uwe? Adur atin uwok. Iruhin nadukemesh um eik urkum manawashamep abom.

<sup>12</sup> Aria ehudok yenekehi aih um agundok yakriep Iruhin ananin baraen aria madae inatrip anabor utabor um uwe, eik douk ta ipeum igipeseh. Yakri inekesh namudok um amudok anam aposel hutik aria yah wokam um hunagunukuk hukri amam douk henek mour kabi apak meneken um. <sup>13</sup> Amudokmori armam douk henek rohwi iri aposel. Amam madae husuhw Debeini ananin mour wosik iri uwe, uwok. Apa habeshuk amamih yoweihi aih aria henek rohwi um arpes hakri amam adur Kraiss nahwaram aria hanak hakripesh ananin baraen iri. <sup>14</sup> Aria ipak mare pikitak yowiyokuk um amamih aih, uwok. Ipak douk padukemesh. Satan anan kanak apa nabeshuk ananih yoweihi aih aria nawishi enen Iruhin ananin nyatrugun abom iri ensel. <sup>15</sup> Aria henek mour um Satan iri hunabeshuk amamih yoweihi aih aria hunek rohwi hukri amam adur henek mour um yopihi aih iri um, apak douk mare mukitak yowiyokuk um amam, uwok. Kweipon amam ta hurao yoweihi poe wosik um ehudok amam henekeh iri aih.

*Pol Nanagunukuk Um Nasuhw Debeini Ananin Mour Aria Sabainyi Amaen Nyatoguman Um*

<sup>16</sup> Wata gamo ikriep. Eik douk yakri uwok um enen arpen nyumnek enyudok eikin baraen aria nyukri eik douk um yenek rohwi iri arpen, uwok. Aria ta ipak pakri eik douk yenek rohwi iri um, enyudok wosik. Aria yakri ipak ta pukutukuk eik ba gamo inagunukuk um eik kanak. <sup>17</sup> Adur, enyudok douk iyagwrehen iri baraen um inagunukuk um eikin mour um, eik douk madae iyagwrehen igipesh Debeini ananim urkum uwe, uwok. Yeyagwreh kabi anan nenek rohwi iri. <sup>18</sup> Sabaishi arpes douk shagipesh enyudok um madae shudukem Iruhin iri uwe esheshih aih aria shanagunukuk shatuk esheshish nyeiguhw shato iruhw. Douk eik shopunek ta igipesh ehudok atih aih aria inagunukuk. <sup>19</sup> Ipak douk wosik gamo padukemesh iri armam armago. Namudok aria ipak pakri wosik abom um punnek rohwi esheshin baraen. <sup>20</sup> Arpes shunekumep enyudokmori um, ipak apa pakri wosik. Enyudokmori. Shunekumep enyudok kabi shonoweshik iri arpes um, shiyatokumep enesh ipakish eshudok eneshenesh um, shunek rohwi um enesh eshudok eneshenesh um, shuhwarep shokwipari eshesh debeishi um, shuboumep ipakigos yamagos um. Shunekumep enyudok-morim um, ipak apa pakri wosik pape panatrish meyoh. <sup>21</sup> Eik Pol douk abraenyiwe um yeyagwreh namudok um. Um agundok yakri apak madae dodogowip um munekumep kabi baraen iganigadae yakriyen iri um. Kabi douk amudok henek rohwi iri aposel henekenyumep iri um.

Aria ta amam hupe um hunagunukuk um enesh eshudok um, eik douk shopunek ta inagunukuk kabi amam um. Douk enyudok yeyagwrehenyuk kabi rohwi iri um. <sup>22</sup> Amudok aposel hakri amam douk Hibru? Eik shopunek anan arpenyin um Hibru. Aria amam douk Israel um, eik shopunek anan arpenyin um Israel. Aria amam hakitak Abraham ananip awirop um, eik douk shopunek yakitak apudok atup awirop. <sup>23</sup> Amam douk hasuhw Kraiss ananin mour iri aka? Douk yakri iyagwreh kabi shagugak iri abom



um. Eik douk yeshagrakuk amam um agundok yenek Kraiss ananin mour um. Adur abom yeshagrakuk amam yenek debeinyi mour. Yeshagrakamuk um agundok showeshike yeshuh shunuweshik-ati urupat sabaih atih um. Yeshagrakuk amam um agundok shae shoreye eshudok sabaih atih um. Yeshagrakuk amam um agundok shae sabaih atih hurukatin um igok um. <sup>24</sup> Eshesh Juda douk shoreye enesh wanohwishi eshudok um 39-poreih. Enyudok douk nyatogrume 5-poreih sisigih nyumneh. <sup>25</sup> Biyeh atih sisigih nyumneh eshesh Rom shakwume rowos. Anah eshesh Juda shakwume utabor. Bioh atih sisigih nyumneh yara-haen owi kroruhiyor yoweu wagrakuk youg. Aria anah um ahudok nyumneh douk yeyom yor youg um anah nyumnah shuknih wab arigaha gagruk ruwahepih. <sup>26</sup> Sabaihi nyumneh yara-haen atin. Yara-haen worubus sau hurukatin um se igok. Armam hanabeshuk yeh hanatrish eshudok eneshenesh iri hakri um he hunatiwe eshudok eneshenesh. Eikishi bauges eshesh Juda shopunek shakri um she igok. Kupairubi warubishi eshesh madae Juda uwe namudok atin shakri she igok. Yawish debeirubi warub shakri um she igok. Yarahaeik wehigunum arpesh uwok um anam hakri he hunatriwe eshudok eneshenesh. Youg yoweg hurukatin um inak iwishuk. Anam eik kanak eikim heyagwreh rohwin baraen hurukatinyum he igok. <sup>27</sup> Yenek dedeben atinyi mour um inaparug eshudok eneshenesh. Yape um yenekesh namudok aria sabaibusi weibus madae ishuh atin uwe. Nyurub bae yape. Abar bae. Sabaihi madae iwok worigun uwe. Sabaihi nyumneh nyumanugas sae yape. Inekheh iri rupeh madae eneh uwe. <sup>28</sup> Sabainyi kupainyi enyudokmori amaen douk nyatogrume. Aria ihih nyumneh eik douk shopunek yenere urkum um ihishmorim Iruhin ananish arpesh shape ihirub warub iri. Yakri eshesh ta shupe wosik o mumam? <sup>29</sup> Eik douk urkum mor abom um eshudok douk madae dodogowish um bilip iri uwe. Apa yemnek um amaen nyatogur um eshesh iri douk kabi nyatogur um eik um.

Aria abudok nyutob eneh aih hutogur hunek enen Iruhin ananin arpen nyunek enesh yoweishi inahos obi nyutob, eik douk juwehosiwe um ehudokmori aih abom yakri wokumeh.

<sup>30</sup> Aria eik ikri inagunukuk akure, aria eik ta inagunukuk um eshudok atish, douk shatogrume aria sheyabigap um agundok eik madae dodogoiwe um uwe. <sup>31</sup> Anudok Iruhin apakin Debeini Jisas Kraiss ananin Yain, apak ta mutuk ananin nyeigur nyuto iruhw ihih nyumneh. Anan douk nadukemesh um enyudok eik yeyagwreh-enyi baraen douk adurin atin. <sup>32</sup> Riguk yape numun debeiburi wabur Damaskus obi nyutob, anudok arman douk king Aretas neneken um nape debeini um abrudok wabur iri nape naurime um nusuwe nuweshike. Namudok aria douk nenek amam soldia heyotu hape haurime agundok shawish abrudok wabur um. <sup>33</sup> Aria enesh Iruhin ananish arpesh shakutuwe enen raba aria shokubur shape shakutuwe enen windua iruhw yape yabuhuk adukehah um arbudok rourubi dodogowirubi narub douk sharukorub sherssharih abrudok wabur iri. Namudok aria yaruwokuk um anudok debeini um abrudok wabur iri.

## 12

*Iruhin Neyabigan Sabaishi Eshudok Pol Kabi Neshuh Nanabek Yomnis Natrish Um*

<sup>1</sup> Ehudok aih um yanagunukuk um douk adur madae nyunek eneh yopihi aih hutogur uwe, uwok. Aria eik ta inagunukuk, um mare uwok. Aria douk ta ikripeshumep um eshudok douk yape kabi yabo yomnis aria Debeini neyabige um. Enesh eshudok, riguk douk madae itrish idukemesh iri uwe. <sup>2</sup> Riguk anob nyutob, Iruhin douk narao eik yato yakih gani iruhw nape nagiguk um binyatin iri heven. Enyudok nyatogur um, douk 14-poreish kwarahos shanak shadiguk. Aria douk madae idukemesh abom uwe. Narae um ahwudok yegenyihw aka, uwok mishin meyoh nyato. Iruhin atun nadukemesh. <sup>3-4</sup> Aria agundok yato um yopuburi abom wabur heven um, enyen

douk adur yato. Aria douk madae idukemesh abom uwe. Yato um yegenyihw aka, mishin meyoh nyato. Iruhin atun nadukemesh. Yakih iruhw aria yemnek enen baraden douk Iruhin nakripe um mare ikrip enesh arpesh um. Enyudok enen kupainyi baraden, apak arpesh douk madae wosik um mukwu apakin baraden mupe mukripesh-umen uwe, uwok. <sup>5</sup> Eik douk ta inagunukuk um enyudok Iruhin neyabige um, aria ta mare inagunukuk um eik kanak, uwok. Ta inagunukuk um agundok eik madae dodogoiwe um atin. <sup>6</sup> Adur, ikri inagunukuk akure, eik ta mare inagunukuk kabi anan nenek rohwi iri um, uwok. Um maresh? Enyudok ikri inagunukuk-umen, enyen douk adurin atin abom. Aria ta mare inagunukuk namudok, uwok. Um maresh? Yakri ta arpesh shumneke um agundok inagunukuk um eshudok yatrish iri um aria shutuk eikin nyeigur um namudok. Yakri ta shutuken meyoh shishagrakuk ehudok adurih yenekeh iri aih.

*Iruhin Nenek Pol Narao Debeiri Eriger Um Mare Nukri Nunagunukuk Nuriguk, Uwok*

<sup>7</sup> Eik douk yape kabi yabo yomnis um aria Iruhin neyabige sabaishi yopiypishi abom eshudok eneshenesh. Aria anan douk nakri uwok um eik inagunukuk iriguk. Namudok aria neneke yarao debeiri eriger um eikihw yegenyihw. Aria arudok eriger um douk rape namudok. Ihih nyumneh douk yemnekor kabi enen arpen nyasuhw Satan ananin mour iri nyae um imnek eriger aria mare inagunukuk iriguk, uwok. <sup>8</sup> Biyeh atih dodogoiwe atuwe yahwar Debeini um nukweshihuk arudok eriger. <sup>9</sup> Yahwaran aria nuwaname baraden namudok. Nakri, “Eik douk urkum morumen abom aria yape yataurumen meyoh. Aria enyudok douk jurug wosikumen. Um maresh? Abudok nyutob eikish arpesh madae dodogowish abom obi nyutob uwe, abudok nyutob eik douk dodogoiwe atuwe abom aria ta itaurumesh.” Debeini nakripe namudok aria eik douk yanadudareh abom

um agundok eik madae dodogoiwe um uwe. Yakri wosik ipe namudok um itik agundok Jisas Krai dodogowin atun abom aria nataurume um. <sup>10</sup> Eik douk yasuhw Krai ananin mour. Namudok aria yanadudareh um agundok arugeh heneke madae dodogoiwe um, o shukripe shunek enenyenen um o shunek enenyenen um ipe yoweuwe um, o agundok eshudok woke um. Enenyenen amaen nyutogrume um, eik douk yanadudareh abom. Um maresh? Abudok nyutob madae dodogoiwe abom obi nyutob, Krai douk nataurume aria dodogoiwe abom.

*Pol Urkum Morum Nakri Nutaurum Eshesh Korin*

<sup>11</sup> Enyudok iganigadae yeyagwreh-enyi rohwin baraden douk ipak Korin meyoh peneken ba douk yeyagwrehen. Douk ta ipak Korin meyoh pupe punakripam um eikih yopihi aih, aria uwok. Adur, eik douk nyeigur woke iri, aria eik madae ipe shakam abom um amam aposel douk ipak panahwaram um nyeiguhw hwatumam iri uwe, uwok. <sup>12</sup> Abudok nyutob yani ipak mape aria enenyenen amaen nyatogrume obi nyutob, eik douk yeyotu dodog abom. Namudok aria Iruhin neyohur yenek enenyenen anan atun neneken iri mour nyani enyudok enen sikin mour douk yeneken nyatogur patrin aria pakitak yowiyokuk. Aria enyudok mour douk nyeyabigep abom um eik douk yenek Iruhin ananin mour iri. <sup>13</sup> Ipak Korin pani Iruhin ananish arpesh shape kupairubi warub iri douk ihipmorim yenekumep atuh aih meyoh. Kupairubi warubish Iruhin ananish arpesh, eik douk madae inekumesh eneh yopihi aih hishagrakuk ipak uwe, uwok. Ipak Korin douk atuh aih meyoh madae inekumep uwe. Um agundok madae ikep amaen um puke utabor um enyudok yeneken iri mour um uwe atin. Aria eik yenek yoweishi inahos um agundok madae irigep um eshudok uwe, aria douk yarikep um mare pusuwen pupe, uwok. Pukweshihenyuk.

<sup>14</sup> Douk yape yenek gibegabe um inatrip anah shopunek aria hutogur bioh

atih. Eik douk ta inaku, aria ta mare ikep amaen um puke enesh ipakish eshudok eneshenesh, uwok. Eik douk yakri uwok um irao enesh ipakish eshudok eneshenesh, yakri uwok. Yakri irao ipak kanak putanamori um Iruhin. Ipak douk padukemesh. Batowish douk madae shurim um eshudok shishubuk um amakenyish atish uwe, uwok. Amakenyish atish apa shenek eneshenesh shaurimesh um shako batowish. <sup>15</sup> Eik douk kabi ipakin yaken um. Aria douk yanadudareh ikep ihishmori eikish eshudok aria ikep eik kanak. Ikep eik kanak um inek mour dodogoiwe atuwe um itaurum ipak atip. Douk eik yakri namudok. Yakri eik douk yape um urkum manawasham ipak dodogoiwe atuwe yeshagrakuk kabi riguk um. Aria ipak urkwip panawashame atin arigaha aria ta uwok? <sup>16</sup> Ipak douk padukemesh. Abudok nyutob eik yani ipak mape obi nyutob, eik douk madae irikep um puke enesh eshudok eneshenesh uwe, uwok. Aria ipak enep douk peyagwrehume enyudok. Pakri eik douk yokwiraeh kupaihi yah aria yenek roh w yanatrip ipakibor utabor. <sup>17</sup> Riguk eik douk yeshopok amudok hanaku. Hanaku aria madae ikripamugu um hunaku hunek roh wumep hutripari enesh eshudok eneshenesh hunaki huko eikesh uwe, uwok meyoh. <sup>18</sup> Douk yeshopok Taitus nanaku aria yakrip anudok anan apakin um neiranagu. Taitus nanaku, aria anan madae nunek roh wumep nuna-tripari enesh eshudok eneshenesh uwe, uwok. Anan nani eik douk atip urkwip abom wagipesh atuh aih.

<sup>19</sup> Ipak douk patarih baraen nyetem apudok shup iri aria penek urkum pakri apak miyagwreh um dodogeship miyawiyamuk ipakin baraen um mukri apak douk yopumi armam madae munek yoweih aih um ipakis nabes. Aria uwok. Apak douk mape Krai ananipari aria Iruhin natrip nadukemesh um apak meyagwreh adurin atin. Eikish arpes, ihinyumori meneken iri mour douk meneken um mutaurum ipak piy-otu dodogowip um bilip. <sup>20</sup> Eik douk yanogugur um yakri ta ikri inak itogragu

aria itrip um pugipeshuk anah kupaihi aih eik yakri wokumah iri. Namudok aria ipak shopunek ta putiwe igipesh anah kupaihi sikih aih ipak pakri wokumah iri. Um agundok igapesh eshudok shenek yoweishi inahos iri um. Yanogugur um yakri ta itik ehudokmori yoweih aih hupenyep. Enyudok. Puneshushshruk puwish putogur um, punek nyigiya um kupaishi esheshish eshudok eneshenesh um, juwehosip arigas um, punadiyogur um pakri pugipesh ipakip atip urkwip um, piyagwreh agabusin um, punek dehik kupaishi um, pununu ipakish nyeiguhw um, mare punek baraen um. <sup>21</sup> Abudok nyutob eik ta wata inaku itik ipak obi nyutob, eik douk yanogugur um eikin Iruhin ta nukeik agab. Nukeik agab ipakis nabes um aria ta iraomep abraen um ipakih penek iri aih. Namudok aria ta puneke ireh um agundok ipak sabaipari pape um penek wehrur um, penek hanabosusih iri yoweih abom aih um hani eneshenesh mishish shakitak-umesh iri yoweishi inahos um. Enyudok douk riguk pape um peneken aria madae pukri um pukenyuk agabus uwe, uwok.

## 13

### *Eshesh Korin Ta Gamo Shudukemesh Um Shusuhw Krai Ananin Baraen Dodog Um*

<sup>1</sup> Douk inaku itrip aria ta hutogur biyeh atih. Iruhin ananin baraen nyetem ananik Buk iri nyakri namudok. Nyakri, "Aria biyesh o biyesh atin arpes shutik enen arpen nyunek enesh yoweishi inahos um, aria enyudok baraen wosik ta pukri adurin aria punek skelumen."

<sup>2</sup> Riguk yanaku yatrip biyeh aria hagiguki douk yakripepuguk dodogowinyi baraen. Douk enyudok yapeik rougun aria yakri gamo inekumepogu enyudok atin baraen. Baraen enyudok. Abudok nyutob ikri inakumagu, eshudok arpes douk riguk sharik shenek yoweishi inahos iri shani ihishmorim eshudok enesh arpes, eik ta mare ikri wosik-umesh, uwok. <sup>3</sup> Abudok nyutob ikri wosik-umesh aria igabeyesh obi nyutob, ipak ta putik namudok aria pudukemesh pukri eik adur Krai apa

neyohur yeyagwreh ananin baraan. Aria mnek! Krai ta nukwu eik neneke dodogoiwe atuwe aria nugapesh eshudok arpesh douk shenek yoweishi inahos iri. Ta nukwu eik aria niyabige um agundok anan dodogowin atun abom um. <sup>4</sup> Adur, riguk abudok nyutob shan shenek nyiliman rowog kruse obi nyutob, anan douk madae dodogowin uwe, uwok. Aria Iruhin anan douk dodogowin atun abom iri, aria wata nonohur nakitak aria douk nape. Kabi douk Jisas nape agundok atap aria madae dodogowin um uwe, douk apak shopunek matukur anan wata mape agundok atap aria madae dodogowip uwe. Aria abudok nyutob apak munaku agundok Korin obi nyutob, Krai ta nini ipak mupe munoprom aria Iruhin ta nutaurumap dodogowip um mutaurum ipak.

<sup>5</sup> Ipak atin atin ta punek skelum ipak kanak aria punosorik um ipak kanak douk pasuhw Debeini ananin baraan dodog o uwok? Ta punek skelum ipak kanak. Adur, ipak ta pudukemesh um Jisas Krai douk nape ipakiruh aparuh. Douk madae nupenyep akure, ipak ta mare pupe ananish arpesh, ta uwok. <sup>6</sup> Eik yakri ipak ta punek skelum apak aria ta pudukemesh abom um apak adur abom masuhw Krai ananin mour iri. <sup>7</sup> Apak apa marig Iruhin um nutaurumep aria mare punek enesh yoweishi inahos, uwok. Aria apak douk madae munek enyudok um enesh arpesh shutrup aria shukri apak munek ananin mour wosik iri uwe, uwok. Aria enesh arpesh shutrup shukri apak madae munek mour wosik um uwe, enyudok nyenekesh. Apak douk makri abom um ipak punek yopihi aih. <sup>8</sup> Ipak padukemesh. Apak ta mare dodogowip um munek enesh eshudok um mukenyuk agab adurinyi baraan, uwok. Munek mour mutaurumen um nyutogur dodogowin atin um, douk wosik. <sup>9</sup> Apak douk manadudareh um meibi nyutob apak madae dodogowip obi nyutob uwe, ipak douk patogur dodogowip um bilip. Aria apak douk marig Iruhin um nu-

taurumep abom putogur yopishi arpesh pishagrakuk kabi riguk parik patogur yopip um. <sup>10</sup> Eik Pol douk Debeini neneke um isuhw enyudok mour aria neke big um ineken. Aria douk watak yapeik rougun um ipak aria yenekumepogu enyudok baraan. Um yakri abudok nyutob ikri inak itogrumepogu obi nyutob, eik yakri uwok um dodogeshiwe atuwe igapesh um ipakih aih, uwok. Debeini neke enyudok big um itaurumep piyotu dodogowip atip um bilip. Madae nukeyen um inekep pubuhuk uwe, uwok.

*Pol Nenekumesh Yopuhi Nyumnah Eshesh Korin*

<sup>11</sup> O eikishi arpesh, eik douk enyudok yakri iyatak eikin baraan aria yakri ikri, "Yopuhi nyumnah ipak." Ipak ta punek mour dodogowip atip um putogur dodogowip um bilip. Yakri pusuhw eikin baraan abom pupe aturuh aparuh aria aparuh hur wosik. Iruhin anan douk baugos abom um agundok urkwip panawasham kupaishi aria aparuh hor wosik shape wosik um. Ipak punekesh namudok kabi yakri um aria anan ta nini ipak pupe.

<sup>12</sup> Yakri ipak atin atin ta pugipesh apak Iruhin ananishi apakih aih aria punadudareh punapuprik um.13:12 <sup>13</sup> Ihishmorim Iruhin ananish arpesh shape agundok iri douk shenemepogu yopuhi nyumnah ipak. <sup>14</sup> Aria yakri Debeini Jisas Krai wosik nutaurumep meyoh. Yakri Iruhin anan urkum munawashamep abom aria ananin Mishin nyutaurum ipak ihishmorim abom um pupe aturuh aparuh.

## Apudok Shup Douk Pol Nenekap Panam Eshesh Galesia Iri

*Banenyi Baraen Um Enyudok Baraen  
Pol Nenekan Nyanak Um Eshesh Galesia Iri*

1:1-5 Pol nakripesh yopinyi baraen um  
Iruhin nutaurumesh meyoh

1:5—2:21 Pol nakripesh eshesh Galesia um  
Iruhin ananin yopinyi baraen atin.  
Baugenyum enyudok Iruhin ananin  
baraen douk nyakri apak ta munek  
bilip um Kraiss atun

3:1—4:31 Apak monek bilip um Kraiss  
atun aria Iruhin natrup nahwarap  
yopishi arpes. Lo seiwok Iruhin  
nakoguk Moses um uwok

5:1—6:10 Kraiss nenekap matogur wosik  
atin aria Iruhin ananin Mishin ny-  
ataurumap monek yopihi atih aih

6:11-18 Pol nakripesh baraen um  
eshesh ta gamo shudukemesh um  
enesh arpes ta shukripesh um  
shutah esheshiruh yegeshiweruh.  
Aria nakripesh ananin nyatuh iri  
baraen shopunek.

<sup>1</sup> Eik Pol anan aposel yenek apudok shup. Madae enesh arpes shishopoke aria enen arpen nyitiwe um inek enyudok mour aposel uwe, uwok. Yain Iruhin douk nohur Jisas Kraiss nakitakuk um agundok nagok um iri nani Jisas Kraiss amam hatiwe um inek enyudok mour. <sup>2</sup> Eik Pol yani ihim ashukenyim owarhim hani eik mape agundok iri mon-eku apudok shup aria makripegogu um yopuhi nyumnah. Monekap panamagu ipak Iruhin ananish arpes douk pape sisigirub warub agudok shokugi nahobig Galesia iri. <sup>3</sup> Apak makri apakin Yain Iruhin nini Debeini Jisas Kraiss wosik hutaaurumep meyoh aria ipakiruh aparuh hur wosik. <sup>4</sup> Kraiss nagipesh apakin Yain Iruhin ananim urkum aria nekesh anan kanak shan nagok nator apakish yoweishi inahos. Nataaurumap namudok aria douk nakweshiap um ehudok sabaihi yoweih

aih douk hape agundok atap iri um douk ta mupe wosik. <sup>5</sup> Namudok aria ihih nyumneh apak ihishmorim douk mutuk Iruhin ananin nyeigur abom nyuto iruhw. Adur atin.

*Iruhin Ananin Yopinyi Baraen Douk  
Atin Arag Abom*

<sup>6</sup> Eik douk yakitak yowiyokuk meyoh abom um ehudok ipak penekah iri aih. Iruhin douk nahwarep panakumori anan um enyudok mour douk Kraiss neneken um nataurumep meyoh um. Aria madae roubi nyutob uwe aria wata pakri pukutunukuk pugipesh enen kupainyi baraen douk shakripegu um Kraiss um. <sup>7</sup> Aria Iruhin ananin yopinyi baraen douk madae enen shopunek nyupe abom uwe, uwok. Eik douk yakri enyudok maren baraen, enesh arpes douk shape shuwaribok um ipakip urkwip shukwiraeh um shububodig um Kraiss ananin yopinyi baraen. <sup>8</sup> Aria ta apak meyoh o enen nyape iri iruhw heven iri enes nyunaki nyukripegu enen kupainyi baraen douk madae nyudukem enyudok apak marik makripegu iri um uwe, aria enyudok arpen wosik eik yakri Iruhin nishopoken nyunak um nyih hapenyaburi wabur hel aria nyupe ganudok ihih nyumneh. <sup>9</sup> Riguk apak douk makriyen aria douk wata ikriyen shopunek. Aria enen arpen nyukripegu enen kupainyi baraen douk madae nyudukem enyudok riguk paraen iri um uwe, aria enyudok arpen wosik eik yakri Iruhin nishopoken nyunak um nyih hapenyaburi wabur hel aria nyupe ganudok ihih nyumneh.

<sup>10</sup> Eik madae ikri enyudok baraen um inek arpes shumnek aria shunadudarehume, uwok. Eik yakri Iruhin atun nutruwe nukri wosik. Adur atin, eik douk madae ikri um inek arpes shunadudarehume, uwok. Aria adur douk eik wata yape um yenekesh namudok akure, aria eik douk madae inek Kraiss ananin mour abom iri uwe, uwok.

*Pol Nakripesh Um Agundok Natogur  
Aposel Um*

<sup>11</sup> Ipak Kristen, wata ikripegu. Enyudok Iruhin ananin yopinyi baraen eik

yakripepen iri douk madae enen arpen meyoh nyunyuhur uwe, uwok. <sup>12</sup> Madae enen arpen nyukripeyen o enen arpen nyunebreshe-umen uwe, uwok. Jisas Kraisa anan meyoh neyabigeyen.

<sup>13</sup> Aih riguk yenekeh iri, um agundok yagipesh apak Juda apakih aih um douk pemnek baraen. Dodogoiwe atuwe abom yenekesh enenyenen eshesh Iruhin ananish arpeshe sharao debeiri eriger. Aria yabirak dodogoiwe atuwe yakwiraeh um inununish meyoh. <sup>14</sup> Agundok douk yagipesh apak Juda apakih eneheneh aih aria yenek lotu um Iruhin um, eik douk yeshagrakuk abom amudok Juda douk hani eik apak manoprom matogur manakwaram atin kwar um. Dodogoiwe atuwe abom yagipesh eikish popehesh yamehesh esheshih aih. <sup>15</sup> Aria eik douk wata shiyubuki uwe, aria Iruhin douk nagraehe. Anan douk nataurume meyoh abom aria nahware um itogur ananiwe. Arigaha abudok anan nakriyobi nyutob batogur <sup>16</sup> aria neyabige ananin nuganin. Neyabigeyan um inak ikrip kupaishi douk eshesh madae Juda iri uwe um ananin yopinyi baraen. Aria abudok nyutob, eik douk madae inak iyorik enen arpen um ta inekesh mumam uwe, uwok. <sup>17</sup> O shopunek madae ito um Jerusalem ikih itik mamudok douk harik hatogur aposel aria eik yagiguk yatogur aposel iri uwe, uwok. Aria yanak abom um agudok debeigi nahobig Arebia yape aria wata yatanam yanak um Damaskus. <sup>18</sup> Douk arigaha biyesh atin kwarahos shanak shadiguk aria ko yato um Jerusalem um ini Pita wiyagwreh. Yato aria yani anan wape biyog wik atuh nyumnah meyoh. <sup>19</sup> Aria douk madae itik anan shopunek aposel uwe, uwok. Yatik Jems, Debeini ananin wanin atun. <sup>20</sup> Iruhin douk native aria nadukemesh um enyudok yenyemori baraen, um agundok madae inak itik anan shopunek aposel um uwe douk madae inek roh w uwe, uwok. Adurin atin. <sup>21</sup> Douk arigah aria yanak um agusudok biyagos shokugosi nahobigos shahwaragos um Siria iri Silisia. <sup>22</sup> Aria eshesh Iruhin ananish arpeshe douk shenek bilip um Kraisa aria shape

agudok shokugi nahobig Judia iri douk watak shutik eikig yamag shudukeme uwe, uwok. <sup>23</sup> Eshesh douk shemnek baraen atin shakri, "Anudok arman riguk nenekap enenyenen aria marao eriger iri, ahudok nyumnah douk nape nakripesh baraen um enyudok bilip riguk nakri nen nununin iri." <sup>24</sup> Eshesh douk shemnek baraen um Iruhin nenekesh um eik namudok aria shatuk ananin nyeigur nyato iruhw.

## 2

### *Amudok Anam Aposel Hakri Wosik Um Pol Nenekan Iri Mour*

<sup>1</sup> Eik yape arigaha 14-poreish kwarahos shanak shadiguk, aria yani Barnabas watanam wanak um Jerusalem. Taitus shopunek yaruman nani eik wanak. <sup>2</sup> Eik douk yanak um maresh? Iruhin neyabige nakri eik ta inak. Yanak yani amam debeimi um Iruhin ananish arpeshe iri atum mape aria yape yakripam baraen. Yakripam um enyudok Iruhin ananin yopinyi baraen douk riguk yape yakrip kupaishi douk eshesh madae Juda iri uwe. Yakripam namudok um yakri hudukemesh. Uwok um, ta enyudok douk yenekeh iri o riguk yarig yenekeh iri mour ta nyunak nyubuhuk meyoh. <sup>3</sup> Taitus anudok neiri eik wanak iri, anan douk anan um eshesh Grik. Aria amam debeimi douk madae hiyagwreh um apak ta mutah ananihw yegenyihw uwe, uwok. <sup>4</sup> Adur, anam armam douk henek roh w hakri amam hasuhw Kraisa ananin baraen aria hanaki hawishumapari. Amudok armam douk henek roh w hanabeshuk hawisham um hakri hudukemesh um okwudok outuk apak matukur Kraisa Jisas aria mape wosik atin um. Kraisa nakweshihapak jurug um agundok enyudok lo seiwok Iruhin nakoguk Moses eni nyoweshikap um aria mape fri abom. Aria amudok armam wata hakri hunekap mupe kabi shonoweshik iri arpeshe um agundok mugipesh enyudok lo um. <sup>5</sup> Aria apak madae wosik mumnek amamin baraen uwe, uwok. Um maresh? Apak makri muyoh enyudok adurinyi Iruhin ananin yopinyi baraen um ipak punek bilip wosik. <sup>6</sup> Mamudok shahwaram

debeimi um Iruhin ananish arpesih iri, eik douk yakri madae anam debeimi anam shokumi uwe, uwok. Iruhin madae nutik aduk meyoh arpeshiruh yegeshiweruh aria nukri enesh yopishi enesh yoweishi uwe, uwok. Amudok debeimi douk madae hunaki hukripe enen kupainyi baraden shopunek um inak ikripesh uwe, uwok. <sup>7</sup> Aria amudok debeimi douk hadukemesh hakri Iruhin adur neke enyudok mour um inak ikrip kupaishi douk eshesh madae Juda iri uwe um ananin yopinyi baraden. Kabi douk Iruhin nakon mour Pita um nukrip eshesh Juda anan Iruhin ananin yopinyi baraden um. <sup>8</sup> Iruhin nataurum Pita nenekan dodogowin um nunek enyudok mour aposel nukrip eshesh Juda um anan Iruhin ananin baraden. Aria namudok atin. Eik douk anan neneke dodogoiwe um inek enyudok mour aposel um ikrip kupaishi douk eshesh madae Juda iri uwe um ananin baraden. <sup>9</sup> Jems nani Pita iri Jon douk eshesh Iruhin ananish arpesih shakri nyeiguhw shato umam iri, amam douk hadukemesh hakri eik douk Iruhin nataurume meyoh aria neke enyudok mour. Namudok aria hakohw roguh ohwak eik yani Barnabas menekesh kabi arpesih shanasupom shenek mour atugun iri um. Aria mabo atin baraden namudok. Eik ini Barnabas wosik unak unek mour utaurum kupaishi douk eshesh madae Juda iri uwe aria amam hunak hutaurum eshesh Juda. <sup>10</sup> Aria amam douk hakripohw abom atin baraden meyoh. Hakri apak ta mupe um mutaurum eshesh Iruhin ananish arpesih Juda douk shape Jerusalem aria shanahwaram um yaruhish arpesih. Aria enyudok, riguk eik douk mishin nyakitakumen abom aria dodogoiwe atuwe yape yeneken.

*Pol Nowereh Pita Nenekeh Iri Yoweih Aih*

<sup>11</sup> Abudok nyutob Pita nanak natograri wabur Antiok obi nyutob, eik douk madae imnek ananin baraden abom agundok nabesinum. Um maresh? Eneh anan nenekeh iri aih douk madae yopih uwe, uwok. <sup>12</sup> Amudok Jems neshopokam hanaki iri douk watak hunak hutograri uwe, aria abudok nyutob Pita apa

nanak nani enesh Iruhin ananish arpesih douk eshesh madae Juda iri uwe shape atugun shape shawok worigun. Aria amam hanak hatograri aria anan nenek yoweishi inahos um wata neyotukuk rougun aria madae nunak nini eshesh shugnoh atugun uwe, uwok. Um maresh? Anan nanogugur um amam shenek bilip iri Juda douk dodogowim atum abom um agundok yegeshiweruh hunatah iri um. <sup>13</sup> Amudok anam henek bilip iri Juda douk hatik Pita namudok, aria amam shopunek heiran henek roh w hape henek ehudok madae yopihi aih iri uwe. Henekesh namudok aria hohuran mishin Barnabas shopunek nenekesh kabi amam henekesh um.

<sup>14</sup> Douk arigaha aria eik yatik um amam madae henekesh wosik kabi enyudok Iruhin ananin adurinyi yopinyi baraden nyakrium uwe, uwok. Namudok aria yakrip Pita um amamis nabes yakri, “Nyak douk enen um Juda, aria nyenekeh iri aih douk kabi eshesh madae Juda iri uwe shenekeh iri um. Madae nyugipesh kabi apak Juda monekesh um uwe, uwok. Namudok aria mumam namudok, um wata dodogowin um kupaishi um shugipesh apak Juda apak aih um?”

*Eshudok Douk Shakri Krai Ananin Baraden Adurin Shagipeshen Iri, Iruhin Douk Nahwadesh Yopishi Arpesih*

<sup>15</sup> Adur, shobuki apak iri amakenyish douk Juda. Apak douk madae mukitak eshesh kupaisi awiros uwe, douk apak Juda makri shenek yoweishi inahos iri uwe, uwok. <sup>16</sup> Aria apak douk madukemesh. Iruhin madae nuhwar enen arpen yopunyi um agundok nyagipesh lo douk seiwok Iruhin nakoguk Moses enyi um uwe, uwok. Arpen nyukri Jisas Krai ananin baraden adurin nyugipeshen iri atin wosik Iruhin ta nuhwaren yopunyi. Apak Juda shopunek makri Jisas Krai ananin baraden douk adurin magipeshen um makri Iruhin wosik nuhwarap yopupari. Ta mare nuhwarap yopipari um agundok mugipesh enyudok lo um, uwok. Um maresh? Iruhin ta mare nuhwar enen arpen yopunyi um agundok nyugipesh enyudok lo um, uwok. <sup>17</sup> Apak

douk makri Krai ananin baraen adurin magipeshen aria makri Iruhin nahwarap yopishi arpesch um namudok. Namudok aria abudok nyutob apak mare mugipesh lo aria enesh Juda shutrup shukri apak mape munek yoweishi inahos kabi eshesh madae Juda iri uwe um, namudok apak ta mukri mumam? Aria ta mukri Krai napuhur munek yoweishi inahos aka? Adur atin uwok. <sup>18</sup> Aria ta eik wata ipe ikwiraeh um igipesh enyudok lo riguk yarig yabrigen iri um, namudok douk yanowereh abom um eik adur yenek yoweishi inahos. <sup>19</sup> Aria douk eik urkum morum enyudok lo um, eik douk madae inek debeinyi mour um igipeshen uwe, uwok. Yagipesh Iruhin ananim urkum um. <sup>20</sup> Eik yatukur Krai aria kabi douk yani anan wagok weir kruse um. Namudok aria douk yape um douk madae eik meyoh ipe uwe, uwok. Krai anan napenye. Agundok douk yape agundok atap um douk yakri Iruhin ananin Nuganin ananin baraen adurin yagipeshen aria douk neneke dodogoiwe yape. Yape kabi douk Iruhin nakri um eik ipeum. Krai anan douk urkum manawasham eik abom aria nagok nataurume. <sup>21</sup> Eik douk madae ikri Iruhin nuhwarap yopupari um agundok apak mugipesh lo um uwe, uwok. Douk ikri namudok akure, namudok douk yekenyuk agab enyudok Iruhin neneken iri mour um nataurumap meyoh aria neshopoki Krai nanaki nataurumap um. Um maresh? Ta Iruhin nuhwar arpesch yopishi um agundok shagipesh ananin lo um akure, aria Krai douk nagok meyoh!

### 3

#### *Ehudok Biyeh Aih Um Shagipesh Lo Um Hani Agundok Shenek Bilip Um Krai Um*

<sup>1</sup> Ipak Galesia douk pogugak abom. Eik douk yape yowerehumep baugos abom um agundok Jisas Krai nagok rowog kruse um. Douk yakripep wosik aria kabi ipak kanak patrun abom ipakis nabes um. Aria omi wata nyenekep pogugak pawish patogur? <sup>2</sup> Yakri iyorigep atin baraen meyoh. Yakri ipak parao Iruhin ananin Mishin um meihi yah, aria ta

pagipesh lo douk paraen aka, pumnek Iruhin ananin baraen penek bilip aria douk paraen? <sup>3</sup> Aria ipak douk adur pogugak abom aka? Tik, sagomatin douk Iruhin ananin Mishin nyataurumep pagipesh namuhi yah. Aria douk wata pakri pugipesh ahudok yah arigaha putogur yopipari um ipakin dodog meyoh aka? <sup>4</sup> Ihinyumori riguk nyatogrumep iri amaen douk nyatogrumep meyoh aka? Eik yakri enyudok douk madae nyatogrumep meyoh uwe, uwok. <sup>5</sup> Iruhin douk nekep ananin Mishin aria napeum nenek debeinyi mour um Iruhin atun neneken iri mour nyatogur patrin. Aria nenekumep namudok um agundok penek ananin yopinyi baraen pasuhwen pagipeshen um o nenekumep um agundok pagipesh lo um?

<sup>6</sup> Ipak douk urkwip purum Abraham. Iruhin ananik Buk douk kwakri, "Anan nenek bilip meyoh um Iruhin aria Iruhin douk nahwaran yopuni arman." <sup>7</sup> Namudok aria douk pudukemesh. Arpesch shunek bilip um Iruhin iri douk Abraham ananish batowish abom. <sup>8</sup> Seiwok watak, aria Iruhin nadukemesh nakri kweipon eshesh madae Juda iri uwe ta shumnek ananin yopinyi baraen aria shusuhwen dodog. Aria anan douk urkum morum nakri kweipon ta nuhwaresh yopishi arpesch. Namudok aria seiwok nakripan yopinyi baraen Abraham kabi Iruhin ananik Buk kwakri um. Kwakri, "Iruhin nakrip Abraham nakri, 'Nyak nyenek bilip um eik. Namudok aria kweipon ta inekumesh yopinyi ihish agundok atapishi arpesch.'" <sup>9</sup> Abraham nenek bilip aria Iruhin nenekuman yopihi aih abom. Namudok aria ihish shunek bilip iri arpesch, Iruhin ta nunekumesh yopihi aih namudok atin kabi neneken um Abraham um.

<sup>10</sup> Aria ihish arpesch douk shakri Iruhin ta nuhwaresh yopishi um agundok shagipesh lo um iri, eshesh Iruhin douk nakri um ta shupe yoweishigom abom. Um maresh? Ananik Buk douk kwakri, "Ihish arpesch douk madae shupe um shugipesh ihinyumori baraen nyetem ananik Buk lo nyetemek iri um uwe,



eshesh Iruhin douk nahwadesh yoweishi aria nakri um shupe yowesh abom.”  
 11 Baraen douk gamo nyape yopugunum abom um, Iruhin madae nuhwar enen arpen yopunyi um agundok nyagipesh lo um uwe. Um maresh? Iruhin ananik Buk kwakri, “Arpen nyunek bilip iri, Iruhin ta nuhwaren yopunyi aria ta nyupe ihih nyumneh.” 12 Agundok arpes shagipesh lo um douk madae shunek bilip um Iruhin uwe, uwok. Eshesh kanak ta shugipesh ihinyumori lo wosik atin abom kabi baraen nyetem Iruhin ananik Buk iri nyakrium. Lo nyakri, “Arpen nyugipesh ihinyumori lo nyakriyeh abom iri aih wosik atin um, enyen ta nyupe wosik ihih nyumneh.”

13 Aria Iruhin ananin lo douk nyakri, “Meishi arpes shubrig enen lo iri, eshesh douk amaen nyapeyesh aria ta shupe yowesh abom.” Aria apak douk Kraiss nator apakish yoweishi inahos aria nakweshihap um mupe wosik atin. Um maresh? Iruhin ananik Buk douk kwakri, “Thishmorim arpes douk shenek nyilimesh sheir rowos iri, eshesh douk Iruhin nahwadesh yoweishi aria nakri um shupe yowesh abom.” 14 Kraiss nenek enyudok mour um enyudok yopinyi seiwok Iruhin nakrip Abraham um ta nyutogur um kupaishi arpes douk eshesh madae Juda iri uwe. Nenekesh namudok um apak wosik munek bilip um Kraiss aria muraos Iruhin ananin Mishin kabi seiwok anan nakriyuk adurin atin baraen um.

### *Iruhin Ananin Lo Ta Mare Nyiyatakuk Ananin Adurin Atinyi Baraen, Uwok*

15 Ipak ashukenyish owashish, douk yakri ikripep enen baraen um agundok apak arpes mape magipeshen um. Aria biom armam hubo enen adurin atinyi baraen kontrak um hunek enesh eshudok eneshenesh um, enyudok baraen ta mare wata enen arpen nyubrigen o nyuwemaguk enen baraen shopunek, uwok meyoh. 16 Enyudok adurin atinyi baraen, Iruhin douk nakrip Abraham nani enen ananin barhenyin. Iruhin ananik Buk douk madae kwukri um sabaishi arpes uwe. Madae kwukri, “Nyak nyuni nyakish barheshish” uwe,

uwok. Aria Iruhin ananik Buk kwakri, “Nyak nyuni enen nyakin barhenyin.” Enyudok baraen douk nyakri atin arpen. Aria enyudok arpen douk Kraiss. 17 Baugenyum um enyudok eikin baraen douk namudok. Seiwok Iruhin nakri enen adurin atinyi baraen kontrak nakrip Abraham. Douk arigah 430-poreish kwarahos shanak shadiguk, aria enyudok Iruhin nakoguk Moses enyi lo nyagiguk nyatogur. Enyudok lo douk nyagiguk nyatogur, aria enyen douk madae wosik um nyubrig enyudok kontrak aria nyiyatakuk ananin adurin atinyi baraen uwe, uwok. 18 Aria ta apak mugipesh lo aria muraos eneshenesh yopishi eshudok mugremesh akure, aria apak mudukemesh namudok. Apak douk madae mugipesh enyudok adurin atin baraen aria muraesh uwe, uwok. Aria Iruhin nakripan enyudok atin adurinyi baraen Abraham aria natauruman meyoh nakon eshudok eneshenesh. 19 Namudok aria lo douk nyanakumori apak um maresh? Enyen douk Iruhin nagiguk nadrani ananin promis um abudok nyutob munek yoweishi inahos obi nyutob, enyen ta nyeyabigap aria mudukemesh mukri apak munek yoweishi inahos. Aria enyudok lo douk nyape arigaha anudok Abraham ananin barhonin seiwok Iruhin nakriyuk adur atin um ta nutograri iri natogur. Enyudok lo douk Iruhin nakripi enselahos shanaki shakrip Moses. Moses douk nape orokohun um apak mani Iruhin iri, aria Moses nanaki nako apak. 20 Nape orokohun narahaem um baraen iri ta nurahemen mumam aria wobresh atish arpes shupe um? Ta uwok. Aria Iruhin douk anan atun meyoh aria madae enesh um shutauruman uwe, uwok. Anan atun wosik nakop ananin adurin atinyi baraen promis.

### *Enyudok Lo Douk Nyeyabigap Yah Meyoh Um Munak Um Kraiss*

21 Enyudok promis douk madae anah yah um Iruhin nuhwar arpes yopishi aria enyudok lo kupaihi yah uwe, uwok. Iruhin anan madae biyeh yeh um nuhwar arpes yopishi um uwe, uwok. Anan douk atuh yah meyoh. Douk ta enen

lo ta wosik nyutaurumap mupe wosik abom ihih nyumneh akure, aria Iruhin ta nuhwarap yopupari um agundok mugipesh enyudok lo um. <sup>22</sup> Aria uwok. Iruhin ananik Buk douk kwakri, “Enesh-enesh yoweishi inahos showeshikesh dodog abom agnudok atapishi ihishmorim arpesh.” Eshesh showeshikap namudok um apak munek bilip um Jisas Kraisi iri ta murao yopishi eshudok enesh-enesh. Eshudok douk seiwok Iruhin nakri adurin atinyi baraen um nuko eshesh shenek bilip um Kraisi iri. <sup>23</sup> Abudok nyutob ahudok yah shenek bilip um watak hutogur obi nyutob um uwe, enyudok lo douk nyoweshikap abom mape arigah arigaha ahudok yah shenek bilip um hatogur hanowereh. <sup>24</sup> Lo douk nyape nyeyabigap yah meyoh nyarap arigah arigaha Kraisi natogur munek bilipuman um Iruhin nuhwarap yopishi arpesh. <sup>25</sup> Douk bilip nyatogur aria lo madae nyupe nyiyabigap yah uwe, uwok.

*Apak Munek Bilip Um Kraisi, Aria Douk Matogur Iruhin Ananish Batowish*

<sup>26</sup> Ipak ihishmorim douk pakri Kraisi Jisas ananin baraen adurin atin pasuwen pagipeshen. Namudok aria Iruhin nahwarep ananish batowish. <sup>27</sup> Meishi arpesh ipak douk shenek baptaisumep um Kraisi ananin nyeigur aria patukur anan iri, ipak douk patogur kabi anan kanak abom um. <sup>28</sup> Namudok aria eshesh Juda madae enesh kupaishi um eshesh madae Juda iri, shape shakamum kupaishi um shenekumesh mour meyoh iri, aria enesh kupaishi shape wosik atin iri, aria enesh kupaishi um armam kupaimi aria armago ono kupaiwari shopunek uwe, uwok. Ipak ihishmorim douk patukur Kraisi aria patogur atin arpen meyoh abom. <sup>29</sup> Aria ipak pupe Kraisi ananip um, aria enyudok douk nyenekep pape Abraham ananish barheshish um. Aria kweipon ta pugrem yopishi eshudok eneshenesh douk seiwok Iruhin nakripan adurin atin baraen Abraham um ta nukepesh iri.

## 4

*Apak Eneshenesh Showeshikap Iri Douk Munek Bilip Um Kraisi Aria Iruhin Nahwarap Ananish Batowish*

<sup>1</sup> Eikin baraen douk namudok. Anan nuganin ta nugrem ihishmorim yakenish eshudok eneshenesh. Ihishmorim eshudok douk adur ananish atish. Aria abudok nyutob anan wata batowin obi nyutob, anan douk wata nape kabi nape shakamum kupaini nenekuman mour meyoh iri um. Anan douk nyeigur wokan. <sup>2</sup> Abudok nyutob watak kupaimi douk yaken nagraeham um hatauruman aria hiyagwreh um hukri ananish eshudok eneshenesh. Ta henekesh-uman namudok arigaha yaken nakriyobi nyutob butogur, aria ta mare wata hiyagwreh um ananish eshudok eneshenesh uwe, uwok. <sup>3</sup> Aria apak douk namudok atin. Riguk apak douk mape kabi batowish um, aria eneshenesh yoweishi shape iruhw atap iri showeshikap dodog mape shakamumesh. <sup>4</sup> Aria arigaha Iruhin nakriyobi nyutob batogur abom, aria neshopoki ananin nuganin nanaki. Nanaki onok armatok kwanabuki natogur arpen, aria nape shakamum enyudok lo seiwok Iruhin nakoguk Moses um. <sup>5</sup> Iruhin neshopokan nanaki um wata nutor apak douk mape magipesh enyudok lo iri. Natorup um mutogur Iruhin ananish batowish abom. <sup>6</sup> Ipak douk pape Iruhin ananish batowish. Namudok aria anan neshopoki ananin nuganin ananin Mishin nyanaki nyawish apakiruh aparuh aria nyapuhur mape mahwar makri, “Aba! Yain!” <sup>7</sup> Namudok aria ipak mare pupe kabi arpesh douk shape shakamum kupaishi aria shape shenekumesh mour meyoh iri um uwe, uwok. Ipak douk Iruhin ananish batowish. Namudok aria ta purao ihishmorim yakenish eshudok eneshenesh pugremesh.

*Pol Anan Douk Urkum Yowem Abom Um Eshesh Galesia*

<sup>8</sup> Adur, riguk ipak madae pudukemesh um Iruhin uwe, uwok. Ipak pape shakamum amudok douk amam madae adurim god omi iri uwe, aria howeshikep

dodog. <sup>9</sup> Aria douk ahudok nyumnah padukemesh um Iruhin. Aria ikri Iruhin nadukemesh um ipak abom. Aria mumam namudok, um wata pakri putanam pugipesh eneshenesh rohwith madae dodogowish iri uwe yoweishi eshudok wata shuweshikep um? <sup>10</sup> Ipak douk pakri Iruhin ta nuhwarep yopipari um agundok pugipesh lo aria urkwip porum eneh debeihi nyumneh hani namubi aub bani namushi kwarahos um. <sup>11</sup> Namudok aria eik apahw yowehw abom um ipak. Yakri yanogugur um ta mour yeneken yataurum ipak um nyunak nyubuhuk meyoh. <sup>12</sup> O eikish ashukenyish owashish, eik douk dodogoiwe atuwe abom um yakri ipak pudukem eik abom. Pudukemesh um pukutukuk ahudok yah shagipesh lo um. Eik douk yadukem ipak. Riguk yani ipak mape um, ipak douk madae punekume eneh yoweihi aih uwe, uwok. <sup>13</sup> Ipak padukemesh, um agundok sagomatin yanaku yakripep Iruhin ananin yopinyi baraden um. Douk arugeh hae aria douk yanaku yape roubi nyutob yape yakripepen. <sup>14</sup> Adur, eik douk arugeh hae yegenyihw hwape yowehw. Ehudok arugeh hatogrome um hukwiraeh ipak aria henek ipak parao amaen, aria ipak douk madae pukeik agabus pakri arigeh hep pukutukuk eik uwe, uwok. Ipak parae kabi ta purao enen Iruhin ananin ensel um o purao Kraiss Jisas anan kanak um. <sup>15</sup> Riguk ipak douk panadudareh abom. Aria ahudok nyumnah douk wata mumam? Eik yadukemesh abom um ipakih aih douk yopihi abom. Aria abudok nyutob ipak ta wosik putuk ipakis nabes putaurume akure, ipak ta putukas pukeyas. <sup>16</sup> Aria douk mumam? Aria eik ta yatogur ipakin horin um agundok yakripep adurinyi baraden um aka?

<sup>17</sup> Adur, mamudok anam armam douk hape hakwiraeh um hakri huhurep mishish aria pugipesh amamin baraden. Aria eshudok hakri hunekesh iri ta mare shunekumep eneh yopihi aih, uwok. Amam douk hakri hudiyogur ipak puni eik um ipak pugipeshuk amam atum abom. <sup>18</sup> Aria namudok douk wosik,

ta ipak mishish shikitak abom aria dodogowip atip um punek yopihi atih aih um. Aria ipak ta punekeh ihih nyumneh. Mare pukri punekeh nyutob eik ini ipak mupe obi nyutob atub, namudok uwok. <sup>19</sup> O ipak douk patogur abom kabi eikish batowish-umori, anah shopunek eik yemnek debeiri eriger abom um ipak kabi onok armatok kwomnek eriger um kwubunuh um. Yemnek ipak um ta eriger ta wata rupe namudok arigaha ipak putogur Iruhin ananish batowish abom pudukem Kraiss anan kanak. <sup>20</sup> Douk ahudok nyumnah yakri adur abom um ini ipak mupe agundok. Yakri ini ipak mupe um ikripep enyudok baraden shokubur meyoh um pumneken aria pudukemesh um agundok eik urkum morumep um. Eik douk madae ipe wosik abom um ipak uwe, uwok. Ta itaurumep mumam?

### *Wobuwobren Baraden Um Bio Armago Sara Kwani Hagar*

<sup>21</sup> Eik yakri iyorik ipak douk pakri pugipesh lo iri. Ipak pemnek aria ta padukemesh aka uwok, um agundok lo nyakrium? <sup>22</sup> Iruhin ananik Buk kwakri Abraham nobuki biom nugamim. Anan Hagar douk kwonekumesh mour meyoh iri kwanabuki. Aria anan Sara okwudok kwape wosik atin iri kwanabuki. <sup>23</sup> Anudok nunganin Ismael douk kwonekumesh mour meyoh kwanabuki, okwok douk kwanabuki ahudok atuh yah kabi shabuki batowish um. Aria Aisak, okwudok kwape fri iri kwanabuki iri, okwok douk kwanabuki kabi seiwok Iruhin nakriyuk adurin atin baraden promis um ta kwanabuki um. <sup>24</sup> Enyudok baraden enyen douk ta mukri wobuwobren baraden. Oudok bio armago weyotu um biyen dodogowin atinyi baraden kontrak. Enen baraden kontrak douk enyudok lo Iruhin nakoguk Moses gani ahwudok yoduhw nyeigurihw um Sainai. Hagar douk kweyotu um enyudok. Arpesh shagipesh enyudok lo Iruhin nakoguk Mosesen iri, eshesh douk shape kabi shonoweshik iri arpesh um agundok shagipesh enenyenen lo um. <sup>25</sup> Hagar douk kwape kabi wobuwobren baraden

um ahwudok yoduhw Sainai douk hwape agudok debeigi nahobig nyeigurig um Arebia. Okwok douk shopunek wobuwobren baraen um abrudok doukibur wabur Jerusalem. Um maresh? Eshesh shape Jerusalem iri douk ihishmorim shape kabi shonoweshik iri arpes, um enyudok lo nyoweshikesh um. <sup>26</sup> Aria enyudok enen baraen douk enyudok adurin atinyi promis Iruhin nako Abraham um. Sara douk kweyotu um enyudok baraen. Aria okwok douk shopunek kweyotu um abrudok wabur Jerusalem douk bape iruhw heven iri. Okwok douk apakik amakek. Um maresh? Apak douk madae kabi showeshikesh iri arpes um uwe, uwok. <sup>27</sup> Iruhwibur wabur Jerusalem douk beshagrakuk abrudok doukibur wabur Jerusalem. Baraen nyetem Iruhin ananik Buk iri nyakri namudok. Nyakri, “Nyak armatok nyape kupin iri, nyak wosik nyunadudareh. Nyak armatok madae nyumnek eriger douk wobuki batowish wemnekar iri, nyak nyunadudareh nyuhur nokwat nyupe nyuhwar. Armatok anan neyatok iri douk kwabuki sabaishi batowish kwe-shagrakuk arman napemok iri okwokwish.”

<sup>28</sup> Aria douk, ipak eikish ashukenyish owashish douk padukem Aisak. Ipak douk patogur Iruhin ananish batowish um enyudok anan Iruhin nakri enyi adurin atinyi promis. <sup>29</sup> Seiwok anudok nuganin douk shagipesh ahudok atuh yah shabuki batowish um shanabuki iri, anan douk nakitak nenek yoweih aih um anudok anan douk shape dodogowish um Iruhin ananin Mishin shanabuki iri. Namudok aria ahudok nyumnah douk namudok atin. <sup>30</sup> Aria Iruhin ananik Buk douk kwakri mumam? Okwok douk kwakri, “Dodogowip um Hagar douk kwenekumesh mour meyh iri kwuni okwokwin nuganin Ismael shunakuk. Um maresh? Okwokwin nuganin ta mare nini Sara, Abraham ananik armatok okwokwin nuganin Aisak hugrem yakenish eshudok eneshenesh uwe, uwok.” <sup>31</sup> Namudok aria eikish ashukenyish owashish, apak douk madae okwudok kwenekumesh mour meyh iri

okwokwish batowish uwe, uwok. Apak douk ananik kwape wosik iri armatok abom okwokwish batowish.

## 5

### *Krais Nakweshihap Aria Madae Wata Mukri Lo Nyuweshikap Shopunek, Uwok*

<sup>1</sup> Riguk douk yoweishi inahos showeshikap aria Krais wata nakweshihap mape wosik. Aria douk pupe dodogowip abom aria mare wata pukri pupe shakamum lo shopunek, uwok. Pupe wosik abom. <sup>2</sup> Mnek! Eik Pol yakripep enyudok! Aria ipak pakri wosik um amam hutah ipakiruh yegeshiweruh um Iruhin nutrip nuhwarep yopipari um, aria Krais ta mare nutaurumep, uwok meyh. <sup>3</sup> Ipak ihipmorim armam douk pakri wosik um hutah ipakiruh yegeshiweruh iri, eik yakri ipak gamo punnek. Pakri punek enyudokmori um, aria ipak ta pugipesh ihishmorim abom um Juda esheshin lo shopunek. <sup>4</sup> Ipak douk pakri Iruhin nuhwarep yopipari um agundok pugipesh enyudok lo iri um, ipak douk pakutukuk Krais jurug. Agundok Iruhin nataurumep meyh um douk pakutunukuk. <sup>5</sup> Aria apak douk Iruhin ananin Mishin dodogowin atin nyapahur munek bilip um Krais. Aria madukemesh abom aria mape matrugun um anan ta nuhwarap yopishi arpes. <sup>6</sup> Aria arpes shutukur Krais Jisas um, aria ehudok aih um hutah yegeshiweruh um o madae hutah yegeshiweruh um uwe douk shopunek um rohwin atin. Aria adurin atinyi mour douk apak mukri Iruhin ananin baraen adurin mugipeshen wosik aria apakip urkwip punawasham kupaishi arpes. <sup>7</sup> Riguk ipak douk pasuhwen pagipeshen wosik abom enyudok adurin baraen. Aria douk omi nyatapok-umep yah, um ipak wata pugipesh adurinyi baraen um uwe? <sup>8</sup> Iruhin madae nupuhur um wata punekesh namudok uwe, uwok. Anan douk nahwarep aria nagraehep um pupe ananip iri. <sup>9</sup> Ipak urkwip porum enyudok wobuwobren baraen. Enyudok, “Asudok yis douk shakutus bret

takitak debeiti iri, asas douk shakwutu muduk atin aria ihitmorim bret takitak debeiti.”<sup>10</sup> Ipak pani eik douk matukur Debeini. Namudok aria yadukemesh um ipak ta pugipesh amudok eikim urkum. Eik madae idukemesh um anudok arman uwe, douk nape nenek rohwmep aria nenekep patogur rohwp iri uwe, uwok. Aria douk nyenekan. Kweipon Iruhin ta nuwanaman yoweishi inahos um enyudok anan neneken iri.<sup>11</sup> Ashukenyish owashish, ta adur eik wata yape yakripesh baraan um hutah yegeshiweruh aria Iruhin nutrum nuhwaram yopumi um, aria namudok mumam, um douk wata shape shenek enenyenen um? Aria adur eik yakripesh akure, eik ta mare wata shupe shuneker enenyenen um agundok yakripesh baraan um Kraiss nagok rowog kruse um, ta uwok.<sup>12</sup> Mamudok douk honowaribok ipakip urkwip iri douk yakri wosik um amam kanak hunak hutah amamiruh yegeshiweruh aria hukutukuk ipak pupe wosik atin.

<sup>13</sup> Eikish ashukenyish owashish, adur. Iruhin douk nahwarap um mutukweshih aria mare wata enesh eshudok shuweshikap, uwok. Aria ipak douk mare wata pure urkwip pukri ahudok nyumnah douk putukweshih jurug pape wosik aria harik hapenyep iri yoweih aih wosik ta punekeh, namudok uwok. Aria punekeh namudok. Ipak urkwip punawasham kupaishi aria putaurum kupaishi um eneheneh yopihi aih.<sup>14</sup> Ihinyumorim lo douk nyetem enyudok atin baraan. Baraan enyudok, “Nyak ta urkum munawasham kupaishi arpes kabi nyak urkum munawasham nyak kanak um.”<sup>15</sup> Aria ta ipak kanak pikitak punitok o purpak puwish putogur um, namudok douk ipak gamo pudukemesh. Ta ihitmorim punak puwishuk.

*Aih Douk Iruhin ananin Mishin Nyakwarumeh Iri Hani Harik Hapenyep iri Yoweih Aih Hakwarumeh Iri*

<sup>16</sup> Eik yakri-enyi baraan douk enyudok. Yakri pupe purahaen o punek enenyenen um, eik yakri pugipesh Iruhin

ananin Mishin atin. Punekeh namudok um, harik hapenyep iri yoweih aih ta mare pugipesh, uwok.<sup>17</sup> Apak douk madukemesh. Harik hapenyep iri yoweih aih douk hakri hubo Iruhin ananin Mishin nyubuhuk, aria Iruhin ananin Mishin shopunek nyakri nyubo ehudok harik hapenyep iri yoweih aih hubuhuk. Aria ehudok biyeh aih douk ihitmorim yoweih hape namudok. Namudok aria enyudok mukri muneken iri ta mubirak mare muneken, uwok.<sup>18</sup> Aria ta pugipesh Iruhin ananin Mishin um, aria douk madae pupe shakamum lo uwe, uwok.<sup>19</sup> Ipak douk padukemeh ehudok harik hapenyep iri yoweih aih. Ekeh douk ehudokmori. Shenek wehrur um, yoweih abraenyih aih, mishish shakitak um shunek dedebeishi atish yoweishi inahos abom um,<sup>20</sup> shunek lotu um madae adurimi god omi um uwe, shunek ouruh o maiyo um, ihitmorim yoweishi um, rupok nitok um, shenek nyigiya um kupaishi esheshish eshudok enesheneh um, juwehosish um, urkwip porum shakri shukwarum sabaishi eshudok shishagrakuk kupaishi um, juwehosish shakitak shanadiyogur um,<sup>21</sup> nyurub akasirub um kupaishi shape wosik um, shawok abar shagugak um, sheyorub anahahiruh yoweiruhi aweruh um hani eneheneh ehudokmori aih. Riguk yakripep aria douk namudok atin wata shopunek ikripep debeinyi baraan. Ihitmorim arpes shenek ehudokmori aih iri ta mare shuwish agundok Iruhin nape Debeini um ananish arpes um, ta uwok.

<sup>22</sup> Aria Iruhin ananin Mishin douk nyokwarum ehudokmori yopihi aih. Urkwip panawasham kupaishi um, shunadareh um, aparuh hor wosik shape atugun um, madae juwehosish arigas atin um uwe, shataurum kupaishi um, shenek yopihi aih abom um kupaishi um, shape wosik abom um kupaishi shatrish shakri adur um,<sup>23</sup> shape samokwiyaisih um hani ehudok eneh um musuhw merik um apak kanak aria miyotu dodog mare munek yoweishi inahos um. Lo nyakrium mare munek ehudokmori aih iri douk madae enen uwe.

<sup>24</sup> Ihishmorim Krajs Jisas ananish arpesh douk showeshikeh hagokuk rowog kruse jurug ehudok harik hapenyep iri yoweih aih. Showeshiguk ehudok hani ehudok eneh aih um mishish shakitak um munek eneshenesh yoweishi inahos um. Shaweshikeh hagokuk aria madae shupe shakamum harik hapenyesh iri yoweih aih uwe, uwok. <sup>25</sup> Iruhin ananin Mishin douk nyekap jurug okwudok outuk um mupe wosik abom um. Namudok aria apak ta mugipesh ananin Mishin abom atin. <sup>26</sup> Apak mare mutuk apakish nyeiguhw shuto iruhw meyoh aria mahur mukwiraeh um enenyenen o mutik kupaishi esheshish eshudok eneshenesh aria munek nyigiyaumesh, namudok uwok.

## 6

### *Apak Ta Munagapesh Um Mutaaurum Kupaishi Atin Atin Um Enenyenen*

<sup>1</sup> Eikish ashukenyish owashish, pakri puparug enen arpen nyunek enesh yoweishi inahos um, aria ipak pugipesh Iruhin ananin Mishin wosik abom iri wata putaurumen um enyen mare wata nyunek yoweishi inahos, uwok. Pukripen um, ipak mare pukripen debeg atin, uwok. Shokubur meyoh. Ipak atin atin shopunek ta gamo pudukemesh. Ta enesh eshudok shukwiraeh ipak shopunek. <sup>2</sup> Ipak ta punagapesh um putaurum kupaishi atin atin um agundok pusah enenyenen amaen um. Punekesh namudok aria douk ta pugipesh Krajs ananin lo abom. <sup>3</sup> Aria enen arpen nyukri enyen douk nyeigur nyato iruhumen, aria enyen nyeigur madae nyuto iruhw umen abom uwe, enyen douk nyenek rohwa abom. <sup>4</sup> Ihishmorim atin atin ta shutik enenyenen eshesh atin atin sheneken iri aria shukri eshesh shenek yopishi o yoweishi inahos. Aria shenek yopinyi um, aria eshudok arpesh wosik ta shunadudareh um enyudok eshesh kanak sheneken iri. Mare shukri shutik kupainyi arpen enenyenih aih aria shukri shunek skelumen, uwok. <sup>5</sup> Um maresh? Eshesh atin atin wosik douk shusah amaen um esheshih aih sisigih atin. <sup>6</sup> Eshudok arpesh douk

shenek skulum Iruhin ananin yopinyi baraen iri, eshesh ta shisiya ihishmorim esheshish yopishi eshudok eneshenesh aria wobresh shuko esheshin tisa. <sup>7</sup> Ipak mare punek rohwa um ipak kanak, uwok. Arpen nyunek rohwa um Iruhin iri douk madae enen uwe. Meiguni worigun enen arpen ta nyuwogun iri, enyen ta wata nyutuk agnudok atugun worigun. <sup>8</sup> Aria enyen nyupe um nyunek harik hapenyep iri yoweih aih um, enyen ta nyutuk yoweiguni worigun namudok. Ta nyunak nyuwishuk abom. Aria ta enyen nyupe um nyunek yopinyi atin kabi Iruhin ananin Mishin nyakrium, enyen adur Iruhin ananin Mishin ta nyutaurumen nyupe wosik abom ihih nyumneh. <sup>9</sup> Namudok aria apak mare arigeh hop um agundok munek yopihi aih um, uwok. Aria apak mare muktukuk yopihi aih um, nyutob ta butogur um Iruhin ta nunekumap yopinyi kabi worigun yopugun aria monak menekesh um. <sup>10</sup> Namudok aria ta ihih nyumneh eneh yeh hupe um apak munek enen enyudokmori um, apak ta munek yopinyi um ihishmorim arpesh. Aria sagomatin apak ta munek yopinyi um eshudok douk shani apak atup awirop um agundok munek bilip um.

### *Pol Neyatak Baraen Nakripesh Enen Dodogowinyi Baraen Aria Nenekumesh Yopuhi Nyumnah*

<sup>11</sup> Ipak putik abudok debeibi behrab eik meyoh yakwu eikis wis yawemumepogu enyudok tukwanin baraen um. <sup>12</sup> Anam armam douk dodogowim hapeimep um hakri hutah ipakiruh yegeshiweruh. Amam douk henek enyudok um hakri kupaishi shutrum aria shutuk amamish nyeiguhw shuto iruhw. Amam hanogugur hakri ta kupaishi shutrum shudukemesh um amam douk henek bilip um Krajs nagok rowog kruse um aria shukri shenekam enenyenen. <sup>13</sup> Amudok apa hatah yegeshiweruh iri, amam douk madae hugipeshen wosik uwe, enyudok lo seiwok Iruhin nakoguk Moses um, uwok. Aria amam douk hakri ipak pugipesh enyudok lo um

hutah ipakiruh yegeshiweruh aria amam hunatuk amamish nyeiguhw. <sup>14</sup> Aria eik douk ta mare inatuk eik kanak o ituk enesh kupaishi eshudok shuto iruhw, uwok. Eik ta ituk Debeini Jisas Kraiss ananin nyeigur atin nyuto iruhw, um agundok nagok rowog kruse um. Eik urkum morum agundok Jisas nagok kruse um aria yatik agundok atapihi yoweihi aih um douk yakri hugok. Aria eik douk shopunek kabi yagok iri um. Madae dodogoiwe um inek eneh agundok atapihi aih uwe, uwok. <sup>15</sup> Aria hukri hutah anan arman ananihw yegenyihw o mare hutahohw um, enyudok douk shopunek atin rohwin mour. Aria sagomatinyin abom mour douk Iruhin nunekap mutogur namishi abom arpesh. <sup>16</sup> Ihishmorim arpesh shasuhw enyudok baraan shagipeshen iri, eik yakri Iruhin wosik nenek gihaumesh, nutaurumesh aria aparuh hur wosik shunadudareh. Aria eshesh douk Iruhin ananish abom adurish Israel. <sup>17</sup> Nyagikuk abom iri baraan douk yakri ikri, ipak mare wata enen arpen nyuke enen amaen shopunek, uwok. Riguk shae aria nyubrusug gwape eikihw yegenyihw iri douk gweyabigep abom um eik adur yasuhw Jisas ananin mour iri. <sup>18</sup> O eikish ashukenyish owashish, eik yakri Debeini Jisas Kraiss wosik nutaurumep meyoh ipak ihishmorim, aria nunek ipakish mishish shur wosik. Adur atin.

## Apudok Shup Douk Pol Nenekap Panam Eshesh Efesus Iri

*Banenyi Baraen Um Enyudok Baraen Pol Nenekan Nyanak Um Eshesh Efesus Iri*

1:1-2 Nyarik iri baraen um Pol nanadudareh um nakri Iruhin nataurum eshesh Kristen Efesus.

1:3—3:21 Seiwok arigaha douk, Iruhin anan urkum manawasham apak. Namudok aria seiwok baugos um anan nanagraehap mape ananish arpesha aria narao sabaishi Juda shani eshesh madae shudukemesh um Iruhin iri uwe shape atish arag.

4:1—6:9 Yopihi aih apak Iruhin ananish arpesha apa mape lait iri ta mugipesheh iri

6:10-20 Apak munek bilip um Kraisi iri ta murao ahwudok wanohwihw suruhw um murpak aria mubo yoweishi inahos shubuhuk.

6:21-14 Nyatuh iri baraen

<sup>1</sup> O ipak Iruhin ananishi arpesha pape Efesus, aria pasuhw Kraisi Jisasi ananin baraen dodog pagipeshen peyotu dodog iri. Eik Pol douk Iruhin nagraehe um itogur aposel um inek Kraisi Jisasi ananin mour aria inak ikripesh ananin baraen iri yenekumep-ogu apudok shup ipak.

<sup>2</sup> Eik yakri apakini Yain Iruhin nini Debeini Jisasi Kraisi hutaurumep meyoah aria hunek ipakiruh aparuh hur wosik.

*Iruhin Nekep Ihishmorim Yopishi Eshudok Eneshenesh Apak Douk Matukur Kraisi Iri*

<sup>3</sup> Apak ta mutuk Iruhin ananin nyeigur nyuto iruhw. Anan douk apakin Debeini Jisasi Kraisi ananin Iruhin. Aria shopunek, anan douk ananin Yain. Aria apak douk matukur Kraisi aria Iruhin nenekumap yopinyi nakop ihishmorim eneshenesh yopishi eshudok shanaki iruhw heven iri. Anan nakopeshi um shutaurum apakip urkwip puni apakish mishish shur wosik. <sup>4-5</sup> Seiwok Iruhin watak nunek agundok atap uwe aria nagraehap um

matukur Kraisi aria mupe ananip atop. Um anan nutrup um, anan mare nutik enesh yoweishi inahos shupenyap, uwok. Aria ananim urkum douk manawasham apak. Douk namudok aria seiwok sago-matin anan urkum morum nakri nagraehap um mupe kabi ananish batowish um enyudok mour Kraisi neneken iri. Iruhin douk nagipesh ananim urkum aria nataurumep meyoah. <sup>6</sup> Iruhin douk nenekesh namudok um apak mutuk ananin nyeigur nyuto iruhw aria munek tenkyuman um ananish yopihi aih um nataurumep meyoah um. Aria ehudok ananish yopihi aih douk henek agundok anan natrugun abom um natogur yopugunum. Anan douk nataurumep meyoah um nakopari ananin nuganin douk anan urkum manawashaman abom iri um apak douk mutukur anan iri.

<sup>7</sup> Douk Kraisi atun nagok aria douk nakweshihap mape wosik um enesh-enesh yoweishi inahos douk showeshikap iri. Anan natorup ananibor owishibor aria anan madae nunasuhwesh um yoweishi inahos apak menekeh iri uwe aria nakweshihesh-aguk. Iruhin nenekumep enyudok um nakri niyabigep um agundok anan urkum manawashamep abom aria nataurumep meyoah um. <sup>8</sup> Anan nenek gihaumap abom nataurumep meyoah nakop ihinyumorim yopinyi saki nyani enyudok enen saki shopunek um mudukemesh um maroh yopihi aih aria menekeh iri yoweihhi um. <sup>9</sup> Iruhin douk nenek enyudok douk anan kanak nakri ta nuneken iri. Aria ananim manabeshuk iri urkum douk anan urkum morum nuneken iri mour, anan nakri nutaurumep aria neyabigapen um enyudok mour Kraisi neneken iri. <sup>10</sup> Aria sago-matin Iruhin ananim manabeshuk iri urkum mape um muneken abudok yopubi nyutob iri douk amudok. Anan nakri nurao ihishmorim ananish arpesha shuni ihishmorim shape iruhw atap iri shunak shupe atugun. Aria Kraisi atun nupe esheshin Debeini.

<sup>11</sup> Iruhin douk nenek ihishmorim eshudok shatogur kabi douk seiwok sago-matin anan nakri ta nenekesh shutograri iri. Aria seiwok anan nagraeh apak Juda um matukur Kraisi. Um maresh?



Anan nagipesh ananim urkum kabi douk seiwok sagomatin anan urkum morumen um. <sup>12</sup> Iruhin douk nagraeh apak Juda abom matogur sagomatinyip marik madukem um Krai douk ta kweipon nunaki iri aria mape matrugun-uman. Aria Iruhin douk nagraehap um mupe namudok um mutuk ananin nyeigur nyuto iruhw aria miyabigesh ananilh sabaihi yopihi aih.

<sup>13</sup> Aria ipak pape Efesus iri shopunek pemnek enyudok Iruhin ananin yopinyi adurin baraen um anan ta nuraep putanamori pupe wosik um aria pasuhw Krai ananin baraen pagipeshen aria patukur anan. Aria abudok nyutob ipak penek bilip um Krai obi nyutob, Iruhin nagraehap nenek ananin kak nyape ipak abom um pudukemesh um ipak douk pape ananip. Enyudok kak, enyen douk Iruhin ananin Mishin douk nyekepen nyapenyep iri. Enyen douk seiwok sagomatin Iruhin nakri enen adurin atinyi baraen um ta nukep ananin Mishin um. <sup>14</sup> Douk sagomatin Iruhin nakri enen adurin atinyi baraen um anan ta nukesh eneshenesh yopishi eshudok ananish arpesh. Douk namudok aria enyudok ananin Mishin douk anan narik nakopen iri douk nyeyabigap abom um mudukemesh um apak ta mugrem enesh eshudok eneshenesh shopunek. Aria shopunek nyeyabigap anob nyutob Iruhin ta nukweshih apak ananishi arpesh abom aria nurap munak muni anan mupe. Aria apak muni kupaishi arpesh mutuk ananin nyeigur nyuto iruhw aria miyabigesh ananilh yopihi aih.

### *Pol Nenek Beten Um Arpesh Shape Efesus Iri*

<sup>15-16</sup> Enyudok iganigadae yakriyen iri baraen douk adurin abom. Douk namudok aria hahudok nyumnah eik yenek baraen um ipak pasuhw Debeini Jisas ananin baraen dodog pagipeshen, aria ipak urkwip panawasham ihishmorim Iruhin ananish arpesh um, eik yape yenek betenumep abom arigaha yatograri um douk. Eik apa urkum morumep aria yenek beten yenek tenkyu

um Iruhin um ipak. <sup>17</sup> Eik yape yenek betenumep yarig Iruhin. Anan douk apakini Debeini Jisas Krai ananin Iruhin douk apakin Yaken wosik abom um apak mutuk ananin nyeigur nyuto iruhw iri. Eik yarigan um nukep ananin Yopunyi Mishin douk nyekep yopinyi saki um pudukem um baugenyum ananin baraen um pugipeshen aria pudukemesh abom um anan wosik. <sup>18</sup> Aria yarigan shopunek um nutaurumep nunekep pudukemesh um yopishi eshudok eneshenesh douk shakusumep iruhw heven iri. Eshudok douk anan nohwarep aria padukemesh abom aria pape patrugun-umesh iri. Aria shopunek um pudukemesh um agundok Iruhin ta nurao ipak puni ihishmorim ananish arpesh putanam pupe wosik ihih nyumneh um. Aria ipak ta pugrem yopishi atish eshudok eneshenesh douk shakusumep iruhw heven iri. <sup>19-20</sup> Aria eik yenek beten yarigan um nutaurumep nunekep pudukemesh um ananin debeinyi dodog abom douk apa nyenek mour nyataurum apak munek bilip um Krai iri. Enyudok dodog enyen douk enyudok atin dodog douk Iruhin nakwin um nohuri Jisas watak nakitaki wonugwehw napeum. Aria douk um enyudok atin dodog, Iruhin nanasap nape nunak um ananin yopunyi rogur ehah um gani iruhw heven. <sup>21</sup> Aria agundok iruhw heven, douk Krai nape Debeini nasuhw merik um eshesh debeishi enselahos shani ihm-morim nyeiguhw shatou-umam iri debeimi hape iruhw utag iri. Aria anan nape Debeini neshagrakuk abom ihishmorim sharao debeishi nyeiguhw iri. Eshudok douk shape iri shuni eshudok douk ta kweipon shutogur hugiguk iri nyumnah shopunek. <sup>22</sup> Aria Iruhin narao ihishmorim eneshenesh eshudok nenekesh shape shakamum Krai. Aria anan nagraehan um nupe Debeini um ihishmorim eshudok eneshenesh aria nupe sagomatinyin Debeini nusuhw merik um ihishmorim Iruhin ananish arpesh. <sup>23</sup> Iruhin ananish arpesh douk shape kabi Krai ananilh shuknihw yegenyihw um. Aria anan douk nape ihigunmorim um iruhw atap

aria nape Debeini iri um ihishmorim eshudok. Aria shopunek, anan nape numun abom um ihishmorim Iruhin ananish arpeshe esheshiruh aparuh.

## 2

### *Iruhin Nenek Apak Magok Iri Makitak Mani Krajs Mape Wosik*

<sup>1</sup> Seiwok ipak pape penek eneshenesh yoweishi inahos aria eshudok yoweishi shabo ipakish mishish shagok. Um maresh? Ipak pakonuguk agabus Iruhin aria penek yoweishi inahos. <sup>2</sup> Abudok nyutob ipak wata pape pagipesh agundok atapihi yoweih aih. Ipak pagipesh anudok dodogowini yoweini arman douk nasuhw merik um ihm-morim yoweimi douk hasuhw merik um iruhw utag iri anan aih. Aria douk anudok yoweini arman douk nape nasuhw merik um eshudok arpeshe douk shakonuguk agabus Iruhin iri. <sup>3</sup> Seiwok apak ihishmorim mape menek yoweishi inahos mani eshudok arpeshe douk shakonuguk agabus Iruhin iri. Apak magipesh apakih seiwok harik hapenyap iri yoweih aih hani ahahim urkum aria menek eneheneh yoweih aih apak mishish shakitakumeh iri. Douk namudok aria abudok nyutob apak shopunek, Iruhin ta juwehosin aria nop kabi douk nabo ihishmorim arpeshe shape agundok atap iri um.

<sup>4</sup> Aria Iruhin douk apa nenek gihaum arpeshe iri nakri gihaumap aria anan urkum manawashamap abom. <sup>5</sup> Douk namudok aria abudok nyutob apak watak mape munek eneshenesh yoweishi inahos shabo apakish mishish shagok obi nyutob, anan nataurumap meyohe nenekap matukur Krajs aria napuhur makitak mape. Aria anan watak narap matanamori mape wosik. <sup>6</sup> Apak douk matukur Krajs Jisas aria Iruhin napuhur mani Krajs makitak mape. Aria anan nakop debeishi nyeiguhw aria nenekap mani anan mape debeipari gani iruhw heven. <sup>7</sup> Iruhin douk nenekap namudok um douk arigaha kweipon shopunek, anan niyabig ihishmorim arpeshe shuni ihishmorim enselahos um shudukemesh um agundok anan nataurumap meyohe

abom um. Aria shopunek, Iruhin ta niyabig ehudok anan aih yopihi aih um nataurumap meyohe um agundok Krajs Jisas ananim urkum manawasham abom apak douk matukur anan iri um. <sup>8</sup> Enyen douk Iruhin nataurumep meyohe um agundok ipak pasuhw Krajs ananin baraen dodog pagipeshen um aria anan naraep patanamori pape wosik. Enyudok enyen douk madae ipak kanak pakri um putanam pupe wosik uwe, uwok. Enyen douk Iruhin kanak nataurumep meyohe naraep patanamori pape wosik. <sup>9</sup> Enyen douk madae ipak punek mour aria douk naraep putanamori pupe wosik uwe, uwok. Douk namudok aria ta mare enen atin arpen nyukri nyutuk enyenyin nyeigur nyuto iruhw, uwok. <sup>10</sup> Um maresh? Iruhin atun nenekap aria mape. Aria apak matukur Krajs Jisas aria Iruhin nenekap matogur namishi arpeshe um munek yopihi atih aih douk seiwok anan nenek redimehumap um mupe munekeh iri.

### *Krajs Narao Biyos Awirosish Arpeshe Nenekesh Shatogur Atup Debeipi Awirop*

<sup>11</sup> Douk namudok aria ipak ta pudukemesh um enyudok. Amam Juda amam kanak hakwu amamis wis hatah amamiruh yegeshiweruh. Douk namudok aria eshesh Juda eshesh kanak shanahwar shakri, "Eshesh shatah yegeshiweruh iri." Aria ipak douk madae Juda iri uwe, eshesh Juda shahwarep shakri, "Ipak madae putah yegeshiweruh iri uwe." <sup>12</sup> Aria ipak ta punek urkwip um riguk abudok nyutob ipak papeik rougun um Krajs obi nyutob. Ipak pape kupairubi warubish arpeshe aria papeik aduk um Iruhin ananip awirop um eshesh Israel. Aria shopunek, ipak madae pudukemesh um Iruhin uwe aria papeik aduk um enyudok ananin dodogowinyi baraen kontrak douk anan nakrip eshesh Israel enyi. Enyudok baraen anan douk nakri adurin atin um ta nutaurumesh um. Aria ipak madae pupe putrugun um agundok kweipon anan watak nuraep putanamori pupe wosik um uwe. Aria ipak madae pudukemesh um Iruhin uwe. <sup>13</sup> Aria ipak

douk seiwok papeik rougun um Iruhin iri, douk anan nenekep patukur Krai Jisas. Aria ananibor owishibor douk batourak iri benekep panak pape hurukatin um Iruhin.

<sup>14</sup> Um maresh? Krai anan kanak douk baugos abom um apakiruh aparuh hur wosik um. Aria anan narauri apak Juda mani ipak kupaipari douk madae pudukemesh um Iruhin iri uwe manaki nenekep matogur atup awirop. Anan kanak nabrig arbudok narub douk badiyogur apak Juda mani ipak iri aria nabouk ehudok aih um menenem horim um habuhuk. <sup>15</sup> Krai nabrig arbudok narub namudok. Anan nagok aria nabo enyudok lo douk seiwok Iruhin nakoguk Moses enyi nyani enen baraen shopunek douk nyape numun enyudok lo iri nyagokuk. Anan nenekesh namudok um nunek apak asudok biyos awiros um arpes mutogur kabi atin namunyi arpen um. <sup>16</sup> Aria Krai nenek apakiruh aparuh hur wosik aria mape atugun hurukatin um Iruhin. Krai nagok rowog kruse aria nabouk ehudok aih um apak munenem um horim hagokuk. Aria narao apak Juda mani ipak douk madae Juda iri uwe nenekep masuhw atum urkum aria narap matanamori um Iruhin. <sup>17</sup> Aria Krai nanaki nakripesh yopinyi baraen ihishmorim arpes nakri, "Ipak aparuh hur wosik aria punagabeim um pupe atugun." Anan nakri pep enyudok baraen ipak douk seiwok pape rougun um Iruhin iri pani apak Juda douk mape hurukatin um anan iri shopunek. <sup>18</sup> Aria douk apak biyos awiros matukur Krai aria morao atin Iruhin ananin Mishin nyapenyap aria apak wosik ta munak mutogur um Yain Iruhin.

*Apak Ihishmorim Kristen Douk Mape Kabi Iruhin Ananit Debeiti Urupat Um*

<sup>19</sup> Douk namudok aria ipak douk madae pupe kabi kupairubi warubish arpes douk amnab wokeshi um uwe, uwok. Douk ipak pawish um eshudok Iruhin ananish arpes aria pape um ananip awirop. <sup>20</sup> Aria ipak pape kabi douk anat urupat Iruhin narokat iri um. Anan narokat tatem iruhw um apak aposel

mani amam profet. Apak aposel aria profet douk mape kabi utabor bosah urupat iri. Aria Jisas Krai anan douk amudok sagomatinyim dodogowimi utom douk apa mosah wobrat um urupat iri. <sup>21</sup> Aria unokiwog-itum atudok urupat douk tanotukur dodog um Krai. Aria douk Iruhin wata apa nape narokat atin. Aria atat ta tutogur yopuyoputi abom aria tupe Debeini ananit atut. Aria apak matukur anan atun. <sup>22</sup> Aria ipak shopunek douk patukur Krai aria Iruhin naraep pani sabaishi kupaishi ananish arpes aria nape nenekep patogur kabi douk urupat um anan nuwish nupe um. Baugenyum enyudok baraen douk nyakrium Iruhin ananin Mishin.

### 3

*Pol Nenek Mour Nakripesh Yopinyi Baraen Eshudok Douk Madae Shudukemesh Um Iruhin Iri Uwe*

<sup>1</sup> Krai douk nenek apak Juda mani ipak douk madae Juda iri uwe matogur atup awirop. Aria douk eik Pol yape yakripesh Krai ananin yopinyi baraen. Douk namudok aria um enyudok atin, douk Krai Jisas nuweshike yape um itaurum ipak douk seiwok madae pudukemesh um Iruhin iri uwe. <sup>2</sup> Adur atin ipak padukemesh um enyudok mour douk Iruhin nataurume meyoh aria nekeyen um itaurum ipak um. <sup>3</sup> Mour douk enyudok. Seiwok ananin baraen douk wata nyanabeshuk nyape. Aria douk abudok nyutob Iruhin nenenen nyatogur yopugunum neyabigeyen yadukemen. Douk namudok aria eik yowemagu enyudok banenyi baraen yakri pep um apudok shup. <sup>4</sup> Ipak ta putarih enyudok baraen aria ta pudukemesh um eikim urkum um agundok eik yadukemen wosik enyudok nyanabeshuk iri baraen um Krai um. <sup>5</sup> Seiwok um roubi nyutob, Iruhin madae nunek enyudok nyanabeshuk iri baraen nyutogur yopugunum aria enesh arpes shudukemen uwe. Aria douk ananin Mishin nyakripapen yopugunum um apak Iruhin ananishi aposel mani amam profet. <sup>6</sup> Baraen seiwok nyanabeshuk iri douk enyudok. Ipak douk

riguk madae pudukem Iruhin iri uwe, douk pemnek ananin yopinyi baraeen pasuhwen dodog pagipeshen. Douk namudok aria ipak pani apak Juda matogur atop awirop. Aria apak ta mugrem yopishi eshudok eneshenesh douk Iruhin nenek redimesh shakusumap iri. Aria apak ta muraio ihishmorim yopishi eshudok eneshenesh douk Iruhin nakri adurin atinyi baraeen um ta nuko apak douk matukur Kraiss Jisas iri.

<sup>7</sup> Eik douk Iruhin nataurume meyoh aria neke enyudok mour um ikripesh enyudok yopinyi baraeen. Aria um ananin dodog atin, anan neneke yatogur dodogoiwe aria douk eik yape yenek enyudok mour. <sup>8</sup> Adur, eik nyeigur woke aria yape shakam abom um ihishmorim Iruhin ananish arpes. Aria Iruhin nataurume meyoh aria douk neke enyudok mour um ikripesh enyudok yopinyi baraeen um Kraiss eshudok douk madae shudukemesh um Iruhin iri uwe. Enyudok baraeen douk nyakrium eneshenesh Kraiss ananish yopiyopishi eshudok douk arpes madae wosik um shudukemesh iri uwe. <sup>9</sup> Aria um itaurum ihishmorim arpes um shudukemesh um ananim urkum iri aih. Seiwok arigaha douk, amudok ananim urkum iri aih douk shanabeshuk shapeum ananim atum urkum. Aria douk anan nenek iruhw atop nani eneshenesh shape iri neke enyudok mour um ikripesh ananin baraeen um shudukemesh um ananim urkum iri aih. <sup>10</sup> Seiwok anan nabeshuken. Aria douk anan nakop mour apak ihishmorim ananish arpes mape agundok atop iri. Anan nakopen um nakri miyabig ihishmorim yopishi shuni yoweishi dodogowishi shuni enselahos douk shape shasuhw merik um iruhw atop iri um shudukemesh um enenyenen saki Iruhin ananin. <sup>11</sup> Iruhin douk nagipesh ananim urkum douk mape ihih nyumneh iri aria nakop enyudok mour kabi douk seiwok anan neneken um apakin Debeini Kraiss Jisas ananis wis um. <sup>12</sup> Aria apak mani ipak douk matukur Kraiss munek bilipman aria ta mare munogugur munak hurukatin um Iruhin um. <sup>13</sup> Douk namudok aria eik yakri ikripep um arudok eriger

douk eik yarar eikihw yegenyihw iri. Ipak mare putruwe um agundok eik yemnek debeiri eriger um aria ipak aparuh yoweruh pukri pukutukuk Iruhin ananin mour um pukripesh ananin baraeen um, uwok. Ipak piyotu dodog. Um maresh? Arudok debeiri eriger, eik douk yemnekar um itaurum ipak um pupe wosik puni Iruhin.

*Pol Nenek Beten Um Arpes Shape Efesus Iri Um Shudukemesh Um Agundok Kraiss Urkum Manawashamesh Um*

<sup>14</sup> Eik urkum morum Kraiss nenek apak Juda mani ipak douk riguk madae pudukemesh um Iruhin iri uwe matogur atop awirop um. Aria douk um enyudok atin, eik yabuh yoduk ohrubus yenek beten yahwar Yain. <sup>15</sup> Eik yahwar anudok Yain douk nodowop nyeiguhw apak ihishmorim arpes his awiros mape agundok atop iri mani ihishmorim dodogowishi eshudok eneshenesh shani enselahos douk shape iruhw heven iri. <sup>16</sup> Eik yenek beten yarig anan douk baugos abom um ihinyumorim dodog nyani yopihi aih iri um nutaurumep nunekep dodogowip. Aria um ananin Mishin atin, anan nunek numun ipakiruh aparuh putogur dodogowip atip. <sup>17</sup> Aria shopunek yarigan um enyudok ipakin bilip atin um Kraiss, ihih nyumneh anan nupe numun abom ipakiruh aparuh. Aria eik yenek beten yarig Iruhin um nutaurumep um pugipesh ehudok aih um ipak urkwip punawasham arpes abom um. Aria ehudok aih hunekep piyotu dodog abom kabi douk enen rowog enenyiruh nukwaruh habuh hasuhw atop aria nyatao dodog um. <sup>18</sup> Eik yenek beten namudok um yakri ipak puni ihishmorim Iruhin ananish arpes purao ananin dodog um pudukemesh um agundok anan urkum manawasham ipak abom um. Pudukemesh um debegun abom nato iruhw um, debegun nabuhukuk atop um, aria agumigun nanak wobuwobur um. <sup>19</sup> Aria yenek beten yarigan um nutaurumep abom pudukemesh um agundok Kraiss urkum manawasham ipak abom um douk neshagrakuk abom ihishmorim arpes hin saki. Eik douk yenek betenumep namudok um

yakri ipak putukur Kraiss aria puraeh piyateh abom Iruhin ananish aih. Aria anan nupe abom numun ipakiruh aparuh aria ipak pudukem anan.

<sup>20</sup> Iruhin anan douk dodogowin atun iri. Aria enyudok ananin dodog douk nyenek mour numun um apakiruh aparuh iri douk dodogowin atinyi abom. Aria um ananin dodog atin, anan douk wosik abom um nunek eneshenesh yopishi eshudok douk sheshagrakuk abom ihinyumorim baraen apak munek beten morigan-umenyi nyani enyudok apakip urkwip poromen iri shopunek. <sup>21</sup> Douk namudok aria apak Iruhin ananishi arpesht ta mupe um munadudareh um Iruhin aria mutuk ananin nyeigur nyuto iruhw abom ihih nyumneh seiwok arigaha kweipon um Kraiss Jisas ananin atin nyeigur. Adur.

#### 4

*Apak Iruhin Ananishi Arpesht Douk Mape Kabi Kraiss Ananishw Shuknihw Yegenyihw Um*

<sup>1</sup> Eik Pol douk yape yenek Debeini ananin mour agundok aria douk showeshike yape. Aria eik yakri ikripep um ipuhur um punekesh namudok. Ipak ta pupe wosik punek yopihi atih aih kabi douk sagomatin Iruhin nahwarep um nakri pugipesheh iri. <sup>2</sup> Ipak ta pupe shakam abom um kupaishi arpesht putaurumesh pukripesh shokubur. Aria ipak aparuh mare juwehosiruh arigas um enesh eshudok, uwok. Aria mare juwehosip um pakri puwanamesh yoweishi inahos douk shenek yoweishi inahos um ipak iri. Ipakip urkwip ta punawashamesh aria pusah enyudok amaen eshesh shukepen iri. <sup>3</sup> Ipak douk Iruhin ananin Mishin nyenekep pasuhw atum urkum. Douk namudok aria ipak ta punek mour dodogowip atip um pugipesh ehudok aih um aparuh hur wosik um. Ehudok aih douk henekep pasuhw atum urkum. <sup>4</sup> Aria apak ihishmorim Iruhin ananishi arpesht douk mape kabi atin arpen um. Aria Iruhin ananin Mishin shopunek, enyen douk atin meyoht. Aria

ehudok aih um Iruhin nuhwarep um pugipeshan aria pupe putrugun um kweipon anan nuraep putanam pupe wosik um enyen shopunek douk atin meyoht. <sup>5</sup> Aria Debeini shopunek douk atun meyoht, aria bilip atin meyoht, aria baptaiss shopunek douk atin meyoht. <sup>6</sup> Aria Iruhin shopunek douk atun meyoht. Anan douk apak ihishmorim apakin Yain. Anan douk Debeini um apak ihishmorim ananishi arpesht aria nape numun abom apakiruh aparuh aria nape nenek mour.

<sup>7</sup> Kraiss douk nataurumap nakopen meyoht yopinyi presen apak ihishmorim atin atin. Anan nakopen kabi douk anan nagraehen um nakri nukopen um. <sup>8</sup> Enyen douk kabi Iruhin ananin baraen nyetem ananik Buk iri nyakrium. Baraen enyudok, "Abudok nyutob anan nato iruhw um, anan nenek uhwinyum ananim horim aria nanaweshik um sabaishi arpesht. Aria nekeshen meyoht sabainyi yopinyi presen ananish arpesht." <sup>9</sup> Douk baugenyum baraen um enyudok baraen um "Nato iruhw" um douk nyakri namudok. Sagomatin anan nabuhukuk gani atap um agundok atap amnab. <sup>10</sup> Aria anudok douk nabuhukuk gani atap iri wata anan kanak abom natanam nato. Anan nato nakih neshagrakuk iruhw utag aria nape Debeini abom um nupe ihigunum iruhw atap. <sup>11</sup> Aria enyen douk anan atun nakopen meyoht abom yopinyi sisigin presen. Anan nakopen namudok. Anan nagraeh anam um hutogur aposel. Aria enesh douk profet, aria enesh um shunek enyudok mour um shurahaen shunak shukrip arpesht um Kraiss ananin yopinyi baraen um shumneken shusuhwen shugipeshen iri. Aria anam douk pasto iri tisa, um hunek skulum eshesh Kristen um shutogur dodogowish aria shunek yopihi atih aih. <sup>12</sup> Kraiss nakop enyudok yopinyi presen apak Iruhin ananishi arpesht um munek redi um apak kanak um mupe munek ananin yopinyi mour. Apak munek mour um apak douk mape kabi Kraiss ananishw shuknihw yegenyihw aria mutogur dodogowip. <sup>13</sup> Aria apak mupe munekesh namudok atin ari-

gaha anah nyumnah apak ihishmorim abom musuhw atum urkum um musuhw Kraiss ananin baraan dodog mugipeshen um. Aria um agundok mudukemesh um Iruhin ananin nuganin um. Aria shopunek abom um mutogurum enyudok kak um mugipesh Kraiss ananin yopihi aih wosik um.

<sup>14</sup> Aria apak mutogur namudok um, apak ta mare mupe kabi shokwishi batowish douk madae enep yopipi urkwip pupenyesh iri uwe um, uwok. Aria ta enesh arpesh douk shadukemesh wosik abom um shenyubumep iri shukri shukripap enen rohwin baraan um, esheshin baraan ta mare nyunekap nyupotikap munakuk aria mugipeshesh, uwok. Aria shopunek um esheshin baraan mare nyunekap mupe kabi enen kanu douk uhwin nyahur nyenek youg gwenyuhur nyanak wobuwobur iri um, uwok. <sup>15</sup> Apak ta mupe dodog aria urkwip punawasham kupaishi aria miyagwreh adurin atinyi baraan. Aria shopunek ta mugipesh ihishmorim Kraiss ananin yopihi aih. Aria apak munekesh namudok um, apak ta mutogur dodogowip mishagrakuk riguk marik mape menekeh iri aih. Aria apak mupe munekesh namudok abom arigaha mudukem Kraiss. Anan douk debeini abom um apak Iruhin ananishi arpesh iri.

*Apak Iruhin Ananish Arpesh Ta Murao Namuhi Aih*

<sup>16</sup> Anan atun douk debeini um apak ihishmorim Iruhin ananishi arpesh. Aria apak apa mape dodogowip um anan atun kabi douk nyugurish shani meriyu shasuhw roguh aiyas shani kupaigunium yegenyihw um. Aria ta eshesh shunek mour kabi douk anan nakri um, shuknihw yegenyihw ta hwubiram kupaigunum um ahwudok yegenyihw, aria hwutogur dodogowihwi hwishagrakuk riguk hwarik dodogowihwi um. Aria ipak douk pape kabi ahwudok yegenyihw um. Aria ipak apa patogur dodogowip um agundok ipak urkwip panawasham kupaishi aria panataurum kupaishi um panabiram um.

<sup>17</sup> Douk namudok aria eik yakri ikripep enen baraan. Ipak douk putukur Debeini. Douk namudok aria eik yakri ikripep dodogoiwe atuwe um ipak mare watak pupe pugipesh eshudok douk madae shudukemesh um Iruhin iri uwe shenekeh iri aih, uwok. Eshudokmori arpesh esheship urkwip douk pape um porum wehinyi rohwin atin baraan.

<sup>18</sup> Eshesh saki wokesh aria esheship urkwip porum yoweishi inahos atish kabi douk shape arukwutigun um. Eshesh madae shudukem eneh yopihi aih uwe, uwok. Eshesh baragos seshukesh. Douk namudok aria eshesh shapeik rougun um agundok Iruhin nenekap matogur namupi mape wosik abom ihish nyumneh um. <sup>19</sup> Eshesh abraen madae nyupeyesh atin um esheshih yoweih aih uwe, uwok. Eshesh shawish abom um shenek eneheneh yoweih abraenyih aih. Aria eshesh shagipesh ihishmorim abom yoweih aih douk henekesh shabosusih iri. Eshesh shapeum shenek ehudokmori aih aria eshesh mishish shakitak abom um shuneheneh ihish nyumneh.

<sup>20</sup> Aria ipak, shenek skulumep um Kraiss ananin yopihi aih um, eshesh douk madae shunek skulumep um ehudokmori yoweih aih uwe, uwok. <sup>21</sup> Adur atin, ipak douk pemnek um Kraiss aria patukur anan aria shenek skulumep um enyudok adurin baraan douk nyakrium Jisas ananin yopihi aih iri. <sup>22</sup> Seiwok ipak douk shenek skulumep um pukutukuk ipakih seiwok harik hapenyep iri yoweih aih douk hape hanunip iri. Eneh douk ehudok eneheneh yoweih aih douk henek rohwmep aria ipak mishish shakitakumeh iri. Douk namudok aria ipak ta pukutihuk pukehuk agabus. <sup>23</sup> Aria ipakip urkwip ta putogur namipi abom aria purum namihi atih yopihi aih. <sup>24</sup> Ipak ta putogur namipi kabi douk Iruhin nenekep um putogur kabi anan kanak um. Aria pugipesh yopihi atih abom aih.

<sup>25</sup> Douk namudok aria ipak ihishmorim ta pukutukuk ehudok aih um pape penek rohwmep um kupaishi Iruhin ananish arpesh um. Ipak ta pukripesh adurin atinyi baraan. Um maresh?

Ipak padukemesh, apak ihishmorim douk mape kabi roguh w aiyas um otuh w yegenyihw. Aria apak douk matogur atin arpen. <sup>26</sup> Aria ta ipak juwehosip um, ipak ta gamo pudukemesh um ipak mare punek yoweishi inahos. Aria shopunek, ipak mare juwehosip pupe namudok arigaha aun nubuh, uwok. <sup>27</sup> Ta punekesh namudok aria punekuman anah yah Satan. <sup>28</sup> Eshudok arpeshe douk apa shakwuaruh iri eshesh mare watak shukwuaruh, uwok. Eshesh kanak ta shunek mour wosik um eneshenesh eshudok um shukesh um yaruhish.

<sup>29</sup> Ipak mare piyagwreh enenyenen yoweinyi barae n, uwok. Ipak ta piyagwreh yopinyi atin barae n douk wosik um nyutaurum arpeshe um shusuhw Iruhin ananin barae n dodog shugipeshen iri. Ipak ta punekesh namudok um putaurum eshudok arpeshe douk shemnek ipakin barae n iri. <sup>30</sup> Aria ipak mare punek enesh yoweishi inahos um punek Iruhin ananin Mishin enenyenihw apahw yowehw, uwok. Enyen douk Iruhin ananin kak um agundok anan nanagraehep um pupe ananip atip abom um. Aria pupe namudok arigaha punak putogur um ahudok nyumnah douk ta anan nukweshihp aria nuraep pupe wosik abom ahi. <sup>31</sup> Ipak ta pukutukuk ehudok ihihmorim yoweihi aih. Ehdok um aparuh juwehosiruh um kupaishi um, huni ehudok um pani kupaishi panitok um. Huni ehudok um pububunim kupaishi um, huni ehudok um juwehosip aria panumogesh kupaishi um, huni ihihmorim yoweihi aih. <sup>32</sup> Ipak ta punek yopihi aih um pubiram kupaishi aria punagabe um pupe atugun. Aria ipak mare punasuhw um yoweishi inahos douk kupaishi shenekesh um ipak iri aria pukwreyeshukuk. Ipak punekesh namudok kabi douk Iruhin madae nurik nusuhwesh nupe um ipakish yoweishi inahos uwe aria nakwreyeshuguk um Krai s ananin nyeigur um.

## 5

*Apak Ta Mupe Laitigunum Um Munek Yopihi Aih*

<sup>1</sup> Iruhin ananim urkum douk manawashamep aria pape ananishi batowish. Douk namudok aria ipak ta pugipesh anan punek anan nenekeh iri aih. <sup>2</sup> Ipak ta pugipesh ehudok aih um urkwip panawasham kupaishi um kabi douk Krai s urkum manawasham apak aria nagok um nataurumap um. Aria agundok anan nagok aria nakon anan kanak Iruhin um, agagun douk kabi worigun iri mahish douk shenek ofamesh shashaisheh sheisik wosik aria shako Iruhin iri.

<sup>3</sup> Aria ipak mare punek ehudok aih um armam hanuk armago um shenek wehrur um. Aria ipak mare piyagwreh um ehudokmori aih aria ipak urkwip mare purumeh, uwok. Aria ipak urkwip mare purum pakri punek ihihmori eneheneh abraenyihi aih. Aria mare punek nyigiya um kupaishi esheshish eshudok eneshenesh, uwok. Um mareshe? Apak Iruhin ananishi arpeshe douk madae wosik um munek ehudokmori aih uwe, uwok. <sup>4</sup> Aria shopunek, ipak mare piyagwreh yoweinyi abraenyinyi barae n nyuni rohwin rihirahaemin barae n nyuni enyudok yoweinyi baunogasin barae n. Enyudokmori barae n enyen douk madae yopinyi um ipak piyagwrehe n uwe, uwok. Aria ipak ta punadudareh punek tenkyu um Iruhin. <sup>5</sup> Ipak douk padukemesh um enyudok. Eshudok arpeshe douk shenek wehrur um iri, shuni eshudok douk urkwip porum shunek eneheneh abraenyihi aih iri, shuni eshudok douk shenek nyigiya um kupaishi esheshish eshudok eneshenesh iri, eshesh douk kabi shenek lotu um madae adurimi god omi um uwe. Aria eshudokmori arpeshe ta mare shuwish shupe agundok douk ta Krai s nini Iruhin amamish arpeshe shupe um, uwok. <sup>6</sup> Aria ipak ta gamo pudukemesh um ta wosik atin enesh arpeshe shunek rohwmep aria ipak punnek esheshin wehinyi barae n aria shubodig ipakip urkwip punak um yoweihi aih. Um mareshe? Eheh douk um ehudokmori aih atin, Iruhin apa juwehosin um eshudok arpeshe douk shenek ehudokmori aih shakonuguk agabus anan iri. <sup>7</sup> Douk namudok aria ipak mare puni eshesh

pupe atugun aria puni eshesh punek ehudokmori yoweihhi aih, uwok.

<sup>8</sup> Um maresh? Riguk ipak parik pape penek yoweishi inahos aria ipak kabi douk pape arukwutigun um. Aria douk ipak patogur Debeini ananishi arpesh patukur anan aria anan kabi douk nepusop pape laitigunum um. Douk namudok aria ipak ta pupe wosik atin kabi arpesh douk shape laitigunum iri um. <sup>9</sup> Arpesh douk shape laitigunum um iri apa shenek ihimorim yopihi abom aih hani ehudok um shagipesh adurin atin baraen um. <sup>10</sup> Aria ipak ta pukwiraeh um pudukemesh um ehudok aih douk ta ipak punekeh aria Debeini nutrip nunadudareh-umep iri. <sup>11</sup> Eshudok arpesh douk apa shenek yoweihhi aih douk madae hukwarmori eneh yopihi iri uwe, eshesh kabi douk shape arukwutigun um. Aria eshudokmori arpesh ipak mare puni eshesh punoprom punek mour punak atugun, uwok. Aria ipak ta dodogowip atip um punek yopihi atih aih um eshesh shutrip aria shudukemesh um ehudokmori aih eshesh shenekeh iri douk yoweihhi. <sup>12</sup> Um maresh? Eik ta mare iwereh baraen um ehudok eneheneh yoweihhi aih douk eshesh apa shanabeshuk shape shenekeh iri, uwok. Eik abraen nyapeye um ikriyen um. <sup>13</sup> Aria abudok nyutob eneheneh yoweihhi aih hutogur yopugunum obi nyutob, bagehum um ihimorim ehudok aih ta hutogur hupe yopugunum. <sup>14</sup> Um maresh? Meishi eshudok douk shunowereh shutogur yopugunum iri, eshesh kabi douk shakus laitigunum um aria arpesh shatrish. Douk namudok aria Iruhin ananin baraen nyakri namudok.

“Ipak douk pape kabi douk shagok iri um, ipak pikitaki wonugwegwiruh aria Kraiss ta nutaurumep kabi douk lait tabuhumep um.”

<sup>15</sup> Ipak douk pape laitigunum um. Douk namudok aria ipak ta gamo pudukemesh abom um ipak pupe punekeh iri aih. Ipak mare pupe kabi shagugaki arpesh shapeum, uwok. Ipak ta pupe kabi shadukemesh iri shapeum. <sup>16</sup> Douk ipak sabaihi yeh hapeimep um punek Iruhin

ananin mour um. Douk namudok aria ipak mare pupe meyoh, uwok. Ipak ta punek Debeini ananin mour. Um maresh? Douk ehudok nyumneh arpesh apa shenek eneshenesh yoweishi inahos. <sup>17</sup> Douk namudok aria ipak mare urkwip purpur atin kabi douk shagugaki arpesh um. Ipak ta pudukemesh um Debeini ananim urkum morohi aih. <sup>18</sup> Ipak mare puwok sabaibari abar um bunekep pugugak, uwok. Ehudok aih ta hunekep pupe yowep abom. Aria ihih nyumneh ipak ta pukutukuk Iruhin ananin Mishin nyupe abom numun ipakiruh aparuh aria enyen nyusuhw merikwumep. <sup>19</sup> Aria ipak puni kupaishi Iruhin ananish arpesh punakripam um yopinyi baraen douk nyetem Buk Sam iri. Nyuni yopinyi baraen douk nyape arhudok yopuruhi aweruh douk ipak apa peyarubaruh patuk Iruhin ananin nyeigur iri. Huni yopinyi baraen douk nyetem arhudok aweruh douk Iruhin ananin Mishin nyepuhur peyarubaruh iri. Aria ipak ta piyarub arhudokmori aweruh numun ipakiruh aparuh huni ipakig nokwatog um punek lotu um Debeini. <sup>20</sup> Aria ihih nyumneh punek tenkyu um Yain Iruhin um ihishmorim eneshenesh eshudok um apakini debeini Jisas Kraiss ananin nyeigur.

### *Shanaraum Iri Armam Armago Esheshin Baraen*

<sup>21</sup> Ipak douk padukemesh um Kraiss anan douk ipakin Debeini aria ipak douk pape shakamum anan. Douk namudok aria ipak ta pupe shakamum kupaishi arpesh aria eshesh shopunek shupe shakamum ipak.

<sup>22</sup> Ipak irorihiyeu ta pupe shakamum ipakim rahaem aria pumnek amamin baraen kabi douk pasuhw Debeini ananin baraen pagipeshen um. <sup>23</sup> Um maresh? Rahaem douk hape debeimium irorihiyeu kabi douk Kraiss nape Debeini um Iruhin ananish arpesh um. Aria eshesh ihishmorim shape kabi ananihw shuknihw yegenyihw um. Eshesh douk anan kanak nataurumesh naraesh shatanamori shape wosik abom iri. <sup>24</sup> Eshudok Iruhin ananish arpesh douk shape shakamum Kraiss.



Douk namudok aria ipak irorihyeyu shopunek douk namudok atin. Ipak ta pupe shakamum ipakim rahaem aria pumnek amamin baraen um eneshenesh eshudok.

<sup>25</sup> Aria ipak rahaem shopunek ta urkwip punawasham ipakiyu irorihyeyu kabi douk Kraiss urkum manawasham Iruhin ananish arpesch aria narao esheshiyu outumeb shan nagok aria nataurumesh um.

<sup>26</sup> Anan nenekesh namudok um nunekesh shutogur Iruhin ananish atish abom arpesch. Aria um agundok eshesh shemnek Iruhin ananin baraen atin shagipeshen um, Kraiss neshrokuhwesh abar nenekesh shatogur yopish. <sup>27</sup> Anan nenekesh namudok shopunek um nakri nunekesh shutogur ananish atish. Aria nuraesh shupe yopishi abom arpesch aria mare enen baraen nyupenyesh um enesh yoweishi inahos, uwok.

<sup>28</sup> Aria ipak rahaem, ipak ta urkwip punawasham abom ipakiyu irorihyeyu namudok atin kabi douk ipak urkwip panawasham ipak kanak um. Anudok arman douk ananim urkum manawasham ananik irohukwik iri, anan douk urkum manawasham anan kanak shopunek. <sup>29</sup> Apak madukemesh um douk madae enen atin arpen apa nyukri uwok um enyenyihw yegenyihw uwe, uwok. Enyen apa nyokohw worigun aria nyanagabeohw yopuhw abom kabi douk Kraiss nanagabe Iruhin ananish arpesch um. <sup>30</sup> Um maresh? Apak douk mape kabi tokwonihw um Kraiss ananihw yegenyihw um.

<sup>31-32</sup> Aria enen debeinyi baraen douk seiwok nyape aria arpesch madae shudukemesh um baugenyum uwe, uwok. Aria douk nyatogur yopugunum kabi douk enen baraen nyetem Iruhin ananik Buk iri nyakrium. Enyen nyakri namudok, "Namudok aria arman ta nukutukuk ananish amakenyish aria nunak nini ananik irohukwik shupe sik. Aria eshesh biyesh ta shutogur atin arpen." Adur enyudok yopinyi baraen douk nyanabeshuk iri abom. Aria apak douk madae mudukemesh abom um baugenyum um uwe. Aria eik kanak yakri enyudok baraen douk nyakrium Kraiss nani Iruhin ananish arpesch douk shatukur Kraiss iri. <sup>33</sup> Aria enyudok baraen

shopunek douk nyakrium ipak atin atin nyakri, "Ipak ihipmorim armam ta urkwip punawasham ipakiyu irorihyeyu kabi douk ipak urkwip panawasham ipak kanak um. Aria ipak ihiyumorim armago shopunek ta pumnek ipakim armam amamin baraen pugipeshen."

## 6

### *Amakenyish Shuni Batowish Esheshin Baraen*

<sup>1</sup> Ipak batowish ta pumnek ipakish amakenyish esheshin baraen kabi douk pemnek Debeini ananin baraen pagipeshen um. Ehudok douk yopihi aih abom ipak ta punekeh iri. <sup>2</sup> Enyen douk kabi enen baraen nyetem Iruhin ananik Buk iri nyakrium. Enyen nyakri namudok nyakri, "Ipak ta punek urkum um ipakish amakenyish pakri eshesh douk debeishi um ipak aria pumnek esheshin baraen." Aria enyudok baraen douk nyetem nyarik abom um ihinyumorim Iruhin ananin lo douk adurin atinyi baraen nyapenyen iri. <sup>3</sup> Aria enyudok adurin baraen douk nyakri namudok nyakri, "Ipak pumnek ipakish amakenyish esheshin baraen um, eneshenesh eshudok ipak punekeh iri ta shutogur wosik aria ta pupe roubi nyutob agundok atap."

<sup>4</sup> Aria ipak amakenyish mare punek ipakish batowish esheshiruh aparuh juwehosiruh, uwok. Ipak ta punagabeyesh aria punek skulumesh um Debeini ananin baraen um eshesh shumneken aria shugipeshen.

### *Shape Shakamum Kupaishi Shenekumesh Mour Meyoh Iri Shuni Esheshim Debeimi Um Esheshin Baraen*

<sup>5</sup> Ipak pape shakamum ipakim debeimi penekumam mour meyoh iri ta pumnek amamin baraen aria punek gihaumam putuk amamish nyeiguhw shuto iruhw. Ipak ta pusuhw atum urkum abom aria pugipeshen wosik amamin baraen aria punek amamin mour yopinyi abom kabi douk peneken um Kraiss um. <sup>6</sup> Ipak mare pukri punek mour abudok nyutob amam hupe hutrip um atub um pakri

kadak amam hutrip aria hunadudareh-umep, uwok. Ipak ta puneken kabi douk pape shakamum Kraiss aria penek ananin mour meyo h iri um. Douk namudok aria ipak ta mishish shukitak abom um punek mour kabi douk Iruhin nakri um. <sup>7</sup> Ipak mishish ta shukitak abom um punek mour wosik. Um maresh? Ipak douk madae punek mour um arpes h atish uwe, uwok. Ipak douk penek mour um Debeini. <sup>8</sup> Um maresh? Ipak padukemesh um Debeini ta nutorish nukesh yopishi eneshenesh eshudok arpes h douk shenek mour wosik abom iri. Anan ta nunekesh namudok atin um eshudok douk shape shakamum kupaishi shenekumesh mour meyo h iri shuni eshudok douk shape meyo h iri shopunek.

<sup>9</sup> Aria ipak debeipari douk pape debeipi um eshudok douk shenekumep mour meyo h iri ta punekesh namudok atin um eshesh kabi douk penekesh um Debeini um. Aria ipak ta pukutukuk ehudok-mori aih um penekesh shunogugur um. Ipak padukemesh, Debeini nape iruhw heven iri douk nape Debeini um ipak pani eshesh shopunek. Aria anan douk madae nutik arpes h esheshish debeishi o shokwishi nyeiguhw aria douk nunek skelimes h uwe, uwok. Anan apa nenek skelimum ihishmorim arpes h arag arag atin.

### *Iruhin Ananish Arpes h Shape Kabi Soldia Um*

<sup>10</sup> Aria douk yakri iyatak baraen namudok. Ipak douk putukur Debeini. Douk namudok aria ipak ta pupe dodog aria pupe dodogowip um ananin debeinyi dodog atin. <sup>11</sup> Ipak ta pur ihimorim rupe h douk amam soldia apa hehur um henek wanohw um iri. Ekeh douk Iruhin nekepe h um pihur aria piyotu dodogowip pubouk Satan ananish yoweih i rohwi h ihih aih hubuhuk iri. <sup>12</sup> Um maresh? Apak douk madae muni arpes h meyo h murpak uwe, uwok. Apak mani ihishmori yoweishi dodogowishi sagabehos shani yoweishi dodogowishi enselahos shopunek douk shasuhw merik um agundok atap iri

marpak. Aria shopunek, mani ihimorim enehene h yoweih i dodogowihwi aruge h douk hape debeih i-umori eshudok arpes h douk shape shenek yoweishi inahos agundok atap iri marpak. Aria shopunek, mani ihishmorim eshudok enesh yoweishi dodogowishi enselahos douk shape orokohun um iruhw utag gani atap iri marpak. <sup>13</sup> Douk namudok aria ipak ta pur ihimorim Iruhin nekepe h iri rupe h douk shenek wanohw um shehur iri. Ipak pihur um ahudok nyumnah yoweishi inahos shutogrump um, ipak ta piyotu dodogowip atip aria pubouk yoweishi inahos shubuhuk aria ahwudok wanohw hwutuh, ipak ta watak piyotu dodogowip atip.

<sup>14</sup> Ipak punek redi piyotu aria pur ehudok shenek wanohw shehur iri rupe h namudok. Pusu hw adurin atinyi baraen kabi letog douk pape puwashog iri um. Aria punek yopihi abom aih kabi douk parao atudok dodogowiti kapait siot douk shenek wanohw iri shatur um tishigor ipakish mishish. <sup>15</sup> Aria ipak punek redim um pukripesh Iruhin ananin yopinyi baraen um Iruhin nunekesh aparuh hur wosik um. Ehudok aih puraeh kabi douk su douk ipak powar iri um. <sup>16</sup> Ipak parao ihishmorim eshudok douk shenekesh um shenek wanohw iri um. Aria shopunek parao ehudok aih um pusu hw Kraiss ananin baraen dodog pugipeshen um. Ehudok aih ipak puraeh kabi douk anap aidap um ipak punasuap um aria punek wanohw. Um Satan nuwashaki ananigos burawos douk nyih hanugos juwehosigos iri sunaki sutak supe opudok aidap aria pubuweh-agos. Agusudok burawos douk sakri um eneshenesh yoweishi inahos douk shape shatogrump shakwiraehep um punek yoweishi inahos iri. <sup>17</sup> Iruhin douk nataurumep naraep patanamori pape wosik. Aria amudok urkum ipak ta pusu wom kabi douk dodogowiti kapait hat um putem baragos aria punek wanohw um. Aria pusu hw Iruhin ananin baraen douk ananin Mishin nyekepen iri kabi douk wanohwit bainat um. <sup>18</sup> Aria ihih nyumneh ipak ta porig Iruhin ananin Mishin nyutaurumep aria nyiyabigep

punek ananinan beten porig Iruhin. Aria ihih nyumneh ipak ta gamo pudukemesh. Ipak mare pupe ba arigeh hep, uwok. Ipak pupe punek ananinan beten aria mare pukutunuk pupe meyoh, uwok. Aria shopunek, ihih nyumneh ipak punek beten purik Iruhin um nutaurum ihishmorim ananish arpesh.

<sup>19</sup> Aria punek beten um eik shopunek um abudok nyutob ikri iyagwreh um, Iruhin ta niyabige baraen um eik iyagwrehen iri. Aria shopunek um eik mare inogugur aria ikripesh baugenyum um Iruhin ananin yopinyi baraen douk seiwok nyanabeshuk nyape iri. <sup>20</sup> Eik douk yape yakripesh enyudok yopinyi baraen aria eshesh shakri uwokumen aria douk shasuhwe showeshike senab yape yonoweshik. Aria eikin mour douk namudok. Eik yarao Krai ananik outuk um ikripesh ananin baraen ihishmorim arpesh. Douk namudok aria ipak punek beten porig Iruhin um nutaurume nuneke dodogoiwe um eik mare inogugur aria ikripesh enyudok baraen kabi Iruhin nakri um.

### *Nyagiguk Iri Baraen*

<sup>21</sup> Anudok apakin arpenyin Tikikus douk apak urkwip panawashaman iri ta nunaku nagundok aria nukripep um agundok eik yape yanak um. Aria anan shopunek douk apa nenek Debeini ananin mour wosik abom iri. <sup>22</sup> Eik yakri ishopokan nunakumagu nukripep um apak mape agundok iri mape manak um. Aria um putrun pumnek ananin baraen aria nyutaurumep piyotu dodogowip um pugipesh Krai ananin baraen um.

<sup>23</sup> Aria eik yakri apakin Yain Iruhin nini Debeini Jisas Krai hunek ipakiruh aparuh hur wosik. Aria hunekep pusuhw Iruhin ananin baraen dodog pugipeshen aria ipak urkwip punawasham kupaishi Kristen. <sup>24</sup> Aria yakri Iruhin nutaurumep meyoh ipak ihishmorim douk ihih nyumneh ipakip urkwip pape um panawasham apakin Debeini Jisas Krai iri.

## Apudok Shup Douk Pol Nenekap Panam Eshesh Filipai Iri

*Banenyi Baraen Um Enyudok Baraen Pol Nenek Nyanak Um Eshesh Filipai Iri*

- 1:1-11 Pol nenek beten aria nenek tenkyu um Iruhin um eshesh Kristen shape Filipai iri  
 1:12-30 Pol nakripesh um amaen anan nyusah um nenek Krai ananin mour um  
 2:1-30 Apak monek bilip um Krai iri ta mupe shakam abom um kupaishi arpesh aria munek yopihi aih miyabig sabaishi arpesh  
 3:1-21 Pol nekehuk agab ehudok aih um shagipesh lo seiwok Iruhin nakoguk Moses enyi. Aria nenek bilip um Krai atun nagipeshan kabi anan naur iri nenek debeinyi mour um nishagrakuk kupaishi um  
 4:1-23 Pol nakripesh nyatuh iri baraen aria nenek tenkyumesh um utabor o eneshenesh eshudok eshesh sharik shakon um

<sup>1</sup> Eik Pol yani Timoti douk wenek Jisas Krai ananin mour abom iri. Ohwak biohw weneku opudok shup um ipak ihipmorim Iruhin ananish arpesh douk patukur Krai Jisas aria pape wabur Filipai iri. Shopunek wenekap panakumagu ipak debeipi um Iruhin ananish arpesh iri pani mamudok douk hataurum ipak debeipari iri. <sup>2</sup> Ohwak wakri apakin Yain Iruhin nini Debeini Jisas Krai hutaurumep meyoh, aria hunekep pupe wosik punadudareh.

*Pol Nanadudareh Um Eshesh Filipai Aria Nenek Tenkyu Um Iruhin*

<sup>3</sup> Ihih nyumneh eik urkum morum ipak obi nyutob, eik yanadudareh abom aria yenek tenkyu um Iruhin douk yenek lotuman iri. <sup>4</sup> Aria ihihmorim nyumneh eik yenek betenumep obi nyutob, eik douk yanadudareh abom aria yenek

beten. <sup>5</sup> Um maresh? Ipak douk pataurume um makrip kupaishi um Iruhin ananin yopinyi baraen riguk sagomih nyumnah arigaha douk. <sup>6</sup> Aria douk yadukemesh abom. Iruhin douk nohur ananin yopinyi mour numun ipakiruh aparuh, aria ta nuneken nyupe namudok arigaha nuneken niyaten ahudok nyumnah Krai Jisas nutanamori-ahi. <sup>7</sup> Ihih nyumneh eik douk urkum morum ipak ihihmorim. Namudok aria eik wosik yadukemesh abom um Iruhin nenek ananin yopinyi mour numun ipakiruh aparuh aria nataurumep. Abudok nyutob douk yonoweshik obi nyutob bani rigukib madae inoweshik obi nyutob uwe, eik yakripesh Iruhin ananin yopinyi baraen sabaishi arpesh um ihur esheshiruh aparuh um shudukemesh shukri enyudok baraen adurin abom aria shugipeshen. Aria ahudok ihihmorim nyumneh, Iruhin douk nataurumep meyoh aria nenekap dodogowip. Eik yani ipak ihipmorim. <sup>8</sup> Iruhin douk nadukeme, um agundok yakri adur um eik urkum manawasham ipak ihipmorim kabi Krai Jisas anan urkum manawashamep abom um aria yakri itrip.

<sup>9</sup> Aria eik yenek beten namudok. Yakri ihih nyumneh ipak dodogowip atip um agundok ipakip urkwip punawasham Iruhin nini kupaishi um. Yakri punekeh namudok pishagrakuk kabi parik pape penekesh um. Yakri purao yopinyi saki aria pudukemesh abom um meihi aih yopihi aria meihi yoweih pishagrakuk kabi riguk parik padukemesh um. <sup>10</sup> Um yakri ipak pudukemesh abom um meihi aih eheh yopihi abom heshagrakuk ihihmori iri yopihi aih um pugipesheh iri. Namudok aria ta pupe wosik abom urkwip purum yopihi atih aih aria Iruhin nutrip mare nutik enesh yoweishi inahos shupenyep ahudok nyumnah Krai nutanamori-ahi. <sup>11</sup> Aria yakri ipak punekeh yopihi atih aih abom douk Jisas Krai atun ta nunekap punekeh iri. Ipak punekeh namudok um sabaishi shutrip aria shini ipak putuk Iruhin ananin nyeigur nyuto iruhw pukri anan debeini abom.

*Pol Nonoweshik Nape Aria Sabaishi Shemnek Iruhin Ananin Baraen*

<sup>12</sup> Eikim ashukenyim owarhim, eik yakri ipak pudukemesh um enyudok douk nyatogrume iri. Agundok eik yonoweshik um douk nenek sabaishi arpesh abom shakripesh Iruhin ananin yopinyi baraen aria sabaishi shemneken.

<sup>13</sup> Namudok aria ihim-morim soldia douk heyoh anudok debeini arman um Sisar ananit urupat iri hani ihishmorim arpesh shape agundok iri douk shadukemesh shakri eik adur yasuhw Kraiss ananin mour abom iri. Douk namudok aria douk showeshike yape. <sup>14</sup> Sabaimi ashukenyim owarhim hatik agundok eik yonoweshik yape um aria hape dodogowim atum um Debeini. Madae hunogugur abom uwe, aria dodogowim atum hape hakripesh Iruhin ananin yopinyi baraen. <sup>15</sup> Adur, anam douk hakripesh Kraiss ananin baraen um maresh? Amam henek nyigiya um eik um agundok yenek Iruhin ananin mour um aria hakri hishagrakuk eik hurao debeishi nyeiguhw um enyudok mour. Aria anam douk yopipi urkwipim hakri hutaaurume aria douk hakripeshen. <sup>16</sup> Amudok armam, amam douk urkwip panawasham eik aria douk hakripeshen. Um maresh? Amam douk hadukemesh hakri eik adur yape agundok um ikripesh Iruhin ananin baraen sabaishi shumneken aria shukri adurin atin abom. <sup>17</sup> Aria anam henek nyigiya um eik iri amamip urkwip douk madae pur wosik aria douk hukripesh Kraiss ananin baraen uwe, uwok. Aria hakripeshen um hakri hutuk amamish nyeiguhw atish shuto iruhw. Henek roh w um hakri huneke gamo irao debeiri eriger abudok nyutob douk watak yape agundok shunuweshik-ati urupat obi nyutob. <sup>18</sup> Aria nyenekam. Amam douk urkwip por wosik douk hakripesh Kraiss ananin baraen o madae pur wosik douk hukripeshen um uwe, eik douk yanadudareh. Um maresh, amam douk hakripesh enyudok Kraiss ananin baraen atin. Aria adur ta inadudareh iriguk.

<sup>19</sup> Um maresh? Eik yadukemesh um ipak douk penek betenume aria Jisas Kraiss ananin Mishin nyataaurume. Na-

mudok aria douk yonoweshik yape aria eshudok douk shatogrume iri, eshesh douk Iruhin nenekesh shatogrume um ipe dodog aria nunarae ipe wosik. <sup>20</sup> Eikim urkum douk yakri adur abom um Iruhin ta nutaurume aria inek ananin mour obi nyutob, abraen ta mare enen nye, uwok. Eik yakri ipe dodogoiwe aria ikripesh abom um douk ituk Kraiss ananin nyeigur nyuto iruhw abom kabi riguk um. Aria eik ipe o igok um, eik yakri abom um ituk Kraiss ananin debeinyi nyeigur atin nyuto iruhw. <sup>21</sup> Baugos um ipe irahaen inek enenyenen agundok atap um douk Kraiss atun. Aria ikri igok um, eik ta ini anan upe aria ta ipe wosik abom ishagrakuk kabi douk yape um. <sup>22</sup> Aria watak ipe agundok atap um douk ta inek yopinyi mour abom um nyutaurum arpesh abom iri. Aria douk madae idukemesh uwe. Igok um wosik o ipeum wosik? <sup>23</sup> Eik douk yor biyep urkwip. Yakri ikutukuk abom ahwudok yegenyihw aria inak ini Kraiss upe um douk wosik abom neshagrakuk kabi douk yape um. <sup>24</sup> Aria ta mare igok um, namudok douk wosik. Um wata ipe aria itaurum ipak. <sup>25</sup> Eik yenek bilip abom um enyudok baraen aria yadukemesh um ta ipe aria mare igok, uwok. Ipeum itaurumep putogur dodogowip um bilip aria punadudareh abom um agundok punek bilip um Kraiss pishagrakuk riguk parik penek bilipuman um. <sup>26</sup> Namudok aria nuhut biyen eik wata inaku ini ipak mupe aria itaurumep um, ipak ta punadudareh-ume abom aria ta putuk Kraiss Jisas ananin nyeigur nyuto iruhw aria punadudareh-uman.

*Iruhin Nenek Yopinyi Um Eshesh Filipai Aria Nenekesh Sharao Eriger Shopunek*

<sup>27</sup> Aria eik yakri douk ipak pupe puraen punek enenyenen um, eik yakri ipak punek yopinyi abom atin kabi douk Kraiss ananin yopinyi baraen nyakrium. Punekesh namudok aria eik ikri inaku itrip o ipe agundok imnek baraen atin um, eik yakri imnek baraen um ipak pupe atug barag punataaurum punagapesh um pusuhw Iruhin ananin yopinyi baraen atin pugipeshen aria dodogowip atip

pukrip kupaishi-umen. <sup>28</sup> Ipak mare punogugur um ipakish horik horin, uwok. Ihih nyumneh piyotu dodogowip atip um bilip. Punekesh namudok piyabigesh aria ta shudukemesh um eshesh ta shunak shuwishuk, aria ipak ta punek uhwin aria pupe wosik. Um maresh, ipak douk Iruhin nataurumep aria douk ta punek uhwin. <sup>29</sup> Iruhin nenekumep yopinyi um agundok nataurumep penek Krai ananin mour. Madae nutaurumep um punek bilipuman um atin uwe, uwok. Aria shopunek nekep enyudok mour um purao debeiri eriger um enyudok Krai ananin mour shopunek. <sup>30</sup> Riguk ipak douk patruhw ahwudok wanohw eik yenekohw iri. Um agundok yenek Krai ananin mour aria shenek enenyenen yarao debeiri eriger um. Aria douk eik watak yape yenekesh namudok atin kabi ipak pemnek baraen jurug um. Aria ipak douk punoprom um ahwudok otuhw wanohw.

## 2

### *Apak Mupe Atug Barag Abom Aria Munek Yopinyi Um Kupaishi*

<sup>1</sup> Ipak patukur Krai aria anan nenekep piyotu dodogowip atip. Anan urkum manawashamep aria nataurumep nenekep panadudareh. Ipak douk pani Iruhin ananin Mishin pape atug barag. Aria douk penenem um yopinyi atin panagapesh. <sup>2</sup> Aria ipak wosik penek enyudokmori um, aria douk yakripep um ipak ta gamo puneke inadudareh abom iriguk um punek enyudokmori shopunek um. Pusuhw atin baraen abom, pusuhw atuh aih um urkwip punawasham arpesh um aria pupe atug barag. <sup>3</sup> Ipak ipak urkwip mare purum putaurum ipakiruh yegeshiweruh aturuh aria punek mour um putuk ipakish nyeiguhw shuto iruhw, namudok uwok. Aria punih ipak kanak abom aria mare pukri pupe iruhw um kupaishi, uwok. <sup>4</sup> Ipak atin atin ipak ipak urkwip mare purum punagapesh ipakish atish eshudok wanaruh, uwok. Aria punagapesh um kupaishi kabi agundok punagapesh ipakish eshudok wanaruh um.

### *Krai Naunih Anan Kanak Abom Aria Iruhin Wata Natukan Nato Iruhw*

<sup>5</sup> Ipak pusuhw atum urkum kabi Krai Jisas anan urkum morumen iri um. <sup>6</sup> Anan douk Iruhin, aria madae nukri abom um nyeigur nyuto iruhuman aria nupe kabi Iruhin um uwe, uwok. <sup>7</sup> Nekehuk agab ehudok aih natogur adurin arpen aria Maria kwanabuki. Aria natogur abom kabi anan arman meyoh douk nenek mour meyoh um kupaishi iri. <sup>8</sup> Arpesh shatrun natogur abom adurinyi arpen. Naunih anan kanak abom aria nagipesh Iruhin nakri-enyi atin arigah arigaha nanak natogurum abudok nyutob douk shan showeshikan neir rowog kruse obi nyutob. <sup>9</sup> Douk namudok aria Iruhin douk natukan nato natem iruhw abom. Aria nakon enen debeinyi abom nyeigur douk nyabouk ihishmorim nyeiguhw shabuhuk iri. <sup>10</sup> Iruhin nenekan namudok um ihishmorim arpesh shape iruhw heven iri, shani ihishmorim shape agundok atap iri, shani eshudok shape shakamum at-apig nahobig iri shumnek enyudok nyeigur Jisas aria shubuh shuduk ohrubus shutuk ananin nyeigur nyuto nyetem iruhw. <sup>11</sup> Aria ihishmorim arpesh ta shuhur nok-watog shukri, “Jisas Krai anan Debeini.” Namudok aria ananin Yaken Iruhin ananin nyeigur ta shutuken nyuto iruhw abom.

### *Agundok Arpesh Shape Um, Apak Iruhin Ananip Ta Mupe Kabi Lait Tabuhi Um*

<sup>12</sup> Ipak eikishi abom arpesh, riguk yani ipak mape obi nyutob, ipak pape um pagipesh eikin baraen. Aria douk yapeik rougun um, ipak douk shopunek yakri punekesh namudok atin. Punekesh pishagrak eshudok riguk pape penekesh iri um. Iruhin douk naraep patanamori pape wosik, aria kweipon

ta nuraep puto iruhw. Aria ahudok nyumnah douk punogugur-uman abom aria pupe dodogowip atip punek ananin mour um purao yopihi aih. <sup>13</sup> Apak douk madukemesh. Ihih nyumneh anan nenek mour numun ipakiruh aparuh aria nepuhur um punek enenyenen mour douk anan nakriyen abom iri.

<sup>14</sup> Punek enenyenen um, ipak mare punotutukem puwish putogur o punogogonim-umen, namudok uwok. <sup>15-16</sup> Punekesh namudok abom um, ta pupe wosik abom aria mare enen baraen nyupenyep, uwok. Um ta pupe Iruhin ananip abom yopiyopishi batowish aria mare punek yoweishi inahos. Aria ipak ta piyabig arpesht um shupe wosik. Aria punekesh namudok um, ipak ta pupe kabi lait um pubuh agundok atapishi arpesht shapeum. Ehudok nyumneh ipak pupe kabi lait um obi nyutob, ipak douk pukripesh enyudok Iruhin ananin baraen um shumneken aria shugipeshen. Aria shugipeshen um, enyen ta nyutaurumesh um shupe wosik agundok atap aria kweipon shopunek ta shupe ihih nyumneh. Agundok atapish arpesht douk shakri uwok um yopihi aih aria shapeum madae shenek yopihi aih iri uwe. Ipak punekesh namudok um, ahudok nyumnah Kraiss nutanamori ahi hunak hutograri aria eik ta inadudarehumep. Aria ta idukemesh namudok. Eik douk yenek enyudok debeinyi mour um yataurumep aria madae nyunak nyuwishuk meyhoh uwe, uwok. <sup>17</sup> Ipakin bilip nyani ipakin yopinyi mour douk nyadukemesh abom um enesh eshudok eneshenesh douk shenek ofamesh shako Iruhin um. Douk ta enesh she igok aria shurakuk eikibor owishibor kabi shourakuk wainibar abar enyudok ipakin ofa um akure, ta wosik abom. Eik ini ipak ihipmorim ta munadudareh muriguk. <sup>18</sup> Aria namudok atin. Ipak shopunek ta punadudareh aria puni eik munadudareh.

*Pol Nakripesh Um Ta Nishopok Timoti Nunak Filipai Um*

<sup>19</sup> Aria Debeini Jisas nukri wosik um, aria mare roubi uwe ta ishopok-ugu

Timoti nunakumepogu. Yakri nunakumagu nutripaguk aria wata nutanamori nukripe um ipak pape mumam, um eik ta inadudarehumep. <sup>20</sup> Eik arman madae anan uwe kabi Timoti um, uwok meyhoh. Anan nani eik douk atip urkwip abom aria mishish shakitak abom um nutaurum ipak pupe wosik. <sup>21</sup> Ihim-morim hape agundok iri armam douk hapeum hanagapesh amamish atish eshudok eneshenesh. Aria mishish douk madae shikitak um husuhw Jisas Kraiss ananin mour uwe, uwok. <sup>22</sup> Aria Timoti douk madae kabi amam um uwe, uwok. Ipak douk padukeman. Anan yopinyi arpen aria nakri um nutaurumep. Anan douk riguk nataurum eik wakripesh Iruhin ananin yopinyi baraen kabi anan nunganin nataurum ananin yaken um mour um. <sup>23</sup> Abudok nyutob ikri idukemesh um eshudok ta shutogrume mumam mumam obi nyutob, eik ta arigas ishopokan nunakumepogu. <sup>24</sup> Eik yenek bilip yakri adur um hurukatin Debeini ta nunekume anah yah um shukweshihemaguk um showeshike um aria eik kanak shopunek ta inakumepogu.

*Pol Nakripesh Um Ta Nishopok Epafroditus Nunak Filipai Um*

<sup>25</sup> Eik yakri wosik ta ishopok Epafroditus nutanam nunakumagu ipak. Anan apakin arpen douk nani apak menek bilip iri. Aria douk nani eik wanoprom wenek Iruhin ananin mour. Weneken obi nyutob, ohwak douk warao eriger kabi harpak wanohw iri um. Anan douk riguk peshopokani nanaki nataurume. Anan narao ipakin baraen aria nataurume. <sup>26</sup> Anan douk nakri abom nutik ipak ihishmorim. Ananihw apahw douk yowehw abom um agundok ipak pemnek um anan arugeh han um. <sup>27</sup> Adur, riguk arugeh han aria hurukatin um nugok. Aria Iruhin nakri gihauman aria natauruman. Aria Iruhin douk madae nenek gihaum anan atun uwe, uwok. Eik shopunek nakri nenek gihaume aria madae nunekan nugok abom uwe, um nunek eikihw apahw yowehw hwutar abom uwe, uwok. <sup>28</sup> Namudok aria eik mishin

nyakitak abom um ishopokan nunakume-pogu um wata putrun aria punadudareh. Namudok um eikihw apahw ta mare apa hwunogugur aria hwur wosik. <sup>29</sup> Namudok aria douk nunak nutogragu aria ipak pukri anan douk Debeini ananin arpen. Aria punadudareh-uman abom puran nunak nini ipak pupe. Aria ihmori kabi ananumori armam, ipak ta putuk amamish nyeiguhw shuto iruhw. <sup>30</sup> Um maresh? Anan douk madae urkum murum anan kanak aria nukri um nupe agundok atap uwe, uwok. Anan douk urkum morum nunek Krai ananin mour atin aria douk hurukatin um nugok um agundok nataurume um. Ipak douk papeik rougun, aria anan douk narao ipakiyu outumeb nataurume kabi ipak pupe putaurume um.

### 3

#### *Arpen Nyusuhw Krai Ananin Baraen Dodog Iri Douk Yopunyi Abom Arpen*

<sup>1</sup> Eikish arpes, eik yakri iyatak eikin baraen namudok. Yakri ipak ta punadudareh um Debeini. Eik douk madae arigeh he um agundok yanarubur yowem-agu enyudok atin baraen um ipak uwe, uwok. Enyen douk wosik wata yenyem-agu um nyutaurumep pupe wosik.

<sup>2</sup> Aria ipak gamo pudukemesh um amudok armam douk hape kabi wana-rig nubag um. Amam douk hapeum henek yoweishi inahos iri. Amudok-mori armam douk hakri huhur ipakip urkwip um putah ipakiruh yegeshiweruh kabi Moses seiwok nakripeshuk-enyi lo nyakrium. <sup>3</sup> Apak kanak douk Iruhin ananish arpes. Aria apak magipesh ahudok adurihi aih um agundok matah apakiruh yegeshiweruh um. Aria douk uwok. Um maresh? Iruhin ananin Mishin nyapenyap aria nyataurumap munek lotuman matuk Krai Jisas ananin nyeigur nyato iruhw. Apak douk madae munek bilip um agundok shatah yegeshiweruh um ta nutaurumap uwe, uwok. <sup>4</sup> Adur, ta eik ikri wosik akure, eik ta wosik inek bilip um ehudok aih ta hutaurume. Aria

yakri uwok. Aria enesh Juda shukri eshesh douk yopishi arpes aria dodogowish atish um shunek ihimori apakih aih um agundok yegeshiweruh hunatah um, eik Pol douk anan um Juda aria douk yeshagrak-eshuk um yagipesh ehudok-mori aih um. <sup>5</sup> Nubokadae sheyabuki atin aria hakri 8-poreih nyumneh um, eshesh shatah eikihw yegenyihw. Eik douk anan um Israel aria yakitak Benjamin ananip awirop. Yani eshesh Hibru apak atubor owishibor abom. Eik douk anan um Farisi aria yagipeshen wosik abom lo. <sup>6</sup> Eik douk dodogoiwe atuwe abom um yenek Iruhin ananin mour. Namudok aria riguk, eik douk yape um yenekesh enenyenen eshesh ihishmorim Iruhin ananish arpes yenekesh sharao debeiri eriger. Douk ta enesh arpes shukri shudukemesh um agundok yagipesh enyudok lo um akure, eshesh ta mare shukripe shukri anabik nyunyubukuk mare nyigipeshen uwe, uwok. Eik yagipeshen yeyaten. <sup>7</sup> Aria douk, eik urkum morum Krai aria ehudok ihimori aih riguk yakri ta hutaurume iri, douk eik madae idareheh uwe, uwok. <sup>8</sup> Eik madae ikri um ehudok aih atih uwe, uwok. Eik yadukemesh um Krai Jisas anan douk eikin Debeini aria yadukemesh um enyudok douk adurin atin abom. Eik yarao Krai anan aih aria ihishmorim eshudok enesh douk madae idarehesh uwe, uwok. Eik yakri inek bilip um Krai atun <sup>9</sup> aria yakri abom um itukur anan. Eik yakri uwok um irao nyeigur yopuni arman um agundok igipesh enyudok lo seiwok Iruhin nakoguk Moses enyi um uwe, uwok. Aria yakri irao nyeigur yopuni arman um douk namudok. Eik inek bilip abom um Krai Jisas aria namudok douk Iruhin natiwe nohware yopuni arman. <sup>10</sup> Eik yakri idukeman wosik abom Krai. Anan douk nagok aria Iruhin dodogowin atun wata nonohur nakitak nape. Eik yatik namudok aria yakri gamo idukemesh um agundok anan dodogowin atun abom um. Yakri ini anan unoprom um agundok umnek eriger um aria shopunek yakri isuhw amudok atum urkum kabi anan



nomur um aria douk nakri wosik um eshesh shon nugok um. <sup>11</sup> Eik yakri adur inekesh namudok um idukemesh abom um eik shopunek kweipon Iruhin ta wata niyohur ikitaki wonugwehw.

*Pol Nahur Dodogowin Atun Um Nunak Nutogur Mak*

<sup>12</sup> Ehudok Krai ananilh yopihi aih, eik madae inek urkum ikri eik yaraeh yeyateh uwe, aria douk yatogur yopuni arman uwe, watak. Aria douk watak yape yabirak um itogur yopuni arman. Um maresh? Krai Jisas nanagraehe aria yape ananiwe. <sup>13-14</sup> Eikish arpes, eik atin yakri eik watak irae, iyateh uwe ehudok aih, watak. Eik yasuhw amudok atum urkum. Amudok. Eik yakri uwok um ihishmorim eneshenesh rigukishi eshudok aria yeshubukuk aria urkum makeshukuk. Aria yape um yenek mour dodogoiwe atuwe yosahur yanak um itogur mak aria irao debeinyi nyeigur. Irao debeinyi nyeigur um douk namudok. Yatukur Krai Jisas, anan nataurume aria Iruhin nahware um ito um iruhw heven ikih ini anan upe wosik abom ihih nyumneh.

<sup>15</sup> Apak ihishmorim douk dodogowip atup abom magipesh Jisas Krai iri, apak ta munek urkwip kabi enyudok baraan eik yakriyen iri nyakrium. Aria ta ipak urkwip purum kupainyi um, Iruhin ta niyabigep pudukemesh wosik. <sup>16</sup> Aria ehudok aih riguk maraeh iri douk mupe um musuweh dodog abom mugipesheh.

<sup>17</sup> Eikish arpes, riguk eik yarik yeyabigep Krai ananilh yopihi aih aria ahudok nyumnah douk yakri ipak ta pugipesh ehudok eikih aih. Yakri putrish duk arpes douk shagipesh eikih aih iri, um ipak pugipesheh abom. <sup>18</sup> Sabaihi atih eik yakripep enyudok baraan um Jisas ananish horim. Aria douk namudok atin. Yareh abih atih aria yakripep enyudok baraan shopunek. Sabaishi arpes shagipesh yoweih aih aria douk shatogur horim um agundok Krai nagok rowog kruse um. <sup>19</sup> Esheship urkwip porum esheshiruh yegeshiweruh aturuh aria eshudok esheship urkwip porumesh iri douk shatogur kabi esheshin god

um. Eshesh shapeum shanadudareh um ehudok abraenyih aih. Esheship urkwip porum agundok atapishi atish eneshenesh. Kweipon eshudokmori arpes ta shunak shuwishuk abrudok yoweiburi wabur hel. <sup>20</sup> Aria apakibur aduribur abom wabur douk iruhw heven. Apak douk manadudareh aria mape matrugun abom um anudok arman douk narao apak matanamori um Iruhin iri um nukutukuk iruhw heven aria nubuhi. Anan douk Debeini Jisas Krai. <sup>21</sup> Anan ta nunek arhudok apakiruh yoweiruhi yegeshiweruh hutogur kabi ananihw yopuhwi abom aria bogarohw iri yegenyihw um. Ta nukwu enyudok atin dodog douk anob nyutob ta nukwin um nunek ihishmorim eneshenesh eshudok shupe shakamum anan aria anan nupe debeini-umesh um.

## 4

*Pol Nakripesh Um Shupe Atug Barag Shunadudareh Aria Shurao Yopumi Urkum*

<sup>1</sup> Namudok aria eikish arpes, eik urkum manawashamep abom aria yakri itrip abom ini ipak mupe. Baugos um agundok eik inadudareh um douk ipak atip. Ipak douk kabi yopishi eshudok eneshenesh kweipon ta iraes iri. Ipak douk patukur Debeini aria pupe dodogowip abom atip kabi iganigadae yarig yakripep um.

<sup>2</sup> Nyak Yuodia iri nyak Sintike, ipak bio armago pumnek. Ipak douk panadiyogur um aria eik dodogoiwe atuwe yakri ipak ta pupe atug barag abom um agundok pugipesh Debeini um. <sup>3</sup> Aria nyak, enyudok enen douk nyani eik wanoprom abom um wenek atin mour iri, eik yakri nyak ta nyutaurum oudok bio armago. Riguk owo douk wani eik manoprom um munek debeinyi mour aria sabaishi shemnek Iruhin ananin yopinyi baraan. Mani Klemen iri eshesh ihishmorim douk shani eik manoprom um mour iri. Eshudok arpes esheshish nyeiguhw douk shetem okwudok Iruhin ananik buk. Okwudok buk douk eshudok arpes ta shupe abom ihih nyumneh iri esheshish nyeiguhw shetem um.

<sup>4</sup> Ihih nyumneh ipak ta punadudareh um Debeini. Wata shopunek ikri, ipak ta punadudareh abom!

<sup>5</sup> Ipak ta pupe samokwiyaish arpesih um ihishmorim arpesih ta shutrip aria shukri ipak douk penek yopihi aih. Um maresh, Debeini douk hurukatin um nunaki. <sup>6</sup> Ipakish mishish mare yowesh um enesh eshudok eneshenesh, uwok. Aria eneshenesh eshudok shukri shuto-grumep um, ipak ta punek beten porik Iruhin. Porigan um ta nutaurumep um eshudok douk ipak pakri nutaurumep-umesh iri. Punek beten porigan aria punek tenkyuman. <sup>7</sup> Iruhin ananish aih um nenekap aparuh hur wosik um douk dedebah abom atin heshagrakuk arpesih saki. Apak arpesih douk madae wosik um mudukemeh uwe, uwok. Aria douk ta ipak punek beten namudok um, Iruhin ta nukap ehudok ananish aih aria ta hutaurum ipakip urkwip puni mishish shur wosik. Um maresh, ipak douk patukur Kraish Jisas iri. <sup>8</sup> Eikish arpesih, douk eik yakri ikripep enen nyagiguk iri baraen shopunek. Yakri ipakip urkwip ta pur abom um eneshenesh yopishi shani ehudok eneh aih douk arpesih shatrih aria shatukeh hatu iruhw iri. Eneh douk ehudokmori. Ihihmorim adurihi, yopiyopihi, hani ehudok eneh ihihmori yopihi aih douk arpesih shanadudareh-umeh aria esheship urkwip porumeh ihih nyumneh. <sup>9</sup> Ihihmorim aih o baraen yenek skulumep aria paraen iri, nyani enyudok douk pemneke yakriyen iri nyani enyudok enen yeneken iri, ipak ta puneken abom ihih nyumneh. Namudok aria Iruhin douk napeum nenek apakish mishish shor wosik manadudareh atin um ta nini ipak pupe.

*Pol Nanadudareh Um Eshesh Filipai Um Shakonari Enesh Yopishi Eshudok Eneshenesh Um*

<sup>10</sup> Riguk ipak douk pukei enesh eshudok eneshenesh. Aria nubokadae, roubi nyutob ipak douk urkwip porome, aria madae puparug anah yah um pukei enesh eshudok eneshenesh um, uwok. Aria douk paparug anah yah, pataurume aria

namudok douk peyabige um ipakip urkwip douk panawasham abom eik. Namudok aria eik yanadudareh abom yariguk um Debeini. <sup>11</sup> Enyudok baraen douk madae ikripep um eik eshudok woke um uwe, uwok. Um maresh? Eik douk yenek towin um abudok nyutob inasuhw karowish eshudok obi nyutob o inasuhw sabaishi um, eik ta inadudareh ikri jurug-umesh. <sup>12</sup> Riguk anob nyutob, eik douk yape namudok. Eneh nyumneh eshudok woke. Eneh nyumneh yatik sabaishi eshudok. Eneh nyumneh yawok worigun yariguk aria eneh nyumneh nyurub bae. Aria ehudok biyeh aih um itik sabaishi eneshenesh eshudok um o eneshenesh woke um, eik douk yadukemesh wosik. Ihigun yanak yape um nani ihihmori nyutob yanak yape aria meih ehudokmori aih hutogrume obi nyutob, eikihw apahw douk madae yowehw uwe, uwok. <sup>13</sup> Kraish neneke aria dodogoiwe. Douk eik yape dodogoiwe um anan aria wosik um inek ihihmorim ehudokmori aih.

<sup>14</sup> Aria ipak douk penek yopihi aih abom um agundok pataurume um eshudok eneshenesh abudok nyutob eik woke um eshudok obi nyutob. <sup>15</sup> Ipak Filipai, ipak kanak douk padukemesh abom um riguk abudok nyutob yarig yanaku yakripep Iruhin ananish yopinyi baraen obi nyutob arigaha yakutukuk shokugi nahobig Masedonia um. Douk ipak pape Filipai iri atip pataurume um eshudok. Kupairubi warubishi Iruhin ananish arpesih douk madae shunekesh um manoprom um ehudok aih um shekesh eshudok kupaishi um, uwok. Ipak atip. <sup>16</sup> Riguk abudok nyutob yape Tesalonaika obi nyutob, ipak parik pataurume anah aria wata shopunek pataurume sabaihi nyumneh. <sup>17</sup> Aria douk, eik madae ihwarep um pukei enesh yopishi eshudok meyoh uwe, uwok. Aria yakri kweipon itrip um Iruhin nutaurumep aria nuwanam-umep ipakih sabaihi yopihi aih kabi ehudok ipak penek um eik iri um. <sup>18</sup> Ipakish yopishi eshudok pakri Epafroditus nasuwesh-umeri iri douk nekeyesh. Namudok aria douk abudok nyutob, eik douk ya-

suhw sabaishi eshudok um wosik ume. Enesh douk watak shakus meyoh. Eshudok ipak pekesh iri douk kabi enesh yopishi eshudok douk penek ofamesh peshaisheh pako Iruhin aria nemnek yopuri unar nakri wosik nanadudareh-umesh iri. <sup>19</sup> Eikin Iruhin douk nagrem ihishmorim eneshenesh yopishi eshudok iri. Namudok aria anan ta nukep ihishmorim eshudok ipak wokumesh iri. Um mareshe? Ipak douk patukur Krajs Jisas. <sup>20</sup> Apak ta mupe um mutuk Iruhin apakin Yain ananin nyeigur nyuto iruhw namudok atin ihih nyumneh. Adur atin!

*Pol Nenekumesh Yopuhi Nyumnah Eshesh Filipai*

<sup>21</sup> Eik yakri yopuhi nyumnah um ihishmorim Iruhin ananish arpesh douk shatukur Krajs Jisas iri. Amudok apakimi douk hani eik mape agundok iri shopunek henemepogu yopuhi nyumnah ipak. <sup>22</sup> Aria ihishmorim Iruhin ananish arpesh shape agundok iri shenemepogu yopuhi nyumnah ipak. Eshudok enesh shenek mour um Sisar douk debeini um gavman iri ananit urupat iri douk shanadudareh abom shariguk aria shenemepogu yopuhi nyumnah.

<sup>23</sup> Eik yakri Debeini Jisas Krajs nutaurum ipakish mishish, nunekumep yopinyi meyoh aria pupe wosik abom punadudareh.

## Apudok Shup Douk Pol Nenekap Panam Eshesh Kolosi Iri

*Banenyi Baraen Um Enyudok Baraen  
Pol Nenekan Nyanak Um Eshesh Kolosi Iri*

1:1-4 Pol nenek tenkyu um Iruhin um  
eshesh Kolosi aria nenek beten um  
Iruhin nunekesh shiyotu dodogowish  
1:5—2:19 Krai atun dodogowinari  
nape narik um sabaishi eneshenesh  
eshudok shani arpesch Namudok aria  
douk anan atun nape narik um ihish-  
morim Iruhin ananish arpesch.

2:20—4:6 Apak mani Krai magok aria  
wata shopunek mani anan makitaki  
aria douk munek yopihi atih aih

4:7-18 Pol nakripesh nyatuh iri baraen  
aria nenek yopuhi nyumnah um es-  
hesh Kolosi

1-2 O ipak pagipesh patukur Krai iri  
douk pape wabur Kolosi iri aria pasuhw  
Iruhin ananin baraen dodog pagipeshen  
iri. Eik Pol, Krai Jisas ananin aposel  
douk Iruhin kanak nagraehe um inek  
ananin mour um inak ikripesh ananin  
baraen aria yenekumepogu apudok shup  
um ipak. Eik yenekapumagu ipak Iruhin  
ananish atish arpesch douk dodogowip  
atip um pasuhw Jisas Krai ananin baraen  
pagipeshen iri. Aria apakin wanin Timoti  
shopunek douk nani eik wape agundok.  
Aria ohwak wakri apakin Yain Iruhin  
nutauremep meyoh aria ipakiruh aparuh  
hur wosik.

*Iruhin Nenek Eshesh Kolosi Esheshin  
Bilip Nyatogur Yopugunum*

<sup>3</sup> Ihih nyumneh ohwak wonek beten  
um ipak um, ohwak apa wenek tenkyu  
um apakin Debeini Jisas Krai ananin  
Yain Iruhin um ipak. <sup>4</sup> Um maresh?  
Ohwak womnek baraen um agun-  
dok ipak pasuhw Krai Jisas ananin  
baraen pagipeshen aria ipak urkwip  
panawasham ihishmorim Iruhin ananish  
arpesch um. <sup>5</sup> Riguk enyudok adurin atinyi  
baraen nyanaki nyatogrumep aria ipak

pemneken. Aria ipak pakri adur atin um  
kweipon ipak ta pupe wosik abom ihih  
nyumneh gani iruhw heven um. Aria  
ipak douk pape patrugun um agundok ta  
kweipon punak pupe wosik um. Douk na-  
mudok aria ipak pakri Krai Jisas ananin  
baraen douk adurin aria pagipeshen  
aria ipak urkwip panawasham Iruhin  
nani kupaishi arpesch shopunek. <sup>6</sup> Iruhin  
ananin yopinyi baraen douk nyarahaen  
ihigunum um agundok atap. Aria enyen  
nyatogur dodogowin atin aria nyenek  
yopihi aih um sabaishi arpesch esheshiruh  
aparuh. Aria enyen nyenek yopunyi  
abom nyeshagrakuk riguk nyarik nyape  
nyeneken um. Enyen nyeneken namudok  
atin kabi douk hahudok sagomatinyih  
nyumnah enyen nyeneken um ipak um.  
Hahudok nyumnah ipak pemnek Iruhin  
ananin yopinyi baraen aria padukemesh  
abom um adur Iruhin natauremep  
meyoh um. <sup>7</sup> Epafra douk nenek  
skulumep nakripep enyudok baraen aria  
ipak padukemen. Anan douk yopuyopuni  
abom aria nani ohwak manoprom mape  
munek Krai ananin mour. Aria ohwak  
douk urkwip panawashaman. Aria anan  
apa neneken wosik Krai ananin mour.  
Aria douk ohwak wakri unaku aria  
anan narao ohwakik outuk aria nanak  
natauremep. <sup>8</sup> Aria shopunek, anan  
nakripohw um agundok Iruhin ananin  
Mishin nyepuhur nyenekep aria ipak  
urkwip panawasham ihishmorim Iruhin  
ananish arpesch um.

*Pol Nenek Beten um Iruhin Nutaurum  
Eshesh Kolosi iri Um Shupe Dodogowish*

<sup>9</sup> Ohwak douk womnek um enyudok  
yopinyi mour douk Iruhin neneken nu-  
mun ipakiruh aparuh iri aria douk hahu-  
dok nyumnah abom ohwak wape wenek  
betenumep. Aria douk shopunek watak  
wape wenek betenumep atin. Ohwak  
wenek beten warig Iruhin um nunekep  
pudukemesh abom um ehudok aih douk  
anan mishin nyakitakumeh iri. Aria  
nunekep pudukemesh abom um ihip-  
morim yopipi urkwip iri saki douk Iruhin  
ananin Mishin nyekepesh iri. <sup>10</sup> Ohwak  
wenek betenumep namudok um wakri  
ipak pugipesh eneheneh yopihi aih douk

Debeini ananin mishin nyakitakumeh iri. Anan nutrip um aria nunadudareh-umep. Aria ipak punekesh namudok aria ta punek ihinyumorim ananin yopinyi mour. Aria shopunek, ta pudukemesh abom um Iruhin pishagrakuk riguk parik padukeman um. Aria enyudok saki um pudukemesh um Iruhin um ta nyutogur debeinyi. <sup>11-12</sup> Aria ohwak wenek betenumep namudok shopunek um wakri Iruhin nukep ananin yopiyopinyi abom debeinyi dodog. Anan nukepen um nunekep putogur dodogowip um piyotu dodog abudok nyutob enenyenen amaen nyuto-grumep um. Aria um ipakiruh aparuh mare yoweruh aria hur wosik. Aria ipak ta punadudareh punek tenkyu um apakin Yain um nenekep patogur yopip aria wosik um purao eneshenesh ipakish yopishi eshudok douk Iruhin neshubukumep lait-igunum iri. Ipak ta puraesh puni ihishmorim ananish arpes agundok douk shape yopugunum shenek yopihi atih aih iri shapeum. <sup>13</sup> Iruhin douk nakweshiap makutukuk enyudok debeinyi dodog douk nyape arukwut-igunum um eshesh Satan ananish arpes shapeum. Aria narap mape wosik manak mawish um ananin nuganin douk anan urkum manawashaman abom iri um ananip awirop. <sup>14</sup> Aria douk apak mape matukur Kraiss aria anan nakweshiap mape wosik atin um agundok anan madae nusuhwesh uwe um apakish yoweishi inahos aria nakwreyeshuk um.

*Baugenyum Um Baraen Um Kraiss Nani Ananin Mour*

<sup>15</sup> Kraiss douk nadukemesh abom um anudok Iruhin douk apak madae mutrun atin iri uwe. Anan douk nape Debeini aria baugos abom um ihishmorim eneshenesh eshudok shani arpes douk shape iruhw atap iri. <sup>16</sup> Um maresh? Iruhin nakripan nenek ihishmorim eneshenesh eshudok shape iruhw atap iri shani arpes shatogur shape. Anan nenek ihishmorim eshudok eneshenesh douk apak matrish iri shani eshudok douk madae mutrish apakis nabes iri uwe. Eshesh shani ihm-morim debeimi, hani ihishmorim dodogowishi enselahos douk

shasuhw merik um iruhw atap iri. Aria Iruhin nakrip Kraiss nenek ihishmorim eneshenesh eshudok shape iruhw atap iri shani ihishmorim arpes. Anan nenekesh um shupe ananish atish aria shutuk ananin atin nyeigur nyuto iruhw. <sup>17</sup> Seiwok baugos um, anan atun narik nape. Aria ihishmorim eneshenesh eshudok shani arpes douk shape iruhw atap iri shagiguk shatogur shape. Aria anan douk anan atun dodogowini abom aria nasuhw ihishmorim eshudok shape esheshiyu outumeb sisigiyyu kabi douk ahudok nyumnah shapeum. Aria arpes shopunek, douk anan nasuwesh nape. <sup>18</sup> Anan douk Iruhin ananish arpes esheshin baragin. Aria eshesh shape kabi ananish roguh aiyas um. Aria anan atun douk baugos um nutaurum ananish arpes shutogur namishi aria shupe wosik um. Anan douk sagomatinyin abom debeini um agundok shagok iri arpes wata shakitaki wonugwegwiruh um. Iruhin douk nonohuri nakitaki wonugwehw um anan atun nutogur debeini abom nusuhw merik um ihishmorim eneshenesh eshudok shani arpes shopunek. <sup>19</sup> Um maresh? Riguk Iruhinin mishin nyakitak um nyakri nyukon ihishmorim ananish aih huni urkum iri saki nyuni ananin dodog ananin Nuganin atun. Douk namudok aria Iruhin nakon ihishmorim eshudok anan atun. <sup>20</sup> Aria Iruhin douk mishin nyakitak um nakri Kraiss nunek ihishmorim eneshenesh eshudok douk shape iruhw atap iri shani ihishmorim arpes shutogur yopish aria naraesh shatanam shupe ananish. Iruhin douk nenekesh namudok um Kraiss ananibor owishibor douk nagok neir rowog kruse aria batourak iri. Anan nenekesh namudok aria narao ihishmorim eshudok shape iruhw atap iri shatanam shape ananish atish.

<sup>21</sup> Riguk ipak shopunek pape rougun um Iruhin aria pape ananim horim. Um maresh? Ipakip urkwip pakri uwok-uman aria ipak penek yoweishi inahos. <sup>22</sup> Aria douk Kraiss narao arpenyihw yegenyihw aria shan nagok. Aria Iruhin naraep patanam pape ananip um agundok Kraiss nagok um. Um anan

naraep punak um anan napeum aria pupe ananish yopishi arpesh. Aria anan mare nutik enen baraen nyupenyep, uwok. <sup>23</sup> Aria ihih nyumneh ipak ta pupe um pusuhw enyudok ananin yopinyi baraen dodog aria piyotu dodogowip atip abom. Ipak mare pukutukuk enesh eshudok shunekap pukutukuk enyudok Iruhin ananin yopinyi baraen douk seiwok ipak pemneken pasuhwen dodog pagipeshen iri, uwok. Aria mare pukutukuk agundok um pakri adur atin um ta Iruhin ntaurumep wosik um, uwok. Ipak douk pemneken enyudok baraen douk eik Pol yape yenek Iruhin ananin mour yakripeshen iri. Aria shopunek, enyudok baraen douk shakripeshen shanak aria ihishmorim arpesh shape agundok atap iri douk shemneken.

### *Pol Nataurum Iruhin Ananish Arpesh Shape Kolosi Iri*

<sup>24</sup> Aria douk eik yanadudareh um agundok yemnek eriger eikihw yegenyihw um yataurum ipak um. Arudok eriger douk yape yemnekor eikihw yegenyihw iri douk yakri iyatak arudok eriger douk Kraiss nakri um eik imnekor iri. Eik yenekesh namudok um inek ananin mour um itaurum ipak puni Iruhin ananish arpesh. Ipak ihishmorim douk pape kabi Kraiss ananish roguh w aiyas iri um. <sup>25</sup> Eik Iruhin nanagraehe um inek enyudok mour um itaurum ipak Iruhin ananish arpesh um ikripep baugenyum um ihinyumorim ananin yopinyi baraen. <sup>26</sup> Seiwok arigaha douk, enyudok baraen nyanabeshuk nyape um ihishmorim seiwokishi apakish popehesh yamehesh. Aria douk Iruhin neneken nyatogur yopugunum aria ananish arpesh shadukemen. <sup>27</sup> Iruhin ananim urkum douk morum nakri nunekesh namudok. Anan nakri niyabig apak ananish arpesh enyudok baraen douk riguk nyanabeshuk nyape iri. Enyudok baraen enyen douk yopiyopinyi abom aria nyeigur nyato iruhumen iri. Iruhin douk nakri enyen nyutogur yopugunum nyutaurum ihishmorim awiros-ish arpesh. Baraen douk enyudok. Kraiss nape numun ipakiruh aparuh. Aria baugenyum um enyudok

baraen nyakri namudok. Adur atin, Iruhin ta nunekap putogur yopiyopipari abom kabi douk anan kanak yopuyopuni abom um. <sup>28</sup> Douk namudok aria apak makripesh Kraiss ananin yopinyi baraen ihishmorim arpesh. Apak morao sabainyi saki aria munek skulumesh um enyudok baraen um shudukemen aria shurao ihigos-morim baragos iri saki. Apak makripesh wosik um shukeshuk agabus yoweishi inahos eshesh shape shenekesh iri. Aria um makri murao ihishmorim arpesh atin atin douk shatukur Kraiss iri shunak um Iruhin aria shupe dodogowish um anan aria shutogur ananish atish arpesh abom kabi anan nakri um. <sup>29</sup> Douk namudok aria eik yape yenek mour um itaurum arpesh shutogur kabi douk Kraiss um, eik yeneken dodogoiwe atuwe. Eik douk anan neke ananin dodog neneke dodogoiwe aria douk yenek enyudok mour dodogoiwe atuwe.

## 2

### *Eshesh Ta Shusuhw Iruhin Ananin Baraen Dodog Shugipeshen Aria Shubo Rohwin Baraen Nyubuhuk*

<sup>1</sup> Douk eik yakri ikripep um enyudok debeinyi mour douk eik yeneken um yataurum ipak um. Eik yeneken dodogoiwe atuwe um yataurum ipak pani armam armago shape Laodisia iri shani ihishmorim eshudok douk wata shutik eikig yamag iri uwe. <sup>2</sup> Eik yeneken namudok um yakri inek eshesh ihishmorim shuni ipak pupe namudok. Yakri ipakip urkwip iri aparuh shupe dodogowish aria ipakip urkwip punawasham kupaishi Iruhin ananish arpesh. Aria shopunek um purao epudok ihishmorim yopipi urkwip iri saki. Aria ipak ta pudukemesh abom um Iruhin ananin baraen douk adurin atin abom. Aria eik yenek enyudok mour um yakri kupaishi shuni ipak pudukemesh abom um baugenyum um enyudok Iruhin ananin baraen douk seiwok nyanabeshuk nyape iri douk nyakrium Kraiss atun. <sup>3</sup> Douk Kraiss anan atun nenek ihishmorim Iruhin ananim yopumi urkum iri saki douk seiwok shanabeshuk shape iri shatogur yopugunum.

<sup>4</sup> Aria ipak gamo pudukemesh um ta enen arpen nyunaki nyunek rohwumep nyukripep enen rohwin baraan douk ta arpes shumneken shukri adurin iri. Douk namudok aria eik douk yakripep enyudok baraan. <sup>5</sup> Adur atin, douk eik madae ini ipak mupe atugun uwe, aria eik urkum mur um ipak kabi douk yani ipak mape atugun um. Aria eik yemnek um agundok ipak pape wosik peyotu dodogowip atip pasuhw Krai ananin baraan dodog pagipeshen um aria eik yanadudareh-umep.

*Apak Ta Mutukur Krai Aria Mupe Wosik Abom Ihih Nyumneh*

<sup>6</sup> Ipak douk pasuhwen dodog Jisas Krai ananin baraan pagipeshen pakri anan douk ipakin Debeini aria paran nawish nape numun ipakiruh aparuh. Aria douk namudok atin, ipak ta pupe um putukur anan dodog aria pupe namudok atin. <sup>7</sup> Ipak ta putukur anan dodog kabi douk enen rowog nyatao dodog atap um, o kabi anohw dodogoihwi urohwhwosah urupatao dodog um. Aria ipak ta gamo pusuwen dodog pugipeshen wosik enyudok Iruhin ananin yopinyi baraan douk riguk parik paraen iri. Ipak pusuwen dodog abom pishagrakuk riguk parik pasuhwen pagipeshen um aria punek tenkyu um Iruhin.

<sup>8</sup> Aria ipak gamo pudukemesh um mare enen arpen nyunaki nyunek rohwumep nyukripep enen rohwin baraan arpes meyoh shakriyen iri. Aria shopunek um mare enen arpen nyunek rohwumep nyukripep enen baraan um arpes shuraosaki um pugipeshen aria enenyin baraan nyuweshikep kabi douk pape shonoweshik iri um, uwok. Enyudok baraan, enyen douk seiwok ipakish popehesh yamehesh shakripepen iri. Eshesh douk shakripep um eshudok debeishi dodogowishi sagabehos shani debeishi yoweishi enselahos douk shasuhw merikwum iruhw atap iri. Eshesh douk madae shukripap um Krai uwe.

<sup>9</sup> Douk namudok aria ipak gamo punek. Um maresh? Ipak padukemesh, Krai natogur arman kabi douk apak

um. Aria ihinyumorim Iruhin ananin dodog iri saki nyani ihimorim ananin yopihi aih douk Iruhin nako Krai aria shape abom um anan atun. <sup>10</sup> Aria ipak douk ponohwar abom um arpes. Um maresh? Ipak douk patukur Krai aria parao ihimorim Iruhin ananin yopihi aih. Krai anan douk nape debeini nasuhw merik um ihishmorim dodogowishi sagabehos shani king-omi hani ihishmorim debeishi yoweishi enselahos douk shasuhw merik um iruhw atap iri. <sup>11</sup> Aria ipak douk patukur anan. Douk namudok aria ipak douk ta mare parao ehudok aih um patah ipakiruh yegeshiweruh um. Ehudok aih douk madae arpes shunekeh-umep adukiruh um ipakiruh yegeshiweruh uwe, uwok. Ipak parao ehudok aih namudok. Ipak patukur Krai aria anan kanak nenekep wosik um pukutukuk harik hapenyep iri aih um penek yoweishi inahos um. <sup>12</sup> Aria ipak patukur Krai aria penek baptais. Aria enyudok enyen kabi douk sharumep pani anan um. Ipak pakri adur Iruhin douk dodogowin aria nohuri Krai nakitaki wonugwehw. Douk namudok aria anan nohur ipak shopunek pani Krai pakitak pape.

<sup>13</sup> Douk riguk ipak pape pagipesh harik hapenyep iri aih um penek yoweishi inahos um. Aria shopunek, ipak douk madae Juda uwe, aria ipak madae pudukemesh um Iruhin nini ananin lo douk seiwok nakoguk Moses enyi uwe, uwok. Douk namudok aria ehudok harik iri yoweih aih haep pagok. Aria Iruhin nepuhur pakitak pape aria nenekep patukur Krai. Aria Iruhin nakweshih eneshenesh yoweishi inahos apak menekesh iri. <sup>14</sup> Aria enyudok lo seiwok Iruhin nakoguk Moses enyi douk nyape Iruhin ananik Buk iri douk nyape kabi apakim horim um. Enyen nyakrium arudok debeiri eriger douk ta apak mumnegor um eshudok apakish yoweishi inahos douk apak menekesh iri shuni enen baraan douk apak madae dodogowip um mugipeshen iri uwe. Aria Iruhin nenek nyilim enyudok ihinyumorim lo iruhw rowog kruse abom aria naen nyabuhuk wouwokuk. <sup>15</sup> Aria

um enyudok mour Kraiss nenenen rowog kruse iri atin, Iruhin nabouk abom ihihmori dodogowihi arugeh kabi douk yoweinyi dodog um hani eshudok de-beishi yoweishi enelahos douk shape iruhw atap iri esheshin dodog nyabuhuk wouwokuk. Anan nenek uhwinyumesh aria noweshikesh kabi douk shonoweshik iri um. Aria anan narik aria eshesh shagiman shanak aria ihishmorim arpes shatrish aria shakri eshesh douk madae dodogowish uwe.

### *Apak Mani Kraiss Magok*

<sup>16</sup> Douk namudok aria ipak mare pukutukuk enen arpen nyunek skelumep nyunumogep baraan um agundok ipak madae pugipesh enyudok lo um worigun iri abar um uwe. O um anah debeihi yopuhi nyumnah douk shenek lotu ahi, o um anagun debeguni worigun douk shenekagun aria shanadudareh um namuni aun natogurum. O um ahudok nyumnah sabat douk eshesh Juda mour uwok shape meyo ahi. <sup>17</sup> Enyudok ihinyumorim lo douk aboriguh meyo um eshudok douk ta shutograri iri. Aria eshudok douk shatogur. Aria baugos um ihishmorim adurishi abom eshudok douk shapeum um Kraiss atun. <sup>18</sup> Aria ta enen arpen nyukri nyukripep um enesh eshudok kabi enyen nyabo yomnis nyatrish iri o nyunek rohwmep nyukri ipak punih ipak kanak pupe shakamum enenyenen lo aria punek lotu um enelahos um, ipak mare pumneken, uwok. Ipak mare pukutinyuk nyunek rohwmep aria nyunekep mare purao ipakish yopishi eshudok eneshenesh douk shakus shatrugun-umep iruhw heven iri. Enyudok arpen enyenyim urkum douk morum enyen nyutuk enyenyin nyeigur nyuto iruhw um eshudok kabi douk enyen nyabo yomnis nyatrish iri um. Aria shopunek, enyenyim urkum douk morum harik hapenyen iri aih um nyenek yoweishi inahos um. <sup>19</sup> Enyudok arpen enyen douk madae nyutukur Kraiss apakin baragin uwe, uwok. Kraiss douk nape narik kabi douk barag um. Aria apak ihishmorim ananish arpes mape kabi douk roguh aiyas um. Aria

anan nutaurum ihihwumorim yegeny-ihw hwape dodogowihwi. Aria anan nenek nyugurish iri bishiguh shanakrupam dodog aria shasuhw ihihwumorim yegenyihw hwape atugun. Aria douk Iruhin nenekohw hwatogur debewh aria dodogowihwi. Aria nenek apak ananish arpes matogur dodogowip meshagrakuk riguk marik mape um.

<sup>20-21</sup> Aria ipak douk pani Kraiss pagok aria pakutukuk agundok um pape shakamum agundok ipak pagipesh enyudok baraan douk nyakrium amudok king-omi hani eshudok dodogowishi sagabehos shani yoweishi enelahos douk shasuhw merik um iruhw atap iri um. Aria douk ipak wata patanam panak pape shakamum eshudok um maresh? Aria shopunek, ipak pape shakamum enyudok lo douk nyakri, “Nyak mare nyusuhwesh o mare nyishoh o mare nyututoruhwesh nyakis wis iri um maresh?” <sup>22</sup> Enyudok lo douk nyakrium agundok worigun iri abar douk ta apak mishoh aria shunak shuwishuk abom iri. Um maresh? Enyudok lo douk arpes meyo urkwip porumen sheneken aria shenek skulumesh. <sup>23</sup> Enyen adur, arpes shatik enyudok lo um, eshesh shakri enyen kabi douk yopipi urkwip um nyutaurumap aria nyunekap munek lotu um enelahos. Aria nyenek arpes shaunih eshesh kanak shape shakamum enenyenen lo. Aria nyenekap mabo apakiruh yegeshiweruh um hugipesh apak. Aria douk arpes shatrin esheshis nabes um, eshesh shakri enyudok lo douk nyape kabi yopipi urkwip um. Aria uwok, enyen douk madae dodogowin um nyutaurumap um mubouk ehudok harik hapenyap iri aih um henekap munek yoweishi inahos iri hubuhuk um uwe, uwok.

## 3

### *Iruhin Nepuhur Mani Kraiss Makitak Mape*

<sup>1</sup> Iruhin douk nepuhur pani Kraiss pakitak pape. Douk namudok aria ipak urkwip ta purum eneheneh aih douk hanaki iruhw heven iri atih. Agundok iruhw heven douk Kraiss nape debeini



aria nape yopunyi rogur ehahum Iruhin napeum. <sup>2</sup> Aria ihih nyumneh ipak urkwip ta purum eneheneh aih douk hanaki iruhw heven iri. Ipak urkwip mare purum agundok atapih aih, uwok. <sup>3</sup> Um maresh? Ipak douk pagok jurug pani Kraiss. Douk namudok aria agundok douk ta ipak pupe wosik ihih nyumneh um douk paragun aria nanabeshuk nani Kraiss nape iruhw heven Iruhin napeum. <sup>4</sup> Kraiss douk baugos um agundok ta ipak pupe wosik ihih nyumneh um. Douk namudok aria kweipon anan nutogur yopugunum shutrun um, ipak shopunek ta puni anan putogur yopugunum. Aria ipak ta purao agundok douk ta anan nutrugun abom um.

#### *Apak Matogur Namishi Arpesh Jurug*

<sup>5</sup> Douk namudok aria ipak ta pubouk abom ihishmorim harik hapenyep iri aih um penek yoweishi inahos um hugokuk. Eik douk yakri ehudok um shenek wehrur um, ehudok habosusih iri aih, ehudok aih um mishish shakitak um shenek yoweishi inahos um, enyudok um urkwip porum eneshenesh yoweishi inhahos um, shani ehudok aih um shenek nyigiya um kupaishi esheshish eshudok eneshenesh um. Aria ehudok aih um shenek nyigiya um, eheh douk kabi shagipesh madae adurimi god omi um uwe. <sup>6</sup> Aria arpesh douk shape shenek ehudokmori yoweih aih. Douk namudok aria Iruhin douk juwehosin-umesh aria ta nuwanamesh ehudok yoweih aih eshesh shape shenekeh iri. <sup>7</sup> Douk riguk ipak pagipesh ihishmorim ehudokmori yoweih aih obi nyutob, ehudok harik hapenyep iri aih hasuhw merikw-umep aria hep-uhur pagipesh penek.

<sup>8</sup> Aria douk ipak ta pukutukuk ihishmorim ehudok eneh yoweih aih shopunek. Eik yakri um ehudokmori aih. Ehudok um juwehosish um, huni ehudok um ipakiruh aparuh juwehosiruh abom aria peyagwreh debeg um, huni ehudok um ipak panogugur kupaishi um. Aria shopunek, ehudok um padukemesh rohwin baraen kupaishi um, huni ehudok um peyagwreh enenyenen yoweinyi

baraen um. <sup>9</sup> Ipak mare punek rohwin um kupaishi Kristen, uwok. Um maresh? Ipak douk pabouk jurug harik iri ihishmorim yoweih aih douk seiwok ipak pape penek iri hagokuk. <sup>10</sup> Aria douk Iruhin nenekep patogur namishi arpesh. Aria ihih nyumneh anan nape nenekep patogur namupi padukem anan kanak douk nenek ihishmorim arpesh iri. Anan douk nenekesh namudok um nakri ipak pudukeman wosik abom aria pugipesh anan. <sup>11</sup> Douk namudok aria apak mape Iruhin ananish arpesh aria mape atup awirop. Apak madae murao sisigish nyeiguhw aria mupe sisigis awiros uwe, uwok. Douk namudok aria apak douk makri eshesh Grik douk madae enesh kupaishi uwe aria eshesh Juda douk madae enesh kupaishi uwe, uwok. Aria mamudok hatah amamiruh yegeshiweruh iri madae anam kupaimi uwe aria mamudok douk madae hutah yegeshiweruh iri anam sigim uwe, uwok. Aria eshudok douk sheneyagwreh kupainyi baraen iri madae kupaishi uwe aria eshudok shape sisigig nahobig, douk madae shudukemesh um eneh yopihi aih iri enesh kupaishi uwe, uwok. Aria eshudok douk shape shakamum kupaishi shenekumesh mour meyoh iri madae enesh sikish aria eshudok douk shape wosik iri madae enesh kupaishi uwe, uwok. Iishmorim eshudok douk Kraiss ananish atish. Anan douk baugos um eneheneh yopihi aih hani eneshenesh yopishi eshudok. Aria anan atun nape debeini aria nape numun um apak ihishmorim masuhw Iruhin ananin baraen iri um apakiruh aparuh.

#### *Apak Ta Murao Ehudok Aih Um Mukri Giha Um Kupaishi*

<sup>12</sup> Seiwok sagramatin Iruhin ananim urkum manawashamep abom aria nagraehep pape ananish arpesh. Douk namudok aria ipak ta punek ehudokmori yopihi aih. Punekeh kabi por yopihi rupeh um. Ipak ta pukri giha aria putaurum sabaishi arpesh. Aria pupe shakamum kupaishi arpesh aria punekumesh yopihi aih putaurumesh. Ipak mare juwehosip

um eshudok douk shunek yoweishi inahos um ipak iri, uwok. Ipak ta pupe putrish meyoh. <sup>13</sup> Aria ta ipak enen arpen enen baraen nyupenyen um agundok kupainyi nyenek enen yoweinyi um enyen um, enyen ta nyukri wosik um nyusah enyudok amaen. Aria enyen mare nyunasuweh um ehudok yoweih aih enyudok kupainyi arpen nyenekehumen iri aria nyukwreyehuk. Um maresh? Sogomatin Debeini narik nakweshih apakish yoweishi inahos. Douk namudok aria ipak shopunek ta punekesh namudok atin um kupaishi. <sup>14</sup> Aria ipak ta punek ehudok ihishmorim yopihi aih. Aria sagomatin ipak ta purik punek ehudok yopihi aih um ipak urkwip punawasham kupaishi um. Um maresh? Ehudok yopihi aih um urkwip punawasham kupaishi um ta hutaurumep huweshikep pupe kabi atin arpen um.

<sup>15</sup> Kraish douk nenek apakiruh aparuh hor wosik aria madae juwehosiruh uwe. Douk namudok aria ehudok aih um aparuh hor wosik um ta husuhw merik um ipakiruh aparuh huni ipakip urkwip. Um maresh? Iruhin douk nahwarep um pupe atup awirop aria shopunek um ipakiruh aparuh hur wosik. Aria ipak ta punek tenkyu um Iruhin. <sup>16</sup> Aria Kraish ananin baraen ta nyupe abom numun ipakiruh aparuh. Aria ipak ta punek skulum kupaishi aria putaurumesh um enenyenen ihinyumorim yopinyi saki. Aria shopunek ta punek tenkyu um Iruhin aria piyarub yopuruhi aweruh douk hotem Iruhin ananik Buk iri. Ipak piyarub aruhudok douk pape penek lotu um Iruhin piyarub aruh iri huni aruhudok douk Iruhin ananin Mishin nyepuhur piyarub patuk Iruhin ananin nyeigur nyato iruhw um. Ipak piyarub aruhudok aweruh aria numun ipakiruh aparuh ipak ta punek tenkyu um Iruhin. <sup>17</sup> Aria ihishmorim eshudok ipak punekesh iri, ipak ta punekesh um putuk Debeini Jisas ananin atin nyeigur. Aria shopunek um ananin atin nyeigur, ipak ta punek tenkyu um apakin Yain Iruhin.

*Shanaraum Iri Armam Armago Shuni*

*Esheshish Batowish Esheshin Baraen*

<sup>18</sup> Ipak armago ta pupe shakamum ipakim armam. Um maresh? Ehudok aih douk wosik abom um Debeini ananis nabes. <sup>19</sup> Aria ipak armam shopunek, ipak urkwip ta punawasham ipakiyu armago aria mare punek owowiruh aparuh yoweruh, uwok.

<sup>20</sup> Aria ipak esheshish batowish ta punek ihinyumorim ipakish amakenyish esheshin baraen pusuwen pugipeshen. Um maresh? Debeini nakri ipak punekesh namudok um, anan ta nunadudarehumep. <sup>21</sup> Aria ipak amakenyish mare punek ipakish batowish esheshiruh aparuh yoweruh aria juwehosish, uwok. Um maresh? Ta punekesh namudok aria shukri eshesh douk madae yopishi uwe.

*Shape Shakamum Kupaishi Shenekumesh Mour Meyoh Iri Shuni Esheshim Debeimi Esheshin Baraen*

<sup>22</sup> Ipak pape shakamum kupaishi penekumesh mour meyoh iri ta pugipesh ihinyumorim ipakim hasuhw merikwumep iri amamin baraen. Ipak mare pukri punek mour abudok nyutob amam hiyotu hutrip um atub um pakri amam hutrip aria hukri ipak yopipari, uwok. Ipak ta pukri adurin atin abom aria ipak urkwip purum Debeini putuk ananin nyeigur nyuto iruhw. Aria ipak mishish shikitak abom um enyudok mour aria puneken wosik. <sup>23</sup> Aria enenyenen mour ipak puneken iri, ipak ta puneken wosik abom kabi douk peneken um Debeini um. Ipak mare puneken kabi douk peneken um arpesh meyoh um, uwok. <sup>24</sup> Um maresh? Kweipon Debeini ta nukkep yopishi atish eshudok eneshenesh um nutorip um enyudok mour ipak pape peneken iri. Eshudok yopishi anan douk nagraehesh shakus shatrugun um ipak ananish arpesh. Um maresh? Ipak douk penek Kraish, apakin Debeini ananin mour. <sup>25</sup> Aria eshudok meishi arpesh douk shenek yoweishi inahos iri, kweipon Iruhin ta nuwanamesh yoweishi inahos nunekesh shumnek debeiri eriger um enyudok eshesh sheneken iri. Um maresh? Anan ta nunek skelimum ihishmorim arpesh arag atin.

#### 4

<sup>1</sup> Aria ipak pasuhw merik um eshesh shenek mourumep meyoh iri ta punek yopihi abom aih um eshesh. Um maresh? Ipak padukemesh, ipakin Debeini douk nasuhw merik um ipak iri shopunek douk nape iruhw heven.

#### *Ehudok Aih Um Shunek Beten Aria Shurahaen Wosik Abom Um*

<sup>2</sup> Ipak ta punek beten porik Iruhin ihih nyumneh. Aria punek beten obi nyutob, ipak mare pupe meyoh aria pupe urkwip pushukepuk uwe, uwok. Ipak urkwip ta pur wosik aria punek tenkyu um Iruhin. <sup>3</sup> Aria shopunek, punek beten um Iruhin um nutaurumap nunekumap anah yah um punak pukriפש baugenyum enyudok baraan um Krai. Seiwok enyen nyanabeshuk nyape, aria douk nyatogur yopugunum. Aria douk eik showeshike yape um agundok yape yakriפש enyudok baraan um.

<sup>4</sup> Aria ipak punek betenume um eik ikriפש enyudok baraan wosik abom kabi douk Iruhin nakri um. <sup>5</sup> Aria abudok nyutob ipak puni eshudok douk madae shugipesh Krai ananin baraan iri uwe pupe um, ipak urkwip ta pur wosik um punek yopihi atih aih. Aria ipak ta punugapesh pupe um piyabig Krai ananih aih. <sup>6</sup> Aria ihinyumorim baraan ipak piyagwrehen iri, ipak ta piyagwreh enyudok douk wosik um nyutaurum arpes abudok nyutob iri. Ipak piyagwreh namudok um punekesh shunadudareh um shumnek ipakin baraan. Aria ipak ta pudukemesh um pinyanamumesh wosik eshesh shurigepumen iri baraan.

#### *Pol Neshopok Tikikus Iri Onesimus Hanak*

<sup>7</sup> Apakin wanin Tikikus douk apak urkwip panawashaman iri anan apa neneken wosik Debeini ananin mour. Anan douk nani eik wanoprom wenek enyudok atin mour iri. Aria anan ta nunaku nagundok aria nukriפש agundok douk eik yape yanak um. <sup>8</sup> Eik douk yeshopokan nanakumagu ipak um nukriפש aria pudukemesh um agundok apak mape manak um. Aria shopunek

um nutaurumep pupe dodogowip. <sup>9</sup> Anan ta ninigu apakin wanin Onesimus douk apak urkwip panawashaman iri hunaku. Anan douk nani ipak atubur wabur. Aria anan apa neneken wosik Iruhin ananin mour. Amam biom ta hukriפש um eneshenesh eshudok douk shatogur agundok iri.

#### *Pol Nenekumesh Yopuhi Nyumnah Eshesh Shape Kolosi Iri*

<sup>10</sup> Aristarkus douk nani eik wonoweshik wape iri nani Barnabas ananin mehinin Mak shopunek henekumepogu yopuhi nyumnah ipak. Aria ta Mak nunaku nutogrumep um, ipak ta putauruman wosik kabi douk riguk eik yenemepogu baraan yakriפש um. <sup>11</sup> Aria Jisas douk kupainyi nyeigur nanahwar um Jastus iri shopunek nenemepogu yopuhi nyumnah ipak. Aria eshesh Juda douk amudok bimatum meyoh abom hani eik manoprom menek mour um mataurum arpes um shuwish agundok Iruhin nape Debeini um ananish arpes um. Aria amam douk hataurume wosik abom um enyudok mour.

<sup>12</sup> Epafras nani ipak douk panaki atubur wabur iri. Aria shopunek, anan douk nape shakamum Krai Jisas nenekuman mour iri. Anan shopunek nenemepogu yopuhi nyumnah ipak. Ihih nyumneh anan nenek beten dodogowin abom atun um ipak. Anan nenek beten narig Iruhin um nunekep piyotu dodogowip atip kabi douk Iruhin nakri ipak pupe um. Aria nenek beten um ipak pudukemesh um Iruhin ananin baraan abom pakri enyen douk adurin atin abom aria pugipesh Iruhin nakriyen iri. <sup>13</sup> Aria eik yadukeman wosik Epafras, douk namudok aria eik yakri ikriפש um anan. Douk anan nape nenek debeinyi mour um nuneke beten um Iruhin nutaurum ipak pani eshesh douk shape arbudok biyorub warub, Laodisia bani Hierapolis iri. <sup>14</sup> Aria apakin arpenyin Luk douk nenek dokta iri douk apak urkwip panawashaman iri nani Demas amam shopunek henekumepogu yopuhi nyumnah ipak.

<sup>15</sup> Aria ipak pukrip apakish Kristen douk shape Laodisia iri. Pukripesh pukri eik douk yanadudareh-umesh abom aria yenekumeshugu yopuhi nyumnah. Aria pukrip Nimfa kwuni Iruhin ananish arpesh douk apa shantorum shenek lotu shape okwokwit urupat iri. Eik yenekumeshugu yopuhi nyumnah eshesh shopunek.

<sup>16</sup> Aria ipak putik apudok shup jurug aria pushopukop punak um Iruhin ananish arpesh douk shape Laodisia iri shopunek shutrup. Aria shopunek, apudok shup eik yenekap panak um eshesh Laodisia iri ipak shopunek ta putrishap aria putrup. <sup>17</sup> Aria pukrip Arkipus um nuneken niyaten wosik enyudok mour douk Debeini nakonen iri.

<sup>18</sup> Aria douk eik kanak Pol eikis wis yowem enyudok nyagiguk iri atin baraen. Eik yenemepogu yopuhi nyumnah um ipak. Aria ipak mare urkwip pushukepuguk um agundok showeshike senab yape yonoweshik um, uwok. Aria eik yakri Iruhin nutaurumep meyoh ipak.

## Parik Iri Shup Douk Pol Nenekap Panam Eshesh Tesalonaika Iri

*Banenyi Baraen Um Enyudok Baraen  
Pol Narik Nenekan Nyanak Um Eshesh  
Tesalonaika Iri*

1:1 Pol nakripesh yopinyi baraen um Iruhin nini Jisas Krai ta hutaurumesh

1:2—3:13 Pol nakripesh um yopinyi mour anan neneken um nataurumesh um aria nakri nunak nutrish

4:1-12 Pol nakripesh um yopihi aih eshesh ta shugipesheh um shunek Iruhin nunadudareh um

4:13—5:11 Pol nakripesh um ahudok nyumnah apakin Debeini nutanamori ahi

5:12-28 Nyatuh iri baraen douk eshesh ta shugipeshen iri

<sup>1</sup> O ipak Iruhin ananish arpesheh pape Tesalonaika iri! Eik Pol yani Sailas iri Timoti mape agundok aria yenekumepogu apudok shup ipak. Ipak douk patukur apakin Yain Iruhin nani Debeini Jisas Krai aria pape amamip atip iri. Apak makri Iruhin nutaurumep meyoh aria ipakiruh aparuh hur wosik.

*Kristen Shape Tesalonaika Iri Shasuhw  
Iruhin Ananin Baraen Dodog Shagipeshen*

<sup>2</sup> Ihih nyumneh apak biom atun apa mape um munek tenkyu um Iruhin um ipak aria mape menek betenumep. <sup>3</sup> Apak menek beten um apakin Yain Iruhin um, apak apa menek urkwip um agundok ipakin bilip nyepuhur penek yopihi aih um. Aria shopunek um agundok ipak urkwip panawasham um kupaishi arpesheh aria ipak douk peyotu dodogowip penek sabainyi yopinyi mour pataurumesh um. Aria shopunek, menek urkum um agundok ipak padukemesh abom um apakin Debeini Jisas Krai ta wata nunaki nuraep um. Douk namudok aria ipak douk peyotu dodogowip atip pasah enenyenen amaen aria pupe putrugun-uman. <sup>4</sup> O ipak apakish arpesheh! Apak madukemesh

um Iruhin douk urkum manawashamep abom aria nanagraehap um pupe ananip atip abom.

<sup>5</sup> Um maresh? Riguk apak biom atun manaku makripep Iruhin ananin yopinyi baraen um, ananin Mishin nyataurumep nyenekap dodogowip abom aria douk makripep ananin baraen. Apak madae mukripep kabi douk baraen meyoh um uwe, uwok. Abudok nyutob apak manaku makripep baraen um, apak madukemesh abom um enyudok baraen douk adurin atin abom. Aria ipak douk patrup aria padukemesh um apak menekeh iri aih um agundok makri mutaurumep um purao Iruhin ananin baraen abom um.

<sup>6</sup> Aria ipak patrup pagipeshap aria pagipesh Debeini shopunek. Aria ipakish horim shenekep pemnek debeiri eriger. Aria Iruhin ananin Mishin nyataurumep nyenekep panadudareh um Iruhin ananin baraen aria douk pemneken pasuhwen pagipeshen. <sup>7</sup> Douk namudok aria ihishmorim Kristen shape agusudok biagos shokugosi nahobigos Masedonia nyani Akaia iri shatrip shakri ipak penek yopihi aih aria eshesh douk shagipeshap.

<sup>8</sup> Aria ipak douk pemnek enyudok baraen um apakin Debeini pasuhwen pagipeshen aria enyen nyarahaen nyeyatagun um agusudok biagos shokugosi nahobigos Masedonia iri Akaia aria shemneken kabi douk nyubrap peyagwreh shemnekap um. Aria enyudok baraen um agundok ipak pemnek Iruhin ananin baraen pasuhwen pagipeshen um douk madae nyurahaen Masedonia iri Akaia atin, uwok. Enyen douk nyarahaen ihigunum. Douk namudok aria apak mour wokap um mukripesh um. <sup>9</sup> Um maresh? Eshesh kanak shakripap um ehudok yopihi aih riguk ipak penek um pataurum apak biom atun abudok nyutob manaku mani ipak mape um. Aria shopunek, shakripap um agundok ipak pekeshuk agabus warehos shani ihim-morim madae adurimi god omi um uwe aria patanam panak um Iruhin penek ananin mour um. Anan douk adurin abom Iruhin douk nape ihih nyumneh iri. <sup>10</sup> Aria shopunek, shakripap um agundok pape patrugun

um ananin nuganin Jisas um nukutuk iruhw heven nunaki um. Sei-wok eshesh shan nagok aria Iruhin wata nonohur nakitak nape iri. Anan douk nataurumap narap makutukuk agundok ta Iruhin juwehosin nunekumesh kwot shenek yoweishi inahos iri arpes h um.

## 2

### *Pol Nakri Um Iruhin Ananin Mour Anan Neneken Tesalonaika Iri*

<sup>1</sup> O ipak apakish arpes h! Ipak kanak padukemesh um apak manaku makripep Iruhin ananin barae n um, apak madae mukripep aria nyunakuk atap meyoh uwe, uwok. Apak makripep aria pasuhwen dodog pagipeshen. <sup>2</sup> Aria ipak padukemesh, sagomatin apak marik manak makripesh Iruhin ananin yopinyi barae n eshesh Filipai aria eshesh shap shawarugap apa shanumogesh apak aria shenekap memnek debeiri eriger. Aria wata manakumagu ipak um, Iruhin nataurumap nenekap dodogowip aria makripep ananin barae n. Sabaishi arpes h shakri uwok um apak mukripep enyudok barae n um aria eshesh shakri shutapokumap yah. Aria apak madae munogugur uwe. <sup>3</sup> Aria baugos um agundok apak makripep um pukutukuk yoweishi inahos putanamori punak um Iruhin um douk enyudok. Apak douk madae mukri um mugiyagimep uwe, uwok. Aria shopunek, apak madae munek urkwip um munek enesh yoweishi inahos um ipak aria munek roh-wumep uwe. <sup>4</sup> Apak douk Iruhin kanak natrup nakri wosik um apak munek enyudok mour um mura o ananin barae n munak mukrip arpes h. Douk namudok aria apak douk manaku makripepen. Aria apak douk madae mukripep barae n um munek sabaishi arpes h shunadudareh um apak uwe, uwok. Apak makri Iruhin douk nadukemesh nenek skelimap um numun apakip urkwip iri atun nanadudareh-umap. <sup>5</sup> Aria apak madae mukri munyubumep uwe. Aria shopunek, apak madae munyubumep apakip urkwip um mukripep enen barae n um munek nyigiya um ipakish eshudok

eneshenesh uwe, uwok. Ipak douk padukemesh um enyudok apakin barae n douk adurin. Aria Iruhin shopunek douk natrup aria nadukemap. <sup>6</sup> Apak douk madae munek mour um mukri ipak o enesh kupaishi arpes h shutuk apakish nyeiguhw shuto iruhw uwe, uwok. <sup>7</sup> Apak douk Kra is ananim aposel maraogu ananin barae n manaku makripepen. Douk namudok aria apak ta dodogowip um ipak putuk apakish nyeiguhw shuto iruhw. Aria apak manaku mani ipak mapeum, apak makripep shokubur kabi douk onok yopukwi amakek kwataurum okwokwish batowish wosik um. <sup>8</sup> Apak urkwip douk panawasham abom ipak aria douk madae mukripep Iruhin ananin yopinyi barae n atin uwe, uwok. Apak shopunek manadudareh mani ipak manoprom mape atugun aria madae mubeshukumep eneh apakih aih uwe, uwok. <sup>9</sup> O ipak apakish arpes h! Douk ipak padukemesh um enyudok debeinyi mour apak biom atun meneken iri. Riguk apak manaku mape mani ipak um, apak menek enyudok biyen mour nyumneh weibus. Apak makripep Iruhin ananin yopinyi barae n aria shopunek menek mour um morao utabor um munator apakish eshudok eneshenesh um. Um maresh? Apak makri uwok um mukep amaen um pukop ipakigun worigun um. <sup>10</sup> Riguk apak douk mani ipak Kristen mape aria ipak pani Iruhin douk padukemap wosik apak. Ipak padukemap um apak douk yopupari munek yopihi atih aih iri. Aria apak barae n madae enen nyupenyap um munek enesh yoweishi inahos uwe. <sup>11</sup> Aria ipak padukemesh, apak douk mataurum ipak atin atin kabi douk anan yaken nataurum ananish batowish um. <sup>12</sup> Apak mataurumep um putogur dodogowip um ipakin bilip aria ipakiruh aparuh hur wosik. Aria shopunek, mape um makripep um pupe wosik aria punek yopihi atih aih Iruhin nakriyehi. Anan douk nahwarep um punak puwish agundok anan nape Debeini um ananish arpes h um aria putik agundok anan dodogowin abom atun aria natrugun nyeigur nyato iruh-uman um.

*Eshesh Kristen Sheyotu Dodogowish  
Atish Shosah Eneyenen Amaen*

<sup>13</sup> Riguk apak biom atun manaku makripep Iruhin ananin baraeen um, ipak penek urkwip pakri enyudok baraeen douk madae enesh arpeshe esheshin uwe. Ipak pakri enyen douk Iruhin ananin abom. Aria enyen douk adur. Aria ipak pasuhwen pagipeshen aria enyen nyenek yopinyi mour abom numun ipakiruh aparuh. Douk namudok aria ihih nyumneh apak munek tenkyu um Iruhin um enyudok yopinyi mour ananin baraeen nyeneken um ipak iri. <sup>14</sup> O ipak apakish arpeshe! Ipak douk pemnek arudokmori atur eriger douk Iruhin ananish arpeshe douk shatukur Jisas Krai shape agudok shokugi nahobig Judia iri shemnegor iri. Eshesh douk Juda eshesh kanak enesh shenekesh eneyenen aria shenekesh shemnek debeiri eriger. Aria ipak shopunek douk pemnek eriger namudok atin. Enesh ipak atubur wabur shakri uwok um ipak pugipesh Krai um aria eshesh shenekep pemnek debeiri eriger. <sup>15-16</sup> Seiwok eshesh Juda shabo sabaimi profet hagok. Arigaha aria nubokuhiyen kwar shabo apakin Debeini Jisas nagok. Aria apak biom atun shopunek shakri uwok-umap aria douk shenekap eneyenen aria shahiyahap maruwok manak um kupaigunum. Apak manak makripesh Iruhin ananin baraeen kupaishi arpeshe douk madae Juda iri uwe. Apak makri mukripesh um shumneken shugipeshen aria anan nunaraesh shutanamori shupe wosik. Aria eshesh Juda shakri uwok aria shakri shutapok apakih yah um mare munak mukripesh. Namudok aria eshesh shutapok Iruhin ananim urkum aria shatogur ihishmorim arpeshe esheshish horim. Riguk eshesh shape shenek sabaishi yoweishi inahos. Aria douk eshesh shatogur sabaishi abom. Aria anan douk juwehosin-umesh aria nakri jurugish. Aria kweipon anan ta nesh.

*Pol Nakri Nutanam Nunak Nutik Eshesh Tesalonaika*

<sup>17</sup> O ipak apakish arpeshe! Enesh arpeshe shahiyahapari aria apak biom atun douk makutipukuk banab nyutob manaki mapeik agudok. Apak manaki mape agudok aria apak urkwip porum ipak aria makri abom um munaku mutrip. Aria apak mabirak matik uwok. <sup>18</sup> Sabaihi nyumneh eik Pol yabirak um yakri apak munaku aria uwok. Yoweini Satan natapokumap yah. <sup>19-20</sup> Apak douk mape munek urkwip um ahudok nyumnah apakin Debeini Jisas Krai nunaki aria apak muni ipak mupe wosik ahi. Ahudok nyumnah, apak ta muni anan mupe atugun aria mupe wosik. Aria douk apak biom atun douk munek urkwip um ipak penek bilip um Krai aria meyotu dodog mape matrugun um Krai nutanamori nunarap um. Aria ahudok nyumnah ta shutik ipak aria ta shudukemesh um apak douk makripep Iruhin ananin baraeen aria mabouk yoweishi inahos shabuhuk. Aria apak ta munadudareh um ipak atip aria punekap mutuk Iruhin ananin nyeigur nyuto iruhw.

### 3

*Pol Neshopok Timoti Nanak Um Nutaurum Eshesh Tesalonaika Shurao Iruhin Ananin Dodog*

<sup>1-2</sup> Apak biom atun munek urkwip um ipak aria manakripam makri ipak ta pupe wosik aka, uwok? Apak makri uwok um mupe mutrugun anah shopunek nyumneh um ipakin baraeen nyunakumori apak um, uwok. Douk namudok aria ohwak biohw wapeik agudok Atens aria weshopoku ohwakin wanin Timoti atun nanakumogu nutaurumep. Anan nani ohwak apa manoprom munek Iruhin ananin mour um makripesh Krai ananin yopinyi baraeen. Ohwak douk weshopokan nanakumogu nutaurumep um pupe dodogowip um Iruhin aria pusuhw ananin baraeen dodog pugipeshen. <sup>3</sup> Um maresh? Ta enesh arpeshe shunekep purao debeinyi amaen aria pukutukuk Iruhin ananin baraeen. Ipak padukemesh,

enyudok amaen douk Iruhin kanak nakri wosik aria enyen douk nyatogrumep. <sup>4</sup> Riguk apak manaku mani ipak mape um, abudok nyutob arpesk douk madae shunekap murao enen amaen uwe. Aria apak makripep makri ta mare roubi aria enesh arpesk ta shunek apak muni ipak murao enen amaen. Aria douk ipak padukemesh um apakin baraen douk nyatogur adurin. Eshudok arpesk shenek ipak pani apak morao amaen abom kabi douk riguk apak makripep um. <sup>5</sup> Douk namudok aria eik yakri imnek baraen arigas um agundok ipak pape um aria eik douk yeshopok Timoti nanaku. Anan nanakumogu nutrip aria neneki baraen nyunakumori um eik idukemesh um ipak pasuhw Iruhin ananin baraen dodog aka, uwok? Eik yenek urkum yakri um anudok yoweini douk nagraeh arpesk um shenek yoweishi inahos iri ta nukwiraehap aria ta jurug pukutukuk Iruhin ananin baraen aka, mumam? Aria ta wosik atin enyudok riguk apak meneken iri mour um makripep Iruhin ananin baraen um nyunakuk meyo.

*Timoti Nakrip Pol Um Eshesh Tesalonaika Shagipeshen Wosik Iruhin Ananin Baraen Um Aria Pol Nanadudareh*

<sup>6</sup> Aria douk Timoti ta shopunek nakutipukuk nanaki nakripohw yopinyi baraen um ipak. Anan nakri ipak pasuhw Iruhin ananin baraen dodog pagipeshen aria ipak urkwip panawasham ipak kanak pani kupaishi arpesk pataurumesh. Aria ipak urkwip panawasham eik yani Sailas aria pakri punaki putruh abom. Aria ohwak shopunek urkwip panawashamep abom aria wakri unaku utrip abom. <sup>7</sup> Ipak apakish arpesk. Sabaishi arpesk shape agundok iri shap aria shakop enenyenen amaen aria apak memnek debeiri eriger. Aria apakiruh aparuh madae yoweruh uwe, uwok. Apak memnek um agundok ipak pasuhw Iruhin ananin baraen dodog pagipeshen um aria apak douk meyotu dodogowip atup. <sup>8</sup> Apak manadudareh um maresh? Ipak pape dodogowip um

Debeini aria pasuhw ananin baraen dodog pagipeshen.

<sup>9</sup> Aria Iruhin nenekap manadudareh abom um ipak aria apa menek tenkyuman. Aria agundok apak menek tenkyuman um douk debegun abom. <sup>10</sup> Aria nyumneh weibus apak biom atun urkwip por abom um ipak aria menek beten marig Iruhin um apak munaku nutrip anah shopunek. Aria ta ipak pusuhw Iruhin ananin baraen pugipeshen um, enyen douk wosik. Uwok um, apak makri munaku mutaurumep um pusuwen dodog pugipeshen.

*Pol Nenek Beten Narig Iruhin Um Anan Nunak Nutik Eshesh Tesalonaika*

<sup>11</sup> Eik yakri apakini Yain Iruhin nini Debeini Jisas hutaaurumap aria hunekumap anah yah um munaku nutrip. <sup>12</sup> Aria yakri apakin Debeini nutaurumep aria ipak urkwip panawasham ipak abom atin atin aria punataurum um pishagrakuk abom riguk parik pape peneken um. Aria ipak urkwip panawasham ihishmorim kupaishi arpesk shopunek putaurumesh kabi douk ahudok nyumnah apak biom atun urkwip panawasham abom ipak mataurumep um. <sup>13</sup> Aria shopunek yakri apakin Debeini nutaurumep nunekep dodogowip numun ipakiruh aparuh aria piyotu dodog. Anan nunekep namudok um hahudok nyumnah apakin Debeini Jisas nini ihishmorim ananish arpesk shunaki ahi, Iruhin apakini Yain ta nutrip aria nukri ipak baraen madae enen nyu-penyep uwe aria pape ananip atip.

## 4

*Apak Ta Mugipesh Iruhin Ananim Urkum Um Munekan Nunadudareh*

<sup>1</sup> Ipak Kristen ta punnek enyudok eikin nyatuh iri baraen! Um maresh? Apak douk morao Debeini ananit nokwat aria makripep. Eikin baraen douk enyudok. Riguk apak manakumogu ipak aria menek skulumep um ihishmorim yopihi aih um pugipeshah aria punek Iruhin nunadudareh. Aria douk ehudok aih ipak douk pape penekeh. Douk namudok aria apak dodogowip-umeh abom um



punekeh wosik pishagrakuk riguk parik pape penekesh um. <sup>2</sup> Ipak douk mare urkwip pukepukuk um Debeini Jisas ananin baraden douk apak biom atun makripepen iri uwe, uwok. Apak douk anan nakop big um mukripepen ananin baraden aria apak douk makripepen.

<sup>3</sup> Iruhin ananin urkum douk namudok. Anan nakri ipak ta pupe ananip atip aria pukutukuk abom ehudok aih um shenek wehrur um. <sup>4-5</sup> Aria shopunek nakri ipak armam ta pusuhw merik um ipak kanak um mishish mare shikitak puni kupaiwari armago penek wehrur umbaugenyumdouk amam haiden douk madae hudukemesh um Iruhin iri uwe hape heneken um, uwok. Ipak ta pupe Iruhin ananip atip aria punek yopinyi atin. <sup>6</sup> Aria shopunek, nakri ipak armam mare punek eshudok yoweishi inahos um kupaimi Kristen um punatrum amamiyu armago um, uwok. Douk riguk apak makripepen dodogowip atup um ehudokmori aih. Um maresh? Apakin Debeini ta nuwanamam eshudokmori yoweishi inahos amam henekesh iri. <sup>7</sup> Aria Iruhin douk madae nuhwarap um munek wehrur uwe, uwok. Anan nahwarap um mupe wosik abom aria mupe ananip atup. <sup>8</sup> Namudok aria shashudok arpeshe douk shukri uwok um shumnek enyudok baraden iri douk madae shukop agabus apak arpeshe atup uwe, uwok. Eshesh douk shakon agabus Iruhin douk nakop ananin Mishin iri shopunek.

*Apak Ta Urkwip Punawasham Kupaishi Aria Munek Yopihi Aih Shopunek*

<sup>9</sup> Eik douk mour woke um ikripepen enen baraden um ipak urkwip punawasham kupaishi Kristen aria punataurum um. Um maresh? Iruhin douk nenek skulumep jurug aria ipak penekesh wosik ehudok aih. <sup>10</sup> Aria ipak urkwip douk panawasham ihishmorim kupaishi Kristen douk shape ihigunum um shokugi nahobig Masedonia iri. Aria ipak Kristen! Apak makri mukripepen dodogowinyi baraden um ipak urkwip punawasham

baugenyum <sup>4:4-5</sup> um enyudok baraden douk biyen. Enen nyetem lain 4-5, aria enen nyakri ipak armam puni ipakiyu armago punaraum iri ta pugipesh yopihi atih aih.

eshudok arpeshe aria putaurumesh pishagrakuk riguk parik pape penekesh um. <sup>11</sup> Aria shopunek, ipak mishish ta shikitak um pupe wosik abom aria mare piyagwreh sabainyi baraden um puni kupaishi piyagwreh debeg punitok uwe, uwok. Ipak ta punek urkum um ipak kanak aria punek mour um puparug ipakibor utabor buni worigun ipak pugnoh iri kabi douk riguk apak makripepen um. <sup>12</sup> Ipak ta punekesh namudok um kupaishi arpeshe douk madae shugipesh Kraisi iri uwe shutrip aria shukri ipak douk yopipari. Aria shopunek um mare puhwar kupaishi um shubiromep, uwok.

*Apakin Debeini Jisas Ta Wata Nutanamori*

<sup>13</sup> O ipak apakish arpeshe! Apak biom atun makri mukripepen enen adurin baraden um eshudok shagok iri arpeshe. Eshudok arpeshe douk madae shudukemesh um Iruhin iri uwe douk madae shudukemesh um agundok shagok iri shanak shapeum uwe. Douk namudok aria eshesh urkwip yowep aria shereh shanakwukri shanaruwor. Douk namudok aria apak makri ipak mare pureh kabi eshesh shereh um, uwok. <sup>14</sup> Um maresh? Apak munek bilip makri Jisas nagok sharuman aria anan wata nakitak nape. Douk namudok aria apak munek bilip makri ahudok nyumnah Jisas nutanamori ahi, Iruhin ta nuhur shagok iri douk riguk shenek bilip um anan iri shukitak shini Jisas shunaki. <sup>15</sup> Aria enyudok baraden apakin Debeini nakripapen iri douk enyudok ta mukripepen. Baraden enyudok. Kweipon hahudok nyumnah anan nutanamori ahi, eshudok douk wata shupe agundok atup iri ta mare shurik shunak aria shagok iri shugiguk shunak, uwok. <sup>16</sup> Eshudok douk shape agundok atup iri ta shumnek Debeini nuhwar debeg. Aria enselahnah esheshin debeinyi ensel ta nyuhwar debeg aria Iruhin ananin oruhw ta hwiagwreh. Aria apakin Debeini Jisas ta nukutukuk iruhw heven nunaki. Aria eshudok arpeshe douk shenek bilip aria

shatukur Krai iri douk riguk shagok iri ta shurik shukitak shupe. <sup>17</sup> Aria hahudok nyumnah apak douk munek bilip aria wata mape iri, Iruhin ta nurap muni eshudok shagok iri munak ahudok atuh. Apak ta munak mutik apakin Debeini gani iruhw utag aria muni anan mupe ihih nyumneh. <sup>18</sup> Douk namudok aria ipak ta punataurum um punakripam enyudok baraen um puhur ipak atin atin ipakiruh aparuh um piyotu dodogowip.

## 5

### *Apak Ta Mupe Mutrugun um Apakini Debeini Nutanamori um*

<sup>1</sup> O ipak apakish arpes! Apak biom atun mour wokap um mukriep um meihi nyumnah ta enyudok nyutogur um, uwok. <sup>2</sup> Um maresh? Ipak padukemesh, ahudok nyumnah apakin Debeini nutanamori nunek skelimum arpes ahi, anan ta nunaki kabi douk nakwuaruh iri nanaki orokohunib um wab um. <sup>3</sup> Abudok nyutob arpes ta shukri, "Douk apak mape yopuhi nyumnah aria mape wosik." Aria ahudok nyumnah ta hutogur ahudok atuh kabi armatok kwomnek eriger um kubuki batowin um. Aria eshesh ta mare shuruwok, uwok. Eshesh ta shurao debeiri eriger aria shupe yowesh abom.

<sup>4</sup> Aria ipak Kristen douk madae pupe kabi eshesh shape arukwutigun iri shape shenek urkum um uwe. Douk namudok aria ahudok nyumnah ta hutogrumesh ahudok atuh kabi douk nakwuaruh iri nanaki um. Aria eshesh shikitak yowiyokuk. Aria ipak ta uwok. <sup>5</sup> Ipak ihishmorim pani apak douk Iruhin ananish batowish douk mape bogaragunumori. Apak douk madae mupe kabi eshudok douk shape arukwutigun iri shapeum um uwe, uwok. Aria apak madae munek yoweishi inahos kabi eshesh shape arukwutigun iri shenekesh um uwe. <sup>6</sup> Douk namudok aria apak ta mare mupe kabi douk sheshuh iri sheshuh um, uwok. Sheshuh iri madae shudukemesh uwe, eshesh shakri uwok um shumnek Iruhin ananin baraen aria shenek yoweishi inahos. Aria apak mare munek yoweishi inahos kabi eshesh um,

uwok. Apak ta mupe musuhw merik um apak kanak aria munek urkum um yopinyi atin aria muneken. <sup>7</sup> Um maresh? Weibus obi nyutob, sheshuh iri arpes sheshuh. Aria shawok abar iri shawok abar aria shagugak. <sup>8</sup> Aria apak uwok. Apak douk mape bogaragun iri. Douk namudok aria apak ta musuhw merik um apak kanak aria musuhw Iruhin ananin baraen dodog mugipeshen aria apak urkwip punawasham kupaishi. Aria ta munekesh namudok um, apak ta mupe kabi anan nasuhw aidap nanabeshuk ananishw yegenyihw iri nape wosik abudok nyutob nunek wanohw um. Aria apak ta mudukemesh abom um Iruhin ta nunarap mutanamori mupe wosik. Aria apak mudukemesh um enyudok um, apak ta mupe wosik kabi anan nowem um ainit hat iri nape wosik abudok nyutob anan nunek wanohw um. <sup>9</sup> Iruhin douk madae nugraehap um nuwanamap apakish yoweishi inahos uwe, uwok. Anan douk nagraehap um apakin Debeini Jisas Krai nunarap mutanamori mupe wosik atin. <sup>10</sup> Anan douk nagok um nurao apak ihishmorim munak muni anan mupe wosik atin. Aria ta apak mugok o wata mupe um, anan ta wata nunarap. <sup>11</sup> Douk namudok aria ipak ta piyagwreh punakrip um yopinyi atin baraen um punataurum um piyotu dodogowip kabi douk ipak pape peneken um. <sup>12-13</sup> O ipak apakish arpes, apak makri ipak pumnek enyudok apakin baraen pugipeshen. Baraen enyudok. Ipak ta pupe shakamum ipakim debeimi douk henek debeinyi mour um hataurumep hakriep Iruhin ananin baraen iri. Amam douk Iruhin nagraehap um hataurumep aria hunabreshap um punek yopihi atih aih. Amam douk hataurumep wosik. Douk namudok aria ipak ta putuk amamish nyeiguhw shuto iruhw aria ipak urkwip punawashamam aria putaurumam. Aria ipak ta piyagwreh atin baraen aria punagabe um pupe atugun.

<sup>14</sup> Ipak apakish arpes! Apak biom atun makri mukriep enen baraen shopunek um pumneken aria pugipeshen. Baraen enyudok. Ipak enesh douk

shape meyo, madae shunek mour atin uwe. Douk namudok aria ipak pukrip eshudokmori arpes, um mare shupe meyo, uwok. Aria shopunek, ipak enesh douk shanogugur. Douk namudok aria ipak pukripesh yopinyi baraan um pugabe esheshiruh aparuh um eshesh mare shunogugur. Aria shopunek, ipak enesh douk madae dodogowish uwe. Douk namudok aria ipak ta putaurumesh um shutogur dodogowish. Aria putaurum ihishmorim arpes, aria mare juwehosip pukripesh debeg, uwok. Ipak ta pupe samokwiyaisi arpes, aria pukripesh shokubur. <sup>15</sup> Aria ta enesh arpes, shunek yoweishi inahos um ipak um, ipak mare wata pinyanam-umesh, uwok. Ihi nyumneh ipak ta pukwiraeh um punek yopinyi atin um ipak atin atin puni ihishmorim arpes, shopunek putaurumesh. <sup>16-17</sup> Aria ipak ta pupe um punadudareh namudok atin aria pupe punek beten nyumnah wab. <sup>18</sup> Aria ipak ta punek tenkyu um Iruhin um eneyenen nyutogrumep iri. Um maresh? Anan douk nakri ipak patukur Jisas Krai iri ta pupe um punek tenkyuman namudok atin. <sup>19</sup> Iruhin ananin Mishin douk nyenek sabaihi yopihi atih aih iri mour. Douk namudok aria ipak mare putapok enyenyih yah um nyunek enyenyin mour um, uwok. <sup>20</sup> Aria enyen douk nyohur enesh arpes, aria shakripep Iruhin ananin baraan. Douk namudok aria ipak mare pukenyuk agabus enyudok baraan, uwok. <sup>21</sup> Aria ipak ta punek skelimum ihinyumorim baraan nyuni aih aria pudukemesh um enyen douk yopinyi o yoweinyi. Aria yopinyi um, ipak ta pusuwen dodog. O ta yoweinyi um, ipak ta pukutinyukuk. <sup>22</sup> Aria pukutukuk ihimori yoweih aih.

<sup>23</sup> Aria eik yakri Iruhin douk baugos um apakiruh aparuh hur wosik um nunekep pupe ananip atip abom um punek ihimori yopihi atih aih. Aria shopunek, yakri nutaurumep aria mare enesh yoweishi inahos shupenyep ipakiruh yegeshiweruh huni ipakish mishish shuni ipakiruh aparuh ahudok yopuhi nyumnah apakin Debeini Jisas

Krais nutanamori ahi aria pupe wosik atin. <sup>24</sup> Aria Iruhin douk nahwarep um pugipesh ananin baraan aria apa nagipeshen wosik ihinyumorim baraan anan nakriyen iri. Namudok aria anan ta nutaurumep pupe wosik arigaha ahudok yopuhi nyumnah Debeini Jisas nutanamori ahi.

<sup>25</sup> O ipak apakish arpes! Ipak ta punek beten porik Iruhin um nyutaurumap. <sup>26</sup> Aria ipak ihimorim ta urkwip punawasham ipak atin atin aria punapuprikum. <sup>27</sup> Aria eik Pol douk apakini Debeini neke debeinyi big. Douk namudok aria eik yakri ikripep um putarih enyudok baraan nyetem apudok shup iri um ihishmorim Kristen shape ganudok iri shumneken. <sup>28</sup> Aria eik yakri apakin Debeini Jisas Krai nutaurumep meyo, aria nunekep pupe wosik.

## Pagiguk Iri Shup Douk Pol Nenekap Panam Eshesh Tesalonaika Iri

*Banenyi Baraen Pol Nagiguk Nenekan  
Nyanak Um Eshesh Tesalonaika Iri*

1:1-2 Pol nakripesh yopinyi baraen um Iruhin nini Jisas Kraiss hutaurum eshesh Tesalonaika

1:3-12 Pol nenek tenkyu um Iruhin um eshesh aria nenek betenumes

2:1-17 Arman ta nukenyuk agab Iruhin ananin baraen iri ta nunaki

3:1-15 Eshesh Kristen mare shupe meyoh, uwok. Eshesh ta shunek mour um shutaurum eshesh kanak shuni kupaishi shopunek

3:16-18 Nyatuh iri baraen

<sup>1</sup> Eik Pol yani Sailas aria Timoti mape agundok aria eik Pol yenyem apudok apakip shup panakumogu ipak Iruhin ananish arpes pape Tesalonaika iri. Apak menekapumagu ipak douk patukur apakin Yain Iruhin nani Debeini Jisas Kraiss iri. <sup>2</sup> Apak makri apakin Yain Iruhin nini Debeini Jisas Kraiss hutaurumep meyoh aria ipakiruh aparuh hur wosik.

*Pol Nenek Tenkyu Um Iruhin Um Eshesh Tesalonaika Sheyotu Dodog Shosah Eneyenen Amaen Um*

<sup>3</sup> O ipak apakish arpes, riguk ipak pasuhw Iruhin ananin baraen atin. Aria douk, ipak pasuhwen dodog abom pagipeshen peshagrakuk riguk parik pagipeshen um. Aria riguk ipakiruh aparuh hanawasham ipak atin atin um. Aria douk ipak peshagrakuk riguk parik pape peneken um. Douk namudok aria ihih nyumneh apak ta urkwip purum ipak aria munek tenkyu um Iruhin. Aria enyen douk wosik um apak menekesh namudok um. <sup>4</sup> Aria ipak douk penekesh namudok aria apak manak sabaigunum mani sabaishi Iruhin ananish arpes mapeum, apak apa makripesh um ipak aria matuk ipakishi nyeiguhw shato iruhw. Apak apa makripesh um sabaihi

eneheneh yoweih aih douk ipakish horik horin shenekeh um ipak iri shani sabainyi amaen douk nyatogrumep nyenekep pemnek debeiri eriger iri. Aria apak makri ipak apa pasuhw Iruhin ananin baraen dodog pagipeshen aria peyotu dodogowip pasah ihinyumorim amaen douk nyatogrumep iri.

*Iruhin Ta Nugipesh Yopihi Atih Aih Aria Nunek Skelimum Apak Arpes*

<sup>5</sup> Aria enyudok douk nyatogur um ipak iri douk nyeyabigap um Iruhin apa nenek yopihi atih aih aria nenek skelimum ipakih aih. Aria ipak douk pemnek debeiri eriger. Um maresh, ipak pakri puwish agundok Iruhin nape Debeini um ananish arpes shupe um. Aria anan ta nunekep wosik abom um puwish ganudok. <sup>6</sup> Aria Iruhin ta nunek yopihi atih aih namudok. Anan ta nunek skelimum eshudok arpes douk apa shenek yoweishi inahos um ipak iri aria nukri eshesh shenek yoweishi inahos. Aria anan ta wata nunyanam-umesh nunekesh shumnek debeiri eriger. <sup>7</sup> Aria anan ta nukweshihap um enyudok amaen aria ta wata pupe um uhwin. Aria apak shopunek, anan ta nunekesh-umap namudok atin. Iruhin ta nunekumap enyudok hahudok nyumnah Debeini Jisas nini ananish dodogowishi enselahos shukutuk iruhw heven shutogur yopugunum ahi. Aria anan ta shutrun nutrugun abom aria nunaki kabi douk debeih nyih hatrugun aria bogaragun abom ba nanaki um. <sup>8</sup> Aria hahudok nyumnah anan ta nunaki aria nubo eshudok arpes douk madae shudukemesh um Iruhin iri uwe shuni eshudok douk madae shugipesh apakin Debeini Jisas ananin yopinyi baraen iri uwe. <sup>9</sup> Anan ta nesh debeg. Aria anan ta nukri wokumesh aria eshesh ta mare shunak shupe anan napeum aria shutik agundok anan natrugun abom um, uwok. Eshesh ta shunak shupe kupaigunum aria shupe shumnek debeiri eriger aria shupe yowesh abom ihih nyumneh. <sup>10</sup> Aria hahudok nyumnah sabaishi ta shutuk ananin nyeigur nyuto iruhw. Aria apak ihipmorim ananish yopishi arpes abom

douk magipesh ananin baraen iri ta mutuk ananin nyeigur nyuto iruhw aria mukri anan douk yopuyopuni Debeini aria munadudareh-uman. Aria ipak shopunek ta putrun aria putuk ananin nyeigur nyuto iruhw. Um maresh? Riguk apak manaku makripep ananin baraen aria ipak pasuhwen pagipeshen.

<sup>11</sup> Douk namudok aria ihih nyumneh apak munek beten um apakin Iruhin um nutaurumep. Apak munek beten makri anan douk seiwok nahwarep aria nenekep penek yopihi atih aih anan nahwarep um punekeh iri. Aria anan nutaurumep nenekep dodogowip um punek ihihmorim yopihi aih ipak mishish shakitakumeh iri. Aria um pusuhw ananin baraen dodog pugipeshen. Namudok aria apak marigan um nupuhur um punek ihinyumorim yopinyi mour iri aih.

<sup>12</sup> Apak menek betenumep um makri apakin Iruhin nini Debeini Jisas Kraiss hutaaurumep meyoh hunekep dodogowip aria putuk Debeini Jisas ananin nyeigur nyuto iruhw. Aria Jisas shopunek nutuk ipakish nyeiguhw shuto iruhw.

## 2

### *Anan Arman Douk Ta Nununu Iruhin Ananin Baraen Nyubuhuk Iri Ta Nutogur*

<sup>1-2</sup> Ipak apakish arpes! Eik yakri ikripep enen baraen um hahudok nyumnah apakin Debeini Jisas Kraiss nutanamori aria apak munak muni anan mupe atugun ahi. Ipak pumnek! Aria enesh arpes douk shenek rohwumep shakri ahudok nyumnah apakin Debeini nunaki ahi douk hatogur jurug. Aria eik madae idukemesh uwe, meishi arpes shenek rohwumep shakripep namudok? Enesh shakripesh Iruhin ananin baraen iri shakripep, o enesh kupaishi shakripep? O enesh shenek rohwumep shakripep shakri apak menyemagu anap shup panakumogu ipak? Ipak mare pikitak yowiyokuk aria aparuh mare yoweruh, uwok. <sup>3</sup> Ipak mare pumnek esheshin baraen, uwok. Eshesh douk

shenek rohwumep. Ahudok nyumnah douk wata hutogur uwe. Sagomatin sabaishi arpes ta shurik shukri uwok um Iruhin ananin baraen shukutinyukuk. Aria shopunek anudok yoweinari arman douk ta nununu Iruhin ananin lo nyubuhuk iri ta nurik nutogur yopugunum ba iyoh. Anan ta nurik nunaki aria ahudok nyumnah ta hugiguk hutogur. Aria anan douk Iruhin nagraehan jurug um nunak nupe yoweiburi wabur hel.

<sup>4</sup> Aria anudok yoweinari anan ta nutuk ananin nyeigur nyuto iruhw aria nukri ihishmorim arpes ta shukutukuk Iruhin nini eneshenesh warehos shuni yoweishi sagabehos shuni warenab douk arpes shegremab bani rohwimi god omi shape shenek lotumesh iri aria shutuk ananin atin nyeigur nyuto iruhw. Aria anan ta nuwish Iruhin ananit debeiti urupat aria nupe nunek rohwumesh nukri anan atun abom douk Debeini Iruhin.

<sup>5</sup> Aria ipak ta urkwip pushukepok um enyudok ihinyumorim baraen douk abudok nyutob eik yanaku yani ipak mape aria yakripepen iri? Uwok. Ipak douk padukemen enyudok baraen douk nyakrium anudok douk ta nununu Iruhin ananin lo nyubuhuk iri. <sup>6</sup> Aria douk anudok arman douk wata nunaki uwe. Anan douk enen arpen<sup>2:6</sup> anan yah aria anan douk madae nunaki uwe. Aria ipak douk padukemen enyudok arpen. Aria ahudok yopuhi nyumnah Iruhin nakriyahi hutogur aria ahudok atuh anudok arman douk ta nununu Iruhin ananin baraen nyubuhuk iri ta nutogur yopugunum. <sup>7</sup> Aria douk ehudok aih um shakenyuk agabus Iruhin ananin lo um douk hatogur aria hanabeshuk hape. Ihih ta hunabeshuk hupe arigaha abudok nyutob shuwaruguk enyudok arpen nyutapok-uman yah iri. <sup>8</sup> Aria anudok yoweinari douk ta nununu Iruhin ananin baraen nyubuhuk iri ta nutogur yopugunum. Aria Debeini Jisas ta nutogur yopugunum aria ta sabaishi arpes shutrun nutrugun abom aria nunaki. Aria anan ta nuhaprish anudok yoweinari arman um

<sup>2:6</sup> <sup>2:6</sup> Enesh shadukemesh iri arpes shakri enyudok arpen nyatapok-uman yah anudok arman iri douk Iruhin ananin Mishin. Aria enesh shakri enen Iruhin ananin ensel

ananip yap atup aria non nugok. Aria agundok Jisas natrugun abom um ta non nugok abom. <sup>9</sup> Aria Satan ta natauruman nunekan dodogowin aria nunaki nupe nunek rohwa um sabaishi arpes. Anan ta nunek sabainyi Iruhin atun neneken iri mour um arpes shutrin aria shikitak yowiyokuk shukri adur anan douk Iruhin natauruman aria douk neneken. <sup>10</sup> Anan ta nunek eneshenesh yoweishi inahos nunek rohwa um eshudok arpes douk shape shagim ahudok yah um shugok shunak shuwishuk iri. Eshesh ta shutik anudok douk ta nununu Iruhin ananin baraan nyubuhuk nyuni ananin mour aria shusuhw ananin baraan. Aria eshesh ta shugok. Um maresh? Eshesh shakri uwok um shusuhw Iruhin ananin adurin atinyi baraan aria anan wata nuraesh shutanamori shupe wosik uwe. <sup>11</sup> Douk namudok aria Iruhin ta nuhur esheshiruh aparuh um shusuhw anudok douk ta nununu Iruhin ananin baraan nyubuhuk iri ananin rohwinyi baraan shugipeshen. <sup>12</sup> Aria Iruhin ta nunekumesh debeiti kwot eshesh ihishmorim aria ta nesh nuwanumesh eneshenesh yoweishi inahos eshesh shenekesh iri. Um maresh? Eshesh douk madae shusuhw adurin baraan shugipeshen uwe, uwok. Eshesh shanadudareh um shunek eneshenesh yoweishi inahos.

### *Iruhin Douk Seiwok Nagraehep Um Nuraep Pupe Wosik Abom*

<sup>13</sup> Ipak apakish arpes, apakin Debeini douk urkum manawashamep abom. Douk seiwok baugos um Iruhin nagraehep um nuraep putanamori pupe wosik. Aria ananin Mishin nyawishep aria nyaraep um pupe ananip atip. Aria ipak pasuhw ananin adurin baraan pagipeshen. Douk namudok aria ihih nyumneh apak ta munek betenumep aria munek tenkyu um Iruhin um ipak. <sup>14</sup> Anan douk nahwarep aria nakrip apak manaku makripep ananin yopinyi baraan. Anan nahwarep um puni apakin Debeini Jisas Krai pupe wosik aria puni anan purao agundok anan natrugun abom um nini ananin debeinyi nyeigur. Aria ipak shopunek ta pupe kabi anan um. <sup>15</sup> Douk namudok aria

ipak apakish arpes! Ipak ta piyotu dodogowip aria pusuwen dodog enyudok yopinyi baraan douk riguk apak menek skulumep makripepen iri nyuni nyanyudok douk apa menyemagu shus iri.

<sup>16-17</sup> Aria apak makri apakin Debeini Jisas Krai anan kanak nini Yain Iruhin hutauremep. Anan douk urkum manawashamep natauremap meyoh aria nenekap apakiruh aparuh hur wosik ihih nyumneh. Aria mape urkwip porum agundok douk madukemesh abom um kweipon anan ta nunaraep punak pupe wosik um. Aria apak makri Jisas Krai nini Iruhin hunek ipakiruh aparuh hur wosik. Aria hunekep dodogowip um punek eneheneh yopihi atih aih huni mour. Aria shopunek um piyagwreh yopinyi atin baraan.

## 3

### *Ipak Punek Beten Um Iruhin Nutaurum Apak*

<sup>1</sup> O ipak apakish arpes! Eik yakri ikripep enen nyagiguk iri baraan. Baraan enyudok. Ipak punek beten um apak um apakin Debeini ananin yopinyi baraan nyurahaen nyunak arigaha sabaigunum. Aria nyunek yopinyi mour numun sabaishi arpes esheshiruh aparuh aria nyurao debeinyi nyeigur kabi douk enyen nyaraen ganudok orokohun um ipak um. <sup>2</sup> Aria shopunek punek betenumap um amudok henek yoweishi inahos atish iri huni mamudok douk hakri uwok um apak munek Iruhin ananin mour iri mare hunek enesh yoweishi inahos um apak. Um maresh? Madae ihishmorim arpes shusuhw Iruhin ananin baraan shugipeshen uwe, uwok. <sup>3</sup> Aria apakin Debeini apa nagipeshen wosik ihinyumorim ananin baraan. Douk namudok aria anan ta nurokarubep um yoweini arman aria nunekep piyotu dodogowip. <sup>4</sup> Aria apak douk matukur Debeini aria madukemesh abom um ipak douk pape penek ihishmorim aih apak makripep um punekeh iri. Aria ipak ta pupe um punekeh namudok atin. <sup>5</sup> Aria apak makri Debeini nutaurumep aria ipakip

urkwip purum enyudok baraan. Baraan enyudok. Ipak ta urkwip punawasham Iruhin. Aria shopunek, ipak urkwip purum agundok ta Krai nutaaurumep aria piyotu dodogowip abom abudok nyutob kwiraeh nyukri nyutogrumpem um.

*Ipak Ihishmorim Ta PuneK Mour*

<sup>6</sup> O ipak apakish arpes! Apak douk Debeini Jisas Krai nakop big um munek ananin mour. Douk namudok aria apak makriep dodogowinyi baraan um pugipeshen. Baraan enyudok. Aria ipak enesh shasuhw Krai ananin baraan aria eshesh shape meyoh madae shunek mour iri uwe, ipak mare puni eshesh ponoprom, uwok. Eshesh douk madae shugipesh enyudok baraan riguk apak makriepen iri uwe. <sup>7-8</sup> Ipak kanak douk padukemesh um agundok riguk apak manaku mani ipak mape um. Apak madae mupe meyoh uwe, uwok. Apak munek mour nyumnah wab aria madae muraao ipakigun worigun meyoh uwe, uwok. Apak matorish aria ipak douk pakapesh. Aria apak munek debeinyi mour nyumneh weibus um makri uwok um mukep amaen um pukop worigun iri utabor, uwok. Douk namudok aria ipak ta pugipesh apakih aih um punek mour dodogowip atip. <sup>9</sup> Aria enyen douk wosik um apak mukriep um pukop utabor iri worigun um. Aria apak makri uwok. Apak makri munek mour dodogowip atop nyumnah wab um miyabigep um pugipesh apak punek mour namudok atin. <sup>10</sup> Riguk abudok nyutob apak manaku mani ipak mape um, apak makriep um eshudok arpes douk shakri uwok um shunek mour iri. Apak makri ipak mare pukesh anagun worigun shugnoh, uwok.

<sup>11</sup> Aria apak douk memnek um orokohun um ipak, enesh arpes shape meyoh madae shunek mour uwe. Aria eshesh shape shanumogesh kupaishi eshesh atubur waburish. <sup>12</sup> Aria apak douk apakin Debeini Jisas Krai nakop big um munek ananin mour. Douk namudok aria apak makriep dodogowinyi baraan eshudok arpes um shugipeshen. Apak makri uwok um shurahaen aria

shupe shiyagwreh enyudokmori baraan, uwok. Apak makri shupe wosik shunenek esheshin mour um shunou esheshigun worigun. <sup>13</sup> Aria ipak apakish arpes mare arigeh hep um punek yopihi aih iri mour um, uwok.

<sup>14</sup> Aria eshudok arpes douk shukri uwok um shugipesh enyudok apakin baraan nyetem apudok shup iri, eshudok ipak pudukemesh um nyeiguhwish um aria mare puni eshesh punoprom, uwok. Ipak punekesh namudok aria eshesh ta abraen nyesh aria wata shumnek yopinyi baraan shugipeshen. <sup>15</sup> Aria ipak mare pukri eshesh douk ipakish horik horin, uwok. Ipak ta urkwip pukri eshesh douk ipakish ashukenyish owashish aria pukriepesh shokubur um shumnek yopinyi baraan shugipeshen.

*Nyagikuk Iri Baraan*

<sup>16</sup> Debeini anan douk baugos um apak aparuh hur wosik um. Aria apak makri anan kanak nunek ipakiruh aparuh hur wosik ihih nyumneh. Aria punak meiguni um aria maren mugu nyutogrumpem um, ipak ta mare punogugur, uwok. Aria shopunek makri Debeini nini ipak ihishmorim nupe.

<sup>17</sup> Aria eik Pol eik kanak yowem um enyudok baraan eikis wis. Eik yakri yopuhi nyumnah um ipak ihipmorim. Eik kanak apa yowem um eikin nyeigur ihishmorim eikis shus namudok um inek eikin kak um putrin pukri adur asas douk eikis shus.

<sup>18</sup> Aria eik yakri apakin Debeini Jisas Krai nutaaurumep meyoh ipak ihishmorim.

## Parik Iri Shup Douk Pol Nenekap Panam Timoti Iri

*Banenyi Baraen Um Enyudok Baraen Pol Narik Nenekan Nyanak Um Timoti Iri*

1:1-2 Pol nakri Iruhin nini Jisas Krai hutaurum Timoti.

1:3-20 Pol nakrip Timoti um niyotu dodogowin aria mare numnek amam henek rohwmesh iri. Amam douk dodogowim atum hakripesh um shugipesh seiwokih aih.

2:1-15 Yopihi aih eshesh Kristen ta shunek um agundok shunek lotu um

3:16 Debeimi um Iruhin ananish arpes iri hani amudok hataurumam iri hunekeh iri aih

4:1—6:21 Pol nakrip Timoti um sabaihi yopihi aih anan nenekeh um nutaurum eshesh ihishmorim Kristen um

1-2 O Timoti, eik Pol yenek apudok shup panakumagu nyak. Nyak douk nyatogur kabi eikin nunganin um. Nyak douk nyasuhw enyudok eik yenek skulumen-umen iri Iruhin ananin baraen nyagipeshen aria yohwaren nunganin. Eik douk anudok Iruhin douk narap matanamori mape wosik abom iri nani Krai Jisas hagraehe. Amam hagraehe aria hakripe dodogowinyi baraen um itogur Krai Jisas ananin aposel aria yakripesh ananin yopinyi baraen. Aria anan douk baugos abom um apak madukemesh um anan ta wata nunaki nurap iri. Eik yakri apakin Yain Iruhin nini apakin Debeini aria Krai Jisas hunek gihaumen aria hutaurumen meyoh. Aria shopunek, yakri amam hunek nyakihw apahw hwur wosik.

*Timoti Ta Nubo Madae Adurinyi Uwe Baraen Nyubuhuk*

<sup>3</sup> Nubokuhi eik yakri ikutinyukuk inak agudok shokugi nahobig Masedonia um, eik yakripeny-umaguk um nyupe Efesus. Aria douk yakri ikripen shopunek um nyupe abom Efesus aria nyukrip amudok armam dodogowinyi baraen um

amam mare wata hunek skulumesh um enen rohwinyi baraen shopunek, uwok. Amam ta hukripesh Iruhin ananin baraen atin. <sup>4</sup> Nyak nyukripam dodogowinyi baraen nyukri, “Ipak mare pukripesh enyudok rohwin sakihasin baraen, uwok. Aria mare pukripesh enyudok seiwokin baraen um seiwokish nyeiguhw douk arpes shanahwar um. Ipak piyagwreh enyudokmori baraen um, ipak ta pupe um punitok atin aria ta mare pugipesh Iruhin ananim urkum, uwok. Enyen douk um apakin bilip atin, Iruhin neyabigap ananim urkum.” <sup>5</sup> Aria baugenyum baraen um nyukripesh enyudok Iruhin ananin baraen um, nyak douk nyukripesh um nyishuhur shugipesh ehudok aih um urkwip punawasham Iruhin nini kupaishi arpes um. Ehudok aih douk hakitaki yopuruhi aparuh hani yopipi urkwip pani adurinyi bilip um Jisas iri. <sup>6</sup> Aria anam amudok armam douk hakutukuk ehudok yopihi aih aria hape heyagwreh wehinyi baraen kabi douk shagagak iri sheyagwrehen iri. <sup>7</sup> Amam hakri hutogur tisa omi um hunek skulumesh um Iruhin ananin lo. Aria hakri, “Apak madukemesh aria douk munek skulumep.” Amam douk hakri namudok aria amam madae hudukemesh um Iruhin ananin lo uwe. Aria shopunek amam madae hudukemesh um baugenyum um amamin baraen shopunek uwe, uwok.

<sup>8</sup> Apak madukemesh um ta apak mukwu lo nyunek enyudok mour douk Iruhin nakri um enyen nyuneken iri um, lo enyen douk yopinyi. <sup>9-10</sup> Aria apak madukemesh um enyudok lo Iruhin douk madae nuneken nukriyen um yopishi arpes uwe, uwok. Anan nenekeh um eshudok douk shenek yoweishi inahos iri um shukutishukuk aria shupe wosik. Iruhin nenek enyudok lo um eshudok douk shakri uwok um ananin lo shakenyuk agabus iri, shani eshudok douk madae shumnek baraen iri uwe, shani eshudok douk shakri uwok um ananin baraen aria shenek ihishumori yoweishi inahos iri. Eshesh shani eshudok douk shakri uwok um shunek lotu um Iruhin aria shenek yoweishi inahos iri, shani eshudok douk shabo esheshish amak-



enyish shagok iri. Eshesh shani eshudok douk shabo kupaishi arpeshe shagok iri, shani eshudok douk shenek wehrur iri, shani amudok douk henek wehrur hani kupaimi armam iri. Anan neneken um eshudok douk shakwumesh aruh kupaishi arpeshe sharaesh shanak um kupaishi shutorish iri, shani eshudok douk shenek rohwumesh iri. Eshesh shani eshudok douk shenek kwot obi nyutob eshesh shenek rohwumesh um baraen um kwot. Aria anan neneken um ihishmorim arpeshe shopunek douk shakri uwok um Iruhin ananin adurin atinyi baraen shakenyuk agabus aria shenek eneshenesh yoweishi inahos iri. <sup>11</sup> Enyudok baraen douk nyagipesh ananin yopinyi baraen douk anan nagraehe um inak ikripeshen. Enyen douk nyeyabigap um Iruhin douk yopuyopuni dodogowini abom nyeigur nyato iruh-uman iri.

*Pol Nenek Tenkyu Um Jisas Um Iruhin Nenek Gihauman Natauruman Meyoh Um*

<sup>12</sup> Eik yenek tenkyu um apakin Debeini Krai Jisas. Seiwok anan nataurume aria neneke dodogoiwe um yenek ananin mour. Anan douk nakri eik wosik apa yenek ananin mour wosik abom aria anan douk nakripe yeneken. <sup>13</sup> Aria seiwok sagomatin eik wata imnek Jisas ananin baraen um uwe, eik yabubunim ananin nyeigur aria yakri uwok um anan. Aria yakri uwok um ananish arpeshe douk shasuhw ananin baraen iri aria yasuwesh yoweshikesh yenekesh shemnek debeiri eriger. Aria abudok nyutob eik yenekesh namudok um, eik madae idukemesh ikri eik yenek yoweishi inahos uwe, uwok. Eik madae isuhw ananin baraen igipeshen uwe. Namudok aria Iruhin nakri gihaum eik aria madae nuwaname yoweishi inahos eik yape yenekesh iri uwe, uwok. <sup>14</sup> Aria apakin Debeini Krai Jisas nataurume meyoh abom nogabeye yatukur anan aria yape wosik. Namudok aria eik yasuhw ananin baraen dodog yagipeshen. Aria shopunek, eik urkum manawasham kupaishi arpeshe aria yataurumesh.

<sup>15</sup> Enyudok baraen douk adurin atin abom. Douk namudok aria apak ihishmorim ta musuwen dodog mugipeshen. Baraen enyudok. Seiwok Krai Jisas nanaki agundok atap um nutaurum apak menek yoweishi inahos iri um nurap mutanamori mupe wosik abom. Aria kupaishi arpeshe shenek yoweishi inahos aria eik Pol douk yoweije iri abom yeshagrakuk eshesh um yenek yoweishi inahos um. <sup>16</sup> Douk namudok aria Krai Jisas nakri gihaume abom aria anan madae juwehosin um eik uwe. Anan nakri gihaume um kweipon ihishmorim shusuhw Iruhin ananin baraen shugipeshen iri shudukemesh shukri eik yoweije iri abom. Aria Krai Jisas narae aria nagabeye um eikish yoweishi inahos aria ta shunek urkum shukri, "Krai Jisas nakri gihauman anudok yoweini arman abom aria naran nagabeyan um yoweishi inahos anan nenekesh iri. Douk namudok aria adur atin anan ta nunarao apak shopunek mupe wosik abom ihih nyumneh." <sup>17</sup> Anan atun abom douk Iruhin. Apak madae mutrun apakis nabes uwe, aria anan ta mare nugok atin. Anan nape king ihih nyumneh. Aria eik yakri apak ihishmorim ta mukri anan douk Debeini aria munek lotuman mutuk ananin nyeigur nyuto iruhw ihih nyumneh. Enyudok baraen douk adurin atin.

*Pol Nakrip Timoti Um Nupe Dodogowin Nenek Iruhin Ananin Mour*

<sup>18</sup> Timoti, nyak douk nyenek Iruhin ananin mour aria eik douk yahwaren naganin. Riguk wata weroroinyi um, amam profet hakripesh um nyak ta nyunek Iruhin ananin mour wosik abom um. Aria eik yakri ikripen enyudok atin kabi seiwok amam hakri um. Aria nyak nyumneken aria nyusuwen nyugipeshen um nyupe dodogowin atin nyunek Iruhin ananin mour. Aria nyubo yoweishi inahos shubuhuk kabi anan soldia nenek mour ami iri neneken aria dodogowin atun um. <sup>19</sup> Nyak nyunek urkum um Iruhin ananin baraen douk nyasuwen aria gamo nyusuwen dodog nyugipeshen. Nyak ta urkum mur wosik aria mare

mur um nyukri nyak nyenek yoweishi inahos, uwok. Enesh arpesch douk shakri uwok um esheship urkwip pur wosik um. Eshesh urkwip porum yoweishi inahos aria shenekesh abom. Aria eshesh shakutukuk Iruhin ananin baraen aria shape kabi shagrukuk shabuh ogumigum youg um. <sup>20</sup> Anam um eshudok douk shagrukuk shabuh ogumigum youg iri douk amudok biom Himeneus iri Aleksander. Amam habubunim um Iruhin aria eik Pol yenekumamuk enyudok um yoweini Satan ananis wis. Eik yenekumam enyudok um hunak hur Satan ananis wis um nom aria nenekam hudukemesh um amam mare wata hububunim Iruhin atin um.

## 2

### *Apak Munek Beten Um*

<sup>1</sup> Harik iri aih apak ta munekeh iri douk ehudok. Eik yakri, “Ipak punek beten um Iruhin um. Aria ipak porigan um eshudok ipak eneshenesh wokepumesh iri, aria punek tenkyuman aria shopunek, porigan um nutaurum ihishmorim arpesch. <sup>2</sup> Aria porigan um nutaurum king-omi huni ihishmorim shape debeishi um gavman iri. Ipak punek beten um gavman namudok um apak mupe wosik, apakiruh aparuh hur wosik aria munek yopihi atih aih um munek enenyenen yopinyi Iruhin nakriyenyi. <sup>3-4</sup> Aria ipak punek beten namudok um, ipak ta punek Iruhin douk narap matanamori mape wosik atin aria anan nunadudareh. Aria anan shopunek douk nakri nurao ihishmorim arpesch shatanam shupe wosik aria shudukemesh um adurin atinyi baraen aria shusuhwen shugipeshen iri. <sup>5</sup> Aria apak madukemesh um douk atun abom meyoh Iruhin nape. Aria apak ihishmorim arpesch mape wobur aria anan nape wobur. Aria atun meyoh arman abom nape orokohun um apak aria nonukop manak hurukatin um Iruhin. Anan douk Krai Jisas. <sup>6</sup> Krai Jisas douk nakri wosik aria nagok um nator apak ihishmorim arpesch apakish yoweishi inahos. Aria nakweshihap um apakish yoweishi inahos douk showeshikap iri. Aria ahudok nyumnah Iruhin nakri ahi,

Jisas nagok um nukweshihap. Aria Iruhin neyabigap um mudukemesh mukri anan douk nakri nurao apak ihishmorim mutanamori mupe wosik. <sup>7</sup> Douk namudok aria Krai Jisas nagraehe um irao ananin yopinyi baraen inak ikrip arpesch. Aria shopunek, nagraehe yatogur aposel um inak inek skulum kupaishi arpesch douk madae shudukemesh um Iruhin iri uwe. Eik inek skulumesh um enyudok adurin baraen um Krai um shudukemesh aria shusuhwen dodog shugipeshen. Aria eik douk madae inek rohwmep uwe, uwok. Eik yakripep adurin atin.”

<sup>8</sup> Eik yakri armam hape ihirubmorim warub iri ta hunek beten. Amam mare juwehosim aria hunitok, uwok. Amam ta hunagabe um hupe atugun hunek yopihi atih aih aria hunek beten.

### *Armago Ta Umnek Enyudok Baraen Ugipeshen Abudok Nyutob Shunak Shupe Shunek Lotu Obi Nyutob*

<sup>9</sup> Aria eik yakri armago shopunek ta upe wosik unawashok yopihi rupeh douk wosik um owo iri aria bane banehi mare wosik um owo ta uhunug iri uwe, uwok. Aria shopunek, mare unaginohw baragos suni yegeshiweruh um eshudok yopishi atish eneshenesh douk shatorish debeibori utabor iri, uwok. <sup>10</sup> Aria ipak armago apa pakri ipak pasuhw Iruhin ananin baraen penek lotuman iri ta punek ihinyumori yopinyi mour douk armago apa wenek lotu um Iruhin iri weneken iri. <sup>11</sup> Aria punak pupe punek lotu obi nyutob, armago mare ukripesh Iruhin ananin baraen, uwok. Owo upe mokureg umnek Iruhin ananin baraen aria upe unek urukwipumen. <sup>12</sup> Eik Pol yakri uwok um ono armago upe debei-wori um armam aria unek skulumam um Iruhin ananin baraen, uwok. Owo ta upe mokureg. <sup>13</sup> Seiwok sagomatin Iruhin nenek arpesch um, anan narik nenek arman Adam iyoh aria nagiguk nenek armatok Iv. <sup>14</sup> Aria yoweini Satan douk madae nunek rohwmep um Adam uwe, uwok. Anan nenek rohwmep um Iv aria kwakutukuk Iruhin ananin baraen kwenek yoweishi inahos. <sup>15</sup> Aria ta armago umnek Iruhin ananin baraen usuwen dodog ugipeshen

aria owo urkwip punawasham kupaishi arpesh utaurumesh, aria upe wosik unek yopihi aih aria mare uni kupaimi shiyagwreh<sup>2:15</sup> owo douk wosik wenek yopinyi. Aria ta unek yopinyi upe wosik namudok aria ubuki batowish um, Iruhin ta nuraio utanamori upe wosik ihih nyumneh.

### 3

#### *Amam Hape Debeimori Um Iruhin Ananish Arpesh Iri*

<sup>1</sup> Enyudok baraen douk adurin. Aria anan nukri nupe debeini um Iruhin ananish arpesh nutaurumesh um, anan douk nakri nuraio yopinyi abom sagomatinyin mour. <sup>2-3</sup> Aria nunek enyudok mour iri, anan ta nenek yopihi atih aih iri. Anan ta nunek yopinyi atin aria mare enesh arpesh shukri anan yoweini. Anan ta nuraio atuk armatok. Aria anan ta nuboyoweipi urkwip pubuhuk aria anan mare urkum mur um nunek yoweishi inahos, uwok. Anan mare nuwok abar nugagak atin. Anan ta nutaurumesh nukesh eshudok eneshenesh um kupaishi arpesh. Anan ta nunek skulumesh nukriפש baraen wosik um shumneken aria shudukemesh. Anan mare juwehosin arigas atin um nini kupaishi shunitok, uwok. Anan nini eshesh shupe atugun. Anan mare nuhesh nukriפש debeg atin, uwok. Aria anan mare nunek urkum um nuraio sabaibori utabor buni eneshenesh eshudok, uwok. Aria anan nunek yopinyi namudok um, anan wosik ta nunek enyudok mour. <sup>4</sup> Anan ta nutaurumok wosik ananik armatok kwuni ananish batowish aria nunekesh shumnek ananin baraen. Aria batowish ta shumnek ananin baraen aria mare shagonigan atin, uwok. <sup>5</sup> Aria ta anan mare nutaurum um ananik armatok kwuni batowish wosik um, anan ta mare wosik um nunek mour um nutaurum Iruhin ananish arpesh. <sup>6</sup> Aria ta anan seiwok natogur Kristen aria nasuhw Iruhin ananin baraen dodog nagipeshen arigaha douk um, anan wosik ta nupe debeini um Iruhin ananish arpesh. Aria nubokuhi atin natogur Kristen um, anan

mare nupe debeini um Iruhin ananish arpesh, uwok. Um maresh? Ta anan nunek urkum nukri anan debeini nyeigur nyato iruh-uman nadukemesh um eneshenesh iri aria ta nukutukuk yopinyi baraen. Aria Iruhin ta nunek skeliman aria nukri anan douk yoweini nenek yoweishi inahos kabi douk seiwok anan nenek skelimum Satan um. Aria Iruhin ta nukri uwok abom um anudok arman kabi douk seiwok nakri uwok um yoweini Satan um. <sup>7</sup> Anudok douk nupe debeini um Iruhin ananish arpesh iri ta nunek yopinyi um eshudok douk madae shusuhw Iruhin ananin baraen iri uwe shopunek. Anan nunekesh namudok aria arpesh ta shutrun shukri anan yopuni madae nunek enesh yoweishi inahos iri uwe. Um maresh, ta eshesh shukri anan yoweini aria anan nugipesh Satan ananin baraen aria Satan nusuwan nuweshikan dodog.

#### *Mamudok Douk Hataurum Debeimi um Iruhin Ananish Arpesh Iri*

<sup>8</sup> Mamudok douk hataurum debeimi um Iruhin ananish arpesh iri shopunek ta hunek yopihi aih um ihishmorim arpesh shutrum aria shukri amam yopumi. Amam ta hunek ehudokmori yopihi aih. Amam ta hukriפש atin baraen ihishmorim arpesh. Mare hukriפש paguk enesh enen baraen aria enesh hukriפשkupainyi, uwok. Aria amam mare huwok abar hugagak atin. Aria mare hunek nyigiya um kupaishi esheshish eshudok eneshenesh shuni utabor, uwok. <sup>9</sup> Baugenyum um Iruhin ananin baraen seiwok nyanabeshuk, aria douk Iruhin nakriפש apak ananip madukemen. Aria amam ta hunek urkum um enyudok atin baraen husuwen dodog hugipeshen. Aria amam ta urkwip pur wosik aria mare purum hunek yoweishi inahos, uwok. <sup>10</sup> Sagomatin ipak Iruhin ananish arpesh ta putik mamudok douk hakri hutaurum amam douk hape debeimi um Iruhin ananish arpesh iri. Putrum um hugipeshen wosik ihishmorim aih iganigadae yakriפשpume iri um, ipak

<sup>2:15</sup> <sup>2:15</sup> Enyudok baraen um uni kupaimi shiyagwreh um douk nyakrium mare uni kupaimi shenek wehrur um, uwok.

wosik pukripam um hunekkeh abom. Aria uwok um, ta uwok.

<sup>11</sup> Aria amamiyu armago<sup>3:11</sup> baraen enyudok. Owo ta unek yopihi aih um ihishmorim arpesih um shutru aria shukri owo yopuwori armago. Aria owo mare ukripesh enen rohwinyi baraen kupaishi um kupaishi arpesih shenekesh iri yoweishi inahos, uwok. Owo ta unodukem usu merik um owo kanak aria unek owowin mour wosik abom.

<sup>12</sup> Mamudok douk hataurum amudok hape debeimi um Iruhin ananish arpesih iri ta hurao atuk atuk armago. Aria amam ta husuhw merik um amamiyu armago uni batowish hutaurumesh wosik. <sup>13</sup> Amam hutaurumam wosik amam hape debeimi um Iruhin ananish arpesih iri um, kupaishi arpesih ta shutrum shukri amam yopumi amam. Aria amam ta hudukemesh abom um amam douk hasuwen dodog abom Kraish ananin baraen hagipeshen. Aria amam ta mare hunogugur um hukripesh enyudok baraen kupaishi arpesih um.

### *Baugenyum Baraen Um Iruhin Ananin Baraen*

<sup>14</sup> Eik yape yenyem apudok shup um, eik urkum mor yakri eik hurukatin um inaku itrin. <sup>15</sup> Aria ta mare dodogoiwe um inaku arigas um, nyak ta nyutik apudok shup aria putaurumen um nyudukemesh um ehudok yopihi aih douk ipak Iruhin ananish arpesih ta punekeh iri. Aria Iruhin douk nape ihih nyumneh iri douk nape numun ipakiruh aparuh. Ipak douk ananip um, atup awiropip douk patogur kabi ananit urupat iri um. Aria ipak douk pasuhw Iruhin ananin baraen dodog pagipeshen aria dodogowip atip pakripesh enyudok atin adurin baraen kupaishi um enyen mare nyubuhuk abom, uwok. Douk namudok aria ipak patogur kabi uroruh douk hosah urupat tatao dodog iri um. <sup>16</sup> Seiwok baugenyum Iruhin ananin baraen um agundok apak munek lotuman um douk nyanabeshuk

**3:11** **3:11** baugenyum baraen um oudok armago douk biyen. Enen nyakri hagok um debeimi iri amamiyu armago. Aria enen nyakri wataurum debeimi um Iruhin ananish arpesih iri.

abom. Aria ahudok nyumnah douk nyatogur yopugunum. Baraen douk enyudok.

Seiwok anan narao arpesihw yegenyihw natogur adurin arman kabi apak um.

Aria Iruhin ananin Mishin nyawishan aria Iruhin neyabig

sabaishi arpesih shadukemesh shakri anan douk Iruhin ananin nuganin.

Aria sabaishi Iruhin ananish enselahos shopunek shatrun.

Aria ananish arpesih shanak sabaigosi nahobigos shakripesh ananin baraen ihishmorim arpesih.

Aria enesh shasuhwen dodog shagipeshen.

Aria Iruhin wata naran natooum iruhw heven aria ananin nyeigur nyato iruhw.

## 4

### *Enesh Arpesih Shenek Skulumesh Aria Shenek Rohwumesh*

<sup>1</sup> Iruhin ananin Mishin enyenyin baraen nyatogur aria gamo nyakri kweipon eneshenesh yoweishi sagabehos shani warehos ta shuhur arpesih aria shunek rohwmesh. Aria enesh arpesih ta shumnek esheshin baraen shugipeshen. Aria eshesh ta shukri uwok um shusuhw Iruhin ananin baraen shugipeshen um aria shukutinyukuk. <sup>2</sup> Eshudok douk shenek rohwmesh abom iri ta shukripesh shukri esheshin baraen douk adurin abom. Eshesh shenek yoweishi inahos aria eshesh madae shudukemesh shukri eshesh shenek yoweishi inahos uwe, uwok. Um maresh, esheship urkwip douk pogugak abom aria madae shudukemesh um maren baraen douk rohwinyi aria maren baraen douk adurin uwe. <sup>3</sup> Eshesh ta shunek rohwmesh shukripesh um mare shurao armago, aria enesh mahish aria worigun eshesh shanowishesh. Aria apak masuhw Iruhin ananin baraen dodog magipeshen iri douk madukemesh um adurin baraen. Apak madukemesh um Iruhin nenek eshudok worigun iri mahish douk eshesh shakri apak mare mishoh iri. Iruhin

nenek eshudok mahish iri worigun um apak munek beten munek tenkyuman aria mishoh. <sup>4</sup> Apak madukemesh, ihigunmorim worigun iri mahish Iruhin nenekesh iri douk yopishi. Aria apak mare mukri wokumesh, uwok. Iruhin nakri apak mishoh. Apak ta munek urkum um ananin baraan aria munek beten munek tenkyuman um eshudok aria mishoh. <sup>5</sup> Um maresh? Ananin baraan nyani apakin beten douk shenekesh shatogur yopish.

<sup>6</sup> Aria ta nyukripesh enyudok baraan yenyem apudok shup iri um Iruhin ananish arpesch um, nyak douk nyenek yopinyi mour. Nyak nyukripesh namudok um, nyak ta nyupe yopinyi um nyuneken wosik abom iri Krai Jisas ananin mour. Aria nyak nyunek urkum um enyudok adurin baraan apak munek bilipumen iri nyuni enyudok yopinyi baraan nyak nyarik nyasuwen nyagipeshen iri um, enyen ta nyuneken nyutogur dodogowin. <sup>7</sup> Aria nyak mare nyunek urkum um enyudok seiwokin rohwin baraan ipakish popehesh yamehesh sheyagwrehyeni, uwok. Enyudok baraan douk madae nyukripep um Iruhin uwe. Aria ihih nyumneh nyak ta nyupe um nyudukemesh um nyak kanak um nyunek yopihi atih aih Iruhin nakriyeh iri. <sup>8</sup> Nyak nyadukemesh, ta apak mukri munek bauanag um munek apakiruh yegeshiweruh hutogur dodogowiruh um, enyudok apa nyataurumap. Aria ta mudukemesh um mutogur dodogowip um munek yopihi atih aih Iruhin nakriyeh iri um, enyen ta nyutaurumap wosik abom. Enyen ta nyutaurumap douk apak mape agundok atap um aria kweipon iruhw heven shopunek.

<sup>9</sup> Enyudok baraan douk adurin atin abom. Douk namudok aria apak ihishmorim ta musuwen dodog abom mugipeshen. Baraan enyudok. <sup>10</sup> Apak madukemesh abom um kweipon Iruhin douk nape ihih nyumneh iri ta wata nurap um. Douk namudok aria apak munek ananin mour dodogowip atop. Aria memnek debeiri eriger um, apak apa meyotu dodog. Um maresh? Apak madukemesh abom um kweipon anan

ta nurap. Adur anan ta nutaurum apak ihishmorim mape agundok atap iri. Aria adur atin anan ta nurao apak douk masuhw ananin baraan dodog magipeshen iri mutanamori mupe wosik.

<sup>11</sup> Enyudok dodogowinyi baraan eik yakripenyen iri nyak ta nyukrip kupaishi arpesch nyunek skulumesh um shudukemen aria ta shugipeshen. <sup>12</sup> Eik yakri mare enesh arpesch shukri nyak weroinyia aria shukri uwok um shumnek nyakin baraan um, uwok. Nyak ta nyunek ehudokmori yopihi aih. Nyak nyiyagwreh yopinyi atin baraan aria nyupe wosik nyunek yopinyi. Aria nyak ta urkum munawasham kupaishi arpesch aria nyutaurumesh. Aria nyusuhw Iruhin ananin baraan dodog nyugipeshen aria nyunek eneheneh yopihi abom atih aih Iruhin nakriyeh iri. Mare nyunek urkum um nyunek yoweihia aih. Nyak ta nyunek yopihi aih namudok um eshesh Kristen shutrin aria shugipesh hatu iruhw iri aih.

<sup>13</sup> Aria nyak ta nyunek Iruhin ananin mour dodogowin atin arigaha eik inaku. Aria mour nyak nyuneken iri douk enyudok. Nyak nyutarih Iruhin ananin yopinyi baraan yopugunum um sabaishi shumneken. Aria nyukripeshen aria nyunek skulumesh um shudukemen wosik aria nyukripesh um shukutukuk yoweishia inahos. <sup>14</sup> Riguk anah nyumnah, amam hakripesh Iruhin ananin baraan iri hakri um agundok ta nyak nyunek Iruhin ananin mour um. Aria hahudok nyumnah, amam hataurum Iruhin ananish arpesch aria howem wis nyakig barag um nyurao enen Iruhin ananin Mishin enyenyin presen um nyutaurumen nyukripesh Iruhin ananin baraan um. Aria nyak mare urkum mukenyagak um enyudok presen, uwok. Nyak ta nyukwu enyudok presen aria nyunek mour wosik kabi douk riguk amam hakri um. <sup>15</sup> Aria nyak ta nyunek urkum um ihinyumorim baraan eik yakripenyen iri aria nyugipeshen dodogowin atin. Aria nyukon abom nyak kanak Iruhin um nyugipesh enyudok atin baraan. Nyak ta nyunekesh namudok um sabaishi arpesch shutrin aria shukri nyak nyenek Iruhin

ananin mour dodogowin atin nyeshagrakuk riguk nyarik nyape nyeneken um. <sup>16</sup> Aria nyak ta nyutaurum nyak nyunekeh iri aih. Aria nyunek skulumesh um, nyak ta nyukriפש adurin atinyi barae atin um shumneken aria shugipeshen. Aria nyak ta nyupe um nyunek enyudok atin mour. Aria nyunekesh namudok um, Iruhin ta nutaurum nyak nyuni eshudok douk shemnek nyakin barae iri shopunek nuraep putanamori pupe wosik.

## 5

### *Ehudok Aih Nyak Nyugipesh Um Nyutaurum Iruhin Ananish Arpesh Um*

<sup>1</sup> Eshudok arpesh douk shenek yoweishi inahos iri nyak nyukriפש um shukutishukuk aria shunek yopihi aih. Aria nyukriפש um, nyak ta nyugipesh ehudok aih namudok. Rowehimi mare nyuhom nyukriפש debeg, uwok. Nyukriפש shokubur um hukutukuk yoweishi inahos kabi douk nyakriפש shokubur nyakin yaken um. Aria weroroi nyukriפש shokubur kabi nyakriפש nyakim owarhim um. <sup>2</sup> Aria ruwehew iri nyukriפש shokubur um ukutukuk yoweishi inahos. Aria owo shopunek, nyak ta nyukriפש shokubur kabi nyakriפש shokubur nyakiyu amakeniyu um. Aria weroroiwori nyukriפש shokubur um ukutukuk yoweishi inahos kabi nyakriפש nyakiyu mohwiyariyu um. Aria nyak ta nyunek urkum um nyunek yopihi atih aih aria nyukriפש.

### *Armam Hagok Hawosopuk Iri Armago Owowin Baraen*

<sup>3</sup> Armam hagok hawosopuk iri armago owowin barae enyudok. Aria ono armago owowim rahaem hagokuk aria owo arpesh uwok um shutaurumo iri um, nyak ta nyutuk owowish nyeiguhw shuto iruhw aria nyukriפש Iruhin ananish arpesh um shutaurumo shuko worigun. <sup>4</sup> Aria ta onok okwokwin raminen nugokuk aria okwokwish batowish o barheshish shupe um, eshesh ta shutaurumok. Eshesh ta shugipesh Iruhin ananin barae aria shutaurumok

um shuwanamok enyudok seiwok okwok kweneken um eshesh iri. Aria shunekesh namudok um, eshesh ta shunek Iruhin nunadudareh. <sup>5</sup> Aria wawudok arpesh wokowori douk wasuhw Iruhin ananin barae dodog wagipeshen wakri Iruhin atun ta nutaurumo, aria wape wenek beten nyumneh weibus. <sup>6</sup> Aria oudok douk wenek yoweishi inahos douk owo kanak urkwip porumen iri, owo douk wawok sabaiguni yopuguni worigun aria wanadudareh wape wosik. Aria owo douk madae ugipesh Iruhin ananish aih uwe. Douk namudok aria owo wape kabi douk owo wagok iri um. <sup>7</sup> Eik yakriפש enyudok barae um nyukriפש ihiyumorim armago douk owowim rahaem hagokuk iri. Um maresh, ta kupaishi shutru aria shukri owo yowewori armago. <sup>8</sup> Ipak ihishmorim ta putaurum eshudok ipak atup awirop um pukesh eshudok eneshenesh. Aria enesh arpesh mare shutaurum eshesh atup awirop um, eshesh douk shakutukuk Iruhin ananin yopinyi barae douk shashuwen shagipeshen iri. Aria eshesh douk shatogur yoweishi arpesh abom sheshagrakuk eshudok douk madae shushw Iruhin ananin barae iri uwe.

<sup>9</sup> Aria nyak nyuwem armam hagok hawosopukuk iri armago owowish nyeiguhw um, nyak ta nyuwem um oudokmori atuw owowish nyeiguhw. Oudok douk owowish kwarahos shenek uhwinyumaguk 59-poreish kwarahos, aria wani owowim atum armam shape aria madae unak unek wehrur atin uwe uni kupaimi iri. <sup>10</sup> Aria kupaishi arpesh shatru shakri owo yopuwori apa wenek ehudokmori yopihi aih iri. Ehudok. Owo apa wataurumesh wosik owowish batowish aria apa wokesh eshudok eneshenesh kupaishi arpesh shanaki kupairubi warub iri. Aria shopunek, owo apa wakwrup Iruhin ananish arpesh douk shanak owowig urusag iri esheshiruh yeriweruh aria wataurum eshudok douk sharao amaen iri. Aria ihih nyumneh owo wape um wenek eneheneh yopihi aih atih. Nyak nyuwem um oudokmori atuw owowish nyeiguhw. <sup>11</sup> Aria weroroiwori

douk owowim hagokuk iri, nyak mare nyuwem um owowish nyeiguhw, uwok. Ta kupaimi urkum mutogurumo um ukri urao kupaimi armam aria owo ukutukuk marik iri urkum wakri unek Kraish ananin atin mour um. <sup>12</sup> Namudok aria owo ta baraen nyupenyo um agundok owo madae ugipesh owowim marik iri urkum um wakri adur um ta unek Kraish ananin atin mour um. <sup>13</sup> Aria shopunek, owo apa arigeh hao wape meyoah aria wape um warahaen atin. Owo wape um wenek uwish togur wanak kupaigwi urusag. Aria watiguk kupaishi aria wata wanak wape wanumogesh eshesh. Ehudokmori aih Iruhin douk nakri uwok abom umeh. <sup>14</sup> Namudok aria eik yakri wosik um weroroiwori douk owowim hagokuk iri wata urao kupaimi armam. Aria owo ubuki batowish aria upe unek mour um utaurumesh aria upe wosik. Um maresh, ta apakish horim douk shakri uwok um Iruhin ananin baraen iri shukri apak yoweipari. <sup>15</sup> Ono armago douk amam hagok hawosopukuk iri douk waktukuk jurug yopinyi baraen aria wasuhw Satan ananin baraen wagipeshen. <sup>16</sup> Aria ta eshesh shasuhw Iruhin ananin baraen iri eshesh atup awirop um ono armago douk amam hagok hawosopukuk iri uni eshesh upe um, eshesh ta shutaurumo shuko worigun nini eshudok douk owo wokumesh iri. Eshesh shunekesh namudok um ipak Iruhin ananip ta mare punek debeinyi mour um putaurum oudok armago um, uwok. Ipak ta putaurum oudok douk owowishi madae enesh shupeik abom um shutaurumo iri uwe atuw.

*Amam Hape Debeimi um Iruhin Ananish Arpesh Iri Amamin Baraen*

<sup>17</sup> Mamudok douk hape debeimi um ipak Iruhin ananish arpesh aria hataurumep henek mour wosik abom iri, ipak ta putuk amamish nyeiguhw shuto iruhw aria pukomabor wosik utabor buni worigun. Eik yakri um mamudok douk henek mour dodogowim atum um henek skulumep hakripep Iruhin ananin baraen iri atum. Ipak ta putaurumam wosik abom. <sup>18</sup> Um maresh? Baraen nyetem Iruhin

ananik Buk iri Iruhin nakri namudok. Nakri, “Shashudok bulmakauhos douk sheyotu shenek mour um sheshish wit um sharumohw urubit iri, ipak mare puweshik esheshig nokwatog, uwok. Eshesh ta shuwok anat ourehit wit.” Aria nakri enyudok kupainyi baraen shopunek nakri, “Eshesh shunek mour iri mare shuneken meyoah, uwok. Eshesh ta shurao utabor.”

<sup>19</sup> Aria ta enen arpen nyukripen enen baraen um anan nape debeini um ipak Iruhin ananish arpesh iri nenek enesh yoweishi inahos um, nyak mare nyumneken, uwok. Aria biyesh o biyesh atin shukripen um, nyak wosik ta nyumnek esheshin baraen aria kadak nyukripan um mare wata nuneken atin. <sup>20</sup> Mamudok douk hape debeimi um ipak Iruhin ananish arpesh aria henek yoweishi inahos iri, nyak ta nyuhom um hukutukuk eshudok yoweishi inahos. Nyak nyuhom abudok nyutob sabaishi Iruhin ananish arpesh shunatorum shupe obi nyutob. Abudok nyutob, nyak ta nyikitak aria nyukripam dodogowinyi baraen um amam mare wata hunek yoweishi inahos. Nyak nyunekesh namudok um kupaishi shopunek shunogugur aria mare shunek yoweishi inahos.

<sup>21</sup> Iruhin nani Kraish Jisas hani Iruhin ananish enselahos shatruhw esheshis nabes aria eik Pol yakripen dodogowinyi baraen um nyumneken aria nyugipeshen. Baraen enyudok. Nyak ta nyukripen enyudok atin baraen eik yakripen-enyi. Nyukrip Iruhin ananish arpesh douk shenek yoweishi inahos iri um mare wata shunekesh shopunek. Aria nyukripen um, nyak mare nyukripen kupainyi nyeiguhw shatoumesh iri arpesh, aria mare nyukripen kupainyi nyeiguhw wokeshi iri uwe, uwok. Nyak ta nyukripen atin baraen ihishmorim arpesh. <sup>22</sup> Aria nyak mare arigas nyenekesh um nyugraeh anan arman um nunek Iruhin ananin mour, uwok. Ta enesh arpesh shutrin um nyutaurum anan nenek yoweishi inahos iri arman aria shukri nyak shopunek douk yowenyari kabi anan um. Aria sagomatin nyak ta gamo nyudukeman wosik ba iyoh aria

nyuwem wis ananig barag aria kadak nyukripan um nunek Iruhin ananin mour. Aria nyak ta mare nyunek urkum um nyunek yoweih aih aria nyunek eneheneh yopihi abom atih aih Iruhin nakriyehi.

<sup>23</sup> Aria eik yakri ikripen enen baraen shopunek um agundok arugeh atih hen um. Nyak mare nyuwok abar atubar, uwok. Nyak ta nyuwok anabar karoibar wainibar abar shopunek um apahw mare hwunatuken. Aria shopunek um kupaihi arugeh mare hen ihih nyumneh.

<sup>24</sup> Anam armam douk henek yoweishi inahos yopugunum iri, apak douk mudukemam um amam douk yoweimi. Aria Iruhin ta nunek skelumam nukri amam douk henek yoweishi inahos. Aria kweipon ta nuwanumam yoweishi inahos amam henekesh iri. Aria anam hanabeshuk henek yoweishi inahos iri, apak madae mudukemam uwe. Aria kweipon amamish yoweishi inahos ta shutogur yopugunum aria Iruhin ta nuwanam yoweishi inahos amam henekesh iri. <sup>25</sup> Aria douk namudok atin. Anam armam henek yopihi aih iri mour yopugunum aria sabaishi shatrum aria shadukemam. Aria anam henek yopihi aih iri mour habeshukesh aria apak madae mudukemesh uwe. Aria kweipon amam ta hunowereh hutogur yopugunum aria sabaishi shutrum. Aria apak shopunek ta mudukemam.

## 6

### *Shape Shakamum Kupaishi Shenekumesh Mour Meyoh Iri Esheshin Baraen*

<sup>1</sup> Shenekumesh mour meyoh kupaishi iri esheshin baraen enyudok. Eshesh Iruhin ananish arpesch douk shape shakamum kupaishi shenekumesh mour meyoh iri ta shumnek esheshim debeimi amamin baraen shugipeshen. Eshesh ta shukri amam douk debeimi aria shumnekam. Eshesh shunekesh namudok um ta mare enesh arpesch shukri enen yoweinyi baraen um Iruhin nini enyudok baraen apak munek skulumeshenyi, uwok. <sup>2</sup> Aria ta enesh Kristen

shunek mour meyoh iri esheshim debeimi douk henek bilip iri um, eshesh mare shunek urkum shukri amam hani eshesh douk Iruhin ananish atish aria eshesh mare shumnekam, uwok. Eshesh douk shenek mour um henek bilip iri douk eshesh urkwip panawashamesh iri. Douk namudok aria eshesh ta shunekumam yopinyi mour abom shishagrakuk enyudok douk sheneken um eshudok douk madae shusuhw Iruhin ananin baraen iri uwe. Aria ihih nyumneh nyak ta nyunek skulumesh um enyudok baraen aria nyukriפש dodogowin atin um eshesh shugipeshen.

### *Shanagrem Sabaibori Utabor Bani Eneshenesh Eshudok Iri Esheshin Baraen*

<sup>3-4</sup> Apakin Debeini Jisas Kraish ananin yopinyi baraen douk nyakripap um musuhw Iruhin ananin baraen dodog mugipeshen aria munek skulum kupaishi um shugipesh ananish aih. Aria eshudok arpesch douk shakutukuk enyudok yopinyi baraen aria shenek skulumesh um kupainyi rohwin yi baraen iri shakri eshesh kanak nyeiguhw shato-umesh aria shadukemesh abom iri. Aria uwok, eshesh douk shagagak abom. Eshesh madae shadukemesh um Iruhin ananin baraen uwe. Eshesh urkwip porum shakri shupe um shuni ipak punitok atin aria shape shanitok um ihinyumorim enenyenen baraen. Namudok aria shah arpesch aria esheshiruh aparuh juwehosiruh um kupaishi shakri eshesh yoweishi. Aria eshesh urkwip porum kupaishi arpesch shakri eshesh shenek yoweishi inahos. Aria eshesh shenek roh. Aria shenek nyigiya um kupaishi esheshish eshudok eneshenesh aria shape shani ipak panitok. <sup>5</sup> Eshesh madae shadukemesh abom, shagagak aria shapeum shakri shunitok atin. Eshesh shakutukuk adurin atinyi baraen aria shenek roh shakri ta eshesh shugipesh Iruhin ananish aih um, eshesh ta shurao sabaibori utabor buni eneshenesh eshudok. Aria esheshin baraen douk madae adurin uwe, uwok. <sup>6</sup> Aria ta apak dodogowip atup um mugipesh Iruhin ananish aih aria mukri eneshenesh apakish eshudok shani utabor douk jurugishumap um, apak ta



munadudareh abom aria mupe wosik.  
<sup>7</sup> Seiwok apakiyu amakeniyu wopubuki-  
 umori, apak madae musuhwi enesh eshudo-  
 eneshenesh uwe, uwok. Aria ta wata  
 namudok atin. Kweipon apak mukutukuk  
 agundok atap um shopunek, apak ta  
 mare munasuhw enesh eshudok munak,  
 uwok. <sup>8</sup> Namudok aria ta apak mura-  
 anagun worigun nini rupeh shukusumap  
 um, apak ta mukri eshesh douk wosik-  
 umap. <sup>9</sup> Aria eshudok arpeshe douk shakri  
 shunarao sabaishi eneshenesh eshudok  
 shuni utabor iri Satan ta nukwiraehesh  
 um shunek yoweishi inahos. Aria eshesh  
 ta shunek yoweishi inahos aria ta shupe  
 yowesh abom kabi bur reir maduhw  
 um. Aria eshesh ta mishish shikitak  
 abom um shunek eneshenesh yoweishi  
 inahos douk shagagak iri arpeshe shakri  
 shunekesh iri. Aria eshudok yoweishi  
 inahos ta shunekesh shugugak abom aria  
 eshesh ta douk shupe yowesh abom.  
<sup>10</sup> Aria enesh arpeshe douk mishish shaki-  
 tak abom um shakri shurao sabaibori uta-  
 bor buni eneshenesh eshudok aria eshesh  
 douk shakutukuk Iruhin ananin barae-  
 n douk eshesh shasuhwen shagipeshen iri  
 aria sharao dedeben atinyi amaen. Um  
 maresh? Baugos um arpeshe shenek  
 yoweih aih um douk agundok um eshesh  
 mishish shakitak abom um shakri shurao  
 sabaibori utabor buni eneshenesh eshu-  
 dok um.

*Nyahur Debeg Um Nyurao Agundok Um  
 Nyupe Wosik Ihih nyumneh Um*

<sup>11</sup> Aria nyak Iruhin ananin nyenek  
 ananin mour iri ta nyuruwokuk um  
 ihishmorim eshudokmori yoweishi in-  
 ahos. Aria nyak ta dodogowin um  
 nyugipesh ehudok yopihi aih namudok.  
 Numun nyakihw apahw, nyak ta nyupe  
 wosik aria nyunek yopihi aih atih kabi  
 Iruhin nakri um. Nyak nyusuhw ananin  
 barae- n dodog nyugipeshen aria nyak ta  
 urkum munawasham kupaishi arpeshe  
 aria nyutaurumesh. Aria abudok nyutob  
 nyak nyurao enen dodog um, nyak ta  
 nyupe dodog. Nyak mare juwehosin  
 nyukri nyuho enesh arpeshe, uwok. Nyak  
 ta nyukripesh shokubur. <sup>12</sup> Nyak ta  
 nyusuhw Krai- s ananin barae- n dodog  
 nyugipeshen kabi douk anan nenek resis

iri nahur debeg um. Aria nyak shopunek  
 douk namudok atin. Nyak ta dodogowin  
 abom um nyugipesh Krai- s ananin barae- n  
 aria nyurao agundok abom um kweipon  
 nyupe wosik abom ihih nyumneh um.  
 Kabi douk seiwok Iruhin nahwaren  
 aria abudok nyutob nyak nyani sabaishi  
 arpeshe pape penek lotu aria nyaki-  
 tak nyakripesh enyudok yopinyi barae- n  
 um. Nyak nyakri Krai- s Jisas anan douk  
 dodogowini aria nyak nyasuhw ananin  
 barae- n dodog nyagipeshen.

Aria douk abudok nyutob nyak nyakri  
 namudok aria Iruhin naraen nakri  
 nyak nyupe wosik abom ihih nyum-  
 neh. <sup>13-14</sup> Seiwok baugos um, Iruhin  
 nakwarum ihishmorim eneshenesh  
 shape iruhw atap iri aria eshesh douk  
 shape. Aria riguk Krai- s Jisas douk  
 nakripesh yopinyi barae- n yopugunum  
 aria anudok debeini um gavman iri  
 Pontius Pailat nemneken aria nenek  
 kwotuman. Aria douk anudok Iruhin  
 nani Krai- s Jisas hatruhw amamis nabes  
 aria eik yakri ikripen enyudok barae- n  
 um nyumneken aria nyugipeshen abom.  
 Nyak ta nyupe wosik um mare enesh  
 arpeshe shukri nyak yoweinyi, uwok. Aria  
 mare enen barae- n nyupenyen. Nyak  
 nyusuwen dodog abom Iruhin ananin  
 barae- n nyugipeshen aria nyunekesh  
 namudok atin arigaha nyunak nyutogur  
 um ahudok nyumnah apakin Debeini  
 Jisas Krai- s nutanamori ahi. <sup>15</sup> Ahudok  
 nyumnah Iruhin nakri ahi, anan ta  
 nishopoki Jisas Krai- s nunaki nutogur  
 yopugunum. Anudok Iruhin anan douk  
 baugos abom um apak munadudareh um.  
 Anan douk yopuni abom.

Anan douk Debeini abom um apak  
 ihipmorim mape agundok atap iri. Anan  
 nasuhw iruhw atap aria nape Debeini  
 um ihim-morim debeimi hani ihim-  
 morim king douk hape agundok atap iri.  
<sup>16</sup> Iruhin anan atun ta mare nugok atin,  
 uwok. Anan douk nape ihih nyumneh  
 aria agundok anan napeum douk boga-  
 ragun abom aria natrugun abom. Aria  
 apak arpeshe douk madae mutrun apakis  
 nabes uwe, uwok. Seiwok arigaha douk  
 shopunek ta mare enesh arpeshe shutrun

esheshis nabes. Kweipon shopunek, ta mare enesh arpesh shutrun, uwok. Aria eik yakri apak ihipmorim mutuk ananin nyeigur nyuto iruhw aria mukri anan nupe Debeini ihih nyumneh. Adur atin.

baraen douk eshesh riguk shasuhwen shagipeshen iri.

Aria eik yakri Iruhin nutaurumep meyoh ipak ihipmorim.

*Shanagrem Sabaibori Utabor Bani Eneshenesh Eshudok Iri Esheshin Baraen*

<sup>17</sup> Nyak ta nyukriפש enyudok dodogowinyi baraen eshudok arpesh douk shanagrem sabaishi eshudok enesh-enesh shani utabor iri um shumneken aria shugipeshen. Nyak nyukriפש um eshesh mare shunagunukuk shukri eshesh debeishi shanagrem sabaishi eshudok shani utabor iri, uwok. Aria nyukriפש um eshesh ta mare shukri wosik um eshudokmori douk kweipon ta burukworesh shunak shuwishuk iri. Apak muni ipak ta mukri wosik um Iruhin douk apa nakop abom ihish-morim yopishi eshudok eneshenesh aria nenekap manadudareh iri. <sup>18</sup> Aria nyak ta nyukriפש enyudok dodogowinyi baraen shopunek um shumneken aria shugipeshen. Aria nyukriפש um shunek eneheneh sabaihi yopihi aih. Aria eshesh ta shutaurum kupaishi shukesh eshudok eneshenesh um yaruhish iri. Aria shutaurum kupaishi arpesh shopunek. <sup>19</sup> Aria shunek yopihi aih namudok um, adur atin eshesh ta shunabuk esheshish yopishi eshudok eneshenesh shukus-umesh iruhw heven. Eshesh ta shukus iruhw arigaha ahudok nyumnah hunaki aria Iruhin ta wata nashanam-umesh aria shupe wosik abom ihih nyumneh.

*Nyak Ta Gamo Nyurukorubesh Nyakin Mour Wosik Abom*

<sup>20</sup> Timoti, nyak ta gamo nyurukorubesh um enyudok ihinyumorim Iruhin ananin baraen eik yakriפש-enyi. Aria nyukutuk ihinyumorim rohwin baraen enesh arpesh shape sheyagwrehenyi. Enyudok baraen madae nyugipesh Iruhin ananin baraen uwe. Eshesh shenek roh wosik shakri esheshin saki douk adurin aria yopinyi, aria uwok. Esheshin saki douk nyakri nyubo Iruhin ananin aih hubuhuk. <sup>21</sup> Aria enesh arpesh shakri eshesh douk sharao enyudokmori saki aria eshesh shakutukuk jurug Iruhin ananin yopinyi

## Pagiguk Iri Shup Douk Pol Nenekap Panam Timoti Iri

*Banenyi Baraen Um Enyudok Baraen  
Pol Nagiguk Nenekan Nyanak Um Timoti  
Iri*

1:1-2 Pol nenekuman baraen Timoti  
nakri Iruhin nini Krai Jisas hutauru-  
man

1:3—2:26 Pol nakrip Timoti um nunek  
Iruhin ananin mour wosik abom

3:1◆17 Eshesh Kristen ta shiyotu  
dodog shusah amaen abudok nyutob  
hugiguk iri nyumnah hukri hutogur  
obi nyutob arpesht ta shukri uwok um  
Iruhin ananin baraen

4:1-8 Pol dodogowin atun nakrip Timoti  
um nukripesh Iruhin ananin baraen  
wosik aria nishuhur um shunek  
yopihi aih

4:9-22 Enen baraen um Pol nenek kwot  
um nyani nyatuh iri baraen

1-2 O Timoti, eik kanak Pol yenek-  
umenyugu apudok shup um nyak. Eik  
douk urkum manawashamen abom. Aria  
nyak nyasuhw Iruhin ananin baraen  
nyagipeshen aria eik douk yahwaren nu-  
ganin. Eik douk Iruhin nagipesh ananim  
atum urkum aria Krai Jisas nagraehe  
um ipe ananin aposel aria inak ikripesh  
Iruhin ananin adurin baraen. Enyu-  
dok baraen um apak matukur Jisas aria  
morao agundok um mupe wosik abom  
ihih nyumneh um.

Aria eik yakri Yain Iruhin nini apakin  
Debeini Krai Jisas hutaurumen meyoh  
aria nyakihw apahw hwur wosik.

*Apak Mare Munenek Abraen Um  
Mukripesh Iruhin Ananin Baraen Kupaishi  
Arpesht Um*

<sup>3</sup> Eik yenek tenkyu um Iruhin. Anan  
douk eik yenek ananin mour wosik iri.  
Eik yenek ananin mour um, eik urkum  
mor wosik aria madae urkum mur um  
ikri eik yenek enesh yoweishi inahos uwe,  
uwok. Eik yeneken wosik kabi seiwok  
eikim yakenyim babukenyim heneken

um. Aria ihih nyumneh eik yenek beten  
um Iruhin um, eik yenek urkum um  
nyak aria yarigan nyumnah wab um  
nutaaurumen. <sup>4</sup> Riguk ohwak douk wape  
atugun. Aria douk eik yenek urkum um  
nahudok nyumnah eik yakutinyukuk ba  
yanaki ahi, ohwak wonakom roguhwa aria  
nyak nyareh abih nyapeik aria eik yanaki.  
Douk namudok aria eik yakri abom um  
wata shopunek itrin aria wata inadu-  
darehumen. <sup>5</sup> Aria shopunek, yenek  
urkum um agundok nyak nyasuhw Iruhin  
ananin baraen dodog nyagipeshen abom  
um. Seiwok nyakik babukek Lois kwarik  
kwasuwen dodog kwagipeshen. Aria  
nyakik amakek Yunis shopunek kwa-  
suwen dodog kwagipeshen. Douk namu-  
dok aria eik yadukemesh abom um nyak  
shopunek douk nyasuwen nyagipeshen  
kabi owo um. <sup>6</sup> Namudok aria eik  
yakri ikripen enyudok baraen aria nyak  
mare urkum mukenyagak. Baraen enyu-  
dok. Riguk eik yowem wis um nyakig  
barag aria Iruhin neken enyudok presen  
um nyuneken dodogowin atin abom um  
nyunek ananin mour um. Douk namudok  
aria nyak ta nyunek urkum um enyudok  
presen anan nekenyen iri aria nyupe  
dodogowin atin abom nyunek ananin  
mour. <sup>7</sup> Um maresh? Iruhin ananin  
Mishin douk nyape apak ananipari douk  
madae nyenekap munogugur uwe, uwok.  
Enyen douk nyenekap morao enyenyin  
dodog matogur dodogowip aria apak urk-  
wip panawasham sabaishi arpesht matau-  
rumesh. Aria shopunek douk ananin  
Mishin atin nyenekap masuhw merik um  
apak kanak wosik.

<sup>8</sup> Douk namudok aria nyak mare  
nyunenek abraen um agundok eik  
yakripesh Iruhin ananin baraen aria  
douk yonoweshik um, uwok. Aria  
shopunek, mare nyunenek abraen um  
nyukripesh apakin Debeini ananin  
baraen um. Nyak ta nyuni eik wiyotu atu-  
gun um ukripesh Iruhin ananin baraen.  
Ohwak mare unogugur um agundok  
arpesh shukri uwok um ukripesh Iruhin  
ananin baraen um aria shohw umnek  
eriger um, uwok. Anan ta nutaurumohw  
nunekohw wiyotu dodog. <sup>9</sup> Iruhin douk

narap matanamori mape wosik aria nahwarap um mupe ananip atup abom aria mupe yopupari. Anan douk madae nutik eneh yopihi aih apak menekeh iri aria douk nuhwarap uwe, uwok. Anan nagipesh ananim atum urkum aria nahwarap meyoh. Um maresh? Seiwok baugos um, Iruhin urkum morum apak aria neshopoki Krajs Jisas nanaki nataurumap narap meyoh. <sup>10</sup> Aria douk enyudok seiwok Iruhin nakriyen iri douk nyatogur. Krajs Jisas douk nanaki aria narao apak matanamori mape wosik. Aria nabo agundok um apak mugok munak muwishuk abom um nabuhuk. Namudok aria apak ta mare mugok munak muwishuk abom, uwok. Apak ta mupe wosik ihih nyumneh kabi Iruhin ananin yopinyi baraen nyakripap um. <sup>11</sup> Aria Iruhin nagraeh eik aria neshopoke um inak ikrip arpesh um enyudok ananin baraen. Douk namudok aria eik douk yanak yakripeshen yenek skulum sabaishi arpesh. <sup>12</sup> Douk yenek skulumesh aria douk eik yape yemnek debeiri eriger. Aria eik madae inenek abraen uwe, uwok. Um maresh? Eik yadukeman wosik abom anudok eik yenek bilipuman iri aria yakan eik kanak abom yani eikin mour yor ananis wis. Aria eik yadukemesh abom um anan ta nutaurume nurukarube ipe wosik aria inek enyudok atin mour arigaha inak itogur um ahudok nyumnah anan nutanamori ahi.

<sup>13</sup> Enyudok yopinyi baraen douk riguk eik yakripenyen iri nyak ta nyusuwen nyugipeshen aria nyukripesh enyudok atin kupaishi arpesh. Aria nyak nyukripesh Iruhin ananin baraen obi nyutob, nyak ta nyugipesh ehudok aih um nyusuhw ananin baraen dodog nyugipeshen um, nyuni ehudok um nyak urkum munawasham anan nini ihishmorim arpesh um. Ehudok biyeh aih, eheh douk Iruhin nako apak douk matukur Krajs Jisas iri. <sup>14</sup> Aria nyak ta nyutaurumen wosik Iruhin ananin baraen douk anan nakri nyak wosik um nyukripeshen iri. Aria Iruhin ananin Mishin douk nyape apak iri

ta nyutaurumen um nyunek nyak nyutaurumen wosik Iruhin ananin baraen. <sup>15</sup> Nyak nyadukemesh eshudok ihishmorim arpesh shape agudok shokugi nahobig Esia iri shani amudok biom Figelus iri Hermogenes. Eshesh douk shakri uwok um eik aria shakutuwe-iguk. <sup>16</sup> Aria Onesiforus atun nataurume. Sabaihi nyumneh anan nanaki nataurume aria nenek eikihw apahw hwor wosik. Eik showeshike senab yape aria anan madae nunenek abraen um agundok eik yonoweshik yape um uwe, uwok. Sabaihi nyumneh anan nanaki nataurume aria neneke yatogur dodogoiwe. Namudok aria eik yakri apakin Debeini nukri gihaum Onesiforus nini ananip awirop aria nutaurumesh. <sup>17</sup> Aria nubokadae sagramatin anan nanaki abrudok debeiburi wabur Rom um, anan nenek urkum um eik aria naurime nanak arigaha nanaki naparuge. <sup>18</sup> Aria nyak nyadukemesh um anan nenek sabainyi Iruhin ananin yopinyi mour gani Efesus um nataurum sabaishi arpesh aria nataurum eik shopunek. Douk namudok aria eik yakri enyudok. Hahudok nyumnah apakin Debeini Jisas nunaki ahi, anan ta nenek gihauman aria natauruman.

## 2

### *Timoti Ta Nunek Jisas Krajs Ananin Mour Dodogowin Atun Kabi Anan Soldia Um*

<sup>1</sup> Nyak eikin nuganin Timoti douk nyani eik watukur Krajs Jisas aria anan douk nataurumohw meyoh. Douk namudok aria nyak ta nyurao dodog um agundok anan nataurumohw meyoh um aria nyiyotu dodogowin atin. <sup>2</sup> Riguk apak sabaipari Iruhin ananish arpesh mantorum mape aria eik yakripen enen yopinyi baraen. Aria nyak ta nyukripam enyudok atin baraen mamudok douk henek mour wosik aria gamo hadukemesh um hunek skulum kupaishi arpesh iri. Nyak nyukripam aria amam ta hunek skulumesh wosik um enyudok atin baraen kupaishi arpesh. <sup>3</sup> Aria nyak nyani apak douk matukur Krajs Jisas. Douk namudok

aria abudok nyutob apak muraao amaen aria mumnek eriger obi nyutob, nyak ta nyiyotu dodog aria mare nyunogugur nyuruwok, uwok. Apak ta miyotu dodog kabi anan soldia nemnek eriger aria ney-otu dodog um. <sup>4</sup> Nyak nyadukemesh, anan soldia douk nakri nunek ananin debeini soldia nunadudareh-uman. Douk namudok aria anan nakutukuk ihinyu-morim kupainyi mour aria napeum nenek nyanyudok amam soldia heneken iri atin mour. <sup>5</sup> Aria shopunek, nyak nyunek urkum um anan nenek resis iri. Aria anan nugipesh lo um resis aria nahur debeg nishagrakuk kupaishi um, anan ta nurao prais. Uwok um ta uwok. <sup>6</sup> Aria nyak nyunek urkum um anan nenek mour nubarig iri. Anan nenek debeinyi mour arigaha ananigun worigun jurugigun aria enyen douk wosik um anan nurik nunenek sagom-atinyigun worigun um. <sup>7</sup> Nyak ta nyunek urkum um enyudok biyen atin baraen iganigadae yarig yenyem iri aria Debeini ta nutaurumen um nyudukemesh um baugenyum um.

<sup>8</sup> Aria nyak ta nyunek urkum um Jisas Kraiss, king Devit ananin barhonin. Anan douk shan nagok aria Iruhin wata nonohur nakitak nape kabi douk Iruhin ananin yopinyi baraen eik yakriפש-enyi nyakrium. <sup>9</sup> Aria enesh arפש shakri uwok um eik ikriפש enyudok baraen um aria eshesh sheneke yemnek debeiri eriger. Aria showeshike senab kabi douk showeshik shenek yoweishi inahos iri arפש um. Eshesh shenekesh namudok aria eshesh madae dodogowish um shubo Iruhin ananin baraen nyubuhuk uwe, uwok. Enyen nyarahaen nyeyatak warub. <sup>10</sup> Douk namudok aria eik yosah ihinyu-morim amaen aria yeyotu dodog um itaurum eshudok douk seiwok Iruhin nagraehesh iri. Anan nagraehesh um Jisas Kraiss nuraesh shutanamori shupe wosik abom agundok bogaragun um ihih nyumneh. <sup>11</sup> Enyudok baraen douk adurin atin aria apak ta munek bilipumen. Baraen enyudok.

“Aria apak mutukur anan aria mugok um, apak shopunek ta wata mukitak

muni anan mupe atugun.

- <sup>12</sup> Aria ta miyotu dodog abudok nyutob amaen nyutogramap obi nyutob, apak ta muni anan mupe debeipari. Aria ta apak mukri uwok um anan um, anan shopunek ta nukri uwok um apak shopunek.
- <sup>13</sup> Aria ta apak mukutukuk ananin baraen um, anan ta mare nukutinyukuk, uwok. Anan ta nugipeshen wosik abom.”

*Timoti Ta Nunek Mour Um Nutogur Yopuni Nenek Iruhin Ananin Mour Wosik Abom Iri*

<sup>14</sup> Timoti, nyak ta nyupe um nyukriפש enyudok atin baraen eik yakriפשenyen iri. Aria shopunek, nyukriפש wosik enyudok enen baraen shopunek um shumneken. Nyukri, “Iruhin nape natrip aria ipak mare pune rupanitak punotutukem debeg um enyudok sakihasin baraen, uwok. EHUDOKMORI aih ta mare hutaaurumep um enesh eshudok eneshenesh. Aria eshudok shumnekep iri ta shukutukuk yopinyi baraen aria shupe yowesh abom.” <sup>15</sup> Aria nyak ta dodogowin um nyuneken wosik Iruhin ananin mour um nyuneken nunadudareh-umen. Aria shopunek, nyak ta nyunek skulumesh um ananin adurin atinyi baraen wosik abom um kweipon shopunek anan ta nunadudareh-umen. Aria nyak ta mare nyunenek abraen um anan, uwok. <sup>16</sup> Aria nyak mare nyuni kupaishi piyagwreh enenyenen rohwin baraen douk madae nyugipesh Iruhin ananin baraen iri uwe, uwok. Um mares? Eshudok douk shenyagwreh enyudokmori baraen iri ta shukutukuk Iruhin aria shunek yoweishi inahos shishagrakuk riguk sharik shape sheneken um. <sup>17</sup> Enyudokmori baraen douk apa nyenek arפש shape kabi douk sagomatin shokuguni arabigun napenyesh, aria arigaha natogur debeibi arab iri. Aria enyudokmori baraen shopunek douk namudok atin. Sagomatin karowish shemneken, aria arigaha nyatogur debeinyi aria sabaishi shemneken aria shakutukuk Iruhin ananin baraen. Aria anam heyagwreh enyudokmori baraen iri douk Himeneus iri Filetus.

<sup>18</sup> Amudok biom douk hakutukuk jurug adurin atinyi baraan aria hape henek rohwa hakri shagok iri arpeshe douk riguk shakitak shape. Amam henek rohwa mesh namudok aria henek enesh arpeshe shakitukuk agundok shasuhw Iruhin ananin baraan shagipeshen um.

<sup>19</sup> Aria Iruhin ananish arpeshe douk shape dodog kabi douk ururuh hosah urusag iri um. Aria Iruhin nowem enyudok baraan um nakri eshesh shupe ananish atish abom. Baraan enyudok.

“Debeini douk nadukemesh wosik abom um ananish arpeshe.”

Aria enen nyakri namudok.

“Eshudok arpeshe douk shakrip kupaishi shakri eshesh douk Debeini ananish iri ta shukutukuk ihishmorim yoweishi inahos abom.”

<sup>20</sup> Numun anat debeiti urupat sabaisi marus sani dis iri yaureruh shakus. Enesh shenekesh shakwu gol iri siliwa, aria enesh shabar rowos shenekesh, aria enesh shakwu amnab shenekesh. Aria enesh shenekesh um shuruh yopuguni worigun um, aria enesh um shuruh yoweishi eshudok eneshenesh um. <sup>21</sup> Aria eshudok arpeshe douk shakitukuk eneheneh yoweihai aih hani eshudok yoweishi arpeshe, aria numun esheshiruh aparuh yopuruh iri douk shape kabi asudok yopusi marus sani dis iri yaureruh douk shakus urupat iri um. Aria eshesh douk wosik um shunek esheshin Debeini ananin mour. Aria eshesh ta shupe ananish atish abom shutrugun um shunek ihinyumorim yopinyi mour.

<sup>22</sup> Aria nyak ta nyukutukuk eshudok eneshenesh yoweishi inahos douk werorowishi apa mishish shakitakumesh aria shenekesh iri aria nyunek yopinyi atin namudok. Nyak ta nyusuhw Iruhin ananin baraan dodog nyugipeshen wosik aria nyak urkum ta munawasham kupaishi arpeshe aria nyutaurumesh. Aria nyuni eshudok arpeshe douk esheship urkwip douk porum yopinyi atin aria shenek beten shorig Iruhin iri um ta punagabe um pupe atugun. <sup>23</sup> Aria nyak ta nyukutukuk wehinyi nyuni rohwish iri sheyagwrehen iri baraan. Um maresh?

Nyak nyadukemesh, shenyagwreh enyudokmori baraan iri apa juwehosishi aria shapeum um shanitok shanatu-tukem atin. <sup>24</sup> Aria mamudok douk henek apakin Debeini ananin mour iri mare huni kupaishi shunitok shunotutukem uwe, uwok. Amam ta huni eshesh shupe atugun aria hupe shakamum ihishmorim arpeshe hutaaurumesh aria hukri-pesh shokubur. Amam ta hukri-pesh wosik abom Iruhin ananin baraan um eshesh shudukemesh wosik. Aria ta enesh shunek enesh yoweishi inahos um amam um, amam ta hupe hunatrish meyoh. <sup>25</sup> Aria amam ta hupe shakamum eshudok douk shakri uwok um Iruhin ananin baraan iri aria hukri-pesh shokubur. Amam hukri-pesh namudok um Iruhin nutaurumesh aria shukeshuk agabus yoweishi inahos aria shatanam shukon aparuh shudukemesh um ananin adurin baraan aka, uwok? <sup>26</sup> Aria shopunek, hukri-pesh shokubur um shurao yopipi urkwip um shudukem Iruhin aria anan ta nukweshihesh um agundok Satan noweshikesh dodog aria shape shagipesh ananim urkum um.

### 3

#### *Hugiguk Iri Nyumneh Hutogur Um Ta Shunek Yoweishi Inahos*

<sup>1</sup> Timoti, nyak douk nyadukemesh um enyudok enen baraan shopunek. Baraan enyudok. Hugiguk iri nyumneh hutogur, apak ta mupe yoweihai nyumneh murao enenyenen amaen. <sup>2</sup> Eshudok nyumneh arpeshe ta shunek urkum um eshesh atish. Aria eshesh ta mishish shukitak um shukri shurao sabaibori utabor. Eshesh ta shukri eshesh douk yopishi arpeshe aria shenek yopinyi iri. Eshesh ta shunagunukuk aria shutuk esheshish nyeiguhw shuto iruhw aria ta shuho kupaishi shukri-pesh debeg. Aria shopunek, ta mare shumnek esheshish amakenyish esheshin baraan, uwok. Aria eshesh ta mare shunek tenkyu um kupaishi arpeshe douk shenek yopinyi um eshesh iri. Aria eshesh ta mare shumnek Iruhin ananin baraan shugipeshen, uwok. <sup>3</sup> Aria eshesh ta mare urkwip punawasham kupaishi arpeshe shutaurumesh, uwok. Eshesh

ta shunekesh kabi douk bur nubat um. Eshesh madae shukweshih yoweishi inahos kupaishi shenekeshum eshesh iri aria eshesh ta shupe um shunitok atin. Eshesh ta shuhesh aria shukripesh baraen douk madae adurin iri uwe. Aria eshesh ta mare shusuhw merik um eshesh kanak, uwok. Aria eshudok yoweishi inahos douk eshesh urkwip porumesh um shunekesh iri, eshesh ta shunekesh. Eshesh ta shukri shunek wanohw atuhw shupe. Aria eshesh ta shukri uwok abom um yopinyi aria ta shupe um shunek yoweishi inahos atish. <sup>4</sup> Aria ta shiyagwreh-pesh rohwinyum baugeshi arpesh aria shiyabig esheshish horim um shunak shusuwesh shesh. Aria arigaha eshesh ta shunek eshudok yoweishi inahos douk eshesh urkwip poromesh iri. Aria ta shunagunukuk shukri eshesh douk yopishi shadukemesh um enesh- enesh iri. Aria eshesh urkwip ta mare punawasham Iruhin, uwok. Eshesh ta mishish shikitak abom um shunek ehudok aih douk ta shunekesh aria hunekesh shumnek wosik abom atin iri. <sup>5</sup> Aria eshesh ta shukri eshesh douk yopishi shenek lotu iri. Aria eshesh ta shunek lotu meyoh. Eshesh ta shukri Iruhin douk madae dodogowin um nushanam um esheshih yoweih aih um uwe. Eshudokmori arpesh nyak mare nyuni eshesh nyupe atin, uwok. <sup>6</sup> Eshudokmori arpesh shape shenekesh namudok aria eshesh anam armam apa hape harahe hakripesh amamin baraen. Aria hanabeshuk hanak hawish ono armago owowig urusag aria hape hasumo merik. Aria oudok armago douk madae dodogowiyu um usuhw merik um owowip urkwip uwe. Owo wape um wenek yoweishi inahos atish aria wenek eneheneh yoweih aih douk owo mishish shakitakumeh um unekeh iri aih. <sup>7</sup> Aria kupaishi arpesh shakripo baraen aria ihih nyumneh owo wape um umneken um urao saki aria owo madae udukemesh um Iruhin ananin adurin atinyi baraen uwe, uwok. <sup>8</sup> Aria amudok armam hakri uwok abom um Iruhin ananin adurin atinyi baraen. Douk namudok aria amam douk hakri hen nyubuhuk kabi seiwok amudok biom Janes iri Jambres hakri hubo Moses

ananin baraen nyubuhuk um. Aria amam madae hudukemesh um Iruhin ananin baraen uwe, uwok. Amam henek rohwi iri abom aria madae husuwen dodog hugipeshen uwe. <sup>9</sup> Aria sabaishi arpesh ta shudukemesh um shukri amam douk rohwi kabi seiwok sabaishi shadukemesh um Janes iri Jambres shakri amam rohwi um. Namudok aria sabaishi arpesh ta shumnek amamin baraen aria enyen ta mare nyuhur esheshiruh aparuh um shumneken shugipeshen uwe, uwok.

*Pol Nakripan Dodogowinyi Baraen Timoti Um Nusuhw Iruhin Ananin Baraen Dodog*

<sup>10-11</sup> Riguk ohwak wape atugun um, nyak nyadukemesh abom um eikih aih. Aria shopunek nyadukeme um agundok yenek skulumesh um Iruhin ananin baraen aria yape yenek yopinyi atin mour um. Aria eik yakripen ihinyumorim baraen eik yenek urkum- umen iri. Eik yakripen um agundok yenek Iruhin ananin mour atin um, aria yasuhw ananin baraen dodog yagipeshen um. Aria eik yape shakamum ihishmorim arpesh. Aria meyagwreh baraen um, eik apa yeyagwreh yakripesh shokubur. Aria shopunek, eik urkum manawasham arpesh yataurumesh. Aria arpesh sheneke yemnek eriger um, eik yeyotu dodog yenek Iruhin ananin mour. Aria nyak nyadukemesh um agundok eshesh arbudok biarub atin debeirubi warub Antiok bani Aikoniam aria Listra sheneke yemnek debeiri eriger um. Aria Debeini nataurume um enenyenen amaen douk nyatogrume iri aria nanarae yape wosik. <sup>12</sup> Aria eshudok ihishmorim arpesh douk shatukur Krajs Jisas aria shukri shugipesh anan shunek Iruhin nakriyen iri um, kupaishi ta shunekesh shumnek debeiri eriger. <sup>13</sup> Aria eshudok yoweishi arpesh shuni eshudok douk shape shenek rohwmesh iri ta shupe shunek yoweishi inahos shishagrakuk riguk sharik shape shenekesh um. Aria kupaishi ta shunek rohwmesh aria eshesh ta wata shukitak shunek rohwi um enesh kupaishi shopunek.

<sup>14</sup> Aria nyak ta nyupe um nyugipesh enyudok atin baraen seiwok shenek skulumen shakrip-enyen aria nyenek bilipumen iri. Um maresh? Nyak nyadukemap apak douk munek skulumen iri. <sup>15</sup> Aria nyak nyadukemesh, seiwok nyak douk wata shokwin aria shakripen Iruhin ananin baraen nyetem ananik Buk iri aria nyak nyadukemen jurug. Enyudok baraen douk wosik um nyutaurumen nyusuhw Krajs Jisas ananin baraen dodog nyugipeshen aria Iruhin wata nuraen nyutanamori nyupe wosik abom.

<sup>16-17</sup> Enyudok ihinyumorim baraen nyetem Iruhin ananik Buk iri douk Iruhin ananin abom. Seiwok anan nohur armam henyemaguk. Aria enyen douk yopinyi abom um nyunek skulumap um mudukemen wosik aria nyiyabigap apakish yoweishi inahos mukeshuk agabus. Aria shopunek um nyukripesh dok douk shakutukuk Iruhin ananin baraen shanak shagipeshuk kupainyi iri um shutanamori shugipesh ananin adurin baraen. Aria shopunek um nyunek skulumap um mugipesh yopihi atih aih um apak Iruhin ananip miyotu dodogowip aria wosik abom um munek ihinyumorim yopinyi mour.

#### 4

#### *Timoti Ta Niyotu Dodogowin Aria Nukripesh Iruhin Ananin Baraen Ihih Nyumneh*

<sup>1</sup> Ohwak douk Iruhin nani Krajs Jisas hape hatruhw. Krajs Jisas anan douk ta kweipon nutanamori aria nunek skelimum ihishmorim shagok iri shuni shape iri arpesh. Aria anan ta nupe Debeini um ihishmorim arpesh. Douk namudok aria eik yakri ikripen enyudok dodogowinyi baraen um nyugipeshen. Baraen enyudok. <sup>2</sup> Nyak ta niyotu dodog aria nyupe nyukripesh Iruhin ananin baraen yopugunum. Aria ta eshesh shukri wosik um shumneken o shukri uwok um, nyak ta gamo nyukripesh shopunek atin. Nyak ta nyukripesh um shudukemen aria shukri enyudok baraen douk adurin. Aria enyen nyiyabigesh um eshesh douk

shenek yoweishi inahos abom aria eshesh ta shukutishukuk. Aria nyishuhur nyukripesh wosik Iruhin ananin baraen um shiyotu dodog aria shugipeshen. Aria abudok nyutob nyukripesh obi nyutob, nyak ta nyupe shakamum eshesh aria nyakihw apahw ta hwur wosik aria nyukripesh shokubur. Aria ihih nyumneh nyak ta nyupe um nyunek skulumesh um shudukemen wosik Iruhin ananin baraen. <sup>3</sup> Aria anob nyutob, enesh arpesh ta shukri uwok um shumnek Iruhin ananin adurin baraen um. Eshesh ta shukri shumnek enyudok baraen douk eshesh meyoh shakri shumneken iri. Aria eshesh ta shuhwar sabaishi arpesh um shunaki shunek skulumesh um enyudok atin baraen douk eshesh kanak mishish shakitak abom um shakri shumneken iri. <sup>4</sup> Aria eshesh ta shukri uwok um shumnek Iruhin ananin adurin atinyi baraen aria ta shukutinyukuk. Aria eshesh ta shumnek enyudok sakihasin baraen atin. <sup>5</sup> Aria nyak ta niyotu dodogowin atin aria nyutaurum nyak kanak. Aria ta enesh arpesh shumneken nyurao enen amaen um, nyak ta niyotu dodog. Aria nyukripesh Iruhin ananin baraen eshudok douk wata shutogur Kristen iri uwe um shukon aparuh Iruhin. Aria nyuneken wosik ihinyumorim mour douk Iruhin nakripen um nyuneken iri.

#### *Pol Ananin Mour Hurukatin Um Nyutuh*

<sup>6</sup> Eik Pol douk hurukatin um she igok. Aria agundok she igok um douk kabi yenek ofa um eik kanak um Iruhin um. Eik yenek ofa um eik kanak kabi eshesh Juda apa shenek ofa um wainibar abar shako Iruhin aria shourak-baruk atap um. <sup>7</sup> Aria eik douk dodogeshiwe yabo yoweihai aih habuhuk kabi douk anan nenek boksen iri nenek uhwin nabo kupaini um. Aria eik douk yenek uhwin, yenek Iruhin ananin mour yeyaten kabi douk anan nahur nenek resis iri nenek uhwin um. Seiwok arigaha douk, eik yape yasuhw Iruhin ananin baraen dodog yagipeshen. <sup>8</sup> Aria hahudok nyumnah apakin Debeini Jisas nutanamori ahi, anan ta nunek skelimum arpesh nugipesh ananin yopihi atih aih abom.



Aria hahudok nyumnah, anan ta nuke yopunyi mugu kabi douk shenek resis iri shenek uhwin sharaen iri. Enyudok mugu douk enyudok. Anan ta nuhware yopuweiri. Aria anan ta mare nuhwar eik atuwe yopuweiri, uwok. Anan ta nukriפש enyudok atin eshudok douk urkwip panawasham anan aria mishish shakitak abom um shakri shutrun nutanamori iri.

### *Nyatuh Iri Baraen*

<sup>9</sup> Aria nyak ta nyunekesh arigas atin um nyunaki nyutik eik. <sup>10</sup> Um maresh? Demas mishin nyakitak abom um nakri nurao yopishi eshudok eneshenesh um nupe wosik agundok atap. Douk namudok aria anan nakutukuk eik nanak um Tesalonaika. Aria Kresens nanak um shokugi nahobig Galesia, aria Taitus nanak um shokugi nahobig Dalmesia. <sup>11</sup> Aria eik yani Luk atun wapeik agundok. Douk namudok aria nyak nyurauri Mak niren punaki. Um maresh? Anan douk wosik um nutaurume um unek Iruhin ananin mour agundok. <sup>12</sup> Aria Tikikus, eik yeshopokan nanak um Efesus. <sup>13</sup> Aria nyak nyukri nyunakumori, nyak ta nyunak Troas aria nyuhurmei eikit debeiti saket douk takus Karpus ananit urupat aria nyusuwatume iri. Aria shopunek, eik yakri nyusuhume iri abom oudok bumeb douk shadaresho iri. Aria shopunek, nyak mare urkum mukenyagak um oudok kupaiwori bumeb shopunek douk sheneko mahishis yegenyihwis iri. Nyak ta nyusuwoume iri.

<sup>14</sup> Anudok Aleksander douk apa nakwu bras nenek eneshenesh eshudok iri apa neneke yarao sabainyi amaen. Aria kweipon apakin Debeini ta nuwanaman yoweinyi poe um enyudok anan neneken um eik iri. <sup>15</sup> Aria nyak shopunek ta gamo nyudukemesh um anan. Um maresh? Riguk apak makriפש Iruhin ananin yopinyi baraen um, anan nakri abom um nubo apakin baraen nyubuhuk.

<sup>16</sup> Aria nubokadae sagomatin eshesh Rom shenekume kwot um, madae enen arpen nyutaurume uwe, uwok. Ihishmorim shanogugur aria shakutuweik sharuwok. Aria eik yakri Iruhin mare

nuwanamesh yoweinyi poe eshudok arpesh douk sharuwokume iri. <sup>17</sup> Aria apakin Debeini nape nani eik neneke yeyotu dodogoiwe aria yakriפש abom um ananin baraen ihishmorim madae shudukemesh um Iruhin iri uwe douk shantorum shape shemnek kwotog iri shemneken. Aria eshesh hurukatin um she igok, aria uwok. Anan nataurume aria eik wata yape wosik. Enyudok kabi narae natriwe iri um debeinyi mahin laion enyenyit nokwat um. <sup>18</sup> Douk namudok aria yoweishi arpesh shukri she igok um, apakin Debeini ta nutaurume aria nurae inak ipe wosik agundok anan nape Debeini um ananish arpesh um. Aria eik yakri apak mutuk ananin nyeigur nyuto iruhw ihih nyumneh. Adur atin.

<sup>19</sup> Aria nyak ta nyukriפש Prisila kwuni okwokwin arman Akwila shuni eshesh Onesiforus ananip awirop nyukri eik yenemeshugu yopuhi nyumnah eshesh. <sup>20</sup> Aria eik douk yadiguk Erastus napeik Korin aria Trofimus douk arugeh han ganik aria yadiyanuguk napeik Miletus. <sup>21</sup> Aria nyak ta nyunaki arigas. Um maresh? Ta debeinyi uhwin nyuhur youg yoweg aria nyak mare nyunaki. Aria Yubulus nani Pudens iri Linus hani okwudok armatok Klodia shani ihishmorim Kristen shape agundok iri shenekmenyugu yopuhi nyumnah nyak.

<sup>22</sup> Aria eik yakri apakin Debeini nini nyak abom nupe aria nuneken nyiyotu dodogowin atin. Aria shopunek yakri anan nutaurumep meyoh ipak ihishmorim aria nunekep pupe wosik.

## Apudok Shup Douk Pol Nenekap Panam Taitus Iri

*Banenyi Baraen Um Enyudok Baraen  
Pol Nenekan Nyanak Um Taitus Iri*

1:1-4 Pol nakrip Taitus yopinyi baraen um Iruhin nini Jisas Kraiss hutauruman

1:5-16 Pol nakrip Taitus um nugraeh anam armam hutogur debeimi hutaurum Iruhin ananish arpesih hirubmorim warub eshesh Kristen shapeum

2:1 —3:11 Pol nakrip Taitus um nukripesh baugenyum Iruhin ananin adurin atinyi baraen um eshesh Kristen esheshih aih huni bilip

3:12-15 Nyatuh iri baraen

<sup>1</sup> O Taitus, eik Pol douk yape shakamum Iruhin yenek ananin mour iri yenekumenyugu apudok shup um nyak. Eik Jisas Kraiss nagraehe aria neshopoke um inak inek enyudok mour aposel um irao ananin baraen um itaurum ihishmorim arpesih. Eshudok douk Iruhin nagraesh um shupe ananish atish abom iri um shunek bilip aria shupe dodogowish. Aria shopunek um itaurumesh um shurao ananin adurin atinyi baraen um nyiyabigesh um shugipesh ananish yopuhi yah. <sup>2</sup> Aria baugenyum enyudok baraen douk namudok. Apak madukemesh abom um apak ta mupe wosik ihih nyumneh. Aria seiwok Iruhin douk madae nunek rohwa atin uwe wata nunek agundok atap uwe, aria anan nakri enen adurin atinyi baraen um apak ta mupe wosik um. <sup>3</sup> Aria douk arigaha ahudok nyumnah Iruhin nakriyah iri hatogur aria anan kanak ta nenek ananin baraen nyatogur yopugunum. Iruhin douk nataurumap matanam um anan nakripe dodogowin atin um inak inek enyudok mour um ikripesh ananin baraen sabaishi arpesih.

<sup>4</sup> Eik yenekumenyugu apudok shup um nyak Taitus. Riguk douk eik kanak yenek skulumen um Iruhin ananin baraen.

Douk namudok aria nyak douk nyatogur kabi eikin nunganin um. Aria nyak nyani eik douk wasuhw enyudok atin baraen douk ihishmorim Kristen shasuhwen iri.

Aria eik yakri Yain Iruhin nini Kraiss Jisas anudok douk nataurumap narap matanam um Iruhin iri hutaurumen meyoh aria nyakihw apahw hwur wosik.

*Iruhin Ananish Arpesih Esheshim Debeimi Amamin Baraen*

<sup>5</sup> Eik douk yakutinyukuk nyapeik enyudok unai Krit um yakri nyunek enyudok mour douk nyak wata nyuneken nyiyaten iri uwe. Aria nyunak hirubmorim warub agundok aria nyugraeh anam debeimi Kristen um hutaurum Iruhin ananish arpesih iri kabi douk riguk yakripen um. Aria nyukri nyugraeh debeimi um, nyak ta nyunek urkum um enyudok eikin baraen. <sup>6</sup> Mamudok armam ta hunek yopihi aih namudok. Amam hupe wosik aria hunek enyudok mour um hupe debeimi um hutaurum eshesh Kristen aria mare hunek enesh yoweishi inahos, uwok. Aria arpesih shutrum aria shukri amam douk yopumi. Aria shopunek, hurao atuk atuk armago aria amamish batowish shunek bilip um Jisas aria esheshish nyeiguhw mare shuto iruhumesh um shunek enesh yoweishi inahos, uwok. Aria shopunek, shupe wosik aria shumnek amakenyish esheshin baraen shugipeshen um, nyak nyugraeh amudokmori um hupe debeimi um hutaurum Iruhin ananish arpesih. <sup>7</sup> Nyak nyadukemesh, mamudok douk hape debeimi um Iruhin ananish arpesih iri douk hape debeimi um Iruhin ananin mour. Douk namudok aria mamudok armam hunek yopihi atih aih namudok. Amam yopuyopumi abom aria hunek yopinyi atin um arpesih mare shutik enesh yoweishi inahos amam hunekesh iri, uwok. Amam hunih amam kanak aria hupe shakamum kupaishi arpesih aria mare juwehosim arigas. Aria shopunek, amam mare huwok wainibar abar aria hugugak, uwok. Aria amam mare juwehosim hubo kupaishi arpesih, aria mare urkwip purum hukri amam atum hurao sabaibori utabor iri jah, uwok.

<sup>8</sup> Amam ta hutaaurum kupairubi warubish arpesch douk shanaki rougun iri. Aria amam urkwip purum yopihi atih aih aria hutaaurum amamip urkwip aria aparuh wosik. <sup>9</sup> Aria amam ta hunek bilip aria husuwen dodog enyudok Iruhin ananin adurin baraen douk riguk kupaimi debeimi um Iruhin ananish arpesch iri hakripam-enyi. Douk amam hunekesh namudok um, amam ta hudukemesh wosik abom aria ta hukripesh enyudok baraen kupaishi arpesch. Aria enyudok adurin baraen ta nyutaurumesh shupe dodogowish. Aria shopunek, um eshudok arpesch douk shakenyuk agabus enyudok baraen iri shutrum aria shudukemesh um esheshin baraen douk madae adurin uwe, uwok.

### *Sabaishi Shenek Rohw Iri Shape Enyudok Unai Krit*

<sup>10</sup> Adur, sabaimi armam hekenyuk agabus yopinyi baraen aria hape heyagwreh sabainyi rohwin baraen aria hape henek rohw um enesh arpesch. Sabaimi amudokmori armam douk Juda. Amam douk hakri sabaimi armam hasuhw Iruhin ananin baraen iri ta hugipesh eshesh Juda esheshih aih um hutah amamiruh yegeshiweruh iri. <sup>11</sup> Amudokmori douk henekesh namudok um hakri hunek rohw um sabaimi armam huni amamiyu armago iri batowish shuni sabaishi arpesch. Amam hakripesh enyudok baraen douk madae yopinyi um amam hukripeshen uwe. Amam hakripesh namudok um maresh? Amam hakri hurao utabor aria eneshenesh eshudok enesh arpesch esheshish. Douk namudok aria nyak nyugah amudokmori armam amamig nokwatog um amam mare hukripesh enyudokmori baraen, uwok. Amam hakripesh enyudok baraen aria henekesh shatanam shakonagak agabus Iruhin. <sup>12</sup> Seiwok anan nadukemesh abom iri arman nape enyudok unai Krit. Aria eshesh shakri anan douk kabi anan profet um. Anan nakri namudok, “Seiwok arigaha douk, ihishmorim arpesch shape Krit iri douk shenek rohw abom iri. Eshesh douk wanohwish atish aria shapeum shenek eneshenesh yoweishi

inahos. Aria shawok sabaiguni worigun aria arigeh atih haesh.” <sup>13</sup> Enyudok baraen anan nakriyen iri douk adurin atin abom. Douk namudok aria nyak nyukripesh dodogowin atin um eshesh mare shumnek enyudokmori baraen, uwok. Eshesh ta shunek bilip um enyudok yopinyi adurin atinyi baraen. <sup>14</sup> Nyak nyukripesh dodogowin atin um eshesh mare shumnek eshesh Juda esheshish yoweishi sakihas shuni eshudok douk shakon agabus um enyudok adurin baraen aria esheshin baraen, uwok.

<sup>15</sup> Eshudok arpesch douk esheship urkwip aria aparuh shor wosik abom um shunek yopihi atih aih iri, ihishmorim eshudok douk yopishi. Aria eshudok arpesch douk esheship urkwip yowep aria madae shunek bilip um Jisas iri uwe, ihishmorim eshudok douk yoweishi abom. Esheship urkwip douk yowep abom. Aria eshesh madae dodogowish um shudukemesh um maren yopinyi o maren yoweinyi um uwe, uwok. <sup>16</sup> Aria eshesh shakri namudok, “Apak madukemesh um Iruhin.” Aria eshesh shenekeh iri aih douk shakonuguk agabus abom Iruhin shakri uwok um anan aria anan nakri uwok um eshesh abom. Aria shopunek, eshudok arpesch douk apa shakon agabus um baraen atin iri ta mare shunek eneh yopihi aih uwe, uwok.

## 2

### *Ruweheshi Arpesch Esheshin Baraen*

<sup>1</sup> Aria nyak ta nyunek skulumesh um enyudok yopinyi baraen kabi douk enyudok adurin yopinyi baraen nyakrium. Nyak nyunek skulumesh um eshesh shumneken aria nyutaurumesh um shunek yopihi aih um shugipesh Iruhin ananin baraen. <sup>2</sup> Nyak nyukripam enyudok atin amam ruwehemi um amam mare huwok abar aria hugugak, uwok. Amam ta urkwip purum adurir yopihi aih aria hutaaurumep wosik um amamip urkwip. Aria hupe wosik aria hunek bilip um adurin atinyi baraen aria amam urkwip punawasham Iruhin nini ihishmorim Kristen shopunek. Aria

amam hiyotu dodogowim atum um husah enenyenen dodog douk nyutogrumam iri.

<sup>3-4</sup> Aria shopunek, nyak nyukrip owo ruwehew iri armago namudok atin um owo upe Iruhin ananiyu atuw. Owo mare unakripesh agabusin kupaishi. Aria shopunek, mare uwok sabaibari abar aria ugagak, uwok. Owo ta uyabigo yopihi aih aria yopinyi baraan oudok wereroiwi um owo urkwip punawasham owowim armam huni owowish batowish. <sup>5</sup> Aria shopunek um utaurum owowip urkwip wosik aria owo urkwip pur wosik um unek yopinyi atin. Aria unek ihinyumorim owowin armagowin mour wosik aria unek yopihi aih um utaurum kupaishi arpes. Aria owo ta umnek owowim armam amamin baraan. Owo unekesh namudok um kupaishi arpes ta mare shunumogesh shububunim Iruhin ananin baraan um shen nyubuhuk, uwok.

#### *Wereroimi Amamin Baraan*

<sup>6</sup> Aria douk namudok atin, nyak dodogowin um mamudok wereroimi um nyumhur um hutaaurumep wosik amamip urkwip. <sup>7</sup> Aria ihinyumorim mour nyak kanak nyuneken iri, nyak ta nyiyabigesh yopihi atih aih um eshesh shutrih aria shugipesheh. Aria nyak nyunek skulumesh um, nyak ta urkum mur um yopihi atih aih aria nyunek enyudok mour. <sup>8</sup> Nyak ta nyiyagwreh yopinyi atin baraan um kupaishi arpes mare shumnek enen yoweinyi baraan douk madae adurin iri uwe um enyudok mour nyak nyeneken iri, uwok. Aria nyak nyunekesh namudok um eshudok douk shakri uwok um nyak nyunek Iruhin ananin mour iri ta mare shukri enen yoweinyi baraan um ohwak, uwok. Eshesh ta abraen nyesh.

#### *Shape Shakamum Kupaishi Shenekumesh Mour Meyoh Iri Esheshin Baraan*

<sup>9-10</sup> Aria nyak nyukrip eshudok douk shape shakamum kupaishi shenekumesh mour meyoh iri um shunek mour wosik. Aria shopunek, shumnek esheshim debeimi douk hekesh mour sheneken iri amamin baraan shugipeshen. Eshesh ta shunek yopinyi mour um shunek esheshim debeimi hunadudareh. Eshesh

mare shukri uwok um shumnek amamin baraan, aria mare shutrum shukwumesh aruh enesh eshudok eneshenesh, uwok. Eshesh ta shuneken wosik abom enyudok mour douk debeimi hekeshen iri um amam hutrih aria hukri Iruhin ananin baraan douk yopinyi. Anudok Iruhin, anan douk nataurumap narap matanamori um anan iri.

#### *Apak Mupe Yopupari Aria Mupe Mutrugun Um Ahudok Nyumnah Kraish Nutanamori Ahi*

<sup>11</sup> Iruhin douk nataurumap meyoh narap matanamori um anan aria mape wosik. Aria enyudok baraan um agundok Iruhin narap um nyatogur yopugunum aria ihishmorim arpes shemnekeshumen. <sup>12</sup> Aria ehudok aih um anan nataurumap meyoh um douk neyabigap um mukehuk agabus yoweih aih huni eshudok douk agundok atapishi arpes mishish shakitakumesh um shunekesh iri. Aria douk opak mupe agundok atap obi nyutob um, opak ta mutaurumep wosik apakip urkwip aria mupe munek yopihi atih aih kabi douk Iruhin nakri um. <sup>13</sup> Aria douk abudok nyutob opak mupe munek ehudok yopihi aih obi nyutob, opak munadudareh aria mupe mutrugun um ahudok yopuhi abom nyumnah douk opak madukemesh um ta hutograri iri. Ahudok nyumnah apakin Debeini Iruhin Jisas Kraish nunaki ahi, anan ta nutrugun abom aria nutogur yopugunum. Anan douk anudok arman douk nataurumap narap matanamori mape wosik atin iri. <sup>14</sup> Anan kanak nagok um nator opak um nakweshihap um ehudok yoweih aih douk howeshikap henekap mape mabrig Iruhin ananin lo iri. Aria nenekap matogur yopupari um mutogur ananish arpes abom aria mishish shakitak um munek eneheneh yopihi aih.

<sup>15</sup> Aria nyak ta nyunek skulumesh um enyudok baraan aria nyutaurumesh nyishuhur um eshesh dodogowish um shugipeshen. Aria nyukripesh dodogowin atin um eshudok arpes douk shakri uwok um shumnek yopinyi baraan iri. Um maresh? Enyudok mour douk Iruhin kanak nakripen um nyuneken.

Aria mare enesh arpesch shukri nyak douk anan rohwin arman, uwok.

### 3

#### *Apak Mupe Dodogowip Um Munek Yopihi Atih Aih*

<sup>1</sup> Aria nyishuhur nyukriפש sabaihi nyumneh um eshesh shumnek debeimi armam douk hape debeimi um gavman hataurumesh iri amamin baraden shugipeshen. Aria eshesh shukri wosik um shunek enenyenen yopinyi mour. <sup>2</sup> Aria shopunek, nyukriפש um eshesh mare shuho enesh arpesch meyoh, uwok. Esheshiruh aparuh ta hur wosik aria mare juwehosish uwe, uwok. Aria shutaurum ihishmorim arpesch shukriפש shokubur.

<sup>3</sup> Riguk apak shopunek douk madae enep yopipi urkwip pupenyap uwe, uwok. Apak madae mugipesh enyudok yopinyi baraden uwe aria Satan nenek rohwumap nenekap makutukuk yopuhi yah aria mabrig Iruhin ananin lo munek yoweishi inahos. Eshudok eneshenesh ihishmorim yoweishi douk apak mishish shakitak umesh aria manadudareh um munekesh iri showeshikap dodog kabi douk mape monoweshik um. Ihih nyumneh apak urkwip porum yoweishi inahos aria mape munek nyigiya um eneshenesh eshudok kupaishi esheshish. Aria kupaishi arpesch shatripukuk yoweisi nabes aria apak shopunek matrishuk yoweisi nabes eshesh.

<sup>4-5</sup> Aria Iruhin nataurumap narap matanamori mape wosik. Aria ananish yopihi aih douk ehudok. Anan urkum manawashamap abom aria nakri gihamap. Aria douk abudok nyutob ehudok aih hatogur yopugunum aria anan narap matanamori mape wosik. Anan douk madae urkum mur um eneh yopihi aih apak menekeh iri aria douk narap mutanamori uwe, uwok. Anan nakri gihamap abom aria nataurumap meyoh matanamori mape wosik aria neshrokuhap. Anan neshrokuhap namudok. Ananin Mishin nyenekap matogur ananish namishi arpesch. <sup>6</sup> Aria Jisas Krai douk narap matanamori um

Iruhin aria nenek yopinyi mour um apak. Anan nenek enyudok yopinyi mour aria Iruhin nakop ananin Mishin abom. <sup>7</sup> Aria Iruhin nataurumap meyoh aria nahwarap yopupari mape wosik abom iri arpesch. Aria anan nakri apak ananishi arpesch mupe wosik abom ihih nyumneh. Namudok aria apak madukemesh abom um enyudok baraden douk adurin aria mape matrugun um kweipon mupe wosik namudok um. <sup>8</sup> Aria enyudok baraden douk adurin aria apak ihipmorim ta munek bilipumen.

Aria shopunek, yakri nyak nyukriפש enyudok baraden dodogowin atinyum um eshudok arpesch douk shenek bilip um Iruhin iri esheship urkwip ta purum enyudok aria shupe dodogowish um shunek yopihi atih aih. Enyudok baraden douk yopinyi aria enyen ta nyutaurum sabaishi arpesch.

<sup>9</sup> Aria enesh arpesch shanitok shanatu-tukem um wehinyi baraden nyani baugenyum baraden um esheshish popehesh yamehesh esheshish nyeiguhw. Aria shopunek, shape shanogogonim baraden um enyudok lo douk seiwok Iruhin nakoguk Moses enyi. Enyudokmori baraden nyak mare nyuni eshesh nyusuwen aria nyuni eshesh punogogonim punitoken, uwok. Um maresh, enyudokmori ta mare nyutaurumap um munek yopihi aih, uwok.

<sup>10</sup> Enesh arpesch shape shorukwesh-eidap aria shadiyogur eshesh shasuhw Krai ananin baraden iri aria shenekesh shanasiyam um. Douk namudok aria nyak nyukriפש eshudokmori arpesch atuh o biyeh meyoh um eshesh mare shuneken atin enyudokmori. Aria ta eshesh mare shumneken um, nyak nyukeshuk agab. <sup>11</sup> Nyak douk nyadukemesh um eshudokmori arpesch douk shakutukuk yopuhi yah aria esheshih yoweih aih douk heyabigesh aria shadukemesh um eshesh douk yoweishi arpesch.

#### *Nyagiguk Iri Baraden*

<sup>12</sup> Aria meihi nyumnah eik ishopoku Artemas o Tikikus anan nunaku nutogur nupeik ganudok aria nyak ta nyunaki

nyuparuge arigas abrudok wabur Nikopolis. Um maresh, eik douk yakri um ipe Nikopolis abudok yoweibi nyutob debeihi eshah atuh hur obi nyutob. <sup>13</sup> Aria nyak nyutaurum Senas douk nadukem um Rom esheshin gavman esheshin lo iri aria nini Apolos um eneshenesh eshudok amam wokesh iri um amam ta mare eneshenesh uwok um enesh eshudok um hunak ahudok rouhi yah um.

<sup>14</sup> Aria nyukrip apakish arpesh douk shasuhw Kraiss ananin baraan iri um eshesh urkwip pur abom um shunek yopinyi atin mour um shutaurum eshudok yaruhish arpesh. Eshesh mare shupe meyoh, uwok. Eshesh shunek mour um shurao utabor buni jah aria worigun um shutaurum kupaishi shasuhw Kraiss ananin baraan iri.

<sup>15</sup> Aria ihishmorim eshudok armam armago douk shani eik mape agundok iri shanadudareh abom aria shenekumenugu yopuhi nyumnah nyak. Aria shopunek, nyukrip apakish arpesh douk shasuhw Kraiss ananin baraan iri. Shashudok douk shenek bilip um Iruhin shape gagundok iri namudok. Apak shopunek munek bilip um Iruhin iri monekumeshugu yopuhi nyumnah eshesh.

Aria eik yakri Iruhin nutaurumep meyoh ipak ihipmorim aria pupe wosik abom punadudareh.

## Apudok Shup Douk Pol Nenekap Panam Filemon Iri

*Banenyi Baraen Um Enyudok Baraen  
Pol Nenekan Nyanak Um Filemon Iri*

ves 1-3 Pol nakrip Filemon yopinyi  
baraen um Iruhin nini Jisas Krai  
hutaauruman

ves 4-7 Pol nenek tenkyu um Iruhin um  
Filemon aria nenek betenuman

ves 8-22 Pol narig Filemon um nutau-  
rum Onesimus

ves 23-25 Pol neyatak baraen aria nani  
anam henekuman yopuhi nyumnah  
Filemon

<sup>1</sup> Eik Pol douk showeshike yape um  
yenek Jisas Krai ananin yopinyi mour  
um, yani ohwakin wanin Timoti weneku  
apudok shup um nyak ohwakin arpen  
Filemon. Nyak nyani ohwak douk menek  
Iruhin ananin mour atin iri. <sup>2</sup> Shopunek  
wenekap panakumagu Iruhin ananish  
arpesh douk shantorum nyakit urupat  
shenek lotu um Iruhin iri, shani ohwakik  
mohwukwik Apia kwani ohwakin arpen  
Arkipus douk nani ohwak manoprom um  
ahwudok wanohw um agundok munek  
Iruhin ananin mour um iri.

<sup>3</sup> Ohwak wakri apakin Yain Iruhin nini  
Debeini Jisas Krai hutaaurumep meyoh  
aria hunekep aparuh hur wosik.

*Filemon Nenek Yopihi Aih Aria Pol  
Nanadudareh*

<sup>4</sup> Eikin arpen Filemon, ihih nyum-  
neh eik yenek beten obi nyutob, eik  
douk yarig eikin Iruhin um nutaurumen  
aria yenek tenkyuman um nyak. <sup>5</sup> Um  
maresh? Eik yemnek um nyak urkum  
manawasham Debeini Jisas nani Iruhin  
amamish arpesh aria nyasuhw Debeini  
Jisas ananin baraen nyagipeshen. <sup>6</sup> Aria  
douk yenek beten namudok. Yakri nyak  
nyuni ohwak mupe um munek bilip  
um Debeini aria munek enenyenen anan  
nakriyenyi. Munekesh namudok atin  
aria nyak ta nyudukemesh abom um  
ihishmorim yopishi eshudok eneshenesh

douk Krai nakopesh iri. <sup>7</sup> O eikin  
arpen Filemon, nyak douk urkum man-  
awasham abom um ihishmorim Iruhin  
ananish arpesh nyataaurumesh nyenekesh  
shanadudareh shape wosik. Nyenekesh  
namudok aria nyagabe eikin mishin  
nyeneke yanadudareh yariguk.

*Pol Narig Filemon Um Nunek Yopinyi  
Um Onesimus*

<sup>8</sup> Eik douk enen baraen aria ta  
dodogoiwe atuwe yakripen dodog um  
nyunek enesh eshudok eneshenesh um  
Krai ananin nyeigur um, aria ta mare  
ikripen dodog, uwok. <sup>9</sup> Nyak douk urkum  
manawasham Iruhin ananish arpesh aria  
eik shopunek urkum manawasham nyak  
abom. Namudok aria douk yakri ikripen  
shokubur meyoh. Eik Pol douk nyeigur  
nyato iruhw um yaraen um Krai Jisas  
ananin baraen aria ahudok nyumnah  
douk shopunek enyudok yonoweshik  
yape um enyudok ananin mour. <sup>10</sup> Aria  
douk yakri ikripen um nyunek yopinyi  
um Onesimus. Anan douk natogur  
kabi eikin nunganin um. Yonoweshik  
yape aria yatogur ananin yaken um  
agundok yataauruman nenek bilip um  
Krai um. <sup>11</sup> Anob nyutob riguk douk  
madae nunekumen enen yopinyi uwe,  
uwok. Aria douk natogur enen yopinyi  
arpen aria ta nutaurum nyak nyuni eik  
nunekumohw yopinyi atin shopunek.

<sup>12</sup> Aria ahudok nyumnah douk anudok  
yeshopokan nanakumenyugu. Aria eikin  
mishin douk shopunek nyanamanagu.  
<sup>13</sup> Abudok nyutob yonoweshik yape obi  
nyutob, um agundok yakripen Iruhin  
ananin yopinyi baraen um, eik douk yakri  
wosik um nini eik upe. Yakri nini eik  
upe nutaurume um eshudok kabi nyak  
nyuni eik upe ba nyutaurume um. <sup>14</sup> Aria  
yakri uwok um dodogoiwe-umen. Nyukri  
nyunekan mumam, nyakin mour. Na-  
mudok aria ta mare inek enesh eshudok  
arigaha nyak ta nyukri wosik.

<sup>15</sup> Aria Iruhin ta nenek Onesimus  
nuruwok-umenyaguk banab nyutob um  
ta wata nutanam-menyugu aria nini nyak  
pupe abom. <sup>16</sup> Aria douk, anan madae  
kabi riguk um atin uwe, uwok. Um  
agundok nenemen mour meyoh utabor

uwok um. Douk neshagrakuk namudok natogur kabi nyakin wanin abom um. Aria nyak ta urkum munawashaman. Eik adur urkum manawashaman, aria nyak ta nyishagrakuk eik urkum munawasham abom anan. Um maresh? Anan ta nunemen mour meyoh aria shopunek natogur abom kabi anan nyakin wanin um agundok pagipesh Debeini um.

<sup>17</sup> Namudok aria nyak nyukri eik nyakin arpen abom douk wanoprom um Iruhin ananin mour iri um, aria nunak nutogragu aria wata nyuran nini nyak pupe kabi ta eik kanak inak itogrugu ba ta nyunadudareh-ume um. <sup>18</sup> Riguk nanunu enesh eshudok o natrin nakwum-abor aruh anabor utabor um, aria eikin nyeigur nyutem um enyudok dinau. <sup>19</sup> Agundok baraenyigun eik Pol eik kanak yenyem um eikis wis iri douk agundok. Eik Pol ta iken ananin dinau. Adur, nyak Filemon nyeneke enen dinau um eik um agundok yataurumen nyenek bilip um Kraiss nyape wosik um, aria yakri uwok um ikripen. <sup>20</sup> Namudok aria eikin wanin Filemon, eik yakri nyak nyunekume enyudok douk yakripenyum, um Onesimus. Nyunekesh kabi Debeini ananish arpeshe shenekesh um. Yakri nyugabeime eikihw apahw um nyunek yopinyi kabi Kraiss ananish arpeshe apa shenekesh um.

<sup>21</sup> Namudok aria ta idukemesh abom. Douk yenekumenyagu apudok shup nyutrup aria ta nyunek enyudok douk yarigen um nyuneken iri. Adur, ihih aih douk yarigen um nyunekeh um Onesimus iri douk ta nyunekeh nyishagrakuk ehudok douk yarigen um nyunekeh iri. <sup>22</sup> Aria anabik baraenyigun douk agundok. Yakri pugapesh-ume um anam rum mupeme um inaku ishuhum. Um maresh? Eik douk yadukemesh um Iruhin ta numnek ipakin beten aria ta nutaurume itanam-umepogu.

*Anam Hani Pol Henek Atin Mour Iri Heneman Yopuhi Nyumnah Filemon*

<sup>23</sup> Epafras douk nani eik wonoweshik um Kraiss Jisas ananin mour iri douk nakri anan urkum morum nyak Filemon. Aria douk nenekumenyagu yopuhi nyumnah.

<sup>24</sup> Amudok anam manoprom menek Debeini ananin mour iri douk shopunek hakri amam urkwip porumen aria douk henemenyagu yopuhi nyumnah. Amam douk amudok. Mak, Aristarkus, Demas iri Luk.

<sup>25</sup> Wosik, eik yakri Debeini Jisas Kraiss nutaurum ipak ihipmorim meyoh aria ipakish mishish shur wosik.



## Apudok Shup Douk Shenekap Panam Eshesh Hibru Iri

*Banenyi Baraen Um Enyudok Baraen  
Shenyem Nyanak Um Eshesh Hibru*

1:1-3 Iruhin ananin baraen nyatogur nyanawereh yopugunum, um Iruhin ananin atun nuganin Jisas Kraish douk nape abom namudok atin kabi Yain Iruhin um

1:4—2:18 Jisas neshagrakuk ihishmorim enselahos

3:1—4:13 Jisas neshagrakuk Moses

4:14—6:20 Jisas anan douk apakin Debeini pris douk nenek ofa um anan kanak um Iruhin

7:1-28 Jisas anan douk nape debeini pris abom neshagrakuk Melkisedek.

8:1—9:28 Jisas anan debeini pris douk nasuhw merik um enyudok Iruhin ananin namunyi baraen kontrak. Aria ananibor owishibor douk benek enyudok kontrak nyatogur dodogowin abom.

11:1—12:29 Sabaishi seiwok shenek bilip um Iruhin iri douk sheyabigap yopihi aih um apak mugipesheh.

13:1-25 Yopihi aih apak ta mugipesheh um munek Iruhin nunadudareh-umap.

*Iruhin Ananin Nuganin Nanaki Nakripap Iruhin Ananin Baraen*

<sup>1</sup> Seiwok sabaibi nyutob, Iruhin nakrip amam profet douk hakripesh ananin baraen iri aria hanaki hakrip apakish popehesh yamehesh ananin baraen. Hakripeshen sabaihi sisigih yeh. <sup>2</sup> Aria douk ehudok hagiguk iri nymneh, ananin baraen douk nakripi ananin Nuganin meyoh nanaki nakripapen. Aria douk, Iruhin douk nagraehan um ta nugrem ihishmori eneshenesh eshudok shuni arpesheh shopunek. Seiwok baugos um, Iruhin nakrip ananin Nuganin aria nenek iruhw iri atap shani ihishmorim eneshenesh eshudok shani arpesheh. <sup>3</sup> Anan douk neyabigap abom

um agundok Iruhin dodogowin atun aria natrugun um. Anan douk nadukem Iruhin abom. Mutik anan um obi nyutob douk matik Iruhin abom. Anan douk napeum neyagwreh dodogowinyi baraen aria agudok nahobig gani iruhw utag iri ihishmorim eneshenesh eshudok shape dodog. Anan douk shan owishibor bakwrupuk apakish yoweishi inahos matogur yopup. Douk nataurumap namudok aria nato heven nakih nyeigur nyato iruhw nape yopunyi rogur ehahum anudok dodogowin atun abom iri Iruhin.

*Jisas Douk Nyeigur Nyato Iruhw Uman Neshagrakuk Iruhin Ananish Enselahos Abom*

<sup>4</sup> Iruhin ananin Nuganin douk natogur dedeben atun neshagrakuk eshesh enselahos douk sharahaen um Iruhin ananin baraen iri. Um maresh? Agundok Iruhin nahwaran Nuganin um douk neshagrakuk abom agundok nahwar eshesh enselahos um. <sup>5</sup> Seiwok, Iruhin madae nukrip enen atin ensel namudok uwe, uwok. Nakrip ananin Nuganin atun. Nakripan namudok nakri, “Nyak douk eikin Nuganin.

Doukih eik yawereh baraen um agundok eik yape nyakin Yain um.”

Shopunek anabik douk nakripan nakri, “Eik ta itogur ananin Yain, aria anan ta nutogur eikin Nuganin.”

<sup>6</sup> Aria shopunek, abudok nyutob Iruhin nakri nishopoki ananin narik iri Nuganin nubuhi agundok atap obi nyutob, anan douk nakri,

“Ihishmorim eikish enselahos ta shunek lotuman

shutuk ananin nyeigur nyuto iruhw.”

<sup>7</sup> Aria eshesh enselahos, Iruhin douk neyagwreh-umesh enyudok nakri,

“Eik yenek enselahos um shunekume mour shunaki shunak kabi uhwin nyahur um

o kabi nyih purareh hanu hato dodogowih atih um.”

<sup>8</sup> Aria Ananin Nuganin Iruhin douk nakripan namudok nakri,

“Iruhin, Nyak ta nyupe um nyupe Debeinyi namudok atin ihih nymneh.

Nyasuhw yopihi aih aria ta nyupe Debeini king

um ihishmorim eneshenesh eshudok shuni arpeshe shupe wosik.

<sup>9</sup> Nyak urkum munawasham abom um yopihi aih

aria yoweihi douk nyakri uwok-umeh abom.

Namudok aria eik nyakin Iruhin yatrin nyape Debeini abom um

ihishmorim eshudok douk nyak nyani eshesh pape atugun iri.

Eik douk yenekesh-umen namudok aria yeneken nyanadudareh nyariguk abom.”

<sup>10</sup> Shopunek Iruhin nakripan nakri,

“Debeini, seiwok watak baugos um nyak kanak nyakwarum agundok atap.

Iruhw utag douk shopunek nyakwu nyakis wis nyenekag.

<sup>11</sup> Iruhw atap aria eneshenesh eshudok ta burukworesh shunak shuwishuk, aria nyak uwok.

Ta nyupe abom namudok atin.

Iruhw atap aria ihishmorim eneshenesh eshudok ta yowesh kabi rupeh yoweh um.

<sup>12</sup> Yoweh aria nyak ta nyudareshuk kabi shadaresh anah debeihi rupah um.

Ta shunak shuwishuk kabi shawaruk yoweihi rupeh

aria shor namuhi um.

Aria nyak kanak ta nyupe abom namudok atin ihih nyumneh.”

<sup>13</sup> Shopunek nakrip ananin Nuganin nakri,

“Nyak poe agundok eikin yopunyi rogur ehahum nyupe arigaha eik ibo nyakim horim hubuhuk hupe shakamum nyak.”

Enyudokmori baraen, Iruhin douk madae nukripesh atin uwe eshesh enselahos, uwok. <sup>14</sup> Namudok aria eshesh enselahos douk meishi? Eshesh douk mishish meyoh douk shenekuman mour Iruhin iri. Anan apa neshopokesh shanaki shataurum eshudok arpeshe douk ta nuraesh aria shutanamori shuni anan shupe wosik abom iri.

## 2

### *Agundok Iruhin Wata Narap Um Douk Sagomatin Yopinyi Mour Abom*

<sup>1</sup> Iruhin ananin Nuganin douk nyeigur nyato iruhw abom neshagrakuk eshesh enselahos. Namudok aria enyudok apak memneken iri baraen, apak ta musuwen dodog mugipeshen. Mare mukri mutanam mukutinyukuk uwe, uwok. <sup>2</sup> Seiwok Iruhin nakripi enselahos shanaki shakrip Moses enyi lo douk dodogowinyi abom. Namudok aria abudok nyutob arpeshe shaken agabus enyudok baraen iri, eshesh douk ta sharao debeiri eriger wosik um esheshih yoweihi aih. <sup>3</sup> Namudok aria ta douk apak mukri mukenyuk agabus enyudok baraen um enyudok nyarik iri yopinyi mour abom douk Iruhin neneken um nurap mutanamori mupe wosik um, apak douk yah wakap um muruwok um Iruhin um. Enyudok baraen um Iruhin nakri watak nurap mutanamori um, enyen sagomatin douk Debeini Jisas narik nakripeshen. Aria eshudok douk shemneken iri, eshesh douk shakripap aria madukemesh um enyen adurin atin abom. <sup>4</sup> Iruhin shopunek nenek enyudok baraen nyatogur adurin namudok. Anan nohur arpeshe shenek sabainyi enenyenen anan atun neneken iri mour nyani eneh aih douk shatrih shakitak yowiyokuk um eheh hatogur aria apak matrih. Matrih aria makri Jisas ananin baraen douk adurin atin abom. Anan douk shopunek nakri aria Ananin Mishin nyagipesh ananim atum urkum aria nyekesh sisigin yopinyi dodog iri saki.

### *Jisas Nenekumap Yah Um Munak Um Iruhw Heven*

<sup>5</sup> Douk yakri ipak urkwip gamo purum enyudok baraen. Enyudok, Iruhin douk madae nukri um enselahos ta shupe debesh um eneshenesh douk shupe agudok namugari nahobig douk ta nunekag iri uwe, uwok. Agudok namugari nahobig douk mape makriyag iri, uwok. <sup>6</sup> Aria enen baraen nyetem Iruhin ananik Buk iri douk nyakri namudok. Nyakri,

“O Iruhin, nyak nyakri apak arpesch douk maresh arpesch, um nyak urkum morumap abom um? Apak douk arpesch meyoh.

Aria namudok mumam, um nyak nyataurumap um?

<sup>7</sup> Banab nyutob meyoh nyak nyenekap mape shakamum enselahos atin.

Aria nyak watak nyakop yopinyi big aria nyatukap mato nyeiguhw shato iruhw.

<sup>8</sup> Aria douk nyenekap mape debeipari um ihishmorim eshudok eneshenesh. Ihishmorim eshudok eneshenesh douk nyenekesh shape shakamum apak.”

Enyudok baraen douk nyakri Iruhin nenek apak arpesch mape debeipari um ihishmori eneshenesh eshudok. Madae nyukri enen atin anan neneken iri enyudok nyupeik meyoh uwe, uwok. Nyakri ihishmorim eshudok eneshenesh. Enyudok douk wosik, aria douk abudok nyutob douk madae mutik apak arpesch mupe debeipari um ihishmori eshudok uwe, watak. <sup>9</sup> Aria apak douk matik atun arman meyoh. Anudok arman douk Jisas. Banab nyutob meyoh Iruhin neneken nape shakamum enselahos atin. Iruhin nenekan nape namudok aria shan nagok um nutaurumap. Douk shan nagok aria nemnek debeiri eriger. Iruhin nataurum apak arpesch meyoh aria neshopok Jisas nanaki nagok um apak ihishmorim arpesch. Aria douk, Iruhin natuk ananin nyeigur nyato iruhw, neneken dodogowin atin abom aria nyatrugun abom.

<sup>10</sup> Yakri gamo ikrirep um enyudok. Iruhin douk nenek ihishmori eshudok eneshenesh aria nape natrish. Aria douk nape narao ihishmorim ananish batowish shatanamori um shuto iruhw heven shukih shuni anan sharao debeishi nyeiguhw. Douk namudok aria neshopoki Jisas nanaki shan nemnek debeiri eriger. Douk shan nemnek debeiri eriger namudok aria natogur debeini narik nenekumesh yah hato iruhw heven. Iruhin nenek enyudok aria douk wosik

um ananish yopihi aih abom. <sup>11</sup> Jisas douk nakwrupuk apakish yoweishi inahos aria nenekap matogur yopupari abom mape Iruhin ananipari atup. Aria anan nani apak douk matogur atup awirop abom meyoh. Namudok aria Jisas douk madae nunek abraen um nuhwarap ananish owashish um uwe, uwok. <sup>12</sup> Anan douk neyagwreh enyudok baraen nyetem Iruhin ananik Buk iri. Nakrip ananin Yain Iruhin namudok, nakri, “Eik douk ta ikrip eikish owashish um nyak.

Abudok nyutob munak munatorum atugun munek lotumen obi nyutob, eik ta ituk nyakin nyeigur nyuto iruhw.”

<sup>13</sup> Aria shopunek nakri namudok, nakri, “Eik ta ipeum inek bilip ipeum Iruhin atun um enenyenen.”

Aria shopunek nakri, “Eik douk enyudok.

Batowish Iruhin nekeyesh iri douk shopunek shani eik mape.”

### *Jisas Natogur Adurin Abom Um Nutaurum Apak*

<sup>14</sup> Eshudok arpesch douk Jisas nahwresh ananish batowish iri, eshesh douk agundok atapishi arpesch meyoh abom. Jisas shopunek douk natogur arpen. Douk nenekesh namudok um shan nagok aria nanunu agundok douk Satan nape dodogowin atun aria nenek arpesch shagok um. <sup>15</sup> Jisas shopunek nenekesh namudok um nukweshih arpesch douk shanogugur um shugok aria esheshih nyumneh shapeum douk ehudok aih howeshikesh dodog abom iri.

<sup>16</sup> Aria douk madukemesh namudok. Jisas douk madae nataurum eshesh enselahos uwe, uwok. Anan douk nataurum Abraham ananish barheshish.2:16

<sup>17</sup> Jisas douk adur nanamori nutaurum apak arpesch. Douk namudok aria narao arpenyihw yegenyihw abom nadukem apak ananishi owashish um ihishmorim aih. Douk nenekesh namudok um natogur apakini Debeini Pris abom aria nusuhw Iruhin ananin mour nuneken

2:16 **2:16** Baugenyum enyudok baraen um Abraham ananish barheshish douk biyen. Enen nyakri eshudok Abraham ananish barheshish douk eshesh Israel. Enen nyakrium apak munek bilip iri.

wosik abom. Anan douk nenek gihaumap aria nataurumap namudok um Iruhin nukweshihuk apakish yoweishi inahos. <sup>18</sup> Aria douk, meishi arpeshe douk Satan nukwiraehesh um shunek yoweishi inahos iri, apakini Debeini Pris douk ta naurumesh. Um maresh? Abudok nyutob Satan nukwiraeh anan obi nyutob, anan kanak douk narao debeiri eriger, aria neyotu dodog.

### 3

#### *Jisas Douk Nyeigur Nyato Iruhw Abom Nyeshagrakuk Moses*

<sup>1</sup> O eikish arpeshe douk pape Iruhin ananip iri, ipak douk Iruhin nagraehesh aria nahwarep um ta puni ananish arpeshe puto um iruhw heven. Douk eik yakri ipak urkwip gamo purum Jisas. Anan douk Iruhin nagraehan aria neshopokan nanaki nakripep enyudok adurinyi baraan douk apak masuhwen magipeshen aria makripepshen iri. Anan douk natogur debeini pris abom aria nape orokohun um apak mani Iruhin. Nape aria nenek mour nataurumap um munak hurukatin um Iruhin. <sup>2</sup> Anan douk Iruhin nagraehan aria nenek enyudok yopinyi mour. Neneken kabi seiwok Moses nenek Iruhin ananin yopinyi mour abudok nyutob nape debeini um ihishmorim Iruhin ananish arpeshe obi nyutob. <sup>3</sup> Jisas anan douk nyeigur nyato iruhw abom neshagrakuk Moses kabi arpeshe shatik anat urupat aria shatik naruk urupat iri ananin nyeigur nyato iruhw um. <sup>4</sup> Ihig urusag douk adur arpeshe sharukog. Aria nenek ihishmori eshudok iri douk Iruhin. <sup>5</sup> Moses anan douk nenek Iruhin ananin mour neneken yopinyi abom. Anan nasuhw Iruhin ananin baraan aria nape debeini um ihishmorim Iruhin ananish arpeshe nataurumesh. Nataurumesh aria neyagwreh baraan um enyudok mugu kweipon Iruhin ta nuneken nyutograri iri. <sup>6</sup> Aria Krai, anan douk Iruhin ananin naganin. Anan douk nenek Iruhin ananin yopinyi mour aria nape

debeini um Iruhin ananish arpeshe nataurumesh. Aria ta apak mupe dodog mupe mutrugun um kweipon muraao Iruhin ananish yopishi eshudok eneshenesh um, apak adur abom Iruhin ananishi arpeshe.

#### *Shakonuk Agabus Jisas Iri Ta Mare Shuwish Shuni Iruhin Shupe Shurao Uhwini, Uwok*

<sup>7</sup> Ipak douk pape Iruhin ananishi arpeshe namudok aria punek yopihi aih kabi Iruhin ananin Mishin nyakrium. Nyakri namudok,

“Douk, ta eik Iruhin ikri ikripep enen baraan um,

<sup>8-9</sup> ipak mare pukenyuk agabus kabi seiwok ipakish popehesh yamehesh shenekesh um, uwok.

Eik douk yakri um itaurumesh, aria eshesh shakri uwok um shumneke. Namudok aria sheneke juwehosiwe atuwe.

Abudok nyutob shape wehigunum arpeshe iri urah uwok enesh um uwe obi nyutob,

eshesh douk shape shokwiraeh eik um eneshenesh shenekesh iri yoweishi inahos.

Shape agundok wehigunum aria shatik sabainyi dodogowinyi mour douk yape yeneken um 40-poreish kwarahos iri.

Eik douk yakri um itaurumesh, aria shakri uwok um shumneke. Shape shokwiraeh eik um eneshenesh shenekesh iri yoweishi inahos.

<sup>10</sup> Douk namudok aria eik juwehosiwe abom um eshudok arpeshe.

Aria douk yakri, ‘Eshudok arpeshe douk shagipeshuk kupainyi baraan.

Namudok aria eshesh madae shudukem ehudok aih eik yakriyeh iri uwe, uwok.’

<sup>11</sup> Sheneke juwehosiwe namudok aria yakri um iruhw abom

yakri adur um, eshesh ta mare shuwish um agundok douk

esheship urkwip pur wosik aria shupe wosik um.”<sup>3:11</sup>

**3:11** **3:11** Enyudok baraan douk nyakrium seiwok eshesh Israel madae shuwish shurao uhwin Kenan uwe. Aria douk, Iruhin nakri ananish arpeshe ta muraao uhwin um mupe wosik douk agundok atap muni gani iruhw heven shopunek.

*Apak Mare Musuwokuk Iruhin Ananin Baraen Kabi Eshesh Israel Um, Uwok*

<sup>12</sup> Namudok aria eikish arpes, ipak douk gamo pumnek. Ta enen nyukri urkum mur um eneshenesh yoweishi inahos aria nyukutukuk bilip um nyukon agab anudok Iruhin douk nape ihih nyumneh iri, aria namudok ta uwok.

<sup>13</sup> Aria douk yakri. Douk, nyutob watak bape um ipak pugipesh ananin baraen um. Eik douk yakri ihih nyumneh um ipak punagapeshum piyotu dodogowip pusuhw ananin baraen dodog pugipeshen. Punelesh namudok aria ta mare enen arpen enyenyin mishin nyikitak um nyunek enesh yoweishi inahos, uwok. Ta eshudok yoweishi inahos shunek rohwomen aria enyudok arpen nyukonuk agab abom Iruhin.

<sup>14</sup> Apak miyotu dodog masuhw Jisas ananin baraen mugipeshen kabi riguk makri adurin atin masuhwen magipeshen um. Musuwen dodog arigaha mugok um, apak ta muni Krai munoprom mupe atugun. <sup>15</sup> Baraen nyetem Iruhin ananik Buk iri douk iganigadae yakripepen. Nyakri namudok, “Douk ta eik Iruhin ikri ikripep enen baraen um,

ipak mare pusuwokuk enyudok baraen kabi seiwok ipakish popehesh yamehesh shenekesh um, uwok.”

<sup>16</sup> Ipak pakri seiwok douk meishi arpes shemnek Iruhin ananin baraen aria shasuwoke-ukuk shakon agabus? Eshudok arpes douk eshudok ihishmorim Moses narikumeshi aria shakutukuk debeigi nahobig Isip shanaki iri.

<sup>17</sup> Aria shopunek yakri iyorigep. Ipak pakri meishi arpes abom shape shenek yoweishi inahos um 40-poreish kwarahos aria shenek Iruhin juwehosin atun abom? Anan douk juwehosin atun um eshudok douk shape shenek yoweishi inahos aria shagok shakusuk wehigunum arpes uwok um. <sup>18</sup> Aria shopunek yakri iyorigep. Ipak pakri Iruhin nakri um adur iruhw nakri adur atin um meishi arpes ta mare shunak shuwish shuni anan shupe shurao uhwin? Anan douk

nakri um eshudok douk shasuwoke-ukuk um ananin baraen iri. <sup>19</sup> Namudok aria apak madukemesh. Eshesh douk mare ta shunak shuwish shuni Iruhin shupe shurao uhwin uwe, uwok. Um maresh? Eshesh douk madae shusuhw ananin baraen wosik shugipeshen uwe, uwok.

## 4

*Iruhin Ananish Arpes Ta Shunak Shuwish Shuni Anan Shupe Shurao Uhwin*

<sup>1</sup> Iruhin ananin adurin atinyi baraen um ananish arpes shuwish shuni anan shupe shurao uhwin um douk watak dodogowin nyape. Douk namudok aria yakri apak gamo mudukemesh abom um mare enen atin nyupeiguk agundok atap um mare nyunak nyuwish nyuni Iruhin nyupe nyurao uhwin uwe, uwok. <sup>2</sup> Apak douk shopunek memnek Iruhin ananin yopinyi baraen kabi seiwok apakish popehesh yamehesh shemneken um. Eshesh douk shemneken, aria enyen madae nyunekumesh enen yopinyi mugu uwe, uwok. Um maresh? Eshesh madae shusuhw Iruhin ananin baraen dodog abom shugipeshen uwe, uwok.

<sup>3</sup> Douk, apak masuhw Iruhin ananin baraen dodog magipeshen iri, apak douk ta munak muni Iruhin mupe murao uhwin. Kabi baraen nyetem Iruhin ananik Buk iri nyakrium. Iruhin nakri, “Eik douk juwehosiwe um eshudok shakenyuk agabus eikin baraen iri.

Shenekesh namudok aria yakri um iruhw abom

aria yakri adur atin eshesh ta mare shuwish shuni eik mupe murao uhwin uwe, ta uwok.”

Iruhin seiwok nakwarum agudok nahobig aria ananin mour nyatuh, aria anan douk watak nakriyuk namudok. <sup>4</sup> Um maresh? Enen baraen nyetem Iruhin ananik Buk iri douk nyakrium ahudok hakri um 7-ih nyumnah. Nyakri, “Iruhin nenek eneshenesh eshudok neyatesh 6-poreih nyumneh. Aria hakri um 7-ih nyumnah um, anan narao uhwin.”

<sup>5</sup> Baraen iganigadae yenyem nyetem iruhw iri, Iruhin douk nakri,

“Eshesh ta mare shuwish shuni eik mupe murao uhwin uwe, ta uwok.”

<sup>6</sup> Enyudok adurin atinyi baraen douk watak nyape namudok, aria douk yah hapeum enesh shuwish shuni anan shupe shurao uhwin. Seiwokishi douk sharik shemnek Iruhin ananin baraen, aria shakenyuk agabus. Namudok aria eshesh madae shunak shuwish shurao uhwin uwe, uwok. <sup>7</sup> Namudok aria Iruhin watak nagraeh kupaibi nyutob aria no-hwarab “Douk”. Arigaha sabaishi kwarahos shanak shadiguk, aria anan Iruhin nohur king Devit aria Devit nakri enyudok atin baraen nyetem nyarik iri. Devit nakri Iruhin neyagwreh enyudok, nakri, “Douk ta eik Iruhin ikripep enen baraen um,

ipak mare pukenyuk agabus uwe, uwok.”

<sup>8</sup> Douk ta Josua nurik um eshesh Israael shunak shuwish shurao uhwin Kenan atugun akure, Iruhin ta mare watak nugraeh kupaibi nyutob shopunek ta uwok. <sup>9</sup> Aria anah nyumnah douk watak hapeum Iruhin ananish arpeshe shunak shuwish shurao uhwin um. Kabi seiwok sagomatin narik nenek eneshenesh eshudok neyatesh 6-poreih nyumneh aria hakri um 7-ih um anan nape nurao uhwin um. <sup>10</sup> Meishi eshudok douk shuwish sharao uhwin kabi Iruhin nakri um iri, eshesh douk sheyatak esheshin mour aria shawish sharao uhwin kabi seiwok Iruhin neyatak ananin mour aria narao uhwin um. <sup>11</sup> Douk namudok aria apak ta dodogowip atup abom um muwish murao uhwin<sup>4:11</sup> namudok. Munekesh namudok um ta mare enesh shupeik agundok atup um mare shuwish shurao uhwin uwe, uwok. Kabi seiwok apakish popehesh yamehesh shakonuk agabus Iruhin ananin baraen aria madae shuwish shupe shurao uhwin um uwe.

<sup>12</sup> Apak mare mukonukuk agabus Iruhin ananin baraen, uwok. Um maresh? Ananin baraen douk dodogowin atin abom aria yopunyi mishin nyapenyen ta nyunek eneshenesh yopishi eshudok. Enyen douk wanohwin atin abom nyeshagrakuk ihig bainatog douk shawatog gwenek eres wobuwobur

um. Apa nyaduk arpeshe nyawish gani numun douk apakip urkwip aria mishish shapeum, nyeshagrakuk abom nyawish nyasuhw gani douk bishiguh shatakum nyawish nyasuhw abar bor bishiguh iri. Nyawish aria nyape nyawerehi enenyenen apakip urkwip poromen iri nyani eshudok apak mishish shakitak-umesh iri. <sup>13</sup> Apak douk madae wosik um mubeshuk enesh eshudok um Iruhin uwe, uwok. Anan kanak nakwarum eneshenesh eshudok aria natrish um douk shanowereh shapei yopugunum iri atish. Kweipon apak ta mukripan um ihimori eneheneh apak menekeh iri aih.

*Jisas Anan Douk Debeini Pris Abom Neshagrakuk Ihim-morim Pris*

<sup>14</sup> Apak douk anan debeini pris abom nape orokohun um apak mani Iruhin aria nape nataurumap. Anan douk Iruhin ananin nuganin Jisas. Anan douk nanak nawish heven, agundok Iruhin napeum. Namudok aria apak douk musuhw ananin baraen dodog abom. Enyudok baraen douk apak mape magipeshen aria meyagwreh arpeshe shemnekapum. <sup>15</sup> Apakini debeini abom pris douk adur apa nenek gihaumap aria nataurumap. Abudok nyutob eneshenesh yoweishi inahos shunakumori apak aria mare dodogowip obi nyutob uwe, anan douk nadukem apakip urkwip aria nataurumap abom. Aria anan, Satan douk nakwiraehan um ihih yeh um nunek yoweishi inahos kabi apak um. Aria anan madae nutu nunek enesh yoweishi inahos uwe, uwok. <sup>16</sup> Douk Jisas nape nataurumap namudok aria apak mare munogugur uwe, uwok. Dodogowip atup abom aria munak muwish agundok douk Iruhin nape debeini abom aria nataurum ananish arpeshe meyoh um. Munekesh namudok aria abudok nyutob yoweishi inahos shukri shunaki aria apak mare dodogowip obi nyutob, ta bishiguh shataurumap abom aria ta nutaurumap meyoh.

## 5

*Jisas Anan Douk Debeini Pris Abom*

<sup>1</sup> Ihim-morim debeimi pris abom douk Iruhin natik arpesch meyoh nagraeham aria nomusop um hurao esheshiyu out-umeb um hunekuman mour anan. Nomusop um hutaurum arpesch hukon yopiyopishi eshudok eneshenesh anan Iruhin aria huwesh esheshish mahish hukon um anan nukweshih yoweishi inahos eshesh shenekesh iri. <sup>2</sup> Aria amam douk hani apak arpesch atish aria atup awirop. Abudok nyutob eneshenesh yoweishi inahos shunakumori amam obi nyutob, amam douk madae dodogowim uwe, uwok. Namudok aria arpesch douk watak shorshor um, mare shugipesh Iruhin wosik iri uwe, amam douk hadukemesh aria shokubur hataurumesh wosik. <sup>3</sup> Madae dodogowim namudok uwe aria amam douk apa henek ofa um mahish hako Iruhin um anan mare urkum mur um yoweishi inahos amam henekesh iri ba iyoh, aria kadak henek arpesch esheshin ofa nyugiguk.

<sup>4</sup> Aria arman natogur debeini pris iri douk narao debeinyi mour abom. Mare anan arman anan kanak nunagraeh aria douk ta nuraen uwe, uwok. Iruhin atun nagraeham douk aria heneken. Kabi seiwok nahwar Eron natogur debeini pris um. <sup>5</sup> Aria Kraish douk namudok atin. Anan kanak madae nunagraeh um nurae debeinyi nyeigur um enyudok mour um nutogur debeini pris uwe, uwok. Iruhin meyoh nagraehan. Baraen nyakripan um douk nyakri,

“Nyak douk Eikin Nuganin.

Douk Eik yawereh baraen um agundok Eik yape Nyakin Yaken um.”

<sup>6</sup> Shopunek enen baraen Iruhin nakri, “Nyak ta nyunek pris nyupe namudok ihih nyumneh

kabi Melkisedek um.”<sup>5:6</sup>

<sup>7</sup> Abudok nyutob Jisas nape agundok atap obi nyutob, anan douk nenek beten narig Iruhin um natauruman. Nareh abih aria nahwar debeg um natauruman. Anan douk nadukemesh um Iruhin ta nurae um mare shon nugok, uwok.

Aria anan douk nemnek aria natauruman um nenekan dodogowin. Um maresh? Anan douk nape shakamum Iruhin aria nenek lotuman. <sup>8</sup> Anan douk adur Iruhin ananin nunganin, aria narao debeiri eriger. Namudok aria douk nadukemesh um agundok nusuhw Yain ananin baraen dodog nugipeshen um. <sup>9</sup> Douk nagipesh ananin baraen nenek yopihi atih aih aria natogur sagomin debeini pris. Douk namudok aria natogur debeini um ahudok yah um Iruhin nurae ihish arpesch douk shasuhw ananin baraen shagipeshen iri aria shutanamori shupe wosik abom ihih nyumneh um. <sup>10</sup> Douk nenek enyudok aria Iruhin nagraehan nape debeini pris abom kabi Melkisedek um.

*Apak Mare Mudukem Batowish Um Agundok Mugipesh Iruhin Ananin Baraen Um, Uwok*

<sup>11</sup> Eik douk sabainyi baraen nyape, um ta ikripep um agundok Jisas nape kabi Melkisedek um. Aria ta itaurumep ikripep aria mare punnek, uwok. Um maresh, ipak madae arigas puraen baraen aria pudukemen wosik uwe, uwok. <sup>12</sup> Adur, ipak douk patogur Iruhin ananish arpesch roubi nyutob. Douk ta pupe punek skulum kupaishi um enyudok Iruhin ananin baraen. Aria douk watak papeum enesh gamo shukripep nyarik iri Iruhin ananin baraen shopunek. Ipak douk padukem batowish. Dodogowiguni worigun uwok. Watak apa pawok nyumaguhw atin um agundok pape um parao nyarik iri Iruhin ananin baraen atin um. <sup>13</sup> Ipak douk padukemesh. Arpesch shape kabi batowish um douk madae dodogowish uwe aria watak shawok nyumaguhw atuguhw. Eshudokmori arpesch douk madae gamo shudukemesh uwe um meih aih yopihi aria meih yoweih um uwe, uwok. <sup>14</sup> Aria dodogowiguni worigun douk yopugunum shugnoh iri. Eshudokmori arpesch douk nubokadae toinyish shadukemesh um meih aih yopihi aria meih yoweih um shugipesh yopihi atih.

## 6

### *Apak Miyotu Dodogowip Atup Abom Um Bilip*

<sup>1-2</sup> Apak ta mugipesh Kraiss ananin baraan mishagrakuk kabi riguk marik masuhwen magipeshen um. Apak mare watak mupe um munak um nyarik iri baraan um agundok mugipesh Kraiss um, uwok. Enyen douk enyudokmori. Mukeshuk agabus eneshenesh yoweishi inahos douk ta munekesh aria Iruhin nop mugok um, musuhw Iruhin ananin baraan dodog mugipeshen abom um, munek anas baptaisum, muwemesh wis arpesh aria morig Iruhin um nukesh ananin Mishin um, shagok iri ta watak shukitakumori, Iruhin nunekumesh kwotog aria neshopokesh shunak shupe yopuburi o yoweiburi wabur um ihih nyumneh um. Apak mare mupe um enyudokmori atin, uwok. Douk ta munak um dodogowip um bilip iri esheshin baraan. Mare mupe munekesh kabi arpesh douk shapeum shenek tuk hwao uroruh, aria shabirak madae shuwem urupat iri um uwe, uwok. <sup>3</sup> Enyudokmori Debeini ananin baraan, ta Iruhin nukri wosik um, aria apak wosik ta mutanam mupe miyagwreh aria mugipeshen.

<sup>4-6</sup> Enesh arpesh douk shemnek Iruhin ananin baraan aria shadukemen wosik kabi shape bogaragun abom um. Shadukemesh um enyudok yopinyi douk nyanaki iruhw heven iri, sharao Iruhin ananin Mishin. Shopunek shadukemesh um agundok Iruhin ananin baraan adur yopinyi abom um, Iruhin nenek enenyenen shatik ananin gobi nyatogur yopugunum abudok yopibi nyutob riguk shakri um ta butograri iri. Namudok aria eshudokmori arpesh shukri shukutukuk bilip aria shukon agabus Iruhin abom um, eshesh douk yah wokesh um watak shutanamori shukon aparuh um. Shakanaguk agabus namudok aria enyudok douk kabi eshesh watak shopunek showeshik Iruhin ananin Nuganin rowog kruse aria shenek arpesh shape shenekan enenyenen um.

<sup>7</sup> Ipak pumnek enyudok wobuwobren baraan. Sabaih atih eshah apa hor habuh

anab amnab. Aria ta enesh arpesh shurib shu worigun abudok amnab aria yopuguni worigun nukihumesh um, apak douk mudukemesh um Iruhin ta nunekumab yopinyi abom abudok amnab. <sup>8</sup> Aria ta abudok amnab douk segego watogroruhi madururuh hani yoweiruhi utaruh aturuh hukih um, apak ta mukri abudok amnab douk yoweb. Iruhin douk juwehosin atun um abudok amnab aria hurukatin um nuhwarab yoweibi. Aria anob nyutob douk ta nyih hunub hununub.

<sup>9</sup> Ipak eikishi abom arpesh, eik adur yeyagwreh enyudok dodogowinyi baraan, aria yadukemesh um ipak ta mare pugipesh ehudokmori yoweih aih, uwok. Um mares? Ipak douk penek sabaihi aih kabi arpesh douk Iruhin naraesh shatanamori shape wosik abom iri shenekeh iri um. <sup>10</sup> Iruhin anan douk madae anan yoweini arman uwe, uwok. Anan ta mare urkum mukonaguk um yopinyi mour ipak peneken iri, uwok. Ipak douk pataurum ananish arpesh aria namudok douk peyabigan um agundok ipakip urkwip panawasham anan abom um. Aria ipak douk watak pape pataurumesh namudok atin. <sup>11</sup> Namudok aria eik yakri ipak atin punekesh namudok atin arigaha Kraiss nutanamori. Punekesh namudok um ta pudukemesh abom um Iruhin ta nukep yopishi eshudok eneshenesh douk roubi nyutob pape patrugun um nutogur nukopesh iri. <sup>12</sup> Eik douk yakri uwok um ipak arigeh hep uwe, uwok. Yakri pudukem eshudok arpesh douk seiwok shasuhw Iruhin ananin baraan dodog shagipeshen iri. Eshesh douk shenek bilip aria shape shokubur atin ariga ha sharao eshudok douk Iruhin nakri adurin atin um ta nukeshesh iri.

### *Apak Douk Musuhw Iruhin Ananin Adurin Atinyi Baraan Aria Mukri Anan Ta Nunekesh-umap Kabi Nakri Um*

<sup>13</sup> Seiwok Iruhin nakrip Abraham enen adurin atinyi baraan um ta nunekuman enesh yopishi eshudok eneshenesh. Iruhin nakri uwok um Abraham nukri anan douk nenek rohw. Namudok aria Iruhin nakri um iruhw anan kanak ananin nyeigur um ta nunekeshuman um



atin. Iruhin douk nakri anan kanak nyeigur um maresh? Arpen douk madae enen shopunek nyeigur nyuto iruhw nyishagrakuk anan uwe, uwok. <sup>14</sup> Aria nakripan namudok. Nakri, “Adur atin yakripen, eik ta inekumen yopinyi abom aria ta inek nyakish barheshish shuto-gur sabaishi abom.” <sup>15</sup> Abraham nasuhw Iruhin ananin baraan nakri adurin aria nape shokubur atin apa natrugun. Nape natrugun arigah arigaha Iruhin nenekuman enyudok kabi nakripan um.

<sup>16</sup> Apakih aih douk namudok. Enen arpen nyukri enen baraan aria kupaishi shukri enyen nyenek roh w um, enyudok arpen apa nyakri adur atin nyakrium enen nyeigur nyato iruhw enyi arpen enyenyin nyeigur. Namudok aria enyen nyagaheshuk eshudok arpeshig nokwatog. <sup>17</sup> Aria Iruhin douk namudok atin. Seiwok nakri adur atin um ta nunekumap yopishi eshudok eneshenesh. Anan douk nakri uwok um apak mukri anan ta wata nuwanam urkum um. Namudok aria nakitak nakri um anan kanak ananin nyeigur um enyudok adur ta nuneken atin um. <sup>18</sup> Iruhin nenek enyudok um apak mumnek, miyotu dodogowip um bilip aria mudukemesh um enyudok Iruhin ananin adurin atinyi baraan ta nyutogur adurin atin. Iruhin nakri enyudok baraan nyanakumori apak douk makutukuk yoweishi inahos aria anan nataurumap nahwarap manak um anan iri. Douk biyen baraan nyape. Enyudok anan nakri enyi adurin atinyi baraan nyani enyudok douk nakri um anan kanak ananin nyeigur um. Enyudok biyen baraan ta mare nyunawanam um kupainyi baraan, aria Iruhin ta mare nunek roh w, uwok. <sup>19-20</sup> Douk apak dodogowip atup madukemesh um Iruhin ananin adurin atinyi baraan ta nyutogur adurin atin. Apak douk matukur Jisas kabi douk shakwutu enen anka nyasuhw anat bot teir dodog anagun yopugunum. Apak douk matukur Jisas aria narikumap narik nanak nawish numun ahudok debeihi rupah douk hataur numun Iruhin ananit debeiti urupat gani iruhw heven iri. Anan nenekesh namudok um nutaurumap. Aria douk natogur debeini pris

abom jurug nape namudok ihih nyumneh kabi Melkisedek um.

## 7

### *Melkisedek Anan Douk Debeini Abom Pris Douk Nenek Mour Um Iruhin Iri*

<sup>1</sup> Anudok arman Melkisedek douk debeini king um wabur nyeiguri-burum Salem. Anan douk shopunek anan pris aria apa nenek ofa eneshenesh nako anudok Iruhin douk nabouk ihishmori eshudok eneshenesh shabuhuk iri dodogowin atun abom. Seiwok Abraham nanak um wanohw nabouk amudok debeimi armam king hagok aria watak natanamum wabur. Nape nanak aria anudok Melkisedek nanaki naparugan yah. Naparugan aria narig Iruhin um nunekuman yopinyi anan Abraham. <sup>2</sup> Aria Abraham nakitak nobuk ihishmori eshudok douk nanak um wanohw neshuhur iri um 10-poreip hip. Aria atup hip douk nako Melkisedek. Baugenyum um enyudok nyeigur Melkisedek douk nyakri, “Debeini arman king douk nenek yopihi atih aih iri”. Enyudok baraan um nape king um wabur Salem um, baugenyum um enyudok baraan douk nyakri, “Anan nape debeini arman king nataurum ananish arpesh aparuh hur wosik aria wanogwiruh uwok shape wosik shanadudareh.” <sup>3</sup> Anudok arman Melkisedek, baraan nyetem Iruhin ananik buk iri douk madae nyukripap um ananin yain o amakek o enesh ananish popehesh yamehesh uwe, uwok. Shopunek nyutob nakitak obi nyutob o nagok obi nyutob apak madae mudukemesh uwe, uwok. Anan douk nenek pris nape namudok atin ihih nyumneh kabi Iruhin ananin Nuganin um. Madae jurug uwe.

<sup>4</sup> Aria douk yakri ipak urkwip purum anudok debeini abom arman Melkisedek. Tik, Abraham anan douk apakini nyeigur nyato iruhw iri um sagomin yamenen. Aria anan nasiya yopishi eshudok eneshenesh douk nanak um wanohw neshuhur iri um 10-poreip hip, aria atup hip douk nako Melkisedek. <sup>5</sup> Enyudok lo seiwok Iruhin nakoguk Moses enyi douk nyakri amam hakitak Livai ananip awirop aria hatogur pris iri atum ta hurao enesh

eshudok douk eshesh Israel shaparugesh iri. Eshesh douk shani amam apudok awirop Livai atish abom shakitak atun yamenen Abraham. Aria enyudok lo nyakri namudok. “Eshesh asudok anas awiros ta shusiya ihishmori shaparugesh iri eshudok um 10-poreip hip aria atup hip ta shuko amam pris.”<sup>6</sup> Anudok Melkisedek, anan douk madae anan um eshesh apudok awirop Livai uwe, uwok. Aria Melkisedek douk narao enesh eshudok eneshenesh um eshudok Abraham neshuhur iri. Naraesh iyoh aria narig Iruhin um nunekuman yopinyi Abraham. Enyudok yopinyi douk seiwok Iruhin nakripan adurin atinyi baraen um ta nunekesh-uman nupe wosik um.<sup>7</sup> Aria apak douk madukemesh. Arpen nyarig Iruhin um nunekumen yopinyi kupainyi iri, enyudok arpen douk enyenyin nyeigur nyato iruhw nyeshagrakuk enyudok enen douk enyen nyarig Iruhin um nunekumen yopinyi iri.<sup>8</sup> Amam pris douk harao enesh eshudok um eshudok douk eshesh Israel shaparugesh iri, amam douk madae hupe abom uwe, uwok. Hagok. Aria anudok arman Melkisedek douk narao enesh eshudok um eshudok douk Abraham neshuhur iri, anan douk nape ihih nyumneh kabi Iruhin ananik Buk kwakripap um.<sup>9</sup> Livai douk baugos abom um amam pris hakitak ananip awirop iri. Amam douk harao enesh eshudok eneshenesh um eshudok douk eshesh Israel shaparugesh iri. Abudok nyutob Abraham nakon enesh eshudok eneshenesh um neshuhur iri um Melkisedek obi nyutob, apak ta mukri enyudok douk kabi Livai nakon um.<sup>10</sup> Apak ta mukri namudok. Um maresh? Adur abudok nyutob Abraham nakon enesh eshudok eneshenesh neshuhur iri um Melkisedek obi nyutob, Livai douk madae shunabuki uwe, uwok. Aria douk sabaishi kwarahos shanakuk aria anan douk shanabuki apudok Abraham ananip awirop atup.

*Anan Debeini Pris Abom Douk Nakitak Neshagrakuk Seiwokimi Pris*

<sup>11</sup> Seiwok eshesh Israel sharao lo um agundok shunek lotu um Iruhin um.

Aria enyudok lo douk nyakri amam apudok awirop Livai atum husuhw enyudok mour pris. Aria ta enyudok mour nyunek arpesh shutogur yopishi akure, Iruhin ta mare watak nukri um kupaini pris nutogur, aria uwok. Anudok namuni pris douk madae nudukem Eron uwe, uwok. Natogur abom kabi Melkisedek um.<sup>12</sup> Douk anudok namuni pris natogur aria enyudok lo seiwok Iruhin nakoguk Moses enyi ta nyutogur ana-haehin.<sup>13</sup> Anudok yakripep-uman iri pris douk kupaipi awiropin. Anan douk madae nukitak apudok awirop Livai uwe, douk apa hasuhw enyudok mour pris aria henek mour alta hakon eshudok enesh-enesh Iruhin iri um uwe, uwok.<sup>14</sup> Aria apak douk madukemesh apakin Debeini douk nakitak apudok awirop Juda. Aria seiwok, Moses douk madae nukri um amam Juda husuhw enyudok mour pris uwe, uwok.

<sup>15</sup> Apak douk matik anudok namuni pris natogur nadukemesh abom um Melkisedek. Namudok aria mudukemesh wosik abom um anan douk nyeigur nyatouman iruhw neshagrakuk amam pris douk hakitak apudok awirop Livai iri.<sup>16</sup> Anan douk madae nukitak Livai ananip awirop aria douk nutogur pris uwe, uwok. Anan natogur pris um mumam? Anan douk dodogowin atun abom aria ta nupe ihih nyumneh mare nugok, uwok. Namudok aria anan douk natogur pris.<sup>17</sup> Baraen nyetem Iruhin ananik Buk iri, Iruhin douk nakri namudok. Nakri, “Nyak ta nyunek pris nyupe namudok ihih nyumneh kabi Melkisedek um.”

<sup>18</sup> Enyudok baraen douk nyeyabigap wosik. Douk Iruhin nakweshihuk ananin nyarik iri lo. Um maresh? Enyen douk madae dodogowin aria wosik um nyutaurumap uwe, uwok.

<sup>19</sup> Arpesh douk shagipesh lo seiwok Iruhin nakoguk Moses enyi aria shenek lotu um Iruhin iri, anan Iruhin douk madae nutrish aria nuhwaresh yopishi uwe, uwok. Namudok aria Iruhin douk nenekumap kupaihi yopuhi yah. Ahah douk heshagrakuk harik iri abom um shagipesh lo um. Douk apak mugipesh

ahudok namuhi yah aria munak mupe hurukatin um Iruhin.

<sup>20</sup> Seiwok abudok nyutob Iruhin nagraeh Jisas um nutogur debeini pris obi nyutob, anan douk madae nagraehan meyoh uwe, uwok. Nakri um anan kanak ananin nyeigur nakri adurin atin douk nagraehan. Aria kupaimi amam hatogur pris iri douk madae nagraeham namudok uwe, uwok. <sup>21</sup> Iruhin nakon Jisas um enyudok mour pris obi nyutob, anan douk nanakri um anan kanak ananin nyeigur nakri adurin atin douk nenekan natogur pris. Nenekan um, baraan nyetem Iruhin ananik Buk iri douk nyakri namudok,

“Debeini nakri um anan kanak ananin nyeigur aria nakri adurin atin, nakri,

‘Nyak ta nyunek pris nyupe namudok ihih nyumneh.’”

<sup>22</sup> Iruhin nakri um ananin nyeigur nakri adurin atin aria nagraeh Jisas natogur pris namudok. Namudok aria apak madukemesh um Jisas natogur debeini arman aria nape orokohun um apak mani Iruhin. Anan douk wosik abom aria nenek enyudok dodogowinyi baraan kontrak nyatogur adurin atin abom. Enyudok kontrak douk nyeshagrakuk nyarik iri lo abom. <sup>23</sup> Seiwok douk sabaimi armam apa hatogur pris. Um maresh? Amam apa hagok aria hatogur kupaimi. Madae hunek pris hupe namudok atin uwe, uwok. <sup>24</sup> Aria Jisas douk madae namudok uwe. Anan douk nape ihih nyumneh aria nasuhw enyudok mour pris. Ta mare anan nurao ananik outuk, uwok. <sup>25</sup> Namudok aria ihih nyumneh anan douk wosik abom um nurao eshudok arpesch douk shunakumori Iruhin um ananin nyeigur aria nutaurumesh shupe wosik abom ihih nyumneh. Um maresh? Anan douk nape ihih nyumneh aria apa nenek beten narig Iruhin um nutaurumesh. <sup>26</sup> Anudokmori debeini pris abom douk wosik abom um nutaurumap. Anan douk yopun abom. Madae nunek enen yoweinyi nyupenyany uwe. Iruhin natrun um douk nape yopuyopuni abom. Iruhin naran nakih nape gani iruhw heven nyeigur nyato

iruhuman aria napeik sik um eshesh shenek yoweishi inahos iri. <sup>27</sup> Amudok anam harik iri debeimi pris abom douk mour nyapenyam um hunek ofa um eshudok huko Iruhin ihih nyumneh. Sagomatin amam harik henek ofa um eshudok hako Iruhin um nukweshihuk amamish henekesh iri yoweishi inahos sharik. Aria eshesh armam armago douk henek ofa um eshudok hako Iruhin aria nukweshihuk esheshish shenekesh iri yoweishi inahos. Aria Jisas, enyudokmori mour douk uwok. Anan douk nenek ofa atuh nyumnah meyoh nakon anan kanak um Iruhin aria jurug. <sup>28</sup> Seiwok amudok debeimi pris abom douk henekam kabi lo Iruhin nakoguk Moses enyi nyakrimori, amam kanak madae dodogowim uwe. Aria enyudok adurinyi baraan douk Iruhin nakri um anan kanak nyeigur nagiguk nakriyen nyagimori lo iri, enyen douk nyagraeh Iruhin ananin Nuganin natogur pris. Anudok debeini pris abom douk yopun abom aria ta nupe abom namudok atin ihih nyumneh.

## 8

### *Jisas Douk Apakin Debeini Pris Abom*

<sup>1</sup> Aria baugenyum um enyudok yakripepen iri baraan douk namudok. Apak douk anan yopuni debeini pris abom nape. Anan douk nape agundok yopunyi rogur ehahum anudok dodogowin atun abom iri king ananin wagitur nyeyotu um gani iruhw heven. <sup>2</sup> Douk nape aria nenek enyudok mour pris numun um atudok Iruhin ananit atat abom urupat gani iruhw heven. Madae enesh arpesch shurukat uwe, uwok. Iruhin anan meyoh narukot. <sup>3</sup> Ihim-morim debeimi abom pris douk mour nyapenyam um hurao yopishi eshudok eneshenesh huko Iruhinesh. Eshudok douk arpesch sharaeshuman iri aria shopunek huweh mahish hunekuman ofa. Namudok aria anudok yakripep-umani iri apakin debeini abom pris, anan douk shopunek ta nurao enesh eshudok nunek ofamesh nuko Iruhin. <sup>4</sup> Douk ta anan nupe agundok atap akure, anan ta mare nutogur anan pris,

uwok. Um maresh? Amudok anam pris douk hape aria hape henek ofa um eshudok eneshenesh hako Iruhin kabi lo seiwok Iruhin nakoguk Moses enyi nyakrium. <sup>5</sup> Amam douk henek enyudok mour pris numun atudok lotuit urupat tatao agundok atap iri. Atudok urupat douk aborir meyoh um atudok adurit urupat tatao gani iruhw heven iri. Douk namudok aria abudok nyutob Iruhin nakrip Moses um nurok atudok selit urupat obi nyutob, anan douk nakripan dodogowinyi baraen nakri, “Abudok nyutob nyukri nyurok atudok urupat obi nyutob, nyak ta gamo nyudukemesh nyunek ihishmori eshudok wosik atin nyugipesh arudok aborir kabi yeyabigen gani iruhw yoduhw um.” <sup>6</sup> Aria douk enyudok mour pris Jisas neneken iri, enyen douk dedeben abom nyeshagrakuk agundok atapimi pris neneken iri mour. Shopunek enyudok Iruhin neneken iri namunyi abom adurin atinyi baraen kontrak douk nyeshagrakuk abom nyarik iri. Enyudok namunyi kontrak douk Jisas nape orokohun um apak mani Iruhin aria nape nataurumap. Enyudok namunyi kontrak douk nyeshagrakuk abom nyarik iri. Um maresh? Baugenyum enyen douk nyakri adurin atinyi baraen um apak ta mupe wosik abom.

*Enyudok Namunyi Adurin Atinyi Abom Baraen Kontrak Douk Nyeshagrakuk Abom Nyarik Iri Kontrak*

<sup>7</sup> Douk ta nyarik iri kontrak yopin abom akure, aria Iruhin ta mare watak nukop namunyi uwe, uwok. <sup>8</sup> Aria Iruhin natik ananish arpesh aria nakri yoweishi inahos douk shapenyesh. Aria nakri namudok, nakri, “Eik Debeiwe iri douk yakri, ‘Nyutob ta butogur um eik ini eshesh Israel aria Juda ta mupe atugun aria mubo baraen um eikin namunyi adurin atinyi baraen kontrak.’”

<sup>9</sup> Enyudok namunyi kontrak ta mare nyudukem enyudok seiwok yani esheshish popehesh yamehesh meneken iri, uwok.

Eshudok douk abudok nyutob yaraeshi agudok nahobig Isip aria yarik-umeshi manaki iri.

Yaraeshi aria madae shugipeshen wosik uwe

enyudok nyarik iri kontrak.

Namudok aria yatanam yekeshuk agab.

Eik Debeiwe iri yakri namudok.

<sup>10</sup> Eik Debeiwe iri yakri kweipon anab butograri iri nyutob,

eik ta ini eshesh Israel

ta miyagwreh mubo enen eikin adurin atinyi baraen kontrak. Baraen enyudok,

‘Eik ta eiyur ihinyumorim eikin lo nyupe esheship urkwip

aria shopunek ta inyem nyupe numun esheshiruh aparuh.

Inekesh namudok

aria eik ta ipe esheshin Iruhin

aria eshesh ta shupe eikish arpesh.

<sup>11</sup> Aria abudok nyutob, eshesh ta mare watak shukitak

shunek skulum um enesheshesh aturub warub um

o atup awirop um shudukemesh um eik Debeiwe iri, ta uwok.

Um maresh? Ihishmorim nyeiguhw wokeshi arpesh shuni

nyeiguhw shato iruhw iri ta shudukeme iri atish.

<sup>12</sup> Um maresh? Eik ta inek gihaumesh ikweshihuk

esheshish shenekesh iri yoweishi inahos aria mare watak urkum murumesh, uwok.’”

<sup>13</sup> Enyudok baraen, Iruhin douk nakrip pap um enen namunyi adurin atinyi baraen kontrak. Aria namudok douk neyabigap um nakri nyarik iri kontrak douk apak magipeshen iri, enyen douk mour woken. Ipak douk padukemesh. Ihishmori eneshenesh seiwokishi jugwaishi eshudok, eshesh douk mour wokesh aria hurukatin abom um ta shunak shuwishuk.

## 9

*Seiwokimi Debeimi Pris Douk Apa Henek Ofa Um Mahishibor Owishibor Hako Iruhin*

<sup>1</sup> Enyudok nyarik iri adurin atinyi baraen kontrak douk Iruhin nani ananish

arpesh shabo baraen-umen iri, enyen douk nyakri enen lo um shugipeshen shunek lotuman iri. Enyudok kontrak nyakripesh um anat shunek lotuat iri urupat douk shopunek agundok atapishi arpesh sharukat iri. <sup>2</sup> Shosop anat selit urupat meyoh. Mape marik iri rum um atudok selit urupat douk shuhwaram, "Iruhin Ananim Atum Rum." Eshudok shakus numun amudok rum iri douk eshudok. Lam nyani tebol aria atudok bret douk shako Iruhinat iri. <sup>3</sup> Amudok mape mariki aria mape magiguk iri douk shahwaram, "Iruhin Ananim Atum Abom Yopuyopumi Rum." Aria orokohun um epudok biyep rip douk shawaur anah debeihi amaenyihi rupah hadiyogurep. <sup>4</sup> Amudok magiguk abom iri rum douk enen alta sheneken gol iri nyeyotu. Amam pris apa howem enen paura heneyeh aria henek yopuri unar um. Enyudok alta nyani anas bokis shenekas gol iri shakus. Numunis um asudok bokis douk shor eshudok eneshenesh. Biyobor beriyaibori utabor douk seiwok Iruhin nowem ananin adurin atinyi baraen kontrak nyetemabor, bani Eron ananim butum manareh marpak namusi shus iri aria anagun worigun douk shahwaresh um mana<sup>9:4</sup> iri. <sup>5</sup> Iruhis um asudok bokis douk shenek biyesh kapraigiyohos shapenyesh iri eshudok kabi enselahos um shape. Eshudok biyesh douk sheyotu shagraeh um agundok Iruhin nape aria natrugun abom um. Eshesh douk shenekesh sheyotu shayawiyom asudok bokis. Iruhisum asudok bokis douk agundok Iruhin apa nenek gihaum arpesh aria nakweshih esheshish yoweishi inahos um. Aria douk ta mare ipe iwerehesh-umep abom um eshudok, uwok.

<sup>6</sup> Douk shenek eshudok shape esheshiyu outumeb namudok iyoh, aria ihih nyumneh amam pris apa hawish hape henek mour numun. Henek witogur amudok mape marik iri atum rum henek amamin mour douk Iruhin nakomen iri. <sup>7</sup> Aria amudok numunim abom rum

douk debeini pris atun apa nanak nawish. Ihish kwarahos douk atuh nyumnah meyoh apa nenek wish togur amudok rum. Nawish um douk madae nuwish meyoh atin, uwok. Nasuhw mahishibor owishibor douk nawish nenek ofa-mobor nako Iruhin. Sagomatin douk narik nenekuman ofa Iruhin, um Iruhin nukweshih ananish nenekesh iri yoweishi inahos ba iyoh aria arpeshin ofa kadak. Nagiguk nenekenyu-mesh um Iruhin iri ta nuneguk esheshish yoweishi inahos douk shorshor aria shenekesh iri. <sup>8</sup> Douk shape shenekesh namudok aria Iruhin ananin Mishin douk nyeyabigap namudok. Atudok selit urupat watak teyotu aria amam pris hawish henek mour amudok adukim rum obi nyutob, ahudok yah um muwish munak hurukatinyum agundok Iruhin napeum douk watak hunejik uwe, uwok. <sup>9</sup> Atudok selit urupat, atat douk anar aborir meyoh teyabigap um enyudok douk nyatograri iri lotuin mour. Atat douk teyabigap namudok. Arpesh apa shawish shakon meyoh yopishi eneshenesh um eshudok Iruhin aria shopunek shenek ofa um mahish shakon. Shenek enyudokmori, aria enyen douk madae nyugapesh eshudok shenek lotu iri esheshigunum numun yopuyopugun abom uwe, uwok. Eshesh douk watak urkwip porum esheshish shenekesh iri yoweishi inahos. <sup>10</sup> Enyudok douk shagipesh lo meyoh um shishoh iri worigun aria abar o eneheneh aih douk shugipeshesh um hunekesh shutogur yopish um. Enyudokmori douk nyakrium adukiruh um yegeshiweruh meyoh. Iruhin nekeshuk enyudok lo um shugipeshen arigaha aria watak nunek namuhi yah. <sup>11</sup> Douk, Kraisanaki natogur debeini abom pris aria nape nataurum um yopishi eshudok douk shatogur jurug shape iri.<sup>9:11</sup> Anan douk nanak nawish atudok adurit abom selit urupat. Atat douk teshagrakuk abom atudok seiwokit urupat tatao agundok atap iri. Atudok adurit urupat douk madae arpesh shurukat esheshish wis uwe, uwok.

<sup>9:4</sup> **9:4** Agundok worigun shawaragun um mana iri, eshesh douk seiwok Iruhin nako eshesh Israel abudok nyutob shape sharahaen wehigunum um. Tik Kisim Bek Sapta 16. <sup>9:11</sup> **9:11** Enesh shakri enyudok baraen douk nyakrium yopishi eshudok douk kweipon ta shutograri iri.

Um maresh? Atat douk madae tutaog agundok atap iri uwe. <sup>12</sup> Krai nanak nawish atudok urupat, nawish amudok Iruhin ananim atum abom rum. Nawish atuh meyoh aria jurug. Nawish aria madae nusuhw memehosibor o nugaesh kauhosibor owishibor nuwish nunek ofa nuko Iruhin uwe, uwok. Anan douk nawish aria nenek ofa um anan kanak ananibor owishibor nako Iruhin. Nenek ofa aria nator apak nakweshihap um apakish menekesh iri yoweishi inahos um mupe wosik abom ihih nyumneh. <sup>13</sup> Seiwok, ta Iruhin nutik enesh arpesh aria nukri eshesh shanabosusih um, eshesh apa shenek eshudok um. Amam pris ta hukitak hubo shuworuhishi bulmakauhos shuni memehos aria husuhw owishibor. Aria hunak huhuri argabus um enyudok aragokwin kau douk haen hashainyeh nyih hanin hanyahuk iri aria hunaki hiyourmabus um owishibor. Hiyourmabus ba iyoh aria hubusiyarik eshudok shanabosusih iri arpesh. Amam henekesh namudok um Iruhin nutik aduk yegeshiweruh meyoh yopuruh aria nukri eshesh wosik yopish jurug. <sup>14</sup> Aria Krai ananibor owishibor douk beshagrakuk abom ehudok harik iri aih. Enyudok Iruhin ananin Mishin nyape ihih nyumneh iri nyakon dodog aria nakon anan kanak um Iruhin kabi enen ofa um. Anan douk madae nunek enesh yoweishi inahos shupenyanyan uwe, uwok meyoh. Douk namudok aria shan ananibor owishibor bakwrupukuk abom apak menekesh iri yoweishi inahos. Aria apak urkwip porum apak douk madukemesh um apak madae enesh yoweishi inahos shupenyap uwe, uwok. Nataurumap namudok um apak mare watak munek yoweishi inahos aria shop mugok, uwok. Aria apak douk mupe munek anudok Iruhin douk nape ihih nyumneh iri ananin mour.

*Krais Ananibor Owishibor Douk Benek Namunyi Kontrak Nyatogur Dodogowin Abom*

<sup>15</sup> Krai ananibor owishibor douk benekap yopup aria apak makri wosik um munek Iruhin ananin mour. Namudok aria anan Krai douk nape orokohun um apak mani Iruhin um

nunek enyudok namunyi dodogowinyi baraen kontrak nyutogur dodogowin. Krai nenekesh namudok um ihish arpesh douk shumnek um Iruhin nahwadesh um shunaki shugipeshan iri, eshesh wosik ta shunaki shuwish shupe wosik abom ihih nyumneh. Kabi riguk Iruhin nakri adur atin um ta nukrip ananish arpesh shupe um. Um maresh? Krai douk nagok nator arpesh nakweshiheshuk um yoweishi inahos douk shenekesh abudok seiwokib nyutob watak shape shagipesh enyudok nyarik iri kontrak obi nyutob. <sup>16</sup> Ta enen arpen nyukri enen dodogowinyi baraen aria nyunyem anap shup um kupainyi ta nyirao enyenyish eshudok eneshenesh abudok nyutob enyen nyugokuk obi nyutob, enyudok kupainyi ta mare arigas nyurao eshudok, uwok. Ta arigaha enyudok nyugokuk aria enyudok enen ta kadak nyuwish nyiyotu nyunaraesh. <sup>17</sup> Umum maresh? Enyudok dodogowinyi baraen douk madae dodogowin um nyunek enyudok enen arpen nyunorao eshudok abudok nyutob nyugremesh iri watak nyupe um. Aria ta enyen nyugokuk ba iyoh, aria enyudok dodogowinyi baraen douk wosik dodogowin um enyudok enen arpen nyuwish nyiyotu nyunarao eshudok eneshenesh. <sup>18</sup> Aria douk namudok atin. Enyudok nyarik iri kontrak douk madae nyutogur dodogowin meyoh uwe, uwok. Amam douk habo mahish shagok owishibor batourak aria beneken nyatogur dodogowin atin. <sup>19</sup> Seiwok Moses douk narik nakripesh ihinyumorim baraen nyetem Iruhin ananin lo iri. Nakripeshen iyoh aria nahuri nugaesh bulmakauhos-ibor owishibor aria nabadigobor um abar. Aria noweshik sipsipirub ehirub douk sheshereh-arub owishibor-iti beit iri um onok nyeigurik um enyudok shokwinyi rowog um hisop aria nakutish owishibor. Nakutish douk natuki owishibor aria narik neyarik anabor karowibor um okwudok Buk Iruhin ananin lo nyetemok iri. Aria arpesh kadak nagiguk neyarik-aboresh. <sup>20</sup> Nape nenek enyudok obi nyutob, anan douk nakripesh namudok nakri, "Abrudok owishibor douk benek

enyudok kontrak seiwok Iruhin nakri abom um ipak pugipeshen iri nyatogur dodogowin atin.”<sup>21</sup> Aria namudok atin. Moses neyarik anabor owishibor um atudok Iruhin ananit selit urupat tani ihishmorim eshudok douk shokwish um shunek lotu um.<sup>22</sup> Aria douk adur atin. Kabi lo nyakrium, apak douk owishibor atubor apa benek hurukatin um ihishmori eshudok shatogur yopish. Ta mare shubo enesh eshudok mahish shugok aria owishibor butourak um, Iruhin ta mare nukweshihuk esheshish shenekesh iri yoweishi inahos, uwok.

*Krais Nenek Ofa Nakon Anan Kanak Um Iruhin Aria Nakweshihuk Apak Arpesh Menekesh Iri Yoweishi Inahos*

<sup>23</sup> Atudok selit urupat tani enesh-enesh shakusat iri, eshesh douk anaguh aboriguh meyoh um adurishi eshudok shakus iruhw heven iri. Iruhin nakrip amam pris um amam ta husuhw mahishibor owishibor um hunek eshudok shutogur yopish. Aria ahudok yah apak munak muwish iruhw heven um, Iruhin nakri namudok, “Ahudok yah ta hupe hutik um enen yopunyi ofa douk nyeshagrakuk abom enyudok nyarik iri. Hape hatik um enyudok ofa um nyunekah hutogur yopuh.”<sup>24</sup> Aria Krais douk madae nunak nuwish Iruhin ananit urupat douk arpesh meyoh sharukat iri uwe, uwok. Madae nuwish atudok urupat douk tape anar aborir meyoh um atudok adurif urupat tatao iruhw heven iri uwe, uwok. Anan douk nanak nawish abom um iruhw heven. Aria douk nanak nape agundok Iruhin napeum, nape nenek beten narigan um nutaurum apak.<sup>25</sup> Seiwok ihish kwarahos, abom debeini pris apa nasuhw mahishibor owishibor aria atuh nyumnah apa nenek wish togur amudok “Iruhin Ananim Atum Abom Rum.” Nawish nape nenek ofa-mobor nako Iruhin. Abrudok owishibor douk madae anan kanak ananibor uwe, uwok. Aria Jisas madae nunekesh namudok uwe. Madae nuwish heven nunek ofa sabaih atih uwe, uwok. Nawish atuh meyoh aria nenek ofa nakon anan kanak um Iruhin.<sup>26</sup> Aria douk nunek ofa sabaihi atih akure, aria anan ta numnek eriger sabaih atih um

seiwok Iruhin nakwarum agudok nahobig um arigaha douk. Aria uwok. Douk abudok nyutob hurukatin um hagiguk iri nyumnah um, aria Krais natogur agundok atap. Natograri atuh meyoh um nunek ofa nukon anan kanak Iruhin um nukweshihuk arpeshish yoweishi inahos.<sup>27</sup> Ihishmorim arpesh ta shugok atuh meyoh aria ta wata shukitak shiyotu um Iruhin ananit debeiti kwot.<sup>28</sup> Aria Krais douk namudok atin. Anan douk nenek ofa nakon anan kanak um Iruhin atuh meyoh um Iruhin nukweshihuk sabaishi arpeshish yoweishi inahos. Aria anan wata nutograri anah shopunek. Nutogur obi nyutob, anan ta mare nukweshihuk arpeshish yoweishi inahos, uwok. Anan ta nutogur um nurao eshudok douk shape shatrugun-uman iri um shutanamori shupe wosik abom.

## 10

*Seiwokin Ofa Amam Pris Heneken Iri Douk Madae Dodogowin Um Nyukweshihuk Arpeshish Yoweishi Inahos Uwe, Uwok*

<sup>1</sup> Apak madukemesh um enyudok lo seiwok Iruhin nakoguk Moses um, enyen douk nyeyabigap anar aborir meyoh um adurishi yopishi eshudok eneshenesh douk ta shugiguk shutograri iri. Eshudok seiwokishi douk madae adurish iri uwe, uwok. Douk namudok aria enyudok lo nyakri amam pris ta hunek enyudokmori atin ofa um ihish kwarahos. Namudok aria douk madukemesh. Enyudok lo douk madae wosik um nyugapesh eshudok arpesh douk shanaki hurukatinyum shunek lotu um Iruhin iri uwe, uwok.<sup>2</sup> Ta shugipesh lo aria sheneken iri ofa nyunekesh shutogur yopish akure, eshesh ta mare watak shunek ofa shopunek, uwok. Douk atin ofa meyoh nyenek eshudok shenek lotu iri shutogur yopish abom akure, aria esheship urkwip ta mare watak purum esheshish yoweishi inahos, aria uwok.<sup>3</sup> Aria ihish kwarahos eshesh apa shenek enyudokmori ofa aria enyen nyape um nyeyabigesh esheshish yoweishi inahos ihih nyumneh.<sup>4</sup> Um maresh? Ababish bulmakauhos shani memehosibor owishibor

douk madae wosik um bukweshihuk esheshish yoweishi inahos shunakuk uwe, uwok meyo.

<sup>5</sup> Namudok aria abudok nyutob Krai nakri um nunaki agundok atap obi nyutob, anan douk nakrip Iruhin nakri, “Nyak nyakri uwok um shubo mahish o shurauri eneshenesh eshudok shunaki shunek ofa shuken um, nyakri uwok.

Aria nyak douk nyenekesh nyugamohwume um onohw yegenyihw hwakusume um ta watak nyukeyohw.

<sup>6</sup> Nyak douk madae nyunadudareh um shishaisheh iri mahish shani eneshenesh douk shenek ofamesh um nyak nyukweshihuk esheshish yoweishi inahos iri uwe, uwok.

<sup>7</sup> Aria douk yakri, ‘Iruhin tiki.

Eik enyudok yanakumori igipesh nyakim urkum.

Kabi seiwok howem baraen nyetem nyakik Buk

aria nyakrium eik iri.’ ”

<sup>8</sup> Aria ipak putik. Sagomatin, Krai douk nakri, “Nyak nyakri uwok um shubo mahish o shurauri eneshenesh eshudok shunaki shunek ofa shuken um nyukweshihuk esheshish yoweishi inahos, nyakri uwok. Nyak douk madae nyunadudareh um shishaisheh iri mahish shani eneshenesh shenek ofamesh um nyak iri uwe, uwok.” Aria lo douk nyakri eshesh ta shunek ofa namudok. <sup>9</sup> Douk nakriyuk enyudok aria watak nagiguk nakri, “Iruhin tiki. Eik enyudok yanakumori igipesh nyakim atum urkum.” Aria namudok Iruhin douk napotiguk harik iri yah um munek lotuman um aria nenekumap namuhi um apak mugimeh aria mugipesh ananim urkum um. <sup>10</sup> Jisas Krai nagipesh Iruhin ananim urkum aria nenek ofa nakon anan kanak um Iruhin. Douk nenek enyudok atuh meyo aria nenekap matogur yopup abom mape Iruhin ananipari atop.

*Krais Ananin Ofa Douk Wosik Abom Um Nyukweshih Apakish Yoweishi Inahos*

<sup>11</sup> Amam ihm pris, ihih nyumneh amam apa heyotu hape henek Iruhin

ananin mour. Amam apa henek enyudokmori atin ofa sabaihi atih. Aria enyudok ofa douk madae dodogowin um nyunek arpesish yoweishi inahos shunakuk uwe, uwok. <sup>12</sup> Aria Krai douk nenek atin ofa meyo um nakweshihuk arpesish yoweishi inahos aria enyudok ofa douk dodogowin atin um nyupe ihih nyumneh. Douk nakweshihuk enyudok nyatuh aria nanak nape agundok Iruhin ananin yopunyi rogur ehahum aria nyeigur nyatouman abom iruhw. <sup>13</sup> Nanak nape arigah arigaha douk nape natrugun um Iruhin nunek uhwin um anan Krai ananish horim aria anan Krai netem iruhumesh. <sup>14</sup> Eshudok arpesish douk apa nenekesh shatogur anan Iruhin ananish atish abom, Jisas douk nenekesh apa shatogur yopish abom um enyudok atin ofa aria ta shupe namudok atin ihih nyumneh.

<sup>15</sup> Iruhin ananin Mishin douk shopunek nyarik nyakripep baraen namudok. Sagomatin douk nyakri,

<sup>16</sup> “Debeini nakri, ‘Kweipon anab butograri iri nyutob, eik ta ini eshesh muweshik enen adurin atinyi baraen kontrak. Baraen enyudok.

Eik ta iwem ihinyumorim eikin lo nyupe esheship urkwip aria shopunek ta inyur nyupe numun esheshiruh aparuh.’ ”

<sup>17</sup> Aria Debeini watak shopunek nagiguk nakri enyudok shopunek nakri, “Eik ta mare watak urkum mur um esheshish eneshenesh yoweishi inahos, uwok.”

<sup>18</sup> Namudok aria ta Iruhin neneguk apakish yoweishi inahos um, namudok douk mour madae enen uwe um watak munek ofa aria Iruhin nukweshihuk apakish yoweishi inahos um, uwok.

*Apak Ta Musuhw Krai Ananin Baraen Dodog Abom Aria Munak Hurukatin um Iruhin*

<sup>19</sup> Eikish arpesish, Jisas ananibor owishibor douk bakweshihuk apakish yoweishi inahos. Namudok aria douk apak wosik dodogowip abom um munak muwish amudok Iruhin Ananim Atum Abom Rum, muni anan miyagwreh aria mare



munogugur, uwok. <sup>20</sup> Yah mugimah muwish um douk ahudok namuhi yah ta mugipeshah aria mupe wosik ihih nyumneh um. Ahudok yah douk Jisas anan kanak nenekah um naworish debeihi rupah aria nawish. Ahudok rupah douk ananihw yegenyihw. <sup>21</sup> Aria douk, apak anan debeini pris abom, douk nape debeini um Iruhin ananish arpesh iri. <sup>22</sup> Douk namudok aria apak ta munak huruk um Iruhin. Munak hurukatin um anan obi nyutob, apak douk munek enyudokmori. Ta mukulukuk eneheneh rohwi aih mugipeshan wosik aria musuhw ananin baraan dodog um mudukemesh abom um ananin baraan douk adurin. Apak ta urkwip purum Krais um agundok nakwrup apakiruh aparuh ananibor owishibor aria nenekap yopup um. Nenekumap enyudok aria apakip urkwip madae pur um enesh apakish yoweishi inahos uwe, aria mukri apak douk munek yoweishi inahos, uwok. Aria shopunek munek urkum um anan douk nakrupap yopubari abom abar aria matogur yopup. <sup>23</sup> Apak apa makripesh yopugunum um apakin bilip nyani yopishi eshudok eneshenesh douk madukemesh abom um ta mutrish shutogur iri. Aria enyudok apak ta musuwen dodog abom aria mare mukri munogugur mutatigos, uwok. Um maresh? Apak douk madukemesh. Ihishmori eshudok Iruhin nakri adur atin um ta nunekesh iri, anan adur ta nunekesh um atin. <sup>24</sup> Apak ta munek urkwip aria murim yeh um muna-gapesh aria muhur kupaishi esheshiruh aparuh um eshesh urkwip punawasham kupaishi aria shunekumesh yopihi aih. <sup>25</sup> Aria apak Iruhin ananishi arpesh, apak mare mukulukuk ehudok aih um munak munatorum mupe atugun um, uwok. Mare munekesh kabi enesh shenekesh um, uwok. Ipak douk padukemesh. Nyumnah Krais nutanamori ahi douk hurukatin. Namudok aria apak atin atin ta mupe dodogowip atup um muhur kupaishi um shiyotu dodogowish. Apak douk mtaurumesh mishagrakuk kabi marik mape mataurumesh um.

### *Ananin Nuganin, Uwok*

<sup>26</sup> Mnek, ta apak madukemesh um Krais ananin adurinyi baraan aria watak munak abom mugipesh apakip atip urkwip aria mupe um munek yoweishi inahos namudok atin um, aria apak ofa douk madae enen shopunek uwe um ta nyukweshihuk apakish yoweishi inahos, uwok. <sup>27</sup> Aria ta apak mupe um munek yoweishi inahos namudok atin um, apak douk ta munogugur abom aria mupe mutrugun um atudok debeiti kwot tuni ahudok juwehosih atihi nyih. Ehudok nyih douk hanu hape hatik um Iruhin ananish horim um hunish. <sup>28</sup> Apak madukemesh. Seiwok meinyi arpen nyubrig lo Iruhin nako Moses iri um aria biyesh o biyesh atin arpesh shutrin shuwerehen um, aria eshesh douk mare shunek gihaum enyudok arpen uwe, uwok. Eshesh ta shen nyugok um atin. <sup>29</sup> Namudok aria ipak pakri mumam, um arpesh douk shukon agabus Iruhin ananin nuganin iri? Eshesh douk ta shurao debeinyi amaen shishagrakuk eshudok seiwok shabrig Iruhin ananin lo ba sharaen iri. Krais ananibor owishibor douk benek enyudok Iruhin ananin adurin atinyi baraan kontrak nyatogur dodogowin. Abrudok owishibor douk benek eshudok arpesh yopish shape Iruhin ananish atish. Aria eshudok arpesh watak shenek abrudok owishibor batogur enesh rohwi muguhwos eshudok. Aria eshesh douk shanumogesh Iruhin ananin Mishin douk nyataurumap meyoh iri. <sup>30</sup> Apak douk madukemesh. Iruhin nakri, “Shuwanamesh yoweishi inahos um, enyudok eikin mour. Eik kanak ta iwanamesh esheshish yoweishi inahos.” Aria watak shopunek nakri, “Debeini anan kanak ta nunek skelimum ananish arpesh um debeiti kwot.” <sup>31</sup> Ta anudok dodogowini abom Iruhin nunasuhw enen arpen ananis wis aria nukri nuwanamen enyenyish yoweishi inahos um, enyudok douk apak ta munogugur abom iri.

*Apak Ta Musuhw Iruhin Ananin Baraan  
Aria Miyotu Dodogowip*

*Apak Mare Mukonaguk Agabus Iruhin*

<sup>32</sup> Ipak watak urkwip purum rigukib nyutob. Abudok nyutob, ipak douk pemnek Iruhin ananin baraen padukemen kabi ananit yoputi lait tabuhumep um aria panadudareh pasuhwen wosik. Abudok nyutob apa shekep enenyenen debeinyi amaen parao debeiri eriger, aria ipak peyotu dodogowip abom atip paen nyabuhuk. <sup>33</sup> Anob nyutob douk sheposop peyotu, ihishmorim shape shatrip aria shenekep enenyenen parao debeiri eriger. Anob nyutob douk pani arpes shasah enyudokmori amaen iri panosupom aria pataurumesh. <sup>34</sup> Abudok nyutob ipak enesh shonoweshik shape shunuweshik-ati urupat obi nyutob, ipak douk penek gihaumesh aria panak pataurumesh penekumesh yopinyi. Shopunek abudok nyutob kupaishi shasuhwep dodogeshish shanatrip ipakish eshudok eneshenesh obi nyutob, ipak douk panadudareh pape patrish meyoh aria shanashuhur. Um maresh? Ipak padukemesh um enesh yopishi abom eshudok eneshenesh ta shukus ihih nyumneh iri douk shakusumep. Eshesh douk yopishi abom sheshagrakuk eshudok shatrip shanashuhur iri. <sup>35</sup> Douk namudok aria yakri ipak piyotu dodogowip atip abom aria mare pukri pukutukuk ipakin bilip, uwok. Ipak ta pusuhwen dodog abom. Um maresh? Ipak kweipon ta purao debeinyi yopiyopinyi abom poe. <sup>36</sup> Ipak ta piyotu dodog abom um pugipesh Iruhin ananim urkum. Punekesh namudok aria ta purao yopishi eshudok eneshenesh douk Iruhin nakri jurug adur atin um ta nukepesh iri. <sup>37</sup> Adur, mare roubi uwe, kabi Iruhin ananik Buk kwakri um, “Anudok arman douk nakri um nunaki iri ta nunaki. Ta mare apa nunek pirapirak nupe, uwok. <sup>38</sup> Aria eikin yopunyi arpen ta nyusuhw eikin baraen dodog nyugipeshen aria ta nyupe wosik. Aria ta enyen nyukri nyutotigos nyutanam um, eik ta mare inadudareh-umen, uwok.” <sup>39</sup> Aria apak douk madae kabi enesh eshudok arpes douk shatotigos shatanam

aria shanak shawishuk iri uwe, uwok. Apak douk masuhw Iruhin ananin baraen makri adurin aria douk narap matanamori um mupe wosik abom ihih nyumneh.

## 11

### *Baugenyum Baraen Um Bilip*

<sup>1</sup> Baugos um agundok munek bilip um Iruhin um douk namudok. Apak madukemesh abom um Iruhin ta nukop atugun um yopishi eshudok eneshenesh douk nakri adur atin um ta nukopesh iri um. Eshesh douk adur watak mutrish uwe. Shopunek baugenyum um douk nyakri. Aria Iruhin nukri um enesh eshudok eneshenesh ta shutogurum, apak adur watak mutrish apakis nabes uwe, aria eshesh adur ta shutogurum atugun. <sup>2</sup> Seiwokimi amam douk hasuhw Iruhin ananin baraen dodog hagipeshen wosik. Douk Iruhin natrum namudok aria nanadudareh-umam nahwaram yopumi armam.

<sup>3</sup> Apak douk masuhw Iruhin ananin baraen dodog makri adurin. Namudok aria madukemesh um anan douk nakwarum iruhw aria atap nani arpes um agundok neyagwreh ananin baraen atin um. Namudok aria eshudok eneshenesh matrish iri douk nakwu eshudok madae mutrish iri uwe aria nenekesh.

### *Abel Nani Enok Aria Noa Douk Hasuhw Iruhin Ananin Baraen Dodog Hagipeshen*

<sup>4</sup> Abel douk nasuhw Iruhin ananin baraen dodog nagipeshen wosik. Namudok aria anan douk nanaki nenek ofa um yopishi eshudok eneshenesh nako Iruhin. Eshudok nako Iruhin um douk yopishi sheshagrakuk eshudok Kein nenek ofamesh nakoneshi. Douk Iruhin natik ananin bilip aria nahwaran yopuni arman. Um maresh? Iruhin douk natik eshudok naraeshmori anan Iruhin iri aria nahwaresh yopishi. Abel douk seiwok nagok. Aria ehudok ananin yopihi aih douk wata hape heyabigap um agundok menek bilip um.

<sup>5</sup> Enok douk nasuhw Iruhin ananin baraen dodog nagipeshen wosik. Namudok aria anan madae nugok uwe. Iruhin naran nato iruhw heven. Arpes shape

shauriman, aria madae shuparugan uwe, uwok. Um maresh? Iruhin douk naran. Iruhin ananik Buk douk kwakri abudok nyutob Iruhin madae nurao Enok obi nyutob uwe, anan Iruhin natik Enok ananah aih um douk nanadudareh-uman. <sup>6</sup> Aria enen arpen madae nyusuhw Iruhin ananin baraen dodog nyugipeshen wosik um, namudok enyen ta mare dodogowin um nyunekan nunadudareh, uwok. Namudok aria meinyi arpen douk nyukri nyunak hurukatin um Iruhin iri, enyen ta nyukri Iruhin adur nape aria apa nenekumesh yopinyi eshudok arpeshe douk shapeum shauriman iri.

<sup>7</sup> Noa douk nasuhw Iruhin ananin baraen dodog nagipeshen wosik. Namudok aria Iruhin nakripan nadukemesh um enyudok amaen douk ta nyutogur iri. Enyen douk madae nyutogur nutrin uwe, watak. Namudok aria Noa nasuhw Iruhin ananin baraen nagipeshen aria nakitak nenek onok debeikwi korohuk. Nenekok aria anan nani armatok aria batowish shawish shape wosik aria enyudok amaen madae nyutogrumesh uwe, uwok. Noa douk nasuhw Iruhin ananin baraen dodog nagipeshen wosik. Namudok aria enyudok douk neyabig ihish doukish atapishi arpeshe um eshesh douk shenek yoweishi inahos um agundok madae shumnek Iruhin um uwe. Noa nenek bilip um Iruhin. Namudok aria Iruhin nahwaran yopuni arman kabi anan apa nenekesh um eshudok apa shahuhw ananin baraen shakri adurin iri.

*Abraham Nani Sara Douk Shasuhw Iruhin Ananin Baraen Dodog Shagipeshen Wosik*

<sup>8</sup> Abraham douk nasuhw Iruhin ananin baraen dodog nagipeshen wosik. Namudok aria abudok nyutob Iruhin nahwaran um, Abraham douk nagipesh anan Iruhin ananin baraen aria nakutukuk ananibur wabur nanak um anab amnab. Nanak um abudok amnab douk Iruhin nukri um ta nukonab butogur ananib abom iri. Abraham nakitak nanak aria anan madae nudukem um agundok douk ta nunak nupe um uwe, uwok. Aria anan douk nasuhw Iruhin ananin baraen nakri adurin aria nanak. <sup>9</sup> Anan douk nasuhw Iruhin ananin baraen nagipeshen aria nanak

nape abudok amnab riguk Iruhin nakri adurin atinyi baraen um ta nukonab iri. Nanak nape agundok kabi anan kupaibi amnabin nanak napeum. Aria narok selig urusag napenyog nanak. Nani Aisak iri Jekop. Enyudok adurin atinyi baraen Iruhin nakrip Abraham um nukon amnab um douk shopunek nakriyen nyanak um Aisak iri Jekop. <sup>10</sup> Abraham douk nasuhw enyudok baraen aria nape natrugun um abrudok debeiburi abom wabur. Abrudok wabur douk Iruhin meyoh nape aria urkum morum agundok ta nurukog-abur bupe mumam um aria douk narukog-abur bape dodog abom ihih nyumneh iri.

<sup>11</sup> Abraham anan douk ruwogin. Ananik irohukwik Sara shopunek ruwogik aria shopunek douk kwape kupik. Aria anan douk nasuhw Iruhin ananin baraen dodog nakri adurin aria Iruhin nakok dodog Sara aria kwabuki anan nuganin. Anan Abraham douk nadukemesh abom um Iruhin ta nunekumesh kabi riguk nakripesh adurinyi baraen um. <sup>12</sup> Abraham douk ruwogin abom hurukatin um nugok, aria anan douk nakwarmori sabaishi barheshish shagiguk shakitak. Shakitak shatogur sabaishi abom kabi unib weir utag iri o kabi arukot takus anagas um youg iri. Arpeshe douk madae wosik um shudarehesh uwe, uwok.

<sup>13</sup> Eshudok ihishmorim arpeshe shahuhw Iruhin ananin baraen iri douk shape dodog arigah arigaha shagok. Abudok nyutob eshesh watak shape atap obi nyutob, eshesh douk madae shurao yopishi eshudok eneshenesh douk Iruhin nakri adur atin um ta nukeshesh iri uwe, uwok. Eshesh douk kabi shey-otu rougun meyoh aria shatigu yopishi eshudok eneshenesh aria shanadudareh um shutrish um. Aria eshesh shakri eshesh douk kupaibi amnabishi shanaki shape banab nyutob meyoh agundok atap. <sup>14</sup> Apak madukemesh. Arpeshe shiyagwreh enyudokmori baraen iri, eshesh douk adur shakri um shutik anab esheshib adurib abom amnab. <sup>15</sup> Douk ta eshesh urkwip purum agudok nahobig douk sharik shakutuguk shanak iri, aria eshesh ta wata shatanam um abudok

amnab. <sup>16</sup> Aria uwok. Eshesh douk madae urkwip purum abudok esheshib barik iri amnab uwe, uwok. Eshesh douk mishish shakitak abom um shura abudok anab amnab. Abudok amnab douk yopubi abom beshagrakuk abudok barik iri amnab. Abudok amnab douk bape iruhw heven. Namudok aria Iruhin madae nunek abraen um agundok shawaran esheshin Iruhin um uwe, uwok. Um maresh? Anan douk nenek garibog anabur wabur bapeumesh um shunak shupeum.

<sup>17-18</sup> Iruhin nakripan adurin atinyi baraen Abraham namudok nakri, "Sabaishi nyakish barheshish ta shukitak um anudok nyakin nunganin Aisak atun." Aria abudok nyutob Iruhin nakwiraeh Abraham aria nakripan um nubo anudok ananin atun nunganin nenek ofa nukon um, anan Abraham douk nasuhw Iruhin ananin baraen nakri adurin aria nakri wosik um nukon Aisak. <sup>19</sup> Abraham douk nenek urkum nakri, "Aria Aisak nugok um, Iruhin douk dodogowin um ta wata nunohur nukitak." Namudok aria enyudok adur um apak ta mukri, "Aisak douk nagok aria Iruhin wata nonohur nakitak aria nakonan."

*Aisak Nani Jekop Iri Josep Douk Hasuhw Iruhin Ananin Baraen Dodog Hagipeshen Wosik*

<sup>20</sup> Aisak douk nasuhw Iruhin ananin baraen dodog nagipeshen wosik aria narig Iruhin um nunekumam yopinyi Jekop iri Iso um hupe wosik. Enyudok baraen douk nakripam um eshudok eneshenesh kweipon ta shutogrumam iri. <sup>21</sup> Jekop namudok. Anan douk nasuhw Iruhin ananin baraen dodog nagipeshen wosik. Namudok aria abudok nyutob ruwogin abom aria nukri um nugok obi nyutob, anan douk madae dodogowin uwe. Namudok aria nanakusim neyotu, nowem barag ananim butum aria nakripamuk yopinyi baraen amudok Josep ananim biom nugamim um Iruhin nunekumam yopinyi. Aria shopunek nanakusim neyotu aria nenek lotu um Iruhin.

<sup>22</sup> Josep namudok. Anan douk nasuhw Iruhin ananin baraen dodog nagipeshen

wosik. Namudok aria abudok nyutob hurukatinyum nugok obi nyutob, anan douk nakriyuk nakri kweipon eshesh Israel ta shukutukuk Isip shunak. Aria shopunek nakriyeshuk um agundok nugok aria ananish bishiguh ta shuraesh shunak shurumesh agundok eshesh shunak shupeum.

*Moses Douk Nasuhw Iruhin Ananin Baraen Dodog Nagipeshen Wosik*

<sup>23</sup> Moses ananish amakenyish douk shasuhw Iruhin ananin baraen dodog shagipeshen wosik. Namudok aria abudok nyutob amakek kwabuki Moses obi nyutob, eshesh amakenyish douk shabeshukan nape biyab atun aub. Um maresh? Eshesh shatrun um anan douk yopuni nunganin abom aria madae shunogugur um shubrig anudok debeini king Fero ananin lo uwe, uwok.

<sup>24</sup> Moses douk nakitak yopun aria nasuhw Iruhin ananin baraen dodog nagipeshen wosik. Namudok aria anan douk nakri uwok um shuhwaran king Fero ananik nugawik okwokwin nunganin, nakri uwok. <sup>25</sup> Anan douk nakri nutanam um Iruhin ananish arpes shusah enenyenen amaen. Nakri uwok um nugipesh eneshenesh yoweishi inahos aria nunadudareh banab nyutob meyoh, uwok. <sup>26</sup> Anan douk nenek urkum aria nakri ta nurao abraen um agundok nusuhw Krai ananin mour um, nakri enyudok douk nyeshagrakuk abom ihish jah o utabor shakus Isip iri. Um maresh? Anan douk urkum morum enyudok ananin yopinyi poe douk Iruhin nakri ta nukonen iri. <sup>27</sup> Moses douk nasuhw Iruhin ananin baraen dodog nagipeshen wosik. Namudok aria nakitak nakutukuk Isip nanak. Eshesh Isip esheshin debeini king douk juwehosin um Moses, aria Moses douk madae nunogugur uwe, uwok. Adur, apak arpes douk madae wosik um mutik Iruhin apakis nabes uwe, uwok. Aria Moses douk neyotu dodogowin atun kabi natik Iruhin abom iri um. <sup>28</sup> Moses douk nasuhw Iruhin ananin baraen dodog nagipeshen wosik. Namudok aria anan nakrip eshesh Israel

shabo sipsipahos shatahesh shashoh ahudok nyumnah Iruhin nataurumesh shape wosik ahi. Aria sipsipibor owishibor douk shobrayok duahas um ensel ta nyubo Isip esheshim sagomim nugamim aria nyunaki aria nyishagrakuk mare nyubo anam eshesh Israel esheshim, uwok.

*Sabaishi Israel Douk Shasuhw Iruhin Ananin Baraen Dodog Shagipeshen Wosik*

<sup>29</sup> Eshesh Israel douk shasuhw Iruhin ananin baraen dodog aria shadukemesh um Iruhin ta nutaurumesh. Namudok aria nataurumesh shabrig youg nyeigur um Retsi kabi sharahaen shanak atap meyoh um. Aria abudok nyutob eshesh Isip shakri shugipeshesh obi nyutob, eshesh douk youg gwaesh gweyawiyeshuk.

<sup>30</sup> Eshesh Israel douk shasuhw Iruhin ananin baraen dodog aria shadukemesh abom um Iruhin ta nutaurumesh nidigwur-umesh narub um abrudok wabur Jeriko. Namudok aria shape sheyor sharih narub um 7-poreih nyumneh arigah hatuh aria arbudok dodogirubi narub batu. <sup>31</sup> Okwudok kweyotu yeh iri armatok Rahap, okwok douk kwasuhw Iruhin ananin baraen dodog aria kwataurum amudok biom douk hanabeshuk hanaki hatiguk abrudok wabur Jeriko iri. Douk namudok aria okwok kwape wosik madae kwuni shakon agabus Iruhin ananin baraen iri shugok uwe, uwok.

<sup>32</sup> Aria douk ta mare wata ikripesh um enesh shopunek, uwok. Nyutob batuh um ikripep um Gideon nani Barak iri Samson, Jepta, Devit, Samuel aria amudok amam profet. Nyutob uwok um ikripep um.

<sup>33</sup> Eshudok armam armago douk shasuhw Iruhin ananin baraen dodog aria shadukemesh um anan ta nutaurumesh. Namudok aria enesh shabo sabaimi debeimi king hani amamin ami shakam agabus. Enesh shatogur jas aria shenek adurigi kwotog shataurumesh shape wosik. Enesh sharao eshudok eneshenesh douk Iruhin nakri adurin atinyi baraen um ta nukeshesh iri. Enesh shogah nokwatog um eshudok wanohwishi mahish

laion. <sup>34</sup> Enesh shaboweh debeihi juwehosih atihi nyih hagok. Enesh sharuwok aria madae shubrei bainatog uwe. Enesh madae dodogowish uwe arigaha wata shutogur dodogowish abom. Enesh shanak shani esheshim horim sharpak aria shatogur dodogowish atish abom um wanogwiruh. Enesh shehiyah kupairubi warubish esheshin debeinyi ami sharuwok. <sup>35</sup> Enesh douk amakenyiyu wata wanarao owowim nugamim douk hagok wata shopunek hakitaki. Enesh douk esheshim horim showeshikesh aria shanak shanunu esheshiruh yegeshiweruh abom arigaha shagok. Esheshim horim shakri ta eshesh shukanakuk agabus Iruhin um, eshesh ta wata shukweshihesh shunak. Aria eshesh douk shakamuk agabus um horim esheshin baraen. Um mareshe? Eshesh shakri ta horim shesh shugok um, eshesh ta wata shopunek shukitaki aria shupe wosik abom ihih nyumneh shishagrakuk kabi sharik shapeum. <sup>36</sup> Enesh douk sharao amaen um horim shenekesh enenyenen aria shakwumesh eshudok wanohwishi. Aria enesh shaesh shaprakesh senab aria showeshikesh shape shunuweshik-ati urupat. <sup>37</sup> Enesh horim shakwumesh utabor. Enesh shakwu so shenek so-umesh arigaha tukaresh um biyeh shagok. Enesh douk shaesh shagok bainatog. Enesh shor eshudok mahish sipsip iri memehosis yegeshiweruh-is um rupeh aria shara haen shanak. Eshesh douk shatogur yaruhish abom. Kupaishi shekesh debeinyi amaen abom aria shenekumesh yoweihi aih abom. <sup>38</sup> Namudok aria douk shanabeshuk shanak yodururuh hani agundok wehigunum arpeshe uwok um. Shanak aria shanabeshuk shape shanak nuwagos o hurupiruh. Agundok atapishi arpeshe douk yowesh abom. Namudok aria eshudokmori shenek bilip iri arpeshe douk madae wosik um shuni eshesh shupe uwe, uwok.

<sup>39</sup> Eshudok ihishmorim arpeshe douk shasuhw Iruhin ananin baraen shakri adurin. Aria anan douk natrish nahwawesh yopishi arpeshe. Aria nyutob eshesh watak shape atap obi nyutob, eshesh douk madae shuraoyopishi es-

hudok eneshenesh uwe, douk Iruhin nakri adurin atinyi baraen um nukeshesh iri, uwok. <sup>40</sup> Um maresh? Seiwok Iruhin kanak nenek garibog um enen yopinyi abom enyudok um apak. Anan douk nakri uwok um eshudok seiwokishi arpesh shurik shutogur yopishi aria apak kadak, uwok. Anan douk nakri um apak muni eshesh ta mutogur yopup ahudok atuh.

## 12

### *Apakis Nabes Ta Sutak Supe Jisas Aria Musuhw Ananin Baraen Dodog Mugipeshen*

<sup>1</sup> Eshudok sabaishi shenek bilip iri seiwokishi arpesh douk sheyotu sher-sharihap kabi onog debeigwi orug aria sheyabigap agundok munek bilip um. Namudok aria apak ta mukutukuk ihishmori amaenyishi eshudok eneshenesh douk ta shenepak mare mahur dodogowip muni ihishumori showeshikap iri yoweishi inahos. Apakish mishish mare yowesh, aria apak ta dodogowip mahur asudok resis douk Iruhin nakri um apak mahuras iri um. <sup>2</sup> Apakis nabes ta sutak supe Jisas. Anan douk baugos um apakin bilip, aria ta nutaurumap musuhw Iruhin ananin baraen wosik mutogur dodogowip. Jisas douk nadukemesh. Nakri ta nugipesh Iruhin ananin baraen um, kweipon anan ta nupe wosik nunadudareh nuriguk. Urkum morum enyudok aria nape dodogowin atun nemnek debeiri eriger aria shan nagok neir kruse. Narao abraen um maresh? Arpesh shakri arpen nyugok nyir abom enen rowog kruse iri, enyen douk yoweinyi arpen abom aria nyarao takweinyi abraen. Aria Jisas douk madae urkum yowem um ta nurao enyudok abraen um uwe, aria shan nagok. Aria douk nape yopunyi rogur ehahum enyudok Iruhin ananin debeinyi wagitur king ananin.

### *Iruhin Douk Nahap Nenekop Wosik Um Murao Ananin Aih*

<sup>3</sup> Ipak douk urkwip gamo purum Jisas. Amam henek yoweishi inahos iri armam

douk hatogur abom ananim horim anabik sik um anahaeh, aria anan neyotu dodogowin atun um amaen. Ipak urkwip purum enyudok aria mare pukri urkwip yowep aria arigehip um agundok piyotu dodogowip um bilip um, uwok. <sup>4</sup> Adur, ipak douk pani yoweishi inahos parpok abom, aria watak shep piyarik onobor owishibor uwe, uwok. <sup>5</sup> Ipak ta urkwip pukepukuk um enyudok baraen douk Iruhin nakriyen um nunekep pupe dodogowip um aka? Anan douk nahwarep ananishi batowish nakri,

“Eikin batowin,

aria Debeini nukri nuhen nenek skulumen um enesh eshudok um, nyak mare nyukri enyudok douk enen rohwin meyoh, uwok.

Nyakihw apahw mare yowehw aria nyukri nahen nakwumen wagon aria nyumnek eriger um, uwok.

<sup>6</sup> Um maresh? Debeini apa nahesh eshudok arpesh douk

anan urkum manawashamesh iri.

Aria ta nurao enen arpen nuhwaren ananin batowin um,

anan apa nahaen nenek skulumen shopunek.”

<sup>7</sup> Abudok nyutob ipak pumnek eriger obi nyutob, ipak ta piyotu dodogowip pukri anan nakri nugabeyep. Anan douk nenekumep ehudok aih kabi yakenyim apa henekeh um amamish batowish haesh henek skulumesh um. Ihish shape iri batowish, esheshim yakenyim douk apa haesh. <sup>8</sup> Aria ihishmorim Iruhin ananish batowish apa naesh nenek skulumesh. Aria anan mare nenek skulumep um, aria ipak douk madae ananishi adurish batowish uwe, uwok. Ipak douk kabi birokish batowish um. <sup>9</sup> Ipak urkwip porum enyudok shopunek. Apakim yakenyim apa hap henek skulumap aria apak apa mape shakamum amam memnekam. Namudok aria apak ta mupe shakam abom um anudok Yain douk nasuhw apakish mishish iri. Munekesh namudok aria ta mupe wosik abom ihih nyumneh. <sup>10</sup> Apakim yakenyim douk hap henek skulumap banab nyutob meyoh kabi amam

mishish shakitak um hop hunek skulumap um. Aria Iruhin apa nap nenek skulumap um nutaurumap abom aria mudukem anan mupe yopupari abom. <sup>11</sup> Abudok nyutob meishi shukri shop shutaurumap um shugabeyap um, abudok nyutob douk mare munadudareh atin uwe, uwok. Memnek eriger. Aria eshesh shap shenek skulumap um jurug, aria apak ta munek yopihi aih aria aparuh hur wosik ba manadudareh.

*Apak Ta Dodogeship Atup Miyotu Dodogowip Um Bilip*

<sup>12-13</sup> Douk namudok aria ta ipakish roguh w shagok sheir meyoh um, ipak wata pishuhur punek Iruhin ananin mour. O ta ipakigas aiyas sagok seir meyoh um, nyenekesh. Ipak ta pikitak punek Iruhin ananin mour piyotu pugapesh ahudok durdurih yopuhi yah. Penekesh namudok aria ipakigas aiyas ta mare sugok abom, uwok. Ta wata shopunek dodogowigas.

<sup>14</sup> Ipak ta dodogowip atip um puni arpeshe pupe wosik aria aparuh hur wosik. Shopunek ipak ta dodogowip atip um purao Debeini ananin yopihi aih um pupe ananin atip abom. Arpeshe douk madae shurao ehudok ananin aih iri uwe ta mare shutik anan, uwok. <sup>15</sup> Ipak douk gamo pudukemesh. Ta enen nyutograguk um agundok Iruhin nenek gihaumep aria nape nataurumap meyoh um. Gamo pudukemesh um ta ipak enen nyunek eneh yoweih aih nyukep amaen aria nyunek sabaipari Iruhin nutrip nukri pape penek yoweih aih aria pape yoweipi abom. <sup>16</sup> Gamo pudukemesh um ta enen arpen nyugipesh ehudok yoweih aih um shenek wehrur um o nyukanuk agab Iruhin kabi seiwok Iso nenekesh um. Anan douk bahen aria ta nurao yakenish eshudok eneshenesh. Aria uwok. Nakitak nawanam um ananish eshudok nator worigun douk nagnoh natuhuk atub nyutob meyoh iri. <sup>17</sup> Ipak douk padukemesh. Douk napeik arigaha wata nakri um nurao yakenish eshudok eneshenesh aria Iruhin nakri uwok. Nabirak nareh abih um nurao eshudok yopishi eneshenesh, aria yah wokan um

nuwanam um eshudok yoweishi inahos sagomatin narik nenekesh iri um.

*Apak Douk Manak Matograri Abrudok Debeiburi Wabur Bape Iruhw Heven Iri*

<sup>18</sup> Ipak douk madae punak putograri um eshudok douk ta putrish aria pusuwesh wis iri uwe, uwok. Kabi seiwok eshesh Israel shenekesh um. Eshesh douk shanaki shape hurukatin um ahwudok yoduhw Sainai aria shatik debeih atih nyih hanu aria shopunek shatik debeigini arukwutigun abom um nani dodogowinyi uhwin aria shanogugur. <sup>19</sup> Shatik eshudok aria shemnek onohw oruhw hwuno-hwapur aria anan arman neyagwrehi dodogowinyi baraen nakripeshi. Eshesh shemnek enyudok baraen aria shanogugur abom. Aria shakrip Moses shakri, "Apak makri uwok um wata mumnek enen baraen shopunek." <sup>20</sup> Shakripan namudok Moses um maresh? Eshesh douk shanogugur abom um enyudok baraen Iruhin nakripeshenyi. Nakripeshi namudok, nakri, "Aria enen arpen o enen mahin nyunak nyutowi ahwudok yoduhw, aria ipak ta pukwumen utom pen nyugok." <sup>21</sup> Eshesh douk shanogugur abom um eshudok shatrish iri. Namudok aria Moses shopunek nakri, "Eik yanogugur abom aria eik yakitak yowiyokuk um eshudok anahaehish eneshenesh."

<sup>22</sup> Aria douk, ipak madae punak putograri um enen enyudok-morim mugu uwe, uwok. Ipak douk panak patograri um ahwudok yoduhw nyeigurihw um Saion hwani anudok dodogowini abom Iruhin ananibur debeiburi wabur. Abrudok wabur Jerusalem douk bape iruhw heven. Ipak douk panak patogrumori agundok sabaibi tausenabish um enelahos shantorum aria shanadudareh shapeum. <sup>23</sup> Ipak douk panak patogrumori Iruhin ananish sagomish batowish shantorum shapeum. Eshudok batowish douk Iruhin nowem esheshish nyeiguhw ananik buk gani iruhw heven. Panak patogrumori um anan debeini jas abom douk nasuhw kwotog iri. Anan douk Iruhin, douk nenek skelum apak ihishmorim arpeshe iri. Ipak douk shopunek

panak patogrumori um seiwok shagok iri arpeshe esheshish mishish. Eshesh douk Iruhin nahwadesh yopishi aria shatogur yopishi abom. <sup>24</sup> Ipak douk shopunek panak patogrumori Jisas. Anan douk nape orokohun um apak arpeshe mani Iruhin aria nenek enyudok namunyi adurin atinyi baraeen kontrak nyatogur dodogowin iri. Panak patogrumori Jisas ananibor owishibor douk riguk nobruyarik aria nenek enyudok namunyi kontrak nyatogur dodogowin iri. Douk ahudok atuh nyumnah Iruhin natik abrudok owishibor aria nakweshihuk apakish yoweishi inahos. Anudok Jisas ananibor owishibor douk beshagrakuk abom abrudok Abel ananibor owishibor douk bape bahwar um shuwanam yoweishi inahos iri.

*Apak Ta Gamo Mudukemesh Um Mare Mukonuk Agabus Iruhin*

<sup>25</sup> Ipak ta gamo pudukemesh um. Ta pakri putapok arigos aria pukenyuk agabus Iruhin ananin baraeen. Seiwok Iruhin douk nakripesh enen dodogowinyi baraeen apakish yamehesh agundok atap. Nakripesh aria eshesh shakri uwok um shumneken. Namudok aria eshesh madae shuni anan shupe uwe, uwok. Nasuwesh nekesh yoweishi inahosin poe um esheshish yoweishi inahos. Aria douk apak, Iruhin douk nape iri iruhw heven aria nakopari dodogowinyi baraeen. Douk mukri mukonagak agabus um, aria pakri ta muruwokuk aria mare nukop yoweishi inahos poe um apakish yoweishi inahos, aka? Adur atin uwok. <sup>26</sup> Abudok nyutob neyagwrehi nakripeshi baraeen obi nyutob, agundok atap douk krutukarogun. Aria ahudok nyumnah douk nakri adurin atinyi baraeen um ta nunek enen enyudok shopunek. Nakri, “Anah shopunek ta igwragworish agundok atap. Aria ta mare igwragworish atap atin uwe, uwok. Ta igwragworish atap nini iruhw utag shopunek.” <sup>27</sup> Enyudok baraeen, “Anah shopunek”, enyen douk nyeyabigap um ihishmorim eshudok anan nenekesh iri ta nugwragworish-esh aria niyateshuk.

Nugwragworish-esh namudok um eshudok shupe dodog abom iri atish ta shupeik.

<sup>28</sup> Namudok aria apak ta munadudareh munek tenkyu um Iruhin. Um maresh? Anan douk narapari aria naposop agundok anan nape debeini um ananish arpeshe um, aria ta mare enesh eshudok shuhekishap aria apak ta mutotigos uwe, uwok. Namudok aria apak ta munek lotuman aria mutuk ananin nyeigur nyuto iruhw. Apak ta munogugur um anan aria mupe shakamaum anan. <sup>29</sup> Munekesh namudok um maresh? Apakin Iruhin douk kabi eneh juwehosih abom atih nyih douk apa hanu eshudok hashahuk atin iri.

## 13

*Apak Atin Atin Ta Urkwip Punawasham Abom Kupaishi Arpeshe*

<sup>1</sup> Ipak ashukenyish owashish, ihih nyumneh ipak ta urkwip punawasham kupaishi Kristen kabi ipakip urkwip panawasham enesh ipakishi um. <sup>2</sup> Abudok nyutob kupairubi warubish arpeshe shukri shunakumori ipak um, ipak ta puraesh um ipakig urusag putaurumesh. Seiwok aria douk namudok. Enesh arpeshe shakri ta sharauri arpeshe meyoh shape shataurumesh, aria uwok. Madae shudukemesh uwe aria sharauri Iruhin ananish enselahos shataurumesh. <sup>3</sup> Ipak ta urkwip purum Iruhin ananish arpeshe douk shonoweshik shape shunuweshik-ati urupat iri. Ipak douk puni eshesh pusah amaen kabi ipak shopunek pani eshesh ponoweshik pape um. Arpeshe douk horim shenekesh enenyenen sharao eriger iri, eshudok ipak ta urkwip purumesh aria putaurumesh. Ipak ta punek urkwip pakri enyudok douk kabi ipak pani eshesh pemnek eriger um. <sup>4</sup> Panaraum iri armam armago ta gamo pudukemesh wosik um ipak panaraum um. Pupeik yopip abom. Ipak padukemesh. Iruhin ta nuwanamesh yoweishi inahos eshudok douk apa shenek wehrur iri shuni eshudok douk shanaraum aria wata shanak shenek wehrur shani kupaimi



o kupaiwori iri. <sup>5</sup> Ipak mare mishish shikitak abom um purao sabaibori utabor, uwok. Karowibor o sabaibori ipak punasuabor iri, ipak punadudareh pakri jurugibor um ipak. Um maresh? Iruhin seiwok nakri, “Ta mare ikwutipokuk, uwok.

Ta mare ikwutipokuk ipak atin pupeik, uwok.”

<sup>6</sup> Namudok aria apak mare aparuh yoweruh aria dodogowip aria mukri, “Debeini apa nataurume aria eik ta mare inogugur. Arpesh ta mare shuneke mumam, uwok.”

### *Apak Mare Munek Abraen Um Mugipesh Jisas*

<sup>7</sup> Ipak ta urkwip purum ipakim debeimi douk heyotu harik-umep aria hakripep Iruhin ananin barae iri. Ipak ta urkwip purum yopihi aih douk amam hagipesh ehudok aih abom um hasuhw Iruhin ananin barae dodog hagipeshen um. <sup>8</sup> Riguk seiwok Jisas Krai douk nataurum amam. Aria douk nenekesh namudok atin nape nutaurum apak. Aria shopunek ta nupeum nutaurumap namudok atin ihih nyumneh.

<sup>9</sup> Ipak mare pumnek enenyenen kupaunyi barae nyunaki nyunekep pukutuk ahudok yah um punek bilip um Krai um, uwok. Enyudok douk wosik, um apak ta mukutuk Iruhin nutaurumap meyoh aria apakigun um numun nurao ananin dodog. Apakigun um numun ta mare nurao dodog um agundok mugipesh lo um mishoh iri o mare mishoh iri worigun um, uwok. Ehudok aih douk madae hutaurumesh uwe eshudok shagipesh iri, uwok. <sup>10</sup> Apak douk enen alta Jisas nenek ofa um nyape. Amam pris douk hagipesh seiwokin lo aria henek mour atudok seiwokit selit urupat iri, amam ta mare hurao enesh yopishi eshudok um Jisas ananin ofa, uwok.

<sup>11</sup> Seiwok, eshesh Juda esheshin debeini pris abom apa narao mahishibor owishibor nawish Iruhin Ananim Yopuyopumi Abom Rum. Nawish aria nenek ofamobor nako Iruhin um Iruhin nenek gihaum arpesh aria nukweshih esheshish

yoweishi inahos. Aria eshudok shuknishi mahish douk apa sharaesh shatograkuk aduk agundok shapeum aria shesheh nyih hanishuk. <sup>12</sup> Douk namudok aria Jisas shopunek nemnek eriger aria nagok adukibur um abrudok debeiburi wabur. Nagok um ananibor owishibor bunek arpesh yopish abom aria shupe Iruhin ananish atish abom. <sup>13</sup> Namudok aria apak mare mugipesh lo, uwok. Apak shopunek ta munak um Jisas agundok adukibur um abrudok wabur aria murao abraen kabi anan naraen um. <sup>14</sup> Apak ta munekesh namudok um maresh? Agundok atap apak douk madae anabur wabur bupe ihih nyumneh abom iri uwe, uwok. Apak douk mape matrugun um abrudok wabur douk ta butograri iri.

<sup>15</sup> Namudok aria ihih nyumneh apak ta mutuk Iruhin nuto iruhw um Jisas ananin nyeigur. Apak ta mutuk ananin nyeigur mupe namudok kabi enen ofa douk apa maraen mako Iruhin um. Adur, ihih nyumneh apakig nukwatog ta gwereh um ananin nyeigur nyuto iruhw. <sup>16</sup> Aria shopunek ipak ta punek yopinyi um arpesh. Ta enesh yaruhish um enesh eshudok eneshenesh um, ipak ta putaurumesh pukesh enesh ipakish um yaruhish. Ipak mare urkwip pukepuk um punek enyudokmori um, uwok. Iruhin nanadudareh-umen abom iri ofa douk enyudokmori.

### *Iruhin Ta Nutaurumap Mupe Wosik*

<sup>17</sup> Ipakim heyotu harikumep iri douk hakripep Iruhin ananin barae hakri hutaurumep. Amam apa heyohep ihih nyumneh aria kweipon amam ta hukrip Iruhin um ihinyumori mour amam heneken iri. Namudok aria ipak ta pugipesh amamin barae aria pupe shakamum amam. Punekesh namudok um, amam ta hunadudareh aria hunek amamin mour. Aparuh ta mare yoweruh, uwok. Aria ta amam aparuh yoweruh aria hutaurum ipak um, enyudok ta mare nyutaurumep, uwok. <sup>18</sup> Aria yakri ipak ta punek beten porig Iruhin um nutaurumep. Apak madukemesh um, apakip urkwip douk por wosik abom aria madae purum munek yoweishi inahos

uwe, uwok. Aria abudok nyutob mupe o murahaen um, apak makri mupe wosik abom. <sup>19</sup> Aria eik kanak douk yarigep abom um porik Iruhin um nutaurume aria wata itanam-agu um ipak arigas.

<sup>20-21</sup> Iruhin douk nohur apakini Debeini Jisas wata nakitaki wanugwehw. Jisas anan douk debeini abom neyoh apak iri apa neyoh Iruhin ananish arpesh iri. Anan douk nagok aria ananibor owishibor benek enyudok namunyi adurin atinyi baraen kontrak nyatogur dodogowin atin. Enyudok kontrak douk ta nyupe ihih nyumneh. Anudok Iruhin douk baugos abom um agundok apakiruh aparuh hur wosik munadudareh um. Aria eik yakri anan wosik ta nunek ihih-mori yopihi aih hutogur dodogowih atih um ipak. Um yakri ipak pugipesh abom ananim atum urkum. Aria douk yakri anan nukri aria Jisas Kraiss nutaurum ipakigun numun um ipak punek eneheneh anan nanadudareh-umeh iri aih. Ihih nyumneh apak ihishmorim ta mutuk ananin nyeigur nyuto iruhw. Adur atin.

### *Nyagiguk Abom Iri Baraen*

<sup>22</sup> Eikish arpesh, eik yakri ipak ta gamo bubuk arigos um enyudok baraen douk yenyem-umepogu pumneken aria piyotu dodogowip atip um. Um maresh? Enyudok baraen yenyemagu shup iri douk bannen meyoh. <sup>23</sup> Aria douk yakri ikripep namudok um pudukemesh. Apakin wanin Timoti douk shakweshihan natograri. Madae nunuweshik nupe uwe. Aria ta nukri nunak nutogrume arigas um, ohwak biyohw ta unaku utrip. <sup>24</sup> Ipak punekume yopuhi nyumnah um ihim-morim amudok heyotu harikumep iri huni ihishmorim Iruhin ananish arpesh. Eshudok enesh Iruhin ananish arpesh douk shakutukuk agudok nahobig Itali shanaki iri, eshesh douk shopunek shenemepogu yopuhi nyumnah ipak. <sup>25</sup> Eik yakri Iruhin wosik nutaurumep meyoh ipak ihipmorim aria pupe wosik.

## Apudok Shup Douk Jems Nenekap Iri

*Banenyi baraeen um enyudok baraeen  
Jems nenyem iri*

1:1-18 Enenyenen kwiraeh apa nyatogrumap iri

1:19-27 Apak mare mumnek Iruhin ananin baraeen meyoh, uwok. Apak ta mumneken aria mugipeshen.

2:1-26 Apak ta munek yopihi aih um muyabigesh apakin bilip.

3:1-12 Apak ta musuhw merik um apakin baraeen

3:13-18 Yopunyi saki douk nyanaki iruhw heven iri

4:1-12 Apak ta mupe shakamum Iruhin.

5:1-20 Sabaihi yopihi aih apak ta mugipeshen iri

<sup>1</sup> O ipak Iruhin ananish arpesh, ipak Juda. Ipak asudok 12-poreis debeisi awiros douk pakutukuk ipakirub warub panaku pape panakumaguk kupairubi warub iri. Eik Jems douk yenek Iruhin ananin mour yape shakamum anan nani Debeini Jisas Kraiss iri yenekumepogu apudok shup ipak. Eik yenemepogu yopuhi nyumnah ipak.

*Kwiraeh Nyutogurumap Um Ta Nyunekap Mutogur Dodogowip*

<sup>2</sup> O ipak Kristen. Meibi nyutob ihinyumori enenyenen kwiraeh nyutogur aria nyikwiraehep um, ipak ta punadudareh aria pukri enyen douk yopinyi. <sup>3</sup> Um maresh? Ipak padukemesh, abudok nyutob kwiraeh nyutogur nyukwiraeh ipakin bilip obi nyutob, enyen ta nyutaurumep nyunekep putogur dodogowip um pusah amaen um. <sup>4</sup> Douk namudok aria ipak ta piyotu dodogowip atip pupe namudok atin. Um arigaha ipak punek sabaihi yopihi atih aih shopunek aria ehudok aih um piyotu dodogowip um pusah amaen um ta nyutogur dodogowin um ipak. Ipak punekesh namudok um putogur yopipari kabi douk Iruhin nakri um. Aria anan nutrip um, anan mare nutik enesh yoweishi

inahos shupenyep. Aria ipak ta mare urkwip pushukep-ukuk um eneh Iruhin ananin aih.

*Eshudok Douk Urkwip Pushukesh-ukuk  
Um Yopipi Urkwip Iri Ta Shunek Beten  
Shorik Iruhin*

<sup>5</sup> Aria enen arpen enyenyim urkum munak mutuhukuk um yopumi urkum um, enyen ta nyunek beten nyirig Iruhin aria anan ta nuken anam shopunek. Um maresh? Anan apa nekeshesh meyoh sabaishi eshudok eneshenesh um sabaishi arpesh aria anan madae juwehosin nuhesh atin uwe, uwok. <sup>6</sup> Aria abudok nyutob enyen nyunek beten nyirig Iruhin um, enyen ta nyunek bilip abom nyukri adur aria nyunek beten nyirigan. Enyen mare nyusuhw biyep urkwip aria nyukri, "Iruhin ta numnek eikin beten aria nuke eshudok eik yariganumesh iri aka, uwok?" Enyen urkum mare mur namudok, uwok. Um maresh? Enyudok arpen douk enyenyim urkum mur namudok iri, enyenyim urkum douk mape kabi youg morub batuk um. Uhwini nyahuri aria nyenek youg gwokitak gwahur gwagipesh uhwin nyahur nyanak um. <sup>7</sup> Aria enyudok arpen mare nyukri Debeini ta nuken enesh eshudok eneshenesh, uwok. <sup>8</sup> Um maresh? Enyen nyere biyep urkwip aria ihinyumorum mour enyen nyeneken iri, enyen madae nyusuhw atum urkum aria nyuneken wosik uwe.

*Yaruhish Shani Shanagrem Sabaishi Eshudok Eneshenesh Iri*

<sup>9</sup> Eshudok Kristen douk yaruhish iri, eshesh ta shunadudareh. Um maresh? Iruhin douk natuk esheshish nyeiguhw shato iruhw. <sup>10</sup> Aria eshudok douk shanagrem sabaishi eshudok eneshenesh iri shopunek ta shunadudareh um agundok Iruhin naunin esheshish nyeiguhw um. Um maresh? Esheshish eshudok eneshenesh ta shunak shuwishuk kabi douk aruruhish douk shatogur ushap patogur urah iri um. Eshesh douk shape banab meyoh nyutob aria wata shopunek yarish. <sup>11</sup> Ipak padukemesh, douk wah hatao habo ushap yarip aria apapish yopishi aruruhish shopunek yarish

shanak shawishuk. Aria eshudok arpeshe douk shanagem sabaishi eshudok eneshenesh iri, anah nyumnah esheshish sabaishi eshudok eneshenesh ta shunak shuwishuk namudok atin. Abudok nyutob eshesh ta shupe shunek mour bisnis um shurao utabor, eshesh ta shugok. Aria esheshish eshudok eneshenesh ta shunak shuwishuk.

*Kwiraeh Nyutogur Nyukwiraeh Arpeshe Um*

<sup>12</sup> Arpen douk nyiyotu dodogowin abudok nyutob um enenyenen kwiraeh nyutogrumen nyukwiraehen obi nyutob, enyen ta nyunadudareh. Um maresh? Abudok nyutob enyen nyiyotu dodogowin nyunek uhwin um enyudok ihinyumorim kwiraeh um, kweipon enyen ta nyupe wosik abom ihih nyumneh. Enyen ta nyupe wosik kabi douk Iruhin nutuk ananin nyeigur nyuto iruhw um. Iruhin douk nakri enyudok adurin atinyi baraen um eshudok arpeshe douk urkwip punawasham anan iri ta shupe wosik abom ihih nyumneh. <sup>13</sup> Aria meibi nyutob enen kwiraeh nyutogur nyukwiraeh enen arpen um nyunek yoweishi inahos um, enyen mare nyukri, "Iruhin nenekesh aria douk yenek yoweishi inahos." Uwok. Um maresh? Iruhin douk mishin madae nyukitak atin um nunek yoweishi inahos uwe. Aria shopunek, anan douk madae nukri um nukwiraeh enen arpen um nuneken nyunek yoweishi inahos uwe, uwok. <sup>14</sup> Abudok nyutob kwiraeh nyutogrumep aria nyukwiraehep um punek yoweishi inahos um, abab douk apakip yoweipi urkwip atip penekap aria apakiruh aparuh hapuhur aria henekap munek yoweishi inahos. <sup>15</sup> Aria apak urkwip porum yoweishi inahos aria penekap abom um munek yoweishi inahos. Aria arigaha eshudok yoweishi inahos ta shutogur debesh aria ta shop abom mugok munak muwishuk.

<sup>16</sup> O ipak Kristen, eik douk urkum manawashamep abom. Douk namudok aria yakri ipak gamo pudukemesh um mare pukutukuk enen enyudokmori yoweinyi baraen nyunek rohwmep, uwok. <sup>17</sup> Ihishmorim eneshenesh yopishi

eshudok sharaesh meyoh kabi presen um iri douk shanaki iruhw heven. Eshudok yopishi eshesh douk anudok apakin Debeini Yain Iruhin douk nenek ihishmorim eneshenesh eshudok douk shabuh iruhw utag iri nakapesh iri. Anan douk madae nububodigen atin uwe. Anan aih madae kabi douk aboriguh um uwe, uwok. Aboriguh apa hwanabadig, anabik um hwatogur rouguhwi, aria anabik um hwatogur banaguhwi. Aria Iruhin douk madae nunobubodig atin uwe. Anan nape namudok atin. <sup>18</sup> Aria anan kanak nagipesh ananim atum urkum aria nenekap matogur abom sharik iri awiropish batowish um ihishmorim arpeshe shani eneshenesh eshudok anan nenekesh iri. Anan nenekap mape namudok um ananin adurin atinyi baraen atin.

*Apak Ta Mumnek Iruhin Ananin Baraen Aria Mugipeshen*

<sup>19</sup> O ipak Kristen douk eik urkum manawashamep abom iri! Ipak ta urkwip purum enyudok baraen. Ipak ihishmorim ta pubuk arigos um punnek baraen aria ipak mare puwanom-umesh baraen arigas. Aria shopunek, ipak mare juwehosip arigas. <sup>20</sup> Um maresh? Ehudok aih um arpeshe juwehosish um ta hukwarmori yoweih aih. Ekeh ta mare hukwarmori ehudok Iruhin nakriyeh iri yopihi aih, uwok. <sup>21</sup> Douk namudok aria douk ipak ta pukutukuk ihishmorim shabo susih iri yoweishi shuni eshudok ihishmorim yoweishi inahos douk arpeshe shenekesh sabaihi atih iri. Aria ipak ta pupe shakamum Iruhin nini arpeshe aria purao Iruhin ananin baraen douk riguk anan nawen nyape numun ipakiruh aparuh iri. Enyudok baraen douk dodogowin um nyutaurumep nyurep putanam punak um anan pupe wosik atin.

<sup>22</sup> Aria ipak mare punneken meyoh um Iruhin ananin baraen, uwok. Ipak ta punneken aria pugipeshen. Aria ipak punneken meyoh um, ipak douk penek rohwmep um ipak kanak. <sup>23</sup> Eshudok arpeshe douk shemneken meyoh aria madae shugipeshen iri uwe, eshesh douk

kabi arpen douk nyanatik enyenyig yamag wenyir iri um. <sup>24</sup> Enyen nyanatik jurug aria nyanak. Aria ahudok atuh enyen urkum mekenyuk um enyenyig yamag gape um. <sup>25</sup> Aria Iruhin ananin lo douk nyakweshihap um ehudok haweshikap iri yoweih aih aria nyenekap mape wosik atin douk abom um sagom-atinyin yopunyi lo. Aria enyudok arpen douk ihih nyumneh nyape um nyatrin wosik baugenyum enyudok lo aria enyen mare urkum mukenyukumen aria nyagipeshen iri, Iruhin ta nunekumen yopunyi enyudok arpen um nuneken nyunadudareh um ehudok aih enyen nyenekeh iri.

<sup>26</sup> Aria ta enen arpen nyukri, “Eik yasuhw Kraiss ananin baraen dodog aria yenek lotu um Iruhin,” aria enyen mare nyusuhw merik um enyenyit nokwat um, enyen douk nyape nyenek roh w um enyen kanak. Douk namudok aria agundok enyen nyape nyanak um lotu um nyuni enyenyin bilip ta mare amu nyutaurumen, uwok. <sup>27</sup> Douk yopihi aih um munek lotu aria apakin Yain Iruhin nutrup nukri apak yopipari baraen uwok-umap um, apak ta munekesh namudok. Aria enesh batowish esheshish amakenyish shugokuk, aria eshesh atish shupeik o ta anan arman nugokuk aria armatok otuk kwupeik um, apak ta mutaurumesh um enenyenen. Aria mutaurumesh mukesh eneshenesh eshudok yaruhish iri. Aria shopunek, apak ta mupe yopup aria ahudok atapihi yoweih aih ta mare hunek apakiruh aparuh hubosusih.

## 2

### *Apak Ta Urkwip Punawasham Ihishmorim Arpesh Shopunek Atin*

<sup>1</sup> O ipak Kristen douk pasuhw apakin Debeini Jisas Kraiss ananin baraen pagipeshen iri. Anan douk nape Debeinyi nyeigur nyatoum aria natrugun abom kabi douk Iruhin natrugun um. Douk namudok aria ipak mare punadudareh um eshudok arpesh douk nyeiguhw shato iruh-umesh iri atish aria pukeshuk agabus yoweishi nyeiguhw wokeshi,

uwok. Ipak ta punadudareh um ihishmorim arpesh shopunek atin. <sup>2</sup> Aria anan nanagrem sabaishi eshudok eneshenesh iri nur enen ring douk sheneken gol iri ananish hah, aria nurari yopihi atih rupeh nunak nuwishi ipak pape penek lotuat iri urupat, aria ta anan wokan um eshudok iri nere iri tutukarehi rupeh iri shopunek nunak nuwishi um, ipak ta punekesh mumam? <sup>3</sup> Ipak ta pukrip anudok nor yopihi rupeh iri pukri, “Nyak nyunak nyupe nyanyi yopunyi wagitur.” Aria anudok nor tutukareh iri pukripan pukri, “Nyak nyunak nyiyotu gani o nyunaki nyupe atap hurukatin um eikiruh yeriweruh,” aka uwok? Ipak mare punekesh namudok, uwok. <sup>4</sup> Aria ipak punekesh namudok um, ipak ta baraen nyupenyep. Um maresh? Ipak pagipesh ipakip yoweipi urkwip aria madae punek skelimum kupaishi Kristen shopunek atin uwe.

<sup>5</sup> O ipak Kristen! Ipak pumnek! Eshudok douk utabor bani jah wokesh iri, eshesh douk Iruhin nanagraehesh um shusuhw ananin baraen dodog shugipeshen aria shupe kabi debeishi um. Aria kweipon, eshudok arpesh douk eshesh urkwip panawasham anan iri ta shugrem eneshenesh yopishi eshudok douk shakus agundok douk ta Iruhin ananish arpesh shunak shupe um. Eshesh ta shugremesh kabi douk seiwok anan nakri enen adurin atinyi baraen um. <sup>6</sup> Aria ipak apa patuk eshudok douk shanagrem sabaibori utabor bani jah iri esheshish nyeiguhw shato iruhw. Aria pahao eshudok douk utabor bani jah wokesh iri. Aria ipak pakri meishi arpesh apa shekep enenyenen amaen aria sharaep shanak shenekumep kwotog? Eshesh douk eshudok shanagrem sabaibori utabor bani jah iri. <sup>7</sup> Seiwok Kraiss douk narao yopunyi nyeigur aria enyudok ananin nyeigur douk nyape ipak aria ipak ananish atish iri. Aria eshudok arpesh douk shanagrem sabaishi eshudok eneshenesh iri douk shape sheneyagwreh enenyenen yoweinyi baraen abom um enyudok nyeigur.

<sup>8</sup> Aria apakin Debeini king douk nashuhw merik um apak ihishmorim iri neneguk enen lo nyatemaguk Iruhin ananik Buk. Enyudok lo douk nyakri namudok, “Ipak ta urkwip punawasham eshudok douk shape hurukatin um ipak iri kabi douk ipak urkwip panawasham ipak kanak aria panagapesh ipak kanak um.” Aria ipak pugipesh enyudok lo um, ipak douk penek yopihi aih. <sup>9</sup> Aria ta ipak putaurum debeishi arpesh douk shanagrem sabaibori utabor bani jah iri atish, aria pukeshuk agabus yaruhish arpesh iri um, ipak douk penek yoweishi inahos pabrig lo abom. Aria enyudok lo atin ta nyunek kwotumep. <sup>10</sup> Um maresh? Aria enen arpen nyugipesh ihinyumorim Iruhin ananin lo douk nyetem ananik Buk iri, aria enyen nyubrig atin meyoh um, enyen douk kabi nyabrig ihinyumorim lo um. <sup>11</sup> Um maresh? Anudok atun nenek enyudok lo iri nakri, “Ipak mare punek wehrur,” aria shopunek nakri, “Ipak mare pubo kupaishi arpesh shugok.” Aria ta ipak mare punek wehrur, aria pubo kupaishi arpesh shugok um, ipak douk pabrig lo. <sup>12</sup> Aria kweipon Iruhin nunek skelimep um, anan ta nugipesh enyudok ananin lo douk nyakweshihap mape wosik iri aria nunek skelimap. Douk namudok aria ipak ta piyagwreh yopunyi adurinyi atin baraen aria punek yopihi atih aih. <sup>13</sup> Um maresh? Eshudok arpesh douk madae shukri shenek gihaum kupaishi arpesh iri uwe, kweipon Iruhin ta nunek skelimesh aria ta mare nukri gihaumesh. Aria eshudok douk shakri gihaum kupaishi arpesh iri, kweipon anan ta nukri gihaumesh aria shunek uhwin um ananit kwot.

*Bilip Douk Yopihi Aih Madae Hupeyen Iri Uwe, Douk Nyagok Kabi Douk Nyagok Iri Arpen um*

<sup>14</sup> O ipak eikishi arpesh, ta enen arpen nyukri, “Eik yasuhw Kraish ananin baraen dodog yagipeshen,” aria enyen mare nyunek yopihi aih hupeyen hiren um enyenyin bilip um, enyudokmori bilip ta mare nyuraen nyutanamori nyupe wosik abom uwe, uwok. <sup>15-16</sup> Aria enesh

ipakish ashukenyish owashish shunare tutukarehi rupeh, aria shopunek eshesh worigun wokesh aria ipak enen nyunak nyukripesh nyukri, “Eik yakri Debeini nunekumep yopihi aih aria ipak punak punare rupeh aria puwok yopuguni worigun!” Douk ipak ta pukripesh namudok aria mare putaurumesh uwe, aria enyudok ipakin baraen ta nyutaurumep mumam? <sup>17</sup> Aria bilip shopunek douk namudok atin abom. Aria enen arpen nyunek bilip meyoh aria mare nyunek yopihi aih hupeyen hiren um enyenyin bilip um, enyudok arpen enyenyin bilip douk nyagok kabi douk nyagok iri arpen um.

<sup>18</sup> Aria enen arpen ta nyukri, “Eik yenek bilip aria nyak nyenek yopihi aih.” Aria eik yakri ikrip enyudok arpen namudok, “Nyak nyiyabige nyakin bilip douk madae nyunek yopihi aih hiren iri uwe. Aria eik ta inek yopihi aih aria iyabigen baugenyum um eikin bilip.”

<sup>19</sup> Nyak nyenek bilip nyakri atun Iruhin nape. Aria enyudok douk wosik. Aria yoweishi sagabehos shopunek douk shenek bilip namudok, aria eshesh shanogugur abom aria krukruk shape. <sup>20</sup> Nyak nyor nyor nyenek rohwi iri. Douk eik yakri ikripen enen baraen um nyakin bilip. Aria nyak nyunek bilip meyoh, aria mare nyunek yopihi aih hiren um nyakin bilip um, enyudok nyakin bilip ta mare nyunek eneh yopihi aih uwe, uwok. Enyen douk wehinyi abom. <sup>21</sup> Nyak nyadukemesh, seiwok apakin yamenen Abraham nakri nuwem ananin nuganin Aisak enyudok alta douk showem um eshudok shenek ofamesh shako Iruhin um aria nunek ofaman nako Iruhin. Douk namudok aria abudok nyutob Iruhin natrun namudok aria nahwaran yopuni arman. <sup>22</sup> Douk namudok aria nyak tik, Abraham nenek bilip um Iruhin aria nunyanuh Aisak um ehudok aih um nakri nunek ofa um ananin nuganin nuko Iruhin um. Aria ananin aih henek ananin bilip nyatogur adurin. <sup>23</sup> Aria enyudok baraen douk nyetem Iruhin ananik Buk iri nyatogur adurin atin. Baraen douk enyudok, “Abraham nashuhw Iruhin

ananin baraen dodog nagipeshen aria Iruhin douk nahwaran yopuni arman.” Aria Iruhin nakri, “Abraham douk eikin arpen.”<sup>24</sup> Douk namudok aria enyudok baraen nyetem Iruhin ananik Buk iri douk nyeyabigep um Iruhin douk madae nuhwar arpesh yopishi um agundok shusuhw ananin baraen meyoh um atin uwe, uwok. Aria eshesh shugipeshen shunek yopihi aih shopunek um, anan wosik ta nuhwaresh yopishi arpesh.

<sup>25</sup> Aria okwudok armatok Rahap douk kwonek wehrur iri shopunek douk kwasuhw Iruhin ananin baraen dodog kwagipeshen aria kwenek yopihi aih shopunek. Okwok douk kwataurum amam Juda douk hanabeshuk hanakum hutik okwokwibur wabur iri aria kwataurumam haruwok hanak kupaihi yah. Aria Iruhin natik ehudok yopihi aih okwok kwenekeh um amudok armam iri aria nahwarok yopukwi armatok.

<sup>26</sup> Aria enyudok arpen douk mishin madae nyupenyen iri uwe douk nyagok. Aria bilip douk madae shunek yopihi aih hiren iri uwe shopunek douk nyagok jurug kabi enyudok nyagok iri arpen um.

### 3

#### *Apak Ta Gamo Mudukemesh Um Apak Miyagwrehen Iri Baraen*

<sup>1</sup> O ipak Kristen! Ipak gamo pudukemesh um ipak mare sabaipari pukri putogur tisa omi um punek skulum kupaishi, uwok. Um maresh? Ipak padukemesh, kweipon Iruhin ta nunek skelimap um, apak tisa douk makripesh Iruhin ananin yopinyi baraen iri ta miyotu um debeiti kwot. Aria eshudok douk shape Kristen meyoh iri ta shiyotu um shokwuti kwot. <sup>2</sup> Ihih nyumneh apak ihipmorim apa matu munek enesh yoweishi inahos. Aria ta enen arpen nyiyagwreh yopunyi atin baraen um, enyen douk yopunyi abom arpen. Douk namudok aria enyen wosik ta nyusuhw merik um enyen kanak nyuni enyenyim urkum shopunek.

<sup>3</sup> Ipak padukemesh, apak apa menyigur shokubi ainab bawish hwosahos esheshig

nokwatog um munekesh shugipesh apakin baraen shunak agundok apak makri munak um. <sup>4</sup> Aria shopunek, ipak punek urkwip um debeiwori kruruhiyor. Kruruhiyor owo douk debeiwori, aria debeinyi uhwin apa nyahur aria nyeneko wahur wanak youg. Aria owowin badaeg douk shokwinyi meyoh. Aria ta nasuhw korohuk iri nukri nunak anagun um, anan ta nuwanam um agudok shokugi badaeg aria okwok ta kwunak agundok anan nakri nunak um. <sup>5</sup> Aria apakig nokwatog douk namudok atin kabi hwosahos shani kruruhiyor um. Ogowog douk shokugi aria gwape orokohun um apakiruh yegeshiweruh. Aria ogwog apa gwanagunukuk gwariguk gweyagwreh enenyenen yopinyi mour nyani aih ogwog gwakri gwunekesh iri.

Ipak padukemesh, enen shokwinyi nyabahasin ta nyukwarum debeihi nyih. Aria eheh ta hunu sabaisi debeishi rowos satao urah iri hiyatagos. <sup>6</sup> Aria apakig nokwatog douk gwape kabi nyih um. Ogowog gwape orokohun um apakiruh yegeshiweruh aria apa gwakwarumori eneheneh yoweih aih. Aria ogwog apa gwenek apak ihishmorim arpesh matogur yoweishi. Aria ogwog apa gwenek ihinyumorim apakin baraen nyani aih iri mour yowen abom kabi douk nyih hanu enesh-enesh eshudok hanununish um. Ehudok nyih douk hanuwi abrudok yoweiburi wabur hel.

<sup>7</sup> Aria arpesh douk dodogowish um shusuhw ihishmorim wanmarish mahish shuni armiguhw iri yuguhw shuni ihishmorim eshudok shape shakam youg iri aria shunak shukesh shunobresh-esh um shugipesh esheshin baraen. Aria ehudok aih arpesh douk shenekeh jurug aria shopunek shenekeh douk.

<sup>8</sup> Aria arpeshig nokwatog ta mare enesh arpesh dodogowish um shusuhw merikwumog, uwok. Ihih nyumneh ogwog apa gwape um gwakri yoweinyi atin. Ogowog douk yoweg abom aria shuknig um eneshenesh yoweishi abom inahos kabi douk yoweini marasin um.

<sup>9</sup> Apak apa makwu apakig nokwatog um matuk apakini Debeini Yain ananin

nyeigur nyato iruhw. Aria wata shopunek makwu ogwudok atug nokwatog um meyagwreh yoweigwi nubug um makri yoweishi inahos shutogurum kupaishi arpesh douk Iruhin nenekesh shadukemesh abom um anan kanak iri. <sup>10</sup> Douk ogwudok atug nokwatog apak matuk Iruhin ananin nyeigur nyato iruhw. Aria wata shopunek makri nubug um makri yoweishi inahos shutogurum kupaishi arpesh. Aria ipak Kristen mare piyagwreh namudok uwe, uwok. <sup>11-12</sup> O ipak Kristen, eik yakri ikripep enyudok binyatin wobuwobren baraen. Baraen enyudok. Ta mare anabar yopubari abar buni anabar nubutibari bukih bur atug waiyag, uwok. Aria shopunek, ta mare anep shuruwep nyeigurip um oliv iri pir enen rowog nyeigur-inyum fik iri. Aria shopunek, ta mare anep shuruwep fik iri ta pir enen rowog nyeigur-inyum wain iri, uwok. Aria douk namudok atin, ta mare anabar yougibar nubutibari abar butanam bunenek um yopubari uwe, uwok.

### *Iruhin Atun Apa Nakop Yopipi Urkwip Iri Saki*

<sup>13</sup> Ipak meinyi arpen douk yopunyi saki nyapenyen aria nyadukemesh wosik iri, enyen ta nyunekesh namudok. Enyenyih aih huni mour iri baraen ta nyiyabig kupaishi arpesh um enyenyin saki nyuni enyenyih yopihi aih aria nyupe shakamum eshesh. Aria ehudok yopihi aih um arpesh shupe shakamum kupaishi arpesh um douk hatograri enyudok yopunyi saki. <sup>14</sup> Aria ta ipak punek nyigiya abom um kupaishi esheshish eshudok eneshenesh, aria ipak urkwip porum pakri ipak atip purao sabaibori utabor buni jah aria kupaishi shutuk ipakish atish nyeiguhw shuto iruhw um, ipak mare putuk ipakish nyeiguhw shuto iruhw aria punek roh pukri ipak pagipesh Iruhin ananin adurin atinyi baraen, uwok. <sup>15</sup> Aria enyudok saki douk madae nyunaki iruhw heven iri uwe, uwok. Enyen douk agundok atapinyi. Enyen douk nyatograri harik hapenyep iri yoweih aih douk henekep pape penek yoweishi inahos iri. Enyudok

saki douk eshudok Satan ananish enselahos esheshin. <sup>16</sup> Aria eshudok arpesh douk shunek nyigiya um kupaishi arpesh esheshish eshudok eneshenesh, aria eshesh urkwip porum shukri eshesh atish shurao sabaibori utabor buni jah aria kupaishi shutuk esheshish atish nyeiguhw shuto iruhw um, eshesh ta mare shupe wosik shuni kupaishi arpesh, uwok. Eshesh ta shupe um shunotutukem shurpak shunitok aria ta shunek eneshenesh yoweishi inahos shopunek.

<sup>17</sup> Aria enyudok saki douk nyanaki iruhw heven iri apa nyakwarum ehudokmori yopihi aih. Harik iri aih douk ehudok um arpesh shupe wosik aria eshesh urkwip purum yopunyi atin. Aria sabaihi yopihi aih shopunek douk ehudok. Arpesh esheshiruh aparuh hur wosik aria yopuruh um kupaishi. Aria eshesh shiyagwreh shokwin baraen aria shukri gihaum kupaishi aria shunek ehudok yopihi aih shutaurum kupaishi. Eshesh ta mare shiyagwreh biyog nokwatog um shunek roh w um kupaishi, uwok. Aria shopunek, ta mare shukri shunadudareh um enesh arpesh aria shukeshuk agabus kupaishi, uwok. Eshesh ta urkwip purum ihishmorim arpesh shukri eshesh douk shopunek atin abom. <sup>18</sup> Aria eshudok arpesh esheshiruh aparuh hor wosik aria aparuh yopuruh um kupaishi, aria shutaurumesh, enyudok eshesh douk kabi shawu worigun um. Ehudok aih ta hunekesh shutogur yopishi arpesh kabi douk moneki yopuguni worigun nubarig um.

## 4

### *Eshudok Arpesh Douk Esheship Urkwip Panawasham Agundok Atapihi Aih Iri Douk Iruhin Ananish Horim*

<sup>1</sup> Ehudok yoweih aih um ipak panoguganim aria parpok panitok um douk paraehi agunum? Eheh douk ehudok harik hapenyep iri aih um penek yoweishi inahos um hohur ipakiruh aparuh aria henekep pape parpok panitok. <sup>2</sup> Ipak pakri purao sabaishi eneshenesh eshudok aria ipak madae puraesh atin uwe. Douk namudok aria ipak



pakri pubo kupaishi arpesh shugok. Ipak penek nyigiya abom um enesh eshudok eneshenesh aria ipak madae dodogowip um puraesh uwe, uwok. Douk namudok aria ipak pape um rupok nitok atin. Aria ipak madae puraesh uwe. Um maresh, ipak madae punek beten porik Iruhin um nukepesh uwe. <sup>3</sup> Aria shopunek, abudok nyutob ipak penek beten parigon um, ipakip urkwip madae pur wosik uwe, uwok. Ipak parigon um nukep eshudok um pugipesh ipakih harik iri yoweih aih hape numunipum iri. Douk namudok aria ipak madae puraesh atin uwe.

<sup>4</sup> Ipak pakutukuk Iruhin ananin yopihi aih aria panak penek yoweishi inahos. Enyudok ipak peneken iri douk kabi armam armago shakutukuk yopihi aih aria shenek wehrur um. Aria ta enen arpen urkum munawasham abom agundok atapih aih um, enyen douk nyakanaguk agab Iruhin aria nyatogur ananin horin. Aria douk ipak padukemen enyudok aka uwok? Douk meinyi arpen enyenyim urkum munawasham agundok atapih aih iri douk nyatogur Iruhin ananin horin.

<sup>5</sup> Enen Iruhin ananin baraan nyetem ananik Buk iri douk nyakri namudok, “Eshudok apakish mishish douk Iruhin nakepesh shape numun apakiruh aparuh iri  
ihih nyumneh shapeum shenek nyigiya um eneshenesh eshudok.”

Aria ipak mare pukri enyudok baraan douk enen rohwin, uwok. Enyen douk adurin atin abom.

<sup>6</sup> Aria Iruhin nataurumap abom meyoh aria nenekap mape dodogowip kabi enyudok baraan nyetem Iruhin ananik Buk iri nyakrium. Baraan enyudok, “Iruhin apa nekesh agab eshudok douk shatuk eshesh kanak esheshish nyeiguhw shato iruhw aria shakri eshesh atish yopishi iri. Aria anan apa nataurumesh meyoh eshudok douk shape shakamum anan iri.”

<sup>7</sup> Douk namudok aria ipak ta pupe shakamum Iruhin pugipesh ananin baraan. Aria mare punnek Satan, uwok abom. Ipak pukanaguk agabus abom aria anan ta nukutipukuk nuruwok.

<sup>8</sup> Aria ipak punak hurukatin abom um

Iruhin aria anan ta nunaki hurukatin um ipak. Ipak douk pape penek yoweishi inahos iri, ipak pukutishuk aria putanam putogur yopishi arpesh. Aria ipak peyagwreh biyog nokwatog iri ta pukutukuk eshudok yoweishi inahos aria punek ipakip urkwip putogur yopip. <sup>9</sup> Ipakiruh aparuh ta yoweruh abom aria pakri uwok abom um eshudok eneshenesh yoweishi inahos ipak pape penekesh iri. Ipak pureh punakwukri debeg um eshudok yoweishi inahos aria pukutishuk. Aria ipak ahudok nyumnah douk pape pagukoruh iri shopunek, ipakiruh aparuh ta yoweruh aria pureh um eshudok yoweishi inahos ipak pape penekesh iri aria pukutishuk. Aria ipak ahudok nyumnah douk ta panadudareh iri, ipak shopunek aparuh ta yoweruh aria pakri uwok um eshudok yoweishi inahos ipak pape penekesh iri. <sup>10</sup> Ipak ta pupe shakamum Debeini aria anan ta nutaurumep nunadudareh-umep nukri ipak yopipari.

#### *Apak Mare Munek Skelim Um Kupaishi Kristen*

<sup>11</sup> O ipak Kristen! Eik yakri uwok um ipak piyagwreh agabusin baraan um, uwok. Um maresh? Ta enen arpen nyunumugesh kupaishi Kristen o nyunek skelimesh um, enyen douk nyenek skelimum Iruhin ananin lo nyakri enyen douk yoweinyi. Aria eshudok arpesh douk shenek skelimum Iruhin ananin lo iri douk madae shugipesh ananin lo uwe. Eshesh douk shape kabi debeimi jas douk hasuhw kwotog iri aria shenek skelimum enyudok lo. <sup>12</sup> Anan douk Iruhin atun abom nakop enyudok lo aria anan atun nape debeini jas um nunek skelimum ihishmorim arpesh. Aria douk anan atun abom wosik um nutaurumap nurapi mukutukuk yoweishi inahos mupe wosik atin. Aria shopunek, anan atun ta nunek skelimap aria nop nununup mugok abom munak muwishuk. Douk namudok aria ipak maresh arpesh aria douk ipak pakri punek skelimum kupaishi arpesh douk shani ipak pape atugun iri? Ipak mare punekesh namudok, uwok.

*Apak Mare Mutuk Apakish Nyeiguhw Shuto Iruhw Um Eshudok Douk Ta Apak Munekesh Iri*

<sup>13</sup> Ipak enep apa pakri namudok, “Doukih o nuhutih, apak ta munaku um babri debeiburi wabur munak mupe atin kwar aria mupe munek bisnis aria muraosabaibori utabor.” Aria ipak pumnek enyudok baraan. <sup>14</sup> Baraan enyudok. Ipak douk madae gamo pudukemesh um eshudok douk o nuhut ta shutogrumep iri uwe. Ipakish kwarahos um ipak pupe um douk kabi nyugus douk sakih sato sape banab meyoh nyutob, aria ahudok atuh wata sanak suwishuk iri. <sup>15</sup> Aria ipak ta pakri namudok, “Ta Debeini urkum mukri wosik um, apak ta mupe aria munek enyudok mour o kupainyi.” Ipak pakri namudok um, enyen douk wosik. <sup>16</sup> Aria douk ipak pakri ipak atip dodogowipari padukemesh um eneshenesh iri aria patuk ipakish nyeiguhw shato iruhw. Enyudok ipak douk penek yoweishi inahos abom. <sup>17</sup> Douk namudok aria ipak ta pudukemesh. Meinyi arpen douk nyadukemesh um nyunek yopihi aih, aria enyen madae nyunekeh iri uwe, enyen douk nyenek yoweishi inahos.

## 5

*Shogrem Sabaishi Eshudok Eneshenesh Iri Esheshin Baraan*

<sup>1</sup> Douk ipak ponogrem sabaishi eshudok eneshenesh iri pumnek. Ipak urkwip purum enyudok debeinyi amaen douk ta ipak puraen iri aria pureh debeg. Ipak pureh punakwukri punoruwor. <sup>2</sup> Kweipon ipakih jah huni eneshenesh eshudok ta tutukresh. Aria ipakih rupeh ta tutubrugos sutupeh. <sup>3</sup> Abrudok ipakibor utabor, aria gol iri siliwa douk ros satowabor aria ta yowebor. Asudok ros ta siyabigep um ahudok yah douk ta kweipon Iruhin nep um. Iruhin ta nunek asudok ros sunek ipakiruh yegeshiweruh humnek debeiri eriger kabi douk nyih hanip um. Ipak panabuk ipakibor utabor bakusumep atugun aria hagiguk iri nyumneh douk hanaki hurukatin. Aria ehudok nyumneh, Iruhin ta nunek kwotumep aria ta nunekep

pumnek debeiri eriger. <sup>4</sup> Aria ipak pumnek. Ipak madae pukom utabor mamudok armam douk pahwarom hanaki henekumep mour hape hatuk-umep worigun um ipakig nubarig iri uwe. Aria eshudok ipak penekesh iri yoweishi inahos douk shape showerehep kabi douk enen arpen nyowereh ipakish yoweishi inahos um. Aria ipak ta pumnek amam hape hereh debeg harigep um amamibor utabor um. Debeini douk nasuhw iruhw atap iri nabo ihishmorim shabuhuk iri douk nemnekam jurug. <sup>5</sup> Aria abudok nyutob ipak pape agundok atap um, ipak pape wosik aria ponogrem yopishi atish eshudok eneshenesh. Aria ipak pawok sabaiguni worigun patogur takweipari. Ipak douk pape penekesh namudok aria pudukemesh um ahudok nyumnah Debeini nunek skelimep aria nukri ipak baraan nyapenyep um. <sup>6</sup> Aria ipak penekumesh kwotog yopishi arpesh aria paesh shagok aria eshesh madae shatanam shukriep enen baraan uwe o shini ipak purpak uwe, uwok.

*Apak Mupe Dodogowip Aria Mupe Mutrugun Um Debeini Nutanamori Um*

<sup>7</sup> O ipak eikish arpesh. Ipak ta piyotu dodogowip, aparuh hur wosik aria pupe putrugun um ahudok nyumnah Debeini nutanamori ahi. Ipak urkwip purum anan arman nagrem anag nubarig iri. Anan apahw hwor wosik aria nape natrugun um ananigun yopuguni worigun douk nawogun ananig nubarig iri um arigaha yopugun. Anan apahw hwor wosik aria nape natrugun um harik iri huni hugiguk iri eshah hurauri. Ahah hutuhuk aria wah hutao hesh shus suhwesh aria anan kadak nunak nutukagun. <sup>8</sup> Aria ipakiruh aparuh shopunek ta hur wosik aria piyotu dodogowip pupe putrugun um ahudok nyumnah hutogur. Umum maresh? Ahudok nyumnah Debeini nutanamori ahi ta hutogur. <sup>9</sup> Ipak eikish arpesh, ipak mare pukesh baraan kupaishi pukri eshesh shenekep parao amaen, uwok. Aria ipak punekesh namudok um, kweipon Iruhin, anudok debeini jas ta nusuhw ipakig kwotog aria

nukri enyudok ipak penek yoweishi inahos. Anan douk hurukatin um nunaki nunek skelimum ipak ihipmorim. <sup>10</sup> Aria ipak urkwip purukuk um amam seiwokimi profet douk hanak hakripesh Iruhin ananin baraan um Debeini ananin nyeigur iri. Amamiruh aparuh hor wosik aria heyotu dodogowim hosah enenyenen amaen nyatogrumam nyenekam hemnek debeiri eriger iri. Aria ipak shopunek ta pugipesh amamih aih. <sup>11</sup> Aria ipak douk padukemesh um apak makri amudok profet douk heyotu dodogowim hosah enenyenen amaen douk nyatogrumom iri. Aria apak matrum makri amam douk hanadudareh. Aria ipak shopunek padukemesh um anudok seiwokini arman Jop. Anan neyotu dodogowin atun um nasah enenyenen amaen douk nyatogruman iri. Anan nape dodogowin arigaha Debeini nagipesh ananim atum urkum aria natauruman. Aria ipak padukemesh, Debeini apa urkum manawasham apak aria anan apa nenek gihaumap nenek yopinyi um apak.

*Apak Mare Mukri Iruhw Um, Uwok*

<sup>12</sup> O ipak eikish arpes, baraan douk sagom-atinyin abom nyeshagrakuk enyudok eik yarig yakripepen iri douk enyudok. Ipak pakri enen adurin baraan um, ipak mare porik iruhw heven o agundok atap o enesh kupaishi eshudok um putaurum ipakin baraan um puneken nyupe dodogowin, uwok. Ta pukri, "Adur" um, pukri, "Adur." O ta pukri, "Uwok" um, pukri, "Uwok." Um maresh? Ta ipak pukri iruhw um, Iruhin ta nunek kwotumep um enyudok baraan nukri ipak yoweipari.

*Yopishi Abom Arpes Shenekan Iri Beten Douk Dodogowin*

<sup>13</sup> Aria ipak enen arpen enen amaen nyutogrumen um, enyen ta nyunek beten nyuhwar Iruhin. O ta enen nyunadudareh um, enyen ta nyiyarub nyutuk Iruhin ananin nyeigur nyuto iruhw. <sup>14</sup> Aria ta enen eneh arugeh hen um, enyen ta nyuhwar Iruhin ananish arpes esheshim debeimi um hunak hurak yopuri wel hurayok enyenyihw yegenyihw

aria hunek betenumen huhwar Debeini um nugabeyen. <sup>15</sup> Aria ta amam hunek bilip hukri adur, Iruhin douk dodogowini abom um nugabeyen aria hunek beten horigan um, Debeini ta nugabeyen nyukitak nyupe. Aria ta enyen nyunek enesh yoweishi inahos um, Iruhin ta nukweshih-eshuk. <sup>16</sup> Douk namudok aria sagomatin ipak ta puwerek ipak penekesh iri yoweishi inahos pukrip kupaishi Kristen aria eshesh shopunek shuwerek shukripep um esheshin. Aria ipak punagapesh um punek beten puhwar Iruhin um nunekep yopip pukitak pupe. Yopishi abom arpes shenekan iri beten douk dodogowin abom aria ta nutaurum arpes. <sup>17</sup> Anudok seiwokini profet Ilaija, anan douk arman kabi apak um. Aria anan nenek beten dodogowin atun nahwar Iruhin um eshah mare hurari aria bishatin shuknishi enen tukwaninyi kwarahos eshah madae anah hurari esheshib amnab uwe. <sup>18</sup> Arigaha douk wata shopunek nenek beten nahwar Iruhin aria eshah wata harari henek worigun natogur wosik.

*Aria Enen Arpen Nyukutukuk Iruhin Um, Apak Ta Mutaaurumen Munyanam-ori*

<sup>19-20</sup> O ipak eikish arpes. Aria ipak enen nyukutukuk Iruhin ananin adurin baraan aria mare nyusuwen dodog nyugipeshen, aria kupainyi arpen wata nyutaurumen nyunyanam-ari um, apak urkwip purum enyudok baraan. Baraan enyudok. Meinyi arpen nyutaurum kupainyi arpen nyukutukuk yoweishi inahos aria wata nyutanam nyunek yopunyi um, enyen douk nyataaurumen um mare nyugok nyunak nyuwishuk, uwok. Aria Iruhin ta nukweshih yoweishi inahos enyen nyenekesh iri.

## Parik Iri Shup Douk Pita Nenekap Iri

*Banenyi Baraen Um Enyudok Baraen Pita Narik Nenyem Iri*

1:1-2 Pita nanadudareh um eshesh Kristen aria nakripesh Iruhin ananin baraen

1:3—2:10 Iruhin nenekap um mupe wosik ihih nyumneh. Namudok aria apak ta munek yopihi atih aih

2:11—5:9 Apak ta mupe shakamum Iruhin nini arpesh aria mupe dodogowip mumnek eriger

5:10 Nyagiguk iri baraen

<sup>1</sup> O ipak Iruhin nagraehesh iri arpesh douk pakutukuk ipakirub warub panaku pape arbudok sabairubi warub bape shokugosi nahobigos nyeigur-igosum Pontus, Galesia, Kapadosia, Esia sani Bitinia iri. Eik anan Jisas Kraais ananin aposel yenekumepogu apudok shup ipak.

<sup>2</sup> Ipak douk Yain Iruhin nanagraehep kabi seiwok anan nagipesh ananim urkum aria nakri um. Aria shopunek, ananin Mishin nyenekep patogur ananish atish arpesh um pugipesh Jisas Kraais ananin baraen. Aria um nishrokuhep ananibor owishibor um bunekep pupe Iruhin ananipari atip. Aria eik yakri Iruhin nunek ehudok biyeh aih um anan nutaurumep meyoh um, huni ehudok um nunek ipakiruh aparuh hur wosik um hupenyep abom aria hutogur debeih numun ipakiruh aparuh.

*Apak Mupe Wosik Abom Um Douk Nape Natrugunumap Iruhw Heven*

<sup>3</sup> Iruhin anan douk apakin Debeini Jisas Kraais ananin debeini Iruhin aria shopunek, anan douk ananin Yaken. Apak ta mutuk ananin nyeigur nyuto iruhw. Anan nenek gihaumap abom aria nohuri Jisas Kraais nakitaki wonugwehw nakitak nape. Iruhin nenekesh namudok aria anan nenekap matogur namupari. Apak madae mugok uwe, uwok. Apak mape manadudareh aria madukemesh

abom um kweipon apak ta munak muni Iruhin mupe. <sup>4</sup> Aria shopunek, apak mape matrugun um kweipon apak mugrem eneshenesh yopishi eshudok douk Iruhin neshubuk shakus um nuko ananish arpesh iri um. Anan neshubuk shakusumep iruhw heven. Aria ganudok eshesh ta mare yowesh o mare shubosusih o shunak burukworeshuk, uwok. Eshesh ta shukus ihih nyumneh. <sup>5</sup> Eshesh douk shakus um ipak. Ipak douk pakri Iruhin ananin baraen adurin pagipeshen aria ananin dodog nyataurumep aria douk pape wosik. Aria arigaha punak putogur um agundok anan nutaurumep nuraep pupe wosik um nutogur yopugunum ahudok hugiguk iri nyumnah.

<sup>6</sup> Aria ipak panadudareh abom um ipakish yopishi eshudok aria douk banab nyutob meyoh, aria ta sabainyi enenyenen amaen nyatogrumep nyenek ipakiruh aparuh yoweruh. <sup>7</sup> Enyudok enenyenen amaen nyatogrumep um, Iruhin nakri nukwiraeh um ipakin bilip um nuneken nyutogur dodogowin. Ipak punek urkum um gol, gol arpesh apa shatorur debeibori utabor. Aria ipakin bilip douk nyeshagrakuk abom arudok gol douk ta kweipon yower iri. Aria arpesh apa shoreh nyih um shunegor rutogur yopur abom. Aria Iruhin douk nokwiraeh ipakin bilip kabi douk gol um nyutogur adurin atin abom aria arpesh shutrin. Aria hahudok nyumnah Jisas Kraais nutogur yopugunum ahi, Iruhin ta nukripep nukri ipak yopipari aria nutuk ipakish nyeiguhw shuto iruhw. <sup>8</sup> Riguk ipak madae putik Jisas uwe aria ipak urkwip panawashaman. Aria douk shopunek ipak madae putrun uwe aria ipak pemnek ananin baraen atin aria penek bilipman. Douk namudok aria douk ipak panadudareh. Aria agundok ipak panadudareh um douk nanaki iruhw heven. Aria apak baraen douk madae enen abom uwe um wosik mukripesh aria shudukemesh um agundok ipak panadudareh um uwe. Adur atin, uwok. <sup>9</sup> Ipak panadudareh abom namudok um madesh? Ipak penek bilip um Jisas Kraais aria kweipon Iruhin ta wata nutaurumep

nuraep putanamori pupe wosik abom. <sup>10</sup> Amam seiwokimi profet henek urkwip dodogowim atum abom henek debeinyi mour um hakri hudukemesh um agundok um kweipon Iruhin nutaurumap nurap mupe wosik um. Amam hakripesh enyudok baraeen um Iruhin nutogrumeep nutaurumep meyoh nunarep pupe wosik um. <sup>11</sup> Krai ananin Mishin douk nyape numun amamiruh aparuh iri nyakri enen baraeen um kweipon ta anaranar yoweiri eriger rurik rutogur um Krai runegon numnek debeiri eriger aria ta wata shutuk ananin nyeigur nyuto iruhw um. Namudok aria amam atun atun hape hanasorim um hakri, “Enyudok ta nyutogur meibi nyutob?” <sup>12</sup> Iruhin neyabig amam profet hadukemesh um amam douk madae hunek enyudok mour um hutaaurum amam kanak uwe, uwok. Amam douk heneken um hataaurum ipak. Seiwok amam hakripesh abom um eshudok atish douk amam hakripesh Iruhin ananin yopinyi baraeen iri hakripep-umeshi. Amam douk Iruhin ananin Mishin douk Iruhin neshopokenyi nyanaki iruhw heven iri nyataaurumam dodogowim atum aria douk hakripep enyudok yopinyi baraeen. Aria douk madae amam atum hukri um hudukemesh um enyudok baraeen uwe, uwok. Iruhin ananish enselahos shopunek shakri shudukemen.

### *Iruhin Nahwarap Um Mupe Ananip Atup Abom*

<sup>13</sup> Douk namudok aria abudok nyutob ipak ta urkwip gamo pur wosik um punek yopinyi atin mour. Ipak ta gamo pudukemesh um ipak kanak aria ipak urkwip mare purum eneshenesh yoweishi inahos, uwok. Aria pupe putrugun abom um Iruhin nutaurumep meyoh nuraep pupe wosik ahudok nyumnah Jisas Krai nutogur yopugunumahi. <sup>14</sup> Ipak ta punnek Iruhin ananin baraeen pugipeshen kabi batowish shemnek amakenyishin baraeen shagipeshen um. Riguk ipak madae pudukemesh um enyudok Iruhin ananin yopinyi baraeen uwe aria ipak apa penek eneshenesh yoweishi inahos kabi douk ipak mishish

shakitak aria penekesh um. Aria douk uwok. <sup>15</sup> Ipak ta pupe wosik abom um enenyenen ipak puneken iri kabi Iruhin douk nahwarep iri um douk wosik yopinyi abom um. <sup>16</sup> Aria Iruhin ananik Buk kwakri namudok, “Eik douk yopuwe iri abom, douk namudok aria ipak shopunek ta pupe eikish yopishi abom arpesh.”

### *Iruhin Nenek Debeinyi Mour um Nator Apak Um*

<sup>17</sup> Ipak apa pahwar Iruhin pakri Yain. Anudok Yain anan douk madae nukri nutrup um agundok apak nyeiguhw shatoumap um o nyeiguhw wokap um aria nunek skelimap uwe, uwok. Anan apa nenek skelimap shopunek atin um ihimorim eneheneh aih apak atin atin menekeh iri um. Namudok aria abudok nyutob ipak pupe abudok amnab douk madae ipakib abom iri uwe um, ipak ta punogugur um Iruhin aria pupe punek lotuman. <sup>18</sup> Um maresh? Ipak padukemesh, seiwok ipak pape pagipesh eneheneh yoweih rohwi aih douk panarao-wehuk ipakim yamehem babukenyim iri. Aria douk Iruhin nanatorip aria nakweshihap pape wosik atin um ehudokmori aih. Anan douk madae nutorip enesh eshudok douk ta kweipon yowesh shunak shuwishuk iri uwe, kabi douk abrudok utabor gol rani siliwa um uwe, uwok. <sup>19</sup> Anan nakwu Krai ananibor owishibor natorip aria nakweshihap nenekep pape wosik atin. Aburdok owishibor douk beshagrakuk abom eneshenesh eshudok douk shatorish debeibori utabor iri. Krai anan douk kabi enen yopunyi abom nugaen sipsip douk seiwok eshesh shaen shenek ofamen shako Iruhin iri um. Enyen arab uwok anab bupenyen uwe aria madae nyunenek nyubrusug uwe, uwok. <sup>20</sup> Douk seiwok Iruhin wata nunek agundok atap uwe aria anan nograehaguk Krai um nugok um nuraep putanam pupe wosik. Aria ahudok hagiguk iri nyumneh anan nutogur yopugunum um nutaurum ipak. <sup>21</sup> Aria douk anan nataaurumep aria ipak penek bilip um Iruhin douk nohuri Krai nakitaki wonugwehw aria natuk ananin nyeigur

nyato iruhw iri. Namudok aria ipak douk penek bilip abom um Iruhin padukemesh um anah nyumnah anan atun ta wata nuraep pupe wosik atin.

*Apak Ta Urkwip Panawasham Kupaishi Kristen*

<sup>22</sup> Ipak douk pagipesh enyudok adurin atinyi baraen um Kraiss nagok natorip um. Douk namudok aria ipak penek ipakiruh aparuh hatogur yopuruh. Aria douk ipak ta urkwip punawasham kupaishi Kristen jurug. Aria ipak mare punek rohwa punek ehudok aih aduk yegeshiweruh aturuh, uwok. Ipak ta urkwip punuwashamesh abom. <sup>23</sup> Um mares? Ipak douk madae putogur namipi kabi batowish agundok atapish amakenyish sheshubuki iri douk apa shagok iri uwe, uwok. Ipak douk enyudok Iruhin ananin baraen douk nyape ihih nyumneh iri nyenekep patogur namipi. Enyudok baraen, enyen douk apa nyenek arpes shape wosik abom ihih nyumneh iri.

<sup>24</sup> Aria Iruhin ananik Buk douk kwakri um enyudok baraen kwakri, "Ihishmorim arpes shape banab nyutob kabi wishap um. Agundok esheshish nyeiguhw shato iruh-umesh um douk kabi aruruhish um. Aria wishap apa yarip aria aruruhish shopunek apa tutukaresh shabuh. <sup>25</sup> Aria Debeini ananin baraen apa nyape ihih nyumneh."

Enyudok baraen douk Iruhin ananin yopinyi baraen douk armam apa hakripepen iri.

## 2

*Debeini Jisas Douk Iruhin Norukwon Yapis Aria Nape Ihih Nyumneh Iri. Anan Douk Kabi Anam Yopumi Utom Sharok Urusag Omi*

<sup>1</sup> Ipak douk patogur namipi, douk namudok aria ipak ta pukutukuk abom ihishmorim eneshenesh yoweishi inahos. Eik yakri enyudokmori um peyagwreh biyog nokwatog penek rohwa um kupaishi arpes um, nyuni penek nyigiya um kupaishi esheshish eshudok um, nyuni panumogesh kupaishi um. <sup>2</sup> Ipak

mishish ta shikitak abom um purao Iruhin ananin yopinyi atinyi baraen kabi douk weshubuk iri batowish apa shapeum shakri shuwok nyumeb atib um. Ipak punekesh namudok um, enyudok baraen ta nyutaurumep nyunekep putogur dodogowip punek yopihi aih pishagrakuk riguk parik pape penek iri. Aria Iruhin ta wata nutaurumep nuraep pupe wosik ihih nyumneh <sup>3</sup> kabi douk baraen nyetem Iruhin ananik Buk iri nyakrium. Baraen enyudok, "Ipak pokwiraeh jurug um Debeini ananin aih aria padukeman um anan douk yopuyopuni abom."

<sup>4</sup> Aria ipak ta punakumori Debeini. Anan douk Iruhin norukwon yapis aria nape ihih nyumneh kabi anam yopumi utom douk sharok urusag omi. Amam douk arpes shakri uwok-umom aria shamuhur shamubukuk anagas. Aria Iruhin douk nagraeham jurug nakri amam douk yopumi abom. <sup>5</sup> Aria

ipak douk Iruhin norukwep yapis aria pape kabi yopubori utabor sharok urusag abori. Aria ipak ta punakumori anan aria nupe nunekep putogur yopishi arpes kabi ananin debeiti urupat um. Iruhin ta nunekep namudok um pupe ananin pris aria punek ofa pukon ipakiruh aparuh huni ipakip urkwip anan um Jisas Kraiss ananin nyeigur. Ipak punek enyudok aria Iruhin ta nutrip nukri ipak yopipari.

<sup>6</sup> Seiwok Iruhin nakriyen aria henyem nyetem ananik Buk iri baraen nyakri namudok, "Ipak mnek, eik yagraeh anam yopumi abom utom<sup>2:6</sup>shatorum debeibori utabor iri. Aria douk yamubuk makus abrudok wabur Saion aria matogur sagomim dodogowimi utom um mosah wobrat um urupat tatao dodog. Aria eshudok arpes douk shahuhw ananin baraen shagipeshen iri esheshiruh aparuh ta mare yoweruh, uwok."

<sup>7</sup> Ipak penek bilip um Kraiss iri douk pakri amudok utom douk nyeigur nyato iruh-umom. Aria eshudok douk madae shunek bilipuman iri uwe, enyudok baraen nyetem Iruhin ananik Buk iri douk nyanak um eshesh. Baraen enyu-

dok, “Amudok utom douk harok urusag iri hakri uwok-umom aria hamuhur hamubukuk anagas iri wata matogur sagomim utom um mosah urupat tatao dodog.”

<sup>8</sup> Aria enen shopunek baraen nyakri namudok, “Kweipon arpesch ta shunotutuk amudok utom aria ta shutu shubuh atap.” Eshesh ta shutu um maresh? Eshesh shemnek Iruhin ananin baraen aria madae shusuhwen shugipeshen uwe. Eshesh shenyubukuk aria douk shatu kabi seiwok Iruhin nakri um.

### *Apak Mape Iruhin Ananip Awirop*

<sup>9</sup> Aria ipak seiwok Iruhin nagraehep aria narep pape ananip awirop. Ipak pasuhw anudok Debeini King Jisas ananin mour aria pape kabi pris um. Aria ipak patogur anap debeipi awiropish arpesch, Iruhin ananishi. Ipak douk Iruhin nagraehep aria pape ananip atip um pukripesh um enyudok yopinyi mour douk anan neneken um ipak iri. Anan douk nahwarep pakutukuk arukwutigun um aria panakumori yopugunum natrugun abom um. <sup>10</sup> Seiwok ipak pape meyohishi arpesch, aria ahudok nyumnah douk pape Iruhin ananish arpesch. Seiwok ipak madae pudukemesh um agundok Iruhin nakri nenek gihaumep um uwe, uwok. Aria douk ipak padukemesh.

### *Apak Ta Mupe Shakamum Iruhin Aria Munekuman Mour Meyoh*

<sup>11</sup> Eik dodogoiwe atuwe abom um yakri ikrip ipak eikish arpesch. Ipak kabi douk kupairubi warubish arpesch douk panaki pape banab nyutob meyoh agundok atap iri um. Douk namudok aria eik yakri ipak pukeshuk agabus abom eneshenesh yoweishi inahos douk ipak mishish shakitak um pakri punekesh iri. Ehudokmori aih apa hanunu ipakish mishish. <sup>12</sup> Aria agundok eshudok douk madae shudukemesh um Iruhin iri uwe shupe um, ipak ta punek yopihi atih aih. Um meibi nyutob eshesh shukri shuduk-umep baraen shukri ipak penek yoweihi aih um, eshesh ta shutik ipakish yopihi aih aria ta shutuk Iruhin ananin

nyeigur nyuto iruhw ahudok hugiguk iri nyumnah anan nunakumori-ahi.

<sup>13</sup> Ipak urkwip ta purum Debeini aria punih ipak kanak aria pupe shakamum ihishmorim debeishi shosah lo iri douk shape agundok atap iri. Aria pupe shakamum debeini king shopunek douk nape debeini abom um ihinyumori gavman iri. <sup>14</sup> Aria shopunek, pupe shakamum eshesh debeishi um gavman iri. Eshesh douk Iruhin neshusop shapeum um shuwanamesh yoweishi inahos eshudok arpesch douk shenek yoweishi inahos iri um shunekesh shugipesh yopinyi atin. Aria shopunek um shutuk eshudok douk shenek yopishi inahos iri esheshish nyeiguhw shuto iruhw. <sup>15</sup> Iruhin nakri ipak punek yopinyi atin um eshudok arpesch douk madae shudukemesh um anan iri uwe. Aria eshesh shukri shukriep enen rohwin wehinyi baraen um, eshesh ta shutik ipakish yopihi aih aria enyen ta nyutapok esheshig nokwatog. <sup>16</sup> Krais douk nakweshihp pape wosik atin aria mare puhur ehudok aih um pape wosik um puhemaguk iruhw um punashigor aria punabeshuk pupe punek yoweishi inahos, uwok. Ipak ta punek yopunyi atin kabi douk pape shakamum Iruhin aria penekuman mour meyoh iri um. <sup>17</sup> Ipak ta punek yopihi aih um ihishmorim arpesch aria putuk esheshish nyeiguhw shuto iruhw. Aria shopunek, ipak ta urkwip punawasham ihishmorim Kristen aria punogugur um Iruhin aria punek lotuman wosik. Aria ipak ta putuk debeini king ananin nyeigur nyuto iruhw.

### *Apak Ta Mugipesh Krais Ananish Aih Um Mumnek Debeiri Eriger Um*

<sup>18</sup> Ipak douk pape shakamum kupaishi penekumesh mour meyoh iri ta pupe shakamum ipakish debeishi aria putuk esheshish nyeiguhw shuto iruhw. Ipak mare punekesh namudok um eshudok douk shenek yopinyi um ipak iri atish, uwok. Ipak ta punek ehudok aih um eshudok douk shenek yoweishi inahos um ipak iri shopunek. <sup>19</sup> Aria ipak piyotu dodogowip pugipesh Iruhin ananin baraen aria kupaishi shukep amaen

meyoh um, Iruhin ta nunadudareh-umep nukripep nukri ipak yopipari. <sup>20</sup> Aria ta enesh shep um enesh yoweishi inahos ipak penekesh iri, aria ipak piyotu dodog mare puwanamumesh wanohw um, ta mare enesh arpesh shutuk ipakish nyeiguhw shuto iruhw, uwok. Aria ta ipak punek yopinyi aria eshesh shukep amaen aria ipak piyotu dodogowip aria mare wata punyanam-umesh um, Iruhin ta nunadudareh-umep nukripep nukri ipak yopipari. <sup>21</sup> Iruhin douk nahwarep um pugipesh ehudok aih um punnek eriger um yopihi aih ipak penekesh iri. Um maresh? Krai anan kanak nemnek debeiri eriger um nataurum ipak aria neyabigep-aguk ahudok yopihi aih um ipak pugipesheh.

<sup>22</sup> “Anan madae nunek enesh yoweishi inahos uwe, o madae nunek rohw niyagwreh enen baraen nyutograri ananit nokwat uwe, uwok.”

<sup>23</sup> Abudok nyutob eshesh shenekan enenyenen um, anan madae nutanam nukripesh enenyenen eshesh uwe, uwok. Aria eshesh shenekan nemnek debeiri eriger um, anan madae nuhesh uwe. Anan nakon anan kanak abom nanak um anudok yopuni arman douk apa nenek skelimum arpesh wosik abom iri um ananis wis. <sup>24</sup> Krai anan kanak narao apakish yoweishi inahos neshusah ananihw yegenyihw aria nagok neir rowog kruse. Anan nenekesh namudok um apak mupe kabi eshudok arpesh douk shagok aria shakutukuk ihishmorim yoweishi inahos iri um. Aria mupe munek yopinyi atin. Eshesh shan shenekan nemnek debeiri eriger. Aria douk um enyudok atin, anan wata nenekap matogur yopupari. <sup>25</sup> Seiwok ipak pakutukuk yah pagipeshuk kupaihi kabi douk sipsip shakutukuk esheshih yah shagimaguk kupaihi um. Aria douk ipak patanamori panakumori Debeini Krai douk apa nataurum ipakish mishish wosik kabi anan arman nataurum ananish sipsip iri um.

### 3

*Shanaraum Iri Armam Armago Esheshin Baraen*

<sup>1</sup> Douk nyarik iri baraen nyakripep um pupe shakamum debeishi um gavman iri shuni ipakish debeishi douk ipak penekumesh mour iri. Aria ipak armago ta punekesh namudok atin abom um pupe shakamum ipakim armam. Um anam douk madae husuhw Iruhin ananin baraen iri uwe hutik ipakih yopihi aih aria eheh ta hutaaurum amam hutaanum husuhw Krai ananin baraen hugipeshen. Aria ipakih aih atih ta hutaaurumam aria ipak ta mour uwok um pukripam enen baraen um. <sup>2</sup> Um maresh? Amam ta hutrip um ipak punogugur um Iruhin penek lotuman aria penek eneheneh yopihi atih aih. <sup>3</sup> Aria ipak pakri putogur yopuwordi armago um, ipak urkwip mare purum pakri puginohw adukiruh um ipakiruh yegeshiweruh, uwok. Ipak urkwip mare purum pakri puginohw ipakigos baragos aria purao ahwudok suruhw kabi douk yopubi weiyoub um buni yopihi atih rupeh, uwok. <sup>4</sup> Aria ipak ta urkwip purum punoginohw numun ipakiruh aparuh huni ipakip urkwip. Aria ipakiruh aparuh ta hur wosik aria pupe anahaehiyu yopuwordi armago. Douk ehudokmori aih ta mare hutuh, uwok. Eheh ta hupe ihih nyumneh. Aria ehudok aih Iruhin nutrih ananis nabes um, eheh douk yopihi abom heshagrakuk agundok paginohw adukiruh um yegeshiweruh um. <sup>5</sup> Seiwokiwordi armago douk wape Iruhin ananiyu atuwordi wenek bilipuman aria wadukemesh wakri adurin anan ta nugipesh ananin adurin atinyi baraen. Aria owo wagipesh ehudok aih aria wenek owo kanak watogur yopu um agundok wape shakamum owowim armam um. <sup>6</sup> Sara douk kwenekesh namudok atin abom. Okwok kwomnek Abraham ananin baraen kwagipeshen aria kwahwaran kwakri okwokwin debeini. Aria douk ta ipak punek yopihi abom aih aria mare punogugur um enesh eshudok um, ipak douk kabi Sara okwokwiyu nugariyu um.

<sup>7</sup> Ipak armam shopunek puni owo pupe um, ipak ta punek yopihi atih aih um owo. Aria ipak ta pudukemesh um owowiruh yegeshiweruh douk madae dodogowiruh uwe. Namudok aria ipak



ta punadudareh-umo aria putuk owowish nyeiguhw shuto iruhw. Um maresh? Owo shopunek uni ipak ta purao agundok um pupe wosik abom ihih nyumneh um. Agagun Iruhin ta nukepagun meyoh kabi douk presen um. Aria ipak ta punekesh namudok um mare enesh eshudok shutapok yah um ipakin beten, uwok.

### *Apak Ta Munagabe Um Mupe Atugun*

<sup>8</sup> Baraen nyutuh iri douk enyudok. Ipak ihishmorim ta punagabe um pupe atugun aria ipak urkwip punawasham kupaishi putaurumesh aria pupe shakamum ihishmorim arpesh. <sup>9</sup> Ipak mare puwanamesh yoweishi inahos eshudok douk shenekesh um ipak iri, uwok. Aria eshesh shuhup shukripep enen yoweinyi baraen um, ipak mare wata punyanamumesh, uwok. Eshesh shunek yoweishi inahos um ipak um, ipak ta punekumesh yopinyi aria pukripep um Iruhin ta nunekumesh yopinyi. Um maresh? Riguk Iruhin douk nahwarep um pugipesh anan aria nakri nukep eneshenesh yopishi eshudok. <sup>10</sup> Enyudok kabi douk baraen nyetem Iruhin ananik Buk iri nyakri um. Baraen enyudok, “Enyudok arpen douk nyukri nyunadudareh um agundok um shupe wosik um aria nyukri nyutik yopihi nyumneh um, enyen mare nyiyagwreh enen yoweinyi baraen enenyit nokwat. Aria mare nyunek roh w nyiyagwreh enen rohwin baraen, uwok. <sup>11</sup> Enyen ta nyukutukuk yoweishi inahos aria nyunek yopinyi atin. Aria enenyin mishin ta nyikitak abom um nyurao ehudok aih um enenyihw apahw hwur wosik aria nyuni Iruhin nini arpesh shupe atugun um. <sup>12</sup> Um maresh? Debeini apa nape natik yopishi arpesh douk shenek yopihi aih atih iri aria apa nemnek esheshin beten. Aria ananihw apahw apa yowehw, aria madae nunadudareh um eshudok douk shenek yoweishi inahos iri uwe.”

### *Ipak Ta Pumnek Eriger Um Yopinyi Mour Ipak Puneken Iri*

<sup>13</sup> Aria ipak punek mour dodogowip atip um punek yopihi atih aih um, ta mare enen arpen nyunek enesh yoweishi

inahos um ipak. <sup>14</sup> Aria ta ipak punnek eriger um agundok ipak penek yopihi aih um, ipak ta punadudareh. Ipak mare punogugur um arpesh aria ipakiruh aparuh mare yoweruh, uwok. <sup>15</sup> Numun ipakiruh aparuh, ipak ta punek Krai atun nupe Debeini abom aria punek lotuman. Aria ta meih nyumnah enesh arpesh shukri shurigep um pukripep um baugenyum baraen um agundok ipak pasuhw Krai ananin baraen dodog pagipeshen um, ipak ta pukri wosik um pukripep enyudok baraen. <sup>16</sup> Aria ipak pukripep um, ipak ta pupe shakamum eshesh shuni Iruhin aria pukripep shokubur. Ipak ta punek yopihi aih um ipak urkwip mare yowep pukri ipak penek yoweishi inahos, uwok. Ipak punekesh namudok, aria ta enesh arpesh shukri shuhup shukripep enen yoweinyi baraen um agundok ipak putukur Krai aria penek yopinyi um, eshesh ta abraen nyesh um esheshin yoweinyi baraen. <sup>17</sup> Aria ta Iruhin nukri wosik um ipak punnek eriger um yopinyi ipak peneken iri um, enyen douk wosik. Aria ipak punnek eriger um yoweishi inahos ipak penekesh iri um, enyen shopunek douk wosik. Aria ta Iruhin nukri wosik aria ipak punnek eriger um yopinyi ipak peneken iri um, enyudok douk yopinyi abom.

### *Krais Nagok Um Nogabeyap Um Apakish Yoweishi Inahos*

<sup>18</sup> Ipak urkwip porum Krai shopunek. Anan yopuni abom arman aria anan nagok um nagabeyep um ipakish yoweishi inahos. Anan nagok atuh meyoh um nataurum ihishmorim shenek yoweishi inahos iri um nuraesh shunak um Iruhin. Um ananihw yegenyihw eshesh shan nagok, aria um ananin mishin, anan wata nakitak nape. <sup>19</sup> Um ananin mishin, Krai nakitak nape aria nanak nakripep baraen um arpeshish mishish douk shonoweshik shape iri. <sup>20</sup> Eshudok mishish eshesh douk eshudok arpesh douk seiwok shakon agabus Iruhin iri esheshish. Abudok nyutob Noa nape nenek korohuk obi nyutob, Iruhin nape

mokareg apa natrish nanabukesh arigos um nakri shatanam shukon aparuh anan. Aria okwudok korohuk karowish meyoh arpesh 8-poreish atish shawish shape numun. Aria Iruhin nataurumesh shape wosik aria abar madae besh shugok uwe. <sup>21</sup> Abrudok abar douk bagraeh um agundok shenek baptaisumesh um. Aria Jisas Krais douk nagok aria Iruhin wata nonohur nakitak nape. Douk namudok aria douk um agundok ipak penek baptaisum atin, Iruhin wata nanaraep patanamori pape wosik. Aria baugenyum baraen um abrudok abar douk madae nyukripep um bukwurup aduk ipakiruh yegeshiweruh aturuh uwe, uwok. Ababar douk bagraeh um enyudok adurin atinyi baraen douk ipak pakripan um Iruhin um nunekenyumep iri. Ipak douk pakripan aria anan nakwurup ipakip urkwip aria epep madae purum pukri ipak penek enesh yoweishi inahos uwe, uwok. <sup>22</sup> Aria anan douk nato iruhw heven aria nape yopunyi rogurehah um Iruhin. Aria ihishmorim ensel shani ihm-morim debeimi hani eshudok dodogowishi shahw merik um iruhw utag iri shape shakamum anan atun.

#### 4

##### *Apak Ta Mumnek Debeiri Eriger Aria Mukutukuk Yoweih Aih*

<sup>1</sup> Krais nemnek eriger ananihw yegenyihw aria ipak shopunek ta dodogowip um pugipesh amudokmori ananim atum urkum. Um maresh? Meinyi arpen douk nyemnek eriger enyenyihw yegenyihw iri douk nyakri uwok um nyunek yoweishi inahos um. <sup>2</sup> Aria douk abudok nyutob ipak pupe agundok atap obi nyutob, ipak mare pugipesh eshudok yoweishi inahos douk agundok atapishi arpesh mishish shakitak-umesh um shunekesh iri, uwok. Ipak ta pugipesh Iruhin ananim urkum atum arigaha pugok. <sup>3</sup> Seiwok ipak pape penek ehudok aih um eshesh douk madae shudukemesh um Iruhin iri uwe mishish shakitak um shenekesh iri. Aria douk ipak mare wata punekesh atin, uwok. Eik yakri um ehudokmori aih um shenek wehrur um, hani ehudok um mishish

shakitak um shunek yoweishi inahos um, huni ehudok um shawok abar shagugak aria shenek yoweishi inahos um Huni ehudok um shape shawok debeguni worigun aria shawok dodogowibari abar, aria shape shenek yoweishi inahos shakon agabus Iruhin aria shenek lotu um madae adurimi god omi um uwe. Abudok nyutob um ipak pape pagipesh ehudokmori aih um douk batuh jurug. <sup>4</sup> Aria douk eshudok madae shudukemesh um Iruhin iri uwe shatrip um ipak madae putaurumesh punekesh atish uwe eshudokmori yoweishi inahos aria eshesh shakitak yowiyokuk. Douk namudok aria eshesh douk shahep shanumogep. <sup>5</sup> Aria Iruhin douk nenek gibegabe napeum nusuhw ihishmorim shagok iri shuni shape iri arpesh esheshig kwotog. Douk namudok aria eshudok arpesh douk shahep iri ta shiyotu um kwot shukrip Iruhin um eshudok yoweishi inahos eshesh shenekesh iri. <sup>6</sup> Douk namudok aria seiwok Krais nanak nakripesh Iruhin ananin yopinyi baraen eshesh shagok iri shemneken shopunek. Aria Iruhin nasuhw esheshig kwotog kabi douk ta kweipon nusuhw ihishmorim arpesh esheshig kwotog um. Aria agundok um esheshiruh yegeshiweruh, eshesh douk shagok. Aria anan douk nakripesh enyudok yopinyi baraen um eshesh shumneken aria esheshish mishish wata shupe kabi douk Iruhin douk madae nugok iri uwe napeum.

##### *Apak Murao Yopinyi Presen Iruhin Nakopen Meyoh Iri Aria Munek Mour Wosik*

<sup>7</sup> Abudok nyutob um eneshenesh eshudok shutuh um douk banaki hurukatin. Douk namudok aria ipak ta pusuhw merik um ipak kanak wosik aria pupe gamo pudukemesh um punek beten. <sup>8</sup> Aria ehudok aih douk heshagrakuk abom sabaihi ihimori aih iri douk ehudok. Ipak urkwip ta punawashamesh dodog kupaishi Kristen. Um maresh? Ehudok aih apa habouk sabaihi yoweih aih habuhuk. <sup>9</sup> Aria ipak ta putaurumesh wosik eshudok douk shunakumori ipakig urusag iri. Ipak putaurumesh aria ipak aparuh mare juwehosiruh, uwok.

<sup>10</sup> Iruhin ananin Mishin douk nyataurumep nyekepen meyoh yopinyi presen ipak atin atin. Douk namudok aria ipak ta pukwu ipakin presen sisigin aria pupe punek garibog um punek yopinyi mour um putaurum kupaishi arpesh.

<sup>11</sup> Aria enen arpen nyurao enyudok presen um nyukripesh Iruhin ananin baraen um, enyen ta nyukripesh Iruhin ananin baraen atin. Aria ta enen arpen nyurao enyudok presen um nyutaurum kupaishi arpesh um, enyen ta nyuneken kabi douk Iruhin nataurumen neneken dodogowin nyeneken um. Ipak punekesh namudok um, ihishmorim arpesh ta shutik enyudok ihinyumorim yopinyi mour aria ta shutuk Iruhin ananin nyeigur nyuto iruhw um Jisas Kraiss ananin nyeigur. Debeinyi nyeigur nyani debeinyi dodog douk shapeum um Kraiss atun ihih nyumneh. Adur atin.

### *Apak Ta Mumnek Eriger Kabi Douk Jisas Nemnegor Um*

<sup>12</sup> O ipak eikish arpesh, ipak roguhw mare shikitak yowiyokuk abom um enyudok debeinyi kwiraeh douk nyatogrumpem nyenekep pemnek debeiri eriger iri. Ipak mare pukri enyudok shokwiraehesh um douk enen kupainyi abom, uwok.

<sup>13</sup> Enyen douk ipak ponoprom Kraiss pemnek arudok eriger. Aria ipak ta punadudareh. Um hahudok nyumnah ananin debeinyi nyeigur nyutogur yopugunum ahi, ipak ta punadudareh puriguk. <sup>14</sup> Aria arpesh shutrip um agundok ipak pasuhw Kraiss ananin baraen dodog pagipeshen um aria shuhup shunumogep um, ipak wosik ta punadudareh. Um maresh? Iruhin ananin Mishin douk nyeigur nyato iruhumen iri nyape ipak. <sup>15</sup> Aria ipak ta gamo pudukemesh um ipak mare punek enesh yoweishi inahos eshesh ta shunekep pumnek eriger, uwok. Ipak mare pubo enen arpen nyugok o pukwuaruh o punak orokohun ponukesh kupaishiyen mour, o punek enesh kupaishi yoweishi inahos, uwok. <sup>16</sup> Aria ta ipak pumnek eriger um agundok ipak pagipesh Kraiss um, ipak mare abraen nyep, uwok. Ipak ta punek tenkyu um

Iruhin um agundok ipak pasuhw Kraiss ananin nyeigur um.

<sup>17</sup> Nyutob douk batogur, aria Iruhin ta nurik nusuhw apak mape ananip awirop iri apakig kwotog gwurik. Aria ta anan nurik nusuhw apakig kwotog gwurik aria anan kadak nusuhw eshudok arpesh douk shakenyuk agabus ananin yopinyi baraen iri esheshig kwotog um, eshesh ta shupe mumam mumam? Eshesh ta shunomnek debeiri eriger. <sup>18</sup> Kabi douk Iruhin ananin baraen nyetem ananik Buk iri nyakrium. Baraen enyudok. “Aria yopishi arpesh shumnek eriger iyoh aria wata shupe wosik um, eshudok shakon agabus Iruhin iri ta shupe mumam? Eshesh ta shunomnek dedeber aturi eriger.”

<sup>19</sup> Douk namudok aria eshudok arpesh douk Iruhin nukri wosik um eshesh shumnek eriger aria eshesh shumnegor um, eshesh ta shunek yopihi aih abom aria shukon eshesh kanak anan. Anan douk seiwok nenek ihishmorim arpesh aria nagipesh ananin baraen wosik abom iri.

## 5

### *Ipak Debeipi Um Iruhin Ananish Arpesh Ta Putaurumesh Wosik*

<sup>1</sup> Douk eik yakri ikrip ipak Kraiss ananish arpesh esheship debeipari um enyudok baraen um pugipeshen. Eik kanak shopunek douk yape debeiweiri yani ipak. Riguk eik yeyotu yatik Kraiss eikis nabes um agundok narao debeiri eriger um. Aria eik yakripesh enyudok baraen um anan. Aria kweipon eik shopunek ta ini ipak miyotu atugun aria mutik agundok ta Kraiss nutrugun abom aria nutogur yopugunum um. Aria douk eik yakri ikrip ipak debeipari namudok. <sup>2</sup> Ipak ta putaurumesh wosik eshudok armam armago douk Iruhin nekepesh um putaurumesh iri. Putaurumesh wosik kabi douk neyoh um sipsip iri nataurum sipsip wosik um. Punek enyudok mour um, ipak putaurumesh wosik aria pigipesh Iruhin ananin urkum aria pukri wosik. Ipak punek ananin mour wosik aria ipak urkwip mare purum agundok ta purao utabor um aria douk puneken aka, uwok.

Ipak mishish ta shikitak abom um punek enyudok Iruhin ananin mour. <sup>3</sup> Aria ipak mare pukri pupe debeipari purao debeishi nyeiguhw aria pusuwokesh-ukuk um eshudok Iruhin ananish armam armago douk ipak pataurumesh iri, uwok. Ipak ta pupe wosik um eshesh shutik ipakih aih aria shugipeshep shudukem ipak. <sup>4</sup> Aria hahudok nyumnah anudok Debeini douk apa nenekesh um neyoh arpesh douk shape kabi Iruhin ananish sipsip iri um nutogur yopugunum ahi, ipak ta purao debeishi abom nyeiguhw douk ta shupe ihih nyumneh iri.

*Apak Munak Mur Iruhin Ananis Atus Wis Abom*

<sup>5</sup> Ipak weroroimi armam shopunek ta punih ipak kanak aria pupe shakamum ipakim debeimi douk hataurumep iri. Aria ipak punih ipak kanak pupe shakamum kupaishi atin atin Kristen aria punagapeshum. Um maresh? Baraen nyetem Iruhin ananik Buk iri douk nyakri namudok, "Iruhin apa nekeshuk agab eshudok arpesh douk eshesh kanak apa shanatuk esheshish nyeiguhw shato iruhw iri. Aria anan apa nataurumesh meyoh eshudok douk apa shaunih eshesh kanak aria shape shakamum kupaishi iri."

<sup>6</sup> Douk namudok aria ipak ta punih ipak kanak aria pupe shakamum debeini dodogowini Iruhin. Puneekesh namudok um arigaha hahudok nyumnah anan kanak nakriyoh iri hutogur aria anan ta nutuk ipakish nyeiguhw shuto iruhw.

<sup>7</sup> Aria ipak puhwar Iruhin pukripan um ihinyumorim enenyenen ipakin amaen douk apa nyenek ipakiruh aparuh yoweruh iri. Um maresh? Anan douk yopuni dodogowini douk apa nataurumep wosik iri.

<sup>8</sup> Ipak gamo pudukemesh aria pusuhw merik um ipak kanak wosik. Anudok ipakin horin Satan douk nape naraen nanak kabi enen dodogowinyi wanohwinyi mahin laion gruruhuren nyanaki nyanak um. Enyen nyape nyaraen um nyakri nyurim um enesh eshudok um nyesh nyishoh iri. Aria anan apa naraen nanaki nanak um nakri

nununu enesh arpesh. <sup>9</sup> Ipak ta pusuhw bilip piyotu dodogowip atip aria pukonaguk agabus Satan. Um maresh? Ipak padukemesh, kupaishi Kristen shape ihigunmorim agundok atap iri shopunek douk sharao amaen shemnek debeiri eriger namudok atin kabi douk ipak um. <sup>10</sup> Aria Iruhin douk baugos um agundok anan nataurumep meyoh um. Ipak douk patukur Kraiss aria douk um enyudok atin, douk Iruhin nahwarep panaki um pupe ananigun yopugunum bogaragunum douk ta nupe ihih nyumneh iri. Aria douk banab nyutob meyoh ipak pemnek eriger, aria anan kanak ta nunekep pupe wosik aria putogur yopipari abom. Aria ta nutaurumep nunekep piyotu dodogowip kabi douk utabor apa bosah urupat iri um. <sup>11</sup> Aria Iruhin atun douk nape dodogowini aria nape Debeini ihih nyumneh iri. Adur atin.

*Nyagiguk Iri Baraen*

<sup>12</sup> Apudok shup, baraen eik kanak yakriyen aria Sailas nyenyemagu. Anudok Sailas, eik douk yatron yakri anan apakin wanin douk nenek Kraiss ananin mour wosik abom iri. Eik yakripep baraen apudok banapi shup ipak douk pape kupaipubi warub iri um yakri ipak pupe dodogowip. Aria yakri ikripep um enyudok baraen um Iruhin nataurumep meyoh um douk adurin atin abom. Douk namudok aria ipak piyotu dodogowip punek bilipumen pusuwen pugipeshen.

<sup>13</sup> Iruhin ananish arpesh shape abrudok wabur Babilon iri douk Iruhin nanagraehesh shani ipak iri shanadudareh aria shenekumepogu yopuhi nyumnah ipak. Aria eikin nunganin Mak shopunek nanadudareh aria nenemepogu yopuhi nyumnah ipak. Anan douk nemnek eikin baraen nasuhw Iruhin ananin baraen aria eik douk yahwaran nunganin. <sup>14</sup> Aria ipak puni kupaishi Kristen punapuprik um puneyabigum um ipak agundok ipak urkwip panawasham ipak atin atin um.

Eik yakri Iruhin nunek ipak ihipmorim patukur Kraiss iri ipakiruh aparuh hur wosik.

## Pagiguk Iri Shup Douk Pita Nenekap Iri

*Baneyi Baraen Um Enyudok Baraen  
Pita Nagiguk Nenyem Iri*

- 1:1-2 Pita nanadudareh um eshesh Kristen aria nakripesh Iruhin ananin baraen.
- 1:3-21 Iruhin nanagraehap mape ananip atop um douk mupe munek ananin sabaihi yopihi aih mishagrakuk riguk marik mape menekeh um
- 2:1-22 Amam henek rohwumesh iri profet apa henek yoweih aih. Namudok aria Iruhin ta nuwanom-umom yoweishi inahos amam henekesh iri aria hurao debeiri eriger
- 3:1-16 Debeini ananin nyumnah ta hutogur aria ihishmorim eneshenesh eshudok ta shunak shuwishuk. Namudok aria apak ta munek yopihi aih mupe mutrugun-umah
- 3:17-18 Pita nakripesh nyatuh iri baraen um nyunekesh shupe dodogowish um bilip

<sup>1</sup> Eik Saimon Pita douk yape shakamum Jisas Kraiss yenek ananin mour aria nagraehe um inek mour aposel um inak ikripesh ananin baraen aria yenekumepogu apudok shup ipak. Eik yenekapumagu ipak arpesh douk parao enyudok atin dodogowinyi bilip kabi douk apak maraen iri um. Jisas Kraiss apakin Iruhin douk nataurumap narapi mape wosik iri nenek yopihi atih aih aria nataurumep pemnek ananin baraen pasuhwen dodog.

<sup>2</sup> Ipak douk padukemesh um Iruhin nani apakin Debeini Jisas Kraiss. Douk namudok aria eik yakri um agundok ipak padukemesh um amam um hunek ehudok aih um amam hataurumep meyoh um huni enyudok um henekep ipakiruh aparuh hur wosik um hutogur debeh abom um ipak.

*Iruhin Nahwarap Aria Nanagraehap  
Abom Um Mupe Ananish Atish Arpesh*

<sup>3</sup> Kraiss douk nahwarep um punaki puni anan purao ananin yopihi aih huni ananin debeinyi yopinyi dodog. Anan douk narao Iruhin ananin dodog aria nakop eneshenesh yopishi eshudok douk apak wokap-umesh um mupe wosik aria mugipesh Iruhin ananin aih um. Apak madukemesh um Kraiss aria anan douk nahwarap um nini apak murao ananin natrugun abomum iri nini ananin yopihi aih.

<sup>4</sup> Aria um enyudok Jisas ananin debeinyi dodog atin, anan nakopesh jurug yopishi abom eshudok eneshenesh douk anan nakri adurin atinyi baraen um ta nukapeshi iri. Eshudok anan nakapeshi iri ta shutaurumep pupe wosik. Ipak ta pupe namudok atin puni Iruhin aria pugipesh ananin yopihi aih. Um ipak puruwok-umaguk eneshenesh yoweishi inahos shape agundok atap iri douk apa shenek arpesh esheshish mishish shikitak-umesh um shunek yoweishi inahos iri.

<sup>5</sup> Douk namudok aria ipak ta gamo pudukemesh abom um punek yopihi atih aih. Aria pihanuh um enyudok um pasuhw Jisas ananin baraen dodog pugipeshen um. Aria purao yopinyi saki pinyanuh um yopihi aih.

<sup>6</sup> Aria enyudok um pusuhw merik um ipak kanak um pinyanuh um yopinyi saki. Aria enyudok um piyotu dodogowip pusah enenyenen dodog um pinyanuh um enyudok um pusuhw merik um ipak kanak um. Aria enyudok um pugipesh Iruhin ananin aih um pihanuh um enyudok um piyotu dodogowip um.

<sup>7</sup> Aria enyudok um punek urkwip um kupaishi Kristen putaurumesh um pinyanuh um enyudok um pugipesh Iruhin ananin aih um. Aria enyudok um ipak urkwip punawasham ihishmorim arpesh um pinyanuh um enyudok um punek urkwip um kupaishi Kristen putaurumesh um.

<sup>8</sup> Ipak padukemesh um apakin Debeini Jisas Kraiss anan douk baugos abom um ehudok iganigadae yarig yakriyeh iri aih. Aria ta ipak pugipesh ehudokmori aih aria pishagrakuk riguk pape penekeh um, ipakin saki um padukem um Jisas Kraiss um ta mare nyupe meyoh, uwok. Enyen

ta nyukwarmori sabaihi yopihi aih. Aria shopunek ta punek Kraiss ananin mour nyutogur wosik. <sup>9</sup> Meinyi arpen douk ehudokmori aih madae hupenyen iri uwe ta mare nyutik eshudok douk shape rougun iri nyudukemesh, uwok. Enyen kabi douk enen nabes seshukenyi arpen um. Enyen douk urkum mekenyagak um agundok Kraiss neshurokuhen aria neneken nyatogur yopin um.

<sup>10</sup> Douk namudok aria ipak Kristen, ipak ta punek mour dodogowip atip pishagrakuk seiwok pape peneken iri um pugipesh agundok douk Iruhin nahwarep um pupe ananip atip um. Aria ta ipak punekesh namudok um, ipak ta mare putu punek yoweishi inahos, uwok. <sup>11</sup> Aria shopunek, kweipon Iruhin ta nunadudareh-umep nukri wosik abom um ipak punak puwish pupe agundok douk ta apakin Debeini Jisas Kraiss nupe debeini king ihih nyumneh um. Abrudok wabur abatur douk apakin Debeini Jisas Kraiss douk narap mape wosik atin iri napenyaburi.

<sup>12</sup> Adur, ipak padukemesh um enyudok baraan aria pasuhwen dodog enyudok adurin atinyi baraan. Aria eik ta wata ipeum ikripep atin um ipuhur um urkwip purum enyudok baraan. <sup>13</sup> Eik yakri enyen douk wosik um agundok eik wata yape agundok atap obi nyutob um ihur ipak um urkwip purum enyudok baraan um. <sup>14</sup> Um maresh, eik yadukemesh, eik douk hurukatin um igok. Enyudok enyen douk apakin Debeini Jisas Kraiss nakripe. <sup>15</sup> Douk namudok aria eik ta inek mour dodogoiwe atuwe um inekumepoguk anah yah hupeimepaguk um eik igokuk um, ipak ta urkwip purum enyudok baraan eik yakripepen iri.

### *Apak Matik Agundok Kraiss Natrugun Abom Um*

<sup>16</sup> Apak douk makripep um agundok apakin Debeini Jisas Kraiss ta wata nutanamori um nyani agundok anan dodogowin abom um. Aria enyen douk madae mukripep enen sakihasin baraan douk shadukemesh iri arpesh shakripapenyuk iri uwe, uwok. Apak matrun

abom apakis nabes um agundok anan dodogowin abom natrugun um aria apak makripep. <sup>17</sup> Apak douk mani Kraiss mape aria matrun abom um agundok Yain Iruhin natuk ananin nyeigur nyato iruhw aria natauruman nenekan dodogowin natrugun abom um. Aria abudok nyutob anah mah hatograri gani dodogowini natrugun iri Iruhin napeum hanakumori Kraiss aria Iruhin nakri, "Anudok eikin Nuganin abom douk eik urkum manawashaman abom iri. Aria eikihw apahw shopunek douk hwanawashaman abom." <sup>18</sup> Abudok nyutob apak kanak mani Kraiss mape ahwudok yopuhwi yoduhw douk Iruhin ananihw aria memnek ahudok mah hanaki gani iruhw heven.

<sup>19</sup> Aria apak urkwip pormoguk enyudok baraan douk seiwok amam profet hakriyenjuk iri madukemen makri enyen douk adurin atin abom. Aria ta ipak punek amamin baraan pusuwen um, namudok douk wosik. Um maresh, amamin baraan douk nyape kabi enen lam hanin nyabuh nyakus arukwutigungunum iri. Enyen ta hunin nyukus arigaha Debeini nunaki. Anan douk kabi okwudok unuk shuduwi douk apa kwakihhi gagrukibus iri. Okwok ta kwukihi aria kwutrugun numun ipakip urkwip. <sup>20</sup> Aria sagramatin ipak ta pudukemesh um douk madae anan atun profet anan kanak urkum mur um enen baraan nukriyen aria nunyem Iruhin ananik Buk uwe, uwok. <sup>21</sup> Um maresh, seiwok douk madae enen baraan amam profet hakriyen iri nyutograri amam kanak amamip urkwip uwe. Amam douk Iruhin ananin Mishin atin nyawishom nyomuhur aria hakri enyudok Iruhin ananin baraan.

## 2

### *Henek Rohwumesh Iri Profet Amamih Yoweihhi Aih*

<sup>1</sup> Seiwok anam henek rohwumesh iri profet hatogur hape orokohun um eshesh Israel aria hape henek rohwumesh. Aria douk shopunek ta namudok atin. Anam henek rohwumesh iri tisa omi ta hutogur hupe orokohun um ipak aria hunabeshuk hupe hukripep enenyenen madae adurin

iri uwe baraan. Aria ta ipak pugipesh amamin baraan um, ipak ta punak puwishuk yoweiburi wabur. Douk Debeini nagok um amam nator eneshenesh yoweishi inahos amam henekesh iri aria amam wata hakanuguk agabus henek yoweishi inahos. Amam hape henekesh namudok aria Iruhin ta ahudok atuh nunekam hurao debeiri eriger aria nom hugok. <sup>2</sup> Amam ta hunek yoweishi inahos aria sabaishi arpesht ta shugipesh amamih yoweih aih. Aria kupaishi ta shutik amamih abraenyih aih aria ta shukanuk agabus um Jisas Kraiss ananin yopinyi adurin atinyi baraan aria kupaishi shukri Jisas ananin yah yoweih. <sup>3</sup> Amudok armam henek nyigiya um hakri amam atum hurao sabaishi eshudok eneshenesh. Douk namudok aria amam ta hukriep enen rohwin baraan douk amam kanak urkwip poromen hakriyen iri um hunatrip ipakibor utabor buni eneshenesh eshudok ipakish shopunek. Aria seiwok douk Iruhin nadukemam aria nakri amam henek yoweishi inahos aria nagraeh anah nyumnah um nusuhw amamit kwot aria amam ta hunak huwishuk abom. Aria shopunek, anudok douk nakri nunemam kwot iri douk wata nape natrugun aria nununum.

<sup>4</sup> Ipak padukemesh, seiwok enesh Iruhin ananish enselahos shenek yoweishi inahos aria Iruhin madae nupe nutrish meyoh uwe, uwok. Anan neshopokesh shanak shape yoweiburi abom wabur. Aria gagundok eshesh shonoweshik shape arukwutigun um shape shatrugun um nyumnah douk ta Iruhin nusuhw esheshig kwotog ahi.

<sup>5</sup> Ipak padukemesh, seiwok Iruhin madae nupe nutrish mokureg uwe seiwokishi arpesht douk shakon agabus anan iri, uwok. Anan nenek debeih eshah hor aria abar bakih atap aria baesh shagok shatuh. Aria anan nataurum Noa atun douk nakriפש um shugipesh Iruhin ananin yopihi aih iri nani 7-poreish arpesht shopunek naraesh shape wosik.

<sup>6</sup> Aria shopunek, anan nenek kwot um eshudok sabaishi arpesht shape arbudok biarub debeirubi warub Sodom bani Gomora iri aria nakri eshesh shenek

yoweishi inahos. Aria anan naesh nenek debeih nyih hanish hashahuk aria argabus atubus sakusuk. Enyudok anan douk neneken um neyabigap um anan ta nunekesh namudok atin um eshudok arpesht douk shape shakon agabus anan iri kabi douk seiwok nenekesh um eshesh Sodom iri Gomora um. <sup>7</sup> Ipak padukemesh, seiwok shopunek Iruhin nataurum anan yopuni arman nanahwarum Lot iri naran nape wosik. Lot ananinw apahw douk yowehw abom aria nakri uwok um ehudok yoweih aih um shenek wehrur um. <sup>8</sup> Anudok yopuni arman Lot nani eshesh shape aria ihih nyumneh anan natrish aria nemnekesh um eneshenesh yoweishi inahos eshesh shenekesh iri. Aria ananinw apahw yowehw abom aria nakri uwok abom um esheshih aih. <sup>9</sup> Debeini Iruhin douk nenekesh namudok um eshesh, douk namudok aria apak madukemesh um anan apa nataurum ananish arpesht douk shagipesh anan iri naraesh shape wosik. Douk namudok aria meih nyumnah enen amaen o kwiraeh nyutogruresh um, Debeini douk nadukemesh um meih yah ta anan nuraesh shupe wosik um. Aria kwiraeh ta mare nyunek uhwinyumesht, uwok. Aria shopunek, nadukemesh um meih yah um nusuhw eshudok arpesht douk shakon agabus Iruhin iri um shupe shumnek debeiri eriger um. Aria nusuhwesh shupe shutrugun um hahudok nyumnah douk ta nusuhw esheshig kwotog ahi. <sup>10</sup> Enyudok baraan douk adurin abom. Aria eshudok arpesht douk shape shenek eneshenesh yoweishi inahos abom um shenek wehrur iri ta shumnek abom debeiri eriger. Eshudok arpesht, eshesh douk shakri uwok um Iruhin nupe debeini um eshesh iri.

Amudok henek rohwmesh iri armam douk madae hunogugur uwe. Amam hakri hutuk amamish atish nyeiguhw shuto iruhw aria madae hunogugur uwe um hiyagwreh-umesh enenyenen yoweinyi baraan eshudok douk shape kabi enselahos douk shape iruhw iri um uwe, uwok. <sup>11</sup> Aria Iruhin ananish enselahos douk dodogowish abom sheshagrakuk amudok henek rohwmesh

iri. Aria eshesh madae shatanam shiyotu shakon yomogos um Debeini aria shukripesh enenyenen yoweinyi baraen eshudok shape iruhw iri uwe, uwok.

<sup>12</sup> Aria amudok armam hakripesh enenyenen eshudok douk amam madae hudukemesh iri uwe. Amam hagugak kabi douk wanarish mahish shape debeihi urah iri um. Eshudok mahish douk madae enep yopipi urkwip pupenyesh uwe. Esheshish amakenyish douk sheshubuki um arpesh shunak shurimesh shuparugesh aria shesh shugok. Aria amudok armam shopunek douk namudok atin. Amam ta hugok hunak huwishuk kabi eshudok wanarish mahish um. <sup>13</sup> Amudok henek rohwumesh iri henek kupaishi arpesh sharao debeiri eriger. Aria kweipon Iruhin ta wata nuwanam amamish yoweishi inahos aria nenekam hurao debeiri eriger namudok atin. Amam hanadudareh um hawok sabaiguni worigun aria hagipesh yoweih harik hapenyam iri aih henek eneshenesh yoweishi inahos yopugunum atugun. Aria amam hani ipak pape pawok debeguni worigun um, amam hanadudareh um agundok amam hape henek rohw aria henek amamih yoweih aih um. Aria ehudok aih douk henekam hape kabi enen yoweinyi behrabinyi kak orokohun um ipak. <sup>14</sup> Ihih nyumneh amamis nabes sape um satak sape weyotu yeh iri armago atuw. Ihih nyumneh amam hapeum hani owo shenek wehrur um. Amam madae hukri um hukutukuk ehudok yoweih aih uwe, uwok. Amam honokunem um kupaishi arpesh douk madae shusuhw Kraiss ananin baraen dodog iri uwe um honukesh shugipesham shunek yoweishi inahos. Amam douk hadukemesh abom um hunek nyigiya um kupaishi esheshish eshudok eneshenesh. Aria Iruhin douk juwehosin napeum nunekam hurao debeiri eriger. <sup>15</sup> Amam hakutukuk yopuhi yah aria douk hagugak atin. Amam hagipesh Beor ananin nunganin Balam um ananin yoweih aih. Balam ananim urkum mor abom um utabor aria nakri nuneke yoweishi inahos um nurao sabaibori utabor. <sup>16</sup> Adur, donkihos madae shiyagwreh atin

uwe. Aria enen donki nyeyagwreh aria enenyeni mah nyeyagwreh kabi arpenyih mah um. Enyen nyaho anudok profet Balam nyatap-uman yah um ehudok rohwi aih anan nakri nunekeh iri. Ehudok aih douk eshesh shagugak iri atish shenekeh.

<sup>17</sup> Amudok henek rohwumesh iri armam hape kabi agusudok waiyas douk abar boragasi. Aria shopunek, amam hape kabi orug douk debeinyi uhwin nyahur aria nyaraog gwanak sisiguk iri. Iruhin douk nogabe-imom anagun arukwutigun abom um amam kweipon hunak hupe um. <sup>18</sup> Amam hanadudareh heyagwreh wehinyi rohwi nyi baraen um hutuk amamish nyeiguhw shuto iruhw. Aria honokunem um enesh arpesh um hohur esheshiruh aparuh um shugipesh yoweih harik hapenyesh iri aih. Aria douk esheshiruh urkwip por abom um ehudok aih um shenek wehrur um. Eshudok arpesh, eshesh douk shape shenek mour um shakri shukutukuk eshudok arpesh douk shenek yoweishi inahos aria madae shudukemesh um Iruhin iri uwe. <sup>19</sup> Amam hakripesh hakri amamin baraen douk adurin atin aria hakri, "Aria ipak pugipesh apakin baraen um, ipak ta mare enesh eshudok shuweshikep. Ipak ta pupe wosik atin." Aria amam kanak douk amamih yoweih aih howeshikam dodog aria hape shakamum eheh. Um mares, aria eneh aih hunek uhwinyum enen arpen aria hasuhw merikw-umen um, enyudok arpen ta nyupe shakamum ehudok aih. <sup>20</sup> Aria ta enesh arpesh shudukemesh um apakin Debeini Jisas Kraiss douk nataurumap narap iri um, eshesh douk shakutukuk jurug agundok atapih yoweih aih. Aria ta ehudok aih wata hapeum huweshikesh dodog um, eshesh ta shupe yowesh abom. Sagomatin eshesh shape shenek yoweishi inahos um, eshesh shape yowesh wosik atin. Aria douk eshesh shape yowesh abom sheshagrakuk sagomatin sharik shapeum. <sup>21</sup> Aria eshesh madae shudukemesh um ahudok yopuhi yah um shunek yopihi aih um, ehudok douk yoweih. Aria ta eshesh shudukemesh um ahudok yah huni Iruhin ananin yopinyi lo, aria eshesh



wata shukon agabus Iruhin um, ehudok douk yoweihi aih abom. <sup>22</sup> Aria enen baraan douk arpes shakriyen iri douk nyatogur adurin um eshesh. Baraan douk enyudok, “Nubat tagwugruk-wesh aria wata tatanam tanak teshuhur tashoh.” Aria enen shopunek baraan douk nyakri namudok, “Bur reshrokuhwi jurug aria wata ratanam ranak ranawatom.”

### 3

#### *Adur Atin Debeini Ta Wata Nutanamori*

<sup>1</sup> O ipak eikish arpes douk eik urkum manawashamep abom iri. Apudok shup douk yenekap-umepogu iri douk pagimagu papudok eik yarig yenekap-umepogu iri. Baraan eik yanyemagu asudok bias shus iri, eik yenyemagu um yakri ipuhur um ipak urkwip purum enyudok yopinyi atin baraan. <sup>2</sup> Eik yakri ipak punek urkwip abom um enyudok baraan douk seiwok Iruhin ananim profet hakriyenyuk iri. Nyuni enyudok dodogowinyi baraan apakin Debeini douk nataurumap narap mape wosik atin iri ananin douk apak ananip aposel makripepen iri.

<sup>3</sup> Sagomatin ipak ta pudukemesh um enyudok. Abudok nyutob ahudok hugiguk iri nyumneh hutogurum, anam armam douk ta hunekep enenyenen iri ta hutogur. Amam ta hutogur aria hugipesh harik hapenyam iri yoweihi aih aria ta hunek eneshenesh yoweishi inahos. <sup>4</sup> Amam ta hunumugep hukri, “Anan nakri adurin atin baraan um anan ta wata nutanamori aria anan douk madae nunaki uwe! Anan nape agunum? Apakim popehem yamehem hagok hanaki arigaha douk aria ihishmorim eshudok douk shape namudok atin kabi douk seiwok sagomatin agundok atap natogur napeum!” <sup>5</sup> Aria amam kanak urkwip pakomuk um agundok seiwok Iruhin neyagwreh baraan atin aria nenek iruhw atap natogur napeum. Anan narik nenek abar bor aria amnab bakih bape orokohun um abar. <sup>6</sup> Aria Iruhin nakwu abar atubar nenekabar hurigasarubar bato aria babo ihishmorim arpes shape abudok nyutob iri shani eneshenesh

eshudok shape agundok atap iri shagok shatuh. <sup>7</sup> Aria douk enyudok Iruhin ananin baraan atin abom nyasuhw iruhw atap nani eneshenesh douk shape iruhw atap iri shapeum kweipon nyih hunish. Iruhin nasuwesh shapeum kweipon ahudok nyumnah anan nusuhw eshudok arpes douk shakonuguk agabus anan iri esheshig kwotog ahi. Aria eshesh ta shunak shuwishuk abom.

<sup>8</sup> Aria ipak eikish arpes abom douk eik urkum manawashamep abom iri mare urkwip pukepaguk um enyudok: Debeini nakri atuh nyumnah ahah douk kabi eshudok sabaishi 1,000-poreish kwarahos um. Aria 1,000-poreish kwarahos douk nakri kabi atuh nyumnah um. <sup>9</sup> Debeini douk madae nukri um nunek mour shokubur atin um nunek eshudok anan nakri adurin baraan um ta nunekesh iri uwe. Anan douk madae kabi enesh arpes douk shakri shunek mour shokubur um uwe, uwok. Aria anan nakri uwok um enen arpen nyunak nyuwishuk. Anan nakri ihishmorim shukeshuk agabus yoweishi inahos aria shatanam shukon aparuh anan. Douk namudok aria douk anan urkum morum ipak aria wata nape natrugun-umep um putanam punak um anan.

#### *Kweipon Iruhw Atap Ta Nunak Nuwishuk*

<sup>10</sup> Aria kweipon hahudok nyumnah Debeini nunaki ahi ta hutogur kabi douk nakwuaruh iri nanaki um. Aria hahudok nyumnah, utag ta giyagwreh debeg aria tukurag gunak guwishuk. Aria ihishmorim eshudok douk shape utag iri ta nyih hunish shunak shuwishuk. Aria agundok atap shopunek nini ihishmorim eshudok arpes shenekesh iri ta nyih hunish shunak shuwishuk. <sup>11-12</sup> Douk namudok aria ipak ta punek mareh aih? Ipak pupe putrugun um ahudok Iruhin ananin debeihi nyumnah um hutogur obi nyutob, ipak ta pupe wosik abom pupe Iruhin ananip atip. Aria ipak pupe wosik pugipesh Iruhin ananin atih aih um punek ahudok nyumnah hutogur arigas. Hahudok nyumnah, debeihi nyih ta hunu utag gunak guwishuk. Aria ihishmorim eshudok shape iruhw utag

iri ta nyih hukiyokesh hunish huyatesh aria shunenem um abar. <sup>13</sup> Aria apak douk mape matrugun um eshudok douk Iruhin nakri enen adurin atinyi baraen um ta nunekesh iri. Kweipon anan ta nunek namugi utag guni namubi amnab um arpesh douk shenek yopihi abom aih iri atish shupeum.

*Apak Ta Gamo Mudukemesh Aria Mupe Mutrugun Um Ahudok Nyumnah Debeini Nunaki Ahi*

<sup>14</sup> Aria ipak eikish arpesh douk eik urkum manawashamep abom iri douk pape patrugun um eshudok. Douk namudok aria ipak ta punek mour dodogowip atip um Iruhin nutrip um, anan mare nutik enesh yoweishi inahos shupenyep aria nukri ipak yopipari. Aria puni anan pusuhw atum urkum aria ipakiruh aparuh hur wosik. <sup>15</sup> Aria ipak ta urkwip purum Debeini aria pudukemesh um anan douk wata nape natrugun um apak um nakri mutanam mukon aparuh aria kweipon anan wata nunarap munak mupe wosik abom. Enyudok baraen enyen douk kabi apakin ashuken Pol douk apak urkwip panawashaman iri nenyemori iri. Anan douk Iruhin nakon yopinyi saki aria nowem-umepaguk enyudok baraen ipak. <sup>16</sup> Ihismorim shus Pol nenekas iri, anan nakripap enyudok atin baraen. Anan nakripap um mupe wosik aria mupe mutrugun um ahudok nyumnah Debeini nutanamori ahi. Aria baugenyum enen baraen nyape ananis shus iri douk madae nyonowereh uwe, uwok. Apak matarihen aria mabirak madae mudukem um baugenyum uwe. Aria shashudok arpesh douk madae gamo shudukemesh wosik uwe aria madae shiyotu dodogowish um bilip iri uwe shenek roh w um enyudok baraen. Aria eshesh shenek roh w um sabainyi kupainyi baraen shopunek douk nyetem Iruhin ananik Buk iri. Eshesh shenekesh namudok aria kweipon eshesh ta shunak shuwishuk abom.

<sup>17</sup> Aria ipak eikish arpesh, ipak douk padukemesh um eshudok douk ta kweipon shutograri iri. Douk namudok aria ipak ta gamo pudukemesh. Um

maresh, ta wosik atin amudok henek roh wumesh iri armam douk hekenyuk agabus Iruhin ananin yopinyi lo iri honukep putanam punek yoweishi inahos. Aria ta pukutukuk agundok douk ipak peyotu dodog aria pasuhw Krai ananin baraen pagipeshen um. <sup>18</sup> Aria ipak douk padukemesh um apakin Debeini Jisas Krai anan douk nataurumap meyoh aria narap mape wosik abom iri. Douk namudok aria ipak ta pupe um punek enyudok saki nyuni ananin dodog douk anan nekepen iri nyutogur deben atin abom um ipak. Aria douk arigaha kweipon, debeinyi nyeigur nyuni debeinyi dodog ta nyupe um anan atun ihih nyumneh. Adur atin.

## Parik Iri Shup Douk Jon Nenekap Iri

*Banenyi Baraen Um Enyudok Baraen  
Jon Narik Neneken Iri*

1:1-4 Jon nakripesh Iruhin ananin baraen aria neshuhur um shunadudareh.

1:5—2:29 Iruhin anan douk natrugun abom iri. Aria apak ta mupe bogaragun um, um agundok munek yopihi aih aria urkwip punawasham ihishmorim arpesh um.

3:1-24 Apak douk mape Iruhin ananish batowish. Aria douk apak ta urkwip punawasham apakish ashukenyish owashish. Aria shenek yoweishi inahos iri arpesh douk Satan ananish aria shape shenek yoweishi inahos namudok atin.

4:1-6 Apak ta munek skelim ihishmorim arpesh aria mudukemesh um eshesh Iruhin ananin Mishin nyapenyesh aka Satan ananin nyapenyesh.

4:7—5:21 Iruhin neshopoki ananin Nuganin nanaki agundok atap um nuyabigap ehudok aih um urkwip punawasham arpesh um. Apak ta munek bilip um anan aria mutukur anan atun um nunekap mupe wosik abom ihih nyumneh.

*Krais Anan Douk Baugos Um Arpesh  
Shupe Wosik Abom Ihih Nyumneh Um*

<sup>1</sup> Apak menekumep baraen apudok shup aria makripep um anudok arman douk nanahwar um Baraen iri. Anudok arman Baraen, arpesh douk ta shuran shunek bilip aria shupe wosik abom ihih nyumneh. Seiwok sagomatin watak baugos um anudok arman Baraen douk nape. Aria apak douk memnek um agundok anan neyagwreh um aria matrun apakis nabes. Adur apak douk matrun aria masuhwan apakis wis. <sup>2</sup> Anan douk natogur yopugunum aria matrun. Aria apak douk meyagwreh adurin atin baraen um anan aria makrip ipak um anan douk baugos um arpesh shupe wosik abom

ihih nyumneh um. Seiwok nani Yain hape aria douk natogur yopugunum matrun. <sup>3</sup> Apak douk matrun, memnekan um neyagwreh um aria douk makrip ipak shopunek. Makripep um ipak puni apak mupe atugun abom musuhw atin. Aria apak muni apakin Yain Iruhin nini ananin Nuganin Jisas Kraisa mupe atugun musuhw atin. <sup>4</sup> Apak mowem enyudok baraen um apak muni ipak ta munadudareh abom muriguk.

*Apak Ta Mupe O Murahaen Bogaragun  
Um Atugun*

<sup>5</sup> Enyudok baraen douk apak memnekan nakriyen iri douk enyudok douk makripep-umen. Baraen enyudok. Iruhin anan douk kabi lait um. Yopuyopun abom aria madae karowihi um anah arukwutigunih aih hupenyanyan um, aria ta mare nenek enesh yoweishi inahos uwe, uwok meyoh. <sup>6</sup> Aria apak mukri apak mani Iruhin mape atugun masuhw atin, aria abudok nyutob apak mupe arukwutigun um agundok munek eneshenesh yoweishi inahos um, namudok douk munek rohwa. Madae mugipesh adurin atinyi baraen uwe, uwok. Aria enenyenen mape meneken iri madae adurin uwe, uwok. <sup>7</sup> Aria ta apak murahaen bogaragun um, um agundok munek enenyenen yopunyi kabi anan nape bogaragun um yopun abom um, namudok adur apak mape atugun masuhw atin abom. Aria ananin nuganin Jisas ananibor owishibor bakrup apakiruh aparuh aria nenekap matogur yopupari madae enesh yoweishi inahos shupenyap uwe, uwok.

<sup>8</sup> Aria apak mukri apak eneshenesh yoweishi inahos uwok enesh shupenyap um uwe, namudok douk munek rohwa abom um apak kanak. Munek rohwa aria adurinyi baraen douk madae enen nyupenyap uwe, uwok. <sup>9</sup> Aria ta apak muwereh eneshenesh apakish yoweishi inahos mukrip Iruhin um, anan douk yopini aria ta nugipesh ananin adurin atinyi baraen seiwok nakriyen iri. Ta nunek yopinyi mour abom um nukweshih apakish yoweishi inahos aria nugabeyap nunekap mutogur yopishi arpesh abom.

<sup>10</sup> Aria apak mukri apak madae munek enesh yoweishi inahos um uwe, namudok douk makri Iruhin anan napeum nenek rohw iri. Aria ananin baraen douk madae nyupe apakiruh aparuh uwe, uwok.

## 2

### *Krais Anan Douk Yopuni Nataurum Apak Abom Iri*

<sup>1</sup> Ipak eikipari douk pape kabi eikish batowishumori, eik urkum manawashamep iri. Eik yenekumepogu baraen apudok shup um putrup aria mare punek enesh yoweishi inahos, uwok. Aria ta apak enen arpen nyunek enesh yoweishi inahos um, aria apak douk wosik anan nataurumap iri douk narig Yain um Yain nenek gihaumap. Anan douk anudok yopuyopuni abom arman Jisas Krais. <sup>2</sup> Krais anan kanak nagok aria nenek Iruhin madae juwehosin um yoweishi inahos apak menekesh iri uwe, uwok. Nakwreyeshuguk nakri nyenekesh. Enyudok mour douk madae nuneken um nutaurum apak atop uwe, uwok. Neneken um nutaurum ihishmorim arpesh shape agundok atap iri.

<sup>3</sup> Aria apak mukri mugipesh Iruhin ananin lo um, namudok douk mudukemesh abom namudok. Apak adur madukeman wosik abom um Iruhin. <sup>4</sup> Aria enen arpen nyukri enyen wosik nyadukemesh um Iruhin wosik, aria enyen mare nyugipesh ananin lo um uwe, namudok douk nyenek rohw. Aria adurinyi baraen douk madae nyupe enyenyihw apahw uwe, uwok. <sup>5-6</sup> Aria arpen douk nyugipesh Iruhin ananin baraen iri, enyudok arpen douk urkum manawasham Iruhin abom nyeshagrakuk riguk nyarik urkum manawashaman um. Aria enen arpen nyukri enyen nyani Iruhin nyape um, aria enyen ta nyunek eneheneh yopihi aih kabi Jisas Krais nenekeh iri um. Douk munekesh namudok aria ta mudukemesh mukri apak adur matukur Iruhin mape.

### *Arpesh Urkwip Panawasham Esheshish Arpesh Iri Douk Shape Bogaragun um*

<sup>7</sup> Eikish arpesh, enyudok lo yenyemagu um ipak iri douk madae enen namunyi uwe, uwok. Enyen douk watak sagomatin paraen iri. Enyudok lo enyen douk enyudok baraen ipak seiwok pemneken iri. <sup>8</sup> Aria enyudok lo douk yenyemagu um ipak iri douk namunyi. Apak douk matik abom Krais nagipeshen wosik. Aria ipak shopunek namudok pagipeshen um kupaishi shutrip. Um maresh? Douk arukwutigunih douk hakri hunak huwishuk aria adurit lait douk tatogur tape.

<sup>9</sup> Aria enen arpen nyukri enyen douk nyape agundok lait tabuh um, aria enyen douk nyekenyek agab enen enyenyin arpen um, enyen douk watak nyape arukwutigunum. <sup>10</sup> Aria arpen douk enyenyim urkum munawasham enen enyenyin arpen iri, enyen douk adur nyape agundok lait tabuh um. Namudok aria enyudok arpen douk madae enesh yoweishi inahos shupenyen uwe, um ta shuneken nyunek yoweishi inahos iri, uwok. <sup>11</sup> Aria enyudok arpen douk nyekenyek agab enen enyenyin arpen iri, enyen douk nyape arukwutigunum. Enyen nyape nyarahaen arukwutigunih atih aria madae nyudukem um agundok douk enyen nyanakum uwe, uwok. Um maresh, arukwutigunih heneken aria madae nyutrugun wosik uwe, uwok.

<sup>12</sup> Ipak eikish arpesh douk pape kabi eikish batowish-umori, Iruhin anan douk urkum morum agundok Krais nagok nator apak um aria anan madae nusuhwesh nupe um yoweishi inahos apak menekesh iri uwe, uwok. Nakwreyeshuk. Douk namudok aria eik yenekumepogu baraen um apudok shup. <sup>13</sup> Ipak douk kabi eikim arhim-umori, ipak padukeman wosik anudok arman douk seiwok wata sagomatin baugosum nape aria douk watak nape iri. Ipak weroroimi armam, ipak douk pabouk Satan nabuhuk. Namudok aria eik douk yenekumepogu baraen um apudok shup.

<sup>14</sup> Ipak batowish, ipak douk padukeman wosik apakin Yain. Namudok aria eik douk yenekumepogu baraen um apudok shup. Ipak arhim, ipak douk padukeman wosik anudok arman douk seiwok

wata sagomatin baugos um nape aria douk wata nape iri. Namudok aria eik douk yenekumepogu baraen apudok shup. Ipak weroroimi armam, ipak douk wosik dodogowip um agundok ipak madae punek yoweishi inahos um uwe. Iruhin ananin baraen adur nyapenyep aria ipak pabouk anudok yoweini Satan nabuhuk. Namudok aria eik douk yenekumepogu baraen um apudok shup.

*Apak Ta Mukehuk Agabus Ehudok Atapihi Yoweih Aih*

<sup>15</sup> Ipak mare urkwip punawasham yoweih eneheneh agundok atapihi aih hani eneshenesh shape agundok atap iri, uwok. Aria enen arpen urkum munawasham yoweih eneheneh agundok atapihi aih um, aria enyen douk madae urkum munawasham Yain uwe, uwok.

<sup>16</sup> Apak douk madukemesh. Iihmori yoweih aih douk agundok atapishi arpesih ihih nyumneh mishish shakitak um shunekeh iri douk ehudokmori. Shatik eneshenesh eshudok mishish shakitakumesh um shunek yoweishi inahos, shatik kupaishi eshudok shanawash-umesh, shanagunukuk um esheshish sabaishi eshudok eneshenesh um. Ehdokmori aih douk madae Iruhin nukapeh uwe, uwok. Eeh douk agundok atapihi abom aih. <sup>17</sup> Agundok atap pani eneshenesh douk arpesih shapeum shatrish mishish shakitakumesh aria shanawash-umesh iri, eshesh douk ta shunak shuwishuk. Aria eshudok arpesih douk shugipesh Iruhin ananim urkum iri, eshesh ta shupe ihih nyumneh.

*Jisas Ananin Horin Douk Natogur Jurug*

<sup>18</sup> Ipak eikish arpesih douk patogur kabi eikish batowish-umori, hagoguk abom iri nyumnah douk hurukatin um hutogur. Riguk douk pemneken baraen um Kraish ananin horin ta nutogur. Aria Kraish ananish horim, douk shatogur sabaishi. Namudok aria madukemesh um, hagoguk iri nyumnah douk hurukatin um hutogur. <sup>19</sup> Eshudok arpesih douk shakutup-ukuk. Aria riguk douk shanaki sheirap obi nyutob, abudok nyutob shopunek madae apakish abom uwe, uwok. Douk apakish abom akure, douk ta shuni apak

abom mupe. Aria shakutup-ukuk aria madukemesh abom um eshudok ihishmorim arpesih douk madae apakish uwe, uwok.

<sup>20</sup> Aria Kraish douk nakapari Iruhin ananin Mishin nyabuhi nyawishep aria ipak ihishmorim douk padukemesh um Iruhin ananin adurin atinyi baraen.

<sup>21</sup> Eik madae inekumepogu baraen apudok shup um Ikripep enen adurin atinyi baraen douk madae pudukemen iri uwe, namudok Uwok. Ipak douk padukemen enyudok adurinyi baraen. Aria douk shopunek Padukemesh um adurinyi baraen douk madae nyugremen atin uwe rohwinyi Baraen, uwok. Namudok aria douk yenekumepogu baraen um apudok shup.

<sup>22</sup> Arpesih douk sheneyagwreh rohwinyi baraen iri douk meishi arpesih? Eshudokmori arpesih douk shakri Jisas anan madae Kraish uwe, douk Iruhin nagraehan aria neshopokan nanaki iri uwe, uwok. Eshudokmori arpesih douk shakanuk agabus apakin Yain nani ananin Nuganin. Aria namudok douk shatogur Kraish ananish horim abom. <sup>23</sup> Meishi arpesih douk shukon agabus Nuganin iri, eshesh douk shopunek shakon agabus Yain. Eshudok douk shukon aparuh Nuganin iri, eshesh douk shopunek shakon aparuh ananin Yaken.

*Iruhin ananin Mishin Apa Nyeyabigap Adurinyi Baraen*

<sup>24</sup> Enyudok baraen douk riguk wata sagomatin pemneken iri, ipak douk pusuwen dodog abom ipakigos baragos. Aria pusuwen dodog abom namudok um, ipak ta putukur naganin nini Yaken ihih nyumneh. <sup>25</sup> Aria Kraish anan kanak douk nakripep enyudok adurin atinyi baraen. Nakripap um ta nunekap mupe wosik abom ihih nyumneh um.

<sup>26</sup> Eik yenekumepogu baraen apudok shup um iwerehumesh baraen eshudok arpesih douk shakri shunek rohwmep pugipesh kupainyi baraen iri. <sup>27</sup> Aria ipak douk Kraish nakepari Iruhin ananin Mishin nyawishep aria douk nyapenyep. Aria ta mare enesh arpesih shiyabigep um

pu dukemesh um enesh eshudok enesh-enesh, uwok. Iruhin ananin Mishin ta nyiyabigep ihishmorim eshudok. Aria enyudok barae n douk enyen nyeyabigep-enyi, enyen douk adurin atin abom. Madae rohwin uwe. Namudok aria ipak pugipesh enyenyin barae n abom aria putukur Krai s pupe dodogowip atip.

<sup>28</sup> Ipak eikish arpes h douk pape kabi eikish batowish-umori, douk ipak putukur abom Krai s pupe namudok. Um ahudok nyumnah anan nukri nutogur yopugunum-ahi, apak ta dodogowip mupe. Ta mare abraen nyop aria munogugur mukri munak munabeshukuk um anan, uwok. <sup>29</sup> Ipak douk wosik padukemesh um Krai s anan douk yopuni arman abom. Namudok aria ipak douk pu dukemesh namudok. Ihishmorim arpes h shunek yopinyi atin iri, eshesh douk shatogur Iruhin ananish batowish abom.

### 3

#### *Douk Apak Mape Iruhin Ananish Batowish*

<sup>1</sup> Yaipo, ipak ta pure urkwip aria punek urkwip um agundok douk Iruhin anan urkum munawasham apak abom um. Ananim urkum manawasham apak abom aria douk nahwarap ananish batowish. Namudok aria adur atin, apak douk Iruhin ananish batowish. Agundok atapishi arpes h douk madae shudukemesh um apak uwe, uwok. Umum maresh, eshesh madae shudukemesh um Iruhin uwe. <sup>2</sup> Eikish arpes h, douk apak mape Iruhin ananish batowish. Aria Iruhin douk watak neyabigap um agundok kweipon ta mupe mumam abom um uwe, watak. Aria apak douk madukemesh um abudok nyutob Krai s nutogur obi nyutob, apak ta mutogur mupe kabi anan um. Um maresh? Apak ta mutrun wosik abom kabi anan nape abom um. <sup>3</sup> Aria ihishmorim arpes h apa shape shatrugun um Krai s iri, eshesh apa shanagapes h um eshesh kanak aria shape yopiyopishi meyo h abom kabi Krai s anan yopuyopuni abom um.

<sup>4</sup> Enyudok arpen nyenek yoweishi inahos iri, enyen douk nyabrig Iruhin ananin lo. Um maresh? Agundok shenek yoweishi inahos um douk baugos abom um shabrig Iruhin ananin lo um.

<sup>5</sup> Ipak padukemesh. Krai s douk natogur nator apak aria nenek Iruhin madae nunasuhwesh nupe um yoweishi inahos apak menekesh iri uwe, uwok. Anan Krai s douk madae enesh yoweishi inahos abom shupeny an uwe, uwok meyo h.

<sup>6</sup> Namudok aria eshudok arpes h douk shatukur Krai s iri, eshesh douk madae shupe um shunek yoweishi inahos namudok atin uwe, uwok. Aria eshudok douk shapeum shenek yoweishi inahos iri, eshesh douk madae shutik Krai s o shudukeman uwe, uwok.

<sup>7</sup> Ipak eikish arpes h douk patogur kabi eikish batowish-umori, ipak gamo pu dukemesh. Ta enen arpen nyunek roh wumep aria pugipeshuk kupainyi barae n. Arpes h shapeum shenek yopinyi atin iri, eshesh douk yopishi abom kabi Krai s anan yopuni abom um. <sup>8</sup> Sei wok wata sagomatin Satan nenek yoweishi inahos. Namudok aria eshudok arpes h douk shapeum shenek yoweishi inahos namudok atin iri, eshesh douk Satan ananish arpes h. Aria baugenyum um barae n um agundok Iruhin ananin Nuganin natogurum, anan douk natogurum nununu Satan ananin yoweinyi mour.

<sup>9</sup> Enyudok arpen douk nyatogur Iruhin ananin batowin iri, enyen douk madae nyupe um nyunek yoweishi inahos namudok atin uwe, uwok. Um maresh? Enyen douk ehudok Iruhin ananin aih abom hapenyen iri. Enyenyin Yaken douk Iruhin aria ta mare nyupe um nyunek yoweishi inahos namudok atin, uwok.

<sup>10</sup> Aria apak mukri mudukemesh um Iruhin ananish arpes h meishi aria Satan ananish meishi um, apak ta mudukemesh namudok. Arpen douk madae nyunek yopihi aih iri uwe o enyen madae urkum munawasham enyenyinyi arpen iri uwe, enyen douk madae Iruhin ananin batowin uwe, uwok.

*Apak Atin Atin Ta Urkwip Punawasham*

### *Abom Kupaishi Arpesh*

<sup>11</sup> Riguk wata sagomatin douk pemneken enyudok baraen. Baraen enyudok. Apak atin atin ta urkwip punawasham abom kupaishi. <sup>12</sup> Apak mare mudukem anudok arman Kein, uwok. Anan douk Satan ananin Nuganin aria nabo ananin wanin nagok. Anan Kein ananin mour douk yoweinyi. Aria ananin wanin Abel ananin mour douk yopinyi. Namudok aria douk nan nagok.

<sup>13</sup> Namudok aria eikish arpesh, ta agundok atapishi arpesh shukri uwok-umep aria shukep agabus um, ipak douk mare mishish shikitak yowiyokuk, uwok. <sup>14</sup> Apak douk wosik urkwip panawasham apakishi arpesh. Namudok aria madukemesh um apak makutukuk ahudok shagok-ahi yah aria matogur ahudok anah douk shape wosik abom ihih nyumneh um. Enyudok arpen douk enyenyim urkum madae munawasham enyenyishi arpesh iri uwe, enyen douk watak nyape ahudok shagok-ahi yah. <sup>15</sup> Enyudok arpen douk nyutik nabes yowes um enen enyenyin arpen iri, enyen douk kabi nyaen nyagok abom um. Aria ipak douk padukemesh. Arpen nyabo kupainyi nyagok iri, enyen douk madae nyurao okwudok outuk um ta nyupe wosik ihih nyumneh um nyupenyok uwe, uwok.

<sup>16</sup> Jisas douk nagok um nutaurum apak. Douk namudok aria apak madukemesh um agundok apakip urkwip punawasham arpesh um. Aria apak douk shopunek mukri wosik abom um kupaishi shop mugok um mutaurum apakishi arpesh. <sup>17</sup> Aria ta enen arpen nyunosuh sabaishi eneshenesh agundok atapishi eshudok, aria enyudok arpen nyutik enen enyenyin yaruhin arpen um eshudok aria madae nyukri giha-umen um uwe, enyen douk mare nyukri enyen urkum munawasham Iruhin, uwok. Enyen douk nyenek roh. <sup>18</sup> Eikish batowish, apak madae mukri urkwip punawasham arpesh um agundok miyagwreh wehinyi baraen atin um, uwok. Apak mukri apakip urkwip panawasham arpesh um, namudok douk munekumesh abom yopihi aih o mour.

### *Iruhin Ananish Arpesh Douk Madae Shunogugur Um Shunak Hurukatin Um Anan Uwe, Uwok*

<sup>19</sup> Munekesh namudok um agundok apakip urkwip punawasham apakishi arpesh um, namudok ta mudukemesh mukri apak adur madukemesh um adurinyi baraen magipeshen. Munekesh namudok aria apakish mishish ta yopiyopish mupe dodogowip abudok nyutob apak munek beten munak hurukatin um anan obi nyutob. <sup>20</sup> Aria abudok nyutob apakip urkwip purum enesh apak menekesh iri yoweishi inahos um, aria apak ta mudukemesh abom namudok. Anan douk debeini abom neshagrakuk apakip urkwip nadukemesh abom um eneshenesh. <sup>21</sup> Namudok aria eikish arpesh, ta apakip urkwip mare purum eshudok yoweishi inahos douk apak menekesh iri aria mare mukri apak yoweipi um, namudok douk meyotu dodogowip atop abom manak hurukatin um anan. <sup>22</sup> Aria apak mukri munek beten morigan um enesh eshudok eneshenesh um, anan ta nukapesh. Um maresh? Apak douk magipesh ananin lo munek enenyenen anan nakri-enyi. <sup>23</sup> Ananin lo douk enyudok. Apak munek bilip abom um ananin Nuganin Jisas Kraisa aria urkwip punawasham apakish atin atin arpesh. Munekesh kabi Kraisa nakripap dodogowinyi baraen um. <sup>24</sup> Aria enen arpen nyugipesh Iruhin ananin lo um, enyen douk nyape Iruhin aria anan nape enyen. Iruhin douk nakapari ananin Mishin aria enyen nyataurumap madukemesh um Iruhin douk nape apak.

## 4

### *Arpesh Douk Iruhin ananin Mishin Nyapenyesh Iri Shani Eshudok Enesh Nyenek Rohwumesh Iri Mishin Nyapenyesh Iri*

<sup>1</sup> Eikish arpesh, sabaimi henek roh-wumesh iri profet douk hape harahe hanak ihigunum agundok atap. Namudok aria ipak mare punek bilip um ihm-morim profet douk hukri amam douk Iruhin ananin Mishin nyapenyam iri, uwok. Aria ipak punek skelimam

ihim-morim um pudukemesh um amam adur Iruhin ananin Mishin nyapenyam o enen kupainyi. <sup>2</sup> Pakri pudukemesh um Iruhin ananin Mishin um, ipak douk ta pudukemesh namudok. Ihish-morim arpesht ta shukri, "Jisas Kraisd douk natogur adurin arpen." Arpesht shukri namudok iri douk Iruhin ananin Mishin nyapenyesh. <sup>3</sup> Aria ihishmorim arpesht douk shakenyuk agabus enyudok baraeen um Jisas iri, eshesh douk madae Iruhin ananin Mishin nyupenyesh uwe, uwok. Eshesh douk kupainyi mishin nyapenyesh. Enyudok kupainyi mishin douk Kraisd ananin horin ananin. Anan douk pemnek baraeen um ta nunaki iri. Aria douk natogur nape agundok atap.

<sup>4</sup> Aria ipak eikish arpesht, ipak douk pape Iruhin ananip. Aria ipak douk pam habuhuk amudok rohwiimi profet. Um maresh? Enyudok nyapenyep iri Mishin douk dodogowin atin abom nyabouk enyudok enen mishin nyape agundok atapishi arpesht iri nyabuhuk. <sup>5</sup> Amudok armam, amam douk agundok atapimi meyoh. Namudok aria amam douk hapeum heyagwreh um agundok atapishi eneshenesh atish. Heyagwreh aria agundok atapishi arpesht shemnek amamin baraeen. <sup>6</sup> Aria apak douk Iruhin ananip. Eshudok arpesht shadukemesh um Iruhin iri, eshesh douk shemnek apakin baraeen. Aria eshudok madae Iruhin ananish iri uwe, eshesh douk madae shumneken atin uwe apakin baraeen, uwok. Aria yah douk ahudok, um mudukemesh um enyudok Iruhin ananin Mishin douk nyape um nyeyagwreh adurin atin baraeen iri meinyi aria enyudok enen nyape um nyenek rohwiimesh iri mishin meinyi um.

### *Iruhin Anan Urkum Manawasham Apak Abom*

<sup>7</sup> Eikish arpesht, apak atin atin ta urkwip punawasham apak kanak abom um. Um maresh? Ehudok aih um urkwip panawasham kupaishi um douk Iruhin ananish abom um. Arpesht urkwip punawasham kupaishi iri, eshesh douk Iruhin ananish batowish abom. Aria eshesh douk shadukeman wosik

abom Iruhin. <sup>8</sup> Iruhin anan douk baugos um agundok urkwip panawasham kupaishi um. Namudok aria meinyi arpen douk enyen madae urkum munawasham enyenyish arpesht iri uwe, enyen douk madae nyudukem Iruhin uwe, uwok. <sup>9</sup> Namudok aria Iruhin neyabigap um agundok anan urkum manawasham apak abom um. Neyabigap namudok. Anan douk atun nuganin meyoh. Aria neshopokan nanakumori agundok atap um nutaurumap muraok kwudok outuk um mupe wosik abom ihih nyumneh um.

<sup>10</sup> Baugos um agundok Iruhin ananim urkum manawashamap um douk namudok. Apak madae murik urkwip punawasham Iruhin uwe, uwok. Aria douk anan narik urkum manawasham apak aria neshopoki ananin Nuganin nanaki nataurumap. Nataurumap nagok aria nenek Iruhin madae juwehosin um apak aria nukri um nunasuhwesh nupe um yoweishi inahos apak menekest iri uwe, uwok nakwreyeshuk. <sup>11</sup> O eikish arpesht, enyudok mour abom um Iruhin neshopoki ananin nuganin nanaki neneken um nutaurum apak um, enyen douk nyeyabigap abom um agundok Iruhin anan urkum manawashamap abom um. Namudok aria apak ihishmorim atin atin shopunek apakip urkwip ta punawasham ihishmorim abom um. <sup>12</sup> Madae enen arpen nyutik Iruhin uwe, uwok. Aria apak ihishmorim atin atin apakip urkwip punawasham ihishmorim abom um, Iruhin ta nupe apak atin atin abom. Namudok aria ehudok ananish aih um urkwip panawasham um kupaishi um ta hutogur dodogowih abom um apak.

<sup>13</sup> Anan douk nakop ananin Mishin nyapenyap. Namudok aria madukemesh um, apak douk mani anan Iruhin mape aria anan shopunek nani apak mape. <sup>14</sup> Yain Iruhin neshopoki ananin Nuganin nanaki aria nataurum apak ihishmorim mape agundok atap iri narap matanamori mape wosik atin abom. Apak matik namudok aria douk makrip arpesht enyudok baraeen. <sup>15</sup> Aria enen arpen nyukri Jisas anan douk Iruhin ananin Nuganin



um, enyen douk nyani Iruhin nyape aria Iruhin nani enyen nape. <sup>16</sup> Aria apak kanak douk madukemesh um agundok Iruhin anan urkum manawashamap abom um. Madukemesh aria munek bilip makri adur um anan douk urkum manawashamap abom.

Iruhin anan douk baugos abom um agundok urkwip punawasham kupaishi um. Namudok aria shashudok arpeshe douk shupe um urkwip punawasham kupaishi iri, eshesh douk shape Iruhin aria Iruhin nape eshesh. <sup>17</sup> Baugenyum um baraen um agundok Iruhin nuhur apakip urkwip aria panawasham abom apakish arpeshe um, douk um apak ta mare munogugur ahudok nyumnah debeti kwot tunenek-ahi. Um maresh? Apak wata mape agundok atap obi nyutob, apak douk madukem Kraish abom. Namudok aria apak ta mare munogugur, uwok. <sup>18</sup> Arpen douk enyenyim urkum manawasham abom enyenyishi arpeshe shani Iruhin wosik iri, enyen douk madae nyunogugur atin uwe, uwok. Aria ehudok aih hutogur dodogowih atih um, enyen douk ta nyihyahuk agundok shanogugur um. Baugos um agundok arpeshe shanogugur um douk namudok. Shanogugur um Iruhin nunekumesh kwotog um esheshish yoweishi inahos aria nunekesh shurao debeiri eriger. Aria arpen douk nyanogugur iri, enyen douk madae dodogowin abom um urkum munawasham Iruhin nini enyenyish arpeshe uwe, uwok.

<sup>19</sup> Iruhin anan narik urkum manawasham apak. Namudok aria douk, apak shopunek wata urkwip panawasham anan nani apakish arpeshe. <sup>20</sup> Aria enen arpen nyukri enyen urkum manawasham Iruhin, aria enyen douk nyekenyuk agab enen enyenyinyi arpen um, enyen douk nyenek rohwa. Aria enyen urkum madae munawasham enyudok arpen douk nyatrin abom enyenyis nabes iri um uwe, namudok enyen ta urkum munawasham Iruhin mumam, douk enyen madae nyutrun enyenyis nabes iri uwe? Uwok meyo. Enyen douk nyenek rohwa abom. <sup>21</sup> Lo douk Kraish

nakopen iri enyudok. Meinyi arpen douk enyenyim urkum munawasham Iruhin iri, namudok atin enyenyim urkum ta munawasham enyenyish arpeshe shopunek.

## 5

### *Iruhin Ananish Arpeshe Douk Dodogowish Abom Um Shubouk Agundok Atapihi Yoweih Aih Hubuhuk*

<sup>1</sup> Ihishmorim arpeshe douk shunek bilip shukri Jisas anan Kraish, douk Iruhin nagraehan aria neshopokan nanakumori nunarao arpeshe iri um, eshudokmori arpeshe douk shape Iruhin ananish batowish abom. Ihish arpeshe douk esheship urkwip panawasham anan yaken iri, eshesh douk shopunek apa urkwip panawasham ananin batowin shopunek. <sup>2</sup> Aria apak urkwip punawasham Iruhin aria mugipesh ananin lo um, namudok douk mudukemesh mukri apakip urkwip adur panawasham ananish batowish abom shopunek. <sup>3</sup> Baugos um agundok apakip urkwip punawasham Iruhin um douk namudok. Apak magipesh ananin lo. Aria ananin lo douk madae debeinyi mour abom um apak mugipeshen um uwe, uwok. <sup>4</sup> Um maresh? Ihishmorim arpeshe shape Iruhin ananish batowish iri douk wosik dodogowish shabo agundok atapihi yoweih aih habuhuk. Baugos um apak munek uhwinyum ahwudok wanohwa, um mubo eneshenesh agundok atapihi yoweish inahos shubuhuk um douk namudok. Apak musuhw Iruhin ananin baraen dodog aria mugipeshen wosik. <sup>5</sup> Meishi arpeshe ta wosik dodogowish um shubouk agundok atapihi yoweih aih hubuhuk? Eshudok arpeshe douk eshudok shunek bilip shukri Jisas anan douk Iruhin ananin Nuganin iri atish.

### *Iruhin Nakripap Baraen Um Gamo Mudukemesh Abom Um Ananin Nuganin*

<sup>6</sup> Jisas Kraish douk anudok arman abom douk nanaki agundok atap iri. Nanaki nenek baptais arigaha aria shan nagok ananibor owishibor bau babuhi atap. Anan douk madae nunakumori agundok nunek baptais abar atubor um

uwe, uwok. Aria douk nanakumori nunek baptais aria shon nugok owishibor butourak buh bubuhi atap shopunek. Iruhin ananin Mishin douk nyape um nyeyagwreh adurin atin baraan iri, enyen douk nyakripap nyakri enyudok baraan douk adurin. Enyudok baraan um Kraiss nenek baptais aria eshesh shan nagok um. <sup>7-8</sup> Biyesh atin eshudok douk shawereh abom baugenyum um enyudok adurin atinyi baraan um Kraiss. Eshesh douk eshudok. Iruhin ananin Mishin nyani abar iri owishibor. Eshesh douk shakri abom atin baraan. <sup>9</sup> Apak douk memnek baraan arpes shakripap-enyi aria munek bilipumen. Aria baraan douk Iruhin nakripap-enyi douk dedeben atin abom nyeshagrakuk arpes shakripap enyi. Aria enyudok Iruhin nakripap-enyi baraan, anan douk nakripap enyudok baraan um ananin Nuganin. <sup>10</sup> Namudok aria eshudok arpes douk shapeum shenek bilip um Iruhin ananin Nuganin iri, eshesh douk sharao enyudok Iruhin nakripap-enyi adurinyi baraan nyape esheshiruh aparuh. Aria eshudok arpes douk madae shunek bilip um Iruhin iri uwe, eshesh douk shahwar Iruhin shakri napeum nenek roh atin iri. Um maresh, eshesh douk madae shunek bilip um enyudok baraan uwe, douk Iruhin nakripap um ananin Nuganin um, uwok. <sup>11</sup> Aria enyudok adurinyi baraan douk Iruhin nakripap-enyi douk enyudok. Iruhin douk nenekap um mupe wosik abom ihih nyumneh. Aria baugos um agundok mupe wosik ihih nyumneh um douk nyape um ananin Nuganin atun. <sup>12</sup> Meinyi arpen douk nyutukur ananin Nuganin iri, enyen douk ta nyupe wosik abom ihih nyumneh. Aria arpen douk madae nyutukur Iruhin ananin Nuganin iri uwe, enyen ta uwok meyoh.

### *Iruhin Nenekap Um Mupe Wosik Abom Ihih Nyumneh*

<sup>13</sup> Eik yenekumepogu enyudok baraan ipak douk penek bilip um Iruhin ananin nyeigur iri. Yenekenyumagu yakri ipak putrin aria pudukemesh um, ipak Iruhin

douk nenekep um pupe wosik abom ihih nyumneh. <sup>14</sup> Aria apak mugipesh enenyenen Iruhin ananim urkum makriyen iri atin aria munek beten morigan um enesh eshudok eneshenesh um, anan ta numnek apakin beten. Namudok aria abudok nyutob munak abom hurukatin um anan aria munek beten obi nyutob, apak douk ta dodogowip aria mare munogugur um anan, uwok. <sup>15</sup> Aria apak madukemesh um anan apa nemnek ihinmorim beten apak marigan um. Namudok aria apak douk mudukemesh um enyudok. Abudok nyutob munek beten morigan um nukop enesh eshudok eneshenesh obi nyutob, apak ta munare urkwip mukri eshudok munek beten marigan-umesh iri douk adur kabi nakopesh masuhwesh um.

<sup>16</sup> Aria enen arpen nyutik enen enyenyin arpen nyunek enesh yoweishi inahos douk madae wosik um shuneken nyunak um yoweiburi wabur um nyugok abom um uwe, enyudok arpen ta nyunek beten nyorik Iruhin um nutaurum enyudok nyenek yoweishi inahos iri, um enyen nyupe wosik abom ihih nyumneh. Enyudok baraan douk yakriyen um eshudok arpes douk shenek eshudok yoweishi inahos douk madae wosik um shunekesh shunak yoweiburi wabur um shugok abom iri uwe. Aria enesh arpes shenekesh iri yoweishi inahos, eshesh adur ta shunekesh shunak um yoweiburi wabur um shugok abom. Aria eik douk madae ikri um punek beten um eshudokmori arpes uwe, uwok. <sup>17</sup> Ihinmorim madae yopihi aih iri uwe, Iruhin douk natrih nakri yoweishi inahos. Aria enesh arpes shenekesh iri yoweishi inahos, eshesh douk madae wosik um shunek arpes shunak yoweiburi wabur uwe, uwok.

<sup>18</sup> Apak douk madukemesh. Eshudok arpes douk shape Iruhin ananish batowish iri, eshesh douk madae shupe um shunek yoweishi inahos namudok atin uwe, uwok. Um maresh? Iruhin ananin Nuganin narokarubesh shape wosik aria yoweini Satan ta nubirak aria mare nunekumesh enesh yoweishi inahos, uwok. <sup>19</sup> Apak douk madukemesh.

Apak douk mape Iruhin ananish batowish aria Satan douk nape debeini um ihishmorim shape shagipesh agundok atapihi atih aih iri. <sup>20</sup> Aria apak douk madukemesh. Iruhin ananin Nuganin douk nanaki neyabigap madukemesh um anudok adurin Iruhin. Apak douk matukur anudok adurin Iruhin aria matukur ananin Nuganin Jisas Krai. Jisas Krai anan douk adurini Iruhin. Anan douk baugos um agundok apak mupe wosik abom ihih nyumneh um.

<sup>21</sup> Eikish arpesh douk pape kabi eikish batowish-umori, eik yakri ipak pukomuk agabus abom ihm madae adurim iri uwe god omi.

## Pagiguk Iri Shup Douk Jon Nenekap Iri

*Banenyi Baraen Um Enyudok Nyagiguk  
Iri Baraen Jon Nenekap Iri*

ves 1-3 Jon nanadudareh um eshesh  
Kristen aria nakripesh Iruhin ananin  
yopinyi baraen um nutaurumesh

ves 4-11 Adurihi aih hani ehudok aih  
um apak urkwip apa panawasham  
kupaishi um

ves 12-13 Nyatuh iri baraen

<sup>1</sup> Eik debeiwe iri um ipak pasuhw Iruhin ananin baraen iri yeneku baraen um apudok shup. Yenekapumagu um nyak armatok<sup>1:1</sup>Iruhin nanagraehen nyape ananin iri nyani nyakish batowish. Eik adur urkum manawashamep abom. Aria douk madae eik atuwe urkum munawashamep uwe, uwok. Ihishmorim shadukemesh um adurinyi baraen shagipeshen iri douk shopunek urkwip panawashamep. <sup>2</sup> Um maresh? Enyudok adurin atinyi baraen douk nyape apak aria ta nyupe abom ihih nyumneh. <sup>3</sup> Aria apak miyagwreh adurin atinyi baraen aria urkwip punawasham kupaishi um, Yain Iruhin nini Jisas Krai apakin Yain ananin Nuganin ta henek gihaumap hutaaurumap meyoh aria hunekap aparuh hur wosik.

*Apak Ta Mugipesh Ehudok Aih Um  
Urkwip Punawasham Kupaishi Um*

<sup>4</sup> Eik yanadudareh abom um agundok yemnek um enesh nyakish batowish shagipesh adurinyi baraen um. Shagipeshen kabi Yain nakripap dodogowinyi baraen um mugipeshen um. <sup>5</sup> Aria douk eik yakri iwemum enen baraen aria ikripen namudok nyak yopukwi armatok abom. Apak ihipmorim atin atin ta urkwip punawasham um. Enyudok lo douk yakripenyumen iri, enyen douk madae ikripen enen namunyi lo uwe, uwok. Enyen douk seiwok

wata sagomatin maraen madukemen iri. <sup>6</sup> Baugos um agundok apak urkwip punawasham kupaishi um douk namudok. Apak mupe um mugipesh Iruhin ananin lo. Enyudok lo douk watak sagomatin ipak ihipmorim pemneken iri. Enyen douk nyakri namudok. Ipak ta urkwip punawasham abom kupaishi.

*Apak Musuhw Krai Ananin Baraen  
Dodog Abom*

<sup>7</sup> Sabaimi armam harahe hanak sabaigunum agundok atap iri, amam douk hakri hunek rohwmup. Amam douk hapeum hakri Jisas Krai anan douk madae nutogur adurinyi arpen uwe, uwok. Amudokmori armam douk hapeum henek roh wiri. Aria amam douk Krai ananim horim. <sup>8</sup> Ipak gamo pudukemesh um ta mare purao yopishi eshudok eneshenesh douk penek mour um kweipon ta puraesh iri. Aria puraesh piyatesh abom um douk ta wosik. <sup>9</sup> Meishi arpesh douk madae shusuhw Krai ananin baraen dodog abom aria shakutinyukuk shagipesh kupainyi iri, eshesh douk madae Iruhin nupenyesh uwe, uwok. Aria eshudok douk apa shasuhw abom enyudok yopinyi baraen dodog iri, douk Yain nani Nuganin douk hapenyesh. <sup>10</sup> Meishi arpesh shunakumogu ipak aria madae shusuhw enyudok baraen iri uwe, ipak mare puraesh shini ipak pupe ipakig urusag o pukri pukesh roguhw punadudareh-umesh, uwok. <sup>11</sup> Meishi arpesh douk shukri shukesh roguhw aria shunadudareh um eshudok-mori arpesh iri, eshesh douk ta shuni eshesh atin baraen. Aria ta shuni eshesh shanoprom um yoweishi inahos eshesh shenekesh iri.

*Nyagikuk Iri Baraen*

<sup>12</sup> Eik sabainyi baraen douk yakri inyemepogu um ipak apudok shup iri. Aria yakri uwok um inyemagu shup meyoh, uwok. Yakri inaku itrip aria mupe atugun miyagwreh meyoh um douk ta munadudareh abom muriguk.

**1:1** **1:1** Enyudok baraen, enesh shakri adurik armatok kwani okwokwish batowish. Aria enesh shakri Iruhin ananish arpesh douk apa shantorum shenek lotu anabur wabur iri.

<sup>13</sup> Nyakik wawik<sup>1:13</sup>Iruhin nagraehok  
um kwupe ananik nugawik iri, okwok-  
wish batowish douk shenemenyagu yop-  
uhi nyumnah nyak.

## Panenem Bisotup Iri Shup Douk Jon Nenekap Iri

*Baneyi Baraen Um Enyudok Binyatin  
Baraen Jon Nenekan Iri*

ves 1-4 Jon nanadudareh um Gaius  
aria nakripan Iruhin ananin yopinyi  
baraen um nutauruman

ves 5-8 Jon nenek tenkyu um Gaius um  
nenek yopihi aih

ves 9-10 Diotrefes nenek yoweishi in-  
hos

ves 11-12 Demetrius nenek yopihi aih

ves 13-15 Tukwanin um nyatuh iri  
baraen

<sup>1</sup> Eik debeiwe iri um Iruhin ananish  
arpesh iri yenekumenyugu apudok shup  
um nyak eikin abom arpen Gaius. Nyak  
douk adur eikim urkum manawashamen  
abom iri.

<sup>2</sup> Eikin arpen, eik yenek beten yarig  
Iruhin um ihinyumori nyak nyuneken  
iri ta nyutogur wosik abom. Aria  
shopunek yenek betenumen um arugeh  
mare eneh hen aria nyupe wosik abom.  
Kabi yadukemesh um nyakin mishin  
nyor wosik aria nyanadudareh abom  
um Iruhin um. <sup>3</sup> Nubokadae anam  
eikim arpeshim hanaki hatogrumori  
eik. Hanaki aria hakripe hakri nyak  
nyagipesh adurin atinyi baraen abom  
aria nyenek adurih atih aih. Douk  
yemnek namudok aria yanadudareh  
abom. <sup>4</sup> Aria eik imnek baraen um  
agundok eikish arpesh pugipesh adurin  
atinyi baraen um, eik douk apa yanadu-  
dareh yariguk yeshagrakuk agundok  
yanadudareh um kupaishi eshudok  
eneshenesh um.

*Gaius Nenek Yopinyi Mour*

<sup>5</sup> Eikin arpen Gaius, nyak nyagipesh  
yopihi aih abom aria nyenek ihinyumori  
mour um nyataurum amam apakimi ar-  
mam um. Amam douk kupaimi madae  
nyudukemam iri uwe, aria nyenekumam  
ehudok atih yopihi aih. <sup>6</sup> Amam hanaki  
agundok aria hakrip ihishmorim Iruhin

ananish arpesh um agundok nyakim  
urkum manawasham amam aria nyatau-  
rumam um. Aria yarigen um nyu-  
taurumam um utabor o eneshenesh es-  
hudok um amam hunak ahudok rouhi  
yah hunek Iruhin ananin mour um.  
Nyugipesh kabi Iruhin nakri um aria  
nyutaurumam. <sup>7</sup> Enyudok hanamen iri  
mour douk hanakum huneken um hutuk  
Krais ananin nyeigur nyuto iruhw. Aria  
amam douk madae hutrish enesh eshu-  
dok um eshesh madae shudukem um  
Iruhin iri uwe, kabi utabor um. Uwok  
abom. <sup>8</sup> Namudok aria apak ta mutaurum  
amudokmori armam. Munekesh namu-  
dok um apak ta muni amam manoprom  
munek enyudokmori atin um mutauru-  
mam mukriפש adurin atinyi baraen.

*Diotrefes Nenek Yoweih Aih*

<sup>9</sup> Eik douk yenekumepogu anap banapi  
shup ipak Iruhin ananish arpesh. Aria  
Diotrefes douk nakri nupe nurik abom  
nupe debeini. Anan douk madae num-  
neken atin uwe apakin baraen, uwok.  
<sup>10</sup> Namudok aria abudok nyutob ikri  
inak itogragu obi nyutob, eik wosik ta  
ikriפש um ihihmori anan nenekeh iri  
aih. Anan neyagwreh-umep enenye-  
nen yoweinyi baraen. Aria neyagwreh-  
umep rohwin baraen nakrip sabaishi  
arpesh. Aria douk madae nunek enyudok  
atin uwe, uwok. Aria amudok apakim  
douk hanakum hunek Krais ananin mour  
iri, anan douk madae nukri um nuram  
huwish hupe ananit urupat uwe, uwok.  
Arpesh douk shakri um shuram um es-  
heshig urusag iri douk shopunek nanak  
nakri wokumesh. Aria eshudok arpesh  
shakri shurao amudok arman iri douk no-  
hiyahesh nakri mare shiron shupe Iruhin  
ananish arpesh, uwok.

*Demetrius Nenek Yopihi Aih*

<sup>11</sup> Eikin arpen, nyak mare nyugipesh  
yoweih aih, uwok. Nyugipesh yopihi  
atih abom. Meinyi arpen douk nyunek  
yopihi aih iri, enyen douk Iruhin ananin  
arpen. Aria arpen nyenek yoweih atih  
iri, enyen douk madae nyudukemesh um  
Iruhin uwe, uwok.

<sup>12</sup> Ihishmorim arpesh shakri Demetrius  
anan douk yopunyi arpen. Aria Iruhin

ananin adurinyi baraen enyen kanak douk shopunek nyawereh um agundok anan douk yopini arman um. Eik shopunek yakri anan douk yopunyi arpen abom. Nyak douk nyadukemesh, um eikin baraen douk adurin.

*Nyagiguk Iri Baraen*

<sup>13</sup> Eik yakri ikripen sabainyi baraen, aria yakri uwok um inyemagu shup meyoh, uwok. <sup>14</sup> Hurukatin um yakri inaku itrin aria upe atugun uneyagwreh.

<sup>15</sup> Eik yakri nyakin mishin nyur wosik aria nyunadudareh. Apakish arpesh shape agundok iri douk shenekumenyugu yopuhi nyumnah nyak. Wosik eik yakri nyak nyunek yopuhi nyumnah um ihish-morim apakish arpesh atin atin douk shape nagundok iri.

## Apudok Shup Douk Jut Nenekap Iri

*Banenyi Baraen Um Enyudok Baraen  
Jut Nenekan Iri*

ves 1-2 Jut nowem yopinyi baraen um Iruhin nini Jisas Kraiss hutaurum eshesh Kristen

ves 3-16 Anam armam henek rohwmesh iri hawish um eshesh Kristen aria hape henek rohwmesh um shunek yoweishi inahos. Aria Iruhin ta nuwanam um yoweishi inahos amam henekesh iri

ves 17-23 Jut nahwarap um miyotu dodog aria munek yopihi atih aih

ves 24-25 Jut natuk Iruhin ananin nyeigur nyato iruhw

<sup>1</sup> Eik Jut, Jems ananin wanin douk yape shakamum Jisas Kraiss yenek ananin mour iri yenekumepogu apudok shup ipak armam armago douk Iruhin nahwarep um pupe ananip atip iri. Ipak douk apakin Yain Iruhin urkum manawashamep aria Jisas Kraiss narokarubep pape wosik iri. <sup>2</sup> Eik yakri ehudok aih um Iruhin nenek gihaumep um huni ehudok um ipak urkwip punawasham kupaishi um huni ehudok um ipakiruh aparuh hur wosik um hutogur dedebah atih um ipak.

*Henek Rohwmesh Iri Armam Amamin Baraen*

<sup>3</sup> O ipak eikish abom arpes! Sago-matin eik yape urkum morum yakri iwemepogu um ipak enen baraen um agundok Iruhin nataurum apak ihishmorim narap matanamori mape wosik abom um. Aria douk eik yemnek um eik ta iwemepogu um ipak enyudok enen baraen. Baraen enyudok. Eik yakri ipuhur um piyoh enyudok Iruhin ananin adurin baraen douk apak Iruhin ananish arpes makri adurin masuhwen magipeshen iri. Aria piyotu dodog pubo Kraiss ananim horim douk henek rohwmesh hakripesh kupainyi baraen iri amamin baraen nyubuhuk. Enyudok baraen douk apak makri adurin magipeshen iri, Iruhin

douk nakopen atuh meyoh apak ananish arpes. <sup>4</sup> Um maresh? Anam armam henek rohwmesh hatogur kabi Iruhin ananim um aria hanabeshuk hawishi um ipak Iruhin ananipi. Aria enen baraen douk seiwok nyetem Iruhin ananik Buk iri douk nyakrium amudokmori armam. Enyen nyakri Iruhin douk juwehosinumam aria ta nusuhw amamig kwotog aria nukri amam henek yoweishi inahos iri. Amam douk madae hudukemesh um Iruhin uwe aria henek rohwmesh hakripesh hakri baugenyum baraen um Iruhin nataurumap meyoh um douk namudok. Hakri, "Aria eshesh wata shupe shunek yoweishi inahos um, Iruhin ta nenek gihaumesh aria mare nunekesh shumnek eriger, uwok." Amam hakripesh enyudok baraen um nyutaurum amamih eneheneh yoweishi aih um shenek wehrur um. Aria amam hakonaguk agabus Jisas Kraiss douk anan atun abom Dodogowini Debeini.

<sup>5</sup> Adur, ipak padukemen enyudok baraen um seiwok Debeini nataurum eshesh Israel um. Anan naraesh shakutukuk agudok debeigi nahobig Isip shanak shape wosik. Aria madae roubi uwe, anan nabo shashudok Israel douk madae shumnek ananin baraen shugipeshen iri uwe shagok. Aria douk eik yakri gamo ikripep um ipuhur um ipak urkwip purum enyudok Debeini neneken um eshesh Israel iri. <sup>6</sup> Ipak urkwip purum eshudok enselahos shopunek douk seiwok madae shupe shakamum Iruhin shiyoh enyudok mour nyani debeishi nyeiguhw anan nekeshesh iri uwe. Eshesh shakutukuk esheshibur wabur. Douk namudok aria Iruhin noweshikesh dodog abudok dodogowibi senab douk bape ihih nyumneh iri aria douk shape arukwutigunum. Eshesh shape shatrugun um ahudok debeihi nyumnah douk ta anan nusuhw eshesh shuni ihishmorim arpes esheshig kwotog ahi. <sup>7</sup> Aria ipak urkwip purum eshudok arpes douk seiwok shape arbudok biarub yoweirubi warub Sodom iri Gomora bani arbudok bape hurukatin iri. Eshesh shenek eneshenesh yoweishi inahos abom um shenek wehrur um. Aria



seiwok arigaha douk, eshesh douk shani eshudok enselahos shape shatrugun um ahudok nyumnah um Iruhin nusuhw esheshig kwotog ahi. Eshesh shenekesh namudok aria Iruhin nawanam-umesh eshudok yoweishi inahos nenek debeihi nyih douk hanu hape ihih nyumneh iri hanish aria shemnek debeiri eriger shape ihih nyumneh. Anan nenek enyudok nyatogrumesh um apak mutrish aria munogugur mare mugipesh esheshih yoweih aih, uwok.

<sup>8</sup> Mamudok armam douk hanabeshuk hawish um ipak Iruhin ananish arpesh iri, amam apa henek ehudokmori aih eshesh Sodom iri Gomora shenekeh iri. Ihismorim yomnis amam hatrus iri douk sohur amamip urkwip um hunek yoweih aih um amamiruh yegeshiweruh. Aria amam hekenyuk agabus Iruhin ananin dodogowinyi baraan aria heyagwreh-umesh enenyenen eshudok nyeiguhw shatoumeshi kabi enselahos um. <sup>9</sup> Seiwok enyudok ensel douk debeinyi abom um ihishmorim enselahos iri nyonahwar um Maikel iri nyani Satan shanogogonim um ta omi nyurao Moses ananit mukwut um, Maikel madae nukri anan douk dodogowini aria nukri niyagwreh-uman enenyenen Satan uwe, uwok. Anan nakri-pan nakri, "Debeini anan kanak ta wosik nuhen!"

<sup>10</sup> Aria mamudok douk hanabeshuk hani ipak pape iri heyagwreh-umesh enenyenen ihishmorim eshudok enesh- enesh douk amam madae hudukemesh iri uwe. Aria ehudok aih amam hadukemeh aria hagipesh iri, eheh douk kabi wanarish mahish eshesh kanak shadukemeh shenekeh um. Amam henek ehudok yoweih aih aria ta ehudok aih atin ta hunekam yowem abom.

<sup>11</sup> Adur, kweipon amam ta humnek debeiri eriger! Amam douk hagipeshuk Kein<sup>1:11</sup> yoweih aih. Aria amam urkwip

<sup>1:11</sup> **1:11** Seiwok Kein nenek yoweishi inahos namudok. Anan juwehosin um ananin wanin aria nan nagok. Ipak putik Jenesis 4:1-5. <sup>1:11</sup> **1:11** Seiwok Balam nakri nutogur Iruhin ananin profet aria kupaimi hunokuneman um utabor um nunek Iruhin ananish arpesh shunek yoweishi inahos. Ipak putik Namba 22:5-41. <sup>1:11</sup> **1:11** Kora nenek yoweishi inahos nekenyuk agab Iruhin ananin baraan namudok. Anan narao anam armam hagipeshan hakanuguk agabus Moses nani ananin big Iruhin nakonen iri. <sup>1:12</sup> **1:12** Amamin baraan madae nyutaurum arpesh uwe. Enyen kabi orug douk madae gwunek eshah hurari iri uwe o kabi rowos douk shuruwep madae enep pir um uwe.

por abom um utabor atabor aria hagipesh abom Balam<sup>1:11</sup>iri yoweih aih. Aria amam hakonaguk agabus Iruhin kabi douk seiwok Kora<sup>1:11</sup>agab um. Amam douk henekesh namudok aria amam ta douk yowem abom kabi douk seiwok Kora yowen abom um.

<sup>12</sup> Babudok nyutob ipak pani kupaishi Iruhin ananish arpesh urkwip por arag atin aria pantorum pape pawok worigun obi nyutob, amudok armam shopunek hani ipak pape hataurumep pagnoh. Amam hani ipak hapeum, amam henek yoweih aih um Iruhin ananis nabes. Madae abraenyim um agundoki worigun amam urkwip porum amam kanak atin. Amam abraen madae nyom um amamih yoweih aih amam hape henekeh iri uwe. Amam hani ipak pape pawok worigun aria amam madae urkwip purum hukri hubiram kupaishi arpesh uwe. Amam urkwip porum amam atum. Amam douk hape kabi onog orug.<sup>1:12</sup> orug douk uhwin nyaragwi aria eshah madae anah hurari uwe. Aria shopunek, amam kabi douk shuruwep peiragosi rowos. Douk nyutob um shuruwep pir um banaki aria shuruwep madae enep pir uwe. Agagos douk shatukagos um baugos aria yarigos abom. <sup>13</sup> Amam henek abraenyihi aih aria ehudok aih hatogur kabi youg debeibi morub batuk aria benek ahwas sanaki saku anagas um. Aria shopunek, amam hape kabi unib douk waktukuk owowih yeh wanarahe wanak hwaroh iri um. Aria Iruhin douk nenek anabur arukwutigun-iburi wabur bape um ta kweipon hunak hupe ihih nyumneh um.

<sup>14-15</sup> Adam ananip awirop sharik shape aria awiros sakitak sanaki aria sakri um namba 7-ip um shabuki anudok arman Inok. Aria seiwok Inok nakripesh enen baraan um eshudok douk ta kweipon shugiguk shutograri iri. Anan nakriyen

um amudokmori henek rohwumesh iri armam nakri namudok, “Ipak mnek! Kweipon Debeini ta nini ananish sabaishi tausenish enselahos shunaki. Eshesh ta shunaki um anan nusuhw ihishmorim arpeshe esheshig kwotog. Aria nuwanamesh yoweishi inahos yoweishi arpeshe nunekesh shumnek debeiri eriger um nuyabigesh shudukemesh um eshesh douk shenek yoweishi inahos aria eshesh douk shemnek debeiri eriger. Aria anan ta nuwanamesh esheshih yoweih aih um shakon agabus Iruhin um aria sheyagwreh-uman enenyenen yoweinyi baraen um.”<sup>16</sup> Amudok henek rohw iri armam amamiruh aparuh madae hur wosik aria hupe wosik atin uwe, uwok. Amam apa henek sousunah hariguk um eneshenesh eshudok douk shatogrumam iri. Aria amam apa heyagwreh hariguk um eneshenesh eshudok. Amam hagipesh yoweih harik hapeum iri aih um henek yoweishi inahos um. Amam hapeum hakri hutuk amamish atish nyeiguhw shuto iruhw aria hakriפש yopinyi atin baraen kupaishi um huhur esheshiruh aparuh um shugipesham shunek eneshenesh yoweishi inahos amam hakriyesh iri.

#### *Ipak Ta Pupe Dodogowip Atip Abom*

<sup>17</sup> Aria ipak eikish arpeshe abom! Ipak ta urkwip purum enyudok baraen um eshudok douk riguk Debeini Jisas Kraish ananim aposel hakriפש-umesh um ta shutograri iri. <sup>18</sup> Amam hakriפש hakri, “Hugiguk iri nyumneh hutogurum, anam armam douk ta hunumogesh Iruhin ananish aih iri ta hutogur. Amam ta hukon agabus Iruhin aria ta hugipesh yoweih harik hapenyam iri aih aria hunek eneshenesh yoweishi inahos.” <sup>19</sup> Aria douk amudok atum armam hape henek ipak Iruhin ananish arpeshe panadi-yogurum pape sisiguk. Amam douk hagipesh yoweih harik hapenyam iri aih aria henek eneshenesh yoweishi inahos amam kanak hakri hunekesh iri. Amam douk madae Iruhin ananin Mishin nyupenyam uwe, uwok.

<sup>20</sup> Aria ipak eikish arpeshe ta pusuhw Iruhin ananin baraen dodogupeshen.

Iruhin douk baugos um ehudok yopihi aih um ipak penek bilipuman um. Aria putogur dodogowip abom um ehudok aih um penek bilipuman um. Aria ipak ta pugipesh Iruhin ananin Mishin nyupuhur um punek beten um aria ta punek beten. <sup>21</sup> Aria Iruhin douk urkum manawashamep aria ipak ta pupe hurukatin um anan. Aria ipak pupe putrugun um apakin Debeini Jisas Kraish douk nenek gihaumep iri um nunekep pupe wosik abom ihih nyumneh.

<sup>22</sup> Ipak penek gihaum eshudok arpeshe douk shasuhw Iruhin ananin baraen aria eshesh madae shusuhwen dodog abom shugipeshen iri uwe. Aria putaurumesh um punekesh shusuhwen dodog shugipeshen. <sup>23</sup> Aria enesh douk hurukatin um shakri shukonaguk agabus Iruhin iri, eshesh kabi douk shagrukuk orokohunih um nyih um. Douk namudok aria ipak ta putaurumesh putukeshi um ehudok nyih puraesh shutanamori shupe wosik. Aria ipak pukri gihaumesh eshudok enesh douk wata shatanam shagipesh yoweih harik hapenyesh iri aih um shenek yoweishi inahos um aria putaurumesh. Aria pukri putaurumesh um, ipak ta gamo pudukemesh um ta wosik atin ipak pugipesh esheshih yoweih aih. Ipak ta pukri uwok-umeh abom.

#### *Apak Ta Mutuk Iruhin Ananin Nyeigur Nyuto Iruhw*

<sup>24</sup> Apak mutuk Iruhin ananin nyeigur nyuto iruhw. Um mareshe? Anudok Iruhin anan douk dodogowini aria wosik um nutaurumep nunekep piyotu dodog aria mare putu punek enesh yoweishi inahos. Aria shopunek, anan douk dodogowini aria wosik um nunekep pupe wosik aria mare enen baraen nyupenyep um enesh yoweishi inahos. Aria punadudareh abom abudok nyutob anan nuraep punak ganudok anan natrugun abom aria napeum. <sup>25</sup> Anan douk anan atun abom nape apakin Iruhin douk nataurumap narap matanamori mape wosik atin iri. Aria enyen douk um enyudok mour apakin debeini Jisas Kraish neneken iri atin aria Iruhin narap mape namudok. Douk

namudok aria agundok natrugun abom  
um nini debeinyi nyeigur nyuni debeinyi  
big nyuni agundok Iruhin dodogowinari  
nape debeini um eneshenesh eshudok um  
douk shupe um anan atun. Seiwok bau-  
gos um arigaha douk, arigaha kweipon  
shopunek ta shupe um anan atun ihih  
nyumneh! Adur atin.

## Baraen Douk Jisas Krais Nakrip Jon-enyi

*Banenyi Baraen Um Eneyenen Jisas Krais Neyabig Jon Um*

1:1-8 Jon kabi nanabek yomnis um aria natik eneshenesh eshudok aria nowem enyudok baraen 7-poreis awiros um Iruhin ananish arpesih aria natuk Jisas Krais ananin nyeigur nyato iruhw.

1:9—3:22 Jon natik Jisas Krais natrugun abom aria ananin baraen nyanam eshesh sabaishi Kristen shape 7-poreirub warub iri.

4:1—8:1 Jon natik iruhw heven aria natik Jisas Krais nani ananin Yaken Iruhin, hani sabaishi enselahos aria natik Jisas nakweshih 7-poreis kendelis gris douk soweshik apudok shup douk shadareshap iri.

8:2—11:19 Jon natik 7-poreish enselahos atin atin shasuhw aruruh aria shahaprisharuh

12:1—13:18 Satan ta nini Iruhin ananish sabaishi enselahos shurpak aria shuhiyahan nugruki agundok atap

14:1—15:8 Jon natik Jisas natogur kabi douk nugaen sipsip um aria nani bishatin enselahos shabo eshudok arpesih douk shakon agabus abom Iruhin iri

16:1-21 Jon natik enesh kupaishi 7-poreish enselahos. Eshesh atin atin shasuhw marus.

17:1—19:21 Iruhin ta nuwanamesh yoweishi inahos eshudok arpesih shape wabur Babilon shenekesh iri, aria Krais ta nutogur kabi douk arman netem shigorihwinyi hos um aria nunaki.

20:1-15 Satan ta nunuweshik nupeik namudok agudok gagari nuwag gabuh gani atap iri nuwag aria Iruhin ta nunek skelimaguk ihishmorim arpesih ba iyoh

21:1-27 Namuburi wabur Jerusalem

22:1-6 Worubibar abar bani shuruwepigos rowos douk ta arpesih shishoh aria shupe wosik abom ihih nyumneh iri.

22:7-21 Jisas Krais ananin nyatuh iri baraen douk nahwar sabaishi arpesih um shunakumori anan.

*Baraen Jon Nenyem Nyakri Um Okwudok Buk Iri*

<sup>1</sup> Seiwok enyudok baraen um Jisas Krais nyanabeshuk. Aria douk abudok nyutob enyen nyatogur yopugunum. Iruhin douk nakon enyudok baraen Jisas um nukrip shenek Iruhin ananin mour iri um nuyabigesh um shanabeshuk iri eshudok eneshenesh hurukatin um shutogur. Anan douk neyabigap namudok. Anan neshopoki ananin ensel nyanakumori eik Jon douk yenek Iruhin ananin mour iri aria nyakripe enyudok baraen. <sup>2</sup> Aria eik yatik eshudok ihishmorim eneshenesh jurug aria eik yawereh enyudok baraen yakripep yopugunum. Enyudok baraen douk Iruhin ananin nyani enyudok adurin baraen Jisas Krais nakripepenyi. <sup>3</sup> Enyudok baraen nyetem okwudok buk iri douk nyakrium eshudok douk ta shutograri iri. Aria ihishmorim arpesih douk shutarih enyudok baraen debeg um kupaishi shumneken iri, eshesh wosik shanadudareh. Aria eshudok douk shumneken aria shusuhwen dodog shugipeshen iri eshesh shopunek douk shanadudareh. Um maresih? Abudok nyutob um eshudok ihishmorim shutogurum douk banaki hurukatin.

*Baraen Jon Nenyem Nyunam Iruhin Ananish Arpesih Shape 7-poreirub Warub Iri*

<sup>4-5</sup> O ipak Iruhin ananishi arpesih pape arbudok 7-poreirub warub douk bape shokugi nahobig Esia iri. Eik Jon yenekumepogu apudok shup ipak. Eik yakri Iruhin douk seiwok nape, aria kweipon shopunek ta nupe arigaha hugiguk iri nyumnah hutograri nutaurumep meyo. Aria anan nutaurumep

pupe dodogowip aria ipakiruh aparuh hur wosik. Aria shopunek, yakri eshudok 7-poreish yopishi mishish<sup>1:4-5</sup>douk shape hurukatin um Iruhin ananin debeinyi wagitur iri shuni Jisas Kraish shopunek shutaurumep meyoh aria ipakiruh aparuh hur wosik. Jisas Kraish douk neyotu dodogowin atun nagipesh ananin baraen wosik iri nakripep ihinymorim Iruhin ananin adurin atinyi yopinyi abom baraen. Aria sagomatin Iruhin narik nohur anan nakutukuk wonugwehw aria watak nakitak nape. Aria anan douk abom nape debeini um ihim-morim debeimi king douk hape agundok atap iri.

Anan douk urkum manawashamap aria ananibor owishibor botourak babuh aria bokweshiap aria mape wosik um eneshenesh apakish yoweishi inahos.<sup>6</sup> Aria douk anan nenekap mape debeipi um sabaishi arpesk kabi douk king-omi um. Aria shopunek, anan nenekap mape pris kabi amam seiwok hape henek ofa um eneshenesh eshudok hako Iruhin iri um. Aria apak munek mour um Iruhin douk Jisas Kraish nenek lotuman iri. Aria anan shopunek douk ananin Yain. Aria eik yakri debeinyi nyeigur nyuni ihinyumorim dodog abom shupeum anan atun ihih nyumneh! Adur atin.

<sup>7</sup> Ipak tik! Anan ta nini orug nunaki. Aria ihishmorim arpesk shuni eshudok douk seiwok shan nagok iri ta shutrun esheshis nabes. Aria ihishmorim debeisi awirosish arpesk douk shape agundok atap iri ta shurepan abom. Adur atin eshudok ta shutogur namudok atin. Adur atin.

<sup>8</sup> Aria debeini dodogowini abom Iruhin douk seiwok nape, aria douk shopunek nape, aria kweipon ta nunaki iri nakri namudok, "Seiwok baugos um ihishmorim eneshenesh eshudok watak enesh shupe uwe aria eik yarig yape. Aria kweipon shopunek, abudok nyutob ihishmorim eshudok shunak shutuhuk um eik ta ipe."

*Jon Natic Kraish Douk Iruhin Nagraehan Neshopokan Nanaki Iri*

<sup>9</sup> Eik ipakin ashuken Jon douk yani ipak munoprom Jisas atun iri. Eik douk yani ipak memnek eriger aria meyotu

dodogowip um musah enenyenen amaeen douk ta nyutogrumap iri. Aria douk shopunek, eik ta ini ipak um muwish agundok Iruhin nape Debeini um ananish arpesk um. Eik douk yakripesh Iruhin ananin baraen nyani enyudok adurin atinyi baraen um Jisas. Douk namudok aria eshesh shasuhwe sharawe shanaki sheyosop yapeik enyudok unai nyeigurinyum Patmos iri.<sup>10</sup> Anah nyumnah douk apak apa mape munek lotu um Debeini ahi, Iruhin ananin Mishin nyatogrume dodogowin atin aria nyeyabige eshudok yatrish kabi yabo yomnis yatrish um. Aria yemnek anah debeihi mah agabiwe um kabi douk shahapur oruhw um.<sup>11</sup> Aria enyudok arpen nyeyagwrehi iri nyakripe nyakri, "Nyak wem eshudok douk ta nyutrish iri anap shup aria nyukeshop punak um Iruhin ananish arpesk shape arbudok 7-poreirub warub iri. Nyeiguhwirub um warub douk arbudok. Efesus, Smerna, Pergamum, Taiaaira, Sardis buni Filadelfia iri Laodisia."

<sup>12</sup> Aria eik yatanam um itik enyudok douk nyakripe enyudok baraen iri aria yatik 7-poreish eshudok shenekesh gol iri shatao. Eshesh douk shenekesh um showem lamhos shetem um.<sup>13</sup> Aria anan arman neyotu orokohun um eshudok 7-poreish shenekesh gol iri. Anan nor anah rouhi rupah habuh heyawiamokuk ananiruh yeriweruh aria nawashak anat let douk shenekat gol iri um ananin mishin. Anan douk kabi Anudok Arman douk natogur adurinyi arpen iri um.

<sup>14</sup> Aria ananig barag douk gatogur shigoriwig abom kabi ehirub douk batogur sipsip iri o kabi shigorihwisi ais um. Aria ananis nabes satrugun kabi douk debeihi nyih hanu aria bogaragun um.

<sup>15</sup> Aria ananiruh yeriweruh hatrugun abom kabi enyudok brasin kapa iri um douk shashainyeh debeihi nyih aria nyatrugun um. Aria ananish mah heyagwreh debeg kabi worub batogur banaki um.<sup>16</sup> Anan nasuhw 7-poreiyu unib um ananin yopunyi rogur, aria anat wanohwiti bainat douk wanohwit eresit wobuwobur iri tatograri ananish nokwat.

Aria ananig yamag bogagrag abom kabi wah hatao nyumnah iri hatrugun um.

<sup>17</sup> Douk yatrūn aria yanak yabuh yakus hurukatin um ananiruh yeriweruh kabi anan nagok iri arman um. Aria anan nowem ananin yopunyi rogur eik aria nakripe nakri, “Nyak mare nyunogugur, uwok! Eik douk seiwok baugos um ihishmorim eneshenesh eshudok watak enesh shupe uwe aria eik yarig yape. Aria kweipon shopunek abudok nyutob ihishmorim eshudok shunak shutuhuk um, eik ta ipe. <sup>18</sup> Eik douk madae igok iri uwe, uwok. Eik yape iri! Seiwok yagok aria douk yape, aria shopunek ta ipe ihih nyumneh. Aria eik douk yarao debeinyi big aria dodog um ipe debeiwe iri um agundok arpesih shugok um. Um ikri eshesh shunak um yoweiburi wabur o shunak um yopuburi.

<sup>19</sup> Douk namudok aria nyak wem eshudok iganigadae nyatrish iri shuni eshudok douk shape shatogur agundok atap iri shuni eshudok douk ta kweipon shugiguk shutograri iri nyakip shup. <sup>20</sup> Aria baugenyum baraen riguk nyanabeshuk um oudok 7-poreiyu unib douk nyatik yasuhwo eikin yopunyi rogur iri douk namudok. Oudok unib douk wagraeh um 7-poreish enselahos douk shape sheyoh Iruhin ananish arpesih shape arbudok 7-poreirub warub iri. Aria baugenyum baraen um eshudok 7-poreish shenekesh gol iri um shuwem lamhos um douk nyakrium Iruhin ananish arpesih douk shape arbudok 7-poreirub warub iri.”

## 2

### *Baraen Nyanak um Iruhin Ananish Arpesih Shape Efesus Iri*

<sup>1</sup> Aria Jisas ta apa nakripe nakri, “Jon, nyak wemen enyudok baraen anap shup nyunak um enyudok ensel douk nyape nyeyoh Iruhin ananish arpesih shape Efesus iri. Eik Jisas eikin baraen douk enyudok. ‘Eik douk yasuhw 7-poreiyu unib eikin yopunyi rogur aria yape yara-haen orokohun um 7-poreish eshudok

douk shenekesh gol iri um shape showem lamhosum iri yenekumep-ogu enyudok baraen ipak. <sup>2</sup> Eik yadukemesh um ihihmorim aih hani enyudok debeinyi mour ipak pape peneken iri. Aria yadukemep um agundok peyotu dodogowip atip um enenyenen amaen douk nyatogrumep iri. Aria ipak pakri uwok abom um eshudok shenek yoweih aih iri arpesih. Aria shopunek, yadukemep um ipak douk pokwiraeh amudok armam douk henek rohwa hakri amam douk aposel douk hakripesh Iruhin ananin baraen iri. Aria ipak padukemam um amam douk madae aposel omi uwe, uwok. Amam douk henek rohwa mesh iri. <sup>3</sup> Aria shopunek, eik yadukemep um agundok arpesih shatrip um pasuhw eikin baraen pagipeshen um aria shenek yoweih aih um ipak um. Aria ipak peyotu dodogowip aria madae juwehosip uwe. Aria shopunek, eik yadukemep um ipak douk madae arigeh hep um punek enyudok debeinyi mour um pugipesh eik um uwe, uwok. Ipak peyotu dodogowip atip.

<sup>4</sup> Aria douk eik yakri ikripep enen baraen um eshudok yoweishi inahos douk ipak pape penekesh iri. Sagomatin ipak urkwip panawashame dodog abom aria pagipeshe. Aria douk uwok. <sup>5</sup> Aria eik yakri ipak urkwip purum agundok riguk ipak papeum. Sagomatin ipak pape wosik, aria douk ipak patu pagrukuk rougunum. Ipak urkwip douk madae punawashame dodog uwe, uwok. Aria douk eik yakri ipak ta pukutukuk ipakish yoweishi inahos aria watak putanam puke aparuh eik. Aria ipak urkwip punawashame dodog abom kabi sago-matin ipak urkwip panawashame um. Uwok um, eik ta inaku itukuk ipakin enyudok douk shape showem lam um agundok douk enyen nyape nyataum. <sup>6</sup> Aria douk ipak watak panasuhw ehudok yopihi aih abom um pakri uwok um ehudok aih douk apudok awirop douk shanahwar um Nikolas<sup>2:6</sup> iri shenekesh iri. Eik shopunek douk yakri um uwok

2:6 2:6 Apudok awirop Nikolas apa shani eshesh Kristen shape Efesus bani Pergamum iri shape shenek lotu. Aria eshesh apa shenek skulumesh um shunek eneshenesh yoweishi inahos.

abom.

<sup>7</sup> Aria douk ipak arigos sapenyep iri ta pumnek enyudok baraan Iruhin ananin Mishin nyakrip ananish arpes-nyeni aria pusuwen dodog pugipeshen! Eshudok arpes-nyeni douk shiyotu dodogowish atish shunek wanohw shubo yoweinyi nyubuhuk iri, eik ta ikesh yopinyi big um eshesh shuwok epudok shurkwip douk peir enyudok rowog douk nyatao Iruhin ananig nahobig ganahwar um Paradais iri. Aria eshudok arpes-nyeni shuwok epudok shurkwip iri ta shupe wosik abom ihih nyumneh.’ ”

*Baraan Nyanak Um Iruhin Ananish Arpes-nyeni Shape Smerna Iri*

<sup>8</sup> Aria Jisas watak shopunek nakripe nakri, “Jon, nyak wem enyudok baraan anap shup nyunak um enyudok enyel douk nyape nyeyoh Iruhin ananish arpes-nyeni shape Smerna iri. Eik Jisas eikin baraan douk enyudok. ‘Seiwok bau-gos um, ihishmorim eneshenesh eshudok watak enesh shupe uwe aria eik yape. Aria kweipon shopunek, abudok nyutob ihishmorim eshudok shunak shutuhuk um, eik ta ipe. Douk seiwok shae yagok aria douk watak yakitak yape. <sup>9</sup> Eik douk yadukemesh um enenyenen amaen douk nyatogur um ipak iri. Aria shop-unek, yadukemesh um ipak eneshenesh eshudok wokep. Aria uwok. Ipak douk pogrem sabaishi yopishi enesh-enesh eshudok shakusumep iruhw heven. Aria eik douk yadukemesh um enyudok yoweinyi baraan douk eshudok arpes-nyeni douk shenek rohwmep shakripepen iri. Eshesh shakri eshesh douk Juda aria eshesh madae Juda abom uwe, uwok. Eshesh douk Satan ananish. <sup>10</sup> Aria ipak mare punogugur um enenyenen amaen douk ta nyutogrump aria nyunekep pumnek debeiri eriger iri. Ipak pumnek! Satan ta nunek anep punak punuweshik pupe um nukwiraehep punek yoweishi inahos. Aria ipak ta pumnek eriger banab nyutob meyoh kabi 10-poreih nyumneh meyoh um. Douk enesh shukri shep

pugok um, ipak ta pusuhw eikin yopinyi baraan dodog aria piyotu dodogowip atip. Aria eik ta ituk ipakish nyeiguhw shuto iruhw aria ta inekep pupe wosik ihih nyumneh. Eik ta itaurumep pupe wosik.

<sup>11</sup> Aria douk ipak arigos sapenyep iri ta pumnek enyudok baraan douk Iruhin ananin Mishin nyakrip ananish arpes-nyeni aria pusuwen dodog pugipeshen! Eshudok arpes-nyeni douk shiyotu dodogowish atish shunek wanohw shubo yoweishi inahos shubuhuk aria eshesh ta mare shugok anah shopunek,<sup>2:11</sup>uwok.’ ”

*Baraan Nyanak Um Iruhin Ananish Arpes-nyeni Shape Pergamum Iri*

<sup>12-13</sup> Aria Jisas nakripe shopunek nakri, “Jon, nyak wem enyudok baraan anap shup nyunak um enyudok enyel douk nyape nyeyoh Iruhin ananish arpes-nyeni shape Pergamum iri. Eik Jisas eikin baraan douk enyudok. ‘Eik douk yasuhw atudok wanohwiti bainat douk wanohwit wobuwobur iri yenekumep-ogu enyudok baraan ipak. Eik douk yadukemesh um ipakibur wabur. Satan douk nape debeini um ipakibur wabur. Aria eik yadukemep um ipak pasuhw eikin baraan dodog pagipesh eik atuwe. Aria eshesh shabo anudok yopuni arman Antipas douk nasuhw eikin baraan dodog abom nakripeshen iri nagok ipakibur wabur douk Satan napenyabur. Aria abudok nyutob eshesh shan nagok um, ipak shop-unek peyotu dodogowip aria madae pukri punyukur-ukuk eikin baraan uwe, uwok.

<sup>14</sup> Aria douk eik yakri ikripepen enen baraan ipak um enesh yoweishi inahos douk ipak pape penekesh iri. Ipak anep douk wata pasuhweh dodog ehudok Balam ananish yoweishi aih. Ananish aih douk ehudok. Seiwok anan neyabigan ehudok yoweishi aih Balak aria Balak nenek rohwmep um eshesh Israel shenek yoweishi inahos um shakonuguk agabus Iruhin. Balak douk nakripesh shawok eshudok mahish iri worigun douk sharik shenek ofamesh shako amudok madae adurimi god omi iri uwe. Aria shopunek,

<sup>2:11</sup> <sup>2:11</sup> Jisas watak nutanamori ahi, shagok iri ta watak shukitak aria shiyotu um kwot. Aria eshudok douk madae shunek bilip iri uwe ta shunak um yoweiburi wabur aria ta shugok anah shopunek.

nakripesh shenek wehrur um. <sup>15-16</sup> Aria douk shopunek namudok atin. Ipak anep douk pasuhw ehudok yoweih aih ehudok apudok awiropish arpesh shahwawesh um Nikolas<sup>2:15-16</sup>iri esheshih. Douk namudok aria ipak ta pukeshuk agabus yoweishi inahos ipak pape penekesh iri aria watak putanam pukon aparuh Iruhin. Uwok um, eik ta hurukatin um inaku aria ini eshudok douk shagipesh ehudok eshesh Nikolas esheshih aih iri murpak. Aria ta ikumesh atudok bainat douk tatograri eikit nokwat iri. <sup>17</sup> Aria douk ipak arigos sapenyep iri ta pumnek enyudok baraan Iruhin ananin Mishin nyakrip ananish arpesh-enyi aria pusuwen dodog pugipeshen! Eshudok arpesh douk shiyotu dodogowish atish shunek wanohw shubo yoweishi inahos shubuhuk iri, kweipon eik ta ikesh anagun worigun douk shahwaragun um mana douk nyanabeshuk nyakus iri. Aria shopunek, eik ta iwem esheshish namushi nyeiguhw anabor shigorihwi-bori utabor aria ta ikesh aburdok utabor eshesh atin atin. Aria kupaishi arpesh ta mare shudukem eshudok namushi nyeiguhw, uwok. Eshudok douk sharao aburdok utabor iri atish ta shudukemesh.”

*Baraan Nyanak Um Iruhin Ananish Arpesh Shape Taiataira Iri*

<sup>18</sup> Aria Jisas nakripe nakri, “Jon, nyak wem enyudok baraan anap shup punak um enyudok ensel douk nyape nyataurum Iruhin ananish arpesh shape Taiataira iri. Eik Jisas eikin baraan douk enyudok. ‘Eik Iruhin ananin nuganin douk eikis nabes satrugun kabi debeih nyih hanu aria bogaragun um. Aria eikiruh yeriweruh hatrugun kabi enyudok bras kapa douk shishainyeh debeih nyih iri nyatrugun um. Eik yenekumepogu enyudok baraan ipak.

<sup>19</sup> Eik yadukem ehudok yopihi aih ipak pape penekesh iri um agundok ipak urkwip panawasham Iruhin nani kupaishi arpesh um. Aria pasuhw eikin baraan dodog pagipeshen aria

douk penek yopinyi mour um putaurum sabaishi arpesh um. Aria shopunek, ipak peyotu dodogowip atip abudok nyutob amaen nyatogrumepep um. Aria eik yadukemesh um ehudok yopihi aih douk ipak pape penekesh iri douk heshagrakuk ehudok yopihi aih riguk ipak parik penekesh iri.

<sup>20</sup> Aria douk eik yakri ikripep enen baraan um eshudok yoweishi inahos douk ipak pape penekesh iri. Ipakish yoweishi inahos douk eshudok. Ipak pakri wosik aria pape patruk meyoh okwudok yoweikwi armatok Jesebel aria okwok douk kwani ipak kwape. Okwok douk kwenek rohw kwakri okwok douk onok profet douk kwakripesh Iruhin ananin baraan iri. Aria okwok douk kwenek rohw iri. Okwok kwenek rohw um eshudok shenek eikin mour iri kwakripesh shenek wehrur um. Aria shopunek, shawok agundok worigun douk shenek ofamogun um amudok madae adurimi god omi iri uwe. <sup>21</sup> Aria eik douk yakutukuk kwape anah nyumneh shopunek um yakri kwukeshuk agab okwokwish yoweishi inahos um agundok kwani kupaishi shenek wehrur um. Aria yakri watak kwutanam kwunakumori eik, aria uwok. <sup>22</sup> Douk namudok aria eik ta inekok kwishuh kwutuwatagun um kwumnek debeiri eriger. Aria ta eshudok arpesh douk shani okwok shenek wehrur iri mare shukeshuk agabus esheshish yoweishi inahos aria shatanam shunakumori eik um, eik ta inekesh namudok. Eik ta inekesh shumnek debeiri eriger abom. <sup>23</sup> Aria shopunek, eik ta ibo eshudok douk shagipesh okwokwin baraan iri shugok. Eik ta inekesh namudok aria ihishmorim Iruhin ananish arpesh ta shudukemesh shukri eik douk yadukemesh wosik abom um ihishmorim arpesh esheshish mishish aria aparuh shor shanak um. Aria eik ta iwanamepep eneshenesh wosikumep atin atin um ihishmorim aih ipak pape penekesh iri.

<sup>24</sup> Aria douk eik yakri ikrip ipak anep douk pape Taiataira iri. Ipak madae pugipesh enyudok okwokwin yoweinyi



baraen uwe. Aria shopunek, ipak madae pugipesh ehudok aih douk enesh kupaishi shahwareh shakri, “Satan ananish aih douk hanabeshuk atin abom iri.” Aria eik ta mare watak ikripep enen kupainyi baraen shopunek um ipak pugipeshen iri, uwok. <sup>25</sup> Aria eik yakri ipak ta pusuhw ehudok ihimori yopihi aih iri baraen douk ipak paraen iri. Aria piyotu dodogowip atip arigaha eik watak itanamori.

<sup>26-27</sup> Aria eshudok arpesh douk shugipesh eikim urkum aria shiyotu dodogowish atish shunek wanohw shubo yoweishi inahos shubuhuk arigaha esheshib nyutob um shugok um butogur um, eik ta inekesh namudok. Eik ta ikesh debeishi dodogowishi nyeiguhw um shupe debeishi um sabaishi arpesh douk shape ihigos nahobigos iri. Aria eshesh ta shupe debeishi shusuhw merikw-umesh namudok atin kabi douk seiwok eikin Yain neke debeinyi nyeigur aria yape debeiwe iri yasuhw merik um sabaishi arpesh um. Enyudok ta nyutogur kabi Iruhin ananin baraen douk nyetem ananik Buk iri nyakrium. Iruhin nakri namudok, “Anan ta nupe dodogowin atun abom aria ta nusuhw anam ainim butum aria nupe nusuhw merikw-umesh. Anan ta nunekesh kabi anan arman douk nawor marus shenekas amnab iri pupuwaros shokugun atugun um.”

<sup>28</sup> Aria eik ta ikesh okwudok unuk douk kwanahwar um shuduwi iri. <sup>29</sup> Aria douk ipak arigas sapenyep iri ta pumnek enyudok baraen Iruhin ananin Mishin nyakrip ananish arpesh-enyi aria pusuwen dodog pugipeshen!’ ”

### 3

#### *Baraen Nyanak Um Iruhin Ananish Arpesh Shape Sardis Iri*

<sup>1</sup> Aria Jisas nakripe nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Sardis iri. Eik Jisas eikin baraen douk enyudok. ‘Eik douk yasuhw Iruhin ananish 7-poreish yopishi mishish<sup>3:1</sup>shani 7-poreiyu unib

3:1 **3:1** Putik futnot nyape Revelesen 1:4 iri.

aria yenekumep-ogu enyudok baraen ipak.

Eik douk yadukemesh um ihimorim eneheneh aih ipak pape penekah iri. Arpesh shatrip um, eshesh shakri ipak madae pugok iri uwe. Aria uwok, ipak nubokadae pagok iyoh. <sup>2</sup> Douk namudok aria ipak pikitak pukutukuk agundok ipak peshuh um. Aria ihimorim ipakih yopihi aih douk ipak wata pasuweh iri, eheh douk hurukatin um hugok. Douk namudok aria ipak ta pikitak aria punekah dodogowih abom atih. Um maresh? Eikin debeini Iruhin natik ipak penekah iri aih jurug aria nakri eheh douk madae yopih uwe, uwok. <sup>3</sup> Douk namudok aria ipak wata urkwip purum enyudok baraen douk seiwok ipak pemneken iri aria wata pugipeshen. Aria putanam pukeshuk agabus yoweishi inahos aria wata punakumori eik. Uwok um, eik ta inaku kabi anan nakwuaruh iri nanakumagu aria ipak ta mare pudukemesh um abudok nyutob eik inaku itogrumep obi nyutob.

<sup>4</sup> Aria ipak karowip pape Sardis iri madae pugipesh yoweih aih uwe. Aria enyudok enyen douk kabi ipak madae punek ipakih rupeh hubosusih um uwe. Aria ipak atip ta pur ehudok shigorihwihi rupeh aria puni eik munak atugun. Um maresh? Ipak douk yopishi arpesh aria ipak douk wosik um puni eik munak atugun um. <sup>5</sup> Aria eshudok arpesh douk shiyotu dodogowish atish shunek wanohw shubo yoweishi inahos shubuhuk iri, eik ta ikesh ehudokmori shigorihwihi rupeh shihur. Eshesh ta shihur kabi ipak karowip pape Sardis iri pehur um. Aria eik ta mare itorihuk esheshish nyeiguhw douk shatem okwudok buk douk eshudok arpesh ta shupe wosik ihih nyumneh iri esheshish nyeiguhw shatemokwi, uwok. Aria eik ta ikrip eikin Yain nini ananish enselahos yopugunum um eshudok arpesh ikri eshesh douk eikish arpesh. <sup>6</sup> Aria douk ipak arpesh arigos sapenyep iri ta pumnek enyudok baraen Iruhin ananin Mishin nyakrip ananish arpesh-enyi aria pusuwen dodog pugipeshen.’ ”

*Baraen Nyanak Um Iruhin Ananish Arpesh Shape Filadelfia Iri*

<sup>7</sup> Aria Jisas nakripe nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Filadelfia iri. Aria eik Jisas eikin baraen douk enyudok. ‘Eik douk yopuweiri abom douk aria eikin baraen douk adurin atin yasuhw ki<sup>3:7</sup>um atudok wit douk seiwok King Devit nasuwen iri. Aria ta eik ijik wit um, ta mare enen arpen dodogowin um nyutaru. Aria shopunek, ta eik itaru um, ta mare enen arpen dodogowin um nyijikat. <sup>8</sup> Eik douk yadukemesh um ihihmorim aih ipak pape penekeh iri. Aria shopunek, eik yadukemesh um ipak douk madae dodogowip um punek eikin mour wosik um uwe. Aria ipak pagipesh ihinyumorim eikin baraen aria madae pubeshuk eikin nyeigur uwe, uwok. Aria ipak tik. Eik yejik anat wit tanejik tapeimep. Aria ta mare enen arpen dodogowin um nyutaru, uwok. <sup>9</sup> Aria ipak punnek! Ipak douk padukemesh eshudok Satan ananish arpesh. Eshesh shenek rohw shakri eshesh douk Juda, aria eshesh douk madae Juda abom uwe. Eshesh douk shenek rohw iri. Douk namudok aria eik ta inekesh shunaki shubuh shuduk ohrubus hurukatin um ipakiruh yeriweruh. Aria abudok nyutob eshesh ta shudukemesh shukri adur atin eik douk urkum manawashamep ipak Iruhin ananish arpesh pape Filadelfia iri. <sup>10</sup> Ipak douk pagipesh eikin baraen wosik peyotu dodogowip aria madae juwehosip arigas uwe um enenyenen amaen douk nyatogrumpari. Namudok aria abudok nyutob eneheneh kwiraeh hutogur um hukwiraeh ihishmorim arpesh shape agundok atap iri um, eik ta itaurumep piyotu dodogowip atip aria pupe wosik.

<sup>11</sup> Aria eik douk hurukatin um inaku. Douk namudok aria ehudok yopuhi aih ipak pagipesh penekeh iri ipak ta gamo pusuweh dodog. Ta wosik atin enesh kupaishi arpesh shutrip shuraoukuk enyudok ipakin yopinyi prais douk

ta ipak puraen iri. <sup>12</sup> Aria eshudok arpesh douk shiyotu dodogowish atish shunek wanohw shubo yoweishi inahos shubuhuk iri, eik ta inekesh shiyotu dodogowish atish kabi anohw urohw douk hwatao hwosah eikin debeini Iruhin ananit debeiti urupat iri. Aria eshesh ta mare wata shukutukuk shutogur shunak, uwok. Eik ta iwem eikin Iruhin ananin nyeigur nyuni ananibur namuburi wabur Jerusalem ababurin nyeigur nyutem eshudok arpesh esheshiruh yegeshiweruh. Abrudok wabur ta bukutukuk iruhw heven douk eikin Iruhin napeum bubuhi iri. Aria eik shopunek ta iwem eikin naminyi nyeigur nyutem esheshiruh yegeshiweruh. <sup>13</sup> Aria douk ipak arigos sapenyepi um ta punnek enyudok baraen Iruhin ananin Mishin nyakrip ananish arpesh-enyi aria pusuwen dodog pugipeshen.’ ”

*Baraen Nyanak Um Iruhin Ananish Arpesh Shape Laodisia Iri*

<sup>14</sup> Aria Jisas nakripe nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Laodisia iri. Eik Jisas eikin baraen douk adurin. Enyen douk enyudok. ‘Eik douk yeyotu dodogoiwe atuwe abom yakripesh yopinyi abom wosik Iruhin ananin adurin atinyi baraen iri. Aria eik douk baugos um ihishmorim eshudok eneshenesh douk Iruhin nenekesh shape iruhw atap iri shani ihishmorim arpesh. Eik yenekumepogu enyudok baraen ipak. <sup>15</sup> Eik yadukemesh um ehudok aih ipak pape penekeh iri um pape penek eikin mour um. Ipak douk madae nyumanugasip abom uwe aria shopunek, madae juwehosip abom uwe. Aria eik yakri ipak ta nyumanugasip abom o juwehosip abom. <sup>16</sup> Aria uwok. Ipak madae juwehosip abom uwe o madae nyumanugasip abom uwe. Ipak juwehosip karowih atin. Douk namudok aria eik ta igugurukwep putograri eikit nokwat! <sup>17</sup> Aria

**3:7 3:7** Enyudok baraen nyakri Jisas Kraiss atun narao big um nukri meishi arpesh shuwish numun Iruhin ananibur namuburi wabur Jerusalem douk ta bukutukuk iruhw heven bubuhi iri (Revelesen 21:2).

ipak pakri, “Apak manabuk sabaibori utabor bani sabaishi eshudok eneshenesh. Apak madae yaruhish um enesh eshudok eneshenesh uwe.” Aria ipak pape yowep abom. Aria arpesht ta shutrip aria shenek gihaumep. Eik yatrip um, ipak douk kabi yaruhish um eneshenesh yopishi eshudok iri um. Ipak kabi douk nabes seshukeshi arpesht um. Ipak kabi douk rupeh wokep aria pagor pape um. Aria ipak douk madae pudukemesh uwe. <sup>18</sup> Douk namudok aria eik yakri ikripep enyudok baraen. Eikir gol douk debeihi nyih hanur aria henekar ratogur yopur abom. Douk namudok aria ipak putor arudok gol um, ipak ta putogur debeipari kabi shogrem sabaibori utabor iri um. Aria punator shigorihwihi rupeh aria pihur um punoshigar ipakiruh yegeshiweruh um arpesht mare shutrip pugor pupe aria abraen nyupeyep, uwok. Aria shopunek, ipak putor marasin aria punayok nabes um ipak wata putrugun wosik. <sup>19</sup> Eshudok arpesht douk eik urkum manawashamesh iri, eik ta ihesh um inekesh shutogur yopishi arpesht abom. Douk namudok aria ipak urkwip ta purum ipakih aih aria pukeshuk agabus yoweishi inahos aria pukon aparuh Iruhin abom. <sup>20</sup> Ipak punnek! Eik yeyotu wit aria yape yarigep. Aria meinyi arpen douk nyumneke aria nyijikume wit iri, eik ta iwish ini enyen upe numun. Aria ohwak ta upe uwok worigun atugun.

<sup>21</sup> Aria eshudok douk shiyotu dodogowish atish shunek wanohw shubo yoweishi inahos shubuhuk iri, eik ta ikesh debeinyi nyeigur um shupe debeishi aria shuni eik mupe eikin debeinyi wagitur. Kabi douk seiwok eik yeyotu dodogoiwe yenek wanohw yabo yoweishi inahos shabuhuk aria douk yape debeiweiri yani eikin Yain wape ananin debeinyi wagitur um. <sup>22</sup> Aria douk ipak arigos sapenyep iri um ta punnek enyudok baraen Iruhin ananin Mishin nyakrip ananish arpesht enyi aria pusuwen dodog pugipeshen! ”

## 4

### *Shenek Lotu Um Iruhin Gani Iruhw Heven*

<sup>1</sup> Douk enyudok nyanakuk aria eik yatik anat wit tanajik tape iruhw heven. Aria yemnek anah mah. Aria enyudok arpen nyeyagwreh debeg kabi shahapur oruhw-umori douk iganigadae yemneken nyeyagwrehi iri nyakripe nyakri, “Nyak nyutowi agundok iruhw aria iyabigen eshudok eneshenesh douk ta shutogur iri.” <sup>2</sup> Aria ahudok atuh Iruhin ananin Mishin nyatogrume dodogowin atin aria yatigu enen debeinyi wagitur douk king-omi atum hapenyen iri nyakus iruhw heven. Aria anan arman nape enyudok wagitur. <sup>3</sup> Anan natrugun kabi anam yopumi abom utom nyeigurim um jasper iri um mani kupaimi owishiborimi nyeigurim um konilian iri batrugun um. Aria enen renbo nyakus aria enyenyir yamuger rakih rananug enyudok debeinyi wagitur. Enyudok renbo douk yopin abom kabi anam yopumi grinporeim utom nyeigurim um emeral iri um. <sup>4</sup> Aria 24-poreish debeishi wagturahos shopunek shakus sherssharih um enyudok debeinyi wagitur. Aria anam debeimi armam 24-poreim hatem eshudok wagturahos. Amam hore shigorihwihi rupeh aria howem yopugwi hatog shenekog gol iri douk king-omi atum hogwem iri. <sup>5</sup> Aria utag bogaragi gani enyudok debeinyi wagitur nyakus um aria utag brereyarog geyagwreh debeg. Aria hurukatin um enyudok debeinyi wagitur 7-poreish ourehish douk hanish atish iri shakus. Eshudok ourehish douk shakri wobuwobren baraen um Iruhin ananish 7-poreish yopishi mishish.4:5 <sup>6</sup> Aria hurukatin um enyudok debeinyi wagitur, enen enyudok kabi douk debeigwi youg um nyakus. Enyen nyatrugun abom nyape kabi wenyir um. Aria eshudok 4-poreish dodogowishi eshudok douk mishish shoresh iri shape orokohun aria shape sherssharih um enyudok debeinyi wagitur. Aria sabaisi nabes sape yamagossish um shani aparuhish um shani agabusish um. <sup>7</sup> Aria nyarik iri dodogowinyi douk mishin nyoren iri douk nyape

4:5 4:5 Putik futnot nyape Revelesen 1:4 iri.

kabi enen debeinyi wanohwinyi mahin nyeigurinum laion iri. Aria nyagiguk iri nyape kabi enen abonin bulmakau um. Aria binyatin iri enyenyig yamag gape kabi arpenyig yamag um. Aria nubatin-enyi nyape kabi anan debeini kumun nehuru nanak iruhw iri um. <sup>8</sup> Aria eshudok nubatish, eshesh atin atin douk anawipish kapraigiyohos shapenyesh. Aria numuniruh um hani adukiruh um esheshiruh yegeshiweruh ihiruhmorim douk shukniruh abom um nabes atus. Aria nyumneh weibus eshesh shapeum shakri,

“Debeini Iruhin douk dodogowini abom. Anan douk yopuni abom, anan douk yopuni abom,

anan douk yopuni abom.

Seiwok nape, aria douk shopunek nape, aria kweipon shopunek ta nunaki.”

Eshesh madae shupe um shurao uhwin atin um shakri enyudok baraen um uwe. <sup>9-11</sup> Eshesh shape shatuk Iruhin douk nape enyudok debeinyi wagitur iri ananin nyeigur nyato iruhw. Anan douk nape ihih nyumneh iri. Eshesh shanadudareh-uman shenek tenkyuman shakri anan yopuni. Aria abudok nyutob eshudok nubatish dodogowishi douk mishish shoreshi shenekesh namudok um, amudok 24-poreim debeimi habuh hoduk ohrubus hurukatin um Iruhin douk nape wosik abom ihih nyumneh iri douk nape enyudok debeinyi wagitur iri aria hape henek lotuman. Amam honik amamig yopugwi hatog douk king-omi atum hogwem iri hawashog hurukatin um enyudok debeinyi wagitur aria hakri, “Apakin debeini Iruhin, nyak douk dodogowinyi yopunyi abom.

Aria ihishmorim arpesh ta shutuk nyakin atin nyeigur nyuto iruhw.

Um maresh? Nyak nyagipesh nyakim atum urkum

aria nyenek ihishmorim eneshenesh eshudok shatogur shape aria nyorukesh yapis.

Eshesh douk nyakim urkum atum morumesh nyakriyesh

aria eshesh shatogur shape.”

## 5

### *Jon Natik Onok Buk Douk Shaweshigok Iri*

<sup>1</sup> Aria eik Jon yatik anudok arman douk natem enyudok debeinyi wagitur iri nasuhw onok buk ananin yopunyi rogur. Okwudok buk okwok douk kabi anap roupi shup um. Okwok douk shadareshok aria showeshigok. Aria baraen shenyem nyape numunik um kwani aduk shopunek. Aria showeshigok 7-poreih shakwu kendelis gris. <sup>2</sup> Aria eik yatik enen dodogowinyi ensel nyape nyeyagwreh debeg nyakri, “Meinyi arpen douk yopin abom aria wosik um nyubahiguk asudok kendelis gris douk showeshik okwudok buk um aria nyukweshihok?” <sup>3</sup> Aria madae shutik enen atin arpen nyape iruhw heven iri o agundok atap iri o shakamum agundok atap iri douk ta wosik um nyukweshih okwudok buk aria nyutik numunik um iri. <sup>4</sup> Aria douk yatik um madae shuparug enen arpen uwe douk wosik um nyukweshih okwudok buk aria nyutik numunik um iri. Douk namudok aria eik yereh debeg. <sup>5</sup> Aria anan um amudok 24-poreim debeimi nanaki nakripe nakri, “Kwamnek! Nyak mare nyureh! Anan arman um apudok awirop nyeigurip um Juda iri douk nakitak Devit ananip awirop iri douk dodogowin kabi enen wanohwinyi mahin nyeigurinyum laion iri. Anan douk neyotu dodogowin atun nenek wanohw nabo yoweishi inahos shani ihishmorim ananish horim shabuhuk. Douk namudok aria anan douk dodogowin aria wosik um nubahiguk asudok 7-poreis kendelis gris douk showeshik okwudok buk um aria nukweshihok.”

### *Jon Natik Enen Nugaen Sipsip*

<sup>6</sup> Aria yatigu enen Nugaen Sipsip nyeyotu hurukatin um enyudok debeinyi wagitur. Aria eshudok nubatish dodogowishi douk mishish shoresh iri shani amudok 24-poreim debeimi sheyotu shersharieh enyudok Nugaen Sipsip. Enyen nyubrug gwapenyen kabi shaen nyagok iri um. Enyen 7-poreiruh

shuwaruh hakih enyenyig barag aria 7-poreis nabes sapenyen. Asudok nabes douk sakri wobuwobren baraen um Iruhin ananish 7-poreish mishish<sup>5:6</sup>douk anan neshopokesh shanak ihigunmorim um agundok atap iri. <sup>7</sup> Aria enyudok Nugaen Sipsip nyanaki nyatron okwudok buk anudok douk nasuok yopunyi rogur aria nape debeinyi wagitur iri. <sup>8</sup> Douk enyen nyatronok aria eshudok nubatish dodogowishi douk mishish shoresh iri shani amudok 24-poreim debeimi shabuh shaduk ohrubus shakus hurukatin um Nugaen Sipsip aria shenek lotumen. Aria ihm-morim amudok debeimi hasuhw sisigish atish enesh eshudok kabi gitahas um shani anas dis douk shenekas gol iri. Asudok dis douk shuknis um enyudok paura douk enyenyigus nyugus seisik wosik iri. Enyudok paura douk nyakri wobuwobren baraen um beten douk Iruhin ananish arpes shape shenekan iri. <sup>9</sup> Aria eshesh shape sheyarub onohw namuhwi awehw shakri,

“Nyak douk yopuni abom aria wosik um nyutrun okwudok buk  
aria nyukweshih ihismorim kendelis gris  
douk showeshigok um.

Um maresh? Eshesh shaen nyagok  
aria nyakibor owishibor batourak bator  
ihismorim awirosish arpes  
aria bakweshihesh shape Iruhin ananish  
atish.

Eshesh douk shape ihismorim sisigis de-  
beisi awiros  
aria sheneyagwreh sabainyi kupainyi  
baraen iri.

Eshesh douk sabairuhi sisigiruh  
yegeshiweruh-ish arpes douk  
shape ihirubmorim debeirubi  
warub nahobigos

abudok amnab agundok atap iri.

<sup>10</sup> Nyak douk nyenekam hatogur pris  
douk hape henek ofa um  
eneshenesh eshudok hako apakin Debeini  
Iruhin iri.

Aria anan ta nupe Debeini nusuhw  
merikw-umesh  
aria kweipon eshesh ta shupe debeishi  
kabi douk debeimi king-omi

aria shusuhw merik um ihishmorim  
arpesh shape agundok atap iri.”

*Eshesh Shatuk Nugaen Sipsip Enyenyin  
Nyeigur Nyato Iruhw*

<sup>11</sup> Aria wata shopunek yatrugunugu  
aria yemneku eshudok sabaishi Iruhin  
ananish enselahos esheshih meh.  
Shadarehesh um douk shatogur sabaishi  
abom. Sabaibi tausenab bani sabaibi mil-  
lionab. Eshudok sabaishi enselahos shey-  
otu shersharh enyudok debeinyi wagitur  
nyani eshudok nubatish dodogowishi  
douk mishish shoresh iri shani amudok  
24-poreim debeimi armam. <sup>12</sup> Aria  
eshudok enselahos sheyarub debeg  
shakri,

“Enyudok Nugaen Sipsip douk seiwok  
shaen nyagok iri douk yopunyi  
abom.

Douk namudok aria enyen douk wosik  
um nyirao debeinyi nyeigur  
nyuni utabor buni eneshenesh yopishi  
eshudok  
shuni debeinyi dodog.

Aria shopunek enyen douk wosik um  
nyurao yopinyi saki  
aria wosik um apak mutuk enyenyin atin  
nyeigur nyuto iruhw.

Aria enyen douk wosik um apak  
munadudareh-umen abom aria  
mutuk enyenyin atin nyeigur nyuto  
iruhw  
aria munek lotumen.”

<sup>13</sup> Aria eik yemnek ihishmorim eshudok  
douk Iruhin nenekesh shape iruhw atap  
iri shani eshudok douk shape shakam  
agundok atap iri shani ihishmorim shape  
shakam debeigwi youg iri shape sheyarub  
onohw awehw shakri,

“Apak makri ihishmorim eneshenesh es-  
hudok shunadudareh um  
anudok nape debeinyi wagitur iri nini  
Nugaen Sipsip.

Aria shutuk esheshish nyeiguhw shuto  
iruhw  
aria shunek lotumesh ihih nyumneh.

Aria makri ihinyumorim debeinyi dodog  
nyuni agundok natrugun aria nape  
dodogowini um shupe um  
eshesh biyesh ihih nyumneh!”

<sup>5:6</sup> <sup>5:6</sup> Putik futnot nyape Revelesen 1:4 iri.

<sup>14</sup> Aria eshudok nubatish dodogowishi douk mishish shoresh iri shakri, “Adur atin!” Aria amudok 24-poreim debeimi armam habuh hoduk ohrubus atap aria henek lotu um Iruhin nani Nugaen Sipsip.

## 6

### *Nugaen Sipsip Nyabrig Kendelis Gris Soweshik Buk Iri*

<sup>1</sup> Aria yatigu Nugaen Sipsip nyohur okwudok buk douk shadareshok showeshigok 7-poreis kendelis gris iri nyasuok aria nyabahiguk sarig iri kendelis gris. Aria eik yemnek enen sago-matin um eshudok nubatish dodogowishi douk mishish shoresh iri nyeyagwreh. Aria enyenyih mah heyagwreh um kabi douk utag pogarog um. Aria enyen nyakri, “Nyak yowi.” <sup>2</sup> Aria yatigu enen shigorihwinyi hos nyanaki. Aria anudok arman natem enyudok hos iri nasuhw enen kein. Aria shopunek, shakon anat yoputi hat douk eshudok arpeshe douk shenek uhwinyum wanohw iri shogur iri. Aria abudok nyutob anan natem hos nanak kabi anan nenek uhwinyum wanogwiruh aria nakri nunek onohw shopunek wanohw nunek uhwinyumoh iri. <sup>3</sup> Aria Nugaen Sipsip nyabahiguk sagiguk iri kendelis gris aria eik yemnek enyudok nyagiguk iri dodogowinyi douk mishin nyoren iri nyakri, “Nyak yowi!” <sup>4</sup> Aria yatigu enen owishiborinyi nyatrugun iri hos nyanaki. Aria anudok arman natem enyudok hos iri narao dodog um nuhur shape agundok atap iri arpeshe esheshiruh aparuh um shurpak aria shubo kupaishi shugok. Aria shakon anat debeiti bainat.

<sup>5</sup> Aria Nugaen Sipsip nyabahiguk binyatinyis kendelis gris aria eik yemnek binyatin-in enyudok dodogowinyi douk mishin nyoren iri nyakri, “Nyak yowi!” Aria eik yatrugunugu aria yatigu enen behrabinyi hos nyanaki. Aria anudok arman natem enyudok hos iri nasuhw enen skel douk shape shenek skelum eshudok eneshenesh um ananis wis. <sup>6</sup> Aria yemnek enen enyudok kabi douk enen arpen enyenyih mah um. Enyen nyeyagwrehi agundok eshudok nubatish dodogowishi

douk mishish shoresh iri shapemori. Aria enyudok nyeyagwrehi iri nyakri, “Nyak nyunak nyunek nyakin mour aria arpeshe ta shugok um nyurub. Wit iri bali ta karowish atish aria ta shutoumesh um debeibori utabor. Douk namudok aria shunek mour atuh nyumnah shurabor iri utabor ta wosik um shutor atop shokupi marup um wit, o bias atop shokusi marus um bali kabi douk rais um. Aria agusudok rowos douk shape shenek welagos iri sani agosudok douk shadi wainip shuruwep-agosi nyak mare nyununugos!”

<sup>7</sup> Aria Nugaen Sipsip nyubahiguk nubatis kendelis gris soweshik okwudok buk iri. Aria eik yemnek nyagiguk iri nubatin dodogowinyi enyudok mishin nyoren iri nyakri, “Nyak yowi!” <sup>8</sup> Aria eik yatigu enen akitohinyi hos nyanaki. Aria anudok natemori enyudok hos iri ananin nyeigur douk nanahwar Gok. Aria anudok anan douk debeini nasuhw merik um abrudok wabur douk shagok iri shapenyaburi nagimani. Aria arpeshe shape agundok atap iri shenesiyao um nubatis awiros. Aria amam harao dodog um hubo anap awiropish eshudok arpeshe shugok. Enesh hakwumesh bainatog haesh shagok, aria enesh shagok um nyurub. Aria enesh yoweih arugeh haesh aria shagok, aria enesh wanohwishi wanarish mahish shaesh shagok. <sup>9</sup> Aria Nugaen Sipsip nyabahiguk anas wisish kendelis gris soweshik okwudok Buk iri. Aria eik yatigu eshudok arpeshe douk seiwok abom shasuhw Iruhin ananin baraen dodog shakripesh um agundok Jisas nataurumesh um aria kupaishi arpeshe shaesh shagok iri esheshish mishish. Eshesh shape shakam enyudok alta douk shape showem eshudok um shenek ofamesh shako Iruhin iri um. <sup>10</sup> Aria eshesh shahwar debeg shakri, “Dodogowini Debeini, nyak douk adurinyi yopunyi abom nyasuhw iruhw atap iri! Ta makwunih nyumneh hunak hudiguk aria nyak kadak nyunekumesh kwotog agundok atapishi arpeshe um nyuwanamesh yoweishi inahos um agundok shabo apak magok um?”

<sup>11</sup> Aria Iruhin nekesh rouhi shigori-

hwihi rupeh um atin atin eshudok arpeshish mishish aria nakripesh namudok nakri, “Ipak pupe pishukabar banab nyutob shopunek um arigaha shubo ipakish ashukenyish owashish douk shani ipak panuboum penek atin mour iri shugok kabi douk shabo ipak pagok um ba iyoh. Douk eshesh shesh shugok arigaha shunak shutogurum enyudok namba eik yakriyen iri aria eik ta kadak iwanom-umep ereb.”

<sup>12</sup> Aria yatigu Nugaen Sipsip nyabahiguk anawipis kendelis gris douk soweshik okwudok buk iri aria debeikwi enyik kwatuk agundok atap. Aria nyumnahin aun natogur behrabin kabi anah yoweih behrabihi rupah um. Aria wabin aun natogur owishiborin kabi owishibor um. <sup>13</sup> Aria unib wape iruhw utag iri wanatuk wagruki atap kabi enep watakipi fikip shuruwep douk dodogowinyi uhwin nyasusuep tutukarep pagruk-umori um. <sup>14</sup> Aria iruhw utag ganak gawishuk kabi shadaresh anap jarukwip um. Aria ihiruhmorim yodururuh hani unaihos shanak abom shapeik kupaigunum.

<sup>15</sup> Aria amudok hape king um agundok atap iri hani anam debeimi nyeiguhw shatoumami, hani amudok debeimi hasuhw merik um ami iri, hani eshudok douk shanagrem sabaibori utabor bani jah iri, shani eshudok dodogowishi arpesh, shani ihishmorim arpesh douk shape shakamum kupaishi shenekumesh mour meyo iri, shani eshudok douk shape wosik iri, eshesh ihishmorim shanak shawish shanabeshuk shape hurupiruh hani debeiworu burbudugiyu douk watao yodururuh iri. <sup>16</sup> Aria eshesh shahwar yodururuh hani debeibori utabor shakri, “Ipak pubuh pishapomakup um anudok nape debeinyi wagitur iri um mare nutrup. Aria shopunek um pubeshukapagak um Nugaen Sipsip juwehosin um mare nyunekumap kwotog aria nyunekap muraao debeiri eriger. <sup>17</sup> Um maresh? Ahudok debeih nyumnah um anudok nape debeinyi wagitur iri nini Nugaen Sipsip amam juwehosim um huwanamesh eneshenesh yoweishi

inahos eshesh shape shenekesh iri um douk hatogur. Douk namudok aria omi ta dodogowin um nyunek uhwinyumam? Adur atin ta uwok.”

## 7

### *Sabaishi Israel 144,000-Poreish Sharao Iruhin Ananin Kak*

<sup>1</sup> Douk enyudok nyanakuk aria eik yatrugunugu aria yatigu nubatish enshalahos sheyotu anagas um nubatin kona um agundok atap um agudok nahobig. Aria eshesh shasuhuk uhwin douk nyahur nubatin kona iri um mare nyahur agundok atap o nyahur youg o nyahur nyususuhw enen rowog. <sup>2</sup> Aria wata yatigu kupainyi ensel nyatowi nyanaki iruhw gani aun nakihumori. Enyen nyasuhwi enen enyudok douk Iruhin nape abom ihih nyumneh iri ananin kak nyapeyenyi. Aria nyahwadesh debeg eshudok nubatish enshalahos douk Iruhin nekesh dodog um shununu agundok atap nini youg iri. <sup>3</sup> Enyen nyakri, “Ipak mare arigas pununu agundok atap nini youg iri rowos, watak. Apak makri muwemumesh Iruhin ananin kak nyupe yomogos um eshudok arpesh douk shenek apakin Iruhin ananin mour iri ba iyoh aria ipak kadak pununu eshudok eneshenesh.”

<sup>4</sup> Aria eik yemnek um shadareh eshudok arpesh douk sharao Iruhin ananin kak iri. Eshesh shadarehesh shanak shatogur sabaishi um 144,000-poreish. Eshudok sabaishi arpesh douk shanaki asudok ihishmorim 12-poreis debeisi awiros um eshesh Israel. <sup>5</sup> Apudok awirop shahwarop um Juda iri, sharao kak aria shatogur 12,000-poreish. Aria apudok anap awirop shahwarop um Ruben iri 12,000, aria apudok shahwarop um Gat iri 12,000. <sup>6</sup> Aria apudok shahwarop um Aser iri 12,000, aria apudok shahwarop um Naptali iri 12,000. Aria apudok shahwarop um Manase iri 12,000. <sup>7</sup> Aria apudok shahwarop um Simeon iri 12,000, aria apudok shahwarop um Livai iri 12,000. Aria apudok shahwarop um Isakar iri 12,000. <sup>8</sup> Aria apudok shahwarop um Sebulun iri 12,000, aria apudok shahwarop um Josep

iri 12,000. Aria apudok shahwarop um Benjamin iri 12,000. Asudok awirosish arpesh sharao Iruhin ananin kak.

*Sabaishi Arpesh Shenek Lotu Um Iruhin*

<sup>9</sup> Douk enyudok nyanakuk aria eik yatrugunugu aria yatigu sabaishi sisi-giruh yegeshiweruh-ish arpesh. Eshudok arpesh douk madae wosik um shudarehesh uwe, uwok. Eshesh douk ihismorim debeisi awirosish arpesh douk sheneyagwreh sabainyi kupainyi baraen iri. Eshesh douk shanaki ihigos-morim nahobigos douk sape agundok atap iri shantorum shape. Eshesh shore shigori-hwihi rupeh aria shasuhw palmenis shus esheshis wis aria sheyotu hurukatin um enyudok debeinyi wagitur nyani Nugaen Sipsip. <sup>10</sup> Aria eshesh shahwar debeg shakri,

“Apakin Iruhin douk nape debeinyi wagitur iri  
nani Nugaen Sipsip amam atum abom hanarap  
matanamori mape wosik.”

<sup>11</sup> Aria ihishmorim enselahos sheyotu sherssharih enyudok debeinyi wagitur nyani amudok 24-poreim debeimi hani eshudok nubatish dodogowishi douk mishish shoresh iri shabuh shaduk ohrubus hurukatinyum enyudok debeinyi wagitur aria shape shenek lotu um Iruhin. <sup>12</sup> Shakri,

“Adur atin! Apak manadudareh um apakin Iruhin

aria matuk ananin nyeigur nyato iruhw aria makri anan yopuyopuni.

Aria apak ta munek tenkyuman ihih nyumneh.

Aria debeinyi nyeigur nyuni yopipi urkwip

puni saki iri dodog ta shupe abom um anan atun ihih nyumneh. Adur atin!”

*Arudok Eriger Douk Eshudok Arpesh Shemnegor Iri Douk Ratur*

<sup>13</sup> Aria anan um amudok 24-poreim debeimi narige nakri, “Eshudok arpesh shor rouhi shigori-hwihi rupeh iri douk meishi? Eshesh shanaki meigunum iri?”

<sup>14</sup> Aria eik yakripan yakri, “Debeini, nyak kanak douk nyadukemesh, eik uwok.” Aria anan nakripe nakri, “Eshudok arpesh seiwok shape agundok atap aria eshudok douk shakanuk agabus Iruhin iri shenekesh shemnek debeiri eriger. Aria eshesh shakwrup esheshih rupeh Nugaen Sipsip enyenyibor owishibor aria hatogur shigori-hwihi. <sup>15</sup> Douk namudok aria eshesh douk sheyotu hurukatin um Iruhin ananin yopunyi wagitur. Aria nyumneh weibus eshesh shape shenek ananin mour numun ananit debeiti urupat. Aria anudok douk nape enyudok wagitur iri ta nini eshesh nupe aria nutaaurumesh. <sup>16</sup> Aria nyurub ta mare wata besh atin aria abar shopunek ta mare besh atin, uwok. Aria debeihi wah shopunek ta mare wata hutao hesh shumnek debeiri eriger, uwok. <sup>17</sup> Um maresh? Nugaen Sipsip douk nyeyotu orokohun hurukatin um debeinyi wagitur iri ta nyupe nyutaaurumesh wosik kabi anudok nataurum sipsip wosik iri um. Aria enyen ta nyuraesh shunak shuwok abrudok abar douk ta shubaroh aria bunekesh shupe wosik abom ihih nyumneh iri. Ababar douk bakih atap meyoh bor iri. Aria Iruhin ta nubatikumesh ihihmorim abih aria eshesh ta mare wata shureh atin, uwok.”

## 8

*Nugaen Sipsip Nyabahigeshuk Namba 7 Kendelis Gris Soweshik Buk Iri*

<sup>1</sup> Douk Nugaen Sipsip nyabahigeshuk namba 7 kendelis gris douk soweshik okwudok buk shadareshok iri gani iruhw heven. Aria madae enesh eshudok shiyagwreh o shubirak uwe, uwok. Ihishmorim eshudok shape mukareg banab nyutob hurukatin um tukwanin aua.

<sup>2</sup> Aria yatigu eshudok 7-poreish enselahos douk sheyotuwu hurukatin um Iruhin iri sharao 7-poreiruh aruruh.

<sup>3</sup> Aria kupainyi ensel nyasuhw anas dis douk shenekas gol iri um shure paura douk shashainyeh nyenek nyugus seisik wosik iri um. Enyen nyasuhw asudok dis aria nyanaki nyeyotu hurukatin um alta douk showem eshudok shenek ofamesh shako Iruhin iri um. Aria sheken sabainyi



paura um nyinyanuh um ihishmorim Iruhin ananish arpeshe esheshin beten douk shape shenekan iri. Aria nyeshem enyudok alta douk shenekan iri nyatao hurukatin um debeinyi wagitur iri aria nyenek ofamesh um Iruhin. <sup>4</sup> Aria nyih hanu enyudok paura douk enyudok ensel nyasuwen enyenyis wis iri aria nyugus sani Iruhin ananish arpeshe esheshin beten shakitak shato um agundok Iruhin napeum. <sup>5</sup> Aria enyudok ensel nyasuhw asudok dis enyudok paura nyor um aria nyanak hurukatin um enyudok alta aria nyonik nyih nyehur dis shukunis aria nyawasheh hagruki agundok atap. Douk enyen nyawasheh hagruki aria utag brereyarog gatrugun abom aria geyagwreh debeg aria debeikwi enyik kwatuk.

#### *Nubatish Enselahos Shahapurish Aruruh*

<sup>6</sup> Aria eshudok 7-poreish enselahos shasuhw 7-poreiruh aruruh iri shenek redi um shahapururuh. <sup>7</sup> Aria nyarik iri ensel nyahapurish enyenyihw oruhw aria shigorihwisi ais douk dodogowis kabi utabor-umori sani nyih douk shenenek um owishibor iri shagruki agundok atap. Aria shasiya agundok atap nani rowos um biwotuk outumeb. Aria ehudok nyih hanu onok outuk aria hanu ihigos-morim rowos iri wishap heyateshuk. Aria bio outumeb wapeik, nyih madae hunu uwe.

<sup>8</sup> Aria nyagiguk iri ensel nyahapurish enyenyihw oruhw aria shawashak enen enyudok kabi douk onohw debeihwi nyih hanuhw iri yoduhw hwagrुकuk youg. Aria shasiyauk youg um biwotuk outumeb aria onok outuk youg gwanenem um owishibor. <sup>9</sup> Aria shasiya ihishmorim eshudok eneshenesh shape youg iri um bibatun lainab aria anan lain shagok shatuh. Aria shopunek, shasiya ihiyumorim kruruhiyor douk wor youg iri um bibatun lainab aria anan lain yoweu abom gririgaro watuh.

<sup>10</sup> Aria binyatin iri ensel nyahapurish enyenyihw oruhw aria onok takweikwi unuk douk hanuk nyih jorarehok kabi hanu arkirub um aria kwakutukuk iruhw aria kwanatuk kwagruki agundok atap.

Aria shadareh ihibusmorim worubus um bibatun lainab aria okwudok unuk kwagrुकuk kwabo anan lain um worubus sani ihibarmorim abar douk bakih atap meyoh iri. <sup>11</sup> Aria anan lain senenem um nubutibari abar. Aria sabaishi arpeshe shawok abrudok abar aria baesh shagok shatuh. Nyeigurik um okwudok unuk douk Nubutini Marasin.

<sup>12</sup> Aria nubatin iri ensel nyahapurish enyenyihw oruhw aria shasiya nyumnahin nani wabin aub bani ihiyumorim unib um biwotuk outumeb. Aria eshesh shanunu onok outuk um anudok nyumnahin aun nani onok outuk um wabin aun aria onok outuk um oudok unib aria shatogur arukwutigunish. Aria shatupak nyumnah um bibatin nyutob aria wab um bibatin. Douk namudok aria nyumnah biyab nyutob batrugun um aria anob nyutob arukwutigun. Aria wab shopunek namudok atin, biyab nyutob wanyukeh aria anob nyutob arukwutigun.

<sup>13</sup> Aria yatrugunugu aria yatigu anar debeiri armir kabi douk kumun um rehuru ranak iruhw. Aria yemnek um arar reyagwreh debeg rakri, "Gihaumesh arpeshe shape agundok atap iri. Um maresh? Hurukatin um eshudok bishatin enselahos ta shihapurish esheshiruh aruruh aria enenyenen amaen ta nyutogur um eshudok atapishi arpeshe aria ta nyunekesh shunamnek debeiri eriger."

## 9

#### *Anas Wisin Ensel Nyahapurish Enyenyihw Oruhw*

<sup>1</sup> Douk anas wisin ensel nyahapurish enyenyihw oruhw aria yatik onok unuk kwanatuki kwakutukuk iruhw kwagruki jurug agundok atap. Okwudok unuk douk shakok enyudok ki um agudok nuwag douk gagor gabuhuk gani atap aria atapig um madae gubuh giyotu anabik iri uwe.

<sup>2</sup> Aria abudok nyutob enyen nyejik agudok nuwag obi nyutob, sabaigwusi nyugwus sasih sato abom kabi douk debeihi nyih hanu um. Aria agwusudok nyugwus sato aria sasih seyawiyamuk nyumnahin aun aria aun nani iruhw shopunek arukwutigun abom. <sup>3</sup> Aria sabaishi eshudok kabi douk debeishi gormish um

iri shakutukuk ogwusudok nyugwus sharuki agundok atap. Eshesh douk sharao dodog aria wanohwish kabi douk pupiyak um. <sup>4</sup> Aria Iruhin nakripesh um eshesh mare shubo wishap puni eneshenesh douk shatogur agundok atap aria shuni rowos shugok, uwok. Eshesh ta shubo eshudok arpesh douk madae shurao Iruhin ananin kak nyupe esheshis domaesh iri uwe atish shunekesh shumnek debeiri eriger.

<sup>5</sup> Aria eshudok kabi douk gormish um iri shape shanatuk eshudok arpesh um anas wisib aub. Aria eshesh shape shemnek debeiri eriger kabi douk pupiyagwihiyar wanatukesh shemnek um. Aria eshesh madae shurao dodog um shubo eshudok arpesh shugok uwe, uwok. <sup>6</sup> Aria abudok nyutob eshesh ta shurim yeh um shugok um. Aria shopunek, eshesh ta shukri abom um shugok um atin aria ta uwok. Gok ta nyuruwok-umeshuk.

<sup>7</sup> Aria yatik eshudok gormish shape kabi douk hwsahos um shape shenek redi um shunak um wanohw. Esheshigos baragos douk enesh eshudok kabi douk yopugwi hatog shenekog gol iri gwatem um aria esheshigos yamagos sape kabi arpeshigos um. <sup>8</sup> Aria esheshigos baragos sape kabi armago-wigos um. Aria esheshiruh naruh hape kabi enen debeinyi wanohwinyi mahin nyeigurin um laion iri enenyiruh hapeum. <sup>9</sup> Aria mishish um, eshesh shor onog siotog douk dodogowig kabi douk ainab um. Aria esheshish kapraigiyohos shenekoh iri mah douk kabi hwsahos shanuk sabaishi wilkarahos shahur shanak um wanohw iri shenekoh iri mah. <sup>10</sup> Aria esheshis honus sape kabi douk pupiyagwihiyar um aria sanatuk arpesh. Aria esheshin dodog douk nyape asudok honus um sunatuk eshudok arpesh um abudok anas wisib aub. <sup>11</sup> Aria eshesh douk enyudok ensel, douk nyasuhw merik um agudok nuwag douk gagor gabuh gani atap iri nyape debeinyi king um eshesh nyasuhw merikwumesh. Enyudok ensel enenyin nyeigur douk shahwaren eshesh Hibiru esheshin baraen um douk shakri, "Abadon." Aria eshesh Grik esheshin shakri, "Apollyon." Aria

apak ta mukri "Anudok arman douk nape nanunu ihish eneshenesh iri."

<sup>12</sup> Eneshenesh sagramatinyish eshudok douk shenek arpesh shemnek debeiri eriger iri douk shatogur shanak shatuh douk. Aria punnek, biyesh yoweishi abom kabi douk enyudok nyarik iri douk wata shape, aria eshesh ta shugiguk shatogur.

### *Anawipin Ensel Nyahapurish Enyenyihw Oruhw*

<sup>13</sup> Aria anawipin iri ensel nyahapurish enyenyihw oruhw aria eik yemnek anah mah. Enyudok arpen douk nyeyagwrehi gani anagas um nubatin kona um enyudok alta douk sheneken gol iri. Enyudok alta showem eshudok shenek ofa shako Iruhin um, enyen douk nyatao hurukatin um Iruhin napeum. <sup>14</sup> Aria enyudok nyeyagwrehi iri nyakrip enyudok anawipin ensel nyasuhw oruhw iri nyakri, "Nyak nyukweshih eshudok nubatish enselahos douk shonoweshik shape abudok debeibi worub nyeiguribum Yufretis iri shunak wosik!"

<sup>15</sup> Aria enyen nyakweshih-esh aria eshesh shasiya ihishmorim arpesh shape agundok atap iri um bisatup awiros. Aria eshesh shabo anap awirop um eshudok arpesh shagok. Eshudok enselahos eshesh douk Iruhin nenekesh shenek garibog abom shapeum abudok atub nyutob, ahudok atuh nyumnah, anudok atun aun aria enyudok atin kwar um eshesh shunek enyudok mour. <sup>16</sup> Aria eik yemnek shadareh amudok soldia douk hatem hwsahos aria hanak henek wanohw iri um douk sabaimi abom hatogur 200 milion.

<sup>17</sup> Aria eik kabi douk yabo yomnis um aria yatik amudok soldia hatem hwsahos iri hore siotog douk shenekog ainab iri um amamish mishish. Agwudok siotog onog douk owishiborig kabi douk nyih hanu um. Aria onog behrabig, aria onog akitohig kabi douk amudok utom nyeigurim um salfa iri. Aria hwsahos esheshigos baragos sape kabi enesh debeishi wanohwishi mahish nyeigurish um laion iri esheshigos um. Aria nyugwus sani nyih douk hanuwi amudok akitohimi

utom nyeigurim um salfa iri shatograri eshudok hwasahos esheshig nokwatog. <sup>18</sup> Aria eshesh shasiya ihishmorim arpesh um bisatin awiros aria eshesh shabo anap awiropish arpesh shagok. Eshesh douk eshudok bishatin yoweishi abom eshudok, nyih, nyugwus aria ehudok juwehosihi nyih douk hanuwi amudok utom salfa iri douk shatograri hwasahos esheshig nokwatog iri shaesh shagok. <sup>19</sup> Eshudok hwasahos esheshin dodog douk nyape esheshig nokwatog gwani honus. Esheshis honus douk sape kabi yuguhw um, aria baragos sapenyesh. Aria eshesh shakwu esheshis honus um shabo arpesh shenekesh sharao debeiri eriger.

<sup>20</sup> Aria ihishmorim shapeik iri arpesh douk madae shugok abudok nyutob eshudok yoweishi shatogrimesh abom um obi nyutob, eshesh madae shukutukuk yoweishi inahos uwe, uwok. Eshesh madae shukehuk agabus ehudok aih um shape shenek lotu um sagabehos shani amudok madae adurimi god omi um uwe, uwok. Amudok god omi douk eshesh kanak shenekam esheshis wis iri. Eshesh shenekam shakwu gol rani siliwa iri akitohinyi kapa douk shahwaren um bras iri nyani utabor bani rowos iri. Amam douk madae hutrugun o humnek o hurahaen iri uwe. <sup>21</sup> Aria shopunek, eshesh madae shukehuk agabus ehudok yoweih aih um shabo kupaishi shakwumesh eshudok eneshenesh aria shaesh shagok um uwe, shani ehudok um shenek ouruh um, shani enyudok um shenek enenyenen um subagwiruh um, nyani enyudok um shape shenek wehrur um, nyani enyudok um shakwuaruh um uwe, uwok. Eshesh madae shukutinyukuk aria shatanam shukon aparuh Iruhin uwe.

## 10

### *Ensel Nyakon Buk Jon Nakwoh*

<sup>1</sup> Enyudok nyanak nyatuhuk aria eik yatigu enen kupainyi dodogowinyi ensel nyakutukuk iruhw heven nyabuhi. Orug gweyor-gwarih enyenyihw yegenyihw. Aria enen renbo nyato iruhw aria enyenyir yamuger rakah rananug, ratem

iruhw enyenyig barag. Aria enyenyig yamag gatrugun kabi douk wah hatao hatrugunuk um. Aria enyenyigas aiyas sape kabi douk nyih hanu jurareh iri um. <sup>2</sup> Aria enyen nyasuhw onok shokukwi buk douk shadareshok iri enyenyis wis. Okwudok buk douk kwanejik kwape aria enyen nyasuhwok. Enyenyig yopugi aiyag nyagur gor youg, aria anag nyeshishuk amnab. <sup>3</sup> Aria enyen nyogao aria nyahwar debeg kabi enen debeinyi wanohwinyi mahin nyeigurinyum laion iri nyahwar um. Enyen nyahwar jurug aria utag pogarog 7-poreih. Aria utag geyagwreh kabi douk arpenyih mah um. <sup>4</sup> Douk utag geyagwreh 7-poreih jurug, aria eik yenek redi um yakri iwem enyudok baraeen um anap shup. Aria eik yemnek anah mah hanaki iruhw heven. Aria enyudok nyeyagwrehi iri nyakri, “Enyudok baraeen douk utag geyagwreh 7-poreih gakriyen iri, nyak mare nyunyem, uwok. Enyudok baraeen nyumneken nyupe um nyak atin!” <sup>5</sup> Aria enyudok ensel douk yatrin nyeyotu youg gwani amnab iri nyatuk enyenyin yopunyi rogur nyato iruhw. <sup>6</sup> Aria enyen nyakri iruhw um anudok douk nape ihih nyumneh iri ananin nyeigur. Anan douk nenek iruhw atap nani ihishmorim eneshenesh eshudok douk shape iruhw atap iri. Aria shopunek, nenek youg gwani eneshenesh shape shakam-igum iri.

Aria enyen nyakri, “Nyutob batuh, aria Iruhin ta mare nukri nusuhwesh nupe, uwok.” <sup>7</sup> Aria enyudok ensel wata shopunek nyakri, “Abudok nyutob douk namba 7 ensel nyahapurish enyenyihw oruhw obi nyutob, eshudok douk seiwok Iruhin nabeshukesh iri ta shunowereh nunekesh shutogur yopugunum. Anan ta nunekesh shutogur yopugunum kabi douk seiwok anan nakripuk amam profet douk henek ananin mour iri um.”

<sup>8</sup> Aria eik wata yemnek ahudok atuh mah. Aria enyudok arpen douk iganigadae yemneken nyeyagwreh iruhw heven iri wata shopunek nyakripe nyakri, “Nyak nyunak nyutrin okwudok buk douk kwanajik kwor enyudok ensel douk nyeshish youg gwani amnab iri enyenyis

wis iri.”

<sup>9</sup> Aria eik yanak yarigen um nyuke apudok shokwupi shup shadareshap iri. Aria enyen nyakripe nyakri, “Nyak suwap aria nyupoh. Nyupoh pur nokwat um, apap ta ekehip kabi douk araruh um. Aria pabuh pur apahw um ta nyumnek nubut.” <sup>10</sup> Aria eik yatrinyap aria yapoh. Aria yapoh por nokwat um, eik yemnek ekehip kabi douk araruh um. Aria yapoh pabuh por apahw um, apap wata nubutip. <sup>11</sup> Aria yemnek enen arpen nyakripe nyakri, “Nyak ta nyukripesh enyudok baraen Iruhin nakripen-enyi shopunek. Enyudok baraen douk nyakrium eshudok douk ta kweipon shutogurum sabaishi arpesh douk shape ihigosmorim nahobigos douk sape agundok atap iri. Eshesh shuni sabaishi sisigiruh yegeshiweruhish arpesh shuni sabaishi sheneyagwreh kupainyi baraen iri, shuni sabaimi kingomi.”

## 11

### *Biom Armam Hakripesh Yopinyi Baraen Iri*

<sup>1</sup> Aria enyudok ensel nyeke enen rowog douk shape shasuhw wigah um eshudok eneshenesh iri aria nyakripe nyakri, “Nyak kakitak suh wigah um Iruhin ananit urupat<sup>11:1</sup>tuni alta douk showem um eshudok shenek ofamesh shako Iruhin iri um. Aria shopunek, nyudareh ihishmorim arpesh douk shape shenek lotu numun ananit urupat iri. <sup>2</sup> Aria arbudok narub douk bapeik adukehahitam agundok wit um atudok urupat iri nyak mare nyususuhw wigahumat, uwok. Um maresh? Arbudok narub Iruhin nako eshudok arpesh douk madae shudukem Iruhin iri uwe. Aria eshesh ta shushish Iruhin ananibur yopuburi wabur Jerusalem shupeum um 42-poreib aub. Abudok 42-poreib aub douk shopunek atin um bishatin shuknish aria enen tukwanin kwarahos. <sup>3</sup> Aria eik Iruhin ta ishopok eikim biom armam inekam dodogowim atum hunak hukripesh eikin

yopinyi baraen. Amam ta hur yoweihirupeh kabi douk yoweigosi begos<sup>11:3</sup>um. Eik ta ikripam eikin baraen aria amam ta hunak hukripeshen 1,260-poreih nyumneh. Ehudok 1,260-poreih nyumneh douk shopunek atin um bishatin shuknish aria enen tukwanin kwarahos.” <sup>4</sup> Amudok biom armam amam douk shakri wobuwobren baraen um eshudok biyesh rowos nyeiguhwish um oliv iri shani biyesh eshudok douk showem lamhos shetem um douk shakus hurukatin um Debeini douk nasuhw ihibmorim amnab iri. <sup>5</sup> Aria ta enesh arpesh shukri shom o shuham um, nyih ta hutograri amamig nokwatog aria hunu amamish horim hiyatesh. Douk namudok aria meishi arpesh shukri shom o shunekam mumam iri, eshesh ta mare shuruwok, uwok. Eshesh shopunek ta ehudok nyih hunish aria shugok shutuh. <sup>6</sup> Amudok biom douk harao big aria dodog um hunek eshah mare hurauri abudok nyutob amam hukripesh Iruhin ananin baraen obi nyutob um. Aria shopunek, amam douk dodogowim um hunek ihibarmorim abar douk bakih atap meyoh iri buni bor worubus sani youg iri um bunenek um owishibor. Aria amam douk dodogowim um hunek eneshenesh yoweishi abom eshudok shutogurum ihishmorim arpesh shunekesh shurao debeiri eriger. Aria douk meibi nyutob amam hukri hunekesh namudok um, amam ta hugipesh amamip atip urkwip.

<sup>7</sup> Douk kweipon amam ta hukripesh Iruhin ananin baraen hiyaten aria enyudok debeinyi wanohwinyi mahin ta nyukutukuk agudok nuwag douk gagor gabuhuk gani atap iri nyutowi. Enyen ta nyutowi aria nyuto iruhw nyuni amudok biom armam shurpak aria enyen ta dodogowin atin nyom hugok. <sup>8</sup> Aria amam ta hucusuk abrudok debeiburi wabur ababih debeihi yah douk seiwok shabo amamin Debeini showeshikan shanaur neir rowog kruse nagok aburi. Abrudok wabur ababish biyesh wobresh nyeiguhw douk Sodom iri Isip. <sup>9</sup> Aria

**11:1** **11:1** Atudok Iruhin ananit urupat douk takri um Iruhin ananish arpesh. **11:3** **11:3** Amudok biom profet hagipesh esheshih aih hore yoweigosi begos sanahwaram um rupeh um huyabigesh um amam hakri uwok abom um eneshenesh yoweishi inahos eshesh shenekesh iri aria hape hereh.

bihotih shuknih anah tukwanih nyumneh, sabaishi arpesh shanaki ihismorim awiros douk shape ihigos-morim nahobigos agundok atap iri ta shutrum. Eshesh douk sisigiruh yegeshiweruh-ish douk sheneyagwreh sabainyi kupainyi baraan iri. Aria eshesh ta mare shukri wosik um enesh arpesh shumuhur shunak shurumam, uwok. <sup>10</sup> Aria shape agundok atap iri arpesh ta shunadudareh um agundok amudok biom hagok um. Eshesh ta shunadudareh aria shupe shukesh yopinyi presen um esheshish atin atin arpesh. Um maresh? Amudok biom wata hapeum, amam apa henek sabaishi arpesh shape agundok atap iri shemnek debeiri eriger. <sup>11</sup> Douk bihotih shuknih anah tukwanih nyumneh hunak hudiguk, aria ta Iruhin ananip yap wata panak pawisham aria amam ta wata hukitak hiyotu. Aria arpesh ta shutrum aria shunogugur abom. <sup>12</sup> Aria abudok nyutob, amudok biom ta humnek anah mah. Aria enyudok arpen nyiyagwrehi iruhw heven iri ta nyukripam debeg nyukri, "Ipak putowi agundok iruhw!" Aria amamish horim ta shiyotu shupe shutrum meyoh aria amam ta huwish onog orug aria hupe huto um iruhw heven.

<sup>13</sup> Aria ta abudok atub nyutob abom, takweikwi enyik ta kwutuk aria sabaishi 7,000-poreish arpesh ta shugok. Aria agundok onok outuk abrudok wabur ta buwishuk aria 9-poreiyu outumeb upeik. Aria eshudok douk shupeik iri ta shutik namudok aria eshesh ta shunogugur abom aria ta shupe shutuk Iruhin douk nape iruhw heven iri ananin nyeigur nyuto iruhw. <sup>14</sup> Eshudok biyesh yoweishi abom douk shenek arpesh shemnek debeiri eriger iri douk eshudok shatuh. Aria ipak pumnek! Douk ta mare roubi nyutob aria eshudok bishatin yoweishi abom douk ta shunek arpesh shunumnek debeiri eriger iri ta shutogur.

### *Namba 7 Ensel Nyahapurish Enyenyihw Oruhw*

<sup>15</sup> Douk namba 7 ensel nyahapurish enyenyihw oruhw aria enesh arpesh

sheyagwrehi debeg iruhw heven iri shakri,

"Amudok douk riguk hape debeimi king um agundok atap iri amamih nyumneh douk hatuh.

Douk abudok nyutob apakin Debeini nani Krai,

anudok douk Iruhin nagraehan neshopokan nanaki iri douk hatogur dodogowim atum um hupe king um agundok atap.

Aria Krai ta nupe Debeini nupe nusuhw merik um agundok atap ihih nyumneh."

<sup>16</sup> Aria amudok 24-poreim debeimi douk hetem amamish debeishi wagiturahos hurukatin um Iruhin iri habuh hakus atap aria hape henek lotu um Iruhin. <sup>17</sup> Aria hakri,

"Debeini dodogowini Iruhin douk seiwok nyape

aria douk shopunek nyape!

Apak manadudareh-umen aria menek tenkyumen.

Um maresh? Nyak douk nyarao nyakin debeinyi dodog

aria douk nyananubur nyape king um ihishmorim arpesh

shani eneshenesh eshudok.

<sup>18</sup> Eshudok douk madae shudukemesh um nyak iri uwe,

eshesh juwehosish aria agundok nyak juwehosin um douk natogur.

Aria ahudok nyumnah douk hatogur um shagok iri

wata shukitaki aria nyak nyusuhw esheshig kwotog um.

Aria shopunek um nyukom yopishi eshudok eneshenesh

um amam profet.

Amam huni ihishmorim nyakish arpesh nyeiguhw shato-umesh iri

shuni nyeiguhw wokeshi douk shanogugur um nyak aria shenek lotumen iri.

Aria um nyununu eshudok arpesh douk shape shanunu abudok amnab iri!"

<sup>19</sup> Douk amudok 24-poreim debeimi hakriyuk namudok jurug aria Iruhin ananit debeiti urupat tatao iruhw heven iri tanajik. Aria asudok bogis douk dodogowinyi baraan kontrak Iruhin nakrip eshesh Israel enyi nyor um sakusi

yopugunum gani numun urupat. Aria utag pogarog geyagwreh aria gatrugun abom. Aria eik yemnek anah debeihi mah. Aria enyik kwatuk aria sabaisi debeisi shigorihwisi ais kabi douk utabor-umori sagruki atap.

## 12

### *Armatok Kwani Debeiri Yur*

<sup>1</sup> Aria shatik um enen dodogowinyi abom kak um shutrin aria shudukemesh shukri enen dodogowinyi arpen hurukatin um nyutogur. Enyudok kak nyanakwarum nyatogur nyape iruhw heven. Aria nyatograri iri kak douk enyudok. Onok armatok kwape aria okwok kwashok nyumnahin aun kabi douk rupah um. Aria wabin nape shakameruh um okwokwiruh yeriweruh. Aria kowem anat yoputi hat douk 12-poreiyu unib wapenyat iri kabi douk debeiwori otu wogwem iri um okwokwig barag. <sup>2</sup> Aria okwok douk kwonarahaen aria kwape kwabirak um kwakri kwubunuh aria kwareh kwahwar debeg. <sup>3</sup> Aria wata shopunek, kupainyi dodogowinyi kak nyanakwarum nyatogur nyape iruhw heven. Aria nyatograri douk enyudok. Enen dedeibeinyi owishiborinyi mahin kabi douk anar takweiri yur um nyanakwarum nyatogur nyape. Enyen 7-poreigos baragos seiren aria 10-poreiruh shuworuh hakihen barag. Aria 7-poreig yopugwi hatog douk debeimi atum hogwem iri gwatem atug atug um enyenyigos baragos. <sup>4</sup> Aria enyen nyakwu enyenyip honup nyogat unib douk wape atugun um onok outuk iri gani iruhw utag aria nyawasho wagrukuki atap. Aria bio outumeb um unib wapeik iruhw utag. Aria enyen nyanak nyeyotu apahwik um okwudok armatok douk hurukatin um kubuki batowin iri um nyakri kadak okwok kwunyubuki atin aria enyen ari-gas nyunyuhur nyunyoh. <sup>5</sup> Aria okwok kwabanuh kwabuki armanin batowin. Anudok arman kweipon ta nupe dodogowin atun aria ta nusuhw ainim butum aria nupe debeini um ihishmorim arpeshe douk shape ihigos-morim nahobigos iri. Douk okwok kwanabuki aria

eshesh shatrukwan sharan shanak um Iruhin um ananin debeinyi yopunyi wagitur douk anan napenyen iri. <sup>6</sup> Aria okwok kwaruwok kwanak um anabik wehigunum arpeshe uwok um. Okwok kwanak um agundok douk Iruhin nenekagunumok um kwunak kwupeum. Aria agundok eshesh ta shupe shutaurumok kwupe 1,260-poreih nyumneh. Ehudok 1,260-poreih nyumneh douk shopunek atin um bishatin shuknish aria enen tukwanin kwarahos.

<sup>7</sup> Aria debeihwi wanohw hwatogur iruhw heven. Enyudok debeini Iruhin ananin ensel douk nyanahwar um Maikel iri nyani enyenyish enselahos shabo arudok debeiri yur. Aria arudok yur shopunek rani ararish yoweishi enselahos wata shatanam shawanam wanohw. <sup>8</sup> Douk eshesh sharpak aria yur rani ararish enselahos madae dodogowish uwe. Aria eshesh madae anabik uwe um shupe iruhw heven um. <sup>9</sup> Aria Iruhin ananish enselahos shasuhwesh shawashesh shabuhi atap. Arudok yur douk seiwok rape aria douk shopunek rape iri. Arar douk shahwaror um yoweini sagaben o Satan. Anan douk nape nenek rohwh um ihishmorim arpeshe douk shape agundok atap iri. Anan nani ananish yoweishi enselahos, eshesh douk showashesh shagruki agundok atap.

<sup>10</sup> Aria eik yemnek anah debeihi mah. Aria enyudok arpen nyeyagwrehi debeihi mah gani iruhw heven iri nyakri, "Douk agundok um Iruhin narap matanamori mape wosik um douk nanaki. Aria Iruhin neyabigap um anan douk dodogowini abom aria ta nupe king um apak ihih nyumneh! Aria douk Kraish, Iruhin nagraehan aria neshopokan nanakumori nurao arpeshe iri douk neyabigap um anan douk dodogowini aria ananin big nyatogur deben. Um maresh? Arudok yur douk reyotu rape renekumesh rohwin baraen eshesh Kristen, rakrip apakin Iruhin nyumnah wab rakri eshesh shenek yoweih aih iri arar douk

Iruhin ananish enselahos shawashor rakutukuk iruhw heven ragruki agundok atap.

<sup>11</sup> Aria apakish ashukenyish owashish douk shagipesh Kraisi iri shenek uhwinyumor.

Um maresh? Eshesh shape dodogowish um

enyudok Nugaen Sipsip douk

seiwok shaen nyagok iri enyenyibor owishibor

bani enyenyin adurin baraen douk eshesh shakripeshen iri.

Esheship urkwip douk por abom um shakri

shukripesh enyudok adurin baraen

aria eshesh madae urkwip purum shukri shupe wosik agundok atap um uwe.

Aria shopunek, eshesh madae shunogugur um kupaishi arpeshe douk

shakon agabus Iruhin iri shesh shugok um uwe.

<sup>12</sup> Douk namudok aria ipak pape iruhw heven iri puni iruhw utag, ipak ta punadudareh.

Aria ipak pape atap pani youg iri eik yakri giha-umep,

ipak ta punnek debeiri eriger.

Um maresh? Satan douk nagrukugu um ipak.

Aria anan douk juwehosin abom. Um maresh?

Anan nadukemesh um anan nupe nura-haen obi nyutob douk banab abom meyoh.”

<sup>13</sup> Aria douk arudok debeiri yur ratik um eshesh shawashor ragruki agundok atap um, aria arar rape rahiyah okwudok armatok douk kwabanuh kwabuki nunganin iri. <sup>14</sup> Aria eshesh shokok biyesh debeishi kumunish kapraigiyohos um kwehuru. Aria okwok kwanadudareh kwanak gani wehigunum arpeshe uwok um. Okwok kwanak agundok um eshesh shupe shutaurumok eshudok bishatin shuknish aria enen tukwanin kwarahos um arudok yur mare rok. <sup>15</sup> Aria sabaibari abar batograri ararit nokwat aria batogur banak. Ababar bagipeshok banak kabi douk worub batogur banak um. Um arar rakri kadak abrudok abar bunak aria buraok bunak bok kwugok.

<sup>16</sup> Aria amnab bataurumok. Aria amnab

puwarob banak tukwotukwan aria abrudok abar bagrukuk atap. <sup>17</sup> Aria arar juwehosin abom um okwudok armatok aria ranak um rakri runi ihishmorim okwokwish batowish aria barheshish shurpak. Eshesh douk eshudok ihishmorim arpeshe douk shagipesh Iruhin ananin lo aria shakripesh Jisas ananin adurin atinyi baraen aria shagipeshen iri.

## 13

<sup>1</sup> Aria arar ranak reyotu anagas um youg.

### *Biyesh Debeishi Wanarish Mahish*

Aria eik yatigu enen debeinyi mahin nyape urah iri nyakutukuk youg nyakitak nyape nyatowi. Enyen 10-poreiruh shuworuh hakihen aria 7-poreigos baragos seiren. Aria 10-poreig yopugwi hatog douk debeimi atum hogwem iri gwatem otuhw otuhw um arhudok shuworuh. Aria enen yoweinyi nyeigur nyetem enyudok mahin enyenyigos baragos. Baugenyum baraen um enyudok nyeigur douk shabubunim um Iruhin.

<sup>2</sup> Enyudok mahin douk nyape kabi enen debeinyi wanohwinyi mahin douk shahwaren um lepat iri. Aria enyenyigas aiyas sape kabi enen debeinyi wanohwinyi mahin shahwaren um bea iri. Aria enyenyit nokwat kabi douk enyudok debeinyi wanohwinyi mahin douk nyanahwar um laion iri enyenyit um. Aria arudok yur reken ararin dodog aria big nyani ararin debeinyi yopunyi wagitur um enyudok debeinyi mahin. <sup>3</sup> Aria anag um enyudok mahin enyenyig barag, takweibi arab bapenyag kabi douk shaen nyagok um. Aria enyen douk madae nyugok uwe, uwok. Abab wata banakawis. Douk namudok aria ihishmorim arpeshe shape agundok atap iri shakitak yowiyokuk um enyudok mahin aria shagipeshen. <sup>4</sup> Aria arudok yur douk reken ararin big um enyudok mahin. Douk namudok aria ihishmorim arpeshe shenek lotu um arudok yur. Aria eshesh shenek lotu um enyudok mahin shopunek shakri, “Arpen douk madae enen dodogowin kabi douk enyudok mahin um uwe, uwok. Enyen atin douk dodogowin

abom. Aria ta omi dodogowin um nyuni enyen shurpak?”

<sup>5</sup> Aria Iruhin nakri wosik nape natin meyoh enyudok mahin um enyen nyupe debeinyi um sabaishi arpesk um 42-poreib aub. Abudok 42-poreib aub douk shopunek atin um bishatin shuknish aria enen tukwanin kwarahos. Aria enyen nyape nyeyagwreh enenyenen yoweinyi abom baraen aria nyape nyatuk enenyin nyeigur nyato iruhw. <sup>6</sup> Aria enyen nyanonubur nyape nyabubunim um Iruhin. Enyen nyabubunim um ananin nyeigur nyani ananibur wabur bani eshudok arpesk douk shape iruhw heven iri. <sup>7</sup> Aria Iruhin neken dodog aria enyen nyani Iruhin ananish arpesk sharpak aria enyen nyaesh nyahiya-hesh. Aria enyen nyarao debeinyi big um nyupe king um ihishmorim arpesk shape ihigos-morim nahobigos iri. Shuni ihishmorim debeisi awirosish, shuni ihishmorim sheneyagwreh ihin kupainyi baraen iri, shuni ihishmorim ihiruh sisi-giruh yegeshiweruhish arpesk. <sup>8</sup> Aria ihishmorim arpesk douk shape agundok atap iri ta shunek lotu um enyudok mahin. Ihishmorim eshudok arpesk douk seiwok Iruhin madae nunek agundok atap uwe, aria anan madae nuwem um esheshish nyeiguhw shutem okwudok buk douk eshudok arpesk ta shupe wosik ihih nyumneh iri esheshish nyeiguhw shutemokwi. Okwudok buk douk enyudok Nugaen Sipsip douk seiwok shaen nyagok iri enyenyik. <sup>9</sup> Aria douk ipak arigos sapenyep iri um, ta gamo punnek enyudok baraen!

<sup>10</sup> Eshudok arpesk douk Iruhin nukri wosik um kupaishi shusuhwesh shuweshikesh shuraesh um shunuweshik iri, eshesh ta shunuweshik. Aria eshudok douk Iruhin nukri wosik um kupaishi shukwumesh bainatog iri, eshesh ta shukwumesh bainatog aria shesh shugok.

Adur atin, enyudok kweipon ta nyutogur. Namudok aria ipak Iruhin ananish arpesk ta pusuhw ananin baraen dodog

pugipeshen aria piyotu dodogowip atip abudok nyutob enyudokmori amaen nyutogrumep um.

<sup>11</sup> Aria eik yatigu enen kupainyi debeinyi wanarin mahin shopunek. Enyen douk nyape iri gani atap nuwag iri nyakitak nyapa nyatowi. Enyen bioruh shuworuh kabi douk hatogur nugaen sipsip iri hakih baragenyum. Aria enyen nyeyagwreh kabi douk yuguhw hweyagwreh um. <sup>12</sup> Aria enyen nyakwu enyudok nyarik iri mahin enenyin big aria dodog um nyupe debeinyi um ihishmorim arpesk. Aria shopunek um nyupe dodogowin atin aria nyunek agundok atap nini ihishmorim arpesk shunek lotu um enyudok nyarik iri mahin douk takweiti nyubrut tape anag enyenyig barag kabi douk shaen nyagok iri um. Aria enyen madae nyugok uwe, uwok. Aria abab banakawis. <sup>13</sup> Enyudok nyagiguk iri mahin nyenek enen mour douk Iruhin atun neneken iri agundok nabesish um ihishmorim arpesk. Enyen nyeneken iri douk enyudok. Enyen nyenek nyih hakutukuk iruhw heven hagruki agundok atap. <sup>14</sup> Aria Iruhin nakri wosik aria enyen nyenek sabainyi Iruhin atun neneken iri mour agundok nabesin um enyudok nyarik iri mahin. Douk enyen nyenekesh namudok aria enyen nyape nyenek roh w um ihishmorim arpesk shape agundok atap iri. Aria enyen nyape dodogowin atin aria nyakripesh um shunek enyudok nyarik iri mahin enenyir aborir aria shupe shutuk enenyin nyeigur nyuto iruhw. Enyen douk seiwok shaen shakwumen bainat aria enyen madae nyugok iri uwe. Enyen wata nyape. <sup>15</sup> Aria Iruhin nakri wosik aria enyudok nyagiguk iri mahin nyahapurish enenyip yap pawish enyudok nyarik iri mahin enenyir aborir douk eshesh shenigor iri aria nyorukar yapis. Enyen nyenekar namudok um riyagwreh aria runek eshudok arpesk douk shakri uwok um shunek lotumar iri shugok. <sup>16</sup> Aria enyen dodogowin atin abom um nyakri ihishmorim arpesk, nyeiguhw shato-umesh



iri,<sup>13:16</sup>shuni nyeiguhw wokeshi, shuni shanagrem sabaishi eshudok eneshenesh iri, shuni yaruhish iri, shuni shape shakamum kupaishi shenekumesh mour meyoh iri, shuni shape wosik iri um shu-rao enen kak nyupe esheshish domaesh o esheshish yopishi roguh. <sup>17</sup> Enyen nyenekesh namudok um meinyi arpen douk mare nyurao enyudok kak o enyudok namba iri, enyen ta mare nyutor eshudok eneshenesh o nyunek salimesh um kupaishi shutorish, uwok. Enyudok namba o kak douk nyakri wobuwobren baraen um enyudok mahin enyenyin nyeigur.

<sup>18</sup> Apak ta murao saki um mudukemesh um baugenyum baraen um enyudok namba. Enyudok arpen douk nyudukemesh abom iri enyen ta nyudukemesh um baugenyum baraen um enyudok namba. Um maresh? Enyudok namba douk nyakrium anan arman ananin nyeigur. Aria enyudok namba douk 666.

## 14

### *Sabaishi 144,000-poreish Arpesh Sheyarub Onohw Namuhwi Awehw*

<sup>1</sup> Aria eik Jon wata yatrugunugu aria yatigu nugaen Sipsip nyeyotu ahwudok yoduhw douk shahwarohw um Saion iri. Enyen nyani sabaishi 144,000 -poreish armam armago douk enyudok Nugaen Sipsip nyani enyenyin Yain amamish nyeiguhw shetem esheshish domaesh iri sheyotu. <sup>2</sup> Aria eik yemnek anah mah hanaki iruhw heven kabi douk debeibi worub batogur debeg um. Aria shopunek, ahah kabi douk utag pogarog debeg um. Ahudok mah eik yemnekah iri ahah douk kabi yopuhi mah douk shabirak eshudok kabi gitahas um iri shabirakesh shenekah iri. <sup>3</sup> Aria eshudok sabaishi 144,000-poreish arpesh sheyotu hurukatin um Iruhin ananin debeinyi wagitur nyani amam debeimi hani eshudok nubatish dodogowishi douk mishish shoresh iri shapeum. Aria eshesh sheyarub onohw namuhwi awehw douk eshesh Jisas Kraiss

nagraehesh aria naraesh shakutukuk agundok atap iri atish shadukemohw iri. <sup>4</sup> Anam armam um eshudok arpesh douk henek yopinyi atin iri. Enesh douk armam henek yopishi inahos atin iri. Amam madae hunek yoweihi aih um huni armago shenek wehrur atin uwe, uwok. Amam hape yopumi armam. Aria hagipesh Nugaen Sipsip hanak ihigunum enyen nyanak um. Aria orokohun um eshudok arpesh shape agundok atap iri, Iruhin nator amudok harik iri armam naram hanakum anan nani Nugaen Sipsip kabi douk ofa um. <sup>5</sup> Amam madae enen baraen nyupenyam um henek eneh yoweihi aih um uwe. Aria shopunek, amam madae hunek rohwh atin uwe, uwok.

### *Iruhin Ananish Bishatin Enselahos Sheneyagwreh Shakri Enen Baraen*

<sup>6</sup> Aria eik yatik enen ensel nyehwuru nyanak gani iruhw iri nyasuhw Iruhin ananin yopinyi baraen douk ta nyupe ihih nyumneh iri um nyukrip ihishmorim arpesh shape agundok atap iri. Enyen ta nyukrip ihiruhmorim sisigiruh yegeshiweruhish arpesh, shuni ihishmorim sisigis awirosish arpesh, shuni ihishmorim sheneyagwreh kupainyi baraen iri, shuni ihishmorim arpesh douk shape ihigosmorim nahobigos iri. <sup>7</sup> Aria enyen nyahwar debeg nyakri, “Nyutob banaki um Iruhin anudok debeini jas um nunek skelimum ihishmorim arpesh um. Namudok aria ipak punogugur um anan aria putuk ananin nyeigur nyuto iruhw! Ipak punek lotu um Iruhin douk nenek iruhw heven nani agundok atap nani youg gwani ihibarmorim abar douk batogur atap meyoh iri.” <sup>8</sup> Aria nyagiguk iri nyehwuru nyanaki aria nyakri, “Abrudok debeiburi wabur nyeigur nyato iruhw aburi Babilon bananukuk jurug! Adur ababur bananukuk iyoh! Arpesh shape Babilon iri riguk shenek ihishmorim arpesh shape ihigos-morim nahobigos iri shenek wehrur um aria shenek eneheneh yoweihi aih. Eshesh shenek ehudok

yoweih aih kabi douk eshesh shape Babilon iri shekesh dodogowibari wainibar abar shaboroh shagugak aria shenekeh iri um.”<sup>9-10</sup> Aria enyudok binyatin iri ensel douk nyagipesh eshudok biyesh sharik iri enselahos iri nyahwar debeg nyakri, “Ihishmorim arpesh douk shenek lotu um enyudok debeinyi mahin nyani enyenyir aborir aria sharao enyenyin kak nyape esheshish domaesh o esheshish roguhwi iri ta shuwok anan kupaini wain. Anudok wain douk nakri wobuwobren baraen um agundok Iruhin anan juwehosin um douk ta nunekesh shumnek debeiri eriger iri. Aria anan ta mare nukri nenek gihaumesh, uwok. Anan ta juwehosin-umesh abom aria nunekesh shumnek debeiri eriger um nuwanamesh eneshenesh yoweishi inahos eshesh shape shenekesh iri. Aria Iruhin ananish enselahos shuni Nugaen Sipsip ta shiyotu shutrish aria eshesh ta debeih nyih hunish. Ehudok nyih douk hanuwi anab akitohibi amnab nyeigurib um salfa iri.<sup>11</sup> Aria nyugus douk sakih ehudok nyih douk hanu eshudok arpesh shemnek debeiri eriger iri ta sukih suto ihih nyumneh. Aria eshudok arpesh douk shenek lotu um enyudok debeinyi mahin nyani enyenyir aborir aria sharao enyenyin kak douk nyakrium enyenyin nyeigur iri, nyumneh weibus eshesh ta mare shupe um shuraou uhwin, uwok. Eshesh ta shupe um shumnek debeiri eriger namudok atin.”

<sup>12</sup> Namudok aria Iruhin ananishi arpesh douk shagipesh ananin lo aria shenek bilip dodogowish atish um Jisas iri, eshesh ta shiyotu dodogowish atish abudok nyutob eshesh shumnek debeiri eriger obi nyutob um.

<sup>13</sup> Aria yemneku anah mah. Aria enyudok arpen nyeyagwrehi iruhw heven iri nyakri, “Nyak wem enyudok baraen anap shup um eshudok douk shasuhwen dodog Debeini ananin baraen shagipeshen iri. Baraen enyudok, ‘Eshudok douk shatukur Debeini aria shugok shunak iri shuni eshudok douk ta kweipon shugok iri, eshesh ta shupe wosik aria ta shunududareh!’ ”

Aria Iruhin ananin Mishin shopunek

nyakri, “Adur, eshesh ta shukutukuk ihinyumorim debeinyi mour eshesh shape sheneken iri aria ta wata shupe um shuraou uhwin shupe meyoh. Um maresh? Eshesh ta mare shunak meyoh, uwok. Ehudok yopihi aih aria mour eshesh shape sheneken iri ta nyunamesh nyunak. Aria Iruhin ta nukesh enesh yopishi eshudok eneshenesh um ehudok aih aria mour eshesh sheneken iri.”

### *Shaurimori Worigun Agundok Atap Um*

<sup>14</sup> Aria wata shopunek yatrugunugu aria yatik onog shigorihwigwi orug. Aria enen arpen nyetemori ogwudok orug. Enyen nyape kabi “Anudok Arman douk natogur adurinyi arpen iri.” Anan nowem anat yoputi hat shenekat um gol iri douk debeimi atum hogwem iri amamigos baragos. Aria nasuhw anap wanohwip atupi ponodaresh iri nogwotep ananis wis.<sup>15</sup> Aria kupainyi ensel nyatograri atudok Iruhin ananit debeiti urupat aria nyahwaran debeg anudok natem ogwudok orug iri nyakri, “Nyak nyukwu nopudok nogwotep nyurimori worigun. Um maresh? Ahudok nyumnah um worigun nunourimori um agundok atap um douk hatogur.”

<sup>16</sup> Aria anudok arman natem ogwudok orug iri nawashak ananip nogwotep pabuhi agundok atap aria nabre ihigunmorim worigun.

<sup>17</sup> Aria kupainyi ensel nyatograri atudok Iruhin ananit debeiti urupat gani iruhw heven. Aria enyen shopunek nyasuhw anap wanohwip atupi ponodaresh iri nogwotep.<sup>18</sup> Aria enen kupainyi ensel shopunek douk nyape nyasuhw merik um nyih iri nyatograri gani enyudok alta douk showem eshudok shako Iruhin iri um nyakus um. Aria enyen nyahwaren debeg enyudok douk nyasuhw wanohwipi nogwotep iri nyakri, “Nyak nyukwu nyakip nogwotep nyubre epudok wainip shuruwep douk peir anaruh madururuh douk hanahwar um wain iri um agundok atap. Um maresh? Epep douk buwarep!”<sup>19</sup> Aria enyudok ensel nyawashak enyenyip nogwotep pabuhi um agundok atap aria nyabre epudok

ihipmorim shuruwep. Aria nyepuhur nyanak nyowashep pabuhuk anag de-beigi tenk douk shenekag utabor iri um shumakwiyeshep aria shunek wainibar abar. Enyudok wobuwobren baraen douk nyakrium agundok Iruhin anan juwehosin um eshudok arpeshep douk shape shenek yoweih aih iri. <sup>20</sup> Aria anudok wain eshesh shanak shamak-wiyeshan agudok tenk adukehahibur um abrudok debeiburi wabur. Aria sabaibori owishibor douk batograri adukehahig um agudok tenk iri bawori banak rougun wosik um 300 kilomita. Aria abrudok sabaibori owishibor hurigasarubor bato um douk wosik hurukatin um 2 mita. Enyudok wobuwobren baraen douk nyakrium agundok Iruhin anan juwehosin um eshudok arpeshep douk shape shenek yoweih aih iri.

## 15

### *Iruhin Ananish 7-poreish Enselahos Shasuhw Eshudok Douk Shenek Arpeshep Shemnek Debeiri Eriger Um*

<sup>1</sup> Aria eik wata shopunek yatik kupainyi debeinyi kak nyatogur iruhw heven. Enyen douk nyatogur um nyiyabig arpeshep um agundok douk Iruhin dodogowin um nini agundok anan juwehosin um eshudok yoweishi inahos arpeshep shenekesh iri um. Aria eik yape yanasorik um enyudok kak. Kak douk enyudok. Eik yatik 7-poreish Iruhin ananish enselahos douk shasuhw 7-poreish shagiguk abom iri eshudok eneshenesh um shunek arpeshep shumnek debeiri eriger iri. Eshudok yoweishi eneshenesh, eshesh douk shagiguk abom iri. Um maresh? Abudok nyutob ta shubo eshudok arpeshep douk shape agundok atap iri ba iyoh, aria agundok Iruhin anan juwehosin abom um ta nutuh. <sup>2</sup> Aria eik yatik enen enyudok douk nyape kabi youg-mori um. Enyen nyape kabi wenyir, douk shenegor rani nyih iri. Aria shopunek, eik yatik enesh arpeshep sheyotu anagas um youg. Eshudok arpeshep eshesh douk sheyotu dodogowish shenek uhwinyum wanohw shabo enyudok debeinyi mahin iri. Aria shopunek, eshesh shenek uhwinyum enyenyir

aborir rani namba douk nyakri wobuwobren baraen um enyenyin nyeigur iri. Aria eshesh shasuhw eshudok kabi gitahas um douk Iruhin nekeshesh iri. <sup>3</sup> Aria eshesh shape sheyarub ahwudok awehw douk nenek Iruhin ananin mour iri Moses nani Nugaen Sipsip amamihw. Ahwudok awehw douk sheyarub shakri namudok, “Debeini Iruhin, nyak douk dodogowinyi

abom

aria nyabo ihishmorim eneshenesh shabuhuk iri.

Nyakh aih douk yopiyopihi abom.

Aria nyakin mour douk dodogowinyi abom

aria arpeshep shatrin aria mishish shakitak yowiyokuk!

Nyak nyape King um ihigos-morim nahobigos douk

sape agundok atap iri.

Aria nyak nyenekeh iri aih aria mour douk adurin atin abom!

<sup>4</sup> Debeini, ta omi mare nyunogugur um nyunek lotumen?

Aria ta omi nyukri uwok um

nyutuk nyakin debeinyi nyeigur nyuto iruhw?

Nyak atin yopunyi abom.

Aria ihishmorim arpeshep shape ihigos-morim nahobigos iri

ta shunaki shunek lotu um nyak atin.

Um maresh? Nyakin ihinyumorim yopinyi mour iri aih douk shatogur yopugunum.”

<sup>5</sup> Douk enyudok nyanakuk aria yatigu atudok Iruhin ananit debeiti urupat gani iruhw heven tanajik. Aria eik yatigu numunitum atudok selit urupat douk Iruhin napenyot iri. <sup>6</sup> Aria Iruhin ananish 7-poreish enselahos douk shasuhw 7-poreish yoweishi eshudok eneshenesh iri shakitak shatograri atudok urupat. Eshudok yoweishi douk ta shunek arpeshep shumnek debeiri eriger iri. Eshesh shorari yopihi atih hatrugun iri shigorihiwihi rupeh. Aria shawashak iri letog douk shenekog gol iri um esheshish mishish. <sup>7</sup> Aria enen um eshudok nubatish dodogowishi douk mishish shoresh iri nyekesh 7-poreis dis douk shenekas gol iri um eshudok enselahos. Asudok dis douk shishuknis um Iruhin douk nape

ihih nyumneh iri um anan juwehosin um.  
<sup>8</sup> Aria atudok Iruhin ananit debeiti urupat shuknit um ogwusudok yopugwusi nyugwus douk satograri agundok douk Iruhin dodogowin aria natrugun abom um. Aria abudok nyutob, madae enen arpen ta dodogowin um nyunak nyuwish um uwe, uwok. Enyen ta nyupe arigaha eshudok 7-poreish enselahos shiyatak enyudok mour um eshudok 7-poreish yoweishi douk shenek arpes shemnek debeiri eriger iri ba iyoh, aria enyen wosik ta kadak nyunak nyuwish.

## 16

### *7-poreis Dis Douk Shukunis Um Eshudok Douk Iruhin Juwehosin-umesh Abom Um*

<sup>1</sup> Aria eik yemnek anah mah. Aria enen arpen nyeyagwrehi atudok Iruhin ananit debeiti urupat. Aria enyudok nyeyagwrehi iri nyakrip eshudok 7-poreish enselahos debeg nyakri, "Ipak punak purak Iruhin anan juwehosin um nyor ipakis dis iri nyubuhukuk atap!"

<sup>2</sup> Aria nyarik iri ensel nyanak nyourak eshudok shor enyenyis dis iri shabuhukuk atap. Aria takwetakweibi yoweibi ereb batogur um enesh arpes. Ebeb douk batogur um ihishmorim douk sharao enyudok debeinyi mahin enyenyin kak nyape esheshish roguh shani domaesh aria shenek lotu um enyenyir aborir iri. <sup>3</sup> Aria nyagiguk iri ensel nyaurak eshudok shor enyenyis dis iri shabuhukuk youg aria youg gwatanam gwanenem um owishibor kabi douk shagok iri arpes esheshibor um. Aria ihishmorim eshudok shape youg iri shagok. <sup>4</sup> Aria binyatin iri ensel nyaurak eshudok shor enyenyis dis iri shabuhukuk worubus aria ihibarmorim abar douk batogur atap meyoh iri batanam banenem um owishibor atubor. <sup>5</sup> Aria eik yemnek enyudok ensel douk nyasuhw merik um ihibarmorim abar iri nyakri,

"Nyak adurinyi. Seiwok baugos abom um nyak nyape,  
 aria douk shopunek nyape.

Baraen nyak nyeneken um eshudok arpes douk shenek yoweishi inahos iri douk yopin abom.

Eshesh shemnek debeiri eriger wosik um yoweishi inahos eshesh shenekesh iri.

<sup>6</sup> Um maresh? Eshesh shabo nyakish arpes shani amam profet douk Iruhin nakripam baraen hakrip arpes iri shagok

aria esheshibor owishibor batourak.

Aria ahudok nyumnah douk nyak nyuwanam-umesh eshudok shenek yoweishi inahos iri shaboroh.

Abrudok owishibor douk bakri wobuwobren baraen um arudok debeiri eriger douk Iruhin nenekesh shemnegor iri.

Aria arar douk renekesh-umesh wosik um eshudok yoweishi inahos eshesh shape shenekesh iri."

<sup>7</sup> Aria eik yemneku enen arpen nyeyagwrehi enyudok alta douk shape showem eshudok shenek ofamesh shako Iruhin iri nyataoum. Aria enyudok arpen nyeyagwrehi iri nyakri,

"Debeini, nyak douk Dodogowini abom Iruhin.

Nyak nyeneken um arpes iri baraen douk yopin abom!"

<sup>8</sup> Aria enyudok nubatin iri ensel nyaurak eshudok shor enyenyis dis iri um nyumnahin aun. Aria Iruhin nakri wosik aria wah hatao juwehosih atuh habo arpes aria nyih hanish. <sup>9</sup> Aria ahudok wah hatao juwehosih atuh abom aria habo enesh arpes aria shanomnek abom um debeihi nyih hanishuk. Aria eshesh shape shahao Iruhin shabubuniman anan douk nasuhw merik um eshudok yoweishi douk shenek arpes shemnek debeiri eriger iri. Aria eshesh shakri uwok abom um shatanam shukon aparuh Iruhin aria shutuk ananin nyeigur nyuto iruhw um. <sup>10</sup> Aria enyudok anas wisin iri ensel nyaurak eshudok shor enyenyis dis iri shanak um enyudok debeinyi mahin nyapenyen iri wagitur nyakus um. Aria wab babuh beyawiyamuk agundok ihishmorim arpes douk enyen nyasuhw merikw-umesh iri shapeum. Eshesh

shapeum arukwutigun abom. Aria eshesh shemnek debeiri eriger aria sabaibi ereb bapenyesh aria shape shanatuk esheship yehep. <sup>11</sup> Aria shape shabubunim Iruhin douk nape iruhw heven iri. Aria eshesh madae shukehuk agabus ehudok yoweihhi aih eshesh shape shenekeh iri uwe, aria shatanam shukon aparuh Iruhin uwe, uwok.

<sup>12</sup> Aria enyudok anawipin iri ensel nyaurak eshudok shor enyenyis dis iri um abudok debeibi worub nyeiguribum Yufretis iri. Aria abar bogerukuk abom um shugabemam yah amam king-omi douk ta hunaki gani aun nakihumori. <sup>13</sup> Aria eik yatigu bishatin shanabosusih iri yoweishi sagabehos douk shape kabi makihos um. Eshesh shatograri arudok debeiri yur rani enyudok debeinyi mahin shani anudok nenek rohwumesh iri profet esheshig nokwatog. <sup>14</sup> Eshesh douk bishatin eshudok yoweishi abom sagabehos douk shape shenek enenyenen mour kabi douk Iruhin atun nape neneken iri. Aria eshudok bishatin iri yoweishi sagabehos ta shunak shurauri ihm-morim king douk hape ihigunum um agundok atap iri um hunaki hupe atugun aria huni dodogowini Iruhin douk nasuhw ihinyumorim dodog iri hurpak ahudok ananah debeihhi nyumnah.

<sup>15</sup> Aria Jisas Kraiss nakri, "Ipak mnek, eik ta wata inaku itogrump kabi douk nakwuaruh iri nanakumogu. Douk namudok aria eshudok arpeshe douk mare shishuh aria shugabe shunabuk esheshih rupeh wosik iri, eshesh ta shunadudareh shupe wosik. Um maresh? Eshesh ta mare shugar shupe shurahaen shunak yopugunum aria abraen nyesh, uwok!"

<sup>16</sup> Aria eshudok yoweishi sagabehos shauri amudok debeimi king hanaki hape agundok douk baraen Hibrui shahwaragun um Amagedon iri.

<sup>17</sup> Aria namba 7 ensel nyaurak eshudok shor enyenyis dis iri shanak um utag. Aria eik yemnek anah mah. Enyudok arpen nyeyagwrehi numun Iruhin

ananit debeiti urupat douk Iruhin ananin yopunyi wagitur nyakus um. Aria enyudok arpen nyeyagwrehi iri nyahwar debeg nyakri, "Douk eshudok shatuh!"

<sup>18</sup> Aria utag pogarog geyagwreh debeg aria gatrugun abom. Aria debeikwi enyik kwatuk. Douk seiwok agundok atap arpeshe shape shanaki arigaha douk aria madae onok okudokmori debeikwi enyik kwutuk uwe! <sup>19</sup> Aria abrudok debeiburi wabur banasiya um bihatuh-igunum. Aria ihirubmorim debeirubi warub bape ihigos-morim nahobigos agundok atap iri bananukuk. Aria Iruhin urkum morum eshesh shape abrudok debeiburi wabur Babilon iri aria nekesh anudok wain douk shakri wobuwobren baraen um anan juwehosin abom um aria shanoh. <sup>20</sup> Aria ihishmorim unaihos shani ihiruhmorim yodururuh burukwaresh-ukuk aria shanak shawishuk abom. <sup>21</sup> Aria shigorihwisi ais kabi douk utabor um sagruki iruhw utag kabi douk eshah harari um aria sabuhi saesh. Abrudok aisibor utabor douk amaenyibor abom. Ababor atum atum douk 50 kilogram. Aria douk enyudok yoweinyi abom um abrudok aisibor utabor babuhi baesh shemnek debeiri eriger um nyenekesh aria shape shabubunim um Iruhin. Um maresh? Enyen douk yoweinyi abom.

## 17

*Debeikwi Armatok Douk Kwani Kupaimi Shenek Wehrur Iri Kwumnek Debeiri Eriger*

<sup>1</sup> Aria enen um eshudok 7-poreish enshalahos douk shasuhw asudok 7-poreis dis douk shuknis um Iruhin anan juwehosin-umesh abom um nyanakumori eik aria nyakripe nyakri, "Nyak yowi aria iyabigen um agundok ta okwudok debeikwi armatok douk kwani kupaimi shenek wehrur iri kwumnek debeiri eriger um okwokwih yoweihhi aih um. Okwok douk kwape hurukatin um sabaibusi debeibusi worubus. <sup>2</sup> Aria king omi 17:2 douk hape agundok atap iri hani okwok shenek wehrur um. Aria sabaishi arpeshe shape

17:2 **17:2** Enyudok baraen um king-omi hani okwudok armatok shenek yowesh inahos um douk nyakrium agundok arpeshe shakutukuk Iruhin shanak shenek lotu um madae adurimi god omi um uwe.

agundok atap iri shawok okwokwin wain aria shagagak. Anudok wain douk shakri wobuwobren baraen um okwokwih yoweih aih.”

<sup>3</sup> Aria Iruhin ananin mishin nyatogrume dodogowin atin. Aria enyudok ensel nyarae nyanak anagun wehigunum arpesk uwok um. Aria agundok eik yatik onok armatok kwatem iruhw um enen debeinyi owishiborinyi wanarin mahin. Enyudok mahin 7-poreigos baragos seiren aria 10-poreiruh shuworuh hakihen. Aria sabaishi nyeiguhw shatem ihihw-morim enyenyihw yegenyihw. Eshudok nyeiguhw douk shabunim um Iruhin. <sup>4</sup> Aria okwudok armatok kwenek biyeh yomogih owishiborihi rupeh. Okwok kwanaginohw okwokwihw yegenyihw um sabaibi yamayamagib batrugun iri weiyoub douk shenekab gol iri. Aria shopunek, anab douk shenekab anabor yopubori utabor bani anab weiyoub douk shatorub debeibori utabor iri. Aria kwasuhw anap kap shenekap gol iri okwokwis wis. Aria eneheneh yoweih aih douk Iruhin nakri wokumeh abom iri hani eneheneh yoweih aih um shani okwudok armatok shenek wehrur um hor apudok kap shuknip. <sup>5</sup> Aria okwokwin domaen enen nyeigur nyetem. Baugenyum baraen um enyudok nyeigur douk nyanabeshuk. Enyudok baraen douk nyakri namudok,

“Nyeigur nyuto-umaburi wabur Babilon baugos abom um ihiyumorim armago douk wape wani kupaimi shenek wehrur um wani ihihmorim yoweih abraenyih aih douk agundok atapishi arpesk shape shenekeh iri.”

<sup>6</sup> Aria eik yatik okwudok armatok kwape kwabo sabaishi Iruhin ananish arpesk douk shenek bilip dodogowish atish um Jisas aria shakripesh ananin baraen kupaishi iri. Okwok kwaesh shagok aria kwogugak abom kabi douk kwawok esheshibor sabaibori owishibor aria kwogugak um. Aria douk yatiguk namudok aria eik mishin nyakitak yowiyokuk. <sup>7</sup> Aria enyudok ensel nyarige nyakri, “Nyak mishin nyakitak yowiyokuk um maresh? Eik ta ikripen um baugenyum baraen

um enyudok nyanabeshuk iri baraen um okwudok armatok kwuni enyudok debeinyi wanarin mahin douk okwok kwatem kurahenyen iri. Enyen douk 7-poreigos baragos seiren aria 10-poreiruh shuworuh hakihen iri. <sup>8</sup> Enyudok nyatrin iri mahin douk seiwok nyape aria douk madae nyugok. Aria enyen ta nyukutukuk agudok nuwag douk gagor gabuhuk gani atap abom iri nyuto iruhw aria ta nyunak nyuwishuk.

Aria onok buk kwakus. Okwok douk eshudok arpesk douk ta shupe wosik atin ihih nyumneh iri esheshish nyeiguhw shetmokwi. Aria enesh arpesk douk seiwok Iruhin wata nunek agundok atap uwe, aria madae nuwem esheshish nyeiguhw okwudok buk iri uwe ta shutik enyudok mahin aria ta shukitak yowiyokuk. Um maresh? Seiwok enyen nyape aria douk uwok, enyen nyagok. Aria anah nyumnah enyen ta wata nyukitak nyupe.

<sup>9</sup> Aria meinyi arpen douk nyadukemesh abom iri enyen wosik ta nyudukemesh um baugenyum baraen um okwudok armatok kwani enyudok debeinyi mahin. Agusudok 7-poreigos baragos sape enyudok mahin iri douk shakri wobuwobren baraen um 7-poreiruh yodururuh douk okwudok armatok kwatemaruh iri. Aria shopunek, agagos douk shakri wobuwobren baraen um 7-poreim king-omi. <sup>10</sup> Amam 5-poreim douk hagog, aria anan douk wata nape dodogowini king. Aria anan wata nutogur nupe king uwe. Aria anan ta nutogur aria ta nupe banab meyoh nyutob. <sup>11</sup> Aria enyudok debeinyi mahin douk seiwok nyape aria douk madae enen nyupe iri uwe, enyen douk shakri wobuwobren baraen um anan king douk natogur nape nani amudok anam 7-poreim aria hatogur 8-poreim iri. Aria anan ta wata nunak nuwishuk abom.

<sup>12</sup> Aria aruhudok 10-poreiruh shuworuh nyak nyatruruh iri douk shakri wobuwobren baraen um 10-poreim king-omi douk wata hutogur hupe debeimi iri uwe. Amam ta hurao debeinyi big um hupe king-omi huni enyudok mahin. Aria eshesh ta shupe debeishi banab nyutob,

atin aua meyoh. <sup>13</sup> Aria amudok 10-poreim king ihim-morim hasuhw atin baraan. Amam hakri hupe dodogowim aria huken amamin debeinyi big nyuni dodog enyudok debeinyi mahin um ihish-morim arpesh shumnek enyenyin baraan shugipeshen. <sup>14</sup> Aria amam king-omi huni enyudok mahin ta shuni Nugaen Sipsip nyuni enyenyish armam armago shurpak. Aria Nugaen Sipsip nyuni enyenyishi douk enyen nyagraehesh aria nyahwadesh shasuhw enyenyin baraan sheyotu dodogowish atish iri ta shubo amudok king huni enyudok mahin shihyahesh. Um maresh? Enyudok Nugaen Sipsip douk Debeinyi abom um ihim-morim debeimi aria nyape king abom um ihim-morim king. <sup>15</sup> Aria enyudok ensel wata shopunek nyakripe nyakri, “Abusdok worubus nyak nyatik okwudok yoweikwi armatok kwapenyabus iri douk shakri wobuwobren baraan um sabaishi arpesh. Eshudok arpesh douk shape sabaigosi nahobigos iri. Eshesh douk sisigiruh yegeshiweruh aria sheneyagwreh sabainyi kupainyi baraan iri. <sup>16</sup> Aria aruhudok 10-poreiruh shuworuh nyak nyatruruh iri huni enyudok debeinyi mahin ta juwehosin um okwudok yoweikwi armatok. Aria eshesh ta shok kwugok aria shutruk shuwaruk owokwih rupeh aria okwok ta kwugor kwupe aria kwukus. Aria eshesh ta shupe shutah eibug-ikwum shugwoh aria okwok ta shukuhur shukweh nyih aria hunuk hiyatokuk. <sup>17</sup> Um maresh? Eshesh douk Iruhin neshuhur um shugipesh ananim atum urkum. Namudok aria anan nakri wosik um amam husuhw atin baraan aria enyudok amamin dodog douk amam haraen um hupe king iri um ta wata huko enyudok mahin. Aria enyen ta nyupe dodogowini king arigaha abudok nyutob Iruhin ananin baraan nyutogur adurin abom obi nyutob butogur. <sup>18</sup> Aria okwudok armatok nyak nyatrak iri douk shakri wobuwobren baraan um abrudok debeiburi wabur. Ababur douk bape kabi anan debeini nyeigur nyato iruh-uman iri arman douk nape debeini um ihim-morim king hape agundok atap iri um.

## 18

### *Debeiburi Wabur Babilon Bananukuk Jurug*

<sup>1</sup> Douk enyudok nyanakuk aria eik yatigu kupainyi ensel nyakutukuk iruhw heven nyabuhi. Enyen douk nyarao debeinyi big aria enyenyih rupeh hatrugun abom aria ihigunum agundok atap gor nakusuk. <sup>2</sup> Aria enyen nyahwar debeg nyakri,

“Abrudok wabur Babilon nyeigur nyato iruhw aburi douk bananukuk jurug! Ababur bananukuk! Aria douk ababur batogur yoweiburi wabur um eshudok ihishmorim sagabehos shuni warehos shuni ogwuhudok yoweiguhwi hwanabosusih abom iri armiguhw hwupeum.

<sup>3</sup> Um maresh? Sabaishi arpesh shape ihigos-morim nahobigos iri shawok okwokwibar wainibar abar.

Abrudok abar douk shakri wobuwobren baraan um okwokwih yoweih aih um shani okwok shenek wehrur um.

Eshesh douk shatik arpesh shape Babilon iri esheshih yoweih aih aria shagipeshesh shenekeh.

Aria amudok ihim-morim king hape agundok atap iri hani abrudok waburishi arpesh shenek wehrur um.

Aria eshudok douk shenek bisnis agundok atap iri

sharao debeibori utabor um ehudok yoweih aih douk

eshudok shape abrudok wabur iri shape shenekeh iri.”

<sup>4</sup> Aria eik yemnek kupaihi mah gani iruhw heven. Aria enyudok nyeyagwrehi iri nyakri,

“Ipak eikishi arpesh, ipak pukutukuk abrudok wabur aria putogrukuk um mare puni abrudok waburishi arpesh punek eshudok yoweishi inahos eshesh shape shenekesh iri.

Ipak pukutubur-ukuk um ipak mare pumnek debeiri eriger douk ta eshesh shumnekar iri.

<sup>5</sup> Um maresh? Eneshenesh yoweishi inahos eshesh shape shenekesh iri douk sabaishi abom shape kabi waripak kwagit nyubuhas kwoshem um.

Aria eshesh shakus shato gani iruhw heven aria Iruhin natrish aria anan urkum moromesh.

<sup>6</sup> Ipak padukemesh eshudok eneshenesh yoweishi inahos okwok kwape kwenekesh iri douk sabaishi abom.

Douk namudok aria ipak ta pushanomumok wosik atin okwokwish yoweishi inahos aria peshopokesh shutoumok.

Okwok kwabadig nubutibari abar bor kap aria ipak pabarah.

Douk namudok aria ipak wata pubodig nubutibari abar namudok atin aria pukok kwubarah um kwumnek arudokmori atin debeiri eriger okwok kwenek ipak pemnekar iri.

Aria pushopokor rutoumok shopunek.

<sup>7</sup> Okwok douk kwatuk okwokwin nyeigur nyato iruhw aria kwenek eneshenesh yoweishi inahos douk okwok mishin nyakitak um kwunekesh iri.

Aria okwok nyeigur nyato iruhw kworao debeinyi amaen wosikumok um eshudok yoweishi inahos douk riguk okwok kwape kwenekesh iri.

Aria okwok numun nanagunukuk aria kwakri,

‘Eik yape debeikwi kwini!’

Eik kabi douk raminen madae nugokuk uwe um.

Aria eik ta mare enen amaen nyutogrume aria nyuneke ireh.

Adur atin ta uwok!’

<sup>8</sup> Douk namudok aria atuh nyumnah meyoh sabaishi yoweishi abom eshudok ta shutogurum abrudok wabur. Eshudok yoweishi inahos douk eshudok.

Eneheneh yoweih arugeh ta huto-grumesh aria ta shureh debeg.

Aria debeirubi nyurub ta besh aria nyih shopunek ta hunish.

Um maresh? Debeini Iruhin apa nenek skelumesh aria nawanamesh eneshenesh yoweishi inahos eshesh shenekesh iri douk dodogowini abom.

<sup>9</sup> “Aria amudok king hape agundok atap iri hani okwudok armatok shenek wehrur um aria shenek sabaishi eneshenesh yoweishi shopunek. Aria amam ta hutiku nyih hunuk aria nyugus supe sukiah aria amam ta hurepok yowiyokuk.

<sup>10</sup> Amam ta hunogugur abom um arudok debeiri eriger douk okwok kwemnekar iri aria ta hiyotu rougun aria hupe hukri, ‘O giha-mobur abrudok nyeigur nyato iruhw maburi wabur Babilon!

Giha-umep ipak arpesh pape abrudok dodogowiburi wabur iri! Douk banab nyutob, atin aua meyoh aria ipak pemnek debeiri eriger jurug um eneshenesh yoweishi inahos ipak pape penekesh iri!’ ”

<sup>11</sup> “Aria eshudok arpesh douk shape shenek bisnis agundok atap iri ta urkwip purum abrudok wabur aria esheshiruh aparuh ta yoweruh aria shupe shureh. Um maresh? Ta mare wata enesh kupaishi arpesh shutor anah esheshih jah, uwok. <sup>12</sup> Ta mare enesh arpesh shutor ahudokmori jah. Gol iri siliwa,

shuni yopubori utabor, buni yopubi abom weiyoub douk shatarub debeibori utabor iri. Shuni yopihi abom shigorih-wihi rupeh huni eneh biyag yomogih owishiborihi rupeh, huni eneh yopihi abom wogeruhihi rupeh. Huni ihigomorim rowos douk seisik yopuri unar wosik iri, suni ihishmorim eshudok douk shenekesh enen mahin douk shahwaren um elefan iri enyenyiruh naruh iri. Shuni eshudok douk shenekesh agusudok rowos douk shatoragos debeibori utabor iri, shuni eshudok douk shenekesh enen akitohinyi kapa nyeigurinum bras iri. Shuni eshudok douk shenekesh ainab iri, shuni eshudok yopishi abom douk shenekesh anabor yopubori utabor iri. <sup>13</sup> Eshudok shuni ahudokmori jah shopunek. Enyudok shanyoh iri rowog sinamon, nyuni enesh eshudok kabi douk yabro um, shuni enesh eshudok douk



shesheh sheisik wosik iri. Shuni enyudok yopinyi sanda douk shahwaren um mer iri, shuni anas gris douk shahwaras um frankinsens iri. Eshudok shuni wain iri arudok sharah iri wel, shuni sabainyi abom plaua, shuni wit douk kabi douk rais um. Shuni bulmakauhos iri sipsip iri hwosahos shuni wilkarahos, shuni arpeshe douk wata shape sharahaen iri. Eshudok douk shape shakamum kupaishi shenekumesh mour meyoh iri. Eshudok ihishmorim shuni arpeshe<sup>18:13</sup>ta mare wata shutorish atin, uwok.

<sup>14</sup> “Aria eshudok douk shenek bisnis iri ta shukripok namudok shukri, ‘Eshudok eneshenesh ihishmorim douk nyak mishin nyakitakumesh um nyuraesh iri douk shanak shawishuk. Aria nyakish yopishi eshudok douk shatorish debeibori utabor iri shani eneshenesh yopishi eshudok douk shatrugun abom iri shopunek douk shanak shawishuk. Aria nyak ta mare wata nyutrish atin!’ <sup>15</sup> Aria eshudok douk shenek bisnis um shonakam um eneshenesh eshudok aria shatorish sabaibori utabor eshudok arpeshe shape abrudok wabur Babilon iri ta shunogugur abom um arudok debeiri eriger douk ta abrudok waburishi arpeshe shumnekar iri. Aria eshesh ta shunak shiyotuwu rougun aria ta shupe shurepobur. <sup>16</sup> Aria ta shukri,

‘O giha mobur atubur abrudok nyeigur nyato iruhw mobur iri wabur!  
Seiwok ababur bananek yopihi abom shigorihwihi rupeh hani sabaihi owishiborihi rupeh shopunek.  
Aria banaginohw gol rani yopubori abom utabor  
bani weiyoub douk shatorish debeibori utabor iri!

Eshudok eshesh douk shatrugun abom iri.  
<sup>17</sup> Aria wata shopunek banab meyoh nyutob, atin aua meyoh  
aria ihishmorim eneshenesh eshudok douk  
shatorish debeibori utabor iri wata shanak shawishuk.’ ”

“Aria sabaimi hasuhw bodaeg kruruhyor douk wahur youg iri hani sabaishi pasindia douk shator kruruhyor aria sharahaen shanak kupairubi warub iri, hani amudok henek mour kruruhyor iri, shani ihishmorim arpeshe douk apa shenek esheshin mour youg iri eshesh ihishmorim ta shiyotuwu rougun um abrudok wabur Babilon. <sup>18</sup> Aria abudok nyutob ta shiyotu shutik wabur nyih hunubur aria nyugwus sukidak suto obi nyutob, eshesh ta shukri, ‘Douk madae anabur wabur bape agundok atap iri bupe kabi abrudok nyeigur nyato iruhw aburi wabur um uwe, uwok meyoh!’ <sup>19</sup> Aria eshesh ta shuhur nyupruk<sup>18:19</sup>shunuwatom baragos aria ta shupe shureh debeg shukri,

‘O giha-mobur atubur abrudok wabur!

Eshudok ihishmorim arpeshe douk shogrem kruruhyor iri

sharao sabaibori utabor abrudok wabur. Ipak pakri giha mobur abrudok wabur. Um mareshe?

Douk banab nyutob, atin aua meyoh abrudok waburishi

ihishmorim eneshenesh yopishi eshudok shanak shawishuk!

<sup>20</sup> Aria ipak enelahos pape iruhw heven iri

puni ipak Iruhin ananish arpeshe,  
puni ipak aposel douk Iruhin nagraehep um

punak pukripesh ananin baraen iri,

puni ipak profet douk pakripesh

Iruhin nakripep-enyi baraen iri,

ipak ihishmorim ta punadudareh.

Um mareshe? Iruhin nenek kwotimabur aria nawanamobur yoweishi inahos abrudok wabur

aria bemnek debeiri eriger um agundok seiwok ababur barik benek ipak pemnek debeiri eriger um.’ ”

<sup>21</sup> Douk enyudok baraen nyanak nyatuhuk aria eik yatik enen dodogowinyi

**18:13 18:13** Enesh arpeshe shape shakamum kupaishi shenekumesh mour meyoh iri. Kupaishi arpeshe apa shatorish utabor kabi douk apak mator enesh eshudok shakus stuahas iri um. **18:19 18:19** Enyudok baraen um shunuwatom nyupruk barag um douk sheneken um shakri shiyabigesh um esheshiruh aparuh yoweruh abom um agundok abrudok wabur bananukuk um.

abom ensel nyohur onok debeikwi bur-  
buduk<sup>18:21</sup>nyawashok kwagruluk youg  
aria nyakri,

“Ta shuwashak abrudok debeiburi wabur  
Babilon bugrukuk debeg atin gani  
atap

kabi eik yawashok okwudok burbuduk  
kwagruluk um.

Aria arpesh ta mare wata shutrubur atin,  
uwok.

<sup>22</sup> Aria eshudok kabi douk gitahas-umori  
esheshih meh

huni eneshenesh douk shabirakesh  
shenek yopugi musik iri,

shuni buwaen iri aruruh esheshih meh  
ta mare wata shumnekeh atin abrudok  
wabur, uwok!

Aria shopunek, eshudok douk shadukemesh  
um

shunek enenyenen mour iri ta mare wata  
shutrish atin.

Aria amudok utom douk arpesh shape  
shakwum shaworish urubit wit iri  
shopunek

ta mare wata shumnekam miyagwreh  
atin abrudok wabur, uwok.

<sup>23</sup> Aria nyih lamhosih ta mare wata shutr-  
ish atin.

Aria eshudok arpesh douk shakri shuna-  
raum iri esheshih meh shopunek ta  
mare shumnekeh atin.

Aria riguk arpesh shape shenek bisnis  
abrudok wabur

aria sharao sabaibori utabor  
aria shatogur debeishi nyeiguhw abom  
shato-umeshi.

Aria douk uwok. Aria eshudok arpesh  
shape abrudok wabur iri

shenek anaruh subagwiruh aria shenek  
rohw um

ihishmorim arpesh douk shape ihigos-  
morim nahobigos iri.

<sup>24</sup> Aria Iruhin natik um abrudok wabur  
benek yoweishi inahos

babo amam profet hani sabaishi Iruhin  
ananish arpesh shagok.

Douk namudok aria baraan abrudok  
wabur banasuwen.

Aria ihishmorim arpesh douk  
kupaishi shaesh shagok iri shopunek,

**18:21** **18:21** Enyudok baraan douk nyakrium okwudok debeikwi burbuduk iri douk nyakrium anam takweimi utom douk eshesh shape shemakwiyesh urubit wit um shaworishat um.

baraan douk nyanak um abrudok atubur  
wabur banasuwen.”

## 19

*Iruhin Ananish Arpesh Shanadudareh  
Um Agundok Babilon Bananukuk Um*

<sup>1</sup> Douk enyudok nyanakuk aria yem-  
nek enen arpen nyeyagwrehi debeihi  
mah kabi douk sabaishi arpesh shape  
sheneyagwreh iruhw heven iri um  
nyakri,

“Apak mutuk Iruhin ananin nyeigur  
nyuto iruhw!

Apakin Iruhin anan atun narap  
matanamori mape wosik.

Aria agundok anan dodogowin natrugun  
abom um douk  
nape abom um anan atun.

<sup>2</sup> Anan neneken um arpesh iri baraan um  
nasuhw esheshig durdurig kwotog um  
douk yopug wosik abom aria  
adurig atug!

Aria okwudok armatok douk kwani ku-  
paimi shenek wehrur um  
kwenek sabaishi arpesh shape agundok  
atap iri

shakutukuk yopihi aih aria shagipesh ok-  
wokwih yoweih aih.

Douk namudok aria Iruhin nenek kwo-  
tumok nakri okwok yoweikwi.

Aria shopunek, okwok kwabo eshudok  
arpesh douk

shenek ananin mour iri shagok aria douk  
anan douk nawanamok enyudok  
yoweinyi poe.

Okwudok armatok douk shakri wobuwo-  
bren baraan um  
abrudok wabur Babilon.”

<sup>3</sup> Aria sabaishi shape iruhw heven iri  
shape shahwar debeg shakri,

“Apak mutuk Iruhin ananin nyeigur  
nyuto iruhw!

Aria ogwusudok nyugwus douk sakih  
ehudok nyih douk hanu

abrudok debeiburi wabur iri ta sukih suto  
ihih nyumneh!”

<sup>4</sup> Aria amudok 24-poreim debeimi ar-  
mam hani eshudok nubatish dodogowishi  
douk mishish shoshesh iri shabuh shoduk

ohrubus aria shenek lotu um Iruhin douk nape ananin debeinyi wagitur iri aria shahwar shakri,

“Adur atin, apak mutuk Iruhin ananin nyeigur nyuto iruhw!”

<sup>5</sup> Aria eik yemnek anah mah agundok enyudok debeinyi wagitur nyakus um. Aria enyudok arpen nyeyagwrehi iri nyakri,

“Ipak ihishmorim penek Iruhin ananin mour iri puni

ipak nyeiguhw shatoumep iri, 19:5

puni nyeiguhw wokepari douk punogugur um Iruhin penek lotuman

aria pusuhw ananin baraen pugipeshen iri

putuk ananin nyeigur nyuto iruhw!”

*Nugaen Sipsip Ta Nyurao Enyenyik Irohukwik Aria Ta Shunek Debeguni Worigun*

<sup>6</sup> Aria eik yemnek enen arpen nyeyagwrehi debeihi mah kabi douk sabaishi arpesh shape sheyagwrehi um. Ahah douk kabi worub batogur beyagwreh um aria kabi utag pogarog debeg um. Aria eik yemnek hakri,

“Apak mutuk Iruhin ananin nyeigur nyuto iruhw!

Apakin Debeini douk anan atun Dodogowini Iruhin abom.

Anan douk nape debeini um ihishmorim arpesh shani

eneshenesh eshudok!

<sup>7</sup> Anan douk dodogowini arman abom.

Aria douk apak ta aparuh yopuruh

aria munadudareh-uman aria mutuk ananin nyeigur nyuto iruhw!

Nyumnah douk hanaki um Nugaen Sipsip nyurao enyenyik irohukwik. 19:7

Baugenyum baraen um Nugaen Sipsip enyenyik irohukwik douk nyakrium Kraiss ananish arpesh.’

Okwok douk kwenek garibog kwape um eshesh biyesh shunaraum um.

<sup>8</sup> Okwok douk shokok anah yopihi hatrugun abom iri

shigorihwihi rupah kwohur.”

Ehudok rupeh ihih douk shakri wobu-wobren baraen um ehudok yopihi abom aih douk Iruhin ananish arpesh shape

shenekeh iri. <sup>9</sup> Aria enyudok ensel nyakripe nyakri, “Nyak wem enyudok baraen. Baraen enyudok.

‘Eshudok arpesh douk Iruhin nahwaresh um shunaki um

agundok debeguni worigun douk shenek-agun um

Nugaen Sipsip nyurao okwok iri um, douk eshesh wosik shanadudareh.’”

Aria enyudok ensel wata shopunek nyakripe nyakri, “Enyudok Iruhin ananin baraen douk adurin abom atin.”

<sup>10</sup> Aria eik yabuh yoduk ohrubus hurukatin um enyenyiruh yeriweruh um yakri inek lotuman. Aria enyen nyakripe nyakri,

“Nyak mare nyunek lotu um eik, uwok.

Nyak nyunek lotu um Iruhin atun.

Eik yani nyak wani eshesh Kristen,

apak ihishmorim douk munek Iruhin ananin mour iri atop.

Ipak douk pasuhw enyudok baraen Jisas nakripepen pagipeshen iri.

Enyen douk enyudok atin baraen nyohur amam profet amamiruh aparuh

aria hakripesh Iruhin nakripam-enyi baraen.”

*Arman Netem Shigorihwinyi Hos Iri Anan Douk Kraiss*

<sup>11</sup> Aria ogwudok orug douk gweshiguk iruhw heven iri tukarog gwanak gweyatuk tukwotukwan aria eik yatigu enen shigorihwinyi hos nyeyotu numun heven.

Aria anudok arman netem enyudok hos iri douk nanahwar namudok. Anan neyotu dodogowin atun nagipesh ananin baraen wosik aria neyagwreh adurin atinyi baraen iri. Aria douk anan nasuhw arpeshig kwotog nenekog wosik atin. Aria anan nenek wanohw um, anan apa nagipesh ananish yopihi abom aih atin. <sup>12</sup> Ananis nabes sape kabi nyih hanu jurareh iri um. Aria anan nowem um sabaigwi yopugwi hatog douk king-omi atum hogwem iri um ananig barag. Aria shopunek, enen nyeigur nyetem ananishw yegenyihw. Kupaishi mare shudukem um baugenyum baraen um enyudok nyeigur uwe, uwok. Anan atun nadukemen.

<sup>13</sup> Aria ahudok rouhi rupah anan nohur iri douk shosegruh owishibor aria owishibor atubor bakrupoh. Aria eshesh shahwaran enyudok nyeigur shakri, "Iruhin Ananin Baraen." <sup>14</sup> Aria eshudok ami douk shape iruhw heven iri shenek yopihi abom shigorihiwihi rupeh aria shetem esheshish shigorihiwishi hwosahos aria shape shagipeshan. <sup>15</sup> Aria anat wanohwit bainat tatograri anudok arman ananit nokwat. Aria anan ta nukwu atudok bainat um nubo sabaishi arpeshe douk shape sabaigosi nahobigos iri. Aria anan ta nusuhw anam butum douk shenekam ain iri aria nupe debeini um ihishmorim arpeshe. Aria anan ta nushish wainip shurkwip agudok debeigari tenk douk shenekag utabor iri. Enyudok douk shakri wobuwobren baraen um agudok Dodogowini abom Iruhin nabo ihishmorim eshudok shabuhuk iri juwehosin abom um. <sup>16</sup> Aria enen baraen nyetem anudok arman ananin mib nyani ananin rupah. Enyudok baraen douk nyakri namudok,

"Debeini um ihim-morim king aria shopunek Debeini um ihim-morim debeimi."

<sup>17</sup> Aria eik yatigu enen ensel nyeyotuwini nyumnahin aun aria nyahwarugu debeg ogwuhudok ihiguhw-umorim armiguhw douk hwanadudareh hwanak iruhw iri nyakri, "Ipak ihiguhw-morim punakumori Iruhin nenekagun iri debeguni wori-gun!" <sup>18</sup> Ipak punaki puwok amudok kingomi huni amudok douk hape debeimi um amam soldia iri huni amudok dodogowimi amam amamiruh yegeshiweruh. Aria shopunek, puwok hwosahos shuni amudok douk hetem hwosahos iri, huni ihishmorim arpeshe. Eshudok douk shape shakamum kupaishi shenekumesh mour meyoh iri, shuni eshudok douk shape wosik iri, shuni ihishmorim nyeiguhw shato-umesh iri,<sup>19:18</sup>shuni nyeiguhw wokeshi esheshiruh yegeshiweruh!"

<sup>19</sup> Aria eik yatik um enyudok debeinyi mahin nyani amudok agudok atapim king hani esheshim soldia shanak sheyotu atugun. Eshesh shanak sheyotu um shuni

anudok arman douk netem enyudok hos iri nini ananim soldia shurpak. <sup>20</sup> Aria eshesh shasuhw enyudok debeinyi mahin nyani anudok nenek rohwumesh iri profet showeshikesh. Anudok profet douk nenek enenyenen Iruhin atun neneken iri mour agudok enyudok mahin nyape um. Riguk anudok profet douk nenek sabainyi mour kabi Iruhin atun neneken iri um aria nenek rohw um eshudok arpeshe douk sharao enyudok mahin enyenyin kak aria shenek lotu um enyenyir aborir iri. Aria enyudok mahin nyani anudok profet eshesh mishish wata shoresh aria showashesh shagrukuk agudok nuwag douk nyih hanuwi amudok utom douk shahwaram salfa iri hanu um. <sup>21</sup> Aria anudok arman douk netem hos iri nabo enyudok mahin nyani anudok profet esheshim soldia hagok hatuh. Anan makwumam atudok bainat douk tatograri ananit nokwat iri. Douk amam hagok aria ihiguhw-umorim armiguhw hwanaki hwape hwawok amamiruh yegeshiweruh aria ogwoguh dugaroguh abom wosik atin.

## 20

### *Satan Nanaweshik Nape Sabaishi Um 1,000-poreish Kwarahos*

<sup>1</sup> Aria wata shopunek yatigu kupainyi ensel nyakutukuk iruhw heven nyabuhi. Enyen nyasuhwi anan debeini sen nani ki um agudok nuwag douk gagor gabuhuk gani atap aria atapig um madae gubuh giyotu anabik iri uwe. <sup>2</sup> Aria enyudok ensel nyasuwor dodog arudok debeiri yur aria nyoweshikor anudok sen um nyuweshikor rupe um 1,000-poreish kwarahos. Arudok yur douk shahwaror um seiwokiri yur iri. Aria shopunek, arar douk shahwaror um renek rohw um arpeshe rakri eshesh shenek yoweishi inahos atish iri o Satan. <sup>3</sup> Aria enyudok ensel nyawashak arudok debeiri yur Satan rabuhukuk agudok nuwag douk gagor gabuhuk gani atap iri aria nyawarukuk wit dodog. Enyen nyawarukuk wit um arudok yur mare wata runak runek rohw

19:18 **19:18** Putik futnot nyape Revelesen 11:18 iri.

um arpesch douk shape ihigos-morim nahobigos iri. Arar ta rupe arigaha 1,000-poreish kwarahos shunak shudiguk aria enshel ta wata nyijikumar wit aria arar ta wata rutogur rupe meyo rupe runarahaen banab meyo nyutob.

<sup>4</sup> Aria eik yatigu enesh debeishi wagturahos douk king-omi atum hapenyesh iri shakus. Aria enesh arpesch shatem eshudok wagturahos. Eshesh douk Iruhin nekesh debeinyi big um shusuhw arpesch esheshig kwotog. Aria shopunek, yatik sabaishi arpesch douk shasuhw Iruhin ananin baraan dodog shagipeshen iri esheshish mishish. Eshesh douk eshudok shakripesh baraan kupaishi um Jisas, aria horim shatupok esheshigos baragos aria shaesh shagok iri. Eshesh douk madae shurao enyudok debeinyi mahin enyenyin kak nyupe esheshish domaesh aria esheshish roguhwa aria shunek lotu um enyen nyuni enyenyir aborir iri uwe. Eshesh wata mishish shawishesh aria shakitak shani Kraish shape debeishi um eshudok 1,000-poreish kwarahos. <sup>5</sup> Aria abudok nyutob eshesh shakitaki um, ahah douk sagomih nyumnah abom um shagok iri shakitaki wonugwegwiruh um. Ihishmorim shagok iri arpesch yapis madae suwishesh abudok nyutob uwe, watak. Eshesh ta eshudok 1,000-poreish kwarahos shunak shudiguk aria eshesh ta kadak yapis suwishesh aria shukitaki. <sup>6</sup> Aria eshudok arpesch douk shukitaki wonugwegwiruh ahudok sagomih nyumnah iri, eshesh ta shunadareh aria shupe Iruhin ananish yopishi abom arpesch. Aria Iruhin nunek yopishi abom um eshesh. Aria agundok um shugiguk shugok um ta mare dodogowigun um nesh shugok anah shopunek, uwok. Eshesh ta shupe kabi pris douk hape henek ofa um eneshenesh eshudok hako Iruhin nani Kraish iri um. Aria eshesh ta shuni Kraish shupe debeishi shusuhw merik um sabaishi arpesch um eshudok sabaishi 1,000-poreish kwarahos.

### *Satan Nemnek Debeiri Abom Eriger*

20:12 **20:12** Putik futnot nyape Revelesen 11:18 iri. 'E'

<sup>7</sup> Douk eshudok 1,000-poreish kwarahos shunak shudiguk aria Satan ta wata jurug um shunuweshik um aria ta shijikuman wit agudok nuwag aria nutograri aduk. <sup>8</sup> Anan ta nutograri um nunak nupe nunek rohw um sabaishi arpesch douk shape ihigosmorim nahobigos douk sape ihigunum agundok atap iri. Eshesh douk shape Gok nani Magok iri. Aria Satan ta nuraesh shunak shupe atugun um shupe shurpak. Eshesh douk sabaishi abom kabi douk sabaiti arukot douk takus anagas um youg iri um. <sup>9</sup> Eshesh shanak ihigunum agundok atap aria sheyotu shersharir Iruhin ananish arpesch shapeum. Eshesh douk shape abrudok wabur douk Iruhin urkum manawasham-abur abom iri. Aria nyih hagruki iruhw heven aria habuhi hanu eshudok Satan ananish soldia heyatesh. <sup>10</sup> Aria eshesh shawashak Satan douk nape nenek rohwumesh iri nagrukuk kupaigi debeigi nuwag douk juwehosihi nyih hanuwi amudok utom douk shahwaram um salfa iri hape hanumi um. Enyudok debeinyi mahin nyani anudok nenek rohwumesh iri profet douk sharik showashesh shabuh shor agudok nuwag. Aria agundok eshesh bishatin ta shupe shunomnek debeiri eriger nyumneh weibus ihih nyumneh.

### *Debeiti Kwot Tatogur*

<sup>11</sup> Aria eik yatigu enen debeinyi shigori-hwinyi wagtur king-omi atum hapenyen iri nyakus. Aria anan debeini netem enyudok wagtur. Aria agundok atap nani iruhw heven sharuwokuk shanak shawishuk. <sup>12</sup> Aria eik yatik eshudok ihishmorim shagok iri. Eshudok douk nyeiguhw shato-umesh iri **20:12** shani nyeiguhw wokeshi sheyotu hurukatin um enyudok debeinyi wagtur nyakus um. Aria ono bumbab wanajik. Aria okwudok onok buk douk eshudok arpesch douk ta shupe wosik ihih nyumneh iri esheshish nyeiguhw shatemokwi shopunek kwanajik. Aria anudok netem enyudok debeinyi wagtur iri natic eneheneh aih hatem oudok bumbab iri douk eshudok arpesch shape shenekeh iri. Aria anan

nenekumesh baraen wosik-umesh um ihismorim eneheneh aih douk eshesh shape shenekeh iri. <sup>13</sup> Aria ihismorim shagok iri douk seiwok shagok youg aria esheshiruh yegeshiweruh horukuk youg iri wata shakutukuk youg shakitak shatowi. Aria ihismorim shagok iri douk shagok shanak shape agundok shagok iri shanak shapeum iri wata shakitak shatowi. Eshesh shakitaki shape aria anudok netem wagitur iri nenekumesh baraen ihismorim atin atin wosik-umesh abom um eneheneh aih iri mour eshesh shape sheneken iri. <sup>14</sup> Aria gok nyani agundok shagok iri shapeum nanawashak nagrukuk agudok nuwag douk nyih hape hanug iri. Agudok nuwag agag atug douk shakri nyagiguk iri gok ta arpesch shubuh aria mare shugok anah shopunek um. <sup>15</sup> Aria ta enesh arpesch esheshish nyeiguhw madae shutem okwudok buk douk eshudok arpesch douk ta shupe ihih nyumneh iri esheshish nyeiguhw shetemek iri um, eshesh ta shunawashak shugrukuk agudok nuwag douk nyih hanug iri.

## 21

### *Namuburi Wabur Heven Aria Namubi Amnab*

<sup>1</sup> Douk enyudok nyanakuk aria eik yatigu namuburi wabur heven bani namubi amnab shape. Barik iri wabur heven bani barik iri amnab shani youg shanak shawishuk abom aria madae enesh shupe uwe. <sup>2</sup> Aria eik yatigu abrudok yopuburi wabur Jerusalem. Abatur douk bape iri agundok Iruhin napeum aria baktukuk iruhw heven bape babuhi. Abrudok wabur douk shaginohwobur kabi douk onok armatok douk kwanaginohw kwenek yopihi atih rupeh aria kwape um kwuni okwokwin raminen shunaraum iri. <sup>3</sup> Aria eik yemnek anah mah agundok enyudok debeinyi wagitur nyakus um. Aria enyudok arpen nyeyagwrehi iri nyakri debeg, "Ipak pumnek! Douk Iruhin nani arpesch shape atugun! Aria anan ta nini eshesh shupe aria eshesh ta shupe ananish atish arpesch. Aria anan ta nupe esheshin debeini Iruhin. <sup>4</sup> Aria anan

ta nubatikumesh abih esheshis nabes aria eshesh ta mare wata shugok atin, uwok. Aria esheshiruh aparuh ta mare wata yoweruh aria shumnek anar eriger aria shureh, uwok. Ihinyumorim enenyenen douk seiwok nyape nyatogur um arpesch iri douk nyanak nyawishuk abom."

<sup>5</sup> Aria anudok nape enyudok debeinyi wagitur iri nakri, "Ipak pumnek! Douk eik yenek ihismorim eneshenesh eshudok shape iruhw atap iri shatogur namushi!" Aria anan wata shopunek nakripe nakri, "Nyak nyuwem um enyudok baraen douk iganigadae nyemneken iri anap shup. Um maresch? Enyudok baraen douk adurin abom aria wosik um arpesch shumneken aria shusuhwen dodog shugipeshen." <sup>6</sup> Aria anan nakripe shopunek nakri, "Eshudok eneshenesh douk shatogur shatuh! Seiwok baugos um ihismorim eneshenesh eshudok watak enesh shutogur shupe uwe aria eik yape. Aria kweipon shopunek ta ipe arigaha hugiguk iri nyumnah hutogur. Aria meinyi arpen abar baen iri, eik ta iken anabar abar nyubroh meyoh. Enyen mare nyutorabar, uwok. Abrudok abar douk bakih atap meyoh iri. Ababar douk ta arpesch shubroh aria shupe wosik abom ihih nyumneh iri. <sup>7</sup> Aria meinyi arpen douk nyiyotu dodogowin atin nyunek wanohw nyubo yoweishi inahos shubuhuk iri, enyen ta nyugrem ihismorim eikish yopishi eshudok eneshenesh. Aria eik ta ipe enyen nyenek lotume iri Iruhin, aria enyen ta nyupe eikin batowin. <sup>8</sup> Aria eshudok douk shanogugur aria wata shatanam shenek yoweishi inahos iri, shuni eshudok douk madae shusuhw eikin baraen dodog shugipeshen iri uwe, shuni eshudok douk shenek eneshenesh yoweishi inahos iri, shuni eshudok douk shabo kupaishi arpesch shagok iri, shuni eshudok douk shenek wehrur um iri, shuni eshudok douk shenek ouruh iri, shuni eshudok douk shenek enenyenen um yoweiruhi subagwiruhi iri, shuni eshudok douk shenek lotu um eshudok douk madae adurimi god omi iri uwe, shuni eshudok douk shenek rohwmesh iri, es-

hesh ihishmorim ta shunak shupe agudok nuwag douk juwehosihi nyih hape hanu agari. Agudok nuwag agag douk ta arpesh shubuh aria mare shugok anah shopunek um.”

### *Namuburi Wabur Jerusalem*

<sup>9</sup> Aria enen ensel um eshudok 7-poreish enselahos douk shasuhw shagiguk abom iri 7-poreish yoweishi abom eshudok eneshenesh iri nyanaki aria nyakripe nyakri, “Nyak yowi aria iyabigen nugaen Sipsip enyenyik irohukwik.” <sup>10</sup> Aria Iruhin ananin Mishin nyatogrume dodogowin atin aria agundok eik kabi douk yabo yomnis um. Aria enyudok ensel nyare wanak wato onohw debeihwi rouhwi yoduhw. Aria enyen nyeyabige abrudok Iruhin ananibur yopuburi wabur Jerusalem. Ababur douk baperi agundok Iruhin napeum aria bakutukuk iruhw heven bape babuhi. <sup>11</sup> Aria agundok douk Iruhin dodogowin abom aria natrugun abom um natrugun numun abrudok wabur. Aria ababur babuhi anabik sik kabi douk anam yopumi utom douk shatorum debeibori utabor iri mabuhi um. Aria shopunek, ababur babuhi kabi douk anam utom jaspa mani wenyir shabuhi um. <sup>12</sup> Aria arbudok narub douk sharukarubi narub um abrudok debeiburi wabur iri douk debeirubi abom aria rourourubi bato gani iruhw. Aria 12-poreish duahas shape arbudok narub. Aria shopunek, 12-poreish enselahos sheyotu sheyoh um eshudok 12-poreish duahas. Aria asudok 12-poreis awirosish arpesh douk shakitaki Israel iri esheshish nyeiguhw shetem eshudok 12-poreish duahas. <sup>13</sup> Aria bishatin duahas shape gani wobrehah-irub um narub douk bape batik aun nakihumori um. Aria bishatin shape shatik saut, bishatin shape shatik not, aria bishatin shape shatik aun nabuh um. <sup>14</sup> Abrudok debeiburi waburirub narub agundok atapirub um douk betem um 12-poreibor utabor um busuwobur batao dodog iri. Aria enyudok Nugaen Sipsip enyenyim 12-poreim aposel douk riguk enyen nyograeham um hunak hukriפש Iruhin ananin baraan iri

amamish nyeiguhw shatem abrudok 12-poreibor utabor.

<sup>15</sup> Aria enyudok ensel douk nyani eik weyagwreh iri nyasuhw anam butum douk shenekam gol iri um shape shasuhw wigah um eshudok eneshenesh-am iri. Enyen nyakri nyusuhw wigah um abrudok debeiburi wabur buni arbudok debeirubi narub buni eshudok duahas douk shape narub iri. <sup>16</sup> Abrudok debeiburi wabur roubur um bani agundok debebur um douk arag atin abom. Aria enyudok ensel nyakwu enyenyim butum aria nyasuhw wigah um abrudok wabur. Aria douk enyen nyasuhw wigah aria ihiburmorim agundok roubur um bani debebur um bani agundok atap bato iruhw um douk aragam atin abom. Aria shasuhw wigah um, ababur douk rourouburi abom hurukatin um 2,200 kilomita. <sup>17</sup> Aria enyen nyasuhw wigah um narub shopunek. Aria agundok atap bato iruhw um douk hurukatin um 144 mita. Amudok butum enyen nyasuhw wigah um arbudok narub iri douk amudokmori um douk arpesh apa shasuhw wigah um eshudok eneshenesh iri um. <sup>18</sup> Aria arbudok narub douk shenekarub abrudok utabor atubor douk shahwarabor um jaspa iri. Aria wabur ababur kanak shenekabur shakwu yopuri gol douk rabuhi aria ratrugun kabi wenyirumori. <sup>19</sup> Atapirub um arbudok narub douk shenekarub um shunek narub um abrudok wabur iri douk shenekarub dodog. Aria shagihwarub sabaibori sisigibor yopubori utabor douk shatorabor debeibori utabor iri.

Marik iri utom douk

makus atap um masuhw arbudok narub iri douk jaspa.

Aria magiguk iri douk bluporeimi douk shahwaram um sapaia iri.

Aria biobor atum iri douk shigorihwimi douk shahwaram um aget iri,

aria nubatibor iri douk grinporeim douk shahwaram um emeral iri.

<sup>20</sup> Aria anas wisi-ibor iri douk anabigim um owishiborim

aria anabigim um shagarihwim.

Amam douk shahwaram um sadonikis iri.

Aria anas wisi-ibor iri douk owishi-  
borimi douk  
shahwaram um konilian iri.  
Aria namba 7-im douk akitoхими douk  
shahwaram um krisolait iri,  
aria namba 8-im douk sikim grinpor-  
eim douk  
shahwaram um beril iri.  
Aria namba 9-im douk anam sikim  
akitoхими douk  
shahwaram um topas iri,  
aria namba 10-im douk anabigim um  
grinporeim  
aria anabigim um akitoхими iri.  
Aria amam douk shahwaram um kriso-  
pres iri.  
Aria namba 11-im douk anam sikim  
bluporeimi douk  
shahwaram um haiyasin iri,  
aria namba 12-im douk anam sikim  
owishiborimi utom  
shahwaram um ametis iri.

<sup>21</sup> Aria eshudok 12-poreish duaahas douk  
shenekesh shakwu 12-poreib shigorih-  
wibi debeibi weiyoub douk shatarub de-  
beibori utabor iri. Aria eshudok duaahas  
atin atin shenekesh shakwu atut atut  
um debeigwi weiyoubig natog douk shah-  
warog um pel iri. Aria ahudok debeihi  
yah douk hape abrudok debeiburi wabur  
iri douk shenekah yopiri gol aria ahah  
hape kabi wenyir<sup>21:21</sup>um.

<sup>22</sup> Aria eik madae itik Iruhin ananit  
debeiti urupat tutao abrudok wabur uwe,  
uwok. Um maresh? Debeini Iruhin anan  
douk Dodogowin abom nabo ihishmorim  
eshudok shabuhuk iri nani Nugaen Sipsip  
amam kanak hape kabi Iruhin ananit  
urupat um. <sup>23</sup> Aria abrudok wabur mour  
ta mare enen um wah hutao hobur um  
o wabin aun wanyukehin aria nutrugun  
um, uwok. Um maresh? Agundok  
douk Iruhin dodogowin aria natrugum  
abom um, agagun kanak ta nunek ihi-  
gunmorim um abrudok wabur butrugun  
aria bogaragun. Aria shopunek, enyudok  
Nugaen Sipsip enyen kanak nyabuhi kabi  
douk lam um aria nyenekagun bogara-  
gun abrudok wabur. <sup>24</sup> Aria ihishmorim  
arpesh shape sabaigosi nahobigos iri ta

abrudok wabur butrugun-umesh aria es-  
hesh ta shunatrugun aria shurahaen.  
Aria amam king douk hape agundok  
atap iri ta hurao amamibor utabor buni  
ihishmorim eneshenesh amamish yopishi  
eshudok hunak huwish abrudok wabur  
um hakri hutuk Iruhin ananin nyeigur  
nyuto iruhw. <sup>25</sup> Aria nyumneh, abru-  
dok waburish duaahas ta shunejik shupe  
namudok atin. Um maresh? Agundok  
weibus ta mare anabus, uwok. <sup>26</sup> Aria  
ihishmorim arpesh shape ihigos-morim  
nahobigos iri ta shurao esheshibor utabor  
buni yopihi jah shuwish abrudok wabur  
um shutuk Iruhin ananin nyeigur nyuto  
iruhw. <sup>27</sup> Aria ihishmorim eneshenesh  
shabosusih iri yoweishi eshudok shuni  
eshudok arpesh douk shenek eneshenesh  
yoweishi inahos iri, shuni eshudok douk  
shenek abraenyih aih iri, shuni eshu-  
dok douk shenek rohw um kupaishi  
iri ta mare shuwish abrudok wabur,  
uwok. Aria eshudok arpesh douk es-  
heshish nyeiguhw shetem Nugaen Sipsip  
enyenyik buk iri eshesh atish ta shuwish  
abrudok wabur. Okwudok buk okwok  
douk eshudok arpesh douk ta shupe  
wosik abom ihih nyumneh iri esheshish  
nyeiguhw shetemokwi.

## 22

*Worubibar Abar Bani Shurkwip Peir  
Rowog Iri Douk Ta Arpesh Shishoh Aria  
Shupe Wosik Abom Iri Ihih Nyumneh*

<sup>1</sup> Aria enyudok ensel wata shopunek  
nyeyabige anab debeibi worub. Abudok  
worub shopunek douk bogarab abom  
kabi douk wenyir ratrugun um. Aria  
arpesh shuwok abar abudok worub iri  
ta shupe wosik abom ihih nyumneh.  
Abudok worub douk batobe iri agundok  
enyudok debeinyi wagitur douk Iruhin  
nani Nugaen Sipsip hatemenyi nyakus  
um. <sup>2</sup> Aria abab bau banak orokohu-  
nih um ahudok debeihi yah douk hape  
abrudok wabur iri. Aria enesh rowos  
shatao wobuwobur abudok worub. Aria  
eshudok arpesh douk shuwok shurkwip  
peir eshudok rowos iri ta shupe wosik

<sup>21:21</sup> **21:21** Arudok gol arar douk anar sikir. Arpesh shutrur um, esheshis nabes ta sunak dukwotis sunakuk  
kabi shape numun urupat shenek narubumat glas iri shatik glas nabes arukwutis shatik aduk um.



abom ihih nyumneh. Aria shurkwip apa peir ihibmorim aub enen kwar. Aria esheshis shus ta sunek ihishmorim eneheneh arugeh henekesh iri arpesh douk shape ihigosmorim nahobigos iri shutogur yopish. <sup>3</sup> Aria ihishmorim eneshenesh yoweishi inahos eshudok shuni arpesh douk Iruhin nakri adur iruhw abom um nakri wokumesh iri ta mare enesh shukus abrudok debeiburi wabur, uwok.

Aria Iruhin nini Nugaen Sipsip amamin debeinyi wagitur ta nyukus abrudok wabur. Aria eshudok douk shenek Iruhin ananin mour iri ta shupe shunek lotuman. <sup>4</sup> Eshesh ta shutik ananig yamag aria ananin nyeigur ta nyutem esheshish domaesh. <sup>5</sup> Aria agundok weibus ta mare anabus aria eshesh ta mare shuhem enesh lamhos, uwok. Aria mour ta mare enen um wah hutao um hunekagun juwehos-igun um, uwok. Um maresh? Agundok douk Debeini Iruhin natrugun abom um ta nutrugun-umesh. Aria eshudok douk shenek ananin mour iri ta shupe debeimi king-omi ihih nyumneh.

### *Jisas Hurukatin Um Nunaki*

<sup>6</sup> Aria enyudok ensel nyakripe nyakri, “Enyudok ihinyumorim baraan douk nyak nyenyem okwudok buk iri douk adurin atin abom. Aria enyen douk wosik abom um ihishmorim arpesh shumneken aria shusuhwen dodog shugipeshen. Aria debeini, anan douk Iruhin douk apa nohur amam profet um hunak hukripesh ananin baraan iri. Anan neshopok ananin ensel nyanaki um nyiyabig ihishmorim shenek ananin mour iri um ihishmorim eshudok eneshenesh douk hurukatin um shutogur iri.”

<sup>7</sup> Aria Jisas nakri, “Mnek, eik douk hurukatin um inaku itogrump! Aria eshudok arpesh douk shugipesh Iruhin ananin baraan nyetem okwudok Buk iri douk nyakrium eshudok douk ta shutogur iri, eshesh ta shunadudareh.”

<sup>8</sup> Aria eik Jon, eik kanak yemnek ihinyumorim baraan aria yatik ihishmorim eshudok douk yeshem okwudok Buk iri. Aria douk yemnek enyudok baraan aria shopunek yatik eshudok

ihishmorim eneshenesh iyoh aria yabuh yoduk ohrubus hurukatin um enyudok ensel douk iganigadae nyape nyeyabige ihishmorim eshudok iri enyenyiruh yeriwuruh aria yakri inek lotuman. <sup>9</sup> Aria enyen nyakripe nyakri, “Nyak mare nyunek lotu um eik, uwok! Eik yani nyak wani nyakim ashukenyim amam profet, mani ihishmorim arpesh douk apa shagipesh enyudok baraan douk nyetem okwudok Buk iri, apak ihishmorim douk munek atin mour iri. Douk namudok aria nyak nyunek lotu um Iruhin atun!”

<sup>10</sup> Aria enyen nyakripe nyakri, “Nyak mare nyubeshuk enyudok Iruhin ananin baraan douk nyetem okwudok buk iri, uwok. Um maresh? Abudok nyutob douk Iruhin nakri nunek eshudok douk shetem okwudok buk iri shutogurum douk banaki hurukatin. <sup>11</sup> Douk namudok aria eshudok arpesh douk shenek yoweishi inahos iri ta shupe um shunek yoweishi inahos namudok atin. Aria eshudok douk shenek eneshenesh shanabosusih abom iri yoweishi inahos iri ta shupe um shunek yoweishi inahos namudok atin. Aria eshudok arpesh douk shenek yopihi aih iri ta shupe um shunek yopihi aih namudok atin. Aria eshudok arpesh douk shape Iruhin ananish atish iri ta shupe ananish atish abom.”

<sup>12</sup> Aria Jisas nakri, “Mnek! Eik douk hurukatin um inaku. Aria eik ta iraougu eshudok um iko ihishmorim arpesh atin atin um iwanamesh ihishmorim eneheneh yopihi o yoweih aih eshesh riguk shape shenekeh iri. <sup>13</sup> Douk seiwok baugos um ihishmorim eneshenesh eshudok madae enesh shupe uwe, aria eik yape. Aria kweipon shopunek eik ta ipe arigaha hugiguk iri nyumnah hutogur.

<sup>14</sup> Aria eshudok arpesh douk apa shanokwrup esheshih rupeh hatogur yopih iri, eshesh wosik ta shunadudareh. Um maresh? Eshesh ta shurao big um shuwok epudok shurkwip douk peir enyudok rowog douk ta shupoh aria shupe wosik abom ihih nyumneh iri. Aria shopunek, eshesh wosik ta shunak shuwish abrudok waburish duahas aria shuwish shupe numun. <sup>15</sup> Aria eshudok douk shenek yoweih abraenyih aih

iri shuni eshudok douk shenek ouruh aturuh iri, shuni eshudok douk shenek enenyenen um sabagwiruh iri, shuni eshudok douk apa shenek wehrur um iri, shuni eshudok douk shabo kupaishi shagok iri, shuni eshudok douk shenek lotu um madae adurimi god omi iri uwe, shuni ihishmorim arpeshe douk esheship urkwip panawasham um ehudok aih um shunek rohwa um kupaishi arpeshe um aria shagipesheh shenekeh iri, eshesh ta mare shuwish abrudok wabur, uwok. Eshesh ta shupeik aduk.

<sup>16</sup> Aria douk eik Jisas yeshopoku enyudok eikin ensel nyanakumogu ipak aria nyakripep um enyudok enenyenen douk nyetem okwudok buk iri um ipak Iruhin ananish arpeshe. Eik douk Devit ananin barhonin douk yakitaki ananip awirop iri. Aria eik douk okwudok unuk douk kwanahwar um shuduwi kwatrun abom iri.”

<sup>17</sup> Aria Iruhin ananin Mishin nyani Nugaen Sipsip enyenyik irohukwik<sup>22:17</sup>shakri, “Yowi!” Aria eshudok arpeshe douk shumnek enyudok barae iri shopunek ta shukri, “Yowi!” Aria eshudok arpeshe douk abar baesh iri ta shunaki aria shuwok abrudok abar douk ta arpeshe shubroh aria shupe wosik abom ihih nyumneh iri. Ababar Iruhin ta nukeshabar meyo. Eshesh ta mare shutorabar, uwok.

### *Nyagiguk Iri Baraen*

<sup>18</sup> Aria eik Jon yakri ikripesh enyudok dodogowinyi barae ihishmorim arpeshe douk shemnek Iruhin ananin barae douk nyetem okwudok buk iri. Enyudok barae douk nyakrium eneshenesh eshudok douk ta shutogur iri. Barae enyudok. Ta enen arpen nyuwem enen kupainyi barae shopunek um enyudok barae douk eik yenyem nyetem okwudok buk iri um, Iruhin ta nunek yoweishi abom eshudok shutogrumen namudok. Eneshenesh yoweishi eshudok douk okwudok buk kwakriyesh iri ta shunek arpeshe shumnek debeiri eriger iri, Iruhin ta wata nenekesh um enyudok arpen

<sup>22:17</sup> <sup>22:17</sup> Enyudok barae um Nugaen Sipsip enyenyik irohukwik douk nyakri wobuwobren barae um Iruhin ananish arpeshe.

enyenyin yoweinyi poe aria ta shutogurum enyen atin. <sup>19</sup> Aria shopunek, ta enen arpen nyukri nyukutukuk enen Iruhin ananin barae douk eik yenyem nyetem okwudok buk iri um, Iruhin ta mare nukri wosik um enyen nyunak nyuwish nyunadi anep shuruwep douk peir enyudok rowog douk ta arpeshe shupoh aria shupe wosik abom ihih nyumneh iri, uwok. Aria enyen ta mare nyuwish nyupe abrudok ananibur yopuburi wabur douk barae nyetem okwudok buk iri nyakri-abur iri.

<sup>20</sup> Aria anudok arman douk nakripap um ihishmorim eneshenesh eshudok douk shetem okwudok buk iri nakri, “Adur atin, eik douk hurukatin um inaku!”

Adur, Debeini Jisas, nyak nyunaki!

<sup>21</sup> Aria eik yakri Debeini Jisas nini ipak ihishmorim Iruhin ananish arpeshe pupe aria nutaurumep meyo. Adur.

## BAUGENYUM ENEN BARAEN NYAPE ARPESHIN NUPELA TESTAMENT IRI

### Aposel

Amam aposel amam douk amudok 12-poreim douk Jisas nograiham aria nakam dadag aria neshopokam hanak henek ananin mour iri. Enyudok nyeigur aposel douk shopunek shohwar Pol. Um maresh? Anan shopunek douk narao Iruhin ananin dadag aria nenek Iruhin ananin mour kabi amam 12-poreim aposel um. Enyudok nyeigur aposel douk seiwok eshesh shopunek showhar kupaimi Kristen shopunek douk henek Iruhin ananin mour iri.

### Baptais

Enyudok baraen nyakri eshesh Kristen shenekeh iri aih um sheshurokuh abar um. Baugenyum baraen um ehudok aih douk nyape 1 Pita 3:21. Arpeshin baraen apak makri shenek baptaisumesh um.

### Bielsebul

Bielsebul anan douk debeinari um sagabehos iri. Aria ananin kupainyi nyeigur douk Satan. Tik Matyu 12:24, 26, 27; Mak 3:22, 23.

### Disaipel bilong Jisas

Enyudok baraen disaipel nyakri eshesh Jisas ananish arpesh douk nanabreshesh um ananin baraen nyani aih um shupe um shusuhwen dadag shugipeshen namudok atin iri.

### Ensel

Eshesh enselahos douk madae arpesh meyo uwe, uwok. Eshesh kabi douk yopishi mishish um. Eshesh douk Iruhin nenekesh um shunek ananin mour. Aria sabaihi nyumneh anan apa neshopokesh sharauri ananin baraen shanaki. Aria eshesh apa shataurum Iruhin ananish arpesh wosik abom. Tik Hibru 1:14.

### Farisi

Amam Farisi amam douk eshesh Juda esheshim debeimi. Amam douk hakri wosik um hunek lotu aria

hagipesh enyudok lo seiwok Iruhin nakaguk Moses enyi hasuhwen dadag hagipeshen. Seiwok amamim yamehem douk henek skulumesh um amamin lo atin. Aria amam Farisi douk hagipesh enyudok baraen abom aria hakri enyudok lo douk kabi Iruhin ananin baraen um. Amam hagipesh amam profet hatogur hagiguk um Moses ananib nyutab iri amamin baraen. Amudok profet douk howem Iruhin ananin baraen douk anan nakripamen iri nyetem buk.

### Glori

Enyudok baraen glori nyakli Iruhin ananin dadag nyani agundok anan natrugun abom um.

### Haus lotu bilong ol Juda

Enyudok baraen haus lotu bilong ol Juda, baugenyum douk nyakri eshesh Juda shape sheyagwreh baraen ogwi urusag.

### Hel

Enyudok baraen hel nyakri yowiburi wabur nyih hapenyabur iri.

### Israel

Jekob, douk Aisak ananin nuganin narao namunyi nyeigur Israel (tik Stat [Genesis] 32:24-30, 35:9-15) arigaha kweipon ananim 12-poreim nugamim hakwarum eshudok ihishmorim arpesh Israel hatogur ihishmorim arpesh Israel esheshim yamehem popehem. Seiwok abudok nyutob eshesh Israel shanak shape abudok amnab Kenan abi nyutab, eshesh shohwar esheshig nahobig douk Israel. Aria arigaha abudok nyutob King Solomon natogur aria nagok abi nyutab eshesh Israel shanodiyagor shatogur biagos nahobigos. Abudok nyutob, abudok amnab hape not um shahwarab Israel aria kupaigi nahobig gape saut iri shohwarag Juda. Aria arigaha eshesh Asiria shanaki shanunu agudok nahobig aria shorao eshesh Israel shanak kupaigosi shokugosi nahobigos aria eshesh Israel esheshig nahobig yoweg abom Jurug. Aria eshesh eshudok arpesh shape shokugi nahobig Juda

iri eshesh shopunek enesh Israel. Namudok aria abudok nyutab eshesh Asiria shanunu eshesh Israel abi, enesh arpes shape Juda iri shahwar esheshig shokugi nahobig enyudok nyeigur Israel.

#### Jordan

Worub Jordan bape agudok nahobig Israel eshesh Juda shape um. Abudok worub douk Jon nenek baptais um Jisas um.

#### Katim skin

Ehudok aih um amam Juda hatah yegeshiweruh um douk hape kabi enen kak um enyudok adurin atinyi baraen kontrak Iruhin nakrip eshesh Israel en. Amam hatah amamim nugamim amamiruh yegeshiweruh abudok nyutab amakeniyu womubuki aria 8-poreih nyumneh hadiyomuk um.

#### Kingdom bilong God

Enyudok baraen nyakri Iruhin atun nape debeini um ananish arpes nataurumesh um. Tok Pisin nyakri kingdom bilong God o kingdom bilong heven. Aria baugenyum baraen nyakri Iruhin nape debeini um ananish arpes nataurumesh um. Aria douk enen baraen um kingdom bilong God baugenyum nyakri iruh heven um, apak Arpes meygwreh Arpesin baraen iri ta mukri agudok Iruhin ananish arpes shape um.

#### Kontrak God i wokim

Enyudok baraen nyakri adurin atinyi baraen kontrak Iruhin nakrip eshesh Israel en. Enyudok baraen nyakri dodogowinyi baraen Iruhin nakrip eshesh Israel um shumneken ari shugipeshen. Aria Iruhin ta mare nukri uwok um enen kupainyi baraen. Enyudok atin baraen ta nyupe abom ihih nyumneh.

#### Krais

Enyudok baraen Krais baugenyum douk bien baraen. Enen nyakri nyeigur kabi douk anan arman ananin nyeigur o enen kupainyi nyeigur shopunek um. Aria enesh shohwar Jisas shakri Jisas Krais. Aria

enen nyakri Mesaia, anudok arman seiwok Iruhin nograihan neshopokon nanamori nurao arpes iri. Anudok arman douk nanaki apakib amnab um nurap mutanam mupe wosik abom iri.

#### Pikinini sipsip

Enyudok baraen nyakri nugan sipsip kabi sabaishi sipsip eshesh Juda esheshim pris haesh henek ofamesh haka Iruhin um nukweshih esheshish yoweishi inahos. Aria baugenyum enyudok baraen pikinini sipsip douk nyakri Jisas Krais atun douk nenek ofa nakan anan kanak Iruhin atuh nyumnah meyhoh um nator apakish yoweishi inahos menekesh iri.

#### Ol man Livai

Baugenyum enyudok baraen um amam Livai douk nyakri namudok. Apudok awirop Livai douk anudok atun yamenon Livai nokwarumom iri. Aria Livai anan kanak douk Jekop ananin nuganin. Seiwok amam Livai henek Iruhin ananin mour heyoh atudok selit urupat eshesh Juda apa shawish shape shenek lotuatari. Aria eshesh Juda shanak sharao esheshig nahobig Israel um, amam Livai henek mour hataurum amam pris numun Iruhin ananit debeiti urupat gani Jerusalem. Aria anam hataurum amam pris ihigun um eshesh Israel shape um shopunek.

#### Maunten Oliv

Enyudok baraen nyakri anag mihig sabaisi rowos sonohwarum oliv iri setu um. Agudok mihig douk gape harakatin um Jerusalem.

#### Mirakel

Enyudok baraen nyakri Iruhin atun neneken iri mour. Arpes madae dodogowish um shunek anyudokumori mour uwe, uwok. Iruhin atun apa neneken.

#### Pasova

Seiwok eshesh Juda shape shakamum eshesh Isip shenekumesh mour meyhoh. Eshesh Juda shape shenek debeinyi mour roubi nyutab. Arigaha aria Iruhin naturish nenek gihaumesh aria nakripesh

dodogowinyi barae eshesh Isip um shukwashihesh shukutishuk shunak meyoh. Aria eshesh Isip shakkri uwok um shumnek Iruhin, aria Iruhin nakrip ananish arpesh eshesh Juda um eshesh shokusi awiros sisig atin shubo atin atin nugain sip-sip aria shuwayok owishibor wobur wobur witog um esheshig urusag. Iruhin nakri shunekesh namudok um abudak nyutab ensel nyanaki nyobo eshesh Isip esheshim nugamim hugok aria nyunaki nyutik abrudok owishibor aria nyishagrakuk eshesh Juda esheshim nugamim nyunak aria amam hupeik wosik. Aria enyudok ensel nyanaki nyeshagrakuk Juda esheshim nugamim aria nyanak nyabo eshesh Isip esheshim sharik shamubuk iri nugamim hani esheshish mahish sharik sheshubuk iri shagok. Aria Iruhin nataurum eshesh Juda shapeik wosik. Aria douk eshesh shape urkwip porum agundok seiwok Iruhin nataurumesh um aria ihishmorim atin atin kwarahos eshesh apa shenek anagun debeiguni worigun. Aria ahudok nyhumnah shenek worigun ahi douk shohwaroh Pasova.

#### Pentikos

Ahudok nyumnah Pentikos, baugenyum barae nyape namudok. Eshesh Juda shenek anagun debeiguni worigun ahudok nyumnah shohwaroh um Pasova iri. Tik barae nyape iruh douk nyakri enen barae um Pasova. Eshesh shenek agundok worigun arigaha 49-poreih nyumneh hanakuk, aria hakri um 50-poreih ahi, ahudok nyumnah Pentikos hatogur. Ahudok nyumnah eshesh Juda shanadudareh shenek anagun debeiguni worigun um shanadudareh um Iruhin nataurumesh wosik aria sabaiguni worigun natogur. Tik barae nyape Kisim Bek 23:16, 34:22, Pris 23:15-21, Lo 16:9-12. Ahudok atuh nyumnah Pentikos eshesh Kristen sharik sharao Iruhin ananin Mishin kabi barae nyape Aposel 2:1-4 nyakri um.

#### Pikinini bilong man

Enyudok barae pikinini bilong man nyakri anudok arman douk natogur adurinyi arpen iri. Aria anam seiwokimi profet douk harao enyudok nyeigur, aria baugenyum enyudok nyeigur douk nyakri Jisas Kraiss atun. Enyudok nyeigur nyakri anan natogur adurinyi arpen kabi apak arpesh um. Aria nyakri anan douk Mesaia, seiwok Iruhin nograehan neshopokan nanamori nurao arpesh iri. Tok ples Inglisin barae o Grikin barae douk eshesh shobeshukuk baugenyum barae um enyudok nyeigur. Aria Arpeshin barae douk nyatogur yopugunum. Enyen nyakri, "Jisas nakri Eik yatogur adurinyi arpen iri."

#### Profet

Amam profet henek Iruhin ananin mour hape hakripesh ananin nyonobeshuk iri barae ihishmorim arpesh. Iruhin ananin Mishin nyawisham nyeyabigam aria hadukem enyudok brain nytem Iruhin ananik kwarik iri Buk.

#### Sadyusi

Amam Sadyusi, amam douk anam Juda. Amam hakri wosik um hunek lotu um Iruhin aria hasuhw Iruhin ananin lo seiwok anan nakaguk Moses iri dadag hagipeshen. Aria enen kumpai barae nyetem Iruhin ananik Buk iri amam madae husuhwen hugipeshen uwe, uwok. Amam hakri uwok-umen. Amam hakri shagok iri arpesh ta mare shikitak shupe, uwok. Amam Sadyusi madae sabaimi uwe, kwaroim meyoh. @PAGE BRK =

#### Saveman bilong lo

Saveman bilong lo nyakri amam henek skulumesh um Iruhin ananin lo iri. Amam saveman bilong lo, amam douk eshesh Juda esheshim debeimi. Hani amam Farisi aria amam Sadyusi. Amam hadukemen wosik abom enyudok lo seiwok Iruhin nakguk Moses iri nyani enyudok ihinyumorim barae nyetem Iruhin ananik kwarik iri Buk Olpela Testamen, aria henek skulumesh ihih

nyumneh.  
 Tempel  
 Enyudok baraden tempel nyakri Iruhin  
 ananit debeiti urupat tatau Jerusalem  
 iri. Sabaishi Juda apa shanak shenek  
 lotu um anan atudok urupat. Aria  
 shopunek, eshesh apa shenek ofa um  
 eneshenesh eshudok shoko Iruhim.  
 Tok piksa  
 Enyudok baraden tok piksa nyakri enyu-

dok wobu woburen douk baugenyum  
 baraden madae nyutogur wosik uwe.  
 Seiwok Jisas nenek skulum sabaishi  
 arpesh nakripesh wobu woburen atin  
 baraden. Aria anan nani ananim  
 12-poreim atum hape um, anan  
 apa nakripam baugenyum enyudok  
 wobu woburen baraden. Um maresh?  
 Amam shopunek madae hudukemen  
 wosik uwe.